


Ew Testamento:
Chipay Tawkquiztan



New Testament in Chipaya (BL:cap:Chipaya)

Ew Testamento: Chipay Tawkquiztan

New Testament in Chipaya (BL:cap:Chipaya)

copyright © 2009 Wycliffe Bible Translators, Inc.

Language: Chipaya

Translation by: Wycliffe Bible Translators, Inc.

Chipaya [cap], Bolivia

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chipaya

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files dated 29 Jan 2022

baeaa6d6-fcc1-578f-afbd-04a9c5c14184

Contents

SAN MATEO	1
SAN MARCOS	52
SAN LUCAS	83
SAN JUAN	139
HECHOS	181
ROMANOS	232
1 CORINTIOS	254
2 CORINTIOS	276
GÁLATAS	290
EFESIOS	298
FILIPENSES	306
COLOSENSES	312
1 TESALONICENSES	318
2 TESALONICENSES	323
1 TIMOTEO	326
2 TIMOTEO	333
TITO	338
FILEMÓN	341
HEBREOS	343
SANTIAGO	360
1 SAN PEDRO	366
2 SAN PEDRO	373
1 SAN JUAN	377
2 SAN JUAN	383
3 SAN JUAN	384
JUDAS	385
APOCALIPSIS	387

EL SANTO EVANGELIO SEGUN SAN MATEO

¹ Jesucristuqui Davidž majchmajtquiztan, nižaza Abrahamž majchmajtquiztan tjoñitača. Jesucristuž tuqita atchi ejpnacača tinacaqui.

² Abrahamqui Isaacž ejptača. Isaacqui Jacobž ejptača. Jacobqui Judaž ejptača, niž jilanacžtanpacha.

³ Judaqui Fares ejptača, Zaratanpacha. Tamarqui Fares Zara maatača. Faresqui Esromž ejptača. Esromqui Aramž ejptača.

⁴ Aramqui Aminadabž ejptača. Aminadabqui Naasonž ejptača. Naasonqui Salmonž ejptača.

⁵ Salmonqui Booz ejptača. Rahabqui Booz maatača. Boozqui Obedž ejptača. Rutqui Obedž maatača. Obedqui Isaiž ejptača.

⁶ Isaiqui David cjita chawc jilirž ejptača. Davidqui Uriás tjunatan zalžcu Salomonž ejptača.

⁷ Salomonqui Roboamž ejptača. Roboamqui Abías ejptača. Abiasqui Asaž ejptača.

⁸ Asaqui Josafatž ejptača. Josafatqui Joramž ejptača. Joramqui Uzias ejptača.

⁹ Uziasqui Jotamž ejptača. Jotamqui Acaž ejptača. Acazqui Ezequias ejptača.

¹⁰ Ezequiasqui Manasés ejptača. Manasesqui Amonž ejptača. Amonqui Josias ejptača.

¹¹ Josiasqui Jeconias ejptača, niž jilanacžtanpacha. Nii timpuqui Israelit žoñinacaqui preso chjitzatača Babilonia cjita yokquin.

¹² Jalla nekztanaqui Jeconiasqui Salatielž ejptača. Salatielqui Zorobabelž ejptača.

¹³ Zorobabelqui Abiudž ejptača. Abiudqui Eliaquimž ejptača. Eliaquimqui Azorž ejptača.

¹⁴ Azorqui Sadocž ejptača. Sadocqui Aquimž ejptača. Aquimqui Eliudž ejptača.

¹⁵ Eliudqui Eleazarž ejptača. Eleazarqui Matanž ejptača. Matanqui Jacobž ejptača.

¹⁶ Jacobqui Josež ejptača. Josequi María lucutača. Mariiqui Jesúš majtchinča. Nižaza Jesusaqui Yooz cuchanzquita Cristo cjitazakazza.

¹⁷ Tunca pusin atchi ejpnacaž kamta wachquichiča Abrahamž timpuquiztan Davidž timpucama. Nižaza tsjii tunca pusin atchi ejpnacaž kamta wachquichiča Davidž timpuquiztan Israel žoñinacaž Babilonia cjita yokquin preso chjichta timpucama. Nižaza tsjii tunca pusin atchi ejpnacaž kamta wachquichiča Babilonia yokquin chjichta timpuquiztan Cristuž nasta tjuñicama.

JESUCRISTUZ NASTA

¹⁸ Jalla tužuča Jesucristuž nastaqi. Niiž maa María cjitiqui Josižtan zalzjapa kazzintača. Ima lucžtan kamcan ica cjissinča Yooz Espiritu Santuž cjen.

¹⁹ Naaža lucu José cjitaqui Yooz kuczama kamñitača. Niiž tjun María icaž cjen Josequi kuz turwaysi cjissiča. Nekztan jamazit jaljtis pecatča. Kjanacama ultimu jaljtiasaž niiqui, Mariiqui žoñiž chjaawjkatta cjitasača, ana honorchiz.

²⁰ Jalla nuž jaljtis pinsan, Yooz Jilirž anjilaqui wiiquin nižquiz tjonziča, tuž cjican:

—José, Davidž majchmaati, Yooz Espiritu Santuqui am maataka t'icziča. Jalla nižtiquiztan ana jiwjata naatan zalzqui.

²¹ Nižaza majttanaqui, wawž tjuuqui Jesúš cjitaž cjequiča. Jalla niiqui niž wajtchiz žoñinaca ujnacquiztan liwriyaquiča. —Nuž cjichiča anjilaqui.

²²⁻²³ Tuqui timpuquiztanpacha Yooz Jiliriqui profetžquiz chiikatchiča, tuž cjican:

“Tsjaa tunsill turqui icaquiča. Nekztan lucmajch wawa mataquiča. Nii wawaqui Emanuel cjitaž cjequiča”.

Emanuelqui tuž cjiča: učumnacatanča Yoozqui. Nii profetž takucama cumplissiča Jesucristuž nastanaqui.

²⁴ Jalla nekztan Josequi tjaji wajtžcu, Yooz anjilaž mantitacama ojkchiča. Mariatan zalziča. Nižaza persun tjunjapa ricujchiča.

²⁵ Naaža majtz tjuñicama Josequi Mariatan anapan ultimu lucutiñi paasiča. Jalla nižtiquiztan ana zalzi cjichucatača, pero chicapan kamñitača. Wawa majttan, Jesúš cjita tjuužtan tjuuzkatchiča.

2

¹ Belén cjeta wajtquiz nižaza Judea cjita yokquin Jesusaqui majttatača. Nii nacionž chawjc jiliritača Herodes cjetaqui. Jalla nii tuquita timpuquiz jalla tužu watchitakalča. Nii nacionquin Jerusalén cjeta wajtquin tuwanchuctan tsjii kjaž žoñinacaqui irantžquichičha. Mago cjeta žoñinacatača ninacaqui, warawar puntu istutiñi.

² Jerusalén wajtquiz irantžcu pewcpewczičha tuž cjican:

—Uzca nassičha judío žoñinacž chawjc jiliriqui. ¿Jakziqintaya? —jalla nuž cjican pecunchičha. Nižaza cjichičha, —Wejrnacqui tuuna žejlcjan niž nastiquiztan warawara cherchinča. Jalla nižtiquiztan nii rispiti tjonchinča, —jalla nuž cjican mazzičha.

³ Herodes cjeta jiliriqui magonacaž quint'ita nonžcu, ancha pinsamintu apazzičha persun kuzquiz. Nižaza Jerusalén wajtquiz kamñi žoñinacami ancha kuzquiz pinsatča.

⁴ Jalla nekztanaqui nii rey jiliriqui timplu chawjc jilirinaca, nižaza lii tjaajiñi maestrunaca kjawzičha. Ninaczquiz pewczičha:

—¿Jakziqint Cristuqui majtta cjesaya? —jalla nuž cjican pewczičha.

⁵ Ninacaqui kjaazičha tuž cjican:

—Belén wajtquinčha, Judea yokquin. Tsjii profetaqui cjjirchičha, tuž cjican:

⁶ “Judá yokquinčha Belén watjaqui. Jalla nii watjapanča chekanaqui, parti watjanacquistan Judá yokquin. Jalla nekztan tsjii chawc jiliriqui ulnaquičha. Jalla niiqui wejt Israel žoñinacaz mantaquičha; nižaza cwitaquičha”.

⁷ Jalla nekztanaqui Herodes jiliriqui magonaca jamazit kjawzičha. Nekztanaqui zumpacha pewczičha, čjul timpuquiztan nii warawaraqui paristčhaja, jalla nii.

⁸ Jalla nekztanaqui Herodesqui magonaca cuchanchičha Belén watja, jalla tuž cjican:

—Nii Belén watja oka, nižaza nii wawž puntu zumpacha pjurwit'agučha. Wawa watžcuqui, wejtquin mazcaquičha. Wejrmi zakal ojkc pecučha, wawa rispiti.

⁹ Jalla nekztan Herodes jiliriž čhiizinta taku nonžcu, magonacaqui ojkcčičha. Jerusalén watja ulantan, nii tuuna cherta warawaraqui ninacz tučquin wilta okatča. Jakziquin nii wawa želatčhaja, jalla nii juntuñ tsijsičha warawaraqui.

¹⁰ Nii warawara tsijsiž cheržcu, magonacaqui ancha wali cuntintutača.

¹¹ Nekztanaqui kjuya luzcu, wawa cherchičha Marii maatanpacha. Jalla nekztanaqui ninacaqui quillzičha wawa rispitsjapa. Paaz caja cjetžcu, wawžquiz zuma cusasanaca onanchičha, kori, insinzu, mirra. Jalla nuž nii wawžquiz rispitičičha.

¹² Jalla nekztanaqui wiiquin Yoozqui magonaczquiz čhiizinchičha, ana Herodes kjutñi quepajo. Jalla nižtiquiztan persun watja quejpcčičha yekja jicz kjutñi.

EGIPTO YOKQUIN ATIPASSICHA

¹³ Jalla nekztanaqui nii magonacz ojktan tsjii Yooz Jiliriž anjilaqui wiiquin Josežquiz parisiscuquičha. Nekztan tuž cjichičha:

—Zaazna, tii wawa chjicha maatanpacha. Egipto yokquin oka, atipasjapa. Herodes jiliriqui tii wawaž kjuraquičha conzjapa. Jalla nii Egipto yokquin am želaquičha, čjulorot wejrmi amquiz wilta chiyachaja, jalla niicama. —Jalla nuž wiiquin čhiichičha anjilaqui.

¹⁴ Jalla nuž anjilaž čhiitiquiztan Josequi nii orapacha žaazičha. Nekztan wawžtan maatan chjitchičha. Nii weenpacha ulanchičha Egipto yok kjutñi.

¹⁵ Jalla nicju kamchičha Herodes ticzcama. Niiž tuquitanpacha Yooz Jiliriqui profetžquiz čhiikatchičha, tuž cjican: “Egipto yokquiztan wejt persun Maati kjawznacha”. Jalla nii profetž čhiita takuqui cumplissičha.

HERODESQUI JESUSA CONKATZ PECATCHA

¹⁶ Herodesqui kuzquiz tantiyassičha, “Magonacaqui wejtanz burlaskalak” cjican. Jalla nižtiquiztan walja žawzičha. Jesucristo majtta timpu tantiichičha magonacz maziqtiztan. Jalla nuž tantižcu mantichičha Belén wajtquin nižaza nii wajtž tjiyaran tjapa lucmajch wawanaca pizc watquiztan kozzuc conajo.

¹⁷ Jalla nuž cumplissičha Jeremias cjeta profetž cjjirta takuqui.

¹⁸ Tuqui timpuqui Jeremiasqui cjjirchičha, tuž cjican:

“Ramá cjeta wajtquin wali chawc llaqui želaquičha nižaza alto joržtan kaaquičha. Raquel cjitiqui ancha kaaquičha naaža maatinaczquiztan. Ana wira kuztami ch'uj cjequičha. Nižaza naaža maatinacaqui ticziž cjequičha”.

Jalla nuž cjjirchičha Jeremias cjeta Yooz taku paljayñi profetaqui.

¹⁹ Wiruñiqui Herodes cjeta jiliriqui ticzičha. Jalla nekztanaqui tsjii Yooz Jiliriž anjilaqui Josežquin wilta parisiscuquičha wiiquin. Nii oraqui Josequi Egiptuquin tira želatča. Anjilaqui cjichičha:

²⁰ —Zaazna, tii am uza chjicha maatanpacha. Israel yoka quepa. Am wawa conz pecñi Herodes jazic ticzičha.

²¹ Jalla nuž cjen Josequi žaazcu Israel yokquin nii uztan maatan chjitchičha.

²² Israel yokquin Judea provinciquin Arquelao cjita jiliritacha mantiñiqui. Jalla niicha Herodes majchqui. Niiž ejpž puestuquizpacha luzzitacha. Josequi nii quintu zizcu, Judea yokquin kamz jiwjatchicha. Nekztan tsjii anjilaqui wiiquin Josežquiz paljaychicha, Judea yokquiz ana kamažo, antiz Galilea yokquin okažo. Jalla nekztan Galilea yok kjutñi ojkičicha.

²³ Jalla nii yoka irantižcu, Nazaret cjita wajtquiz kamchičicha. Tuquimpuqui Yooz cuntiquiztan chiiñi profetanacaqui mazinchičicha, Jesusaqui “nazareno” cjitazakaz cjequičha, jalla nuž cjican mazinchičicha. Nazaret wajtquiz kamcan profetanacaž chiita taku cumplissičha.

3

JUAN BAUTISTA YOOZ TAKU PALJAYÑI

¹ Niiž wiruñiqui Juan Bautistaqui Judea provinciquin želatčha, ch'ekti yokquin. Yooz taku paljayatčha,

² tuž cjican:

—Kuznacaž campiya. Arajpach Yoozqui waj mantaquičha. Nii timpuqui žcatžinžquičha.

³ Tuquimpuqui Isaías cjita profetaqui Juanž puntuquiztan cjiirchicha, tuž cjican:

“Ch'ekti yokquin tsjii žoñž joraž nonžta cjequičha. Alto jorquiztan tuž cjican chiyaučicha: ‘Tsjii chawjc Jiliriz tjonaučicha. Jaziqum zuma kamañ jic tjaczna. Tsjii jicztakaz ančhuca kuznaca zumpacha azquičha, nižaza zuma ljiitumapanž cje’ ”.

Jalla nuž cjiirtatačha Juanž puntuquiztan.

⁴ Juanž zquitiqui camello cjita animalž chomquiztan watstatačha. Niiž cinturaaqui zkizitachha. Nižaza langosta cjita kolta animalanaca lujlñitachha. Munti misqu'inaca lujlñizakaztačha.

⁵ Walja žoñinacaqui Juanž taku nonžñi tjonñitachha, Jerusalén chawc wajtquiztan, nižaza Judea yokquiztan, nižaza Jordán cjita puj žcatirantan. Walja žoñinaca tjonñitachha.

⁶ Jakziltat niž persun unjaca mazzaja jalla ninacžquiz Juanqui bautissičha Jordán cjita pujquiz.

⁷ Nii tama žoñinacžtanpacha walja fariseonacami, nižaza saduceonacami jalla nii jilirinacami Juanžquin tjonchizakazza bautista cjisjapa. Jalla ninaca cheržcu, Juanqui tuž chiižinchičicha:

—Zkoražtakaz incallñi žoñinaca. Yooz Ejpqui ujchiz žoñinaca wajillaž casticaquičha. ¿Ject ančhucaquiz nii mazzežo? ¿Nii casticu atipžjapa wejtquinž tjonkaya?

⁸ Kuz campiichinčhucžlaj niiqui, zumapankaz kamaquičha, ančhuca campiita kuz kjanapacha tjeezjapa.

⁹ Ančhucqui anaž mit kuzziz porapat chiyasaquičha, tuž cjican: “Wejrnacqui Abrahamž majchmaatinacžquiztanpacha tjoninčha, Yoozqui anaž wejrnaca casticasačha”. Jalla nižta ana chiihiiz waquisičha. Yoozqui tii maznacquiztan žoñiž cjskatasachha, Abrahamž majchmaatinaca cjisjapa.

¹⁰ Ančhucqui tsjii frut muntiztakazza. Ana zuma fruta pookñi muntiqui k'aatztaž cjequičha jir achžtan. Jalla nuž k'aatztiquiztanauqi, ujtaz cjequičha. Jalla nižta irataž ančhucaquiz wataquičha. Ana zuma kamañchiz žoñinaca casticta cjequičha.

¹¹ Wejrqui weraral chiyučha. Kjaztangkal bautisučha, ančhuca kuznaca campiitiquiztan. Tsjiiqui wejt wirquin tjončha. Jalla niiqui Espiritu Santužtanami nižaza arajpach ujžtanami bautisaquičha. Jalla niicha wejtquiztan tsjan juc'ant poderchizqui. Niižquiz atintisjapa anal waquisučha, niž čjyta jeržcu chjojkinimi. Inakaztčha wejrqui.

¹² Ančhucqui trigo zkalažtakazza. Nii tjoñi jiliriqui trigonaca kjojaquičha. Nekztan itzanacami zuma trigumi pjalznaquičha. Nii zuma triguqui ricužtaž cjequičha. Niiž persun kjuyquin majtaž cjequičha. Nii itzanacazti liwjujtaz cjequičha, ana wira tjesñi ujquiz. Jalla nižta irataž ančhucaquiz wataquičha.

JESUSAQUI BAUTISTATACHA

¹³ Niiž wiruñiqui Jesusaqui Galilea yokquiztan Jordán cjita pujquin ojkičicha, jakziquint Juan želatčhaja, jalla nicju. Bautiskatzjapa Juanžquin ojkičicha.

¹⁴ Jesusiž irantitan, Juanqui ana nii bautis pecatčha. Jalla tuž cjichicha:

—Amž wejr bautis waquizičha. ¿Am wejtquiz tjonkaya? ¿Weriz bautista cjisjapaya? —Jalla nuž cjichicha Juanqui.

¹⁵ Nekztan Jesusaqui kjaazičha, tuž cjican:

—Anzikam wejr bautisaquičha. Yooz mantitacama liwjuj cumplis waquizičha učhumqui. —Jalla nuž kjaaztiquiztan Juanqui “iyaw” cjichicha.

¹⁶ Nekztanaquui Juanquui Jesusa bautissičha. Kjazquiztan ulnan, nii orapacha arajpacha cjetzičha. Nekztan Jesusaquui cherzičha Yooz Espiritu Santo palomažtakaz chjiwžquičhi. Jalla niiz juntuñpacha Espiritu Santuquui irantižquichičha.

¹⁷ Nekztanaquui arajpachquiztan tsjii jora paljayžquičhi nonzičha, jalla tuž cjiñi:

–Tiičha wejt ultim k'ayi Maatiquui. Tiiž cjen ancha cuntintutčha wejrquui. –Jalla nuž cjičhičha nii tsewctan chiizquičhi joraquui.

4

JESUSAQUI DIABLUZ YANZTA

¹ Jalla nekztanaquui Jesusaquui Jordán cjita pujquiztan ojkičhičha. Nuž okan, Espiritu Santuquui Jesusa chjitchičha ch'ekti yokquin, Satanás diabluz yanzta cjisjapa. Satanasuquui Jesusa ujquiz tjojtskatz pecatčha.

² Jalla nijwc žejlcan, Jesusaquui pusi tunc tjuñi pusi tunc arama ana čheri lujlchičha. Jalla nii pusi tunc tjuñi wattiquiztan ancha čheri eecskatchičha.

³ Jalla nekztanaquui diabluquui Jesusižquiz macjatchičha ujquiz tjojtskatz yanzjapa. Jalla tuž cjičhičha:

–Amquui ultim Yooz Maatimžlaj niiquui, tii maznacquiztan t'anta tuckatalla.

⁴ Jesusaquui kjaazičha, tuž cjican:

–Cjijrta Yooz takuquui tuž cjičha: “Zoñinacaquui anaž čheržtan alaja žetasačha. Yooz takučha chekanaquui, jalla niičha ultim čherižtakazquui”. Jalla nuž kjaazičha Jesusaquui.

⁵ Jalla nekztanaquui diabluquui Jesusa chjitchičha Jerusalén, Yooz illzta chawjc watja. Jalla nicju timplu tsewcta pjurniguin yawkatchičha.

⁶ Nekztan diabluquui cjičhičha:

–Cjijrta Yooz takuquui tuž cjičha:

“Yooz Ejpquui niiz anjilanaca mantaquičha am cwitajo. Ninacz persun kjaržtan am cwaitačhičha, ana am kjojcha chjojričta cjeajo mazquizimi”.

Jazic, ultim Yooz Maatimžlaj niiquui, tsewctan kozzuc tii yokquiz layzca. –Jalla nuž cjičhičha nii diabluquui.

⁷ Nekztanaquui Jesusaquui kjaazičha tuž cjican:

–Cjijrta Yooz takuquui zakaz cjičha: “Zoñiquui ultim arajpach Yooz ana inakaz nuž yanznaquičha”. Jalla nuž cjičhičha.

⁸ Jalla nekztanaquui wilita ujquiz tjojtskatz yanzjapa, diabluquui Jesusa chjitchičha pajk cur puntiquin. Jalla niwjc chjitzcu, diabluquui tjapa tii muntuquiz žejlñi nacionanaca nižaza tjapa ninacz cusasanacžtanpacha, nižaza tjapa ninacz honoranacžtanpacha jalla ninaca diabluquui Jesusižquiz tjezičha.

⁹ Nekztan nii diabluquui cjičhičha:

–Tjapa tinaca amquiz tjaasačha, wejtquizim quillzaja, nižaza wejr rispithaja, niiquui.

¹⁰ Jalla nižtiquiztan Jesusaquui kjaazičha, tuž cjican:

–Satanás, wejtquiztan zaraka amquui. Cjijrta Yooz takuquui tuž cjičha: Yooz Jiliržquinkaz rispita, nižaza nii alaja sirwa. Niikazza am Yooz Jiliriquui.

¹¹ Jalla nuž Jesusiž chiitiquiztan diabluquui Jesusižquiztan zarakchičha. Nekztan tsjii kjaz anjilanacaquui Jesusižquin atinti tjonchičha.

JESUSAQUI GALILEA YOKQUIN OJKCHICHA

¹² Niiz wiruñaquui Jesusaquui quinto nonchičha, Juan carsilquiztačha, jalla nii. Jalla nii quinto nonžcu, Galilea yokquin ojkičhičha.

¹³ Pero Nazaret wajtquin ana kamchičha; antis Capernaum wajtquin kami ojkičhičha. Capernaum watjaquui kot atquiztačha, Zabolón yokquin nižaza Neftalí yokquintačha.

¹⁴ Jalla nuž ojktiquiztan Isaías profetaž cjičhičha taku cumplissičha.

¹⁵ Jalla tuž cjičhičha Isaías profetaquui:

“Zabolón, nižaza Neftalí, am yokaquui kot atquizza, nižaza jiczquizza Jordanquiztan tuwanchuc. Nižaza Galilea yokquinčha. Jalla nii Galiliiquinaquui yekja wajtchiz zoñinacaž kamčha.

¹⁶ Am yokquin žejlñi zoñinacaquui zumchiquiz kamčha, ana zuma kamañquiz. Ninacaquui tsjii zoñi cheraquičha. Nii zoñiquui zuma kamaña tjeznaquičha, zuma kjanažtakaz. Ticzi zoñinacažtakaz kamčha; anaž Yooz kamaña zizza. Pero kjanapachaž Yooz zuma kamaña tjezta cjequičha.”

¹⁷ Jalla nekztanaquui Jesusaquui Yooz puntu kjanzt'i kallantichičha, tuž cjican:

–Kuznaca campiya. Arajpach Yooz waj mantaquičha. Jalla nii timpluquui žcatzinžquičha. –Jalla nuž paljayčhičha.

¹⁸ Jesusaqui Galilea cjeta kot at tjiyaranž okatča. Jalla nuž ojkcان pucultan jilazullca zoñinaca cherchiča. Tsjiiqui Simón cjitatača, nižaza Pedro cjitazakzatača. Tsjiiqui Andrés cjitatača. Jalla ninacaqui ch'iz tanñinacatača. Nii oraqui ninacaqui ch'iz tanz kjazquiz tjojtsi želatča.

¹⁹ Jalla ninaczquiz Jesusaqui tuž cjican paljaychiča:

—Wejttan chica ojklayñi cjee. Jaknuž ch'iz juntichamžlaja, jalla nižta irata ančhucqui Yooztajapa zoñinaca juntaquiča.

²⁰ Jalla nuž chiitiquiztan nii pucultan zoñinacaqui nii orapacha ch'iz tanz eccu, Jesusižtan chica ojklaychiča.

²¹ Jalla nekztanaqui tsjii koloculla najwcjapa ojkcžcu Jesusaqui tsjii pucultan jilazullca zoñinaca cherchizakazza. Tsjiiqui Jacobo cjitatača. Tsjiiqui Juan cjitatača. Zebedeoz majhtača. Niiž ejpžtanpacha warcuquiz želatča, ch'iz tanz azquichcan. Jalla nii cheržcu, Jesusaqui ninaca kjawziča.

²² Nekztan nii orapacha warcumi niž ejpmi eccu, Jesusižtan chica ojklaychiča.

ZOÑINACA JESUSA APZA

²³ Tjapa nii Galilea cjeta yokaran ojklaychiča, zapa ajcz kjuyquiz Yooz puntu tjaajincan. Nižaza paljaychiča, Yooziž mantita zoñinacaž cjee, cjican. Nižaza tjapaman laanaca čhetinchiča.

²⁴ Jesusiž ojklayta, jalla nii quintuqui tjapa Siria yokquin ojkcchiča. Jalla nižtiquiztan, tjapaman conchiz zoñinacami, nižaza tjapaman laa ayiñi zoñinacami, nižaza zajraž tanta zoñinacami, nižaza t'ucur zoñinacami, nižaza ana ojklayi atñi zuch zoñinacami, tjapaman laanaca Jesusižquin chjitzatača. Nekztanaqui Jesusaqui nii laanaca čhetinchiča.

²⁵ Galilea zoñinacaqui nižquin walja apžquichiča, nižaza Decápolis watjanacquiztan zoñinacami, nižaza Jerusalén wajtquiztan zoñinacami, nižaza Judea yokanacquiztan zoñinacami, nižaza Jordán puž tuwanchuctan zoñinacami. Tjapa nii zoñinacami jalla nuž Jesusa apziča.

5

JECTNACAT CUNTINTU ZOÑINACA

¹ Walja tama zoñinaca cheržcu, Jesusaqui tsjii kolta curulla yawchiča. Jalla nekztan nii curullquin julziča. Nižaza niž kjawžta zoñinacaqui niž muytata ajczčiča.

² Jalla nekztan Jesusaqui ninaczquiz tjaajñi kallantichiča, tuž cjican:

³—Jecnacat “wejrqui ujchizpanča” cjican persun kuzquiz sint'ichaja, jalla ninacaž Yooz wajtchiz zoñinaca cjequiča. Nekztanqui cuntintuž cjequiča.

⁴ Jecnacat persun ujquiztan llaquita žejlčhaja, jalla ninaczquiz Yoozqui kuznaquiča. Nekztan cuntintuž cjequiča ninacaqui.

⁵ Jecnacat humilde kuzziz cječhaja, jalla ninaczquiz Yoozqui irinsaž tjaaquiča, ew yoka. Nekztan cuntintuž cjequiča.

⁶ Jecnacat Yooz kuzcamakaz kamz ancha pecčhaja, jalla ninaczquiz Yoozpanž zuma kamzjapa yanapaquiča. Nekztan cuntintuž cjequiča.

⁷ Jecnacat parti zoñinacztaajapa oksñi kuzziz cječhaja, jalla ninaczquiz Yoozqui zakaz oksnaquiča. Nekztan cuntintuž cjequiča.

⁸ Jecnacat ancha zuma kuzziz cječhaja, jalla ninacaqui Yooz cheraquiča. Nekztan cuntintuž cjequiča.

⁹ Jecnacat pasinsis kuzziz kamñi cječhaja, jalla ninacaqui Yooz maati cjetaž cjequiča. Nekztan cuntintuž cjequiča.

¹⁰ Jecnacat Yooz kuzcama kamtiqiztan chjaawjta sufrachaja, jalla ninacaž Yooz wajtchiz zoñinaca cjequiča. Nekztan cuntintuž cjequiča.

¹¹ Jecnacat weriž cjen zoñinacaž chjaawjta cječhaja, nižaza kijčta cječhaja, nižaza tjapaman toscar tawkžtan quintra ch'aanita cječhaja, jalla ninacami cuntintuž cjequiča.

¹² Jecnacat weriž cjen jalla nižtanaca sufrichi cječhaja, jalla ninaczquiz Yoozqui arajpachquin wali pajk honora tjaaquiča. Jalla nižtiquiztan tii muntuquiz kamcan, cuntintukaž cjee. Ančhucqui cjuñzna. Yooz cuntiquiztan chiiñi profetanacaqui nižta zakaz sufrichiča tuqui timpuquiztanpacha.

CRICHINACZ PUNTU

¹³ Jesusaqui tjaajinchizakazza:

—Ančhucqui tii muntuquiz kamcan yacu cuntažtakazza, parti zoñinacztaajapa. Pero yacuqui lak'az cjesaž niiqui, žkjažpant wilta walipan cjisnasajo? Anapanž cjesača. Nekztan anaž čjuljapami sirwasača; tjojttapanž cjesača; nekztan zoñinacaž tječtaž cjequiča.

¹⁴ Ančhucqui tii muntuquiz kamcan, parti zoñinacztajapa kjana cuntažtakaz cjesača, zuma kamaña zizajo. Tsjii curquiz kjuyta watjaqui, ana chjojžta cjesača.

¹⁵ Tsjii lamparaqui tjeežtaž cječhaj niiqui, anapanž cajón koztan nonžta cjesača. Lamparaqui tjeežtaž cječhaj niiqui, tsewc tsjijptapanž cjesača, tjapa nii kjuyquiz žejlñi zoñinacztajapa kjanajo.

¹⁶ Jalla nuž ančhucqui lamparažtakaz cjee, zoñinacztajapaqui. Kjanapacha zuma kamañchiz cjee. Nekztan zoñinacaqui ančhuca zuma kamaña cheržcu, ančhuca arajpach Yooz Ejpžquin honora tjaaquičha.

LII PUNTU

¹⁷ Jesusaqui tjaajinchizakazza:

–Wejrqui ana tjonchinča Moisés lii tjtanskatzjapa, nižaza profetanacaž tjaajintanaca tjtanskatzjapami. Jalla nižta anaž pinsa ančhucqui. Wejrqui ana tjonchinča nii tuquita Yooz tjaajintanaca tjtñiqui; antis tjonchinča cumpliskatzjapa.

¹⁸ Weraral chiižinuča. Tuquita Yooziž tjaata liiquiztan tjapa puntumi tjapa letرامي anaž tjtanta cjequičha, tjappacha cumpliscama. Ima tii muntumi arajpachami tucuzinžnan, nii liiqui anapanž tjtantaž cjequičha.

¹⁹ Jalla nižtiquiztan jequit tuquita Yooziž tjaata liiquiztan tsjii mantita, kolta lii cjenami, ana pajz pecčhaj niiqui, nižaza yekjap zoñinacžquiz nižtapacha tjaajinčhaja, jalla nii zoñiqui arajpach Yooz wajtquin anaž čjul honorchiz cjequičha. Pero jequit nii tuquita lii mantita cazačhaja, nižaza yekjap zoñinacžquiz nižtapacha tjaajinčhaja, jalla nii zoñiqui arajpach Yooz wajtquin chekan honorchiz zoñiž cjequičha.

²⁰ Ančhucaquiz wejr chiižinuča. Lii tjaajiñi maestruncami, nižaza fariseo zoñinacami žejlča. Pero ančhucqui ninacžquiztan anaž juc'anti Yooz mantitacama kamačhaj niiqui, anapanž arajpach Yooz wajtquin luzasača. Yooz mantitacama kamstanča, arajpach Yooz wajtquin luzjapa.

ZAWJZ PUNTU

²¹ Jesusaqui tjaajinchizakazza:

–Ančhucqui tuquita atchi ejpnacžquiztan tuž nonzinčhucča. Ninacaqui cjiñitača, tuž cjian: “Anača zoñi conzqui. Jequit zoñi conačhaja, niiqui juzjitaž cjequičha”.

²² Pero wejr chiižinuča, jequit tsjii jilžjapa žawjwachaj niiqui, jusjitaž cjequičha. Nižaza jequit tsjii jilžtan ch'aachaj niiqui, Junta Suprema cjita chawjc jilirinacaž jusjitaž cjequičha. Nižaza jequit tsjii jilžquiz “ana zumamča” cjian ch'aančhaj niiqui, infiernuquin chjatkattaž cjequičha.

²³ Nižaza tii puntu zakal cjeeča. Jequit niž ofrenda Yooz yujcquin chjichačhaj niiqui, nižaza chjichcu niž jilžtan quintra tanasta cjuñsnačhaj niiqui,

²⁴ jalla nekztan ima ofrenda tjaacan, nii timpluquizpacha ecla. Nekztanaqui niž jilžquin pertuna mayiza ojkla. Nižtan jilžtan walikaz cjila. Jalla nekztanaqui timpluquin quejpžcu, ofrenda Yoozquin tjaasača.

²⁵ Jequit am quintra quijchi cječhaj niiqui, nižaza jilirž kjuya chjichačhaj niiqui, jalla nii quijchi zoñžquiz pertunam mayizaquičha ana enenzcu, ima jilirž kjuya irantican. Pertunaza cjequiz niiqui, anam juez jiliržquin intirjita cjequičha jusjita cjisjapa. Amqui ultimpacha juez jiliržquin intirjita cjesaž niiqui, nii juez jiliriqui am tsjii policiiquin zakaz intirjasača; carsilquiz chawjctam cjesača.

²⁶ Weraral chiižinuča. Carsilquiz chawjctam cjesaž niiqui, anam ulanasača, liiw pacañcama.

ADULTERIO PUNTU

²⁷ Jesusaqui tjaajinchizakazza:

–Ančhucqui tuquita atchi ejpnacžquiztan tuž nonzinčhucča: “Anača adulteriuquiz ojklazqu”.

²⁸ Pero wejrqui tuž chiižinuča, jakzilta luctakat yekja maataka “wejt maatakaj cjejaa” cjian pinsičhaja, jalla niiqui persun kuzquiz niwjctanaqui adulterio paachizakazza Yooz yujcquiziqui.

²⁹ Am žew latu čhujquiqui ujquiz tjojtskatčhaj niiqui, nii čhujqui leczna, nižaza nawjk tjojtta. Jalla nuž tsjii čhujquiqui pertissi cjenauqui am parti curpuqui ana infiernuquin tjojtta cjesača. Jalla nuž waliz cjesača.

³⁰ Nižaza am žew kjarauqui ujquiz tjojtskatčhaj niiqui, nii kjara pootzna, nižaza nawjk tjojtta. Jalla nuž tsjii kjarauqui pertissi cjenauqui am parti curpuqui ana infiernuquin tjojtta cjesača. Jalla nuž waliz cjesača.

TJUNATAN JALJTIS PUNTU

³¹ Jesusaqui tjaajinchizakazza:

—Ančuca tuquita atchi ejpnacaqui tuž cjiñitacha: “Jecmiž niiz persun tjunatan jaljtasaž niiqui, primiruqui tsjii ultim jaljita cjirra papel certificado tjaasa”.

³² Pero wejrqui tuž chiižinuča, jakziltamiž persun tjunatan jaljtasaž niiqui, nižaza ana čjul adulterio motivo želan, jalla nijwctanaqui naa ultimu jaljita tjunqui adulterio cjskatasacha. Nižaza jakziltami naa ultimu jaljita tjunatan zalznačaj niiqui, adulterio upjanž paacha.

JURAMENTO PUNTU

³³ Jesusaqui tjaajinchizakazza:

—Nižaza ančhucqui tuquita atchi ejpnacžquiztan tuž nonzinčhucča: “Anača toscar tawkžtan juramento paazqui. Juramento paaquiž niiqui, tjapa nii juramentužtan compromitta takupanž cumplisnaquiča Yooz yujcquiziqui”.

³⁴ Pero wejrqui tuž chiižinuča, anaž čjulquiztanami juramento paasača, werara chiižpanča. Nižaza anača “arajpacha zizza” cjican juramento paazqui. Yooztajapača arajpachaqui.

³⁵ Nižaza anača “tii yoka zizza” cjican juramento paazqui. Yooztajapača tii yokaqui. Nižaza Jerusalén wajtž tjuu aynakkan anača juramento paazqui. Chawjc Yooz Jiliržtajapača nii watjaqui.

³⁶ Nižaza anača “wejt persun acha zizza” cjican juramento paazqui. Amqui anam zinta tsok charquiztan chiw charquin tuckatasacha. Nižaza anam zinta chiw charquiztan tsok charquin tuckatasacha.

³⁷ Jalla nižtiquiztan, “Jesalla” cjicanaqui, “Jesalla” cjispanča; nižaza “Anaž” cjicanaqui, “Anaž” cjispanča. Zajra diabluz cjen juramento paazqui žejlča.

ANA WALI TJEPUNTA PUNTU

³⁸ Jesusaqui tjaajinchizakazza:

—Ančhucqui tuquita atchi ejpnacžquiztan tuž nonzinčhucča: “Tsjii zoñiqui yekja zoñž čhujqui pjatžinasacha, nekžtan nii pjatži zoñž čhujqui pjatžintazakaz cjesacha. Nižaza tsjii izke chjatkatžinasaz niiqui, nii chjatkatži zoñž izke chjatkatžintazakaz cjesacha”.

³⁹ Pero wejr chiižinuča, anača kijtžni zoñiqui nižtapacha kijtžqui. Nižaza am quintra tsjii yujc latu kijchasaž niiqui, kijchta cjskazza, tsjii yujc latužtanpachami.

⁴⁰ Nižaza jakziltamiž am tanžcu am almilla kjanž pecčaj niiqui, kjañaj cjskazza, irztanpachami.

⁴¹ Jakziltamiž niiz kuzi tsjii tupucama, amquiz chjitskatasaz niiqui, juc'anti tupucama chjichna.

⁴² Jakziltamiž amquiztan mayasaž niiqui, tjaa amqui. Nižaza jakziltamiž amquiztan tomžni tjonasaž niiqui, onzna amqui.

QUINTRA ZOÑINACŽTANAMI ZUMA MUNAZIZA

⁴³ Jesusaqui tjaajinchizakazza:

—Nižaza ančhucqui tuquita atchi ejpnacžquiztan tuž nonzinčhucča: “Mazinacžtan zuma munaziza. Nižaza am quintra zoñinacžtan chjaawjkata”.

⁴⁴ Pero wejr chiižinuča, am quintra zoñinacžtanami zuma munaziza. Nižaza am quintra laykiñi zoñinacžtajapa zuma kuztan Yoozquiztan maynaquiča. Nižaza am quintra chjaawjkatži zoñinacžquin zumapan paa. Nižaza am quintra ch'aañinacžquinami kichñinacžquinami zumapan Yoozquiztan mayt'izina.

⁴⁵ Jalla nuž zuma kamcan ančhucqui tjeeža, arajpach Yooz Ejpž maatičhucča, nii. Yoozqui zuma zoñinacžquizimi ana zuma zoñinacžquizimi liwj tsjiikaz niiz paata tjuñi tewkkatcha. Nižaza niž kuzcama kamñinacžquizimi nižaza ana niiz kuzcama kamñinacžquizimi tjapa ninacžquiz chijñi apayžquiča.

⁴⁶ Ančhucqui persun okžni zoñinacžquizkaz okznaquiž niiqui, jalla nuž paatiquiztan čehjul premio Yoozquiztan tanznaquejo? Jalla nižtazakaz kamča ana wali impuesto cobriñinacami.

⁴⁷ Nižaza ančhucqui persun jilanacžquizkaz tsaanaquiž niiqui, jalla nijwctan čehjul zumaž ančhuc paajo? Jalla nižtazakaz paacha ana Yooz pajñinacami.

⁴⁸ Ančhucqui walja zuma kuzziz kama, jaknužt ančhuc arajpach Yooz Ejp walja zuma kuzzizpančhalaja, jalla nuž.

6

ZUMA KAMZ PUNTU

¹ Jesusaqui tjaajinchizakazza:

—Ančhucqui anača persunpacha honorchizkaz cjis peczqui. Anača zoñinacž yujcquiz ančuca Yooz custurumpinaca paazqui, zoñinacžquiztan honorchiz cjisjapa. Ančhucž jalla

nuž persun honorchizkaz cjis pecaquiz niiqui, nii honorchiz kaz cjequičha. Ančhuca arajpach Yooz Ejpqui ana iya honora tjaaquičha.

² Ana zum kuzziz zoñinacaqui t'akjir zoñinacžquiz onanžcu zoñi zoñinacžquin mazmazničha, "onanchinčha" nuž cjicanaqui. Ajcz kjuyaranami calliranami jalla nižta paañičha, zoñinacaž ninacžjapa zuma chiyajo. Pero wejrqui weraral chižinučha. Jalla nižta paañi zoñinacaqui nii honorchizkaz cjequičha. Ančhucqui anačha nižta iratapacha kama.

³ Ančhuczi t'akjir zoñinacžquiz onanžcu, jalla nii ančhuca onantaqui anaž jeczquizimi mazmaznaquičha, "onanchinčha", cjicanaqui.

⁴ Nižaza t'akjir zoñinacžquiz jamazit onaquičha. Aunquimi ančhucaž jamazit paachiž cjenami, ančhuca Yooz Ejpqui cherčha. Jalla nuž cheržcu ančhucaquiz kjanacama honora tjaaquičha, tsjii premiužtakaz.

MAYIZIZ PUNTU

⁵ Nižaza nii ana zum kuzziz zoñinacaqui Yoozquin mayizican jalla tuž jutzazničha. Ajcz kjuyquizimi call isquinqizimi tsijtchi Yoozquin mayiziñičha, tjapa zoñinaca cherajo. Wejrqui weraral chižinučha, jalla nuž paažcu ninacaqui nii honorchizkaz cjequičha. Ančhucqui anačha nižta irata mayizizqui.

⁶ Ančhuczi Yooz Ejpžquin mayizizjapaqui, kjuyquiz luz waquizičha, nižaza kjuy chawjcz waquizičha. Jalla nekztan ančhuca Yooz Ejpžquin mayizasachha. Jalla nuž zinalla mayizan ančhucatan chicaž cjequičha Yooz Ejpqui. Jalla nuž jamazit mayizitiqiztan Yooz Ejpqui ančhucaquiz honora tjaaquičha, tsjii premiužtakaz.

⁷ Yoozquin mayizcan, anačha wiltan wiltan takunaca quejžcu quejžcu mayizizaqui. Jalla nuž mayizaquiz niiqui, inapanikazza. Jalla nižtaž mayizza ana Yooz pafñi zoñinacaqui. Jalla nuž wacchi chiican mayizitiqiztan "nonznaqueeka Yoozqui" cjican.

⁸ Jalla nižta anaž ančhuc cjeella. Ančhuca Yooz Ejpqui zizza, čjulut ančhuc pecčhaja, jalla nii. Ima ančhucaž mayizan, panž zizza Yooz Ejpqui.

⁹ Jaziqui ančhucqui jalla tuž mayizaquičha:

"Yooz Tata, amqui arajpachquin žejlčha. Am tjuu honorchiz aptitaj cjlilla.

¹⁰ Nižaza am mantiz tımpu tjonchej cjlilla. Nižaza tii muntuquiz žejlñi zoñinacaqui am kuzcamaj kamlilla. Jaknužt am kuzcama kamčhaja arajpachquin žejlñinaca, jalla nižta.

¹¹ Nižaza tonjiqui čjheri tjaazcalla čjeržtan kamžjapa.

¹² Nižaza wejtnacaž paata ujnaca pertunalla, jaknužt wejrnacqui wejtnaca quintra paañi pertunučhaja, jalla nižaza.

¹³ Nižaza anaž anawalinacžquiz tjojskatalla, antis anawalinacquiztanž liwriyalla. Amčha wiñaya juc'ant mantiñamqui, nižaza amčha wiñaya juc'ant azzizqui, nižaza amčha wiñaya juc'ant honorchizqui. Jalla nužoj cjila. Amén."

¹⁴ Ančhuca quintra paañinacžquiz pertunaquičha. Nekztan Yooz Ejp zakaz ančhuca ujnaca pertunaquičha.

¹⁵ Ančhuca quintra paañinacžquiz ana pertunaquiz niiqui, nekztan ana zakaz Yooz Ejpqui ančhuca ujnaca pertunaquičha.

AYUNAS PUNTU

¹⁶ –Ančhucqui ayunascan anaž llaquit chercherchiz cjee. Ana zum kuzziz zoñinacaqui llaquit chercherchiz ayunasničha, zoñinaca ninaca ayunasni cherajo. Wejrqui weraral chižinučha, jalla nuž paatiquiztan ninacaqui inapanikaz cjequičha.

¹⁷ Ančhuczi ayunascanaqui zumpacha yujcmiz awjzna, nižaza zumpacha achami čhijczna,

¹⁸ zoñinaca ančhuc ayunasni ana nayajo. Yooz Ejpqui ana cherta cjenauqi tjappacha cherčha, jamazit paatami. Yooz Ejpqui ančhucaquiz zuma honoraž tjaaquičha, tsjii premiužtakaz.

CUSASANAC PUNTU

¹⁹ Jesusaqui tjaajinchizakazza:

–Tii muntuquiz kamcanaqui anačha muzpa cusasanaca juntizqui. Kjurinacakaz ančhuca juntita cusasanaca lulaquičha. Nižaza parti ančhuca juntita cusasanaca inapankaz čhijtaquičha. Nižaza tjañiqui kjuyaž luzasachha, ančhuca cusasanaca tjangzjapa.

²⁰ Nonžna, arajpachquin muzpa cusasanaca juntaquičha. Arajpachquin cusasanaca lujlñimi, nižaza cusasanaca akziñimi, nižaza cusasanaca tjangziñimi ana žejlčha.

²¹ Jakziqizt ančhuca cusasanaca juntita žejlčhaja, jalla nicjukaž ančhuc kuz tjaachha.

ZUMA KAMAÑCHIZ, ANA ZUMA KAMAÑCHIZ PUNTU

²² Jesusaqui tjaajinchizakazza:

—Zoñž ċhjujquiqui persun curpuż lamparażtakazza. Jaziqiu zoñž ċhjujqui zuma cjequiz niiqui, zuma cheraquičha. Jalla niżtazakaz zoñž kuzquī zuma cjequiz niiqui, zuma kamaquičha.

²³ Zoñž ċhjujquizti ana zuma cjequiz niiqui, zumċiquiztakaz ojklayaquičha. Anċhuca kamaña zumċiquiz panž cjequiz niiqui, juc'anti juc'anti zumċiquiz cjisnaquičha. Nekztan žaknużt zuma kamasajo?

PAAZ PUNTU

²⁴ Jesusaqui tjaajinchizakazza:

—Anaž jakziltami pizc patruna sirwasaċha. Pizc patrunchiz cjesaž niiqui, tsjii patrunžquiz ana pectaž cjesaċha. Tsjii patrunchiz pectaž cjesaċha. Tsjii patrunchizquizkaz zuma sirwasaċha. Jalla niżtiquiztan Yoozquiz sirwican anaž anċha paazquiz kuz tjaasaċha. Niżaza paazquiz kuz tjaaquiz niiqui, anaž Yoozquin anċha kuzziz cjesaċha.

YOOZ EJPQUI NIIZ MAATINACA CWITICHA

²⁵ Jesusaqui tjaajinchizakazza:

—Anċhucquiz tuž ċhiizinuċha, žejtzjapaqui kjaz liczmi lujlz ċherimi pecċha. Jalla nuž cjenami anċhucquī anaċha kuzquizic ċherquiztan llaquita cjisquī. Niżaza curpu wali cjisjapa zquiti pecċha. Jalla nuž cjenami anċhucquī anaċha zquitzquiztan llaquita cjisquī. ċhjul ċherquiztanami zoñž žetiž juc'anti importiċha. Niżaza ċhjul zquitzquiztanami persun curpuż juc'anti importiċha.

²⁶ Laylayni wežlanacaž chernza. Jalla nii wežlanacaqui ana zkalami ċhjacċha, niżaza ana zkalquiztanami ricujċha, niżaza ana ċheri yaaz zquitchizza. Jalla nuž cjenami anċhuca arajpach Yooz Ejpqui wežlanacžquiz ċheri tjaaċha. Yooz yujcquiziqui anċhucquī ċhjul wežlanacquiztanami juc'antiž importiċha.

²⁷ Anaž jec kolta zoñimi persunpacha tsjan lajcha paki atasacna, llaquiziñi kuzziz cjenami anċha lajcha pecni kuzziz cjenami.

²⁸ Žkjažtquiztan anċhucquī zquitzquiztankaz llaquit kuzziz cjesajo? Plantanaž pjajkjal-laž chernza, jaknużt pajkċhaja, jalla nii. Ninacaqui anaž langza, niżaza anaž kawanċha.

²⁹ Jalla nuž cjenami nii pjajkallanacaqui anċha c'achjallaċha. Finu zquiti cutžcumī ricachu Salomón cjita jiliriqiu anaž juc'ant c'achja nii pjajkallanacžquiztanami.

³⁰ Plantanacaqui tsjii upacamakaz žejlċha. Nekztanaqui jakatažu kattažu jurnuquiz tjutjunzjapa ujttaċha. Jalla niža cjenami Yooz Ejpjpaċha nii plantanaca cwitiċha. Anċhucquī ċhjul plantaquiztanami juc'antipanž importiċha. Jalla niżtiquiztan Yoozqui anċhuc juc'ant cwitiċha, Yoozquin ana tjapa kuzziz cjenami.

³¹ Jalla niżtiquiztan anċhucquī anaċha llaquita kuzziz cjisquī, ċhjul ċherquiztanami, niżaza kjaz liczquiztanami, niżaza ċhjul zquitzquiztanami.

³² Ana criichi zoñinacaqui tii muntu cacasanacžquin kuzziz ojklayċha. Anċhuczi ana niža kuzziz cjeella. Anċhucacċha arajpach Yooz Ejpchizquī. ċhjul takiċha anċhucquī pecċhaj niiqui, liwј zizza Yooz Ejpqui.

³³ Jalla niżtiquiztan Yooz Ejpžquinpankaz walja kuzziz cjee. Niżaza niž mantita zuma kamañquiz kuzziz cjee. Jalla nekztanaqui anċhucaltaqui cawalikaz cjequičha ċhjulumi.

³⁴ Jakatan ċhjulut anawalinaca wataċhaj niiqui, jalla nii ana juyzu paa tonjiqui. Jakaqui ċhjulut wataċhaj niiqui, jakapachaž jaknužquinami wataquičha. Zapuru ċhjul anawalinacaqui žejlñipanċha.

7

ZOÑINACŽTAN ZUMA KAMA

¹ Jesusaqui tjaajinchizakazza:

—Anċhucalaqui anaċha zoñinacž uj ċhiī ċhiizquī. Jalla nuž zoñinacž uj ċhiī ċhiyaquiz niiqui anċhucquī juc'ant ujchiz cjequičha Yooz yujcquiziqui.

² Niżaza zoñinacžquizimi “Amqui Yooziž castictaj cjila”, cjican ċhiyaquiz niiqui anċhucquī Yooziž casticta zakaz cjequičha. Zoñinacžtan zuma kama. Nekztan Yooz Ejpqui anċhucatan zumaž cjequičha.

³ Niżaza amqui am jilž ċhjujquiz tsjii ċjujchilla cherasaž niiqui, žkjažtquiztan am persun ċhjujquiz pajk ċjujċi ana cherjo?

⁴ Am persun ċhjujquiz nii pajk ċjujċi ana cherasaž niiqui, žkjažtquiztan am jilžquiz ċhijo, “jila, am ċhjujquiztan ċjujchilla apakžinaċha”, cjicanajo?

⁵ Ana zum kuzziz zoñimċha amqui. Am persun ċhjujquiztan pajk ċjujċi apakalla. Nekztan zuma cherasaċha, y niżaza am jilž ċhjujquiztan ċjujchilla apakasaċha.

⁶ Yoozquin criichi zoñinaca, anċhucquī Yooz taku anapan nonz pecni zoñinacžtan Yooz puntu ana paljayaquičha. Ninacaqui pacunacaztakazza. Niža zoñinacaqui anċhucaltan

ch'atñi pacuztakaz cjesača. Nižaza nii Yooz taku anapan nonz pecñi zoñinacaqui cuchi-nacažtakazza. Yooz puntu nonžcu, kuzquizkaz žawjča.

YOOZQUIN MAYIZIZQUI

⁷ Jesusaqui tjaajinchizakazza:

–Yooz Ejpžquiztan mayaquiž niiqui, Yooz Ejpqui tjaaquiča. Nižaza Yoozquin kjuraquiž niiqui, Yooz wachaquiča. Nižaza kjuy zanquiztan t'oc t'ocaquiž niiqui, cjetžintaž cjequiča.

⁸ Jequit mayačhaja, risiwaquicha. Nižaza jequit Yoozquin kjuračhaja, wachaquiča. Nižaza jequit kjuy zanquiztan t'oc t'ocačhaja, cjetžintaž cjequiča. Jalla nužuča Yoozquiz mayizizqui.

⁹ Anaž jakziltami ančuca majch t'anta mayanaqui maz chjalznasača.

¹⁰ Nižaza anaž jakziltami ančuca majch ch'iz mayanaqui zkora chjalznasača.

¹¹ Ančhucqui ana zum kuzziz cjenami zuma cusasanaca tjayinčhucča persun maatinacžquiz. Jaziqumi ančuca arajpach Yooz Ejpqui mayñi maatinacžquiz juc'ant zumaž tjaasača.

¹² Jaknužt ančhucqui parti zoñinaca ančhucatan zuma munaziz pecčhaj niiqui, jalla nižtapacha parti zoñinacžtan zuma munaziz waquiziča ančhucqui. Jalla niipan Moisés liiquiz chiichiča, nižaza Yooz cuntiquiztan chiiñi profetanacaž cijrtanacami.

ZKOZ JICZ, PAL JICZ

¹³ Jesusaqui tjaajinchizakazza:

–Yoozquin ojcz pecčhaj niiqui, zkocz zanquiztan luzza. Infiernuquin ojčkñi jicz palača, nižaza pal zanchizza. Jalla nijwchuc ojčkñi zoñinacaqui muzpača.

¹⁴ Tsjiic zakaz žejlča. Arajpachquin ojčkñi jicz zkocača, nižaza zkocz zanallchizza. Nižaza c'ujlculača arajpachquin ojčkñi jiczqui. Jalla nii jiczquinaqui koluckaz zoñi ojčkča.

KAMAÑQUIZTAN PAJTA CJESACHA ZOÑINACAQUI

¹⁵ Jesusaqui tjaajinchizakazza:

–Ančhucqui zumpacha cwitasauquiča toscar taku chiichiñi zoñinacžquiztanami. Jalla ninacaqui “Yooziž tjaata taku chiyuča” cjiñizakazza. Ninacaqui ančucaquiž tjonža, tsjii uuzi zkizi tjtžta kitižtakaz. Ninacž kuzqui anawira zumača.

¹⁶ Ninacž ana zuma kamañquiztan pajtaž cjequiča, ultimu ana zum zoñinacaqui. Tsjii ch'ap muntiqui uwaz frutchiz anaž cjesača. Nižaza tsjii ch'ap plantaqui higo frutchiz anaž cjesača. Jalla nižtapanča ana zum kuzziz zoñinaca. Zuma kamañchizqui anapanž cjesača.

¹⁷ Tjapa zuma muntinacaqui zuma fruta pookñiča. Nižaza tjapa ana zuma muntinacaqui ana zuma fruta pookñiča.

¹⁸ Zuma muntiqui anapanž ana zuma frutchiz cjesača. Nižaza ana zuma muntiqui anapanž zuma frutchiz cjesača.

¹⁹ Jakzilta muntit zuma fruta ana pookzaja, k'atžtaž cjequiča nižaza ujtaž cjequiča.

²⁰ Jalla nižtanacquiztan ančhucqui ana zum kuzziz zoñinaca pajaquiča, ninacaž ana zuma kamañquiztan.

ANA YOOZ WAJTQUIN OJKŃI ZOŃI

²¹ Jesusaqui tjaajinchizakazza:

–Yekjap zoñinacaqui wejtquiz “wejt Jiliri, wejt Jiliri” paljajča. Pero nuž chiicanami, anaž wejt arajpach Ejpž mantuquiz kamaquiž niiqui, anapanž arajpach wajtquin okasača, nižaza anapanž arajpach Yooz Ejpž mantuquiz želasča.

²² Ultim zoñi pjalz tjuñquiziqui wacchi zoñinacaqui wejtquiz paljajajquiča, tuž cjian: “Wejt Jiliri, wejt Jiliri, am tjuu aynakkan Yooz taku paljajajinča, nižaza am tjuu chiican zajranaca chjatkatchinča, nižaza am tjuu aynakkan wacchi milajrunaca paachinča”. Jalla nuž cjian wejtquiz paljajajquiča.

²³ Jalla nuž paljaytiqiztanami wejrqui cječa, “Ančhuc anawira pajchinla pero. Wejtquiztan zaraka. Ančhucča ana zuma paañinacaqui”.

PIZC PUNTA ZOÑINACAQUI

²⁴ Jesusaqui tjaajinchizakazza:

–Jakziltami weriž chiita taku nonžaja, nižaza weriž chiita tawk jaru kamčhaja, jalla niiqui zuma intintazñi zoñinacača. Intintazñi zoñiqui jalla tužuča. Tsjii maz lum juntuñ kjuya kjuyča.

²⁵ Nekztanaqui chijñi chijinčiča. Nekztan puj kjazqui walja tsijtchiča, nižaza pjatziča, nižaza tjamiqui walja tjamchiča nii kjuya quintra. Pero nii chijñimi, tjamimi, kjazmi ana nii maz juntuñ kjuyta kjuyaqui pali atchiča.

²⁶ Jaziqui jakziltami weriž chiita taku nonzcanpacha ana wejt tawk jaru kamčhaja, jalla niiqui zumzu zoñiicha. Zumzu zoñiqui jalla tužuča. Ana zuma yokallquiz pjil yok juntufñ kjuya kjuychiča.

²⁷ Nekztanaqui chijñi chijinchičha. Jalla nekztan puj kjazqui walja tsijtchiča, nižaza pjatzicha, nižaza walja tjamchiča nii kjuya quintra. Jalla nekztanaqui nii pjil yok juntufñ kjuya kjuyaqui muzpa tsucchuca pajlziča.

²⁸ Jesusaž jalla nuž tjajñi žeržtan, nonžñi zoñinacaqui walja ispantichiča niž tjajjintiquiztan.

²⁹ Jesusaqui walja zizñi zizñi tjajjinchičha. Lii tjajjiñi maestrinacaqui ana nižta tjajjiñitača.

8

MOJKCHI JANCHICHIZ LAA ZOÑI CHJETINTA

¹ Jalla nekztanaqui Jesusaqui curquiztan chjijwžquichiča. Nižaza muzpa zoñinaca apziča.

² Tsiji mojkchi janchichiz laa zoñiqui Jesusižquiz macjatžquichiča. Jesusiž yujcquiz quillžcu, tuž cjichiča:

—Wejt Jiliri, tii laaquiztanž čhjetnalla. Am wejr čhjetinzim pecčhaj niiqui, wejr čhjetinzim atča.

³ Jalla nekztanaqui Jesusaqui kjaržtan lanžcan, tuž cjichiča:

—Wejr am čhjetnasachiya. Chjetintam cjissa.

Jesusaž jalla nuž čhiitiquiztan, nii mojkchi janchichiz zoñiqui laaquiztan žejtchi quirchiča.

⁴ Nekztanaqui Jesusaqui nižquin čhižinchičha, tuž cjan:

—Wejr am tsiji cesača. Jalla tii čhjetintiquiztanaqui anam ječžquizimi maznaquiča. Timpluquin oka. Jalla nicju timplu jiliržquin persunpacha tježca, žejtchi, jalla nii. Nižaza Moisés mantita ofrenda tjaaquičha, tjapa zoñinaca zizajo, laaquiztan čhjetinta, jalla nii.

TSJII CHJETINTAQUI

⁵ Jalla nekztanaqui Jesusaqui Capernaum cjita watja luzziča. Jalla nuž luzan tsiji roman sultat capitán jiliriqui nižquin macjatžquichiča. Nekztanaqui roct'ichiča,

⁶ tuž cjan:

—Wejt Jiliri, kjuyquiz wejt piyuna ajpžquiz žejlča, ana tsijtñi. Nižaza walja ana wali ayiñča.

⁷ Nekztanaqui Jesusaqui cjichiča:

—Nii čhjetñi okasača.

⁸ Nii sultat capitán jiliriqui kjaaziča, tuž cjan:

—Wejt Jiliri, anal wejt kjuyquiz am tjonžca cjiyi atasacha. Wejrqui amquiztan inakaztča. Jaziqui takukaz čhiya čhjetinzjapa. Nekztan wejt piyunaqui čhjetinta cjequičha.

⁹ Wejrpacha wejt pajk jilirž mantuquiz želuča. Niiž mantitacama ojklayiñča. Nižaza wejt mantuquiz sultatunaca žejlča, čjulut wejr mantučhaja, jalla nuž cjen zultatunaca ojkča. Nižaza zultatu kjawznučhaja, zakaz tjonča. Nižaza wejt piyuna čjululu paajumi mantučhaja, zakaz paača.

¹⁰ Jalla nuž nonžcu, Jesusaqui nii jiliri ancha zuma kuzziz naychiča. Nekztanaqui nuž nayžcu Jesusaqui niž apžñinacžquiz cjichiča:

—Wejrqui weraral cjiwčha. Chekapan tii zoñiqui juc'ant Yoozquin kuzzizza, tjapa Israel wajtchiz zoñinacžquiztanami.

¹¹ Nižaza wejrqui cjiwčha, tuwantan tajatan muzpa zoñinacaqui tjonaquičha, arajpach Yooz wajtquin luzjapa. Jalla nii Yooz wajtchiz zoñinacaqui Abrahamžtan, Isaacžtan, Jacobžtan, jalla ninacžtan juntupacha cuntintuž cjequičha.

¹² Israel zoñinacazti arajpach Yooz wajtquin žejlchucatača. Pero Yooz wajt zawntan zumchiquiz čhatkattaz cjequičha. Jalla nicjuž kaaquičha, nižaza izke jojan zelaquičha.

¹³ Jalla nekztanaqui Jesusaqui capitán jiliržquiz tuž cjichiča:

—Am kjuya oka. Jaknužt am tjapa kuztan cričhaja, jalla nižtapachaž cjequičha.

Jalla nii orapacha niž piyunaqui žejtchi quirchiča.

ZOÑINACA CHJETINTA

¹⁴ Nekztanaqui Jesusaqui Pedruž kjuya ojkchiča. Jalla nicju ajpžquiz Pedruž ajmuž ma cherchiča ch'ujlñi conžtan laa cjiči.

¹⁵ Naaza kjara lanžinchičha. Nuž lanžtiquiztan nii ch'ujlñi conquiztan žejtchinča. Nii orapacha žaažcu, ninaca atinti kallantichinča.

¹⁶ Nii čhjetinta quintu nonžcu tjuñiz kattan muzpa zajraž tanta žoñinaca Jesusizquiz zjičtatača. Jesusaqui tsjii taku čhižcu zajranaca chjatkachiča. Nižaza tjapa laanaca čhjetinchiča.

¹⁷ Nii čhjetintanaquai Isaías profetaž čhiita taku cumplissiča. Isaíasqui cjiyrchiča tuž cjan: “Tsjii žoñiqui učum laa curpunaca tjupi cjisakataquiča, nižaza conanacquistan učum čhjetnaquiča”.

JESUCRISTUZTAN CHICA OJKLAYZ PUNTU

¹⁸ Wiruñaquai tsjii noojiquai muzpa žoñinacaqui walja muytata Jesusizquiz ajcziča. Jalla nižta cheržcu, Jesusaqui mantichiča, kotž tsjii latuquistan okajo.

¹⁹ Jalla nekztanaquai tsjii lii tjaajiñi maestruquai Jesusizquiz macjatžquichiča, tuž cjan: –Tjaajiñi Maestro, jakzitchum okačhaja, amtan chicapachal ojklayasacha.

²⁰ Jesusaqui nižquin kjaaziča, tuž cjan:

–Kitinacami kjuychizza. Nižaza wežlanacami tjurchizza. Wejrzi anal kjuychizza, tjažzjapami.

²¹ Tsjiiquai nižquiz apžni žoñinacžquistan zakaz paljaychiča, tuž cjan:

–Wejt Jiliri, amtan chica ojklayasacha. Pero wejt ejpča ticziqui. Nekztan iyal wejt ejp tjatsni okaž cjeella.

²² Jesusaqui kjaaziča, tuž cjan:

–Wejtan chicaka am ojklaya. Ticzižtakaz žoñinacaqui, jalla ninacaj ticzinaca tjažzlani.

JESUSAQUI TJAMIMI KJAZ LJOJKIMI MANTICHA

²³ Jalla nuž chiyžcu Jesusaqui warcuquiz luzziča. Niiž tjaajinta žoñinacaqui luzzizakazza.

²⁴ Ninacaž kotquiz okan, tjamiquai walja tjamchiča. Jalla nuž tjaman kjaz ljojkiquai warcu tjananz pecatča. Jesusazti tjaatča.

²⁵ Nii kjaz ljojkiž cjen tjaajinta žoñinacaqui Jesusa zinchiča, tuž cjan:

–!Wejt Jiliri! !Liwriyalla! Tii warcu kjazquiz julzmayača. Ticznachani učumqui.

²⁶ Jesusaqui kjaaziča, tuž cjan:

–¿Kjažtiquistan ančhucqui ancha tsuctsucjo? Ančhucqui anača wejtquin tjapa kuzziz. Jalla nekztan Jesusaqui zaažcu, tjamimi kjaz ljojkimí ujziča. Jalla nuž čhiitiquistan tjamimi kjaz ljojkimí apaltichiča.

²⁷ Nii apaltiñi cheržcu nižtan ojklayni žoñinacaqui ispantichiča, nižaza tuž cjichiča:

–¿Čhjul žoñit teejo? Tjamimi tii kot kjaz ljojkimiz tiž čhiita takukaz cazla.

ZAJRAZ TANTA ŽOÑINACA

²⁸ Nii kotž nawjctuñtan irantižcu, Jesusaqui Gadara cjita yokquin ulanchiča. Ulantan pucultan žoñinacaqui campu santuquistan tjonchiča. Nii pucultan žoñinacaqui zajraž tantatača walja ana walinacatača, žoñinacžtan kichasñipanikaztača. Jalla nižtiquistan nii jicžquiz ana jecmi ojklayñitača.

²⁹ Jesusizquiz macjatžcu nii zajranacaž tanta žoñinacaqui kjawchiča, tuž cjan:

–¿Kjažtiquistan wejtnacaquiz mitisejo? Ima casticž timpu irantižcan amqui tekz tjonchamča, wejrnaca sufriskatzjapa. ¿Kjažtatajo? –Nuž cjan kjawchiča.

³⁰ Nižaza nii nawjkchuc cuchinacaqui ojklayča lujlcan.

³¹ Zajranacaqui Jesusizquiz rocchiča tuž cjan:

–Amqui wejrnaca chjatkataquiz niiqui, nii cuchinacžquin wejrnaca luzkatalla.

³² Jalla nekztanaquai Jesusaqui cjichiča:

–Nižtaqui, oka. Cuchinacžquin luzca.

Jalla nuž čhiitiquistan zajranacaqui žoñinacžquistan ulanchiča; cuchinacžquin luzziča. Zajranacaž luztiquistan cuchinacaqui tsjii barranc k'awquin tjojsiča, kotquizpachatača. Jalla nužquiz kjaztan tsamžcu, ticziča nii cuchinacaqui.

³³ Jalla nii cuchí itzñinacaqui ancha tsucchi zajtchiča. Watja irantižcu, nii pucultan zajraž tanta žoñinacž puntuquistan quint'ichiča, nižaza tjapa nižta watchinacami.

³⁴ Jalla nii quintu nonžcu tjapa nii wajtquiz žejlñi žoñinacaqui ulanchiča, jakziquin Jesusa želatčhaja, nicju. Jesusižtan zalžcu, ninacaqui rocchiča, ninacž yokquistan okajo.

9

ZUCH ŽOÑI ČHJETINTA

¹ Jalla niž wiruñpachaquai Jesusaqui wilta warcuquiz luzziča. Nekztan kotž tsjii latuquistan kajkchiča. Nižaza niž persun watja irantichiča.

² Jalla nijwc žoñinacaqui Jesusizquiz tsjii zuch žoñi čhjitichiča. Tjaž zquitinacžtanpacha ajpchi čhjitichiča. Ninacž tjapa kuz cjičjiñi cheržcu, Jesusaqui laa žoñžquiz paljaychiča, tuž cjan:

—Jila, ana llaquisa; tjup kuzziz cjee. Am ujnacac pertuntača.

³ Jalla ništa chiiñi nonžcu yekjap lii tjaajiñi maestrunacaqui kuzquiz tuž pinsichiča: “Yooz quintrala; tii žoñž takuqui anawalipanla”.

⁴ Pero Jesusaqui ninacž kuzquiz pinsita zizatča. Jalla nekztan ninacžquiz cjichiča:

—¿Kjažtiquiztan ančhucqui ništa ana zuma pinsamintuchiztažo?

⁵ ¿Jakzilta takut pjasila čhiiz cjesajo? ¿“Am ujnaca pertuntača” čhiiz pjasila cjesaya? Už ¿“Tsijsna, oka”, jalla nuž čhiiz pjasila cjesaj?

⁶ Tsewtan cuchanžquita Yooz Zoñtča wejrqui. Tii muntuquiz jiliritča, ujnaca pertun-zjapami. Razunal chiyuča. Nuž zizjapa, ančhucqui tiiz čera.

Jalla nekztanaqui nii zuch žoñžquiz cjichiča:

—Tsijsna, am tjajz zquiti apta; nižaza am kjuya oka.

⁷ Jalla nii orapacha tsijsiča, nižaza niiz kjuya ojkčiča.

⁸ Zoñinaca nii cheržcu, tsucchi quirchiča, nižaza “Yoozqui honorchiz cjilalla” cjican čhiichiča. Yoozqui žoñinacžquiz ništa čhjetinñi azi tjaachiž cjen, nuž čhiichiča.

MATEO KJAWZTA

⁹ Nii kjuyquiztan ulanžcu Jesusaqui Mateo cjita žoñi cherchiča. Mateoqui impuesto cobriñi puestuquiz julzi želatča. Jesusaqui niizquiz cjichiča:

—Wejtta chica ojklaya.

Jalla nekztan Mateoqui tsijscu, Jesusižtan ojkčiča.

¹⁰ Niiž wiruñ Jesusaž Mateož kjuyquin lulan, muzpa impuesto cobriñinacami nižaza ujhiz žoñinacami irantichiča. Nižaza ninacaqui Jesusižtan niiz tjaajinta žoñinacžtan chica julziča tsjii mizquiz.

¹¹ Fariseo žoñinacžti jalla nii cheržcu, Jesusiž tjaajinta žoñinacžquiz pewcziča, tuž cjican:

—¿Kjažtiquiztan ančuca tjaajiñi mastruqui impuesto cobriñinacžtan nižaza ujhiz žoñinacžtan čheri lujlo?

¹² Jesusaqui jalla ništa pewczñi nonžcu ninacžquiz cjichiča:

—Žuma wiw žoñinacaqui anaž medicu kullñimi pecča. Antiz laa žoñinacž medicu kullñimi pecča.

¹³ Yooz takuqui tuž cjiča: “Oksñi kuzziz žoñinaca juc'antil pecuča wilana jawkñi žoñinacžquiztan”. Tantiya čjul puntut tii Yooz taku čhiichaja, nii zumpacha intintaza. Jaziqui wejrqui “Žuma kamuča” cjiñi žoñinacžquiz anal kjawsñi tjončinča. Antiz “Ujhizpanča” cjiñi žoñinacžquiz kjawsñi tjončinča, ninacž kuz campiita cjisjapa.

AYUNAS PUNTU

¹⁴ Juan Bautistaž tjaajinta žoñinacaqui Jesusižquiz macjatžquichiča. Nekztan pewcziča, tuž cjican:

—Wejrnacmi fariseo žoñinacami walja ayunasifiča. Amiž tjaajinta žoñinacžti ana ayunasñipanla. ¿Kjažtiquiztan nižtažo?

¹⁵ Nekztanaqui Jesusaqui kjaaziča, tuž cjican:

—¿Kjažt weriž tjaajinta žoñinaca llaquit kuzziz ayunasasajo, weriž želanpachajo? Wejrqui zalz kazzi tjowažtakaztča. Ninacaqui zalz pjiistiquiz invittanacžtakazza. Zalz kazzi tjowaž želan, niiz zalz pjiistiquiz invittanacaqui ana llaquit kuzziz ayunasasacha. Pero tsjii timpuž tjonacuichiča. Jalla nii timpuquiz zalzñi tjowa kjañtaž cjequiča; jalla nekztanz ayunasasacha.

¹⁶ ‘Anaž jakziltami tsjel zquiti ew rimintužtan rimintasacha. Ew rimintuqui jaljta-pasacha, nižaza nii ach zquiti qui juc'anti wjajržcu tsjelanzasacha.

¹⁷ Nižaza anaž jakziltami ach zkiz luuzquiz ew vinu alznasacha. Jalla nižtaž alznasaž niiqui, zkiz luuz panž wjajrskatasacha ew vinuqui. Nekztan vinumi zkiz luuzmi pertis-nasacha. Ew vinu ew zkiz luuzquiz panž alznasacha. Jalla nuž zumpacha cjesacha vinumi zkiz luuzmi.

JESUCRISTUCHA LAA ŽOÑI ČHJETINŃIQUI

¹⁸ Jesusaž tjaajnan, tsjii judio žoñinacž jiliriqui irantichiča. Jesusiž yujcquin quillziča, tuž cjican:

—Wejt majtqui ticžñil jitča. Amqui wejt kjuya okasaž niiqui, naaquiz am persun kjaržtan lanznasacha. Nekztan naaqui žetaquiča.

¹⁹ Nekztanaqui Jesusaqui tsijscu nii jiliržtan ojkčiča tjaajinta žoñinacžtanpacha.

²⁰ Jalla nuž okan, tsjaa laa maatak žonqui Jesusižquiz wirquiztan macjatžquichinča. Tunca paan wata ljok tjawksñi laakaz t'akjiri želintacha. Jesusižquiz macjatžcu Jesusiž zquit puntallquiz lanzinča.

²¹ Ima macjatcan pinsichinča, “Wejrqui niiz zquitilla lanžcu žetaka wejrqui” cjican.

²² Jalla nuž lanztiquiztan Jesusaqui jalla naaža kjutñi kjutžcu naa maatak zoñ cherzicha. Nekztan tuž cjichicha:

—Cullaca, tjuj kuzziz cjee. Amiz tjapa kuztan criichiz cjen, žejtchi cjissamča.

Jalla nii orapacha žejtchin cjissinča.

²³ Jalla nekztanaqui Jesusaqui tira ojkcicha. Nii jilirž kjuya irantican Jesusaqui cherchicha, nii jilirž majt tjazjapa banda pjujñinacaqui listutakalča, jalla nii. Nižaza zoñinacaqui ančaž kaacan aranchicha.

²⁴ Nuž cheržcu Jesusaqui ninacžquiz cjichicha:

—Ančhucqui tekztanž ulna. Taa uzqui anača ticzinqi, antiz tjačha.

Jalla nuž Jesusiž chiitiquiztan, zoñinacaqui nižquin tjassicha.

²⁵ Nekztanaqui Jesusaqui ninaca ulanskatchipanča. Nekztan luzcu, naaža ticzi uza kjarcu tanžcu, žinziča; žejtchinpacha.

²⁶ Jalla nekztanaqui tjapa kjutñi nii yokquin nii milajru quinto ojkcicha.

ZUR ZOÑINACA CHJETINTA

²⁷ Jalla nijwctan ulanžquitiqiztan pucultan zur zoñinacaqui nižquin apžquichicha, kjawcan:

—Davidž majchmaatquiztan tjoñi, wejrnača okznalla, —cjican.

²⁸ Nekztan Jesusaž kjuya luztan nii zur zoñinacaqui nižquin macjatchicha. Nekztan Jesusaqui ninacžquiz pewczicha, tuž cjican:

—Wejrqui ančhuc cherkatasacha, žjalla nii crii ančhucya?

Ninacaqui kjaaziča, tuž cjican:

—Wejt Jiliri, cryučha.

²⁹ Jalla nekztanaqui Jesusaqui ninacž čhujqui lanlanžinchiča. Nižaza cjichicha:

—Ančucaž tjapa kuztan criitiquiztan cherñi cjisna.

³⁰ Nii orapacha ninacž čhujquiqui cherñi cjissicha. Nekztanaqui Jesusaqui ninacžquiz zumpcha čhižinchiča, tuž cjican:

—Tii čhjetintaqui anaj jecmi zizla; ančhucmi anaz jecžquizimi čhičhiyaquichicha.

³¹ Jesusaž nuž čhižinchiž cjenami, ninacaqui ulanžcu, tjapa yokaran nii čhjetinta quinto parlichicha.

ANA CHIÑI ZOÑI CHJETINTA

³² Nii kjuyquiztan ulnan yekjap zoñinacaqui tsjii zajraž tanta zoñi zjijcchicha. Zajraž tantiquiztan ana čhiñi atatcha.

³³ Nekztanaqui Jesusaqui nii zajra chjatkatchicha. Jalla nuž chjatkattiquiztan nii ana čhiñi zoñiqui čhiy kallantichicha. Zoñinacazti jalla nii cheržcu walja ispartichi cjissicha, tuž cjican:

—Tii Israel yokquiz ana wira tižtanaca cheriñtača wejrnacqui.

³⁴ Pero fariseo nzoñinacazti tuž cjetča:

—Tiiqui zajranacž jilirž aztankaz zajranaca chjatkatñiča.

³⁵ Jesusaqui tjapa wajtquiztan watja nižaza jochquiztan jochi ojklaychicha, judio ajcz kjuyquizimi tjaajincan. Yooz mantuquiz kamz puntu čhižinchiča. Nižaza tjpaman laanacami nižaza jallc'a curpuchiznacami čhjetinchiča.

³⁶ Zoñinaca cheržcu, ninaca okziča. Ana awatirchiz uuzanacaztakaz želatča.

³⁷ Zoñinaca okzcu, Jesusaqui niž tjaajinta zoñinacžquiz paljaychicha, tuž cjican:

—Weraral cjiwča. Zkalaqui walja žejlča. Pero zkala ajžni zoñinacača upaqui.

³⁸ Yooz Ejpqui zkaj Patrunača. Jalla nižtiquiztan Yooz Patrunžquiztan mayiza, zkala ajžni zoñi cuchnajo.

10

TUNCAPAN APOSTOLONACA ILLZTA

¹ Jalla nekztanaqui Jesusaqui niž tuncapan illzta zoñinaca kjawziča. Nekztan ninacžquiz mantiz poder tjaachicha, zajranaca chjatkatzjapa, nižaza tjpaman laanacami jallc'a curpuchiznacami čhjetnajo.

² Nii tuncapan illzta apostolonacaqui jalla tižta tjuuchiznacatača: Primiruqui Simonatača, nižaza niž tsjii tjuuqui Pedro cjitazakaztača. Nekztan niž lajktacha, Andrés cjita. Nekztan Jacobotača, nižaza niž jila Juan. Nii pucultanaqui Zebedeož majchwichtača.

³ Nekztan Felipitača, Bartolometača, Tomastača, nižaza Mateotača. Nii Mateozti impuesto cobriñitača. Nekztan Jacobotača, Alfeož majchtača. Nekztan Lebeotača nižaza niž tsjii tjuuqui Tadeo cjitazakaztača.

⁴ Nekztan Simonatača, niiqui cananista cjeta partiquiztantatača. Ultimquiziqui Judas Iscariotetača, jalla niiqui Jesusiž quintra tarasunchiča.

ILLZTA ZOÑINACA CUCHANTA

⁵ Jesusaqui nii tuncapan illzta zoñinaca cuchanzquichiča, niiz cuntiquiztan ojklajajo. Ima cuchanzcan tuž chiižinchiča:

–Judío yokquinpanž ojklayaquiča, Samaria yokquin nižaza yekja yokanacquin ana ojklayaquiča.

⁶ Israel wajtchiz zoñinaczquinakaz okaquiča. Jalla ninacaqui katchi uuzinaczta kaz zejlča.

⁷ Arajpach Yooz mantuquiz kamz timpu žcatzinzquiča. Jalla nii paljaycan ojklaycaquiča.

⁸ Nižaza laanaca čhjetnaquiča. Nižaza ticzinaca jacatatskataquiča. Nižaza mojkchi janchichiz zoñinaca čhjetnaquiča. Nižaza zajranaca chjatkataquiča. Tii mantiz poderaqui ančhucacquiz nužukaz tjaatača. Jalla nižtiqiztan tii poderžtan zoñinaczquiz yanapžcu anaž čhjulumi mayaquiča pacajo.

⁹ Paaz ana chjichaquiča, kor paazmi, čhiw paazmi, cobre paazmi.

¹⁰ Nižaza ana chjichaquiča žak quelzmi. Tsjii almilla alaja chjichaquiča. Nižaza ana iya čhjulumi chjichasača, ana yekja čhatami, nižaza atsmi. Yooztajapa lažñinaczquiziqui čheriqui tjaata cjis waquiziča.

¹¹ Ančhucqui wajtquizimi jochquizimi irantižcuqui, zuma zoñipanž kjurznaquiča. Nuž zuma zoñi wachcuqui, niiz kjuyquiz alujasaquiča, nii wajtquiztanami jochquiztanami ulanzcama.

¹² Tsjii kjuya luzcu, tsaanaquiča, “Ančhuc walipaj cjila”, cjican.

¹³ Nii kjuychiz zoñinaca zumažlaj niiqui, jalla ninacztaqui walipanž cjequiča. Yekjapa zoñinacaqui ana zumažlaj niiqui, jalla ninacztaqui čhjulumi anawalikaz cjequiča.

¹⁴ Jakziltat ančhuc ana risiwaquič niiqui, nižaza ančhuc ana nonz pecaquič niiqui, ninaczquiztan okaquič ančhucqui. Nii kjuyquiztan ulnaquiča nižaza nii wajtquiztanaqui. Nekztan nii wajtquiztan kjojchquiz žcatchi pulpunaca tsajt tsajtsnaquiča. Jalla nii tsajt tsajttaqui siñalaž cjequiča ninacz quintra, ančhuc ana risiwčhiž cjen.

¹⁵ Weraral cjiwča. Casticz tjuñquiziqui nii ančhuc ana zuma risiwñi zoñinaczti juc'anti castictaž cjequiča, Sodoma cjeta Gomorra cjeta, jalla nii wajtchiz zoñinaczquiztan.

CHJAAWJKATÑINACA ZELAQUICHA

¹⁶ Jesusaqui tjaajinchizakazza:

–Tii weriž chiižinta taku nonžna. Wejrqui ančhuc cuchnuča. Ančhucqui kitinacz taypiquič ojklayaquiča, uuzanaczta kaz. Jalla nižtiqiztan ančhucqui walja kuzziz cje. Listuž cjequiča žkoraztakaz, pero zuma paazjapa.

¹⁷ Ančhucqui persunpachaž walja cwitazaquiča. Ančhucqui jilirinaczquin intirjita cjequiča; nižaza ajcz kjuyquiz wjajttaž cjequiča.

¹⁸ Nižaza ančhucqui wejt puntuquiztan parlichiz cjen chjichtaž cjequiča prefetonaczquinami, nižaza tsjan chawjc jilirinaczquinami. Nekztan ančhucqui wejt puntuquiztan chiyauquiča, nii jilirinacz yujcquizimi, nižaza ana judío wajtchiz zoñinacz yujcquizimi.

¹⁹ Jilirinaczquiz intirjitaž cjenami, ana kuz turwaysi cjequiča, čhjulut ančhuc kjaaznačhaja, nižaza jaknužt kjaaznačhaja, jalla nii. Jilirinacz yujcquiz prisintiz ora, Yoozqui ančhuc kuzquiz čhiiz taku tjaaquiča, jaknužt čhiizalaj, nii.

²⁰ Ančhuc persun kuzquiztan anaž chiyauquiča. Antiz ančhuc Yooz Ejpž Espiritu Santuqui ančhuc čhiikataquiča.

²¹ Nii timpuquiziqui zoñinacaqui persun jilž quintra aptjapznaquiča persun jila conkatjapa. Nižaza ejpnacaqui persun maatinacz quintra aptjapznaquiča. Maatinaczti persun maa ejpnacz quintra zakaz aptjapznaquiča, persun ejpnaca conkatjapa.

²² Tjapa ana criichi zoñinacaqui ančhucacquiz ch'aanaquiča wejt puntu parliñiž cjen. Pero jakziltat ticzcama wali tjurt'iñi kuzziz cječhaj niiqui, liwriitaž cjequiča, Yooztan wiñaya kamzjapa.

²³ Tsjii wajtchiz zoñinacaqui ančhuc chjatkataquič niiqui, ninaczquiztan yekja wajtquin okaquiča. Weraral cjiwča, wejrqui arajpachquiztan cuchanzquita Zoñtča. Ima weriž tii muntuquiz wilta tjonan, ančhucqui tjapa Israel watjanaczquin anaž iranti atasacha.

²⁴ Tjaajinta zoñiqui niiz tjaajiniž quiztan anaž juc'anti cjesača. Nižaza piyunaqui niiz patrunžquiztan anaž juc'anti cjesača.

²⁵ Tsjii tjaajinta zoñiqui niiz tjaajiniž irata, jalla nižta tjaajiniž cjisnaquič niiqui, cuntintuž cjis waquiziča. Nižaza tsjii piyunaqui niiz patrunž irata, jalla nižta patrunaž cjisnaquič niiqui, cuntintuž cjis waquiziča. Nonžna ančhucqui, quintra zoñinacaqui “Beelzebú”

cjcan zajra jilirž tjuužtan wejtquiz tjuuskataquiž niiqui, ančhucaquiz juc'ant anawal tjuužtanž tjuuskataquiča. Wejrqui kjuychiz patrunžtakaztča, ančhuczi wejt kjuy familiažtakazza.

²⁶ Jalla nižtiquiztan ančhucqui anaž žoñi eksna. Tjapa chjojzakuñ tjaajintami zuma kjana ziztaž cjequiča. Nižaza tjapa jamazit tjaajintami nižtakaz zuma kjana zizta-pankaz cjequiča.

²⁷ Tjapa weriž chjojzaka tjaajintanacami ančhucqui žoñinacž yujcquiz kjanacama pal-jayaquiča. Nižaza tjapa weriž jamazit tjaajintanacami ančhucqui paljayaquiča, tjapa žoñinaca nonžjapa.

²⁸ Nonžna ančhucqui, anača eksqui tii curpu alaja conñinacžquizimi. Ninacaqui animuqui anaž conasača. Antiz Yoozquizpan eksna. Jalla niiča curpumi animumi infiernuquin wiñaya t'akjisiskatñiqui.

²⁹ Tsjii paaztan pizc wežlanaca kjayasacha. Jalla nuž koluc valorchiz kjayžcumi ančhuca Yooz Ejpqui ninaca cwitiča. Yooz Ejpž ana munan, tsjii wežlaqui anaž ticznasacha.

³⁰ Jilanaca, Yooz Ejpqui tjapa ančhuca ach charanaca kanžintača.

³¹ Jalla nižtiquiztan anaž čjulquiztanami eksna. Wežlanacžquiztan ančhucča juc'ant valorchizqui. Yooz Ejpqui ančhuc juc'anti cwitaquiča wežlanacžquiztan.

³² Jakziltat parti žoñž yujcquiz wejt favora cječaj niiqui, nižazakal wejrqui wejt arajpach Yooz Ejpž yujcquiz nii žoñž favora chiyacha.

³³ Nižaza jakziltat parti žoñž yujcquiz wejr ana pajñi nicačhaj niiqui, nižaza wejrqui wejt arajpach Yooz Ejpž yujcquiz nii žoñž quintra ana pajñi zakal chiyacha.

³⁴ Tii taku nonžna. Weriž tjontiquiztan žoñinacaqui ana zumquin cjequiča; quintrasñi cjequiča. Nekztan aptjapznaquiča. Ana criichinacaqui criichi žoñinacž quintra cjequiča.

³⁵ Weriž tjontiquiztan tsjii maatiqui persun ejpžjapa quintraž cjequiča. Nižaza tsjaa majtqui persun maajapa quintra cjequiča. Nižaza tsjaa wazmi persun kjan maajapa quintra cjequiča.

³⁶ Jalla niža zapa mayni familianacaqui ninacporaž quintraž cjequiča.

³⁷ Jakziltat persun maa ejpžquizkaz kuzziz cječhaja, jalla niiqui anaž wejt partiquiz cjichuca cjesacha. Nižaza jakziltat persun ocjalžquizkaz kayazt'achaja, jalla niiqui anaž wejt partiquiz cjichuca cjesacha.

³⁸ Jakziltat wejt partiquiz cjis pečhaj niiqui, tjapa kuztanž wejtquiz cjistanča. Sufri-japaqui listoj cjila, ticzcama. Ana niža wejtquin tjapa kuztan cječaj niiqui, anaž wejt partiquiz cjichuca cjesacha.

³⁹ Jakziltat weriž cjen persun anazum kamañquiztan ana jaytačhaja, jalla niiqui ultimquiziqui ana liwriita cjesacha. Nižaza jakziltat weriž cjen persun anazum kamañquiztan jaytačhaja, jalla niiqui ultimquiziqui liwriitaž cjequiča; Yooztan wiñaya zuma kamaquiča.

⁴⁰ Jequit ančhuc risiwčhaja, nižaza wejrmi zakaz risiwčha. Nižaza jequit wejr risiwčhaja, jalla niiqui nižazakaz wejt Yooz Ejpmi risiwčha.

⁴¹ Jequit tsjii Yooziž cuchanta profeta risiwaquiž niiqui, jalla niiqui profetažtakaz honorchiz zakaz cjequiča. Nižaza jequit tsjii Yooz kuzcama kamñi žoñi risiwačhaja, jalla niiqui Yooz kuzcama kamñiž premio, jalla nižtakaz honorchiz cjequiča.

⁴² Nižaza jequit tsjii wejtquin kuzziz žoñžquiz yanapačhaja, jalla niiqui honorchiz zakaz cjequiča. Jequit wejtquin criichi žoñžquiz tsjii tasa kjaz onačhaja, jalla niiqui honorchiz zakaz cjequiča. —Jalla nuž čiičičha Jesusaqui.

11

JUAN BAUTISTAZ CUCHANZQUITA ŽOÑI

¹ Niiž tuncapan illzta žoñinacžquiz tjaajinz žeržcu, nekztan Jesusaqui ojkičičha, yekja watjanac kjutñi. Wajtquiztan watja ojklayčičha, žoñinacžquiz tjaajñi, nižaza Yooz taku paljaji.

² Juanqui nii oraqui carsilquiztača. Jalla nicju Cristuž ojklaytanaca quinto nončiča. Nekztanaqui Juanqui tsjii kjažt mazinaca Jesusa pewczñi cuchanzquičičha. Nekztan irantizuž Jesusižquiz

³ pewczičha, tuž cjican:

—Cristuqui tjoniz cjispača; ¿Amj Yoozquiztan cuchanzquita Cristumkaya? ¿Už yekjaž tjewznasa, jaa?

⁴ Jesusaqui ninacžquiz kjaaziča, tuž cjican:

—Jaknužt cherčhaja nonžaja, jalla nii tjappachaž Juanžquiz quint'izcaquiča ančhucqui.

⁵ Zur zoñinacac cherča, Zuch zoñinacaqui ojklayča. Mojkechi janchichiz zoñinacaqui čhetintacha. Oñi zoñinacaqui nonža. Nižaza ticzi zoñinacaqui jacatatskattača. Nižaza pobre zoñinaczquiz Yooz liwriñi taku paljaytapanča.

⁶ Jakziltat weriž paatanaca cherčcu, nižaza weriž chiitanaca nonžcu, ana kuz turwayzižlaj niiqui, walipanikaz cjequiča.

JUAN BAUTISTA PUNTU

⁷⁻⁸ Jalla ninacaž ojktan, Jesusaqui chiya kallantichiča Juanž puntuquiztan. Zoñinaczquiz tuž cjichiča:

—Ch'ekti yokquin, čėhjululu cherzñi ojkinčhuctaya? ČTjamiž tjizinta caña cherzñi ojkinčhuctajto? Anačhay. ČFino zquiti cajtchi zoñi cherzñi ojkinčhuctajto? Čawjw jilirž kjuyquin zuma zquiti cajtchi zoñi žejlča. Jalla nii zizza ančhucqui.

⁹ Čėhjululu cherzñi ojkinčhuctaya? ČYooz cuntiquiztan čiiñi profeta cherzñi ojkinčhuctaya? Jesalla, ultim werara nuž ojkinčhucča. Juanqui tuquita profetanaczquiztan juc'ant chekanča.

¹⁰ Juanž puntuquiztan Yooz takuqui tuž cjiča:

“Yooz Ejpqui tsjii zoñi cuchanzcaquiča ima Cristuž Yooz taku paljayi ojklayan. Nii zoñi qui Israel zoñinaczquiz Cristu zuma tjewskataquiča”.

¹¹ Weraral cjiwča. Juan Bautistača parti zoñž maatinaczquiztan tsjan juc'anti qui. Pero čjul Yooz maati mi zoñž maati quiztan tsjan juc'antiča. Arajpach Yoozquin kuzziz zoñinacača Yooz maatinacaqui.

¹² Juanž tjontiquiztan ancama muzpa zoñinacaqui ts'acjazcan arajpach Yooz mantuquiz luz pecča; walja tjapa aztan nižaza tjapa kuztan luz pecča.

¹³ Juanž tjonzcama, tjapa tuquita profetanacz chiitanacami nižaza Moisés liinacami arajpach Yooz cuchanzquita puntuquiztan čiiča.

¹⁴ Elías cjita profetaqui wilta tjoniž cjispacha; nii Elias tjonz cuntiquiztanča Juan Bautistaqui. Jalla niic werarača. Nuž criiž waquiziča.

¹⁵ Jakziltachalaj nonžni cjunčhiz, jalla niiqui tii čiičtaqui nonžna.

¹⁶ ČKjažtat tii timpuquiz žejlñi zoñinacajo? ČJecnaca iratat tinacajo? Jalla tižta ocjalanacažtakazza tinacaqui. Yekjap ocjalanacaqui palazquin julzi uzinča, nižaza ninacz mazinaca kjawkjawža, tuž cjičan:

¹⁷ “Tsjajtsjapa pincallu pjuchinča. Ančhuczi ana tsajtchinčhucča. Nižaza kaayikaayi wirzu itzinča. Ančhuczi ana kaachinčhucča”. Jalla nuž cjichiča ocjalanacaqui. Jalla nižta iratača tii timpuquiz žejlñi zoñinacaqui.

¹⁸ Juan tjončiča. Niiqui zumanaca ana lujlñiča, nižaza ana licñiča. Jalla nižti quiztan ančhucqui tuž cjiñčhucča, “Juanqui zajraž tantača” cjičan.

¹⁹ Niž wiruñiqui wejrqui tjončinča, arajpach Yooz Ejpč cuchanzquita Zoñi. Wejrqui zumanaca luluča, nižaza licuča. Jalla nižti quiztan ančhucqui wejt puntuquiztan cjiča: “Niiča anča lujlñiqui, nižaza licñiqui, nižaza niiča ujchiz zoñinacz mazi qui, nižaza anawali impuesto cobriñinacz mazi qui”. Jalla nuž cjiñčhucča wejt puntuquiztan. Tuž zakal cjiwča: Yooz puntu zuma zizñi zoñinacaqui Yooz tjaajintacama kamča.

ANA YOOZQUIN KUZIZ ZOÑINACA

²⁰ Jalla nekztanaqui Jesusaqui čiičiča, chojru kuzziz zoñinacz puntu. Tsjii watjanacquiz anča milajrunaca paachiča. Pero nii wajtchiz zoñinaczi persun uj ana pajčiča; nižaza kuznaca ana campiichiča. Jalla nižti quiztan Jesusaqui ninaczquiz ayjatchiča, tuž cjičan:

²¹ —Corazín wajtchiz zoñinaca, ančhucacquiz anča anawaliz wataquiča. Nižaza Bet-saida wajtchiz zoñinaca, ančhucacquiz anča anawalizakaz wataquiča. Ančhucac watjanacquiziqui walja milajrunaca paachinča. Tiro cjita nižaza Sidón cjita watjanacquiz nii milajrunaca paataž cjitasaz niiqui, nii ortanpacha nii wajtchiz zoñinacaqui Yoozquin kuzziz cjitasacha; nižaza “ujchizpanča wejrnacqui, pertunalla”, cjitasacha. Nižaza uj zint'ižcu nii wajtchiz zoñinacaqui llaquita kuz kjanapacha tjeezñi cjitasacha, lutu zquiti cajtčcu, nižaza achquiz kjupžtan tjajlžcu.

²² Jalla nižti quiztan ančhucqui juyzu casticz tjuñquiziqui juc'anti castictaž cjequiča nii Tiro cjita nižaza Sidón cjita watjanacchiz zoñinaczquiztan.

²³ Capernaum wajtchiz zoñinaca, čkjažti quiztan ančhucqui pinsejo, “Yoozqui učhum honorchiz cjizkataquiča”, cjičanajo? Anaž nuž cjesacha. Pero ančhuczi kozzc tjojttaž cjequiča infiernuquin sufrisjapa, ujchiz zoñinacztan chica. Ančhucac wajtquiziqui walja milajrunaca paachinča. Sodoma cjita wajtquiz nii milajrunaca paataž cjitasaz niiqui, nii watjaqui anz tii tjuñinaca žejltasacha.

²⁴ Jalla nižti quiztan nii juyzu casticz tjuñquiziqui ančhucqui juc'anti castictaž cjequiča, Sodoma wajtchiz zoñinaczquiztan.

YOOZQUIN KUIZZI ZOÑINACA

²⁵ Jalla nii orazakaz Jesusaqui chiichiča:

—Wejt Yooz Tata, amqui honorchizam cjlalla. Arajpachquin žejlñinacami tii muntuquiz žejlñinacami amča mantñamqui. Amqui humilde žoñinacžquiz chjojzaka tjaajinta tjeezamča. Zizñi žoñinacžquizimi intintazñi žoñinacžquizimi nii chjojzaka tjaajintanacami ana zizkatchamča.

²⁶ Yooz Tata, amiž muntaqui nužuča.

²⁷ Yooz Tata, tjapa amiž ziztanacauqui wejtquiz tjaajinchamča. Ultimquiziqui anaž jecmi wejr am Majč zumpacha pajča. Am alaja wejr zumpacha pajča. Nižaza anaž jecmi am Yooz Ejp zumpacha pajča. Wejr alaja am zuma pajučha. Nižaza jakziltižquiz wejrqui zizkatz pecachaja, jalla ninacazakaz am zuma pajasacha.

²⁸ Ančhucqui jakziltat ana zumanacquiztan otchizlaj niiqui, wejtquizza macjatžca. Nižaza jakziltat persun aztan Yooz watja irantiz otchizlaj niiqui, wejtquizza macjatžca. Weril ančhucquiz jeežkatača.

²⁹ Wejrqui pasinsis kuzziztča, nižaza humilde kuzziztča. Jalla nižtiquiztan weriž tjaata kamaña catoka; nižaza wejt puntuquiztan zizñi cjee. Nekztan persun kuz jeež wachaquičha.

³⁰ Weriž tjaata kamañaqui anača ch'ama, nižaza wejt manta paazqui cježakazza.

12*JEEJZ TJUŇI QUINTU*

¹ Tsjii jeež tjuŇquiziqui Jesusaqui niž tjaajinta žoñinacžtan čjacta zcalanac taypiranž okatča. Tjaajinta žoñinacauqui čjeri eeckatchičha. Nekztan ninacauqui tric oz chjojlnunaca kjajpžcu, triculujlčičha.

² Fariseo žoñinacauqui jalla nižta paañi cheržcu, Jesusižquiz cjichičha:

—Chera, tii amiž tjaajinta žoñinacauqui trabajla. Jeež tjuŇquiziqui nižta trabajzqui učhum lii quintrala. —Jalla nuž čhičan ujšiz jwes pecatča.

³ Nekztanaqui Jesusaqui ninacžquiz kjaaziča, tuž cjican:

—Ančhucqui tuž liichinčhucča, žanajaa? Čjeri eecznanacauqui David cjita žoñiqui niž mazinacžtan tižta paachiča.

⁴ Niiquičha Yooz timpluquin luzcu Yooz yujcquin nonžta t'antanaca lujlčičha. Čjul žoñimi anapatača permitta nii t'antac lujlžqui. Lii quintrala niiqui. Timplu jilirinacapankaz lulasacha. Pero nii Davidzti lujlčipanča. Nižaza niž mazinacauqui nii t'anta lujlčizakazza.

⁵ Nižaza Moisés liiquiz tižta liichinčhucž, žana jaa? Jeež tjuŇquiziqui timplu jilirinacauqui ana jeežla. Jalla nuž ana jeežtquiztanaqui, ninacžtajapa anaž ujšiz cjesača.

⁶ Ančhucquiz cjiwča. Tekz tsjiičha timpluquiztan juc'ant chekanacauqui.

⁷ Nižaza ančhucqui cjižta Yooz taku ana intintazžinčhucča. Yooz taku tuž cjiča: “Wejrqui wilana jawkñi žoñinaca anal pecučha. Okžñi kuzziz žoñinacapan pecučha”. Tii Yooz taku intintaztasaz niiqui, anaž ančhucqui tii žoñinaca ujšiz jwes pectasacha. Tii žoñinacauqui jaziqui anaž uj paača.

⁸ Wejrqui tsewctan cuchanžquita Yooz Žoñtča. Wejrpanikal jeež tjuŇquizimi mantasacha.

KJARA KJONCHI ZOŇI ČHJETINTA

⁹ Jalla nekztanaqui najwčhuc ojkžcu judío ajcz kjuyquiz luzziča.

¹⁰ Jalla nicju tsjii žoñi želatča kjara kjonchi. Tsjii quintra žoñinacauqui uj jwesjapa Jesusižquiz pewcziča tuž cjican:

—Jeež tjuŇquiziqui žoñi čjetinž cjesaya, už anapan cjesaj? nuž cjican pewcziča.

¹¹ Jesusaqui ninacžquiz kjaaziča tuž cjican:

—Jeež tjuŇquiziqui uuzac tujquiz tjojsiž cjesaž niiqui, žkjaža ančhuczti tujquiztan uuzaz joožñi ana okasajo?

¹² Pero žoñiqui uuzižquiztan juc'antiž walča. Jalla nižtquiztan jeež tjuŇquizimi anača lii quintra zuma paazqui.

¹³ Jalla nekztanaqui Jesusaqui laa žoñžquiz cjichičha:

—Am kjara zjičca.

Nekztan žejtči cjišičha, nii tsjii kjara wiwuž nižtapacha.

¹⁴ Jalla nekztanaqui fariseo žoñinacauqui ulanžcu, Jesusiž conžjapa kazziča.

¹⁵ Jalla nii zizcu Jesusaqui najwčhuc ojkčičha. Nižaza muzpa žoñinacauqui Jesusižquiz apziča. Jesusaqui tjapa nii apzñi laanaca čjetinčičha.

¹⁶ Nekztan ninacžquiz mantičičha, ana jeczquizimi Jesusiž čjetinñi puntuquiztan parľajo, nii.

PROFETAŽ CHIITA TAKU CUMPLITA

¹⁷ Jalla nižta ojklaycan, Jesusaqui Isafas profetaž cjiirta taku nužquiz cumplissičha. Yoozqui Isaiasquiz tuž cjiirkačičha:

¹⁸ “Jalla tiičha weriž illzta žoñiqui, weriž mantitacama ojklayñi žoñi. Jalla nižžquin kayazt'učha. Niž cjen cuntintutčha wejrqui. Jalla nuž cjičha Yoozqui. Wejt Espiritu Santuqui niž kuzquiz cjequičha. Niiqui yekja watjanacchiz žoñinacžžquin Yooz liwriñi taku paljayaquičha.

¹⁹ Žoñinacžžquizimi ana ch'anaaquičha, nižaza ana kjawaquičha. Calliran alto joržtan ana paljayaquičha.

²⁰ Tsjii tjuwanta cañami anaž kjolaquičha. Nižaza ch'aman asñi michami anaž tjesaquičha, niž ultimpacha legal mantiz tjuñicama.

²¹ Niž cjen yekja watjanacchiz žoñinacaqui zuma liwriiz tjuñi tjewznaquičha”. Jalla nuž Jesusiž puntuquiztan Yooz takuqui cjičha.

JESUSIZ QUINTA CHIICHA

²² Jalla nekztanaqui tsjii laa žoñiqui Jesusižžquin chjichtatačha. Nii žoñiqui zajraž tantaž cjen zuratačha, nižaza ana chiiñitačha. Jesusaqui nii žoñi chjetinčičha. Jalla nižtiquiztan cherni chiiñi cjišičha.

²³ Jalla nuž chjetintiquiztan tjapa žoñinacaqui ispantichičha tuž cjan:

—¿Tij Davidž majchmajtquiztan tjonñi cjesaya? ¿Tiipan Cristo cjesaya?

²⁴ Nii nonžcu fariseo žoñinacaqui tuž cjičičha:

—Tiiqui ana wal žoñikalala. Zajranacž Beelzebú jilirž aztankaz yekja zajranaca chjatkatcha.

²⁵ Jesusaqui ninacž pinsitanaca zizzičha, jalla nižtiquiztan ninacžžquiz cjičičha:

—Jakzilta nacionamiž partira partira t'akznaquiž niiqui, nižaza t'aka t'aka kichasaquiž niiqui, k'ala t'atantaž cjequičha. Tsjii watjamiž nižaza tsjii kjuya familiamiž nižta t'aka t'aka cjisnaquiž niiqui, anaž tjurasacha.

²⁶ Jalla nižta irata Satanás diabluqui persun partira chjatkattasaž niiqui, niipacha t'akztasacha. Jalla nuž t'akžtiquiztan niž mantiz azi anaž tjurasacha.

²⁷ Ančhucqui wejt puntuquiztan cjiñčucčha, “Beelzebú diabluž aztan zajranaca chjatkatcha”. Jalla nuž cjiñčucčha. Jalla nužžlaj niiqui, žject ančuca partira žoñinacžžquiz azi tjaažjo, zajranaca chjatkatzjapajo? Jalla nižtiquiztan kjanapachaž wejt puntuquiztan tsjii kjutñi čiičinčucčha, nii.

²⁸ Wejrzi Yooz Espiritu Santuž aztan zajranaca chjatkatiñčha. Jalla niicž cjičha, Yooz mantiz timpu ančucaquiz žcatžinžquičha, nii.

²⁹ “Tsjilla cjesacha. Anaž jecmi tsjii azziz žoñž kjuyquiziqui luzi atasacha; nižaza anaž niž kinakunacami jwesi atasacha, ima čejlcanaqui. Nii čejlžcu, nekztan tjapa kinakunaca jwesi luzasacha.

³⁰ “Jecchalaj ana wejt fava, niiqui wejt quintačha. Nižaza jequit wejttañ chica Yooz kjutñi žoñinaca ana macjatskatchaja, jalla niiqui žoñinacžž Yoozquiztan tirkatcha.

³¹ “Jazič ančucaquiz chiyučha, tuž cjan: tjapa ujnacami nižaza tjapa ana zum takunacami pertuntaž cjesacha. Pero jakzilta žoñit Yooz Espiritu Santuž quinta chiyachaj niiqui, anaž pertuntaž cjesacha. Nii žoñiqui wiñaya ujchiz cjequičha.

³² Jakzilta žoñit wejt quinta chiyachaj niiqui, pertuntaž cjesacha. Pero jakzilta žoñit Yooz Espiritu Santuž quinta chiyachaj niiqui, anaž pertuntaž cjequičha. Nii žoñiqui wiñaya ujchiz cjequičha; anawira pertuntaž cjequičha.

FRUTANAC PUNTU

³³ Nekztan Jesusaqui tjaajinčičha, tuž cjan:

—Zuma muntžlaj niiqui, zuma frutaž pookčha. Nižaza ana zuma muntžlaj niiqui, ana zuma frutaž pookčha. Jalla nižtiquiztan muntiqui niž frutquiztan pajza, zuma ana zuma, jalla nii.

³⁴ Zkoražtakaz ančhucqui, ana zum žoñčucčha. ¿Kjažža ančhucqui zumanaca chiyasajo? Ančuca kuzquiz pinsitaqui ana zuma parijula. Jaziqui ančhucčha anazumanacapan chiiñinacaqui.

³⁵ Tsjii zuma žoñiqui zuma čiičha, niž zuma kuzquiztan. Nižaza tsjii ana zum žoñizti ana zumapaž čiičha, niž ana zuma kuzquiztan. Jaknužt kuzquiz pinsičhaja, jalla nuž čiičha žoñinacami.

³⁶ Ančucaquiz cjiwčha, juyzu casticž tjuñquiziqui zapa mayni cwinta tjaastančha, tjapa ana zuma čiiñanacami.

³⁷ Ančucaž čiiñtiquiztan jama jusjitaž cjequičha, ujchiz cječhaja, ana ujchiz cječhaja, nuž.

ANA CRIICHI ZOÑINACA

³⁸ Jalla nekztanaqui yekjap fariseo zoñinacaqui lii tjaajiñi maestruncztan Jesusizquiz cjichicha:

—Maestro, am milajru paañi cherez pecučha.

³⁹ Jesusaqui ninaczquiz kjaazičha tuž cjan:

—Ana zum zoñinacćhucćha. Ana Yoozquin kuzziz zoñinacćhucćha. ¿Kjažt tsjii milajru mayčha, zinalažtakaz? Jonáz cjita profetz zinala, niikaz anćhucacuz tjaata cjequičha.

⁴⁰ Jonasqui pajk ch'iz pjuchquiz žejlchičha čhjep majžtan čhjep aramžtan. Jalla nižta irata wejrqui tii yok koztan kamacćha čhjep majžtan čhjep aramžtan.

⁴¹ Juyzu tjuñquiziqui, jalla nii casticz tjuñquiziqui Nínive wajtchiz zoñinacaqui jacatataquičha. Nekztan ninacaqui tii timpuquiz kamñi zoñinacć uj tjeeskataquičha. Jonás Yooz taku paljaytiquiztan ninacaqui Yoozquin kuzziz cjissičha. Pero wejrtćha Jonasquiztan juc'ant chekanaqui. Tii timpuquiz kamñi zoñinacćati anaž Yoozquin kuz tjaacćha.

⁴² Nižaza casticz tjuñquiziqui tsjaa waruta maatak jilirqui jacatataquičha. Nekztan naaqui tii timpuquiz kamñi zoñinacć uj tjeeskataquičha. Naaqui najwkta yokquiztan tjonchinćha Salomonžtan zali, nižaza niž zuma razunchiz taku nonžñi. Pero tejcz wejrtćha Salomonquiztan tsjan juc'ant chekanaqui. Pero tii timpuquiz kamñi zoñinacćati wejt taku anaž nonz pecćha.

ZAJRA PUNTU

⁴³ "Tsjii zakal quint'asačha. Tsjii zajraqi zoñžquiztan ulanžcu kjoñ yokaran ojklayñitacćha, jeejzjapa kjurcan. Ana jeejz watćcuqui, kuzquiz pinsichičha, tuž cjan:

⁴⁴ "Jaziqui wejr quepaka jakziquiztan ulanzquitučhaja, jalla nicju". Jalla nuž quejpcu nii zoñžtan wilita zalchichicha. Nii zoñiqui pewžta kjuyažtakaztačha, cuza žcayí, azquitzta, pero laachitačha.

⁴⁵ Jalla nuž zaltiquiztan nii zajraqi pakallak juc'ant anawali zajranaca zjijqui ojkchichicha. Zajranaca zjijćcu, tjappacha nii zoñž kuzquiz luzzičha. Jalla nižtiquiztan nii zoñiqui juc'ant ana waliž cjissičha tuquita kamzquiztan. Jalla nižta irata tii ana zum zoñinacćquiz wataquičha. —Jalla nuž quint'ichichicha Jesusaqui.

JESUSIZ FAMILIA

⁴⁶ Jesusaqui iyapanž zoninacćquiz chiyatćha. Jalla nuž chiyan niž maaqui lajknacćtan irantizquichichicha. Zoñinacć tjiiquin zelan, nižtan parlis pecatćha.

⁴⁷ Tsjii zoñiqui Jesusizquiz mazzičha, tuž cjan:

—Am maa lajknacćtanpacha tii tjiiquiz žejlćha. Am kjawž, amtanž parlis pecćha.

⁴⁸ Jesusaqui mazñi zoñžquiz kjaazičha, tuž cjan:

—¿Ject wejt maaya? ¿Ject wejt jilanacaya?

⁴⁹ Jalla nuž chiižcu tjaajinta zoñinacć kjutñi kjaržtan tjeezičha, nižaza cjichichicha:

—Tinacćha wejt maami, wejt jilanacami.

⁵⁰ Jecnacami wejt arajpach Yooz Ejpž kuzcama kamćhaja, jalla ninacćha wejt jilanacami, wejt cullaquinacami, wejt maami.

13*ZKALA CHJACZ QUINTU*

¹ Nii noojpacha Jesusaqui kjuyquiztan ulanchichicha. Kot kjutñi ojkćcu kot atquiz julzičha. ² Jakziquin nii želatćhaja, jalla nicju zoñinacaqui walja ajczičha. Jalla nižtiquiztan tjaajinzjapa tsjii warcuquiz luzzičha. Nekz julzičha. Tjappacha zoñinacaqui kot at tjiiquiz žejlchichicha.

³ Jalla nekztanaqui Jesusaqui zoñinacćquiz walja Yooz puntunaca tjaajinchichicha, tjapan quintunacćtan. Jalla nuž tjaajincan tuž cjichichicha:

—Tsjii zoñiqui zkal čhjaqui tewcchichicha.

⁴ Zkala čhjaccan, parti simillaqui jicz latuquiz tjojtsichicha. Nekztan wežlakaz nii simillac ilziqui.

⁵ Parti simillazti maz yokaran tjojtsichicha. Nekziqui anaž wacchi pjila želatćha. Nekztan koloculla pjila zelan ratulla jeczičha.

⁶ Jalla nuž jecžtiquiztan sii kjakiqui ujchichicha; koluc sep'allchiztačha nekztan. Ratulla kjonchichicha.

⁷ Parti simillazti ch'ap ch'ap yokaran tjojtsichicha. Ch'apinacakazza ancha pajkchiqui, nižaza atpchiqui.

⁸ Parti simillazti zuma yokquiz tjojtsichicha. Nekztan zuma pookchichicha. Yekjap simillaqui patac čherchiz zapa zkal ozquiz pookchichicha; nižaza yekjap simillaqui sojta tuncan čherchiz zapa zkal ozquiz pookchichicha; yekjap simillaqui quinsa tuncan čherchiz pookchichicha.

⁹ Jakziltažlaja nonžni cjuñchiz niiqui, nonžla.

¹⁰ Jalla nekztanaqui tjaajinta žoñinacaqui Jesusižquiz macjatchičha, nižaza pewczičha, tuž cjan:

—¿Kjažtiquiztan am niža quintunacžtankaz žoñinacžquiz tjaajinya?

¹¹ Jesusaqui kjaazičha tuž cjan:

—Arajpach Yooz mantuquiz kamz puntuquiztan ch'aman intintazzuca quintunacžtan tjaajnučha. Ančhucaquizkaz Yoozqui zizkatz munčha nii puntunacquiztanaqui. Parti žoñinacžquiziqui Yoozqui ana zizkatz munčha.

¹² Jequit zizačhaja, jalla nižquiziqui juc'ant tjaajnz tjaataž cjequičha. Nekztan zumpacha zizniž cjequičha. Jequit ana zizačhaja, jalla niž kuzquiztan kjañtaž cjequičha nii ana intintaztanacaqui.

¹³ Jalla nižtiquiztan wejrqui tižta quintunacžtan paljajučha. Parti žoñinacaqui weriž paata cheržcumi ana cherchižtakaz cjissa. Nižaza weriž chiita taku nonžcumi, ana nonžnižtakaz tučha; ana intintazni žoñinacačha ninacaqui.

¹⁴ Jalla niža cjissiz cjen, Isafas profetž taku cumplissa. Jalla tuž Isaiasqui cjiřchičha: “Ančhucqui nonznaquičha. Nonžcu, ana intintazaquičha. Nižazaž cheraquičha. Cheržcu, anaž tantiyasaquičha.

¹⁵ Tii žoñinacž kuznacaqui chojru cjissičha; ana zumaž nonža. Nižaza čhujcchiz cjenami ana cheržni atčha, zur žoñižtakaz. Jalla nuž cjisnaquičha, ana cheržni cjisjapa, nižaza ana nonžni cjisjapa, nižaza ana kuzquiz intintiñi cjisjapa, nižaza ana wejtquin macjatzjapa. Ana wejtquin tjontiquiztan, ana liwriita cjesačha”.

¹⁶ ‘Ančhucčha cuntintu. Ančhucqui cheržni žoñinacžhucčha. Nižaza nonžni žoñinacžhucčha. Ančhucčha Yooziž wintičha.

¹⁷ Weraral cjiwčha. Wacchi profetanacami nižaza zuma kuzziz žoñinacami ančhucaž chertanaca cherez zakaz pecatčha. Pero ana cherchičha. Nižaza ančhucaž nonžtanaca nonz zakaz pecatčha. Pero ana nonžičha. Ančhuczti cherchinčhucčha, nižaza nonzinčhucčha.

¹⁸ Jazic ančhucž nonžnalla. Jalla tuž cjičha nii zkala čhajcz quintuqui.

¹⁹ Nii jicz latuquiz tjojtsi simillaqui jalla tižta žoñinacačha. Ninacaqui arajpach Yooz mantuquiz kamz puntuquiztan nonzcanpacha, ana intintazza. Diabluqui ninacž kuzquiz tjonžcu, ninacaž intintazta kjañčha.

²⁰ Nižaza nii maz yokquiz tjojtsi simillaqui jalla tižta žoñinacačha. Ninacaqui Yooz taku nonžcu nii ora cuntintuž nonža; cuntintuž catokčha.

²¹ Pero ninacaqui ana tjapa kuztan catoktiquiztan zkoluc zep'ichiz zkalažtakazza. Jalla nižtiquiztan ana tjuraquičha. Yooz taku criičiž cjen, sufraquičha; nižaza čhjaawjkattaž cjequičha. Jalla nekztan orallaž quejpsnaquičha.

²² Nižaza nii ch'ap yokquiz tjojtsi simillaqui jalla tižta žoñinacačha. Ninacaqui Yooz taku nonžcu, catokčha. Pero nekztan juc'anti kuz tjaačha tii muntu cusasanacquiz. Wali jiru kamzpanž pecčha. Persun kuzquiz pectiquiztanaqui Yooz taku tjažta ninacž kuzquiz. Jaziqui ana zuma kamčha; ana pookni zkalažtakaz kamčha.

²³ Nižaza nii zum yokquiz tjojtsi simillaqui jalla tižta žoñinacačha. Ninacaqui Yooz taku nonžcu, zuma tjapa kuz catokčha; zuma intintičha. Jalla nižtiquiztan zuma kamañchiz cjissa, zuma pookchi zkalažtakaz. Nii zuma pookni žoñinacaqui zuma kamañchizpanž cjissa, jaknužt tsjii simillaqui patac čhjerchiz, sojta tunc čhjerchiz, quinsa tunc čhjerchiz pookčhaja, jalla nižtačha.

ANA WAL PASTU QUINTU

²⁴ Tsjii quintužtan quint'ičičha Jesusaqui, tuž cjan:

—Arajpach mantiñi Yooz puntuqui jalla tužučha. Tsjii žoñiqui zuma similla čhjaczhičha zkal yokquiz.

²⁵ Tjapa niž kjuychiz žoñinacž tujan, tsjii quintra žoñiqui tjonchičha. Nekztan zkalquiz ana wal pastunaca čhjaczhičha. Jalla nuž ana wal čhjaczcu, ojkičha.

²⁶ Nii tric zkala ječžtan, chicapacha pajkchičha nii ana wal pastunacaqui. Nižaza pizcpacha pookchičha.

²⁷ Jalla nii cheržcu, nii piyunanacaqui patrunžquin mazni ojkičha. Niižquin mazzičha, tuž cjan: “Wejt Patruna, amiž čhjecta simillaqui zumažlaj niiqui, ¿jakziquiztan tii ana wal simillanaca pajkchitaya?”

²⁸ Patrunaqui kjaazičha, tuž cjan: “Tsjii quintra žoñiqui nižta paačhani”. Jalla nekztanaqui piyunanacaqui pewczičha tuž cjan: “¿Wejrnacqui nii ana wal pastunaca k'achasaya?”

²⁹ Nii patrunaqui cjichičha: “Ana k'achaquičha. Ana wal pastu k'achcan yekjap tricžtanpachaž k'achnasačha.

³⁰ Antiz pizcpacha pajkla, kujich timpu tjonzcama. Jalla nekztan wejt piyunacnacaqui cuchantaž cjequiča. Ninacaqui anawal pastunaca ricujaquiča. Nekztan kojchquiz čhejlznaquiča ujjapa. Jalla nekztanaqui tricuz ricujžcu, wejt tiric yaaz kjuyquiz majcznaquiča”.

³¹ Nižaza Jesusaqui tsjii puntuzakaz quint'ichiča, tuž cjican:

—Arajpach Yooz mantiz puntuqui tužuča. Tsjii žoñiqui niž yokquiz mostas similla čhjaccchiča.

³² Mostas simillaqui parti simillquiztan juc'ant zkoltallača. Jalla nuž cjenami pajkžcuqui tjapa zkalanacquiztan tsjan pakjiča. Pajk muntiztakaz cjissa. Nekztan wežlanacaqui nii mostas munti itzquiz tjuraž tjacñiz tjonča.

LIWATUR QUINTU

³³ Jesusaqui tsjii quint'ichizakazza, tuž cjican:

—Arajpach Yooz mantiz puntuqui jalla tužuča. Tsjaa maatak žonqui čhjep medida tupžcu nii liwatura jac'uquiz utčinča; nižaza t'ajzinča, tjapa nii t'anti maza tsjitzkatjapa.

³⁴ Tjapa tjaajintanacami quintunacžtan paljaytatača. Arajpach Yooz puntuquiztan tjaajincan, Jesusaqui quintunacžtankaz tjaajinchiča.

³⁵ Jalla nuž tjaajincan, Jesusaqui tužita profetaž čhiita takuqui cumplissiča. Profetaqui jalla tuž cjiirchiča:

“Quintunacžtankaz chiyuča. Tii muntu kallantiquiztan weriz čhiita tjaajintanaca ana intintazzucača. Jalla nii ana intintaztanaca paljayuča”.

ANA WAL PASTU QUINTU INTINTAZKATTA

³⁶ Jalla nižta puntunaca čhiiz žeržcu, Jesusaqui žoñinacžquiztan ojkchiča; kjuyquiz luzziča. Jalla nicju niž tjaajinta žoñinacaqui macjatchiča, tuž cjican:

—Nii zkal yokquiz čhjacta ana wal pastu, jalla nii puntuquiztan wejtnacaquiz intintazkatalla.

³⁷ Jalla nekztanaqui Jesusaqui intintazkatchiča tuž cjican:

—Wejrqui tsewctan cuchanžquita Yooz Žoñiča. Wejrčha zuma similla čhjaciñtqui.

³⁸ Nii zkal yokaqui tii muntuča. Nii zuma zkalanacaqui cjiča, arajpach Yooz mantuquiz kamñi žoñinacača nii. Ana zuma pastunacaqui diabluz mantuquiz kamñi žoñinacača.

³⁹ Nii ana wal pastu čhjactiimi diablupachača. Zkala ajz timpuqui tii muntu tucuzinz timpuča. Nii zkala ajzñi piyunanacaqui Yooz anjilanacača.

⁴⁰ Jaknužt nii ana wal pastunaca ricujžcu, ujqin ujjapa tjojttaž cječaj niiqui, jalla nižta irataž wataquiča tii muntu tucuzinžcan, ultim juyzuž nez.

⁴¹ Jalla nii oraqui wejt anjilanaca cuchanžcača, tii muntuquiztan tjapa ana wal žoñinaca ricuji. Wejt anjilanacaqui tjapa ujnaca paakatñi žoñinacami, nižaza tjapa ana wali paañinacami ricujaquiča.

⁴² Jalla nuž ricujžcu, infernuquin tjojttaž cjequiča kjakchi jurnuquiztakaz. Jalla nekzi ančaž kaaquiča, nižaza waljaž izke kjojnzaquiča.

⁴³ Yooz kuzcama kamñi žoñinacazti arajpach Yooz wajtquiz želaquiča, tjuñiztakaz kjancan. Jakžiltat nonžni cjuñichizčucžlaja, nonžna.

IYA QUINTUNACA

⁴⁴ Arajpach Yooz mantuquiz kamañiqui jalla tužuča. Tsjii yokquiz pajk paaz čhjojztatača. Tsjii žoñiqui nii čhjojzta paaz wajtchiča. Nii wajtžcu, wilta čhjojziča nekzpacha. Ancha cuntintutača. Nekztanaqui tjapa niž cusasanaca tuyi ojkchiča. Niiž cusasanaca tjuyžcu, nii yoka kjaychiča. Jalla nužuča arajpach Yooz kamañiquiz luzqui. Nii kamañiqui čhjulquiztanami juc'anti valorchizza.

⁴⁵ Nižaza arajpach Yooz mantuquiz kamañiqui tužuča. Tsjii tintichiz žoñiqui zuma valorchiz perlanaca kjayi ojkchiča.

⁴⁶ Nekztan tsjii anča zuma valorchiz perla wajtchiča. Jalla nekztanaqui tjapa niž cusasanaca tuychiča, nii perla kjayzjapa.

⁴⁷ Nižaza arajpach Yooz mantiz puntuqui tužuča. Tsjii ch'iz tanñi žoñinacaqui niž ch'iz tanz pajk kotquiz tjojtziča. Jalla nuž tjojtziquiztan tjpaman ch'iznaca tanchiča.

⁴⁸ Nekztan ch'iz tanz chjiipztanaqui, kot at tjiuquin jwessiča. Jalla nekztanaqui ninacaqui nijwc julžcu, ch'iz pjalziča. Zuma ch'iznaca canastiquiz yaaziča. Ana zuma ch'iznacazti tjojtchiča.

⁴⁹ Jalla nižta irataž tii muntu tucuzinžtanaqui wataquiča. Anjilanacaqui ulanžcaquiča žoñinaca pjali, zuma žoñinaca ana zuma žoñinaca, nii.

⁵⁰ Nii ana zuma zoñinacaqui infiernuquin tjojttaž cjequičha tsjii kjakchi jurnuquiztakaz. Jalla nekzi ancha kaaquičha, nižaza izke kjojaquičha.

⁵¹ Jalla nekztanaqui Jesusaqui zoñinaczquiz pewczičha, tuž cjan: —¿Ančhucqui tjapa tii weriž chiita quintunaca intintiya?

Nii željñi zoñinacaqui kjaazičha, tuž cjan:

—Wejt jiliri, wejrnacqui intintasučha.

⁵² Nekztan Jesusaqui cjichičha:

—Tsjii lii tjaajiñi maestruqui arajpach Yooz mantuquiz cjsnaquič niiqui, tsjii kjuya patrunažtakaz cjsisa. Jalla nuž cjistiquiztan niž ziztanacqiztan zuma tjaajintanaca zizkatasačha, tuquita tjaajintami nižaza anzta tjaajintami.

⁵³ Jalla tii arajpach Yooz mantiz puntuquiztan chiiz žeržcu, jalla nekztan Jesusaqui ojkchičha, niž persun yoka.

⁵⁴ Jalla nicju irantižcu, ajcz kjuyquiz tjaajiñi kallantichičha. Nii nonžñi zoñinacaqui ispantichičha tuž cjan: —¿Jakziquin tii zoñizti ancha tižtanaca zizñi cjsisitaž? ¿Kjažt ancha tižta milajrunaca paasajo?

⁵⁵ Carpinterož majchkazza tiiqui. Tiiž maaqui María cjitičha. Nižaza tiiž lajknacaqui Jacobočha, Josečha, Simonáčha, nižaza Judassa.

⁵⁶ Nižaza tiiž cullaquinacaqui učhumnacžtan kamčha. Jalla nižtiquiztan, ¿jakziquin tiiqui tižtanaca zizzitajo?

⁵⁷ Jalla nižta pinsitiquiztan ninacaqui Jesusižjapa quintra cjisičha. Pero Jesusaqui ninaczquiz cjichičha:

—Persun wajtchiz zoñinacami, nižaza persun kjuychiz zoñinacami tsjii Yooziž uchta profetžquiz ana rispitcha. Parti zoñinacazti nižquiz rispitcha.

⁵⁸ Jalla nižtiquiztan nekzi ana ancha milajrunaca paachičha, nii wajtchiz zoñinacaqui Jesusižquiz ana criichiž, nekztan.

14

JUAN BAUTISTA CONTA

¹ Jalla nii oranaca Herodes cjita jiliriqui Jesusiž quintu nonchičha.

² Jalla nuž nonžcu, niž piyunanaczquiz cjichičha:

—Juan Bautistala tiiqui. Ticziquiztan jacatatchila. Jalla nižtiquiztan walja milajrunaca paazjapa poderchizlani.

³ Jalla nuž tsucchičha Herodes jiliriqui. Tuquiqui Herodesqui Juan tankatchičha. Chejlžcu carsilquin chjitchičha. Jalla nuž paachičha, niž tjunaž cjen. Niž tjunqui Herodias cjitičha. Tuquiqui naaqui niž jilž tjuntačha. Felipe cjitatačha Herodes jilaqui.

⁴ Jalla nižta anawali zalziž cjen, Juanqui Herodižquiz chiizinchičha tuž cjan:

—Naa maatak žon anaž am tjun cjichuca. Felipiž tjunčha naaqui.

⁵ Jalla nuž chižintiquiztan Herodes Juan conz pecatčha. Pero zoñinaca ekscu ana atchičha. Tjapa zoñinacaqui Juanžquiz rispitchičha tuquita Yooz taku parliñi profetažtakaz.

⁶ Nii Herodesqui niž persun cupleañ tjuñquiziqui pijjsta paachičha. Jalla nuž pijjsta paan, naa Herodias majtqui ulanžquichinčha, invittaž zoñinacz yujcquiz tsati. Jalla nuž tsatan ancha justassičha Herodesqui.

⁷ Zuma tsattiquiztan Herodesqui taku onzičha, tuž cjan:

—Chjulum mayčhaja, jalla nii tjaasačha.

⁸ Ima mayan maaqui mataquiz mantichinčha, Juanž acha mayzjapa. Jalla naaža maaž chiita takucama Herodesquiztan maychinčha, tuž cjan:

—Tsjii chuwquiz Juan Bautistaž acha tjaalla.

⁹ Jalla nuž maytiquiztan Herodesqui llact'azzičha. Pero invittaž zoñinacz nonžnan taku onzičha. Jalla nižtiquiztan naaža maytacama mantichičha.

¹⁰ Juanqui carsilquiz želatčha. Jalla nijwc cuchanchičha, Juanž acha pooti.

¹¹ Jalla nekztanaqui tsjii chuwquiz acha zijcžcu, naaquiz tjaatatačha. Nekztan naaqui maaquinž tjaachinčha.

¹² Jalla nii quintu nonžcu, Juanž tjaajinta zoñinacaqui Juanž curpu chjichi tjonchičha. Nekztanaqui nuž chjichcu niž curpu tjatzičha. Jalla nuž tjažcu, Jesusižquin mazñi ojkchičha.

LULJL CHJERI TJAATA

¹³ Nii quintu nonžcu Jesusaqui najwk ojkchičha, ana zoñi željž yokquin. Warcuquiz ojkchičha. Pero zoñinacaqui nuž ojkchi quintu nonchičha. Jalla nekztanaqui ninacaqui nii yokaranpacha wajtanacqiztan ulanchičha. Jesusižquin wilta zali kojchin ojkchičha.

¹⁴ Warcuquiztan ulanžcu Jesusaqui tama zoñinaca cherchičha. Jalla nuž cheržcu niž kuzquiz sint'ichičha ninacztažjapa. Nekztan zijjcta laanaca chjetinchičha.

¹⁵ Waj zezi cjisnan niiz illzta zoñinacaqui Jesusižquin tjonchiča, tuž cjan: —Waj zezilla. Čheri pecča. Tii yokquiziqui anaž čheri žejl-la. Jalla nižtiqiztan tii zoñinaca cutzna. Okaj cjee, joch kjuyaran čheri kjayžcumi lulachani tinacacni.

¹⁶ Jesusaqui ninacžquiz cjichiča:

—Anaž cuchta cjesača. Ančucaž čheri tjaaquiča.

¹⁷ Nekztanaqui ninacaqui kjaaziča, tuž cjan:

—Wejtnacalta ana lujlz čheri žejlča. Pjijska t'antalla pizc ch'iztankaz žejlča.

¹⁸ Jesusaqui ninacžquiz cjichiča:

—Nii čheri wejtquiz zjijca.

¹⁹ Jalla nekztanaqui Jesusaqui zoñinacžquin mantichiča, pasturan julzna cjee. Jalla nuž julzkatžcu nii pjijska t'anta nii pizc ch'iz persun kjaržtan tanziča. Tanžcu tsewchuc arajpach kjutñi cherziča, nižaza Yooz Ejpžquin gracias cjan chiichiča. Nekztanaqui t'anta kjolžcu tjaajinta zoñinacžquiz tojunchiča. Nekztan ninacaqui parti zoñinacžquin partir paychiča.

²⁰ T'antanaca ch'iznaca lujlžcu liwjpacha nii zoñinacaqui chjekchi cjissiča. Nižaza nii t'antiquiztan nii ch'iznacquiztan žejtchinacaqui tuncapan canasta chijpi ricujtača.

²¹ Jalla nii t'anta ch'iz lujlchi zoñinacaqui pjijska warank luctakanacatača. Maatakanacami ocjalanacami ana kantatača nii oraqui.

JESUSAQUI KJAZ JUNTUŃ OJKCHA

²² Nekztanaqui Jesusaqui niiz tjaajintanaca warcuquiz luzkatchiča, niiz tuqui kota kakjajajo tsjii latu kotquin irantizcama. Jesusazti nii žejlñi zoñinacžquiz persun kjuyquin okaj cjan nijwctan najwkhuc cuchanchiča.

²³ Jalla nuž cuchanžcu Jesusaqui curulla yawchiča, zinalla Yooz Ejpžtan parlisjapa. Jalla nuž mayizan ween cjissiča. Nicju zinatača Jesusaqui.

²⁴ Nii oraqui niiz tjaajinta zoñinacaqui kotž taypiquin okatča. Tjamiqi warcuž quintra walja tjamatča. Nižaza kjaz ljojki warcu waljaž aytinguiskatatča.

²⁵ Wali chawc kjanatati Jesusaqui ninacžquin žcatžinčiča, kjaz juntuñ ojkcan.

²⁶ Niiz tjaajinta zoñinacaqui, Jesusa kjaz juntuñ tjoñi cheržcu, ancha tsucchiča, nižaza kjawchiča, tuž cjan:

—Cuntinažlani —cjican kjawchiča.

²⁷ Pero ninacaž kjawan Jesusaqui ninacžquiz paljayžquichiča, tuž cjan:

—Tjup kuzziz cjee. Wejrpanča. Anaž tsuca.

²⁸ Nekztanaqui Pedruqui paljaychiča, tuž cjan:

—Wejt Jiliri, amžlaj niiqui, wejr kjawznalla kjaz juntuñ ojkzjapa am irantiscama.

²⁹ Jesusaqui niizquiz cjichiča:

—Pichalla amqui.

Nekztanaqui Pedruqui warcuquiztan ulanžcu, kjaz juntuñ oki kallantichiča, Jesusa jakziquin tjenatčhaja, jalla nicju.

³⁰ Nii walja tjamiž cjen tsucchiča. Tsucžcu, kjazquiz luzi kallantichiča. Nekztan kjawchiča, tuž cjan:

—Wejt Jiliri, wejr yanapalla, wejr žejtkatalla.

³¹ Nii orapacha Jesusaqui Pedruž kjara tanziča, nižaza niizquiz cjichiča:

—Ancha upa kuzzizamčha amqui. ¿Kjažtiqiztan am kuz turwayskatchamtaya?

³² Ninacaž warcuquin luztan, tjamiqi zekchiča.

³³ Jalla nii cheržcu warcuquiz žejlñi zoñinacaqui Jesusiž yujcquiz quillziča, tuž cjan:

—Chekapan werara Yooz Maatimkalala amqui.

LAANACA ČHJETINTA

³⁴ Jalla nuž kota kajžcu, Genesaret cjita yoka irantichiča.

³⁵ Nii yokchiz zoñinacaqui Jesusa pajchiča. Jalla nekztan "Jesusa tekz žejlča", cjan liwj nii yokaran mazmazziča. Nii quintu maztiqiztan tjapa laanaca zijjchiča, jakziquin Jesusa želatčhaja, jalla nicju.

³⁶ Nii zoñinacaqui Jesusižquiz walja rocchiča, tuž cjan: —Am zquit puntalla mekaz lanzkatžinalla. Tjapa lanžni zoñinacaqui žejtchi cjissiča.

15

UJ PUNTU

¹ Jalla nekztanaqui tsjii kjaž fariseo zoñinacaqui nižaza tsjii kjaž lii tjaajiñi maestruncžtanpacha Jesusižquiz macjatchiča. Ninacaqui Jerusalén wajtquiztan tjonchiča. Jesusižquiz pecunchiča, tuž cjan:

² —¿Kjažtiquiztan amiž tjaajintanacaqui ućhum tuquita atchi ejpnacž custurumpi ana cazjo? Ana kjara awjžcu, lujl-la.

³ Pero Jesusaqui ninacžquiz pewczića, tuž cjan: —Anćhuczi, ¿kjažtiquiztan Yooz mantita lii ana cazjo? Nii lii caz cjenpacha persun custurumpinacakaz paala anćhucqui.

⁴ Yoozqui tuž cjichića: “Am maa ejpmi rispitaquića”. Nižaza cjichića: “Jequit persun maa ejpž quintra chjaawjkataćhaja, jalla niiqui contaj cjila”.

⁵ Pero anćhuczi tuž tjaajiñćhucća: Zoñiqui persun maa ejpžquin chiyasaća, tuž cjan: “Am anal yanapasaćha. Tjapa wejt cusasanaca Yoozquin tjaataća nekztan”.

⁶ Jequit nižta chiyaćhaj niiqui, niž persun maa ejpžquiz anaž yanapchuca cjesaćha. Jalla nuž tjaajincan anćhucqui Yooz mantita ana walkatchinćhucća, persun custurumpi jarukaz ojkszjapa.

⁷ Ana wal kuzziz zoñinaca. Isaías cjita profetaqui anćhuca puntuquiztan zuma kjana cjiirchića, tuž cjan:

⁸ “Tii zoñinacaqui atžtankaz wejtquiz rispitića. Pero tinacž ultim kuzzi wejtquiztan ažquinća. Nižaza wejr anaž rispitića.

⁹ Tinacaqui inakaz wejtquin custurumpi paaća. Tinacž tjaajintanacaqui zoñiž manti-takazza”.

¹⁰ Jalla nekztanaqui Jesusaqui zoñinaca kjawzića, nižaza tuž cjichića:

—Nonžna, nižaza intintazñi kuzziz cjee.

¹¹ Anaž zawnctan kjuylchuc zoñž atquiz luzñiqui uj cjesaćha zoñžquiziqui. Antiz zoñž atquiztan ulanñi, jalla nižž uj cjesaćha zoñžquiziqui.

¹² Jalla nuž chiiťquiztan Jesusiž tjaajinta zoñinacaqui nižžquin macjatchića, nižaza cjichića:

—Nii fariseo zoñinacaqui am chiita taku nonžcu ancha žawjwatćha. ¿Nii ana naychamjo?

¹³ Pero Jesusaqui ninacžquiz kjaazića, tuž cjan:

—Jakzilta zkalat wejt arajpach Yooz Epiž ana ćhjacta cjećhaja, jalla nii zkalaqui zep'iztanpacha kajžtaž cjequićha.

¹⁴ Ninacžquiz ana chjiťquiza. Ninacaqui zur zoñinacažtakazza. Yekja zuranacžquiz irpican, pucultanpacha wali ojtquiz tjoťsnasaća.

¹⁵ Pedruqui Jesusižquiz cjichića:

—Tii puntuquiztan wejtnacaquiz tjaajznalla.

¹⁶ Jesusaqui cjichića:

—¿Anćhucqui zakaz ana intintiya?

¹⁷ Tjapa atquiz luzñi ćheriqui pjuchquiz luzza, nekztan wir kjutñiž ulanća. ¿Jalla nii ana intintiya?

¹⁸ Pero atquiztan ulanñi chiitaqui kuzquiztan tjonća. Jalla nii zoñžquiziqui uj cjesaćha.

¹⁹ Kuzquiztanpanž ulanća tižtanaca, ana wali pinsinacaqui, nižaza zoñi conzqui, nižaza adulteriuquiz ojklayzqui, nižaza yekja maatakžtan žejlžqui, nižaza cusasanaca kjañžqui, nižaza toscar taku chiižqui, nižaza ana wal taku joojoozqui.

²⁰ Jalla nižtanaca uj cjesaćha zoñžquiziqui. Pero ana kjara awjžcu, jalla nižta lujlžcu, anapan uj cjesaćha. Jalla niiqui zoñž custurumpikazza.

YOOZQUIN KUZZIZ MAATAKA

²¹ Jalla nekztanaqui Jesusaqui nijwctan ojkićhića Tiro nižaza Sidón cjita yokquin.

²² Jalla nijwc želan tsjaa cananea yokchiz zoñqui Jesusižquiz tjonzinća, kjawcan:

—Wejt Jiliri. Davidž majchmajťquiztan tjonñi. Wejr oksnalla. Wejt majťqui zajraž tantaća. Jalla nižťquiztan ana wira wali laaćha.

²³ Jesusaqui ana ćjulumi kjaazića. Jalla nekztan nižž tjaajinta zoñinacaqui roqui tjonchića, tuž cjan:

—Tsjiiika oka cjee. Ućhum wirquiz kjaw jawi apžquićha.

²⁴ Nekztanaqui Jesusaqui cjichića:

—Yooz Ejpqui wejr cuchanžquichića Israel wajťchiz zoñinacžquin, ninacžquinkaz. Nii Israel zoñinacaqui katchi uuzanacažtakazza.

²⁵ Pero naa maatak zoñqui macjatžquichinća, nižaza nižž yujcquiz quillzinća, tuž cjan:

—Wejt Jiliri, wejr yanapt'alla.

²⁶ Nekztan Jesusaqui naaquiz cjichića:

—Maatinacž t'anta ana kjañasaća, pawcžquin tjaazjapaqui. Jalla niiqui ana wali cjesaćha.

²⁷ Jalla nuž chiižinta cjenami naaqui cjichinća:

—Jesalla, wejt Jiliri. Pero pacunacami patrunaž mizquiztan tjawkzi ćherilla lujlća.

²⁸ Jalla nekztanaqui Jesusaqui cjichicha:

—Cullacalla, walja Yoozquin kuzzizamcha. Jaknužum am pecchaja, nužoj cjila.

Jalla nii orapacha naaža majtqui žejtchi cjissincha.

LAANACA CHJETINTA

²⁹ Jalla nekztanaqui Jesusaqui nijwctan ulanchiicha, Galilea cjita kot ata watchiicha. Nekztan tsjii curulla yawžcu julziča.

³⁰ Tama žoñinacaqui irantižquichiča, jakziquin nii želatčhaja, jalla nicju. Ninacaqui laanaca zjijcchiča, zuch žoñinaca, zur žoñinaca, ana chiiñi žoñinaca, chjojritžta žoñinaca, tjpaman laanaca, jalla ninaca zjijctatača, Jesusiž yujcquin. Jesusaqui ninaca liwž čhjetinchiča.

³¹ Jalla nuž cheržcu, žoñinacaqui ancha ispančichiča. Ana chiiñi žoñinacaqui chiiñi cjissiča. Chjojritžta žoñinacaqui žejtchi cjissiča. Zuch žoñinacaqui ojklajñi cjissiča. Zur žoñinacaqui cherñi cjissiča. Jalla nuž cheržcu žoñinacaqui walja Yooz honora waytichiča, “Israel žoñinacž Yooz ancha honorchiz cjilalla”, cjan.

JESUSAQUI CHJERI TJAACHA

³² Jalla nekztanaqui Jesusaqui niiž tjaajinta žoñinaca kjawžcu, tuž cjichicha:

—Tii žoñinacžtajapa kuzquiz anchal sint'ucha. Chjep maj wejttan čica žejlča, nižaza ana čjul čherchizza. Persun kjuyanacquin anal cutz pecuča ana lujlchi cjen. Tinacaqui ana lujlchi okaquiz niiqui, jiczaranž tismayasacha.

³³ Nekztan niiž tjaajinta žoñinacaqui cjichicha:

—ŽJaknužt čheri cuncicas, tii wacchi žoñinacžtajapajo? Tii yokquizic anaž kjayzmi žejlča.

³⁴ Jesusaqui ninacžquiz pewcziča, tuž cjan:

—ŽKjaž t'antichizt ančhucjo?

Ninacaqui kjaaziča, tuž cjan:

—Pakallak t'antača, nižaza tsjii kjaž ch'iznacžtan.

³⁵ Jalla nekztan Jesusaqui nii žoñinacžquiz mantichiča, yokquiz julznao.

³⁶ Nekztan persun kjaržtan nii pakallak t'anta ch'iztanpača tanzicha. Jalla nekztan Yoozquin gracias cjan tjaachiča. Nekztan nii t'antanaca ch'iznaca kjolkjolziča. Nekztan niiž tjaajinta žoñinacžquiz toj tojziča. Nekztan ninacazti partir paychiča nii tama žoñinacžquiz.

³⁷ Tjapa nii tama žoñinacazti čheri lujlžcu chjekchi cjissiča. Nižaza žejtchinacaqui pakallak canasta chjijpi ricujtatača.

³⁸ Pusi warank luctak žoñinacatača lujlchiqui. Nižaza nii oraqui maatakami ocjalami muzpa želatčhaj, pero ana kantatača.

³⁹ Jalla nekztanaqui Jesusaqui nii žoñinacžquiz liwž cuchanchiča okajo. Niimi warcuquin luzziča. Nekztan Magdala cjita yokquin ojkičiča.

16

JESUSIZ QUINTRA ŽOÑINACA

¹ Fariseo žoñinacami, saduceo žoñinacami Jesusa cheržni ojkičiča. Jesusiž quintra uj jwes pecatča. Jalla nižtiquiztan Jesusižquiztan maychiča, arajpach milajru tjeeznao, tsjii sinalažtakaz.

² Jesusaqui ninacžquiz kjaaziča, tuž cjan:

—Zezilla arajpach tsjiri ljoc cjissi cjen, “Jakac zuma tjuñiž cjequičha” cjiñčuchča.

³ Nižaza wentan tjuñi tjewktan arajpach tsjiri ljoc cjissi cjenaqui, walja tsjiri cjenaqui, “Tonjiqui ana zum tjuñiž cjequičha” cjiñčuchča. Ana zum kuzziz žoñinaca. Ančhucqui tsewcta tsjiri cheržcu, zuma tjuñi ana zuma tjuñi cjechaja, jalla nii zumpacha zarayiñčuchča. Pero ančhucqui weriž paata sinalanaca cheržcu, ana zuma zarayiñčuchča.

⁴ Ana zum kuzziz žoñinacaqui Yoozquiztan zarakchiž cjen, sinala sinala mayča. Ančhucžtajapa Jonás puntuqui siñalažtakaz žejlča. Ana iya tjeezta cjequičha. —Jalla nuž chiižcu Jesusaqui ninacžquiztan zarakchiča.

⁵ Niiž tjaajinta žoñinacaqui kotquin tsjii latu kajkičiča. Nižaza t'anti žaka chjitz tjat-skalča.

⁶ Nekztanaqui Jesusaqui ninacžquiz cjichicha:

—Tii taku nonžna. Fariseo žoñinacž liwaturžquiztanami nižaza saduceo žoñinacž liwaturžquiztanami zumpacha cwitasaquičha.

⁷ Jalla nii čhita nonžcu, tjaajinta žoñinacaqui ninacpora parlassiča, tuž cjan:

—Učhumqui ana t'anta zjijctacha, jalla nižtiquiztan nižta čhiča.

⁸ Jesusaqui ninacž pinsita ziccu, ninacžquiz paljaychiča tuž cjan:

—¿Kjažtiquiztan ančhucqui t'antiquinkaz pinsejo? Ančhucqui ancha upa kuzzizchuccha.

⁹ Anapanž ančhucqui wira intintas, žitiža ana cjuñžo? Pjijska t'antiquiztan pjijska warank luctak žoñžquiz partir payžcu lujlkatchinla. Nekztan žkjaž canasta nii žejtchi t'antanaca ricujtataya?

¹⁰ Nižaza pakallak t'antiquiztan pusi warank luctak žoñžquiz partir payžcu lujlkatchinla. Nekztan žkjaž canastat nii žejtchi t'antanaca ricujtataya?

¹¹ Fariseo žoñinacž puntuquiztanami nižaza saduceo žoñinacž puntuquiztanami, jalla nii liwatur puntu chiičinča. Jalla nii chiitaqui anača ultim t'anti puntuquiztanaqui. ¿Anaž nii intintas, ančhucya?

¹² Jalla nekztanaqui ninacaqui zumpacha intintazziča. Jesusaqui ultim t'anti liwaturquiztan ana nii puntu chiižinčiča. Pero fariseož tjaajinta puntuquiztan nižaza saduceož tjaajinta puntuquiztan, jalla nii puntu chiižinčiča, jalla nii tjaajintanacquiztan cwitasauiča, cjican.

¿JECT JESUSAQUI?

¹³ Jalla nekztanaqui Jesusaqui Cesarea de Filipo cjita yokquin ojkičiča. Nii irantizcu, niiž tjaajinta žoñinacžquiz pewcziča, tuž cjican:

—Wejrqui tsewcta cuchanžquita Yooz Žoñtča. Žoñinacaqui wejt puntuquiztan žkjažt cjeejo?

¹⁴ Ninacaqui kjaaziča, tuž cjican:

—Yekjapanacaqui am puntuquiztan tuž cjicha: “Juan Bautistača niiqui”. Yekjapanacaqui cjicha, “Eliassa niiqui”. Nižaza yekjapanacaqui cjicha, “Jeremiassa niiqui”. Nižaza yekjapanacaqui cjicha, “Tsjii yekja profetača niiqui”.

¹⁵ Jalla nekztanaqui Jesusaqui ninacžquiz pewcziča, tuž cjican:

—Ančhuczi wejt puntuquiztan žkjažzaž cjeejo?

¹⁶ Simón Pedruqui tuž cjichiča:

—Yooziž uchta Cristumča amqui, žejtñi Yooz Maatimča.

¹⁷ Jesusaqui nekztan cjichiča:

—Simón, Jonás maati, jalla nuž chiitiquiztanaqui cuntintum cjee amqui. Anaž jakzilta žoñimi amquiz nii tjaajinchiqui. Wejt arajpach Yooz Ejppankazza am zizkatchiqui.

¹⁸ Amquiz cjiwča. Tekztan najwkchuc amqui Pedro cjitam cjequiča. Nižaza tii maz simintuchiz wejrqui wejt icliza kjuyača. Wejt iclizaqui wejtquin kuzziz žoñinacača. Ticzmi wejt iclizquiztan ana atipasača.

¹⁹ Wejrqui amquiz llawiztakaz poder tjaača žoñinaca arajpach Yooz mantuquiz luzkatzjapa. Tii muntuquiz amqui jequit Yooz mantuquiz luzkatačhaja, jalla niiqui arajpach Yooz wajtquin luzkatta zakaz cjequiča. Nižaza tii muntuquiz jequit Yooz mantuquiz ana luzkatačhaja, jalla niiqui arajpach Yooz wajtquin ana luzasača.

²⁰ Jalla nekztanaqui Jesusaqui niž tjaajinta žoñinacžquiz mantichiča, tuž cjican:

—Anaž jeczquizimi maznaquiča, “Niiča Cristuqui” cjicanaqui.

JESUSAQUI NIZ TICZ PUNTU CHIICHA

²¹ Nekztan najwkchuc Jesusaqui tjaajinta žoñinacžquiz niž ticz puntuquiztan paljayi kallantichiča, tuž cjican:

—Wejrqui Jerusalén watja ojktanča. Jalla nicju nii wajtchiz jilirinacami, nižaza timplu jilirinacami, nižaza lii tjaajiñi maestruncami jalla ninacaqui wejr walja sufriskataquiča. Ultimquiziqui wejr conaquiča. Jalla nuž contiquiztan čhjep majquiztan jacatatača.

²² Nekztanaqui Pedruqui Jesusa tsjii latu chjitchiča, chiižinzjapa. Chiižinžcan, tuž cjichiča:

—Wejt jiliri, amiž nuž chiitacama Yooz Ejpqui anaj niic nuž munlalla. Amquiz anaj niža watlalla.

²³ Jalla nuž chiitiquiztan Jesusaqui Pedruž kjutñi kjutziča, tuž cjican:

—Satanás, wejtquiztan zaraka. Amqui wejr ujquiz tjojtskatz pecča. Am kuz pinsitaqui anaž Yooz pinsita, antiz žoñiž pinsitakazza.

²⁴ Jalla nekztanaqui Jesusaqui niž tjaajinta žoñinacžquiz cjichiča:

—Jequit wejtta chica kamz pecčhaj niiqui, primiruqui persun kamañ wiraqui tjazla. Sufrijsapaqui listoj cjila, ticzama. Nekztan wejtta chicaž kamaquiča.

²⁵ Jakziltat persun kamañ wira ana tjats pecčhaj niiqui, arajpach kamañaqui ana tjaataž cjequiča. Jakziltat wejt laycu persun kamañ wira tjaznačhaja, jalla niiqui arajpachquin wiñaya kamaquiča.

²⁶ Tsjii žoñiqui tjapa tii muntuquiz žejlñi cusasanaca kanasača. Pero nekztan infernuquin okaquiz niiqui, tjapa nii kanta cusasanaca, čhjuljapat sirwejo? Inakaz cjequiča. Arajpachquin Yooztan kamzqui persun liwriizqui anaž paaztanac kjayasača.

²⁷ Wejrqui tsewtan cuchanzquita Yooz Zoñt'cha. Tsjii noojuqui wejrqui wejt anjilancžtan quejpžcača; wejt Ejpž wali aztan quejpžcača. Jalla nuž quejpžcu, wejrqui zapa maynižquiz tjaača, jaknužt kamčhaja, jalla nii jaru tjaača.

²⁸ Weraral cjiwčha. Tsjii noojuqui wejrqui mantiz poderžtan tjonacha. Yekjap tekzi žejlñi žoñinacaqui nii noojcama ana ticznaquičha.

17

JESUSAQUI TSJEMATAZ CJISSICHA

¹ Sojta tjuñquiztan Jesusaqui Pedružtan, Jacobžtan, Juanžtan, Jacobož lajk, jalla ninaca chjitchičha. Ninacžtan alaja nuž pajk curquin ojkžcu, yawchičha.

² Jalla nicju ninacžt yujcquin tsjemat chercherchiz cjissičha. Jesusiž yujcqui walja c'ajñi cjissičha tjuñžtakaz. Nižaza niž zquitimi muzpa llijñi cjissičha, nižaza ancha chiwi.

³ Nii orapacha Moiestan Eliastan parizichičha. Nii pucultan žoñiqui Jesusižtan parlican želatčha.

⁴ Jalla nekztan Pedruqui Jesusižquiz cjichičha:

–Wejt Jiliri, tekz žejlžqui walikazza. Am pecaquiz niiqui, čhjep chjujlli kjuyaž kjuyača wejrnacqui, tsjiiqui amta, tsjiiqui Moiesta, tsjiiqui Eliasta.

⁵ Pedruž nuž chiyān, zuma kjañi tsjiriqui ninacžquiz urpuntichičha. Tsjirquiztan tsjii jora chiižquichičha, tuž cjan:

–Tiičha wejt k'ayi Maatiqui. Tiiž cjen anchal cuntintutčha. Jalla tiiž takunaca catoka.

⁶ Jalla nii chiižquita nonžcuqui, nii čhjep tjaajinta žoñinacaqui yokquiz tuzi t'okzičha. Muzpa tsucchičha.

⁷ Jalla nuž tuzi t'okzi želan, Jesusaqui ninacžquiz macjanzquichičha. Ninacžquiz kjaržtan lanlanžinchičha, tuž cjan:

–Tsijsna. Anača tsuca.

⁸ Ninacaqui acha waytižcu Jesusa alajakaz cherzičha, ana iya jecmi cherchičha.

⁹ Nekztanaqui curquiztan chjijwžcan, Jesusaqui ninacžquiz mantichičha, tuž cjan:

–Anaž jeczquizimi nii ančhucaž cherta maznaquičha, weriž ticziquiztan jacatatta, jalla niicama.

¹⁰ Nekztanaqui niž tjaajinta žoñinacaqui Jesusižquiz pewczičha, tuž cjan:

–Lii tjaajiñi maestrunacaqui cjiñičha, primero Eliās profetaqui tjonstanča, nii. ¿Kjažtiquiztan nii maestrunacaqui nižta chiya?

¹¹ Jesusaqui kjaazičha, tuž cjan:

–Ultimupanž Eliasqui wejt tuqui tjonchičha. Niiqui tjappachaž tjaczičha, wejr tjonžjapa.

¹² Wejrqui cjiwčha. Eliasqui tjonchitala. Pero lii maestrunacaqui nii Eliās ana pajchila. Antiz ninacž kuzcama nii Eliās čhjulumi sufriskatchičha. Nižaza ninacaqui wejrzakaz ancha sufriskataquičha.

¹³ Jalla nuž Jesusiž chiiquiztan nii tjaajinta žoñinacaqui tantiyazzičha, Juan Bautistačha Eliasqui, nii.

TSJII MAJCHQUI ZAJRAZ TUCKATTA

¹⁴ Jalla nekztanaqui curquiztan chjijwžcu, parti žoñinacžquiz irantižquichičha. Nekztan tsjii žoñiqui Jesusižquiz macjatžcu, niž yujcquiz quillzičha. Nižaza tuž cjichičha:

¹⁵ –Wejt Jiliri, wejt majchquiz okžnalla. Niiqui t'ucñipanča. Ancha sufričha. Avisac ujquiz tjojtsa, nižaza kjazquiz zakaz tjojtsa.

¹⁶ Tekz zjijechinča am tjaajinta žoñinacžquiz. Ninacaqui ana čhetñi atchičha.

¹⁷ Jesusaqui kjaazičha, tuž cjan:

–Tii timpuquiz kamñi žoñinacaqui ana Yoozquin kuzzizza, ana zumača. ¿Čhjulorcamat wejr ančhucatan želaqui? ¿Čhjulorcamat ančhucaquiz awantaqui? Wejtquin zjijca nii am majch.

¹⁸ Jalla nekztanaqui Jesusaqui nii majch tanñi zajra ujzičha; nekztan chjatkatchičha. Jalla nii orapacha žejtchi cjissičha.

¹⁹ Jalla nekztanaqui tjaajinta žoñinacaqui Jesusižquiz zinapora pewczičha, tuž cjan:

–¿Kjažtiquiztan wejrnacqui zajraž tanta žoñi ana čhetñi atchintaya?

²⁰ Jesusaqui kjaazičha, tuž cjan:

–Ančhucqui anača Yoozquin tjapa kuzziz. Jalla nižtiquiztan ana chjatkati atča. Weraral cjiwčha. Tsjii mostasa cjita simillaqui koltallača. Čhjectiquiztan walja pakjiz pajkčha. Yoozquin tjapa kuzzizčhuc cječhaj niiqui, jalla tuž paasača. Tii curumiž mantasača, tuž cjan: “Tekztan najwk oka”. Jalla nuž mantitiquiztan curucz okasača. Tjappacha čhjulumi paasača ančhucqui, ultimu Yoozquin tjapa kuztan cječhaj niiqui.

²¹ Pero tii punta zajra chjatkatzjapa, Yoozquin mayiziz waquiziča. Nižaza ayunas waquiziča.

²² Galilea yokaran juntupacha ojklajcan, Jesusaqui niiz tjaajinta zoñinacžquiz chichiča, tuž cjican:

—Wejrqui tsewctan cuchanžquita Yooz Zoñtča. Wejrqui zoñinacž kjarquin intirjital cjeeča.

²³ Nižaza contal cjeeča. Nižaza čhjep majquiztanzi jacatatača.

Jalla nuž čhiitiqiztanaqui ancha llaquisiskatchiča nii tjaajintanacžquiz.

TIMPLU IMPUESTO

²⁴ Nekztan Jesusižtan niiz tjaajintanacžtanpacha Capernaum watja irantichiča. Nekztan timplujapa impuesto cobriñinacaqui Pedružquin cheržni ojkičiča. Jalla niizquin zalzcu pewcziča tuž cjican:

—¿Ančuca tjaajiñi maestruqui timplu impuesto ana pacñikaya?

²⁵ Pedruqui kjaaziča, tuž cjican:

—Impuesto pacñipančhay.

Jalla nekztanaqui Pedruqui kjuyquiz luzziča, jakziquin Jesusac želatčhaja, jalla nicju. Ima Pedruž chiyen, Jesusaqui niizquiz paljaychiča, tuž cjican:

—Simón, ¿tii tantiya? Tii muntuquiz žejlñi jilirinacaqui impuesto cobriñiča. ¿Jakziltizquiztan cobriya? ¿Persun wajtchiz zoñinacžquiztankaya? už žyekja wajtchiz zoñinacžquiztan, ja'?

²⁶ Pedruqui kjaaziča tuž cjican:

—Yekja wajtchiz zoñinacžquiztanpanča.

Nekztan Jesusaqui cjichiča:

—Jalla nižtiqiztan nii jilirinacž persun wajtchiz zoñinacaqui impuestonaca ana pacasača.

²⁷ Jalla nuž cjenami, anaz jecmi učum quintra iñiziñi cjiskatz pecuča. Jaziqui kotquin oka. Nekztan čh'iz tanzjapa kjazquiz anzuelo tjojtznaquiča. Primiru tanzi čh'iz leznaquiča. Nii čh'iz ata waakatžcu, tsjii paaz wachaquiča. Nii paazqui wejt impuestojapa, nižaza am impuestojapa wachaquiča. Nii paaz čhjicha, učum impuestonaca paczjapa.

18

¿JECT TUCQUIN CJES?

¹ Jalla nii orapacha tjaajinta zoñinacaqui Jesusižquiz macjatžcu pewcziča, tuž cjican:

—Arajpach Yooz wajtquiz, ¿ject juc'ant pajk puestuquin uchtaž cjeequi?

² Jalla nekztanaqui Jesusaqui tsjii uza kjawziča. Nii uza ninacž taypiquiz tsijt-skatchiča.

³ Nekztanaqui Jesusaqui cjichiča:

—Weraral cjiwčha. Ančhucqui tii ocjalž kuz irata, nižta kuzziz pecčha. Ančuca kuz ana campiita cječhaj niiqui, arajpach Yooz wajtquiz anapan luzasača.

⁴ Jalla nižtiqiztan tii ocjalž kuz irata, jalla nižta humilde kuzziz cjis waquiziča. Jakzilat nižta kuzziz cjisnaquiz niiqui, jalla ničha arajpach Yooz wajtquiz juc'ant honorchizquij. Juc'ant zuma puestuquiz uchtaž cjequiča.

⁵ Jequit weriž cjen tsjii ocjalžtakaz humilde kuzziz zoñi risiwčhaja, jalla niiqui wejrza-kaz risiwčha.

PAAZQUIZTAN CWITASA

⁶ Nižaza jakzilta humilde kuzziz zoñit wejtquin tjapa kuztan criyačhaja, jalla niizquiz ana jakziltami ujquiz tjojtskatz waquiziča. Ujquiz tjojtskataquiz niiqui, nii ujquiz tjojtskatñi zoñž jorquiz tsjii pajk molinu tjaaj mokžcu, koz kotquiz jacuntiz waquiziča. Jalla nii tsjan cusaž cjesača nii ujquiz tjojtskatñi zoñžtaqui.

⁷ ¡Zoñinacajay! Ujquiz tjojtaquiča, nižaza ujquiz tjojtskataquiča. Pero nekztan ana walinača tjonaquiča. Tii muntuquiz ujquiz tjojtskatñinaca panž želaquiča, pero nii ujquiz tjojtskatñinacaqui ninacžtajapa ana waliž cjequiča.

⁸ Jalla nižtiqiztan am kjarazlaj už kjojčazlaj ujquiz tjojtskatčhaja, nii uj paañi kjara cjicu už kjojča cjicu pootzna, nižaza najwk tjojta. Jalla nuž tsjii kjara cjicu už tsjii kjojča cjicu pertissi cjenami am parti curpuqui ana infiernuquin tjojttaž cjesača. Jalla nuž waliž cjesača.

⁹ Nižaza am čhjujcquiqui ujquiz tjojtskatčhaja, jalla nii čhjujcquij leczna, nižaza najwk tjojta. Yooztan wiñaya kamzjapaqui tsjii čhjujquiqui pertissiž cjequiz niiqui, waliž cjequiča. Tjapa curpuqui infiernuquin tjojttaž cjequiz niiqui, ana waliž cjequiča.

ZARAKCHI UUAZ QUINTU

¹⁰ Humilde kuzziz zoñinacžtan ana chjaawjkata. Ančhucaquiz cjiwčha, ninacž anjilanaqaui wejt arajpach Yooz Ejpž yujcquiz žejlřipančha.

¹¹ Wejrqui tsewctan cuchanzquita Yooz Zoñtčha. Wejrqui tii muntuquiz tjonchinčha, ujqiz kamñi zoñinaca liwriizjapa.

¹² ‘¿Jalla tii tantiya? Tsjii zoñiqui patac uuzichiztačha. Patac uuziquiztan tsjillaquui yekjaquin zaraktan, nii zoñiqui nii llatuntunc llatuncani uuzinaca curquin ecaquičha, zarakchi uua kjuržquizjapa.

¹³ Nižaza katchi uua wachaquiz niiqui, nekztan walja chipznaquičha ana zarakchi uuzanacžquiztan juc'anti.

¹⁴ Jalla nižta irata ančhua arajpach Yooz Ejpqui humilde kuzziz zoñinacžquiztan anapan jakziltami pertita cjis muncha.

UJ PERTUNZ PUNTU

¹⁵ ‘Am jilaquui am quintra ana wali paaquiz niiqui, jalla nižtan zinapora palt'a, niž ana wali paata ujqiztan “ujchizpančha” cjan cjeequi. Jalla nuž amiž chiižintiquiztan catokaquiz niiqui, nii jilaquui ricujta cjequičha.

¹⁶ Zinapora chiižintiquiztan ana nonz pecaquiz niiqui, nii uj paañi jilžquiztan okaquičha. Nekztan iya pucultan jila kjawžcu, wilta nii uj paañi jilžquin okaquičha, niž paata uj tjeezjapa. Jalla nuž paažcu pucultan cjicu už čjepultan cjicu testicž taypiquiz niž paata uj tjeezta cjequičha.

¹⁷ Nii uj paañiqui anapanž niž uj maz pecaquiz niiqui, jalla nii puntuquiztan tjapa icliz jilanacžquin maznaquičha. Anapan niž uj maz pecaquiz niiqui, ana Yoozquin criichi jilažtakaz čhejlnaquičha, nižaza impuesto cobriñi zoñižtakaz.

¹⁸ Ultim weraral cjiwčha. Tii muntuquiz jequit am čhelachaja, jalla niiqui arajpach Yooziž čhejlta zakaz cjequičha. Nižaza tii muntuquiz jequit am cutznačhaja, jalla niiqui arajpach Yooziž cutžta zakaz cjequičha.

¹⁹ Tii zakal chiižinučha. Tii muntuquiz pucultan ančhucqui tsjiikaz Yoozquiztan mayaquiz niiqui, ančhucaquiz tjaataž cjequičha. Wejt arajpach Yooz Ejpqui ančhuaž mayta tjaaquičha.

²⁰ Nižaza tsjii pucultanami čjepultanami wejtquin kuzziz cjen wejt tjuuquiz ajcznaquiz niiqui, jalla ninacž taypiquiz wejrzakaz želačha.

²¹ Wiruñaquui Pedruqui Jesusižquin pewczñi ojkchičha. Zalžcu, jalla tuž pewczičha:
–Wejt jiliri, ¿kjaž wiltamiž wejt jilaqui wejt quintra uj paažcu pertuna mayisasaya?
¿Nižaza wejrqui kjaž wiltat pertunasaya? ¿Pakallak wilta pertunasaya?

²² Jesusaquui nižquiz kjaazičha, tuž cjan:
–Wejrqui cjiwčha, anaž pakallak wilta cjesačha. Antiz pakallak tunc pakallakuni wiltan wiltan pertunasatča.

KAJCHIZ ZOÑI QUINTU

²³ Arajpach Yooz mantiz puntuquiztan jalla tuzučha. Tsjii chawc jiliriqui piyunanacžquiz kaja packatz pecatčha.

²⁴ Jalla nuž packatan tsjii kajchiz zoñiqui zjižctatačha. Nii zoñiqui walja kajanacchiztačha, tsjii kjaž millona.

²⁵ Nii piyunžtaquui anaž pacz paaz želatčha. Nekztan patrunaqui jalla tuž mantichičha:
“Tii zoñi tuya, paaz cunciczjapa. Nižaza niž tjunmi, ocjalanacami, tjapa niž cusasanacami liw t'uylla kaja pacz paaz cunciczjapa”.

²⁶ Nekztanaqui nii piyunaqui patrunž yujcquiz quillzičha, nižaza roct'ichičha, tuž cjan:
“Wejt patruna, pertunalla. Tjappachal pacačha”.

²⁷ Nižtami patrunaqui ancha okzičha; nižaza nii kaja ana cobrichičha. Jalla nižtiquiztan liwrii cjišičha nii kajquiztan.

²⁸ Wajilla nii piyunaqui niwctan ulanžcu tsjii piyun maztan zalchičha. Nii piyun maziquui tsjii kjažtalla kajatačha nii pertunta piyunžquiz. Nekztan nii pertunta piyunaqui jor t'ullcu tanchičha, nii packatzjapa, tuž cjan: “Kajquiztan tjappacha paca”.

²⁹ Jalla nekztanaqui nii piyun maziquui niž yujcquiz quillzičha, nižaza roct'ichičha, tuž cjan: “Pasinsis kuzziz cjee. Nii kajallquiztan tjappachakal pacačha”.

³⁰ Nii kaja cobriñižti ana munchičha. Antiz carcilquin uchantičha, jalla nii kaja paczcama.

³¹ Parti piyunanacaqui nižta paañi cheržcu ancha sint'ichičha. Nekztan patrunžquiz mazñi ojkchičha. Jalla nicju tjappacha quint'ichičha, jaknužt watčhaja, nii.

³² Jalla nekztanaqui patrunaqui nii pertunta piyuna wilta kjawžkatchičha. Nekztan cjičhičha: “Ana zum kuzziz piyuna, wejrqui tjapa am kajanaca pertunchinčha, amiž roct'iñiž cjen.”

³³ Jaknužt wejrqui am kajquiztan, pertunchinčhaja, jalla nužuzakaz amlaqui am piyun mazquiz pertunstanča”.

³⁴ Jalla nekztanaqui patrunaqui juc'anti zawjziča. Nižaza mantichiča, nii piyuna casticzjapa, tjapa niž kaja paczama.

³⁵ Jesusaqui nii quinto quint'ican jalla tuž žerziča:

—Jakzilta ančhucaquiztan niž jilžquiz kuzquiztan ana pertunačhaja, jalla nužuzakaz wejt arajpach Yooz Ejpqui ančhucaquiz ana pertunaquiča.

19

MAATAKZTAN JALJTIZ PUNTU

¹ Jalla nuž tjaajinžcu Jesusaqui Galilea yokquiztan ojkchiča. Judea yokquin iran-tichiča, Jordán cjeta puž tuwanchuc.

² Muzpa žoñinacaqui nižquiz apziča. Jalla nicju muzpa laanaca čhjetinčiča.

³ Jalla nekztanaqui yekjap fariseo žoñinacaqui Jesusižquiz macjatchiča, ujqiz tjojt-skatzjapa. Nekztan tuž pewcziča:

—Čhjul uj paatiquiztanaqui persun maatakžtanaqui jaljtasaya?

⁴ Jesusaqui ninacžquiz kjaaziča, tuž cjan:

—Yoozqui tii muntu paacan, luctakžtan maatakžtan paachiča. ČCjirta Yooz takuqui ana liichinčhucjo?

⁵ Yooz takuqui tuž cjiča: “Jalla nižtquiztan tsjii žoñiqui tjunatan zalzjapa, ma ejpžquiztan zarakstanča. Zalžcu pucultan tsjii lucutiñi cjissa”.

⁶ Jalla nuž kjanapacha tjeēža, anaž iya pucultan žoñi, pero tsjiikazza. Jalla nižtquiztan anaž jaljtasača. Yoozza tsjii luctakžtan tsjaa maatakžtan čhalziqui, tsjii lucutiñi cjisjapa. Yooz čhalžtaqui ana jalta cjesača.

⁷ Nekztanaqui pewcziča tuž cjan:

—Moisesqui jalla tuž mantichiča. Tsjii certificado de divorcio tjaaquiz niiqui, tjunatan jaljtasača. ČKjažtquiztan nižta mantichejo, ana jaljtiz želanajo?

⁸ Jesusaqui ninacžquiz kjaaziča, tuž cjan:

—Ančhucaž chojrju kuzziz cjen Moisesqui tjunatan jaljtis lii tjaachiča. Primirquiztan-pacha anataž nižta.

⁹ Wejrqui ančhucaquiz chiižinuča. Adulteriuquiz ojklajñiž cjenkaz am maatakžtan jaljtasača. Jequit ana adulterio paachiž cjenaqui niž persun maatakžtan jaljtačhaja, nižaza yekja maatakžtan zalznačhaja, jalla niiqui adulterio uj paacha. Nižaza jequit divorcita maatakžtan zalznačhaja, nii zakaz adulterio paacha.

¹⁰ Tjaajinta žoñinacaqui nižquiz cjichiča:

—Luctakžtan persun maatakžtan jalla nižta cjesaž niiqui, anaž cumpinča zalzqui.

¹¹ Jesusaqui nekztan cjichiča:

—Tjapa žoñinacaqui tii tjaajinta anaž catokaquiča. Jakziltižquiz Yoozqui tjaajnačhaja, jalla niiqui tii tjaajintaqui catokaquiča.

¹² Žoñinacaqui punta punta ana zalzi cjiča. Yekjapanacaqui nastiquiztanpacha ana zalzucača. Yekjapanacazti capunapantača, jalla nižtquiztan ana zalžni atasacha. Yekjapanacazti ana zalz pecča, arajpach Yooz Ejpžtajapa langzjapa. Jecmiž tii takucama kami catokaquiz niiqui, paj kamla.

OCJALANACZ PUNTU

¹³ Žoñinacaqui ocjalanaca Jesusižquiz zjičchiča, ocjalanacžquiz kjaržtan lanznajo, nii ocjalanacžtajapa Yoozquin mayižinajo. Pero tjaajinta žoñinacaqui zjičfi žoñinacžquiz atajchiča.

¹⁴ Nekztan Jesusaqui cjichiča:

—Tii ocjalanaca wejtquin tjonaj cjee, ana ataja. Tii ocjalanacž kuz irata jalla nižta kuzzizza arajpach Yooz mantita kamañchiz žoñinacaqui.

¹⁵ Nekztan Jesusaqui ocjalanacžquiz kjaržtan lanziča. Jalla nekztan nii yokquiztan ojkchiča.

RICACH TJOWAQUI TJONCHICHA

¹⁶ Wiruñaquei tsjii tjowaqui Jesusa chertzni ojkchiča. Nekztan pewcziča, tuž cjan:

—Zuma Maestro, Yooztan wiñaya kamzjapa, ččhjul zumanacat wejr paasaya?

¹⁷ Jesusaqui kjaaziča, tuž cjan:

—Čkjažtquiztan “Zuma Maestro” cjee amjo? Tsjii alajača zumaqui. Yoozkazza niiqui. Yooztan wiñaya kamz pecčhaj niiqui, Yooz Epiž mantitanac jaru kama cjee.

¹⁸ Nii tjowaqui jalla nekztan kjaaziča, tuž cjan:

—Ččhjul mantitanacaya?

Jesusaqui nižquiz cjichiča:

—Anača zoñi conzqui. Anača adulteriuquiz ojklayzqui. Anača tjangzqui. Anača toscara chiizqui, jeczquizimi.

¹⁹ Am maa ejpmi rispitaquiča. Jaknuzum persunpachquiz okzñamzłaja, jalla nižta okzñi kuzziz cjsipanča zoñinaczquizimi, ligitum mazižtakazza.

²⁰ Nii tjowaqui nekztan cjichiča:

—Tjapa nii mantitanacami cumpliñča koltiquiztanpacha. ¿Jaziqui čhjulut wejta pjal-tasa?

²¹ Jesusaqui tuž cjichiča:

—Anča wali cjsim pečhaj niiqui, oka, nižaza amta žejlñi cusasanaca tuyzna. Jalla nii tuyzcu, porinacz ona. Jalla nižtiquiztan arajpachquin cusasanaczta kaz zuma honora tjaatan cjequiča. Jalla nii cumpliscu wiltam tjonaquiča wejtta chica ojklayzjapa.

²² Jalla nižta chiita nonzcu, nii tjowaqui walja llaquita kuzziz ojkiča. Anča ricachutača.

²³ Jalla nekztanaqui Jesusaqui niž tjaajinta zoñinaczquin cjichiča:

—Weraral ančhucaquiz cjiwča. Tsjii ricachu zoñi arajpach Yooz mantuquiz luzjapa anča ch'amaž cjesača.

²⁴ Tsjii camello cjita animala žejlča. Nii camelluqui ch'aman acuj cjuñ pjetquiz luzasača. Jalla nižtaž ricachunacaqui tsjan ch'amača Yooz kamañ jiczquiz luzqui, Yooz wajtchiz zoñi cjisjapa.

²⁵ Jalla nuž nonzcu, tjaajinta zoñinacaqui walja ispantichiča. Nekztan ninacpora pewcsarassiča, tuž cjan:

—¿Jectpan liwriita cjesajo?

²⁶ Jesusaqui ninacz kjutñi cherziča. Jalla nekztan cjichiča:

—Zoñinacaqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁷ Jalla nekztanaqui Pedruqui Jesusižquiz cjichiča:

—Wejt Jiliri, wejrnaqui tjapa persun cusasanaca jaytichinča, amtan chica ojklayzjapa. ¿Jalla nižtiquiztan wejrnaqui čhjulut canas?

²⁸ —Jesusaqui kjaaziča, tuž cjan:

—Weraral ančhucaquiz cjiwča. Ew muntuquiz želan, wejrqui poderchiz puestuquiz luzacha. Ančhucazakaz poderchiz puestunacquiz luzaučiča, tuncapan Israel partira mantizjapa.

²⁹ Jakzilta zoñit weriž cjen kjuyanaca, jilanaca, cullaquinaca, maa ejp, tjun, ocjalanaca, yokanaca ecathaja, jalla ninacaž walja zuma kamañ wirchiz cjequiča. Nižaza arajpachquin Yooztan wiñaya kamaquiča.

³⁰ Arajpachquin Yoozqui wacchi tii timpuquiz tucquin cjiñi zoñinaca wirquin cjskataquiča. Nižaza Yoozqui wacchi tii timpuquiz wirquin cjiñi zoñinaca tucquin cjskataquiča.

20

PIYUNANACZ QUINTU

¹ 'Arajpach mantiñi Yooz puntuquiztan jalla tužuča. Wentanalla tsjii yokchiz wali pajk patruñaqui piyunanaca kjuri ulanchiča, uwas frut zkala ajzjapa.

² Piyunanacztan acuerduquiz luzziča, zita langžtan tsjii denario cjita paaz paczjapa. Jalla nekztanaqui langzñi cuchanzquičiča.

³ Nekztan wenzlaka wilta ulanchiča. Palazquin inakaz žejlñi zoñinaca cherchiča.

⁴ Ninaczquiz paljaychiča, tuž cjan: “Ančhucqui wejt zkal yokquin langzñi oka. Wejrkal zumpacha pacača”. Nekztanaqui ninacaqui ojkiča.

⁵ Tappuru patruñaqui wilta ulanchiča, iya piyunanaca kjuri, nižaza langznajo. Nižaza tappuru zezi cjeella wilta ulanchiča, piyunanaca kjuri, nižaza langznajo.

⁶ Nii noojpacha zezi cjee wilta palaz kjutñi ulanchiča. Nižaza palazquin inakaz žejlñi zoñinacztan zalchiča. Ninaczquiz paljaychiča tuž cjan: “¿Kjažtiquiztan ančhucqui tonj zita ana langž žejljo?”

⁷ Ninacaqui patruñquiz kjaaziča, tuž cjan: “Anaž jecmi wejrna langznajo rocchiča”. Nekztanaqui patruñaqui cjichiča: “Ančhucqui wejt yokquin zakaz langzñi oka. Wejrkal jaknižłaj niil pacača”.

⁸ Tjuñiž kattan nii yokchiz patruñaqui niž langzkatñi encargado mantichiča, tuž cjan: “Kjawžca langzñi piyunanaca, paczjapa. Primiruqui wiri tjonchi piyunanaczquiz pacaquiča; wirquin, tuqui tjonchi piyunanaczquiz pacaquiča”.

⁹ Jalla nekztanaqui nii wiri luzzi piyunanacaqui langzkatñižquiz macjatchiča. Zapa mayni ninaczquiz pactača, tsjii nooj lanžtaž nižtapacha. Tsjii denario cjita paaz tanziča.

¹⁰ Jalla nekztanaqui wirquin paczquita primiru piyuna luzzi zoñinaca kjawztatača. Jalla nii primiru piyuna luzzi zoñinacaqui pinsichiča jila paca tanzjapa wiri piyuna luzzi zoñinaczquiztan. Jalla nekztanaqui pacchiča tsjii denario cjita paaz zakaz.

¹¹ Jalla nii paca tanžcu patrunž quintra quijchiča,

¹² tuž cjican: “Tii wirquin piyuna luzzi zoñinacaqui tsjii orakaz langziča. Wejrnczti primirquiztanpacha langzinča, nižaza zita anča sii kjakquiz otžcan langzinča. Niaczquizimi wejtnacaquizimi tsjiikaz pacchamča”. Jalla nuž cjican quijchiča.

¹³ Nii patrunaqui tsjii ninaczquiz kjaaziča, tuž cjican: “Jila, amquiz anal incallchinča. Jalla nuž tsjii acuerduquiz luztapanla, tsjii denario paaz paczjapa.

¹⁴ Tii paca tanzna, nižaza oka. Tii wirquin piyuna luzzi zoñinaczquiz nižazakaz pacz pecuča, amquiz pactala, jalla nuž zakaz.

¹⁵ Wejt persun paaztan jaknužut wejr pinsučhaja, jalla nuž wejt munañpiquiz pacasača. Weriz zuma pacni kuzziz cjen amqui iñiziñi kuzziz cjesamla”.

¹⁶ Jalla nižta irataž wirquin cjiñinacaqui tucquinž cjequiča. Nižaza tucquin cjiñinacaqui wirquinž cjequiča. Kjawžta zoñinacaqui wacchiča. Illzta zoñinacazti kolucullača.

JESUSAQUI NIIZ TICZ MAZZICHA

¹⁷ Wiruñaquei Jesusaquei niiz tjaajinta zoñinacžtan Jerusalén ojkchiča. Jalla nuž jiczquiz ojkcan, Jesusaquei tsjii latu niiz tuncapan illzta zoñinaca chjitchiča, nižaza ninaczquiz tuž cjichiča:

¹⁸ —Ančhucqui zizza, tii jiczqui Jerusalén kjutñiž ojkča, nii. Jerusalén wajtquin wejrqui intirjital cjeeča timplu jilirinaczquizimi lii tjaajiñi maestrinaczquizimi. Jalla ninacaqui wejr conaquiča. Wejrqui tsewtan cuchanzquita Yooz Zoñtča.

¹⁹ Nižaza wejrqui yekja wajtchiz zoñinaczquiz intirjital cjeeča, ana wali burla paata cjisjapa. Nižaza wejrqui wjajttal cjeeča. Ultimquiziqui cruzquiz ch'awcta contal cjeeča. Jalla nekztan chjep majquiztanzi jacatatača.

TSJII FAVORA MAYTA

²⁰ Jacobžtan Juanžtan ninacz maaqui Jesusižquiz macjatžquichinča. Jacobžtan Juanžtan ninacz ejpqui Zebedeo cjitatača. Jalla naa maaqui maatinacztanpacha Jesusižquin macjatchinča. Nekztanaqui naaqui Jesusiž yujcquiz quillzinča, tsjii favora mayzjapa.

²¹ Nekztan Jesusaquei naaquiz cjichiča:

—¿Amqui chjulum pecya? —cjican.

Naaqui kjaazinča, tuž cjican:

—Amqui am mantis puestuquin luzcu tii wejt pucultan majchnaca am latuquiz uchnalla, tsjiiqui žew latuquiz nižaza tsjiiqui zkar latuquiz.

²² Jesusaquei tuž kjaaziča:

—Ančhucqui chjulut mayčhaja ana intintazza. Wejrqui walja sufris tanča. ¿Nižtapacha ančhuc sufrasaya? Nižaza tsjii nooj anča sufrican watača tsjii bautismožtakaz. ¿Jalla nižtapacha ančhuc sufrasaya?

Ninacaqui tuž kjaaziča:

—Nii sufris watimi atasacha.

²³ Nekztan Jesusaquei cjichiča:

—Weraral cjiwča. Ančhucpacha sufris tanznaquiča, tsjii licz wazužtakaz. Nižaza sufris wataquiča, tsjii bautismožtakaz. Pero wejrqui mantis puestuquin luzcu, žew latuquizimi zkar latuquizimi ana jecmi uchasacha. Wejt Yooz Ejkaz nii puestunaca tjaaquiča jecztaajapa tjaczta kazlani, jalla ninaczta.

²⁴ Parti nii tuncapan illzta zoñinacaqui nii mayta puntu nonžcu nii pucultan jilazullcaž quintra žawjchiča.

²⁵ Pero Jesusaquei tjappacha nii tjaajintanaca kjawziča, nekztan tuž cjichiča:

—Ančhucqui zumpacha zizza, jalla tužu. Tii muntuquiz nación jilirinacaqui partrunacžtakaz mantiñiča, nižaza chawc jilirinacaqui parti zoñinaczquiziqui niiz mantita cazkatñipankazza.

²⁶ Ančhucqui ana nižta irata cjee. Tsjii kjutñiča nii irat kuzqui. Ančhucaquiztan jequit chawc jilirižtakaz cjis pecchaja, jalla niiqui piyunažtakaz cjis waquiziča parti zoñinaczquiziqui.

²⁷ Nižaza jequit ančhucaquiztan tucquin mantiñi cjis pecchaja, jalla niiqui wirquin cjis waquiziča, parti zoñinacz mantitacama cjisjapa.

²⁸ Wejrqui tsewtan cuchanzquita Yooz Zoñtča. Wejrpacha tii muntuquiz ana tjonchinča, sirwita cjisjapa. Antiz wejrča tjonchinqui, zoñinaczquiz sirwisjapa, wejr ticzcama. Jalla nuž ticžcu walja preciochiztakal cjeeča, zoñinaca liwriizjapa. —Jalla nuž cjichiča Jesusaquei.

ZUR ZOÑINACA CHJETINTA

- ²⁹ Jalla nekztanaqui Jericó wajtquiztan ulnan, muzpa zoñinacaqui Jesusizquiz apziča.
- ³⁰ Jicz latuquin pucultan zur zoñi julzi želatča. Ninacaqui Jesusaž watñi nonžcu, kjawchiča tuž cjican:
- Wejt Jiliri, Davidž majchmajtquiztan tjonñi, wejrnacž okznalla.
- ³¹ Nekž žejlñi zoñinacaqui ninacžquiz ujziča, ch'uj cjeyajó. Ninacazti juc'anti kjawchiča, tuž cjican:
- Wejt Jiliri, Davidž majchmajtquiztan tjonñi, wejrnacž okznalla.
- ³² Jalla nekztan Jesusaqui tsijtsu, ninaca kjawziča. Kjawžcu ninacžquiz tuž pewczicha:
- žčhjuluz werj paaj cjii ančhucya?
- ³³ Nii zur zoñinacaqui kjaaziča, tuž cjican:
- Wejt Jiliri, wejtnaca čhjujquiz čhjetinžinalla.
- ³⁴ Nekztanaqui Jesusaqui ninacžquiz sint'izcu čhjujqui lanlanžinchiča. Jalla nii orapacha cherñi cjišičha. Jalla nekztanaqui Jesusizquiz apziča.

21*JESUSAQUI JERUSALEN WAJTQUIN LUZZICHA*

- ¹ Jerusalén watja žcatžincan, Betfagé watja irantichiča. Betfagé watjaqui Olivos cjita curu žcatitača. Nicju irantican Jesusaqui pucultan tjaajinta zoñinaca cuchanchičha, tuž cjican:
- ² –Jalla nii najwkta watja oka. Jalla nicju mokta ljat azni wachaquičha, nižaza pajk zjič maltum wawchizza naa azniqui. Mokta jeržcu wejtquin akžcaquičha.
- ³ Jakzilta zoñimiz atajasaž niiqui, nižquiz ančhucqui “Wejt Jiliriz pecča. Wajilla tjepunta cjequičha tii azniqui”, nuž cjican nii zoñžquiz cjequičha. –Jalla nuž mantichiča Jesusaqui.
- ⁴ Jalla nii watchiqui profetaž cjiirta taku cumplissičha. Tuqitan nii profetaqui tuž cjiirchiča:
- ⁵ “Sión wajtchiz zoñinacžquiz tuž chiya: Chera, ančhuca chawc Jiliri tjončha, humilde kuzziz. Nižaza zjič maltum aznuquiz yawchi tjonauquičha, nižaza nii zjič aznuž maatanpacha tjonauquičha. Jalla ninacaqui carga kuzñi aznunacača”.
- Jalla nuž cjiirchiča nii profetaqui.
- ⁶ Jalla nekztanaqui nii pucultanaqui ojkičiča. Nižaza jaknužt Jesusaqui mantičhaja, jalla niicama paachiča.
- ⁷ Ninacaqui ljat azñi naaža pajk zjičtanpacha akžquičiča. Jalla nuž akžcu, zqutinaca aznunač juntuñ caruntichiča. Nekztan Jesusaqui yawchiča.
- ⁸ Niiž ojč jicz latuquiz muzpa zoñinaca želatča. Ninacž zquiti jiczquiz čhjinziča. Yekjapaqui ramuz čhjañinaca murchičha jiczquiz čhjinžjapa.
- ⁹ Tucquin ojkiž zoñinacami wirquin tjonñi zoñinacami chipcan walja wiwi kallantičičha, tuž cjican:
- ¡Viva tii Yooz tjuuquiz tjonchi zoñi! ¡David cjita chawc Jilirž majchmajtquiztan tjonñi! ¡Amqui rispittaj cjila! ¡Amquiz honora tjaataj cjila! ¡Yooz Ejpžquin zakaz honora tjaataj cjila! –Jalla nuž wiwchiča.
- ¹⁰ Jesusaž Jerusalén watja luztan, tjapa nii chawjc wajtchiz zoñinacaqui walja ispartichi tjojknačičha. Nižaza walja pewcpewczičha, tuž cjican:
- žjectpan teejo?
- ¹¹ Zoñinacaqui tuž kjaaziča:
- Tiiqui Jesusa cjita profetala. Nazaret de Galilea, jalla najwkta tjonchiča.
- JESUSAQUI TIMPLU PEWZICHA*
- ¹² Jalla nekztan Jesusaqui Yooz timpluquin luzzičha. Jalla nicju tuyñinacami kjajñinacami timpluquiztan liwj tirkatchičha zancchuccama. Nižaza paaz campiiñi zoñinacž mizami pjocžinchiča; paloma tuyñinacž sillami pjocžinčizakazza.
- ¹³ Jalla nuž paažcu tuž cjichiča:
- Yooz Takuqui tuž cjiča: “Wejt kjuyaqui Yoozquin mayiziz kjuyača”. Ančhuczi tjañinacž kjuyažtakaz paachinčhucča.
- ¹⁴ Jalla nicju tsjii kjaž zur zoñinaca Jesusizquiz macjatžquičiča, nižaza tsjii kjaž zuch zoñinaca. Jesusaqui ninaca čhjetinchiča.
- ¹⁵ Pero timplu jilirinacami lii tjaajiñi maestruncami jalla nii čhjetiñi milajru cheržcu, zawjchiča. Nižaza ocjalanacaqui timpluquin Jesusizquiz tuž wiwchiča: “¡David cjita chawc jilirž majchmajtquiztan tjonñi! ¡Rispittaj cjila!” Jalla nuž nonžcu timplu jilirinacami lii maestruncami anča zawjchiča Jesusiz quintra.
- ¹⁶ Nekztan Jesusizquiz paljajchiča, tuž cjican:

–¿Tinacaž čhiita taku ana nonžjo?

Jesusaqui ninacžquiz kjaaziča, tuž cjan:

–Nonznuča. Nižaza nii puntu Yooz takuqui tuž cjiča:

“Ocjalanacami piz itžni wawanacami wejttajapa honora zumpachaž tjaaquiča. Jalla nuž paaquiča Yoozqui”.

¿Jalla nii cjiřta Yooz taku liichinčuckaya; ana jaa?

¹⁷ Jalla nektanaqui ninacžquiztan ojkchiča. Betania watja ojkchiča. Jalla nicju alujassiča.

ANA FRUTCHIZ MUNTI

¹⁸ Jakatažuqui wenzlaka Jerusalén watja quejpcan čhjeri eecskatchiča.

¹⁹ Jicz latuquiz higo munti cherchiča. Jalla nii muntiquin macjatčhiča, fruta apakžcu lujljzjapa. Pero fruta ana wajtchiča, čhjañchiz alajatača. Jalla nižtiquiztan Jesusaqui nii muntiquiz cjichiča:

–Jazic anam iya fruta pookni cjequiča.

Jalla nii orapacha nii muntiqui kjonchiča.

²⁰ Jalla nižta munti kjonni cheržcu, tjaařinta žořinacaqui ispantichiča, nižaza Jesu-sižquiz pewcziča, tuž cjan:

–¿Kjažtiquiztan nii higo munti ratulla kjanya?

²¹ Jesusaqui tuž kjaaziča:

–Weraral ančhucaquiz cjiwča. Ančhucqui Yoozquin tjapa kuztančhucčhalaj niiqui, nižaza ana payznakni kuzzičhucčhalaj niiqui, tii irata zakaz paasača. Nižaza juc'ant pajk milajru paasača. Tii curumi mantasača, tuž cjan: “Tekžtan oka. Pajk kotquin tjořtsna”. Jalla nuž mantžcu nižta zakaz okasača.

²² Nižaza ančhucqui čhjulumi tjapa kuztan Yoozquiztan mayačhaja, jalla niit jama ančhucaquiz tjaataž cjequiča.

¿JEC JESUSIZQUIZ MANTICHI?

²³ Jerusalén irantižcu Jesusaqui wilta timpluquin luzziča. Jalla nicju tjaajnan, timplu jilirinacami wajtchiz jilirinacami nižquiz macjatžquichiča. Nektan pewcziča, tuž cjan:

–¿Jec am mantichi tii paazjapajo? ¿Jec jilirit am utchi jilirižtakaz cjisjapajo?

²⁴ Jesusaqui ninacžquiz tuž kjaaziča:

–Wejřzal ančhucaquiz tsjii pewcznača. Ančhucqui wejtzquiz kjaaznaquiž niiqui, wejřzakal ančhucaquiz maznača, jec wejř mantichi, nii.

²⁵ Wejtzquiz kjaaznalla. ¿Ject Juan mantžquiči bautisjapaya? ¿Yoozkaya, žořinaca, ja'?

Jalla nektanaqui ninacpora parlatča, tuž cjan:

–¿Jaknužum cjeequi? Učhumž “Yoozqui Juan mantichiča” cjanž kjaaznaquiž niiqui, jalla tiicni učumnacaquiz kjaaznačan, cjan: “Nižtiquiztan ¿kjažtiquiztanž ančhucqui ana nii criichinčucta?”

²⁶ Nižaza učumž “Žořiqui Juan mantichiča” cjanž kjaaznaquiž niiqui, žořinacaqui učumnacaquiz ¿kjaž cjičuejo? –Jalla nuž parlatča. Žořinacaqui Juanž puntu cjiřiča, Yooz parti parliři profetača niiqui. Jalla nižtiquiztan ninacaqui žořinaca eksiča, “Učhum conačhani”, cjan.

²⁷ Jalla nuž parliřcu ninacaqui Jesu-sižquiz cjichiča:

–Ana zizuča wejřnacqui.

Jalla nižta kjaaztiquiztan Jesusaqui cjichiča:

–Wejřmi ana zakal ančhucaquiz maznača, jec wejř mantichi tii paazjapa.

PUCULTAN MAJCHWICH QUINTU

²⁸ Wiruřaqui Jesusaqui tsjii puntu čhiichiča, tuž cjan:

–Tii puntu tantiya. Tsjii žořiqui pucultan majchwichtača. Tsjiižquiz cjichiča: “Wejř maati, tonjiqui uwas frut ajžni oka”.

²⁹ Nii mantita maatiqui tuž kjaaziča: “Anača”. Jalla niž wiruřalla niž kuz campi-ichiča. Nektan uwas frut langžni ojkchiča.

³⁰ Nižaza nii ejpqui tsjii maati cheri ojkchiča. Nižtan zalžcu, nižtazakaz uwas frut ajžni mantichiča. Jalla niiqui kjaaziča, tuž cjan: “Tata, okasača”. Ultimquiziqui nuž cjisquiqui ana ojkchiča.

³¹ Nii pucultanquiztan ¿jakžilta maati niž ejpž mantitacama paachiya?

Ninacaqui kjaaziča tuž cjan:

–Primiru mantitaž, jalla niiča.

Jalla nektanaqui Jesusaqui cjichiča:

—Weralal ančhucquiz cjiwcha. Impuesto cobriñinacami, nižaza ujchiz maatakanacami arajpach Yooz wajtquiz ančhucž tuqui luzaquičha.

³² Juan Bautistaqui tjaajñi tjonchičha, jaknužt ančhucalaqui kamžtažlaja, jalla nii tjaajinchičha. Pero ančhucqui niž tjaajinta ana criichinčhucčha. Impuesto cobriñinacazti nižaza ujchiz maatakanacazti niž tjaajinta criichičha. Jalla nii cherchinčhucčha ančhucqui. Jalla nižtanaca cheržcumi, ančhucqui ana Yoozquin cjisjapa kuz campiihinčhucčha. Ančhucčha niž taku ana criichinčhucqui.

ANA WAL PIYUNANACZ QUINTU

³³ Jalla tii quinto zakaz nonžna. Tsjii yokchiz patruaqui uwas zkala čhjacchičha. Nekztan uwas zkal muytata pirka pirkichičha. Nižaza tsjii maz ojt paachičha, uwas kjaz spjižtjapa. Nižaza tsjii campanturiž cherchi kjuychičha, nii zkala itzjapa.

³⁴ Nekztan nii patruaqui zkal yoka alquiličha piyunanacžquiz. Nekztan jicz ojkchičha.

³⁵ Zkala ajz timpu irantižcan, patruaqui tsjii kjaž piyuna cuchanžquichičha, niž parti zkala ricujajo.

³⁶ Pero nii zkala alquiliñi žoñinacazti nii cuchanžquita piyunanaca tanchičha. Tsjiiqui kitžtačha. Tsjiiqui contačha. Tsjiiqui maztan čhajtačha.

³⁷ Nekztanaqui patruaqui wilta piyunanaca cuchanžquichičha, primirquiztan juc'anti. Pero nii zkala alquiliñi žoñinacazti nižtapacha ana wali paachizakazza.

³⁸ Ultimquiziqui patruaqui niž persun majch cuchanžquichičha, tuž tantiican: “Wejt ultim maatiqui rispitzinaa” cjican.

³⁹ Niiž majch cheržcu, nii alquiliñi žoñinacaqui ninacpora palt'ichičha, tuž cjican: “Jalla tiikat liwj tii irinsa tanznačhani. Jalla nižtiquiztan ž-conla, učhumnacaltajapa tii yok irinsa cjeajajo”.

⁴⁰ Jalla nekztanaqui nii žoñinacaqui majch tanchičha; nekztan yokquiztan jwescu conchičha.

⁴¹ Jalla nekztanaqui Jesusaqui pewczičha, tuž cjican:

—Jalla nii patruapacha tjonžcu, ččhjulukat nii alquiliñi žoñinacžtajapa paačhani?

⁴² Žoñinacaqui kjaazičha tuž cjican:

—Nii ana wal žoñinacaqui contaž cjequičha, ana importayžcu. Nekztan nii zkal yoka yekja piyunanacžquiz alquilaquičha, zkala ajz timpu niž parti zkala ricujžcu nižquiz tjaata cjisjapa.

⁴³ Nekztan Jesusaqui ninacžquiz cjičhičha:

—Yooz takuqui tuž cjičha:

“Kjuy pirkiñinacaqui tsjii maz tjojtchičha. Nii tjojta mazqui isquinquiz cjissičha. Juc'ant chekan mazqui cjissičha. Yoozqui nuž utchičha. Učhumqui jalla nii cheržcu ispantichičha”.

Jalla nuž cjičha cjiirta Yooz takuqui. Ančhucqui nii Yooz taku liichinčhucčha, čana jaa?

⁴⁴ Ančhucquiz čhižinučha, ančhucqui nii ana wal alquiliñi žoñinacaztakazza. Jalla nižtiquiztan ančhucqui Yooz kjuychiz famillquiztan chjatkatkaž cjequičha. Yekja žoñinacaqui Yooz famillquiz luzaquičha. Yooz kuzcama kamñi žoñinacaqui luzaquičha.

⁴⁵ Nonžna. Maz puntuquiztan zakal chiyučha. Jakziltat nii maz cjen ujquiz tjojtsnačhaja, jalla niiqui pirasužtakaz t'okuntaž cjequičha. Nižaza jakziltiž juntuñ nii mazqui tjojtsnaquičha niiqui, pulpužtakaz t'okuntaž cjequičha. Nii žoñinacaqui k'ala akžtaž cjequičha.

⁴⁶ Jalla nii Jesusiž čhiita takunaca nonžcu, timpulu jilirinacami, fariseo parti jilirinacami tanchičha, ninacž puntu čhiñi, nii.

⁴⁷ Jalla nuž tantižcu, Jesusa tanz pecatčha. Pero ana atchičha, parti žoñinaca ekscu. Parti žoñinacaqui Jesusiž puntu tantiyatčha, Yooz taku parliñi profetačha, nii.

22

YOOZ KJUYCHIZ FAMILIA

¹ Jalla nekztanaqui Jesusaqui wilta tjaajinchizakazza. Jalla tuž cjican quint'ichičha:

² —Arajpach Yooz kjuychiz familiaqui jalla tužučha. Tsjii chawjc jiliričha niž majčta-japa zalz pjižta paachičha.

³ Niiž piyunanaca cuchanchičha, invitta žoñinaca kjawžñi. Nii kjawžta žoñinacaqui ana tjonž pecchičha.

⁴ Nekztanaqui yekja piyunanaca cuchanchizakazza, tuž cjican: “Invitta žoñinacžquin mazca, ‘Chjeri lujlž tjacztačha. Wejt wacanaca conkatchinčha, nižaza cjew animalanacami. Tjappacha listučha, jaziqui pjižstiquin tjonla”.

⁵ Jalla nuž čhiyanami nii invitta žoñinacaqui ana cazquichičha. Tsjiiqui zkal yoka ojkchičha. Tsjiiqui tuyžtan ojkchičha.

⁶ Parti invitta zoñinacaqui kjawzñi cuchanta piyunanaca tanzicha. Nekztan kitchicha, conañcama.

⁷ Jalla nekztanaqui nii chawc jiliriqui ninacz quintra žawzjicha. Nekztan zultatunaca cuchanzquichicha, nii piyuna conñinaca conzcajo. Nižaza, ninacz watja ujzcajo.

⁸ Jalla nižta paažcu chawc jiliriqui piyunanaczquiz cjichicha: “Tjappacha zalz pjižstac listuža. Nii primir invitta zoñinacaqui ana tjonz waquizicha.

⁹ Jalla nižtiquiztan ančhucqui pajk calliranž ojklayzca. Jecnacžtanami zalačhaja, jalla ninaczquiz tjonajum cjequicha tii zalz pjižstiquin”.

¹⁰ Jalla nekztanaqui piyunanacaqui call kjutñi ulanchiicha, nižaza tjapa niž zaltanaca kjuyquiz ajcskatžquichicha, zuma zoñimi, ana zuma zoñimi. Jalla nekztanaqui pjižsta paaz kjuyaqui chjijpsi cjissiča.

¹¹ Jalla nekztanaqui chawjc jiliriqui luzquichicha invitta zoñinaca chertzñi. Tsjii žejlñi zoñi naychicha, ana pjižsta paaz zquiti cutchi želatča.

¹² Jalla nuž nayžcu nii chawc jiliriqui nižžquin paljaychicha tuž cjican: “Jila, žkjažtiquiztan amqui ana pjižsta paaz zquiti cajtchi luzquichamtajo?” Nii zoñiqui ch’uj quirchicha.

¹³ Nekztanaqui chawjc jiliriqui pjižsta atintiñi zoñinaczquiz mantichicha, tuž cjican: “Kjojchanacami kjaranacami chejlžina. Zawnc zumchiquiz tjojta, jalla nicju kaala, nižaza niž izke kjojla”.

¹⁴ Jesusaqui cjichizakazza:

—Kjawžta zoñinacaqui tamača. Illzta zoñinacaqui kolucullača.

IMPUESTO PACZ PUNTU

¹⁵ Jalla nekztanaqui fariseo zoñinacaqui ojkcchicha. Ninacaqui acuerduquiz kazzicha, Jesusiž quintra tsjii ujchiz cjiskatzjapa. Jaknužumi Jesusa tsjii ana wali čhiikataquicha; jalla nii ujchiz cjiskatz pecatča.

¹⁶ Jalla nekztan ninacz partiquiztan yekjap zoñinaca cuchanzquichicha, Herodes parti zoñinacztanpacha. Jalla nii cuchanta zoñinacaqui Jesusižquiz cjichicha:

—Maestro, wejrnac zizuča, amqui werarapan čhiča, nižaza Yooz kamañ puntuquiztan weraram tjaajñamčha, kjažtami zoñiqui čhičhani, nižaza kjažta zoñimi želačhani.

¹⁷ Jaziqui amqui tii tantiižinalla. ŽRoman chawc jiliržžquin impuesto pacz wali cjesaya? už žanaž wali cjesaj? Jalla nii ziz pecučha.

¹⁸ Pero Jesusaqui ninacz ana zuma pinsita intinzuna zizziča. Jalla nižtiquiztan ninaczquiz kjaaziča tuž cjican:

—Ana zum kuzziznaca, žkjažtiquiztan ančhucqui wejt quintra uj jwes pecjo?

¹⁹ Impuesto pacz paaz tjeezna.

Jalla nekztan tsjii denario cjita paaz zjičchicha.

²⁰ Jalla nii paaz chertzcu, Jesusaqui ninaczquiz pewczicha, tuž cjican:

—Tii paazquiz žjecž yujctaya? Nižaza tii cijjrta tjuu, žjecž tjuutaya?

²¹ Nii quintranacaqui kjaaziča, tuž cjican:

—Roman chawc jiliržtacha.

Jesusaqui nekztan cjichicha:

—Roman chawc jiliržtaqui jalla nii jiliržžquin tjaasa. Nižaza čhjulut Yooztaqui Yoozquinpan tjaasa.

²² Jalla nuž nonžcu, nii quintranacaqui ispantichicha. Nekztan Jesusižquiztan zarakžcu ojkcchicha.

JACATATZ PUNTU

²³ Jalla nii noojpacha yekjap saduceo parti zoñinacaqui Jesusa cheri ojkcchicha. Saduceo parti zoñinacaqui ana criiñitacha, ticziquiztan jacatatz, nii. Jalla nuž cjenami Jesusižquiz pewczicha. Tii quintu quint’ican, pewczicha, tuž cjican:

²⁴ —Maestro, Moisesaqui uħumnacalca cijjrtkalča, tuž cjican: “Tsjii zoñi ticznasaž niiqui, niž tjun ana ocjalchiz cjesaž niiqui, nekztan nii ticzi zoñž jilaqui naa žewatan zalz waquizicha, nii ticzi jilž cuntiquiztan ocjala paazjapa”.

²⁵ Jaziqui wejrnacporquiz pakallak jilazullca želatča. Jilir jilaqui zalsiča. Nekztan ticziča ana ocjalchiz. Jalla nekztan jilirž jar jilaqui naa žewatan zalsizakazza.

²⁶ Nii jilaqui ticzizakazza ana zinta ocjala ecžcu. Nekztan yekja taypir jilžtan nižtakaz watchiča. Nižaza tjappach nii pakallak jilazullquizquiz nižta watchiča.

²⁷ Tjapa nii pakallak jilazullcaž ticztan, naa žewquiči ticzizakazza.

²⁸ Jaziqui ticziquiztan jacatatzcu, naa žewquiči žjakziltiž tjun cjequeo? Tjappacha naatan-cama zalzitača.

²⁹ Jesusaqui ninaczquiz tuž kjaaziča:

—Ančhucqui tsjii kjutñi kiwkchinčhucča. Ančhucqui Yooz takumi ana zuma zizza. Nižaza Yooz azimi ana pajča.

³⁰ Ticzi zoñinacaž jacatattanaqui zalzqui ana želaquiča. Zoñinacami zoñž maatinacami ana zalznaquiča. Nii timpuquiz zoñinacaqui arajpach Yooz anjilanacažtakaz cjequiča.

³¹ Pero nii ticziquiztan jacatatpuntu, ¿Yooz tawkquiz ana tuž liichinčhucjo? Tii puntuquiztan Yoozpačaž čhiichiqui. Jalla tuž cjan Yoozqui cjichiča:

³² “Wejrqui Abrahamž Yoozza, nižaza Isaacž Yoozza, nižaza Jacobž Yoozza”. Anača ticzi zoñž Yoozqui. Antiz žejtñi zoñž Yoozza.

³³ Jalla nuž čhiita nonžcu, neks žejlñi zoñinacaqui Jesusiž čhiitiquiztan ispantichiča.

JUC'ANT CHEKAN MANTITAQUI

³⁴ Jalla nuž čhižcu Jesusaqui saduceo parti zoñinaca ch'uju paachiča. Jalla nuž ch'uj paatiquiztan fariseo parti zoñinacaqui wilta ajcziča.

³⁵ Tsjii lli maestruqui nižaza fariseo partinacžquiztan uj jwesjapa yanz pecatča. Jesusižquiz pewcziča, tuž cjan:

³⁶ —Maestro, učhum liiquiztanaqui ¿čhjul mantitat juc'ant chekanaya?

³⁷ Nekztan Jesusaqui kjaaziča, tuž cjan:

—Tii mantitača juc'ant chekanaqui. “Ančuca Yooz Ejp Jiliržquiz sirwa, tjapa kuztanami, tjapa animužtanami, tjapa pinsamintužtanami”.

³⁸ Parti mantitanacquiztan cjenauqui jalla niiča chekanaqui.

³⁹ Niž jaru tii mantitaqui žejlča. “Jaknužum persunpachquiz okžñamžlaja, jalla nižta okžñi kuzziz cjanča zoñinacžquizimi, liijitum mazižtakaz”.

⁴⁰ Jalla nii picz mantitanacača chekanaqui. Nižaza tjapa Moisés tjaata liimi, nižaza tjapa profetanacaž tjaajintanacami nii picz mantitanacž partiquiztan čhiiča.

CRISTUZ PUNTU

⁴¹ Fariseo zoñinacaž ajczi želan, Jesusaqui ninacžquiz pewcziča tuž cjan:

—Ančhucqui Cristumž puntuquiztan tantiya. ¿Cristuqui ječž majch niiqui?

⁴² Nekztanaqui ninacaqui Jesusižquiz kjaaziča, tuž cjan:

—Davidž majchmajtquiztan tjonñiča niiqui.

⁴³ Jalla nuž kjaaztiquiztan Jesusaqui ninacžquiz cjichiča:

—David jiliričiqui Cristuž puntuquiztan čhiican, “Chawc Jiliri” cjichiča. Jalla nuž čhižcu, Yooz Espíritu Santuž čhiikatchiqui.

⁴⁴ Davidaž cjiirta Yooz takuqui tuž cjiča:

“Yooz Jiliričiqui wejt chawc Jiliržquiz cjichiča: ‘Wejrqui am kjojch koztan am quintri zoñinaca tječkatača. Nii oracama wejt žew latuquiz julna’.”

⁴⁵ Jazičiqui Davidačiqui “chawc Jiliri” cjichiča Cristuž puntuquiztan. Jalla nižtiquiztan žaknužt nii chawc Jiliri Davidž majchjic cjesajo? —Jalla nuž pewcziča Jesusaqui.

⁴⁶ Anaž jecmi kjaazñi atchiča, ana zinta takumi. Jalla nužquiztanpacha ana čhjulumi pewcžñi atchizakazza iya. Jalla nii orquiztanpacha pecunz eksipanča nii quintra zoñinacaqui.

23

ANA ZUM TJAAJIŃINACŽ PUNTU

¹ Jalla nektanaqui Jesusaqui neks žejlñi zoñinacžquizimi niž tjaajinta zoñinacžquizimi tuž cjichiča:

² —Lii tjaajiñi maestrunacami nižaza fariseo zoñinacami persun puntuquiztan tuž tantiča, tjaajinz puestuquiz uchtača Moisés liiquiztan punta punta tjaajinzjapa, nii. Jalla nuž tantiča persun antičiziqui.

³ Ančhucqui ninacaž tjaajintacama oka. Nižaza ninacaž čhiitacama paa. Pero ninacž kamz jaru, ana kama. Ninacaqui tjaajinča, pero persun tjaajinta jaru ana ojčča, ana cumpliča.

⁴ Ninacaqui walja mantitanaca paača, walja kuzižtakaz zoñinacžquiz jepča. Tjapa ninacž mantitanacaqui anapan atčucača. Jalla nuž cjenami tjapa mantitanaca zoñinacžquiziqui tirapanž ijsižča. Pero ninacapacha anaž čhjulquizimi yanapča nii cumplisjapa.

⁵ Ninacaqui čhjululu paatami paača, zoñinacakaz cherajo. Yujc ayquizimi kjarquizimi cjiirta Yooz taku jwerančhiž ojklajča, nižaza parti zoñinacžquiztan juc'anti lajch čhjalčhiž zuoti cujtčhiž ojklajča. Jalla nižtaž ojklajž juztazza.

⁶ Pijističiqui cjen tucquin panž julz pecča. Nižaza ajcz kjuyquiz cjen tucquin panž julz pecča honorčiz cjisjapa.

⁷ Ninacaqui zoñinacž taypičiqui cjen rispitižtan tsaanta cjis pecča, nižaza “Maestro” cjita cjis pecča.

⁸ 'Ančhucqui anača zoñinacžquiz “maestro” cjeta cjis peczqui. Tjapa ančhucqui jilazul-iquičucča. Tsjii Maestručhizčuckazza. Cristučha nii Maestruqui.

⁹ Nižaza ančhucqui tii muntuquiz kamcan anaž jeczquizimi “ejp” cjecan chiiz waquzičha. Tsjii Ejpchizčuckazza. Arajpach Yooz Ejpča niiqui.

¹⁰ Nižaza ančhucqui anača zoñinacžquiz “jiliri” cjeta cjis peczqui. Tsjii jilirchizčucča. Cristučha niiqui.

¹¹ Ančhucquiztan jequit jilirižtakaz cjis pecčhaja, jalla niiqui piyunažtakaz cjis waquzičha parti zoñinacžquiziqui.

¹² Jequit persun honora waytiz pecčhaja, ultimquiziqui ana honorchiz cjequičha. Nižaza jequit humilde kuzzizlaja, jalla niiqui ultimquiziqui honorchiz cjequičha.

¹³ 'Lii tjaajiñi maestrunaca, nižaza fariseo parti zoñinaca, ana zuma kuzziz zoñinacžhucča. Ančhucqui anawalipanž cjisnaquičha. Zoñinaca atajiñčhucča, arajpach Yooz wajčhiz ana luzajo. Ančhucpachaž ana luzza, nižaza pecchi cjenami parti zoñinacžquizimi ana luzkatiñčhucča.

¹⁴ Lii tjaajiñi maestrunaca, nižaza fariseo zoñinaca, ana zuma kuzziz zoñinacžhucča. Ančhucqui anawalipanž cjisnaquičha. Zew maatakanacžquiztan kjuy cusasanaca kjañiñčhucča. Jalla nuž paažcumi nii maataka incallzjapa ažka ažka Yoozquin maytažoka payiñčhucča ninacžtajapažtakaz. Jalla nuž paatiquiztan ančhucqui juc'anti castictaž cjequičha.

¹⁵ 'Lii tjaajiñi maestrunaca, fariseo zoñinaca, ana zum kuzziz zoñinacžhucča. Jaziqui ančhucqui anawalipanž cjisnaquičha. Ančhucqui jaknužumi ančhucua cuzturumpi jaru zoñinaca ojkkatzkaz pecčha. Jalla nuž ojkkatžcuqui ančhucqui nii zoñinaca ančhucquiztan pizc wilta wilta juc'anti anawaliz cjskatčha, infiernuquin casticta cjisjapa.

¹⁶ 'Ančhucqui anawalipanž cjisnaquičha, zur zoñižtakaz irpiñinaca. Ančhucqui cjiñčhucča: “Jakziltat timplu tistiwcchiz juramintu paaquiz niiqui, jalla nii juramintuqui anaž walčha. Pero jakziltat timplu kor paaz tistiwcchiz juramintu paaquiz niiqui, jalla nii juramintuqui walčha”.

¹⁷ Zumzu zur zoñinaca. ¿Jakziltat juc'ant chekanaqui, timpluquin žejlñi korinacakaya, už timplupanej? Timpluž cjen nii korinacaqui walčha.

¹⁸ Nižaza ančhucqui cjiñčhuczakazza: “Jakziltat timplu altar tistiwcchiz juramintu paaquiz niiqui, jalla nii juramintuqui anaž walčha. Pero jakziltat altarquin uchta ofrenda tistiwcchiz juramintu paaquiz niiqui jalla nii juramintuqui walčha”.

¹⁹ Zumzu zur zoñinaca. ¿Jakziltat juc'ant chekanaqui, ofrendakaya, už altarapanej? Altaraž cjen nii ofrendaqui walčha.

²⁰ Jakziltat altar tistiwcchiz juramintu paaquiz niiqui, nižaza tjapa nii altar juntuñ žejlñinaca tistiwcchiz juramintu paačha.

²¹ Nižaza jakziltat timplu tistiwcchiz juramintu paaquiz niiqui, nižaza timpluž Yooz tistiwcchiz juramintu paačha.

²² Nižaza jakziltat arajpach tistiwcchiz juramintu paaquiz niiqui, nižaza arajpach Yooz tistiwcchiz juramintu paačha. Yoozqui arajpachquin žejlčha, nižaza arajpachquiztan mantičha.

²³ 'Lii tjaajiñi maestrunaca, nižaza fariseo zoñinaca, ana zum kuzziz zoñinacžhucča. Ančhucqui anawalipanž cjisnaquičha. Ančhucqui diezmos tjaayiñčhucča mentquiztan, anizquiztan, cominquiztan. Jalla nii kolta plantanacquiztan ančhucqui diezmos tjaayiñčhucča. Pero ančhucqui liiž chekan mantitanac jaru ana kamiñčhucča. Yooz kuz jaru ana kamiñčhucča, nižaza ana okžni kuzzizčhucča; nižaza ana Yoozquin kuzzizčhucča. Jalla nižta chekan lii jaru ana kamiñčhucča. Jalla nižta jaru kamz waquzičha, diezmos tjaacanami.

²⁴ Ančhucqui zur irpiñinaca. Tižta irata paayiñčhucča. Tsjii zoñiqui kolta zmoyalla culchičha ana lujljzjapa. Jalla nuž cjenami pajk ana wali animala ana culžcu lujlchičha. Jalla nižta irata paayiñčhucča.

²⁵ 'Liy tjaajiñi maestrunaca, nižaza fariseo zoñinaca, ana zum kuzziz zoñinacžhucča. Anawalipanž cjisnaquičha ančhucqui. Wazumi chuwami zawnctanaqui ajuntaž cjesačha. Jalla nuž cjenami kjuyłtan cjujchiz cjesačha. Jalla nižtaž ančhucqui. Zawnceta curpuqui walikaz chercherčha. Ančhucua kuzquizti cjujchinacažtakaz žejlčha. Tjañi zaazmi anawali paazmi jalla nižta kuzzizčhucča ančhucqui.

²⁶ Zur fariseo zoñinaca, primiruqui zuma kuzziz cjisna ajunta chuwažtakaz; nekztanaqui zuma zoñiz tsijtchizakaz cjequičha.

²⁷ 'Lii tjaajiñi maestrunaca, nižaza fariseo zoñinaca, ana zum kuzziz zoñinacžhucča. Anawalipanž cjisnaquičha ančhucqui. Chiw ljocžtan tjarta sipulturužtakazza ančhucqui.

Ančuca tsitiqui walikazza. Ančuca kuzzti ana walipanča. Sipultura ticzi zoñinacž tsjijnacžtan chjijpsi, niža ana waliča.

²⁸ Jalla nižtaž ančucqui. Zoñinacaqui ančuc zuma zoñižtakaz nayča. Pero ančuca persun kuzquizzti juc'ant anawalinaca žejlča.

²⁹ Lii tjaajiñi maestrúnaca, nižaza fariseo zoñinaca, ana zum zoñinacžhucča. Anawali-panž cjisnaquičha. Ančucqui profetanacž sipulturúnaca azquichiñčucča, nižaza Yooz kuczama kamñita zoñinacž monumentúnaca c'achjalla cjskatiničucča.

³⁰ Nižaza nii zuma zoñinacž puntuquiztan tuž cjiñčucča: “Učhum tuquita atchi ejpnacaqui anawali kamchiča. Wejrnacqui nii tuqui tĩmpuquiz kamtasaz niiqui, anaž profetanaca conzjapa yanaptasača”.

³¹ Jalla nuž chiican, ančucpacha chiičha, profeta conñi zoñinacž majchmaatičucča, nii.

³² Jaknužt ančuca tuquita atchi ejpnacaqui anawali paatčhaja, jalla nižtakaz payiñčucča.

³³ Zkoražtakaz zoñinaca. Zkoražta sarchiz zoñinaca. Ančucqui anapanž wira atipasača infiernuquin casticquiztanaqui. Castictapanž cjequičha.

³⁴ Ančuc juc'ant casticta cjisjapa, ančucaquiz cuchanžcača profetanaca, nižaza Yooz puntu zuma zizñinaca, nižaza Yooz puntu tjaajinñinaca. Jalla nii zoñinaca cuchanžquichiz cjen, ančuczti tsjii yekjanaca conaquiča, yekjanaca cruzquiz ch'awcznaquičha, yekjanaca ajcz kjuyquizpacha wajaquičha. Nižaza yekjanaca wajtquiztan watja tanzjapa apznaquičha.

³⁵ Jalla nuž paatiquiztan ančuca ujnacquiztanami nižaza ančuca tuquita atchi ejpnacž ujnacquiztanami castictaž cjequičha. Ančuca atchi ejpnacaqui zuma zoñi conchiča, Abelquiztanpacha asta Berequias majch Zacarias, jalla niicama. Zacariasqui tĩmpluquizpacha contatača, altar žcati.

³⁶ Ančucaquiz weraral cjiwča. Tjapa nii uj paatanacquiztan casticta cjequičha tii tĩmpuquiz kamñi zoñinacaqui.

JERUSALEN WAJTCHIZ ZOÑINACŽ PUNTU

³⁷ Nekztan Jesusaqui chiichiča, tuž cjan: Jerusalén wajtchiz zoñinaca, Jerusalén wajtchiz zoñinaca. Profetanaca coničucča. Nižaza Yooz cuchanžquita profetanaca maztan čhaciñčucča. Kjaž wilta wejrqui tii zoñinaca juntis pecchinča, cwitisjapa. Jaknužt wallpiqui kjar koztan ozmachanaca cwitičhaja, jalla nižta irata tii zoñinaca cwitis pecchinča. Tii zoñinacazti wira ana nuž cwitiskatz pecchiča.

³⁸ Tii taku nonžna. Ančuca kjuyanacaqui jaytitaž cjequičha.

³⁹ Ančucaquiz cjiwča. Tsjii noojiqui ančucqui wejť puntuquiztan chiyaquičha, tuž cjan: “Yooz Jilirž tjuuquiz tjonñi, amqui honorchiz cjila”. Jalla nii noojcama ančucqui ana wejť wilta cheraquičha.

24

JUDIO TĩMPLU PUNTU

¹ Nekztanaqui Jesusaqui tĩmpluquiztan ulanchičha. Nekztan niž tjaajinta zoñinacaqui nižžquin macjatžcu, tuž cjichiča:

–Cherzna. Anča c'achjača tii tĩmplu kjuyanacaqui.

² Jesusaqui kjaaziča, tuž cjan:

–Tjapa tii tĩmplu kjuyanaca zumpacha chernza. Ančucaquiz weraral cjiwča. Tsjii noojiqui tii kjuyanacaqui k'ala pajltaž cjequičha. Ana zinta tii maznaca pirkita želaquičha.

TII MUNTU TUCUZINZ PUNTU

³ Nekztan ninacaqui Olivos cjita curullquin ojkchiča. Nicju Jesusaž julzi želan, tjaajinta zoñinacaqui nižžquiz jamazit tuž cjichiča:

–Maznalla. Žčhjulorat nii amiž chiita wataqui? Nižaza am tjonz siñala, žjakziltat cjeequiya? Nižaza tii muntu tucuzinz siñala, žjakziltat cjeequiya?

⁴ Nekztanaqui Jesusaqui kjaaziča tuž cjan:

–Ančucz cwitzata, ana jecmi ančucaquiz incallskata.

⁵ Muzpa zoñinacaqui wejť tjuužtan tjonaquičha, “Wejrtča Cristutqui” cjan. Jalla nuž chiižcu tama zoñinaca incalltaž cjequičha.

⁶ Nižaza ančucqui quira žejlž quintunaca zizaquičha; nižaza yekja quira quintunaca arawasaquičha. Jalla nuž cjenami anaž tsuca. Nuž watstanča. Imaziča tii muntu tucuzinžqui.

⁷ Nacionpora talznaquiĉha; niĉaza quira paaquiĉha. Niĉaza mach'a Źelaquiĉha, niĉaza conanaca ojklayaquiĉha, niĉaza walja yoka chekjincan terremotoŹ wataquiĉha, wacchi yokaran.

⁸ Tjapa tii wattanaqui juc'anti t'akjiziz Źelaquiĉha.

⁹ Jalla nekztanaqui anĉhucqui jilirinacŹquiz intirjitaŹ cjequiĉha sufriskatzjapa. Niĉaza contaŹ cjequiĉha anĉhucqui. Niĉaza anĉhucaŹ wejtqiz criichiŹ cjen, tjapa ana criichi Źoĉinacaqui anĉhuca quintraŹ cjequiĉha.

¹⁰ Jalla nuŹ watan, muzpa Yoozquin criichi Źoĉinacaqui quejpsnaquiĉha. Yoozquin criichi ŹoĉinacŹ quintra cjsnaquiĉha, jilirinacŹquin intirjizcama. Criichi ŹoĉinacŹquiz ancha chjaawjkataquiĉha nii quejpsĉinacaqui.

¹¹ Muzpa toscara chiiĉinaca ojklayaquiĉha, tuŹ cjican: "YooziŹ tjaata takuĉha tiiqui". Nii toscar takunacŹtan muzpa ŹoĉinacŹquiz incallaquiĉha.

¹² AnawalinacaŹ miraquiĉha. Źoĉinacpora ana zuma munasaquiĉha.

¹³ Jakziltat wejt tjonzcama tjurt'iĉni kuzziz Źelaĉhaja, jalla niiqui ultimquiziqui liwriitaŹ cjequiĉha.

¹⁴ YooziŹ liwriita Źoĉinacaĉha Yooz kjuychiz familiaqui. Jalla nii zuma taku tjapa kjutĉi tii muntuquiz parlitaŹ cjequiĉha, tjapa Źoĉinaca zizajo. Jalla nii wattanaqui tii muntuqui tucuzinznaquiĉha.

¹⁵ Tii zakal cjiwĉha. Tii puntuquiztan Daniel cjita profetaqui cjjirĉiĉha: "Tsjii noojuqui tsjii juc'ant ana wali akĉi Źoĉi parizaquiĉha. Yooz chekan kjuyquinkaz luzaquiĉha". (Tii taku liiĉi taintaza.)

¹⁶ Jalla nuŹ cherŹcu Judea yokquin Źejlĉi Źoĉinacaqui curunacŹquin atipz waquiziĉha.

¹⁷ Niĉaza nuŹ cherŹcu kjuyjuntuĉ Źejlĉi Źoĉinacaqui chjujŹcu ana kjuya luzla, cusasanaca chjitzjapa.

¹⁸ Niĉaza pampiquin Źejlĉi Źoĉinacaqui persun zquiti apti ana quejŹquila.

¹⁹ Nii tjuĉquiziqui ic maatakanacami k'azllu wawchiz maatakanacami ancha t'akjiri Źelaquiĉha.

²⁰ Źeloquiniĉha mayiza anĉhucqui, anaj zac timpuquin niŹtanaca watsjapa, niĉaza anaj jeejz tjuĉquiz niŹtanaca watsjapa.

²¹ Tii sufris timpu juc'anti sufris cjequiĉha yekja sufrisnacquiztanami. Yooz tii muntu paatiquiztan jecchuc anapanĉha tiŹta sufrisnacaqui watchiqui. Niĉaza tekŹtan najwccuch anaŹ iya juc'anti sufrisqui cjequiĉha.

²² Yoozqui anaŹ tii sufrisnaca tucuskatasas niiqui, tjapa Źejlĉi Źoĉinacaqui ticznasaĉha. Yoozqui niiz illŹta ŹoĉinacŹ laycu nii sufrisnaca tucuskataquiĉha.

²³ Niĉaza yekjap Źoĉinacaqui anĉhucaquiz chiyasaĉha, tuŹ cjican: "Tekziĉha Cristuqui". Yekjapac chiyasaĉha, "Nii nacjuĉha Cristuqui" cjican. Jalla nuŹ chiyanami anapanĉha nii taku criyaquiĉha anĉhucqui.

²⁴ Incallĉi ŹoĉinacaŹ tjonaquiĉha. Yekjapaqui "Cristutĉha wejrqui" cjequiĉha. Yekjapaqui "YooziŹ tjaata taku mazniĉtĉha wejrqui" cjequiĉha. Ninacaqui walja ispantichuca milajrunacaŹ paaquiĉha, incallzjapa. Tjapa ŹoĉinacaŹ incallz pecaquiĉha, asta YooziŹ illzta Źoĉinacami.

²⁵ Ima tiŹtanacaŹ tjonan wejrqui anĉhucaquiz ultim weraral maznuĉha, ana incallta cjisjapa.

²⁶ Źoĉinacaqui "Ch'ekti yokquin cherŹquilalla, nicjuĉha Cristuqui" cjequiĉha. Jalla nii quinto nonŹcu, anapanŹ okaquiĉha. Niĉaza "Tii kjuyquizza Cristuqui" cjequiĉha. Jalla nii quinto nonŹcu, anapan criyaquiĉha.

JESUCRISTUQUI WILTA TJONAQUICHA

²⁷ 'Anĉhucaquiz cjiwĉha. Jalla tiŹtal irata tjonaĉha wejrqui. Wejrqui tsewctan cuchanŹquita Yooz Źoĉtĉha. JaknuŹt lliwjlliwjĉi tuwantan tajachuc lliwĉhaja, jalla nuŹ tjonaĉha.

²⁸ Jakziquin zerwi Źejlĉhaja, jalla nekzi zkananacaŹ ajcnaquiĉha.

²⁹ 'Nekztanaqui tii sufris timpu wattan, tjuĉiqui zumaquiĉha; kataquiĉha, ana iya kjanaquiĉha. Jiizmi niŹazakaz ana iya kjanaquiĉha. Warawaranacami pachquiztan tjojtsnaquiĉha. Niĉaza tseecu azziz Źejlĉinacaqui chjekinskattaŹ cjequiĉha.

³⁰ Jalla nekztanaqui arajpachquin wejt siĉalauqui parisaquiĉha. Wejrqui tsewctan cuchanŹquita Yooz Źoĉtĉha. Jalla nuŹ wejt siĉala cherŹcu tjapa ana criichi Źoĉinacaqui kaaquiĉha. Ninacaqui wejt tjonz cheraquiĉha. Wejrqui tsjir taypiquiz tjonaĉha walja aztan, niĉaza Yooz EpiŹ aziŹ tjeeŹcan.

³¹ Niĉaza wejt anjilanaca cuchanŹcaĉha weriŹ illzta Źoĉinaca juntjapzjapa, trompeta tjawŹcu. Illztanacaqui tjapa tii muntuquiztanpacha juntaptaŹ cjequiĉha.

³² Ančhucqui higuera munti puntuquiztan zizza, jalla tuž. Higuera muntiqui ch'ojñantiz kallantaquiz niqui, waj kutunz timpuž kallantaquičha. Jalla nii zizza ančhucqui.

³³ Jalla nižta irataž tjapa weriž chiita wattan, tii muntuquui waj tucuzinzaquičha. Jalla nuž ančucaquiz zizkatz pecučha. Jaknužt tsjii zoñiqui kjuy zana žcatžinčhaja, luzjapa, jalla nižta irataž žcatžinčhicha tii muntu tucuzinzqui.

³⁴ Ančucaquiz weraral cjiwčha. Ima tii timpuquiz kamñi zoñinacaž ticznan, tjapa weriž chiitanaca wataquičha.

³⁵ Arajpachami tii yok muntumi liwj tucuzaquičha. Wejt takunacazti wiraž ana tucuzaquičha.

³⁶ Pero wejt tjonz tjuñimi, wejt tjonz orami anaž jecmi zizasachha, anaž arajpach Yooz anjilanacami, anaž Yooz Majchmi. Yooz Ejp alajakaz zizza.

³⁷ Jaknužt Noež timpu watčhaja, jalla nuž wataquičha wejt tjonz tjuñiquiziqui.

³⁸ Noež timpuquiz ima tii muntu kjaztan tuzkatta cjen, zoñinacaquui tuž kamñitačha, lujlcan, liccan, zalzcan, zalzjapa majtnaca tjaacan. Jalla nuž kamñitačha Noež warcuquiz luz tjuñicama.

³⁹ Kjaz juyzu tjonzcama zoñinacaquui ana čjul tantiyassi žejlčičha. Nekztan kjaz tjontiquiztan tjappacha zoñinacaquui kjazquiz kuzta ticzičha. Jalla nižta irataž wataquičha wejt tjonž tjuñiquiziqui.

⁴⁰ Jalla nii noojuquui pucultan zoñiqui pampiquin cječhani. Tsjiuquui arajpach kjutñi waytižcu chjitztaž cjequičha. Tsjiuquui ectaž cjequičha.

⁴¹ Nižazakaz pucultan maatakanacaquui jawuncan želačhani. Tsjaaquui arajpach kjutñi waytižcu chjitztaž cjequičha. Tsjaaquui ectaž cjequičha.

⁴² Jalla nižtiquiztan ančhucqui walja naynay želaquičha. Chjulorat wejr, am Yooz Jiliri, tjonačhaja, jalla nii ora ana zizzuca.

⁴³ Ančhucqui tii zizza. Kjuychiz zoñiqui tjañi tjonz ora ziztasaz niqui, walja naynay žejltasachha, nižž kjuya ana tjañiž luzta cjisjapa.

⁴⁴ Jalla nižta irataž ančuquui naynay želaquičha. Tiripintit, ana pinsita orquiz tjonačha. Wejrqui tsewctan cuchanzquita Yooz Zoñtčha.

PIZC PUNTA PIYUNANACA

⁴⁵ Tsjii kjuychiz zoñiqui piyunanacžquiz kjuya tjiisičha, cwitisjapa, nižaza lujl ora čhjeri tjaazjapa. ¿Jakzilita piyunat zuma cumpliñi, nižaza zuma cwitiñiya? Nii tantiya.

⁴⁶ Jalla tižtaž piyunanacaquui. Kjuychiz zoñiž irantižcan tsjii piyunaquui cwitican žejlčičha, jaknužt cumpjiitažlaja, jalla nuž cumplican žejlčičha. Jalla ničha zuma piyunaquui. Nižaza nii piyunaquui cuntintuž cjequičha.

⁴⁷ Ančucaquiz weraral cjiwčha. Nii kjuychiz zoñiqui tjapa nižž cusasanaca cumpjiyaquičha nii zuma piyunž kjarquiz.

⁴⁸ Nii kjuy cumpjiita piyunaquui ana zuma cječhaj niqui, pinsasachha jalla tuž: "Aaaa, wejt patruanaquui ana uri tjonasaka", cjian cjequičha.

⁴⁹ Jalla nekztan parti piyunanacžquiz wjajtasachha. Nižaza ana zum zoñinacžtan cumpant'asachha, lujlcanami liccanami.

⁵⁰ Jalla nuž kaman, nii kjuychiz patruanaquui tiripintitž tjonaquičha, tsjii ana zizta orquiz.

⁵¹ Jalla nekztanaquui nii ana zum piyunaquui zuma castictaž cjequičha. Nižaza nii ana zuma piyunaquui chjatkattaž cjequičha. Nižaza infernuquin žejlcan, kaaquičha, nižaza izke kjojaquičha.

25

TUNCA TURAKANACZ QUINTU

¹ Tii zakal chiyučha. Arajpach Yooz mantis puntuquui jalla tužučha. Tunca turtakanacaquui micha tanžcu tsjii zalzñi tjowžquin ojčkhičha.

² Pjijskaltanaquui ima ojkan ana zuma tantičičha. Tsjii pjijskaltanaquui zuma listu tjaczitačha.

³ Nii pjijskaltan ana zuma tantiitazzi turtakanacazti michaka chjitchičha, ana iya parafina chjitchičha, tsjižtan camzjapaquui.

⁴ Nii pjijskaltan zuma listu ojčkhinacaquui wilta camzjapami parafina chjitchičha.

⁵ Nii zalzñi tjowaquui ana uri tjončičha. Jalla nižtiquiztan tjaji tjonkatchičha tjappacha. Nižaza tjačhichha.

⁶ Jalla nekztanaquui chica arama kjawñi jora nonzičha, tuž cjian: "Cherzna. Zalzñi tjowa tjonžca. Ulanžca nižaza risiwžca".

⁷ Tjapa nii turtakanacaquui žaazičha, nižaza micha teezjapa tjaczichha.

⁸ Niiž upaquiztanalla nii pjijskaltan ana zuma tantiyazzi turtakanacaqui tsjii pjijskaltan turtakanaczquiz cjichiča, “Parafina tojnalla, wejtnaca parafina upziča. Nižaza wejtnaca micha tjessa”.

⁹ Pero nii walja tantiitazzi turtakanacaqui tuž kjaaziča: “Ana atchuca. Wejtnacaltami ančhucaltami anaž wacasatha. Jalla nižtiqiztan ančhucadž oka, jakziqin parafina tuyčhaja, jalla nicju. Ančhucaltajapa kjayžca”.

¹⁰ Nii pjijskaltan turtakanacz parafina kjayi ojktan, zalžni tjowaqui irantizquichiča. Nekztan nii tantitazzi turtakanacaqui zalžni tjowžtan kjuyquiz luzziča, zalz pjijsa paazjapa. Jalla nekztanaqui kjuya chawczicha.

¹¹ Wiruñaqi nii kjayi ojčki turtakanacaqui quejpžquichiča, tuž cjan: “Wejt Jiliri, Wejt Jiliri, cjetznalla, cjetznalla”.

¹² Pero niiqui kjaaziča, tuž cjan: “Ančhuc anal pajuča”.

¹³ Jalla nižtiqiztan Jesusaqui ninaczquiz chiižinchiča tuž cjan:

—Anchucqui walja zuma listu tjacziz cjequiča. Wejt tjonz tjuñi orami ana zizza.

TJAATA PAAZNACA QUINTU

¹⁴ ‘Arapach Yooz kamañaqi jalla tužuča. Tsjii zoñiqui jiczquin ojck cjen, niiž piyunanaca kjawziča. Piyunanaczquiz paaz tjiiziča.

¹⁵ ‘Tsjii tsjiizquiz pjijska warank paaznaca tjaachiča. Tsjiizquiz paa warank paaznaca tjaachiča. Tsjiizquizquiz tsjii warank paaznaca tjaachiča. Zapa maynižquiz ninacz negocio paaz atñi jama tjaachiča. Jalla nekztanaqui ojčkiča.

¹⁶ Nii tsjii pjijska warank paaznaca tanzñi piyunaqui paaztan negocio paachiča. Jalla nuž paazcu tsjii pjijska warank paaznacžtan canchiča.

¹⁷ Nižazakaz nii tsjii paa warank paaznaca tanzñi piyunaqui paaztan negocio paachiča. Jalla nuž paazcu tsjii paa warank paaznacžtan canchizakazza.

¹⁸ Nii tsjii warankalla paaznaca tanzñi piyunazti patrunž paaz chjojziča. Yokquiz ojt jwetžcu, jalla nekz chjojziča.

¹⁹ ‘Ažktan niiž wiruñ nii paaz kajžñi patrunaqui quejpžquichiča. Jalla nekztanaqui piyunanaczquiztan kaja cobrichiča.

²⁰ Primiruqui nii tsjii pjijska warank paaznaca tanzñiqui tjonchiča. Jalla niiqui patrunžquiz paaznaca intirjichiča, tuž cjan: “Wejt Jiliri, wejtquiz pjijska warank paaznaca tjaachamča. Nii paaztan trabajžcu, iya pjijsk warank paaztan canchinča. Jalla tiiča amiž tjaatami nižaza weriz cantami”.

²¹ Patrunaqui nižquiz cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiqiztan, jaziqui juc’anti paaznaca amquiz cumpjiyača”. Nižaza cjichiča: “Luzca. Wejtan chica chjipzna. Cuntintum cjee”.

²² Jalla niiž wiruñ nii tsjii paa warank paaznaca tanzñi piyunaqui tjonchiča, tuž cjan: “Wejt Jiliri. Wejtquiz paa warank paaznaca tjaachamča. Iya tsjii paa warank paaztan canchinča. Jalla tiiča amiž tjaatami nižaza weriz cantami”.

²³ Niiž patrunaqui nižquin cjichiča: “Walikazza. Amqui ancha zuma piyunamča. Zuma trabajchamča. Zkoluc paaz zuma trabajtiqiztan, jaziqui juc’anti paaznaca amquiz cumpjiyača”. Nižaza cjichiča: “Luzca. Wejtan chica chjipzna. Cuntintum cjee”.

²⁴ Pero nekztan nii tsjii warank paaznaca tanzñi piyunaqui tjonchiča. Niiqui patrunžquiz cjichiča: “Wejt Jiliri. Amqui c’ar patrunamča. Jalla nii zizzatuča. Amqui ana čhjulumi paazcumi canñamča. Nižaza ana čhjaczumi, ajžñamča.

²⁵ Jalla nižtiqiztan ekzinča, nižaza ojžcu am paaznaca yokquiz chjojchinča. Pero tekziž am paazqu”.

²⁶ Patrunaqui nii piyunžquiz tuž kjaaziča: “Ana zum piyuna. Jayri piyuna. Wejrqui ana čhjaczcu ajžñinpanča, nižaza ana čhjulumi paažcu canñinpanča. Jalla nižtapanim zizla amqui.

²⁷ Jalla nižtiqiztan wejt paaz bancuquiz mekaz uchanchucataž, jalla. Jalla nuž paatasadž niiqui, wejrqui quejpžcu bancuqiztan paaz majchtanpacha ricujtasacha”.

²⁸ Jalla nekztanaqui nii patrunaqui nekzi žejlñi zoñinaczquiz cjichiča: “Tii piyunžquiztan nii warank paaznaca kjaña. Nii tunca warank paaznacchiz piyunžquiz tjaa.

²⁹ Jakziltat želinchizlaja, jalla nižquiz iya tjaataž cjequiča, jilacama. Nižaza jakziltat zkoluc želinchizlaja, nižaza ana zuma trabajchizlaja, jalla nižquiztan tjappacha kjañtaž cjequiča.

³⁰ Tii ana zum piyuna chjatkata, zawncta zumchiquin. Jalla nicju kaaquiča, nižaza izke kjojaquiča”.

³¹ Wejrqui tsewcan cuchanzquita Yooz Zoñtcha. Tsjii noojiqui wejrqui wilta tjonacha, wejt azi tjeežcan. Rey cjeta Jiliri cjeecha. Tjapa wejt anjilnacžtanpacha tjonacha. Poderchiz tjonacha žoñinaca pjalzjapa. Tsjan chekan juez Jiliritcha wejrqui.

³² Wejt yujcquin tjapa tii muntuquiz kamñi žoñinaca juntjaptaž cjequičha. Jalla nekztanaqui wejrqui ninaca pjalznacha, jaknužt tsjii awatiriqui uua z yekja nižaza cabra yekja pjalznachaja, jalla nuž.

³³ Pjalzcu uuzanacaqui žew latuquiz cjequičha, cabranacazti zkar latuquiz cjequičha.

³⁴ Wejrčha chekan juez jiliritqui. Nekztanaqui wejt žew latu pjalžtanacžquiz tuž cjeecha: “Wejt Epiz k'aachita žoñinaca, pichalla ančhucalta tjaczta kamaña tanzjapa. Tii muntu paata ora, niwjtcanpacha ančhucalta nii kamaña tjacztača, Yooztan kamzjapa, nii kjuychiz familia cjisjapa”.

³⁵ Nižaza cjeecha, “Ančhucqui zumanaca paachinčhucča. Weriz čjheri eecsiž cjen, ančhucqui wejtquiz čjheri tjaachinčhucča. Nižaza weriz kjaz pecan, ančhucqui wejtquiz kjaz onanchinčhucča. Nižaza yekja yokquin ojklayan, ančhucqui wejtquiz tjajz kjuyquiz kjawzinčhucča.

³⁶ Weriz ana zquitchiz cjen ančhucqui zquiti onanchinčhucča. Nižaza laaquichi cjen, wejtquin tjonzinčhucča. Nižaza carsilquiz chajwcta cjen, ančhucqui wejtquin cherzñi tjonchinčhucča”.

³⁷ Jalla nekztanaqui zuma kamañchiz žoñinacqui wejtquin cjequičha: “Wejt Jiliri, žčhjulora am čjheri eecsi chercintaya? Nižaza čjheri lujljapa, žčhjulora onanchintaya? žčhjulora am kjaz pecan, onanchintaya?”

³⁸ žčhjulora am yekja yokquin ojklayan tjajz kjuyquiz kjawzintaya? žčhjulora am ana zquitchiz cjen, zquiti onanchintaya?

³⁹ Nižaza žčhjulora am laaquichi cjen, tjonzintaya? žčhjulora am carsilquiz cjen, amquin tjonzintaya?”

⁴⁰ Jalla nekztanaqui zuma kamañchiz žoñinacžquiz kjaaznacha, tuž cjan: “Anchucaquiz weraral cjiwča. Wejrčha chekan juez Jiliritqui. Čhjulora wejt jilanacžquiz yanapčhaja, humilde jilanacaž cjenami, jalla niiqui wejtquiztakaz yanapchinčhucča”. Nuž chiyacha pjalz tjuñquiz.

⁴¹ Jalla nekztanaqui wejrqui, chawc juez Jiliri cjan, nii zkar latu pjalžtanacžquiz cjeecha: “Ančhucqui, Yoozqui ančuca quintrača. Jaziqui wejtquiztanž infiernuquin oka. Diablužtami niž anjilnacžtami tjacztača nii infiernuqui. Ančhucqui zakaz nii infiernuquin wiñaya sufraquičha.

⁴² Weriz čjheriž eecsiž cjen, ančhucqui ana wejtquiz čjheri onanchinčhucča. Weriz kjaz pecan, ančhucqui ana wejtquiz kjaz onanchinčhucča.

⁴³ Weriz yekja yokquin ojklayan, ana tjajz kjuyquiz kjawzinčhucča. Weriz ana zquitchiz cjen, ana zquiti onanchinčhucča. Weriz laa cjen, nižaza carsilquiz cjen, ančhucqui ana wejr cherzñi tjonzinčhucča”.

⁴⁴ Jalla nekztanaqui ninacaqui cjequičha: “Wejt Jiliri, žčhjulora am čjheri eecsi cjen, kjaz pecchi cjenami, yekja yokquin ojklaychi cjen, ana zquitchiz cjen, laa cjen, carsilquiz chawcta cjen, jalla čhjulora am nižta chercintaya? Nižta chertučhaja, yanaptasača”.

⁴⁵ Jalla nektanaqui wejrqui, chawc juez Jiliri cjan, ninacžquiz kjaaznacha, tuž cjan: “Anchucaquiz weraral cjiwča. Čhjulora wejt jilanacžquiz humilde cjenami ana yanapčhizlaja, wejtquiztakaz ana yanapchinčhucča”.

⁴⁶ Jalla nekztanaqui nii ana zuma kamañchiz žoñinacqui infiernuquin cuchantaž cjequičha, wiñaya casticta cjisjapa. Nii zuma kamañchiz žoñinacazti Yooztan chica wiñaya kamzjapa okaquičha.

26

JESUSA TANZ TANTIITA

¹ Tjappacha nii chiitanaca žeržcu, Jesusaqui niž tjaajinta žoñinacžquiz cjichiča:

² —Ančhucqui zizza, puc majča pascua pjižtaqui. Jalla nii pjižta ora wejrqui intirjital cjeecha cruzquiz ch'awcta cjisjapa. —Jalla nuž cjichiča Jesusaqui.

³ Jalla nii oraqui timplu jilirinacami, liy tjaajiñi maestruncami judío wajtchiz jilirinacami ajczicha, Caifás jilirž kjuy patiuquiz. Caifás cjetaqui timplu jilirinacžquiztan chawc jiliritača.

⁴ Jalla nicju ninacaqui palt'ichiča, nižaza kazziča mañžtan Jesusa tanzjapa. Jalla nuž tanžcu, Jesusa conzjapa kazziča.

⁵ Nuž kazcu tuž cjichiča:

—Pjižta paan Jesusa tanz anaž cjichuca. Žoñinacqui aptjapznasača.

JESUSIZ ACHQUIZ ASIITI ALZTA

⁶Jesusaqui Betania wajtquiz želatĉha, Simonž kjuyquiz. Niž tuquiqui Simonaqui janchi mojkchi laataĉha.

⁷Jalla nekz želan, tsjaa maatak žonqui Jesusižquiz macjatžquichinĉha. Naaqui tsjii putilla chjitchinĉha. Nii putillquiz cuza mazk'a ulurchiz asiiti želatĉha, anĉha jila walurchiz. Nii putilltaĉha zuma alabastro cjeta maztan paataqui. Jesusa mizquiz želan naa maatak žonqui niž achquiz zuma asiiti alžinĉinĉha.

⁸Niž tjaajintanacaqui niž cheržcu, žawjiĉha, naa žoña quintra. Jalla nekztan tuž cjichiĉha:

—ĉKjažtiquiztan tii walurchiz asiiti pertejo?

⁹Jalla tiiqui antis tuychucataĉha walja jiluñ, nižaza pori žoñinacžquiz yanapžjapa.

¹⁰Jesusaqui nii chiiñi nonžcu tjaajintanacžquiz ujziĉha:

—ĉKjažtiquiztan taa žonatan chjijcisejo? Anaĉha taa žon kjaž cjisqui. Jalla tuž taa žoñaž paataqui wejtquiztan walikazza.

¹¹Porinacžquiz yanapž pecaquiz niiqui, porinacaqui anĉhucatan panž zelaquiĉha. Wejrzi anĉhucatan ana željztanpanĉha.

¹²Jalla taa maatak žoñqui wejtquiz tii zuma ulurchiz asiiti alžinžcu, wejt curpu tjaczinĉha, tjatta cjisjapa.

¹³Anĉhucaquiz weralar cjiwĉha. Jakziquinami tii muntuquiziqui liwriiñi Yooz taku parlita cjeĉhaja, jalla nižtazakaz taa maatak žonaž paataqui parlita zakaz cjequičha, jalla naaquiztan cjuñta cjisjapa.

JUDASQUI JESUS TARAZUNAQUICHA

¹⁴Tuncapan illzta žoñinacžquiztan tsjiiqui Judas Iscariote cjitataĉha. Jalla niiqui ojkiĉha timplu jilirinacžtan parli.

¹⁵Jalla nuž parlican cjiĉhiĉha:

—Anĉhucaquiz Jesusal intirjasaj niiqui, anĉhucqui ĉkjaž paaz pacas?

Jalla nii orapacha quinsa tunc paaznaca Judasquiz pacĉhiĉha.

¹⁶Jalla nužquiz Judasqui ĉjulorat Jesusa tankatchuca cjeĉhaja, jalla nii ora walja kjurchiĉha.

SANTA CENA PAACHICHA

¹⁷Jalla nekztanaqui ana liwaturžtan t'anta lujlz pijizta, jalla nii pijiztaž primir tjuñquiz tjaajinta žoñinacaqui Jesusižquin macjatžcu tuž pewcziĉha:

—ĉJakziquin wejrnacqui tjaczñi ojki pecya, pascu ĉheri lujlžapaya?

¹⁸Jesusaqui tuž kjaaziĉha:

—Watja oka. Tsjii žoñžtan zalaquiĉha. Nižquiz cjee, “Maestruqui ž-cjiĉha. ‘Wejt ticz ora wajillaĉha. Am kjuyquiz pascua pijiztal paaĉha wejt tjaajinta žoñinacžtan’”.

¹⁹Nekztanaqui Jesusaž mantitacama ojkiĉha. Nii tokint'ita kjuyquiz pascu ĉheri tjaczĉha.

²⁰Weenjapa cjistana Jesusaqui nii kjuyquiz željcan mizquiz julziĉha niž tuncapan tjaajinta žoñinacžtan.

²¹Jalla nuž ĉheri lujlcan, ninacžquiz cjiĉhiĉha:

—Anĉhucaquiz weralar cjiwĉha. Tsjii tsjii anĉhucqui wejt quintra paaquičha, nižaza tarazunaquičha.

²²Jalla nuž ĉiitiquiztan tjaajinta žoñinacaqui walja llaquita cjissiĉha. Jalla nekztan ninacaqui tsjiiza tsjiiza pewcziĉha, tuž cjican:

—Wejt jiliri, ĉwejr cjesajo?

²³Nekztanaqui Jesusaqui tuž kjaaziĉha:

—Anziqui wejtana ĉhicaž tii chuwquiztan lujlĉha nii tarazunñi žoñiqui.

²⁴Wejrqui tsewctan cuchanžquita Yooz žoñĉha. Jaknuž cjiirta Yooz takuqui cjiĉhaja, jalla niicama okaĉha. Nii tarazunñi žoñiqui anaj maa pjuĉquiztan nastĉhaja, waliz cjitasaĉha nižtaqui. Wejr tarazuntiquiztan wali chawc ujchiz cjequičha.

²⁵Jalla nekztanaqui Judasqui, nii tarazunñi žoñiqui, tuž cjiĉhiĉha:

—Maestro, ĉwejr cjesajo?

Jesusaqui tuž kjaaziĉha:

—Jesalla, amĉhiya.

²⁶Jalla nuž pascua ĉheri lujlcan Jesusaqui niž persun kjaržtan t'anta tanzĉha. Nekztan Yooz Ejpžquin gracias cjican tjaazcu, t'anta kjolziĉha. Jalla nuž kjolžcu, niž tjaajinta žoñinacžquiz tjaachiĉha, tuž cjican:

—Lujlzna. Jalla tiiĉha wejt curpu cuntaqui.

²⁷Jalla nekztan persun kjaržtan tsjii wazu tanzĉha. Yooz Epžquin gracias cjican tjaachizakazza. Nekztan tjaajinta žoñinacžquin ĉjalžcu zapa mayni licĉhiĉha. Jalla nuž ĉjalžcu, tuž cjiĉhiĉha:

—Tii wazquiztan tjapa ančhucqui liczna.

²⁸ Wejt ljocquiztanž cjičha tiiqui. Wejt ljocžtan tsjii ew acta tjulžtaž cjequičha. Wacchi zoñinacž laycu wejt ljocququi tjawktaž cjequičha ninacž uj pertunta cjisjapa.

²⁹ Wejr cjiwčha. Uwas kjaz ana iya licačha, čhjulorcama wejt Yooz Ejp tjapa mantačhaja, jalla nekžtan ančhucatan wilta uwas kjaz licačha.

TJAAJINTA ZOÑINACAQUI WICHANZNAQUICHA

³⁰ Nekžtan Yooz wirzu itzcu, Olivos cjita curulla ojkchičha.

³¹ Jalla nekžtanaquī Jesusaquī niīž tjaajinta zoñinacžquīz tuž cjičhičha:

—Jalla tii weenquī tantal cjeečha. Nekžtan tjapa ančhucquī ana wejtquīn kuzziz tucaquīčha. Jalla nuzpan cjiirta Yooz takuquī cjičha: “Uza awatiri contanaquī uuzanaquī wichanznaquīčha”.

³² Wejr jacatatžcuquī ančhuca tuquī okayačha Galilea cjita yoka.

³³ Nekžtanaquī Pedruquī cjičhičha:

—Tjappacha ana amquīn kuzziz tucačhani. Wejrzi ana wira nižta cjesačha.

³⁴ Jalla nuž čhiitiquiztan Jesusaquī tuž kjaazičha:

—Amquīz weraral cjiwčha. Jalla tii weenpacha čhjep wilta amquī ana wejr pajñi čhiican k'otaquīčha, ima wallpaž kjawan.

³⁵ Nekžtan Pedruquī Jesusižquīz kjaazičha, tuž cjičan:

—Wejrquī amtan chicami waztal ticznasačha. Anapan amquīzitan k'otasachha.

Nižaza tjapa niī tjaajintanaquī tsjiika čhiichičha.

JESUSAQUI GETSEMANI CJITA YOKQUINCHA

³⁶ Jalla nekžtan Jesusaquī niīž tjaajintanačžtan Getsemanī cjita yoka irantichičha. Jalla niwjc irantižcu, ninacžquīz cjičhičha:

—Tekz julzna ančhucquī. Wejrquī niī nawcju Yooz Ejpžtan parli okačha.

³⁷ Jalla nekžtan Pedružtan nižaza Zebedeož pucultan majchnacžtan chjitchičha. Nekžtanaquī Jesusaquī kuzquī walža llaquisatčha, nižaza ančaž llactazatčha.

³⁸ Jalla nižtiquiztan Jesusaquī niī čhjepultan chjichta tjaajintanačžquīziquī cjičhičha:

—Wejt kuzquī ancha llaquissa, ticzmayačha. Ančhucquī tekzi žela. Wilaquīčha, anačha tjajaquīčha.

³⁹ Jalla nekžtanaquī Jesusaquī tsjii koluc nawjčchuc ojkchičha. Yokquīzkaz tuzi t'okžcu Yoozquīn mayizichičha, tuž cjičan:

—Wejt Yooz Ejp. Tii juc'ant sufris timpu anal watz pecučha. Tii sufrisquīzitan liwriichucažlaj niiquī, amquī wejr liwriyalla. Pero anal wejt kuzcama cjis pecučha. Antiz jaknužt am kuz antichaja, am munañpakaj cjila.

⁴⁰ Jalla nekžtanaquī tjaajintanačžquin quejpžquīchičha. Tjajchi zalchičha. Jaziquī Jesusaquī Pedružquīz cjičhičha:

—¿Ančhucquī anapanž wejttan tsjii orami wilasi atya?

⁴¹ Tjaji watz žela, nižaza wilazaquīčha. Yoozquin mayizaquīčha, ana ujquīz tjojtsjapa. Čhekan, ančhuca kuzquī wilasačha. Pero ančhuca curpuzti anaž awantasačha.

⁴² Nekžtan Jesusaquī wilta Yoožtan parli ojkchičha. Tuž cjičan, mayizichičha:

—Wejt Yooz Ejp, tiī sufrisquīzitan ana liwriita cjičhucažlaj niiquī, am kuz munañpakaj cjila.

⁴³ Nekžtan wilta tjaajintanačžquin quejpžcu tjajchi zalchičha. Anča tjaji tjonatčha.

⁴⁴ Čhjepquīziquī wilta ninacžquīzitan ojkchičha, Yooz Ejpžquin parli. Primiru jaknužt parličhaja, jalla nuž zakaz parličhičha.

⁴⁵ Jalla nekžtanaquī tjaajintanačžquin quejpcičha. Ninacžquin paljaychičha, tuž cjičan:

—Jaziquī tjajchinčucčha ančhucquī, nižaza jeejzinčucčha. Nuzukazza. Wejrquī ujchiz zoñinacž kjarquīz intirjital cjeečha. Anz niī ora irjatžquīčha.

⁴⁶ Zaazna. Ojkla. Wejr tankatñi zoñiquī niī najwčž tjončha.

JESUSA PRESO CHJICHTA

⁴⁷ Jesusa nuž čhiyan, Judasquī irantižquīchičha. Niitačha Jesusiž tuncapan illzta zoñinacžquīzitanquī. Judastan tama zoñinacaquī tjonchičha pajk cuchillunacchiz, nižaza wjajtz carotinacchiz. Timplu jilirinacami wajt jilirinacami ninaca cuchanžquīchičha.

⁴⁸ Tarazunñi Judasquī niīž tuquilla niī zoñinacžtan kazzitačha, tuž cjičan:

—Wejrquī niī zoñžquīz čhjulznačha. Jalla niīž cjequīčha niī zoñiquī. Jalla nekžtan zuma tanžcu chjichaquīčha.

⁴⁹ Jalla nuž kazcu Judasquī Jesusižquīz macjatchičha, tuž cjičan:

—Tjaajinñi Maestru, ¿walikazkay?

Jalla nuž tsaanžcu, čhjulzičha.

⁵⁰ Jesusaquī niīžquīz kjaazičha, tuž cjičan:

—Jila, ¿chjulquin am tjonjo?

Jalla nekztanaqui zoñinacaqui zcatzinzquichiča, nižaza preso chjichi tanchiča.

⁵¹ Jalla nuž paan, tsjii tsjii Jesusiž tjaajinta zoñiqui pajk cuchillu joožcu, quintri zoñž cjuñi chjajtzinchiča. Nii cjuñi chjajtzinta zoñiqui timplu jilirž piyunatača.

⁵² Jalla nekztan Jesusaqui tuž cjichiča:

—Am pajk cuchillu chjojnza, nii cuchill chjojzquiz. Jakziltat pajk cuchillu joojoočhaja, jalla ninacaqui pajk cuchillžtan conta zakaz cjequiča.

⁵³ Wejt Yooz Ejpžquiztan mayasača, wejtquiz yanapzjapa. Jalla nuž maytiquiztan wejt Yooz Ejpqui anzpachaž wacchi anjilanaca cuchanzcasacha, tuncapan walja tama ejércitonacama. ¿Nii ana zizya?

⁵⁴ Pero jalla nižta anal mayacha. Jalla tižta watstanča, jaknužt cjjirta Yooz taku chiičhaja, jalla nii cumplistanča.

⁵⁵ Jalla nekztanaqui Jesusaqui nii tjonchi zoñinaczquiz cjichiča:

—Ančhucqui pajk cuchillunacztan wjajtz carotinacztan wejr tani tjonchinčhucča, wejr tjañi cjes, nižtažtakaz. ¿Kjažtiquiztan nižta tjonchinčhucčaja? Zapurupan ančhucatan zejlichinča, timpluquiz tjaajincan. Jalla nii oranacaqui anaž wejr tanchinčhucča.

⁵⁶ Tjapa tii watñinacaqui jaknužt tuqita profetanacaž cjjirčhaja, jalla niit jama cumplistanča.

Jalla nekztanaqui tjapa Jesusiž tjaajinta zoñinacaqui tsucaña wichanziča. Jesusa zinalla ecchiča.

CHAWC JILIRINACZ YUJCQUIN CHJICHTA

⁵⁷ Jalla nii Jesusa tanñi zoñinacaqui Caifás cjita jiliržquin chjitchiča. Caifasqui timplu jilirinacz chawc jiliritača. Caifás kjuyquin liy tjaajiñi maestrunacami wajt jilirinacami ajczitača.

⁵⁸ Pedruqui nii chawc jilirž kjuy patiučama apziča ažquiztanalla. Nii patiuquin luzcu, julzi želatča wijilñi policianacztan. Jaknužt Jesusa wathčhaja, jalla nii cherzjapa želatča.

⁵⁹ Timplu jilirinacami, wajt jilirinacami, tjapa mantiñi jilirinacami Jesusiž quintra uj jwes pecatča, toscaraž cjenaqui, conkatzjapa.

⁶⁰ Wacchi zoñinacami toscar tawkžtan prisintizquichiča Jesusiž quintra uj tjojtunzjapa. Pero ana chjul uj jwesi atchiča. Ultimquiziqui pucultan toscar tisticunacaqui apantizquichiča,

⁶¹ tuž cjican:

—Tii zoñiqui cjiñiča, “Yooz timplu t'ezinžu, chjep majquiz wiltal tsijtsnasača”.

⁶² Jalla nekztanaqui timplu chawc jiliriqui tsijtsiča. Jesusižquiz cjichiča:

¿Kjažtiquiztan am ana kjaazjo? ¿Kjaž cjican tii zoñinacaqui am quintra chiijo?

⁶³ Jalla nuž chiižinanami Jesusaqui ch'uju zejlichiča. Jalla nekztanaqui nii timplu chawc jiliriqui niižquiz cjichizakazza:

—Zejtñi Yooz tjuuquiz am juramintu paakatača, werara chiižjapa. Mazna. ¿Amqui Cristumkaya? ¿Nižaza Yooz Majchpanikaya?

⁶⁴ Jesusaqui kjaaziča, tuž cjican:

—Wejrčhay. Amqui jaknužum chiičhaja, jalla nužuča. Wejr zakal ančhucquiz cjeeča. Wejrqui tsewctan cuchanzquita Yooz zoñtča. Tsjii noojiqui ančhucqui wejr cheraquiča, juc'anti azziz Yooz žew latuquiz julzi. Nižaza arajpachquiztan tsjir taypiquiz wilta tjonacha.

⁶⁵ Jalla nuž kjaaztiquiztan timplu chawc jiliriqui niiž persun zquiti wjajrzinchiča, zawjchi kjanapacha tjeezjapa. Nižaza cjichiča:

—Tii zoñiqui persun tawkžtan Yooz quintra chiičhija. ¿Kjažt iya tisticunaca pecznasajo? Ančhucpacha tiž ana wal takunaca nonzinčhucča.

⁶⁶ ¿Kjažtat cjees?

Ninacaqui kjaaziča, tuž cjican:

—Tiiqui ujchizpanča. Paj ticzla.

⁶⁷ Jalla nekztanaqui Jesusiž yujcquiz llawzižtan tjujti kallantichiča, nižaza wjajtchiča. Partinacaqui yujcquiz chajcziča,

⁶⁸ tuž cjican:

—Amqui Cristumžlaj niiqui, jazic ¿jequit am chajczjo? Jalla nii pajalla.

PEDRUQUI K'OTCHICHA

⁶⁹ Nii ora Pedruqui zancu kjuy patiuquin julzi želatča. Nekz želan tsjaa piyuniqui niižquiz macjatžcu paljaychinča, tuž cjican:

—Amqui ojklayñamla nii Galilea yokchiz Jesusižtan, žana jaa?

⁷⁰ Pedruqui parti zoñinacz yujcquiz k'otchiča, tuž cjican:

—Chjulquiztankam chiičhani, anal intintazuča.

⁷¹ Nekztanaqui Pedruqui zan kjutñi zcatzinchicha. Nekztan tsjaa piyuniqumii cherzcu parti zoñinacžquiz cjichinča:

—Tii zoñipan ojklayatla tii Nazaret wajtchiz Jesusižtan chica.

⁷² Pedruqui wilta k'otchiča. Juramintužtan tuž cjichiča:

—Nii zoñi anapan pajuča.

⁷³ Jalla niž upaquiztan nekž žejlñi zoñinacaqui Pedružquiz macjatžcu, cjichizakazza:

—Chekapan, amqui zakaz Jesusiž parti zoñinacžtan chica ojklayñamla. Am takuqui kjanapachala, ninacaž takukam chiila.

⁷⁴ Nekztanaqui Pedruqui wilta k'otchiča, juramintu paacan.

—Anapal nii zoñi pajuča. Toscana chiichinžlaj niigui, Yooz wejr casticačhani. —Nuž cjichiča Pedruqui. Jalla nii orapacha tsjii wallpi jora kjawchiča.

⁷⁵ Jalla nii wallpa kjawñi nonžcu, Pedruqui Jesusiž chiita taku cjuñižiča. Niž tuquiqui Jesusaqui cjichiča: “Ima wallpaž kjawan, chejp wilta amqui ana wejr pajñi chiican k'otaquiča”. Jalla nuž cjuñžcu Pedruqui nekztan ulanchiča. Nižaza walja kuzquiz sint'ican kaachiča.

27

JESUSAQUI CHAWC JILIRIZQUIN CHJICHTA

¹ Kjanžquitan tjapa timplu jilirinacami, wajtchiz jilirinacami tsjii acuerduquiz luzziča Jesusa conkatzjapa.

² Jalla nekztan Jesusa chejlžcu chjitchiča Poncio Pilato cjita chawc jiliržquin. Nii oraqui naciona mantiñi gubernutača Pilatuqui.

JUDASQUI TICZICHA

³ Jesusa tarazuñi Judasqui Jesusa conata cherzcu, kuzquiz walja sint'ichiča. Jalla nuž sint'izcu nii quinsa tunc tjaata paaz tjepunchiča timplu jilirinacžquizimi wajtchiz jilirinacžquizimi.

⁴ Paaz tjepunžcu, tuž cjichiča:

—Wejr uj paachinča. Ana čjul ujchiz zoñi tarazunchinča.

Ninacazti nižquiz tuž kjaaziča:

—Jalla niigui, ččjul importejo wejnacaquiztanajo? Niigui amtakazza.

⁵ Jalla nekztanaqui Judasqui timpluquinpacha nii paaz tjojtunchiča. Nekztan ojčkhiča. Persunpacha jora mokžcu, tsjijscu ticziča.

⁶ Nekztanaqui timplu jilirinacaqui paaz ricužcu, tuž cjichiča:

—Tii paazqui anaž uchumqui ofrend cajquiz uchasača. Tiiča zoñž ljok kjayta paazqui.

⁷ Nekztanaqui ninacaqui kazziča nii paaztan yoka kjayzjapa. Nii yokaqui Campo del Alfarero nižta cjita tjuuchiztača. Yekja wajtchiz tici zoñinaca tjatžjapatača nii yokaqui.

⁸ Nužquiz tii timpucama nii yokž tsjii tjuuqui Campo de Sangre cjitazakaztača.

⁹ Jalla nuž Jeremias profetž takuqui cumplissiča. Tuqui timpu Jeremiasqui cjiřchiča, tuž cjian: “Israel zoñinacaqui nii zoñi tankatz precio utchiča, quinsa tunc paaznaca, jalla nii.

¹⁰ Nii quinsa tunc paaznacžtan Campo del Alfarero cjita yoka kjayaquiča, jaknužt Yooz jilirž mantičhaja, jalla nuž”.

JESUSAQUI CHAWC JILIRIZ YUJCQUIN ZEJLCHA

¹¹ Nekztanaqui Jesusaqui naciona mantiñi chawc jiliržquin chjichtatača. Nii mantiñi jiliriqumii Jesusižquiz tuž pewcziča:

—¿Amqui judionacž chawc jilirimkaya?

Jesusaqui tuž kjaaziča:

—Am jaknužum chiičhaja, nužuča.

¹² Timplu jilirinacami wajtchiz jilirinacami, jalla ninacaž uj tjojtuntan, Jesusaqui anaž čjulumi kjaaziča.

¹³ Jalla nekztanaqui Pilato jiliriqumii tuž cjichiča:

—¿Anam am kjaaznaquiya tjapa tii am quintra chiyanaqui?

¹⁴ Jesusažti jalla nuž chiyanaqui ana čjulumi kjaaziča. Jalla nižtiquiztan nii mantiñi chawc jiliriqumii ispanitichiča. Ana čjul pinsimi atchiča.

¹⁵ Jalla nii pascu pijjztiquiz Pilato chawc jiliriqumii tsjii cuzturumpichiztača. Tsjii priz zoñi qumii cutzpanikaztača zoñinacaž chiiacama.

¹⁶ Tsjii ana wal zoñi qumii Barrabás cjita prisu zakaztača.

¹⁷ Zoñinaca ajcziž cjen Pilatuqui ninacžquiz pewcziča, tuž cjian:

—¿Jakzilta tii tanta zoñinacat liwrii cutžta cjeequi? ¿Barrabás cjeequi? už ¿Jesús, Cristo cjita cjeeja?

¹⁸ Pilato jiliriqumii zizziča, Jesusa chjaawjcu judío zoñinacaqui nii intirjichiča, jalla nii.

¹⁹ Pilatuaqui niiz jusjiis mizquiz julzi želatča. Jalla nicju želan niiz tjunqui tsjii žoñi mazñi cuchanzquichinča. Nii mazñi žoñiqui tuž čhiichča: “Am tjun cjiča: ‘Nii zuma žoñžquiz ana mitisaquiča. Nii žoñiž cjen tizwan juc’ant ana wali čjuuzinča. Nii žoñžquiz ana mitis waquiziča”.

²⁰ Pero timplu jilirinacami wajtchiz jilirinacami, nii žejlñi žoñinacžquiz intintiskatchiča, Barrabás cutzna cjeajo, nižaza Jesusa contaj cjila cjeajo.

²¹ Jalla nekztanaqui nii mantiñi jiliriqwi wilta žoñinacžquiz pewcziča, tuž cjican:

—Žakzilta pirit tii pucultan tantanacquiztan liwrii cutznaqui?

Zoñinacauki kjaaziča, tuž cjican:

—Barrabás cutzna.

²² Pilato jiliriqwi wilta ninacžquiz pewcziča, tuž cjican:

—Tii Cristo cjita Jesusižquiz, žčhjulut wejr paa-aqui?

Tjappacha nii žoñinacauki kjaaziča, tuž cjican:

—jCruzquiz ch’awczna!

²³ Nekztanaqui Pilato jiliriqwi cjichiča:

—žČhjul uj paachi teejo?

Nii žoñinacazti juc’anti kjawchiča:

—jCruzquizka ch’awczna! —cjican.

²⁴ Jalla nekztanaqui Pilato jiliriqwi naychiča, nii žoñinaca ana intintiskatchuca. Nii žoñinacauki walja žawjchiž ch’ajrapatča. Jalla nekztanaqui Pilato jiliriqwi kjaz zjijckatchiča. Nii zjijcta kjazquiz kjara awziča žoñinacž jujcquiz, tuž cjican:

—Tii zuma žoñž ticzqu i anaž wejt uj cjequiča. Ančhuca ujž cjequiča.

²⁵ Tjapa nii žoñinacauki kjaaziča, tuž cjican:

—Wejtnacaltazat uj cječhani, nižaza wejtnaca ocjalanacžtami.

²⁶ Jalla nekztanaqui Pilato jiliriqwi Barrabás liwrii cutziča. Nekztanaqui Jesusa wjajtzjapa mantichiča. Nižaza cruzquiz ch’awceta cjeajo, zultatunacžquiz intirjichiča.

²⁷ Jalla nekztanaqui nii mantita zultatunacauki jilirž palacio kjuyquin Jesusa chjitchiča. Nekztanaqui tjapa nii zultatž tropanaca kjawsassiča, Jesusa muytata.

²⁸ Nekztanaqui Jesusa čhjojkičiča. Jalla nuž čhjojkcžcu tsjii ljoc murat zquiti tjutziča.

²⁹ Nekztan niiz achquiz ch’ap pillužtakaz paažcu scaržinčiča, nižaza žew kjarquiz wara tanskatchiča. Jalla nuž paažcu niiz jujcquiz quillziča, tuž cjican:

—jViva tii judío žoñinacž chawc jiliri! —Jalla nuž čhiican burla paachiča.

³⁰ Nižaza llawzižtan niizquiz tjujtichiča. Niiz kjarquiztan wara kjañcan, achquiz wjajtchiča.

³¹ Jalla nuž burla paažcu, niizquiztan ljoc murat zquiti čhjojkičiča. Nekztan wilta niiz persun zquiti tjutziča. Jalla nekztanaqui cruzquiz ch’awczjapa Jesusa chjitchiča.

JESUSAQUI CRUZQUIZ CH’AWCTA

³² Jalla nuž Jesusa chjichcan tsjii Cirene wajtchiz žoñi zalžquichiča. Simón cjitatača. Jalla nii žoñiqui Jesusiž cruza kuzkatchiča.

³³ Jalla nuž Gólgota cjita yokquin irantichiča. Nii yokaqui “Ach Tsij yoka” cjitazakatača.

³⁴ Jalla nicju tsjii vinžtan jaržtan t’ajžta lickatchiča. Pero nii mallžcu, ana licz pecchiča.

³⁵ Cruzquiz ch’awczcu, zultatunacauki Jesusiž zquiti tanzjapa surtiassiča. Jalla nuž paatan profetž takuqui cumplissiča. Nii tuquita profetaqui tuž cjichiča: “Wejt zquiti tanzjapa surtiasaquiča”.

³⁶ Jalla nekztanaqui nijwcpacha ninacauki wilzjapa julziča.

³⁷ Kjažtiquiztan Jesusa cruzquiz ch’awctatažlaja, jalla nii tabliquiz cjjirtatača, tuž cjican, “Tiiča Jesusaqui, judío žoñinacž chawc jiliri”. Jalla nuž cjjiržcu ach tsewctuiñ nii tabla ch’awczinčiča.

³⁸ Nižaza pucultan tjañinaca cruzquiz ch’awctatača, tsjiiqui žew latu tsjiiqui zkar latu.

³⁹ Nekz watñi žoñinacauki iñarcan, acha wewcziničatača.

⁴⁰ Nižaza tuž cjichiča:

—Amqui cjiñamla, “Timplu t’ezinžcu čjep majquiztan tsjitsnasača”. Jalla nižta payi atasaž niiqui, jazic persunpacha liwriisalla. Yooz Maatimžlaj niiqui, cruzquiztan apakscu, chjijwžcalla.

⁴¹ Jalla nižta irata zakaz iñarchiča timplu jilirinacami, liy tjaajiñi maestruncami, fariseo parti žoñinacami, wajtchiz jilirinacami. Jalla ninacauki porapat parlassiča tuž cjican:

⁴² —Tiiqui yekja žoñinaca liwriičiča, pero persunpacha anaž liwrii atča. Israel žoñinacž chawc jilirizlaj niiqui, cruzquiztan apakscu, chjijwžquila. Nekztan niizquiz criyasacha.

43 “Tiiċha cjiñiqui, Yoozquin tjapa kuzziztċha. Wejrtċha Yooz Maatiqui”, cjan. Yoozqui tii k'aachichizlaja, jaziqui anzpacha Yooz tiij liwriila.

44 Nii cruzquiz ch'awcta tjañinacami Jesusizquiz quintra chiichizakazza.

JESUSAQUI TICZICHA

45 Taypurquiztan majña kak oracama tjapa nii yokaqui zumchi cjissicċha.

46 Jalla nii orapacha Jesusaqui tjapa aztan kjawchicċha, tuż cjan:

–Eli, Eli, ċlama sabatani? –Jalla nii takuqui cjiċha: “Wejt Yooz, wejt Yooz, ċkjażtiquiztan wejr jaytichamtajo?”

47 Yekjap neکز žejlñi žoñinacaqui jalla nii kjawñi nonžcu, cjichicċha:

–Nonžna. Tiiqui Elías profetaž kjaw kjawla.

48 Nekztan tsjii tsjiiqui esponja cjita kjaz ch'umñi apti zajtchicċha. Jar vinu ch'umkatžcu zijjicċha. Nekztanaqui war puntiztan chjapžcu, Jesusizquin chjalzicċha, liquinzjapa.

49 Parti žoñinacaqui cjichicċha:

–Zela cjee. Antiz chekžla, Elías tii liwrii cunamit tjonañhan.

50 Nekztanaqui Jesusaqui altu joržtan wilta kjawchicċha. Jalla nuż kjawžcu ticzicċha.

51 Jalla nii orapacha pajk timplu cortina chicatquiz juystokaz wjajrzicċha, tsewctan kozzuc. Nižaza yokac chjekinichicċha. Nižaza cur akjinacaqui c'acchicċha.

52 Nižaza sipulturanacaqui cjetsi cjissicċha. Muzpa Yoozquin criichi ticzi žoñinacaqui jacatatchicċha.

53 Jesusaž jacatattiquiztan nii parti jacatatchi žoñinacaqui Jerusalén wajtquiz luzquichicċha. Jalla nicju muzpa žoñinacaqui ninaca cherchicċha.

54 Zultat capitanaqui nii Jesusa wijlñi zultatunacžtanpacha yoka chjekiñi cheržcu, nižaza tjapa nii watñi cheržcu, walja tsucchicċha. Jalla nekztan cjichicċha:

–Chekapan tii žoñiqui werar Yooz Maatitakalala.

55 Jalla nicju wacchi maatakanacaqui želatċha, ažquiztan chekžcan. Nii maatakanacaqui Galilea yokquiztanpacha Jesusa apzicċha, nii atintizjapa.

56 Jalla nii maatakanacaqui tuż cjita tjunchiztaċha: Maria Magdalenataċha; nižaza Mari-iqui Jacob Josež maataċha; nižaza Zebedeož tjun želatċha. Naaqui majchwichchiztaċha.

JESUSIZ CURPU TJATZTA

57 Waj zumznan, tsjii ricach žoñi, José cjita tjonchicċha. Arimatea wajtchiz žoñitaċha. Nižaza Jesusa cumpañt'iñi žoñitaċha.

58 Jalla nii žoñiqui Pilato jiliržquin zali ojkcċha. Nuż zalžcu, Jesusiz curpu maychicċha. Nekztan Pilato jiliri qui mantichicċha nii curpu intirjajo.

59 Josequi Jesusiz curpu chjichcu, limpu saban pañžtan capzicċha.

60 Niižta ew sipultura želatċha, mazquiztan jwetta. Jalla nii sipulturne Jesusiz curpu tjatchicċha. Jalla nuż tjatžcu, sipultur zana pajk maztan pjuczicċha. Nekztan ojkcċha.

61 Jalla nicju Maria Magdalena, nižaza tsjaa María julzi želatċha, sipulturne yujcquiz.

SIPULTURA ZUMPACHA PJUCZTA, NIZAZA WIJILTA

62 Jakatažuqui, jeejz tjuñijapa tjacžcu, timplu jilirinacami, fariseo parti žoñinacami Pilato jiliržquin zali ojkcċha.

63 Jalla nuż zalžcu tuż cjichicċha:

–Wejt Jiliri, wejrnacqui tuż cjuñžnuċha. Tii toscar chiiñi žoñiqui, žejtcanaqui, tuż cjichicċha: “Chjep maj ticziquiztan jacatataċha wejrqui” cjan chiiñitaċha.

64 Jalla nižtiquiztan mantiznalla ċjep majcama sipultura zumpacha wijilta cjilla. Ana zuma wijilta cjequiz niiqui, niž tjaajinta žoñinacaqui ween niž curpu chjichi tjonasaċha. Jalla nekztanaqui žoñinacžquiz k'otasaċha: “Jesusaqui ticziquiztan jacatatchicċha” cjan. Nižta toscara juc'ant anawaliž cjesaċha, primira toscara chiiťiquiztan.

65 Jalla nekztanaqui Pilato jiliri qui ninacžquiz cjichicċha:

–Jalla tekz zultatunaca žejlċha wijilñijapaqui. Anċhucqui oka, nii sipultura zumpachaž chawjčžca, jaknužt atċhaja, jalla nuż.

66 Jalla nekztanaqui ojkcžcu, sipultura zumpacha chawjčžquichicċha. Nižaza nii chawjčžta maz latuquiz sinalt'izcu ecchicċha. Nižaza nekžpacha nii sipultura wijilñi zultatunacami ecchicċha.

JESUSAQUI JACATATCHICHA

¹ Ktantati jeejz tjuñi watžcu Maria Magdalena cjiti qui tsjaa Mariatan sepultura cheržñi ojkcċha, primir siman tjuñi kallžnan.

² Tsjii Yooz anjilaqui arajpachquiztan chjiwžquichiča. Nekztan yoka walja chjek-inchiča. Anjilaž nii sipultura pucžta maz cjewžinchiqi. Nekztan Yooz anjilaqui nii maz juntuñ julziča.

³ Anjilaqui ancha kjañchiča liwliwñižtakaz. Nižaza ancha chiwitača niž zqititqi, kjañižtakaz.

⁴ Jalla nuž cheržcu wijilñi zultatunacaqui walja tsucchiča chjekinzcama. Ticzi zoñižtakaz cjissiča.

⁵ Jalla nekztanaqui nii anjilaqui maatakanaczquiz cjichiča:

—Anaž ančhuc eksna. Wejrqi zizuča, ančhucqui Jesusaž kjurča, cruzquiz ch'awcta Jesusa.

⁶ Anaž tekz žejlča. Niiqi jacatatchiča, jaknužt chiitčaja, jalla nuž. Pichay, tii sipultura chernna.

⁷ Nekztanaqui apuraž oka. Niiž tjaajinta zoñinaczquiz mazca, tuž cjican: “Jesusaqui ticziquiztan jacatatkalča. Ančhuca tuqi Galilea yokquin okaychiča. Jalla nicjuž ančhucqui Jesusa jacatatchi cheraquiča”. Wejrqi cuchanžquitacha tii puntuquiztan ančhucaquiz maznajo. —Nuž cjican paljaychiča anjilaqui.

⁸ Jalla nekztanaqui sipultur kjuya cheržcu, maatakanacaqui apura ojkchiča, ispartichi nižaza walja cuntintu. Zati parižu ojkchiča tjaajintanaczquin mazñi.

⁹ Jalla nuž okan Jesusaqui ninaczquiz parizichiča. Nekztan ninaczquiz tsaanchiča. Nii maatakanacaqui Jesusižquiz macjatžcu rispitan, quilljatchiča, Nekztan niž kjojcha žcojriča.

¹⁰ Jalla nekztanaqui Jesusaqui cjichiča:

—Anaž ančhucqui eksna. Wejt jilanaczquin mazca, Galilea yok kjutñi ojkla ninacaqui. Jalla nicju ninacaqui wejr cheraquiča. Jalla nii maznaquiča.

ZULTATZ QUINTU

¹¹ Jalla nuž nii maatakanacaž okan wijilñi zultatunacaqui watja ojkchiča. Nekztan timplu jilirinaczquin tjapa watchinaca quint'ichiča.

¹² Jalla nekztanaqui timplu jilirinacaqui wajtchiz jilirinaczquin parli ojkchiča. Nuž parližcu tsjii acuerduquiz luzziča. Jalla nekztanaqui nii quint'iñi zultatunaczquiz paaz tjaačiča,

¹³ tuž cjican:

—Ančhucqui tii wajtchiz zoñinaczquiz cjequiča: “Ween wejtnacaž tjan, niž tjaajinta zoñinacaqui Jesusiž curpu kjañžcu chjitchiča”. Jalla nužuž cjequiča.

¹⁴ Chawe jiliriqi ančhucaž quint'ita nonznaquiž niiqi, wejrnacqui nižtan parlača ančhucqui ana casticta cjisjapa.

¹⁵ Jalla nekztanaqui nii zultatunacaqui nii ch'ižzinta paaz tanžcu, ojkchiča. Jalla nekztan nii paaz laycu toscara čiichiča. Jalla nižta toscar quinto judío zoñinacaqui čiichiñiča anz tii timpuquiziqui.

JESUSIZ MANTITANACA

¹⁶ Jalla nii maatakanacaž maztiquiztan nii tuncaman tjaajinta zoñinacaqui Galilea yoka ojkchiča, Jesusaž t'okinzt'ita curquin.

¹⁷ Jalla nicju Jesusa cheržcu, nižquiz rispitchiča. Yekjapa kuz turwaysi zelatča, ultim werera Jesucristo, už anaj Jesucristo.

¹⁸ Jalla nekztanaqui Jesusaqui ninaczquin macjatžcu, tuž cjichiča:

—Wejtquizpacha tjapa mantiz poder tjaatača, arajpachquin žejlñinaca mantizjapami, nižaza tii yok muntuquiz žejlñinaca mantizjapami.

¹⁹ Jaziqi ančhucqui cuchnuča. Tjapa tii muntu nacionanaczquin oka. Tjapaman nacionchiz zoñinaczquiz wejtquin kuziz cjisjapa tjaajinžca. Nižaza Yooz Ejp, Yooz Majch, Yooz Espiritu Santo, jalla wejtnaca tjuužtan criichi zoñinaca bautizaquiča.

²⁰ Nižaza tjapa weriž mantitanaca nii zoñinaczquiz tjaajnaquiča ninaca cazajo. Zapuru wejrqi ančhucatan chica cjeeča, tii muntu tucuzinžcama. Jalla nii ančhucqui tiraž cjuñaquiča. Jalla nužoj cjila. Amén.

EL SANTO EVANGELIO SEGUN SAN MARCOS

¹ Liwriiñi takuqui Jesucristo Yooz Majch puntuquiztan jalla tužuča. Jesucristuča Yooz Majchqui.

JUAN BAUTISTAZ PUNTU

² Tuqui timpuqui tsjii Yooz cuntiquiztan chiiñi profeta želatča, Isaías cjita. Nii profetaqui cjjirchiča tii takunaca:

“Nonžna. Yoozqui Jesucristuž tuqui tsjii žoñi cuchanžcaquiča, tjappacha tjacznažo.

³ Jaziqui ch'ekti yokquin nii žoñž joraqui altu tawkžtan paljayaquiča, tuž cjican: ‘Tsjii chawc jiliriqui tjonaquiča. Jaknužt jicz zuma tjacznačhaja, jalla nižta ančuca kuznaca zuma tjaczna. Ančuca kamañanacaqui zuma lititumapanž cjee’”.

Nuž cjjirchiča Isaías cjita žoñiqui.

⁴ Jalla nižtapan Juan Bautistaqui ch'ekti yokquin parizizquichiča. Nižaza žoñinaca bautissiča. Nižaza paljaychiča, tuž cjican:

–Kuznacaž campiya, ujnaca pertunta cjsjapa. Nekztan ančhuc bautisasača.

⁵ Tama žoñinaca Juanžquin ojkcichiča, Judea cjita yokquiztan, nižaza Jerusalén cjita wajtquiztan. Jakzilta žoñit persun ujnacquiztan “ujchizpanča” cjican kuzquiz zint'ichaja, jalla niiqui bautistatača Jordán cjita puj kjazquiz.

⁶ Juanž zquitiqi camello chomquiztan watstatača. Nižaza Juanqui zkiz tsjaychiztača. Niiž čheriqui tižtatača: langosto cjita kolta animalanaca, nižaza misq'ui. Jalla nii lujlñitača.

⁷ Juanqui ojklaycan žoñinacžquiz paljaychiča, tuž cjican:

–Tsjiiqui wejt wirquin tjonča. Jalla niiča wejtquiztan tsjan juc'anti poderchizqui. Niižquiz atintisjapa anal waquisuča, niiž čhjata jeržcu chjojczinimi. Inakaztča wejrqui.

⁸ Kjaztanka bautisuča. Nii tjonñi jilirizti Espiritu Santužtan bautisaquiča.

JESUSAQUI BAUTISTATAČHA

⁹ Nekztanaqui Jesusaqui Nazaret cjita wajtquiztan ojkcichiča. Nazaaret watjaqui Galilea cjita provinciquintača. Jesusaqui Juanžquin ojkcichiča, Jordán cjita pujquin. Nekz Juanqui Jesusa bautissiča.

¹⁰ Jesusaqui kjazquiztan ulancan arajpacha cjetzi cherchiča, nii orapacha. Yooz Espiritu Santo palomažtakaz chjijwžquiñi cherziča. Niižuntuñpacha irantizquichiča.

¹¹ Nekztan arajpachquiztan tsjii jora paljayžquiñi nonziča, tuž cjican:

–Amča wejt k'ayi Maatimqui. Amiz cjen ancha cuntintutča wejrtqui.

JESUSIZTAN DIABLUZTAN

¹² Nekztanaqui Espiritu Santuqui ch'ekti yokquin Jesusa ojklayskatchiča.

¹³ Jalla nicjuž pusi tunc tjuñi kamchiča Jesusaqui. Nekziqui q'uit animalanaca zakaz želatča. Jaziqui Satanás cjita diabluqui Jesusižquiz tjonziča; ujquiz tjojtskatz pecatča. Pusi tunc tjuñi ujquiz tjojtskatz yanznatča. Nekztan Yooz anjilanacaqui tjontjonžquiniča Jesusa atintizjapa.

JESUSAQUI TJAAJINCHICHA

¹⁴ Wiruñajqui Juanqui carsilquiz chawjctatača. Nekztan Jesusaqui Galilea cjita yokquin ojkcichiča. Nii yokquin Yooz liwriiñi taku paljaychiča, jaknužt žoñinaca Yooz wajtchiz žoñi cjisaja, nii.

¹⁵ Tuž cjican, paljaychiča:

–Tii timpumiž otča. Anzpacha žoñinacaqui Yooz wajtchiz žoñi cjesača. Kuznaca campiya, “ujchizpanča”, cjican. Nekztan tii liwriiñi takuž tjapa kuztan catoka. Tii takuž criya.

CH'IZ TANÑI ŽOÑI KJAWZTA

¹⁶ Tsjii pajk kota želatča, Galilea cjita. Jesusaqui kot ataran ojklaycan pucultan jilazullca cherchiča; Simón, nižaza Andrés cjitatača. Ninacatača ch'iz tanñinacaqui. Nii ora ch'iz tanz kjazquiz tjojznatča.

¹⁷ Nekztan Jesusaqui ninacžquiz cjichiča, tuž cjican:

–Ančhucqui, wejtan chicaž ojklayñiž cjee. Anziqui ch'iz tanz langzzizza. Pero wejrqui ančucaquiz yekja langzquin utznača, Yooztajapa žoñinaca kjawzqui, nii.

¹⁸ Nekztanaqui nii orapacha ninacaqui ch'iz tanz eccu, Jesusižtan chica ojklayñi cjis- siča.

¹⁹ Jesusaqui tsjii koloculla nawcjapa ojkžcu, tsjii pucultan zoñinaca cherchizakazza; Jacobo, nižaza Juan cjitatača. Ninacž ejpqui Zebedeo cjitatača. Nii pucultan zoñinaca warcuquiz želatča, ch'iz tanz azquichcan.

²⁰ Jaziqui Jesusaqui ninaca kjawziča, nižtan chica ojklayñi cjisjapa. Ninacž ejp warcuquiz želatča, piyunanacžtan. Pero Jacobžtan Juanžtan ejp ecchiča, Jesusižtan ojklayzjapa.

ZAJRAZ TANTA ZOÑI

²¹ Nekztanaqui jeez tjuñi Capernaum cjita watja luzziča Jesusižtan ninacžtan. Nekz-iqui judio zoñinacž ajcz kjuyquiz luzziča. Nekztan Jesusaqui tjaajinchiča.

²² Chawc jiliri irata tjaajnatča, zuma zizñi. Judiuž lii tjaajiñinacžtakaz ana nuž tjaajnatča. Jesusiž tjaajintiquiztan zoñinacaqui ispantichiča:

—jAncha cuzala! —cjican.

²³ Nii ajcz kjuyquizpacha tsjii zajraž tanta zoñi želatča. Nii zoñiqui kjawchiča, tuž cjican:

²⁴ —Jesusa, Nazaret wajtchiz zoñimla. ¿Kjažtiquiztan am wejtnacaquiz mitizi? Wejrnaca aki tjonchamžlani. Jaziqui am pajuča. Zuma Yooz Zoñimla. —Nuž cjican, kjawchiča.

²⁵ Nekztan Jesusaqui zajrižquiz uzjiča, tuž cjican:

—jCh'uj žela! Tii zoñžquiztan ulna.

²⁶ Nekztan zajraqi nii tanta zoñi chekjinskatzcu, nižaza altu tawkžtan kjawžcu, ulanchiča.

²⁷ Nižta cheržcu, zoñinacaqui ancha tsucchiča. Ninacpora parlassiča, tuž cjican:

—jČhjulut nižta teejo? Tsjemataž tjaajinla. Walja azziz tawkchizla. Tii zoñiqui zajramiž mantila. Nižaza zajrami tiiž taku cazla. —Nuž ispantichi parlassiča.

²⁸ Oralla Jesusiž paataqui mazmzatača tjapa nii yokaran.

SIMON PEDRUZ AJMUZ MAA

²⁹ Nekztanaqui ajcz kjuyquiztan ulanžcu, Jesusaqui Simón, nižaza Andrés, jalla ninacž kjuyquiz luzziča, Jacobžtan Juanžtan, nuž.

³⁰ Simónž ajmuz maaquij ajpsquiz ch'ujlñi conchiz laaquichi želatča. Tjapa curpu walja kjakatča. Jaziqui Jesusižquiz mazziča.

³¹ Jesusaqui macjatžcu, naaža kjara tanžcu, tsijtskatchiča. Nekztanaqui naaža kjakñi cona zarakchiča. Nekztan naa žonqui ninaca atintichinča.

ANCHA ZOÑINACA CHJETINTA

³² Nekztanaqui nii zez tjuñiž kattan Jesusižquiz tjapa laaquichi zoñinacami, nižaza zajraž tanta zoñinacami zjijctatača.

³³ Nižaza Jesusaž alujta kjuy zanaran tjapa nii wajtchiz zoñinacaqui ajczjiča.

³⁴ Nekztanaqui Jesusaqui tjapaman laa zoñi čhjetinchiča. Zoñinacžquiztan muzpa zajranaca chjatkatchiča. Zajranacaqui Jesusa pajchiča; pero Jesusaqui ana chiikatchiča.

YOOZ TAKU PARLITA

³⁵ Jakawenz tažquij ima kjanžcan Jesusaqui zaaziča, iya zumchi zumchi cjican. Wajtquiztan ulanžcu, ana zoñž žejlz yokquin ojkchiča, Yooz Ejpžtan parli.

³⁶ Wiruñiqui Simonaqui niž mazinacžtan Jesusa kjuri ojkchiča.

³⁷ Jesusižquiz zalžcu cjichiča:

—Tjapa zoñinacaqui am pewc pewcža.

³⁸ Nekztan Jesusaqui cjichiča, tuž cjican:

—Nacjuñž ojkla, visin watjanacquin. Nicju zakaz Yooz taku paljayzquiztanča wejrqui. Jalla niijapa tii muntuquiz tjonchinča.

³⁹ Nekztanaqui Galilea yokaran ojklaychiča, ajcz kjuyanacquin Yooz taku paljaycan, nižaza zajranaca chjatkatan.

MOJKCHI JANICHIZ ZOÑI

⁴⁰ Tsjii mojkchi janichiz zoñi želatča. Niiquij Jesusižquiz tjonchiča. Quillžcu, rocchiča, tuž cjican:

—Wejr čhjetinzim pecčhaj niiquij, wejr čhjetinzim atča amquij.

⁴¹ Nekztan Jesusaqui nii zoñi okžcu, nižquij lanziča, tuž cjican:

—Wejr am čhjetnasachiya. Jaziquij čhjetintam cjissa.

⁴² Jalla nuž čhiitiquiztanaqui nii orapacha nii zoñiquij žejtchi cjissiča, mojkchi janchi laa cjitiquiztan.

⁴³⁻⁴⁴ Nekztanaqui Jesusaqui nii zoñžquij iwjt'ichiča, tuž cjican:

—Jaziqui tii ħjul am ċiichiijay! Anatha jeczquizimi ċiichiizqui. Timpluquin oka amqui. Nekztan timplu jiliržquin persuna tjeežca. Nižaza ċhjetintiquiztan Moisés mantiacama paa. Jaknužt Moisesqui ofrenda uchajo mantiċhaja, jalla nuž ofrenda uchaquiċha. Jalla nižtiquiztan žoñinaca am žejtċi zizaquiċha. Jazic oka amqui. —Nuž mantiċhiċha Jesusaqui.

⁴⁵ Nekztan nii žejtċi žoñiqui tjapa kjutñi ojklayċhiċha, nii žejtta quintu parlican. Tjapa žoñinacžquin nii quint'ichihċha. Jalla nekztanaqui tjapa žoñinacaqui Jesusižtan zalz pecatċha. Jalla nižtiquiztan Jesusaqui anaž jakzi wajtquizimi luzi atċhiċha, žoñiž zizan. Ana žoñž žejlz yokuñ ojklayċhiċha. Nižtami tjapa kjuttan žoñinacaqui nižžquin tjonñitaċha.

2

ZUCH ZOÑI ĊHJETINTA

¹⁻² Tsjii kjaž majquiztan Jesusaqui Capernaum wajta quejpcihċha, persun kjuyquiz. Nii zizucuqi, tama žoñinacaqui ajcziċha, kjuya ċhjijspcama. Nižaza anataċha campo kjuy zanaran. Nekztan ajczi žoñinacžquiz Jesusaqui Yooz taku tjaajinċhiċha.

³ Nuž tjaajnan, pakpaltan žoñinaca tjonċhiċha, tsjii zuch žoñi kuzi.

⁴ Muzpa žoñi ajcziž cjen, Jesusižquin ana macjati atċhiċha. Nekztanaqui tsewctan kjuya pjetžcu, pjetquiztan zuch žoñi kjuyłchuc ċhjjunžquichihċha, nižž tjaž zquitziquiz.

⁵ Ninacaqui Jesucristužquin tjapa kuztan tjonċhiċha. Nii nayžcu, Jesusaqui zuch žoñžquiz paljayċhiċha, tuž ċjican:

—Jilala. Jaziqui am ujnaca pertuntaċha.

⁶⁻⁷ Kjuyquiz julzi yekjap žoñinaca želatċha, judiuž lii tjaajiñi žoñinaca. Ninacaqui kuzquiz pinsatċha, tuž ċjican:

—ċKjažtquiztan tiiqui nižta ċiijjo? Anawalipanċha tiiž takuqui. ċJect ujnaca pertunasajo? Yoozpanikazla ujnaca pertunñiqui. —Jalla nuž pinsichihċha lii tjaajiñi žoñinacaqui.

⁸ Jesusaqui persun kuzquiz ninacž pinsita zizziċha. Nekztan ninacžquiz paljayċhiċha, tuž ċjican:

—ċKjažtquiztan anċhuca kuz nižta pinsejo?

⁹ ċJakzilta takut pjasila ċiiz cjesajo? Tii zuch žoñžquiz ċiizinsjo, “Am ujnacami pertunta”, ċcjis pjasila cjesaya? už “Tsijsna. Am tjaž zquiti aptižcu oka”, ċnuž ċiiz pjasila cjesaj?

¹⁰ Tsewctan cuchanžquita Yooz Žoñċha wejrqui. Tii muntuquiz jiliritċha, ujnaca pertunžjapami. Jalla nii zizjapa, anċhucqui tiiž chera.

Nekztanaqui zuch žoñžquiz ċjichihċha:

¹¹ —Amquiz ċjiwċha, tsijsna. Am tjaž zquitinaca aptaza. Oka am kjuya. —Nuž ċjican ċiichiċha Jesusaqui.

¹² Nekztanaqui nii zuch žoñiqui tsijsiċha. Tjaž zquiti aptichihċha. Liwž tjappachaž cheran, ulanċhiċha. Jalla nižta cheržcu tjapa žoñinacaqui walja ispantichi quirchihċha, tuž ċjican:

—Tižta wira ana cheriñċha.

Nekztanaqui Yoozquin honora waytichihċha.

LEVI ĊJITA ZOÑI

¹³ Nekztanaqui Jesusaqui wajtquiztan ulanžcu, pajk kot ataran wilta ojklayatċha. Nuž ojklayan, žoñinacaqui nižžquin macjatžquichihċha. Nekztan Jesusaqui ninacžquiz tjaajinċhiċha.

¹⁴ Wiruñauqi nawjċjapa ojkiċha. Jiczquiz ojkan, Leví ċjita žoñi cherċhiċha, aduanž kjuyquiz julžnan. Levíž ejpqui Alfeo ċjitataċha. Jesusaqui nižžquiz paljayċhiċha, tuž ċjican:

—Wejttan ċhica ojklayñim ċjequichha.

Nekztan tsijscu, Jesusižtan ojkiċha Leviqui.

¹⁵ Nižaza Levíž kjuya luli ojkiċha. Nicju Jesusižtan nižž tjaajintanacžtan nuž lulan, aduanerunacžtan nižaza ujchiz žoñinacžtan nekzizakaz lulatċha. Muzpa žoñinacaqui Jesusižquin apžitaċha.

¹⁶ Tsjii kjažt judiuž lii tjaajiñi žoñinaca zakaz želatċha, fariseož partinacami. Jaziqui Jesusižtan anazum žoñinacžtan juntu lulan, nayċhiċha. Nekztan pewcziċha nižž tjaajinta žoñinacžquiz, tuž ċjican:

—ċKjažtquiztan tii Jesusa aduanerunacžtan nižaza ujchiz žoñinacžtan lujljo?

¹⁷ Ninacž ċhiita nonžcu, Jesusaqui kjaaziċha, tuž ċjican:

—Zuma žejtċhinacaqui anaž kullñi pecasaċha. Laa žoñinacž kullñic pecċha. Wejrqui “Zumal kamuċha” ċjiñi žoñinacžquiziqui ana kjawžñi tjonchinċha. Antiz “ujchizpanċha” ċjiñi žoñinacžquiz kjawžñi tjonchinċha.

AYUNAS PUNTU

¹⁸ Juanž tjaajintanacžtan fariseož parti zoñinacžtan, jalla ninacaqui ayunasñipantača. Jaziqúi zoñinacaqui Jesusižquiz pewczñi tjonchiča, tuž cjican:

—¿Kjažtiqiztan Juanž tjaajintanacžtan nižaza fariseož tjaajintanacžtan ayunasñejo? Amiž tjaajintanacazti ana ayunasñipanla.

¹⁹ Nekztan Jesusaqui ninacžquiz tuž cjichiča:

—Zalž pjižstiqiz impittaž cjenaqui, ¿kjažt ayunasasajo? Zalsñi zoñžtan pjižstaž paacha. Zalsñi zoñi želanpacha, anaž ayunasasača.

²⁰ Tii jarquin nii zalsñi zoñiž kjantaž cjequiča. Nekztanž ayunasasača.

²¹ Jesusaqui tii takuzakaz čiichiča:

—Anaž jakziltami zijzi zquitquiziqui ew rimintižtan rimintasača. Nižta rimintasaž niiqui, zijzi zquti juc'anti wjajrskatasasača. Ewqui zijziqiztan jaljiznasasača. Nekztan juc'antiž tsjelanznasača.

²² Nižaza anaž jakziltami zijzi zkiz luusquiz ew vino alznasača. Nižta alznasaž niiqui, zkiz luus wjajrskatasasača ew vinuqui. Nekztanaqui zkiz luusmi vinumi pizcpacha pertisnasasača. Ew vinuqui ew zkiz luusquizpanž alznasača. —Nuž cjichiča Jesusaqui.

JEEJZ TJUŇI QUINTU

²³ Nekztanaqui tsjii jeejz tjuñi Jesusaqui tiric zkal taypiran okatča tjaajintanacžtan. Zkal taypiran ojkan tjaajinta zoñinacaqui tiric oza kjajpchiča.

²⁴ Nii cheržcu, yekjap fariseonacaqui Jesusižquiz paljaychiča, tuž cjican:

—Cheržna. ¿Kjažtiqiztan nižta paajo? Jeejz tjuñquiziqui nižta anapanča paazqui. Učhum lii quintrala, ¿ana jaa?

²⁵ Nekztan Jesusaqui kjaaziča, tuž cjican:

—Ančhucqui Yooz taku liichinčhucča, ¿ana jaa? Cjijrta Yooz takuqui tuž cjiča: učhum tuquita atchi ejp, David cjitaqui, niž mazinacžtan čheri eescatchiča. Ana čjul čherchiz cjen,

²⁶ Yooz timpluquiz luzziča. Nii ora timplu chawc jiliritača Abiatar cjitaqui. Timpluquin Yooz yujcquiz nonžta t'antanaca želatča. Jalla nii t'anta aptižcu, lujlchiča David cjitaqui. Nižaza niž mazinacžquiz tojunchiča. Anapantača permitta nii t'anta lujlžqui ina zoñžlaqui. Nižta lujlžcuqui lii quintrala niiqui. Timplu jilirinacžtapankaz nii t'anta lulaj cjitaqui.

²⁷ Nekztanaqui Jesusaqui ninacžquiz čiizinchizakazza:

—Zoñž laycu jeejz tjuñiqui uchtatača. Nii jeejz tjuñquiztanaqui zoñiča juc'ant chekanaqui.

²⁸ Wejrqui tsewtan cuchanžquita Yooz Zoñtča. Jeejz tjuñquizimi čhjulu paaz cjenami weril mantasača. —Nuž cjichiča Jesusaqui.

3*KJARA KJOŇCHI ZOŇI*

¹ Nekztanaqui Jesusaqui wilta tsjii judionacž ajcz kjuyquiz luzziča. Nekz tsjii kjara kjoñchi zoñi želatča.

² Ujchiz jwesjapa quintri zoñinacaqui Jesusa awayt'atča, jeejz tjuñquiz čhjetnaquiya, už anaž čhjetnasaj.

³ Nekztanaqui Jesusaqui kjara kjoñchi zoñžquiz paljaychiča, tuž cjican:

—Tsijsna. Tii taypiquin cjisna.

⁴ Nekztan parti zoñinacžquiz paljaychizakazza, tuž cjican:

—¿Jeejz tjuñquiziqui učhum liiqui kjažt cjejo? ¿žožžquiz zuma paasaya uz žožžquiz ana zuma paasaja; žožž wira liwriyasaya uz žožž wira ticskatasaja? —Nuž pewczičha Jesusaqui.

Ninacazti ch'ujukaz želatča.

⁵ Nekztan Jesusaqui niž muytata žejlñi zoñinacž kjutñi chercherziča. Ninacžjapa žawjchiča; nižaza ninacž chojru kuzziz cjen, llaquitatača. Nekztan laa žožžquiz paljaychiča, tuž cjican:

—Am kjara chjinzna.

Nuž kjara chjinžcu, žejtchi quirchiča.

⁶ Nekztanaqui fariseo zoñinacaqui ulanchiča. Ulanžcu Herodes partinacžtan Jesusiž quintra parlichičha:

—¿Jaknužt Jesusa conas? —cjican.

JESUSAQUI TJAAJINCHICHA

⁷ Nekztanaqui Jesusaqui niiz tjaajintanacžtan ojklaychiča pajk kot ata. Muzpa tama žoñinacaqui apziča.

⁸ Tjapa kjuttan yokquiztan tjonchiča, Galilea yokquiztan, Judea yokquiztan, Jerusalén wajtquiztan, Idumea yokquiztan, Jordán puž najwctan yokquiztan, Tiro Sidón wajtanac kjuttan, tjapa tii yokanacquiztan Jesusižquin tjonchiča, niiz ancha wali paatanaca cheri.

⁹ Nekztanaqui Jesusaqui niiz tjaajintanacžquiz čhižinchiča:

–Wejtta warcuž tjaczina, tii tama žoñinaca ana wejtquiz ts'acjasajo.

¹⁰ Muzpa žoñinacaž čhjetintaž cjen, tjapa laa žoñinacaqui Jesusižquin tjonchiča. Niižquiz lanzjapa, ancha ts'acjassiča.

¹¹ Nižaza čhjulorami zajranacaqui nii cherčhaja, niiz yujcquiz quillziča. Kjawcan, čhiichiča:

–Yooz Matimča amqui, –cjican.

¹² Jalla nekztanaqui Jesusac ninacžquiz walja iwjt'ichiča, tuž cjican:

–Wejtquiztanac anača ančhucqui čhiizqui, “Yooz Maatimča”, cjican.

TUNCAPAN APOSTOLONACA ILLZTA

¹³ Nekztanaqui Jesusaqui tsjii curullquin yawchiča. Niiž kuz pecta žoñinaca illzcu ninaca kjawziča. Nekztan niižquin macjatchiča illzta žoñinacaqui.

¹⁴ Tuncapan žoñi utchiča niiztan kamajo, nižaza Yooz taku parlajo.

¹⁵ Ninacžquiz poderchiz cjiskatchiča, Yooz aztan laa žoñinaca čhjetnajo, nižaza zajrami čhatkatajo.

¹⁶ Nii illzta žoñinacaqui tinacatača; Simonatača; niiqui Pedro cjitazakaztača.

¹⁷ Jacobotača; Zebedeož majhtača niiqui. Juantača; Jacobož lajktatača niiqui. Jacobžtan Juanžtan altu jorchiz cjen Boanerges cjitazakaztača.

¹⁸ Andrestača. Felipitača. Bartolomitača. Mateotača. Tomastača. Yekja Jacobotača; Alfeož majhtača niiqui. Tadeotača. Yekja Simonatača; tsjii politicutača niiqui, cananiž partitača.

¹⁹ Judas Iscariotitača; Jesusiž quintra tarazunchiča niiqui. Jalla nužuča Jesusiž illzta žoñinacaqui.

JESUSIŽ QUINTRA CHIICHICA

Nekztanaqui Jesusaqui kjuyquin ojkičiča niiz illzta tjaajintanacžtan.

²⁰ Nekziqui muzpa žoñinacaqui ajcsizakaztača. Jesusaqui niiz tjaajintanacžtanaqui ana čhjeri luli atchiča, žoñinacaž muzpa ajcziž cjen.

²¹ Nekztanac yekjap žoñinacaqui cjichiča:

–Lucurataž niiqui, –cjican.

Jaziqi žoñiž lucurata cjiñiž cjen Jesusiž parintinacaqui tjonchiča Jesusa čhjichi.

²² Nižaza Jerusalenquiztan judiuž lii tjaajiñinacaqui tjonchiča, tuž cjican:

–Jesusaqui Beelzebú cjita zajraž tantača. Nii zajriž jilirž aztan yekja zajranaca čhatkatničiča tiiqui. –Nuž cjichiča.

Beelzebú cjitaqui zajriž jiliritača.

²³ Nekztanaqui nižta čhiñi žoñi kjawžcuqui, Jesusaqui paljaychiča, tuž cjican:

–ĴJaknužt Satanás cjita zajraqui persunpacha čhatkatasajo?

²⁴ Tsjii wajtchiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii wajtaqui tjtantaž cjequiča.

²⁵ Nižaza tsjii kjuychiz žoñinacaqui pizcquiz t'aknsasaž niiqui, tsjiimi tsjiimi quintrasasaž niiqui, nii kjuychiz žoñinaca wichansnasača.

²⁶ Satanasaqui persuna t'aknsasaž niiqui, ezasača. Niiž aziqi miransnasača. Anaž azziz cjesača.

²⁷ Jaziqi anaž jecmi tsjii azziz žoñiž kjuyquiziqui luzi atasača, ima azziz žoñi čhejlcanaqui. Anaž niiz kinakunacami jwesi atasača. Čhejlzcu, nekztan kinakunaca jwesi luzasača.

²⁸ Čeka ultimú werara chiyuča, tjapa ujnacami tjapa anazum takunacami pertuntaž cjesača.

²⁹ Pero jakzilta žoñit Yooz Espirituž quintra čhičhaj niiqui, anaž pertunta cjesača. Nii žoñi qui wiřaya ujchiz cjequiča.

³⁰ Žoñiž “Zajraž tantamča amqui,” cjiñiž cjen, nuž paljaychiča Jesusaqui.

JESUSIŽ MAATAN LAJKNACŽTAN

³¹ Nekztanaqui Jesusiž maatan lajknacžtan tjonchiča. Kjuy zanquiztan tsijtscu, Jesusa kjawskatchiča.

³² Kjuyltan žoñinacaqui Jesuižquiz muytata julzi želatača. Ninacaqui Jesusižquiz mazziča:

—Tekz am maa tjonchinča am lajknacžtan. Am kjawža, —cjican.

³³ Nekztanaqui Jesusaqui kjaaziča:

—¿Ject wejt maajo, wejt jilanacajo?

³⁴ Nii muytata julzi zoñinacž kjutñi cheržcu, Jesusaqui cjichiča:

—Tinacača wejt maaqui, wejt jilanacajo.

³⁵ Jakziltat Yooz mantitacama ojčkaha, niičha wejt jilaqui, wejt cullaqui, wejt maaqui.

4

ZKALA CHJACZ QUINTU

¹ Wilta Jesusaqui kot atquiz tjaajinchiča. Nekztanac muzpa zoñinacajo niizquiz macjatžquichiča. Jalla nekztan Jesusaqui walsiquiz luzziča kot kjutñi. Zoñinacasti kot atquiz žejlchiča.

² Nekztan nii walsiquiztan zoñinacžquiz muzpa tjaajinchiča, tuž cjican:

³ —Nonžna ančhucui. Tsjii zoñiqui zkal čjaqui tewcchiča. Nekztan zkal semilla wichcan wichcanka čhjaczhiča.

⁴ Nuž čhjacan, parti semillanacajo jicz latuquiz tjojsiča. Nekzi wežlanacajo tjonchiča nii semilla luli.

⁵ Parti semillanacajo maz yokaran tjojsiča. Maz juntuñaqui ljawallatača yokaqui. Nekztan ratulla jecziča nii čhjactaqui.

⁶ Pero sii kjakiqui nii čhjactaqui ujsiča. Ana kozi zep'i atžcu, ratulla kjoñchiča.

⁷ Parti semillanacajo ch'ap yokaran tjojsiča. Nekztan ch'apinacaz pajkchi, nii čhjactaqui tjanachiča. Ana pookchiča.

⁸ Parti semillanacajo zuma yokquiz tjojsiča. Nekztan cuza jecziča, pajkchiča, čhjerchiča. Jaziqui nii semillanacajo quinsatunca sojtatunca, patac čhjerchiz zapa zkal ozquiz, nuž pookchiča.

⁹ Jalla nekztanaqui Jesusaqui chiižinchiča:

—Jakziltadžlaja nonžni cjuñchiz niiqui, nonžla.

CHJACZ QUINTU INTINTISKATTA

¹⁰ Wiruñajaki Jesusa zinalla želan, niiz tuncapan tjaajinta zoñinacžtan nekz žejlñinacžtan, ninacajo Jesusa pecunchiča čhjacz quintu.

¹¹ Nekztanaqui Jesusaqui kjaaziča, tuž cjican:

—Ančhucajo Yooz tjaajinacajo ančhucaku kuzquiz, niiz mantita kamaña puntuquiztan zizjapa. Yekjap zoñinacžquizzti quintunacžtankaz nii puntuquiztan chiyučha, ana criichi kuzziz cjen.

¹² Jalla nižta chiyučha, chercanpacha ana zizajo, nonžcanpacha ana intintajo, ana kuz campižkatajo, ujquiztan ana pertunta cjisjapa.

¹³ Nekztanaqui Jesusaqui tjaajinta zoñinacžquiz pewcziča, tuž cjican:

—¿Anača tii zkala čhjacz quintu ziz, ančhucjo? ¿Jaknužt parti weriž chiita quintunaca zizasajo?

¹⁴ Ančhucajo tjaajnuča. Zkala čhjacz quintuqui jalla tuž cjiča: Jakziltat Yooz taku paljayčaha, jalla niičha nii zkala čhjaczni zoñiqui.

¹⁵ Tsjii semillanacajo jicz latuquiz tjojsiča. Čhjulorat tsjii zoñinacajo Yooz taku nonžaja, oralla Satanasajo tjonča, kuzquiztan nonžta taku kjañžjapa. Jalla nižtača nii jicz latuquiz yokažtakaz zoñinacajo.

¹⁶ Nižaza tsjii semillanacajo maz yokaran tjojsiča. Nii maz yokažtakaz zoñinacajo Yooz taku nonžcu, orallaž catokča. Pero tsjii upacamakaz Yooz tawk jaru kamča.

¹⁷ Ana koz zep'ichiz zkalažtakazza ninacajo. Yooz taku catoktquiztan yekjap zoñinacajo quintrassa, ninaca čhjaawjča. Nižaza pruebanacajo tjonča. Nekztan ratulla Yooz taku tjažta, quejpsa.

¹⁸ Nižaza tsjii semillanacajo ch'ap yokaran tjojsiča. Nii ch'ap yokažtakaz zoñinacajo Yooz taku nonža.

¹⁹ Nekztanaqui čhjulquinami pinsiča. Wali jiru cjis pecča; čhjultakimiž pecča. Nekztan kuzqui turwaysa. Nižta kuzziz cjen, Yooz taku tjanñiča. Ch'ap yokaran čhjacta semillanaca ch'apiž atipta, anaž pakji atča. Jalla nižtaž nii ch'ap yokažtakaz zoñinacajo. Nužquiz nii zoñž kuzquiz Yooz takuqui anaž pookča.

²⁰ Tsjii semillanacajo zuma yokquiz tjojsiča. Nii zuma yokažtakaz zoñinacajo Yooz taku nonžcu, tjapa kuztan catokča. Nekztanaqui ninacž kuzquiz Yooz takuqui cusaž pookča. Nii zum yokquiz čhjactaqui cusaž čhjerča —quinsatunca, sojtatunca, patac čhjerchiz zapa zkal ozquiz. Jalla nižta Yooz takuqui pookča zuma zoñinacž kuzquiziqui.

MICHA TJEEZ QUINTU

Jesusaqui tsjižžtan quint'ichiča, tuž cjican:

²¹ —Micha ana tjeeznasača cajun kjuyltan nonzjapa, nižaza tjajz zquit koztan nonzjapa. ¿Jalla nižta cjesajo? Anaž cjesača. Micha tjeezqui iztačž juntuñ nonznasača, zuma kajajo.

²² Chjulu čhojžtami wažtapanikaz cjequiča. Nižaza Yooz puntu ana ziztanacami kjanapacha ziztapanikaz cjequiča.

²³ Jakziltažlaj nonžñi cjuñchiz niiqui, nonžla.

²⁴ Jesusaqui cjichizakazza:

—Weriz čhiita taku zuma nonžnalla ančhucqui. Jaknužt ančhuc tjaačhaja, jalla nižtazakaz Yoozqui ančhucquiz tjaasača; iya zakaz yapznasača Yoozqui.

²⁵ Jakziltažlaj catokñi kuzziz niiqui, juc'anti zuma kuz tjaataž cjequiča, Yooz taku intintajo. Jakziltažlaj ana catokñi kuzziz niiqui, juc'anti turwayskattaž cjequiča. Jalla nižtiquiztan Yooz takuqui anapan intintiñiž cjequiča. —Nuž tjaajinčiča Jesusaqui.

ZKAL QUINTU

²⁶ Nižaza Jesusaqui iya tjaajinčiča, tuž cjican:

—Yooz wajtchiz žoñinacauqui jalla tužuča. Tsjii žoñiqui zkala čhjaccča.

²⁷ Nekztan ween tjaičha, majiñ žaaža. Jaknužt zkalaqui jecžaja, pajkčhaja, nii ana zizza žoñiqui.

²⁸ Zkal yokaqui juyžtokaz pookča. Primiruqui zkalaqui jecža, nekztan pjajkallčha, nekztan ozziz cjissa, nekztan čherchizza. Nuž pookča.

²⁹ Nekztan zkala wejliz čjen pajk cuchillžtan zkala ajza. Zkala ricujz timpučha.

MOSTAZA CJITA SEMILLA PUNTU

³⁰ Jesusaqui tsjii quintužtan tjaajinčiča.

—Yooz wajtchiz žoñinaca, ¿jalla nii puntu irata čhjulut cjesajo? Ančhucquiz cjiwčha, tii quintu irata cjesača, mostaz quintu.

³¹ Tsjii semillaqui mostaza cjitača. Tjapa semillquiztan juc'ant zkoltallača.

³² Pero čhjacta mostaz semillaqui walja pakji pajkča, čjul zkalkuiztanami juc'anti. Pajk itzzizza. Layñi wežlanacami itzquiz julžcu, ziwžquiz jeejznasača. —Nuž tjaajinčiča Jesusaqui.

³³ Jalla nižta quintunacžtan žoñinacžquiz tjaajinčiča, quintu nonžñi otčañcama.

³⁴ Quintunacžtankaz tjaajinčiča. Nekztan niž persun tjaajinta žoñinacžquiz zapa quintumi intintiskatchičha, parti žoñinacž ana želan.

JESUSAQUI TJAMIMI KJAZ LJOJKIMI MANTICHA

³⁵ Tsjii nooj tjuñiž kattan, Jesusaqui niž tjaajinta žoñinacžquiz paljayčiča, tuž cjican:

—Tii kotž najwktuñtanž ojklaj, —cjican.

³⁶ Nekztan parti žoñinaca eccu, Jesusaqui tsjii walsiquiz ojkičiča niž tjaajintanacžtan. Nižaza yekja walsanacauqui ninacžtan čhica ojkičiča.

³⁷ Nekztanaqui tsjii wali pjursanti tjami zalčiča. Jaziqui juc'anti tjamiž čjen walsiquiz anča kjaz luzičha. Walsaqui jozipan kjaz chjijsičha.

³⁸ Jesusaqui walsa kjuyltan tsjii azquiz tjaatčha, wirquin. Tjaajinta žoñinacauqui Jesusa žiñziča, tuž cjican:

—Tjaajiñi Maestro! ¡Ticzmayala učhumqui! ¿Anam llaquisya?

³⁹ Wajtžcuqui Jesusaqui tjami mantičičha, apaltajo. Kjaz ljojki mantichizakazza:

—Čh'uj žela! —cjican.

Nekztanac tjamimi nižaza kjaz ljojinacami apaltičičha.

⁴⁰ Nekztan Jesusaqui ninacžquiz cjichiča:

—¿Kjažtiquiztan anča tsucchinčhuctajo? ¿Ana wejtquiz kuzzizčhuckaya?

⁴¹ Tjaajinta žoñinacauqui anča ispantichi cjissičha. Ninacpora parlassičha, tuž cjican:

—Čhjul žoñit teejo? Tiž takucama tjamimi nižaza kjaz ljojki cazla.

5

ZAJRAZ TANTA ŽOÑI

¹ Nekztanaqui kotž najwctuñtan irantičičha Gadara cjita yokquin.

²⁻³ Jesusaqui walsiquiztan ulantan, tsjii zajraž tanta žoñiqui campu santuquiztan tjončiča. Campu santuquin kamñitača. Nižaza anaž jecmi nii zajraž tanta žoñi čheli atatčha, jir carinžtanami.

⁴ Kjaž wilta kjojchami kjarami carinžtan čhejlžinpantača. Čhejlžtiquiztan carinaqui kjoksnipankaztača; t'una kjolžñipankaztača. Anaž jecmi nii žoñž azquiziqui alcansatčha, nii atipzjapaqui.

⁵ Ween majiñ campu santuran cururan ojklajñitača kjawcan. Maztan persun janchi chjojriřñitača.

⁶ Ažquiztan nii žoñiqui Jesusa cheržcu, zajžquichiča, Jesusiž yujcquiz quillžlaki.

⁷ Nekztan altu joržtan chiichiča, tuž cjan:

—Jesusa, Arajpach Yooz Maati, ¿kjažtiquiztan am wejtquiz mitisi? Am roct'uča, anaž wejr tjtatnalla, anaž wejr sufriskatalla.

⁸ Tuquiqui Jesusaqui mantichiča, tuž cjan:

—Zajra, tii zoñžquiztan ulna.

Nuž mantitiquiztan zajraqui chiichiča.

⁹ Nižaza Jesusaqui pewcziča:

—¿Ĉhjul tjuuchizamta? —cjan.

Nii zajraqui kjaaziča, tuž cjan:

—Tama cjitaž wejt tjuuqui. Tamača wejrnacqui.

¹⁰ Nekztan nii zajranacaqui Jesusižquiz anča rocchiča, ana najwcuñ ojklayskatajo.

¹¹ Nekziqui tsjii lumquiz tama cuchinacaqui lulatča.

¹² Nižtaqui Jesusižquiz rocchiča, tuž cjan:

—Cuchinacžquin wejrnac cuchnalla. Cuchinacžquizkaz luzkatalla.

¹³ Nekztanac Jesusac cjichiča:

—Oka nižtaqui.

Ulanžcu zajranacami cuchinacžquiz luzziča. Tsjii pizc waranka cuchinaca želatča. Zajranacaž luztan cuchinacaqui ispanthičiča. Kot kjutñi jira pariju chjucuntichičiča. Kjazquiz luzcu, ticziča.

¹⁴ Nekztanaqui nii cuchi itzñi zoñinacaqui tsucaña zajtchiča. Wajtquinami jochquinami cwint'ichiča cuchi kjazquiz katta quinto. Nekztan zoñinacaqui ojkičiča, nii paatanaca cherzñi.

¹⁵⁻¹⁶ Jesusižquin irantizcu, zajraž tanta zoñi žejtchi cherchiča. Julzi, zquitimi cajtzi, žejtchi, nižta cherchiča. Jalla nuž cherzcu nii zoñinacaqui anča tsucchiča. Ispanthičiča. Nekztan nii cherzñi zoñinacaqui yekja zoñinacžquiz mazziča. Jaknužt nii zajraž tanta zoñi watčhaja, jaknužt nii cuchinacami watčhaja, nii mazmazziča.

¹⁷ Nekztanaqui zoñinacaqui Jesusižquiz rocatča:

—Tii yokquiztan okalla amqui, —cjan.

¹⁸ Nekztan Jesusa walsiquiz luznan nii žejtchi zoñiqui Jesusižquiz rocatča:

—Amtanpan tira žejlz pecuča, —cjan.

¹⁹ Jesusaqui ana munchiča, tuž cjan:

—Am kjuya oka amqui, am jamillanacžquin. Ninacžquiz mazca, “Wejr okziča Yoozqui. Yooz čhjetintitča wejrqui”, cjan.

²⁰ Nekztanaqui Tunca Wajtanaca cjita yokaran ojklaychiča nii žejtchi zoñiqui. Nicjuñ jaknužt Jesusaqui nii čhjetinčizlaja, jalla nii mazmazquichiča. Jalla nekztanaqui nii maztiquiztan tjapa zoñinacaqui tsucchiča.

JESUCRISTUCHA LAA ZOÑI ČHJETINŇIQUI

²¹ Nekztanaqui Jesusaqui kot najwctuñtan quejpžquichiča walsiquiz. Kot ataran želan, nekziqui muzpa tama zoñinacaqui niž muytata ajcziča.

²² Jalla nekztan tsjii Jairo cjita zoñiqui tjonchiča. Judionacž ajcz kjuy jiliritača niiqui. Jesusa cherzcu niž yujcquiz ezlaki quillziča.

²³ Nekztan Jesusižquiz anča rocchiča, tuž cjan:

—Ticzmayaž wejt kolta uzqui. Tjonžcalla amqui. Wejt uzaquiz am persun kjaržtan lanžinalla, wejt uz žetajo, ana ticznao.

²⁴ Nekztanac Jesusaqui nižtan chica nii zoñž kjuya ojkičiča. Okan tama zoñinacaqui Jesusiž wirquiz apziča, ts'acjasan tejcw tejcwwaracan.

²⁵ Zoñinacž taypiquiz tsjaa laa žon želatča. Tuncapan wata ljoc okiñtača.

²⁶ Tsjii kjaž kullñi zoñinacžquin ojkinča. Juc'anti sufriskatchičiča ninacaqui. Nužquiz inapankaz tjappacha naaža cusasa castassinča. Naa žonqui juc'anti laa cjisnatča; ana wira žeti atatča.

²⁷⁻²⁸ Jesusiž paata quintunaca nonchinča. Nekztan Jesusiž wirquiztan macjatchinča. Tama zoñinacž taypiquiz želan, tuž cjan pinsichinča:

—Niž zquitikaj lanžnučaj niiqui, žetaka.

Nekztan niž zquiti lanžinča.

²⁹ Lanžcu nii orapacha tsijtsiča naaža ljoc ojkiñiqui. Žejtchinča. Persun janchiquiz naychinča, nii laaquiztan žejtchi.

³⁰ Jesusaqui persun kuzquiz naychiča, niž aztan naa žon čhjetinchiča, nii. Nayžcu wir kjutñi cherziča. Nekztan pewcziča, tuž cjan:

—¿Ject wejt zquiti lanzejo?

³¹ Nekztanac niž tjaajinta zoñinacaqui cjichiča:

—Cherzna. Tama žoñinaca ancha amquiz ts'acjassa. ¿Kjažtiquiztan am nuž pewczjo, “Ject wejr lanzejo?” cjicanajo.

³² Nekztan Jesusac žoñinacž kjutñi chercherziča, jectčhalaj nii lanzi, nii pajzjapa.

³³ Nekztan naa žonqui persun curpu zejčhi nayžcuqui, ekeksan cjarcatcan macjatchinča, Jesusiž yujcquiz quillzinča. Nekztan naaqui tjapa werara mazzinča.

³⁴ Nekztan Jesusaqui cjichiča:

—Cullacalla. Tjapa kuztan criičiž cjen, čhjetinta cjissamča. Jaziqui zejčhipanim cjequičha. Cuntintum okaquičha.

³⁵ Nekztanaqui Jesusiž naa žonaquiz chiyā, tsjii žoñinacaqui tjonchiča; Jairo cjita judio jilirž kjuyquiztan tjonchiča. Nii jiliržquiz cjichiča:

—Am uzqui ticzinča. Anam iya tii maestružquiz molistis waquizičha.

³⁶ Jesusazti nii žoñinacž čhiita taku ana catokchiča. Nekztan nii jiliržquiz cjichiča:

—Ana am niic kuz turwayskata. Yoozquin tjapa kuztanpan cjeella.

³⁷ Nekztan Jesusaqui Pedružtan Santiagužtan Juanžtan (Santiaguž lajk) ninacakaz apskatchičha. Partinaca ana apskatchičha Jesusaqui.

³⁸ Nekztan judio jilirž kjuyquin irantižquichiča. Nekzi žoñinacaqui ancha kjawcanž kaatkalča. Nižta cherchiča Jesusaqui. Ancha arnatča nii kaañi žoñinacaqui.

³⁹ Kjuyquin luzcu, Jesusaqui cjichiča:

—¿Kjažtiquiztan ancha aranjo, nižaza kaažo? Taa uzqui anača ticzin, tjačha.

⁴⁰ Nekztan nii žejlñi žoñinacaqui tjassiča, nii nonžcu. Jesusazti zancuñ nii žoñinaca ulanskatchičha. Nekztanaqui Jesusaqui maa ejpžtan niž mazinacžtan luzziča, jakziquin naa uz želatčhaja, nicju.

⁴¹ Nekztan Jesusaqui naa uza kjara tanzičha. Nižaza altu tawkžtan čhiichiča:

—Talita cumi, —cjican.

Nii takuqui cjiča, “Usalli, žaazna”.

⁴² Nekztanac nii orapacha naa uzqui žaazičha. Ojklaychičha. Tuncapan watchiztača naa uzqui. Nekztanaqui nii žoñinacaqui kuz kata tsucchiča. Ancha ispantichiča.

⁴³ Nekztan Jesusaqui zuma iwj'ichiča, tuž cjican:

—Ana jecžquizimi tii čhjetinta quintu čhi chiyāquičha.

Nuž mantižcu, ninacžquiz mantichizakazza, naa uzaquiz čhjeri tjaajo, nii.

6

NAZARET CJITA WAJTQUIN OJKCHICHA

¹ Nekztanaqui Jesusaqui najwctan persun wajtquin ojkchiča niž tjaajintanacžtan.

² Jeež tjuñquiziqui judionacž ajcs kjuyquiz tjaajinchiča. Nii nonžcuqui žoñinacaqui ispantichiča, tuž cjican:

—¿Jakziquin zizzit tii žoñi tii tjaajinzacaya? ¿Jaknuž zizzit tii tjaajinzacaya? ¿Jaknuž paachit tii milajrunacaya? ¿Jaknužupan teejo?

³ Tiiqui carpintirukazla, Mariā majchča tiic, žana jaa? Tiiž lajknacaqui Jacobo, José, Judas, Simón cjitača. Ninacžtan tiiž cullaquinacžtan tii wajtquiz učumnacžtan kamča. —Nuž cjichiča.

Nekztanaqui nii wajtchiz žoñinacaqui Jesusiž quintra muzpa žawziča.

⁴ Nekztan Jesusac čhiichiča:

—Tjapa žoñinacaqui Yooziž uchta profetžquiz rispita. Pero persun wajtchiz žoñinacami persun parintinacami persun familianacami profetžquiz anaž rispitz pecñičha.

⁵ Nekziqui nii wajtquiz tsjii kjažultan žoñi čhjetinchiča, kjaržtan lanžcu. Ana iya milajru paayi atchiča.

⁶ Ana criiñiž cjen Jesusaqui cjichiča:

—¿Kjažtiquiztan tii žoñinacaqui ana criijo? ¿Kjažt cjisnaquejo?

Nekztanaqui nii wajtquiztan ulanžcu, visinunacž wajtquiztan wajta tjaajinñi ojklaychiča Jesusaqui.

TJAAJINTA ŽOÑINACA CUCHANTA

⁷ Jesusaqui niž tuncapan tjaajinta žoñinaca kjawžcu, pucultan pucultan cuchanchičha:

—Ančhucqui Yooz aztan zajranaca chjatkataquičha, —cjican.

⁸ Jalla nekztanac mantichiča, tuž cjican:

—Ančhucqui anaž čhjulumi chjichaquičha jiczjapaqui, anaža žak quelzmi anaza čhjerimi anaza paazmi. Tsjii atskaz chjichaquičha.

⁹ Chjata čhjatžcuča okaquičha. Nižaza tsjii zquitillchizkaz okaquičha, ana pizc zquitčiz.

¹⁰ Ančhucqui jakziquinž alujasčhaja, nekziž kamaquičha, čhjulorat nii wajtquiztan ulnačhaja, niicama.

¹¹ Jakzilta watjat ančhuc ana cherz pecčhaja, nižaza ančhuca takumi ana nonz pecčhaja, jalla nii wajtquiztan ulnaquiča. Nekztan nii yok pulpu ančhuca kojchquiztan tsajt tsajtsnaquiča, ninacz uj tjeezjapa. Ultim weraral cjiwčha, juyzu tjuñquiziqui Sodomo nižaza Gomorra cjita watjanacchiz zoñinacaqui castictaž cjequiča. Pero nii ana ančhuc pecči zoñinacazti juc'anti castictaž cjequiča. —Nuž cjichiča Jesusaqui.

¹² Jalla nekztanaqui niiz tuncapan tjaajinta zoñinacaqui Yooz taku paljayi ulanchiča, tuž cjican:

—Ančhucqui tjappacha kuz campiya. Ančhuca uj paaznacaqui eca.

¹³ Nekztanaqui zmali zajranaca chjatkatchiča. Nižaza asiitiztan achquiz tjawkžcu, muzpa laanaca čhetinčiča.

JUAN BAUTISTA CONTA

¹⁴ Tjapa kjutni nii yokaran zoñinacaqui Jesusiž ancha wali paata milajrunaca zizziča. Herodes cjita nacionž chajwc jilirimi zizzizakaztača. Nii Jesusiž paata milajrunacz puntu nonžcuqui, Herodesaqui cjichiča:

—Juan Bautistala tiiqui. Ticziquiztan jacatatchizlani. Jalla nižtiquiztan walja milajrunaca paazjapa poderchizlani.

¹⁵ Yekjap zoñinacaqui cjichiča:

—Elias cjita profetila tiiqui.

Yekjapaqui cjichiča:

—Tuquitan Yooz taku parliñi profetažtakazla tiiqui.

¹⁶ Jesusiž quintu nonžcu Herodes cjita nacionž chawc jiliriqui cjichiča:

—Juan Bautistala tiiqui. Wejrqui tiiz acha pootkatchinča. Anziqiu jacatatchila tiiqui.

—Nuž cjichiča Herodesaqui.

¹⁷ Tuquiqui tužu watchiča. Herodiy cjita zonqui Felipiž tjuntača. Felipitača Herodes jilaqui. Nekztan Herodesaqui Felipiž tjunatan zalsiča. Nekztan Herodiy cjita tjunqui Herodižquiz paljaychiča:

—Nii Juan tankata. Carsilquiz chawjczna. —Nuž cjichinča naaqui.

¹⁸ Tuquitan Juanqui Herodes cjita jiliržquiz čhižinčiča, tuž cjican:

—Am persun jilž tjunatan zalsamča amqui. Nuž ana waquisiča. Jaziqui liy quintram kamča amqui.

¹⁹ Nekztanaqui naa Herodiiqui Juanž quintra ancha žawjchinča. Conkatzpan pecatča. Pero ana atchinča.

²⁰ Juanqui zuma kuzziztača, ana ujchiz žoñi. Nekztan Herodesaqui Juanžquiz eksiča. Nekztan Herodiyqui ana conkati atchinča. Herodesaqui Juanž taku nonžcu, walja paysnakchiča. Jalla nuž cjenami Juanž taku jutzazñipankaztača.

²¹ Wiruñaqiu niiz cumpliaños pjijztiquiz Herodesaqui cusa čherinaca luli kjawziča. Wajt jilirinaca, sultatž jilirinaca, Galiliquiztan ricach zoñinaca, ninaca kjawziča. Nii tjuñquiz naa Herodiyqui ancha kuz tjutzinča, Juan conkatzjapaqui.

²² Nii nooj jakziquin čheri lujlčhaja, nicju Herodiyž turqui tsati luzzinča. Nekztanaqui naa turaž ancha tsajtchinča. Nii cheržcu, jutzazziča Herodiztan niiz invitta zoñinaczšanaqui. Nekztan nii Herodes jiliriqui naa turaquiz paljaychiča, tuž cjican:

—Čjulum pecčhaj niiqui, wejtquiztan mayaquiča. Amquiz tjaača.

²³ Jaziqui Herodesac turaquiz juramentužtan čhiichiča, tuž cjican:

—Čjulu pecanamami amiž maytacama čicat wejt nacionami amquiz tjasača.

²⁴ Nekztan ulanžcu naa turqui maa pewczinča:

—ČjJulut wejr mayas, mama? —cjican. Maaqui kjaazinča:

—Juan Buatistiž acha maya.

²⁵ Nekztan apura jiliržquiz luzquichinča naa turqui. Maychinča maaž mantitacama, tuž cjican:

—Anzpacha tsjii chuwquiz Juan Bautistiž achal pecučha.

²⁶ Nekztanaqui nii jiliriqui ancha llactazziča. Juramentužtan čhiichiž cjen, nižaza niiz mazinacaž nonziž cjen, ana kjaž cjiyi atchiča.

²⁷ Nekztan sultatu cuchanchiča Juanž acha zjijcajo.

²⁸ Carsila ojkičiča mantita sultatuqui. Nekztanaqui Juanž acha pootžcu chuwquiz zjičchiča. Naa turaquiz acha tjaatatača. Nekztan naaqui maaquini acha tjaažquichinča.

²⁹ Jalla nekztanaqui Juanž acha poota nonžcuqui, Juanž tjaajintanacaqui niiz curpu mayi tjonchiča, chjitzjapa, yokquiz tjatzjapa.

LULJL ČHERI TJAATA

³⁰ Wiruñaqiu Jesusiž cuchanta zoñinacaqui quejpžquichiča. Jesusižquiz cwinťichiča tjapa ojklaytanacami tjapa tjaajintanacami. Nekztan Jesusaqui ninaczquiz paljaychiča, tuž cjican:

³¹ —Jakziqunt ana zoñinaca žejlčhaja, nicju tjappachaž ojklalla. Nicju jeežcaquiča. Anča zoñinacaž tjonjonžtiquiztan wira ana čherimi lujzucatača.

³² Nekztanaqui Jesusižtan niž tjaajinta zoñinacžtan, jalla ninacakaz ojkcichiča; ana žejlz yokquin walsiquiz ojkcichiča.

³³ Pero eclichi zoñinacaqui ninaca ojknī cherchiča. Zoñinacaqui ninaca pajžcu tjapa wajtquiztan kjočhuñ zajtchiča. Jaziqui nii zoñinacaqui Jesusiž tuqui irantichiča.

³⁴ Jesusaqui nii yokquin irjatžcuqui walsiquiztan ulanchiča. Nekztan tama zoñinaca cherziča. Nii zoñinaca okziča. Ana awatirchiz uuzanacažtakaz nii zoñinaca želatča. Nekztanac Jesusac walja tjaajinchiča.

³⁵ Ima tjuñ katalla Jesusiž tjaajintanaqui tjonchiča, tuž cjan:

—Ana žejlz yokquizla učhumqui. Tjuñiqui wajillaž kataquiča.

³⁶ Jaziqui tii zoñinacaqui joch kjutñimi wajt kjutñimi cuchnalla, nicju čherimi kjajžcajo. Ninacžta čheri ana žejlča.

³⁷ Jesusaqui kjaaziča:

—Ančhucča tinacžquiz čheri tjaa.

Ninacaqui cjichiča:

—¿Tinacžquiz čheri tjaazjapa, paa patac paaztan t'anta kjayi okas?

³⁸ Nekztan Jesusac kjaaziča:

—¿Kjaž t'antat ančhucalta žejljo? Cheržca ančhucqui.

Nekztan cheržcu quejpžquichiča ninacaqui. Nekztan chiichiča, tuž cjan:

—Pjijska t'anta pizc ch'iz žejlča.

³⁹ Jalla nekztanaqui Jesusaqui ninacžquiz cjichiča:

—Jaziqui pastu yokaran t'aka t'aka tii zoñinaca tjulžna,

⁴⁰ patacquiztan pataca, pjijska tuncquiztan pjijska tunca.

Nekztan nužupan julziča zoñinacaqui.

⁴¹ Nekztanaqui Jesusaqui nii pjijska t'anta pizc ch'iz niž kjarquiz tanzcuqui, tsewcchuc cherziča. Nekztan Yooz Ejpžquin gracias cjan chiichiča. Nekztan t'anta kjolziča. T'una t'una kjolžcu, tjaajintanacžquiz tojziča, parti zoñinacžquiz onajo. Nižaza nii pizc ch'iz tojzizakazza zoñinaca lulajo.

⁴² Nekztan tjapa zoñinacaqui chjeki cjissiča.

⁴³ Nekztanaqui žejtchi t'anti t'unanacami ch'iz t'unanacami tuncapan canasta chjippi ricujchiča.

⁴⁴ Nii t'anta lujlñi luctak zoñinacaqui pjijska warankatača.

JESUSAQUI KJAZ JUNTUŃ OJKCHICHA

⁴⁵ Nekztanaqui Jesusaqui niž tjaajintanaca walsiquiz luzkatchiča, nii kota kakajo, Betsaida cjita wajtquin kotž najwcchaktan. Ninacž ojktan Jesusaqui parti zoñinacžquiz cjichiča:

—Ančhuca kjuyaz okaquiča.

⁴⁶ Zoñinaca cuchanžcuqui Jesusaqui cur kjutñi yawchiča, Yooz Ejpžtan parlisjapa.

⁴⁷ Nii oraqui zumchitača. Curquin Jesusaqui zinallatača. Pajk kotquiziqui nii tjaajinta zoñinaca walsiquiz kjaz kot taypiquintača.

⁴⁸ Jesusaqui curquiztan walsa cherchiča. Tjamiqi pjursantitača. Nii tjaajinta zoñinacaqui tjapa aztan langznatča, najwcchaktan walsa tjakzjapa. Ima kjantatiž cjen ninacžquin ojkcichiča Jesusaqui. Kjaz juntuñ ojkcichiča, tsjiu latu watzjapa.

⁴⁹ Nii tjaajintanacazti Jesusa kjaz juntuñ ojknī cherchiča. Nekztanac kjawchiča:

—Cuntinaž caa, almaž caa, —cjan.

⁵⁰ Anča tsucchiča. Nekztanaqui Jesusaqui paljaychiča, tuž cjan:

—Anača tsuca ančhucqui. Wejrčha. Tjup kuzziz cjee.

⁵¹ Nekztanaqui walsiquiz luzziča Jesusaqui. Nii oraqui tjamiqi zekziča. Jalla nekztanaqui tjaajintanacaqui ispantichiča. Inakaz cjissiča.

⁵² Ninacatača ana nii t'anta milajru intintazñinacaqui. Imazi ninacž kuznacatača zizñi.

JESUSAQUI LAA ZOŃINACA CHJETINCHICHA

⁵³ Nekztanaqui pajk kota kajžcuqui Genesaret cjita yokquiz irantichiča. Nekztan walsa kjaz kot atquiz mokžcu ecchiča.

⁵⁴ Walsiquiztan ulnan zoñinacaqui Jesusa pajchiča.

⁵⁵ Jalla nekztanac nii zoñinacaqui tjapa kjutñi ojkcichiča, laanaca zjijczjapa. Jakziqunt Jesusa želatčhaja, nicju laa zoñinaca zjijcchiča zquitquiz callžcu.

⁵⁶ Jochiran kolta watjaran pajk watjaran ojklayatča Jesusaqui. Jakziqunt ojklayatčhaja, nekzi laa zoñinaca zjijcñipankaztača. Nižaza zoñinacaqui Jesusa rocchiča, laa zoñinaca Jesusiž zquiti lanžnajo. Jesusiž zquiti lanžñinacaqui žejtchiča.

7

¿CHJULUT UJ CJES ZOŃZQUIZQUI?

¹ Nekztanaqui fariseo zoñinacaqui Jesusizquiz macjatchiċha, tsjii kjažt judiuž lii tjaa-jjiñnacžtan Jerusalenquiztan tjonċhi. Jakziquin Jesusa želatċhaja, jalla nicju ajcsičha.

² Nižaza nekzi Jesusiz tjaažinta zoñinacaqui ċhjeri lulatċha, kjara awjz costumbre ana paažcu. Nuž ana kjara awjžcu lulan, cherċiċha parti zoñinacaqui. Nekztan quintra ċhiċhiċha.

³ Nii fariseo zoñinacaqui ana kjara awjžcu, wira ana lujlñitaċha. Parti judio zoñinacaqui nižtazakaztaċha. Jaziċui tuqita zoñinacž costumbre nužupan ċhjoñitaċha.

⁴ Nižaza ċhjeri kjayžcu ana kjara awjz costumbre paažcu, ana wira lujlñipantaċha. Nužupan anċa costumbre cumpliñinacataċha. Wazunacami mazcanacami jir mazcanacami catrinacami nižtanaca ajunñipankaztaċha.

⁵ Nuž cjen nii fariseo zoñinacaqui judiuž lii tjaañinacžtan Jesusizquiz pewcziċha, tuž cjican:

—ċKjažtiqiztan am tjaažintanacaqui tuqita costumbre ana cumplejo? Ana kjara ajwžcu lujl-la.

⁶ Jesusaqui ninacžquiz kjaaziċha, tuž cjican:

—Anazum kuzziz zoñinacžhucċha anċhucqui. Ultim werara anċhuc punctuquiztan ċhiċhiċha tuqita Isaias cžta zoñiqui. Tuž cjican cjiřtkalċha:

“Tii zoñinacaqui tawkžtankaz Yooz rispitiċha; juntuñkazza. Ultimu kuzquiz ana Yooz rispitiċha.

⁷ Inapankaz Yooz sirwiċha tii zoñinacaqui. Tinacaqui zoñž taku tjaañiċha, ‘Tiiċha Yooz takuċui’, cjican”.

—Nuž cjiřtkalċha Isaias cžta zoñiqui.

⁸ Jesusaqui cjichizakazza:

—Nižtapan anċhucqui Yooziž mantita ana cumpliñċhucċha. Zoñž cuzturumpi cumpliñċhucpankazza. Mazcanacami wazunacami ajunz nižta costumbrenaca cumpliñċhucpankazza.

⁹ Anċhucqui Yooziž mantita tjatanċha. Anċhuc costumbrekaz tucquin utċha.

¹⁰ Tuqita Moisés cžta zoñiqui ċhižinċhiċha:

“Am maa ejp respita. Nižaza jakziltami nižž maa ejpž quintra ċhjaawjkataċhaja, jalla niiqui, contaj cžila”. Nuž mantichiċha Moisesaqui.

¹¹ Anċhucqui tuž ċjiñċhucċha: “Jakzilta zoñit nižž maa ejpžquiz ċhiyasaċha, tuž cjican, ‘Wejřqui amquiz anal yanapi atasāċha. Tjapa wejř cusasanaca, Yoozquiz tjaataċha’.

¹² Nuž ċhiyaċhaj niiqui, maa ejp yanapž anaž waquisiċha”. Nuž ċjiñċhucċha anċhucqui.

¹³ Nižtiqiztan anċhuc costumbre ana tjažniž cjen, Yooz mantitaqui tjažta. Jalla nižta paayñċhucpankazza anċhucqui. —Nuž ċhižinċhiċha Jesusaqui.

¹⁴ Nekztanaqui Jesusaqui wilta zoñinaca kjawziċha, tuž cjican:

—Anċhucqui, tjappacha nonžna. Wejř taku intintazñi cjee.

¹⁵ Anaž zawnctan kjuylchuc luzñiqui uj cjesaċha zoñžquiziċui. Zoñž kuzquiztan ulanñi nižž uj cjesaċha zoñžquiziċui.

¹⁶ Jakziltažlaj nonžni ċjuñċhiz niiqui, nonžla.

¹⁷ Nekztanac Jesusac zoñinaca eccu kjuya ojċċhiċha. Kjuya luzcu nižž tjaažintanacaqui Jesusizquiz ni ana intintazta takunaca pewcziċha.

¹⁸ Jalla nekztan Jesusaqui kjaaziċha, tuž cjican:

—ċAnċhucqui nižtazakaz anaž naazyā? ċAnapanž intintiya? Tužuċha niiqui. Anaċha zawnctan kjuylchuc luzñiqui uj cjesaċha zoñžquiziċui.

¹⁹ Nii lujltaqui kuzquiz ana luzasaċha; pjuchquizpanž luzza. Nekztan pjuchquiztan wir kjułñi ulanċha zawnċhuc. Jalla nižtiqiztan ċhjul ċheripankaz lulasaċha zoñinacaqui.

²⁰ Nekztan cjichizakazza:

—Kuzquiztan ulanñi nižž uj cjesaċha zoñžquiziċui.

²¹ Zoñž kuzquiztan tižta ana walinaca ulanċha: anawali pinsiz, adulteriuquiz ojċklayz, yekja maatakžtan žejlz, zoñi conz,

²² tjañi cjis, wali jiru cjis pecz, uj paaz, incallz, anawali kamañċhiz cjis, ċhjułtaki zmaz, anazum takunaca joojooz, mita cjis, anazum kuzziz cjis.

²³ Nižtanaca kuzquiztan ulanċha. Jalla nižtanaca uj cjesaċha zoñžquiziċui.

JESUSIZQUIN KUZUZ MAATAKA

²⁴ Nekztanaqui Jesusaqui tsjitsiċha. Jakziquin Tiro Sidón cžta watjanaca žejlċhaja, niċċhuc ojċċhiċha. Nicju tsjii kjuyquiz alujassiċha. Ana zoñiž pajta kamz pecatċha. Pero ana pajta kamzqui anapantaž atċhuc.

²⁵ Jesusiž tjonta zizcu nii orapacha tsjaa žonqui Jesusiž yujcquiz quillzlaki mac-jatžquichinča. Naaža uzquí zajraž tantatača.

²⁶ Sirofenicia cjita yokchiz žontacha naaqui. Grecia cjita taku chiyiñtača. Jaziqui naa žonqui Jesusa rocchinča:

–Wejt uzaquiztan zajra chjatkatzinalla, –cjican.

²⁷ Nekztan Jesusaqui kjaaziča:

–Primiru maatinaca čjери chjeki lujlsa. Maatinacž čjერიqui kjañžcu pawčžquin tjoj-tanz anaž waquiziča.

²⁸ Naaqui kjaazinča, tuž cjican:

–Nužupanzača. Weraram chiiča. Pero pacunacami mis koztan ocjalž tajwkta čjерinaca lujlča.

²⁹ Nekztanac Jesusac chiičiča:

–Amiž zuma čhiitiqiztan zajraqui ulanskatchinča am uzaquiztanaqui. Jaziqui am kjuya quepa.

³⁰ Nekztanaqui kjuya quejpchinča naa žonqui. Nii kjuyquin naaža uz ajpsquiz želanami, zajraqui chekapanž ulantkalča.

OÑ ZOÑI CHJETINTA

³¹ Nekztan Jesusaqui Tiro cjita yokquiztan quejpžquichiča. Sidón cjita watja, Decápolis cjita yoka watžcu Galilea cjita kot ataran ojklaychiča.

³² Nicju tsjii oñ žoñi Jesusižquiz zjičtatača. Cjacija chiiñizakztača. Nekztan žoñinacaqui Jesusižquiz rocatča:

–Am kjaržtan tii žoñi lanžinalla, –cjican.

³³ Nekztanaqui Jesusaqui nii žoñi chjitchiča tsjii latu. Nekztan nii oñ žoñž cjuñquiz loc'anžtan čjapziča. Nekztan llawsižtan tjužžcu nii žoñž las lanziča.

³⁴ Nižaza Jesusaqui tsewcchuc cheržcu:

–Aayj, –cjican llactazziča.

Nekztan chiičiča,

–Efata, –cjican.

Nii tsjemat taku cjiča, “Cjetzi cjee”, nii.

³⁵ Nekztanac nii žoñž cjuñinacaqui cjetzi cjissiča. Niiž lasqui žejtchizakazza. Cusa chiiñi cjissiča.

³⁶ Nekztanaqui Jesusaqui mantichiča, tuž cjican:

–Tii anam jecžquizimi maznaquiča.

Nekztanaqui žoñinacaqui nii taku ana cassiča. Nekztan Jesusaqui juc'anti ana chiy-chiyajo mantichiča. Nekztan nii žoñinacazti juc'anti mazmazziča tjapa kjutñi.

³⁷ Jaziqui walja ispanitichiča nonžñi žoñinacaqui, tuž cjican:

–Tjapa niž paatanacaqui ancha zumača. oñ žoñimi nonskatñiča. Up žoñimi chikatñiča. Ancha cusača.

8

JESUSAQUI ČJERI TJAACHICHA

¹ Tsjii nooj muzpa žoñinacaqui wilta ajcsiča. Čjери miranzcama žejlčiča. Nekztan Jesusaqui niž tjaajintanaca kjawžcu, ninacžquiz paljaychiča, tuž cjican:

² –Čjep maj tii žoñinacaqui wejttan kamchiča. Jaziqui tinacaqui ana čjерchizza. Tinacžquiz okžnuča.

³ Ana čjери tjaazcu kjuya cuchnasaž niiqui, jicžquiz čjерž kjara tismayasača. Yekjap žoñinacaqui ažquiztan tjončiča.

⁴ Jesusiž tjaajintanacaqui kjaaziča:

–Wazquizza učhumqui; anaž čjulumi žejlča tekziqui. Ččjul čjери tii žoñinacžquiz tjaasajo, wejrnacjo?

⁵ Nekztan Jesusaqui ninacžquiz cjichiča:

–Čkjaž t'antat ančhucalta žejlya?

Tjaajintanacaqui kjaaziča:

–Pakallaku.

⁶ Jaziqui Jesusaqui nii žoñinacžquiz chiičiča:

–Ančhucqui, yokquiz julzna.

Nekztanaqui t'anta tanžcu Yooz Ejpžquin gracias cjican chiičiča. Nekztan t'anta kjolkjolžcu, niž tjaajintanacžquiz tjaachiča, žoñinacžquiz tojnajo. Nekztan partir pay-čičiča tjaajinta žoñinacaqui.

⁷ Nii tjaajintanacaqui tsjii kjaž č'ižnacchiztača. Nii tanžcu Jesusaqui wilta Yooz Ejpžquin gracias cjican chiičiča. Nekztan tjaajintanacžquiz chiičiča:

—Tii zoñinacžquiz tii ch'iznaca tojzna, ančhucqui.

⁸ Nii zoñinacaqui lujlchiča, chjekañcama. Nekztan žejtchi čhjerinaca tjappacha juntžcu, pakallaku canasta chijjpsiča.

⁹ Nii lujlñi zoñinacaqui tsjii pusi warankatača. Nekztan Jesusaqui zoñinaca cuchanchiča, kjuya okajo.

¹⁰ Jesusaqui tjaajintanacžtan walsiquiz luzcu, Dalmanuta cjita yokquin ojkchiča.

JESUSIZ QUINTRA ZOÑINACA

¹¹ Fariseo zoñinacaqui tjonžcu, Jesusižquiz ch'ayi kallantichiča, tuž cjican:

—Amqui Yooztamčhalaj niiqui, milajru tekz paalla nižtaqui.

¹² Nekztan Jesusaqui walja llactazcan ujrsiča. Nekztan čhiichiča, tuž cjican:

—¿Kjažtiquiztan milajrukaz pecjo? ¿Tii zoñinacajo? Wereral cjiwča, milajru ana paasača.

¹³ Nii zoñinaca eccu, walsiquiz luzcu, ojkchiča, wilta kot nawjktuñtan kajkjzapa.

¹⁴ Jesusiž tjaajintanacaqui t'anta chjitz tjatsiča. Tsjii t'antakaz želatča walsiquiz.

¹⁵ Nekztan Jesusaqui ninacžquiz čhižinchiča:

—Cwitazaquiča fariseož liwaturžquiztan nižaza Herodiž liwaturžquiztan.

¹⁶ Nekztan nii tjaajinta zoñinacaqui Jesusiž čhižintiquiztan palt'ichiča, tuž cjican:

—Učhumqui ana t'anta zjijctala. ¿Kjaž cjeequejo?

¹⁷ Nekztan ninacž nuž parlan, Jesusaqui pewcziča:

—¿Kjažtiquiztan t'antiquiztan parli ančhucjo? ¿Anapanž intintiy? ¿Kjažtat ančhucjo? ¿Ančuca kuzqui ana naazñipan, kjažtatajo?

¹⁸ ¿Ančuca čhjujquiqui anaj cherchiya? ¿Ančuca cjuñimi anaj nonziya? ¿Tii anapanž cjuñkaya?

¹⁹ Wejrqui pjijiska t'antižtan pjijiska warank luctak zoñinaca lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Tuncapani.

²⁰ Nekztan Jesusaqui pewczizakazza:

—Wejrqui pakallaku t'antižtan pusi warank zoñi lulunchinča. ¿Nekztan kjaž canastat nii žejtchi t'anta ricujtatajo?

Ninacaqui kjaaziča:

—Pakallaku.

²¹ Nekztan Jesusaqui pewczizakazza:

—¿Anapanž zuma intintas, ančhucjo?

ZUR ZOÑI ČHJETINTA

²² Nekztan Betsaida cjita yokquin irantichiča. Nekzi tsjii kjažu zoñinacaqui Jesusižquiz tsjii zur zoñi zjijcchiča. Zjiježcu rocchiča:

—Tii lanžinalla, —cjican.

²³ Nekztan Jesusaqui nii zur zoñž kjarcu tanžcu, wajtž tjiya chjitchiča. Nekztan niž čhjujquiz llawsižtan t'awziča. Kjaržtan lanžcu pewcziča:

—¿Jaziqui čhjujtakinacam cherya?

²⁴ Zur zoñiqui acha waytižcu chercherziča. Nekztan kjaaziča:

—Zoñi cherchuchača, ojklayñi. Pero ana cusal cheruča; muntinacžtakaz nii zoñinaca cheruča.

²⁵ Jesusaqui nii zoñž čhjujquiz wilta kjaržtan lanziča, zuma cherajo. Nekztan niž čhjujqui zuma žejtchiča. Nii zoñiqui zuma calaru cherchiča ažkquin.

²⁶ Jesusaqui čhjetinžcu niž kjuya cuchanchiča, tuž cjican:

—Anam wajtquiz luzaquiča. Anaž jecžquizimi tii čhjetinta chiyaquiča.

¿JECT JESUSAQUI?

²⁷ Nekztan Jesusaqui tjaajintanacžtan ojkchiča, Cesarea de Filipo cjita yok kjutñi. Ojkcan Jesusaqui pewcziča:

—¿Ject wejrjo? ¿Kjažt cjii zoñinaca wejt puntuquiztanajo?

²⁸ Niž tjaajinta zoñinacaqui kjaaziča:

—Yekjap zoñinaca, “Juan Bautistala”, cjiča. Yekjapac, “Eliasia”, cjiča. Yekjapac, “Tsjii Yooz taku parliñi profetala”, cjiča.

²⁹ Nekztan Jesusaqui pewcziča:

—¿Ančhuczi, jaknuž cjii wejt puntuquiztanajo?

Pedruqui kjaaziča:

—Yooziž cuchanžquita Cristumča amqui, —cjican.

³⁰ Nekztan Jesusaqui mantichiča:

—Anañ jeczquizimi nii maznaquičha.

JESUSAQUI MAZINCHICHA NIIZ TICZ

³¹ Nekztan niiz tjaajinta zoñinac̄quiz wilta tjaajñi kallantichičha, tuž cjican:

—Wejrqui tsewctan cuchanzquita Yooz Zoñt̄cha. Jaziqui ancha t'akjsačha. Wajt jilirinacami timlu jilirinacami judio tjaajñinacami, ninacaqui wejtquiz chjaawjkataquičha. Wejrqui contal cjeečha. Nekztan čjep majquiztan jacatačha.

³² Jesusaqui nuž kjanacama niž ticz mazinchičha. Tii mazintiquiztan Pedruqui tsjii latu Jesusa chjitchičha. Nekztan paljaychičha, tuž cjican:

—¿Kjažtiquiztan nižta chiijo? Anapan nižta chiyalla amqui.

³³ Jesusaqui wir kjutñi parti tjaajinta zoñinac̄zquin cherzičha. Nekztan Jesusaqui Pedro ujzičha, tuž cjican:

—Satanás, zaraka wejt yujcquiztan. Amiz pinsita anačha Yooziž pinsita, zoñiž pinsitakazza.

³⁴ Nekztan Jesusaqui nekz žejlñi zoñinaca kjawžcu, chiizinchičha, tuž cjican:

—Jequit wejttañ chica ojklaz pecčhaj niiqui, primiraqui persun kamañ wiraqui tjažla. Sufrijsapaqui listoj cjila, ticzcama. Nekztan wejttañ chicaž kamaquičha.

³⁵ Jakziltat persun kamañ wira ana tjaž pecčhaj niiqui, arajpach kamañquičha ana tjaataž cjequičha. Jakziltat tii muntuquiz Yooz tawk laycu nižaza wejt laycu persun kamañ wira tjažnačhaja, jalla niiqui arajpachquin wiñaya kamaquičha.

³⁶ Tsjii zoñiqui tjapa tii muntuquiz žejlñi cusasanaca canasačha. Pero nekztan infiernuquin okaquičha niiqui, tjapa nii canta cusasanaca, ¿čhjuljapat sirwasajo? Inakaz cjequičha.

³⁷ Arajpachquin Yooztan kamzqui persun liwriizqui anaž paasztanac kjayasačha.

³⁸ Wejrqui cjiwčha, tii muntuquiz zoñinaca žejlčha, ana Yooz kuzcama ojklayñi, persun kuzcama ojklayñi, ujhizza. Nii zoñinac̄žtan želan, jakziltat wejtquiztan nižaza wejt tawkquiztan asačhaja, nižaza ana pajñi chiyachaj niiqui, jalla niizquiztan wejrzal ana pajñi chiyachha. Tsjii nooj wejrqui wejt Ejpž aztan tjonachha zuma arajpach Yooz anjilnac̄žtan. Nii ora wejtquiztan asñi ana pajñi zoñinac̄zquitanaqui wejrzal ana pajñi chiyachha. Wejrqui tsewctan cuchanzquita Yooz Zoñt̄cha. —Nuž cjichičha Jesusaqui.

9

¹ Jesusaqui cjichizakazza:

—Ultimu werara wejr cjiwčha, tsjii nooj Yoozqui aztan mantaquičha. Ima nii tjuñi tjonan yekjap tekzta zoñinacaqui anaž ticznaquičha.

JESUSAQUI TSJEMATA CJISSICHA

² Soja tjuñquiztan Jesusaqui čjepultan tjaajinta zoñinaca chjitchičha, Pedro, Jacobo, Juan, jalla ninac̄žtan. Pakpaltan tsjii curu yawchičha. Nicju nii čjepultanž yujcquiz Jesusaqui tsjemat chercherchiž cjissičha.

³ Niiž zquitičha ancha llijatčha. Ancha chiw kjatñižtakaztačha. Anaž jec zoñimi nižta chiwi zquiti cjskati atčha.

⁴ Nekztan pucultan zoñinaca jeczquichičha; Elías nižaza Moisés cjitatačha ninacaqui. Jesužtan parlichičha.

⁵ Nekztan Pedruqui Jesusižquiz paljaychičha:

—Wejt Tjaajñi. Walikazza tekz žejlžqui. Čjep chjujlli kjuya kjuyznasačha, tsjiiqui amta tsjiiqui Moiesta, tsjiiqui Eliasta.

⁶ Nekztan nii tjaajinta zoñinacaqui ancha tsucchičha. Pedruqui čhjulut chiyi ana zuma tantiuchucatačha.

⁷⁻⁸ Nekztan ninac̄zquiz tsjiriqui urpuntichičha. tsewctan tsjirquiztan tsjii joraqui chiizquichičha:

—Wejt k'ay Majchčha tiiqui. Tiižquiz nonžna.

Nekztan tjaajinta zoñinacaqui tjapa kjutñi chercherzichha. Anazaka čhjulumi tjenchichha. Jesupankaz želatčha nii čjepultan zoñinac̄žtan.

⁹ Jesusaqui nii curquiztan chjiwžquican ninac̄zquiz paljaychičha, tuž cjican:

—Ančhucaz cherta ana jeczquizimi chiichiyaquičha. Weriz jacatattan, nekztan chichiyaquičha ančhucqui. Wejrqui tsewctan cuchanzquita Yooz Zoñt̄cha.

¹⁰ Ninac̄pora pewsarassičha:

—¿Čhjulut tii jacatatp puntu cjeejo?

Nižtami Jesusiž chitacama ojkcchichha.

¹¹ Nekztan Jesusižquiz pewczichha:

—Judiuž lii tjaajñinacaqui cjiñičha, “Primuruqui Elías profetaqui tjonstančha”, nii. ¿Kjažtiquiztan nižta chiija?

¹² Jesusaqui kjaaziča, tuž cjan:

—Ultimupan Elias profetaqui primiru tjončiča, tjappacha tjaczjapa. Nižaza cjišta Yooz takuqui tuž cjiča, wejr tsewctan cuchanžquita Yooz Zoñž puntuquiztan. Tekziqui ancha sufrača wejrqui. Chjaawjtaza iñartaza cjeeča.

¹³ Jaziqui wejr cjiwča, Eliaaqui tjonchila. Nekztan zoñinacaqui Elias ninacž munañparu paachiča. Nuzupan cjišta Yooz takuqui cjiča Elias puntuquiztan. —Nuž cjičiča Jesusaqui.

ZAJRAZ TANTA UZA CHJETINTA

¹⁴ Nekztan parti tjaajinta zoñinacžquiz irantichiča. Nekzi muzpa zoñinacaqui zelatkalča. Parti tjaajintanacžtan judiuž lii tjaajiñinacžtan ch'aazatkalča.

¹⁵ Tjappacha Jesusa cheržcu ispanti ch'uj cjičiča. Nekztan tsaani zajtčiča.

¹⁶ Jesusaqui pewcziča, tuž cjan:

¿Ninacžtan čjulul chiyas?

¹⁷ Tsji zoñiqui kjaaziča:

—Tjaajiñi Maestro, wejrqui wejt uza amquiz zjičchinča. Zajraz luztan, upa cjišiča.

¹⁸ Jakziquinami zajraqui wejt uzquiz pankaz luzza. Nekztan t'uckatča. Nekztan yokquiz tjojša. Atquiztan čh'utukaž jup'okiča. Izkekaž jojša. Ljajtikaž cjišsa. Jaziqui amiž tjaajintanacžquiz rocchinča, zajra chjatkatajo. Ninacaqui ana chjatkatati atčiča.

¹⁹ Jaziqui Jesusaqui kjaaziča:

—Ančhucqui, ana criñi zoñinacžhucpanča. ¿Čhjuloracamat ančhucatan kamac wejrjo? ¿Čjuloracamat ančhucatan awantac wejrjo? Nižtac nii uza zjičca.

²⁰ Nekztan nii uzac zjičcatača. Nii zajraqui Jesusa cheržcu uza t'uckatčiča. Nekztan nii uzaqui yokquiz tjojšiča. Yokquizpacha zunt'ichiča, atquiztan čh'utu jup'okcan.

²¹ Jesusaqui ejpžquiz pewcziča:

—¿Čhjuloratanpacha am uza laacjichitajo?

Niž ejpqui kjaaziča:

—Koltallquiztanpacha.

²² Tii zajrapan wilta wilta tjojt tjojškatčhani ujquizimi kjazquizimi ticskatzjapaqui. Am cunam atčhani. Tii kullžinalla. Okžnalla wejracqui.

²³ Nekztan Jesusaqui nii ejpžquiz čhičiča:

—¿Kjažtiquiztan am nuž cjeejo, “Am cunam atčhan”, cjanajo? Yoozquin tjapa kuzziz zoñiqui čhjulumpankaz atasacha.

²⁴ Nii uz ejpqui altu joržtan čhičiča:

—¡Tjapa kuzziz wejrqui! ¡Juc'anti Yoozquin kuzziz cjis yanapt'alla!

²⁵ Jesusaqui nayčiča, muzpa zoñinaca ajcsquiñi. Nekztan zajra ujziča, tuž cjan:

—Zajra, amqui tii uza upa oñi cjskatchamča. Wejrqui am mantuča. Tiižquiztan ulna. Anam iya tii uza tanaquiča.

²⁶ Nii zajraqui uza wilta t'uckatčiča. Nekztan ancha kjawcan, ulančiča. Nii uza ticzižtakaz cjišiča. Nekztan jila parti zoñinacaqui čhičiča:

—¡Ticzila tii uzaqui!

²⁷ Nekztan Jesusac kjarallcu tanžcu zinziča. Nekztan nii uzaqui tsijšiča.

²⁸ Nekztanac tjaajinta zoñinacaqui kjuy luzcu jamazit Jesusižquiz pewcziča, tuž cjan:

—¿Kjažtiquiztan wejracqui ana nii zajra chjatkatati atojo?

²⁹ Jesusaqui kjaaziča:

—Ana Yooztan parliscu ana ayunascu, anaž tii zajranacaqui chjatkatati atasacha.

JESUSAQUI NIIZ TICZ MAZINCHICHA

³⁰ Nekztanaqui Jesusaqui niž tjaajintanacžtan ojkčiča Galilea yoka nuž. Ana zoñiž zizan nekž žejlž pecatča, niž tjaajinta zoñinacžquiz iya tjaajinzjapa.

³¹ Tuž cjan tjaajinčiča:

—Wejrqui tsewctan cuchanžquita Yooz Zoñčha. Tsji zoñiqui wejr tarazunaž paaquiča, wejr tankatzjapa. Nekztan tantapal cjeeča. Contal cjeeča. Nekztan čhjep majquiztan jacatatača.

³² Tjaajintanacaqui Jesusiž takunaca ana cusa intintazi atčiča. Nižaza Jesusa iya pewcž eksiča:

—¿Kjažt cjiy, nii am takunacajo? —Nuž cjan, pewcž pecatča, pero.

¿JEC ZOÑIT TUCQUINAQUI?

³³ Nekztan Capernaum cjišta wajta irantichiča. Kjuyquiz luzcu Jesusaqui niž tjaajintanaca pewcziča:

—¿Ojkcan ančhuc čhjulučha parliya?

³⁴ Nekztan anaž čjulumi kjaaziča. Ojkcan tii puntu parlatča, “¿Ject tucquinaqui cjes?” cjian.

³⁵ Nekztan Jesusaqui julziča. Niiž tuncapan tjaajinta zoñinaca kjawžcu, paljaychiča: –Jakziltat tucquinac cjis pecčhaj niiqui, wirquinpankaz cjis waquiziča. Mantapaaz-pankaz waquiziča.

³⁶ Jesusac tsjii uza kjawžcu, tayıquız tsijtskatchiča. Nii uza žcojrziča, tuž cjian:

³⁷ –Jakzilta zoñit wejt laycu tsjii ocjala sirwičhaja, jalla niiqui wejr sirwiča. Nižaza anaž wejr alaja sirwiča; wejrž cuchanžquiñi nii zakaz sirwiča.

CRISTUZ FAVORA PAAŃI ZOŃI

³⁸ Nekztan Juanqui cjichiča:

–Tjaajiñi, am tjuužtan tsjii zoñiqui zajranaca chjatkatatča. Niiqui ana učumtan chica ojklayñiča. Nekztan wejr nacqui użinča, “Nižta anača paazqui”, cjian.

³⁹ Jesusaqui cjichiča:

–Ana nižta chiya. Jakzilta zoñit wejt tjuužtan tsjii milajru paačhaj niiqui, wejt quintra ana pjazila chiyaquiča.

⁴⁰ Jakzilta zoñizlaja ana učum quintra niiqui, učumnaca partizakazza.

⁴¹ Weraral chiyuča, ančhucqui Cristuz illta zoñinacapančhucča. Jakzilta zoñit weriž cjen ančhucquız tsjii kjazllami onančhaja, jalla niiqui nekztan ultimu juc'ant zumanaca tanznaquiča arajpachquin.

UJQUIZTAN CWTTASA

⁴² Nekztan Jesusaqui tjaajinchiča, tuž cjian:

–Wejtquız criichi zoñinaca žejlča, humilde kuzziz cjiñi. Jakzilta zoñit nižta criichi zoñinaca ujquız tjojtskatačhaja, jalla niiqui ana wali paača. Nii paañi zoñž jorquız pajk tjaaj mokžcu, koz kotquız jacuntiz waquiziča. Jalla nižta tsjan cusaž cjesača nii zoñžtaqui.

⁴³ Am kjarat ujquız tjojtskatz pecčhaj niiqui, pootzna. Infiernuquin pizc kjarchiz ojzkqui, nii ana waliž cjesača. Juc'anti cusaž cjesača tsjii kjarchizkaz arajpachquin luzqui. Infiernuquin ujqui wira ana tjesnasača.

⁴⁴ Infiernuquızıqui zoñi lujlñi lak'unacami anaž ticznaquiča. Nii asñi ujqui anaž wira tjesnaquiča.

⁴⁵ Nižaza am kjojchat ujquız tjojtskatz pecčhaj niiqui, pootzna. Infiernuquin pizc kjojchchiz Yooz cuchnasaž niiqui, ana waliž cjesača. Juc'anti cusaž cjesača tsjii kjojchchizkaz arajpachquin ojzkqui. Infiernuquin ujqui wira ana tjesnasača.

⁴⁶ Infiernuquızıqui zoñi lujlñi lak'unacami anaž ticznaquiča. Nii asñi ujqui ana wira tjesnaquiča.

⁴⁷ Am čhujquit ujquız tjojtskatz pecčhaj niiqui, leczna. Infiernuquin pizc čhujcchiz Yooz cuchnasaž niiqui, ana waliž cjesača. Juc'anti cusaž cjesača tsjii čhujcchizkaz arajpachquin ojzkqui.

⁴⁸ Infiernuquızıqui zoñi lujlñi lak'unacami anaž ticznaquiča. Nii asñi ujqui ana wira tjesnaquiča.

⁴⁹ Tjapa zoñinacaqui użtan tjacztaž cjequiča. Zapa wilananacaqui yawčtan tjaczťapanča, jalla nižta.

⁵⁰ Yacuqui zumača. ¿Yacuž lak'anznasaž niiqui, kjažt wilta ch'uyi cjisnasa? Yawcchiz-panž ančhuc želaquiča. Porapat zumaž kamaquiča.

10

JALJTIZ PUNTU

¹ Nekztan Jesusaqui Capernaum wajtquıztan ulanžcu, Judea yokquin ojkičiča; nižaza Jordán cjita puž najwctuñtan ojkičiča. Nicju muzpa zoñinacaqui wilta ajsciča. Nekztan Jesusaqui wilta tjaajinchiča, jaknužt tjaajinčhazlaj, nii.

² Fariseo zoñinacaqui tjonchiča, Jesusa ujquız tjojtskatzjapa. Nekztan pewcziča, tuž cjian:

–¿Učhum liiqui kjažt cjeejo? ¿Tsjii luctakaqui persun tjunatan jaljtiz waquizasaya? Tjaajnalla.

³ Jesusaqui ninacžquız pewcziča:

–¿Moisés cjita zoñiqui, jaknužt ančhucquız mantichiya?

⁴ Nekztan ninacaqui kjaaziča:

–Moisesaqui tuž mantichiča, “Tsjii luctakaqui certificado de divorcio tjaasača tjunatan jaljtizjapa. Nekztan jalťasača.”

⁵ Nekztanaqui Jesusaqui čhižinchiča:

—Ančuca chojru kuzziz cjen nuž mantitatača.

⁶ Niiž tuquiqui ana nižta mantitatača. Tuqui timpuqui Yoozqui tjappacha paacan, žoñi paachiča luctaka maataka.

⁷ “Nižtiqiztan žoñiqui maa ejpžquiztan zarakaquičha, tjunatan kamzjapa.

⁸ Nekztan nii lucutiñi žoñiqui tsjiikaz cjissa”. Anaž iya pucultan žoñi, pero tsjiikazza.

⁹ Yoozqui tsjii lucutiñi cjskatchičha. Nekztan lucutiñi žoñiqui anapan jaltiz waquizičha.

¹⁰ Wiruñaquí niiž tjaajinta žoñinacaqui kjuyquiz Jesusa jamazit pewczičha nii jaltiz puntuquiztan.

¹¹ Jesusaqui kjaaziča:

—Jakzilta žoñit tjunatan jaltižcu yekja maatakatan zalžaj niiqui, uż paača, tuquita tjuna quintra.

¹² Nižaza jakzilta žont persun luctakžtan jaltižcu, yekja luctakžtan zalžaj niiqui, użakaz paača, tuquita lucž quintra.

JESUSAQUI OCJALANACA K'AACHICHA

¹³ Tsjii nooj žoñinacaqui Jesusižquin ocjalanaca zjičchiča, kjaržtan lanznajo. Nuž zjičcan Jesusiž tjaajintanacaqui nii ocjala chjaawjchiča.

¹⁴ Nižta chjaawjñi nayžcu Jesusaqui žawjchiča. Nekztan tjaajinta žoñinaczquiz chižinchiča, tuž cjican:

—Tii ocjalanacaqui wejtzquiz tjonaj cjee. Anaž chjaajwa. Tii ocjalanacz kuzziz irata, jalla nižta žoñinacača Yooz wajtzchiz žoñinacaqui.

¹⁵ Ultim wereral chiyučha, ocjalanacaqui maa ejpž mantitanaca cazza. Jalla nižta irata žoñinacaqui Yooz mantitanaca caz waquizičha. Ana cazaquiz niiqui, wira ana Yooz wajtzchiz žoñinaca cjequičha.

¹⁶ Nekztan Jesusaqui ocjalanaca žcojrzcu k'aachichiča. Zapa maynižquiz kjaržtan lanžcu:

—Yooz am wintijla, —cjichiča.

RICACH ZOÑIŽ QUINTU

¹⁷ Nekztanaqui žoñinaczquiztan Jesusaž zaraktan tsjii žoñiqui zati pariju tjonchiča, niiž yujcquiz quillslaki. Nii žoñiqui cjichiča:

—Tjaajñi Maestro, zumamž amqui. Yooztan wiñaya kamzjapaqui, žčhjul zumanacat wejr paasaya?

¹⁸ Jesusaqui kjaaziča:

—žkjažtiqiztan, “Zumamž amqui”, cjeejo? Anaž jec žoñimi zumaqui, Yoozpankazza zumaqui.

¹⁹ Amqui Yooz mantitanaca zizñamča: “Anača adulteriuquiz ojklazquí. Anača conzquí. Anača tjañi cjisquí. Anača toscara chiizquí. Anača incallzquí. Am maa ejpčha rispitzquí”.

²⁰ Nii žoñiqui kjaaziča:

—Tjaajñi Maestro, koltallquiztanpacha tjapa tinaca cazičha.

²¹ Jesusaqui nii žoñž kjutñi cherziča, k'aachtican. Nekztan cjichiča:

—Tsji cusasa pjaltiča amtaqui. Tjappacha am čhultaki žejlñina tuzna. Poris žoñinaczquiz nii paaz ona. Oka jaziquí. Nekztan am arajpachquin juc'anti ricachum cjequičha. Nuž paažcu wejtzquin tjona. Sufrijsapa listu cjee. Nekztan wejttan chica ojklajñi cjequičha.

²² Walja ricachutača nii žoñiquí. Nekztan nii chiitiqiztan ancha upa kuz cjissiča. Llaquita ojckhiča.

²³ Nekztan Jesusaqui tjapa kjutñi chercherziča. Nekztan tjaajintanaczquiz paljaychiča, tuž cjican:

—Ricachunacztaqui walja ch'amača Yooz wajtzchiz žoñinaca cjisquí!

²⁴ Niiž tjaajintanacaqui Jesusaž chiitiqiztan ancha tsucchiča. Nekztanaqui Jesusaqui wilta paljaychiča, tuž cjican:

—Jilanaca. Jakzilta žoñit tii wir cusasanaczquiz kuz tjaachaja, jalla ninacztaqui walja ch'amača Yooz wajtzchiz žoñinaca cjisquí!

²⁵ Tsjii camello cjita animala žejlčha. Nii camelluqui ch'aman acuj cjuñquiz luzasača. Ricachunacazti tsjan ch'aman Yooz wajtzquiz luzasača, Yooz mantita žoñinaca cjisjapa.

²⁶ Nii chiitiqiztan tjaajinta žoñinacaqui juc'anti tsucchiča.

—žjequit liwriita cjesajo? —cjican, pewcsassiča.

²⁷ Jesusaqui ninaczquiz cherziča. Nekztanac cjichiča:

—Žoñiquí anaž persunpacha liwrii atasacha. Yoozpankazza liwriiñiquí. Yoozqui jecmi liwrii atasacha.

²⁸ Nekztan Pedruqui Jesusižquiz paljaychiča:

—Nonžna. Wejrnacqui tjappacha ecchinča, amtan chica ojklayzjapaqui.

²⁹ Nekztan Jesusaqui cjichiča:

—Weraral ančhucaquiz cjiwča. Jakzilta zoñit Yooz tawklaycu wejt laycu kjuya, jilanaca, cullacanaca, maa, ejp, maatinaca, zkalanaca, jalla ninaca ecačhaj niiqui,

³⁰ tii muntuquiz kjuyanaca, jilanaca, cullacanaca, maanaca, maatinaca, zkalanaca, nižtanaca patac wilaž ninacžtajapa želaquiča. Pero chjaawjta iñartazaž cjequiča. Jalla nuž cjenami, arajpachquin wiñaya Yooztan zuma kamaquiča.

³¹ Walja anzič tucquin zoñinacaqui wirquin cjisnaquiča ultimquiziqui. Nižaza walja anzič wirquin zoñinacaqui tucquin cjisnaquiča ultimquiziqui.

JESUSAQUI NIIZ TICZ MAZINCHICHA

³² Nekztan Jesusaqui Jerusalén cjeta wajtquin okatča tjaajintanacžtan. Jesusača ninacž tuqui ojklchiqui. Nii tjaajinta zoñinacaqui tsucchi okatča. Nii parti apžñinacaqui eksan okatča. Nekztanac Jesusac niž tuncapan tjaajintanaca kjawžcu, tsjii kjtñi chjitchiča. Nekztan jaknužt nižquiz watačhaja jalla nii mazinchiča.

³³ Jesusac cjichiča:

—Nonžna. Wejrqui tsewctan cuchanžquita Yooz Zoñtča. Jerusalén watjaž ojčka ućhumqui. Jalla nii wajtquin tarazuna paatal cjeeča. Timlu jilirinacžquiz nižaza judío tjaajiñinacžquiz tantal cjeeča. Nekztan ninacaqui, “Ticzla tiiqui”, cjequiča. Nekztan yekja wajtchiz zoñinacžquiz intirjital cjeeča.

³⁴ Nekztan wejr munu paatal cjeeča. Llawsižtan tjujttal cjeeča. Wjajttal cjeeča. Ultimquiziqui contal cjeeča. Nekztan ticžcuqui čhjep majquiztanac jacatatača.

JACOBZTAN JUANZTAN

³⁵ Nekztanaqui Zebedeož majchnacaqui Jacobžtan Juanžtan Jesusižquin macjatchiča tuž cjan:

—Tjaajiñi Maestro, čhjulut amquiztan pecučhaj niiqui, tjaalla.

³⁶ Jesusaqui pewcziča:

—čChjuluž pecya?

³⁷ Nii puculatan zoñiqui kjaaziča:

Čhjuloram am tjappacha mantačhaj niiqui, wejrnac julskatalla, tsjiiqui žew kjuttan, tsjiiqui zkar kjuttan.

³⁸ Nekztan Jesusaqui cjichiča:

—Ančhucqui tii maya ana intintichiñčhucča. Wejrqui tsjii wasu licznača. Nižaza tsjii bautismo bautista cjeeča. čJalla nižtapacha ančhuc sufri atasajo?

³⁹ Ninacaqui kjaaziča:

—Atasačhaj.

Nekztan Jesusaqui cjichiča:

—Wejr irata ančhucqui tsjii wasu licznaquiča. Nižaza tsjii bautismo bautista cjequiča.

⁴⁰ Pero žewquiztan nižaza zkarquiztan julznaj cjičhaj niiqui, wejr ana nii atasacha. Jakziltižtažlaj nii julz tjacžta niiqui, ninacžtaž cjequiča.

⁴¹ Nekztan nii parti tunca tjaajintanacaqui nuž nonžcu, žawjchiča Jacobuž nižaza Juanž kjutñi.

⁴² Nekztan Jesusaqui tjaajinta zoñinaca kjawziča, tuž cjan:

—Ančhucqui zizza. Tsjii nacionž chawjc jiliriqui nacion nužpachaž cazkatča. Tsjii c'ari patruažtakaz cjiša jilirinacaqui. Jilirinacaqui tjapa zoñinaca rispitskatča.

⁴³ Ančhuczi anača niža cjisqui. Jakziltat ančhucaquiztan juc'ant chekan zoñi cjis pecčhaj niiqui, partinacž piyuna cjis waquiziča.

⁴⁴ Jakziltat ančhucaquiztan ancha tucquin cjis pecčhaj niiqui, tjapa zoñinacž mantuquizpanž cjis waquiziča.

⁴⁵ Jalla nižtijapa wejr tjončinča. Tsewctan cuchanžquita Yooz Zoñtča. Pero ana zoñiž sirwita cjisjapa tjončinča. Antiz zoñinaca sirwisjapa tjončinča. Zoñinacž cuntiquiztan ticžjapami, zoñinaca liwriizjapami, nijapa tjončinča wejrqui.

ZUR ZOÑI ČHJETINTA

⁴⁶ Nekztan Jesusaqui Jericoquiztan ulanžquichiča tjaajinta zoñinacžtanami tama zoñinacžtanami. Jicz latuquiz tsjii zur zoñi julzi želatča, tomangžcan. Bartimeož cjitatača, Timeož majch.

⁴⁷ Nii Nazaret wajtchiz Jesusa macjatžquiñi nayžcu, nii zur zoñiqui kjawchiča, tuž cjan:

—Jesusa, Davidž Majchimča! ¡Wejr okžnalla!

⁴⁸ Nekztan zoñinacaqui nii zur zoñi ujsiča:

—čCh'uj žela! —cjan.

Nekztan nii zur zoñiqui juc'anti kjawchiča:

—¡Davidž Majch, wejbranž okžnalla!

⁴⁹ Nekztan Jesusaqui tsijsiča.

—Nii zoñi kjawžca, —cjichiča. Zoñinacaqui nii zur zoñi kjawziča, tuž cjan:

—Tsijsna. Zuti cjee. Jesusaž am kjawža.

⁵⁰ Nekztan niž zquiti cujtžcu, tjojktichiča. Jesusižquin macjatchiča.

⁵¹ Nekztan Jesusaqui nii zoñi pewcziča:

—¿Chjulum pecya? ¿Kjažum wejr paljay-ya?

Nii zur zoñiqui kjaaziča:

—Tjaajiñi Maestro, ancha zurtča wejrqui. Chertz pecuča.

⁵² Jesusaqui cjichiča:

—Am tjapa kuztan cjen žejtchamča. Jazic oka.

Nii orapacha nii zoñž čhujquiqui cjetsiča. Cherñi cjissiča. Nekztan Jesusaž okan nii zoñiqui apziča.

11

JESUSAQUI JERUSALEN WATJA LUZZIČHA

¹ Nekztanaqui pizc wajtquin irantichiča Tsjiiqui Betfagé cjitača, tsjiiqui Betania cjita. Jerusalén wajtž žcatillatača, Olivos cjita cur zanquiz. Jesusaqui tsjii pucultan tjaajinta zoñinaca tuqui cuchanchiča,

² tuž cjan:

—Jerusalén watja oka. Irantižcu tsjii mokžta aznu cheraquiča. Nii aznuqui ana zinta zoñiž yawztača. Jalla nii aznu jweržcu wejtquin zjiicaquiča.

³ Yekjap zoñiž pewcznanaqui, “¿Kjažtiquiztan nižta paa?” cjenaqui, ančhucqui tuž kjaaznaquiča, “Chawjc jiliriž pecča”, cjan. “Upaquiztan tii aznuc tjepuntaž cjequiča”.

⁴ Nekztan nii pucultanaqui ojkičiča. Tsjii aznu cherchiča, kjuy zanquiz mokžta; callquiztača. Nekztan ninacaqui aznu jwersiča.

⁵ Yekjap nekz žejlñi zoñinacaqui pewcziča:

—¿Kjažtiquiztan ančhuc nii aznu jwerjo?

⁶ Jesusiž chiitacama kjaaziča. Nužquiz nii zoñinacaqui cutziča.

⁷ Jesusižquin nii aznu zjičchiča. Nekztan zquitinaca carunsiča, Jesusiž yawzjapa.

⁸ Yekjap zoñinacaqui ch'ojña ramuzanaca pootžcu, nii jiczquiz chjinchiča. Zquitinaca chjinchizakazza. Nuž paachiča rispitsjapa.

⁹ Jesusiž tucquin ojkiñi zoñinacami Jesusiž wirquin apzñi zoñinacami tjappacha wiwhiča, tuž cjan:

—¡Viva tii Yooz tjuuquiz tjonchi zoñi! ¡Yooz wintijla!

¹⁰ ¡Tiiž mantaquiča, učhum tuquita zoñiča David cjita, jalla nižta! ¡Yooz wintijla! ¡Viva učhum Yooz!

¹¹ Jalla nužu Jesusaqui Jerusalén watja luzziča. Nižaza timpluquiz luzziča. Tjapa kjutñi chercherchiča. Nekztan tjuñiž zeziz cjen Betania cjita wajtquin ojkičiča niž tuncapan tjaajinta zoñinacžtan.

ANA FRUTCHIZ MUNTI

¹² Jakatažuqui Jesusaqui Betania wajtquiztan ulanžcan, čheri eescatchiča.

¹³ Azquiztan higuier munti cherchiča, ch'ojña chjañchiz. Nii munti cherzñi ojkičiča, “Frutaj žejlž”, cjan. Nii munti irantan, chjañkaz želatča. Anatača frut timpu.

¹⁴ Nekztan Jesusaqui nii muntiz quintra čhiichiča:

—Tii muntiquiztan anaž jecmi iya fruta lulaquiča.

Niž tjaajintanacaqui nii chiita nonziča.

JESUSAQUI TIMPLU PEWZIČHA

¹⁵ Nekztan Jesusaqui niž tjaajinta zoñinacžtan Jerusalén watja irantižcu timpluquiz luzziča. Nekztan timpluquiztan zawncchuc liwj tuyñi zoñinacami kjayñi zoñinacami tjirkatchiča. Paaz campiñi zoñinacž mizami paloma tuyñiž zillami k'ala pjokžinchiča.

¹⁶ Jesusaqui nii timplu patiuran kužñi zoñinaca k'ala jarq'uchiča.

¹⁷ Nekztanac čhižinchiča, tuž cjan:

—Cjijrta Yooz takuqui tuž cjiča: “Wejt kjuyača Yooztan parlis kjuyaqui. Jakzilta zoñimi Yooztan parlasača tekziqui.” Ančhucqui tii timplu tjangz kjuyažtakaz paachinčuča.

¹⁸ Nekztan timplu chawjc jilirinacaqui judio lii tjaajiñinacaqui nii quinto zizcu parličiča:

—¿Jaknužt tii Jesusa conas? —cjan.

Tjapa zoñinacazti Jesusiž tjaajintiquiztan ispantichiča:

—Ancha cusala, —cjan.

Nižtiquiztan nii quintri zoñinacaqui Jesusižquiztan eksñitacha.

¹⁹ Tjuñiž kattan Jesusaqui wajtquiztan ulanchiicha niž tjaajinta zoñinacžtan.

ANA FRUTCHIZ MUNTIQUI KJOÑCHICHACHA

²⁰ Jakawenztažuqui nii higuier cjita munti wilta watchiicha. Waaa, kjoñchi cherchiicha, žep'anacžquiztanpacha.

²¹ Pedruqui Jesusiž tuqita chiita taku cjuñžcu cjichiicha:

—Tjaajiñi Maestro, cheržca. Amqui tii muntiž quintra čhiuchamčha. Jaziqiu kjoñchiicha.

²² Jesusaqui kjaaziča:

—Yoozquiz tjapa kuztan cjee.

²³ Weraral cjiwčha, jakzilta zoñit nii najwc curquiz, “Curu, tekztan zaraka. Pajk kotquiz luzca”, nuž cjan chiyasaž niiqui, nižtapachaž curu okasača, ana paysnakasaž niiqui, tjapa kuztan cjesaž niiqui.

²⁴ Jaziqiu ančhucaquiz chiyučha, čjulumi Yoozquiztan mayizaquič niiqui, tjaataž cjequičha, Yoozquin tjapa kuztanž cjee.

²⁵ Nižaza ančhucqui čjulorat Yoozquiztan mayisaja, nii orac ančhuca quintra zoñinacž uj pertunaquičha. Nekztan ančhuca Yooz Ejpqui ančhuca ujmi zakaz pertunaquičha.

²⁶ Ančhucqui ana zoñiž uj pertunasaž niiqui, nižaza arajpach Yooz Ejpqui ančhuca ujnaca anazakaz pertunasača.

¿JEC JESUSIZQUIZ MANTICHI?

²⁷ Nekztanaqui Jesusaqui Jerusalén watja wilta quejpchicha niž tjaajinta zoñinacžtan. Jesusaž simpluran ojklayan templu jilirinacžtanami lii tjaajiñinacžtanami wajt jilirinacžtanami jalla ninacaqui Jesusižquin tjonchiicha.

²⁸ Nekztan pewcziča:

—Jec jilirit am mantichi, tii paazjapajo? Jec jilirit am utchi jilirižtakaz paazjapajo?

²⁹ Jesusac nekztan kjaaziča:

—Wejrmii jazic ančhucaquiz zakal pewcznača. Ančhucaž kjaaztan, wejr zakal ančhucaž pewcztac kjaaznača, jec jilirit wejr utchi, nii.

³⁰ Tiil pewcznača ančhucaquiz. Jec Juan mantichi, bautisjapajo? Yoozkaya už zoñej. Jazicž kjaazna.

³¹ Nekztanac ninacpora ancha ch'aasi kallantichiicha, tuž cjan:

—Kjažum kjaaznaqueje? “Yooz mantitacha”, cjequič niiqui, nekztan “Kjažtiquiztan ančhuc nii Juan ana criichinčhuctajo?” nuž cječan tični.

³² Učhumqui anapanča chiyi atasacha, “Zoñiž mantitacha”, cjan:

Zoñinacaqui walja nii Juanžquin rispittiquiztan, cjichiicha:

—Werara Yooz taku parliñi profetača Juanqui.

Nižtiquiztan nii jilirinacaqui zoñinaca ekskcu,

³³ ana kjaazni atchiicha. Ninacaqui chiichiicha:

—JJaknužukazlan? Nekztanac Jesusac cjichiicha:

—Nižaza wejr ana zakal maznasača, jec jilirit wejr utchi, nii.

12

ANA ZUM PIYUNANACZ QUINTU

¹ Nekztan Jesusaqui tsjii quintu paljaychiicha, tuž cjan:

—Tsjii zoñi želatča, patruna. Nii zoñiqui uwas zkala čhajcchiicha. Nekztan pajk uyu pirkichiicha nii zkal muytata. Nižaza maz ojt paachiicha, uwas kjaz spjijtjapa. Nekztan campanturi cherchi torre pirkichiicha, zkala itzjapa.

Nekztan nii patrunaqui zkala partira tjaachiicha piyunanacžquiz. Nekztan azkquin ojkičiča.

² Nekztanaqui zkala ricujz timpuž tjontan nii patrunaqui tsjii piyuna cuchanžquichiicha, niž partir zkala ricujzjapa.

³ Nii partira tanzni zoñinacaqui patrunaž cuchanžquita piyuna tanžcu kijtchiicha. Wajtchiicha. Ana čjulchiz cuchanchiicha patrunžquin.

⁴ Nekztan nii patrunaqui tsjižžtan wilta cuchanžquichiicha. Nii partira tanzni zoñinacaqui nii patrunž piyuna maztan čhajcchiicha. Achquiz chjojritchiicha. Chjaawjkatchiicha.

⁵ Nekztan nii patrunaqui wilta tsjii piyuna cuchanžquichiicha. Čjep wiltiquiziqui piyuna conchiicha. Nižta anawali paachiicha tsjii kjaž cuchanta piyunanacžquiz. Partiqui wajttatača. Partiqui contatača.

⁶ Iya tsjii želatča nii patrunž k'ay majch. Ultimquiziqui nii patrunaqui k'ay majch cuchanžquichiicha, “Wejt majch rispitta cjequičha”, cjan.

⁷ Nii partira tanzñi zoñinacazti ninacpora parlassiċha tuż cċjan, “Tsjii nooj tii majchqui ejpż irinsa tanznasāċha. Tii zkal yokanaca k’alaz ricujasaċha. Ojklay tiż conla. Nekztan tsjii nooj uċhumnacaltaż tjappacha tii zkal yokanaca cjequiz, jalla”.

⁸ Nekztanaqui nii majch tanżcu conchiċha. Nekztan nii yokquiztan niiz ticzi curpu jwescu, tjojtċiċha.

⁹ Nekztan Jesusaqui pewcziċha:

—ĠNii uwaz zkalchiz patruaqui, ċjulut paāċhaja? Wejr cjiwcha, nii patruaqui tjonauċiċha. Nekztan nii partira tanzñi zoñinaca conauċiċha. Nekztan niiz uwaz zkal yokanaca yekjanacżquiz tjaauċiċha.

¹⁰ Anċhucqui Yooz taku liċhinċhucċha, žana jaa? Tsjii Yooz takuqui tuż cjiċha:

“Kjuy pirkiñinacaqui tsjii maz tjojtċiċha. Nii tjoċta mazqui isquinquiz cjiċsiċha. Ultimquiz-iqui tucquin cjiċsiċha.

¹¹ Yoozqui nuż cċjiskatċiċha. Nii cherżcu anċha ispanċichinċhumċha”.

Nuż cjiċha cċjirra Yooz takuqui.

¹² Nekztanaqui nii quintri zoñinacaqui Jesusa tanz pecatċha:

—Tii quinto wejtnaca quintraż, —cċjan.

Nekztan nii žejlñi zoñinaca ekskcu, quintri zoñinacaqui Jesusa ecċiċha, ana kjaż cċjiscu. Nużquiz ojċhiċha.

TASA TJAAZ PUNTU

¹³ Yekjap fariseo zoñinacaqui Herodes zoñinacżtan cuchanżquitataċha, Jesusa pewcżñi. Niiż ċhiitiquiztan tsjii anazum taku jwes pecatċha.

¹⁴ Jaziqċi cċjichiċha:

—Tjaajiñi Maestro, zizuż wejrnacqui, am werarapan ċhiñamċha, zoñinacaż am quintra ċhiċhiz cċjenami. Niżaza am taku anaj tsjii tsjii ċhiċhila zoñinacż laycu. Yooztan kamz puntuquiztan werarapan tjaajiñamċha. Jazic tjaajñalla tii puntu. Wejrnacqui César cċjita jilirżquiz tas paaz tjaayiñċha. ĠNuż walikazkay uż anaż wali cċjesaj? ĠNii tas paaz tjaaz waquizasaya, uż anaż waquizasaj, jaa?

¹⁵ Jesusaqui ninaca pizc kuzziz zizatċha. Nekztan kjaaziċha:

—ĠKjażtiquiztan anċhucqui wejr ujchiz jwes pecjo? Tsjii paaz zċjica, cherzċjapa.

¹⁶ Tsjii paaz zċjicċiċha. Nekztan Jesusac pewcziċha:

—ĠTii paazquiz, jecż yujctaya? ĠJecż tjuu cċjirtataya?

Ninacaqui kjaaziċha:

—César cċjita jilirż tjuuċha. Niiż yujcċha niiqui.

¹⁷ Nekztan Jesusaqui ċhiċhiċha.

—Ġjulumi jilirżta cċjenaqui jilirżquiz tċja. Niżaza ċċjulumi Yoozta cċjenaqui Yoozquiz tċja.

Nuż ċhiitiquiztan ninacaqui anċha ispanċiċiċha.

JACATATZ PUNTU

¹⁸ Nekztan yekjap saduceo zoñinacaqui Jesusa cherzñi ojċhiċha. Jacatatz puntu ana criñipantaċha. Jesusiżquin macjatżcu pewcziċha:

¹⁹ —Tjaajiñi Maestro, Moisesaqui uċhumnacalta cċjirtkalċha, tuż cċjan: “Tsjii zoñi ticznasaż niiqui, niiz tċjun ana ocjalchiz cċjesaż niiqui, nekztan nii ticzi zoñi jilaqui naa žewatan zals waquiziċha, nii ticzi jilż cuntiquiztan ocjala paazċjapa”.

²⁰ Jaziqċi pakallak jilazullica želatċha. Nii jilir jilaqui zalsiċha. Nekztan ticziċha ana ocjalchiz.

²¹ Nekztan tsjii taypir jilaqui naa žewatan zalsizakazza. Nekztan ana ocjalchiz ticzizakazza. Nekztan yekja taypir jilaqui naa žewatan zalsizakazza. Nekztan ana ocjalchiz ticzizakazza.

²² Tjappach nii pakallak jilazullicanacaqui naa žonatan zalsiċha. Nekztan tjappacha ana ocjalchiz ticziċha. Ultimquiziqui naa žonquic ticziċha.

²³ Jaziqċi zoñinaca jacatattanaqui wilta žeti tantanaqui ċċjakzilta jilż tċjun naa žon cċjequejo? Pakallakuqui naa žonatan zalsiċha.

²⁴ Jesusaqui kjaaziċha:

—Anċhuca takuqui tsjii kċjutñi ċhiyiñċhucpanċha. Anċhucqui Yooz takumi Yooz azimi anapan zizza.

²⁵ Ticzi zoñinacaż jacatattanaqui anaż zals želaquiċha. Anaż tċtojowami turtakanacami zalznaquiċha. Arajpach anċjanana irataż kamaquiċha.

²⁶ Jacatatz puntuquiztan Moisesaqui liwruquiz cċjirtkalċha. Liċhinċhucċha, žana jaa? Tsjii ujsñi kalquiztan Yoozqui Moisesquiz palċjayċiċha, tuż cċjan: “Abrahamż Yooztċha wejrtċha. Niżaza Isaacż Yooztċha, niżaza Jacobż Yooztċha”.

²⁷ Yooz Ejpqi anača ticzi žoñž Yoozqui, žejtñi žoñž Yoozqui. Nižtiquiztan ančuca takuqui anča tsjii kjuťnipankazza.

¿JAKZILTA YOOZ MANTITAT CHEKANAQUI?

²⁸ Nekztanaqui žoñinacžtan Jesusižtan ch'aasñi nonžcu tsjii judiuž lii tjaajiñi žoñiqui macjatžquichiča. Jesusaž zuma kjaaztiquiztan nii žoñiqui pewczizakazza, tuž cjan:

–¿Jakzilta Yooz mantitat chekanaqui?

²⁹ Jesusaqui kjaaziča:

–Tii Yooz mantitača chekanaqui: “Nonžna ančucqui, Israeli wajtchiz žoñinaca. Tsjan chawjc jiliriča učum Yoozqui. Ana iya yekja Yooz žejlča. Yoozqui jiliripanča.

³⁰ Ančucqui tii ančuca Yoozquiz tjapa kuztan sirwaquiča, nižaza tjapa animužtanami, nižaza tjapa pinsamintužtanami, nižaza tjapa aztanami”. Jalla nii Yooz mantitača chekanaqui.

³¹ Nižtažakaz nii jaru tii Yooz mantitac žejlča. Tuž cjiča: “Jaknužum persunpachquiz okžñamžlaja, jalla nižta okžñi kuzziz cjistanča žoñinacžquizimi, lijitum mazižtakaz”. Tii picz mantitanacača juc'ant chekanaqui čjul mantitanacžquiztanami.

³² Nekztan nii judio tjaajiñi žoñiqui cjičiča:

–Tjaajiñi Maestro, werara čiichamča. Am čiitaqui cusača. Tsjii Yoozpankaz žejlča; ana iya želasča.

³³ Tii Yoozquiz sirwispanž waquizila, tjapa kuztan, nižaza tjapa animužtan, nižaza tjapa pinsamintužtan nižaza tjapa aztan. Nii jaruqui jaknužum persunpachquiz okžñamžlaja, jalla nižta okžñi kuzziz cjistanča žoñinacžquizimi, lijitum mazižtakaz. Yoozquin ujtta wilana puntu mantitami nižaza ofrenda tjaaz mantitami jalla nii mantitanacžquiztan tii picz Yooz mantitanacača juc'ant chekanaqui.

³⁴ Nii judio tjaajiñi žoñiqui zuma intintazzi razunchiz čiichiča. Nižta nayžcu Jesusaqui čiichiča:

–Amqui Yooztan kamz jicz cježullača, Yooz mantita žoñi cjisjapa.

Nekztan žoñinacaqui iya pecunchi Jesusižquiz pewczñi anaž atatča.

¿CRISTUQUI JECZ MAJCHTATA?

³⁵ Jaziqni Jesusaqui timpluquiz tjaajincan, cjičiča:

–Nii judio tjaajiñinacaqui tuž cjiča: “Davidž majchkazza Cristuqui”. ¿Kjažtiquiztan nuž cjeejo?

³⁶ Arajpach Yooz Espirituqui David čiikatchiča, tuž cjan:

“Yooz Ejpqi wejt chawjc jiliržquiz cjičiča: ‘Tsjii ora wejrqni am kjojch koztan am quintri žoñinaca t'okskatača. Nii oracama wejt žew latu julzna’”.

³⁷ Jaziqni Davidaqui persunpacha cjičiča: “Chawjc jiliriča tiiqui”. ¿Nižtiquiztan jaknužt niž chawjc jiliri niž majchqui cjesajo? –Nuž cjičiča Jesusaqui.

Nii tama žejlñi žoñinacaqui Jesusiž taku nonž juztaziča.

JUDIO LII TJAAJIÑINACA

³⁸ Nižaza tjaajincan Jesusaqui cjičiča:

–Judio lii tjaajiñinacžquiztan cwitazaquiča. Ninacac tol zquitchiz ojklaz juztazñiča. Ninacaqui palazquiz tsaanskatzmi rispitskatzmi jalla niika pecñiča.

³⁹ Ninacaqui ajcz kjuyquiz tucquin julz pecñiča. Nižaza pijjstiquiz lujlcan anča tucquin cjecis pecñiča.

⁴⁰ Ninacpacha žewžewanaca t'akjiri cjiskatñiča. Nižaza žoñinaca incallzjapa ažka Yooztan parlitazoka cjiñiča. Jaziqni ninacaž juc'anti casticta cjequiča.

OFRENDA PUNTU

⁴¹ Nekztan Jesusaqui ofrenda tjaaz cajun yujcquin julziča. Nekzi žoñinaca paaz uchan cherchiča. Yekjap ricachunacaqui muzpa paaz utčiča.

⁴² Nekztan tsjaa poris žewqui tjončinča. Picz paazalla utčinča, koluculla.

⁴³ Jalla nekztanaqui Jesusaqui niž tjaajinta žoñinacžquiz kjawziča. Nekztan intintiskatchiča:

–Weraral chiyuča, naa poris žewqui nii cajunquiz juc'anti utčinča, tjapa nii parti žoñinacžquiztan cjen.

⁴⁴ Nii parti žoñinacaqui čjetinta paaz utčiča. Naa poris žewzti tjappacha naatan kamñi paaz utčičiča.

13

JUDIO TIMPLUZ PUNTU

¹ Nekztan timpluquiztan ulnan tsjii tjaajinta žoñiqui Jesusižquiz paljayčiča, tuž cjan:

–Tjaajiñi Maestro, cheržca. Tii pajk maznacami tii pajk kjuyanacami anča cusača.

² Jaziqui Jesusaqui niizquiz chiichiča:

—Tii pajk kjuyanaca cherča amqui. Wejrqui cjiwča, tsjii nooj ana zinta tii maznacaqui pirkita zelaquiča. Tjappacha pajlžtaž cjequiča.

TII MUNTU TUCUZINZ PUNTU

³ Nekztan Olivos cjita curu ojkchiča, timpluž zanquiz. Nekzi Jesusac julzi želatča; ana iya žoñi želatča. Nekztan Pedružtan, Jacobožtan, Juanžtan, Andrestan, ninacaqui Jesusižquiz pewcziča, tuž cjican:

⁴ —Maznalla wejtnacaquiz. Ćhjulorat nii amiž chiita wataquejo? Ćima amiž chiita watan, Ćhjulunacat wataquejo?

⁵ Nekztan Jesusaqui kjaaziča:

—AnĆhucqui persunpachquiz cwitaza, anaĆha jecžquizimi incallskata.

⁶ Zoñinacaqui wejt tjuu aynakanž tjonauquiča, tuž cjican: “WejrĆha Cristutqui”, Jalla nekztanaqui muzpa zoñinacaqui incallskataquiča.

⁷ ‘AnĆhucqui quintunaca nonznaquiča, quira žejlz quintunaca, Ćh’ajwa quintunaca. Nekztan anaĆha tsucaquiča anĆhucqui. Nižtapanž wataquiča. Tii muntu tucuzinžqui imaž irjatžquiča.

⁸ Nacionporaž kichjasaquiča. Wajtporaž kichjasaquiča. Tjapa kjutñi yokac Ćhjeknaquiča. Mach’anaca zelaquiča. Zoñipora kichjasaquiča. AnĆha zoñinaca t’akjisaquiča tjapa kjutñi. Sufrisnaca uzcakaž kallza. Wiruñac juc’ant sufrisnaca zelaquiča.

⁹ ‘AnĆhucqui persuna waljaž cwitazaquiča. Zoñinacaqui anĆhuc tanžcu jilirinacžquin ĆhjiĆhaquiča. Nekztan ajcz kjuyquiz wjajtažakaz cjequiča anĆhucqui. Weriz cjen Ćhawjcz jilirž yujcquizimi wajt jilirž yujcquizimi apantitaž cjequiča. Nekztan wejt puntuquiztan ninacžquiz maznaquiča anĆhucqui.

¹⁰ Ima tii muntuž tucuzan, Yooz takuqui tjapa nacionquin maz maztaž cjequiča.

¹¹ Ćhjulorat anĆhucqui jiliržquiz apantita cjeĆhaja, jalla nii ora anaĆha eksnaquiča, Ćkjažt wejr cjeequejo? —cjicanaqui. Nižaza anaĆha anĆha Ćhulu chiismi pinsaquiča anĆhucqui. Nii oraqui Yooz anĆhucquiz tjaajznaquiča, Ćhjul takut ĆhiyaĆhaja, nii. AnĆhuc persun pinsita inapankazza. Nii oraqui Yooz Espirituqui anĆhucquiz Ćhikataquiča.

¹² Tsjii jilaqui persun jila tarasunaquiča conkatžjapa. Ejpnaqui persun maati tarasunaquiča conkatžjapa. Maatinacami maa ejpž quintra tsjitsnaquiča conkatžjapa.

¹³ AnĆhuc weriz cjen tjapa zoñinacaž Ćhjaawjtaž cjequiča. Jakzilta zoñit ticzcama wejtquiz tjurt’ahaja jalla niiqui liwriitaž cjequiča.

¹⁴ ‘Daniel cjita Yooz taku parliñi profetaqui ĆjirrtkalĆha, tuž cjican: “Tsjii nooj tsjii juc’ant anawal akñi zoñi zelaquiča”. Jakziquin niiqui ana žejlsalaja, nicjuñ zelaquiča tii anawaliqi. Ćhjulorat anĆhucqui nižta ĆheraĆhaja, nii ora curunacquin atipas waquiziĆha tjapa Judea yokquon žejlñinacaqui. Liñi zoñiqui intintazla.

¹⁵ Nii kjuy juntuñ žejlñi zoñinacaqui Ćhjiwžcu ana kjuya luzla, Ćhjulumi ĆhjiĆhi jwesjapa.

¹⁶ Nii zkalquin žejlñi zoñinacaqui ana kjuya quejpla, zquiti apti.

¹⁷ Nii timpuquiziqui ic maatakanacami k’azllu wawĆhiz maatakanacami anĆha t’akjiri cjequiča.

¹⁸ YoozquinĆha mayiza anĆhucqui, anaj zak timpuquin tižtanacac tjonla, nii.

¹⁹ Tii sufris timpu yekja sufrisnacquiztan juc’anti sufris cjequiča. Tuqui timpuqui Yoozqui tii muntu paachiĆha. Nekztan jecĆhuc anapanž tižta sufrisnacac watchiqui. Tekztan najwĆhuc anaž iya juc’anti sufrisqui cjequiča.

²⁰ Yoozqui anaž tii sufrisnaca tucuskataquiz niiqui, tjapa zoñinacaž ticznaquiča. Yoozqui niž illzta zoñinacž cjen tii sufrisnaca tucuskataquiča.

²¹ ‘Nižaza yekjap zoñinacaqui anĆhucquiz Ćhiyaquiča: “Ćhera. TicjuĆha Cristuqui”. Yekjapac Ćhiyaquiča: “NacjuĆha Cristuqui” cjican. Nuž ĆhiĆhiž cjenami, anapanĆha nii taku criyaquiča anĆhucqui.

²² Incallñi zoñinacaž tjonauquiča. Tsjii incallñinacaqui: “CristutĆha wejrqui”, cjequiča. Yekjapazti: “Yooz taku parliñtĆha wejrqui”, cjequiča. Ninacaqui walja ispanĆhuca miłajrunacaž paaquiča, incallžjapa. Tjapa zoñinacaž incallž pecaquiča, Yooz illzta zoñinacami.

²³ Ima tižtanacaž tjonan wejrqui anĆhucquiz mazinĆhiñĆha. Nižtiquiztan walja cwitazaquiča anĆhucqui. Nižta kuzziz cjee.

ĆJAKNUŽT CRISTUQUI TJONAQUI?

²⁴ ‘Nekztanaqui tii sufris timpu wattan, tjuñiqui zumaquiča. Nižaza jiizmi anaž iya kjanaquiča.

²⁵ Warawaranacami tsewctan tjojtснаquičha. Tseecu azziz žejlñinacaqui chjekinskattaz cjequičha.

²⁶ Jalla nekztanaqui zoñinacaqui tii tsewctan cuchanzquita Yooz Zoñiz cheraquičha. Wejrqui tsjir taypiquiz tjonachha, walja aztan, ancha ispantichuca.

²⁷ Nekztanaqui tjapa kjutñi nii arajpach Yooz anjilanacaqui cuchanta cjequičha, weriz illztanaca juntjapžcajo. Tjapa yok tjiyquiztanpacha tjapa arajpach tjiyquiztanpacha juntjapžtaž cjequičha.

²⁸ Ančhucqui tii puntu zizaquičha higuera cjita muntiquiztan. Chjulorat nii muntiqui ch'ojñantis cjissaja, jalla nii ora waj kutunz timpu žcatičha. Nužupanž zizza ančhucqui.

²⁹ Jalla nižtapacha tii weriz čhiita watan, ančhucqui tuž zizaquičha; tii tsewctan cuchanzquita Yooz Zoñiqui wajillaž tjonaquičha, nii. Nižaza tii muntu tucuzinzqui žcatillačha.

³⁰ Weraral cjiwčha, tjapa tii timpuquiz žejlñi zoñinacaqui ana ticznaquičha, ima tii weriz čhiita watan.

³¹ Arajpachami yokami tucuzaquičha. Wejt takunacazti wiraž ana tucuzaquičha. Nužupanž cumplisnaquičha.

³² Wejt tjonz tjuñimi wejt tjonz orami anaž jecmi zizasachha, anaž nii arajpach Yooz anjilanacami, anaž Yooz majchmi. Yooz Ejp alajakaz zizza.

³³ Ančhucqui, persuna naazna, cwitaza, Yoozquin mayiza. Chjulorat nii tjuñi tjonachaja, nii ora ana zizza ančhucqui.

³⁴ Jalla tii quintuž iratačha wejt tjonz tjuñi. Tsjii zoñiqui azkquin ojz tantiichičha. Ima niž kjuyquiztan zarakan zapa mayni niž piyunanacžquiz langz tjaachha. Kjuy cwitiñi zoñžquiz zuma cwitajo mantičha.

³⁵ Nekztan ojžcu, čjulorat nii kjuychiz zoñiqui quepačhaja, jalla nii ora, piyunanacaqui ana zizza, niit už zeztan tjonachaja, niit už čhica arama tjonachaja, niit už kjantat ora tjonachaja niit už wentan tjonachaja. Chjulorat tjonachaja, ninacaqui anaž zizza. Nižtiquiztan piyunanacaqui listuž cjila.

³⁶ Jalla nii irata ančhucqui listuž cjee. Tiripintit ančhucraž tjan tjonasachha.

³⁷ Wejrqui ančhucquizimi tjapa zoñinacžquizimi čhiyučha, listupančha cjee.

14

¿JAKNUŽUM JESUSA TANAS?

¹ Puc majkaz pjaltičha pascu pjijztiquinaqui. Nii orazakaz yekja pjijztaqui kalltiznatčha, ana liwaturchiz t'anta lujlž pjijzta. Jalla niž ora timplu jilirinacžtan judio tjaajiñinacžtan palt'ichičha, tuž cjan:

—¿Jaknužum Jesusa incallžcu tanas?

Nižaza nuž tanžcu, Jesusa conzjapa kazzičha.

² Ninacaqui tantiižcu, cjichičha:

—Pjijztiquiz anaž tanz waquizasachha. Zoñinacaqui učhum quintraž cjisnasachha.

JESUSIZ ACHQUIZ ASIITI ALZTA

³ Jesusaqui Betania cjita wajtquiz želatčha, Simonž kjuyquiz. Nii Simonaqui tuquitan mojkchi janchichiz žejlñitačha. Nekzi lulan tsjaa maatak zonqui tsjii putillžtan tjonzinčha. Nii putillquiz cusa mazk'a ulurchiz asiiti želatčha, nardo cjita, ancha jila walurchiz. Nii putillaqui zuma alabastro cjita maztan paatatačha. Nekztan naa maatak zonqui putilla kjolžcu Jesusiz achquiz asiiti alsinčha.

⁴ Yekjap nekž žejlñi zoñinacaqui zawjzičha. Ninacpora palt'ichičha, tuž cjan:

—¿Kjažtiquiztan nii mazk'a ulurchiz asiiti pertejo?

⁵ Naalaqui asiiti tuysalani quinsa patac denario cjita paazuñ. Nekztan nii paazqui poris zoñinacžquiz onansalani.

Naaža quintra čutchičha.

⁶ Nekztan Jesusaqui čhiichičha:

—¿Kjažtiquiztan taa žonatan čhijcisejo? Anačha taa žon kjaž cjisqui. Wejtquiziqui walika paachinčha.

⁷ Poris zoñinacami panž žejlčha. Chjulorami ninacžquiziqui yanapasačha. Wejrqui anal ančhucatan tira želachha.

⁸ Taa zonqui jaknužt payi atčhaja, nii paachinčha. Ima wejt curpu tjan asiitižtan alsinčha.

⁹ Čhekpacha weraral cjiwčha, jaksiquinami tjapa kjutñimi Yooz taku parlita cječhaja, jalla nicju taaža paata parlita cjequičha, taa maatak žon cjuñznajo.

JUDASQUI JESUSA TANKATZ PINSICHICHA

¹⁰ Nekztanaqui Judas Iscariotiqui timplu jilirinacžquin palt'i ojkchiča. Jesusiz tunca-pan tjaajinta zoñinacžquizontača Judasqui.

¹¹ Judas taku nonžcu jilirinacaqui ancha chipchiča:

—Paaz tjaasača, —cjican.

Nekztanaqui Judasqui tantiichiča, čhjulator wali cječhaja, Jesusa tankatzjapa, nii.

PASCU ČHJERI LUJLCHICHA

¹² Pjijzta kallni tjuñi, ana liwaturžtan t'anta lujlz pjijzta, nii tjuñi judio wajtchiz zoñinacaqui pascu uuza conñiča. Nii noojpacha tjaajinta zoñinacaqui Jesusizquiz pewcziča:

—Čakziquin wejrnacqui ojkz waquiziya, pascu čhjeri luli tjaczjapaya?

¹³ Nekztan Jesusaqui pucultan tjaajintanaca cuchanchiča, tuž cjican:

—Wajtquin oka. Nekzi tsjii zoñžtan zalaquiča kjaz luuz kužži. Nii zoñž wirquiz apznaquiča.

¹⁴ Jakziquin nii zoñi qui luzačhaja, jalla nicju nii kjuychiz zoñžquiz paljayaquiča, tuž cjican: “Tjaajiñi qui cjichiča: Čakziquin wejt tjaajintanacžtan pascu čhjeri lulasaya? Čaknit nii kjujajo?”

¹⁵ Nekztan nii kjuychiz zoñi qui tsewcta pisuquin tsjii pajk kjuya tjeeznaquiča ančhucaquiz. Nii kjuya listu tjacžta cjequiča. Jalla nicju uchumqui čhjeri kiswaquiča. —Nuž mantichiča Jesusaqui.

¹⁶ Nužquis nii pucultan tjaajintanacaqui zarakchiča. Watja ojkchiča. Jesusiz čhiitacama nižtapacha watchiča. Nekztanaqui pascu čhjeri kissiča.

¹⁷ Tjuñiz kattan Jesusaqui tjonchiča tuncapan tjaajintanacžtan.

¹⁸ Čhjeri lujlcan Jesusaqui čhiichiča:

—Weraral cjiwča, ančhucaquiztan tsjii wejttan lujlñi qui wejr tarazunaquiča.

¹⁹ Ninacaqui nužquiz llaquita cjissiča. Nekztan ninacaqui Jesusizquiz pewcziča. Tsjiiqui:

—ČWejr kay? —cjichiča.

Tsjii:

—ČWejr kay? —cjichizakazza.

²⁰ Nekztanac Jesusac kjaaziča:

—Tuncapaniž ančhucqui tsjiiqui wejr tarazunaquiča. Anzi qui niča wejttan chica čhjeri lujlchi.

²¹ Wejrqui tsewctan cuchanzquita Yooz Zoñčha. Wejr okača, Yooz taku cjiirtacama. Jakziltat wejr tarazunačhaja, jalla ni qui juc'anti castictaž cjequiča. Nii tarazuñi zoñi qui anaj maa pjuchquiztan nastčhaj ni qui, juc'ant cusaž cjitasaača.

²² Nekztanaqui čhjeri lujlcan, Jesusaqui t'anta tanžcu Yoozquin gracias cjican čhiichiča. Nekztan t'anta kjolžcu, tjaajintanacžquiz tojziča, tuž cjican:

—Tanžna. Tii t'antača wejt curpu cuntaqui.

²³ Nekztan tsjii wazu tanzičha. Yoozquin gracias cjican čhiichizakazza. Nekztan ninacžquiz tjaatan, tjappacha ninacaqui ni wazquiztan licziča.

²⁴ Jesusaqui čhiichiča:

—Wejt ljocquiztan cjiča tiiqui. Wejt ljocžtan tsjii ew acta tjulžta cjequiča. Wejt ljocqui tjapa zoñinacž cuntiquiztan tjawktaž cjequiča.

²⁵ Weraral cjiwča, uwas kjaz ana iya licača, čhjulator Yooz tjapa mantačhaja, jalla nii oracama.

PEDRUQUI JESUSA ANA PAJŃI TUCAQUICHA

²⁶ Tsjii Yooz wirsu itscu ojkchiča Olivos cjita curullquin.

²⁷ Nekzi qui Jesusaqui čhiichiča:

—Tii weenaqui tjapa ančhucqui ana wejtquin kuzziz tucaquiča. Nižtapan cjiirta Yooz taku qui cjiča:

“Wejr arajpach Yoozqui awatiri conača. Nekztan uuzanacaqui wichansnaquiča”.

²⁸ Jesusaqui cjichizakazza:

—Nekztan jacatatžcuqui ančhuca tuqui okjayača Galilea cjita yokquin

²⁹ Nekztan Pedruqui čhiichiča:

—Tjappacha ana amquin kuzziz cječhani. Wejrqui ana wira nižta cjesača.

³⁰ Jesusaqui kjaaziča:

—Weraral cjiwča, tii weenpacha amqui ana wejr pajni tucaquiča, Ima wallpaž pizc wilitaž klawan, amqui čhjep wilita wejr ana pajnim chiaquiča.

³¹ Pedruqui juc'anti tjurt'ichiča, tuž cjican:

—Wejrqui amtan chicami waztal ticznasača. Anapan amquiztanac zarakasača.

Tjapa nii tjaajintanacaqui nižtapacha tjurt'ichiča.

JESUSAQUI YOOZTAN PARLICHICHA

³² Nekztan Getsemaní cjita yokquin ojkchiča. Nicju Jesusaqui niž tjaajinta zoñinacžquiz chiichiča:

–Tekzi julzna. Wejrqui Yooztan parli okača.

³³ Nekztan Pedružtan Jacobžtan Juanžtan chjitchiča. Jesusaqui walja llaquita kuzziz turwaysiča.

³⁴ Niž tjaajintanacžquiz paljaychiča:

–Wejt kuzqui ancha llaquita, ticzucača. Ančhucqui tekzi žela. Wilazaquiča; anača tjaajaquiča.

³⁵ Nekztan tsjii koluc tuquinalla ojkchiča Jesusaqui. Yokquizkaz tuzi t'okziča. Yoozquiztan mayizichiča, tuž cjican:

–Tii juc'ant sufris timpu anal wats pecuča. Tii sufrisquiztan liwriychucažlaj niiqui, amquiz liwriyalla.

³⁶ Tira maycan cjichiča:

–Yooz Ejjp, amqui čjululmipankam atasača. Tii sufrisnacquiztan liwriyalla. Pero anal wejt kuzcama paaz pecuča. Jaknužt am kuz amtičhaj niiqui, jalla nuž am munañpaj cjila.

³⁷ Nekztanaqui tjaajintanacžquin quejpžquichiča. Tjajchi zalchiča. Nekztanaqui Jesusaqui Pedružquiz cjichiča:

–¿Simona, amquim tjaaja?

³⁸ ¿Anam tsjii orami wilazi atya? Wilaza. Yoozquiztan mayiza, ana ujquiz tjojtžjapa. Ančhucqui ancha kuztanča. Pero ančuca curpuzi anaž awantasaca.

³⁹ Nekztan Jesusaqui wilta Yooztan parli ojkchiča. Tuquiqui jaknužt parličhaja, nižtazaka parličhiča.

⁴⁰ Wilta tjaajintanacžquin quejpžquichiča. Wilta tjajchi zalchiča. Ancha tjaji atip-skatchiča. Ninacaqui Jesusižquiz ana kjaazñi atchiča.

⁴¹ Jalla nekztan Jesusac čhjep wilta ojkžcu quejpžquichiča. Nekztan chiichiča:

–Jaziqui tjajčinčucča, ančhucqui, nižaza jeejzinčucča. Nuzukaz. Wejrqui tsewctan cuchanžquita Yooz Zoñiča. Wejrqui ujchiz zoñinacž kjarquiz tankattal cjeeča. Nii ora anziqiu irjatžquichiča.

⁴² Zaazna. Ojkla. Cherezna. Wejr tarazuñi zoñiqui nii nacjuž tjonča.

JESUSAQUI TANTATACHA

⁴³ Nii ora Jesusaž nuž chiyán, tsjiiqui tuncapan tjaajinta zoñinacžquiztan tjonchiča, Judas cjita. Tama zoñinacaqui Judastan tjonchiča pajk cuchillunacchiz, nižaza wajajt carotinacchiz. Timplu chawjc jilirinacžtan judío lii tjaajiñinacžtan wajt jilirinacžtan ninacaž cuchanžquita tjonchiča.

⁴⁴ Tuquitan nii tankatñi Judasqui kazziča Jesusa tankatžjapa. Nuž kazcu, cjichiča:

–Tsjii zoñil chjulznača. Niiž niic cjequiča. Nekztan zuma tanžcu chjichaquiča.

⁴⁵ Nii ora Judasqui Jesusižquiz macjatchiča:

–Tjaajiñi Maestro, –cjican.

Nekztan nii chjulziča.

⁴⁶ Nekztan zoñinacaqui Jesusa tanchiča, preso chjitzjapa.

⁴⁷ Tsjii nekz tsijtchi zoñiqui pajk cuchillu jwessiča. Jalla nekztan tsjan chawjc jilirž piyuna chjojritchiča. Tsjii cjuñi pootžcu apakchiča.

⁴⁸ Nekztan Jesusac chiichiča:

–Ančhucqui cuchillunacžtan carotinacžtan wejr tani tjončinčucča, tsjii tjañi cjes, nižtažtakaz.

⁴⁹ Zapuru ančhucaltan žejlčinča, timpluquiz tjaajincan. Wira ana wejr tanchinčucča. Pero anziqiu jaknužt Yooz taku chiichaja, nužupanž cumplita cjila.

⁵⁰ Nekztanaqui tjapa niž tjaajinta zoñinacaqui tsucaña wichanziča. Jesusa zinalla eclichiča.

⁵¹ Tsjii tjowaqui Jesusa apziča, tsjii zquiti irzi. Nii tjowac tantazakaztača.

⁵² Nekztan nii zquiti cutžcu, k'alapacha tsucaña atipchiča.

JESUSA CHAWJC JILIRINACŽQUIN CHJICHTA

⁵³ Nekztanaqui Jesusaqui chjichtatača timplu tsjan chawjc jilirž kjuya. Nekziqiu timplu chawjc jilirinacžtan wajt jilirinacžtan judío lii tjaajiñinacžtan ajczitača.

⁵⁴ Pedruqui ažquiztan apziča, chawjc jilirž kjuy patio luzcama. Nii patiuquiz zultunacžtan julzi želatča, uj latuquiz kutuncan.

⁵⁵ Kjuyquiziqui timplu jilirinacaqui tjapa jiliri mazinacžtan Jesusiž quintra chiiñi zoñi kjuratča, Jesusa conta cjisjapa. Ana zinta uj wajtchiča.

⁵⁶ Muzpa tama zoñinacaqui Jesusiž quintra toscara chiichiča. Pero ninacž toscar takuqui anaž wira casatča.

⁵⁷ Yekjap zoñinacaqui tsijtsucu toscara chiichiča, tuž cjan:

⁵⁸ —Wejr nonziñča, tii zoñi tuž chiiñi, “Tii zoñiz kjuyta timplu pajlznača. Nekztan čhjep majquiztan yekja timplu kjuyača, ana zoñiz kjuyta”. Nuž chiiñi nonzinča wejrqui.

⁵⁹ Anaž nižtami zoñinacž takuc casatča.

⁶⁰ Ułtimquiziqui nii timplu chawjc jiliriqui tsijtsiča zoñinacž taypiquiz. Jesusizquiz pewcziča:

—¿Anam kjaazñi at, kjažtatajo? ¿Kjaž cjan am quintra chii tii zoñinacajo?

⁶¹ Jesusaqui ana čhulu tawkžcu, želatča, ana kjaaziča. Nekztan nii tsjan chawjc jiliriqui wilta pewcziča:

—¿Amqui Cristumkaya? ¿Arapach Yooz Machimkaya?

⁶² Jesusaqui kjaaziča:

—Jesalla. Wejrčha Cristutqui. Wejrqui tsewctan cuchanžquita Yooz Zoñčha. Tsii nooj anchucqui wejr cheraquiča, juc’anti azziz Yooz latuquiz julzi. Nekztan arapachquiztan tsjirquiz tjonacha.

⁶³ Nižta chiitiquiztan nii timplu chawjc jiliriqui niiz zquiti wjajrzinchiča, žawjchi tjeezjapa. Nekztan cjichiča:

—¿Kjažtiqiztan iya quintra chiiñi zoñi pecasajo?

⁶⁴ Ančhucqui nonzinčhucča. Tiiž takuqui Yooz quintrača. Ana walipanča. ¿Čhjuluchum paaqui, kjažum cjeequi? ¿Tantiyalla?

Nekztan tjappacha quintra chiichiča:

—Tii zoñi contaj cjila, —cjan.

⁶⁵ Nekztan yekjapaqui Jesusizquiz llawsižtan tjujtchiča, wjajtchizakazza. Nekztan niiz yujc pañžtan tjožžinžcu, cjichiča:

—¡Pajalla, jaziqui! ¿Ject am wjajtchejo?

Nižaza zultatunacaqui Jesusiz yujcquiz čhajcziča.

PEDRUQUI JESUSA ANA PAJŇI TUCCHICHA

⁶⁶ Nii ora Pedruqui kjuj patiuquiz želatča. Nekzi tsjaa žonqui tjonchinča. Naa žonqui timplu tsjan chawjc jilirž piyunitača.

⁶⁷ Pedruž uj latuquiz kutnan, cherchinča. Nekztan paljaychinča:

—Amqui nii Nazaret wajtchiz zoñžtan čhica ojklajñamla, nii Jesusižtan.

⁶⁸ Pedruqui Jesusa ana pajñi chiichiča:

—Nii zoñi anal pajuča. Am takumi anal intintuča.

Nuž chiižcu, zancu ulanchiča.

⁶⁹ Ničju naa žonqui wilta cherchinzakazza. Nii žejlñi zoñinacžquiz maazinča, tuž cjan:

—Tii zoñiča ninacžtan čhica ojklajñi.

⁷⁰ Pedruqui wilta Jesusa ana pajñi chiichiča. Nekztan tsii upaquiztan nii žejlñi zoñinacaqui Pedružquiz cjichizakazza:

—Čheapan amqui ninacžtan čhica ojklajñi zoñimla. Amqui Galilea wajtchiz zoñimla. Nii zoñinacž irataž chiiñamla.

⁷¹ Nekztan Pedruqui juramintužtan chiichiča, tuž cjan:

—Wejr toscara chiichinžlaj niiqui, Yooziž castictal cjila. Tii amiž čhiita zoñi ana wira pajuča.

⁷² Pizcquizic nii orapacha tsii wallpaqui kjawčiča. Nekztanaqui Pedruqui Jesusiz čhiita taku cjuñiča. Tuž mazinčhitača, “Ima wallpaž pizc wiltaž kjawan, amqui čhjep wilta wejr ana pajñim tucaquiča”. Nekztanaqui Pedruqui nii cjuñžcu, ancha llaquita cjissiča. Nekztan ancha kaachiča.

15

JESUSA PILATUZQUIN CHJICHTA

¹ Kjantati timplu chawjc jilirinacžtan wajt jilirinacžtan judío lii tjajjiñnacžtan tjappacha jilirinacžtan ajczitača. Nekztan Jesusa čhejlžcu Pilato jiliržquin čhjtchiča. Nekztan niižquiz intirjichiča.

² Nekztan Pilatuqui pewcziča:

—¿Am judionacž chawjc jilirimya?

Jesusaqui kjaaziča:

—Nužupanzača, amiž čhiitacama.

³ Nekztan nii timplu jilirinacaqui Jesusiz quintra čhjultaki tjojtunchiča.

⁴ Pilatuqui pewczizakazza:

—¿Kjažtiqiztan am ana kjaazñi atjo? Tjapamanaž am quintra čhiila, pero.

⁵ Jesusaqui ana čhulu tawkžcu želatča. Nužquiz Pilatuqui ana iya čhjulumi chiižñi atchiča.

ZOÑINACAQUI JESUSIZ QUINTRA CHIICHICHA

⁶ Pilatuqui pascu pjiiztiquiz tsjii piriz zoñi cutzñipantača zoñinacaž chitacama.

⁷ Carsilquiz tsjii kjažultan gobierno quintri zoñinacaž chawjcta želatča. Barrabás cjita ujhiz zoñi carsilquiz chawjctazakaztača. Revolucionquiz zoñi conchiča Barrabás cjita zoñiqui.

⁸ Jaziqui zoñinacaqui Pilatu pewczñi tjonchiča, tuž cjican:

—Wejtnacalta tsjii zoñi cutžinalla. Tuquitanpacha nuž cutžñampanla amqui.

⁹ Pilatuqui kjaaziča:

—¿Ančhucqui pecya, tii judionacž chawjc jiliri cutzta cjisjapajo?

¹⁰ Jesusa čhaawjcu, nii timplu jilirinacaqui Pilatužquiz intirjichiča; nii zizziča Pilatuqui.

¹¹ Nekztan nii timplu jilirinacaqui Jesusiž quintra zoñinaca aptjapchiča. Nekztan zoñinacaqui maychiča, Barrabaspakaz cutzta cjisjapa.

¹² Pilatuqui wilta pewziča:

—¿Tiiži? ¿Jaknužt wejr paaj cjii ančhucjo? Ančhucqui tii judionacž jiliriča cjinčhucla.

¹³ Nii zoñinacaqui kjawchiča:

—¡Tii zoñi conzna! ¡Cruzquiz ch'awczna!

¹⁴ Nekztan Pilatuqui čhiichiča:

—¿Kjažtiquiztan, čjul uj paachit teejo?

Nii zoñinacazti juc'anti kjawchiča:

—¡Cruzquiz ch'awczna!

¹⁵ Pilatuqui nužquiz zoñinacž kuz wali cjisjapa Barrabás cutziča. Jesusa cusa wjatkatzcuqui, Pilatuqui zultatunacžquiz intirjichiča, cruzquiz ch'awcta cjisjapa.

¹⁶ Nekztan nii zultatunacaqui jilirž kjuy patiuquin Jesusa chjitchiča. Nekzi parti zultatunaca ajcznao kjawziča.

¹⁷ Nekztan Jesusižquiz tsjii morat zquiti tjutziča. Nižaza tsjii ch'apirar pillu irata nižtižtan Jesusiž achquiz scarzinchiča.

¹⁸ Nekztan ararcan kjawchiča:

—¡Viva tii judío nacionž chawjc jiliri! —cjican.

¹⁹ Nekztan tsjii paržtan Jesusiž achquiz t'etkatchiča; llawsižtan tjujtchiča; rispittažoka quillsiča.

²⁰ Nekztan burla paažcuqui Jesusižquiztan nii morat zquiti chjojžzinchiča. Niiž persun zquiti tjutziča. Nekztanaqui Jesusa chjitchiča cruzquiz ch'awczjapa.

JESUSAQUI CRUZQUIZ CH'AWCTATAČHA

²¹ Tsjii Cirene wajtchiz zoñi želatča, Simón cjita. Pucultan zoñž ejptača niiqui, Rufo, nižaza Alejandruž ejp. Jochquiztan kajžcatča. Nekz watan mantichiča, Jesusiž cruza kužajo. Nužquiz uytissiča.

²² Nekztan Jesusaqui Golgota yokquin chjichtatača. Golgota cjitaqui tuž cjiča: “Ach Tsjiž Yokacha”.

²³ Nekztan Jesusižquiz vinu miržtan t'ajžta tirinchiča. Jesusazti ana licz pecchiča.

²⁴ Jalla nekztanaqui cruzquiz ch'awczcu, sultatunacaqui zurtiychiča niiž zquitinaca tanzjapa, jakzilta sultatut nii zquiti tanznačhaja, nii zizjapa.

²⁵ Wenzlaka Jesusaqui cruzquiz ch'awctatača.

²⁶ Kjažtiquiztan tii zoñi cruzquiz ch'awctatažlaja, niiqui cjižrchiča tsjii tawliquiz, tuž cjican: “Tiiqui judionacž chawjc jiliriča”.

²⁷ Jesusižtan chicapacha tsjii pucultan tjañinaca yekja cruzanacquiz ch'awctazakaztača, tsjiic žew kjuttan tsjiic zkar kjuttan.

²⁸ Nužupan tuquitan cjižta Yooz taku cjiča. Nii Yooz taku tuž cjiča: “Ujhiz zoñinacžtan chica uchtača”. Nužquiz nii Yooz takuqui cumplissiča.

²⁹ Zoñinacaqui nekz watan acha wewczinchiča; ancha žawjchi, tuž cjican:

—¡Aj! Amqui timplu pajltasača. Nekztan čhjep majquiziqui wilta kjuytasača, jalla nuž cjičhamča, čana jaa?

³⁰ Jaziqui persunpacha am cruzquiztan zarakalla. Persunpacha liwriyalla amqui.

³¹ Nižaza nii timplu chawjc jilirinacžtan judío tjaajiñinacžtan parlassiča, Jesusa iñarcan, tuž cjican:

—Yekjapanacžquiz liwriichiča tiiqui. Persunpachazti anaž liwrii atča.

³² Cristužlaj niiqui, Israel nacionž chawjc jilirizlaj niiqui, persunpachaj cruzquiztan apakscu, chjiwžquila. Nekz criyaquiz učhumqui.

Zoñinacaqui Jesusa iñarchiča. Niižtan chica ch'awcta zoñimi iñarchizakazza.

JESUSAQUI TICZICHA

³³ Taypurquiztan tjapa nii yokac zumchi cjiissiča, majñakak oracama.

³⁴ Nii ora Jesusaqui tjapa aztan kjawchiča:

—Eloi, Eloi ¿lama sabactani? —Tii takuqui cjiča: “Wejt Yooz, wejt Yooz ¿kjažtiquiztan wejr ecchamtajo?”

³⁵ Yekjap nekz žejlñinaaqui nii taku nonžcu cjičiča:

—Nonžna. Elías kjawža tiiqui, nii tuquitan Yooz taku parliñi profetaqui.

³⁶ Tsjiiqui ninacžquiztan zajtchiča. Nekztan tsjii esponja cjita kjas licñiquiz jar vinu licskatchiča. Nekztan quejpžcu tsjii parquiz tsjijpchi Jesusižquiz macjatskatchiča nii jar vinu ch'umznajo. Nekztan nii žoñiqui parti žoñinacžquiz čiičiča:

—Tjewžla učumqui. Jaknužukat Eliasac cruzquiztan apaki tjonachani, niiz čekžla.

³⁷ Jesusaqui juc'anti kjawchiča. Nužquiz ticziča.

³⁸ Nii oraqui pajk timplu pañu juystokaz chicatquiz wjajrsiča, tsewctan kozzcu.

³⁹ Nii romanž sultatunacž jiliriqui Jesusiž yujc kjuttan želatča. Tjappacha niiz watanaca cheržcu cjičiča:

—Chekapan Yooz Majchtakalča tii žoñiqui.

⁴⁰ Nižaza tsjii kjažultan maatakanacaqui ažuiztan čekziča. Nii maatakanacaqui tinacatača: María cjititača, Magdalena wajtchiz žonqui. Nekztan María cjitizakaztača, Josež maa, nižaza Jacobž maa (lajktača Jacoboqui). Nekztan Salomé cjititača.

⁴¹ Nii maatakanacaqui Jesusa apžitača, nižaza yanapchitača, Jesusa Galilea yokaran ojklayan nii ora. Nekztan ninacaqui Jesusižtan chica Jerusalenquin tjonchiča. Nii cruzaz nekziqui muzpa maatakanaca želatča.

JESUSAQUI TJATZTATACHA

⁴² Nii noojiqui pjijzta tjacz tjuñitača. Jeejz tjuñi ispirazakaztača.

⁴³ Nižtiquiztan tjuñiž kattan tsjii José cjita Arimatea wajtchiz žoñiqui walja tjup kuzziz Pilatužquin ojkičiča. Nekztan Jesusiž curpu maychiča. Walja rispitta jiliritača nii Josiqui. Yooz tjapa mantiz timpu tjewznatča.

⁴⁴ Niiz žontiquiztan, Pilatuqui ispantichiča, tuž cjican:

—¿Kjažt waj ticzi cjesajo?

Nekztan zultatž jiliri kjawziča, nii pewczjapa.

⁴⁵ Nii zultatž jiliriqui kjaaziča:

—Jesalla, ticziča, —cjican.

Nekztan Pilatuqui Jesusiž curpu chjitzjapa permiso tjaachiča José cjita žoñžquiz:

—Nižtaqui niiz curpu chjichalla, —cjican.

⁴⁶ Nekztan Josiqui zuma chiw pañu kjawchiča. Jesusiž curpu chjijunžcu nii pañquiz tejziča. Nekztan tsjii sipulturquiz majkziča. Nii sipulturaqui pajk mazquiz pjettatača. Nii sipulturž zana tsjii pajk maztan pjuczijača.

⁴⁷ Pucultan maatakanacaqui Jesusiž curpu tjatñi cherchiča. Tsjaaqui María Magdalena cjititača. Tsjaac Maria cjitizakaztača, yekja Josiž maa.

16

JESUSAQUI JACATATCHIČHA

¹ Judionacž jeejz tjuñi jakatažu María Magdalenatan Jacobž maa Mariatan Salomatan, nii čhjepultan maatakanacaqui cusa ulurchiz asiiti kjaychiča, Jesusiž ticzi curpu tjajlinzjapa.

² Ancha wentan ninacaqui sipultura cheržni ojkičiča tjuñiž tewctanalla.

³ Sipultura ojkan ninacpora parlasičiča tuž cjican:

—¿Jequit učumtaqui cjetžinaquejo? ¿Nii pjuczta pajk mazjo?

⁴ Nekztan irantžcu, nii pajk pjuczta mazqui cjetžta cherziča.

⁵ Sipultura luzcu, žew latu kjuyltan tsjii tol chiw zquitchiz tjowa julzi cherchiča. Nužquiz nii maatakanacaqui ancha tsucchiča.

⁶ Nii tjowaqui paljajchiča, tuž cjican:

—Anaž tsuca maataka. Ančhucqui Jesusaž kjurča, nii cruzquiz ch'awctta žoñi. Niiqui jacatatchiča jaziqui. Anača tekzi. Cherznalla. Tii sipulturquiz ana žejlča.

⁷ Jazic ančhucqui oka. Niiz tjaajinta žoñinacžquin mazca. Pedružquizimi zaka mazna. Tuž cjican ančhuc maznaquiča: “Jesusaqui ančucaž tuqui okjayaquiča Galilea cjita yokquin. Nekzi Jesusižtan zalaquiča ančhucqui. Jaknužt tuquitan čiižinchipančhaja, jalla nužuča”.

⁸ Nekztanaqui nii maatakanacaqui sipulturžquiztan ulanžcu, zati pariju quejpchiča, tsucaña čhjekincan. Tsucaña ana čhjulumu čiyi atchiča jeczquizimi.

JESUSAQUI MARIA MAGDALENAQUIZ PARIZIČIČHA

⁹ Jesusaqui kjantatilla jacatatžcuqui primiraqui María Magdalenaquiz parizichiča. Tuquitan Jesusaqui naaquiztan pakallaku zajranaca chjatkatchitača.

¹⁰ Naa zonqui Jesusiž mazinacžquin mazñi ojkchinča. Ninacaqui llaquita želatča, kaacan.

¹¹ Nekztan mazzinča:

–Jesusaqui jacatatchičha. Wejrqui nii cherchinča, –cjican.

Nii nonžcu nii tjaajinta žoñinacaqui ana criichičha. Inapanka chiitažoka naychičha.

¹² Wiruñaqi pucultan tjaajinta žoñinacaž wajtquiztan okan, Jesusaqui parizichizakazza, tsjemata cjissi.

¹³ Nekztan quejpžcu, nii pucultanaqui parti tjaajintanacžquiz mazzičha. Nii mazta ana zakaz criichičha.

JESUSAQUI WILTA PARIZICHICA

¹⁴ Wiruñaqi Jesusaqui nii tuncamani tjaajinta žoñinacžquiz parizichičha, čhjeri lulan. Ninacaqui jacatatta maztaqui ana criichičha. Nekztan ninacž ana criiñi kuzziz cjen ninacžquiz iwjt'ichičha Jesusaqui.

¹⁵ Nižaza Jesusaqui mantichičha, tuž cjican:

–Jazic ančhucqui okaquičha tjapa kjutñi tii muntu intiru. Tjapa žoñinacžquizimi liwriiñi taku paljayaquičha.

¹⁶ Jakziltat tii taku criichaja, jalla niiqui liwriitaž cjequičha; nižaza bautista cjequičha. Jakziltat tii taku ana criichaj niiqui, ancha castictaž cjequičha.

¹⁷ Yooz taku criichinacaqui tii milajrunaca paaquičha. Wejt tjuuquiz zajranaca ch-jatkataquičha. Yekja takunaca chiyaquičha.

¹⁸ Zkora tanžcu zkoržquiz ana chjojrichtaž cjequičha. Tsjii veneno licžcu, ana ticznaquičha. Kjaržtan lanžcu, laa žoñinaca čhjetnaquičha. Nižta paaquičha Yooz taku criichi žoñinacaqui.

JESUSAQUI ARAJPACHA OJKCHICA

¹⁹ Nii taku chiižcu chawjc jilir Jesusaqui arajpacha ojkchičha. Nekzi Yooz zew latuquiz julzičha.

²⁰ Nekztanaqui nii tjaajinta žoñinacaqui ulanžcu, tjapa kjutñi Yooz liwriiñi taku paljaychičha. Chawjc jiliripanča Jesucristuqui. Jalla niičha ninacžquiz yanapñiqui. Nii Yooz aztan paata milajrunacaqui tuž cjičha: “Tii Yooz takuqui werarapanča”. Nužupanž cjila. Amén.

EL SANTO EVANGELIO SEGUN SAN LUCAS

¹⁻² Ancha zuma Teófilo, tii cartal amquin cjiyržcuča, Jesucristuž puntuquiztan. Jesucristuž nasta tjuñquiztanpacha jaknužt watčhaja, jalla niiqui ana tjatziča cherchi zoñinacaqui. Nii cherchi zoñinacaqui wejtnacaquiz tjaajinchičha. Nižaza yekja zoñinacžquiz tjaajinchizakazza Jesucristuž puntuquiztan. Nekztan tsjii kjaž zoñinacaqui Jesucristuž puntuquiztan cjiyrčičha niiz jaru niiz jaru.

³ Nižaza wejrqui zumpacha pewcpewczinča jaknužt Jesucristuž nasta tjuñquiztanpacha watčhaja, jalla nii. Jalla nuž pewcpewczcu wejrqui pinsichinča Jesucristuž puntuquiztan cjiyržpapazakaz niiz jaru niiz jaru. “Jalla niic walž cjesača”, cjican pinsichinča wejt kuzquiz. Jaziqwi walja zuma Teófilo, amquin tii cartal cjiyržcuča,

⁴ Jesucristuž puntu tjaajintanaca zumpacha zizajo.

JUAN BAUTISTAZ NASTAQUI

⁵ Ima Juan Bautistaž nasan jalla tuž watchičha. Judea yokquin Herodes cjita pajk jiliriqwi mantiñitača. Nižaza Zacarías cjita timplu cwitiñi zoñi želatča. Niiqui Abías cjita t'akquiztantacha. Niiž tjun cjititača Elisabet. Ninacaqui Aarón cjita tuqita atchi ejpžquiztan tjonñitača.

⁶ Nii pucultan lucutiñ zoñiqui Yooz yujcquiziqui zuma kamañchiztača. Yooz Epiž mantitacama kamañitača. Jalla nuž kaman ana čhjul ujmi ninacž quintra tjeezñi atasacha jecmi.

⁷ Ninacaqui ana zinta majchchiztača. Elisabet cjitiqui ana wira matiñitača. Nii oraqui pucultan lucutiñi chawc chawcwatača.

⁸ Tsjii nooj Zacarías t'akquiztan turnuž tjonatča, Yooz sirwizjapa timpluquiz. Jalla nižtquiztan Zacaríasqui Yooz sirwatča timpluquiz.

⁹ Nii timplu cwitiñinacaqui tsjii zoñi inzinu tjaazñi illžñipantakalča. Nekztan Zacarižquiz illziča. Jalla nuž illztaž cjen Zacaríasqui Yooz timpluquiz luzziča, inzinu tjaazñi.

¹⁰ Jalla nii inzinu tjaazñi oraqui tama zoñinacaqui Yoozquin mayizican želatča timplu zancu.

¹¹ Jalla nekztanaqui tsjii Yooz anjilaqui Zacarižquiz parisquichiča timpluquiz. Nii anjilaqui inzinu altarž žew latuquiz tsjitsičha.

¹² Anjila cheržcu Zacaríasqui kuz turwaysi cjsiicha, ancha tsucchiča.

¹³ Anjilaqui cjichiča:

—Zacarías, ana am tsuca. Yoozqui amiž mayizitaqui nonziča. Jalla nižtquiztan Yoozqui am Elisabet cjeti tjunaquiz lucmajch wawaž majtkataquiča. Jalla nuž majttan am wawaqui Juan cjita tjuuchiz cjequiča.

¹⁴⁻¹⁵ Jalla nii am majchqui walja pajk jiliriž cjequiča Yooz Ejpž yujcquiziqui. Jalla nii majttiquiztanaqui, amqui cuntintum cjequiča, walja chipsnaquiča. Nižaza walja zoñinacami chipsnaquiča, am tjunaž majttiquiztanaqui. Am majchqui vinumi awarintimi ana licaquiča. Ima maa pjuchquiztan ulnan Yooz Espiritu Santuqui am majch kuzquiz luzaquiča.

¹⁶ Am majchqui walja Israel wajtchiz zoñinaca Yooz Ejpžquin wilta sirwizkataquiča.

¹⁷ Nižaza am majchqui ima Jesucristuž ojklayan ojklayaquiča, Yooz taku paljaycan. Cjuñzna. Tuqui timpuqui tsjii Yooz puntu paljayñi profeta želatča, Elías cjita. Yooz Espiritu Santuqui nii Elíasqui Yooziž tjaata taku paljayskatchičha. Jalla nii tjaata taku paljaychiča Elíasqui, ana ekscu. Yoozquin tjurt'iñi kuzziztača. Jalla nižtapacha Yooz Espiritu Santuqui am majchquiz Yooziž tjaata taku paljayskataquiča. Niiž paljaytquiztan ejpžtanami maatinacžtanami wilta zumanskataquiča. Nižaza am majch paljaytquiztan ana Yooz kuzcama kamañi zoñinacami Yooz kuzcama kamañi cjisnaquiča. Jalla nižtquiztan Israel wajtchiz zoñinacaqui Yooz Majch tjonz tjuñi tjewznaquiča. Zuma kamcan, ninaqaqui tjewznaquiča, Yooz Majch zuma risiw't'isjapa. —Jalla nuž Zacarižquiz paljaychiča nii Yooz anjilaqui.

¹⁸ Nekztan Zacaríasqui anjilžquiz pewczičha, tuž cjican:

—¿Ultim werara amiž čhiitajo? ¿Jaknužt zizasajo? Wejrqui walja chawc žoñtla pero. Wejt maatakami chawc žon zakazza.

¹⁹ Nii anjilaqui kjaaziča, tuž cjican:

—Wejrqui Gabriel cjititča. Yooz manta payiñtča. Yoozqui wejr mantižquičha amquiz tii zuma takunaca maznajo.

²⁰ Amqui weriž chiita ana critiquiztan, upam cjisnaquiča, am maati majtcama. Yooziž pinsita tjuñquiz weriž chiita takuqui cumplisnaquiča. –Jalla nuž chiichiča anjilaqui.

²¹ Zacarías timplu kjuyltan azka želatča, ulanžquiz oraqui watatča. Jalla nižtiquiztan tjewzñi žoñinacaqui kuzquiz pinsichiča, kjažtiquiztan ana ulanžquejo, jalla nii. Žoñinacaqui zancu muzpa tjewznatča, Zacarías ulanžquizcama.

²² Nekztanaqui Zacariasqui azktanalla ulanžquichiča. Pero ana jaknužt chii atchiča. Jalla nižtiquiztan nii zawnc žejlñi žoñinacaqui ispartichiča. “Timplu kjuyltan anjilžtan zalzižlani”, jalla nuž cjeyasiča. Upa cjissiž cjen Zacariasqui žoñinacžquiz kjaržtan paljaychiča.

²³ Tsjii kjaž majquiztan Zacariasqui timplu cwitis turnu cumplichiča. Nii tjuñinaca žeržcu, persun kjuya ojkchiča.

²⁴ Wiruñaquí niž Elisabet cjiti tjunqui ica cjissinča. Nekztan Elisabet tsjii pjijaska jiiž kjuyaran želatča. Ana kjuyquiztan kjuya ojklaychinča. Naaqui persun kuzquiz pinsichinča tuž cjican:

²⁵ “Yooz Jiliriqí wejr cjuñžcu, wejtquiz ickatchiča. Jaziqí žoñinacaqui anaž iya wejr iñarasača”.

JESUCRISTUZ NASTAQUI MAZINTACHA

²⁶ Nekztanaqui sojta jiižquiztan Elisabet ickattanaqui, Yoozqui Gabriel cjita anjila cuchanžquichiča Galilea cjita yokquin, Nazaret cjita wajtquiz.

²⁷ Nii wajtquiz tsjaa tunsill tur želatča María cjiti. David cjita atchi ejpžquiztan tjoninča. Mariiqí José cjita žoñžtan kazzintacha zalzjapa. Yoozqui naa Mariaqui anjila cuchanžquichiča.

²⁸ Naaquiz tjonžcu, anjilaqui paljaychiča, tuž cjican:

–Cullacalla, Yooz k'ayamča amqui. Yooz kjarquizza. Nižaza Yoozqui amtan chicapachača. Yoozqui tjapa maatažquiztanam amquíz juc'ant wali favoraž paaquiča. –Jalla nuž tsaanchiča anjilaqui.

²⁹ Anjilž taku nonžcu Mariiqí ispartichinča. Kuzquiz pinst'ichinča, nii tsaantaqui anal intintasača, cjican.

³⁰ Nekztanaqui anjilaqui naaquiz cjichiča:

–María, ana tsucaquíz amqui. Yoozqui amquíz wali pajk favora paaquiča.

³¹ Jalla nižtiquiztan amqui icaquiča. Lucmajch wawchizim cjequiča. Nii wawaqui Jesúš cjita tjuuchiz cjequiča.

³² Tsjii noojiqui nii am majchqui wali pajk jiliriž cjequiča. Arajpach Yooz Ejpž Majchpanča niiqui. Werar Yooz Ejpquí niž Majchquiz pajk mantiñi cjskataquiča, Israel wajtchiz žoñinacžjapa. Am David cjita atchi ejptača tuquita pajk mantiñiqui. Jalla nižta pajk mantiñi cjequiča am majchqui.

³³ Israel wajtchiz žoñinaca wiñayaž mantaquiča. Niž mantitaqui wiñayaž želaquiča. Anaž tucuzinznasača. –Nuž paljaychiča anjilaqui.

³⁴ Nekztanaqui Mariiqí anjilžquíz pewczinča, tuž cjican:

–¿Jaknužt tii cjesaya? Wejrqui ana luctaka pajuča.

³⁵ Nii anjilaqui kjaaziča, tuž cjican:

–Yooz Espiritu Santuqui amquíz tjonznaquiča. Jalla nuž tjonan arajpach Yoozqui niž aztan tsjirižtakaz wezcaquiča am juntuñ. Nii oraqui Yooz Espiritu Santuqui am t'icznaquiča. Jalla nižtiquiztan nii am maatiqui juc'ant zuma lijitum kamañchiz cjequiča. Yooz Majchpanča niiqui.

³⁶ Nižaza amquíz maznuča tuž, am jamillquiztan Elisabet cjitiqui ickatchitača, chawc žon cjenami. Tuquiqui žoñinacaqui Elisabet puntuquiztan cjiñitača: “Naa žonča ana matiñqui” cjicanaqui. Jaziqí sojta jiižkaz icchinča.

³⁷ Yoozqui čhjulumpankaz paasača. –Jalla nuž chiichiča anjilaqui.

³⁸ Nekztanaqui Mariiqí cjichinča:

–Wejrqui Yooz Jiliriž mantitacama kamiñ žontča. Yoozqui wejtquízimi amiž chiitacama paaj cjila.

Jalla nuž Mariaž chitan, anjilaqui ojkchiča.

MARIAZ ELISABETAQUIN OJKTA

³⁹ Nekztanaqui tsjii kjaž majquiztan Mariiqí zati pariju ojkchinča Judea cjita kolta curunacchiz yokquin.

⁴⁰ Jalla nicju Zacarías kjuya luzzinča. Kjuya luzcu Elisabetaquiz tsaanchinča.

⁴¹ Nuž Mariaž tsaanan Elisabeta wawaqui pjuch kjuył cjenpacha kissiča. Nekztanaqui nii oraqui Espiritu Santuqui naa Elisabetaquiz luzziča nižaza chiikatchiča.

⁴² Jalla nekztan naaqui alto tawkžtan Mariaquiz paljaychinča, tuž cjican:

—Yoozqui amquiz tjapa maatakžquiztanami wali pajk favora paachiča. Nižaza nii am majchqui walja honorchiz cjesaž cjila.

⁴³ ¿Kjažtiquiztan taa arajpach Jilirž maaqui wejtquin tjonžquejo? Wejrqui inakaztča. Anal waquisučha.

⁴⁴ Amiž tsaanta taku nonžcu, wejt wawaqui pjuchquiz ancha cuntintu kis kissičha.

⁴⁵ Yooziž apayžquita taku criichamčha, nii Yooziž chiita takucama cumplisnaquičha, jalla nii criichamčha. Jalla nižtiquiztan zuma cuntintum cjequičha. Nuž cjichinča Elisabetqui.

⁴⁶ Nekztanaqui Mariiqui chiichinča, tuž cjican:

“Wejt Yooz Jiliriz honoral waytačha.

⁴⁷ Wejt Liwriiñi Yooziž cjen, wejt kuzmi ančaž chipčha.

⁴⁸⁻⁴⁹ Wejrqui inakaztča. Yooz mantitacama kamiñ žontčha. Yoozqui wejtquiz cjuñžquichičha. Jaziqqui walja azziz Yooz Ejpqui wejtquiz t'iczičha. Jalla nuž wejtquiz pajk obra paachičha. Tekztan nawjčchuc tjapa žoñinacaqui wejt puntuquiztan parlaquičha: ‘Yoozqui naaquiz zuma favora paachiča’, cjican. Werar Yoozqui jecžquiztanami juc'anti zumapankazza.

⁵⁰ Yoozqui tjapa nižžquin rispitiñi žoñinaczquiz okžñipančha, watay wata okžñipančha.

⁵¹ Yoozza walja pajk obranaca paañiqui. Mit kuzziz žoñinacz pinsitanaca inakaz cjissa.

⁵² Walja azziz jilirinaca jwessa ninacz puestuquiztan. Antiz humilde kuzziz žoñinaca honorchiz cjiskatčha.

⁵³ Nižaza jakziltat ana cusasanacchiz t'akjiri žejlčhaja, jalla nii t'akjirinaczquiz walja cusasanaca tjaaquičha Yoozqui. Antiz ricachunzcacti laachi kjarquiz ana čhjulchiz quejpkataquičha.

⁵⁴⁻⁵⁵ Nižaza Yoozqui učhum tuqita atchi ejpnaczquizimi, Abrahamžquizimi, Abrahamž majchmaatinaczquizimi, jalla ninaczquizimi taku tjaachičha, ninaca tirapan okznajo. Jalla nuž okžcu Yoozqui walja yanapčha Israel wajtchiz Yooz sirwiñi žoñinaczquin, ninaca ana tjatsñičha”.

Jalla nuž chiichinča Mariiqui.

⁵⁶ Tsjii čhjep jiiz Mariiqui Elisabetatan kamchinča. Nekztan quejpcinča naaža persun kjuya.

JUAN BAUTISTAZ NASTA

⁵⁷ Naa Elisabeta majt tjuñiqui irantižquichičha. Nekztan lucmajch wawa majtchinča.

⁵⁸ Jalla nuž cjen, Yoozqui Elisabetaquiz ancha zuma favora paachičha. Jalla nii quintu zizcuqui, Elisabeta wisinunacami jamillanacami naaquin tjonžni ojkičha. Nekztan ninacz tjonžtan, Elisabetaqui ancha cuntintutakalčha. Ninacami cuntintuzakaztačha.

⁵⁹ Jalla nekztan quinsakal tjuñiquiztan Zacariastan Elisabetatan timplu ojkičha wawa chimpus cuztrumpi paakatzjapa. Nii cuztrumpi paatan ejpž tjuužtan tjuuzkatz pecatčha, Zacarias cjican.

⁶⁰ Wawž maaqui cjichinča:

—Anaž. Tii wejt maatiqqui Juan cjita tjuuchizpanž cjequičha.

⁶¹ Partinacacti pewczičha:

—¿Kjažtiquiztan nižta tjuuskatz pecjo? Am jamillanacquiztan anaž nižta tjuuqui žejlčha.

⁶² Jalla nekztanaqui wawž ejpžquiz kjaržtan pewczičha, čhjul tjuuchizim pecas, jalla nii.

⁶³ Ejpqui tsjii maychičha, tjuu cjiirzjapa. Nekztanaqui cjiirchičha, tuž cjican: “Wejt maatiqqui Juan cjitaž cjequičha”. Nekztanaqui tjappacha ispantichičha nii puntuquiztan.

⁶⁴ Nii orapacha Zacariasqui wilta chiiñi cjissičha. Jalla nuž wilta chii atcan, Yooz honora paljaychičha.

⁶⁵ Jalla nuž cjen wisinunacami ispantichi quirchičha. Tjapa kjutñi nii Judea yokaran nii quintu ojkičha.

⁶⁶ Tjappacha nii quintu zizñi žoñinacaqui kuzquiz pinsichičha: “¿Tii uzaqui čhjulut cjisnaquejo?” cjican. Yooz kjarquizpantačha nii wawaqui.

⁶⁷ Nekztanaqui Yooz Espiritu Santuqui Zacarižquiz chiikatchičha. Jalla nižtiquiztan Zacariasqui Yooziž tjaata takucama paljaychičha, tuž cjican:

⁶⁸ “Yooz Jiliri honorchiz cjilalla. Ničha Israel žoñinacz Yoozqui. Učhum Yoozqui niž mantitacama kamiñ žoñinaczquin cjuñičha. Jaziqqui liwriita cjequičha učhumqui.

⁶⁹ Yoozqui walja azziz Liwriiñi cuchanžquichičha, učhumnacaquiz. Davidž majch maatinaczquiztanpacha majttačha nii Liwriiñiqui. David cjitaqui Yooz mantitacama kamñitačha.

⁷⁰ Tuqui timpuquiztanpacha jalla nužupan Yoozqui taku tjaachičha. Yooz taku paljayñi žoñinacaqui niž jaru niž jaru nii Yooziž tjaata taku mazmazzičha.

⁷¹ Nii maztaqui tužutača: ‘Liwriitačumž cjequiča, učum quintra žoñinacžquiztanami, učum chjaawjkatñi žoñinacžquiztanami’.

⁷² Yooz Ejpqui učum tuquita atchi ejpnacžquiz taku tjaachiča, tuž cjan: ‘Wejrqui ančhucacuz tira okzniča. Weriz zuma tjaata taku anal tjatsnača’.

⁷³ Nižaza Yooz Ejpqui učum tuquita Abraham ejpžquiz taku juramintužtan tjaachiča, nijapami učumjapami.

⁷⁴ Učum quintra žoñinacžquiztanami liwriitanaqui, učumqui ana ekskcu Yoozquin sir-wasača.

⁷⁵ Nižaza učumqui Yooz kuzcamakaz zuma ligituma kamaquiča. Jalla nuž kamcan učumqui Yooz sirwaquiča ticzcama’.

⁷⁶⁻⁷⁷ Nižaza Zacariasqui tira paljaychiča, tuž cjan: “Juan, wejt maati, amqui Jesús Jilirž tjonz tuqui ojklayaquiča, Israel žoñinaca nii zuma tjewznajo. Amqui jaknužt žoñinacž ujnacami pertunta cječhaja, jalla nii intintiskataquiča. Žoñinacž ujnaca pertunta cjen, liwriitaž cjequiča. Jalla nuž intintiskattiquiztanaqui profeta cjitam cjequiča amqui, arajpach Yooziž tjaata taku paljayni profeta.

⁷⁸ Yoozqui učum ancha okzñiž cjen učum liwriyaquiča. Tsewctanpacha tsjii Liwriiñi cuchanzquichiča, učum kuzquiz tjuñižtakaz kjanajo. Jalla nižtquiztan ew timpužtakaz cjequiča.

⁷⁹ Jalla nii Liwriiñi qui zuma kjanacamapanž Yooz zuma kamañ jicz tjeeznaquiča, zum-chiquiztakaz kamñi žoñinacžquizimi, ticzquiztan eksñi žoñinacžquizimi. Nižaza nii Liwriiñi qui učum zuma irpaquiča, Yooz Ejpžtanami učumtanami zumanznajo’.

Jalla nuž cjichiča Zacariasqui.
⁸⁰ Nekztanaqui nii Juan cjita uzaqui pajkchiča. Zapuru juc'anti Yoozquin tjurt'iñi kuzziztača. Jalla nekztanaqui tsjii ch'ekti yokquin ojklayatča, Israel wajtchiz žoñinacžquiz niž obra tjeezcama.

2

JESUCRISTUZ NASTA

¹ Jalla nii timpuquiz tsjii walja chawc jiliri želatča, Augusto cjita. Nii chawc jiliriqui mantichiča, tuž cjan:

–Tjappacha žoñinacaqui tjuu apuntiskataquiča.

² Nii timpuquiz Cirenio cjita jiliri želatča, Siria yokchiz žoñinaca mantiñi. Jalla nii timpuquiz primir censuqui watchiča.

³ Nekztanaqui tjapa žoñinacaqui persun watja ojkspantača, persun tjuu apuntiskati.

⁴ Jalla nuž cjen José cjita žoñi qui Galilea cjita provinsiquiztan, Nazaret cjita wajtquiztan ulanzquichiča. Judea cjita provinsiquin, Belén cjita wajtquin ojkičiča. Jalla nicju David cjita tuquita atchi ejpqui nassitača. Davidž majchmaatquiztan tjonñitača Josequi.

⁵ Jalla nuž cjen nicju ojkičiča, tjuu apuntiskati. Marija cjiti turatan zalzjapa kazzitača Josequi. Nii oraqui naa Mariiqui Espiritu Santuž t'icžtatača. Juztan Mariatan pucultan ojkičiča, tjuu apuntiskati.

⁶ Belén wajtquin irantižcu, Marija majts oraqui tjonchiča.

⁷ Jalla nicju Mariiqui primir wawa majtchinča, Belén wajtquiz, animalž tjajz kjuyquiz. Wawaqui pañ awallžtan capžtatača. Jalla nuž capžcu animalž tjajz kjuyquiz t'apžtatača. Anaž iya alujamintu wajtchucatača.

AWATRINACAQUI JESUSIZQUIZ RISPITI TJONCHICHA

⁸ Belén wajt zcatiran uuzi itzñi awatrinaca želatča. Awatrinacaqui pakara uuzi itzñitača pamparanpacha.

⁹ Jalla nuž želan tiripintit Yooz anjilaqui jeczquichiča. Tsewctan ninacž kjutñi walja kjanžquichiča. Nuž cheržcu ninacaqui ancha tsucchiča.

¹⁰ Jalla nekztanaqui nii anjilaqui cjichiča:

–Ana tsuca ančhucqui. Zuma quintul zjijczcuča. Tsjii Liwriiñi qui tjapa žoñinacžtjapa cuchanzquitača. Jalla niž cjen žoñinacaqui zuma cuntintuž cjequiča.

¹¹ Tii zeziqui Davidž wajtquiziqui tsjii wawa majttača. Jalla niiqui Jesucristo Yooza, ančhuc Liwriiñi.

¹² Ančhucqui nii wawa wachaquiča pañ awallžtan capžta; nižaza animalž tjajz kjuyquiz t'apžta wachaquiča. Jalla nuž wažtaž cjen siñala cuntažtakaz cjequiča. Jalla nuž cjenacqui ančhucqui zizaquiča, chekapan weraraž chiiikalala, niiqui. –Nuž cjichiča anjilaqui.

¹³ Jalla nekztan anjilžtan chica tama Yooz anjilanacaqui tsewctan jeczquichizakazza. Yooz anjilanacaqui Yooz honora waytichiča, tuž cjan:

¹⁴—Tsewcta arajpach Yooz honorchiz cjlalala. Nižaza tii yokquiziqui Yooz okžta žoñinaca zuma cuntintu kuzziz cjlalala.

¹⁵ Jalla nuž chiižcu, Yooz anjilanaquai tsewc arajpacha quejpciha. Nekztan nii awatirinacaqui porapat parlassiha, tuž cjican:

—Anjilaž maztaquai arajpach Yoozquiztan tjonchikalala. Tsjii Liwriiñi majttakalala. Jalla nii cheriž Belén watjaž ojkallala.

¹⁶ Jalla nekztanaquai awatirinacaqui zati pariju ojkchiha. Belén wajtquin animalž tjazj kjuyquiz luzziha. Nekzpacha awatirinacaqui zalchiha Mariatan Juztan wawa t'apzi.

¹⁷ Ninacžtan zalžcu tjappacha Yooz anjilaž chiitanaca nii wawž puntuquiztan quint'ichiha.

¹⁸ Awatirinacaž nuž maztiquiztan, tjappacha nonžñi žoñinacaqui ispanitichiha.

¹⁹ Mariizti persun kuzquiz nii mazta chjojchinha. Nii mazta puntuquiz pinsican walja pinsamintu aptazzincha.

²⁰ Awatirinacaquai uuzi ichi quejpciha. Nižaza Yooz honora paljaychiha, tuž cjican:

—Yoozza chekanaquai. Ancha waliha uhumž nonžtanaca, uhumž chertanacami. Yooz anjilaž chiitacama nižtapacha cherchinčumla. —Jalla nuž cjican Yooz honora waytissiha awatirinacaqui.

JESUSAQUI TIMPLUQUIN CHJICHTACHA

²¹ Majtquiztan quinsakal tjuñquiziqui jalla nekztan nii wawžquiz chimpuz cuztrumpi paachiha. Ima Mariaž ican, Yooz anjilaquai Mariaquiz chiichiha, “Jesús cjita cjequicha amiž primir majtta wawaquai”. Jalla nižtquiztan nii anjilaž chiita tjuužtan tjuuzkatchiha.

²² Tuquitanpacha tsjii taku mantichiha Moisesqui, tuž cjican: “Majtžcu ima pusi tunc tjuñiž cjen, maatakanacaquai Yooz sirwiz cuzturumpinaca ana payi atasacha. Pusi tunc tjuñiž tjonan, timpluquiz tsjii cuztrumpi paazpancha. Jalla nekztanaquai wilta Yooz sirwiz cuztrumpiž paasača”. Jalla nižtquiztan majtta tjuñquiztan pusi tunc tjuñi pjožkan Juztan Mariatan ninacž wawa chjitchiha Jerusalén cjita watja. Jalla nicju timpluquin ojkchiha wawa Yoozquin cumpjii.

²³ Tsjii Yooz liiqui tuž cjiichiha, “Primir lucmajch wawa majtžcu, Yoozquin cumpjitaž cjequicha Yooz sirwajo”. Nuž Yooz lii ut'aysiž cjen lii jaru cumplichaha.

²⁴ Yooz mantita lii jaru nii lucutiñiqui ojkchiha. Yooz liiqui zakaz cjiča: “Tsjii pariza paluma uz tsjii pariza wežla palomažtakaz Yoozquin tjaaspancha”. Jaziqui nužupan Yoozquin tjaachiha.

²⁵ Nii timpluquai Jerusalenquiz tsjii Simeón cjita žoñi želatča. Nii žoñiqui Yooz kuzcama kamñitača; Yooz lii jaru kamñitača. Nižaza Israel wajtchiz žoñinacž Liwriiñi tjewziha. Simeonqui Espiritu Santuž irpita žoñipantača.

²⁶ Espiritu Santuquai Simeonžquiz taku tjaachiha, tuž cjican: “Ima ticžcan, amqui Yooz cuchanžquita Liwriiñi Jiliri cheraquičha”.

²⁷ Jalla nuž taku tjaatiquiztanaquai Espiritu Santuquai Simeón irpichiha timplu kjutñi. Nii oraquai Jesusiž maa ejpquai nii timpluquin chjitchiha. Nekziquai Jesusižquiz mantita lii jaru cumplichaha.

²⁸ Jesusa cjita wawa cheržcu, Simeonqui kjaržtan kaaziha. Jalla nuž kaažcu, Yooz honorchiz cjejajo, tuž cjiichiha:

²⁹ —Yooz Tata, wejrquai amiž mantitacama kamiñ žoñtča. Tuquiqui wejtquiz taku tjaachamča. Anziquai amiž chiita taku cumplichamča. Jaziqui tižtquiztanaquai cuntintu ticznasača.

³⁰ Jaziqui wejt persun čhjujčžtan tii amiž cuchanžquita Liwriiñi cherchinha.

³¹ Tjappacha tii muntuquiz željñi žoñinacžtajapa tii Liwriiñi cuchanžquichamča.

³² Tii Liwriiñiž cjen, Israel žoñinacžquizimi parti žoñinacžquizimi Yooz kamañ jicž tjeježtaž cjequičha, liwriita cjejajo. Nižaza tii Liwriiñiž cjen, Israel wajtchiz žoñinacaqui zuma honorchiz cjisnaquičha. —Jalla nuž chiichiha Simeonaquai.

³³ Simeonž chiitquiztan Jesusiž maa ejpquai ninacž kuzquiz ispanitichiha.

³⁴ Nekztanaquai Simeonaquai ninacžta Yoozquin mayizichiha walikaz cjejajo. Nižaza Jesusiž maaquiz paljaychiha, tuž cjican:

—Werarapančhay, tii wawaž cjen walja Israel wajtchiz žoñinaca liwriitapanž cjequičha. Nižaza tii wawaž cjen yekjapa Israel wajtchiz žoñinacžti ujquin tjojtznaquičha. Tiiquai walja chawc jiliripanž cjequičha. Pero walja žoñinacaqui nii anaž rispitaquičha, Yooziž cuchanžquita cjenami.

³⁵ Tii wawaž cjen žoñinacaž kuzquiz pinsitanacaqui pajtaž cjequičha. Nižaza María, amqui tii wawaž cjen ancha llaquitam cjequičha. —Jalla nuž mazziha Simeonaquai.

³⁶⁻³⁷ Nii oraquai tsjaa Ana cjiti žon želatča, timpluquiz zakaz. Naatača Yooz taku paljayiñ profetquai. Jalla naaquai Fanuelž majttača, Aser cjita t'akquiztan. Pakallawk wata

zalztiquiztan, naaža lucuqui ticziča. Anziqui walja chawc zontača. Quinsakalc tunca pusin watchiztača naa žewqui; timpluquiztan anapan ulniŋtača. Ayunascan Yoozquin mayizican, Yooz Ejpžquin sirwiŋtača majiŋami weenami.

³⁸ Jesús cjeta wawa timpluquiz želan, nii orapacha Ana cjiti žonqui nii wawžtan zalchinča. Nuž zalžcu Yoozquin sparaquiž cjichinča. Nekztan nii wawž puntu paljaji kalltichinča Jerusalén watja liwriiz tjuŋi tjewžŋinacžquiz.

JESUSAQUI PAJKCHICHA

³⁹ Tjapa Yooz mantita lii cumplizcuqui Jesusiž maa ejpqui Galilea yokquin quejpchiča. Niiž persun watja Nazaret cjita quejpchiča.

⁴⁰ Jalla nii wajtquinaqui nii uzaqui pajkchiča. Tsjan tjupi y nižaza tsjan čhjultaki zizŋi cjiŋsiča. Yooz Ejpqui nii walja cwitichiča, nižaza yanapchiča.

⁴¹ Zapa wata niiž maa ejpqui Jerusalenquin ojkchiča, pascua pijjsta payi.

⁴² Jesusaqui tuncapan wajtchiz cjen, niiž jamillžtan Jerusalenquin ojkchiča pascua pijjsta cuztrumpi payi.

⁴³ Jalla nekztan pijjsta žeržcuqui, quejpchiča ninacaqui. Jesús uzasti Jerusalén wajtquiz eclichiča. Niiž maa ejp ana ecličiŋi naychiča.

⁴⁴ Niiž maa ejpqui pinsatča, “Niiž mazinacžtanž caa”, cjan. Jalla nuž cjen niiž maa ejpqui ojkchiča tsjii nooj intru. Pero tjuŋi kattan, Jesusa kjurchiča jamillanacžquin nižaza ocjalž maziran.

⁴⁵ Maa ejpqui Jesusa ana wači atchiča. Jalla nekztanaqui Jerusalén watja quejpchiča, jalla nicju kjurzjapa.

⁴⁶ Tsjii čhjep majquiztan, maa ejpqui Jesús watchiča timplu kjuyula. Timpluquiz Israel lii tjaajiŋi maestrunacžtan želatča. Maestrunacž takunaca nonznatča. Y nižaza maestrunacžquiz pewcznatča Jesusaqui.

⁴⁷ Nii uzaž paljajta taku nonžcu tjapa žoŋinacaqui ispantichiča, nii uzaž nuž čhjulumu zizŋiž chyan.

⁴⁸ Jalla nekztanaqui nuž žejlŋi cheržcu, ispantichi cjiŋsiča maa ejpmi. Nekztanaqui niiž maaqui čhižinčinča:

—Aay, tii wejt uza jay. ¿Kjažtquiztan am nižta eclichamta? Am ancha llaquita kjurchinča wejrnacqui. —Jalla nuž maaqui niižquiz čhižinčinča.

⁴⁹ Jalla nekztanaqui Jesusaqui maaquiz kjaaziča, tuž cjan:

—¿Wejr tjapa kjutŋi kjurchamkaya? Wejt persun Ejpž kjuyquiz žejlstanpantača wejlaqui. ¿Jalla nii ana zizzat amya?

⁵⁰ Jalla nuž chyan niiž maa ejpqui ana intintazziča.

⁵¹ Nekztanaqui Jesusaqui maa ejpžtan Nazaret cjita watja ojkchiča. Nicju irantižcu maa epiž mantitanaca cazŋipanikaztača. Maaqui jalla niiž nuž wattanacquiztan kuzquiz čhjojčinča.

⁵² Jalla nekztan Jesusaqui tsjan pajkchiča. Nižaza tsjan zizŋi pinsamintuchiztača. Yooz Ejpmi žoŋinacami niiž cjen cuntintutača.

3

JUAN BAUTISTAQUI YOOZ TAKU PALJAYCHICHA

¹ Zacarías Juan cjita majchqui Yooz taku paljaji kallantichiča. Jalla nii timpuquiz tii jilirinaca želatča. Tsjiiqui Tiberio cjitatača, juc'ant chawc jiliritača niiqui. Tunca pijjskan wata jiliri cjan mantichiča. Nižaza tira mantiŋipantača. Tsjiizuŋqui Poncio Pilato cjitatača. Niiqui mantichiča Judea cjita yokquin. Tsjiizuŋqui Herodes cjitatača. Niiqui Galilea yokquin chawc jiliritača. Niiž lajkqui Felipe cjitatača. Nii Felipiqui Iturea cjita yoka, Traconite cjita yoka, jalla nii pizc yokquin mantiŋitača. Tsjiizuŋqui Lisanijs cjitatača. Niiqui Abilinia cjita yokquin mantiŋitača. Nii timpuqui ninacatača pajk jilirinacaqui.

² Nižaza nii timpuqui Anastan Caifastan timplu chawc jilirinacatača. Nii timpuqui Juanqui želatča tsjii ch'ekti yokquin. Jalla nuž želan Yoozqui Juanžquiz takunaca paljaychiča.

³ Nekztan Juanqui tjapa kjutŋi Jordán puj yokaran ojklaychiča. Nicju žoŋinacžquiz paljaychiča, tuž cjan:

—Ančhucqui kuznacaž campiya; Yoozquin kuzziz cjisna. Nekztan ančuca ujnaca pertunta cjequiča. Jalla nekztanaqui bautistaž cjesača. —Jalla nuž paljaychiča Juanqui.

⁴ Tuquita tsjii Isaías cjita Yooz taku paljayŋi profeta želatča. Niiž cjiŋta takucama watchiča. Jalla tuž cjan, cjiŋrchiča:

“Ch'ekti yokquin tsjii zoñiqui altu tawkžtan paljayžcaquiča, tuž cjican: ‘Tsji chawc jiliriz tjonacuicha. Jaziqui zuma kamañ jicz tjaczna. Tsji zuma jicztakaz ančuca kuznaca zumpacha tjaczna, y nižaza zuma litjumatapanž cjee.

⁵ K'awanaca liwjtattatzna. Curunacami lumanacami zumpachaž wjajržna, nii jicz zuma zok'o okajo. Nižaza nii t'ojonacqui zumpacha kujuzcatzna. Jalla nuž zuma kamañ jicz tjacznaquiča.

⁶ Nii chawc jiliriz tjontan, tjapa tii muntuquiz zejłni zoñinacami Yooz Epiž cuchanžquita Liwriiñiz cheraquiča’”.

Jalla nuž cjican cjiyrchiča nii Isaías cjita zoñiqui.

JUAN BAUTISTAQUI ZOÑINACŽQUIZ CHIIZINCHICHA

⁷ Nekztanaqui zoñinacqui tjapa watjanacquiztan ulanžquichiča, Juanž bautista cjisjapa. Juanqui nii zoñinacžquiz cjichiča:

—Zkora irata incallni zoñinaca. Yooz Ejpqui ujchiz zoñinaca wajillaž casticaquiča. ¿Ject ančucaquiz nii mazzejo? ¿Nii casticu atipzjapa wejtquinž tjonja?

⁸ Kuz campiichinčucžlaj niiqui, zumapankaz kamaquiča, ančuca campiita kuz kjana tjeezjapa. Ančhucqui anaž mit kuzziz porapat chiyasaquiča, tuž cjican: “Wejrnacqui Abrahamž majchmaatinacžquiztanpacha tjoniča. Yoozqui anaž wejrnaca casticasača”. Jalla nižta ana čhiichiiz waquisiča ančhucqui. Yoozqui tii maznacquiztan Abrahamž majchmaatinaca paasača.

⁹ Ančhucqui tsjii frut muntižtakazza. Ana zuma fruta pookni muntiqui k'aachtaz cjequiča jir ačtan. Jalla nuž k'aachtiquiztanaqui, ujaž cjequiča. Jalla nižta irataž ančucaquiz wataquiča. Ana zuma kamañchiz zoñinaca castictaž cjequiča. —Nuž cjican paljaychiča Juanqui.

¹⁰ Jalla nekztanaqui zoñinacqui Juanžquiz pewcziča:

—¿Jaziqui čhjulut paaqui wejrnacjo?

¹¹ Nekztanaqui Juanqui kjaaziča, tuž cjican:

—Jequit pizc almillchiz cječaj niiqui, tsjii almillacqui ana almillchiz zoñžquin tjaasača. Tsji wacchi čherchiz zoñiqui tsjii ana čherchiz zoñžquin niž čjeri tojnaquiča. —Nuž cjichiča Juanqui.

¹² Jalla nekztanaqui tsjii impuesto cobriñi zoñinacqui Juanžquin tjonchiča, bautista cjisjapa. Nekztanaqui Juanžquiz pewcziča, tuž cjican:

—Tjaajiñi, ¿wejrnacqui čhjulut paaquiya?

¹³ Juanqui kjaaziča, tuž cjican:

—Lii jaruž cobraquiča. Anaž juc'anti cobraquiča ančhucqui.

¹⁴ Nižaza tsjii zultatunacqui Juanžquiz pewcziča, tuž cjican:

—¿Wejrnaczi čhjulut paaquiya?

Juanqui kjaaziča, tuž cjican:

—Ančhucqui zoñžquiztan anaž čhjulumi kjañasača. Nižaza anaž fuerziyasacha. Nižaza zoñžquimi ana inapankaz tjojtasača, tsjii cusasa packatzjapami. Nižaza ančhuc persun suelduchiz cuntintapanž cjee. —Jalla nuž cjican kaaziča Juanqui.

¹⁵ Tjapa zoñinacqui Yooziž cuchanžquita Cristuž tjonz ancha tjewznatča. Jalla nižtiquiztan zoñinacqui kuznacquiz pinsichiča: “Juanqui Cristužłani” cjican.

¹⁶ Pero Juanqui tjappacha nii zoñinacžquiz cjichiča:

—Nonžna. Wejrqui kjaztangkal bautisuča. Tsjiizuñ wejt wirquin tjonča. Jalla niiqui Espiritu Santužtanami arajpach ujžtanami bautisaquiča. Jalla niiča wejtquiztan tsjan juc'ant poderchizqui. Anal niž čhjata chjojkinimi atasacha, nižžquiz atintisjapa. Inakaztča wejrqui.

¹⁷ Juanqui tira paljaychiča, tuž cjican:

—Ančhucqui trigo zkalažtakazza. Nii tjoñi jiliri qui trigonaca kjojaquiča. Nekztan itsanacami zuma trigumi pjalznaquiča. Nii zuma trigu qui ricujtaž cjequiča. Niž persun kjuyquin majcžtaž cjequiča. Nii itsanacazi liwjt ujažtaž cjequiča, ana tjesni ujquj. Jalla nižta irataž ančucaquiz wataquiča.

¹⁸ Jalla nuž zoñinacžquiz čhižinchiča Juanqui. Nižaza yekja čhižintanacami paljaychiča, zuma Yooz taku paljaycan.

¹⁹ Nižaza wiruñacqui Juanqui Herodes cjita jiliržquiz iwj'tichizakazza. Herodes cjita jiliri qui niž jilž tjunatan zalsiča. Felipe cjtatača niž jilaqui. Nižaza Herodesqui iya anawalinaca paachitakalča. Nekztan Juanqui Herodesquiz iwj'tichiča tjapa niž anawali paatiquiztan.

²⁰ Herodeszi ana nonziča. Juc'anti anawalinaca paachiča, Juan carsilquiz chawjcz-cama.

²¹ Juanqui ima carsilquiz chawcta želan, walja žoñinaca bautissičha. Nižaza Jesusa bautissizakazza. Jesusaqui baptista cjiscu Yooz Ejpžquin mayizatčha. Nii orapacha arajpacha cjetzičha.

²² Yooz Espiritu Santuqui tsjii palumažtakaz chjijwžquichičha Jesusiž juntuñ. Nižaza arajpachquiztan tsjii altu jora paljayžquičhi nonzičha. Nii joraqui tuž cjan chiižquichičha: –Amčha wejt ultim k'ayi Maatimqui. Amiž cjen anchal cuntintutčha wejrtqui.

JESUCRISTUZ TUQUITA ATCHI EJPNACACHA TINACAQUI

²³ Jesusaqui nii oraqui quinsatunc watchiztačha. Jalla nektzanaqui niiz Yooz Epiž tjaata trabajo kallantichičha. Jesusiž tuquita atchi ejpnacaqui tinacačha. Primero Josež maati cjiatažtakaztačha. Josequi Eliž majchtačha.

²⁴ Eliqui Matatž majchtačha. Matatqui Leviž majchtačha. Leviqui Melquiž majchtačha. Melquiqui Janaž majchtačha. Janaqui Josež majchtačha.

²⁵ Josequi Matatias majchtačha. Matatiasqui Amós majchtačha. Amosqui Nahumž majchtačha. Nahumqui Esliz majchtačha. Esliqui Nagaiž majchtačha.

²⁶ Nagaiqui Maatž majchtačha. Maatqui Matatias majchtačha. Matatiasqui Semeiz majchtačha. Semeiqui Josež majchtačha. Josequi Judaž majchtačha.

²⁷ Judaqui Joanaž majchtačha. Joanaqui Resaž majchtačha. Resaqui Zorobabelž majchtačha. Zorobabelqui Salatielž majchtačha. Salatielqui Neriž majchtačha.

²⁸ Neriqui Melquiž majchtačha. Melquiqui Adiž majchtačha. Adiqui Cosamž majchtačha. Cosamqui Elmodamž majchtačha. Elmodamqui Erž majchtačha.

²⁹ Erqui Josuež majchtačha. Josuequi Eliezerž majchtačha. Eliezerqui Jorimž majchtačha. Jorimqui Matatž majchtačha.

³⁰ Matatqui Leviž majchtačha. Leviqui Simeonž majchtačha. Simeonqui Judaž majchtačha. Judaqui Josež majchtačha. Josequi Jonanž majchtačha. Jonanqui Eliaquimž majchtačha.

³¹ Eliaquimqui Meleaž majchtačha. Meleaqui Mainanž majchtačha. Mainanqui Matataž majchtačha. Matataqui Natanž majchtačha.

³² Natanqui Davidž majchtačha. Davidqui Isaiž majchtačha. Isaiqui Obedž majchtačha. Obedqui Booz majchtačha. Boozqui Salmonž majchtačha. Salmonqui Naasonž majchtačha.

³³ Naasonqui Aminadabž majchtačha. Aminadabqui Aramž majchtačha. Aramqui Esromž majchtačha. Esromqui Fares majchtačha. Faresqui Judaž majchtačha.

³⁴ Judaqui Jacobž majchtačha. Jacobqui Isaacž majchtačha. Isaacqui Abrahamž majchtačha. Abrahamqui Tarež majchtačha. Tarequi Nacorž majchtačha.

³⁵ Nacorqui Serugž majchtačha. Serugqui Ragauž majchtačha. Ragauqui Pelegž majchtačha. Pelegqui Heberž majchtačha. Heberqui Salaž majchtačha.

³⁶ Salaqui Cainanž majchtačha. Cainanqui Arfaxadž majchtačha. Arfaxadqui Semž majchtačha. Semqui Noež majchtačha. Noequi Lamecž majchtačha.

³⁷ Lamecqui Matusalenž majchtačha. Matusalenqui Enocž majchtačha. Enocqui Jaredž majchtačha. Jaredqui Mahalaleelž majchtačha. Mahalaleelqui Cainanž majchtačha.

³⁸ Cainanqui Enós majchtačha. Enosqui Staž majchtačha. Setqui Adanž majchtačha. Adanqui Yooziž paatiquiztan Yooz maatitačha.

4

SATANAS CJITA DIABLUQUI JESUSA UJQUIZ TJOJTSKATZJAPA PECATCHA

¹ Jesusiž kuztan Yooz Espiritu Santuž kuztan tsjii kuzziztačha. Jalla nuž cjen Jesusaž Jordán cjiata puquiztan okan, Espiritu Santuqui Jesusa chjitchičha ch'ekti yokquin.

² Jalla nii ch'ekti yokquin željchičha pusi tunc tjuñi. Jalla nuž želanaqui nii Satanás cjiata diabluqui Jesusa ujquiz tjojtskatzjapa pecatcha. Jalla nii pusi tunc tjuñi Jesusaqui ana čjheri lujlchičha. Jalla nižtiquiztan pusi tunc tjuñiquiztan ana lujlchiž cjen čjheri eecskatchičha.

³ Jalla nektzanaqui nii diabluqui cjichičha:

–Ultim Yooz Maatimžlaj niiqui, amqui tii mazquiztan t'anta tuckatalla. –Nuž diabluqui čhiichičha.

⁴ Jesusaqui kjaazičha, tuž cjan:

–Cjijrta Yooz takuqui tuž cjičha: “Žoñinacaqui anaž čjheržtan alaja žetasačha. Yooz takučha chekanaqui, jalla niičha ultim čjherižtakazqui, Yooztan wiñaya žetzjapaqui”.

⁵ Jalla nektzanaqui nii diabluqui Jesusa chjitchičha tsjii pajk cur puntiquin. Jalla nicju tja tii muntuquiz željñi yokanaca tjeezičha tsjii ratukaz.

⁶⁻⁷ Nektzanaqui diabluqui Jesusižquiz cjichičha:

—Wejt yujquiz quillsnaquíz niiqui, nízaza wejr rispitaquíz niiqui, tjapa tii yokquiz žejlñinaca amquíz tjaataž cjequičha. Wejrqui tjapa tii yokanaca tjaacha, am mantisjapa. Tii yokquiz žejlñinaca amtaž cjequičha tjappacha. Tii tjappacha wejtquiz tjaatačha. Jaziqui wejrqui jakžiltižquíz tjaaz pecučhaja, jalla nižquin tjaasačha. —Jalla nuž cjichičha diablui.

⁸ Nekztanaqui Jesusaqui kjaazičha, tuž cjan:

—Satanás, wejtquiztan zaraka. Cjijrta Yooz takuqui tuž cjičha: “Ultim arajpach Yoozquinkaz rispita. Nižaza nii alaja sirwa. Niikazza Yooz Jiliričha”, nuž cjan cjijrtačha.

⁹⁻¹¹ Nekztanaqui nii diabluiqui Jesusa chjitchičha Jerusalén cjita watja. Nicju timplu pjurniquin chjitchičha. Nekztan cjičhica:

—Cjijrta Yooz takuqui tuž cjičha: “Yooz Ejpqui niž anjilanaca mantaquičha, am cwitisjapa. Ninacž kjaržtan am cwitaquičha, ana am kojchha čhjojritžta cjejajo čhjul mazquiztanami”. Nuž cjijrtačha. Jaziqui ultim Yooz Maatimžlaj niiqui, tsewctan kossuc tii yokquiz layžcalla.

¹² Nekztanaqui Jesusaqui kjaazičha, tuž cjan:

—Cjijrta Yooz takuqui tuž cjičha: “Zoñiqui ultim arajpach Yooz ana inakaz nuž yanznaquičha”.

¹³ Jalla nekztanaqui diabluiqui ana čhju lu iyas pinsiñi cjičhica, Jesusa ujuquiz tjojskatzjapaqui. Nekztanaqui tsjii kjažtapacha nižquiztan zarakčičha. Wiruñ wilta ujuquiz tjojskatz yanznaquičha.

JESUCRISTUQUI YOOZ PUNTU PALJAYCAN OJKLAYCHICA

¹⁴ Nekztanaqui Jesusaqui quejpžquičhica Galilea cjita yokquin. Walja Espiritu Santuž azziztačha. Tjapa yok kjuťni niž quintuqui ancha ojkchica.

¹⁵ Galilea yokquin želan judío ajcz kjuyanacquizimi tjaajiñitačha. Niž tjaajintiquiztan tjapa žoñinacaqui niž honora waytichica.

NAZARET CJITA WAJTQUIN OJKCHICA

¹⁶ Nekztanaqui niž persun watja ojkchica, Nazaret cjita. Jalla niitačha niž pajkta watjaqui. Jeejz tjuñ nojiqui ajcz kjuyquin luzzičha, niž cuztrumpi jaru. Jalla nii ajcz kjuyquin žejlcan, tsijtsičha Yooz taku liizjapa.

¹⁷ Nekztanaqui Isaías cjita profetaž cjijrta Yooz taku, jalla nii libruqui chjalžtatačha Jesusa liyajo. Nii libro cjetžcu watjchica tii cjijrta taku. Nekztan liičhica, tuž cjan:

¹⁸ “Yooz Espiritu Santuqui wejt kuzquž žejlčha. Wejrqui illztačha, pori žoñinacžquíz zuma taku maznajo. Nižaza wejrqui cuchanžquitačha llaquizñi žoñinaca ana llaquíz llaquizajo. Nižaza wejrqui cuchanžquitačha tanta žoñinacžquíz maznajo, ‘Liwrriitaž cjequičha ančhucqui’ cjan. Nižaza wejrqui cuchanžquitačha zur žoñinacž čhjujqui čhjetnajo. Nižaza wejrqui cuchanžquitačha ana zuma langzkatta žoñinaca liwriyajo.

¹⁹ Yooz Ejpqui žoñinacžquíz zuma favora paaquičha. Jalla nuž nii zumanaca paazjapa Yooz Espiritu Santuqui wejtan chicapachačha”.

Jalla nuž Yooz taku cjijrtačha.

²⁰ Jalla nekztanaqui Jesusaqui nii libro pjucžcu ajcz kjuya atintiñi žoñžquíz intirjichica. Nekztan nužquíz julzičha. Tjappacha nekž žejlñi žoñinacaqui tira nižquin chekznatčha.

²¹ Nekztanaqui paljayi kallantichica, tuž cjan:

—Tonjpacha tii cjijrta Yooz taku cumplissičha ančhucaž nonžnan.

²² Nekztanaqui žoñinacaqui čhičhica, tuž cjan:

—Walikazza tii Jesusaqui.

Niž zuma čhiita takuanacquiztan ispantichica. Ninacpora parlassičha, tuž cjan:

—¿Anaj tiic Juz maatiya?

²³ Nekztan Jesusaqui tuž čhičhica:

—Ančhucaquiztan žoñi wejtquíz chiyachani, “Am kullñi žoñimžlaj niiqui, ima wejr kullcan, am persunpacha kullalla”. Wejrqui Capernaum waitquin milajrunaca paachinčha, jalla nii quintu nonzinčhuccha. Jaziqui ančhucqui wejtquíz tuž chiyachani: “Nižtapacha tii am persun waitquin paažinalla”. Nuž wejtquíz chiyachani.

²⁴ Jesusaqui tirapan paljayičha, tuž cjan:

—Weraral chiyučha. Yekja waitchiz žoñinacaqui tsjii Yooz taku paljayñi profeta zuma risiwasačha. Persun waitchiz žoñinacazti nii Yooz taku paljayñi profetžquíz anaž juyzu paačha.

²⁵ Tuquiqui tsjii Elías cjita Yooz taku paljayñi profeta želatčha. Nii timpuqui walja žewžew maatakanaca želatčha Israel waitquinaqui. Čhjep wata sojta jizziz ana wira chijinchica. Jalla nižtiquiztan walja mach'atačha. Ana čheri želatčha nii waitquinaqui.

²⁶ Israel wajtquin walja zewzew maatakanaca želanami, Eliasqui ninaczquin ana cuchantatača. Pero Sarepta cjita wajtquin tsjaa žew želatča, Sidón cjita wajtž zcati. Jalla naa yekja wajtchiz zewaquin cuchantatača Eliasqui. Jalla nužupan cjetča.

²⁷ Nižaza tuqui timpuzakaz tsjii Eliseo cjita Yooz taku paljayni profeta želatča. Nii timpuqui walja mojkchi janchichiz laa žoñinaca želatča; lepra cjita conača niiqui. Pero Eliseuqui persun wajtchiz laa žoñinaczquiz ana čjulumi čhjetinčiča. Antiz tsjii Naamán cjita Siria wajtchiz žoñžquiz čhjetinčiča. —Jalla nuž čhiichiča Jesusaqui.

²⁸ Jalla nuž čhiita nonžcu, tjappacha nii ajczni žoñinacaqui muzpa zawjchiča Jesusiž quintra.

²⁹ Ninacaqui walja tsijtsiča. Nekztanaqui wajtquiztan Jesusa ulanskatchiča. Nii watjaqui pajk waranc k'aw zcati želatča. Jalla nuž k'aw kjutni Jesusa čhjetinčiča, nii k'awquiztan kossuc tjojtšjapa.

³⁰ Ułtimquiziqui Jesusazti ninacz taypi watchiča. Ana čjulumi kjaž cjita ojkcichiča.

TSJII ZAJRAZ TANTA ZOÑI ČHJETINTA

³¹ Nekztanaqui Jesusaqui ojkcichiča Capernaum cjita watja Galilea cjita yokquin. Jalla nicjuqui jeež tjuñ nooj Jesusaqui tjaajinčiča ajcz kjuyquin.

³² Niiž tjaajintiquiztan žoñinacaqui walja ispantichiča. Jesusaqui pajk jilirž tawkžtan tjaajinčiča.

³³ Jalla nii ajcz kjuyquiz tsjii zajraz tanta žoñi želatča. Nii žoñiqui kjawchiča, tuž cjican:

³⁴ —iAy! Jesusa, Nazaret wajtchiz žoñimča. ĆKjažtiquiztan am wejnacaquiz mitizi? ĆKjažtiquiztan wejrnac aki tjon amjo? Wejrqui am pajuča. Yooziž zuma cuchanzquita žoñimča amqui. —Jalla nuž cjichiča nii zajraqui.

³⁵ Nekztanaqui Jesusaqui nii zajrižquiz užiča, tuž cjican:

—iCh'uj žela! iTii žoñžquiztan zaraka!

Jalla nekztanaqui žoñi tjojtcu zajraqui ulančiča žoñinacz čheranpacha. Ana nii žoñi čhjojritžcu, ecchiča.

³⁶ Nekztan tjapa žoñinacaqui ispantichiča. Jalla nekztan parlassiča, tuž cjican:

—Ćčhjul mantiñi takumekaz čhiila tiiqui? Walja azziz tawkchizza. Tii žoñiqui zajramiž mantila. Tiiž mantitiquiztan zajramiž ulanla. —Nuž ispantichi parlassiča.

³⁷ Tjapa kjutni nii yokaran Jesusiž ispantichuca paatanacquiztan walja parlasñitača.

SIMON PEDRUZ AJMUZ MAA ČHJETINTA

³⁸ Nekztanaqui Jesusaqui nii ajcz kjuyquiztan ulanžcu ojkcichiča. Nekztan Simonž kjuyquin luzziča. Jalla nekž Simonž ajmuž maa ch'ujlñi cona laacjichi želatča. Tjapa curpu walja kjakchi želatča. Nii žejlñi žoñinacaqui Jesusižquiz roct'ichiča:

—Čhjetinžinala, —cjican.

³⁹ Nekztanaqui Jesusaqui naa laa žona kjutni chutjatchiča. Nekztan laa žon čhjetinčiča. Ch'ujlñi conaqui apaltichiča nužquiz. Nii orapacha naa žonqui žaazinča, nekztanaqui ninaca atinti kallantichinča.

TJAPAMAN LAA ZOÑINACA ČHJETINTA

⁴⁰ Nekztanaqui tjuñiz kattan, žoñinacaqui tjapaman laa žoñinaca zijicchiča, Jesusa čhejtano. Nekztan Jesusaqui zapa maynižquiz persun kjaržtan lanziča. Jalla nuž lanžcu čhjetinčiča.

⁴¹ Nižaza tsjii kjaž laa žoñinaczquiztan zajranaca ulanskatchiča. Jalla nuž ulanskatan zajranacaqui kjawchiča:

—Yooz Maatimča amqui, —cjican.

Nii zajranacaqui zizatča, Yooziž cuchanzquita Cristupankazza Jesusaqui, jalla nii. Jalla nižtiquiztan Jesusazti zajranaczquiz užiča, tuž cjican:

—Jalla wejt puntuquiztan anapanča čhiichiisqui.

JESUSAQUI YOOZ ZUMA KAMAÑ PUNTU PALJAYCHICHA

⁴² Niiž jakakattaž wentan Jesusaqui wajtquiztan ulančiča, ana žoñ žejlz yokquin. Pero nii wajtchiz žoñinacazti walja nii kjurchiča. Nižtami kjurni žoñinacaqui irantichiča jakziquin Jesusa želatčaj, jalla nicju. Nii žoñinacaqui Jesusaž atajs pecatča, ana jakziquinami okajo.

⁴³ Pero Jesusaqui ninaczquiz cjichiča:

—Yekjap watjanacquin jaknužt žoñinacaqui Yooz zuma kamañchiz kamz waquizičhaja, jalla nii paljayquiztanča wejrqui. Jalla nijapa wejrqui tii muntuquiz cuchanzquitača.

⁴⁴ Jalla nuž paljaycan Jesusaqui ojklaychiča Galilea yokaran. Jalla nuž ojklaycan ajcz kjuyquizimi paljayñitača.

5

JESUCRISTUQUI MILAJRU PAACHICHA

¹ Tsii nooj Jesusaqui tsii pajk kot atquin želatča. Genesaret cjiatača nii pajk kotaqui. Jalla nekz želan walja žoñinacaqui nižquin tjonchiča. Yooz taku nonzjapa niž muytata ancha ts'acjasatča.

² Jesusaqui pizc laachi warcu cherchiča kot atquiz. Tsii ch'iz tanñi žoñinacaqui warcunaca ecchitača. Ninacaqui ch'iz tanz rednaca awjnatča.

³ Jalla nekztanaqui Jesusaqui Simón cjita zoñž warcuquiz luzziča. Simonžquiz nii warcu koluc atskatchiča kot mor kjutñi cheechi. Jesusaqui warcuquiz julžcu, žejlñi žoñinaczquin tjaajñi kallantichiča.

⁴ Jalla nuž žoñinaczquiz tjaajñi žeržcu, Simonžquiz cjichiča:

—Tii warcu am chjicha tsjan kos kjutñi. Jalla nekztan am ch'iz tanz rednaca tjojtžna.

⁵ Simonaqui kjaaziča tuž cjican:

—Wejt Tjaajñi Maestro, zeziqui wejrnacqui pakara langzinča, pero ana zinta ch'iz tanchinča. Nižtaqui amiž mantanaqui wejt ch'iz tanznaca tjojtžnača.

⁶ Nekztanaqui ch'iz tanz tjojtžcu, walja muzpa ch'iz tanchi jooziča, redmi wjajržñi kallantichiča.

⁷⁻⁸ Nii oraqui ninacz mazinaca yekja warcuquintača koluc azkquinalla. Ch'iz tanz wjajržñi kallantiquiztan mazinaca kjaržtan wilzcu, kjawziča yanapi tjonajo. Nii mazinacaqui irantižcu, nii pizc warcuquiz ch'iztan chjijsiča. Ch'iztan jos nii kotquiz kos julžñi tjurchiča nuž wacchi ch'iz tanziz cjen. Nii cheržcu, Simón Pedruqui Jesusiz yujcquiz quillziča. Nekztan cjichiča:

—Wejt Yooz Jiliri, ancha ujchiz žoñtča wejrqui. Amtan chica ojklayzqui anal waquizuča.

⁹ Jalla nii wacchi ch'iz tanchiž cjen, Simonaqui walja ispantichiča, nižaza niž mazinacami.

¹⁰ Tsii pucultan mazinacaqui Jacobžtan Juanžtan cjitatača. Ninacaqui Zebedeož majchnacatača. Jacobžtan Juanžtan nižaza ispantichi cjijsiča. Jesusaqui Simonžquiz cjichiča:

—Ana am tsuca. Jalla tekztan nawjkchuc jaknuž ch'iz juntichamžlaja, jalla nižta irata amqui žoñinacam juntaquiča Yooztajapaqui.

¹¹ Jalla nekztanaqui warcunaca yokquin irantiskatžcu, ninacaqui tjappacha ecchiča. Nižaza nii ch'iz tanz langz jaytichiča Jesusižtan chica ojklayzjapa.

MOJKCHI JANCHICHIZ LAA ZOÑI CHJETINTA

¹² Tsii noojiqui Jesusaž tsii wajtquiz želan, tsii mojkchi janchichiz laa zoñi tjonchiča. Jesusa cheržcuqui, niž yujcquiz puct'ichiča yokquizpacha. Jalla nekztanaqui rocchiča, tuž cjican:

—Wejt Jiliri, wejr čhjetnalla. Am wejr čhjetinzim pecčhaj niiqui, wejr čhjetinzim atča amqui.

¹³ Nekztanaqui Jesusaqui kjaržtan lanziča, tuž cjican:

—Wejr am čhjetnasachiya. Jaziqi čhjetintam cjijsa.

Jalla nuž čhiitiquiztanaqui nii orapacha nii žoñiqui žejtchi cjijsiča mojkchi janchi laaquiztan.

¹⁴ Nekztanaqui Jesusaqui nii zoñi mantichiča ana jeczquizimi nuž nii čhjetinta puntu čhiichiyajo. Nižaza cjichiča:

—Timpluquin oka amqui. Timplu jiliržquin persuna tjeežca. Nižaza čhjetintiquiztan Moisés mantitacama paa. Jaknužt Moisesqui ofrenda uchajo mantičhaja, jalla nuž ofrenda uchaquiča. Jalla nižtiquiztan žoñinaca am žejtchi zizaquiča. Jazic oka amqui. —Nuž mantichiča Jesusaqui.

¹⁵ Jalla nuž ana chiyajo mantichiž cjenami, Jesusiz paata puntu juc'anti juc'anti par-lita cjijsiča tjapa kjutñi žoñinaczquin. Jalla nii quintu nonžcuqui, ju'anti žoñinacaqui ajcsquichiča Jesusiz taku nonzjapa. Nižaza laanacami ajczquichiča Jesusaž čhjetinta cjijsjapa.

¹⁶ Jalla nižtiquiztanaqui Jesusaqui nii žoñinaczquiztan zarakžcu ana žoñinacz žejlz yokquin ojčkichiča. Jalla nii yokquin Yooz Ejpžquin mayizichiča.

ZUCH ZOÑI CHJETINTA

¹⁷ Tsii nooj niž wiruñ Jesusaqui tjaajnatča. Jalla niiran fariseo cjita žoñinacaqui julzi želatča, nižaza judiuz kamañ lii tjaajñi žoñinaca želatča. Jalla ninacaqui tjapa Galilea watjanacquiztan tjonchiča, nižaza Judeaquiztan, nižaza Jerusalenquiztan. Nižaza Jesusaqui laa žoñinaca čhjetincan, Yooz azi tjeeziča.

¹⁸ Jalla nekztanaqui tsjii kjaž žoñinacaqui tsjii zuch žoñi zjjicchiča tjaz zquitquiz callžcu. Irantžcu kjuyquiz majcz pecatča. Jesusiž yujcquiz nonzinz pecatča.

¹⁹ Pero muzpa žoñinacacaz ajcsiž cjen, ana Jesusižquin macjati atchiča. Nekztanaqui kjuya yawžcu, tsewctan kjuya pjetchiča, tejanaca apakžcu. Pjetquiztan nii zuch žoñi tsewctan kjuylichuc majcchiča tjaz zquitquiz callžcu. Kjuytlan žejlñi žoñinacž taypi nuž Jesusiž yujcquin apjatchiča.

²⁰ Ninaca tjapa kuztan tjonchi nayžcu Jesusaqui laa žoñžquiz cjichiča:

–Jilala, jaziqui am ujnacaqui pertuntača.

²¹ Jalla nekztanaqui judiuž kamañ lli tjajañinacžtan fariseonacžtan kuzquiz pinsi kallantichiča, tuž cjan: “Žject tii žoñejo? Žkjažtiquiztan nižta chiijo? Yooz quintra anawalipanla tii žoñž takuqui. Žject ujnaca pertunasajo? Yoozpanikazla ujnacaqui pertunñiqui”. Jalla nuž pinsichiča nii žoñinacaqui.

²² Jesusaqui persun kuzquiz ninacaz pinsita naychiča. Nekztan ninacžquiz paljajchiča, tuž cjan:

–Žkjažtiquiztan anchuca kuz nižta pinsejo?

²³ Žjaksilta takut pjasila chiiz cjesajo? Tii zuch žoñžquiz chižinsjo, “Am ujnacami pertunta”, žcjis pjasila cjesaj? už “Tsijsna. Am tjaz zquiti aptižcu oka”, žnuž chiiz pjasila cjesaj?

²⁴ Tsewctan cuchanžquita Yooz Žoñčha wejrqui. Tii muntuquiz jiliritča, ujnaca pertunzjapa. Razunal chiyučha. Jalla nii zizjapa ančhucqui tiž chera.

Nekztanaqui zuch žoñžquiz cjichiča:

–Amquiz cjiwčha, tsijtsna. Am tjaz zquitinaca aptaza. Oka am kjuya. –Nuž cjan chiichiča Jesusaqui.

²⁵ Nii orapacha nii zuch žoñiqui tsijtsiča, žoñinacaz cheranpacha. Tjaz zquiti aptižcu, persun kjuya ojkičiča. Yooz honora waytican ojkičiča.

²⁶ Jalla nižta cheržcu tjapa žoñinacaqui walja ispantichi quirchiča. Ekekscan ninacaqui Yooz honora waytichizakazza. Nižaza ninacpora parlassizakazza:

–Tonj tjuñiqui walja ispantichucanaca cherchinčhumča.

LEVI CJITA ŽOÑIQUI JESUSIZQUIN KUZZIZ CJISSICHA

²⁷ Jalla nekztanaqui Jesusaqui ulanchiča. Jalla nuž ulanžcu tsjii Levi cjeta žoñi cherchiča. Impuesto cobriñi žoñitacha niiqui. Impuesto cobriñi puestuquiz julzi želatča žoñinacžquiz cobrican. Jesusaqui nii žoñžquiz cjichiča:

–Wejttanž ojkla.

²⁸ Nekztanaqui Levi cjeta žoñiqui tsijtsiča. Impuesto cobriz langz apatatžcu, Jesusižtan chica ojkičiča.

²⁹ Nekztanaqui Jesusižtan pijjsta paazjapa, Leviqui persun kjuyquiz zuma čjjeri tjacziča. Čjjeri lujlcan Jesusaqui impuesto cobriñinacžtan nižaza yekja ujchiz žoñinacžtan chica julzi želatča.

³⁰ Jalla nii cheržcu, fariseo žoñinaca nižaza judiuž lli tjajañi maestrucan jalla ninacaqui Jesusiž tjajjinta žoñinacžquiz chuchi kallantichiča, tuž cjan:

–Žkjažtiquiztan impuesto cobriñinacžtanami ujchiz žoñinacžtanami čjjeri lujl ančhucjo?

³¹ Nekztanaqui Jesusaqui nuž nonžcu kjaaziča ninacžquiz, tuž cjan:

–Wiw žoñinacaqui kullñi žoñi anaž pecasača. Antiz laa žoñinacaz pecchiya.

³² Wejrqui “zumal kamuča” cjiñi žoñinacžquiziqui anal kjawžñi tjonchinča. Antiz “ujchizpanča” cjiñi žoñinacžquiz kjawžñi tjonchinča, ninaca Yoozquin kuzziz cjisjapa.

AYUNAS PUNTU

³³ Jalla nekztanaqui žoñinacaqui Jesusižquiz chiichiča, tuž cjan:

–Juanž tjajjintanacami fariseož tjajjintanacami walja ayunasñiča. Y nižaza ninacž cuzturumpi jaru walja Yoozquin mayiziñiča. Pero amiž tjajjinta žoñinacazti ana ayunasñipanla. Žkjažtiquiztan nižtajo? Čjjeriž lujlžla, nižaza mazk'a kjaž licžla, nižtakazla. –Nuž cjan uj tjojtunz pecchiča nii žoñinacaqui.

³⁴ Nekztanaqui Jesusaqui ninacžquiz kjaaziča, tuž cjan:

–Zals pijjstiquiz žoñinacaz impittaž cjenaqui, žkjažt zalsni žoñžtajapa ayunasasajo? Nii zalsñi žoñi želanpacha anaž ayunasasača.

³⁵ Tii jarquin nii zalsni žoñž kjañtaž cjen, jalla nekztanž ayunasasača.

³⁶ Tsji taku chiichizakazza, tuž cjan:

–Anaž jecmi tsji ew zquitquiztan riminta apakasača, tsjelanzi zquiti rimintisjapa. Jalla nuž paaquž niiqui, nii ew zquiti pertisnaquiča. Nižaza nii ew riminta apjattaqui tsjel zquitquiztan tsjemata cjequičha.

³⁷ Nižaza anaž jecmi tsjii zijzi zkiz luusquiz ew vino alznasača. Nižta alznasaž niiqui, zkiz luus wjajrskatasasča ew vinuqui. Nekztanaqui zkiz luusmi vinumi pizcpacha pertinasasča.

³⁸ Ew vinuqui ew zkiz luusquizpanž alznasača. Nekziqui zkiz luusmi vinumi zuma-panž cjesasča.

³⁹ Y nižaza t'amchi vinu licžcu, anaž ew vinu pecasasča. "Wejta t'amchi vinuqui walikazza", cjan cjequiča. Nižtazakaz zoñinacaqui Yooziž tjaata ew kamaña ana pecasasča.

6

TSJII JEEJZ TJUŇQUIZ WATTA

¹ Tsjii jeejz tjuŇ nooiqui Jesusaqui zkal taypiranž okatča niiz tjaajnta zoñinacžtan. Jalla nuž ojkan niiz tjaajnta zoñinacaqui tric oza kjajpchiča. Nuž kjajpžcu kjaržtan kojchiča. Nekztan lujlchiča.

² Nii cheržcu tsjii kjažultan fariseo zoñinacazti ninacžquiz pewcziča, tuž cjan:

—Zkjažtiqiztan ančhucqui nižta paajo? Jeejz tjuŇquiziqui nižta anapanča paazqui. Učhum lii quintrala, žana jaa?

³ Nekztanaqui Jesusaqui ninacžquiz kjaaziča, tuž cjan:

—Ančhucqui Yooz taku liichinčhucpanča, žana jaa? Cjijrta Yooz takuqui tuž cjiča: učhum David cjeta tuquita atchi ejpqui niiz mazinacžtan čheri eecskatchiča.

⁴ Čheri eecznanaqui arajpach Yooz timpluquin luzziča. Nicju Yooz yujcquiz nonžta t'antanaca želatča. Jalla nii t'anta aptižcu, lujlchiča. Nižaza niiz mazinacžquiz to-junchiča. Anapantasča permitta nii t'anta lujlsqui ina zoñžlaqui. Nižta lujlžcuqui, lii quintrala niiqui. Timplu jilirinacžtapankaz nii t'anta lulaj cjetaqui.

⁵ Nižaza Jesusaqui ninacžquiz cjichiča:

—Wejrqui tsewctan cuchanžquita Yooz Zoñtča. Jeejz tjuŇquizimi čhju lu paaz cjenami mantasasča. —Nuž cjichiča Jesusaqui.

KJARA KJOŇCHI ZOŇI ČHJETINTA

⁶ Niiz wiruŇ jeejz tjuŇquiziqui Jesusaqui luzziča judionacž ajcz kjuyquiz. Jalla nii ajcz kjuyquin tjaajni kallantichiča. Nicju tsjii zoñi želatča žew kjara kjoŇchi.

⁷ Nižaza judiuz lii tjaajniinacžtan, fariseonacžtan želatča. Nii zoñinacaqui Jesusaž awayt'atča, jeejz tjuŇquiziqui čhjetnaqui anaž čhjetna, jaa, jalla nii. Jalla nuž awayt'atča, Jesusiž quintra nii jaru aptisjapa.

⁸ Pero Jesusaqui nižta ana wali pinsitanaca kuzquiz naychipanča. Jalla nekztanaqui kjara kjoŇchi zoñžquiz paljaychiča, tuž cjan:

—Tsijsna. Tii taypiquin cjisna.

Nuž chiitiquiztanaqui nii zoñiqui nii taypiquin tsijsiča.

⁹ Nekztanaqui Jesusaqui parti zoñinacžquiz paljaychizakazza, tuž cjan:

—Wejrqui ančhucquiz tsjii pewcsnasača. Žeejz tjuŇquiziqui učhum liiqui kjažt cjejejo? zoñžquiz zuma paasaya uz zoñžquiz ana zuma paasaja. Zoñž wira liwriyasaya uz zoñž wira ticskatasaja. Ančhucqui zumpacha zizza, zuma paazqui učhum lii jaruča jeejz tjuŇquizimi. —Jalla nuž cjan, chiizinchiča Jesusaqui.

¹⁰ Jalla nekztanaqui Jesusaqui niiz muytata žejlŇi zoñinacž kjutŇi chercherziča. Nekztan kjara kjoŇchi zoñžquiz cjichiča:

—Am kjara chjinzna.

Nii zoñiqui nuž kjara chjinžcu niiz kjara žejtchi quirchiča.

¹¹ Quintra zoñinacazti nii cheržcu walja žawjchiča Jesusiž quintra. Jalla nekztanaqui ninacpora pewcsarasiča, jaknužt Jesusiž quintra paa-as, jalla nii.

TUNCAPAN APOSTOLONACA ILLZTA

¹² Niiz wiruŇaqui Jesusaqui tsjii curullquin ojkičiča Yooz Ejpžquin mayizi. Ween pakara Yooz Ejpžquin mayizichiča.

¹³ TjuŇiž tjewctanalla, niiz tjaajnta zoñinaca kjawziča. Kjawžcu, Jesusaqui tuncapani illziča niiz mantita apostolonaca cjisjapa.

¹⁴ Nii illzta apostolonacaqui tuž cjeta tjuunacchiztasča: Simonatača; nižaza niiz tsjii tjuuqui Pedro cjitazakaztasča. Andreštasča, Simonž lajk Jacobotasča. Juantasča. Felipetasča. Bartolometasča.

¹⁵ Mateotasča. Tomasatasča. Jacobotatasča; niiqui Alfeo cjeta zoñž majchtasča. Simonatasča, nižaza niiqui Canaan t'akquiztantasča.

¹⁶ Judatasča, Jacobž lajk; nižaza Judas Iscariotitasča; jalla niiqui Jesusiž quintra tarazunchiča.

¹⁷ Jalla nektzanaqui Jesusaqui niiz illztanacžtan chjiwžquichiča curullquiztan. Pampiquin irantižcu, niiz tjaajinta zoñinacžtan tsijtsiča. Nicju wacchi zoñinaca želatča, tjapa kjuttan Judea yokquiztan, nižaza Jerusalén wajtquiztan, nižaza Tiro yokquiztan, nižaza Sidón yokquiztan, jalla nii yokanacquiztan tjonchiča. Nii zoñinacaqui Jesusiž takunaca nonžni irantižquichiča. Yekjapanacaqui tjonchiča laanacquiztan čhetinta cjisjapa.

¹⁸ Nižaza yekjapanacaqui tjonchiča zajranacaž tantiquiztan liwriita cjisjapa. Jalla nektzanaqui Jesusaqui ninaca čhetinčiča.

¹⁹ Jesucristuqui čhetin azziztača. Nižaza Jesusaqui tjapa nii žejlñi laanaca čhetinčiča niiz aztan. Tjappacha laa zoñinacaqui Jesusa lanž pecatča, čhetinta cjisjapa.

JESUSIŽ TJAAJINTANACA

²⁰ Nektzanaqui Jesusaqui niiz tjaajinta zoñinacž kjutñi cherziča. Nektzan paljajčiča, tuž cjan:

–Ančhucqui porinaca, Yooz mantita zuma kamañauqui ančhucaltajapacha. Jalla nižtquiztan cuntintuž cjee.

²¹ Čheri eecšninaca, wiruñ Yoozqui ančhucquiz wali cjiskataquiča, tsjii čheržtan chjekchižtakaz. Jalla nižtquiztan cuntintuž cjee.

Llaquitanaca, anzic ančhuc kaathan. Wiruñauqui ananiž čipchipaquiča. Jalla nižtquiztan cuntintuž cjee.

²²⁻²³ Ančhucqui, Yooz Majchquin sirwiñi zoñinacžhucča. Quintra zoñinacaqui ančhucquiz chjaawjkatča. Nižaza jakurpayaquiča. Nižazaž ch'anaquiča. Nižaza iñaraquiča. Ančhucquiz ana zumapanž nayaquiča. Jalla nuž cjenami ancha cuntintuž cjee. Ančhuczi arajpachquin ojžžcu, wali kamañ wira tanzaquiča, tsjii chawc premiužtakaz. Nižtapan tuquitanpacha tii zoñinacž tuquita atchi ejpnacaqui Yooz sirwiñi profetanacžquiz chjaawjkatñipantača. Jalla nižtquiztan anziqum cuntintuž cjee.

²⁴ Ančhucqui ricachunaca, cuntintukaz tii wirquiz kamchinčhucča. ¡Wiruñ anawali-panž ančhucquiz wataquiča!

²⁵ Ančhucqui zuma cusasanacchiz kamchinaca, porižtakaz cjisnaquiča. Yoozquin ana cjuñiž cjen t'akjiriž cjisnaquiča. Ana walinacquiztan čipchinaca tsjii noojiqui ananiž kaaquiča nižaza llaquitaž cjequiča.

²⁶ Ančhucqui, Yooz taku čhiitažoka cjiñi žoninacžhucča. Tjapa zoñinacaqui ančhucua honora waytaquiz niiqui ančhucquiz juc'ant anawaliž cjequiča. Tuquitanpacha tii zoñinacž tuquita atchi ejpnacaqui nižtapan honora waytichiča toscara čhiičhiñinacžquiz.

QUINTRA ZOÑINACŽTANAMI ZUMA KUZZIZPANŽ CJEE

²⁷ Ančhucqui, wejť taku nonžñinaca, ančhucquiz tuž cjiwča: Ančhucua quintra zoñinacžtanami zuma kuzzizpanž cjee. Y nižaza zumapanž ninacžtan paa, nižaza ančhucua chjawjkatñinacžtanami zumapanž cjee.

²⁸ Nižaza ančhucua quintra laykiñi zoñinacžquiz zuma tawkžtan paljaya ančhucqui. Nižaza ančhucua iñariñi zoñinacžtajapa zuma tawkžtan Yoozquin mayt'izina.

²⁹ Jakziltamiž am yujcquiz kichasaž niiqui, ana nižtapacha amqui kicha. Anača cutjatžqui. Nižaza jakziltamiž am ira kjañasaž niiqui, nii kjañaj cjee.

³⁰ Nižaza jakziltamiž amquiztan mayi tjonasača, nuž tjaa. Jakziltamiž amquiztan kjañasača, nuž kjañaj cjee. Anam amqui quijjasača.

³¹ Jaknužť ančhucqui parti zoñinaca ančhucatan zuma kamž pecħhaj niiqui, jalla nižtapacha ančhucqui zoñinacžtan zuma kama.

³² Yekjapanacaqui ančhucatan zumaž munaziča. Ančhucqui ninacžtan alajapankaz zuma munazaquiz niiqui, žkjažtquiztan ančhucqui “Zumal paa-uča” cjan chiyasajo? Nižta iratazakaz paača anawal kuzziz zoñinacami.

³³ Yekjapanacaqui ančhucquiz yanapča. Ančhucqui ninacžtan alajapankaz yanapaquiz niiqui, žkjažtquiztan ančhucqui “Zumal paa-uča” cjan chiyasajo? Nižta iratazakaz paača anawal kuzziz zoñinacami.

³⁴ Yekjapanacaqui ančhucquiz onza. Ančhucqui ninacžtan alajapankaz onznaquiz niiqui, žkjažtquiztan ančhucqui “Zumal onžuča” cjan chiyasajo? Nižta irata zakaz paača anawal kuzziz zoñinacami. Nektzan tsjii onžnižakaz tjewza.

³⁵ Pero ančhucqui quintra zoñinacžtanami zuma munazizpanž waquiziča. Nižaza ančhucqui quintra zoñinacžquizimi yanapž panž waquiziča. Nižaza ančhucqui onžcumi anaž tjewž waquiziča “Niimiž onž, jaa” cjanauqui. Jalla nuž kamtiquiztanauqui Yoozqui ančhucquiz tsjii pajk honora tjaaquiča. Nižaza nuž kamtiquiztan ančhucqui tjeeža werar arajpach Yooz maatinacaž, nii. Nižaza nuž kamcanaqui Yooz irataž kamča. Yoozqui okžñizakazza quintra zoñinacžquiziqui.

³⁶ Yooz Ejpqui walja okžñipanča. Nižta irata ančhucqui okžni kuzziz cjee.

ZUMA KAMAQUICHA

³⁷ Ančhucalaqui anača zoñinacž uj paatanaca chii chiizqui. Jalla nuž žoninacž uj paatanaca chii chiyaquiz niiqui ančhucqui juc'ant ujchiz cjequičha Yooz yujcquiziqui. Nižaza zoñinacžquizimi “Amqui Yooziž castictaj cjila”, cjican chiyaquiz niiqui ančhucqui Yooziž casticta zakaz cjequičha. Nižaza jakzilta zoñit ančuca quintra uj paačhaja, jalla niizquiz nuž tuptalla zakaz Yoozqui tjaaquičha. Nekztan Yoozqui ančucaquiz ujnaca zakaz pertunaquičha.

³⁸ Ančhucqui okžni kuzziz zoñinacžquizimi tjaa. Jalla nuž tjaan Yoozqui ančucaquiz juc'anti tjaaquičha. Jalla tuž Yoozqui tjaaquičha. Ančuca quelzquiz chjijpi tjaaquičha. Tsajtscu tsajtscu nižaza walja kala ts'aczu tjaaquičha. Jakziltat tuptalla tjaachaja, jalla niizquiz nuž tjuptalla zakaz Yoozqui tjaaquičha. Nižaza jakziltat čhuñi kuzziz tjaachaja, jalla niizquiz nuž čhuñi zakaz Yoozqui tjaaquičha.

³⁹ Jesusaqui tsjii takunacžtan chiichiča, tuž cjican:

—Čkajužt zur zoñiqui yekja zur zoñi irpiñižtakaz zuma chjichasajo? Pucultanpachaz ojtquiz tjojtsnasacha. Jalla nižtaž ana zuma cjcijni zoñinacaqui.

⁴⁰ Tsjiiilla cjesacha. Tsjii tjaajinta zoñiqui niiz tjaajinižquiztan anaž juc'anti cjesacha, aunquimi istutižcu tjaajini maestrujanikaz cjequičha. —Jalla nuž tjaajinchiča Jesusaqui.

UJ PUNTUQUIZTAN

Nižaza Jesusaqui tjaajinchiča, tuž cjican:

⁴¹ —Amqui am jilž čhujcquiz tsjii cjujchilla cherasaž niiqui, čkjažtiquiztan am persun čhujcquiz pajk cjujchi ana cherjo?

⁴² Am persun čhujcquiz nii pajk cjujchi ana cherasaž niiqui, čkjažtiquiztan am jilžquiz chijjo, “Jila, am čhujcquiztan nii cjujchilla apakžinača”, cjicanajo? Ana zum zoñičha amqui. Primeruqui am persun čhujcquiztan pajk cjujchi apakalla. Nekztan zuma cherasacha. Y nižaza am jilž čhujcquiztan cjujchilla apakasača. —Jalla nuž tjaajinchiča Jesusaqui uj puntuquiztan.

ZOÑINACAQUI PAJTAZ CJESACHA NINACZ KAMTIQUIZTAN

⁴³ Nižaza zoñinacž kamañ puntuquiztan Jesusaqui tjaajinchiča tuž cjican:

—Tsjii zum muntiquiztan ana zum frutanaca anawira pookasača. Nižaza tsjii ana zum muntiquiztan zum frutanaca anazakaz pookasača.

⁴⁴ Nižaza zapa muntinaca niiz frutanacquiztan pajza. Jalla nižtiquiztan tsjii ch'ap muntiquiztan higo fruta anaž pooki atasacha. Nižaza tsjii ch'ap muntiquiztan uwas fruta anaž pooki atasacha.

⁴⁵ Tsjii zuma kuzziz zoñiqui zuma takunaca paljayñipanča. Tsjii ana zuma kuzziz zoñizti ana zuma takunaca paljayñipanča. Jaknužt kuzquiz pinsičhaja, jalla nuž chiča zoñinacami.

⁴⁶ Jesusaqui cjichizakazza:

—Ančhucqui anaž weriž čhiitacama kamča. Jaziqui, čkjažtiquiztan ančhucqui wejt tjuu aynakjo, wilitajo, “Wejt Jiliri, wejt Jiliri”, cjicanajo?

⁴⁷ Yekjap zoñinacazti wejtquin tjonžcu wejt takunaca tjapa kuz nonža Nižaza weriž čhiitacamaž kamča. Jalla tižtaž nii zoñiqui.

⁴⁸ Jalla nii zoñiqui kjuya kjuyčičha. Primeraqui yoka jwetchičha, maz zalzjapa. Nii mazquin zalzcu, jalla nii maz juntuñ čhuzičha nii kjuy simintu. Nekztan kjuya pirkichičha. Wiruñaqu tsjii puju kjaz chjijpi ojkcichha, walja pjatsi. Nekztanaqui nii kjazqui ojkcichha, kjuya t'eznata. Pero anapan t'ezni atchičha. Nii kjuyaqui maz juntuñ kjuytatača.

⁴⁹ Yekjap zoñinacazti wejt taku ana tjapa kuz nonža. Nižaza weriž čhiitacama anaž kamča. Jalla tižtaž nii zoñiqui. Jalla nii zoñiqui kjuyazakaz kjuyčičha, ana maz simintuchiz. Wiruñaqu nižazakaz tsjii puju pjatzi, kjazqui kjuya t'ezinsjapa ojkcichha. Nekztanaqui nii kjuyaqui ezziča. K'ala kuztača. Jalla nižtaž nii ana weriž čhiitacama kamni zoñiqui.

7**TSJII ČHJETINTAQUI**

¹ Jesusaqui nuž paljayz žeržcuqui, Capernaum cjita watja ojkcichha.

² Nicju tsjii romano zultat jiliri želatča. Niiž anča zuma piyunaqui anča laatača, ticzmayatača.

³ Nii zultat jiliričha Jesusiž quinto zizcu, tsjii kjažtultan judionacž jilirinaca cuchanžquičičha, Jesusižquiz rocžcajo niiz piyuna čhjetnajo.

⁴ Jalla nekztanaqui mantita zoñinacaqui Jesusižquiz macjatchičha. Nekztanac anča roct'ichičha, tuž cjican:

—Tii zultat jiliriqúi ancha zumačha. Jalla nižtiquiztan yanapchucapančha.

⁵ Učhum watja walja rispitičha. Nižaza tsjii učhumž ajcz kjuya kjuykatchičha niiqui.

⁶⁻⁷ Nekztanaquí Jesusaqui nii rocñinacžtan ojkchičha. Kjuya žcati cjsnan, nii zultat jiliriqúi tsjii niž mazinaca cuchanžquichičha, Jesusižquiz čhii, tuž cjan:

—Wejt jiliri, am yujcquizic anal waquizučha, am wejt kjuyquiz luzajo. Wejrqui persunpacha eksinčha am kjuri ojktžapa. Am ojczqui ch'amaž cjesačha. Tekztanpacha tsjii taku chiyalla. Nuž amiž čhiitiqiztanac zetaquičha wejt piyunaqui.

⁸ Wejrmi wejt jiliriž mantitacama ojklayičha. Nižaza wejt zultatunacaqui weriž mantitacama ojklayičha. Jaziqúi tsjiimil mantučha, “Oka” cjan. Nekztan ojkčha. Nižaza tsjiimil kjawznučha. Nekztanac tjončha. Nižaza tsjiimil mantučha, “Tižta paa” cjan. Niimi zakaz paačha. Nižtazakaz amqui mantasačha, wejt piyuna zetajo.

⁹ Jalla nižta taku nonžcu, Jesusaqui, čhiičičha:

—Cusapachaz čhičha nii žoñiqui, —cjan.

Nekztanaqui apšni žoñinacž kjutni chersičha. Cheržcu tuž cjichičha:

—Chekapan tii žoñiqui juc'ant Yoozquin kuzzizza tjapa Israel wajtchiz žoñinacžquiztanami.

¹⁰ Nii jiliriž cuchanta žoñinacaqui jiliriž kjuya irantižcu chekapan laa piyuna žejtchi zalchičha.

TSJII ZOŇI JACATATCHI

¹¹ Wiruñaqúi Jesusaqui tsjii Naín cjita watja ojkchičha, niž tjaajinta žoñinacžtan nižaza tama žoñinacžtan.

¹² Wajt žcati irantižcu, tsjii alma callni cherchičha. Jalla nii ticziqúi zinta maatitačha. Niiž maaquí žewtačha. Walja nii wajtchiz žoñinacaqui cumpaňtatičha.

¹³ Cheržcu, Jesucristu Jiliriqúi naa maatak žonaquiz okzičha, tuž cjan:

—Ana kaa amqui.

¹⁴ Nekztanaquí Jesusaqui žcatžinchičha. Almiž cajuna lanzičha. Alma callñinacaqui nužquiz tsjisičha. Nekztanaquí Jesusaqui ticzi žoñžquiz cjichičha:

—Jilala, amquiz cjiwčha, “Zaažna”.

¹⁵ Jalla nii čhiitiqiztanaquí nii ticzi žoñiqui zaazičha. Nekztanac čhii kallantichičha. Nekztanaquí Jesusaqui niž maaquiz intirjichičha.

¹⁶ Jalla nuž cheržcu, tjappacha tsucchičha. Nižaza tjappacha Yoozquin honora waytichičha, tuž cjan:

—Učhum wajtquizpacha tsjii chawc Yooziž cuchanžquita žoñiqui jecsila, oré. Yoozqui niž wajtchiz žoñinaca yanapi tjonchičha.

¹⁷ Jalla nekztanaquí tjapa Judea yokaran nižaza nii yok tjiyaran Jesusiž zuma paata quintu ojkchičha.

JUAN BAUTISTAQUI JESUCRISTUZ PUNTU ZIZ PECCHICHA

¹⁸ Juan Bautistaž tjaajinta žoñinacaquí nii žoñi jacatatchi quintu quint'ichičha Juanžquiz. Jalla nižtiquiztan Juanqui Jesusiž quintu zizzakazza. Nekztanaquí pucultan niž tjaajintanaca kjawzičha.

¹⁹ Nekztan Jesusižquin cuchanžquichičha, nižquin pewcznajo, tuž cjan:

—Cristuquí tjonitaž cjila. ¿Amqui Yoozquiztan cuchanžquita Cristumpankaya; uz yekjaž tjonasaj?

²⁰ Juanž cuchanta žoñinacaquí Jesusižquin žcatžinchičha. Jalla nekztanaquí irantižcu, cjichičha:

—Juan Bautistaquí wejrnacž cuchanžquičha amquiz pewcznajo: “Cristuquí tjonitaž cjila. ¿Amqui nii Cristumkaya, uj yekjaž tjonasaj?”

²¹ Nii orapacha nuž irantitiquiztan Jesusaqui walja žejlñi laanaca čhjetinchičha. Nižaza zajraž tanta žoñinaca čhjetinchičha. Nižaza zur žoñinacž čhjujquí čhjetinchičha.

²² Jalla nekztanaquí Jesusaqui ninacžquiz kjaazičha, tuž cjan:

—Juanžquin quepa. Amiž chertanaca nonžtanaca quint'izca. Weriž paatanaca mazca. Zur žoñinaca cheržni cjisila. Nižaza coj žoñinaca zuma kjojchchiz ojklayi čjisila. Nižaza mojkchi janchichiz žoñinacami zuma janchichiz žejtchi čjisila. Nižaza oñ žoñinacami nonžni čjisila. Nižaza ticzi žoñinaca jacatatchi čjisila. Nižaza pori žoñinacžquiz Yooz liwriñi taku paljaytapančha.

²³ Jakziltat weriž paatanaca, čhiitanaca nonžcu ana kuz turwayzižlaj niiqui, walipanikaz cjequičha.

JUAN BAUTISTAZ PUNTU

²⁴ Juanž cuchanžquita žoñinacž ojktan, Jesusaqui Juanž puntuquiztan čhiičičha. Tjapa žoñinacžquiz tuž cjichičha:

—Ĉĥjulu ch'ekti yokquin chertzni ojkchinĉuctaya? ĈTsjii tjamiĝ tjizinta kalu chertzni ojkchinĉuctaya? Anapanĝ jaz.

²⁵ ĈTsjii finu zquitchiz zoĝni chertzni ojkchinĉuctaya? Anapanĝ, jaz. Finu zquitchiz zoĝinaca chawc jilirĝ kjuyquiz ĵejlĉha. Niĝaza wali jiru kamĝi cusasanacĉiz zoĝinaca chawc jilirĝ kjuyquiz ĵejlĉha.

²⁶ Nekztanac, ĉĉjulu chertzni ojkchinĉuctajo? Yooz taku paljayĝi profeta chertzni ojkchinĉucĉha. Nuĝupancha. Juanqui Yooz yujcquiz juc'antiĉha parti Yooz taku paljayĝi profetanacĝquiztanaqui.

²⁷ Juanĝ puntuquiztan Yooz tawk libruquiz cjjirtaĉha tuĝ cĝican:

“Yooz Ejpqui tsjii zoĝni cuchanĝcaquiĉha ima Cristuĝ Yooz taku paljayi ojklayan. Nii zoĝi qui Israel zoĝinacĝquiz Cristo zuma tjewskataquiĉha”.

²⁸ Juan Bautistaĉha parti zoĝnĝ maati quiztan tsjan juc'antiqui. Pero tjapa Yoozquin kuzziz zoĝimi Yooz maati cjequiĉha. Ĉjul Yooz maatimi zoĝnĝ maati quiztan tsjaa juc'antiĉha. — Jalla nuĝ cĝichiĉha Jesucristuqui.

²⁹ Jalla nuĝ nonĝcuqui tjapa Juanĝ bautistaĝ zoĝinacami cĝichiĉha:

—Zumapanĉha Yooz Ejpqui, —cĝicanaqui. Nuĝuzakaz cĝichiĉha impuesto cobriĝi zoĝinacami, Juanĝ bautista cĝicanaqui.

³⁰ Pero fariseo zoĝinacazti judioĝ lli tjajjiĝnacĝtanpacha Yoozquin kuzziz puntuquiztan ĉiĝizinta ana juyzu paachiĉha. Niĝaza Yooziĝ cuchanĝquita Juan Bautista ana rispitchiĉha. Niĝti quiztanaqui ana Juanĝ bautistataĉha.

³¹ Jesucristo Jiliriqui cĝichiĉha:

—Ĉkjaĝtat tii timpuquiz ĵejlĝi zoĝinacajo? ĈJectnaca iratatajo tinacajo?

³² Ocjala irataĝ tiinaca, ĉana jaa? Ocjalanacaqui palazquin uzincan niĝ mazinacĝquiz altu tawkĝtan kjaw kjawĉha, tuĝ cĝican: “Wejrnacaĝ pincallu pjuĝtan, ana tsajtĉinĉucĉha anĉucqui. Wejrnacaĝ llaquita itsan, ana kaachinĉucĉha”. Jalla niĝta ocjala irataĉha tii timpuquiz ĵejlĝi zoĝinacaqui.

³³ Ĉkjaĝti quiztan niĝta iratajo? Juan Bautistaqui tjonĉiĉha. T'anta ana lujlĝitaĉha. Vinumi ana licĝitaĉha. Jalla niĝti quiztan anĉucqui ĉiĝinĉinĉucĉha: “Zajriĝ tantĉha niĝi”, cĝican.

³⁴ Wiruĝaqui wejrqui tjonĉinĉha. Ĉjulumi lujlĉinĉha. Niĝaza ĉĥjulumi licĉinĉha. Jalla niĝti quiztan anĉucqui wejt quintra ĉutĉha: “Walja lujlĝiĉha licĝiĉha tiĝi. Jalla tiipanĉha ujĉiz zoĝinacĝ mazi quiya, niĝaza impuesto cobriĝinacami”. Nuĝ ĉiyiĝinĉucĉha.

³⁵ Tuĝ zakal cĝiwĉha: Yooz puntu zuma zizĝi zoĝinacaqui Yooz tjajinta puntu tjeĝa.

JESUSAQUI TSJII FARISEO ZOĝNĝ KJUYQUIN LUJLĉHICHA

³⁶ Wiruĝaqui tsjii fariseo zoĝi qui Jesusa luli kjawziĉha. Nekztanaqui niĝ kjuya ojkĉiĉha Jesusaqui. Niĝ kjuya irantiĝcu misquiz julziĉha lujljapa.

³⁷ Nii wajtquizpacha tsjaa anĉa ujĉiz maatak ĝonqui ĵelatĉha. Jesusa luli ojkĉi quinto zizcu, fariseo zoĝnĝ kjuya irantiĝquichiĉha alabastro cĝita maz putillĝtan. Nii putillaqui zuma uluraz aceiti ĉĝijpitaĉha.

³⁸ Niĝaza naaqui anĉa kaacan Jesusiĝ kjoĝĉ latuquiz julzinĉha. Jalla nekztanaqui naaĝa ĉĥjuc kaj ĉĥojcan Jesusiĝ kjoĝĉ awjzĝi kallantĉinĉha. Nekztan naaĝa persun ĉarĝtan Jesusiĝ kjoĝĉa ĉĥujzinĉinĉha, zuma kjoĝipacha. Nekztan Jesusiĝ kjoĝĉa ĉĥulsinĉha. Nekztanaqui Jesusiĝ kjoĝĉquiz nii zuma uluraz aceitiĝtan tĝajlzinĉinĉha.

³⁹ Jalla nuĝ ĉerĝcuqui, fariseo impitĝi zoĝi qui persun kuzquiz pinsichiĉha, tuĝ cĝican: “Tii zoĝi qui ultim werar Yooz taku paljayĝi zoĝiĝlaz niĝi, tiĝi qui zizkalal, taa maatak zoĝi anĉa uj payiĉha, jalla nii. Taa zoĝti tiĝ kjoĝĉa zakal lanlanzla”.

ĈJAKZILTAT JUC'ANTI YOOZQUIN KAACHIĝI ĈJESAYA?

⁴⁰ Jalla nekztanaqui Jesusaqui fariseo zoĝi quiz cĝichiĉha:

—Simona, amquiz tsjii taku ĉiyasaĉha.

Nekztan nii Simoĝ cĝita fariseuqui kjaaziĉha, tuĝ cĝican:

—Tjajjiĝi, wejtquiz ĉiyalla.

⁴¹ Jalla nekztanaqui Jesusaqui cĝichiĉha:

—Tsjii pucultan zoĝi qui denario cĝita paaz kajataĉha. Tsjii zoĝi qui 500 denario cĝita paaz kajataĉha. Tsjii zuĝti 50 denario kajataĉha.

⁴² Jalla nekztanaqui nii pucultanaqui ana wira pjoĝki atĉiĉha. Niĝtami ana wira pjoĝki atĉiĝ cĝen nii kajĝi zoĝi qui nii pucultan zoĝinacĝquiz cĝichiĉha: “Anĉucaĝ kajĝta paazqui anal cobraĉha. Jaziĝi nuĝquizpanikal pertunaĉha”.

Nekztanaqui Jesusaqui fariseo zoĝi quiz pewcziĉha, tuĝ cĝican:

—Jaziĝi kjaaznalla amqui. ĈJakziltat nii pucultan zoĝi quiztan nii ana cobriĝi zoĝi quiz juc'anti k'aachiĝi ĉjesaya?

⁴³ Jalla nekztanaqui Simoĝ cĝita fariseuqui kjaaziĉha, tuĝ cĝican:

—Nii pajk kaja ana cobrita zoñiqui juc'ant k'aachiñi cječhani.

Nekztanaqui Jesusaqui cjichiča:

—Razunam chiiča.

⁴⁴ Nekztanaqui naa maatak zona kjutñi cheržcu Jesusaqui Simonžquiz cjichiča:

—Wejrqui am kjuya luzquichinča. Amqui anam kjaz onanchamča, tii wejt kjojcha awjzjapa. ¿Taa maatak žon cherkay? Taa maatak žonzi persun čhjujz kajlliztan wejt kjojcha awjzinča. Nekztanaqui persun charžtan čhjujzinča.

⁴⁵ Amqui wejtquiz anam čjulzamča. Naazti nuž luzcu wejt kjojchami čjul čjulžinčinča.

⁴⁶ Amqui wejt achquiz ana aceitimi alzinčamča. Naazti wejt kjojchquizimi zuma uluraz aceite alzinča.

⁴⁷ Jalla nižtiquiztan amquiz čhižinuča tužu. Walja naaža ujnaca pertuntiquiztan taa maatak žonqui juc'anti wejr k'ayachtiča. Jakziltat ujlliquiztan pertunta cječhaja, jalla niiqui anaž juc'anti k'ayachtiča.

⁴⁸ Jalla nekztanaqui Jesusaqui naa maatak žonaquiz cjichiča:

—Am ujnacaqui pertuntača.

⁴⁹ Nekztan parti impitta žoñinacaqui nii nonžcu ninacpora parla kallantassiča, tuž cjican:

—¿Ject tii žoñejo? Wali ujnacamiž pertunla. Ujquiztan žoñinacamiž pertunča.

⁵⁰ Jesusaqui naa maatak žonaquiz cjichiča:

—Amiž criitiquiztan jaziqui amqui liwriitača. Jaziqui cuntintum okaquiča.

8

MAATAKANACAQUI JESUSIZQUIZ YANAPCHICHA

¹ Wiruñiaqui Jesusaqui wacchi watjanacaran jochinacaran ojklaychiča. Jalla nuž ojklaycan Yooz mantita zuma kamaña, jalla nii puntu paljaychiča. Niiž tuncapan illza apostolonaca nižtan chicapachatača.

² Nižaza tsjii kjažultan niiž čhetinta maatakanaca cumpañtichiča, ninacžtan chica. Niiž tuquiqui nii maatakanacaqui zajraž tantatača, y nižaza conanacchiztača. Jalla nii maatakquiztan tsjaaqui María Magdalena cjititača. Jalla naaquiztan pakallak zajranaca ulanchitača.

³ Nižaza tsjaa žon želatča, Juana cjiti, Chuza cjita žoñž tjuntača. Naaža lucuqui Herodes cjita jiliri yanapñi secretariotača. Nižaza tsjaa Susana cjiti žon želatča. Nižaza tsjii kjažultan iya maatakanacaqui apsñitača. Nii maatakanacaqui persun cusastan atintiñitača Jesusizquiz.

CHJACZ QUINTU

⁴ Walja žoñinacaqui watjanacquiztan Jesusa cheri ulanžquichiča. Walja žoñinacaž nuž juntaziž cjen, Jesusaqui tsjii quintu quint'ichiča, tuž cjican:

⁵ —Tsjii zkala čjacñi žoñiqui zkali čjaqui ojkičiča. Nekztan zkali semilla wichcan wichcan čjacchiča. Čjacčan, parti semillanacazti jiczaran tjojtsiča. Nii tjojtsi semillaqui tjecantatača, y nižaza wežlanacaž lujtatača.

⁶ Tsjii parti zkali semillanacazti maz yokaran tjojtsiča. Nii tjojtsi semillanacaqui jeczancapacha nužquiz kjoñičiča. Anaž umit yoka želatča.

⁷ Parti zkali semillanacazti č'ap yokaran tjojtsiča. Nuž juntu pakan č'apinacakazza atipchiqui.

⁸ Parti zkali semillanacazti zum yokquiz tjojtsiča. Nekztan pajkchiča. Nuž pajkžcu, zuma čheri pookchiča, patac čherchiz zapa čhjojlluquiz. —Nuž quint'izcu Jesusaqui altu tawkžtan cjichiča:

—Jecčhalaj cjuñchiz niiqui, ž-nonžna.

⁹ Jalla nekztanaqui niiž tjaajinta žoñinacaqui Jesusizquiz pewcziča:

—¿Jaknužt čhii tii am takajo? —cjican pewcziča.

¹⁰ Jalla nekztanaqui Jesusaqui kjaaziča tuž cjican:

—Ančucaquiz Yoozpachaž tjaajnaquiča ančuca kuzquiz, niiž mantita kamañ puntuquiztan, nii. Yekjap žoñinacžquizti quintunacžtankaz čhiyuča Yooz mantita kamaña puntuquiztan. Jalla nužquiz weriž čhiita quintu nonžcuqui parti žoñinacaqui ana wira intintiñiž cjissa. Weriž čhiitiquiztanaqui ana wira tantiiñiž cjissa.

¹¹ Nekztanaqui Jesusaqui niiž tjaajinta žoñinacžquiz cjichiča:

—Jalla tižta puntunacquiztanž čhiča wejt zkala čjacz quintuqui. Yooz takuča nii zkali semillanacaqui.

¹² Nii jicjaran žejlñi žoñinacaqui Yooz taku nonzičha. Yooz taku nonžtanaqui, diablu cjita zajraqui tjonza, ninacž kuz turwayžinzjapa. Jalla nuž paačha diabluqui, nonžñi žoñinacaž Yooz taku ana criyajo, y nižaza ninacaž ana liwriita cjeyajo.

¹³ Nižaza nii maz yokaran žejlñi žoñinacaqui Yooz taku nonzičha. Yooz taku nonžcupacha cuntintuž catokčha. Pero Yoozquin tjapa kuzzizpan ana nonža. Tsjii pacamakaz catokčha. Čjul pruebaž tjonanami ratullaž quejpsa.

¹⁴ Nižaza nii ch'ap yokaran žejlñi žoñinacaqui Yooz taku nonzičha. Yooz taku nonžcu anaž tjapa kuztan catokčha. Cusasanacapankaz cherza; nižaza wali jiru kamspanž pecčha; nižaza pijistanacapankaz pecčha. Jalla nižtiquiztan čjul ana walinaca tjonan, ninacž kuznaca turwayskatčha. Persun kuzquiz pectiquiztanaqui Yooz taku tjažza. Jalla nižtiquiztan ana zuma kamasacha. Ana pookñi zkalažtakaz kamčha.

¹⁵ Nii zum yokquiz žejlñi žoñinacaqui Yooz taku nonzičha. Tjapa kuztan Yooz taku nonža. Tjapa kuztanž catokčha. Nižaza Yooz takucama zuma kamčha Yoozquin tjurt'iñi kuzziz. Jalla nižtiquiztan zuma pookñi zkalažtakaz kamčha, zupapankaz kamčha.

MICHA TJEEZ QUINTU

¹⁶ Jesusaqui tjaajinčičha tuž cjican:

—Anaž jecmi micha tjeznasačha cajun kjuyltan nonzjapa, už tjažz zquit koztan nonzjapa. Micha tjez nonz juntufpanž nekzipan tewznasačha kjuyquiz luzñi žoñinacžquin kjanajo.

¹⁷ Čjulu čhojžtami wažtapanikaz cjequičha. Nižaza ana Yooz puntu ziztanacami kjanapacha ziztapanikaz cjequičha.

¹⁸ Weriz čiita taku zuma nonžnalla ančucqui. Jakziltažlaj catokñi kuzziz niiqui, juč'anti zuma kuz tjaataž cjequičha, Yooz taku intintajo. Jakziltažlaj ana catokñi kuzziz niiqui, juč'anti turwayskattaž cjequičha. Jalla nižtiquiztan Yooz takuqui anapan intintiñiz cjequičha, “intintučha wejrqui” čiichiž cjenami. —Jalla nuž tjaajinčičha Jesusaqui.

JESUCRISTUZ FAMILIA PUNTU

¹⁹ Wiruñaqi Jesusiž maatan niž lajknacžtan irantizquichičha, jakziquin Jesusac želatčhaja, jalla nicju. Pero nižžquin ana macjati atchičha. Kjuyquiz walja žoñinaca želatčha.

²⁰ Jalla nekztanaqui tsjii žoñi qui Jesusižquiz mazzičha, tuž cjican:

—Am maami am jilanacami kjuy zancu žejlčha. Am cherz pecčha.

²¹ Jesusaqui nekztan kjaazičha, tuž cjican:

—Yooz taku nonžñi žoñinacaqui y nižaza Yooz takucama kamñi žoñinacaqui, ninacapančha wejt familia cuntaqui, wejt maa cuntaqui, y nižaza wejt jilanaca cuntaqui.

JESUSACHA TJAMIMI KJAZ LJOJKIMI MANTIŇIQUI

²² Tsjii nooj Jesusaqui niž tjaajinta žoñinacžtan luzzičha tsjii warcuquiz. Nekztanaqui tuž cjichičha:

—Tii kotž nawjktuñtanž ojklaj.

²³ Jalla nuž ojkan Jesusaqui tjačhičha. Nekztanaqui tiripintit wali pjursanti tjami zalchičha. Jalla nii tjamiž cjen warcuqui kjaz ljojkiztan julzmayaž cjisnatčha, kjaz čhijipi.

²⁴ Nekztanaqui Jesusiž tjaajinta žoñinacaqui Jesusa žinčičha, tuž cjican:

—Tjaajiñi Maestro, Tjaajiñi Maestro, kotquiz julzmayaž cjis učhumqui. Ticznačan učhumni. —Jalla nuž čiitiquiztanaqui Jesusaqui žaazičha. Nekztanaqui tjamžquiz nižaza kjaz ljojkimi mantichičha apaltajo. Jalla nuž mantitiquiztanaqui tjamimi kjaz ljojkimi apaltichičha. Čh'ujupan cjissičha. Nužquiz walikaztačha.

²⁵ Jalla nekztanaqui Jesusaqui niž tjaajinta žoñinacžquiz čhižinčičha, tuž cjican:

—ŽAna wejtquin kuzziz cjissinčuckaya? —Nuž pewcztiquiztan, nii tjaajinta žoñinacžti tsucchi ispantichi cjissičha. Nižtiquiztan ninacpora parlassičha, tuž cjican:

—Čject tii žoñejo? Tjamimi kjazmi tiž mantitacamaž ojčkha, tiž čiita takukaz cazza.

TSJII ZAJRAZ TANTA ŽOŇI ČHJETINTA

²⁶ Nižtami Gadara cjita yokquin irantichičha, kotž nawjktuñtan, Galilea cjita yokž nawjktuñtan.

²⁷ Jesusa yokquiz čhijwžtan tsjii nii wajtchiz žoñi qui macjatžquichičha. Ažk watanaca zajraž tantapantakalčha nii žoñi qui. Zajraž tantiquiztan ana zquiti cutñitakalčha. Nižaza ana kjuyquizimi kamñitakalčha. Campu santuran kamñitakalčha.

²⁸⁻²⁹ Jesusa cheržcu, niž yujcquz tuzi t'okzičha yokquizpacha; kjawcan puct'ichičha. Nekztanaqui Jesusaqui žoñi tanñi žajra mantichičha žoñžquiztan ulnajo. Nii čiitiquiztan zajraqi kjawchičha, tuž cjican:

—Jesusa, Arajpach Yooz Maati, čkjažtiquiztan am wejtquiz mitisi? Am roct'učha, anaž wejr tjatnalla, anaž wejr sufriskatalla.

Tuquiqui wilta wilta zajraqui nii zoñi tanñitakalcha. Nižaza nii wajtchiz zoñinacaqui zajraž tanta zoñi chejñitakalcha, y nižaza carinžtan mokñitakalcha. Jalla nuž maktiquiztanami chejltiquiztanami carina kojžcu atipasñipankaztakalcha. Jalla nekžtan zajraqui nii zoñi ch'ekti yokaran zajt zajtskatchičha.

³⁰ Nekztanaqui Jesusaqui nii pewczičha, tuž cjican:

—¿Ĉhjul tjuuchizzamta?

Nii zajraqui kjaazičha:

—Tama cjitaž wejrqui, —cjican.

Tama zajranacaqui nii zoñžquiz lusñitakalcha.

³¹⁻³² Zcati cururan wacchi cuchinacaqui lujlcan žejlñitakalcha. Jalla nižtiquiztan zajranacaqui Jesusižquiz rocchičha, tuž cjican:

—Anaž wejrnac casticta cjeajo mantalla. Nii cuchinacžquin luzkatalla. —Jalla nuž mantiskatz pecchičha zajranacaqui. Nekztanaqui Jesusaqui nuž mantichičha.

³³ Jalla nekztanaqui nuž mantiquiztan zajranacaqui zoñžquiztan ulanžcu cuchinacžquin luzi ojckhičha. Cuchinacžquin luzcuqui cuchinaca tjiiranchičha tsjii k'aw kjutñi. Nekztanaqui nii cuchinacaqui kossucpacha tjojsičha nii barranc k'awquiz. Nižaza kotquin tjojsičha. Jalla nužquiz tjapa ticzičha.

³⁴ Cuchi itzñinacaqui nii cheržcu walja tsucchi zajtchičha. Watjaran jochiran quintu quint'ican ojklaychičha.

³⁵ Nii quintu nonžcu walja zoñinacaqui ojckhičha nii paatanaca cheri. Jesusižquin irantižcu, nii zajraž tanta zoñi žejtchi cherchičha. Nii zoñiqui julzi želatčha Jesusiž kojch latuquiz, zquiti kujtchi. Nižaza zuma tawkchiztačha, ana lucuratžtakaztačha. Jalla nuž cheržcu, nii cheri tjonchi zoñinacaqui nužquiz ispantichičha.

³⁶ Nii zoñi čhjetinči cherchi zoñinacaqui quint'ichičha parti zoñinacžquiz, jaknužt Jesusaqui zoñi čhjetinčhaja, jalla nii.

³⁷ Nii quintu nonžcu, tjapa Gadara cjita yokquiz žejlñi zoñinacaqui Jesusižquiz roqui kallantichičha nawjk okajo. Nii zoñinacaqui cuchinacaz pertisiž cjen waljaž eksnatčha. Jalla nižtiquiztanacaqui Jesusaqui tsjii warcuquiz luzzičha, ojckjapa.

³⁸ Nii zajriquiztan čhjetinta zoñiqui Jesusižquiz rocchičha, tuž cjican:

—Amtan chical ojkkatalla.

Pero Jesusaqui kjaazičha, tuž cjican:

—Tekz am žela.

³⁹ Am kjuya oka. Zoñinacžquizam amqui quint'aquičha jaknužt Yoozqui am čhjetinčhaja, jalla nii.

Nekztanaqui nii zoñiqui ojckhičha. Jalla nuž ojckcu tjapa kjutñi watjaran quint'ichičha, jaknužt Jesusaqui nii čhjetinčhaja, jalla nii.

JESUCRISTUCHA LAZ ZOÑI ČHJETINŃI

⁴⁰ Jalla nekztanaqui Jesusaž kotž nawjktuñtan quejžžquitan, žejlñi zoñinacaqui tjapa kuz risiwchičha. Tjappacha Jesusiž tjonz tjewsitačha. Nekztanaqui niž tjontiquiztan cuntintutačha.

⁴¹ Jalla nekžtan tsjii Jairo cjita zoñiqui irantižquichičha; ajcz kjuy jiliritačha. Nii zoñiqui Jesusiž yujcquiz puct'ichičha. Nekztanaqui rocchičha niž kjuya okajo.

⁴² Nii oraqui nii zoñž zinta majtqui ticzmayatačha. Tuncapan watchiztačha naa majtqui. Nekžtan Jesusaqui jilirž kjuya ojckhičha. Jesusaž okan, walja zoñinacaqui ts'acjascan apzičha.

⁴³ Jalla ninacžtan juntu tsjaa laa maatak žonqui okatčha. Tuncapan wata inturu ljok ojknī laa t'akjisichintakalcha. Nižaza medicunacžquiz kullkatjawi ancha castassinčha, ana čhjulchiz cjsisintachha. Nuž kullkatžcumi ana wira žetatčha.

⁴⁴ Nekztanaqui naa laa žonqui Jesusiž wir kjuttan macjatchinčha. Niiž zquiti tjiiquiz lanžinčha. Nii orapacha nuž lanžcuqui žejtchinčha. Nižaza ljok ojknīmi tsijtsičha.

⁴⁵ Jalla nekztanaqui Jesusaqui pewczičha, tuž cjican:

—¿Ject wejr lanzejo?

Tjappacha ninacaqui ana zizñi čhiuchičha, nuž pewcžtiquiztan. Jalla nuž cjen Pedruqui niž mazinacžtan cjichičha:

—Tjaajñi Maestro, tii zoñinaca ancha amquiz ts'acjassa, nižaza tjapa kjuttanž am tewjctewjčha. Jaziqui ĸkjažtiquiztan am nuž pewcžjo, “¿Ject wejr lanzejo?” cjicanajo?

⁴⁶ Nekžtanac Jesusaqui cjichičha:

—Tsjii tsjiiqui wejr lanzičha. Wejr persun kuzquiz naychinčha wejt aziqui tsjii čhjetinchičha, jalla nii.

⁴⁷ Naa maatak žonqui waj nuž Jesusiž kuzquiz pajta ziztiquiztan, cjarcatcan macjatchinčha. Nekžtan Jesusiž kojchquiz quillzinčha. Tjapa zoñinaca želan naaqui mazinčha, nii

orac lanzintaž naaqui, jalla nii. Nižaza nii lanžcu nii orapacha žejtchi quirchinča naaqui. Jalla nuž cjan mazzinča Jesusižquiz.

⁴⁸ Jalla nekztanaqui Jesusaqui cjichiča:

—Cullacalla, tjapa kuztan criichiž cjen čhetinta cjissamča. Jaziqi cuntintum am okaquiča.

⁴⁹ Jesusaž ima naatan parla žeržnan, tsjii žoñiqui tjonchiča Jairo cjita žoñž kjuyquiztan. Nii Jairuqui ajcz kjuy jiliritacha. Tjonchi žoñiqui Jairužquiz cjichiča:

—Am majtqui ticzinpanča. Anam iya tii Maestružquiz molistis waquiziča.

⁵⁰ Jalla nii takunaca nonžcuqui, Jesusaqui Jairužquiz cjichiča:

—Ana am nic kuz turwayskata. Yoozquin tjapa kuzziz cjee. Nekztan am uzqui zetaquiča.

⁵¹ Jairuž kjuya irantižcu, Jesusaqui anaž jecmi kjuyquiz luzkatchiča. Jesusižtan Pedružtan, Jacobžtan, Juanžtan, naa uza maa ejpžtan jalla ninacakaz luzkatchiča.

⁵² Nii kjuyquiz žejlñi žoñinacaqui tjappachaž kaatkalča. Nižaza naa uzaž ticziž cjen walja llaquitatakalča. Pero Jesusaqui ninacžquiz cjichiča:

—Anaž kaa. Taa uzqui anača ticzin, antiz taa uzqui tjajča.

⁵³ Nuž Jesusiž čhiitquiztan nii žejlñi žoñinacaqui tjassiča nii nonžcu. Ticzinpanča nuž zizziča parti žoñinacaqui.

⁵⁴ Jalla nekztanaqui Jesusaqui naa uza kjara tanzinchiča, y nižaza altu tawkžtan čhiichiča, tuž cjan:

—Kolta cullacalla, zaazna.

⁵⁵ Nii orapacha wilta žejtchin cjissinča. Nižaza nii orapacha tsijtsinča. Nekztan Jesusaqui mantichiča naa uzaquiz čjeri tjaaznajo.

⁵⁶ Naaža maa ejpqi nuž jacatatchiž cjen ancha ispantichiča. Nekztanaqui Jesusaqui ninacžquiz paljaychiča:

—Anaž jeczquizimi čhiichiyaquiča tii čhetinta quintu, —nuž cjichiča Jesusaqui.

9

APOSTOLUNACA CUCHANTA

¹ Jalla nekztanaqui Jesusaqui niž tuncapan illzta apostolonaca kjawziča. Nekztan ninacžquiz mantiz azi tjaachiča, tjapaman zajranaca čjatkatzjapa, nižaza tjapaman laanaca čjetinzjapa.

² Nižaza Jesusaqui ninacžquiz mantichiča Yooz zuma kamañ puntuquiztan paljayajo, y nižaza laa žoñinaca čjetnajo.

³ Nižaza cjichiča:

—Ančucqui anaž čjulumi čjichaquiča, jiczquin ojkan. Anaza ajtsmi, anaza zak quelsmi, anaza čjerimi anaza paazmi. Nižaza zinta zquitkaz čjichaquiča.

⁴ Jakzi kjuyquinami irantižcuqui nii kjuyquin alujasaquiča. Jalla nicjuž kamaquiča, nii yokquiztan ojkcama.

⁵ Yekjap wajtchiz žoñinacaqui ančuc anaž risiwz pecaquiž niiqui, nii wajtquiztanž ulnaquiča. Nižaza ančuca kjojchquiz zcachi pulpunaca tsajt tsajtsnaquiča. Jalla nii tsajt tsajtstaqui siñalaž cjequiča ninacž quintra, ančuc ana risiwchiž cjen.

⁶ Jalla nekztanaqui Jesusiž nuž taku tjaatquiztan apostolonacaqui niž mantitacama ojkičiča. Tjapa jochinacž kjutñi ojkičiča, liwriñi Yooz taku paljaycan, y nižaza laanaca čjetincan.

JUAN BAUTISTAZ PUNTU

⁷ Tsjii chawc jiliriqi Herodes cjita želatča. Jesusiž quintu zizcu, ana čjulumi naazi-panča nii oraqui. Inakaz želatča. Jesusiž quintu nonžcu yekjapanacazti cjichiča:

—Juanqui ticziquiztan jacatatchižlani.

⁸ Yekjapanacazti čhiichiča tuž cjan:

—Tiila Eliasqui; jeczquichila.

Elias cjitaqui tuqita Yooz taku paljayñi profetatača. Yekjapanacazti Jesusiž puntu čhiichiča, tuž cjan:

—Tiila tsjii tuqita Yooz taku paljayñi profetaqui, jacatatchila.

Jalla nuž cjenami Herodes cjita jiliriqi inakaz cjissiča.

⁹ Nii Herodesqui tuž cjichiča:

—Wejbranča mantichintqui, Juanž acha muržcajo. Anziqi wacchi milajru paata quintunaca nonznuča. Žjectpan nii milajrunaca paañejo? ¿Juanpan cjesajo?

Jalla nekztanaqui Herodesqui Jesusižtan walja zalz pecchiča.

ZOÑINACŽQUIZ ČJERI TJAAZ MILAJRU

¹⁰ Wiruñaqi Jesusiz illzta apostolonacaqui cutjatchicha. Nekztan Jesusizquiz quint'ichiča jaknužt kamtčhaja, jalla ninaca. Jalla nekztanaqui Jesusaqui ninaca chjitchicha tsjii ana žejlz yokquin, Betsaida cjita wajtz zcati.

¹¹ Nuž ojka zizcu, žoñinacaqui walja apziča. Nekztanaqui nuž apžtiquiztan Jesusaqui zuma risiwchiča. Ninaczquiz paljaychiča Yooz mantita zuma kamañ puntu. Nižaza laanaca čhjetinchiča.

¹² Zezi cjee ora Jesusiz tuncapan illzta apostolonaca nižquin macjatchicha, tuž cjan:

–Tii žoñinaca cuchna joch kjutñi wajt kjutñi okaj cjee; t'jaz kjuya kjuržcaj cjee; nižaza lujlz čheri kjuržcaj cjee. Tekziqui anaž čhjulumi žejlča. Jalla nuž cuch waquiziča amqui.

¹³ Pero Jesusaqui niž illzta apostolonaczquiz chiižinchiča, tuž cjan:

–Ančhucž antiz čheri tjaa.

Ninacaqui kjaaziča, tuž cjan:

–Anaž wejtnacalca čhulumi žejlča. Pjijska t'antallžtan pizc ch'izllžtan, nižtallakaz wejtnacalca žejlča. Tinaczquiz tjaazjapa anapan wacasača. Tinaczquiz tjaasjapa, čhheri kjayi okasaya?

¹⁴ Nii žejlñi žoñinacaqui pjijska warank luctakatača. Nekztanaqui Jesusaqui niž tjaajintanaczquiz cjichiča:

–Tjulžna tii žoñinacaqui pjijska tuncquiztan pjijska tunca jalla nuž t'aka t'aka tjulžna.

¹⁵ Jalla nuž niž mantitacama paachiča. Nekztan tjappacha julziča.

¹⁶ Nekztanaqui Jesusaqui persun kjarquiz nii pjijska t'anta nii pizc ch'iz tanziča. Nuž tanžcu arajpach kjutñi cherziča. Nekztan Yooz Ejpžquin sparaqiz cjichiča, jalla nii t'antiquiztan, ch'izquiztan. Jalla nekztanaqui t'unžcu niž tjaajintanaczquiz chjalziča, parti žoñinaczquiz tojznajo.

¹⁷ Nekztanaqui tjapa nii žoñinacaqui čhekañcama lujlchiča. Jalla nuž lujltanaqui zejthi t'anta ch'iz t'unanaca tuncapan canasta chjippi ricujchiča.

JESUSACHA YOOZIZ CUCHAÑŽQUITA CRISTUQUI

¹⁸ Tsjii nooj ana žoñinaca želan, Jesusaqui Yooz Ejpžquin mayizatča. Niž tjaajinta žoñinacapanatča nižtan chicapachaqui. Jesusaqui ninaczquiz pewziča:

–ČJaknužt pinsi žoñinacaqui wejt puntuquiztanajo?

¹⁹ Nekztanaqui nii tjaajintanacaqui kjaaziča, tuž cjan:

–Yekjap žoñinacaqui cjiča, Juan Bautistaž amqui. Yekjapanacazti zakaz cjiča, Elías amqui. Yekjapanacazti cjiča, tuquita Yooz taku paljayñi profetažlani jacatatchini, –jalla nuž cjiča.

²⁰ Jaziqui nekztanaqui Jesusaqui wilta pewziča, tuž cjan:

–Ančhucžti, čwejt puntuquiztan kjažzaž cjeejo?

Pedruqui kjaaziča, tuž cjan:

–Yooziž cuchanžquita Crustumča amqui.

²¹ Jalla nekztanaqui Jesusaqui zumpacha niž tjaajintanaczquiz iwjt'ichiča, ana jeczquizimi nižta maznajo.

JESUSAQUI NIIZ PERSUN TICZ MAZZICHA

²² Nižaza Jesusaqui cjichiča:

–Yooz cuchanžquita žoñtča wejrqui. Pero walja sufristanča; nižaza wajt jilirinacami timplu chawc jilirinacami judioz lli tjaajiñinacami wejr ana jilirižtakaz nayaquiča. Nižaza wejr conta cjistanča. Nižaza čhjep majquiztan jacatatača.

²³ Wiruñaqi tjapa nii žejlñi žoñinaczquiz paljaychiča, tuž cjan:

–Jequit wejtan čica kamz pecčhaj niiqui, primiraqui persun kamañ wira t'atžla. Nižaza čhjul pruebanaca watanami zapuru wejtan chicapacha cjee, aunquimi persun wirami apt'ačhani.

²⁴ Jakžiltat persun kamañ wira ana t'ats pecčhaj niiqui, arajpach kamañaqi ana tjaataž cjequiča. Jakžiltat wejt laycu persun kamañ wira t'atžnačhaja, jalla niiqui arajpachquin wiñaya kamaquiča.

²⁵ Arajpachquin wiñaya kamañ wira pertaquiz niiqui, čtii muntuquiz žejlñi cusasa čhjuljapat sirwasajo?

²⁶ Nižaza quintra žoñinacaz želan, jakžiltat wejtquiztan wejt tawkquiztan ana pajñi chiyauiz niiqui, wejrqui nižtazakal nižquiztan ana pajñi chiyacha wejt mantiz timpuquiz, nekziqui. Tsjii noojiqui walja poderchiz quejpžcača wejt Yooz Ejpž aztan, nižaza wejt Yooz Ejpž anjlanacztanpacha. Mantizjapa quejpžcača.

²⁷ Wereral cjiwča. Tsjii žoñinaca tekz žejlcanpacha anaž ticznaquiča ima Yooz mantiz timpuquiz kallantan.

JESUSAQUI TSJEMATAZ CJISSICHA

²⁸ Tsjii quinsakal tjuñquiztan Jesusaqui curulla yawchiča Yooz Ejpžtan parli. Nižaza čhjepultan niiz illzta žoñinaca chjitchičha, Pedružtan, Jacobžtan, Juanžtan; jalla ninacaqui Jesusižtan chica ojkičičha.

²⁹ Yooz Ejpžtan parlican, Jesusiž yujcmi niiz cujtta zquitimi walja llijñi kjanapanikaz cjissičha, chiwicamatača.

³⁰ Nii orapacha pucultan luctak žoñiqui parisizquichiča, Jesusižtan parlisjapa. Nii pucultanaqui Moisestan Eliastantača.

³¹ Nii pucultanaqui walja chiw kjana llijñi taypiquiz tjonatča. Jesusiž ticz puntu parlatča. Jerusalén wajtquiz jaknužt ticznačhaja jalla nii puntu.

³² Nii oraqui Pedružtan niiz mazinacžtan ančaž tjaji tjonkatatča pero nii cheržcu ninacž tjajimi zajtčičha. Jesusiž tježta honora cherchiča nii pucultan žoñinacaž nižtan želan. Walja chiwi llijñi kjanñi cherchiča.

³³ Pucultan žoñinacaž Jesusižquiztan zarakan, Pedruqui cjichiča:

—jWejt Tjaajiñi Maestro, tekz žejlzqui walipankazza! Jaziqiu čhjep chjujlli kjuya kjuysla, tsjiiqui amta, tsjiiqui Moiesta, tsjiiqui Eliasta, jalla nuž.

Pedruqui ana zuma tantižcu čhičičha.

³⁴ Jalla nuž Pedruž chiyān, tsjii tsjirižtakaz macjatžquichiča. Nekžtan ninacžquiz urpuntičičha. Jalla nuž urpuntižquiztan nii čhjepultan illzta žoñinacaqui walja tsucchiča.

³⁵ Tsjirquiztan tsjii jora čhižquičhi nonziča, jalla tuž cjan:

—Jalla tiičha wejt k'ayi Maatiqiu. Jalla tiiz čhiita taku nonžna.

³⁶ Jalla nuž nii joraž čhiitan, Jesusaqui zinalla želatča. Nii čhjepultan illžtanacaqui nužquiz ch'uju quirchiča. Ana jeczquizimi nii cherta puntu čhičičha.

TSJII ZAJRAZ TANTA ŽOÑI ČHJETINTA

³⁷ Niž jaka tažu curquiztan chjiwžquichiča. Walja žoñinacaqui Jesusižtan zali tjončičha.

³⁸ Nii tama žoñinacžquiztan tsjii žoñiqui altu tawkžtan paljayčičha, tuž cjan:

—Wejt Tjaajiñi Maestro, wejt zinta majch cheržinžcalla.

³⁹ Wilta wilta zajraž tantača. Nii zajraqui ančaž kjaw kjawkatča. Nižazaž t'uckatča. Atquiztan ch'utuž jupokskatča. Persun janchiž čhjojriskatča. Nižquiztan ana zarakž pečča.

⁴⁰ Amiz tjaajinta žoñinacžquiz rocchinča, wejt majch čhjetžinajo. Ana atchipanča.

⁴¹ Jalla nekžtanaqui Jesusaqui kjaaziča, tuž cjan:

—Tii žoñinacajay ana criiñipanča. jWalja ujnacchizčhucpanča ančhucjay! ĸČhjul oracamat ančhucatan wejr želaquiya? ĸČhjul oracamat ančhuca ujquiztan wejr awantaquiya? Nižtaqui am majch zjijžcalla.

⁴² Nii žoñž laa majch Jesusižquiz macjatan, zajraqui yokquiz tojtčičha. Wilta t'uckatčičha. Jalla nekžtanaqui Jesusaqui zajra ujziča. Nii žoñž majch čhjetinžcu, niž persun ejpžquiz intirjichičha.

⁴³ Nii Yooz aztan paata obra cheržcu tjapa žoñinacaqui ispantichičha. Žoñinacaž ispantichi želan, Jesusaqui niž tjaajinta žoñinacžquiz paljayčičha, tuž cjan:

⁴⁴ —Tjapa kuztanž tii weriž paljayta nonžna ančhucqui. Anaž tjatzna. Wejrqui tsewctan cuchanžquita Yooz Žoñičha. Quintra žoñinacžquiz wejr intirjital tarazuntal cjeeča.

⁴⁵ Jalla nuž chiyān niž tjaajinta žoñinacaqui ana intintazziča. Nižaza nii čhiitaqui ana kjanzt'itatača, ninaca intintajo. Ana intintazcumi, pewcz eksnatča niž čhiita taku kjana intintisjapa.

YOOZ YUJCQUIZ, ĸJECT TUCQUIN CJES?

⁴⁶ Wiruñaqiu niž tjaajinta žoñinacaqui ninacpora ch'aassi kallantichičha, jakžiltat ninacžquiztan tucquin cjes, jalla nii.

⁴⁷ Ninacž kuz pinsita zizcu Jesusaqui tsjii uza tsjitskatchičha niž latuquiz.

⁴⁸ Nekžtan ninacžquiz paljayčičha:

—Jequit wejt cuntiquiztan tsjii uza risiwčhaj niiqui, wejrpacha risiwčha. Nižaza jequit wejr risiwčhaja, nižaza risiwčha wejr cuchanžquičhi. Jakžiltat ančhucaquiztan wirquin nayta cjičjiyačhaja, jalla niičha tucquin zuma honorchizqui.

⁴⁹ Wiruñaqiu Juanqui cjichiča:

—Wejt Tjaajiñi Maestro, tsjii žoñiqui am tjuu čhiican zajranaca chjatkatchičha. Nii cheržcu wejrnacqui ujinčha, “Ana nižta paa”, cjan. Nii žoñiqui anača učhumnacatan ojklayñi.

⁵⁰ Pero Jesusaqui cjichiča:

—Anaž nuž atajča, jalla. Nižta paañiqui anača učhumnacatan quintra. Jakžiltažlaja ana učhumnacatan quintra, jalla niiqui učhum favoraž paača.

TSJII OJKTA PUNTU

⁵¹ Jalla nekztanaqui Jesusiz arajpacha ojkz tjuñi žcatžinžcatča. Jalla nižtiquiztan walja p'ektichiča Jerusalén watja ojkszjapa.

⁵² Niž tuqui žoñinaca cuchanchiča, alujamint kjuya kjuržcajo. Jalla nekztanaqui nii cuchanta žoninacaqui Samaria cjita yokquin tsjii watja macjatchiča.

⁵³ Nii Samaria wajtchiz žoñinacazti ana kjuyquiz kjawz pecatča Jesusaž Jerusalén watja ojkz cjen.

⁵⁴ Nii quintu nonžcu Jacobžtan Juanžtan Jesusižquiz cjichiča:

–Wejt Jiliri, žkjažt cjes? Wejrnačqui arajpachquiztan uj mantizquila, cjiwčha, ninaca tjatanzjapa. Jaknužt tuqui timpu Elias cjita Yooz taku paljayñi profeta paatčhaja, jalla nuž. Jalla nuž waliž cjesaž, ž ana jaa?

⁵⁵ Jalla nuž čhiitiquiztan Jesusaqui ninacaž kjutñi cherzičha. Nekztanaqui ujzičha, tuž cjan:

–Ančhucua kuzqui ana waličha. Anaž tantiyassa ančhucqui.

⁵⁶ Wejrqui tsewtan cuchanžquita Yooz Žoñtčha. Wejrqui tsewtan tjonchinčha, ujchiz žoñinaca liwriizjapa. Ana tjonchinčha ujchiz žoñinaca tjatanzjapa.

Jalla nekztanaqui yekja watja ojkchiča.

JESUCRISTUŽTAN CHICA OJKLAYZ PUNTU

⁵⁷ Jiczquiz okan, tsjii žoñiqui Jesusižquiz cjichiča:

–Wejt Jiliri, jakziquinam ojkčhaja amqui, wejrqui chicapachal ojklayz pecučha.

⁵⁸ Nekztan Jesusaqui nižquiz kjaazičha, tuž cjan:

–Kitinacami kjuychizza. Nižaza wežlanacami tjurchizza. Wejrzi anal kjuychizza, tjajzjapami.

⁵⁹ Wiruñauqui Jesusaqui yekja žoñžquiz tuž cjichiča:

–Wejtčan čicaž ojklaya.

Nii žoñiqui kjaazičha, tuž cjan:

–Wejt Jiliri, primiraqui wejt ticzi ejp tjatnačha.

⁶⁰ Nekztan Jesusaqui kjaazičha, tuž cjan:

–Ticzižtakaz ana zuma kamañchiz kamñi žoñinacaqui, jalla ninacaj ticzinaca tjatžla. Amqui ojkla, Yooz mantita zuma kamañ puntuquiztan paljayzjapa.

⁶¹ Wiruñauqui yekja žoñiqui Jesusižquiz cjichiča:

–Wejt Jiliri, amtan čica ojklayz pecučha. Pero primiraqui wejt familianacžquiz wejt ojklayz puntu mazinžquiz pecučha.

⁶² Nekztan Jesusaqui kjaazičha, tuž cjan:

–Jakziltat Yooztajapa langžñi kalltičhaja, jalla niiqui tirapan Yoozta langz waquizičha, ana wir kjutñi cheržcu. Jakziltat wir kjutñi cherznasaž niiqui, nižaza tuquita kamañ wirquiz quejps pecasaž niiqui, jalla niiqui anaž Yooz mantita zuma kamaña tanznasačha.

10*JESUSAQUI YOOZ LANGZQUIN ŽOÑINACA CUCHANCHIČHA*

¹ Jalla wiruñauqui Jesusaqui pakallak tunc žoñinaca illzičha. Jalla nuž illžcu Jesusaqui niž tuqui tjapa kjutñi pucultan pucultan cuchanchiča, jakziquint okačhaja, jalla nii.

² Ima cuchancan ninacžquiz cjichiča:

–Tsji puntul čhižinasasčha. Zkalaqui walja žejlčha. Pero zkala ajžñi žoñinacačha upaqui. Yooz Ejpqui zkal Patrunačha. Jalla nižtiquiztan Yooz Ejpžquiztan mayiza, zkala ajžñi žoñinaca cuchanžcajo.

–Jalla nuž paljayčiča Jesusaqui, žoñinacačha zkalažtakaz.

³ Nižaza Jesusaqui niž cuchanžquita žoñinacžquiz cjichiča:

–Ančhucqui uuzanacaztakaz cuchnučha. Tanñi kitinacaz čeechi žoñinacž taypiquin ojklayaquičha ančhucqui. Jaziqi persunpachaž cwitzauquičha.

⁴ Nižaza anaza quelsmi chjichaquičha, anaza paaz pulsami. Ana enenžcu jiczquizic okaquičha.

⁵ Tsji kjuya luzcu, ančhucqui tsaanaquičha, tuž cjan: “Tii kjuychiz žoñinacaqui wali-pankaj cjila”.

⁶ Nicju zuma kamñi žoñinaca želaquiz niiqui, walipankaz cjequičha nii kjuychiz žoñinacaqui. Nižaza nii kjuyquiz zuma kamñi žoñinaca ana želaquiz niiqui, ančhucaz tsaanta takuqui nužquizkaz cjequičha.

⁷ Kjuyquiztan kjuya ana ojklayaquičha. Tsji kjuya irantizcu, nekzpachapan kamaquičha. Čjulut nii kjuychiz žoninacaqui onačhaja jalla niicž lujznaquičha. Langžñi žoñinaca pacta cjis waquizičha.

⁸ Tsjii watja irantizcu nii wajtquiz jakziltakat ančhuc kjawžnačhaj niiqui, jalla nekziqwi lujlnaquičha čhjuulu onanami.

⁹ Nižaza nekz željñi laanaca čhjetnaquičha. Nižaza paljayaquičha, tuž cjian: “Yooz mantita zuma kamaña ančhucaquiz žcatžinžquičha”.

¹⁰⁻¹¹ Nižaza tsjii wajtquiz irantizcuqui, jalla nii wajtquiz anaž ančhuc kjawznaquiz niiqui, calli kjutñiž ulnaquičha, nii wajt žoñinacžquiz tuž cjian: “Tii wajt pulpu wejnaca kjoichquiz zcatchipan cjen, jalla tii wajt pulpu tjappacha tsajt tsajtsnačha. Jalla tii tsajstaqui siñalaž cjequičha ančhuca quintra. Pero ančhucqui tuž zizla, Yooz mantita zuma kamaña ančhucaquiz žcatžinžquichitačha”. Jalla nuž chiižcuqui, nii ana ančhuc kjawžñi wajtquiztan okaquičha.

¹² Wejr cjiwčha ančhucaquiz; casticz tjuñquiziqui nii wajtchiz žoñinacaqui juc'anti castictaž cjequičha, nii tuquita Sodoma cjita wajtchiz žoñinacžquiztanaqui.

YOOZQUIN ANA JUYZU PAAÑI ŽOÑINACŽ PUNTU

¹³ ¡Corazñi wajtchiz žoñinaca, ančhucaquiz anawaliž wataquičha! ¡Nižaza Betsaida wajtchiz žoñinaca, ančhucaquiz anawaliž wataquičha! Ančhuca watjanacquiziqui walja milajrunaca paatačha. Tiro Sidón cjita watjanacquiz nii milajrunaca paataž cjtasaž ni-iqui, walipan nii wajtchiz žoñinacaqui werar Yoozquiz cjuñžñiž cjtasačha, “Ujchizpantčha; pertunalla”, cjcanaqui. Nižaza ninacž uj sint'ižcu nii wajtchiz žoñinacaqui llaquita kuz kjanapacha tjeesñi cjtasačha, lutu zquitchiz kujžcu, nižaza achquiz kjupžtan tjaljžcu, jalla nuž.

¹⁴ Jalla nižtquiztan ančhucqui casticu tjaaz tjuñquiziqui juc'anti castictaž cjequičha nii Tiro Sidón cjita watjanacchiz žoñinacžquiztanaqui.

¹⁵ Capernaum wajtchiz žoñinaca, čkjažtquiztan ančhucqui pinsejo, “Yoozqui učhum honorchiz cjskataquičha”, cjianjo? Anaž nuž cjesačha. Pero ančhucžti kozzuc tjojttaž cjequičha infiernuquin sufrisjapa, parti ujchiz žoñinacžtan chica.

¹⁶ Nekztan Jesusaqui niž tjaajinta žoñinacžquiz tuž cjichičha:

—Jakziltat ančhuca taku nonžaj niiqui, nižaza wejt takumiž nonža. Nižaza jakziltat ančhuca taku ana nonz pecčhaj niiqui, nižaza wejt taku anaž nonz pecčha. Nižaza jakziltat wejt taku ana nonz pecčhaj niiqui, nižaza werj cuchanžquičha Yooz Ejp anaž nonz pecčha.

CUCHANTA ŽOÑINACAQUI QUEJPZQUICHICHA

¹⁷ Wiruñaqwi nii pakallak cuchanta žoñinacaqui ancha cuntintu quejpžquichičha, tuž cjian:

—Wejt jiliri, am tjuu chiižcu, am aztan zajranacami ulanskatchinčha.

¹⁸ Nekztanaqui Jesusaqui ninacžquiz cjichičha:

—Jesalla, tsjii rayužtakaz Satanás cjita diabluqui arajpachquiztan tjojtsičha. Jalla nuž cherchinčha.

¹⁹ Wejrqui ančhucaquiz wejt azi tjaazinčha. Jalla nižtquiztan ančhucqui zkorami yek'achuncami tjeznaquiz niiqui anaž kjaž cjisnasačha. Nižaza nii wejt aztan tjapa quintranaca atipaquičha.

²⁰ Zajranacaž ulantiquiztan ančhucqui anaž ancha chipchipsačha. Antiz ančhuca tjuunaca arajpachquin apuntiquiztan, nekztanž ančhucqui chipchizp waquizičha.

CUNTINTU ŽOÑINACA

²¹ Nii orapacha Jesusaqui ancha cuntintutačha Yooz Espiritu Santuž cjen. Nekztan cjichičha:

—Yooz Tata, arajpachquinami yokquizimi ampančha wali chawc jilirimqui. Am puntunaca humilde žoñinacžquiz tjeezamčha, intintajo. Pero tii muntuquiz wali estudiantinacami zizñinacami am puntunaca anaž intintazičha, čhojžtažtakaz ninacžquiziqui. Jalla nužupančha am munañpaqui, Yooz Tata. Jalla nižtquiztan am honora waytučha.

²² Nižaza Jesusaqui cjichičha:

—Yooz Tata, tjapa amiž ziztanacami wejtquiz tjaajinčhamčha. Anaž jecmi wejt kuz zizza. Yooz Tata, am panikaz wejt kuz zizza. Nižaza am kuz anaž jecmi zizza. Wejr panikal zizučha. Nižaza Yooz Tata, jakziltižquiz wejrqui am kuz zizkatz pecučhaja, jalla ninacazakaz am kuz zizaquičha.

²³ Jesusaqui niž tjaajinta žoñinacžtan zina želatčha. Ninacžquiz cheržcu cjichičha:

—Anchucqui zuma paatanaca cherchinčhucčha. Jakziltat weriž paatanaca persun čhjujčžtan cherchižlaja, cuntintuž cjesačha.

²⁴ Wacchi tuquita Yooz taku paljajñinaca nižaza tuquita chawc jilirinaca, jalla ninacaqui weriž zuma paatanaca cherz pecatčha. Pero ana cherchičha. Nižaza ninacaqui Yooz puntu takunaca nonz pecatčha. Pero ana nonzičha. Jaztankaz ančhucqui tii cherchinčhucčha, nižaza nonzinčhucčha. Jaziqwi cuntintuž cjee.

ZUMA KUZZIZ ZOÑINACA

²⁵ Wiruñaquí tsjii judiož líi tjaajiñi zoñiqui tsijtsiĉha. Nekztanaquí Jesúsizquíz paljay-
chiĉha, Jesusa líi quintra chiikatjzapa. Nekztan pewcziĉha, tuž cĉican:

—Wejt Tjaajiñi Maestro, Yooztan wiñaya kamzjapa ĉhjulut paaz waquizisaya?

²⁶ Nekztanaquí Jesusaquí niizquin kjaaziĉha, tuž cĉican:

—ĉKjaž cĉijrtat uĉhum liiquiziya? ĉJaknuž liichamtajo?

²⁷ Nii líi tjaajiñiqui kjaaziĉha, tuž cĉican:

—Zoñinacžlaquí Yoozquin tjapa kuzziz cĉistanĉha. Yoozquin tjapa animužtanami sirwis-
tanĉha, nižaza tjapa aztanami, nižaza tjapa pinsamintužtanami. Tjapa kuzziz Yoozquin
cĉistanĉha. Nižaza jaknužt persunpachquíz okžñamžlaja, jalla nižta okžñi kuzziz cĉistanĉha
zoñinacžquízimi, lijitum mazižtakaz.

²⁸ Jalla nekztanaquí Jesusaquí cĉichiĉha:

—Walikam kjaaza. Jalla nuž amiž kjaaztacama kamaquíz niiqui, Yooztan wiñayam
kamaquičha.

²⁹ Jesúsiz ĉiitiquiztan nii líi tjaajiñiqui atipz pecatĉha. Jalla nekztanaquí Jesúsizquíz
pewcziĉha, tuž cĉican:

—ĉJec zoñinacžquíz wejrlaquí okstankaya?

³⁰ Nekztanaquí Jesusaquí kjaaziĉha, tuž quint'ican:

—Tsjii zoñiqui Jerusalén wajtquiztan okatĉha, Jericó cĉita wajt kĉutñi. Nuž jiczquíz
okan, tsjii kjažultan tjañinacžtan zalziĉha. Tjañinacaquí nii zoñi kĉjtĉiĉha, nižaza tjapa
niž zquitinaca niž paaznaca kjañĉiĉha. Nekztanaquí zuma ĉhojricama ana žaafiŉpacha
ecĉiĉha. Nužquíz ticzmaya želatĉha.

³¹ Nekztan tsjii icliz jiliriquí nii jicziñpacha okatĉha. Pero ĉhojricĉha zoñi ĉeržcu, tsjii
latu ĉjuužcu watĉiĉha.

³² Niž jarupachaquí tsjii timpluquíz sirwiñi zoñiqui nii jicziñpacha ojĉkĉizakazza. Nižaza
nii ĉhojricĉha zoñi ĉeržcu, nawĉjuñ zakaz ĉjuužĉha.

³³ Jalla nekztanaquí tsjii Samaria wajtĉiz zoñiqui nii jicziñpacha tjonĉizakazza. Jalla
nuž nii kĉjĉta ĉhojricĉha zoñi ĉeržcu, anĉha okziĉha.

³⁴ Jalla nekztanaquí kĉjĉta zoñžquíz macjatiĉha. ĉhojricama ĉeržcu kullzinĉiĉha
aceitižtan vinžtan. Nuž kullžcu ĉhojri jeržinĉiĉha zumpacha. Nekztanaquí persun
aznuquíz tewžcu ĉjĉiĉha, tsjii alujamintuquin. Jalla nicju cwiĉiĉha.

³⁵ Jaka tažuquí ima wilita jicz ojĉkan nii Samaria wajtĉiz zoñiqui persun paaz jescu,
pizc billete pacĉiĉha alujamintuĉiz zoñžquíz. Nekztan cĉiĉiĉha, “Tii ĉhojricĉha zoñi
am cwiĉinalla. Tii paaz ana alcansaquíz niiqui, wejrqui pjoĉkaĉha, quejžcuquí”.

³⁶ Jaziqui, ĉjakžiltat nii ĉĉjepultiquiztan ĉhojricĉha zoñžquíz zuma okzikaya, lijitum
mazižtakazya? ĉJaknužum am tantii? Kjaaznalla.

³⁷ Jalla nekztanaquí nii líi tjaajiñiqui kjaaziĉha, tuž cĉican:

—Nii oksñi zoñiŉpanĉha zuma mazižtakazqui.

Nekztanaquí Jesusaquí cĉichiĉha:

—Jaziqui oka, nužuzakaz ammi paalla.

³⁸ Jalla nekztanaquí Jesusaquí tíra ojĉkiĉha. Ojĉkan tsjii wajtquin luzziĉha. Jalla nicju
Marta cĉiti žonqui naaža kĉjuyquíz Jesusa kĉjawzinĉha.

³⁹ Martiqui cullacĉiztaĉha, María cĉititaĉha. Mariiqui Jesúsiz ĉjojĉ latuquíz julzinĉha,
nii ĉiĉiñi nonzjapa.

⁴⁰ Martizti naaža kĉjuy lurañquíz kuz tjaatĉha. Nekztan Jesúsizquíz macjatiĉinĉha, tuž
cĉican:

—Wejt Jiliri, taa cullaquiqui wejrlaquí zinallakal tii kĉjuya lurañanacquíz ĉakjurpayĉha. Ana
wejr yanapĉha. ĉAnam wejrtquiztan sint'iya? Am ĉižinžinalla, wejrlaquí yanapajo.

⁴¹ Nekztanaquí Jesusaquí naaquíz kjaaziĉha, tuž cĉican:

—Marta, Marta, kĉjuy lurañanacžquíz kuz tjaaĉiž cĉen am kuzqui turwayzikalala. Jalla
nižtquiztan anĉha llaquitamkalala amqui.

⁴² Tsjii zintallapanikaz žejlĉha ĉekanaquí. Mariiqui nii zuma illzinĉha. Naaquí kuz
tjaaĉha wejrlaquí taku nonzjapa. Anaž ĉecmi taa cullaquí wejrlaquí taku nonžtquiztan apaki
atašaĉha.

11*YOOZ EJPŽQUIN MAYIZIZ PUNTU*

¹ Tsjii nooj tsjii yokquin Jesusaquí Yooz Ejpžquin mayizatĉha. Nuž mayiziz žeržtanaquí
niž tjaajintanacžquiztan tsjii tjaajinta zoñiqui pewcziĉha tuž cĉican:

—Jaziqui wejrlaquí Jiliri, Yooz Ejpžquin mayiziz tjaajznalla. Jaknužt Juanquí niž tjaajinta
zoñinacžquíz Yooz Ejpžquin mayiziz tjaajinĉižlaja, jalla nuž.

² Nekztanaquí Jesusaquí tjaajinĉiĉha, tuž cĉican:

—Yoozquin mayizizqui tužuča:

“Učhum arajpach Yooz Ejp, am tjuuqui zuma honorchiz cjlalla. Nižaza am mantiz timpu irantizquilalla. Nižaza am munañpaj cjlalla tii yokquizimi tsewc arajpachquinami.

³ Nižaza tonjtijapa nižaza zapurutijapa čheriž tjaazcalla, azziz cjisjapa.

⁴ Wejrnacqui pertunchinča wejtnacaquiz ana zuma paañi žoñinaca. Jalla nižtiquiz amqui wejtnaca ujnacaž pertunalla. Nižaza čjul anawalinacami wejtnacaquiz ana watkatala. Antiz čjul anawalinacauiztanami liwriyalla”.

⁵ Nekztan Jesusaqui ninacžquiz cjichizakazza:

—Tsjii žoñiqui amiguchiztača. Nii amiguqui chica aramaž kjuyquiz tjonchiča, tuž cjan: “Amigo, čhjep t'antaž kajžnalla.

⁶ Wejt kjuyquiz tsjii žoñi irantizquichiča jiczquiztan. Anaž wejtac čjulumi žejlča nižquiz tjaazjapa”.

⁷ Nekztanaqui nii žoñiqui kjaaziča kjuyltan, tuž cjan: “Anaž wejr čhižina. Kjuyami zuma chawjčztacha. Nižaza wejt ocjalanacaqui ajpžquiz wejttan čicaž tjaiča. Anaž žaazñi atasacha. Nekztan anal čjulumi tjaayi atasacha”.

⁸ Amiguž cjenami ana tjaayi žaaz pecchiča. Pero nižtami tjaayi žaaziča, ana iya molistita cjejajo.

⁹ Jaziqui cjiwča, Yooz Ejpžquiztan maya, nekztan Yooz Ejpqui ž-tjaaquiča. Nižaza zuma kamaña kjurzna, nekztan wachaquiča. Nižaza kjuy chawjczquiztan t'oc t'ocžcaquiča, nekztan cjetžtaž cjequiča.

¹⁰ Mayñi žoñinacami ninacž mayta tjaataž cjequiča. Nižaza kjurñi žoñinacami nuž kjuržcu wachaquiča. Nižaza chawjczquiztan t'oc t'ocñi žoñinacžquizimi cjetžtaž cjequiča. Jalla nužuča Yooz Ejpžquin mayizizqui.

¹¹ ¿Kjažt tsjii ejpqui ančhucporquiz t'anta mayñiž majchquiz “Tiž t'antaqui” cjan tsjii maz čjalznasajo? Anapanž nuž cjesača. Nižaza, ¿kjažt ejpqui čh'iz mayñi majchquiz “Tiž čh'izqui” cjan zkorakaz čjalznasajo? Anaž nužupan čjalznasacha.

¹² Nižaza ¿kjažt ejpqui walpi žiñi mayñi majchquiz “Tiž walpi žiñiqui” cjan yek'achunca čjalznasajo? Anaž nužupan čjalznasacha.

¹³ Jaziqui ančhucqui ana zum kuzziz cjenami zuma cusasapanikaz tjaasacha persun maatinacžquiziqui. Anča zuma kuzziz Yooz Ejpqui juc'ant zumanaca ančhucquiz tjaasacha. Jakžiltat Espiritu Santo mayačhaja, jalla nižquiz arajpach Yooz Ejpqui Espiritu Santo cuchanžcaquiča, nii mayñinacž kuzquiz.

JESUSIZ QUINTRA CHIICHICA

¹⁴ Wiruñaquí zajraqui tsjii žoñi upa cjskatchiča. Nekztanaqui Jesusaž nii zajra ulanzkattan, nii upa ana čhiñi žoñiqui čhii kallantichiča. Nekztan nuž paatiquiztan nekž žejlñi žoñinacaqui walja ispantichiča.

¹⁵ Yekjap žoñinacaqui Jesusiz quintra chutchiča, tuž cjan:

—Tiiqui anawal žoñikalala. Zajranacž Beelzebú jilirž aztan yekja zajranaca chjatkatča.

¹⁶ Yekjap quintra žoñinacaqui yanz pecatča, arajpach Yooz aztan milajru paañi, ana arajpach Yooz aztan paañi, jalla nii. Yanzjapa pewcziča:

—Jaziqui arajpach milajru paala, —cjan.

¹⁷ Pero Jesusaqui ninacž kuz zizziča. Jalla nižtiquiztan paljaychiča, tuž cjan:

—Tsjii nacionchiz žoñinacaqui t'aka t'aka cjisnaquiz niiqui, ninacaž kichassiž cjen, nii nacionaqui tjetantaž cjequiča. Nižaza tsjii famillchiz žoñinacaqui chaasaquiz niiqui, ninacaž kichassiž cjen nii familiaqui tjetantaž cjequiča.

¹⁸ Nižaza Satanás cjeta zajraž partimi t'aka t'aka cjesaž niiqui, ultimu tjetantaž cjesača. ¿Kjažt nii zajranacž azi tjurasajo? Anaž azziz cjesača. Anapanž tjurasacha. Jaziqui ančhucqui tuž cjiča, wejrqui zajranacž Beelzebú cjeta jilirž aztan yekja zajranaca chjatkatča, jalla nuž cjiča ančhucqui.

¹⁹ Pero wejrqui anaž nužu jalla. Nonžna. Ančuca partinacami zajranaca chjatkatñizakazza. ¿Jecž aztan ninacac chjatkatjo? ¿Beelzebú cjeta zajriž aztan chjatkatjo? Anaž cjesača. Ančuca parti žoñinacaž paatiquiztan intintiz waquiziča, zajriž aztan anapan zajranaca chjatkatasača, jalla nuž intintiz waquiziča. Jalla nižtiquiztan ančhucqui kjanapachača ana zuma razunchizqui.

²⁰ Jaziqui ultim werara Yooz aztanpankal wejrqui zajranaca chjatkatuča. Yooz aztan chjatkatiquiztan, kjanapacha tjeeža, Yooz mantiz kamañ timpu irantizquiča, jalla nii.

²¹ Tsjilla quint'asacha. Tsjii walja armichiz žoñiqui persun kjuya walja tjurt'iñitača. Jalla nižtiquiztan kjuyquiz chjojtanaca segurotača.

²² Nuž armichiz cjen cuntintu želatča. Nekztanaqui tsjii tsjan tjup žoñiqui tjonchiča. Armichiz žoñi atipžcu, tjapa niž armanaca kjañičiča. Nekztan tjapa niž chjojt

cusasanaca kjañchizakazza. Nekztan tjup zoñiqi niiz mazinac̄quiz kjañta cusasanaca tojunchiça.

²³ Nonzna. Jakziltat ana wejt favora cječhaj niiqui, wejt quintraça. Nižaza jakziltat Yooztajapa zoñinaca ana juntjapi yanapçhaj niiqui, wejt quintra Yoozquiztan zoñinac̄z wichanskatça.

ZAJRIZ PUNTU

²⁴ Nižaza Jesusaqui cjichiça:

–Tsjii zakal quint'asacha. Tsjii zajraqui zoñžquiztan ulanžcu kjoñ yokaran ojklaychiça, jeejzjapa kjurcan. Ana jeejz watžcuqui, niiz kuzquiz pinsichiça, tuž cjican: “Jaziqui wejr quepaka jakziquiztan ulanžquituchaja, jalla nicju”.

²⁵ Jalla nuž quejžcu niiz ulanta zoñžquiz zalchiça. Nii zoñž kuzqui tsjii zuma pewžta kjuyažtakaztakalça, nižaza zuma žcayi azquitžta kjuyažtakaztakalça.

²⁶ Jalla nuž zaltiquiztan nii zajraqui pakallak juc'ant anawali zajranaca zjijjui ojkiçiça. Ninaca zjijžcu, tjapa nii zajranacaqui zoñž kuzquiz luzziçiça. Jalla nižtiquiztan nii zoñiqi juc'ant anawaliž cjsiçiça tuqita kamzquiztan, tsjan ana zuma.

²⁷ Jesusaž nuž quint'an, tsjaa maatak žonqui nii žejlñi zoñinac̄zquiztan altu joržtan paljaychiça, tuž cjican:

–Honorchiz cjila am matiñ maaqui, am jwessinž cjen.

²⁸ Nekztanaqui Jesusaqui cjichiça:

–Juc'ant honorchiz cjila Yooz taku nonžñinaca. Nižaza Yooz tawk jaru kamñinaca.

ZOÑINACAQUI SIÑALA CHERZKAZ PECATÇA

²⁹ Tsjan tsjan zoñinacaqui Jesusiž muytataž ajcznatça. Nekztanaqui Jesusaqui paljayi kallantiçiça, tuž cjican:

–Jazta timpu zoñinacaqui ana zum kuzzizza. Milajru siñala paañipankaz pecça. Tuqui timpuqui Jonás cjita zoñiqi želatça, Yooz taku paljayñi. Jalla nižta paljayzqui tsjii siñalažtakazza, Yooziž cuchanžquita cjican. Wejrzakal Yooz taku paljayuça. Anaž iya çjul siñalami želasaçi tii zoñinac̄ztaqui.

³⁰ Yooz Ejpqui Nínive cjita wajtchiz zoñinac̄zquiz Jonás cjita zoñi cuchanžquichiça, casticu tjaaz tjuñi maznajo. Jalla niitaça siñalaqui, nii timpuquiz kamñi zoñinac̄ztaqui. Nižaza Yooz Ejpqui arajpachquiztan wejr cuchanžquichiça. Jalla wejrtça siñalaqui, jazta timpuquiz kamñi zoñinac̄ztaqui. Anaž iya çjul siñalami tjaataž cjequichiça.

³¹ Pjalz tjuñquiziqui, jazta timpuquiz kamñi zoñinacaqui pjaltaž cjequichiça, zuma, ana zuma, jalla nii. Ana zuma zoñinacaqui castictaž cjequichiça. Nonžna. Tuqui timpuqui tsjaa maatak jilir želatça, wartuñtan watja mantiñ. Pjalz tjuñquiziqui naaqui jakatatžcu jazta timpuquiz kamñi zoñinac̄z uj kjana tjeeznaquichiça, jazta zoñinaca casticta cjejajo. Naaqui muzpa ažkquiztanpacha tjonchinça Salomón cjita jiliržquiz zali, niiz zuma razun taku nonžñi. Pero tekzi wejrqui želuça Salomonžquiztan tsjan chekan jiliriqui. Pero jazta timpuquiz kamñi zoñinacaqui wejt taku anaž nonz pecça. Nižtiquiztan juc'ant ujchizza, nižaza juc'ant castictaž cjequichiça.

³² Nižaza pjalz tjuñquiziqui Nínive wajtchiz zoñinacaqui jacatatžcu jazta timpuquiz kamñi zoñinac̄z uj kjana tjeeznaquichiça. Jonás cjita zoñiž Yooz taku paljaytquiztan, nii Nínive wajtchiz zoñinacaqui Yoozquin kuzziz cjsiçiça. Pero tekzi wejrqui želuça Jonasquiztan tsjan chekan jiliriqui. Nižaza wejrtça tsjan chekan Yooz taku parliñtqui. Pero jazta timpuquiz kamñi zoñinac̄z anal Yoozquin kuzziz cjsiçiça, weriž paljayta Yooz taku nonžcu. Nižtiquiztan juc'ant ujchizza. Nižaza juc'ant castictaž cjequichiça.

KJANQUIZ KAMZ QUINTU

³³ Nekztanaqui Jesusaqui quint'ichiça tuž cjican:

–Anaž jecmi tsjii lámpara tjeezcu, chjojzakquiz nonznasaça, nižaza anaž tsjii cajon kjuy-lami nonznasaça. Nii lamparaqui tseecupanž tsjijsnasaça, kjuyquiz luzñi zoñinac̄zquiz kjanajo.

³⁴ Zoñž çhjujquiqui persun kuz lamparažtakazza. Zoñž çhjujqui zumažlaj niiqui nižaza zoñž kuzmi zumazakazza, zuma kjanquiztakaz kamçha. Pero zoñž çhjujqui ana zumažlaj niiqui, kuzmi ana zumazakazza, zumchiquiztakaz kamçha.

³⁵ Zuma kjanquizim kamçhaj niiqui, persun kamaña zumaž cwitazaquichiça, ana zumchi kamañchiz cjisjapa.

³⁶ Tsjii zoñiqi kjanquiztakaz zumapankaz kamçhaj niiqui, nižaza ana çjul ana waliquiz kamçhaj niiqui, liwž niiz kamtanaca zumaž cjequichiça, jaknužt tsjii lámpara wali kjançhaja, jalla nuž.

³⁷ Jesusaž chiyān, tsjii fariseo žoñiqui Jesusa čheri luli kjawziča, niž kjuyquin. Pucul-tanaqui kjuya irantižcu, kjuya luzziča. Nekztan mizquiz julziča.

³⁸ Jesusaqui kjara awjz custurumpi ana cumplichiča ima lujlcan. Jalla nii cheržcu fariseo žoñiqui ispanitichiča. Jesusaqui persun kuzquiz naychiča fariseo žoñiz ispanitita. ³⁹ Nekztanaqui Jesusaqui nižquiz paljajychiča, tuž cjan:

–Tsji žoñiqui tasanaca chuwanaca zawnctankaz awjza, nižaza chjuzja. Nižta iratača ančucqui fariseonaca. Ančucqui zawnctankaz limpuča. Pero kjuyltanaqui ančuca kuzqui walja cjuchinacchizpanča. Ančuca kuzquiz tjangz zizza, nižaza čjul anawali paazmi zizza.

⁴⁰ ¡Zumzu žoñinaca! Yoozqui curpumi kuzmi paachiča. ¡Jalla ančucqui anaž nii zizjo?

⁴¹ Ančuca cusasanacqiztan žoñinacžquiz tjaaz waquiziča. Ančucqui tjapa žoñinacžtan okžfi kuzziz cjesaž niiqui, ančuca kuzmi zumapanž cjesača Yooz Ejpž yujcquiziqui, ana kjara awjz custurumpi paažcumi.

⁴² ¡Ayii pori fariseonaca! Ančucqui Yoozquin diezmos tjaayinčucča, nižaza tjapa plantanacqiztanami diezmos tjaayinčucča. Jalla nuž paacan walikazza. Pero nuž tjaacanami ančucqui ana lijituma zuma kamañquiz kamchinčucča, nižaza ana Yoozquin kuzzizčucča. Zuma kamzqui, nižaza Yoozquin kuzzizqui, jalla niča chekanaqui. Pero diezmos tjaazmi zakaz cumpliz waquiziča.

⁴³ ¡Ayii pori fariseonaca! Ajcz kjuyquiziqui tucquin julzkaz pecča, nižaza honorchizkaj cjiw cjiča ančucqui. Nižaza ančucqui jakzi calliranami zuma rispitchizkaž wejr tsaanja cjiča ančucqui.

⁴⁴ ¡Ayii pori fariseonaca! Nižaza ¡ayii pori lii tjaajinaca! Ana lijitum kuzzizčucča. Ančuca liiqui cjiča jakziltat tsjii sipultur juntun ojkchaja jalla niiqui Yoozquin ana macjatasacha. Jalla nižta irata ančucqui žoñinacžquiz ana Yoozquin macjatskatča. Pero žoñinacaqui ančucaž puntu cjinča, “Yooz žoñinacača ninacaž”. Ančucqui ninaca incallča, ana zuma kuzziz cjen. Ančucqui ana pajta sipulturažtakazza.

⁴⁵ Jalla nuž chiitiquiztan tsjii lii tjaajiniqui kjaaziča, tuž cjan:

–Tjaajini Maestro, jalla nuž chiižcu, wejnacaquiz ana zumam chiiča.

⁴⁶ Nekztanaqui Jesusaqui cjičiča:

–¡Ayii pori lii tjaajinaca! Ančucqui parti žoñinacžquin niž jaru niž jaru ch'ama cuzturumpinaca yapchinčucča: kuzi cuntažtakaz jepzinčucča. Ch'ama cuzturumpinaca yapchiž cjenami, ančucqui anaž tsjii loc'anžtanami yanapz pecča, žoñinaca nii cuzturumpinaca cumplajo.

⁴⁷ ¡Ayii! Ančucqui anča t'akjiriča. Ančuca tuqita atchi ejpnacaqui Yooz taku paljayni profetanaca conchiča. Ančucpacha nii paljayinacž sipulturanaca kjuyfiča, niwjtanaqui ančucqui rispittažokaz cjiča. Pero ančucqui anaž ultimu rispitiča.

⁴⁸ Tuquiqui ančuca ejpnacaqui nii Yooz taku paljayinaca conchiča. Nuž conchi cjenami ančucaquiztan walikazza. Anzimi ančucqui sipulturanaca kjuyča, zuma žoñižtakazza. Pero ultimquiziqui ančucqui ninacaž paljajta Yooz taku anazakaz nonz pecča.

⁴⁹ Jalla nižtiquiztan Yooz Ejpqui ančuca puntuquiztan zuma razun taku chiičiča, tuž cjan: “Wejrqui wejt taku paljayni profetanacami apostolonacami cuchanžcača. Nekztanaqui yekjananaca nii Yooz taku paljayinacžquiztan contaž cjequiča. Yekjapazti kijchtaž cjequiča”.

⁵⁰ Tii muntu kalltiz, niwctanpacha Yooziž cuchanžquita žoñinaca conchiča ančuca tuqita atchi ejpnacaqui. Ančucqui nižta ana wal kuzzizakazza. Jaziqui Yoozqui jazta timpuquiz žejlfi žoñinacžquiz zakaz casticaquiča.

⁵¹ Tsjii Zacarias cjita žoñiqui altaržtan timplužtan, jalla nii taypquiz contatača. Abel contiquiztanami Zacarias contiquiztanami nižaza tjappacha contanacqiztanami Yooz Ejpqui jazta timpuquiz žejlfi žoñinacžquiz casticaquiča.

⁵² ¡Ayii pori lii tjaajinaca! Liwriifi Yooz taku ližcu, zizcu, žoñinacžquiz ana nii tjaajinčinčucča. Yooz taku tsjii llave irata tanzinčucča. Nii llave tanžcanpacha ančucmi liwriifi Yooz jiczquiz ana luzzinčucča. Y nižaza nii llave tanžcu, ana cjetžinčinčucča, liwriifi Yooz jiczquiz žoñinaca luzajo.

⁵³ –Jalla nuž chiižinžcu Jesusaqui ojkchiča.

Nii lii tjaajinacžtan nii fariseonacžtan, jalla ninacaqui muzpa zawjchi cjissiča Jesusiž quintra. Nižaza ninacaqui Jesusižquiz wiltan wiltan pewcziča,

⁵⁴ Jesusiž quintra tsjii ujchiz jwezjapa. Jesusiž kjaaztiquiztan uj tjojtunz pecatča.

¹ Jesusaž nuž tjaajnan, zmali wacchi zoñinacaqui tjonchiča, waranka waranka. Nižaza zmali porapat tewksascan tewksascan tjonchiča. Primeraqui Jesusaqui niž tjaajnta zoñinacžquiz paljaychiča, tuž cjan:

–Fariseo zoñinacaqui anaž ultimu Yoozquin kuzzizza. Anaž ligitum Yooz zoñinacača, aunquimi ligitum zoñižtakaz cjeciñi cjenami. Ninacžquiztan zumpachaž cwit'azaquiča, ana ninaca irata cjisjapa.

² Tsji noojiqui tjapa chjojzakuñ paatami tjeežtaž cjequiča. Nižaza tjapa chjojzakuñ pinsitam ziztaž cjequiča. Tsji noojiqui zoñž ultim kuz tjeežtaž cjequiča.

³ Nižaza jamazit chiitanacami kjana ziztaž cjequiča. Chjojzakuñ chiitanacami tjapa zoñinacaqui zizaquiča.

¿JECŽQUIN EKS WAQUIZIYA?

⁴ Jaziqui ančhucqui, wejt mazinaca, tuž wejr chiižinuča. Anača eksqui tii curpu alaja conñižquiziqui. Curpu conžcu anaž iya čhjulumi payi atasacha.

⁵ Jecžquin antiz ančhucqui eks waquiziya? Yooz Ejpžquin eks waquiziča. Yooz Ejpqui zoñž curpu žeti tucuzinskatžcu zoñž animumi infiernuquin tjojtžjapa azzizza. Jalla nižquizza chekanaqui eksqui.

⁶ Tsji pjijska wežlaqui pizc paazkaz cwističa. Anača juc'ant valorchiz cjen, Yooz Ejpqui zapa wežlallami cjuñča.

⁷ Pero zapa zoñžquiz juc'anti cjuñča. Nižaza ančuca ach charami kanžintača, zintallquiztan zintalla. Anaž ančhucqui tsuca. Nii wežlanacžquiztan ančhucča juc'ant valorchizqui. Yooz Ejpqui ančhuc juc'ant cwitaquiča wežlanacžquiztan.

JESUCRISTUZ FAVORA CJEE

⁸ Ančucaquiz cjiwča: Jakziltat parti zoñž yujcquiz wejt favora cječaj niiqui, nižaza wejrqui Yooz anjilanacž yujcquiz ni zoñž favorazakal chiyača.

⁹ Jakziltat parti zoñž yujcquiz wejr ana pajñi nicačhaj niiqui, nižaza wejrqui Yooz anjilanacž yujcquiz ni zoñž quintra ana pajñi zakal cjeeča.

¹⁰ Jakzilta zoñit Yooz Epiž cuchanžquita Zoñž quintra chiyačhaj niiqui, pertuntaž cjesača. Pero jakzilta zoñit Yooz Espiritu Santuž quintra chiyačhaj niiqui, anapanž wira pertuntaž cjequiča.

¹¹ Wiruñaqi ančhucqui juezanacž yujcquin nižaza jilirinacž yujcquin chjichtaž cjequiča, ajcz kyuyquiz. Jalla nuž chjichtiquiztan ana kuz turwaysi cjequiča, jaknužt chiyačhaja, nižaza jaknužt tjurt'azalaja, jalla nii.

¹² Ančuca chiiž ora Yooz Espiritu Santuqui ančuca kuzquiz chiižjapa tjaajznaquiča, jaknužt chiižalaj, jalla nii.

CWITAZA, ZMAŽŇI KUZIZ ANA CJISJAPA

¹³ Tsji zoñiqui Jesusižquiz paljaychiča, tuž cjan:

–Wejt Tjaajñi Maestro, wejt jilžquiz chiinalla, wejt parti irinsa tjaa-ajo.

¹⁴ Nekztanaqui Jesusaqui nižquiz cjichiča:

–Jila, čkjažtquiztan amqui wejr jilirižtakaz cheržjo? Anapanž wejr juež partirtqui, ančuca quija azquitzjapaqui.

¹⁵ Nižaza Jesusaqui ninacžquiz cjichiča:

–Persun kuzquiz naazna, nižaza cwitaza ana zmažñi kuziz cjisjapa. Zoñž wira kamañaqi anaž niž wacchi cusasanacquiztan yatisinsa.

¹⁶ Jalla nekztanaqui Jesusaqui tii quintu quint'ichiča, tuž cjan:

–Tsji ricach zoñi želatča. Nii zoñž yokquiziqui zkalanacaqui ancha cusa pookchiča.

¹⁷ Jalla nuž pooktiquiztan nii ricach zoñiqui kuzquiz pinsichiča, tuž cjan: “Čkjažt wejr cjequejo? Wejt yaaz kjuyanacaqui tii ajta zkal čhjeri anaž wacasacha”.

¹⁸ Jalla nekztanaqui pinsichiča, tuž cjan: “Aaaa. Tuž jazic cjeeka. Wejt zkala yaaz kjuyanaca pajlnaka. Nekztanaqui tsjan pajk kjuyanaca kjuysnaka. Jalla nekž tjappach zkal čhjeri yaaznaka, nižaza tjapa wejt cusasanaca”.

¹⁹ Jalla nekztanaqui nii ricach zoñiqui niž persun kuzquiz cjichiča: “Aaaa. Wejrqui zmali cusasanaca yaazinča, nižaza zmali čherinaca yaazinča, ažk wata tjurñipacha. Jeejnaka, nižaza cusa lujlsnaka, licsnaka. Nižaza cuntintul cjeeka”.

²⁰ Pero Yoozqui nii zoñžquiz cjichiča, “Zumzu zoñimča amqui. Tižwanpacha amqui ticznaquiča. Am zkal čhjerimi am cusasanacami nii yaaztanacami inamayaž cjequiča, čhjuljapat cjeequi neejo? Jecžtapan cjeequi neejo?”

²¹ Jaknužt nii ricach zoñžquiz watchižlaja, jalla nižta irataž wataquiča persunjapanakaz cusasa juntjapñi zoñinacžquiziqui. Nižta zoñinacaqui Yooz yujcquiziqui poripanž cjisnaquiča.

YOOZ EJPQUI NIIZQUIN KUZIZ ZOÑINACA CWITICHA

²² Jalla nekztanaqui Jesusaqui niiz tjaajinta zoñinaczquiz cjichicha:

—Anchucacqui tuž cjiwčha. Zoñiqui žejtzjapaqui lujl čheri pečha. Jalla nuž cjenami, anchucqui anača čherinaczquiz kuzqui llaquizizkatzqui. Nižaza zoñiqui curpu wali cjisjapa zquiti pečha. Jalla nuž cjenami anchucqui anača zquitinaczquiz kuzqui llaquizizkatzqui.

²³ Zoñž žetiqui čherquiztan juc'anti importičha. Nižaza persun curpumi zquitquiztan ju'canti importičha.

²⁴ Wežlanaczquiz chernza. Anaž zkalami čhjaczha. Nižaza anaž ajza. Nižaza ana čheri yaaz quetallchizza. Nižaza ana čheri yaaz kjuychizza. Jalla nuž cjenami nii wežlanacztaqui lujl čherinacami panž žejlčha. Yooz Ejpkaž čheri tjaačha. Pero anchucqui Yooz yujcquiziqui wežlanaczquiztan juc'antiž importičha. Jaziqui anchucaquiz zakaz Yoozqui lujl čheri tjaaquičha, žejtzjapaqui.

²⁵ Anaž jec kolta zoñimi persunpacha tsjan lajcha paki atasachha, llaquiziñi kuzziz cjenami anča lajcha pečni kuzziz cjenami.

²⁶ Jalla nižta ana atchuczaj niiqui, čkjažtiquiztan lujl čherinaczquizimi zquiti-naczquizimi anchuca kuzqui llaquizizkatjo?

²⁷ Plantanacz pjajkallaž chernza. Anaž langza. Anaž kawančha. Yoozqui nii pjajkallanacz pajkkačha. Zmali finu zquiti cujtžcumi anaž jecmi pjajkallquiztanami juc'ant c'achalla cjesačha. Nižaza finu zquiti cujtžcumi nii anča ricachu Salomón jiliriqui anača pjajkallquiztan juc'ant c'achaqui.

²⁸ Plantanacaqui tsjii upacamakaz c'achallačha. Nekztanaqui jakatažu kattažu tsjii jurnuquiz tjutjunzjapa ujtžačha. Jalla nuž cjenami Yooz Ejpkaž nii plantanacami nižta cwitičha. Anchučha Yoozquin ana tjapa kuzziz zoñinaca. Anchuczti Yooz yujcquiziqui čjul plantaquiztanami juc'antiž importičha. Jalla nižtiquiztan Yoozqui anchuc juc'anti cwitičha; zquitchiz panž cjequičha.

²⁹ Jalla nižtiquiztan anchucqui ana anča llaquiziñi kuzziz ojklaya, čjul čheri kjurzquiztanami.

³⁰ Tii muntuquiz ana Yoozquin criichi zoñinacaqui anča llaquiziñi kuzziz ojklayčha nižta cusasanaca kjurcan. Anchucqui anača nižta llaquiziñi kuzziz ojklayzqui. Werar Yooz Ejpchizčučha. Yooz Ejppui zizza, čjulut anchuc pečhaj, jalla nii. Anchucqui čheri, zquiti, cusasanaca pečha, žejtzjapa, jalla nii zizza Yooz Ejppui.

³¹ Nižtiquiztan anchucqui Yooz Ejpžquinpankaz walja kuzziz cjee. Nižaza niiz mantita zuma kamañquiz kuzziz cjee. Nekztanaqui Yooz Ejppui anchucaquiz čjulumi cawalikaz tjaaquičha.

ARAJPACHQUIN CUSASANACCHIZ ZOÑINACA

³² Nižaza Yooz Ejppui anchuca uchaquičha mantiñi puestuquiz. Jalla nužuča Yooz munañpaqui. Tii muntuquiz žejlcan anaž eksna, anchucqui wejť uzanaczčučha, aunqui kolucullami.

³³ Anchuca cusasa žejlñinaca tuysna. Nekztan t'akjiri kamañi zoñinaczquiz tojna. Tii muntuquiz žejlcan jaknužť anchucaqui zuma žak quels tjaczaja, jalla nižta irata zuma munaziñi kuz tjacz waquizičha wiñaya zuma kamzjapa. Arajpachquin zuma cuntintu kamzjapa, anchuca kuz tjaczna, zuma azquičha. Tii muntuquiziqui tjañ zoñiqui anchuca cusasanaca kjañasačha. Arajpachquin tjañ zoñinaca ana luzasačha. Nižaza tekziqui tjujtami cjurimi anchuca zquitinaca lulasačha. Arajpachquin tjujtami cjurimi ana želasačha.

³⁴ Jakzilat tii muntuquiz walja cusasanachizlaja, tii muntuquiz kamañ wirquiz kuz tjaačha. Pero jakzilat arajpachquin kamañ wirquiz kuz tjaačhaja jalla niiqui arajpachquin walja cusasanacchiz cjequičha.

KUZ TJACZI CJEE

³⁵ Nižaza Jesusaqui tii quintu quint'ichicha, tuž cjican:

—Arajpachquin ojczjapa anchucqui kuz zuma tjaczi tjewžna, tsjii tjeežta lama-paražtakaz.

³⁶ Tižtažtakaz cjee. Tsjii patruaqui zalsñi pjijstiquin ojčkichičha. Piyunanacaqui patruñ cuttižquiz tjewža, niiz irantižquitan kjuy zan chawjcz cjetžinzjapa. Jalla nižta irata anchucqui Yooz tjonz tjuñi zuma tjewžna.

³⁷ Weraral cjiwčha. Patruaž tjonz orauki jakzilta piyunanacat tjaji wajtsi tjewznačhaja, jalla ninacaqui cuntintuž cjee. Jalla nii piyunanacaqui patruñ misquiz julskattaž cjequičha. Nekztanaqui nii patru napachaž čheri tjaaquičha, nižaza ninaczquiz atintaquičha. Jalla nižta irata Yoozqui paaquičha niiz tjonz tjewžñinaczquiz.

³⁸ Chica aramami, kjantatimi, čjulorakat nii patruaqui irantižquičhani. Nii orauki jakzilta piyunanacat tjaji wajtsi tjewz tjewznačhaja, cuntintuž cjequičha.

³⁹ Tsjiilla zakaz cjiwča, ančucaž zizjapa. Tsjii kjuychiz žoñiqui čhjulorat tjañi tjonachaja, jalla nii ora zizaquič žoñiqui, tjañi wajtsipan tjewznaquiča, nii tjañi ana luzkatzjapa, nižaza ana tjangskatzjapa. Tjañi tjonz ora zizcu, anapan niiz kjuya nužkaz ecasača.

⁴⁰ Ančhucmi nižaza Yooz tjonz tjuñi walja listu tjacziz tjewžna. Tiripintit tsjii ana pinsita oraqui wejrqui quejžcača. Wejrčha tsewctan cuchanzquita Yooz Žoñtqui.

PIZC PUNTA PIYUNANACA

⁴¹ Jalla nekztanaqui Pedruqui Jesusižquiz pewcziča, tuž cjican:

–Wejt Jiliri, žtii quintu quint'ichamča wejtnacaltajapakazkaya? už žtjapa žoñinacžtajapa, jaa?

⁴² Jesús Jiliriqui kjaaziča, tuž cjican:

–Tsji kjuj cwitiñi žoñi želatča zuma cumpliñi, nižaza zuma intintiñi. Nii kjuychiz tuyñuqui zuma žoñž kjarquiz niiz kjuya ecchiča, tjapa nii kjuyquiz žejlñinacžtan. Chjeri tjaaz ora chjeri tjaajo, jalla nuž zakaz ecchiča nii žoñž kjarquiz. Žject nii zuma cumpliñi žoñejo?

⁴³ Jalla tiiča nii žoñiqui. Kjuj tuyñu quejpsquizcama jakzilta žoñit niiz kjuya zuma cwitican žejlčhaja, jalla niiča zuma cumpliñi žoñiqui. Nižaza cuntintuž cjequiča nii zuma cwitiñi žoñiqui.

⁴⁴ Wejrqui weraral cjiwča. Kjuya tuyñuqui cumpliñi žoñž kjarquiz tjapa kjuj cusasanaca ecasača.

⁴⁵ Tsjemata cwitiñi žoñi zakaz želatča. Nii žoñiqui kuzquiz pinsičiča, “Kjuychiz tuyñuqui anaž uri tjonasaž, jaz”, cjican pinsičiča. Jalla nekztanaqui nii kjuychiz luctaka cjiñi maataka cjiñi piyunanaca wjajtñitača. Nižaza nii žoñiqui persun lujlsquin licsquin kuz tjaachiča.

⁴⁶ Tiripintit tsjii ana pinsita nooj kjuychiz tuyñuqui quejžquičiča. Tsji ana zizta ora quejžquičiča. Jalla nižtquiztan kjuychiz tuyñuqui nii ana zuma cwitiñi žoñžquiz juc'anti anawalž casticu tjaquiča. Nii ana zuma žoñiqui jaknužt ujchiz žoñinacž castictaž cječhaja, jalla nižtapacha castictaž cjequiča.

⁴⁷ Tsji piyunaqui zumpacha niiz patrunaž pecta langz zizziča. Niiž patrunž langz zizcanpacha, ana langziča. Jalla nuž zizcanpacha, ana langztiqiztanaqui juc'anti castictaž wjajtzaž cjequiča.

⁴⁸ Nižaza jakzilta piyunat ana niiz patrunaž pecta langz zizzaja, jalla nižta cjenpacha ana cumpličhaja, jalla niiqui upa casticta cjequiča. Jakzilta žoñžquiz wacchi cusasanaca cwitajo tjaatčhaja jalla nii žoñiqui tjapa nii cusasanacquiztan quint'istanča. Jakzilta žoñžquiz wacchi cusasanaca cwitajo cumpjiita cječhaja, jalla nii žoñiqui cusasanacchiz tuyñužquiz quint'istanča tjapa cumpjiita cusasanacquiztan.

IYA TJAAJINTA

⁴⁹ Tsjiilla zakaz quint'ičiča Jesusaqui, tuž cjican:

–Tekz werjqui tsji uj peksnižtakaz tjonchinča. Nii uj peks oraqui wajž cjila.

⁵⁰ Wejrqui tsji wali pajk prueba watača bautismužtakaz. Nižaza nii watscama, ancha llaquital cječha.

⁵¹ Werž tjonitquiztan žoñinacaqui anazumquin cjequiča; t'aka t'akaž cjequiča, wejtquiz criichinaca, ana wejtquiz criichinaca, jalla nuž.

⁵² Tii timpuquiztan nawjchuc tsji famillanacami t'aka t'akaž cjequiča. Tsji famillquiz pjijskaltan cječhani, čjepultanac quintraž cjequiča pucultan žoñžjapaqui.

⁵³ Nižaza ejpžtan persun majchtan quintraž cjequiča. Nižaza majchžtan persun ejpžtan quintraž cjequiča. Nižaza maatan persun tjunmat matatan quintraž cjequiča. Nižaza naa tjunmat matatan persun maatan quintraž cjequiča. Nižaza kjan maatan wazatan quintraž cjequiča. Nižaza wazatan kjanatan quintraž cjequiča. Jalla nuž cjisnaquiča, wejtquiz criichinacžtan ana wejtquiz criichinacžtan.

KUZ CAMPIYA, ANA CASTICTA CJEYAJO

⁵⁴ Jalla nekztanaqui Jesusaqui žoñinacžquiz cjichiča:

–Ančhucqui cjiñchucča, wacchi tsjirinaca tajatan ulanžcaquič žoñiqui, “chijnachani”, nuž cjiñchucča. Nekztan jalla nuž chijnž watača.

⁵⁵ Nižaza wartan quera queržcaquič žoñiqui, “kjutñit cječhani”, nuž cjinčhucča. Nekztan jalla nuž kjutñiž watača.

⁵⁶ ¡Hipócrita cheechi žoñi! Ančhucqui jana ligitum kuzziz žoñinaca! Tjamž puntu tsjirž puntu walja zizni chiiñchucča. Žkjažtiqiztan Yooz siñalanaca ana tantiyasajo? Kuz campiya, ima casticz ora irantan.

⁵⁷ Nižaza ĺkjažtiqiztan kamz puntu ana tantiyasajo, jaaċha zuma kamċhaja, jaaċha ana zuma kamċhaja, jalla nii?

⁵⁸ Jakziltat am quijžcu jiliržquin ċhjechaċhaja, jalla niizqiztan pertunam mayizaquičha ana enenžcu, ima jiliržquin irantican. Am quija ana pertunazta cjenauqi, nii jiliriqui policiquiz am intirjasatċha. Nekztanaquqi nii policiaquqi am carsilquiz chawcwasatċha.

⁵⁹ Nekztanaquqi wejrquqi ċjiwċha, carsilquiztanaquqi anapanim ulnasatċha, liwċj tjjappacha paczcama. Anziquqi kuz campiya; Yoozquiztan pertuna maya, ana casticta cjeajajo.

13

YOOZQUIN KUZUZIZ CJEE

¹ Nii orapacha tsjii kjaž žoñinacaquqi quintu zjjecċhiċha, Jesusižquiz mazñi. Tuž ċjican quint'ichiċha. Pilato ċjita jiliriqui tsjii Galilea wajtċhiz žoñinaca conkatchiċha. Nii conta žoñinacž ljocquqi animal ljocnacžtan t'ajziċha. Tuquiqui animala contkalċha, Yoozquin ofrenda tjaazjapa.

² Jalla nuž nonžcu Jesusaquqi ċjichiċha:

—ĺkjažtiqiztan Galilea wajtċhiz žoñinacžquiz nuž anawali watchitajo? ĺParti Galilea wajtċhiz žoñinacžquiztan juc'ant uċhiz ninacajo? ĺJalla nižtazaž anċhuc pinsiya?

³ Anċhucquqi anaċha nižta pinsa. Anċhucquqi Yoozquin kuzuzizpan ċjee. Ana nižta ċjisnaquiz niiqui, anċhucquiz juc'ant anawaliž watasatċha.

⁴ Jesusaquqi quint'ichizakazza, tuž ċjican:

—Tsjii tunca quinsakalcuni žoñinacaquqi ticziċha Siloé ċjita wajt campanturi jalla ninacž juntuñ pajlžtiqiztan. ĺkjažtiqiztan nižta watchitajo? ĺParti Jerusalén wajtċhiz žoñinacžquiztan juc'ant uċhiz ninacajo? ĺJalla nižtazaž anċhuc pinsiya?

⁵ Anċhucquqi anaċha nižta pinsa. Anċhucquqi Yoozquin kuzuzizpan ċjee. Ana nižta ċjisnaquiz niiqui, anċhucquiz juc'ant anawaliž watasatċha.

ISRAEL ŽOÑINACŽ PUNTUQUIZTAN

⁶ Jalla nekztanaquqi Jesusaquqi tsjii quintu zakaz quint'ichiċha, tuž ċjican:

—Tsjii žoñiqui niiz yokquiz jiws muntinaca ċhjacċhiċha. Tsjii nooj ojċhiċha “jiwsa pookċižcaa” ċjican, ojċhiċha. Irantižcu, muntinacquiz ana ċhjul jiws frutanaca watchiċha.

⁷ Jalla nižtiqiztan nii yoka cwitiñi žoñžquiz ċjichiċha: “Ĉera, ċhjep wata jiws frutanaca ċjuri tjonċinċha. Ana jiws frutanaca pookċhikalċha. Jaziquqi tii muntinaca k'atzna. Inapanikaz žejlċha.”

⁸ Jalla nekztanaquqi nii yoka cwitiñi žoñiqui patrunžquiz ċjichiċha: “Wejt patruna, tii watamakaz žela ċjee. Wejrquqi yokal zumpacha ċjullznaċha, nižaza wanžtan wanit'aċha.

⁹ Jalla nižtiqiztanaquqi jiws frutanaca pookz atċhani. Anapan pookaquiz niiqui, nekztanaquqi k'atžtaž ċjequičha”. —Jalla nuž quint'ichiċha Jesusaquqi.

TSJAA MAATAK ŽONQUI ĈJETINTATAĈHA

¹⁰ Tsjii jeejz tjuñquiziqui, Jesusaquqi ajcz ċjuyquiz tjaajnatċha.

¹¹ Jalla nekz želatċha tsjaa laa maatak žon. Tunca quinsakalcun watanaca laataċha. Tsjii zajraqui naa žon taj ċhutu paatkalċha. Nižtiqiztanaquqi anawira ts'iru tsjitsniñtaċha, ana ċhjul paazjapami.

¹² Jesusaquqi naa žon ċheržcu, ċjawziċha, nekztan tuž ċjichiċha:

—Cullacalla, am laaquiztan liwriita ċjequičha.

¹³ Nekztanaquqi Jesusaquqi niiz ċjaržtan lanziċha naa zonaquiz. Jalla nii orapacha naa žonqui ts'iru ċjissinċha. Nižtiqiztan Yooz Ejpžquin honora paljayċhiċha.

¹⁴ Nii ajcz ċjuy jilirizti Jesusižjapa žawziċha, nii jeejz tjuñquiz ċhjetintiquiztan. Nekztanaquqi nii jiliriqui žoñinacžquiz ċjichiċha:

—Sojta tjuñikaz langz waquiziċha. Jalla nii langz tjuñiran laanacaquqi tjonsa ċhjetintaz ċjisjapa. Anaċha jeejz tjuñquiziqui tjonzquqi.

¹⁵ Jalla nekztanaquqi Jesús jiliriqui nii jiliržquiz ċjichiċha:

—Ana zum kuzuziz žoñinaca. Jeejz tjuñquiziqui tjapa anċhucanacaquqi wacami aznumi cutzniñċhucċha, ċjaz liqui okajo, žana jaa?

¹⁶ Taa maatak žonqui Abrahamž majċ maatquiztan tjoninċha. Tunca quinsakalcun wata ċhututaċha, Satanás ċjita zajraž nuž ċhutu paañiz ċjen. ĺKjažt tii jeejz tjuñquiziqui taa laa žonqui ana ċhjetinta ċjesajo? Jeejz tjuñquizmi ċhjetinžpanikazza.

¹⁷ Jesusiž nuž ċhiitiquiztanaquqi tjapa niiz quintra žoñinacaquqi azzi quirċhiċha. Parti žoñinacazti cuntintutataċha, Jesusaž nuž pajk milajrunaca paachiž ċjen.

YOOZ MANTAPARU OJKŃI ŽOÑINACŽ PUNTU

¹⁸ Jalla nekztanaquqi Jesusaquqi ċjichiċha:

–Tižtača Yooz mantaparu ojkñi žoñinacž puntuqui. Jalla nii puntuqui intintazkatasacha, mostaz cjita semillž puntu chiitiquiztan. Jalla tužucha.

¹⁹ Tsjii mostaza cjita semilla žejlča, ancha zkolta. Žoñiž čhjectan, walja pakjiž pakjča, tsjii pakj muntž, niža pakji. Nižaza nii mostaz muntiquiz wežlanacaqui tjuraž paasača. Jalla nužupan Yooz mantaparu ojkñi žoñinaca yapaquiča, mostaz munti pakñiila, jalla niža irata.

²⁰ Nižaza Jesusaqui cjichiča:

–Tii takunacžtzanakaz Yooz mantaparu ojkñi žoñinacž puntu intintazkatasacha. Jalla tužucha.

²¹ Tsjaa maatak žonqui čhjep tupu jac'užtan levaturžtan t'ajzinča. Nekztanaqui tjappacha nii t'anti masaqui t'amchiča. Jalla niža iratača, tjapa kjutñi tii muntuquiz žoñinacaqui Yooz mantita kamañchiz cjisnaquiča.

LIWRITA ŽOÑŽ PUNTU

²² Wiruñaqi Jerusalén jiczquiz ojkan, Jesusaqui tjaajinchiča. Jakziran watatčhaja, jalla nii watjaran jochiran tjaajinchiča.

²³ Nuž tjaajan, tsjii žoñi qui Jesusižquiz pewcziča, tuž cjican:

–Wejt jiliri, ¿koluckaz liwriita žoñinacajo?

Nekztanaqui Jesusaqui kjaaziča, tuž cjican:

²⁴ –Ančhucqui tjapa kuz cjee, arajpach ojkñi zkocz jicz zanquiz luzjapa. Wejrqui ančhucquiz cjiweča. Casticz tjuñquiziqui tjapa žoñinacaqui luz pecaquiča. Nii oraqui anaž ataquiča. Jalla nižtiquiztan anziqiu liwriñi zanquiz luzjapa, tjapa kuz cjee.

²⁵ Tsjii noojiqui arajpach kjuychiz tuyñuqui tsijsnaquiča liwriñi zana chawjczjapa. Ančhucqui, zawnctan cjiñinaca, nii chawjczta zanquiz t'ok t'okaquiča, tuž cjican: “Wejt jiliri, cjetznalla, cjetznalla”. Kjuychiz žoñi qui kjaaznaquiča, tuž cjican: “Anal ančhuc pajuča. ¿Jecnactčhuckazlaj ančhucqui?”

²⁶ Jalla nuž chiitiquiztan ančhuczi zakaz chiyačhani, tuž cjican: “Amtan chica lujchinča. Nižaza wejtnaca wajt calliran tjaajinčamča”.

²⁷ Pero nii arajpach kjuychiz tuyñuqui kjaaznaquiča, tuž cjican: “Ančhucqui anapal pajuča, cjiwla. Wejtquiztan oka, tjapa ančhucqui ana zuma kuzzizčhucča”.

²⁸ Nekztan Jesusaqui cjichiča:

–Abrahamžtan, Isaacžtan, Jacobžtan, tjapa Yooz taku paljayñi profetanacžtan, tjapacha ninacaqui arajpach Yooz kjuyquiz želaquiča. Ančhuczi zawnctanpanikaz želaquiča. Jalla nuž zawnctan žejlcan ančhucqui kaaquiča, nižaza ižkež jojaquiča, ana luzzucaž cjen.

²⁹ Tjapa kjuttan criichi žoñinacaqui arajpach Yooz kjuyquin luzaquiča, užatan, wartan, tajatan, tuwantan, nuž tjapa kjuttan. Nižaza nii luzzi žoñinacaqui arajpach Yooz kjuyquiz cusa atintitaz cequiča. Yooz čhjeri luli julznaquiča.

³⁰ Nižaza Yoozqui arajpachquin yekjap tii muntuquiz wirquin cjiñi žoñinaca tucquin cjskataquiča. Nižaza yekjap tii muntuquiz tucquin cjiñi žoñinaca wirquin cjskataquiča.

JERUSALEN CJITA WAJTQUIN TICZ PUNTU

³¹ Jesusiž taku žeržtan, nii noojpacha, tsjii kjaž fariseo žoñinacaqui tjonchiča, tuž cjican:

–Tekztan am oka. Herodes cjita jiliriqui am konz pečča.

³² Jalla nekztanac Jesusaqui kjaaziča, tuž cjican:

–Ančhucqui nii mañus Herodesquin oka. Niižquin chiižca, tuž cjican: “Tsjii kjaž tjuñi tirapal Yooz obranacal paa-uča, zajranaca chjatkatan, laanaca čhjetincan. Nekztan tsjii kjaž tjuñiquiztan wejt obra žerznača”.

³³ Pero wejrqui tsjii kjaž tjuñi tiral kamača, Jerusalén wajtquin ticzcama. Jerusalén wajtquin Yooz taku paljayñi profetanacaqui ticstanča.

³⁴ ‘Jerusalén, Jerusalén wajtchiz žoñinaca! Ančhucqui Yooz taku paljayñinaca coničhucča. Nižaza Yooziž cuchanzquita žoñinaca maztan čhjaquiñchucča. Wallpiqui persun ozmachanaca kjarž koztan juntiñil, jantey. Jalla niža irata wejrqui tii wajtchiz žoñinaca juntiz pecuča. Ančhuczi ana wira wejtquin tjonz pequiñchucča.

³⁵ Jalla nižtiquiztan ančhuca wajt yokaqui ana Yooz kjarquiz žejlča. Nižaza wejrqui cjiweča. Tsjii noojiqui ančhucqui wejt puntuquiztan chiyaquiča, “Honorchiz cjila, tii Yooziž cuchanzquita žoñi qui”. Jalla nii oracama, ančhucqui wejr ana wilta cheraquiča.

14

TSJII CURPU TJUUCHI ŽOÑIQUI ČHJETINTATACHA

¹ Tsjii jeež tjuñquiziqui Jesusaqui tsjii fariseo jilirž kjuya luli ojkchiča. Yekja fariseo žoñinacaqui Jesusa awayt'atča.

² Nižaza nii kjuyquiz želatča tsjii curpu tjuuchi zoñi. Jesúš žcati želatča.

³ Nii cheržcu Jesusaqui fariseo žoñinacžquiz lii tjaajñinacžquiz, jalla ninacžquiz pewczicha, tuž cjan:

—Žeejz tjuñquiziqui tsjii laa zoñi čhjetnasay? už žana čhjetnasaj?

⁴ Ninacazti ch'ujukaz cjissiča. Nekztanaqui Jesusaqui laa zoñi kjawžcu, čhjetinčiča. Nekztan laa zoñžquiz cjichiča:

—Oka amqui —cjicanaqui.

⁵ Nekztanaqui Jesusaqui fariseo žoñinacžquiz tuž cjichiča:

—Jeejz tjuñquiz cjenami aznumi wacami tujquiz tjojtsiž cjen okžcu, žanaž jooznasajo?

⁶ Jalla nuž čhiitiquiztanaqui ana jaknuž kjaazñi atchiča.

PIJIZTA PUNTU

⁷ Nekztanaqui Jesusaqui nii kjuyquin lujlcan jalla tižta cherchiča. Kjawžta žoñinacaqui tucquin julz kjuratča, nižaza honorchiz cjis pecatča. Jalla nižta cjcijiñi cheržcu, Jesusaqui, tuž cjichiča:

⁸ —Amqui tsjii zalzñi pijiztiquiz kjawžta cjesaž niiqui, anača tucquinpan julzqui. Am jarupacha tsjii juc'ant jilir zoñiqui tjonasaž niiqui, am tucquin julzpantaž cjesača.

⁹ Jecčhalaj pucultan ančhucqui kjawzi, jalla nii kjawzñi žoñiqui amquiz chiyasača, “Am julz tii juc'ant jiliržquin tjaa”, cjan. Jalla nižtiquiztanaqui amlaqui azanpanti wirquin julz cjesača. Am aziž cjesača.

¹⁰ Ana nižta paa. Antiz tuž cjee. Tsjii zalzñi pijiztiquiz kjawztaž cjesaž niiqui, wirquinpankaz julzqui. Nekztan nii kjawzñi žoñiqui irantižcuqui, amquin chiyasača, tuž cjan: “Wejt k'ayi jila, ticchuc watžca, tucquin julžca”. Jalla nuž kjawžcu tucquin tjułžtiquiztan parti žoñinacž čhjujquiziqui honorchizim cjesača.

¹¹ Jakzilta žoñit parti žoñinacžquiz persun honora čhii chyačhaj niiqui, wiruñauqui nii žoñiqui ch'ujukaz cjesača. Pero humilde kuzziz žoñižti honorchiz cjskattaž cjequiča.

¹² Nižaza Jesusaqui nii kjawzñi žoñžquiz cjichiča:

—Čheri tjaasim pecčhaj niiqui, anam kjawznaquiž am persun mazinacžquiz, nižaza am persun jlanacžquiz, nižaza am persun famill parintinacžquiz, nižaza am ricach visinunacžquiz, jalla ninacžquiz alaja anam kjawznaquiča. Ninaca čheri luli kjawznasaž niiqui, ninacaqui am zakaz kjawznasača. Nižtiquiztan amzakam čheri tanznaquiča. Nižtiquiztan ana gastichim cjequiča.

¹³ Ana nižta paa. Antiz tuž cjee. Čheri tjaasim pecčhaj niiqui, kjawznaquiča pori žoñinaca, zuch žoñinaca, coj žoñinaca, zur žoñinaca, jalla ninacžquiz kjawznaquiča.

¹⁴ Nuž paažcu cuntintum cjequiča. Ninacaqui anaž čhjulumi tjepñi atasacha. Yooz zuma kamañchiz žoñinacž jacatatž tjuñiž tjontan, jalla nekzim amqui tjepuntam cjequiča.

¹⁵ Jalla nuž Jesusiž čhiita taku nonžcu, tsjii julzi žejlñi žoñiqui Jesusižquiz cjichiča:

—Arajpach Yooz Ejpž kjuyquin lujlñinaca cuntintuž cjequiča.

¹⁶ Jalla nekztanaqui Jesusaqui nii žoñžquiz quint'ičiča, tuž cjan:

—Tsjii nooj tsjii žoñiqui pajk pijizta paachiča. Tuquiqui walja žoñinaca kjawskatchiča pijiztiquiz.

¹⁷ Pijizta čheri lujl ora piyunaqui kjawžta žoñinacžquiz cuchanžquitača, tuž cjeajajo: “Tjappacha listu tjacžtača, jaziqui ž-tjona”.

¹⁸ Nekztanaqui kjawžta žoñinacaqui pasinza mayizichiča. Tsjii žoñiqui cjichiča: “Anzilla yoka kjaychinča. Jalla nii cheržquistanča. Jalla nižtiquiztan amqui wejr pasintž'alla”.

¹⁹ Tsjizti cjichiča: “Anzilla tunca waca kjaychiñča. Jalla nii waca yanstanča. Jalla nižtiquiztan zumaž pasintž'alla”.

²⁰ Tsjizti cjichiča: “Anzilla tjunanat zalzinča. Nižtiquiztan anal oki atasacha”.

²¹ Nii cuchanžquita piyunaqui quejpžcu patrunžquiz tjappacha quint'ičiča, jaknuž žoñinacat kjaaztčhaja, jalla nii. Nuž quint'itiquiztan nii patrunaqui walja žawjchi cjissiča. Nižaza piyunžquiz cjichiča: “Uri ojklayžca calliran nižaza wajt tjiyaran. Pori žoñinaca zijjczna, nižaza zuch žoñinaca, cojonaca, zuranaca, jalla ninaca kjawžca”.

²² Wiruñauqui nii piyunaqui mazziča tuž cjan: “Wejt patruna, amiž mantitacama ojklaychinča. Nižaza iya julz campo žejlča”.

²³ Nekztanaqui patrunaqui cjichiča piyunžquiz: “Wilta ojklayžca callinacaran jicznacaran. Žoñinaca kjawkjawcan ojklayžca kjuyquiz čhjipsnajo. Kjawžta žoñinacžquiz tjonkatžca”.

²⁴ Nekztan Jesusaqui cjichizakazza:

—Wejrqui cjiwča. Weriž primira kjawžta žoñinacaqui anapan čheri lulasača wejt arajpach pijiztiquiziqui. —Jalla nuž cjichiča Jesusaqui.

²⁵ Walja žoñinacaqui Jesusa apzičha. Nekztanaqui Jesusaqui tsijtscu žoñinacz kjutñi quejpc̄hičha, tuž cjican:

²⁶ —Jakzilta žoñit wejtkuin kuzziz cječhaj niiqui, niiz persun ejpmi, maami, tjunmi, maatinacami, persun jilanacami, persun cullaquinacami, nižaza niiz persun kamañ wirami, jalla ninaczquiztanami wejtkuin juc'anti kuzziz cjistančha. Anaž wejtkuin juc'anti kuzziz cjequiž niiqui, anaž wejtkuin žoñi cjichuca cjesačha.

²⁷ Jakzilta žoñit wejtkuin žoñi cjis pecčhaj niiqui, tjapa kuztanž wejtkuin cjistančha niiz persun wira apt'iz cjenami.

²⁸ Tsjilla cjesačha. Jequit tsjii campanturi kjuyz pecčhaj niiqui, primiruqui gasto zumpacha tantiistančha, paaz wacata ana wacata, jaknuž ni campanturi tsajczjapa, jalla ni.

²⁹ Ana zumpacha tantižcu kallantaquiž niiqui, nekztan ana tsaqui atchucaž cjesačha. Jalla nuž ana tsajc̄ni cherzcu parti žoñinacaqui ni žoñžquiz iñarasacha,

³⁰ tuž cjican: “Nii žoñiqui campantur kjuyi kallantichičha. Nekztan ana tsaqui atchičha. Ana zuma tantiichičha”. Jalla nuž tjasaquičha.

³¹ Nižaza jakzilta chawc jilirit quira zalz pecačhaj niiqui, primiruqui zumpacha tantiistančha, niiz tunca warank zultatunaca tsjižnuž paatunc warank quintra zultatunaczquiz atipata, ana atipata, jalla ni.

³² Ana atipchucažlaj niiqui, quintra jilirzquin ažquin cjen cumisiuna cuchansa, nužquiz pasinza paajo, acuerdo luzjapa.

³³ Jalla nižta, ima wejtkuin kuzziz cjen, zumpacha tantiž waquizičha. Jakzilta žoñit čhjultakquiztanami anaž wejtkuin juc'anti kuzziz cjequiž niiqui, anapanž wejtkuin žoñi cjesačha.

³⁴ Yacuqui zumačha. Yacuqui lak'ansnasaž niiqui, žjaknuž wilta zuma cjesajo?

³⁵ Anapanž cjesačha. Anaž yokjapa sirwasacha, nižaza anaž yok kulljapa sirwasacha. Jalla nuž ana sirwanami tjojtspanikazza. Jakziltažlaj cjuñchiz niiqui, zumpacha nonžna Yooz puntu intintisjapa.

15

KATCHI UUZI QUINTU

¹ Impuesto cobriñi žoñinaca nižaza ujchiz žoñinaca Jesusižquiz macjatžquichičha, niiz taku nonzjapa.

² Jalla nižtiquiztanaqui fariseo žoñinacztan lii tjajjiñinacztan jalla ninacaqui Jesusiž quintra chutchičha, tuž cjican:

—Tii žoñiqui ujchiz žoñinacami risiwñipanikazza, nižaza ninacztan chica čjheri lujñičha.

³ Jalla nižtiquiztan Jesusaqui ninaczquiz quint'ichičha tuž cjican:

⁴ —Tsjii žoñiqui patak uuzichiztačha. Nekztanaqui tsjiilla katchičha. Jalla nekztanaqui parti uuzinaca ilakz yokquin ecchičha, katchi uuzi wajtzcama. Žjakziltat ančhucaquiztan ana nižta paajo?

⁵ Nižaza katchi uuzi wajtzcuqui, azkar juntuñ tjojtžcu, awatiriqui tjonchičha, ancha cuntintu.

⁶ Nižaza kjuya irantižcuqui žcatinta visinunaczquiz nižaza mazinaczquiz kjawzičha, tuž cjican: “Wejttan cuntintuž cjee. Wejt katchi uuziqui wajtchinčha”.

⁷ Nižaza wejrqui cjiwčha, jalla nižta iratačha arajpachquinaqui. Tsjii ujchiz žoñiqui Yoozquin kuzziz cjesaž niiqui, arajpachquin žejlñinacaqui ancha cuntintuž cjisnaquičha. Llatunc tunc llatuncani ana Yoozquin kuzziz žoñinaca želačhani: “Wejrnacqui zuma kamok”, cjicanaqui. Pero arajpachquinaqui ninaczquiztan juc'anti cuntintuž cjequičha ni zinta Yoozquin kuzziz žoñiž cjen.

KATCHI PAAZ QUINTU

⁸ Jesusaqui quint'ichizakazza, tuz cjican:

—Nižaza tsjaa tunca paazziz žon želatčha. Nekztanaqui tsjii paaz tjtanchinčha. Paaz tjtanzcu, lámpara pekzinčha. Nižaza kjuya pewchinčha, zumpacha. Nuž zuma pewcan, katchi paaz wajtchinčha.

⁹ Nii paaz wajtžcu, mazinaczquiz nižaza žcatinta visinunaczquiz kjawzinčha, tuž cjican: “Wejttan cuntintuž cjee. Wejt katchi paaz wajtchinčha”.

¹⁰ Wejrqui cjiwčha. Nižaza arajpachquinaqui Yooz anjilanacaqui cuntintuž cjequičha čhjulorami tsjii ujchiz žoñiqui Yoozquin kuzziz cjisnachaja, jalla ni oraqui.

EJPZQUIZTAN ZARAKCHI MAJCH QUINTU

¹¹ Nižaza Jesucristuqui tii quintu zakaz quint'ichičha, tuž cjican:

—Tsjii žoñi želatčha, pucultan lucmajch ocjalchiz.

¹² Nii upañažta majchqui ejpžquiz cjichiča: “Tata, irinsaž wejtquiz tjaall amqui”. Jalla nekztanaqui ejpqui irinsa t’akžinchiča pucultan majchnacžquiz.

¹³ Tsjii kjaž majquiztan upañažta majchqui irinsa tuychiča. Nekztan tjappacha niž cusasanaca juntjapžcu, azkquin ojkičiča yekja nacionquin. Nekztan nii nacionquin tjappacha niž cusasanaca gastichiča, ana zuma kamcan.

¹⁴ Nužquiz tjappacha cusasanaca miržcuqui, upañažta majchqui ana čjulchiz cjišičiča, žoñi maya. Nižaza nii nacionquiz čjheri upsičiča. Upañažta majchqui čjherž kjara passičiča.

¹⁵ Nekztanac niiqui langz kjuri ojkičiča. Tsjii žoñžquiz langz wajtchiča. Nii partrunaqui jochi mantichiča, cuchi ichajo.

¹⁶ Anča čjheri eeczatchičiča nii ejpžquiztan zarakchi majchqui. Ana čjulu lulimi onantaž niiqui. Jalla nekztanac cuch lulinacami čhajpinacami lujlnatakaztača.

¹⁷ Jalla nekztanaqui kuzquiz pinsiskatchičiča, tuž cjan: “Tjappacha wejt ejpž piyunanacaqui cusa čjherinaca lujlčhani. Nižaza žejtchinacami žejlčhani. Wejrzi tekzi t’akjiri želucha; čjherž kjara pascu, ticz atučhani.

¹⁸ Quepaž wejrqui, tira wejt ejpžquin. Nižaza wejt ejpžquin cječa: ‘Wejt Tata, Yooz quintra am quintra uj paachinča.

¹⁹ Wejrqui anam am maati cjichucača. Kjažllami tsjii am piyunažtakaz uywalla’”. Jalla nuž cjan pinsičiča.

²⁰ Nekztanaqui ejpžquin zarakchiča; ejpž kjuy kjutñi ojkičiča. Azkquin cjen ejpqui niž majch pajchiča. Kuzquiz anča okziča, anča k’aaztichiča. Nekztan majch zali zajtchiča. Majch žcojržcu, čjulziča.

²¹ Nekztanaqui majchqui ejpžquiz cjichiča: “Tatay, wejrqui Yooz quintra, am quintra uj paachinča. Jaziqui wejr am maati anaž cjichuca”.

²² Jalla nekztanaqui ejpqui piyunanacžquiz cjichiča: “Uri, jila walurchiz zquiti jwesanzca. Nii zquitztan wejt majch tjužna. Niž loc’anquiz zurtija majczina. Nižaza zapato tjužna.

²³ Nekztanac ančucqui walipunt cjew wacaž zijječca conzjapa. Pijiztaž paaquiča. Zuma čjheriž lulaquiča.

²⁴ Wejt majch ticzižtakaz katchitača. Jaziqui ticziquiztan jacatatchižtakaz tjonchiča. Nižtami nižtan zalchinča”. Jalla nekztanaqui pijizta payi kallantichiča.

²⁵ ‘Jalla nuž upañažta majch tjon ora, niž jilaqui joch yokquintača. Kjuy žcati irantižcan, pijizta nonziča, tsajtñi wayliž jora.

²⁶ Jalla nižtiquiztanaqui jilir majchqui tsjii tsjii piyuna kjawziča. Nuž kjawžcu, “čjJulut wat?” cjan, pewcziča.

²⁷ Piyunaqui kjaaziča, tuž cjan: “Am lajkqui tjonchila. Wiwusa anazak kjaž cjišičiča. Nižtiquiztan am ejpqui walipunt cjew wac conkatchičiča, pijizta paazjapa”.

²⁸ Jalla nii quintu zizcu, jilir majchqui walja zawjchiča. Pijiztiquiz ana luz pecatča. Nuž cjen ejpžakazza nii roqui ulanžquichi luzcajo.

²⁹ Nekztanaqui jilir majchqui ejpžquiz cjichiča: “Kjaž watanaca wejrqui am sirwichinča. Nižaza am mantitacama okintača. Jalla nuž cjenami ana wira tsjii cabrallami onančamtača, wejt mazinacžtan pijizta paazjapami.

³⁰ Anziqui tii am ana cažni majchqui tjonchiča. Tiiqui ana zuma kamcan am paaz gastichila, ana zum maatakanacžtan žejlcan. Nuž paata cjenami, nižtajapa tsjii walipunt cjew waca conchamča”.

³¹ Jalla nekztanaqui niž ejpqui kjaaziča, tuž cjan: “Wejt maati, amqui wejt chicaž kamñampanla. Tjapaž wejtac žejl-la, niic amtacamača.

³² Tii am lajkqui ticzižtakaztača. Jaziqui ticziquiztan jacatatchižtakaz tjonchiča. Nižaza katchitača. Jaziqui wažtača. Jalla nižtiquiztan anča cuntintuž cjen pijizta paaz waquičiča”.

16

CUSASANACA CWITIŃI PIYUNA QUINTU

¹ Nižaza Jesusaqui niž tjaajnta žoñnacžquiz tsjii quintu zakaz quint’ichiča, tuž cjan: –Tsji ricach žoñi želatča. Niž kjuy cusasanaca cwitajo tsjii piyuna utchiča. Wiruñauqui yekja žoñinacaqui nii patrunžquiz mazziča, tuž cjan: “Tii am piyunaqui am cusasanaca anča anawali gastiñiča”.

² Jalla nekztanaqui patrunaqui piyunžquiz kjawziča, tuž cjan: “čjJul quintut am puntuquiztan nonojo? Jaziqui jaknužum amqui wejt cusasa cwitižinčhaja, jalla nii wejtquiz quint’alla. Amiž ana zuma cwitichiž cjen anam iya wejt cusasa cwitasača”.

³ Nekztanaqui nii piyunaqui pinsičiča, tuž cjan: “čJaziqui kjažt wejr cjisnaquejo? Wejt patrunaqui wejrž jakjurpayla nii wejt langzquiztanaqui. Jaziqui ana anča langziž

cjinsnula wejrqui. Wejtta azi ana žejlčha, zkal yokquiz langzjapa. Nižaza žoñžquiztan tomangz eksnučha, azučha.

⁴ Jalla nuž ana langzñi atchiz cjen, čjulut paa-as?” Nekztan piyunaqui cjichičha: “Aaaa. Čjulut paa-as, nii zizučha wejrqui. Nekztan žoñinaca wejr atintifñiz želačhan. Wejr kjawznačhan ninacz kjuyquizimi”.

⁵ Jalla niž pinsita jaru piyunaqui zina zina patrunž kajchi žoñinaca kjawzičha. Tsjii primira kajchi žoñžquiz pewczičha, tuž cjican: “Žkjažum wejt patrunžquiz kajchamta?”

⁶ Kajñi žoñiqui kjaazičha, tuž cjican: “Patac turril aceite kajchinčha”. Jalla nekztanaqui piyunaqui cjichičha: “Tiz am factura. Uri julzna. Yekja factura paa. Pjijska tunca turril aceitekaz cjiirzna”.

⁷ Wiruñauqui tsjiizuñ kajchi žoñžquiz pewczičha, tuž cjican: “Am, žkjažum kajchamta wejt patrunžquiz?” Kajñi žoñiqui kjaazičha, tuž cjican: “Patac quintal tiricu”. Nii piyunaqui cjichičha: “Tiz am factura. Nižaza yekja factura paa, quinsakal tunca quintal tiricukaz cjiirzna”.

⁸ Jalla nii piyunaž nuž paan patruñaqui nii anawal piyuna c'uñchi pajchičha, niž cusasanaca cwitiñi. Jalla nižtažtakaz anawali kamñi žoñinacaqui tii muntuquiz cusasquin kuzziz kamčha. Jalla nuž kamcan ninacaqui c'uñchi tjojknañičha zuma kamñi žoñinaczquiztan juc'anti.

⁹ Wejrqui cjiwčha. Tii ujchiz muntuquiz kamcanaqui žejlñi cusasanaca gastis waquizičha, zuma paacan tsjii zuma amigo tanzjapa. Jalla nekztan ticžcu ančhucqui kjawztaž cjequičha niž arajpach kjuyquin.

¹⁰ Jakzilta žoñit koluc cusasanaca zumpacha cwit'ačhaj niiqui, nižaza wacchi cusasanaca zumpachazakaz cwit'aquičha. Nižaza jakzilta žoñit koluc cusasanaca ana zuma cwit'ačhaj niiqui, nižaza wacchi cusasanaca ana zuma cwit'ichiz cjequičha.

¹¹ Nižaza jakzilta žoñit tii ujchiz muntuquiz žejlñi cusasanaca ana zumpacha cwit'asačhaj niiqui, jalla nižta ana zuma kamchiz cjen, Yoozqui werar arajpach cusasanaca nii cwitiñijapa ana tjaasačha.

¹² Jakzilta žoñit Yooziž tjaata cusasanaca ana zuma cwit'ačhaj niiqui jalla nižta ana zuma kamchiz cjen, Yoozqui arajpach cusasanaca tjaaz cjen pacha ana tjaasačha.

¹³ Anaž jakzilta piyunami pizc patruña sirwi atasachha. Piyunaqui tsjii patrunžquizkaz kuz tjaasačha. Tsjiižuñ patruñaž jaytaquičha. Nižaza nii piyunaqui tsjii patrunžquizkaz zumpacha sirwaquičha. Nii tsjii patrunžquiz anapan zuma sirwi atasachha. Yoozmi paazmi žejlčha pucultan patruñažtakaz. Pero žoñinacaqui pucultizquiz kuz ana tjaasačha. Tsjii patrunžquizpankaz zuma sirwasachha.

¹⁴ Ancha paaz pecñi fariseo žoñinacaqui tjapa Jesusiž čhiita taku nonzičha. Jalla nuž nonžcu Jesusa iñarchičha.

¹⁵ Jesusaqui nižtiquiztan cjichizakazza:

–Ančhucqui cusa žoñižtakaz ojklayiñchucčha žoñž yujcquiziqui. Yoozti ančhuca kuz zizza. Tii muntuquiz žejlñi žoñinacaqui ana zuma kuzziz žoninacz honorakaz waytičha. Yooz Ejpti nii ana zuma kuzziz žoñinaca čhaawjñipančha.

LII PUNTU

¹⁶ Nižaza Jesusaqui cjichičha:

–Juan Bautistaž tjonzcama, Moisés mantita lii azziztačha. Nižaza Yooz taku paljayñi profetž tjaajintanacami azziztačha, Juan Bautistaž tjonzcama. Nii timpuqui jalla nii mantita takunaca azziztačha. Pero Juan Bautistaž tjontiquiztan, liwriiñi Yooz taku nižaza Yooz mantita kamañ puntu paljayzqui, jalla ničha tsjan chekanaqui. Jaziqui walja žoñinacaqui Yooz mantita kamañquiz luzjapa tjapa kuz tjaachha.

¹⁷ Jalla nuž cjenami tjuñimi warawarami yokami katasachha. Pero tjapa nii arajpach Yooz liizti anaž wira katasachha.

JAKJURPAYZ PUNTU

¹⁸ Nižaza Jesusaqui cjichičha:

–Jakzilta žoñit niž maataka jakjurpayžcu yekja maatakžtan zalsnačhaj niiqui, jalla nuž cjenaqui adulterio uj paačha. Nižaza jakzilta žoñit jakjurpayta maatakžtan zalsnačhaj niiqui, adulterio uj zakaz paačha.

RICACH ŽOÑŽTAN PORI ŽOÑŽTAN QUINTU

¹⁹ Nižaza Jesusaqui tsjii quintu zakaz quint'ichičha, tuž cjican:

–Tsjii wali jiru ricach žoñiqui želatčha. Zuma finu zquiti cujtžñitačha. Nižaza zapuru pijjztakaz ancha cusa čheri lujlchičha.

²⁰ Nii oraqui tsjii pori žoñi želatčha Lázaro cjita. Niiž janchiqui walja zkira cjižtchitačha. Zapuru ricach žoñž kjuy zanquiz julzi žejlñitačha.

²¹ Nii ricachuqui žejtchi čherinaca tjojtñitacha. Nii pori žoñizti tjojtta žejtchi čherinaca lujlz pecñitača. Pacunacaqui pori žoñžquiz macjatžcu niiz žkiranaca issañitača.

²² Tsjii noojiqui nii pori žoñiqui ticziča. Nekztanaqui Yooz anjilanacaqui nii chjitchiča Yooz illzta zuma yokquin, Abraham cjeta žoñžtan chica želajo. Wiruñaquí nii ricachu žoñiqui ticzizakazza. Nekztanaqui yokquiz tjažtatača.

²³ Nii ricachu žoñiqui infiernuquin sufrican želatča. Nicju sufrican, tsewc kjutñi cherchiča. Ažquiztan cherchiča Abrahamžtan Lazaružtan.

²⁴ Jalla nuž cheržcu, kjawchiča, tuž cjican: “Abraham tatay, wejr okznalla. Lázaru cuchanžca, niiz loc'ana kjaztan t'awžcu, wejt lasquiz lanznajo, ch'uñkatajo. Tii asñi ujquiz anchal sufruča”.

²⁵ Abrahamzti cjichiča: “Jila, cjuñžnalla, muntuquiz kamcan, ancha cusa kamchamča. Lazaruzti t'akjiri kamchiča. Jaziqí anziqí Lazaruqui kuztača, ancha cuntintuča. Amzti ancha sufricha.

²⁶ Nižazakaz Yoozquí pajk pal k'awa utchipanča wejtnacquiztanami amquiztanami. Jaziqí tekztan nawjkchuc ojkz pecñinacaqui anaž okasača. Nižaza nawjktan tjonz pecñinacaqui anaž tjonasača”.

²⁷⁻²⁸ Jalla nekztanaqui nii ricuqui cjichiča: “Abraham tatay, wejttta pjijskaltan jilanaca žejlča. Jaziqí am rocuča, wejt ejpž kjuyquin Lázaro cuchanžinžcalla, ninacžquiz paljayajo, nižaza tii infiernuquiz ana tjonajo”.

²⁹ Pero Abrahamqui niizquiz kjaaziča, tuž cjican: “Ninacžta žejl-la Moisés cjiirtami nižaza Yooz taku paljayñi profetanacž cjiirtami. Nii cjiirtanacquiz cazla, kuz tjaala”.

³⁰ Jalla nekztanaqui nii ricuqui kjaaziča tuž cjican: “Razanum chiča, Abraham tatay. Pero tsjii žoñiqui ticziquiztan ninacžquin okačhaj niiqui, Yoozquin kuzziz cjskatačhani”.

³¹ Nekztanaqui Abrahamqui cjichiča: “Ninacaqui Moisés mantita taku nižaza Yooz taku paljayñinacž taku ana criyačhaj niiqui, tsjii ticziquiztan jacatatchi žoñž takumi ana zakat criyačhani”. –Nuž quint'ichiča Jesusaqui.

17

UJQUIZ TJOJTТА PUNTU

¹ Nekztanaqui Jesusaqui niiz tjaajinta žoñinacžquiz cjichiča:

–Ujquiz tjojtskatñi žoñinaca žejlñipantača. Pero Yoozquí nii ujquiz tjojtskatñi žoñinacaqui anawaliž watkataquiča.

² Jakzilta žoñit Yoozquin kuzziz žoñi ujquiz tjojtskatačhaj niiqui, nižta ana zum žoñinacaqui koz kot kjazquin tjojttaž waquiziča, tsjii pajk taj maztan jorquiz mokžinta. Jalla nuž tsjan cusaž cjesača nii ujquiz tjojtskatñi žoñžtaqui.

³ Nižta žoñinacžquiztan ančhucquí walja cwitassa, ana ujquiz tjojtsjapa. Tsjii am jilanacžquiztan am quintra uj paačhaj niiqui, jalla niizquiz žumpacha chižžina, niiz kuz campiita cjeajo. Nekztan niiz kuz campiita cječhaja, jalla nii uj paañi žoñžquiz pertunaquiča amqui.

⁴ Zapa wiltami nii am quintra uj paañi žoñiqui pertuna mayizičhaj niiqui, amqui pertunaquiča, tsjii nooj pakallawk wilita am quintra uj paanami.

YOOZQUIN KUZUZ PUNTU

⁵ Wiruñaquí Jesusiž illzta žoñinacaqui Jesusa jiliržquiz paljaychiča tuž cjican:

–Juc'anti Yoozquin kuzziz cjsjapa yanapalla.

⁶ Nuž maytiquiztan Jesusaqui kjaaziča, tuž cjican:

–Tsjii mostaz semillaqui aunqui koltallami wali pakji pakñiča. Jalla nižta iratača ančhucquí. Yoozquin walja kuzzizčhucčhalaj niiqui, milajrunacami zakaz paasača. Walja Yoozquin kuzziz želanauquí, tii sicómoro cjeta muntiquiz cjesača, tuž cjican, “Tekztan pajlta cjee, nižaza kotquin tjojtta cjee”. Jalla nuž chiitiquiztan nižtapachaž cjesača.

PIYUNZ PUNTU

⁷ Jesusaqui cjichizakazza:

–Tsjilla chiyasača. Ančhucquiztan piyunchiz žoñi želasača. Piyunaqui joch yokquiztan tjonasača, uywanaca itzcu, nižaza zkala yoka kjullžcu. Jalla nuž langquiztan tjonanaqui, anapanž ančhucquí cjesača, “Watzca, julzna, tiča lujlzna” cjičanaqui.

⁸ Ančhucquí antiz piyunžquiz cjesača, “Chjeriž apura kiswa. Nižaza wejr atintisjapa, žumpacha tjaczna. Wejrqui lulača, licača. Nekztanž amqui lulaquiča, nižaza licaquiča”. Jalla nuž tsjii piyunžquiz cjesača.

⁹ Jakzilta piyunat niiz patrúnž mantitanaca paačhaj niiqui, patrunaqui sparaquiz cjesajo?

¹⁰ Ančhucqui Yooz piyunažtakazza. Jalla nižtiqiztan tjapa Yooz mantitacama kamcan, ančhucalaqui chiiz waquzičha, tuž cjan, “Wejrnacqui am piyunitča. Inakaztča wejrnacqui. Jaknužt paaz waquzičhaja, jalla niikaz paayinča”.

MOJKCHI JANCHICHIZ ZOŇINACA CHJETINTATACHA

¹¹ Jalla nekztanaqui Jesusaqui Jerusalén watja ojkan, Samaria cjita yoka Galilea cjita yoka nii taypiquin watchičha.

¹² Nekztanaqui tsjii watjallquiz, waj irantawc cjen, tuncaltan mojkchi janchichiz zoñinacaqui Jesusižquin zali tjonchičha. Azkquiztan Jesusižquiz chiižinčičha.

¹³ Altu tawkžtan tuž cjichičha:

—Jesusa, jiliri, wejtnacaquiz okznalla!

¹⁴ Jalla nii laanaca cheržcu, Jesusaqui cjichičha:

—Icliz jiliržquin persun janchi tjeežni oka.

Jalla nuž ojkan, laanacaqui žejtchi quirchičha.

¹⁵ Tsjii tsjiiqui persun janchi žejtchi cheržcu cuttichičha, Jesusiž kjutni, altu joržtan Yooz honora waytican quejpčičha.

¹⁶ Jalla nuž Jesusižquin wilta zalžcu, niiž yujcquiz quillzičha, nižaza tuzi t'okzičha yoka iranta. Jesusižquiz ancha sparaquiž cjichičha. Nii zoñiqui Samaria wajtchiz zoñitačha.

¹⁷ Nekztanaqui Jesusaqui cjichičha:

—¿Ančhucqui anataj tuncaltanpacha žejtchinčhucjo, tii laaquiztanajo? ¿Jakziqunt tsjii partinacajo?

¹⁸ Amqui anaž tii wajtchiz zoñila. Am zinakaz quejpžquila Yoozquin honora wayticanacauqui.

¹⁹ Nekztan Jesusaqui nii zoñžquiz cjichičha:

—Tsijsna, oka. Amiž tjapa kuz criitiquiztan, jaziqui čhetintamča.

YOOZ MANTIZ TJUŇI PUNTU

²⁰ Nekztanaqui fariseo zoñinacaqui Jesusižquiz pewczičha, tuž cjan:

—¿Chjulorat Yooz Epiž mantiz tjuŇi irantižcaquiya?

Nekztanaqui Jesusaqui kjaazičha, tuž cjan:

—Yooz Epiž mantiz tjuŇiqui anačha cherchua.

²¹ Anačha “tekzipan” cjan nii tjuŇi tjeeznasačha. Nižaza anačha “nii nawjk” cjan nii tjuŇi tjeeznasačha. Yooz mantizqui zoñinacž kuzquizpachačha. Jalla nižtiqiztanac Yooz mantizqui anaž cherchua cjesačha.

²² Jalla nekztanaqui Jesusaqui niiž tjaajintanacžquiz cjichičha:

—Tsjii sufris timpuqui irantižcaquičha ančhucquiz. Jalla nekztanac ančhucqui wejr arajpachquiztan quejpsquini cherez pecaquičha, tsjii noojillami. Pero weriž arajpachquin želan, anaž wejr cheri atasachha. Wejrqui tsewctan cuchanžquita Yooz Zoñtča.

²³ Nižaza nii sufris timpuquiziqui zoñiqui Cristuž puntuquiztan parlaquičha, tuz cjan: “Arajpachquiztan chjiwžquichičha. Tekzi žejlča”. Tsjiizti zakaz chiyaquičha, “Nii nacjučha Cristuqui” cjan. Pero ančhucqui anaž nicju okaquičha, nižaza nii čhiita taku anaž criyaquičha.

²⁴ Tsjii liwjlwjni rayu cjita tjonñila, jantey, jalla nuz liwjtayžcaquičha, liwjpacha irantaž kjanžnaquičha. Jalla nižta irata wejrqui arajpachquiztan wilta tjonacha. Weriž tjonan, tjappacha zizasachha. Jalla nižtaž wejt tjonz tjuŇiž cjequičha.

²⁵ Anziqiu primiraqui wejrqui walja sufristančha. Nižaza tii timpuquiz kamni zoñinacžquiztan anapan criital cjeečha. Ana werj cherez pecaquičha.

²⁶ Jaknužt Noež kamta timpuquiz watčhaja, jalla nižtazakaz wataquičha ima weriž tjonan. Wejrqui tsewctan cuchanžquita Yooz Zoñtča.

²⁷ Noež timpuquiz jalla tuž kamničha zoñinacaqui. Zuma čheri lujlñitačha, nižaza licñitačha. Nižaza zalzñitačha, nižaza zalzjapa tjaañitačha. Jalla nuž zoñinacaqui kamchičha asta Noež pajk warcu kjuyquiz luzcama. Yooz kamañquiz kamzqui ana importayñitačha. Jalla nekztanaqui kjaz juyzuquiu tjonchicha. Jalla nii juyzuquiziqui tjappacha anawali kamni zoñinacaqui ticzičha.

²⁸ Nižaza jaknužt Lot cjita zoñž timpuquiziqui watčhaja, jalla nižtazakaz wataquičha ima weriž tjonan. Lujlñitačha, licñitačha, kjayñitačha, tuyñitačha, čjacñitačha, y nižaza kjuya kjuyñitačha. Yooz kamañquiz kamzqui ana importayñitačha.

²⁹ Jalla Lotž Sodoma cjita wajtquiztan ulantan, tiripintit uj azupri chijni tjonchičha. Nuž chijintiquiztan tjappacha užcu ticzičha.

³⁰ Wejt tjonz tjuŇiquiziqui nižta iratazakaz wataquičha. Wejrqui tsewctan cuchanžquita Yooz Zoñtča.

³¹ 'Nii wejt tjonz tjuñquiziqui jakziltat kjuy zawncu želačhaja, anaž kjuy cusasanaca aptiñi luz waquizičha. Nižaza jakziltat joch yokqucin želačhaja, anaž wajt kjuya cuttis waquizičha.

³² Lotž tjuna puntuquiztan cjuñzna.

³³ Jakziltat persun kamañquiztan ana jaytačhaja, jalla niiqui anaž arajpachquin kamaquičha. Nižaza jakziltat persun kamañ wira jaytičhaja, jalla niiqui arajpachquin wiñaya kamaquičha.

³⁴ Nižaza wejrqui cjiwčha. Weriz tjonan nii arama pucultan tsjii kjuyquiz tjaajaquičha. Jalla nuž tjan, tsjiuqui arajpach kjutñi waytižcu chjichtaž cjequičha, tsjiizti pachpiquiz nii kjuyquiz ectaž cjequičha.

³⁵ Nižaza pucultan maatakanaca chica jawuncan, tsjaaqui arajpach kjutñi waytižcu chjichtaž cjequičha. Tsjaazuñzi pachpiquiz ectaž cjequičha.

³⁶ Nižaza pucultan luctakanaca joch yokquin želan, tsjiuqui arajpach kjutñi waytižcu chjichtaž cjequičha, tsjiizuñzi nii joch yokquinpacha ectaž cjequičha.

³⁷ Jalla niža tjaajinta takunaca nonžcu, niž tjaajinta žoñinacaqui pewczičha, tuž cjan:

–Wejt jiliri, žakziquin tižtanaca wataquiya?

Jalla nekztanaqui Jesusaqui kjaazičha, tuž cjan:

–Jakziquin ticzi janchi žejlčhaja, jalla nicju cunturinacaqui muzpa ajcsñičha. Jalla niža irata jakziquin ana wali paañinacaqui žejlčhaja, jalla nicju ana walinaca wataquičha.

18

ZEW ZONATAN JUEZ JILIRZTAN QUINTU

¹ Nekztanaqui Jesusaqui tjaajinčičha, žoñinacžlaqui Yoozquin mayizizpančha, ana upa kuzcan, jalla nuž tjaajinčičha.

² Tjaajincan jalla tuž quint'ichičha:

–Tsjii juez jiliri tsjii wajtquiz želatčha. Yooz ana rispitičha, nižaza ana čjul žoñimi rispitičha.

³ Nii wajtquizpacha želatčha tsjaa žew maatak zon. Tsjii nooj naa žonqui juez jiliržquin ojkchinčha, tsjii quija quijsquizjapa, nižaza naaža quintrižtan naa zumpacha azquichajo.

⁴⁻⁵ Azkapan juez jiliriqui ana naaža quija nonz pecchičha. Niž wiruñ nižtami pin-sichičha, tuž cjan: “Taa žew žonqui tirapanikal quijžtan wejr molističha. Yoozmi žoñimi wejta anaž importičha. Jalla nuž cjenami taaža quija nonznačha, wejtquiz ana tira molistajo tii quijžtan. Wejrqui ana azquichačhaj niiqui, naaž tjontjonanaqui wejt žawjwat žijnačhani”.

⁶⁻⁷ Nekztanaqui Jesús jiliriqui cjičičha:

–Jalla nuž čiičičha nii anawal juez jiliriqui. Nižaza Yooz Ejpqui niž illzta žoñinacž quijanaca azquichaquičha. Ninacaqui majiñami weenami Yoozquinkaz mayizičha. Ninacž mayizitiquiztan Yoozqui ana enenžcu ninacž quintranaca azquichaquičha.

⁸ Wejrqui cjiwčha, tsjii noojuqui Yooz Ejpqui niž illztačqu čuija apuraž atintaquičha. Yooziž tsewtan cuchanžquita Žoñi tjonan, Yoozqui ultimupan niž illztaž quija azquichaquičha. Nii tjonz tjuñquiziqui, žtii yokquiz žejlñi žoñinacaqui Yoozquin kuzziz želasaya?

YOOZQUIN MAYIZIZ PUNTU

⁹ Tsjii žoñinacaqui želatčha, persun honora waytican, nižaza parti žoñinaca iñarcan. Jalla nii žoñinacžquiz tii quintu quint'ichičha Jesusaqui, tuž cjan:

¹⁰ –Pucultan žoñinacaqui timpluquin ojkchičha, Yoozquin mayiza. Tsjiiqui fariseo partiquiztantačha. Tsjiižuñqui impuesto cobriñi žoñitačha.

¹¹ Fariseo žoñiqui tsijtchi mayizičha, tuž cjan: “Yooz Tata, amquiz sparaquiz cjiwčha. Wejrqui anačha nii yekja žoñinaca iratitqui. Ninacačha tjañinacaqui, nižaza ninacačha ñejonacaqui, nižaza ninacačha adulteriuquiz ojklayñinacaqui. Nižaza wejrqui anačha tii impuesto cobriñi iratitqui.

¹² Wejrqui pizc wilta simanquiz ayunasičha. Nižaza tjapa weriz cantiquiztan tsjii tunca parti tjayičha”.

¹³ Jalla nii impuesto cobriñi žoñizti wirquin acha colzi želatčha. Ana tsewcchuc cherzipanž želatčha. Jalla nuž persun ujhiz cjen persun tuzi čhajccan želatčha. Nižaza cjičičha: “Yooz Tatay, wejr ujhizpantčha. Wejr okznalla”.

¹⁴ Jaziqui ančhucaquiz cjiwčha. Nii impuesto cobriñi žoñiqui Yooz Epiž yujcquiziqui niž ujquiztan liwriičha. Niiž kjuya pertunta ojkchičha. Nii fariseo žoñizti Yooz Epiž yujcquiziqui tira ujhizpantačha. Ana pertunta cjišičha. Persun honora waytiñi žoñinacaqui ultimquiziqui azipanž cjesačha. Nižaza ultimquiziqui humilde kuzziz žoñinacžti honorchiz cjskattaž cjequičha.

OCJALANACZ KUZ PUNTU

¹⁵ Tsjii nooj zoñinacaqui Jesusizquin ocjalanaca zjicchiča, kjaržtan lanznajo. Nuž zjijcan, Jesusiz tjaajinta zoñinacaqui ocjala zjijcni zoñinaca ujziča.

¹⁶ Nuž nonžcuqui Jesusaqui kjawziča, tuž cjan:

—Ocjalanaca wejtquin tjonaj cjee, ana chiižina. Tii ocjalanacz kuz irata jalla nižta kuzzizza Yooz Epiž mantita kamañchiz zoñinacaqui.

¹⁷ Tii razunazakal chiyuča. Ana tii ocjalanacz kuz irata Yoozquin kuzzizzalaj niiqui, ana Yooz Ejpž arajpach watja luzasača.

LIWRIITA CJIS PUNTU

¹⁸ Wiruñaquí tsjii jiliriquí Jesúsizquíz pewczíča, tuž cjan:

—Tjaajiñi Maestro, zumača amqui. Arajpach wajtquin wiñaya kamzjapa, ¿chjulut paasaya?

¹⁹ Nekztanaqui Jesusaqui kjaaziča, tuž cjan:

—¿Kjažtiquiztan amqui wejtquíz “zumačham” cjeejo? Anaž jecmi zumaqui, Yooz-pankazza zumaqui.

²⁰ Amqui Yooz mantitanaca zizza: “Anača adulteriuquíz ojklayzqui. Anača zoñimi conzqui. Anača tjañi cjisqui. Anača toscarami chiizqui. Am maa ejpča rispitzqui”.

²¹ Nekztanaqui nii jiliriquí cjichiča:

—Wejrqui koltallquiztanpacha tjapa nii lii jaru cumpliñča.

²² Jalla nuž nii zoñiz chiita nonžcu, Jesusaqui cjichiča:

—Tsjii llakaz pjaltiča amtaqui. Tjappacha am chjultak cusasanaca tuysna. Nekztan porinaczquíz nii paaz ona. Jalla nuž onanžcuqui tsewcta arajpachquin juc'ant ricachum cjequiča. Jaziqui nekztan wejttañi chica ojklayñi cjesača.

²³ Nii oraquí walja ricachutača nii zoñiqui. Jalla nuž Jesúsiz chiitiquiztan nonžcu, walja llactazziča.

²⁴ Nii zoñi llaquita cheržcu, Jesusaqui cjichiča:

—Ricachunacztaqui walja ch'amača Yooz kamañ jiczquíz luzqui, Yooz mantita kamañquíz cjisjapaqui.

²⁵ Tsjii camello cjita pajk animalaqui ch'aman acuj cjuñquíz luzasača. Ricachunacztaqui tsjan ch'amača Yooz jiczquíz luzqui, Yooz mantita kamañquíz cjisjapaqui.

²⁶ Jalla nii nonžcu, nonžni zoñinacaqui cjichiča:

—¿Jequit liwriita cjesajo?

²⁷ Nekztanaqui Jesusaqui cjichiča:

—Zoñiqui anaž persunpacha liwrii atasacha. Yoozpankazza liwriiñiqui. Yoozqui jecmi liwrii atasacha.

²⁸ Nekztanaqui Pedruqui cjichiča:

—Wejt Jiliri, wejrnaquí tjappacha ecchinča, amtan chica ojklayzjapa.

²⁹ Jalla nekztanaqui Jesusaqui kjaaziča, tuž cjan:

—Weraral chiyuča. Jakzilta zoñimi kjuya, maa ejp, jilanaca, cullaquinaca, tjun, maati-naca, jalla ninaca ecčhaj niiqui, Yooz mantita kamañquíz ojklayzjapa,

³⁰ tii muntuquíz žejlcan juc'anti tjaataž cjequiča. Y nižaza arajpachquin ojžcu, Yooztan wiñaya cuntintu kamaquiča.

JESUSAQUI NIIZ PERSUN TICZ ORA MAZZICHA

³¹ Nekztanaqui Jesusaqui niiz tuncapan tjaajintanaca tsjii latu kjawziča, tuž cjan:

—Jaziqui Jerusalén watjaž ojkla. Wejrqui tsewctan cuchanžquita Yooz Zoñiča. Tuquitanpacha Yooz taku paljayñi profetanacaqui wejt puntuquiztan mazincan cjiřchiča. Jalla nii Jerusalén wajtquin ninacz mazinta taku tjappacha cumplisnaquiča.

³² Yekja wajtchiz zoñinaczquíz intirjital cjeeča. Nižaza ancha iñartal cjeeča; arartal cjeeča. Nižaza llawzižtan tjujtal cjeeča.

³³ Nižaza wjajtal cjeeča. Nekztanaqui contal cjeeča. Pero ticžcuqui chjep majquiztan jacatatača.

³⁴ Jalla nii tjaajinta zoñinacaqui Jesúsiz chiita ana zinta intintazatča, chjul puntuquiztan chiičhaja, jalla nii. Nii takuqui ana intintichuc takužtakaztača.

ZUR ZOÑI CHJETINTA

³⁵ Jalla nekztanaqui Jesusaqui Jericó cjita wajt žcati irantatča. Jalla nuž irantan tsjii zur zoñi jicz latuquíz julzi želatča, niiqui kjaraz chjinchjinatča onajo.

³⁶ Walja zoñinaca watwatñi nonžcu, zur zoñiqui pewczíča, tuž cjan:

—¿Kjažtiquiztan tama tama zoñinaca watwat?

³⁷ Nekztanaqui zoñinaca kjaaziča, tuž cjan:

—Jesusa, nii Nazaret wajtchiz zoñiqui watča tii jiczquíz.

³⁸ Jalla nii zizcu, zur zoñiqui altu joržtan kjawchiča, tuž cjican:

—Jesusa, Davidž maati, wejr okznalla! Ana wali zeluča.

³⁹ Nii Jesusiž tuqu ojkñi zoñinacaqui nii zur zoñi ujziča, ch'uj zelajo. Zur zoñizti juc'anti altu joržtan kjawchiča, tuž cjican:

—iDavidž majch, wejr okznalla!

⁴⁰ Nekztanaqui altu joržtan chiiñi nonžcu, Jesusaqui tsijtsiča. Zur zoñi zijiqui cuchanchiča. Zur zoñi žcatžinžcu Jesusaqui pewcziča, tuž cjican:

⁴¹ —iČhjulut amta wejr paaquiya?

Nii zur zoñiqui kjaaziča, tuž cjican:

—iWejt Jiliri, čhjujcuž cjetžinalla!

⁴² Nekztanaqui Jesusaqui cjichiča:

—Am čhjujcu cjetžtaj cjsla. Amiž tjapa kuz criitiquiztanaqui, čhjetintamča.

⁴³ Nii orapacha zur zoñiqui cherñi cjissiča. Nekztanaqui Jesusižtan chica ojklayatča, Yoozquin honora waytican. Jalla nižta paata cheržcu, tjapa zoñinacaqui Yoozquin honora waytichizakazza.

19

JESUSIŽTAN ZAQUEOŽTAN

¹ Jalla nekztanaqui Jerusalén wajt kjutñi ojkan Jesusaqui Jericó cjita watja luzziča; nekztan nii wajt taypiquiz watchiča.

² Nicju tsjii ricach zoñi želatča Zaqueo cjita. Nii zoñiqui impuesto cobriñiž jiliritača, ancha ricachutača.

³ Nižaza nii zoñiqui Jesusa pajz pecatča. Kolta zoñitača. Jalla nižtiquiztan wacchi zoñinacž taypiquiz cjen, Jesusižquin anatača cherchuca.

⁴ Nekztan Zaqueoqui tucquin žajtžcu tsjii sicómoro cjita munti yawchiča, Jesusa chertzjapa. Nii munti, jicz latuquiz želatča, Jesusiž watz žcatipan.

⁵ Nii munti nuž watan, Jesusaqui tsewchuc cherziča. Nuž cheržcu cjichiča:

—Zaqueo, apura chjijwžca. Tonj tjuñi am kjuyquiz kamstanča.

⁶ Jalla nuž čhiitiquiztan Zaqueoqui apura chjijwžquichiča. Ancha cuntintu Jesusa risiwchiča.

⁷ Jalla nii cheržcu, tjappacha nii zoñinacaqui Jesusiž quintra chuchchiča, tuž cjican:

—Jesusaqui nii ujchiz zoñž kjuya kami ojčkča.

⁸ Jalla nekztanaqui Zaqueoqui tsijtsu, Jesusa Jiliržquiz cjichiča:

—Wejt Jiliri, tii zizza. Porinacžquiz tjaa-ača chicata wejt cusasa žejlñinaca. Nižaza jakzilta zoñžquiztan wejr incalltučhaja, jalla nii zoñžquiz wejr tjepnača pajkpic wiltiquiztan juc'anti.

⁹ Nekztanaqui Jesusaqui cjichiča:

—Tonj tjuñi tii kjuychiz zoñinacaqui liwriitača, Yooz kamañquiz luzjapa. Tii zoñiqui Abraham cjita majchmaatiquiztanpacha tjonñiča.

¹⁰ Wejrqui tsewctan cuchanžquita Yooz Zoñtča. Wejrqui tii muntuquiz tjonchinča, ujchiz zoñinaca kjawžñi, nižaza ninaca liwrii.

PIYUNANACŽQUIZ PAAZ INTIRJITA QUINTU

¹¹ Jerusalén wajtž žcati zelán, žejlñi zoñinacaqui pinsichiča, tuž cjican: “Anzilla Yooz mantiz tjuñiqui tjonachani”. Jalla nuž pinsitiquiztan, nižaza nii žejlñi zoñinaca niž čhiita taku nonznan, Jesusaqui tii quintu paljaychiča,

¹² tuž cjican:

—Tsjii zoñi želatča rispitta famillquiztan. Nii zoñiqui ažkquin yekja wajtquin ojčkichiča, chawc jilir nombramiento tanzjapa. Nuž tanžcu quejžcaquiča.

¹³ Ima ojkan, nii zoñiqui tunca niž piyunanaca kjawziča. Kjawžcu zapa maynižquiz tsjii pajk valorchiz paaz intirjichiča. Nižaza ninacžquiz cjichiča: “Tii paazan negociož paaquiča, wejt quejpsquizcama”.

¹⁴ Nii zoñž persun wajtchiz zoñinacaqui nii walja chjaawjkatchiča. Jalla nižtiquiztan niž wirquin tsjii cumizuna mantichiča, tuž cjejajo: “Tii zoñi anaž pecča učhum chawc jiliri cjisjapa”.

¹⁵ Nižtami chawc jiliri nombritatača. Nekztan niž yoka quejpciča, mantizjapa. Niž irantižcuqui, kjawžñi cuchanchiča niž paaz intirjita zoñinacžquin, jaknužt zapa mayni paaztan cančhaja, jalla nii zizjapa.

¹⁶ Primir piyunaqui prisintichiča, tuž cjican: “Wejt patruna, am paaztan canchinča tunca wiltan wiltan juc'anti”.

¹⁷ Nii chawc jiliriqui nii piyunž honora paljaychiča, tuž cjan: “Ancha waliča. Zuma piyunamča amqui. Nii zkoluc paaztan zumpacha trabajchamča. Jaziqui amqui jilirim cjequiča, tunca watja mantiñim cjequiča”.

¹⁸ Tsji piyunazti prisintichizakazza, tuž cjan: “Wejt patruna, am paaztan canchinča pjijska wiltan wiltan juc'anti”.

¹⁹ Nii chawc jiliriqui paljaychiča, tuž cjan: “Jaziqui jilirim cjequiča. Pjijska wajtquiztan mantiñim cjequiča”.

²⁰ Nekztanaqui tsji piyunazti prisintichizakazza, tuž cjan: “Wejt patruna, tiž am paazqui. Tsji pañquiz žcucžcu chjojchinča.

²¹ Amqui walja cumpliskatñi patrunamča. Jalla niztiquiztan am eksinča. Ricujñamča ana amiž nonztaqui. Nižaza ajžñamča ana amiž čjactaqui”.

²² Nekztanaqui nii chawc jiliriqui chiižinchiča, tuž cjan: “Ana zum piyunamča amqui. Am persun čhiita takuqui am uj tjeeža. Amqui zizzamča, wejrqui kjanapanžlani cumpliskatiñ žoñtni, jalla nii. Ana weriž nonztaqui ricujñihalani. Ana weriž čjactaqui ajžniñihalani.

²³ Niztiquiztanaqui, ¿kjažtiquiztanam amqui wejt paaz ana bancuquiz majcžinjo? Bancuquiz majcžintiquiztan wejrqui paaz machtanpacha ricujtasacha, tekz quejpžcu”.

²⁴ Nekztanaqui nii patrun jiliriqui parti žoñinacžquiz mantichiča, tuž cjan: “Intirjita paaz kjañzna. Nii tunca paazziz žoñžquiz tjaa”.

²⁵ Žoñinacaqui cjichiča: “¡Wejt Jiliri! Tunca paazzizza nii žoñiqui”.

²⁶ Patrun jiliriqui kjaaziča, tuž cjan: “Ančucaquiz tii razunal cjiwča. Jakzilta žoñit niž wacchi tjaata cusasa zuma cwitača, jalla nižquiz juc'anti tjaata cjequiča. Nižaza jakzilta žoñit niž koloculla tjaata cusasa ana zuma cwitačhaja, jalla nižquiztan asta nii zkolocullami kjañtaž cjequiča”.

²⁷ Nižaza nii jiliriqui mantichiča, tuž cjan: “Nii wejt quintra žoñinacaqui ana wejr pecchiča ninacž chawc jiliri cjisjapa. Jaziqui zjijczna ticju. ¡Zjijczcu wejt yujcquiz conzna!” Jalla nuž mantichiča nii jiliriqui.

JESUSAQUI JERUSALENQUIN LUZZICHA

²⁸ Jalla nuž quint'izcu, Jesusaqui Jerusalén watja tira ojkchiča.

²⁹ Betfagē cjita nižaza Betania cjita watjanaca žcatžincan, nižaza Olivos cjita curulla žcati želan, jalla nekztan pucultan niž tjaajinta žoñinaca cuchanchiča,

³⁰ tuž cjan:

—Nii nawjka watja oka. Jalla nicju ančhucqui mokta aznu wačhacquiča. Anaž jecmi nii aznuqui yawchi. Jalla nekztanaqui maktiquiztan jweržcu, tekz zjijca.

³¹ Jalla nuž jweržcu zjijcawc cjen cunamit žoñimiž pewcznačan, “¿kjažtiquiztan tii aznu jwerjo?” cjanacaqui. Jalla nii puntu pewcztiquiztan ančhucqui kjaaznacquiča, tuž cjan: “Jesusa jiliriž tii aznu pecča”.

³² Nekztanaqui nii pucultan tjaajintanacaqui ojkchiča. Jaknužt Jesusa čhiitčhaja, jalla nuž cjitacama watchiča. Jalla nuž tsji mokta aznu watchiča.

³³ Jalla nuž jweran, nii aznuž tuyñunacaqui pewczniča, tuž cjan:

—¿kjažtiquiztan nii aznu jwer ančhucjo?

³⁴ Tjaajintanacaqui kjaaziča, tuž cjan:

—Jesusa jiliriqui tii aznuž pecča.

³⁵ Nekztanaqui Jesusižquiz chjitchiča. Nekztan zquitinaca jepžcu ninacaqui Jesusižquiz yawkatchiča.

³⁶ Nii aznuquiz Jesusaž jiczquiz okan, žoñinacaqui zquiti chjinchiča, zquitinac juntuñ okajo chawc jilirižtakaz.

³⁷ Olivos cjita curulla watan, Jerusalén watja tjenziča. Jalla nekztanaqui tjapa niž tjaajinta žoñinacaqui altu joržtan Yooz honora wayti kallantichiča. Chipchipcan Yooz honora waytichiča, tjapa Jesusiž paata milajrunaca cherčiz cjen.

³⁸ Nižaza cjichiča:

—¡Chawc Jiliri! ¡Yooz tjuuquiz tjonchi jiliri! ¡Honorčiz cjila! ¡Arajpacha žejlñinaca cuntintuž cjee! ¡Arajpach Yoozquin wali honorčiz cjila!

³⁹ Jalla nuž Jesusižquiz honora waytitičquiztan tsji žejlñi fariseo žoñinacaqui paljaychiča, tuž cjan:

—Tjaajiñi Maestro, tii am apžni žoñinaca ujzna ch'uj želajo.

⁴⁰ Nekztan Jesusaqui kjaaziča, tuž cjan:

—Ančucaquiz cjiwča, tii žoñinacaž ch'uj cjisnaquila niiqui, tii maznacamiž altu joržtan chiyasacha, wejt honora waytizjapa.

⁴¹ Jerusalén watja žcatžincan, jalla nii watja cheržcu, Jesusaqui nii wajtchiz žoñinacaž cjen kaachiča,

⁴² tuž cjan:

—Jerusalén wajtchiz zoñinaca, tonj tjuñquiziqui wejt puntuquiztan intintaztasaz niiqui, zuma cuntintuž cjitasača. Walipankaz kamtasacha. Ančuca kuznaca jeejskatz pecuča. Pero wejt puntuquiztan ančucaquiztan čhojžtača. Jaziqui ančucqui Yooz zumanaca anaž cherasača.

⁴³ Wejt puntu ana intintaziž cjen walja anawali tjuñinacaz tjonaučiha. Nii tjuñinacquiziqui ančuca quintra zoñinacaqui tii wajtž tjia tsjii pirka quintra paaquiča. Tjapa kjuttanz ančuca wajt muytata quintrarionacaqui zelaquiča.

⁴⁴ Nižaza ančuca wajt pirkami k'ala pajltaž cjequiča. Tii wajtchiz zoñinaca ocjalanacžtanpacha contaž cjequiča. Nižaza tjappacha k'ala pampa nonžtaž cjequiča, anaž maz tawkitami zelaquiča. Yoozqui anchucaquiz tsjii liwriñi cuchanzquichiča; ančuczti nii liwriñiqui ana pajchinčucča. Jalla nižtiquiztan tii wataquiča. —Jalla nuž cjichiča Jesusaqui.

JESUSAQUI TIMPLU PEWZICHA

⁴⁵ Jerusalén watja irantizcu, Jesusaqui timpluquiz luzziča. Timpluquiztan zawncchuc liwj tuyñinacami kjayñinacami tjirkatchiča.

⁴⁶ Ninacžquiz cjichiča:

—Cjirta Yooz takuqui tuž cjicha: “Wejt kjuyaqui Yoozquin mayiziz kjuyača”. Ančuczti tii wejt kjuya tjañi zoñinacž kjuyažtakaz paachinčucča.

⁴⁷ Jalla nekztanaqui zapuru Jesusaqui tjaajnatča timpluquiz. Pero timplu jilirinacami lii tjaajñi maestrinacami wajt jilirinacami, jalla ninacazti jaknužt Jesusa coni atas, jalla nii kaznatča.

⁴⁸ Pero tjappacha nii wajtchiz zoñinacaqui Jesusiž taku nonzjapa kuz tjaatča. Jalla nižtiquiztan ana jaknužquiztanami nii conz puntuqui asiptiskatz atatča.

20

¿JECT JESUSIZQUIZ MANTICHI?

¹ Zapuru Jesusaqui timpluquiz zoñinacžquiz tjaajnatča, y nižaza liwriñi Yooz taku paljayatča. Jalla nuž tjaajnan, tsjii nooj timplu jilirinaca, lii tjaajñi jilirinaca, wajt jilirinaca, jalla ninacaqui Jesusižquiz macjatčiča.

² Nuž macjatžcu Jesusižquiz paljayčiča:

—Jaziqui am chiyazučiha. ¿Jec am mantichi tii paazjapajo? Nižaza ¿jec jilirit am utchi jilirižtakaz cjisjapajo?

³ Nekztanaqui Jesusaqui kjaaziča, tuž cjan:

—Wejrm jazic ančucaquiz zakal pewcznača.

⁴ ¿Ject Juan mantizquichi bautisjapajo? ¿Yoozkaya uz zoñinaca, ja? Kjaazna.

⁵ Jalla nuž čhiitiquiztanaqui ninacpora ch'aasi kallantichiča, tuž cjan:

—¿Jaknužum cjeequi? “Yooz mantitača” cjan učum kjaaznaquiz niiqui, “¿Kjažtiquiztan ančuc nii Juan ana criichinčuctajo?” jalla nuž cječan tični.

⁶ “Zoñiz mantitacha Juančui” cjan učum kjaaznaquiz niiqui, tjapa zoñinacaqui učum conačhani maztan čhajacawi. Tii zoñinacaqui Juanž puntuquiztan cjiñiča, niiqui werarapanča Yooz taku paljayñi profetaqui, jalla nii.

⁷ Nuž palt'izcu nii jilirinacaqui kjaaziča, tuž cjan:

—Wejrnacqui anal zizuča, jequit Juanqui bautisajo mantizquitčhaja, nii.

⁸ Nekztanaqui Jesusaqui cjichiča:

—Nižaza wejrqui ana zakal maznasača, jec jiliriž mantita paa-uchaja wejrqui, nii.

ANA WAL PIYUNANACA QUINTU

⁹ Nekztanaqui Jesusaqui zoñinacžquiz paljayi kallantichiča. Paljaycan tii quintu quint'ichiča, tuž cjan:

—Tsjii patrun zoñiqui uwasanac zkala čhajacziča. Nekztan nii zkala partira tjaachiča piyunanacžquiz. Nekztanaqui azkquin ojkičiča azk tjuñi kami.

¹⁰ Uwasa ajz cujicha timpu tjontan patrunaqui piyuna cuchanzquichiča niiz partir zkala ricujzjapa. Nii pachpiquiz partira langžni zoñinacazti patrunaž cuchanzquita piyuna kijchcu chjatkatchiča. Ana čjulchiz cuchanchiča.

¹¹ Nekztanaqui patrunaqui wilita tsjižtan piyuna cuchanzquichiča. Nekztan partir yokquiz kamñi zoñinacaqui patrunaž cuchanzquita piyuna ch'aanchiča, nižaza kijtčiča, nižaza ana čjulchiz cuchanchiča patrunžquin.

¹² Nekztanaqui patrunaqui tsjižtan cuchanzquichiča. Nii partira zoñinacaqui cuchanzquita piyuna chjojritchiča, nižaza chjatkatchiča.

¹³ Nižtami nii yokchiz patrunaqui pinsichiča, tuž cjan: “¿Čjulut wejr paas? Wejt k'ayi majch cuchnača. Jalla nuž cheržcuqui nii partira zoñinacaqui rispitačhani”.

¹⁴ Pero partira zkala langzñi zoñinacazti cuchanzquita majch cherzcu, ninacpora parlassiĉha, tuĉ cĉican: “Tiiqui tjappacha tii irinsa tanznaĉhani. Jaziqui ticĉ conĉla. Nekztan uĉumĉ tii zkala yokac tanznaquiĉha”.

¹⁵ Nuĉ pinsitiquiztan partira langzñi zoñinacaqui cuchanzquita majch yok tjia jwescu conĉiĉha.

‘Jaziqui pewcznuĉha:

–Nii zkala yokchiz patrucaqui ĉĉjulukat nii zoñinacĉtanac paaĉhani?

¹⁶ Wejrqui cĉiwĉha. Tjonĉcu zkala yokchiz patrucaqui partira langzñi zoñinaca conaquiĉha. Nekztanaqui patrucaqui niiz zkala yoka wejkĉquin tjaaznaquiĉha.

Jalla nuĉ nii quintu nonĉcu, zoñinacaqui cĉiĉiĉha:

–‘Yooz munañpaqui anaj nii cĉilla!

¹⁷ Jesusaqui ninacĉ kjutñi cherzcu cĉiĉiĉha:

–Wejt puntuquiztanaqui cĉijrta Yooz takuqui tuĉ cĉiĉha:

“Kjuy pirkiñinacaqui tsĉii maz tĉojĉiĉha. Nekztanaqui tĉojta mazqui isquinquiz cĉissiĉha. Ultimquiziqui tucquin cĉissiĉha”.

¹⁸ Nii maz cĉen jakzilit ujqiz tĉojtsnaĉhaja, jalla niiqui pirasuĉtakaz t’okuntaĉ cĉequiĉha. Niĉzaa jakzilitĉ juntuñ nii mazqui tĉojtsnaquiz niiqui, pulpuĉtakaz t’oknaquiĉha.

–Jalla nuĉ cĉiĉiĉha Jesusaqui.

TASA PACZ PUNTU

¹⁹ Jesusaqui nii quintu chiyatĉha quintra zoñinacĉ puntu. Jalla niĉtiquiztan timplu jilirinaca, niĉzaa lii tĉaajiñi maestrinaca, jalla ninacaqui Jesusaqui tanz pecatĉha nii orapacha. Pero parti ĉejlñi zoñinaca ekskcu, ana tani atĉiĉha.

²⁰ Pero nii quintranacaqui Jesusiĉquiz tiraĉ awayt’atĉha. Niĉzaa tsĉii kĉaĉt awayt’ini zoñinaca mantichiĉha, Jesusiĉtan ojklajajo zuma zoñiĉtakaz. Nuĉ chica ojklajcan Jesusiĉquiztan ana zuma taku jwes pecatĉha, uj tĉojtunĉjapa. Jalla nuĉ uj jwezanzcu nii wajt ĉawc jilirĉquiz intirĉiz pecatĉha.

²¹ Jalla nuĉ awayt’ican Jesusiĉquiz pewczĉiĉha tuĉ cĉican:

–Tĉaajiñi Maestro, zizuĉ wejrncacqui, am werarapan kĉaajiñamĉha. Kĉaĉtam parti zoñinacac chiyaj cĉee, amqui werarapankaz ĉiĉiñamĉha Yooz kamañ puntuqui.

²² Jaziqui tĉaajznalla tii puntuquiztan. Wejrncacqui ĉesar cĉita ĉawc jilirĉquiz tas paaz tĉaayiñĉha. ĉJalla nuĉ tas paaz tĉaazqui wali cĉesaya, uz anaĉ wali cĉesaj?

²³ Pero nuĉ pewcztiquiztan nonĉcu Jesusaqui ninacĉ quiz ninacĉ pizc kuzziz nayĉiĉha. Nekztanaqui cĉiĉiĉha:

–ĉKĉaĉtiquiztan anĉhucqui ĉawc ujquin wejr tĉojtskatĉ pecĉo?

²⁴ Tsĉii paaz zĉijca, cherĉjapa.

Paaz zĉijĉcu, Jesusaqui cĉiĉiĉha:

–ĉTii paazquiz ĉeĉ yujĉa? ĉNiĉzaa tii paazquiz ĉeĉ tjuu cĉijrtata?

Ninacaqui kĉaaziĉha:

–ĉesar cĉita jilirĉ yujĉĉha, niiz tĉuuzakazza.

²⁵ Nekztanaqui Jesusaqui ninacĉquiz cĉiĉiĉha:

–ĉjulumi jilirĉta cĉenaqui jilirĉquiz tĉaa. Niĉzaa ĉjulumi Yoozta cĉenaqui Yoozquiz tĉaa.

²⁶ Anaĉ ĉecmi Jesusiĉquiztan ana wal taku jwesi atasatĉha nii ĉejlñi zoñinacĉ yujcquiz cĉicanpachaqui. Jalla nuĉ Jesusiĉ kĉaaztiquiztanaqui ninacaqui ispanĉiĉha; ĉh’uju cĉissiĉha.

ZOÑINACA JACATATZ PUNTU

²⁷ Wiruñaquei tsĉii kĉaĉt saduceo cĉita zoñinacaqui Jesusiĉtan zali ojĉiĉha. Nii saduceo zoñinacaqui tĉaajiñitacĉha, ticzi zoñiqui anapan jacatatasacĉha, nuĉ cĉiñitacĉha. Jalla nii jacatatz puntuquiztan Jesusiĉquiz palĉayĉiĉha,

²⁸ tuĉ cĉican:

–Tĉaajiñi Maestro, Moisesaqui uĉumnacalĉa cĉijrtkalĉha, tuĉ cĉican: “Tsĉii zoñi ticznasaĉ niiqui, niiz tĉun ana ocjalchiz cĉesasaĉ niiqui, nekztan nii ticzi zoñi jilaqui naa ĉew ĉon tĉunatan zals waquiziĉha, nii ticzi jilĉ cuntiquiztan ocjala paazjapa”.

²⁹ Jaziqui pakallak jilazullca ĉelatĉha. Jilir jilaqui zalsiĉha. Nekztan ticziĉha ana ocjalchiz.

³⁰ Nekztanaqui tsĉii taypir jilaqui ĉew ĉon tĉunatan zalsizakazza. Nekztan ticzizakazza ana ocjalchiz.

³¹ Nekztanaqui yekĉa taypir jilaqui ĉew ĉon tĉunatan zalsizakazza. Niiz ĉaru niiz ĉaru naa tĉunatan zalsiĉha tĉapa nii pakallak jilazullcanacaqui. Niĉzaa tjappacha ticziĉha jilazullcanacaqui. Ana ocjala ecĉipanĉha.

³² Ultimquiziqui naa maatak ĉonqui ticzinĉha.

³³ Jaziqui zoñinaca jacatattanaqui, ¿jakzilta jilž tjunt cjequejo naa zonjo? Tjappacha nii pakallak jilazullcaqui naa zonatan zalsičha. —Jalla nuž pewczičha saduceo quintra zoñinacaqui.

³⁴ Jalla niža puntuquiztanaqui Jesusaqui kjaazičha, tuž cjican:

—Tii muntuquiz žejlcanaqui luctakami maatakami zalza; nižaza maatinaca zalsjapa tjaačha.

³⁵ Jakziltat Yoozquin kuzzizlaj niiqui ticziquiztan jacatatžcu, arajpach wajtquin zelaquičha. Nicju žejlcana ana zalznaquičha. Nižaza anaž zalzmi želasačha.

³⁶ Arajpachquin žejlcana, zoñinacaqui anjilažtakaz cjequičha; ana ticznasačha. Nižaza jalla nuž jacatattiquiztanaqui Yooz žejtñi maatinacapančha.

³⁷ Yooz tawk libruquiz tsjii ujsñi kal quintu žejlčha. Nii quintu quint'ican Moises-pachačha učhum zizkatchi, zoñinaca ticziquiztan jacatatñi, jalla nii. Nii Yooz tawk libruquiz Moisesqui cibirčičha, tuž cjican: “Yooz jiliriqiu Abrahamž Yoozza. Nižaza Isaacž Yoozza. Nižaza Jacobuž Yoozza”.

³⁸ Nii zoñinacž curpu ticziž cjenami, žejtčha. Yoozqui anačha ticzi zoñž Yoozqui. Niičha žejtñi zoñž Yoozqui. Tjapa Yoozquin kuzziz zoñinacaqui žejtchipana žejlčha.

³⁹ Jalla nekztanaqui tsjii kjaž lii tjaajiñi maestrunacaqui cjichičha:

—Žuma Tjaajiñi Maestro, walim čiichamčha.

⁴⁰ Jesusiž walja zizñi zizñi čiican quintra zoñinacaqui eksičha iya pewczjapaqui. Panž atiptatačha ninacaqui.

JESUSAQUI TSJII PEWCZICHA

⁴¹ Nekztanaqui Jesusaqui cjichičha:

—Zoñinacaqui tuž cjiñičha: “Cristučha Davidž Majchqui”. ¿Kjažtiquiztan nuž cjejejo?

⁴²⁻⁴³ Davidpachačha cjichi Salmos cjita libruquiz, tuž cjican:

“Yooz Ejppqui wejt chawjc jiliržquiz cjichičha: ‘Am kjojch koztan am quintri zoñinaca t'oksnachha, jalla nii t'okscama wejt žew latuquiz julzi žela amqui’”.

⁴⁴ Davidpachačha Cristuž puntuquiztan “Wejt chawjc jiliričha” cjican čiichičha. Jalla nižtiquiztan, ¿jaknužt Cristo chawjc jiliri cjicanpacha Davidž majch cjesajo?

JUDIO LII TJAAJIÑI MAESTRUNACZ PUNTU

⁴⁵ Tjapa zoñinacaz nonznan, Jesusaqui niž tjaajinta zoñinacžquiz paljajychičha, tuž cjican:

⁴⁶ —Lii tjaajiñi maestrunacžquiztan cwitaza. Ninacaqui tol zquitchiz ojklayz justasñičha, walja honorchiz cjsjapa. Nižaza palazquiz ojklaycan zuma rispitchiž tsaanskatz pecñičha. Nižaza ajcz kjuyquiz tucquin julz pecñičha. Nižaza pijstiquiz lujlcana ancha tucquin julžcu honorchiz cjskaz pecñičha.

⁴⁷ Nižaza ninacapacha žew maatakž cusasanaca tanzjapa, incallčha. Zoñinaca incallz-japa Yooztan ažka ažka parlitazoka cjiñičha. Yoozquin tjapa kuzziz zoñinacžtakaz tjeez pecčha. Jalla nižtiquiztan ninacaqui juc'ant tsjana anawaliž castictaž cjequičha.

21

OFREND A PUNTU

¹ Tsjii nooj timpluquiz žejlcana, Jesusaqui wali jiru ricach zoñinaca cherchičha ofrend cajquiz paaz uchñi.

² Nižaza tsjaa poris žew maataka cherchičha. Naa žewqui pizc paazalla utchiñičha.

³ Jalla nii cheržcu Jesusaqui cjichičha:

—Tii razunal cjiwčha. Taa poris žew žonqui ofrend cajquiz juc'ant jila utchiñičha, tjapa parti zoñinacžquiztan.

⁴ Parti zoñinacaqui žejtchi paaz utchičha. Naa poris žewzti tjappacha naaža paaz utchiñičha; ana iya žejlčha, čhjeri kjayzjapa.

JUDIUZ TIMPLU PUNTU

⁵ Yekjap zoñinacaqui timplu puntuquiztan parlatčha, nižaza nii timpluquiz žejlñi c'achja maznac puntuquiztan parlatčha, nižaza nii Yoozquiz ofrenda tjaata puntuquiztan parlatčha. Jalla nuž nonžcu timplu puntuquiztan Jesusaqui čiichičha, tuž cjican:

⁶ —Tsjii nooj tjapa tii timplu pajltaž cjequičha. Ana zinta tii maznaca pirkita želaquičha.

THI MUNTU TUCUZINZ PUNTUQUI

⁷ Jalla nekztanaqui Jesusižquiz pewczičha, tuž cjican:

—Tjaajiñi Maestro, ¿čhjularat tii amiž čiita wataquejo? Ima amiž čiita takunaca watan, ččhjulut siñalažtakaz cjequejo?

⁸ Nekztanaqui Jesusaqui cjichičha:

—Ančhucqui persunpachquiz cwitaza, anača incallskata. Walja zoñinacaqui wejt tjuu aynakanž tjonacuicha, tuž cjan: “Wejrtča Cristutqui”. Nižaza “Wajillaž Cristuž tjonacuicha”. Nuž cjanž ojklayaquiča. Jalla nuž chyanami ančhucqui anača criya, nižaza anaž ninacžtan apznaquiča.

⁹ Chjulorat quira zalz quintumi nižaza kichas zalz quintumi želačhaj niiqui ančhucqui wiraž ana tsucaquiča. Nuž: watanami imaž tii muntu tucuzinzqui irjatžcaquiča. Jalla nižta ana walinacatša primiraqui watstanqui.

¹⁰ Jesusaqui tira paljaychiča, tuž cjan:

—Tsjii nacionžtan tsjii nacionžtan kichasaquiča nacionpora. Nacionanacquitzan quiranaca zalassaquiča.

¹¹ Nižaza pajk terremotonacaž wataquiča, yokaž chjekinskatcan. Nižaza parti yokaran wali chawc mach'a želaquiča. Nižaza parti yokaran anawal cona želaquiča. Nižaza arajpachquin anawali ispanitchucanacaž parizaquiča, pajk siñalažtakaz wataquiča.

¹² Pero ima tižtanaca watan ančhucqui tantaž cjequiča, nižaza kijčtaž cjequiča. Nižaza ajcz kjuyquin chjichtaž cjequiča uj jwesanzjapa. Nižaza carsilquiz chawctaž cjequiča. Nižaza wali chawjc jilirž yujcquin chjichtaž cjequiča. Jalla nižtanacaž ančhucaquiz wataquiča, ančucaž wejtquin kuzziz cjen.

¹³ Jilirž yujcquiz chjichta cjen, ančhucqui wejt favoraž tjurt'acuicha.

¹⁴ Ima jilirž yujcquiz tjurt'ican ančhucqui ančuca kuzquiz ana tantiiz waquziča, jaknužt tjurt'achaja, jalla nii.

¹⁵ Tjurt'iñi chiiz oraqui weril zizñi taku tjaažzčača ančuca kuzquiz. Nii ančucaž zizñi taku chiitquitzan anaž jecmi ančuca quitra kjaazñi atasacha. Inakaz cjisnaquiča.

¹⁶ Ančhucqui tarasuntaž cjequiča. Maa ejp, jilanaca, famillanaca, mazinaca, jalla ninacžquitzanami tarasuntaž cjequiča ančhucqui. Nekžtan yekjap ančucaquitzan contaž cjequiča.

¹⁷ Nižaza wacchi tii muntuquiz kamñi zoñinacaqui ančucaquiz chjaawjkataquiča, weriž cjen.

¹⁸ Jalla nuž cjenami anaž zinta ančuca ach charami pertiskatta cjequiča.

¹⁹ Nižaza sufrichiz cjenami jakziltat zumpacha Yoozquin tjurt'ichi cjechaja, Yooztan wiñaya cuntintu kamaquiča.

²⁰ Jesusaqui cjichizakazza:

—Jerusalén watja zultatuž muyuntita cjen, ančhucqui naaznaquiča, ultimu nii watjaqui t'ezintaž cjeekalaca, jalla nuž cjequiča ančhucqui.

²¹ Jalla nuž naazcan, Judea yokquin žejlñi zoñinacaqui cur kjutñi zajtcu atipz waquziča. Nižaza Jerusalén wajtchiz zoñinacaqui wajtquitzan ulanz waquziča. Nižaza joch yokquin žejlñi zoñinacaqui ana wajtquin quejpsquiz waquziča, atipz waquziča.

²² Nii noojiqui Yoozqui Israel zoñinaca casticaquiča. Casticz puntuquitzan tjapa Yooz tawk libruquiz cjiirtaqui cumplisnaquiča.

²³ ¡lc maatakanacajay! ¡Wawa t'ichiñi maatakanacajay! Ancha ana wali sufraquiča. ¡Tjapa tii yokquiz žejlñi zoñinacajay! Anchaž llact'azaquiča, castictaž cjequiča.

²⁴ Zoñinacaqui quirquiz ticziž cjequiča. Yekjap zoñinacacazti tanžcu chjichtaž cjequiča yekja nacionquin. Nižaza yekja wajtchiz zoñinacaqui tii wajtchiz zoñinaca mantaquiča, nii yekjanacž timpu tucuzinžcama, nižaza Yooz munañpa timpucama.

²⁵ Jalla nekžtanaqui tjuñquzimi jizquzimi warawarquzimi, jalla ninacžquiz siñalanaca wataquiča. Nižaza pajk kot ljojkiž kjawaquiča. Jalla nižtiquitzan tii yokquiz žejlñi zoñinacaqui walja tsucchi kuzziz cjequiča, nižaza turwayzinta kuzziz cjequiča.

²⁶ Arajpachquin žejlñi kjananacami chjekinskattaž cjequiča. Jalla nii cheržcu zoñinacaqui pinsaquiča, tii muntu kjažt wataquejo, jalla nii. Tii muntu tucuzinz tjewznaquiča. Jalla nižta watan zoñinacaqui tsuscukaz tismaquiča.

²⁷ Jalla nekžtanaqui zoñinacaqui wejr, nii tsewtan chuchayzita Yooz Zoñi, quejprziñi cheraquiča. Walja kjancañ wejt azi tjeežcan tsjir taypiz tjonacħa.

²⁸ Jalla nižta anawalinaca wati kallantan, ančhucqui walja Yoozquin kuzziz cje. Achamiž wayta, tsewcchucħa chernza. Wajillaž ančuca ultim liwriiz tjuñi tjonacuicha.

²⁹ Nižaza Jesusaqui tii quintu quint'ichiča tuž cjan:

—Higo muntiquitzan naazna; čjul muntimi naazna.

³⁰ Ančhucmi tsjii munti ch'ojñapachaž c'ajan tuž zizza, kjutunz timpu žcatžinča, jalla nii.

³¹ Jalla nižta irataž tii weriž chiitanaca watan, ančhucqui tuž zizaquiča, Yooz mantiz tjuñi žcatžinča, jalla nii.

³² Tii razunal cjiwħa. Ima tjapa tii timpuquiz kamñi zoñinacaž ticznacñ, tjapa weriž chiitanaca wataquiča.

³³ Arajpachami yokami tucuzinžnaquiča. Wejt takuzti anapanž tucuzinžnaquiča, panž cumplisnaquiča.

³⁴ 'Ančhucqui persunpachquiz cwitaza. Ančhucqui anaž turpi kuzziz cjee. Ana wali kamz cjen, nižaza licz cjen, nižaza tii wir cusasanacžquiz kuz tjaaz cjen, jalla nuž cjen zoñinacaqui turpi kuzzizza. Ana zuma kaman Yooz tjonz tjuñi tiripintit ančhuc tanaquiča

³⁵ tsjii trampaqui tiripintitž tanža, jalla nižta irataž Yoozquii tii muntuquiz ana wali kamñi zoñinaca tiripintit tanaquiča, casticzjapa.

³⁶ Ančhuczti listu tjaczi tjewzñi cjee. Zapuru ančhucqui Yoozquiztan azziz cjisjapa mayiza, tjapa watñi anawalinacquiztan atipzjapa, nižaza tsewctan cuchanžquita Yooz Zoñž yujcquiz zuma prisintizjapa.

³⁷ Jalla nuž tjaajinchiča Jesusaqui. Majiñqui Jesusaqui simpluquiz tjaajnatča zapuru. Weenqui Olivos cjita curullquin želi okatča.

³⁸ Tjapa zoñinacaqui wentan simpluquiz tjonatča Jesusiž taku nonzñi.

22

JESUSA TANZ TANTIITA

¹ Jalla nekztanaqui ana liwaturchiz t'anta lujlz pjijsa irantižcatča. Nii pjijsaqui pascua cjitatača.

² Nii oraqui timplu jilirinacami lli tjaajiñi maestrnacami, “žJaknužt Jesusa conas?” cjican kazziča. Pero ninacaqui parti zoñinaca walja ekskcu, ana coni atchiča.

³ Jalla nekztanaqui Satanás cjita zajraqui Judas kuzquiz luzziča. Judasqui Iscariote cjitazakaztača. Judasqui parti tuncapan illzta zoñinacžquiztan nekztantača.

⁴ Judasqui timplu chawc jilirinacžtanami, timplu zultatž jilirinacžtanami parli ojkchiča. Ninacžtan zalžcu, parličiča, jaknužt ninacž kjarquiz Jesusa intirjas, jalla nii.

⁵ Jalla nuž Judas parlitiquiztan quintra zoñinacaqui ancha cuntintutacha. Paaz tjaaz compromitchiča.

⁶ Jalla nižtiquiztan Judasqui asiptičiča, “Way” cjican. Nekztanaqui tantiya kallantichiča, jaknužt ana tama žoñi želan Jesusa intirjas, jalla nii.

SANTA CENA PAACHICHA

⁷ Jalla nekztanaqui ana liwaturchiz t'anta lujlz pjijsaqui irantižquichiča. Nii pjijsaqui tsjii uuzi wilana conspantača, pascua pjijsa paažjapa.

⁸ Nekztanaqui Jesusaqui pucultan niž tjaajintanaca cuchanchiča. Pedružtan Juanžtan ninacatača. Ima cuchancan ninacžquiz tuž cjichiča:

—Ančhucquiči oka, učumnacaž pascua čjheri lujlzjapa, tjaczca.

⁹ Nekztanaqui nii pucultan tjaajintanacaqui Jesusižquiz pewcziča, tuž cjican:

—žJakziquin wejrnacqui čjheri tjacznaquiya?

¹⁰ Jesusaqui kjaaziča, tuž cjican:

—Ančhucqui watja luzcu, tsjii zoñžtan zalaquiča kjaz luuz kuzzi. Nii zoñž wirquiz apznaquiča, jakziquin luzachaja, jalla nekz.

¹¹ Jalla nekz luzcu nii kjuychiz zoñžquiz paljayaquiča, tuž cjican: “Wejt Tjaajiñi cjiča: žJakziquin visitiz kjuya žejlya, wejt tjaajintanacžtan pascu čjheri lujlzjapaya?”

¹² Nekztanaqui tsewcta pisuquiz tsjii pajk kjuya tjeeznaquiča ančucaquiz. Nii kjuya listu tjaczta cjequiča. Jalla nekz čjheri lujlz tjacznaquiča.

¹³ Jalla nekztanaqui nii pucultanaqui ojkchiča. Nekztan Jesusiž čhiitacama watchiča. Jaziqii nekziqii pascu čjheri kissiča.

¹⁴ Pascu čjheri lujlz ora cjen, Jesusaqui niž illzta zoñinacžtan misquiz julziča.

¹⁵ Jalla nuž julžcu Jesusaqui ninacžquiz cjichiča:

—Wejrqui ančhucatan tii pascu pjijsa čjheri lujlzjapa ancha pecchinpanča, ima ticzcan.

¹⁶ Ančucaquiz cjiwča, ančhucatan ana iya tii pjijsa paača, čhjoloracamat Yooz ultimu tjapa mantačhaja, jalla nii oracama. Nekztan tii pjijsa wilta paa-acha.

¹⁷ Jalla nekztanaqui Jesusaqui persun kjaržtan wasu tanziča. Nekztan Yooz Ejpžquin sparaquiči cjičiča. Nekztanaqui niž illztanacžquiz cjičiča:

—Tii wasu tanžna. Ančhuccama tožžcuqui liczna.

¹⁸ Tekztan nawjkchuc wejrqui uwas kjazquii anal iya licača, čhjoloracamat Yooz tjapa mantačhaja, niicama.

¹⁹ Jalla nii licžcuqui, Jesusaqui persun kjaržtan t'anta tanziča. Nekztan Yooz Ejpžquin sparaquiči cjičiča. Nekztanaqui t'anta kjolžcu niž illztanacžquiz tjaachiča, tuž cjican:

—Tiiča wejt curpuž cuntaqui. Tii wejt curpuqui intirjitaž cjequiča ančuca laycu. Nižaza wejr cjuñžcu, tii lujlznaquiča.

²⁰ Nekztan čjheri lujlzcu, wasu tanziča. Nekztan niž tuquii čhiita taku irata čhiichizakazza, tuž cjican:

—Wejt ljocqui ančhuca laycu tjawktaž cjequiča. Wejt ljocžtan ew žejtz kamaña ut'aytaž cjequiča. Tii wazuquiztan liczqui wejt ljoc cuntiquiztanča.

²¹ Wejt quintra tarasunñi zoñiqui wejttan chicapachača tii misquiz.

²² Wejrqui tsewctan cuchanzquita Yooz Zoñtča. Wejrqui Yooz Epiž munañpi jaru jalla nii kamañ jiczquiz okača. Wejt quintra tarasunñi zoñžquizziti anawaliz cjisnaquiča.

²³ Jalla nuž čhiitiquiztan tjaajinta zoñinacaqui ninacpora pewcsassiča:

—Jequit wejrnacquiztan nii tarasunñi zoñi cjes? —Nuž cjican ninacpora pewcsassiča.

JEQUIT TUCQUIN CJEEQUI?

²⁴ Jalla nuž wiruñiqui nii tjaajintanacaqui ch'aassiča, ject tucquin naazi cjeequi, jalla nii.

²⁵ Pero Jesusaqui ninacžquiz cjichiča:

—Chawc jilirinacaqui persun wajtchiz zoñinaca mantiñiča anawal patrunažtakaz. Nižaza nii jilirinacaqui mantita zoñinacžquiz jilirž honorakaz waytiskatča, “walipan paača tii jiliriqui”, cjican.

²⁶ Ančhuczi anaž nižta paaz waquiziča. Antiz ančhucqui tižta paaz waquiziča. Jakziltat tsjan chawc jilirizlaj niiqui, tjowažtakaz cjis waquiziča. Nižaza jakziltat mantiñizlaj niiqui, piyunažtakaz cjis waquiziča.

²⁷ ¿Ject tucquin chekan zoñejo? ¿Misquiz julzñi zoñej chekanaqui? Už ¿nii misquiz atintiñi zoñej, jaa? Tii razunal cjiwča: Misquiz julzñi zoñiča tucquin chekanaqui. Jalla nuž cjenami wejrqui ančhucaporquiz atintiñi zoñižtakaztča.

²⁸ Ančhucqui wejttan čica žejlchinčhucpanča wejtquiz anawali watanami. Wejtquiztan ana zarakchinčhucča.

²⁹ Jalla nižtiquiztan wejrqui ančhuc učača, mantiñi jilirinaca cjisjapa. Jaknužt wejt Yooz Ejpqui mantiñi jiliri cjisjapa wejr utčhaja, jalla nižta.

³⁰ Jalla nuž cjen ančhucqui arajpach wajtquin wejttan čica želaquiča, nižaza wejttan čica lujlznaquiča. Nižaza nekzičiqui wejttan čica jilirž sillquiz julznaquiča tuncapan Israel t'akquiz žoninaca pjalzjapa.

SIMON PEDRUQUI JESUSA ANA PAJÑI CHIYAQUICHA

³¹ Nekztan Jesusaqui cjichiča:

—Simona, Simona, tiim zizaquiča amqui. Satanasqui am pecča, nuž parti cjskatzjapa. Trigožtakaz layinz pecča, ujquiz tjojtskatzjapa.

³² Simona, am laycu tjurt'izinchinča ana juc'anti upa kuzziz cjejajo. Amqui Yoozquin tjapa kuztan quejpžcu am jilanaca yanapaquiča tjup kuzziz tjurt'ajo.

³³ Nekztanaqui Simonaqui cjichiča:

—Wejt jiliri, wejrqui listuča amtan čica ojkzjapa; carsilquizimi lusasača; nizaza amtan chicapachami ticsnasača.

³⁴ Jalla nuž čhiitiquiztanaqui Jesusaqui cjichiča:

—Pedro, amquiz chiyuča, ima wallpaž kjawan, amqui wejt puntuquiztan nicaquiča. Chjep wilta wejr ana pajñim chiyauquiča.

JESUSIZ CHIIZINTA TAKUNACA

³⁵ Jalla nekztanaqui Jesusaqui paljaychiča, tuž cjican:

—Tuquiqui wejrqui ančhuc cuchanchinča ana quelzziz, nižaza ana paazziz, nižaza ana yekjat čhjatchiz. Jalla nuž okan ¿ančhucaquiz čhjulut pjaltichiya?

Nekztanaqui ninacaqui kjaaziča:

—Anaž čhjulumi pjaltichiča, —cjican.

³⁶ Nekztanaqui Jesusaqui ninacžquiz cjichiča:

—Anzičiqui jakziltat quelzziz cječhaja, nii quelzqui chjicha. Nižaza jakziltat paazziz cječhaja, nii paazqui chjicha. Jakziltat ana armichiz žejlčhaja, persun chaquita tuyzla, arma kjayžjapa.

³⁷ Ančhucaquiz chiyuča. Wejt puntuquiztanaqui Yooz takuqui tuž cjiča: “Castictaž cjequiča anawal zoñinacžtan čica”. Wejt persunquiz cumplistanča nii cjižta Yooz takuqui. Nižaza tjapa cjižta Yooz takuqui wejt puntuquiztan cumplistanča.

³⁸ Jalla nekztanaqui ninacaqui cjichiča:

—Wejt jiliri, tekzi pizc arma žejlča.

Jesusaqui kjaaziča:

—Nužquizka cjila, —cjican.

JESUSAQUI YOOZ EJPZQUIN MAYZICHICHA

³⁹ Jalla nekztanaqui Jesusaqui ulanchiča. Olivos cjita curullquin ojkchiča, jalla nicju ojkñipantača. Tjaajinta zoñinacaqui Jesusižquiz apziča.

⁴⁰ Olivos cjita curulla irantižcu, Jesusaqui cjichiča:

—Yooz Ejpžquin mayiza ana ujquiz tjojtsjapa.

⁴¹ Nekztanaqui Jesusaqui niž tjaajintanaczquiztan žoñiž maz čhjecta, jalla nužullquin ojkcichiča. Jalla nicju quillsiča Yooz Ejpžquin mayizizjapa.

⁴² Mayizican cjichiča:

—Yooz Tata, amqui munaquiz niiqui, wejr liwriyalla tii sufrisquiztan. Pero anal wejt kuzcama ojkc pecuča. Jaknuž am kuz munčhaja, jalla niicama ojkc pecuča.

⁴³ Jalla nii oraqui arajpachquiztan tsjii Yooz Epiž cuchanzquita anjilaqui jeczquichiča, Jesusa azi tjaazjapa.

⁴⁴ Jesusaqui jalla nuž ancha llact'azcan, tjapa aztan Yoozquin mayizatča. Jalla nuž mayizan ancha pjalñi pjatziča ljocžtakaz čhjujatča yok kjutñi.

⁴⁵ Yoozquin mayiziz žeržcu, tsjitsiča Jesusaqui. Nekztanaqui niž tjaajintanaczquiz quejpcichiča. Ninaca llaquizinpantiž tjabatča. Nuž cjen Jesusaqui tjañi zalchiča.

⁴⁶ Jalla nekztanaqui Jesusaqui cjichiča:

—¿Ančhucqui kjažtiquiztan tja-jō? Zaazna, Yoozquin mayiza ana ujquiz tjojtsjapa.

JESUSA PRESO TANTA

⁴⁷ Jesusaž ima parla žeržnan, walja žoñinaca tjonchiča. Judas cjita žoñiqui tucquinpan tjonchiča. Judasqui nii tuncapan illzta žoñinacz partiquiztantača. Nekztan Jesusižquin macjatchiča chjulzjapa.

⁴⁸ Jesusaqui Judasquiz cjichiča:

—Judas, ¿wejr tsjii chjulžcum amqui tarazunaquiya? Wejrtča Yooz cuchanzquita žoñtqui.

⁴⁹ Jesusižtan žejlñi žoñinacaqui jalla nižta cheržcu, pewcziča, tuž cjican:

—Wejt jiliri, ¿cuchillu armižtan tjurt'aquiya?

⁵⁰ Tsjii nii tjaajintanaczquiztan timplu jilirž piyuna čhjojritchiča, žew cjuñi chja-jtžinchiča.

⁵¹ Pero Jesusaqui cjichiča:

—Nužquizkaz cjee. Armižtan ana iya tjurt'aquiča.

Nekztanaqui nii orapacha Jesusaqui nii piyunž cjuñi lanžcu čhjetinchiča.

⁵² Timplu čawc jilirinacami nižaza timplu zultatž jilirinacami, nižaza wajt jilirinacami, jalla ninacami Jesusa preso čhichi tjonchiča. Ninaczquiz paljaychiča Jesusaqui, tuž cjican:

—¿Kjažtiquiztan ančhucqui cuchillu armižtan, nižaza tuñžtan tjonchinčhucta, wejr tanz-japaya? ¿Wejrqui tjañ žoñtkaya?

⁵³ Zapuru timpluquiz kamčinča ančhucatan chica. Nii oraqui wejr ana kjaž cjich-inčhucča. Pero anziča ančhucata tanz oraqui. Tii orakaz zumchiquiz kamñinacaqui mantasača.

PEDRUQUI JESUSA ANA PAJÑI CHIICHICHA

⁵⁴ Jalla nekztanaqui žoñinacaqui Jesusa preso tanchiča. Tanžcu timplu čawc jilirž kjuya chjitchiča. Pedruqui ažkquiztanalla apziča.

⁵⁵ Jalla nii jilirž kjuy patio taypiquiz tsjii uj luminaru taaziča. Žoñinacaqui uj muytata julzi želatča. Nižaza Pedruqui ninacztan chica julzi želatča.

⁵⁶ Jalla nuž uj kjanquiz julzi želan, tsjaa piyun žonqui Pedro žejlñi cherčinča. Nekztan naaqui cjichinča:

—Tii žoñiqui nii žoñžtan chica ojklajñitala, niž tiic, ¿ana jaa?

⁵⁷ Pedruzti nuž cjitiquiztan nicchiča, tuž cjican:

—Cullaca, nii žoñi anal pajuča.

⁵⁸ Jalla niž wiruñpacha, tsjiizuñ Pedro cherchizakazza. Jalla nuž cheržcu, cjichiča:

—Amqui nii parti žoñimla.

Nekztanaqui Pedruqui kjaaziča; tuž cjican:

—Anapanča wejrqui.

⁵⁹ Tsjii orquiztanaqui yekja žoñiqui paljaychizakazza, tuž cjican:

—Ultim werara, tii žoñiqui nii žoñžtan chica ojklajñipantala. Tiiqui Galilea wajtchiz žoñizakazla.

⁶⁰ Jalla nekztanaqui Pedruqui cjichiča:

—Jila, čhjulukam nižta chiičhani, anal zizuča.

Jalla nuž čhyan nii orapachaqui tsjii wallpi jora kjawchiča.

⁶¹ Jalla nuž wallpi jora kjawan, Jesusaqui Pedruz kjutñi kjutžcu cheržquichiča. Jalla nižtiquiztan Pedruqui, Jesús jilirž tuqui čhiita cjuñižiča. Tuquiqui Jesusaqui cjichiča: “Ima wallpaž kjawan, amqui wejt puntuquiztan nicaquiča. Čhjep wilta wejr ana pajñim chiyauquiča”.

⁶² Jalla nuž watžcu, Pedruqui ulanchičha. Nuž ulanžcu ancha kaachičha, Jesusa ana pajñi chiižcu.

⁶³ Jesusa itzñi zoñinacaqui walja iñarchičha. Nižaza Jesusa wjajtchičha.

⁶⁴ Nižaza Jesusiž chjujcuqui chawjczinžcu yujcquiz kijtchičha, tuž cjican:

—¡Tantiyalla! ¿Ject am kijchjo?

⁶⁵ Nižaza niiz quintra čhjul anawalinacami chiichičha, nuž iñarchičha.

JESUSA JILIRINACZ YUJCQUIZ CHJICHTA

⁶⁶ Tjuñiž tjewctanalla, tjapa judío jilirinacaqui juntassičha, wajt jilirinacami, timplu jilirinacami, lii tjaajiñinacami, jalla ninacami. Jalla nektanaqui Jesusa chawjc parliz kjuya chjitchičha. Nicju ajczi jilirinaczquin apantichičha. Nektzan jilirinacaqui niizquiz pecunchičha, tuž cjican:

⁶⁷ —Jaziqui am chiya, ¿ampanim Cristumpanikaya?

Jesusaqui kjaazičha, tuž cjican:

—Wejrqui “jesalla” cjež niiqui, anaž wejr criyaquiz ančhucui.

⁶⁸ Nižaza wejrqui ančhucuaquiz pewcznaž niiqui, anaž wejr werara kjaazta cjeečha. Nižaza wejr anaž cujtznauquičha

⁶⁹ Wejrqui tsewctan cuchanžquita Yooz Zoñtčha. Tekztanpacha wejrqui tjapa azziz Yooz Ejpž zew latuquiz julzil cjeečha. —Jalla nuž kjaazičha Jesusaqui.

⁷⁰ Jalla nektanaqui tjapa nii žejlñi zoñinacaqui pecunchičha, tuž cjican:

—¿Am Yooz Majchimpanikaya?

Nektzan Jesusaqui kjaazičha, tuž cjican:

—Wejrpančha, ančhucž pecunčha, jalla nužupančha.

⁷¹ Jalla nektanaqui ninacaqui cjichičha:

—¿Čhjul juc'antiž tisticu tumpasajo? Učhumpachala niiz persun ata chiiñi nonztaqui, ana wali chiichičha, “Yooz Majchčha wejrqui” cjican.

23

JESUSIZTAN PILATO CJITA JILIRZTAN

¹ Jalla nektanaqui tjapa nii žejlñi jilirinacaqui tsijtsičha. Nektanaqui Jesusa chjitchičha Pilato cjita jiliržquin.

² Jalla nicju uj tjojtñi kallantichičha, tuž cjican:

—Wejrnacqui tii zoñi wajtchinčha, tii wajtchiz zoñinaczquiz anawaliž aptjapcan zelatčha. Jalla nuž wajtchinčha. Tii zoñizakaz cjičha: “Učhumqui Romanž jilirž tasa ana tjaaz waquizichha” jalla nuž cjičha tiiqui. Nižaza cjičha, “Wejrtčha Yooz cuchanžquita Cristutqui”. Nuž cjican, cjičha, “Wejrtčha chawc jiliritqui”.

³ Jalla nektanaqui Pilato cjita jiliričha tuž pewczičha:

—¿Judío wajtchiz zoñinacz chawc jilirim amya?

Nektzan Jesusaqui kjaazičha, tuž cjican:

—Jalla nužupančha, am nuž chiita, jalla nii.

⁴ Nektanaqui Pilatuqui timplu chawc jilirinaczquiz, nižaza žejlñi zoñinaczquiz cjičha:

—Anal tii zoñžquiz čhjul ujmi wačučha.

⁵ Nii zoñinacazti ancha ujquiz tjojtskatž pecatčha. Jalla nižtquiztan cjičha:

—Tii zoñiqui niiz tjaajintžtan waljaž tjojtkila tjapa Judea yokquin žejlñi zoñinacaqui. Primiraqui Galilea yokquinž nižta paatčha tiiqui. Jaziqui tekzi nižtazakaz paačha.

JESUSA HERODIZQUIZ CHJICHTA

⁶ Jalla nuž nonžcu, Pilatuqui pewczičha, tuž cjican:

—¿Tiiqui Galilea yokchiz zoñikaya?

⁷ “Jesalla” cjican kjaaztan, Pilatuqui Herodes cjita Galilea chawc jiliržquin nii Jesusa cuchanchičha. Herodesqui Jerusalén wajtquiz želatčha nii ora.

⁸ Jesusa cheržcuqui Herodesaqui ancha cuntintutačha. Walja niiz puntuiztan quintunaca nonchičha. Jalla nižtquiztan azkanaca Jesusižtan zalž pecatčha. Jesusa milajru paañi cherž pecatčha.

⁹ Herodesaqui walja pewcñi kallantichičha. Pero Jesusazti ana kjaazñi žejlčičha.

¹⁰ Jalla nicju zakaz timplu jilirinacami lii tjaajiñinacami chicapacha želatčha. Ninacaqui walja Jesusiž quintra chiichičha, uj tjojtunžjapa.

¹¹ Herodesaqui zultatunacztan Jesusa iñarchičha. Burla paachičha. Zultatunacaqui Jesusižquiz chawc jilirž punchu tjutzičha. Jalla nektanaqui Herodesaqui wilta Pilatužquin cuchanžquichičha.

¹² Nii oraqui Herodestan Pilatužtan amigo pajassitačha. Niiž tuquiqui quinratačha.

JESUSA PILATUZQUIN CUCHANTA

¹³ Jalla nektzanaqui Pilatuqui juntjapchiča timplu jilirinacami wajt jilirinacami, nižaza zoñinacami.

¹⁴ Juntjapžcu, cjichiča:

—Ančucqui wejtquiz tii zoñi zjičchinčucča, tuž cjan: “Tii zoñiqui zoñinacaž aptjapñiča”. Nekztanaqui ančuca yujcquiz tižquiz pecunchinla. Jalla nuž pecuntiquiztan tii zoñž ujqui ana watchinpanla, ančucaž tii zoñžquiz uj tjojtuntiquiztanaqui.

¹⁵ Herodesaqui nižazakaz ana čjul ujmi watchiča. Jalla nižtiquiztan wila wejtquin cuchanžquitacha. Ziza ančucqui, tii zoñiqui anapanž ticz waquiziča.

¹⁶ Jaziqui cunkal casticača, nektzanaqui cutsnača.

¹⁷ Nii pjištiquiz cjenaqui Pilat jiliriqui cuzturumpichiztača, tsjii pres zoñi liwrii cuts, jalla nii. Nii cuzturumpi paañitača zoñinacž kuz wali cjisjapa.

¹⁸ Jalla nuž Pilatuž čhiitiquiztanaqui tjappacha nii zoñinacaqui kjawi kallantichiča, tuž cjan:

—jPanž chjichla tiiqui! jAntiz Barrabás cutsla!

¹⁹ Jalla nii Barrabasqui carsilquiz chawctatača, nii wajtquin jilirž quintra zoñinaca aptjaptkalča, y nižaza zoñiž contkalča. Jalla nižtiquiztan carsilquiz chawctatača.

²⁰ Pilatuqui Jesusa cuts peccan zoñinacžquiz wila paljaychiča.

²¹ Nii zoñinacazti juc'anti altu joržtan kjawchiča, tuž cjan:

—jCruzquiz ch'awczna! jCruzquiz ch'awczna!

²² Chjep wilitiquiz Pilatuqui paljaychiča tuž cjan.

—Tii zoñi, žčjul anawali paachejo? jWejrqui tii zoñž uj ana wachula! jAnaž ticz waquiziča tiiqui! jJaziqui cunkal casticača, nektzanac cutsnača!

²³ Pero nii zoñinacazti juc'anti kjawchiča, “Cruzquiz ch'awczna” cjan. Timplu jilirinacami zoñinacami ancha kjawchiča, Pilatuž kuz atipscama.

²⁴ Jalla nuž kjawtiquiztan Pilatuqui ninacž kuzcama paachiča. Jesusa cruzquiz ch'awczajo mantichiča.

²⁵ Nižaza Pilatuqui Barrabás cjita zoñi cutziča zoñinacž kuzcama. Nii Barrabasqui carsilquiztača, jilirž quintra zoñinaca aptjaptiquiztan, nižaza zoñi contiquiztan. Pilatuqui Jesusa intirjichiča nii zoñinacž kuzcama wali cjejajo.

JESUSA CRUZQUIZ CHAWCTA

²⁶ Jalla nektzanaqui zultatunacaqui Jesusa chjitchiča, cruzquiz ch'awczjapa. Jalla nuž chjichan tsjii zoñi tanzicha cruza tjuzjapa. Nii zoñiqui Cirene wajtchiztača, Simona cjitatača. Jochquiztan tjonatča. Jalla nuž Simona tanžcu zultatunacaqui Jesusiž cruza tjuzziča. Nekztan Jesusiž wirquiz ojkkatchiča.

²⁷ Walja zoñinacaqui apznatča. Walja maatakanaca kaacan kjawcan ancha llaquita apzicha.

²⁸ Pero Jesusaqui maatakanacžquiz cheržcu paljaychiča, tuž cjan:

—Jerusalén wajtchiz maatakanaca, wejtquiztan ana kaa. Ančuca persunjapa nižaza ančuca maatinacžquiztan kaa.

²⁹ Tsjii ora tjonaquiča. Nii oraqui zoñinacaqui sufris cjen chiyaquiča, “Ana majtñi maatakanacaqui cuntintuž cjequiča. Nižaza anaž icchi maatakanacaqui cuntintuž cjequiča. Nižaza anaž piz t'ichiñi maatakanacaqui cuntintuž cjequiča”.

³⁰ Nii ora zakaz zoñinacaqui walja sufris cjen curunacžquiz paljayaquiča, tuž cjan: “Wejtnac junttuñ tjojtčca”. Nižaza lumanacžquiz cjequiča, “Wejrnacž chjojsna, tsjii tjatta cunta”.

³¹ Tsjii ch'ojñi muntiquiz tižta paaquiz niiqui, kjoñ muntiquiz juc'ant ana wali paaquiča. —Jalla nuž paljaychiča Jesusaqui.

³² Zultatunacaqui pucultan tjañinaca cruzquiz ch'awczjapa chjitchiča Jesusižtan chica.

³³ Calavera cjita yoka irantižcu, Jesusa cruzquiz ch'awczhiča. Nižaza nii pucultan tjañinaca cruzquiz ch'awctazakaztača, tsjii tjañizti zew latuquiztan, tsjii tjañizti zkar latuquiztan.

³⁴ Cruzquiz ch'awctan, Jesusaqui cjichiča:

—Yooz Tatay, tii zoñinaca pertuna, čjulut paačhaja, anaž intintiča ninacaqui.

Nii ora zultatunacaqui Jesusiž zquiti tanzjapa, zurtiyassiča.

³⁵ Jalla nekzi zoñinacaqui walja chekznatča. Jilirinacami ancha burla paachiča, tuž cjan:

—Tiiqui yekjanaca liwriichiča. Ultim werar Cristumčhalaj niiqui, Yooziž illztamčhalaj niiqui, persunpacha liwriyalla.

³⁶ Nižaza zultatunacaqui burla paachiča. Macjatžcu jar vinu tirinchiča.

³⁷ Nižaza cjichiča:

—Amqui judionacz chawc jilirimčhalaj, niiqui, persunpacha liwriyalla.

³⁸ Nižaza cruzquiz Jesusiž ach juntuñ litranaca cjiirtatača. Chjep tawkquiztan cjiirtatača, griego taku, latín taku, hebreo taku. Jalla tuž cjiirtatača: “Tiiča judionacz chawc jiliriqiu”.

³⁹ Tsjii ch'awcta tjañi zoñiqui Jesusižquiz ana wal taku čhiichiča, tuž cjan:

—Amqui Cristumčhalaj niiqui, persunpacha liwriyalla. Nižaza wejrnacmiž liwriya.

⁴⁰ Tsjii ch'awcta tjañizti nii tjañ mazquiz ujziča, tuž cjan:

—Amqui cruzquiz ch'awctazakazza. ¿Am anam Yooz eks, kjažtatajo?

⁴¹ Učumqui ujquiztan sufristanča. Cruzquiz ch'awcta cjispanz waquiziča. Tii zoñizti ana čhjul ujhizta.

⁴² Nekztan nii tsjii tjañ zoñiqui Jesusižquiz paljayčiča, tuž cjan:

—Jesusa, čhjulorat amqui mantiz kallantačhaja, jalla nii ora wejr cjuñznalla.

⁴³ Nekztanaqui Jesusaqui kjaaziča, tuž cjan:

—Weraral amqui cjiwčha, tonjtanpacha amqui wejttan chica cjequiča, Paraíso cjita zuma yokquinaqui.

JESUSAQUI TICZICHA

⁴⁴ Nii oraqui taypuruž cjisnatča. Tjapa nii yokaqui zumchi cjiisčiča, majñakak oracama.

⁴⁵ Tjuñiqui zumchi cjiisizakazza. Nižaza pajk timplu cortina chicata wjajrziča.

⁴⁶ Jalla nekztanaqui Jesusaqui altu joržtan kjawchiča, tuž cjan:

—Yooz Tatay, am kjarquiz wejt animu cumpjiyuča.

Jalla nuž čhižcu, ticziča.

⁴⁷ Jalla nuž watchi cheržcu tsjii romanž zultat jiliriqiu Yooz honora paljayčiča, tuž cjan:

—¡Ultim weraratakalča, tiiqui lijitum zoñitakalča! Ana ujhiztakalča.

⁴⁸ Nižaza nuž watchi cheržcu tjapa nii cherñi zoñinacaqui ancha llaquita ojkchiča.

⁴⁹ Jesusiž mazinacami nižaza nii Jesusa Galilea wajtquiztan apzi maatakanacami azkquiztan chekczan quirchiča. Tsijtsucakaz cheksiča nii watñiqui.

JESUSIZ CURPU SIPULTURQUIZ TJATZTA

⁵⁰ Tsjii zuma zoñi želatča José cjita. Yooz mantitacama kamñitača. Judea yokquin Arimatea wajtchiz zoñitača. Judiuž jilirinacz partitača.

⁵¹ Nii zuma Josequi Yooz mantiz tjuñiž tjewsñipantacha. Nižaza niiqui anatača Jesusa conz kuzizquiu parti jilirinaczšanaqui.

⁵² Nekztan Pilatužquin ojkchiča Jesusiž curpu mayi.

⁵³ Nekztanaqui Josequi Jesusiž curpu cruzquiztan apakžcu tsjii wali pajk pañužtan capziča. Nekztanaqui sipulturquiz tjatziča. Nii sipulturuqui wali pajk mazquiz pjettatakalča. Anatakalča yekja almami tjatta niiqui.

⁵⁴ Jeejz tjuñi žcatzintiquiztan, zoñinacaqui tjacznatča jeejz tjuñiqui žejlžjapa.

⁵⁵ Nii Galilea yokquiztan Jesusižtan chica tjonchi maatakaqui Juzquiz apziča, Jesusiž sipulturu cheri, jaknužt tjatžtažlaja, nii cheri.

⁵⁶ Jalla nekztanaqui persun kjuya qanejžcu, zuma ulurchiz aceitenaca nižaza tjajlinz cremanaca jalla nii tjaczziča. Nekztanaqui jeejz tjuñiquiziqui jeejziča, judiuž lii jaru.

24

JESUSAQUI JACATATCHICHA

¹ Tumincuqui simana kalltiznan maatakanacaqui Jesusiž sipultura ojkchiča walja wentan. Tjaczta ulurchiz aceitenaca chjitchiča, Jesusiž curpu tjajlinzjapa. Jalla nuž okan yekja maatakanacaqui cumpant'ichizakazza.

² Jalla nicju irantižcu nii sipulturu pjuczta mazqui cjetžta cherziča.

³ Nekztanaqui sipulturquiz luzziča. Pero Jesusiž curpuqui ana wajtchiča.

⁴ Jalla nižtiquiztan ninacz kuz turwayskatatča. Ana jaknužquin zizi atchiča, čhulu paachuca, jalla nii. Nuž želan pucultan luctak zoñižtakaz tsijtsi cherziča. Ninacz zquiti walja llijatča. Maatakanacztan chica cjiisčiča.

⁵ Jalla nuž cheržcu walja tsucchiča maatakanacaqui. Tuzi t'okziča. Jalla nuž cjen pucultan luctakaztakaz anjilaqui čhižinčiča maatakžquiz, tuž cjan:

—¿Kjažtiquiztam ančhucqui ticzinacporquiz žejtñi zoñi kjurjo?

⁶ Anaž tekz žejlča niiqui. Jacatatchiča niiqui. Ančhucž cjuñzna, Galilea yokquiz ojklayan Jesusaqui niža mazinčipanla, jalla nii.

⁷ Nicju Jesusaqui mazinčiča, “Yooz Epiž cuchanzquita Zoñiča wejrqui. Ujhiz zoñinacz kjarquiz intrižital cjeeča. Nižaza cruzquiz ch'awčcu contal cjeeča. Pero čhjep majquiztanaqui jacatatača”. Jalla nuž Jesusaqui mazinčiča.

⁸ Jalla nuž čhyan maatakanacaqui cjuñziča Jesusiž mazintanaca.

⁹ Jalla nekztanaqui sipulturniquiztan quejppzcu, tjappacha quint'ichiča niii tuncamani illzta zoñinaczquiz, nižaza tjapa neks žejlñi zoñinaczquiz.

¹⁰ Jalla nii quint'iñi maatakanacaqui tižta tjuuchiztača: María Magdalenatača, Juanatača, Jacobuž maatača Mariiqui, nižaza tsjii kjaž yekja maatakanacatača. Jalla ninacaqui Jesusiž illzta zoñinaczquiz quint'ichiča, jaknužt watchi, jalla nii.

¹¹ Jalla nii maatakanacz quint'ita anapan criichiča Jesusiž illzta zoñinacaqui.

—Čhjulukat lucuratažtakaz čhičhani nii maatakanacaqui? —jalla nuž cjichiča Jesusiž illzta zoñinacaqui.

¹² Jalla nuž ana criičcumi Pedruqui ulanžcu sipulturnu chertzñi zajtchiča. Colžcu sipulturnu kjuylchuc cherziča. Nii capžta pañunaca tsjii latu chjojžta želatča. Jalla nii cheržcu, walja kuzquiz pinsican ojkičiča, čhjulut watchajja, jalla nii.

EMAUS CJITA WAJTQUIN OJKTA

¹³ Nii noojpacha pucultan Jesusiž tjaajinta zoñinacaqui Emaús cjita watjaž okatča. Emaús watjaqui tsjii tuncaman kilometratača Jerusalén wajtquiztan.

¹⁴ Jiczquiz ojkan, ninacpora parlassatča, tjapa Jesusiž puntu watchinaca, jalla nii.

¹⁵ Nuž parlasan, Jesusapachača žcatžinžquichi. Nekztan ninacžtan čica ojkičiča.

¹⁶ Jesusižtan čica ojkanami, nii pucultanaqui anapan pajñi cjissiča.

¹⁷ Jalla nekztanaqui Jesusaqui ninaczquiz pewcziča, tuž cjican:

—Jiczquiz ojkan, ččhjul puntu ančhucqui parlasjo? Čkjažtiqiztan llaquita ančhuc ojko?

¹⁸ Tsjiizuñqui Cleofás cjitatača. Jalla niiqui kjaaziča, tuž cjican:

—Tjapa zoñinacaqui Jerusalén wajtquiz wajtchi quinto zizza. Am neks žejlcan, čnii watchinaca anam ziz, jaa?

¹⁹ Nekztanaqui Jesusaqui kjaaziča, tuž cjican:

—Ččhulu watchitaya?

Nekztanaqui nii pucultanaqui cjichiča:

—Tii quinto žejlča. Tsjii Jesusa cjita zoñi želatča, Nazaret wajtchiz zoñi. Yooz taku paljayñi profetatača niiqui. Yooz Ejpž yujcquizimi zoñinacz yujcquizimi walja Yooz aztan milajrunaca paachiča. Nižaza Yooz taku zumapan parličiča.

²⁰ Jalla nekztanaqui učhum timplu jilirinacami učhum wajt jilirinacami nii Jesusa intirjichiča cruzquiz ch'awczjapa, conzjapa.

²¹ Wejrnacqui cjetuča, "Niiqui Israel wajtchiz zoñinaca liwriyaa" cjichintatča. Nižaza tonjtanpacha čhjep majčha, tižta watchiqui.

²²⁻²³ Wejtnacaquiztan tsjii kjaž maatakanacaqui wentan Jesusiž sipulturnu chertzñi ojkičiča. Jalla nekztanac "Jesusiž curpu ana žejlča" cjican tjončiča. Tjonžcu quint'ichiča, tižta. Sipulturnu anjilanaca chertkalča. Anjilanacaqui cjitkalča "Jesusaqui vivo žejtčiča" cjican. Jalla nuž quint'itikalča maatakanacaqui. Jalla nuž quint'itiquiztan tsucchinča wejrnacqui.

²⁴ Jalla nii quintu nonžcu tsjii kjažt wejtnaca mazinacaqui sipulturnu chertzñi ojkičiča. Nii maatakaž quint'ita, jalla nižtapacha cherziča. Pero Jesusa ana cherčiča.

²⁵ Jalla nekztanaqui Jesusaqui cjichiča:

—Anča ana intintiñi ančhucqui. Čkjažtatajo? ĩAnča ch'aman criichinčhucča tjapa Yooz taku paljayñi profetanacz cjiirtaqui!

²⁶ Ima honorchiz mantican, Cristuqui nuž sufrispantaž niic, čana jaa?

²⁷ Jalla nekztanaqui Jesusaqui ninaczquiz tjaajñi kallantichiča, tjapa cjiirta Yooz takunaca niž puntuquiztan, jalla nii. Tjaajincan, Moisés cjiirta libruquiztan kallantichiča. Nižaza tjappacha Yooz taku paljayñi profetanacz libruquiztan tjaajinčiča niž persun puntuquiztan.

²⁸ Jalla nekztanaqui jakziquin ojktčhaja, jalla nicju irantitan, Jesusaqui tira wajtž cjichitacha.

²⁹ Nii pucultan zoñinacaqui Jesusižquiz rocatča, tuž cjican:

—Wejtnacatan žela. Tjuñi zezillaž cjissa, jož zumčha.

Nekztanaqui Jesusaqui ninacžtan čica tsjii kjuyquiz želi luzziča.

³⁰ Nekztanaqui tjapa ninacaqui misquiz julziča. Nuž julžcu Jesusaqui t'anta tanziča niž kjaržtan. Nekztanaqui Yooz Ejpžquin sparaquiž cjichiča. Nekztan ninaczquiz toziča.

³¹ Nuž paan nii pucultan zoñinacaqui Jesusa pajñiž cjissiča, čhjujqui cjetžintatčakaz. Pero nii orapacha Jesusaqui liwž katchiča.

³² Nii pucultanaqui ninacpora parlassiča, tuž cjican:

—Učhumnacatan jiczquiz okan nižaza Yooz taku tjaajnan, učhumnaca kuzqui anča zint'atča. Jalla nižtataž, čana jaa?

³³ Jalla nekztanaqui ana tjewžcu Jerusalén watja quejpciha. Jalla nicju Jesusiž tunca-man illzta žoñinacžtan zalchiha, yekja mazinacžtan juntazzi.

³⁴ Ninacaqui cjichiha:

—Ultim werara jacatatchipanča Jesusa Jiliriqi. Simonaqui zakaz cherchiha.

³⁵ Nekztanaqui nii pucultanaqui zakaz quint'ichiha, jaknužt jicquiz okan, ninacžquiz watčhaja, jalla nii. Nižaza jaknužt Jesusižquiz pajtčhaja t'anta tojznan, nii quint'ichizakazza.

JESUSAQUI TIRIPINTIT PARIZICHICA

³⁶ Jalla nuž parlan, Jesusapachača ninacž taypiquiz tsijtsiqui. Jesusaqui ninacžquiz tsaanchiha, tuž cjan:

—jZuma kuzziz cjee!

³⁷ Ninacaqui ancha ispanitichi cjissiha, ancha tsucchiha. Pinsichiha, “Almaž caa” cjan.

³⁸ Pero Jesusaqui cjichiha:

—¿Kjažtiquiztan ančhucqui tsucchinčhucta? ¿Kjažtiquiztam wejt puntuquiztan ančhuca kuzquiz turwaysita?

³⁹ Wejt kjaraz chernza. Wejt kjojčaž chernza. Wejrpachača. Lanzna. Chera. Tsjii alma animuqui ana janchichizza, nižaza ana tsijchizza. Ančhucqui cherča, wejrtča janchichizmi tsijchizmi.

⁴⁰ Jalla nuž chiican, Jesusaqui kjaranaca kjojchanaca tjeeziha.

⁴¹ Jalla nekztanaqui nii žejlñi žoñinacaqui kuzquiz pinsichiha, “Jesusaqui žejlča werara, ana werara”, nii. Nižtami cuntintutača. Ispanitichi želan, Jesusaqui ninacžquiz cjichiha:

—Ančhucalta ¿čhjulut lujljapa žejl?

⁴² Nekztanaqui Jesusižquiz tjaachiha ch'iz canca, nižaza mazk'a.

⁴³ Jesusaqui nii čhjeri tanžcu lujlchiha ninacž cheran.

⁴⁴ Nekztanac cjichiha:

—Tuquiqui ančhucaltan žejlcan ančhucaquiz mazinchintača, jaknužt wejtquiz watastanzlaja, jalla nii. Jaziqi cumplispantača tjapa wejt puntuquiztan cjiirta Yooz takunaca. Moisesqui wejt puntuquiztan cjiirchiha, nižaza tuquita Yooz taku paljayñi profetanacaqui cjiirchizakazza wejt puntuquiztan. Nižaza salmos cjita liwruquiz cjiirta zakaztača wejt puntuquiztan. Jalla nii tjapa cumplispantača.

⁴⁵ Jalla nekztanaqui Yooz taku tjaajincan zumpacha intintiskatchiha.

⁴⁶ Nižaza cjichiha:

—Jalla tuž cjiirtatača. Cristuqui ticspantača. Nižaza čhjep majquiztan jacatatspantača.

⁴⁷ Nekztan Cristuž mantita kamañquiz kamcan žoñinacaqui tjapa kjutñi nacionanacaran liwriñi taku paljaystanča. Jerusalén wajtquiztan liwriñi taku paljayi kallantistanča. Jalla tuž cjan, paljayaquiča, “Yoozquin kuzziz cjee, nižaza kuznaca campiya, ujnaca pertunta cjisjapa”.

⁴⁸ Ančhucqui jalla nižtapacha paljayaquiča. Tisticunacača ančhucqui.

⁴⁹ Yooz Ejpqui ančhucaquiz taku compromitchiha ančhuca kuzquiz Espiritu Santu cuchanzjapa. Wejrqui ančhucaquiz wajilla cuchanzcača nii wejt Yooz Epiž compromitta Espiritu Santo, jalla nii. Nižaza tii Jerusalén wajtquizpachaž kamla, tsewtan cuchanzquita Espiritu Santuž azi tanzcama.

JESUSA ARAJPACHQUIN CHJICHTA

⁵⁰ Jalla nekztanaqui Jesusaqui ninaca chjitchiha wajtž tjiya, Betania cjita watjacama. Jalla nicju kjara waytižcu, ninacžquiz cjichiha:

—Yooz Ejpqui ančhucaquiz zuma yanapla.

⁵¹ Jalla nuž chiižcuqui, Jesusaqui ninacžquiztan zarakchiha. Tsewchucpacha waytiscu chjichtatača.

⁵² Nii ecta žoñinacaqui Jesucristuž honora paljayžcu Jerusalén cjita watja ancha cuntintuž cuttižquichiha.

⁵³ Jalla nicju ninacaqui timpluquiz pan žejlchiha, Yooztajapa honora waytican. Jalla nužoj cjila. Amén.

EL SANTO EVANGELIO SEGUN SAN JUAN

YOOZ TAKU CJITACHA JESUCRISTUQUI

¹ Ima tii muntu želan Jesucristo želatča. Jalla niiča Yooz Taku cjita. Nižaza Yooz Ejpžtanča. Niimi Yoozazakza.

² Primirquiztanpacha niiqui Yooz Ejpžtanpanča.

³ Jalla niž cjen Yoozqui tjappacha paachiča. Tjapa niž paatacamacha. Anaž yekjaž paataqui žejlča.

⁴ Jalla nižakazza žeti tjaachiqui. Nižaza žejtcan žoñinacaqui persun kuzquiz zuma kamaña zizasacha. Tsjii kjanažtakaz Jesucristuqui Yooz zuma kamaña žoñž kuzquiz zizkatñiča.

⁵ Jaknužt tsjii kjanaqui zumchiquiz kjančhaja, jalla nižta Jesucristuqui zumchiquiz ojklayñi žoñinacž kuzquiz zuma kamaña zizkatča. Nii zumchiquiz ojklayñi žoñinacača ana zuma kamañchizqui. Pero Jesucristuž cjenpankaz Yooz zuma kamaña zizasacha.

⁶ Tsjii Yooziž cuchanžquita žoñi želatča, Juan cjita.

⁷ Nižaza Jesucristuča zuma kamaña zizkatñiqui. Juanqui Jesucristuž puntuquiztan mazñi tjonchiča, tsjii kjanažtakaz. Nižaza testicu cunta Jesucristuž puntu werara mazzinchiča. Tjapa žoñinacžquiz nuž mazzinchiča, Jesucristužquiz crijajo.

⁸ Juanqui anača ultim Yooz zuma kamaña zizkatñiqui. Antiz tsjii testicu cunta tjonchiča, nii Yooz zuma kamaña zizkatñiž puntuquiztan mazzinzjapa.

⁹ Jesucristuča ultim Yooz zuma kamaña zizkatñiqui. Jalla niiča zapa žoñinacž kuzquiz Yooz zuma kamaña zizkatñiqui. Nižaza Jesucristuqui tii muntuquiz tjonchiča.

¹⁰ Jalla nuž tjonžcu tii muntuquiz kamchiča. Nižaza niiča tjapa tii muntuquiz žejlñinaca paañiqui. Niž paataž cjenami tii muntuquiz žejlñi žoñinacaqui Jesucristo ana pajz pecchiča.

¹¹ Jesucristo Yooz Majchqui niž persun wajtchiz žoñinacžquiz tjonchiča. Pero nii žoñinacazi Jesucristo ana pajz pecchiča.

¹² Pero jakziltami nii Jesucristo pajz pecčhaja, nižaza nižžquin tjapa kuztan cričhaja, jalla ninacaqui ultim Yooz maatinacapanž cjissa.

¹³ Jalla nuž muñchiča Yoozqui. Anaž persun maa ejpž kuzcama, nižaza anaž persun kuzcama, nižaza anaž žoñiž pinsitacama, antiz Yooziž pinsitacama žoñinacaqui Yooz maatinaca cjissa.

¹⁴ Yooz Taku cjita Jesucristuqui tii muntuquiz tjonžcu, žoñž curpuchiz wejtnacatan juntu kamchiča. Jalla tii muntuquiz kamcan Jesucristuqui Yooz zuma okžñi kuz tjeeziča. Nižaza Yooz ligitum kamañ puntunacami werara tjeeziča. Tii muntuquiz kaman, wejrnacqui niž anča zuma arajpach kamaña cherchinča. Niiča Yooz Ejpž zinta Majchqui. Jalla nižtiquiztan niž tjeežta arajpach kamañaqui niž kamañapankalča.

¹⁵ Juanqui nii Yooz Majch puntu mazzinchiča, tuž cjican:

—Jalla tiž puntuquiztan tuqui čhiichinča, tuž cjican: “Tsjiiqui tjonča wejt jarupacha. Jalla niiča wejtquiztan juc'ant chekanaqui. Ima weriž nasan pan želatkalča niiqui”.

¹⁶ Nii Yooz Majchqui tsjan juc'ant zuma kuzziz cjen učumnacaquiz zuma arajpach kamañchiz cjiskatchiča juc'anti juc'anti.

¹⁷ Tuqui timpu Moisesqui lii mantitanaca žoñinacžquiz tjaachiča. Jaziqui Jesucristuqui Yooz zuma okžñi kuz žoñinacžquiz tjeeža. Nižaza žoñinacžquiz Yooz zuma kamañchiz cjiskatča, nižaza Yooz puntunaca zizkatča.

¹⁸ Jesucristuča Yooz Majchqui. Anapanž jec žoñimi Yooz cherchiqui. Niž zinta Majch alajakazza Yooz cherchiqui. Nii Yooz Majchqui Yooz Ejpžtan tsjii kuzzizpankazza. Jalla nižtiquiztan niiča Yooz puntunacami werara zizkatñiqui.

JUAN BAUTISTAZ CHIITA TAKU

¹⁹ Juanž mazzintagui Jesucristuž puntuquiztan jalla tužuča. Jerusalén wajtchiz judío žoñinacaqui Juanž puntuquiztan iya ziz pecatča. Nekztan timplu jilirinacami timpluquiz sirwiñinacami Juanžquin pewczñi cuchanžquitatača. Ninaca pewcziča, tuž cjican:

—¿Amqui jequimtaya?

²⁰ Juanqui zumpacha mazzinchiča. Nii pewczñi žoñžquiz ana nicchiča. Mazzincan tuž cjichiča:

—Wejrqui anača Cristutqui, ančucaž tjewžtaqui.

²¹ Jalla nekztanaqui nii pewczñi žoñinacaqui wilta pewcziča tuž cjican:

—¿Jequimt amjo? ¿Elias cjita profetamkaya?

Juanqui kjaaziča, tuž cjican:

—Anača Eliastqui.

Nekztanaqui ninacaqui pewcziča, tuž cjican:

—Nii profeta tjoniz cjizpacha, ¿niiimi amya?

Juanqui kjaaziča, tuž cjican:

—Wejr anača niitqui.

²² Jalla nekztanaqui ninacaqui cjichiča:

—¿Jecpant amjo? Wejrnacqui quintu chjitstanča wejrnac cuchanžquiñinacžquin. Am persun puntuquiztan ¿kjažum cji?

²³ Nekztan Juanqui tuž kjaaziča:

—Wejrtča alto joržtan ch'ekti yokquin paljayiñtqui. Tuž paljayiñča: “Yooz Jiliržtajapa zuma kamañ jicz tjaczna”. Jaknužt Isaias cjita profeta chiitčhaja, jalla nuž paljayiñča.

²⁴ Nii pewcžñinacaqui fariseo žoñinacž cuchanžquitatača, Juanžquin.

²⁵ Ninacaqui pewczizakazza tuž cjican:

—Nižtaqui amqui anaž Cristumni, nižaza anaž Eliasni, nižaza anaž nii tjonni profetamni. Ana nižta žoñimžlaj niiqui, ¿kjažtiquiztan am judio žoñinaca bautisjo?

²⁶ Juanqui ninacžquiz kjaaziča tuž cjican:

—Wejrqui kjaztankaz bautisiñča. Judío žoñinacžquiztan tsjiiqui žejlča, jalla niiqui ančhucqui anaž pajča.

²⁷ Jalla niiqui wejt jaruž tjonča. Jalla nuž cjenami niičha wejtquiztan juc'ant tsjan chekanaqui. Jalla nii atintizjapa wejrqui anal waquizuča, niiz zapat chiqui jwerzinimi, anaž cjichuca.

²⁸ Betábara cjita yokquin nuž Juanžquiz pecuntatača. Betábara cjita yokaqui Jordán cjita pužž tuunacha. Jalla nicju Juanqui bautisatča.

UZI WILANAZTAKAZZA JESUCRISTUQUI

²⁹ Jakatažuqui Juanqui Jesusa tjonni cherchiča. Jalla nuž cheržcu, tuž cjichiča:

—Cherzna. Tičha Yoozquiztan cuchanžquita žoñi, uzi wilanažtakaz. Jalla tiiqui tii muntuquiz žejlñi žoñinacž cuntiquiztan ticznaquičha. Ujchiz žoñinacž laycu ticznaquičha, ninacž ujnacquiztan ana casticta cjeajo.

³⁰ Wejrqui tiž puntuquiztan mazzinčinča tuž cjican: “Wejt wirquin tjonča tsjiiqui. Jalla niičha wejtquiztan juc'ant tsjan chekanaqui. Ima weriž nasan, niiqui želatkalča”.

³¹ Wejrqui persunpacha tii žoñi anal zizaytuča, jecčhalaj, jalla nii. Wejrqui Yooz mantita jaru kjaztan bautisiñča, Israel wajtchiz žoñinacžquiz nii pajkatta cjisjapa.

³² Nižaza Juanqui Jesusiž puntuquiztan tuž čhičhizakazza:

—Wejrqui arajpachquiztan Yooz Espíritu Santo palumažtakaz chjiwžquini cherčinča. Nekztan nii palumaqui Jesusiž juntuñpacha cjisquičhiča.

³³ Tuquiqui wejrqui persunpacha tii žoñi anal zizaytuča, jecčhalaj, jalla nii. Pero Yoozqui wejr mantičhiča kjaztan bautisajo. Nižaza wejtquiz tuž cjichiča: “Espiritu Santuqui jecžquiz chjiwžcačhaja, nižaza nižquiz želačhaja, jalla niičha Espiritu Santužtan bautisñiqui. Jalla nii cheržcu nižquiz pajaquičha”.

³⁴ Jaziqui nižtapan cherčinča, jalla nižtquiztan wejrqui ančhucquiz maznuča, tičha werar Yooz Maatiqui, cjican.

ANDRESTAN PEDRUZTAN

³⁵ Jakatažuqui Juanqui pucultan niiz tjaajinta žoñinacžtan tsjitsi želatča.

³⁶ Jesusaž nijcchuc ojklayan, Juanqui nižquin cheržcu tuž cjichiča:

—Cherzna. Tiičha Yoozquiztan cuchanžquitaqui. Uzi wilanažtakaz cjequičha.

³⁷ Nii pucultan Juanž tjaajintanaçaqui jalla nuž čhiñi nonžcu Jesusižquiz apziča.

³⁸ Jalla nekztanaqui Jesusaqui wir kjutni cheržcu, ninaca apžquini naychiča. Ninacžquiz cjichiča:

—¿Čhjuluz ančhuc kjurya?

Nii apžni žoñinacaqui tuž kjaaziča:

—Rabbi. (Rabbi cjita takuqui Tjaajiñi Maestro cjicha ninacž tawkquiztan.) ¿Jakziquinam am kama?

³⁹ Jesusaqui ninacžquiz cjichiča:

—Picha. Wejtan oka, cherzjapa.

Jalla nekztanaqui tjonžni ojkičhiča, jakziquin kamchitazlaja, jalla nicju. Tjuñi zezi cjen nii pucultanaqui Jesusižtan kamchiča nii zeztan ween pakara.

⁴⁰ Tsjii pucultiquiztan Andrés cjitatača, Simón Pedruz lajktacha. Jalla niiqui Juanž čhiita nonžcu Jesusa apziča.

⁴¹ Pero Andresqui ima Jesusižtan ojklayan niiz Simón cjita jila kjuri ojkičhiča. Jalla nižtan zalžcu, tuž mazziča:

—Wejrqui Mesiastan zalchinča. (Ninacž tawkquiztan Mesías cjita tjuuqui Cristuž cjicha. Cristo cjita tjuuqui “Yooz illta” cjicha.)

⁴² Jalla nekztanaqui Andresqui niiz jila Jesusižquiz zjijcchiča. Jesusaqui nii cheržcu, tuž cjichiča:

—Amqui Simona cjitamča, Jonás majch. Tekztan najwcchuc Cefas cjita cjequiča. (Cefas cjita tjuuqui Pedro cjicha, ninacž tawkquiztan. Pedro cjita tjuuqui “maz” cjicha.)

FELIPZTAN NATANAELZTAN

⁴³ Jakatažuqui Jesusaqui Galilea yokquin ojkc pinsichiča. Jalla nuž okawk cjen, Felipe cjita zoňžtan zalchiča. Niižquiz tuž cjichiča:

—Wejttanpanim chica ojklayaquiča.

⁴⁴ Nii Felipiqui Betsaida wajtchiz zoňitača. Andrestan Pedružtan nii wajtchiz zoňinacazakaztača.

⁴⁵ Jalla nekztanaqui Felipiqui Natanael kjuri ojkcichiča. Jalla niižtan zalžcu cjichiča:

—Tsjii zoňžtan zalchinča. Niiž puntuquiztan Moisesqui cjjirchiptala Yooziž tjaata liy librunacquiz. Nižaza niiž puntu profetanacaqui cjjirchizakaztača. Niiqui Jesusa cjitača, Josež majch. Nazaret wajtchiz zoňiča nii Jesusaqui.

⁴⁶ Jalla nuž nonžcu Natanaelqui tuž cjichiča:

—¿Nazaret wajtquiztan zuma zoňi želasajo? Anaž jaz.

Felipiqui niižquiz tuž kjaaziča:

—Cheržquily.

⁴⁷ Jesusaqui Natanael cjita zoňi macjatžquiňi cheržcu, tuž cjichiča:

—Cheržca. Nii zoňiča lijitum Israel wajtchiz zoňiqui, ana incallñiqui, nižaza zuma kuzzizza.

⁴⁸ Jalla nekztanaqui Natanaelqui Jesusižquiz pewcziča tuž cjan:

—¿Jaknužum am wejr pajjo?

Jesaqui niižquiz kjaaziča tuž cjan:

—Ima Felipe am kjawznan, wejrqui am cherchinča, higo munti koztan.

⁴⁹ Natanaelqui tuž cjichiča:

—Tjaajiňi Maestro, am Yooz Maatimkalala, Israel zoňinacž chawc Jilirimkalala.

⁵⁰ Nekztanaqui Jesusaqui niižquiz cjichiča:

—Tiiž wejrcqui chiichinča, am higo munti koztan žejlñi cherchinča, nii. Jalla nižta chitiquiztan alaja wejtzuzim kuzziz cjissamča. Pero wiruñaquí juc'ant pajk obranaca cheraquiča amqui.

⁵¹ Nižaza Jesusaqui cjichizakazza:

—Ančucaquiz weralar cjiwča. Ančucqui arajpacha cjetsi cheraquiča, nižaza Yooz anjilanacaqui wejt juntuň chjiwžquiňi yawžquiňi cheraquiča. Wejrtča tsewctan cuchanžquita Yooz Zoňtqui.

2

ZALZ PJIJZTA

¹ Chjep majquiztan tsjii zalz pjiizta želatča Caná wajtquin, Galilea yokquin. Jesusiž maa nicju želatča.

² Nižaza Jesusaqui niiž tjaajinta zoňinacžtanpacha nii zalz pjiiztiquiz kjawžtatača.

³ Jalla nuž pjiizta paan vino upzitača. Jalla nekztanaqui Jesusiž maaqui niižquiz cjichinča:

—Vino upziča.

⁴ Jesusaqui naaquiz tuž kjaaziča:

—Maataka, žkjažtiquiztan nii puntu wejtzuzim chiijo? Wejt langz ora imaziča.

⁵ Pero naaqui nekz atintiňi sirwizunacžquiz cjichinča:

—Tiiž mantitacama ančucž paaquiča.

⁶ Jalla nicju sojta pajk maz luuznaca želatča. Judío zoňinacaqui ajunz cuzturumpi paazjapa luuznaca joojooňitača. Zapa luuzquiz quinzakal tunc litro, patac litro, nuž kjaz lužñitača.

⁷ Nekztan Jesusaqui nii pjiizta paaňi sirwizunacžquiz mantichiča, tuž cjan:

—Tii luuznacquiz ančucqui kjaz chjiizpnaquiča.

Nekztanaqui luuz joracama kjaznaca chjiizpziča.

⁸ Jalla nekztanaqui Jesusaqui cjichiča:

—Jaziqui tsjii zkoluculla coožna. Nekztan pjiizta paaňi patrunžquiz chjicha.

Jalla nuž niiž chiitacama chjitchiča.

⁹ Nii pijjzta paañi patruaqui mallziča nii kjazquiztan vino tucchi. Jakziquiztan tjonchi nii vino, jalla nii ana zizatča. Sirwizunacakaz zizatča. Ninacaž kjazqui cootkalča. Jalla nuž nii vino mallzcu pijjzta paañi patruaqui nii zalzñi tjowa kjawziča.

¹⁰ Nekztan tuž cjichiča:

– Chjul zoñimi zuma vino panž tjaača primiraqui. Nekztan kjawžta zoñinacaž zuma vino licitan nii jaru ana zuti zuma vino zakaz tjaača. Amzti tii oracama tii ancha zuma vino čhjojcham, čkjažtatajo?

¹¹ Jalla niitača Jesusaž primer paata milajruqui. Caná de Galilea wajtquiz paachiča. Jesusaqui nii milajru paacan, niiz arajpach kamañami azimi tjeeziča. Jalla nižtiquiztan nižtan chica ojklayñi zoñinacaqui niizquizimi tjapa kuz cjissiča, nižaza criichiča.

¹² Jalla niiz wiruñ Capernaum wajtquim ojkičiča. Niiž maatan, niiz lajknacžtan, niiz tjaajinta zoñinacžtan, jalla ninacaqui nižtan chica ojkičiča. Jalla nicju tsjii kjaž maj kamchiča.

TIMPLU PEWZA JESUCRISTUQUI

¹³ Judío zoñinacž pascua pijjzta wajillatača. Jalla nižtiquiztan Jesusaqui Jerusalén watja ojkičiča.

¹⁴ Jalla nicju timplu patiuquiz luzcu, animala tuyñinaca cherchiča. Vacanaca, uuzinaca, nižaza palumanaca jalla nižtanaca timplu patiuquiz tuyñi cherchiča. Nižaza paaz campiñinaca ninacž puestuquiz julzi cherchizakazza.

¹⁵ Jalla nižtanaca cheržcu Jesusaqui poota zkizquiztan lazcu paachiča. Jalla nekztanaqui nii laztan zancchuc liwj tirkatchiča vacanacami, uuzinacami tjapa nii tuyñinacžtanpacha. Nii paaz campiñi zoñinacž paazmi k'ala witzinchiča, nižaza ninacž mizanacami pjokžinchiča.

¹⁶ Nekztan paluma tuyñi zoñinacžquiz ujziča tuž cjican:

– Tjapa tinaca jwesa. Wejt Yooz Ejpž kjuya anača tuyz kjuya tjaczqui.

¹⁷ Jalla nekztanaqui niiz tjaajinta zoñinacaqui cjiřta Yooz taku cjuñziča. Yooz tawk libruquiz tuž cjiřtkalča: “Am kjuya rispitta cjiskatz pecuča. Nuž pectiquiztan akztal cjeeča”.

¹⁸ Jalla nekztanaqui judío zoñinacaqui niizquiz pewcziča tuž cjican:

– Jalla nižtanaca paazjapa, čject am mantichejo? Yoozqui am mantichizlaj niiqui, tsjii siñala milajruž tjeežna.

¹⁹ Jesusaqui tuž kjaaziča:

– Tii timplu pajlžta cjequiča. Nekztan čhjep majquiz wilta tsjitsnacha.

²⁰ Jalla nižta čhiñi nonžcu judío zoñinacaqui cjichiča:

– Tii timplu kjuycanaqui pusi tunc sojtan wata kjuytala pero. ČAmqui čhjep majquizkaz tii timplu tsjitsnasajo? Anapan niim atasača amqui.

²¹ Jalla nuž nii timplu puntuquiztan čhiican Jesusaqui niiz persun curpu puntuquiztanž chiyatča.

²² Jesusaž ticziquiztan jacatattan niiz tjaajinta zoñinacaqui nii čhiita cjuñziča. Nekztan Yooz takumi criichiča, Jesusaž jacatatz punto cjiřta. Nižaza Jesusiž čhiitanacami cričizakazza.

²³ Pascua pijjztiquiz Jesusaqui Jerusalén wajtquiz želatča. Jalla nicju želan walja zoñinacaqui niizquim criichiča. Niiž paata milajrunacami siñalanacami, nii cheržcu criichiča.

²⁴ Jesusaqui niiz persun kuzquiz zoñinacž kuz, jaknužt cječhaja, jalla nii zizatča. Jalla nižtiquiztan Jesusaqui nii juntuñ criichi zoñinacžquiz ana juyzu paachiča.

²⁵ Jesusaqui persunpacha zoñinacž kuz jaknužt cječhaja jalla nii zizatča. Jalla nižtiquiztan niiqui anaž jec tjaajñimi pecatča zoñinacž kuz puntuquiztanuqui.

3

JESUSIZTAN NICODEMUZTAN

¹ Tsjii fariseo zoñi želatča, Nicodemo cjita, judío zoñinacž jiliritača.

² Jalla nii Nicodemuqui tsjii ween Jesusižquin tjonzñi ojkičiča. Nekztan Jesusižquin paljaychiča, tuž cjican:

– Tjaajñi Maestro, zoñiqui ana Yooz poderžtanžlaj niiqui, nekztan ana milajrunaca paasača, amiž paata milajru, nižtanacami. Jalla nižtiquiztan wejrqui zizuča, Yoozquiztan tjonchamčha, Yooz obra tjeežni nižaza Yooz puntu tjaajñi.

³ Jalla nekztanaqui Jesusaqui niizquiz cjichiča:

– Amquiz weraral cjeeča. Jequit ana pizc wilta nassi cječhaja, jalla niiqui arajpach Yooz wajtquiz ana kamasacha.

⁴ Jalla nižta čhiitiquiztan nii Nicodemo cjita zoñiqui tuž pewcziča:

—Pero, ¿kjaž tsjii zoñiqui wilta majtta cjesajo? Wilta majtta cjisjapa, ¿maa iczquiz wiltaž luzasajo?

⁵ Jesusaqui tuž kjaaziča:

—Ultimu werarapal cjiwča. Jequit kjazquiztanami Espiritu Santužquiztanami ana nassi cječhaja jalla niiqui arajpach Yooz wajtquiz ana luzasača.

⁶ Jequit maa ejpžquiztankaz nassaja, jalla niiqui zoñž kamañchizkazza. Pero jequit Yooz Espiritu Santuquiztan zakaz nassaja, jalla niiqui Yooz Espiritu Santuž kamañchizza.

⁷ Weriž chiitiquiztan anam am ispantaquiča. Tjapa zoñinacaqui pizc wilta nastanpanča cjiwča.

⁸ Nicjumi ticjumi tjamiqiu tjamča. Nii tjamž jora nonžcanami jakziquiztan tjamžquičhaja, jakzitchuc ojčkchaja, jalla nii ana zizzuca. Jalla nižta irataž Yooz Espiritu Santuqui jecz kuzquizimíž luzasača. Nižaza ana Yoozquin criichi zoñinacaqui criichi zoñinacz kamaña cherča. Pero nii Espiritu Santuž tjaata kamaña ana intintazucača.

⁹ Jalla nekztanaqui Nicodemuqui wilta pewcziča, tuž cjan:

—¿Jaknužupan cjes teejo?

¹⁰ Jesusaqui nižquin tuž kjaaziča:

—Amqui Israel zoñinaczquiz tjaajiñi maestrumla. ¿Jalla tii weriž chiita ana intintazzucakaya?

¹¹ Ultimupan wejr cjiwča. Wejrqui tii puntuquiztan intintazcu chiyučha. Wereraž chiyučha, tii weriž zizta nižaza cherta puntunacami. Jalla nuž cjenami amqui weriž chiita anam catokča.

¹² Tii muntuquiz watñi puntuquiztan chiyana intintazza amqui. Jaziqiu juc'ant altu razunžtan arajpach Yooz puntuquiztan chiyanami, ¿jaknužt am intintasasajo?

¹³ 'Anaž jecmi arajpachquin yawchiqui. Wejrpankal arajpach Yooz puntuquiztan zumpacha zizučha. Wejrqui arajpachquiztan chijiwžquichinča. Wejrqui arajpachquiztan cuchanžquita Yooz Zoñičha.

¹⁴ Nižaza wejrqui cruzquiz waytital cjistanča. Jaknužt Moisesqui tsjii korquiztan paata zkora pajk tuñquiz waytitčhaja, jalla nižta wejrqui waytital cjistanča,

¹⁵ wejtquin criichi zoñinaczquiz ew kamaña tjaazjapa, ninaca Yooztan wiñaya kamajo, ana infernuquin sufrajo.

YOOZ EJPCHA ZOÑINACŽQUIZ OKŽÑIQUI

¹⁶ Yooz Ejpqui tii muntuquiz žejlñi zoñinaczquiz ancha okžquichipanča. Jalla nižtiquiztan niž zinta Majch cuchanžquichiča, zoñinaczquiz ew kamañchiz cjiskatzjapa. Jakziltat niž zinta Majchquiz criyačhaja, ew kamañchiz cjequiča Yooztan wiñaya kamzjapa ana infernuquin sufrajo.

¹⁷ Yooz Ejppqui niž Majch tii muntuquiz cuchanžquichiča. Niiž cjen zoñinaca liwriita cjesača infernuquin ana casticta cjisjapa.

¹⁸ Jakziltat Yooz Majchquiz criyačhaja, jalla niiqui ana infernuquin castictaž cjequiča. Pero jakziltat Yooz Majchquiz ana criyačhaja, jalla niiqui infernuquin castictapanž cjequiča, Yooz zinta Majchquiz ana criitiquiztan.

¹⁹ Yooz zinta Majchča Yooz kamaña tjeežñiqui zuma kjanažtakaz. Jalla nuž cjenaqui tii muntuquiz tjontan, zoñinacaqui ana wali kamañchiz kamzpanž pecatčha, zumchiquiz kamzpanž pecatčha. Nižaza ninacaž ana wali kamtanacaž cjen Yooz kamañchiz cjis ana pechipanča. Jalla nižtiquiztan castictapanž cjequiča.

²⁰ Tjapa ana wali kamñinacaqui Yooz kamaña tjeežñižjapa quintrača. Nižaza Yooz kamaña tjeežñižquiz anaz cherez pecčha, ninacz ana wali kamtanaca ana tjeezta cjisjapa.

²¹ Pero jakziltat werar Yooz kamañ jaru kamz pecčhaja, jalla niiqui Yooz kamaña tjeežñižquiz macjatžquiča kjanapacha tjeezjapa, niž zuma kamtanaca Yooz aztan kamtača, nii. —Jalla nuž cjichiča Jesusaqui.

JUAN BAUTISTAZ CHIITA

²² Jalla nuž Nicodemužtan parližcu, Jesusaqui tjaajintanacztan Judea yokquin ojčkichiča. Jalla nicju niž tjaajintanacaqui bautiscan žejlchiča.

²³ Nižaza Juan bautiscan zakaz želatča. Salim cjita wajt žcati Enón cjita wajtquin želatča. Jalla nicju wacchi kjaz želatča. Nekztan zoñinacz tjonatča bautista cjisjapa.

²⁴ Jalla nižtanaca watchičha, ima Juanqui carsilquin chawcta cjen.

²⁵ Jalla nekztanaqui Juanž tjaajinta zoñinacztan tsjii kjaž judío zoñinacztan ch'aassiča, ajunz cuzturumpi puntuquiztan.

²⁶ Juanž tjaajintanacaqui nižquin mazñi tjonchiča, tuž cjan:

—Tjaajiñi maestro, tsjiqiu amtan chica želatča Jordán puž tuuna. Amqui niž puntuquiztan mazzinchamča. Jalla niiqui tekz žejlča bautiscan. Nižaza tjapa zoñinacaqui nižtan ojckpanž cjisja.

²⁷ Juanqui ninacžquiz tuž cjichiča:

–Yooz Ejpqui wejtquiz tsjii kamaña tjaachiča; nižaza tsjii puestuquiz wejr utchiča. Jaknužt Yoozqui zoñžquiz kamaña tjaatčhaja, jalla nii jaru zoñiqui kamz waquiziča.

²⁸ Ančhucpacha weriž chiita nonzinčhucča. Wejr cjichinča: Anača wejr Cristutqui. Wejrzi niž tuqui cuchanzquita zoñtča.

²⁹ Tsjii zalz pijiztiquiz zalzñi tjoawaqui yanapñi mazinacžquiztan tsjan importantiča. Nii zalzñi tjoawaqui tjunchiča. Yanapñi mazinacaqui jalla nii nonžcu cuntintuča, nižaza chipchipča. Jalla nižta iratača anziqui. Wejrqui Jesusiž quintu nonžcu ancha cuntintuča.

³⁰ Niiqui juc'anti juc'anti tucquin cjistanča. Wejrzi nižquiztan juc'anti juc'anti wirquin cjistanča.

JESUSACHA TSEWCTAN TJONCHI ZOÑI

³¹ Nii tsewctan tjonchi zoñiča tjapa zoñinacžquiztan juc'anti chekanaqui. Tii yok muntuquiz kamñi zoñinacaqui tii yokjapakaz kamañchizza. Nižaza tii yokjapa kamaña puntuquiztankaz parliča. Nii tsewctan tjonchi zoñizti tjapa zoñinacžquiztan juc'antiča.

³² Nii tsewctan tjonchi zoñiqui arajpachquin čhulul chertčhaja, nonžtčhaja, jalla nii zoñinacžquiz mazziča. Jalla nii zumanaca maztiquiztanami zoñinacaqui anaž wira criž pecča.

³³ Jakziltat niž mazta cričhaja, niiqui tjurt'auquiča, Yooziž chiita takuqui wererapankalala, cjican.

³⁴ Yooziž cuchanzquita zoñiqui Yooz takupanž parliča. Yooz Espiritu Santuča niž kuzquiz željñipan, yanapzjapa. Jalla nižtiquiztan Yooz takupanž parliča.

³⁵ Yooz Ejpqui niž Majch k'aachiča. Jalla nižtiquiztan tjappacha tjaachiča niž Majch kjarquiz.

³⁶ Jalla nižtiquiztan jakziltat Yooz Majchquiz criyačhaja, jalla niiqui Yooztan wiñaya kamaquiča. Nižaza jakziltat ana Yooz Majchquiz criyačhaja nižaza ana cazachaja, jalla niiqui anapanž Yooztan kamasacha. Nižaza Yooz Ejpqui cjiča, nii zoñiqui castictaž cjequiča.

4

JESUSIZTAN SAMARIA WAJTCHIZ MAATAKZTAN

¹ Zoñinacaqui Jesusižquiz walja tjonchiča nižtan chica ojklajzjapa, Juanžquiztan juc'ant tama. Nižaza Juanžquiztan juc'anti zoñinaca bautissiča. Jalla nii quintu ojklayan, fariseo zoñinacaqui nii quintu nonchiča. Nekztan Jesusižtan quintrazi kallantichiča. Nii zizziča Jesusaqui.

² Jalla nuž nii Jesusiž bautis quintu ojklajchiz cjenami, Jesusaqui anaž bautissiča. Antiz niž tjaajinta zoñinacakaz bautisatča.

³ Pero fariseo zoñinacaqui Jesusiž puntuquiztan nonžcu, Jesusižtan quintrazi kallantichiča. Jalla nižtiquiztan Jesusaqui Judea yokquiztan zarakchiča, Galilea yokquin quejppžquizjapa.

⁴ Jalla nii jiczquiz ojkan, Samaria yoka nuž watstantača.

⁵ Jalla nuž Samaria yokquin ojkan Sicar cjita wajtquin irantichiča. Tuqui timpu Jacob cjita zoñiqui niž José cjita majchquiz tsjii yoka tjaachitacha. Nii yok žcati Sicar cjita watja želatča.

⁶ Jalla nicju tsjii kuj tuj želatča, Jacobž tuj cjitatača. Jesusaqui jiczquiz ojktiquiztan otchiča. Nekztan tuj latuquiz julziča. Nii orauqui taypur wajitacha.

⁷⁻⁸ Nekztanaqui niž tjaajinta zoñinacaqui watja luzziča lujlz čhjeri kjajzjapa. Jesusaž nuž zinalla želan, tsjaa Samaria wajtchiz maatakqui nii tujquin kjaz cooyi tjonchinča. Jesusaqui naaquiz paljaychiča:

–Kjaz onalla, –cjican.

⁹ Jalla nuž kjaz tomangztiquiztan naa Samaria wajtchiz maatak žonqui cjichinča:

–Amqui judío zoñimla. Wejrqui Samaria wajtchiz žontča. ¿Kjažtiquiztan amqui wejtquiztan kjaz mayjo?

(Judío zoñinacžtan Samaria wajtchiz zoñinacžtan porapat ana parliñipanla, pero.)

¹⁰ Jalla nekztanaqui naa maatakaž čhiitiquiztan Jesusaqui tuž kjaaziča:

–Wejrqui amquiztan kjaz maychinča. Pero amzi wejt puntuquiztanami nižaza Yooziž tjaaz puntuquiztanami intintitasaz niiqui, jalla nekztan wejtquiztan žejtñi kjaz maytasacha. Nižaza nii žejtñi kjaz tjaatam cjitasača.

¹¹ Jalla nekztanaqui naa maatakqui tuž cjichinča:

–Señor, am anaj kjaz coozizamla. Tii tuž koziča. ¿Jakzictanam nii žejtñi kjaz tjaasajo?

¹² Učhum Jacob cjita tuquita ejpqui tii tuj ecanchičha. Nižaza tii tujquiztan kjaz licñitačha, nižaza niiz maatinacami, nižaza niiz animalanacami. ¿Amqui niizquiztan juc'antim cjes, kjažtatajo?

¹³ Jalla nekztanaqui Jesusaqui naaquiz cjichičha:

—Jakziltat tii tuj kjažquiztan licħaja, jalla niiqui wiltaz kjaz pecaquičha.

¹⁴ Pero jakziltat weriz tjaata kjaz licħaja, jalla niiqui anaž iya kjaz pecñiž cjequičha. Weriz tjaata kjažqui niiz persun kuzquiz tsjii jalzurižtakaz cjisnaquičha wiñaya žejtzjapa.

¹⁵ Jalla nekztanaqui naa maatak žonqui niizquiz cjichinčha:

—Señor, nii kjaz tjaalla, ana iya kjaz peczjapa, nižaza tii tujquiz ana iya kjaz cooyi tjonzjapa.

¹⁶ Nekztanaqui Jesusaqui naaquiz cjichičha:

—Oka, am luctaka kjawžca. Nekztan wiltam wejtquin tjonaquičha.

¹⁷ Naa maatak žonqui tuž kjaazičha:

—Ana luctakchiztčha.

Jalla nuž kjaaztiquiztan Jesusaqui tuž cjichičha:

—Amqui weraram chiičha, “Ana luctakchiztčha” cjicanaqui.

¹⁸ Amqui pjijaska luctakchiztakalala amqui. Jalla nižtiquiztan anziqiu am lucum cjičhaja, jalla niiqui anaž am ultim lucuqui. Jaziqiu weraram chiičha.

¹⁹ Jalla nekztanaqui naa maatak žonqui Jesusižquiz tuž cjichinčha:

—Señor, amčha profetaqui, nuž tantiyučha.

²⁰ Wejtnaca tuquita ejpnacaqui tii curquiz Yooz rispitiñitačha. Ančhuc judío žoñinacazi cjiñchucčha, Jerusalén wajtquin Yooz rispitsa, nii.

²¹ Nekztanaqui Jesusaqui naaquiz tuž kjaazičha:

—Maataka, weriz chiita taku criya. Tsjii tjuñi tjončha. Jalla nii tjuñiquiziqui anaž tii curquizimi nižaza anaž Jerusalén wajtquizimi Yooz Ejp rispitaquičha.

²² Ančhucqui Yooz ana zuma pajžcu rispitičha. Wejrnczti Yooz litjuma pajžcu rispitučha. Judío partiquiztanž Yooziž cuchanžquita Liwriñiqui tjončha.

²³ Nii tjonz tjuñiquiziqui, nižaza anzimi, werar Yooz Ejp rispitiñinacaqui kuztanami animužtanami Yooz rispitaquičha. Nižaza Yooz Ejpž kuzcama weraraž rispitaquičha. Jalla nižta rispitiñinacaz Yooz Ejpqui pecčha.

²⁴ Yoozta ana janchichizqui, animužtakaz. Jalla nižtiquiztan nižquin rispitiñinacaqui kuztanami animužtanami nii rispitančha. Nižaza Yooz kuzcama werara rispitančha.

²⁵ Jalla nekztanaqui naa maatak žonqui Jesusižquiz cjichinčha:

—Tsjii noojiqui tsjii Yoozquiztan cuchanžquita cjetaqui tjonaquičha. (Mesias, nižaza Cristo cjitazakazza niiqui.) Jalla nii tjonžcu wejtnacaquiz tjapa Yooz puntuquiztan tjaaj-naquičha.

²⁶ Nekztanaqui Jesusaqui naaquiz tuž cjichičha:

—Werjtčha niitqui, amquiz paljayučha.

²⁷ Jalla nuž parlan Jesusiž tjaajinta žoñinacaqui quejpžquichičha. Nuž Jesusaž tsjaa Samaria wajtchiz žonatan parliñi cheržcu, ispantichičha. Ancha ispantižcu tjapa nii tjaajintanacaqui ana pewczñi atchičha, “Naaquiztan ¿chjulul pec?” cjican, už “¿Kjažtiquiztan naa žonatan parli?” cjican ana pewczñi atchičha.

²⁸ Nekztanaqui naa maatak žonqui kjaz luuz eccu, watja ojkhinčha. Nekztan žoñinacžquin tuž quint'ichinčha:

²⁹ —Ojklay, tsjii žoñiž cheržquilai. Niiqui tjapa weriz kamta puntu zizza. Wejtquiz nii puntu chiičhichha. ¿Anaj tii Yooz cuchanžquita Cristo cjesaya?

³⁰ Nekztanaqui žoñinacaqui wajtquiztan ulanžquichičha, jakziquin Jesusa želatčhaja, jalla nicju.

³¹ Ima nii žoñinacaz irantižcan, niiz tjaajintanacaqui Jesusižquiz chiižinčhichha, tuž cjican:

—Tjaajini Maestro, chjululla mekaz lujlžnalla.

³² Jesusazti ninacžquiz cjichičha:

—Wejtac yekja lujlž žejlčha. Jalla nii lujlžqui ančhucqui anaž pajčha.

³³ Jalla nuž chiitiquiztan niiz tjaajintanacaqui ninacpora pewcsassičha, tuž cjican:

—¿Jequit tižquiz lujlž chjeri zjijcanchi cjesajo?

³⁴ Jesusaqui ninacžquiz cjichičha:

—Wejrqui wejt cuchanžquiniž kuzcama kamučha. Nižaza niiz pecta langz cumplučha. Jalla niičha wejtta lujlž chjeri cuntaqui.

³⁵ Ančhucqui cjinčhucčha, “Zkala ajzquinaqui pajkpic jiiz pjaltičha”, jalla nuž cjiñchucčha. Pero wejr ančhucquiz cjiwčha, “Ni žoñinacžquin cherzna. Pookchi zklanacaztakaz ninacaqui. Ricujz pecčha.

³⁶ Jakzilita nii pookchi zkalanaca ricujačhaja, jalla niiqui pactaž cjequičha. Nižaza nii ricujta zoñinacaqui Yooztan wiñaya kamaquičha. Jalla nižtiqiztan zkala čhjaciñimi ajžñimi nuž chicapacha cuntintuž cjequičha.

³⁷ Tii zkala puntuqiztan čhiitaqui werarapančha. Jalla tuž cjičha: “Zkala čhjaciñiqui tsjičha. Nižaza zkala ajžñiqui yekjačha”.

³⁸ Wejrqui ančhuc cuchanžquichinčha, ana amiž trabajta zkala ricujzjapa. Yekjanacačha nii zkalac trabajchi Yooz taku paljaycan. Ančhucqui nii trabajtiqiz yapzinčhucčha, ultimquiziqui Yooztajapa ricujta cjisjapa.

³⁹ Jalla nekztanaqui wacchi Samaria wajtchiz zoñinacaqui nižquiz criichičha, naa maatak žonaž maztaž cjen. “Niiqui tjapa weriž kamta puntu zizza”, jalla nuž cjan mazzinčha naaqui.

⁴⁰ Nižaza Jesusižquiz tjonžcu, nii Samaria wajtchiz zoñinacaqui Jesusižquiz rocchičha, tuž cjan:

–Wejtnacatan kamt'alla.

Nekztanaqui Jesusaqui ninacžtan puc maj kamchičha.

⁴¹ Jalla nuž niž persuna tjajintiquiztan iya juc'anti nii zoñinacaqui nižquiz criichičha.

⁴² Ninacaqui naa maatak žonaquiz tuž cjichičha:

–Wejrnacqui criyučha. Anaž amiž maztiqiztankaz criyučha. Antiz niž taku persuna nonžcupan criyučha. Chekapan, tiiqui Yooz cuchanžquita Cristukalčha, zoñinacžquiz liwriñiqui. Anzil nii zizučha wejrnacqui, niž tjajinta taku nonžcu.

TSJII ČHJETINTAQUI

⁴³ Puc majquiztan Jesusaqui Galilea yokquin ojkchičha.

⁴⁴ Jalla nekztanaqui Jesusaqui tuž čhiichičha:

–Tsjii Yooz cuntiquiztan čhiñi profetaqui niž persun wajtchiz zoñinacžquiz ana rispitačha.

⁴⁵ Jalla nekztanaqui Galilea irantitan, nii zoñinacaqui Jesusa zuma risiwchičha. Nii zoñinacaqui Jerusalén ojkchizakaztačha, pascua pjijzta payi. Jalla nicju žejlcan tjapa Jesusaž paatanaca cherchičha. Jalla nižtiqiztan nii zoñinacaqui Jesusa zuma risiwchičha.

⁴⁶ Galilea yokquin žejlcan, Jesusaqui Caná cjita watja wilta ojkchičha. Tuquiqui nii wajtquiz kjazquiztan vino tuckatchičha. Tsjii pajk jilirž secretariuqui Capernaum wajtquiz želatčha. Nii secretariuž majchqui laatačha.

⁴⁷ Jesusaž Judea yokquiztan Galilea tjonchi quintu zizcu, nii secretariuqui Jesusa roqui ojkchičha niž kjuyquin tjonžcajo, nižaza niž majch čhjetnajo. Niiž majchqui ticzmayatačha.

⁴⁸ Jalla nekztan Jesusaqui nižquiz cjichičha:

–Ančhucqui sinalanacami milajrunacami ana cheraquiž niiqui, ana criyasatčha.

⁴⁹ Nekztan nii secretariuqui cjichičha:

–Señor, ima wejt majch ticznaj wejt kjuyquin tjonžcalla.

⁵⁰ Jesusaqui nekztan cjichičha:

–Am kjuya quepa, am majchqui zetaquičha.

Nekztan nii secretariuqui jalla nuž Jesusaž čhiitan nii criichičha. Jalla nekztan kjuya quejpcchičha.

⁵¹ Jalla nuž niž kjuya okan, niž piyunanacaqui nižquin zalžquichičha, tuž cjan:

–Am majchqui žejtchičha.

⁵² Jalla nuž čhiitiquiztan nii secretariuqui pewczičha, čhjulora niž majch žeti kallantichi, jalla nii. Niiž piyunanacaqui cjichičha:

–Zezcu taypuruž paztanalla nii kjakñi ch'ujlñiqui apaltichičha.

⁵³ Nii ejpqui cjuñičha, nii orapacha Jesusaqui cjichičha, “Am majchqui zetaquičha”. Jalla nižtiqiztan nii ejpqui tjapa kuztan Jesusižquiz criichičha, tjapa niž kjuychiz zoñinacžtanpacha.

⁵⁴ Judea yokquiztan Galilea quejpcžcu, Jesusaqui nii milajru paachičha. Jalla nižtanaqui pizc wilta milajru paachičha.

5

LAA ZOÑI ČHJETINTA

¹ Wiruñiqui judío zoñinacaqui pjijzta paatčha. Jalla nuž paan, Jesusaqui Jerusalén watja quejpcžquichičha.

² Jerusalén wajtquiz tsjii pajk zana želatčha, uuzi zana cjita. Jalla nii žcati tsjii zoñiž paata cocha kjazjapa želatčha. Nii cochaqui Betesda cjitatačha Hebreo tawkquiztan. Nii coch muytata pijska kjuyallanaca želatčha.

³ Jalla nekzi wacchi laanaca želatħa, zuranaca, zuch žoñinaca, ana tsijťñinaca. Nii laa žoñinacaqui kjaz kizkiz tjewznatħa.

⁴ Awiz awizaqui tsjii anjilaqui nii cochquiz tjoñiħa kjaz tjarñi. Jalla nuž nii kjaz tjarnan, primera kjazquiz luzzi žoñiqui žejťchi cjisñitaħa, ħjul laaquiztanami.

⁵ Tsjii laa žoñiqui quinsa tunc quinsakalcun wata laa želatħa.

⁶ Jesusaqui nii laa žoñi ħerchiħa. Nekztan Jesusaqui zizzi cjissiħa, nii žoñi aźk watanaca laachitaħa, nii. Jalla nuž zizcu nii laa žoñžquiz pewcziħa tuž cjican:

—Žejťchi cjissim pecya?

⁷ Nii laa žoñiqui kjaaziħa tuž cjican:

—Señor, anaž jecmi tii kjaz tjarnan wejr luzkatñi žejľħa. Luz pecuħa, pero yekjakaz wejt tuqui luzza, tii kjazquizqui.

⁸ Nekztanaqui Jesusaqui niižquiz cjichiħa:

—Zaazna, am tjaž zquiti apta, ojklaya.

⁹ Jalla nii orapacha žejťchi cjissiħa. Niiž tjaž zquiti aptižcu ojkiħiħa. Jeež tjuñquiz nii ħjetintaqui watchiħa.

¹⁰ Jalla nižtiquiztan judío žoñinacaqui nii ħjetinta žoñžquiz tuž čhižinchiħa:

—Jeež tjuñquiziqui, anaħa tjaž zquiti joojooz cjetaqui. Lii quintrala niiqui.

¹¹ Nii ħjetinta žoñiqui tuž kjaaziħa:

—Jalla nii wejr ħjetiñi žoñiqui wejr mantichiħa, tuž cjican: “Tjaž zquiti aptižcu, oka”. Jalla nuž cjichiħa.

¹² Nii judío žoñinacaqui pewcziħa tuž cjican:

—Žect amquiz nuž cjichejo, “Tjaž zquiti aptižcu oka”, cjicanajo?

¹³ Jesusaqui nii oraqi walja nekž žejľñi žoñinacž taypiquiztan katchiħa. Jalla nižtiquiztan nii žoñiqui ana pajchiħa, ject nii ħjetinħaja, jalla nii.

¹⁴ Niiž wiruñ Jesusaqui nii laaquiztan žejťchi žoñžtan zalchiħa timpluquin. Nekztan niižquiz cjichiħa:

—Jila, amqui žejťħamħa. Jaziqi ana wila uj paaquiħa. Uj paaquiž niiqui, amquiz juc'ant anawalim cjisnasaħa.

¹⁵ Jalla nekztanaqui nii žoñiqui judío žoñinacžquin mazñi ojkiħiħa, Jesusaħa nii ħjetiñi žoñiqui, jalla nii mazziħa.

¹⁶ Nii Jesusaž nižta jeež tjuñquiz ħjetintiquiztan judío žoñinacaqui Jesusiž quintra cjissiħa; conž pecatħa.

¹⁷ Ninacžquiz Jesusaqui tuž cjichiħa:

—Wejt Yooz Ejpqi tiraz langža, wejrmi nižtapachal langznuħa.

¹⁸ Jalla nižta čhiitiquiztan nii judío žoñinacaqui juc'ant žawjchiħa, nižaza juc'anti conž pecatħa. Jesusaqui jeež tjuñquiz ana permitta langž mantichiħa, judío žoñinacž lli quintra. Nižaza “Yooz Ejpħa wejt persun Ejpqi” cjican čhiichiħa. Nuž cjican “Wejrmi Yoozakazťħa” cjichiħa. Jalla nižtiquiztan nii judío žoñinacaqui Jesusiž quintra juc'anti aptichiħa, conžjapa.

JESUCRISTUCHA YOOZ MAJCHQUI

¹⁹ Nižaza Jesusaqui tuž cjichiħa:

—Anħucaquiz weralar čhiyuħa. Wejrťħa Yooz Majchqui. Pero persun kuczama anal paasaħa. Yooz Epiž tjaata obranacal paa-uħa. Jaknužt Yooz Ejpqi obra paaħaja, jalla nužuzakaz wejr Yooz Majchqui obra paa-uħa.

²⁰ Yooz Ejpqi wejr k'aachiħa, nižaza tjapa niž paata obranacami wejtquiz tjeeža. Nižaza Yooz Ejpqi juc'anti pajk obranacaz tjeeznaquiħa, anħuc ispartichi cjejajo.

²¹ Jaknužt Yooz Ejpqi ticzinaca jacatatskatħaja, nižaza wila žeti tjaaħaja, jalla nižta zakaz wejrqi žeti tjaaħa, wejt munañpicama.

²² Yooz Ejpqi persunpacha ana casticu tjaaħa. Pero wejtquiz tjapa niž mantiz poder intirjichiħa castictu tjaazjapa.

²³ Jalla nuž intirjichiħa, tjapa žoñinaca wejtquiz rispitažo, jaknužt Yooz Ejpžquin rispitiħaja, jalla nuž. Jakziltat wejtquiz ana rispitiħaja, jalla niiqui wejr cučanžquini Yooz Ejpžquin ana zakaz rispitiħa.

²⁴ Anħucaquiz weralar čhiyuħa. Jakziltat weriž čhiita taku nonžcu tjapa kuztan catokħaja, nižaza wejr cučanžquinižquiz kuz tjaaħaja, jalla niiqui Yoožtan wiñaya kamħa. Nižaza ana casticta cjequiħa. Infiernuquin ojkiñi jiczquiz eccu, arajpach ojkiñi jiczquiz kamħa, Yoožtan wiñaya kamzjapa.

²⁵ Anħucaquiz weralar čhiyuħa. Tsjii timpu tjonħa, nižaza anzimi nii timpuħa. Anziqi ticzizťtakaz kamñi žoñinacaqui wejt taku nonznaquiħa. Jakziltat wejt taku nonžcu tjapa kuztan catokaħaja, jalla niiqui ew kamañchiz kamaquiħa. Yooz Majčťħa wejrqi.

²⁶ Yooz Ejpqi persunpacha žejtkatz poderchizza. Nižaza wejt Yooz Ejpqi nii poder wejtquiz intirjichiča.

²⁷ Wejrqi tsewtan cuchanžquita Yooz Zoñtča. Jalla nižtiquiztan Yooz Ejpqi pjalz puestuquiz wejr utchiča. Jaziqui arajpachquin kamzmi nižaza infiernuquin casticzmi jalla nii mantznaca wejtquiz intirjichiča.

²⁸ Tii weriž chiitiquiztan ana ispanta. Tsjii timpu tjonča. Jalla nii timpuquiz tjapa ticzinacaqui wejt joraž nonznaquiča. Nekztan sipulturquiztanž zaaznaquiča.

²⁹ Zuma kamčhinacaqui jacatataquiča Yooztan wiñaya kamzjapa. Ana zuma kamchinacazti jacatataquiča infiernuquin casticta cjisjapa.

YOOZ EJPZTAN YOOZ MAJCHTAN

³⁰ *Wejrqi persun kuzquiztanac anal pjalznasača. Jaknužt wejt Yooz Ejp mantičhaja, jalla niicamal pjalznuča. Anal wejt kuzquiztan pjalz pecuča. Antiz wejr cuchanžquiniž kuzcama pjalz pecuča. Jalla nižtiquiztan weriž pjaltaqui lijtumača.

³¹ Wejrkal persunpacha wejt favora chiyasaž niiqui, weriž chiita taku anaž walasača.

³² Pero yekja tisticu wejt favora žejlča. Jalla niiča Yooz Ejpqi. Niž wejt puntuquiztan chiita takuqui werarapanča. Jalla nii zizuča.

³³ Ančhucqui Juanžquin pewczñi cuchanžquichinčucča wejt puntuquiztan. Niž kjaaztaqui werarapanča.

³⁴ Zoñiž wejt favora werara chiiñiž cjenami, wejtquiz anaž ancha importiča. Yooz Ejpča wejt favora ultim werara chiiñiqui. Nuž cjiwča, ančhuc wejtquiz criyajo, ančhuc liwriita cjisjapa.

³⁵ Juanqui tsjii tjeezta lamparažtakaz kjanatča. Jalla nuž kjančan nii Juanqui wejt puntu kjanzt'ichiča. Nižaza tsjii upacamakaz niž kjanquiz ančhucqui cuntintu kamchiča.

³⁶ Juanqui wejt favora chiichiča. Pero tsjiiqui žejlča Juanžquiztan juc'anti. Jalla niiča Yooz Ejpqi. Niiqui wejt favora zakaz chiiča. Nižaza wejt Yooz Ejpqi wejr mantichiča obranaca cumplizjapa. Tii obranacquiztan wejr pajtapan cjesača, Yoozquiztan tjončin, ana Yoozquiztan tjončin, nii. Tii weriž paata obranaca kjanapacha tjeeža, Yooz Epiž wejr cuchanžquita, jalla nii.

³⁷ Wejr cuchanžquini Yooz Ejppacha wejt favora chiichiča. Ančhucqui niž persun jora ana nonznasača nižaza niž tsiti ana cherasača.

³⁸ Yooz Ejpqi wejr cuchanžquichiča. Pero ančhucqui wejtquiz ana criiča. Jalla nižtiquiztan niž takumi ančuca kuzquiz ana zakaz catokča.

³⁹ Ančhucqui cjiirta Yooz taku ančaž istutiča. Nekztan ančhucqui tantiiča, "Yooz taku istutičičiž cjen wejrnačquī Yooztan wiñaya kamaka," cjan. Pero nii cjiirta Yooz takunacaqui wejt puntuquiztanž chiiča.

⁴⁰ Jalla nuž istutižcupacha, ančhuczti anaž wejtquiz macjatz pecča, Yooz Ejpžtan wiñaya kamzjapaqui.

⁴¹ *Zoñinacaž tjaata honora wejtquiz anaž importiča.

⁴² Ultimu ančhucqui ana Yoozquin kuzzizčucča. Nii zizuča.

⁴³ Wejt Yooz Ejpž cuntiquiztan tjonchi cjenami, ančhucqui anaž wejr criiča. Pero yekja zoñiqui persun kuzcama ančucaquiz tjonasaž niiqui, nižquiz criyasaž, jaz.

⁴⁴ Ančhucqui ančhucporaž honorchiz cjevas pecča. Ančhucqui Yooziž tjaata honorchiz cjisjapa anaž importiča. Jaziqui, ¿jaknužt ančhuc wejr criyasažo?

⁴⁵ Ančhucqui Moisés liiquiz kuz tjaachiž cjen, pinsaquiča, Yooztan wiñaya kamaka, jalla nii. Pero nii Moisespacha ančuca ujnacaž tjeeznaquiča, Yooz Ejpž yujcquiziqui. Anača wejrqi Yooz Ejpž yujcquiz ančuca ujnaca tjeezñiñtquī.

⁴⁶ Moisesqui wejt puntuquiztan cjiirchiča. Jalla nižtiquiztan ančhucqui Moisés cjiirta criitasaz niiqui, wejtquiz zakaz criitasacha.

⁴⁷ Ančhucqui nii Moisés cjiirtanaca ana criičhaj niiqui, ¿jaknuž weriž chiitanaca criyasažo?

6

JESUSAQUI CHJERI TJAACHA

¹ Jalla nuž chiižcu Jesusaqui Galilea cjita kotž nawjctuiñtan ojkchiča. Nii kotaqui Tiberias, cjitazakaztača.

² Walja zoñinacaqui nižžquin apziča, milajrunaca paañi cheržcu nižaza laanaca čhetinchi cheržcu.

³ Pero Jesusaqui tsjii curu yawchiča niž tjaajintanacžtan. Jalla nicju julziča.

⁴ Nii oraqui judío zoñinacž pascua pjijzta zcatitača.

⁵ Acha waytızcu, Jesusaqui walja zoñinaca apžquini cherchiča. Nekztanaqui Felipžquız paljaychiča, tuž cjican:

—Ķakziquiztan lujlz čherinaca kjayzcaqui, tii tama zoñinacžquız luli tjaazjapaya?

⁶ Jesusaqui nuž čiichiča Felipe yanzjapa, jaknužt kjaazni, jalla nii. Nii ora Jesusa persun kuzquız zizatča, jaknužt nii zoñinaca luli tjaachaja, jalla nii.

⁷ Nekztanaqui Felipiqui kjaaziča, tuž cjican:

—Paa patac pajk paaz walurchiz t'anta anaž alcansasača, zapa mayni zkoluccama lujlz cjenami.

⁸ Tsjii tjaajintaqui, Andrés, cjitatača, Simón Pedruz lajk. Jalla niiqui tuž cjichiča:

⁹ —Tekz tsjii uza žejlča, pjijska siwat t'antichiz, pizc ch'izziz. Pero Ķtama zoñinacžquız wacas teejo?

¹⁰ Nekztanaqui Jesusaqui mantichiča:

—Tjappacha nii zoñinaca, julznajo.

Jalla nii yokaqui walja pastu yokatača. Nekziqui tsjii pjijska warank luctak zoñinaca julziča.

¹¹ Jalla nekztanaqui Jesusaqui nii t'anta tanžcu, Yoozquin gracias cjican cjichiča. Nekztanaqui tjaajintanacžquin tjaachiča. Jalla nii tjaajintanaqui partir paychiča nii julzi zoñinacžquız. Nužuzakaz nii pizc ch'iztan tojžcu, lujlkatchiča, jaknužt zapa mayni pecatčhaja, jalla nuž.

¹² Jalla nuž nii zoñinacž čhekchiž cjen, Jesusaqui niž tjaajintanaca mantichiča, tuž cjican:

—Nii žejtchi t'unanaca ricuja, ana čhjulumi pertita cjeajo.

¹³ Nekztanaqui zoñinacž lujlz žeržtan, niž tjaajintanaqui nii pjijska siwat t'antiquiztan žejtchinaca ricujchiča. Tuncapan canasta chjipi ricujchiča.

¹⁴ Nekz žejlni zoñinacqui Jesusiž paata milajru cheržcu, tuž cjichiča:

—Chekapani, tiikalala nii tjonni profetaqui.

¹⁵ Jesusaqui ninacž kuzquız naychiča. Ninacaqui Jesusa pgorzaž majkz pecatča, ninacž chawc jiliri cjeajo. Jalla nižtiquiztan Jesusaqui ninacžquıztan zarakžcu cur punt kjutni yawchiča, zina žejljapa.

JESUSAQUI KJAZ JUNTUŃ OJKCHA

¹⁶ Tjuñiz kattan niž tjaajinta zoñinacaqui kot atquin chjijwžquichiča.

¹⁷ Nii curquıztan chjijwžcu warcuquız luzziča, Capernaum watja irantizjapa. Jalla nekztanaqui kotquız oki kallantichiča. Ween zumchitača. Jesusaqui imapanž ninacžquin tjonatča.

¹⁸ Kotquız okan tsjii pjursant tjamiqui tjamžquichiča. Jalla nižtiquiztan kjaz ljojkinacaqui waljaž ljojkinžquichiča.

¹⁹ Tsjii tupu zkoluc jilalla ojkičiz cjen, ninacaqui Jesusaž warcuquin žcatžinžquini cherchiča. Jesusaqui kjaz juntun tjonatča. Pero Jesusižquız ana pajatča nii zumchiquız cjen. Jalla nekztan ninacaqui ancha tsuchčiča.

²⁰ Nekztan Jesusaqui ninacžquız tuž cjichiča:

—Werjtča. Anača tsuca.

²¹ Jalla nuž čiitiquiztan ninacaqui Jesusa warcuquız cuntintu luzkatchiča. Kot tayp-iquiztatača. Pero nii ratupacha kot atquin cjissiča, jakzi wajtquin okatčhaja, jalla nicju.

ZOŃINACAQUI JESUSA KJURCHA

²² Jakatažuqui nii kotž nawjctuñtan ecta zoñinacaqui Jesusa ana cherchiča. Zezcu zeztan tsjii warcukaz želatča. Jesusaqui warcuquız ana luzziča. Niž tjaajinta zoñinacakaz warcuquız ojkičiča. Pero jakziquin Jesusaqui želatčhaja, ana zizziča nii ecta zoñinacaqui.

²³ Nekztan yekja warcunacaqui irantižquichiča Tiberias cjeta wajtquıztan. Jakziquin nii zoñinaca t'anta lujlchižlaja, jalla nicju irantižquichiča. Ima lujlkatcan, Jesús Jiliriqui Yoozquin parličiča gracias cjican.

²⁴ Nekzi ecta zoñinacaqui Jesusami niž tjaajintanacami ana nekz cheržcu warcunacquız luzziča. Capernaum watja ojkičiča Jesusa kjuri.

JESUCRISTUZ CHIITA TAKU

²⁵ Kot tsjii latuquin irantižcu, zoñinacaqui Jesusižtan zalčiča. Jalla nuž zalžcu nižquız pewcziča tuž cjican:

—Tjaajiñi Maestro, Ķchjulora tekz irantižquichamtajo?

²⁶ Jesusaqui ninacžquız tuž kjaaziča:

—Ančhucaquiz ultim weraral chiižinuča. Zezcu ančhucqui t'anta lujlchinčhucča chjekjañcama. Jalla nižtiquiztanž ančhucqui wejr kjurča. Weriz paata milajru anaž intintazza ančhucqui. Jalla niž intintaztasaz niiqui anaž wejr kjurtasača čheri lujlžpakaz. Antiz wejr kjurtasača, Yooz puntu tsjan zizjapa.

²⁷ Anača miranzñi čherquinaqui kuz tjaazqui. Tsji ratujapakazza niiqui. Antis ana miranzñi Yooz čherquiñča kuz tjaa. Yooz Ejpžtan wiñaya kamzjapača niiqui. Nii Yooz čheriqui wejrqui ančhucaquiz tjaasača. Yooz Ejpqui niijapa wejr utchipanča. Wejrqui tsewctan cuchanžquita Yooz Zoñtča.

²⁸ Jalla nekztanaqui nii zoñinacaqui pewcziča tuž cjican:

—¿Čhjuulu obranacat paaz waquisasaya, Yooz munañpa cumplisjapaya?

²⁹ Jesusaqui ninacžquiz kjaaziča, tuž cjican:

—Yooz cuchanžquita Zoñžquiz kuz tjaa; nižquiz criya. Jalla niiča Yooz munañpaqui.

³⁰ Nekztanaqui ninacaqui cjichiča:

—¿Amqui čhjul milajrum tjeznas, wejrnac chertzjapajo? Nekztan amquin criyasača. ¿Čhjul obram paa-as?

³¹ Učhum tuquita atchi ejpnacaqui ch'ekti yokquin maná cjita čheri lujlchiča. Nižaza nii puntuquiztan Yooz tawk libruquiz tuž cjiřtača: “Moisesqui ninacžquiz arajpachquiztan tjonñi čheri tjaachiča”.

³² Jalla nuž chiiquiztan Jesusaqui tuž kjaaziča:

—Ančhucaquiz ultim weraral chiižinuča. Moisesqui ančhuca atchi ejpnacžquiz čheri tjaachiča. Pero Moisesqui anača tjaachiqui ultim werar arajpach t'anta čheriqui. Wejt Yooz Ejpča ultim werar arajpach t'anta čheri tjaachiqui.

³³ Jalla nii Yooziž tjaata t'antaqui arajpachquiztan chjiwžquichiča. Jalla niiča tii muntuquiz žejlñi zoñinacžquiz arajpach žeti tjaañiqui.

³⁴ Nekztanaqui ninacaqui Jesusižquiz cjichiča:

—Señor, nii t'anta čheri panž tjaalla.

³⁵ Jalla nekztanaqui Jesusaqui tuž cjichiča:

—Wejrtča arajpach žeti tjaañi t'antitqui. Jequit wejtquin tjonachaja jalla niiqui ana wira čheri eeczñiz cjequiča; nižaza jequit wejtquiz criyačhaja, jalla niiqui ana wira kjaz kjara pasñiz cjequiča.

³⁶ Tuqui wejrqui ančhucaquiz chiičinča, “Ančhucqui wejr cherczumi wejtquiz ana criichinčhucča”.

³⁷ Yooz Ejpqui wejt mantuquiz cjisjapa zoñinaca intirjichiča. Tjapa nii intirjita zoñinacaqui wejtquiz tjonauiča. Nižaza jakziltat wejtquiz tjonachaja, jalla niiqui ana weriz čhatkattaž cjequiča.

³⁸ Wejrqui arajpachquiztan ana wejt persun kuzcama payi tjonchinča. Antiz wejrqui wejr cuchanžquiñi Yooz Ejpž kuzcama payi tjonchinča.

³⁹ Jalla tiiča wejt Yooz Ejpž kuzqui. Niž kuz tuž pecča, wejr ana zinta niž intirjita zoñinaca pertiskatajo, nižaza ninaca jacatatskatajo.

⁴⁰ Nižaza tiiča wejt Yooz Ejpž kuzqui. Niž kuz tuž zakaz pecča, jequit wejr pajačhaja, nižaza wejtquin criyačhaja, jalla niiqui Yooztan wiñaya kamaquiča. Nižaza wejrqui ninaca ticziquiztan jacatatskatača ulim juyzu pjalz tjuñquiziqui. Jalla nužuča wejt Yooz Ejpž kuzqui.

⁴¹ Tuqui Jesusaqui chiičiča, tuž cjican:

—Wejrtča arajpachquiztan tjonchi t'antitqui. Jalla nii chiiquiztan judío zoñinacaqui niž quindra chutčiča.

⁴² Ninacaqui cjichiča:

—¿Anaj tii Jesusac Jus maatejo? Učhumqui niž maa ejpžquiz pajla. ¿Kjaž tiizti “Arajpachquiztan tjonchinča” cjican chiyasajo?

⁴³ Jalla nekztanaqui Jesusaqui ninacžquiz cjichiča:

—Ančhucqui anaž nuž wejt quindra chucha.

⁴⁴ Yooz Ejpqui wejr cuchanžquichiča. Nižaza niiča wejtquiz macjatskatñiqui. Jakziltat wejt Epiž macjatskatta cječaj niiqui jalla ninacakaz wejtquiz tjonasača. Anažlaj wejt Epiž macjatskatžquitaqui, wejtquiz anaž tjonasača. Nižaza jacatatz tjuñquiziqui wejtquiz criichinacaqui jacatatskatača, ninaca Yooztan wiñaya kamzjapa.

⁴⁵ Profetanacaqui tuquitan tuž cjiřchiča: “Yoozqui tjapa niž partir zoñinacžquiz tjaajnaquiča”. Jalla nižtiquiztan jequit wejt Epiž tjaajinta nonžaja, nižaza catokčhaja, jalla niiqui wejtquiz tjonča, nižazaž criča.

⁴⁶ Jalla nuž wejt Yooz Epiž tjaajinta cjenami, anaž jecmi persun čhujcžtan Yooz Ejp cherchiqui. Wejr alajača Yooz Ejp cherchintqui. Wejrqui Yooz Ejpžquiztan tjonchinča.

⁴⁷ Ančhucaquiz ultim weraral chiyuča. Jequit wejtquiz criyačhaja, jalla niiqui Yooztan wiñaya kamča; nižaza arajpachquin žejtñiz cjequiča.

⁴⁸ Wejrčha arajpach žeti tjaañi t'antitqui.

⁴⁹ Ančhuca tuquita atchi ejpnacaqui ch'ekti yokquin maná cjita t'anta lujlchiča. Pero nii t'anta lujlchiž cjenami, ninacaqui ticizakazza.

⁵⁰ Wejrčha arajpachquiztan tjonchi t'antitqui. Jequit wejt t'antiquiztan lulačhaja, jalla niiqui Yooztan wiñaya kamaquiča; arajpachquin žejtñiž cjequiča.

⁵¹ Wejrqui arajpachquiztan tjončinča. Jaziqi wejrpanča žeti tjaañi t'antitqui. Jequit tii t'antiquiztan lulačhaja, jalla niiqui Yooztan čica wiñaya kamaquiča. Tii wejt curpuqui t'anta cuntacha. Wejt curpuqui tjaa-ača, tii muntuquiz žejlñi žoñinaca Yooztan wiñaya kamajo.

⁵² Jalla nuž čhiitiquiztanaqui nii judío žoñinacaqui ninacpora ch'aazi kallantichiča, tuž cjican:

—¿Kjaž tiiž persun curpu učhum lulajo tjaasajo?

⁵³ Jesusaqui nektzanaqui cjichiča:

—Ančhucaquiz weraral chiyuča. Jequit ančhucaquiztan wejt curpu ana lulačhaj niiqui, nižaza wejt ljoc ana licačhaj niiqui, jalla niiqui anapanž ultimu arajpach žejtz wirchiz cjesača. Anapan Yooztan wiñaya kamasacha.

⁵⁴ Jequit wejt curpu lulačhaj niiqui, nižaza wejt ljoc licačhaj niiqui, jalla niiča Yooztan čica wiñaya kamñiqui. Nižaza nii žoñinacaqui tsjii tjonz tjuñquiziqui weriž jacatatskattaž cjequiča, Yooztan wiñaya kamzjapa.

⁵⁵ Wejt curpuqui ultimu arajpachquin žejtkatñi čheriča. Nižaza wejt ljocča ultimu arajpachquin žejtzjapa liczqui.

⁵⁶ Jequit wejt žejtkatñi curpu lujlčhaja, nižaza wejt žejtkatñi ljoc licčhaja, jalla ninacača wejtčan tsjii kuzzizqui. Nižaza wejrčha ninacžtan tsjii kuzzizqui.

⁵⁷ Wejr cuchanžquiñi Yooz Ejpčha arajpach žejtñi kamañchizqui. Wejrmi niíž cjen arajpach žejtñi kamañchizča. Nižaza jequit wejtquiztan lujlčhaja, jalla niiča weriž cjen arajpach žejtñi kamañchizqui.

⁵⁸ Wejrčha nii arajpachquiztan tjonchi t'antitqui. Jalla tii t'antaqui anača nii maná cjita t'anta irataqui. Nii maná t'anta lujlchiž cjenami, ančhuca tuquita atchi ejpnacaqui ticziča. Jequit tii wejt t'anta lulačhaja, jalla niiqui arajpachquin wiñaya žetaquiča.

⁵⁹ Jalla nuž Jesusaqui tjaajinčiča Capernaum wajtquiz ajcz kjuyquiz.

TSJII ŽOÑINACAQUI ANAZ CRIIČHA

⁶⁰ Jalla nižta tjaajinta nonžcu walja niížquiz apžñinacaqui tuž cjichiča:

—Tii čhiitaqui ch'amača intintazqui. ¿Jequit tiiž tjaajintizquiz criyasajo?

⁶¹ Jesusaqui persun kuzquiz zizziča, tsjii apžñi žoñinacaqui niíž čhiitiquiztan chutchiča jalla nii. Jalla nižtiquiztan tuž cjichiča:

—¿Tii čhiitiquiztan chuchya, wejtquiztan zarakz pecya?

⁶² Tuquiqui arajpachquin wejr želatča. Ančhucqui wejr wilta arajpachquin ojki čheraquiž niiqui, nektzan žjaknužt ančhuc cjeequi?

⁶³ Tsjii žoñiqui animuž cjen žejtča. Niíž curpuqui curpukazza, ana wiñaya žejtñiča. Nižaza weriž čhiita takuqui ančhuca animunaca arajpachquin žetñi jiskatasacha, Yooztan wiñaya kamajo.

⁶⁴ Yekjapanacaqui ančhucaquiztan wejtquiz ana criiča.

Jesusaqui primirquiztanpacha zizziča, jequit niížquin ana criiči cječhaja, jalla nii Nižaza zizziča, jequit niíž quintra tarazuna paačhaja, jalla nii.

⁶⁵ Jalla nektzanaqui Jesusaqui tuž cjichiča:

—Wejrqui cjichinpanča, “Yooz Ejppankazza žoñinaca wejtquiz macjatskatñiqui, wejtquiz criizjapa. Jequit wejtquiz macjatžquiči cječhaja, jalla niiqui wejtquiz tjonča, nižaza criiča. Pero jequit ana macjatžquiči cječhaja, jalla niiqui anapan wejtquiz tjonasacha, criizjapa”.

⁶⁶ Jalla nektzanaqui walja nii apžñinacaqui Jesusižquiztan zarakčiča. Nižtan čica ana iya ojklayčiča.

⁶⁷ Nektzanaqui Jesusaqui niíž tuncapan tjaajintanacžquiz pewcziča, tuž cjican:

—¿Ančhuczakaz zarakz pecya?

⁶⁸ Nektzanaqui Simón Pedruqui kjaaziča, tuž cjican:

—Wejt Jiliri, žjecžquin wejrnac okasajo? ¿Yooz puntu tjaajinta cjisjapajo? Am takunacakazza werara tjaajintaqui, jaknužt Yooztan wiñaya kamčhaja, nii.

⁶⁹ Wejrnacqui amquiz criičinča. Nižaza zizñi cjissinča, amqui Yooz cuchanžquita Cristumpanča; wiñaya žejtñi Yooz Ejpž Maatimča.

⁷⁰ Jesusaqui nektzan tuž cjichiča:

—Wejrqui ančhuc illzinča, tuncapani. Jalla nižta cjenami tsjii ančhucaquiztan diabluž mantuquiz žejlča.

⁷¹ Jalla nuž čhiican Jesusaqui Judas Iscariote, niiz puntuquiztan čhiichiča. Simonž ma-jčtača niiqui. Judasqui tuncapan illzta žoñinacžquiztanpachača. Niiqui tarasunažcu, Jesusa intirjaquiča quintra žoñinacž kjarquiz.

7

JESUSIZ LAJKNACAQUI NIIZQUIN ANA CRIICHA

¹ Jalla nektzanaqui Jesusaqui Galilea yokaran ojklaychiča. Judea yokquin ana ojklayz pecatča. Jalla nicju judío žoñinacaqui Jesusa conz pecatča.

² Nii timpuqui tsjii judío žoñinacž pijiztaqui žcatitača. Nii pijizta paazjapa chjujilla kjuyanaca kjuychiča.

³ Jalla nižtiquiztan Jesusiž lajknacaqui nižquiz paljaychiča, tuž cjan:

—Ana tekz žela amqui. Judea yokquin oka. Jalla nicju am apžñinaca žejlča. Jalla ninacžquiz amiž paata obranaca cherskata.

⁴ Jakziltami žoñinacžquiz persun poder cherskatz pecčhaja, jalla niiqui anaž chjojzacuñ obranaca paacha. Jaziqiu amqui obranaca paaz poderchizzamžlaj niiqui, kjanapacham žoñinacžquiz tjeeznaquiča.

⁵ Jesusiž lajknacami ana nižquin criichiča.

⁶ Nekztan Jesusaqui ninacžquiz cjichiča:

—Ančhucqui čjulorami pijizta okasača. Wejt ojck oraqui imaziča.

⁷ Tii muntuquiz žejlñi žoñinacaqui ančhucatan ana chjaawjkatasacha. Wejtantzi chjaawjkatcha. Wejrqui kjanapacha tjeeznuča ninacaž ana wali paatanaca. Jalla nižtiquiztan wejtan quintrača.

⁸ Ančhuckaz pijizta oka. Wejrqui anal okasača. Wejt ojck oraqui imaziča.

⁹ Jalla nuž čhiiču, nii Galilea yokquin eclichiča.

JESUSAQUI PIJIZTA OJKCHICHA

¹⁰ Niiz lajknacaž pijizta ojktanaqui Jesusaqui chjojzacuñ ojckchizakazza, žoñinaca ana cherajo.

¹¹ Judío žoñinaczi Jesusa kjurchiča nii pijizta paañi žoñinacžporquiz, tuž cjan:

—Žakziquin nii žoñi želasaya?

¹² Wacchi nii pijiztiquin žejlñi žoñinacaqui Jesusiž puntu parlatča. Yekjap žoñinacaqui cjetča: “Niiča zuma žoñiqui”. Yekjap žoñinaczi cjetča: “Niiča ana zuma žoñiqui. Žoñinacžquiz tsjii kjuñi tjaajincan incallñiča”.

¹³ Pero judío jilirinaca ekscu, anaž jecmi Jesusiž favora cuza kjana parlatča, antiz jamazitž parlatča.

¹⁴ Pijizta taypi cjisnan, Jesusaqui timpluquin luzcu tjaajinčiča.

¹⁵ Jesusaž nuž tjaajnan judío žoñinacaqui ispartičiča, tuž cjan:

—Žkjaž tii žoñiqui zizñi zizñi tjaajnasajo, ana instutižcojo?

¹⁶ Jalla nuž nii judío žoñinacaž parlitiquiztan Jesusaqui tuž kjaaziča:

—Weriž tjaajintaqui anača wejt kuzquiztan jwesta. Antiz wejr cuchanžquiniž kuzquiztan tjonča.

¹⁷ Jakziltat Yooz kuzcama kamz pecčhaj niiqui, nii žoñiqui zizaquiča, weriž tjaajintaqui Yoozquiztan tjončiča, nii. Anača wejt persun kuzquiztan tjonchiqui.

¹⁸ Jakziltat persun kuzcama tjaajinčhaja, jalla niiqui persun honorakaz waytiz pecčha. Pero wejrqui Yooz kuzcama tjaajnuča. Yooz Ejpqui wejr cuchanžquichiča. Jaziqiu Yooz honora waytiz pecuča. Weriž tjaajintami kamtami Yooz kuzcamapankazza. Werarapanča. Ana zinta toscara chiyasača.

¹⁹ Moisesqui ančhucaltajapa lii ecchiča, žana jaa? Jalla nuž ecchiž cjenpacha, anaž jecmi ančhucquiztan nii lii jaru kamchinčucča. Žkjažtiquiztan ančhucqui wejr conz pecjo, ančuca lii quintražo?

²⁰ Jalla nižtiquiztan nii žoñinacaqui kjaaziča tuž cjan:

—Amqui zajraž tantamča. Žject am conz pecjo?

²¹ Jesusaqui ninacžquiz kjaaziča tuž cjan:

—Tsjii pajk obra paachinča jeejz tjuñquiz. Jalla nižta paatiquiztan ančhucqui ispartičinčucča. Pero weriž paata obra ana intintazinčucča.

²² Nonžna. Moisesqui jančiquiz chimpuz cuzturumpi ančhucquiz mantičiča. Primirquiztanpacha ančuca atchi ejpnacatača nuž mantichiqui. Wiruñauqui Moisés zakaz nuž mantičiča, nii jaru. Jalla nižtiquiztan ančhucqui nii lii jaru žoñž jančiquiz chimputa cjiskatiñčucča, jeejz tjuñquizimi.

²³ Moisés lii rispittapanž cjisjapa, ančhucqui jeejz tjuñquiz cjenami žoñž jančiquiz chimputa cjisiñčucča. Jalla nižtiquiztan žkjažtiquiztan ančhucqui wejt quintra žawj-jo, weriž jeejz tjuñquiz žoñž curpu čhetintiquiztanajo?

²⁴ Ančhucqui, Yooz kuzmi nižaza žoňž kuzmi ana zizcuqui, anača uj jwez peczqui. Ujchiz jwez peccuqui zuma ujchiz jwezpanča.

¿JAKZQUIZTAN TJONCHI JESUSAJO?

²⁵ Jalla nekztanaqui yekjap Jerusalén žejlñi žoñinacaqui pewcziča, tuž cjican:

—Tiiča nii conz pecta žoñi, žana jaa?

²⁶ Pero tekz žejl-la, anaž chjojzacuñ tjaajinla; kjanaž tjaajinla. Niiž quintra žoñinacaqui ana kjažma cjiła. Jaziqúi, žilirinacami pajkay, tiiqui Yooz cuchanžquita Cristokay? Anapanž cjesača.

²⁷ Wejrnacqui zizuča, jakziquiztan tii žoñi tjonchizlaja, jalla nii. Pero Cristuž tjonžcuqui anaž jecmi zizaquiča jakziquiztan tjončhaja, jalla nii.

²⁸ Jalla nekztanaqui Jesusaqui timpluquin tjaajincan, alto tawkžtan tuž cjichiča:

—Ančhucqui cjiñchucča, nii žoñi pajuča, nižaza jakziquiztan tjonchizlaja, nii. Ul-timu ančhucqui wejr ana pajča. Wejrqui persun kuzquiztan ana tjonchinča. Antiz cuchanžquita tjonchinča. Nii wejr cuchanžquiniqui zuma lujitumača. Nižaza ančhucqui nii ana pajča.

²⁹ Pero wejrqui nižquiztan tjonuča. Nižaza niiqui wejr cuchanžquichiča. Jalla nižtiquiztan wejrqui nii pajuča.

³⁰ Jalla nižta chiitiquiztan ninacaqui preso tanz pecatča. Jesusiž preso tanta cjis oraqui imazitača. Jalla nižtiquiztan ana jakziltami tanzñi atchiča.

³¹ Jalla nuž tanz pecñi žoñinaca želanami walja žoñinacaqui Jesusižquin criichiča. Nii criichinacaqui tuž cjichiča:

—Yooz cuchanžquita Cristo tjonžcuqui, žtii žoňžquiztan juc'ant cuza milajrunaca paasajo?

ZULTATUNACA CUCHANTA

³² Jalla nekztanaqui fariseo žoñinacaqui Jesusiž puntu chiitanaca nonžcu, ninacaqui timplu jilirinacžtanpacha Jesusa preso tani zultatunaca cuchanžquichiča.

³³ Jalla nižtiquiztan Jesusaqui cjichiča:

—Wejrqui tsjii kjaž žižkal ančhucatan želača, jalla nekztan wejr cuchanžquinižquin quepača.

³⁴ Jalla nekztan ančhucqui wejr kjuraquiča. Jalla nuž kjurcan anaž wejr wachi ataquiča. Nižaza ančhucqui anaž oki atasacha, jakziquint wejr želačhaja, jalla nicju.

³⁵ Jalla nekztanaqui nii judío žoñinacaqui ninacpora pewcassiča, tuž cjican:

—Žakziquint tii okas, ana watžta cjisapajo? Žekja yokquin kamñi judío žoñinacžquin nižaza nekž žejlñi žoñinacžquin okas teejo, ninacžquin tjaajinzjapajo?

³⁶ Žčhjulut tiiž chiitac cjes? “Ančhucqui wejr kjuraquiča, pero wejr ana wachi ataquiča”, cjican. Nižaza “Ančhucqui anaž oki atasacha, jakziquint wejr želačhaja, jalla nicju” cjican. Jalla nuž chiyanaqui, žčhjulut cjes?

³⁷ Jalla nekztanaqui pjijzta tucuzinž tjuñquiziqui wali chawc tjuñitača. Jalla nii tjuñquiziqui Jesusaqui tsijtscu, alto tawkžtan paljaychiča:

—Jakziltat kjaž kjara passaja, jalla niiqui wejtquiz macjatžca, wejt wiñaya zejtkatñi kjaž liczjapa.

³⁸ Jequit wejtquiz criyačhaja, jalla niiž kuzquiztan walja zumanaca ulnaquiča jaknužt tsjii zuma jalzurquiztan zuma kjaznaca ulančhaja, jalla nižta. Jalla nuž Yooz tawk libruquiz cjiirtača.

³⁹ Jalla nuž chiican Jesusaqui Espiritu Santuž puntuquiztan chiichiča. Wiruñauqui Yooz Espiritu Santuqui Jesusižquiz criichinacž kuzquiz luzaquiča. Pero Jesusaqui imaž ticznatča, nižaza imaž tsewc arajpacha okatča. Jalla nižtiquiztan imazitača Espiritu Santo tjaataqui.

CRISTUZ PUNTU PARLITA

⁴⁰ Jalla nuž Jesusaž chiita nonžcu yekjap žoñinacaqui cjichiča:

—Chekapan tiiča nii tjonñi profetaqui.

⁴¹ Yekjapazti tuž cjichiča:

—Tiiča Yooziž cuchanžquita Cristuqui.

Yekjapanacaqui cjichiča:

—Žkjaž Galilea žoñinacžquiztan Cristuc nasasajo? Anaž cjesača.

⁴² “Cristuqui Davidž majchmajtquiztan naspanča, nižaza Belén cjita wajtquin nasaučiča. Nii watjaqui Davidž watja cjitača”. Jalla nuž cjicha Yooz takuqui.

⁴³ Jalla nuž parlicu nii žoñinacaqui t'aka t'aka cjissiča, Cristuž puntuquiztan ch'aazcu.

⁴⁴ Yekjapanacaqui Jesusa preso tanz pecatča. Jalla nuž peccanami, ana jaknužumi payi atchiča.

⁴⁵ Timplu zultatunacaqui timplu jilirinacžquinami fariseonacžquinami quejpchicha, ana Jesusa preso tani atžcu. Nii jilirinacaqui zultatunacžquiz cjichicha:

—¿Kjažtiquiztan ančhuc nii ana zjijcjo?

⁴⁶ Nii zultatunacaqui kjaazičha, tuž cjan:

—Anaž jecmi chiičha, jaknužt nii zoñi chiyatčhaja, jalla nužuqui. ¿Yooziž cuchanžquita nii zoñejo?

⁴⁷ Jalla nekztanaqui fariseo zoñinacaqui tuž cjichicha:

—¿Ančhuczakaz incallskatchinčhucž, jaz?

⁴⁸ Tjapa učhum jilirinacami nižaza tjapa fariseo zoñinacami nižžquinaqui ana cri-ichipanla.

⁴⁹ Tii ana lii pajñi zoñinacaqui, jalla ninacakazza nižžquin criichiqui. Ninacaqui Yooziž castictapanž cjequičha.

⁵⁰ Nicodemo cjtatačha tsjiiqui ninacžquiztan. Tuquiqui ween chjojzacuñ Jesusižquin zina ojkičha. Jalla niiqui ninacžquiz cjichicha:

⁵¹ —Učhum liiqui tuž cjičha, “Tsjii zoñiiqui ima casticta cjan, primero kjawžta cjequičha, nižž persun razuna nonžta cjisjapa”. Nuž cjičha učhum liiqui, ¿ana jaa?

⁵² Nekztanaqui ninacaqui kjaazičha tuž cjan:

—¿Am zakaz Galileauiztanajo? Yooz taku istutiya. Anaž jec profetaqui Galileauiztan tjonasačha. Jazim zizaquž, jaz.

⁵³ Jalla nekztanaqui tjappacha persun kjuya ojkičha.

8

ADULTERIUQUIZ OJKLAYÑI ZON

¹ Jesusaqui Olivos cjeta curulla ojkičha.

² Jakatažuqui kjantati timpluquin quejžquichicha. Tjapa nekz žejlñi zoñinacaqui nižžquin tjonchičha. Jesusaqui julžcu wilta tjaajinchičha.

³ Jalla nuž julzi tjaajnan, lii tjaajiñinacami fariseonacami tsjaa maatak zon zjijcchičha. Jalla naa maatak žonqui adulterio paachiž cjen tanstkalčha. Zoñinacaqui jalla nuž tanžcu naa maatak žon Jesusiž yujcquiz zjijcchičha. Nižaza nii žejlñi zoñinacž taypquiz tsijt-skatchičha naa žonqui.

⁴ Nekztanaqui ninacaqui Jesusižquiz tuž paljaychičha:

—Tjaajiñi Maestro, taa maatak žonqui adulterio paañipacha tanassinčha.

⁵ Moisés liiquiz tuž mantitačha, “Tižta adulteriuquiz cjičjiñi zoñinacaqui čhajc jawi conz cjitatačha”. Am, ¿kjažum cjiy?

⁶ Jalla ninacaqui nuž paljaychičha, Jesusa kjaz cjiñit cjes, jalla nii zizjapa. Nižaza Jesusiž chiiitquiztan ujhiz jwez pecatčha, nižž quintra tsjii uj tjojtunžjapa. Jalla nekztanaqui Jesusaqui pachpiquiz colžcu yokquiz cjiiri kallantichičha, nižž loc'anžtan.

⁷ Pero ninacaqui tirapanž Jesusižquiz pewcnatčha, “Am, ¿kjažum cjii?” cjan. Jalla nekztan Jesusaqui zumpacha acha waytižcu, ninacžquiz cjichicha:

—Ančhucquiztan jakziltapirizłaj ana ujhiz, niiqui primiru taa maatak žonaquiz maztan čhajczkazza.

⁸ Jalla nuž chiižcu wilta colžcu yokquiz tira cjiiratčha.

⁹ Jalla nuž Jesusiž chiiitquiztan nii zoñinacaqui persun ujquiztan sint'ichičha. Nekztanaqui mayat mayat ch'uju ulñi kallantichičha. Chawc zoñinacž primiraqui ulanchiqui. Nekztan tjappacha nii zoñinacž ulantan, Jesusaqui naa maatak žonatan, nuž pucultankaz, eclichičha.

¹⁰ Jalla nekztanaqui Jesusaqui wilta acha waytichičha. Anaž jecmi želatčha. Naa maataka alajakaztačha. Nekztan naaquiz cjichicha:

—Cullaca. ¿Jakziquin amquiz uj tjojtunñi zoñinacajo? ¿Ana jakziltami am castiqui atchikaya?

¹¹ Naa maatak žonqui cjičinčha:

—Wejt Jiliri, anaž jakziltami wejr castiqui atchičha.

Nekztanaqui Jesusaqui naaquiz cjichicha:

—Wejrmí anal am ujquiztan casticačha. Jaziqui oka amqui, anam iya uj paaquičha. — Nuž pertunchičha Jesusaqui.

KJANAZTAKAZ JESUCRISTO

¹² Wiruñaquí Jesusaqui zoñinacžquiz wilta paljaychičha, tuž cjan:

—Wejrqui tii muntuquiz žejlñi zoñinacžquiz zuma kamaña tjeeznučha, tsjii kjanaztakaz. Jakziltat wejt kamañ jaru kamačhaja, jalla niiqui anawal zumchiquiz anaž kamaquičha. Nižaza nii zuma kamañchiz zoñinacčha wiñaya Yooztan kamñinacaqui.

¹³ Jalla nekztanaqui nii fariseo zoñinacaqui cjichicha:

—Am alaja am persunjapa chiicha. Jalla nižtiquiztan anaž walcha.

¹⁴ Jesusaqui kjaaziča, tuž cjan:

—Tii weriž chiitaqui wejt persunjapa cjenami walcha. Wejrqui zizuča jakziqiztan tjonučhaja, nižaza jakzit wejr okačhaja, jalla nii. Anchuczi anaž nii zizza.

¹⁵ Ančhucqui zoñiž pinsita jarukaz wejtquiz uj tjojt pecča. Pero wejt kuz ana zizza. Wejrzi anal nižta uj tjojticha.

¹⁶ Pero weril tsjii zoñžquiz “Uj paachamča” cjeēž niiqui, wejrqui weraral chiyuča nii zoñiž uj paañiž cjen. Anal wejt kuzquiztankaz chiyuča. Wejr cuchanžquini Yooz Ejpž kuzcamakal wejrmi chiyuča. Wejrmi wejt Yooz Ejpmi tsjiikaz chiyuča.

¹⁷ Ančuca liquiz tuž cjiirtača: “Pucultan tistic zoñinacaqui tsjiikaz chiyaquiz niiqui ninacž chiitaqui walcha”.

¹⁸ Wejrqui persun puntuquiztan chiyuča. Nižaza wejr cuchanžquini Yooz Ejpqui wejt puntuquiztan zakaz chiicha. Jaziqiu weriž chiitaqui panž walcha.

¹⁹ Jalla nekztanaqui ninacaqui Jesusižquin cjichicha:

—Žakziqint am Ejpjo?

Jesusaqui tuž kjaaziča:

—Ančhucqui wejr anaž ultimu pajča, nižaza wejt Ejpmi anaž pajča. Wejr ultimu pajčhaj niiqui, wejt Ejp zakaz pajasča.

²⁰ Nuž tjaajincan Jesusaqui timpluquiz želatča. Jakziquin ofrenda utz cajanaca želatčhaja, jalla nekž želatča. Nuž želan, anaž jecmi Jesusa preso tanchiča. Jesusa preso tanta cjis oraqui imazitača.

JESUSA OJKZ PUNTU

²¹ Jalla nekztanaqui Jesusaqui wilta ninacžquiz cjichicha:

—Wejr okača. Jalla nekztanaqui ančhucqui wejr kjuraquiča. Pero jakziqint wejr okačhaja, jalla nicju ančhucqui anaž oki atasča. Ančhucqui ticznaquiča persun ujquiztan ana pertunta.

²² Nekztanaqui nii judío zoñinacaqui cjichicha:

—Tiiqui chiicha, “Jakziqint wejr okačhaja, jalla nicju ančhucqui ana oki atasča”, cijcanž chiicha. ŽTiiqui persunpacha curpu conasaya?

²³ Nekztanaqui Jesusaqui tuž cjichicha:

—Ančhucqui tii koza yokchiz zoñčhuckazza. Wejrzi tsewcta yokchiz zoñčha. Ančhucqui tii yokquiz žejlñi zoñž kuzcama kamiñchucča. Wejrzi ana tii yokquiz žejlñi zoñž kuzcama kamiñča.

²⁴ Jalla nižtiquiztan wejrqui ančucaquiz chiichinča, ančhucqui ticznaquiča, persun ujquiztan ana pertunta. Ultimupan ančhucqui weriž chiitaqui ana catokaquiz niiqui, ticznaquiča, persun ujquiztan ana pertunta.

²⁵ Jalla nekztanaqui ninacaqui pewcziča, tuž cjan:

—ŽJequimt amjo?

Jesusaqui tuž kjaaziča:

—Jaknužt wejt persun puntuquiztan chiintčhalaja, jalla nižta zoñtpanča wejrqui.

²⁶ Ančuca puntuquiztan wejtta walja chiiz žejlča, ančuca uj tjeezjapa. Pero wejt chiizqui anača wejt kuzquiztanqui. Antiz wejr cuchanžquiniž kuzcamapankazza. Wejr cuchanžquiniqui werara chiñipanča. Wejrqui nižquiztan nonžtanaca maznuča tii muntuquiz žejlñi zoñinacžquiz. Jalla nižtiquiztan weriž chiitaqui ančuca puntuquiztan ultim werarača. —Jalla nuž chiichiča Jesusaqui.

²⁷ Jalla nuž Yooz Ejpž puntuquiztan chiyau, nii judío zoñinacaqui ana intintazziča.

²⁸ Jalla nekztan Jesusaqui cjichicha:

—Wejrqui tsewctan cuchanžquita Yooz Zoñčha. Chjulorat ančhucqui wejr tsewccuc waytita cheračhaja, jalla nii ora ančhucqui zizaquiča, werarača wejt persun puntuquiztan chiitaqui, nii. Wejrqui anal wejt persun kuzquiztan kamuča. Antiz wejt Yooz Epiž kuzcama kamuča. Wejt waytiz oraqui jalla niizakaz zizaquiča.

²⁹ Wejr cuchanžquiniqui wejtjan chicaž žejlča. Wejrqui niž kuzcamapan kamuča. Jalla nižtiquiztan wejt Ejpqui anaž wejr zina ecča.

³⁰ Jalla nuž Jesusiž chiitiquiztan muzpa zoñinacaqui nižquin criichiča.

LIWRII PUNTU

³¹ Jalla nekztanaqui Jesusaqui nižquiz criichi judío zoñinacžquiz cjichicha:

—Ančhucqui weriž chiita tawquiz tjapa kuztan tjurt'auquiz niiqui, ultim werara wejt partir zoñinaca cjequiča.

³² Nižaza Yooz takuča ultim weraraqui, nii zizaquiča. Jalla nuž werara zizcu liwriitaz cjequiča.

³³ Nii ana criichi judío zoñinacaqui Jesusižquiz kjaaziča, tuž cjan:

—Wejrnacqui Abrahamž majchmajtquiztan tjoničha. Jaziqui Yooz wajtchiz zoñinactħa wejrnacqui. Yekjaž mantuquiz anaž wira zejłchinħa. Amzti, ĸjažtiquiztan chiichamta, “Anħucquiqui liwriitaž cjequičha” cĵicanajo?

³⁴ Jesusaqui ninacžquiz cĵichiħa:

—Anħucaquiz weraral chiyuħa. Jakziltat uj paacan kamħhaja, jalla niiqui ujz mantuquiz kamħhaja.

³⁵ Tsĵii mantita piyunaqui patrunž kĵuyquiz kamchi cjenami ultimu anaž nii kĵuychiz famillž partiquiz želasaha. Antiz nii famillž majchquiqui jalla niičha famillž partiquiz zejłłipanħa.

³⁶ Jalla nižtiquiztan anħucquiqui Yooz Majchiž liwriita cjequiz niiqui ultim werara liwriita cjequičha, Yooz kĵuychiz famillquiz cĵisjapaquiqui.

³⁷ Wejr zizuħa, anħucquiqui Abrahamž majchmajtquiztan tjoničħucħa, nii. Pero jalla nuž cjenami, anħucquiqui weriž chiitanaca anapan catokħa. Jalla nižtiquiztan anħucquiqui wejr conz pecħhaja.

³⁸ Wejrquiqui chiyuħa, wejt Yooz Epiž chiitanaca, jalla nii. Anħucuzti anħuca epiž chiita jaru paaha.

³⁹ Ninacaquiqui tuž kĵaaziħa:

—Wejtnaca atchi eĵħhaja Abrahamquiqui.

Pero Jesusaqui ninacžquiz cĵichiħa:

—Anħucquiqui ultim Abrahamž majchmajtħuc cĵiħhaj niiqui, niž kamta irataž kamħhaji.

⁴⁰ Yoozquiztan nonžtanac jaru werara chiichinħa. Jalla nuž werara chiitiquiztan anħucuzti wejr conz pecħhaja. Abrahamquiqui ana nižta paachiħa.

⁴¹ Anħucquiqui persun epiž kamta irataž kamħhaja.

Nekztanaquiqui ninacaquiqui cĵichiħa:

—Wejrnacquiqui anaħhaja adulteriuquiz kamñi maa eĵpžquiztan tjoniniqui. Wejtnaca maa eĵpnaca zizuħa. Nižaza wejrnacquiqui tsĵii arajpach Eĵpħizkazza. Yoozza niiqui.

⁴² Jesusaqui nekztan cĵichiħa:

—Anħuca eĵpquiqui Yoozjalaj niiqui, anħucquiqui wejtta zuma munazitasaha. Wejrquiqui Yooz Eĵpžquiztanħhaja; nižquiztan tjonuħhaja. Niž pinsitiquiztan tekz tii muntuquiz zeluħhaja. Anal wejt kuzcamakaz tjonchinħhaja. Wejt Yooz Eĵpquiqui wejr cuchanzquichihaja.

⁴³ ĸjažtiquiztan anħucquiqui weriž chiitanaca ana intintazasajo? Anħucquiqui weriž chiitanaca anapanž kuztan nonz pecħhaja, nekztan.

⁴⁴ Anħuca ultim eĵpquiqui diabluħhaja. Niž kuzcama kamz pequiniħhucħhaja. Primirquiztanpacha niičha zoñi conñiquiqui. Nižaza diabluquiqui werara chizquiztan ana juyzu paañihaja. Anapanħhaja werar taku chiñi niiqui. Niž ana zum kuzcamapan toscar takunaca chiħhaja. Niipankazza toscara chiñi quiqui. Nižaza niičha toscar chiñinacž eĵpquiqui.

⁴⁵ Wejrquiqui anħucaquiz weraral chiyuħhaja. Anħuca diablu eĵpħiz cjen, weriž werara chiitanaca ana criiñihucħhaja.

⁴⁶ ĸjet anħucaquiztan tsĵii weriž paata uj tjeenasajo? Wejrquiqui Yooz taku werarapan chiyuħhaja. ĸjažtiquiztan wira ana wejtquiz crii anħucjo?

⁴⁷ Yooz partir zoñinacaquiqui Yooz takuž nonža. Anħucuzti anapanħhaja Yooz partira. Jalla nižtiquiztan anħucquiqui Yooz taku ana nonz pecħhaja.

IMA ABRAHAM ZELAN, JESUCRISTUQUI ZELATCHA

⁴⁸ Nekztan judio zoñinacaquiqui Jesusižquiz kĵaaziħhaja tuž cĵican:

—Amquiqui anawal Samaria wajtchiz zoñimžłani. Zajraž tanta zoñimžłani. Nužupanħhaja.

⁴⁹ Jesusaqui ninacžquiz tuž kĵaaziħhaja:

—Wejrquiqui anaħhaja zajraž tantitquiqui. Wejt Yooz Eĵpž honora waytuħhaja. Anħucuzti wejr iñarcan wejtquiz anaž honora tĵaaha.

⁵⁰ Wejrquiqui persun honora ana waytiz pecuħhaja. Tsĵiiquiqui zejłħhaja. Jalla niičha wejt honora waytiz pecñi quiqui. Jalla niičha lijtuma pjalñi quiqui.

⁵¹ Wejrquiqui anħucaquiz weraral chiyuħhaja. Jequit weriž chiitacama kamħhaja, jalla niiqui ana ticzñiž cjequičha; Yooztan wiñaya kamaquičha.

⁵² Jalla nuž chiitiquiztan judio zoñinacaquiqui tuž kĵaaziħhaja:

—Jalla nuž amiž chiitiquiztan wejrnacaquiqui zizzinħhaja, zajraž tantapanimkalal amquiqui. Abraham ticziħhaja; profetanacami ticzizakazza. Amzti cĵiħhaja, “Jequit weriž chiitacama kamħhaja, ana ticzñiž cjequičha”, nii.

⁵³ Amquiqui wejtnacaž ticzi Abraham eĵpžquiztan tsjan jilirim cjes, ĸjažtatajo? Yooztajapa chiñi profet zoñinacami ticziħhaja. ĸChjul zoñipananim amzt cjesajo?

⁵⁴ Jesusaqui tuž kĵaaziħhaja:

—Wejt persun honora waytaž niiqui, jalla nuž waytita honoraqui anaž walča. Wejt Yooz Ejpča wejt honora waytiñiqui. Jalla niž puntu ančhucqui “Wejtnaca Yoozza” cjiñčhucča.
⁵⁵ Ančhucqui nii Yoozqui anapan pajča. Wejrkal nii pajuča. “Wejrqui Yooz Ejp anal pajuča”, cjesaž niiqui, wejrqui toscaral cjesača, ančhuc irata. Yooz Ejp pajuča; nižaza niž čhiitacama kamuča.

⁵⁶ Tuquita atchi Abraham ejpqui wejt tjonž tjuñi nonžcu, walja cuntintutača. Nižaza wejt tjonž tjuñi zizcu, walja chipchiča.

⁵⁷ Jalla nuž čhiitiquiztan nii judío žoñinacaqui Jesusižquiz cjichiča:

—Amqui imazi pjijzka tunc watchizzam pero. ¿Jaknužt amzti Abraham pajcham cjesajo?

⁵⁸ Jesusaqui ninacžquiz tuž kjaaziča:

—Ančhucaquiz ultim weraral cjiwča. Ima Abraham zelan, wejrqui žejlchinča.

⁵⁹ Jalla nuž čhiitiquiztan judío žoñinacaqui maznaca aptichiča. Jesusa maztan čhajc pecatča. Jesusazti chjojziča. Nekztan timpluquiztan ulanchiča. Nekž žejlñi žoñinacž tapiquiztan atipassiča.

9

ZUR ŽOŇI ČHJETINTA

¹ Jalla nekztanaqui Jesusaqui jiczquiz ojkiča. Nii jicz latuquiz tsjii zur žoñi želatča. Majttiquiztanpacha zuratača.

² Jalla nii žoñi cheržcu Jesusiž tjaajinta žoñinacaqui pewcziča, tuž cjan:

—Tjaajiñi Maestro, ¿kjažtiquiztan zurapan majttata? ¿Niiž maa ejpž ujquiztan nižta zura majtta cjesaya? Už ¿persunž ujquiztan cjesaj?

³ Jesusaqui ninacžquiz tuž kjaaziča:

—Anaž niž persun ujquiztanami, nižaza anaž niž maa ejpž ujquiztanami zura majttatača. Antiz zura žejlča, niž zuržquiz Yooz obra tjeežta cjisjapa.

⁴ Jaknužt žoñinaca majiñ langžaja, jalla nižta irata wejrnacqui tii muntuquiz žejlcan langstanča. Wejt cuchanžquiniž tjaata obranaca langstanča. Zumž timpu wajillača. Zumchi cjenaqui anaž jecmi langzuca.

⁵ Tii muntuquiz žejlcan wejrqui žoñinacžquiz Yooz zuma kamaña tjeeznuča, tsjii kjanažtakaz.

⁶ Jalla nuž čhižcu, Jesusaqui yokquiz tjujziča. Nekztan nii tjujžta llawsa yok pjilžtan tjarziča. Jalla nii aptižcu nii zur žoñž čhjujquiz tjalžinčiča.

⁷ Nekztanaqui nii zur žoñžquiz cjichiča:

—Siloé cjita coch paata kjazquin oka. Jalla nicju čhjujqui awjžca.

Siloé cjita tjuuqui “Cuchanžquita” cjiča ninacž tawkquiz. Jalla nekztanaqui nii zur žoñiqui ojžcu čhjujqui awjziča. Nekztan cherñi cjissiča. Cherñi quejžquichiča.

⁸ Jalla nekztan niž žcati kamñi žoñinacami nižaza nižquiz pajñi žoñinacami nii žejtchi cheržcu, tuž cjičiča:

—¿Anaj tiiqui nii paaz tomtomangžni žoñiya? Tuquiqui julzi žejlñitala.

⁹ Yekjapanacaqui cjetča:

—Niipansala.

Yekjapac cjetča:

—Anapanž nii tiiqui. Nižtažtakazla, pero.

Pero nii žejtchi žoñipachača cjičiqui:

—Wejrpantča.

¹⁰ Jalla nekztanaqui nižquiz pewcunchiča:

—¿Kjažum am jazic cher, kjažtatajo?

¹¹ Niiqui ninacžquiz kjaaziča tuž cjan:

—Nii Jesusa cjita žoñiqui llawsižtan yok pjilžtan tjarziča. Jalla nuž tjaržcu wejt čhjujquiz tjalžinčiča, tuž cjan: “Siloé cjita kjazquin oka. Jalla nicju ajunžca”. Jalla nekztanaqui ojkičinča wejrqui. Čhjujqui ajunžcu cherñi cjissinča.

¹² Jalla nekztanaqui nii žejtchi žoñžquiz pewczizakazza tuž cjan:

—¿Jakziquin nii žoñiya?

Niiqui tuž kjaaziča:

—Anal zizuča.

¹³ Jalla nekztanaqui jakatažquui nii zurquiztan čhjetinta žoñiqui fariseo partinacžquin čhichtatača.

¹⁴ Jeejž tjuñquiz Jesusaqui nii milajru paachiča.

¹⁵ Fariseo žoñinacaqui nii zurquiztan čhjetinta žoñžquiz wilta pecunchiča, tuž cjan:

—¿Anziqui kjažtam cherya?

Nii žoñiqui tuž kjaaziča:

—Llawsitzan pjilžtan tjaržcu, wejt čhjujqui tjalžzinčiča. Jalla nekztan wejt čhjujqui ajunžcu, cherñi cjissinča. Jaziqui cheruča.

¹⁶ Tsjii fariseo zoñinacaqui nii Jesusižjapa quintra čiichiča, tuž cjican:

—Nii zoñiqui anaž Yooz partiquiztan cjesača. Niiqui ana jeejz tjuñimi rispitchila.

Yekjapazti cjetča:

—¿Kjažt ujchiz zoñiqui nižta milajrunaca paasajo? Anaž cjesača.

Jalla nižtiquiztan Jesusiž puntuquiztan t'aka t'aka cjissiča.

¹⁷ Jalla nuž t'aka t'aka cjiscu, wilta nii zurquiztan čhetinta zoñžquiz pecunchiča, tuž cjican:

—¿Amqui kjažum cjii, am čhjujqui čhjetinči zoñž puntu?

Nii zoñiqui tuž kjaaziča:

—Wejrqui cjiwčha, jalla ničha Yooz cuntiquiztan čiñi profet zoñipanqui.

¹⁸ Tuquiqui nii zoñiqui zuratača, jaziqui cherñi cjissiča. Pero nii judío zoñinacaqui nii milajru ana criiz pecatča. Jalla nekztan nii zoñž maa ejp kjawziča, pewczjapa.

¹⁹ Jalla tuž pewcziča:

—¿Tiic am majchkaya? ¿Tiic zurapan majttakaya? ¿Kjažt tiizti cherñi cjesajo?

²⁰ Nii maa ejpqui kjaaziča, tuž cjican:

—Tiipanča wejtnaca majchqui. Nižaza zurapan majttatača. Jalla niikal chiyasača.

²¹ Anziqiu cherñi cjissizlani, jalla nii puntuquiztanaqui anal zizuča. Nižaza jecčhalaj tiiz čhjujqui čhjetinči anal zizuča. Tiika pewcnani. Pajk zoñiča tiiqui. Tiipachaž razunacama čiiz pecatča.

²² Nii judío zoñinacaqui tsjii acuerduquiz parlassitača, jakziltat Jesusiž puntuquiztan “Tiičha Cristuqui” cjican chiyachaja, jalla niiqui ajcz kjuyquiztan chjatkataž cjistanča. Jalla nii acuerduquiz parlassitača. Jalla nižtiquiztan nii zur zoñž maa ejpmi ekziča; ana kjanacama čiiz pecatča.

²³ Jalla nižtiquiztan ninacaqui kjaaziča, tuž cjican:

—Tiika pewcnani. Pajk zoñiča tiiqui.

²⁴ Jalla nekztanaqui nii judío zoñinacaqui nii zurquiztan čhetinta zoñi wilta kjawziča. Nekztan tuž cjichiča:

—Yooz honora wayta. Anača Jesusiž honora waytizqui. Wejrnaca zizuča, nii čhjetinči cjeta zoñiqui walja uj paañipanča.

²⁵ Jalla nekztan nii zurquiztan čhetinta zoñiqui tuž kjaaziča:

—Wejrqui anal zizuča, uj paañi ana uj paañi, nii. Pero wejrqui zuratača. Jaziqui cheruča. Jalla nužupan zizuča.

²⁶ Wilta nižžquin pecunchiča, tuž cjican:

—¿Jaknužt paachitajo? ¿Jaknužt am čhjujqui čhjetintajo?

²⁷ Nii zoñiqui tuž kjaaziča:

—Ančucaquiz čiichinsala. Weriz čiita ana nonz pecča. ¿Kjažtiquiztan wilta wilta wejr čiijaj cjejo? ¿Ančucazakaz nižtan chica ojklayñi cjis pecjo?

²⁸ Jalla nekztanaqui nii judío zoñinacaqui nii zurquiztan čhetinta zoñžquiz ch'aanichiča tuž cjican:

—Amqui nii zoñž jaru ojčha. Wejrnaczi Moisés jaru okučha.

²⁹ Yoozqui Moisesquiz čiichiča. Jalla nii zizuča. Tii zoñžquiztanaqui anal zizuča, jakziquiztan tjončhaja, jalla niimi.

³⁰ Jalla nekztanaqui nii čhetinta zoñiqui tuž cjichiča:

—Tiičha ispantichuca. Anchucqui jakziquiztan tjončhaja, nii ana zizza. Wejtquiz pero čhjujqui čhjetinžinčiča.

³¹ Učhumqui zizla. Yoozqui ujchiz zoñinacž mayiztaqui anaž nonznasača cjiča. Yooz rispitiñi zoñinacžquizimi nižaza Yooz kuzcama kamñi zoñinacžquizimi, jalla ninacžquiz nonznasača Yoozqui cjiča.

³² Anawira tsjii zur zoñž čhjujqui čhetinta quinto žejlñitala, tuquitanpachami.

³³ Nii zoñiqui ana Yooz partiquiztanžlaj niiqui, ana čjul pajk obrami paachani.

³⁴ Jalla nekztanaqui nii judionacaqui tuž cjichiča:

—Amqui ujchizpan majttamtača. ¿Jaziqui wejtnacaquiz tjaajinzim pec, kjažtatajo?

Jalla nekztan nii zurquiztan čhetinta zoñi ajcz kjuyquiztan chjatkatchiča.

ZURANZ PUNTUQUIZTAN

³⁵ Jalla nuž chjatkattiquiztan Jesusaqui zizziča. Jalla nekztan nii zoñžtan wilta zalžcu, tuž cjichiča:

—¿Tsewctan cuchanžquita Yooz Zoñžquizim criya?

³⁶ Nii čhjujqui čhetinta zoñiqui tuž kjaaziča:

—Señor, maznalla, ¿ject niiqui? Wejrqui nižžquin criyasača.

³⁷ Jesusaqui niizquin kjaaziča, tuž cjan:

—Anziqui werim cherča. Niiča wejrtqui, amtan parliñtqui.

³⁸ Jalla nekztanaqui nii zoñiqui Jesusiž yujcquiz rispitcan quillziča, tuž cjan:

—Wejt jiliri. Amquiz criyuča.

³⁹ Jesusaqui niizquiz cjichiča:

—Wejrqui tii muntuquiz tjonchiča, zoñinaca pjalzjapa. Tsjii zoñinaca žejlča ana zuma kamañchiz. Pero ninacž ujquiztan kuz zint'iča, “ujchizpanča wejrqui” cjan. Wejrqui tjonchinča ninaca zuma kamañchiz cjiskatzjapa. Tsjii zoñinaca žejlča. Jalla ninacaqui ana zuma kamañchizzakazza. Pero “Yooz puntu zuma zizuča” cjiñiča. Jalla nuž chichiyani ninacača zur zoñinacažtakaz. Jalla nii tjeezjapa, tii muntuquiz tjonchinča.

⁴⁰ Jesusaž nuž chiyani yekjap fariseo zoñinacaqui niiz žcati želatča. Ninacaqui nii chiita nonžcu, pewcziča tuž cjan:

—¿Wejrnacmi zur zoñinacažtakaz cjesajo? Anaž cjesača.

⁴¹ Jalla nekztanaqui Jesusaqui ninacžquiz tuž cjichiča:

—Ančhucqui persun kuzquiz zur zoñižtakaz naytasaž niiqui, ančhucqui anaž ančuca ujquiztan casticta cjitasača. Pero “Wejrnacqui Yooz puntu zuma zizuča” cjanž chiila. Jalla nižtiquiztan ančuca ujquiztan casticta cjequiča.

10

UZANACZ QUINTU

¹ Jesusaqui zakaz cjichiča:

—Ančucaquiz weraral chiyuča. Jakziltat uuzi uyquiz ana zan kjutan luzzaja, yekja latuquiztan chjozacuñ luzzaja, jalla niiča ana wal tjañiqui. Uzanaca kjañzjapa luzza.

² Pero jakziltat uuzi uy zanquiztanpan luzzaja, jalla niiča uuzi itzñi awatiriqui.

³ Nižaza uy zana cwiñiñi zoñiqui uy zana cjetžničiča nii uuzi awatiri lujjapa. Nižaza nii uzanacaqui awatirž jora pajča. Nii awatiriqui uuzi tjuucu tjuucu kjawža, nižaza uyquiztan jwessa.

⁴ Jalla nuž tjapa niiz uzanaca jwescu, niiz uzanacž tucquinž ojčka. Nižaza nii uzanaca niž wirquiz apža, jora pajžcu.

⁵ Tsjii ana pajta zoñž wirquiziqui anaž apža, antiz nii ana pajta zoñžquiztan zajtča, niiz jora ana pajžcu.

⁶ Jalla nuž Jesusaqui quint'ichiča. Pero nonžñi zoñinacazti ana wira intintazziča, čjul puntuquiztan chičhaja, jalla nii.

ZUMA AWATIRI

⁷ Jalla nekztanaqui Jesusaqui wilta ninacžquiz chiichiča, tuž cjan:

—Ančucaquiz weraral chiyuča. Wejrtča uuzi uy zantqui.

⁸ Ima weriž tjonan, zoñinacaqui tjonchiča, “Yoozquiztan tjonuča”, cjicanaqui. Pero tjañicamača tjapa nii tjonchi zoñinacaqui. Uuza tjangžñinacača ninacaqui. Pero ninacž wirquiziqui wejt uzanacaqui ana apziča.

⁹ Wejrtča uuzi uy zantqui. Jakziltat weriž cjen Yooz jamillquiz luzzaja jalla niiqui liwriitaž cjequiča. Jalla niiqui Yooz uuzi cuntaž cjequiča. Uuza uyquiz luznaquiča, zaž ulnaquiča, zuma pastu watzjapa. Liwriitapaž cjequiča.

¹⁰ Tjañi cjićjiñi zoñinacaqui tjonča, cjisñi, con, nižaza tirkati, jalla nii alaja tjonča. Wejrzi tjonchinča, zuma kamaña tjaazjapa, ančhuc anča zuma kamañchiz cjiskatzjapa.

¹¹ Wejrtča zuma awatirtqui. Tsjii zuma awatiriqui niiz uzanacž laycu ticznasača.

¹² Pero yekjapanacaqui paca tanzjapakaz uuzi ichñiča. Jalla ninacaqui tsjii uuzi tanñi animalaž tjonan uuzi eccu zatasacha. Nii uuzi anača persun uzanaca. Jalla nuž uzanaca ectan nii anawal animala tjonchiqui uzanacaž tanča, nižaza witča. Anača nižta zuma awatiriqui.

¹³ Nii anawal awatiriqui paca tanzjapakaz uuzi ichñiča. Ana nii uzanacžjapa juyzu paañiča, čjulunacat watačhaja, jalla nii. Jalla nižtiquiztan uzanaca eccu, anawal animalquiztan zatasacha.

¹⁴⁻¹⁵ Wejrtča zuma awatirtqui. Jaknužt wejt Yooz Ejpqui wejtquiz pajčhaja, nižaza wejrmi wejt Ejpžquiz pajučhaja, jalla nižtača wejrqui wejt uzanacžquiz pajuča, nižaza wejt uzanacaqui wejtquiz pajča. Wejrqui wejt uzanacž laycu ticznača.

¹⁶ Wejta zakaz žejlča yekja uzanaca ana tii uyquiz cjiñiqui. Wejrqui nii uzanaca ricujzquiztan zakaztča. Jalla ninacaqui wejt taku cazaquiča. Tjapa wejt uzanacaqui tsjii tamaž cjequiča, nižaza tsjii awatirchiz.

¹⁷ Wejt uzanacž laycu ticznača, nižaza jacatatača. Jalla nižtiquiztan Yooz Ejpqui wejr kaachiča.

¹⁸ Anaž jecmi wejr ticzkatasach̄a. Antiz wejrqui persun kuzquiztan ticznač̄a. Nižaza poderchiztč̄a jacatatzjapa. Jalla nii poder wejt Yooz Ejpqui wejtquiz tjaachič̄a.

¹⁹ Jalla nuž Jesusiž chiita taku nonžcu judío žoñinacaqui wilta t'aka t'aka cjissič̄a.

²⁰ Tsjii žoñinacaqui cjichič̄a:

–Zajraž tantala. Lucuratala tiiqui. ¿Kjažtquiztan tiiz chiita ančhucqui nonžjo?

²¹ Yekjapac cjichič̄a:

–Tiiqui anaž zajraž tanta žoñižta chiič̄a. ¿Nižaza zajraž tanta žoñiqui tsjii zur žoñi čhjetnasajo? Anaž cjesach̄a.

TSJII ŽOÑINACAQUI JESUSA ANA NONZ PECCHA

²² Zac timputach̄a. Nižaza Jerusalén wajtquin timplu cumpleañ pjižta paatč̄a.

²³ Jalla nii oraqui Jesusaqui timpluquin ojklayatč̄a, Salomón cjeta kjuy patiuran.

²⁴ Jalla nuž ojklayan judío žoñinacaqui Jesusiž muytata ajczič̄a, tuž cjan:

–¿Čhjulorcama amqui wejtnaca kuz turwayskataquejo? Amčhalaj Cristumž niiqui, tsjiika kjanacama chiižna.

²⁵ Jesusaqui ninacžquiz tuž kjaazič̄a:

–Ančhucaquiz nuž cjichinč̄a. Pero weriž chiitami ana criichinčhucč̄a. Jaknužt wejt Yooz Ejp mantačhaja, jalla nii mantita jaru zuma obranacal paa-uč̄a. Jalla nii obranacaž cjen, ančhucqui zizasach̄a, werjtč̄a Cristo už anažlaj Cristo, nii.

²⁶ Ančhuczi ana wejtquiz criiñčhucč̄a. Ančhucqui anač̄a wejt uuažtakazi, jaknužt tuquiqui chiituchaja, jalla nii.

²⁷ Wejt uuzanacaqui wejt jora pajč̄a, nižaza wejrqui wejt uuzanaca pajuč̄a. Nižaza nii wejt uuzanacaqui wejtquiz apžquifipanč̄a.

²⁸ Wejrqui ninacžquiz zuma kamaña tjaa-uč̄a, Yooztan wiñaya kamzjapa. Anapan infiernuquin okasač̄a. Nižaza anaž jecmi wejt kjarquiztan ninaca kjañasač̄a.

²⁹ Wejt Yooz Ejpqui wejt kjarquiz tjaachič̄a. Jalla niiqui tjappachquiztanami juc'ant azzizza. Jalla nižtquiztan anaž jecmi Yooz Ejpžquiztan wejt uuzanaca kjañasač̄a.

³⁰ Wejttan wejt Yooz Ejpžtan tsjii kuzziztč̄a.

³¹ Jalla nuž chiitquiztan nii judío žoñinacaqui maztan aptižcu wilta Jesusižquiz čhajc pecatč̄a.

³² Nekztan Jesusaqui ninacžquiz cjichič̄a:

–Wejrqui Yooz Ejpž aztan zuma obranacal ančhucaquiz tjeezinč̄a. Nii zuma obranaca Yooz kuzcama paachinč̄a. ¿Jakzilitat nii zuma obranacquiztan wejr maztan čhajc pecjo?

³³ Nii judío žoñinacaqui tuž kjaazič̄a:

–Anal am čhacač̄a, zuma obriquiztan. Yooz quintra chiitquiztan am čhacač̄a. Amqui žoñimkazza. Pero Yooztakam cjiicjič̄a.

³⁴ Jalla nekztanaqui Jesusaqui ninacžquiz tuž cjichič̄a:

–Ančhuca liiquizpacha tuž cjiirtapanč̄a: “Yoozqui cjič̄a: ‘Ančhucqui Yooztakazza.’”

³⁵ Cjiirta Yooz takuqui anaž niqui atasach̄a. Jalla nii zizza učhumqui. Yoozqui niiz taku catokñi žoñinacž puntuquiztan cjichič̄a, “Ančhucqui Yooztakazza”, cjiicanaqui.

³⁶ Yoozqui wejr ut'aychič̄a tii muntuquiz cuchanžquizjapa. Jalla nižtquiztan wejrqui cjichinč̄a, “Wejrtč̄a Yooz Majchtqui”. Jalla nuž chiitquiztan, ¿kjažt ančhucqui Yooz quintra chiiñi cjeejo?

³⁷ Wejrqui wejt Yooz Epiž mantita obranaca ana paayin čjitasaz niiqui, wejtquiz criiz ana waquizič̄a.

³⁸ Pero wejt Yooz Epiž mantita obranaca paayinč̄a. Jalla nižtquiztan wejtquin criya. Weriž chiitquiztan anač̄a wejtquiz criyačhaj niiqui, weriž paata obranacquiztan mekaž wejtquiz criyalla. Wejtquin criyaquiz niiqui, ančhucqui intintazaquič̄a, wejttan Yooz Ejpžtan tsjiikazza, jalla nii. Wejt Yooz Ejpqui wejt kuzquiz žejlč̄a, nižaza wejrqui wejt Yooz Ejpž kuzquiz želuč̄a. –Jalla nuž chiichič̄a Jesusaqui.

³⁹ Nekztanaqui wilta Jesusa preso chjitz pecatč̄a. Pero Jesusaqui ninacžquiztan atipas-sič̄a.

⁴⁰ Jalla nekztanaqui Jesusaqui Jordán puž tuuna ojkič̄a. Jakziquin Juanqui primero bautistč̄haja, jalla nicju želatč̄a.

⁴¹ Walja žoñinacaqui nižtan zali ojkič̄a. Ninacaqui tuž cjichič̄a:

–Chekapan, tjapa Juanž chiita tiiz puntuquiztan werarapanč̄a. Ana čhjul milajru paachi cjenami, Juanqui tiiz puntuquiztan werarapan chiiñitakalala.

⁴² Jalla nicju želan walja nekž žejlñi žoñinacaqui Jesusižquiz criichič̄a.

¹ Tsjii laa zoñi želatča, Lázaro cjita. Betania wajtchiz zoñitača. María, nižaza naaža cullaqui, Marta, jalla nii pucultanaqui Betania wajtchizzakaztača.

² Mariiqui nii laa Lazaruž cullaquitača. Nižaza Mariiqui Jesusa Jilirž kojchquiz zuma ulurchiz asiiti alžinchintača. Nekztan naaža persun ach charžtan Jesusiž kojchanača chjužinchintača.

³ Jalla nuž nii pucultan maatakanacaqui Jesusižquiz mazñi cuchanžquichiča, tuž cjican:

—Wejt Jiliri, amiž pecta k'aachita amigo laa cjichiča.

⁴ Jesusaqui nii mazta nonžcu, cjichiča:

—Niž laacjitiquiztan ana ticznaquiča. Antiz niž laacjitiquiztan Yooz azi tjeežtaž cjequiča. Nižaza Yoozqui honorchiz cjequiča. Nižaza Yooz Majchqui honorchiz zakaz cjequiča.

⁵ Jesusaqui Martaquiz, naaža cullaqui Mariaquiz, nižaza ninacž jila Lazaružquiz, jalla ninacžquiz ančaž k'aachichiča.

⁶ Jalla nuž cjenami Lazaruž laa quintu nonžcu, Jesusaqui iya puc majžtan kamchiča, jakziquin kamatčhaja, jalla nicju.

⁷ Jalla nii puc majquiztan niž tjaajintanacžquiz cjichiča:

—Wiltaž Judea yokquin okla.

⁸ Nekztanaqui niž tjaajintanacaqui cjichiča:

—Tjaajiñi Maestro, ažk tsjii kjaž majkaz nekzta zoñinacaqui am maztan čhajc pecatla, conzjapaqui. ¿Wilta am nicju ojkc pecya?

⁹ Jesusaqui ninacžquiz tuž kjaaziča:

—Tsjii noojiqui tuncapan orchizza, majiñqui. Jakziltat kjanquiz ojčkchaja, anaž ezasača. Jalla nižta iratača wejt kjanquiz ojčkñi zoñinacaqui. Ima niž ticz ora irantižcan, walikaz cjequiča.

¹⁰ Jakziltat ween zumchiquiz ojčkchaja, jalla niiqui ezasača, kjanaž ana želanaqui. Jalla nižtača ana wejt kjanquiz ojčkñi zoñinacaqui. Ana Yooz kuzcama kamtiquiztan anawalquiz tjožtsnasača.

¹¹ Nekztanaqui Jesusaqui ninacžquiz cjichiča:

—Učhum Lázaro amiguqui tjačha. Pero wejrqui Lázaro tjažil wajtskatača.

¹² Jalla nekztanaqui niž tjaajintanacaqui cjichiča:

—Jiliri, tjačhaj niiqui, nuž cjenauqui upallat cjissani; žetaquiz, jaz.

¹³ Niž tjaajintanacaqui tsjii kjutñi intintazziča. Jesusaqui Lázaro ticz puntuquiztan chichiča. Niž tjaajintanacaqui ultimu tjaž puntuquiztan intintazziča.

¹⁴ Jalla nižtiquiztan Jesusaqui kjanapacha čiichiča tuž cjican:

—Lazaruqui ticziča.

¹⁵ Ana nicju žejlchiž cjen wejrqui cuntintučha. Jalla nuž cjenča ančhucaltajapaqui waliqui, wejtquiz juc'anti criiči cjisjapa. Jazic nii cheriž ojkla.

¹⁶ Nekztanqui Tomasaqui, niž mazinacžquiz cjichiča:

—Učhumnac zakaz ojkla, tižtan chica ticžñi.

Tomasaqui "Pacha" cjita zoñizakaztača.

JESUSACHA JACATATSKATŃIQUI

¹⁷ Betania watja irantižcu, Jesusaqui zizziča, Lazaruž ticžtaqui nižaza tjattaqui pajkpic tjuñitača.

¹⁸ Betania watjaqui Jerusalén wajtquiztan pizc kilómetro jilallatača.

¹⁹ Jalla nii žcati želan walja zoñinacaqui Martaquiz nižaza Mariyaquiz kuzñi tjonzitača, ninacž jila ticziž cjen.

²⁰ Martiqui Jesusaž waj irantižquiči quintu nonžcu, Jesusižquin zali ojkcchinča. Mariiqui kjuyquin eclichintača.

²¹ Jesusižtan zalžcu, Martiqui paljaychinča, tuž cjican:

—Wejt Jiliri, am tekz žejltašaž niiqui, wejt jilaqui ana ticzi cjitasača.

²² Jalla nuž cjenami wejrqui zizuča, čhulu amiž Yoozquiztan mayiztami tjaataž cjequiča. —Jalla nuž Jesusižquiz čiichinča Martiqui.

²³ Jesusaqui naaquiz cjichiča:

—Am jilaqui jacatataquiča.

²⁴ Martiqui cjichinča:

—Wejrqui zizuča, tii muntu tucužinžtan, jacatatz tjuñquiziqui jacatataquiča.

²⁵ Nekztan Jesusaqui naaquiz cjichiča:

—Wejrčha jacatatskatiñtqui, nižaza arajpach žeti tjajiñtqui. Jakziltat wejtquiz criyačhaja, ticzi cjenami, wilta žetaquiča.

²⁶ Nižaza jakzilta žejtñi zoñimi wejtquiz criyačhaja, jalla niiqui anaž wira ultimu ticznasačha. Arajpachquin wiñaya žetaquičha. ¿Jalla nii crii amya?

²⁷ Naaqui tuž kjaazinčha:

–Criyučha, wejt Jiliri. Nižaza criyučha, amqui Cristumčha; nižaza Yooz Maatimčha tii muntuquiz tjonchiqui. Jalla niiqui criyučha.

MARIAQUI JESUSIZTAN ZALI ULANCHINCHA

²⁸ Jalla nuž čhižcu, Martiqui naaža Marii cullaqui kjawžni ojkchinča. Nekztan Mari-aquiz jamazit čhičhinča, tuž cjan:

–Tjaajiñi Maestruqui tekz tjonchičha. Am kjawžca cjičha.

²⁹ Jalla nuž nonžcu Mariiqui apura žaazinčha. Jesusižquin zali ojkchinča.

³⁰ Jesusaqui imaž watja irantižcatčha, jakziquin Marti nižtan zalčhaja, jalla niiranž želatčha.

³¹ Lázaro jilaž ticziž cjen, Mariaquiz kuzcan zoñinaca kjuyquin želatčha. Jalla ninacaqui Maria apura žaazcu ulanñi cheržcu wirquizpacha apzičha. Ninacaqui cjichičha, “Lázaro jilž sipulturquin kayit ojkčhani” cjan.

³² Jesusižtan zalžcu Mariiqui niž yujquiz quillzinčha, tuž cjan:

–Wejt Jiliri, tekzim cjitčhaj amqui, wejt jilaqui anaž ticzi cjitasačha.

³³ Jesusaqui naa Maria kaañi cheržcu, nižaza naatan tjonñi judío zoñinaca kaañi zakaž cheržcu, persun kuzquiz ancha sint'ichičha, nižaza ancha llaquita cjissičha.

³⁴ Jalla nekztan pewczičha, tuž cjan:

–¿Jakziquin tjatchinčhuctaya?

Ninacaqui cjichičha:

–Jiliri, niž cheržinžcalla.

³⁵ Nekztanaqui Jesusaqui kaachičha.

³⁶ Jalla nuž cheržcu zoñinacaqui cjichičha:

–Cheržna. Lázaro jila ančaž k'aachichičha.

³⁷ Yekjapa ninacazti cjičhičha:

–Tiiqui zur zoñž čhujquičha. ¿Anaj tiic Lázaro jila čhjetnasaya, ana ticzi cjisjapaya?

LAZARO JACATATSKATTA

³⁸ Jalla nekztanaqui Jesusaqui ancha kuzquiz sint'ican, sipulturquin macjatchičha. Sipulturaqui pajk mazquiz pjetatačha. Nižaza pajk maztan pjucžtatačha, nii sipultur zana.

³⁹ Jesusaqui nekztan cjičhičha:

–Nii maz cjewžna.

Martiqui, nii ticzi jilž cullaquiqui, cjichinčha:

–Wejt Jiliri, pajkpic tjuñi tiž ticztaqui. Jalla nižtiquiztan tiiqui chjonanchižlani.

⁴⁰ Nekztanaqui Jesusaqui naaquiz cjichičha:

–Amqui wejtquiz criyaquičha niiqui, Yooz azi tjeežtam cheraquičha. ¿Anaj werj nuž amquiz čhičhinpanejo?

⁴¹ Jalla nekztanaqui nii sipultura mazquičha. Nekztanaqui Jesusaqui arajpach kjutñi cheržcu, tuž cjičhičha:

–Yooz Ejp, weriž mayizta nonžniž cjen gracias amquin cjiwčha.

⁴² Weriž mayiztaqui nonžñampančha amqui. Jalla nii zizučha. Tekz tsijtchi zoñinacžtajapa nuž chiyučha, amčha wejr cuchanžquičhi, jalla nii criyajo.

⁴³ Jalla nuž mayizicu, Jesusaqui alto tawkžtan mantichičha tuž cjan:

–Lázaro, nekztan ulanžca, ticchuc tjona.

⁴⁴ Nii ticziquičha ulanžquičhičha, kjarami kjojchami jweržintapacha, nižaza niž yujcni tsjii pañžtan ch'okžinta. Nekztanaqui Jesusaqui nekž žejlñi zoñinacžquičha mantichičha:

–Nii jweržina. Nekztan ojklajaj cjee.

JESUSA CONZJAPA KAZZICHA

⁴⁵ Jalla nižtiquiztan muzpa judío zoñinacaqui Jesusižquin criichičha. Ninacaqui Mariaquiz cumpantižcu Jesusiž paata milajru cherchičha.

⁴⁶ Yekjap nekž žejlñi zoñinacazti fariseo zoñinacžquin mazñi ojkchičha. Nicju tjapa Jesusiž paatanaca quint'izquičhičha.

⁴⁷ Jalla nuž nonžcu fariseo partir zoñinacami timplu jilirinacami tjapa jilirinaca ajc-skatchičha. Nekztan jilirinacžquičha pewczičha, tuž cjan:

–Nii zoñiqui ančaž milajrunaca paačha. ¿Učhumnacqui kjaža cjeequi nii zoñžtan?

⁴⁸ Jalla nužkaž milajrunaca tira paañižlaj niiqui, tjapa zoñinacaqui nižquincama criyačhani. Jalla nuž cjenaqui roman jilirinacaqui zultatunaca cuchanžcačhani, učhum timplu pajlžjapani, nižaza učhum naciona akžjapani.

⁴⁹ Nii wataqui Caifás cjitaqui uchtatacha timplu chawc jiliri. Jalla niiqui paljaychicha, tuž cjan:

—Anchucqui ana zizñi zoñinacžtakaz, žkjažtatajo?

⁵⁰ Učhum wajtchiz zoñinacžtajapa nii Jesusac ticstanča, tjapa učumnaca ticz cjenquiztanpacha. Jalla nuž waquzičha. Tjapa tii naciona akžinasaz niiqui, jalla niiz ana wali cjesača. Nuž ana waquzičha.

⁵¹ Nii timplu chawc jiliriquni anača persun kuzquiztan čiichiqui. Timplu chawc jiliriz cjen, Yoozza nuž čiikatchi. Jalla nuž čiican, Jesusiž puntu mazinčičha, Jesusaqui nii wajtchiz zoñinacžtajapa ticznaquičha.

⁵² Anazaž nii wajtchiz zoñinacžtajapakaz ticznaquičha. Tjapa zoñinacžtajapa ticznaquičha. Yooz partiquiz kamñi zoñinacaqui tjapa kjutñi tii muntuquiz wichanzičha. Jalla ninacaqui Jesusaqui tjapa nacionquiztan ricujaquičha. Tsji Yooz jamillajapa ricujaquičha.

⁵³ Jalla nuž palt'izcu nii noojtanpacha judío jilirinacaqui Jesusa conzjapa kazzičha.

⁵⁴ Jalla nižtiqiztan Jesusaqui chjozacuñ ana kjanacama ojklajchičha Judea cjita yokquiz. Jerusalén žcati yokquiztan ojkičičha Efrain wajtquin. Efrain watjaqui ch'ekti yok žcatitača. Jalla nicju niiz tjaajintanacžtan kamčičha.

⁵⁵ Judío zoñinacž pascua pijjta wajillatača. Jalla nižtiqiztan walja zoñinacaqui jochinacquiztanami zkolta watjanacquiztanami Jerusalén watja ojkičičha ima pascua pijjta tjonan. Ajunz cuzturumpi payi ojkičičha. Ana nii cuzturumpi paaquiz niiqui, ana pascua pijjta paasača.

⁵⁶ Nii tjonchi zoñinacaqui Jesusa kjuratča. Timpluquin tsijtchi žejlan ninacpora Jesusiž puntu pewcsassičha, tuž cjan:

—ŽAm jaknužum tantii? ŽTii pijjtiqiz Jesusac tjonasaya?

⁵⁷ Nižaza fariseo partir zoñinacami timplu jilirinacami ordena tjaachičha, jequit Jesusa cheracha, jalla niiqui ninacžquiz maztanča, Jesusa preso tanta cjisjapa.

12

ASII TJAJLZINTA QUINTU

¹ Pascua pijjta wajilla sojta tjuñiz cjen Jesusaqui Betania watja ojkičičha, Lazaruž kjuya. Niiz tuquiqui Jesusaqui ticziqiztan nii Lázaro jila jacatatskatchitača.

² Jalla nicju Jesusižquiz rispitan zuma čjери tjaczinčičha. Martiqui čjери atintichinča. Lazaruzni mizquiz želatča, Jesusižtan chica lujcan nii parti zoñinacžtanpacha.

³ Jalla nuž lulan Mariiqui medio litro zuma ulurchiz asiiti zjijčchinča. Nii asiitiqui zuma legal nardo cjita asiititača, wali precuichiztača. Jalla nii asiitžtan Jesusiž kojchquiz alžcu tjajlžinčinča. Nekžtan naaža persun ach charžtan chjujžinčinča. Walja zuma ulurchiztača. Tjapa nii kjuyquiziqui nii zuma ulura chjijpsitača.

⁴ Jalla nuž asiiti alžinñi čheržcu, Judas Iscariote cjita Simonž majchqu chutchičha. Jalla niiqui Jesusiž tjaajinta zoñinacž partiquiztantatača. Nižaza niipacha niiz wiruñ Jesusiž quintra tarasunaž paaquičha. Jalla nii Judasqui naa Mariaquiz paljaychičha, tuž cjan:

⁵ —ŽKjažtiqiztan tii aceite ana 300 paazuñ tuytata, pori zoñinacžquiz yanapžjapajo?

⁶ Judasžti anaž porinaca importayatača. Tjañi zaañitača. Niiz kjarquiztača paaz pulsaqui. Nižaza nii utžta paaznacquiztan tjangñitača. Jalla nižtiqiztan nuž čiichičha.

⁷ Jalla nekžtanacqui Jesusaqui Judasquiz cjichičha:

—Ana naaquiz nuž cjee. Ima wejt ticz tjuñi tjonan, naaqui wejtajapa tii aceite čjjojčinča, wejr zuma tjatta cjisjapa.

⁸ Tii muntuquiz porisanac panž žejlča. Wejržti ančhucatan ana tira želača, tii muntuquiz.

LAZARUZAKAZ CONZ PECCHA

⁹ Walja judío zoñinacaqui Jesusiž quinto zizzičha, Betania wajtquin žejlñi, jalla nii. Jalla nekžtan nicju ojkičičha, Jesusa cheržni, nižaza Lázaro cheržni. Jesusaqui Lázaro ticziqiztan jacatatskatchičha.

¹⁰ Jalla nuž Lázaro jacatatskatta quinto nonžcu timplu jilirinacaqui Lazaruzakaz conz kazzičha.

¹¹ Jalla nii Lazaruž jacatataž cjen, walja judío zoñinacaqui nii jilirinacž čiitanaca ana cazzičha. Nekžtan zarakžcu, Jesusižquiz apoychičha. Nižaza nižquin criichičha.

JERUSALEN WAJTQUIN LUZTA QUINTU

¹² Walja zoñinacaqui Jerusalén watja tjonžcu, nekž želatča pascua pijjta paazjapa. Jakatažuqui zoñinacaqui zizzičha, Jesusaqui wajtquin wajillaž irantižquičha, jalla nii.

¹³ Jalla nekžtan chjañinacžtanpacha ramuca cjita munti itsa kjajpčičha. Jalla nuž nii ramuz itsanac manžcu, wajtž tjiya Jesusa risiwi ulanchičha, tuž kjawcan:

—¡Yoozqui honorchiz cjila! ¡Yooz Jilirž tjuuquiz tjonñi žoñi rispittaj cjila! ¡Israel chawjc jiliri rispittaj cjila!

¹⁴ Jesusaqui tsjii aznu cuncsicžcu, yawchicha, jaknužt Yooz tawk liwruquiz cjiirčhaja, jalla nuž.

¹⁵ Cjiirta Yooz takuqui tuž cjicha:

—Siñon wajtchiz žoñinaca, anaž eksna. Chertzna. Aznuquiz yawchi am chawjc jiliriz tjončha.

¹⁶ Jalla nuž watan nii ora niž tjaajintanacaqui anaž intintazatčha, kjažtiquiztan nižta wat, jalla nii. Jesusa arajpacha ojktan, jalla nekztan ninacaqui intintazzi cjissičha. Jalla nii ora cjuñzičha, tuquitan cjiirta Yooz takuqui tjapa nii watchinaca mazinchičha, nii. Nii cjiirtnac jaru, nužcama watchičha.

¹⁷ Niiž tuquiqui Jesusaqui Lázaró ticziquiztan jacatatskatchičha. Nekztan kjawžcu sipulturquiztan ulanskatžquichičha. Jalla nii cherni žoñinacaqui parti žoñinacžquiz walja parlichicha tjapa nii milajru paatiquiztan.

¹⁸ Jalla nižtiquiztan Jesusaž paata milajru zizcu, walja žoñinacaqui Jesusižquin zali ojkičha.

¹⁹ Jalla nuž cheržcu fariseo žoñinacaqui ninacpora tuž cjichičha:

—Wejrnacqui jazicž cheručha. Tjapa žoñinacaqui nižquin ojkszpanž cjiskalala. Nižaza wejrnacqui anaž čhjulumi kjaž cjiyi atchuca cjesaž, jaz.

GRIEGO WAJTCHIZ ŽOÑINACA

²⁰ Nii pijizta ojkiči žoñinacžporquiz tsjii kjaž griego wajtchiz žoñinaca želatčha. Ninacaqui Jerusalén watja ojkičizakazza, Yooz rispiti.

²¹ Ninacaqui Felipižquin tjonchičha. Felipiqui Betsaida wajtchiztačha, nižaza Galilea yokchiztačha. Felipižquiz rocchičha tuž cjan:

—Señor, wejrnacqui Jesusižtan zalz pecučha.

²² Nekztanaqui Felipiqui Andrežquiz mazñi ojkičha. Nekztanaqui pucultanaqui Jesusižquiz mazñi ojkičha.

²³ Jalla nuž maztiquiztan Jesusaqui cjichičha:

—Wejrqui tsewtan cuchanžquita Yooz Žoñičha. Jaziqui wejt ticz ora wajičha. Jalla nekztanaqui wejrqui honorchiz cjeečha.

²⁴ Ančhucaquiz weraral chiyučha. Tsjii čhjacta trigo semillaqui yokquiz tjažta, katčha. Jalla nižta čhjacta cjen, ew zkala jecža, nižaza pookčha. Ana nižta čhjacta cjequiz niiqui, nužquikaz žejlčha semillaqui.

²⁵ Jalla nižta iratačha tii čhiitaqui. Jakziltat persun kuzcamakaz kamz pecčhaja, jalla niiqui ultim zuma kamaña pertaquičha. Pero jakziltat tii muntuquiz žejlcan persun kuzcama ana kamz pecčhaja, nižaza Yooz kuzcama kamz pecčhaja, jalla niiqui wiñayjapa zuma kamañchiz cjequičha.

²⁶ Jakziltat wejtquiz sirwachaja, jalla niiqui wejtčan chica ojklaysa čhjul sufrizquiztanami. Nekztan jakziquin wejr želačhaja, jalla nicju wejtčan chica wejt sirwiñinaca zakaz cjequičha. Nižaza jakziltat wejtquiz sirwachaja, jalla nižquiz wejt Yooz Ejpqui honoraz tjaaquičha.

JESUSIŽ TICZ MAZINTA

²⁷ Anziqwi wejt kuzqui ancha turwaysičha. ¿Kjaž cjisnaqui? Yooz Ejp, tii sufrizquiztanž liwriyalla. ¿Nuž cjis wali cjesaya? Anačha. Wejrqui tii muntuquiz tjonchinpančha, sufrisjapaqui.

²⁸ Yooz Ejp, am munañpaj cjila; ampacha rispittaj cjila. —Nuž cjichičha Jesusaqui. Jalla nii orapacha arajpachquiztan tsjii joraqui paljayžquichičha, tuž cjan:

—Wejrqui rispittičha, nižaza rispittapan cjeečha, amiž cjen.

²⁹ Nekz žejlñi žoñinacaqui jalla nii čhiñi jora nonžcu, cjichičha:

—Tsjii jorjorñi želatčha —nuž cjichičha.

Yekjapanacaqui tuž cjichičha:

—Tsjii anjilaž paljayžquichila.

³⁰ Jalla nekztanaqui Jesusaqui cjichičha:

—Anaž wejtajapa nii jora čhižquichičha, antiz ančhucaltajapačha.

³¹ Weriz ticztaž cjen tii muntuquiz žejlñi žoñinacaqui pjalžtaž cjequičha. Nižaza tii muntuquiz mantiñi diablugu atiptaž cjequičha, čjatkattaž cjequičha.

³² Yooz Žoñičha wejrqui. Jaziqui tii yokquiztan cruzquiz waytital cjeečha. Nekztan tjapa wejt partir žoñinacžquiz wejtquin macjatskatačha, wejtquin criizjapa.

³³ Jalla nuž čhiican Jesusaqui jaknužt ticznachaja, jalla nii čhiichičha.

³⁴ Nekz žejlñi žoñinacaqui tuž cjichičha:

—Učhumnacqui učhum liiquiztan zizzicha, Cristuqui wiñaya žetaquiča. ¿Kjaž amqui chiyasajo, Yooz Zoñi cruzquiz waytita cjequiča, cjanajo? ¿Ject tii Yooz Zoñejo?

³⁵ Jalla nekztanaqui Jesusaqui cjichiča:

—Wejrqui tsjii upacamakal ančhucatan želača Yooz kamaña tjeežcan, tsjii kjanažtakaz. Jalla nuž wejt kjana želan, ančhucqui zuma kamañchiz kama. Zumchi cjis wajillača. Nii zumchi cjen, ana tsucaquiča. Jakziltat anawal zumchiquiz kamčhaja, jalla niiqui jakzitchuc ojkčhaja, jalla nii ana zizza.

³⁶ Jaziqui tsjii kjanažtakaz weriž želan, wejtquiz criya, zuma Yooz kamaña tjeežñinaca cjisjapa.

Jalla nuž chiižcu Jesusaqui ojkchiča. Nekztan ninacžquiztan čhjojziča.

ISAÍAS CJIJRTA TAKU CUMPLISSICHA

³⁷ Ninacaž cheran walja milajrunaca paachiča Jesusaqui. Jalla nuž paachiž cjenami parti zoñinacaqui ana niižquin criichiča.

³⁸ Jalla nuž ana critiquiztan Isaías cjita profetž takunaca cumplissiccha. Isaías cjita Yooz cuntiquiztan chiiñi profetaqui tuž cjichiča:

“Yooz Jiliri, ¿ject wejtnacaž chiita taku criižo? Nižaza am azi tjeežnan, zoñinacaqui anapaž intintazza”.

³⁹ ¿Kjažt zoñinacaqui criyasajo? Isaíasqui tuž cjichiča:

⁴⁰ “Yoozqui tii zoñinaca zur zoñižtakaz cjiskatchiča, ana cherñi zoñinacažtakaz cjejajo. Nižaza chojru kuzziz cjiskatchiča, ana intintazñi kuzziz cjejajo. Jalla nuž cjen ana wejtquin macjatžcaquiča, liwriita cjejajo”.

Nuž cjižriča Isaíasqui,

⁴¹ tuquitan Jesusaž tjeežta honora puntu zizcu.

⁴² Jila parti ana criichiž cjenami, muzpa zoñinacaqui Jesusižquiz criichiča, nižaza jilirinacami. Pero fariseo zoñinaca ekscu ana kjanacama cjičjičhiča. Jamazit criichiča, ana ajcz kjuyquiztan chjatkatta cjejajo.

⁴³ Zoñinacaž rispitta cjis pecatča, Yoozquiztan cjen juc'anti. Jalla nižtiquiztan jamazit criichiča Jesusižquiz.

JESUSIZ CHIITA TAKU

⁴⁴ Jalla nekztanaqui Jesusaqui altu joržtan chiichiča tuž cjan:

—Jakziltat wejtquiz criičhaja, jalla niiqui wejr cuchanžquiñižquiz nužuzakaz criiča.

⁴⁵ Nižaza jakziltat wejr cherčhaja, jalla niiqui wejr cuchanžquiñižquiz nužuzakaz cherča.

⁴⁶ Wejrqui tii muntuquiz tjonchinča, Yooz kamaña tjeežjapa, tsjii kjanažtakaz. Jakziltat wejtquiz criičhaja, jalla niiqui anawal zumchiquiz ana tira kamaquiča.

⁴⁷ Jakziltat weriž chiita nonžcu ana catokačhaja, jalla niiž quintra tii ora anal chiyučha. Wejrqui zoñinacž quintra chiižjapa ana tjonchinča. Antiz zoñinaca liwriižjapa tjonchinča.

⁴⁸ Jakziltat wejtquiz ana criičhaja, nižaza werj ana cherz pecčhaja, nižaza weriž chiita taku ana catokčhaja, jalla niiča persun quintra cjičjiñižquiz. Pjalz tjuñquiziqui weriž chiita taku ana catoktiquiztan jalla nižtiquiztan Yooz Ejpqui ultimquiz ninaca casticaquiča.

⁴⁹ Wejrqui anal persun kuzquiztan chiiñča. Antiz wejr cuchanžquiñižquiz Yooz Ejpž mantita jaru chiiñča, nižaza niiž mantitacama tjaajničha.

⁵⁰ Wejt Yooz Epiž mantitacama kamzqui arajpachquin Yoožtan wiñaya kamzjapapanča. Jaziqui weriž chiitaqui Yooz Epiž mantitacama chiičinča.

13

JESUSAQUI PIYUNAZTAKAZ KJOJCHANACA AWJZICHA

¹ Ima pascua pijizta tjonan, Jesusaqui zizzicha niiž ticz ora wajitacha, jalla nii. Nižaza zizzicha, tii muntu eccu niiž Ejpžquinž okaquiča, nii. Tii muntuquiz žejlcan Jesusaqui niiž pecta mazinaca walja k'aachichiča, ultim werarapan. Ticzcama k'aachichiča.

² Pascua pijizta paacan, Jesusaqui niiž tjaajintanacžtan čheri lujlchiča. Judas Iscarote cjita Simonž majch chicapacha nekž želatča. Judas kuzqui diabluž mantuquiz cjiskatchiča. Diabluž mantitaž cjen Judasqui tarzuna paaz pinsichiča, Jesusa tankatzjapa.

³ Jesusaqui zizzicha, Yooz Ejpqui tjapa mantiznaca niiž kjarquiz tjaachiča. Nižaza niiqui Yooz Ejpžquiztan tjonchiča, nižaza Yooz Ejpžquin quepaquiča. Jalla nii zizzicha Jesusaqui.

⁴ Jalla nuž zizziz cjenami, piyunažtakaz cjsiča. Misquiztan tsijtscu, niiž juntuñta zquiti chjojksiča. Nekztanaqui toalla aptižcu, nižtan tsjaasiča.

⁵ Jalla nekztanaqui tsjii purinquiz kjaz alžcu, niiz tjaajintanacz kjojcha awjžiñi kallantichicha. Nekztan nii tsjaazta toallžtan kjojchanaca chjujžinchicha.

⁶ Nižaza Jesusaqui Simón Pedro cjita žoñžquiz niiz kjojcha awjžiñi macjatchicha. Nekztan Pedruqui Jesusižquiz cjichicha:

—Wejt Jiliri, žamqui wejt kjojcha awjžinz pecya? Ana wejt kjojcha awjžinz waquizičha.

⁷ Jalla nuž čhiitiquiztan Jesusaqui tuž kjaazičha:

—Tii weriž paataqui amqui ana intintazza anziqui. Tii jarquinam intintazaquičha.

⁸ Pero Pedruqui cjichicha:

—Wejt Jiliri, amqui wejt kjojcha anapanim awjžinasaccha.

Jesusaqui niizquiz kjaazičha, tuž cjan:

—Wejrqui am kjojcha anal awjžinaž niiqui, anam wejt partiquiz cjesaccha.

⁹ Jalla nekztanaqui Simón Pedro cjitaqui tuž cjichicha:

—Wejt Jiliri, ana wejt kjojcha alajakaz awjnasačha, wejt kjarami achami awjžinalla.

¹⁰ Jesusaqui niizquiz tuž cjichicha:

—Tsjii ajunta žoñiqui anaž wilta wilta ajunz pecčha, antiz kjojchakaz ajunz pecčha. Nekztan limpuž niiqui tjappacha. Ančhucqui limpučha, pero tsjiiqui ana limpučha ančhucqui.

¹¹ Jesusaqui zizzičha, jakziltat tarsuna paazcu nii tankatačhaja, nii. Jalla nižtiquiztan nuž čhiičhicha Jesusaqui, “Tsjiiiqui ana limpučha ančhucqui” cjanacu.

¹² Nekztan Jesusaqui ninacz kjojchanaca awjawjžiñžcu, niiz juntučha chjojka zquiti aptichicha. Zquiti cujžcu wilta misquiz julzičha. Nekztan ninaczquiz cjichicha:

—ŽTii weriž paata ančhucqui intintaziñičhuckaya?

¹³ Ančhucqui wejr “Tjaajiñi Maestruž” cjičha, nižaza “Jiliriž” cjičha. Jalla nužupančha wejrqui. Jalla nižtiquiztan nužpan čhiiz waquizičha.

¹⁴ Wejrčha werara ančhuca Jiliritqui nižaza Tjaajiñi Maestručqui. Jazičqui wejrqui ančhuca kjojcha ajunžinchinčha. Jalla nižta irata ančhucmi piyunanacaztakaz, porapat yanaparassa, nižta kjojchanaca ajunz tjepi.

¹⁵ Jazic nižta paachinčha, ančhuc nižtapacha paajo.

¹⁶ Ančhucaquiz ultim weraral chiyučha. Tsjii piyunaqui niiz jiliržquiztan anačha juc'anti Nižaza tsjii cuchanžquitaqui niiz cuchanžquinižquiztan anačha juc'anti.

¹⁷ Ančhucqui tii puntu intintazzaj niiqui, jalla nii jaru kamz waquizičha. Nekztan cuntintuž cjequičha ančhucqui.

¹⁸ “Wejrqui weriž illztanaca pajučha. Nižaza tsjiizuñ pajučha. Niiz puntuquiztan cjiirta Yooz takuqui tuž cjičha: “Tsjii wejtta chica lujlñiqui wejt quintraž cjisnaquičha”. Jalla nii cjiirta Yooz takuqui cumplisnaquičha. Tjapa ančhuca puntuquiztan anal chiyučha.

¹⁹ Pero anzičqui ima tankatan ančhucaquiz chiyučha jaknužt wejr tanta cječhaja, nii puntu kjanzt'učha. Jalla nižtiquiztan wejr tantanaqui, ančhucqui wejtquiz criyaquičha, wejrčha Yoozquiztan cuchanžquitaqui, jalla nii.

²⁰ Ančhucaquiz weraral chiyučha. Jakziltat weriž cuchanžquita žoñinaca risiwčhaja, jalla niiqui wejr zakaz risiwčha. Nižaza jakziltat wejr risiwčhaja, jalla niiqui wejr cuchanžquinižquiz risiwčhazakaz cjequičha.

JESUSAQUI TARAZUNTAZ CJEQUICHA

²¹ Jalla nuž čhiizcu Jesusaqui persun kuzquiz ancha llaquita sint'ichičha. Jalla nekztan tuž kjanapacha cjichicha:

—Ančhucaquiz weraral chiyučha. Tsjii ančhucaquiztan wejr tankataquičha.

²² Jalla nuž čhiitiquiztan niiz tjaajintanacaqui porapat chersassičha, kuzquiz pinsican, “ŽJakziltižjapa čhičhaja?” jalla nii.

²³ Tsjii ancha k'aayi tjaajinta žoñi Jesusiž latuquiz žcati julzi želatčha.

²⁴ Jalla nekztan Simón Pedruqui nii žcati žejlñizquiz kjaržtan paljayčhicha. “ŽJeczquiztanpan čhi? Maznalla”, cjanacu.

²⁵ Jalla nižtiquiztan nii žcati žejlñi žoñiqui Jesusižquiz pewczičha tuž cjan:

—Wejt Jiliri, žject am tankatñi žoñiqui?

²⁶ Jesusaqui tuž kjaazičha:

—Jeczquizkat wejrqui čhjer mazquiquiz t'awžcu tii t'anta tjaacchaja, jalla niiz cjequičha niiqui.

Jalla nekztanaqui nii t'anta t'awžcu, Judas Iscariotiquiz tjaachičha. Niiqui Simonž majčtačha.

²⁷ Jalla nii t'awžta t'anta tanžtanaqui, Satanás cjita diabluqui Judas kuzquiz luzzičha. Nekztanaqui Jesusaqui Judasquiz paljayčhicha, tuž cjan:

—Chjulium paacchaja, apura paa.

²⁸ Nii parti mizquiz julzi žoñinacaqui ana intintichičha, nii Jesusiž čhiita.

²⁹ Yekjapanacaqui tantiyat'cha, jalla tuž: Judas paaz pulsa tanzñiž cjen, Jesusaqui nižquiz mantichizlani pjiizta paazjapa chjulunaca kjayzjapani. Yekjapanacazti zakaz tantiyat'cha, jalla tuž: Judas paaz pulsa tanzñiž cjen, Jesusaqui mantichizlani, pori zoñinacžquiz paaz onanzjapani.

³⁰ Judasqui nii t'anta tanžcu nii orapacha ulanchi'cha. Nii oraqui weenta'cha.

EW MANTITAQUI

³¹ Jalla nuž Judas ulantanaqui, Jesusaqui cjichi'cha:

—Wejrt'cha Yooz cuchanzquita Zoñtqui. Jaziqui wejrqui wejt Yooz tjaata kamaña tjeeznu'cha, honorchiz cjisjapa. Nižaza weriž cjen Yooz Ejpqui honorchiz cjequi'cha.

³² Jalla nižtiquiztan Yooz Ejpqui wejtquiz zakaz honorchiz cjiskataqui'cha. Jalla niiqui wajillaž wataqui'cha.

³³ Weriž pecta jilanaca, tsjii upacamakaz ančhucatan žela'cha. Nekztan ančhucqui wejr kjuraqui'cha. Pero jaknužt tuquiqui zoñinacžquiz chiiučhaja, jalla nižtapachal anziqiu ančhucqui tuž chiyu'cha: Jakziqunt wejr okačhaja, jalla nicju ančhucqui ana oki atas'cha.

³⁴ Wejrqui tsjii ew mantita ortina ančhucqui tuž tjaa-u'cha: “Porapat zuma munazizpan'cha, jalla nii. Jaknužt wejrqui ančhucatan zuma munazituchaja, jalla nižta ančhucqui porapat zuma munazaqui'cha”.

³⁵ Ančhucaz nii ortina mantita jaruž kaman, tjapa zoñinacaqui zizaqui'cha, ančhuc'cha weriž tjaajinta zoñinacapan.

PEDRUQUI K'OTAQUICHA

³⁶ Jalla nekztanaqui Simón Pedruqui nižquiz cjichi'cha:

—Wejt jiliri, ¿am jakzim okaquiya?

Jesusaqui nižquiz kjaazi'cha, tuž cjan:

—Jakziqunt wejr okačhaja, jalla nicju anaž apzñi atas'cha anziqiu. Tii jarquinaqui amqui wejtquin tjonauqui'cha.

³⁷ Pedruqui cjichizakazza:

—Wejt jiliri, ¿kjažtiquiztan anziqiu ana am apzñi atasajo? Anzimi amquiztanami weril ticznas'cha.

³⁸ Jesusaqui tuž kjaazi'cha:

—¿Wejtquiztan ticznasaya? Ultim weraral amquiz cjiw'cha: Ima quer wallpaž kjawan, amqui chjep wilta wejr ana pajñim toscara chiyauqui'cha.

14

ARAJPACHA OJKZ PUNTU

¹ Wejt tjaajinta zoñinaca, Yooz Ejpžquin criyiñchuc'cha nižaza wejtquiz zakaz criya. Ana turwayzi kuzziz cjee.

² Wejt Ejpž arajpach kjuyquin wacchi campu žejl'cha, kamzjapa. Ana nižta žejltasaž niiqui wejrqui ančhucacquiž maztas'cha. Jaziqui wejrqui okačhaja ančhucaltajapa campu tjaczquizjapa.

³ Jalla nuž campu tjaczñi ojkzcu, wital quejpžca'cha ančhuc chjichi, wejtta kamzjapa. Jakziqunt wejr želačhaja, jalla nicju ančhuc zakaz želaqui'cha, weriž chjichtaž cjen.

⁴ Ančhucqui jakziqunt wejr okačhaja, niiqui zizza. Nižaza wejt ojkz jicz zizza.

⁵ Nekztanaqui Tomasqui cjichi'cha:

—Wejt jiliri, jakziquinam am okačhaja, anal zizu'cha wejrnacqui. ¿Kjažt am ojkz jicz zizasaya?

⁶ Jesusaqui nižquiz tuž kjaazi'cha:

—Wejrt'cha jicz cuntitqui, arajpachquin irantizjapaqui. Nižaza wejrt'cha werarapankaztqui. Weriž cjen werar Yooz kamaña zizas'cha. Nižaza wejrt'cha žeti tjaayitqui, Yoozta winaya kamzjapa. Weriž cjenpankaz Yooz Ejpžquin iranti atas'cha.

⁷ Ančhucqui wejr ultim pajtasaž niiqui, ančhucqui wejt Yooz Ejp zakaz pajtasa'cha. Jaztanpacha weriž cjen ančhucqui wejt Yooz Ejp paj'cha, nižaza weriž cjen ančhucqui Yooz Ejp cher'cha.

⁸ Nekztanaqui Felipiqui cjichi'cha:

—Wejt jiliri, Yooz Ejp cherkatalla, nužquiz niimi bastakal cjee'cha.

⁹ Jesusaqui tuž kjaazi'cha:

—Felipe, ančhucatan ažkpacha žejlchinzala. ¿Anapanim wejr pajjo? Jakziltat wejr cher'chaja, nižaza Yooz Ejp cher'cha. ¿Kjažt am nuž cjeejo, “Yooz Ejp cherkata”, cjanajajo?

¹⁰ Wejrmi Yooz Ejpmi tsjii kuzzizza. ¿Jalla nii anam crii amya? Weriž ančhucacqui chiiatqui anaž persun kuzquiztan chiyu'cha, antiz Yooz Ejpž cuntiquiztan chiyu'cha. Yooz Ejpqui wejt kuzquiz žejl'cha. Jalla nižtiquiztan niž cjen obranacal paa-u'cha.

¹¹ Wejrmi Yooz Ejpmi tsjii kuzzizza. Jalla nii criyaquičha, jaziqui. Weriz chiitiquiztan ana criyasaž niiqui, weriz paata obranaca cheržcu mekaz criyalla.

¹² Werarapan ančhucaquiz chiyučha. Jakziltat wejtquiz criican tjapa kuzziz cječhaja, jalla niiqui weriz paata obranaca irataž zakaz paaquičha, nižaza weriz paata obranacquiztan juc'ant pajk obranaca paaquičha, weriz Yooz Ejpžquin ojktiquiztan.

¹³ Wejtquiz tjapa kuzziz cjen, ančhucquičjul mayiztami Yooz Ejpžquiztan mayačhaj niiqui, jalla nii mayiztiquiztan wejrkal čjulumi tjaa-ačha. Jalla nuž tjaa-ačha, weriz cjen Yooz Ejp juc'ant honorchiz cjisjapa. Werjtčha Yooz Majchqui.

¹⁴ Ančhucquičjul wejtquiz tjapa kuzziz cjen čjul mayiztami mayačhaja, jalla nii mayiztiquiztan wejr tjaa-ačha.

ESPIRITU SANTUZ PUNTU

¹⁵ Ančhucquičjul wejtjan tjapa kuztan munazaquičjul niiqui, weriz tjaata ortinanaca cazaquičha.

¹⁶ Wejrquičjul Yoozquiztan mayačha, tsjii tjurt'iziñi cuchanzquizjapa. Nii tjurt'iziñi ančhuca kuzquiz wiñayaž kamaquičha. Yooz Espiritu Santučha niiqui.

¹⁷ Nii tjurt'iziñi werara intintazkataquičha. Ana criichi zoñinacž kuzquiz anaž luzasačha. Ninacaquičjul niijurt'iziñi ana cherasačha, nižaza ana pajasačha. Nii tjurt'iziñi ančhuca kuzquiz žejlčha. Jalla nižtiquiztan niijapa ančhucquičjul. Nižaza wiñaya ančhuca kuzquizpacha želaquičha.

¹⁸ Wejrquičjul ančhuc anal ečača maa ejp wajchallažtakaz. Ančhucaquin wilta tjonučha.

¹⁹ Tsjii upacamakaz, nekztan ana criichi zoñinacaquičjul ana iya wejr cheraquičha. Ančhucquičjul wilta cheraquičha. Nižaza jacatatžcu wiñajjapa žetačha. Weriz žejtchiz cjen, ančhuc zakaz wiñaya žetaquičha Yooztan kamcan.

²⁰ Jacatatžtanaquičjul ančhucquičjul zizaquičha, wejrquičjul wejt Yooz Ejpžtan tsjii kuzzizza. Nižaza ančhucquičjul wejtjan tsjii kuzzizza. Nižaza wejrquičjul ančhucatan tsjii kuzzizza.

²¹ Jakziltat weriz mantita ortinanaca catokčhaja, nižaza cumpličhaja, jalla niiqui ul-timuž wejtjanž munazičha. Nižaza jakziltat wejtjan munazičhaja, jalla nižtan zakaz wejt Yooz Ejpquičjul munazičha. Nižaza wejrzakal nižtan munazučha. Nižaza wejrquičjul niijurt'iziñi kjanacama wejt puntu zizkatačha.

²² Nekztan Judas (anačha Iscariotiquičjul) tuž pewczičha:

–Wejt Jiliri, žkjažtiquiztan amquičjul wejtnacaquizkaz pajkataquičjul, am puntuquiztan zuma zizjapaya? Nižaza žkjažtiquiztan partij zoñinacžquin am persuna ana pajkataquičjul? žkjažtiquiztan nuž cjeej?

²³ Jesusaquičjul tuž kjaazičha:

–Jakziltat wejtjanpan munazičhaja, jalla niiqui weriz chiita taku cazza, nižaza wejt Yooz Ejpquičjul nižtan munazičha, nižaza wejrnacquičjul nižquin tjonučha, niž kuzquiz kamzjapa.

²⁴ Jakziltat wejtjan ana munazičhaja, jalla niiqui weriz chiita taku ana cazza. Weriz chiita takuquičjul anačha wejt persun kuzquiztan. Antiz wejr cuchanzquičjul Yooz Ejpž kuzquiztanpančha weriz chiita takuquičjul.

²⁵ Ančhucatan iya žejlcan ančhucaquičjul tii puntunaca chiyučha.

²⁶ Wejt wiruñ weriz cjen Yooz Ejpquičjul tsjii tjurt'iziñi cuchanzcaquičha. Yooz Espiritu Santučha niijurt'iziñi. Jalla niiqui wejt cuntiquiztanž cjequičha. Niiqui ančhucaquičjul tjapa Yooz puntunaca tjaajnaquičha, nižaza tjapa weriz chiita takunaca cjuñkataquičha.

²⁷ Wejrquičjul ančhuca kuznaca jeejzkatučha. Ančhuca kuznaca jeejzkatžcuquičjul okačha. Zoñinacaquičjul anapanž žoñž kuz nižta jeejzkatasačha. Ančhuca kuznacaquičjul anačha turwaysi cjee, nižaza anačha eksna.

²⁸ Ančhucquičjul weriz chiita nonzinčhucčha: Okačha, nižazal ančhucaquičjul wital tjonučha, jalla nii. Ančhucquičjul wejtjan zuma munaztasaj niiqui, chipchiz cjitasačha, niijurt'iziñi weriz chiitaž cjen. Wejrquičjul wejt Yooz Ejpžquin okačha. Wejt Yooz Ejpquičjul wejtquiztan juc'antičha.

²⁹ Ima ojkan ančhucaquičjul anziquičjul mazinčinčha, jalla nuž wattan wejtquičjul tjapa kuztan criyajo.

³⁰ Tii muntuquičjul žejlñi zoñinacž mantiñi tjončha. Jalla nii anawal mantiñi diablucquičjul Judasquičjul cuchanzquičha, wejr tankatzjapa. Jalla nižtiquiztan tsjii upacamakaz ančhucatan parlučha. Pero nii anawal mantiñi wejtquiztan anačha juc'ant azzizquičjul. Jazic niiqui wejr anaž mantasačha.

³¹ Wejrquičjul wejt Yooz Ejpž mantitacama okačha. Jalla nižtiquiztan tii muntuquičjul žejlñi zoñinacaquičjul zizaquičha, wejrquičjul Yooz Ejpžtan zuma munazičha, jalla nii. Jaziquičjul žaažna. Tekžtan ojkla.

¹ Wejrčha chekan lijitumtqui, tsjii zuma uwas muntiztakaz. Wejt Yooz Ejpqui nii munti cwitiñiqui.

² Nii uwas muntiquiztan skoz uwas piz itzanacaž pajkčha. Jakzilta uwas piz itzat ana čherchiz pajkčhaja, nii ana čherñi itzaqui c'utztaž cjequičha. Nižaza nii munti cwitiñiqui čherñi itzanaca zumpachaž azquichaquičha, juc'ant čheri pookajo. Yooz Ejpčha nii munti cwitiñiqui.

³ Weriz čhiitiquiztan ančhucqui zuma kuzziz cjsinčhucčha.

⁴ Nižaza wejrqui ančhucatan tsjii kuzziztčha. Jalla nižta ančhucqui wejtta tsjii kuzziz cjee. Tsjii muntiquiztan ojkñi piz itzaqui nii muntiquiztan apakta cjequiz niiqui, ana čherchiz cjsnasačha. Antiz nii zuma muntiquiz pajkñi itzanacaz čherasačha. Jalla nižta nii munti itzanaca irataž ančhucqui. Ančhucqui wejtta ana tsjii kuzziz cječhaj niiqui, ana zuma kami atasachha. Antiz wejtta tsjii kuzziz cječhaj niiqui, nekzipanž zuma kamaña nižaza zuma obranaca tjeeznasačha.

⁵ Wejrčha nii zuma uwas muntiztakaztqui. Ančhuczi nii uwas piz pajkñi itzanacažtakazza. Jakziltat wejtta ultimu tsjii kuzzižlaj niiqui, nižaza wejrmi nižtan tsjii kuzziz cjesaž niiqui, jalla ničha ancha zuma kamaña nižaza zuma obranaca tjeezñiqui. Jakziltat wejtta ana tsjii kuzzižlaj niiqui, Yooz yujcquiz ana čjul zum obranacami tjeeznasačha.

⁶ Jakziltat wejtta ana tsjii kuzzižlaj niiqui, Yoozquiztan čhatkataž cjequičha. Nekztanaqui ana zuma kamañchiz cjen kjoñchi itsanacažtakaz cjequičha. Jalla nižtquiztan nii kjoñchi itsanacažtakaz ricujtaž cjequičha ujquin ujzjapa.

⁷ Ančhucqui wejtta tsjii kuzzižlaj niiqui, nižaza weriz tjaajinta takunaca catokaquiz niiqui, nekztan wejtquiztan čjulumiž mayasačha. Nekztanaqui amiž mayiztquiztan tjaataž cjequičha.

⁸ Ančhucqui walja zuma obranaca tjeezñiz cjen, Yooz Ejpqui honorchiz cjequičha. Nižaza ančhuc zuma obranacchiz cjen ančhucqui weriz tjaajinta žoñinacčhucčha, jalla nii kjanapachaž tjeeznaquičha.

⁹ Jaknužt wejt Yooz Ejpqui wejtta zuma munazichaja, jalla nižtapacha wejr ančhucatan zuma munazučha. Weriz ančhucatan munazñiz cjen, jalla niipanž cjuñzna.

¹⁰ Ančhucqui weriz mantita ortinanaca cumplaquičha. Jalla nekztan wejrqui ančhucatan tirapan munaziñil cjeečha. Wejrqui wejt Yooz Epiž mantita ortinanaca cazzinčha. Jalla nižtquiztan niiqui wejtta tirapanž munazichha. Jalla nižta irata ančhucatan wejtta cjequičha.

¹¹ Jalla nii puntunaca ančhucquiz chiyučha, wejtta chica cuntintuž cjisjapa, nižaza ančhuc kuznacami ancha cuntintu cjisjapa.

¹² Weriz mantita ortinaqui tužučha, jaknužt wejr amtan zuma munazitučhaja, jalla nižta irata ančhucqui porapat munazaquičha.

¹³ Jakziltat persunpacha niiz mazinacž laycu ticžaja, jalla niiqui, ancha munaziñi kuz tjeeža. Jalla nižta žoñzquiztan anaž juc'anti munaziñi kuzziz žoñic želasačha.

¹⁴ Ančhucqui weriz mantitacama kamaquiz niiqui, nekzipančha ančhucqui wejtta munaziñiqui.

¹⁵ Tekztan najwcchuc anal ančhucquiz “wejt piyunanacačha” cjican cjesačha. Tsjii piyunaqui čjulut patruna paachaja, ana zizza. Wejrqui tjapa wejt Yooz Epiž čhiitaqui ančhucquiz zizkatchinčha. Jalla nižtquiztan tekztan najwcchuc ančhucquiz “wejt mazinacapančha” cjeečha.

¹⁶ Ančhucqui ana wejr illzinčhucčha. Wejrzi ančhuc illzinčha, nižaza apóstol puestuquiz utchinčha, Yooz taku parli okajo, nižaza walja žoñinaca wejtquiz criiskatajo. Nižaza nii wejtquiz criichi žoñinacaqui wejtquiz tiraž tjurt'auquičha. Wejtquiz kuzziz cjen, čjul mayiztami Yooz Ejpžquiztan mayachaja, jalla nii mayiztaqui tjaataž cjequičha.

¹⁷ Wilta ančhucquiz mantučha:

Porapat zuma munazaquičha.

CRIICHI ŽOÑINACAQUI CHJAAWJKATTA CJEQUICHA

¹⁸ Ana criichi žoñinacaž ančhucatan chjaawjkatan, cjuñzna, jalla nižta ninacaqui wejtta chjaawjkatchičha.

¹⁹ Ana criichi žoñinacž partiraž cjitasaž niiqui, ančhucqui ninacžquiz munazita cjitasačha. Pero wejrqui ančhuc illzinčha. Jalla nižtquiztan anačha ana criichi žoñinacž partira ančhucqui. Nižaza nižtquiztan ančhucqui ana criichi žoñinacžquiz ana munazita cjequičha, nižaza chjaawjtaž cjequičha.

²⁰ Weriz čhiitac cjuñzna. Wejrqui cjichinčha, “Tsjii piyunaqui niiz patrunžquiztan anačha juc'anti”. Ana criichi žoñinacaqui wejtquiz sufriskatchičha. Nižaza ninacaqui

ančucaquız zakaz sufriskataquicha. Weriz tjaajinta taku ana catokchicha. Jaziqui ančucaž tjaajinta taku ana zakaz catokaquicha.

²¹ Pero ana criichi žoñinacaqui ančuca quintra cjequicha, ančucaž wejtquız kuzziz cjen. Nii quintranacaqui wejr cuchanžquini anaž pajča. Jalla nižtiquıztan ančucaquız quintra.

²² Wejrqui ninacžquız Yooz taku mazni ana tjonasaž niiqui, ninacaqui ana nii pajk ujchiz cjtasača. Pero wejrqui wejt puntuquıztan kjanapacha ninacžquız chiichinča. Jalla nižtiquıztan ninacaqui ana čjulumi chiyi atasacha, casticz tjuñquıziqui. Nižaza ninacžquıziqui anaž pertunac želasacha.

²³ Jakziltat wejtquız chjaawjkatčhaja, jalla niiqui wejt Yooz Ejpžquız zakaz chjaawjkatča.

²⁴ Wejrqui ninacž yujcquız walja milajru obranaca paachinča, jakzilta wali žoñžquıztanami juc'anti. Pero anapanča wejtquız criiz pecchicha. Jaziqui pajk ujchiz cjissiča. Jalla nižta obranaca anal paatasaj niiqui, ninacaqui ana nii pajk ujchiz cjtasača. Pero nižta obranaca paachinča. Nižaza ninacaqui weriz paata milajrunaca cherchicha. Jalla nuž cheržcumi, wejtquızimi wejt Yooz Ejpžquızimi chjaawjchipanča.

²⁵ Jalla nuž ninacaž chjaawjtaqui cjiirta Yooz taku cumplissiča. Ninacž liquızpacha cjiirta Yooz takuquı, tuž cjičha: "Wejtquız chjaawjchicha ana čjul razunžtan".

²⁶ Wejrqui Yooz Ejpžquıztan ančucaquız Yooz Espiritu Santo cuchanžcača. Jalla nii Yooz Ejpžquıztan tjonchi Espiritu Santuqui wejt puntuquıztan wereraž intintazkataquicha, nižaza ančhucaltajapa tjurt'izinaquicha. Jalla nii Espiritu Santuqui tjonžcu wejt puntuquıztan zizkataquicha.

²⁷ Primirquıztanpacha ančhucui wejtta chica ojklaychinčucpanča. Jalla nižtiquıztan ančhuczakaz wejt puntuquıztan zizkataquicha.

16

PRUEBANACAZ TJONAQUICHA

¹ Tjapa weriz chiitanacaqui ančucaquız chiichinča, čjul sufrisquıztanami tirapan wejtquin kuzziz cjisjapa, nižaza ana wejtquıztan zarakzjapa.

² Jazta tımpuquız ančhucui ajcz kjuyanacquıztan chjatkatcaž cjequicha. Nižaza tsjii sufris ora tjonaučiča. Jalla nii orauqi jecmit ančhuc conačhaja, jalla nii conni žoñiqui cjequicha, "Wejrčha Yooz sirwintqi. Jalla nižtiquıztan nii žoñi conchinča", nuž cjequicha.

³ Nii ančhuc conni žoñinacami wejtquızimi wejt Yooz Ejpžquızimi anapan pajča. Jalla nižtiquıztan ančhuc conasača.

⁴ Tjapa weriz chiitanacaqui ančucaquız chiichinča, ančucaquız yanapzjapa. Nii sufris ora tjonanaquı jalla tii weriz chiitanaca cjuñznaquicha. Primirquıztanpacha tii sufris puntuquıztan ančucaquız kjanacama ana chiichinča. Ančhucatan kamiñtača. Jalla nižtiquıztan tii sufris puntu ana čhiiz pecchintača.

ESPIRITU SANTUZ PUNTU

⁵ Pero anz wajilla wejr cuchanžquinižquin okača. Ančucaquıztan anaž jakziltami wejr pewcža, "Jakzit okačhaja?" jalla nii.

⁶ Ančhucui ancha llaquita cjissinčhucča, jalla nuž weriz čhiiniž cjen.

⁷ Pero wejrqui werera takunaca chiyuča. Weriz ojktanaquı waliž cjequicha ančhucaltaquı. Wejrqui anal okasaž niiqui, tjurt'iziñi Espiritu Santuqui anaž tjonasača. Pero wejr ojkcquı nii Tjurt'iziñi cuchanžcača.

⁸ Jalla niiqui tjonžcuquı, ana criichi žoñinacž kuzquız ninacž persun uj tantiyaskataquicha. Nižaza Yooziž mantita kamañ puntu tantiyaskataquicha, nižaza nii Espiritu Santuqui Yooz casticz puntu tantiyaskataquicha.

⁹ Espiritu Santuqui ana criichi žoñinacž kuzquız persun uj tantiyaskataquicha, wejtquız ana criichiž cjen.

¹⁰ Nižaza nii Espiritu Santuqui ana criichi žoñinacž kuzquız Yooziž mantita kamañ puntu tantiyaskataquicha, weriz Yooz Ejpžquin ojkičiz cjen. Jalla nižtiquıztan ančhuc zakaz wejr ana iya cheraquicha.

¹¹ Tii muntuquız mantiñi diablui Yooziž yatisinžtača, ana walipanča, nii. Jazic niiqui castictaž cjequicha ultim juyzuquız. Jalla nižtiquıztan Espiritu Santuqui ana criichi žoñinacžquız Yooz casticz puntu tantiyaskataquicha.

¹² 'Iya juc'anti kjažumi ančucaquız čhiizznaca žejlča wejttaqui. Pero anziqui ančhucui anaž nii intintazasača.

¹³ Werar intintazkatni Espiritu Santuqui tjonžcu, ančucaquız tjaajnaquicha tjapa weraranaca. Anaž persun kuzquıztan tjaajnaquicha, antiz Yoozquıztan nonžtanaca tjaajnaquicha. Nižaza tekztan najwccchuc čjulut watačhaja, jalla nii zakaz tjaajnaquicha.

¹⁴ Espíritu Santuqui wejt puntuquiztan ančhucaquiz tjaajnaquičha. Jalla nuž tjaajinñiz cjen wejrqui honorchiz cjeečha.

¹⁵ Tjapa Yooz Epiž chiitaqui wejrpankazza chiiñtqui. Tsjiikaztčha wejrnacqui. Jalla nižtquiztan wejrqui chiichinčha, Espíritu Santuqui wejt puntuquiztan ančhucaquiz tjaajnaquičha, nii.

CUNTINTUZ CJEQUICHA

¹⁶ Upaquiztancama ančhucqui wejr ana cheraquičha. Nekztanaqui tsjii kjaž majquiztan wejr wilta cheraquičha.

¹⁷ Nekztanaqui yekjap tjaajintanacaqui porapat pewcsassičha, tuž cjican:

– ¿Kjažt cjii tjeeo, tuž cjicanajo? “Upaquiztancama ančhucqui wejr ana cheraquičha. Nekztanaqui tsjii kjaž majquiztan wejr wilta cheraquičha”. Nižaza tiiqui “Wejrqui Yooz Ejpžquin okačha”, cjičha. Jalla nuž cjican, ¿kjažt cjii teejo? ¿Čhjul puntut chii teejo?

¹⁸ Ninacaqui cjichizakazza:

– “Upaquiztancama” chiicanaqui, ¿kjažt cjii teejo? Anačha intintazzuca tiiž chiitaqui.

¹⁹ Jesusaqui persun kuzquiz zizatčha, ninacaqui nižquin tsjii pewcz pecatčha, jalla nii. Jalla nekztanaqui Jesusaqui ninacžquiz tuž cjichičha:

– Wejrqui chiichinčha, tuž cjican: “Upaquiztancama ančhucqui wejr ana cheraquičha, nekztanaqui tsjii kjaž majquiztan wejr wilta cheraquičha”. Jalla nuž chiican, ¿kjažt cjii? ¿Jalla niičha ziz pecya?

²⁰ Ultim weraral ančhucaquiz cjiwčha. Ančhucqui llaquita cjequičha, nižaza kaaquičha. Ana criiči zoñinacazti cuntintuz cjequičha. Ančhucqui llaquita kuzziz cjenami, tsjii kjaž majquiztan ancha chipchipcan cuntintuzakaz cjsnaquičha.

²¹ Nonžna. Majtz ora irantžcan tsjaa maatak žonqui janchinaca walja mizkatiñčha. Nekztan wawa majtžcuqui, naa maatak žonqui wawchiz cjen ana janchi mizkattami cjuñiñčha. Wawchiz cjen, ancha cuntintučha naaqui.

²² Jalla nižta irataž ančhucqui anžiqui llaquita kuzzizza. Pero wejrqui am wilta cheračha. Jalla nii oraqui ančhuca kuznaca cuntintuz cjequičha. Nižaza nii ančhuca cuntintu cjis kuzqui anaž jecmi wilta nižta llaquita cjskatasachha.

²³ Nii orquiztan najwchuc ančhucqui zizñi cjiscu wejr anaž iya pewcnaquičha. Ančhucaquiz weraral chiyučha. Wejtquiz tjapa kuztan cjen, ančhucqui Yooz Ejpžquiztan čhjulumi mayachaja, jalla nekztan weriž cjen nii mayiztaqui tjaataž cjequičha.

²⁴ Tii oracama ančhucqui anaž čhjulumi maychinčhucčha wejt tjuuquiz. Mayiza, nekztanaqui tjaataž cjequičha, ančhuca kuz juc’anti cuntintu cjisjapa.

JESUSIZ CHIITANACA

²⁵ Tii oracama wejrqui ančhucaquiz ch’aman intintazzuc takunaca chiichinčha. Tsjii tjuñiqui tjončha. Jalla nii tjuñquiztan nižta ch’aman intintazzuc takunacami anal iya chiyachha. Antiz Yooz Ejpž puntuquiztan jalla niil kjanacama chiyachha.

²⁶ Nii oraqui ančhucqui wejt tjuuquiz čhjulquiztanamiž mayizaquičha. Nekztan wejrqui ančhucaltajapa anal iya maynachha wejt Yooz Ejpžquiztanqui.

²⁷ Ančhucqui wejtjan munazichinčhucčha. Nižaza wejtquiz criichinčhucčha, wejrqui Yooz Ejpžquiztan tjonchi, jalla nii. Jalla nižtquiztan Yooz Ejpčhaca ančhucatan munazičha.

²⁸ Wejrqui Yooz Ejpžquiztan tii muntuquiz tjonchinčha. Nižaza tii muntuquiztan, wejt Yooz Ejpžquin quepačha.

²⁹ Jalla nekztanaqui niž tjaajintanacaqui cjichičha:

– Jaziqiu ultim kjanacama chiichamčha, ana ch’aman intintazzuc takunacžtan.

³⁰ Jaziqiu zizučha, amqui tjapa čhjulumi zizñampančha, nii. Ampankam wejtnaca kuzmi zizza. Jalla nižtquiztan wejrnacqui anal iya pewcnasachha. Nižaza wejrnacqui ultim chekpacha criyučha, amqui Yooz Ejpžquiztan tjonchamčha, jalla nii.

³¹ Jesusaqui ninacžquiz tuž kjaazičha:

– ¿Jaziqiu ančhucqui ultim chekpacha criichinčhucjo?

³² Tsjii ora wajičha. Anzpachachha nii oraqui. Nii oraqui ančhucqui wichanziz cjequičha, nižaza zina zina wichanziz cjequičha. Wejrqui zinalla ectal cjeečha. Pero wejr zina ecta cjenami, wejrqui ana zina cjeečha. Wejt Yooz Ejpž wejtjan chica cjequičha.

³³ Jaziqiu tjappacha tii takunaca ančhucaquiz chiichinčha, wejtquiz kuzziz cjen, cuntintu cjisjapa. Tii muntuquiz žejlcan ančhucqui supraquičha. Walja tjup kuzzizpan cjee. Wejrqui tjapa liju atipchinčha.

¹ Jalla nuž chiižcu Jesuſaquí tsewchuc arajpach kjutñi cherziča. Nekztan Yooz Ejpžtan parličiča, tuž cjan:

—Yooz Tatay. Wejt sufris ora tjonča. Wejrtča am Majchtqui. Wejtquíz honorchiz cjiskatalla. Nekztan wejrqui amquíz juč'ant honorchiz cjiskatača.

² Tjapa žoñinaca mantizjapa, jalla nii poder wejtquíz tjaachamča. Jakziltami amqui wejtquíz intirjichaja wejt parti cjisjapa, jalla ninacžquíz arajpachquin wiñaya kamkatača wejrqui.

³ Amča zinta werara Yoozqui. Nižaza wejrtča Jesucristutqui; amiž cučanžquíta Žoñtča. Wejt parti žoñinacaqui amquízimi wejtquízimi pajča. Jalla nižtiquízitan arajpachquin učumtan wiñaya kamaquiča.

⁴ Tii muntuquíz kamcan amquíz honorchiz cjiskatchinča. Nižaza amiž mantia obranaca žerzinča.

⁵ Jaziquí, Yooz Tatay, amquin wilta quejpžcu, arajpachquin amtan chica želaquiča. Nekztan wejtquíz honorchiz cjiskatalla. Ima tii muntu želan, wejrqui amtan chica honorchiztala. Jalla nižta tuquíta honorchiz irata wilta wejtquíz honorchiz cjiskatalla.

⁶ 'Amqui žoñinaca illzamča, wejt partiquíz cjisjapa. Jalla nii žoñinacžquíz intintazkatchinča am puntuquízitan. Ninacaqui amtača. Nižaza wejt parti cjisjapa wejtquíz tjaachamča. Nižaza ninacaqui am takunac jaru kamča.

⁷ Jaziquí wejt partir žoñinacaqui zizza, tjapa weriž čiiťaqui amquízitan tjonñicamača, jalla nii.

⁸ Amiž čiiťa takunacacama ninacžquíz tjaajinčinča. Jalla nekztan ninacaqui weriž tjaajinta catokčiča. Nižaza weriž tjaajinta žoñinacača zizñipanqui, wejrqui amquízitan tjončinča, jalla nii. Nižaza criichipanča, amqui tii muntuquíz wejr cučanžquičamča, nii.

⁹ Jaziquí ninacžtajapa amquíz mayizuča. Ana criiči žoñinacžtajapa anal mayizuča. Antiz wejt partir žoñinacžtajapakaz mayizuča, amiž illñiž cjen.

¹⁰ Amtača tjapa wejt partir žoñinacaqui. Nižaza wejttača ninacaqui. Jalla ninacaž cjen wejrqui honorchizza.

¹¹ 'Wajilla ana iya tii muntuquíz kamača. Nii wejt partir žoñinacž eclaquiča. Tii muntuquíz tira želaquiča ninacaqui. Wejrzi amquin quejpžcača. Zuma arajpach Yooz Tatay, tii žoñinaca wejtquíz tjaachamča. Jaziquí am aztan tinaca tirapan cwitalla, tsjii kuzziz cjeýajo, jaknužť učumqui tsjii kuzzizlaja, jalla nižta.

¹² Tii muntuquíz tinacžtan kamcan, tii žoñinaca cwitichinča, am aztan. Nižaza tinacžquízitan tsjitsinčinča čjulquízitanami ana kjaž cjisnajo. Tsjiiqui pertissipanča. Jalla nuž pertisjapa nii Judas Iscariotiquí žejltkalča. Jalla nuž cjen tuquíta cjiřta Yooz taku cumplissiča.

¹³ Anziquí wejrqui amquin quejpžcača. Iya tsjii žkolucžtan tii muntuquíz kamcan wejrqui tinacžquíz čiižinuča, wejtquíz criiči žoñinacž wejržtapacha cuntintu cjeýajo.

¹⁴ Wejrqui tinacžquíz am taku tjaajinčinča. Jaknužť wejrqui ana criiči žoñinacž partiquíz ana želatučhaja, jalla nižta irata wejtquíz criiči žoñinacaqui ana žejlča ana criiči žoñinacž partiquíz. Jalla nižtiquízitan ana criiči žoñinacaqui ninacžquíz čhjaawjča.

¹⁵ Amquízitan ana mayizuča, wejt žoñinacž tii muntuquízitan čhjičtaž cjisjapa. Antiz amquízitan mayizuča, ana wal diablužquízitan wejt žoñinaca tsjitsinta cjisjapa.

¹⁶ Jaknužť wejrqui ana criiči žoñinacž partiquíz ana želatučhaja, jalla nižta irata wejt žoñinacaqui ana žejlča, ana criiči žoñinacž partiquíz.

¹⁷ Amiž čiiťaqui ultim werarča. Am takuž cjen wejtquíz criiči žoñinaca zuma kamañchiz cjiskata. Čjul ana zuma kamañquízitanami zarakskata.

¹⁸ Jaknužť amqui tii muntuquíz žejlñi žoñinacž kjutñi wejr cučanžquičhaja, jalla nižaza wejrqui tii muntuquíz žejlñi žoñinacž kjutñi wejt žoñinaca cučnuča.

¹⁹ Wejtquíz criiči žoñinacžtajapa anča kuztanča wejrqui ticzjapa. Nižaza am werar tawk jaru kamtuquízitan tii žoñinaca t'akžinuča amta cjeýajo.

²⁰ Wejrqui tii tekžta žoñinacžtajapa alaja anal mayizuča, antiz tjapa wejtquíz anzimi wiruñami criiči žoñinacžtajapa mayizuča. Tii tekžta žoñinacž Yooz taku paljaytuquízitan yekjapanacaqui wejtquíz criyaquiča. Jalla ninacžtajapa zakaz mayizuča.

²¹ Jalla tjapa ninacžtajapa mayizuča tsjii kuzziz cjisjapa. Yooz Tatay, amqui wejt-tan tsjii kuzzizza. Nižaza wejrqui amtan tsjii kuzziztča. Jalla nižta irata ninacaqui učumnacaquíz tsjii kuzziz čjila. Jalla nuž mayizuča, tii muntuquíz žejlñi žoñinaca criyajo, am wejr cučanžquiči, jalla nii.

²² Amiž wejtquíz tjaata arajpach kamaña, jalla nii kamaña ninacžquíz cjiskatchinca-kazza, tsjii kuzziz cjeýajo, jaknužť učumqui tsjii kuzzizlalaja, jalla nižta.

²³ Jaknužť amqui wejt-tan žejlčhaja, jalla nižtača wejrqui ninacžtan želacha, ninaca tsjii kuzzizpan cjeýajo. Jalla nižtiquízitan žoñinacaquíz zizaquiča, amqui wejr

cuchanžquichiča, jalla nii. Nižaza žoñinacaqui zakaz zizaquiča, amqui ninacžtan munaziča, jaknužt amqui wejttan munazičhaja, jalla nižta.

²⁴ Yooz Tatay, amqui wejtquiz tii žoñinaca tjaachamčha, wejtquiz criyajo. Jalla tinacaqui wejttan chica kamñijapa pecučha, jakziquin wejr želačhaja, jalla nicju. Jalla nužuntu žejlcan tinacaqui wejt arajpach kamaña kjana cheraquiča. Ima tii muntu želan, wejttan munaziñiž cjen amqui wejtquiz nii arajpach kamaña tjaachamčha. Jalla nii kamaña cheraquiča wejt partir žoñinacaqui.

²⁵ Ultim lijitum Tatayi ana criichi žoñinacaqui am anaž pajčha. Wejrzi am pajuča. Nižaza jalla tinacaqui zizza, amqui wejr cuchanžquichamčha, jalla nii.

²⁶ Am puntuquiztan tinacžquiz zumpacha intintazkatchinčha. Nižaza wejrqui tiral intintazkatučha, ninacaž zuma munazizjapa, jaknužt ućhumqui zuma munazičhaja, jalla nižta. Nižaza am puntuquiztan ninacžquiz intintazkatučha, wejr ninacžtan tsjii kuzziz cjisjapa.

18

JESUSAQUI TARAZUNTACHA

¹ Jesusaqui nuž čiižcu niž tjaajintanacžtan ojkchiča. Cedron cjeta k'awž tsjii latuquin ojkchiča. Jalla nicju ch'ojñi muntinaca želatčha. Nijcchuc luzziča.

² Jesusaqui nii yokquin kjaž wilta ajczñipantakalčha niž tjaajintanacžtan. Tarazunñi Judasqui nii yoka pajchiča.

³ Jalla nicju Judasqui zultatunacami, nižaza timplu wijilñi zultatunacami, jalla ninaca chjitchiča. Timplu jilirinacami, fariseo žoñinacami jalla ninacačha nii timplu wijilñi zultatunaca cuchanchiqui. Ninacaqui irantichiča michanacžtan teyanacžtan pajk cuchillunacžtan, nižaza wjajtz carotinacžtan. Jalla nižtanacžtan irantichiča.

⁴ Jesusaqui čjulut watačhaja, jalla nii tjapa zizatčha. Nii tjonchi žoñinacžquiz macjatžcu, pewczičha, tuž cjan:

—¿Jectčha kjur anćhucjo?

⁵ Jalla ninacaqui kjaaziča, tuž cjan:

—Wejrnacqui kjuručha Jesusa, nii Nazaret wajtchiz žoñi.

Jesusaqui tuž kjaaziča:

—Wejrtčha niitqui.

Judas, nii tarazuñi žoñiqui ninacžtan chica tsijtchi želatčha.

⁶ Jesusaž “Wejrtčha niitqui” cjitiquiztan nii tanñi žoñinacaqui wir kjutñi atžcu porapat tewksarascu yokquiz tjojtassičha.

⁷ Jesusaqui wilta pewczičha:

—¿Jectpan anćhuc kjurjo? —cjan.

Ninacaqui wilta kjaaziča, tuž cjan:

—Wejrnacqui kjuručha Jesusa, nii Nazaret wajtchiz žoñi.

⁸ Jesusaqui nekztan zakaz cjichiča:

—Wejrtčha cjichinsala. Anćhucqui wejr kjurčha. Jaziqui tii parti žoñinaca cutznaquiča.

⁹ Jalla nekztan Jesusaž tuqui čhiita taku cumplissičha. Tuquiqui Jesusačha čhiichiqui, jalla tuž: “Yooz Epiž wejtquiz tjaata žoñinacaqui ana tsjiimi pertichinčha”.

¹⁰ Simón Pedruqui pajk cuchillchiztačha. Jalla nii cuchillu jwescu, Pedruqui timplu jilirž piyunž žew cjuñi pootžcu chjajtzinchiča. Jalla nii cjuñi chjajtzinta žoñiqui Malco cjitatačha.

¹¹ Nekztanaqui Jesusaqui Pedružquiz cjichiča:

—Am cuchillu cuchillž žejlžquiz quijtžna. Wejt Yooz Ejpž pinsita kuz jaru wejtlaqui sufristančha. ¿Anaj wejr tii sufrasajo?

JESUSAQUI CHJICHTACHA

¹² Jalla nekztanaqui zultatunacami, zultatž comandantimi, nižaza judío timplu wijilñi zultatunacami, jalla ninacaqui Jesusa tanžcu kjara jweržinchiča.

¹³ Nekztan Anás cjeta jilirž kjuyquiz chjitchiča. Anasqui Caifás ajmuž ejptačha. Jalla nii wata Caifasqui timplu chawjc jiliritačha.

¹⁴ Nii Caifasqui tuquiqui tuž cjitkalčha: “Ućhumnacaltajapa tsjii žoñi ticstančha, tjapa žoñinaca ana conta cjeajo”.

¹⁵ Jesusa chjichan, Simón Pedružtan tsjii tjaajinta žoñžtan Jesusa apziča. Nii tsjii Jesusiž tjaajinta žoñiqui timplu jilirž pajtatačha. Jalla nižtiquiztan Jesusižquiz apžcu nii timplu jilirž patiuquin luzziča.

¹⁶ Pedruqui ana pajtaž cjen zancu eclichiča. Nekztan nii tsjii luzzi tjaajinta žoñiqui ulanžquichiča, naa ulanz zanquiz cwitiñi žonaquin paljayzjapa. Jalla nuž paljayžcu patiuquiz Pedro luzkatchiča.

17 Nekztan naa cwiṭiñi žonqui Pedružquiz pewczinča, tuž cjican:

—¿Anaj am zakaz nii žoñžtan chica ojklajñamtajo?

Nekztan Pedruqui chiichiča:

—Anaž wejr, —cjican.

18 Ch'uñuriž cjen piyunanacami timplu zultatunacami uj taaziča carpunžtan. Nekztan nii uj parazquiz tsijtchi kutnatča. Ninacžtan chica Pedruqui tsijtchi zakaz želatča, kutuncan.

TIMPLU CHAWJC JILIRZQUIN APANTITA

19 Jalla nekztanaqui timplu chawjc jiliriqi Jesusa pecunchiča, niiz tjaajinta žoñinacž puntuquiztanami nižaza niiz persun tjaajintami.

20 Jesusaqui niizquiz kjaaziča, tuž cjican:

—Tjapa žoñinacž yujcquiz tjaajinchinča. Učhum ajcz kjuyquizimi timpluquizimi tjaajinchinča. Timpluquiz tjapa žoñinaca ajczñiča. Ana chjojzaka tjaajinchinča.

21 ¿Kjažtiquiztan nuž wejr pecunjo? Weriz tjaajinta nonžni žoñinacžquiz pewczna, čhjulut tjaajintučaja, jalla nii. Jalla ninacaqui weriz tjaajintanaca zizza.

22 Jalla nuž čhiitan, tsjii nekz tsijtchi žejlñi zultatuqi Jesusa yujcquiz kjaržtan tsjajpchiča, tuž cjican:

—¿Jalla nuž timplu jiliržquiz kjaazkaya?

23 Jesusaqui nii zultatžquiz kjaaziča, tuž cjican:

—Wejr ana zuma čhiituchaj niiqui, čjaknužt cjican ana zuma čhiichintajo? Zumal chiyuča. ¿Kjažtiquiztan am wejr tsjajpjo?

24 Jalla nekztanaqui Jesusa kjara jweržintapacha cuchanchiča Caifás timplu chawjc jiliržquin.

PEDRUQUI K'OTCHICHA

25 Jalla nii oraqui Simón Pedruqui tsijtchi želatča nii ujquiz kutuncan. Tsjii tsjii nekz žejlñi žoñiқи Pedružquiz cjichiča:

—Amqui nii žoñžtan chica ojklajñamča, ¿ana jaa?

Pedruqui toscara čhiichiča:

—Anača wejrqui, —cjican.

26 Jalla nekztanaqui tsjii timplu jilirž piyunaqui Pedružquiz pewczizakazza. Nii piyunaqui nii cjuñi čhajžtinta piyunž familiatača. Jalla tuž cjican pewcziča:

—Nii munti yokquin nii žoñžtan chica am cherchinla, ¿ana jaa?

27 Pedruqui wilta toscara čhiichiča. Jalla nuž wilta toscara chiyan, nii orapacha tsjii querwallpi jora kjawchiča.

PILATUZQUIN ČHJICHTA

28 Jalla nekztanaqui Caifás cjita žoñžquiztan Jesusaqui čhjichtača pajk mantiñiž kjuyquin. Waj kjantatitača. Nii judio žoñinacapacha nii pajk mantiñiž kjuyquin ana luzziča, ninacž cuzturumpi cjen. Jalla nuž luztasaz niiqui, pascua pjijzta čhjeri ana lujltasača.

29 Jalla nižtiquiztan Pilatuqui ninacžquiz paljaji ulanžquichiča, tuž cjican:

—Ančhucqui, ¿čhjul už tii žoñž quintra jwes pecya?

30 Žoñinacaqui tuž kjaaziča:

—Tii žoñiқи ana čhjul pajk ujnacami paatasaz niiqui, anal wejrnacqui tii intirjitasacha.

31 Nekztanaqui Pilatuqui ninacžquiz cjichiča:

—Ančhuckaz čhjicha, ančuca lii jaruz justicia paažca.

Nii žoñinacaqui kjaaziča, tuž cjican:

—Wejtnacalta žoñi conzqui lii quintrača.

32 Niiz tuquiqui Jesusaqui čhiitkalča, persun ticz puntuquiztan, jaknužt ticznačhaja, jalla nii. Nižaza niiz čhiitaqui cumplisnaquiča.

33 Pilatuqui wilta niiz kjuyquin luzquichiča. Jesusa kjawžcu, niizquiz pewcziča, tuž cjican:

—¿Judio žoñinacž chawc jilirimkaya?

34 Jesusaqui niizquiz kjaaziča, tuž cjican:

—¿Amqui jalla nuž persun kuzquiztan wejr pewczya? Už žyekja žoñinaca amquiz nuž pewczna cjichi jaa?

35 Pilatuqui tuž kjaaziča:

—Wejrqui judio žoñt, ¿jaa? Am persun wajtchiz žoñinacami nižaza am persun timplu jilirinacami, jalla nii žoñinacača wejtquin am intirjichiқи. ¿Čhjul uj paachamt, amjo?

36 Jesusaqui nekztan cjichiča:

—Wejtla mantizqui anača tii muntuquiztan. Tii muntuquiztan wejtla mantiz cjesaž niiqui, wejt piyunanaca kichaskatasacha wejt quintra zoñinacžquiz, ana wejr intirjita cjisjapa. Pero wejtla mantizqui anača tii muntuquiztanaqui.

³⁷ Nekztan Pilatuqui cjichiča:

—¿Nižtaqui amčhalani mantiñi jilirinqui?

Jesusaqui cjichiča:

—Jesalla, wejr mantiñi jilirtchiya, am chiča jalla nuž. Tii muntuquiz tjonžcu nassinča, werara puntu tjaajinzjapa. Jakziltat nii werara tjaajinta jaru kamčhaja, jalla niiqui weriž chiita taku nonža.

³⁸ Jalla nuž chiitiquiztan Pilatuqui cjichiča:

—Werara puntuqui, ¿čhjulut neejo?

Jalla nuž pewčzcu Pilatuqui wilta ulanchiča judío zoñinacžquin parli. Ninacžquiz cjichiča:

—Wejrqui tii zoñžquiz ana čjul ujmi jwesi atuča.

³⁹ Pascu pijztiquiz anchucalta tsjii custurumpi žejlča, wejtla tsjii preso tanta zoñi cutzqui. ¿Tii judío wajtchiz chawjc jiliri cutznaquiya? ¿Jalla nuž cutskatz pecya?

⁴⁰ Judío zoñinacaqui kjawchiča:

—¡Tii zoñi ana cutzna! ¡Barrabás cutzna! —cjican. Barrabasqui tsjii anawal tjañi zoñitača.

19

PILATUQUI JESUSA CUTZ PECCHA

¹ Jalla nekztanaqui Pilatuqui wilta kjuylchuc Jesusa majcchiča. Nekztanaqui Jesusižquiz wajtajo mantichiča.

² Nekztan zultatunacaqui ch'apquiztan tsjii pillužtakaz paachiča. Jalla nii paatžtan Jesusiž achquiz tewžinchiča. Nižaza jilirž murat zquiti tjtziča.

³ Jalla nuž paažcu nižquin macjatchiča,

—¡Viva, judío zoñinacž chawjc jiliri! —cjican.

Nižaza Jesusiž yujcquiz kjaržtan tsjajpchiča.

⁴ Nekztan Pilatuqui judío zoñinacžquin wilta ulanžquichiča. Nekztan ninacžquiz cjichiča:

—Cherzna. Ančucaž intirjita zoñi ticju jwescača, ančhuc zumpacha intintazajo. Wejrqui tii zoñžquiz anal čjul ujmi jwesi atuča.

⁵ Jalla nekztan Jesusaqui ulanzkatžquichiča. Ch'apquiztan paataqui achquiz tewžinta, nižaza jilirž murat zquiti tjtžta. Nekztanaqui Pilatuqui ninacžquiz cjichiča:

—Tiiča ančucaž intirjita zoñi.

⁶ Timplu jilirinacami, nižaza timplu wijilñi zultatunacami nii cheržcu, alto joržtan kjawcan, chiichiča:

—¡Cruzquizkaz ch'awczna! ¡Cruzquizkaz ch'awczna! —cjican.

Pilatuqui ninacžquiz cjichiča:

—Way, nižtacž chjiča ančhucqui, nižaza cruzquiz ch'awczca. Pero wejrqui ana čjul ujmi tižquiz jwesi atchinča.

⁷ Nekz žejlñi judionacaqui tuž kjaaziča:

—Wejrnacqui liichiztča. Wejtnaca lii jaru tii zoñic ticstanča, tiiqui “Wejrtča Yooz Majch” cjican ojklaychiž cjen.

⁸ Jalla nii chiita taku nonžcu, Pilatuqui tsjan eksiča Jesusižquiztan.

⁹ Jalla nižtiquiztan Pilatuqui niž kjuya wilta luzziča Jesusižquin pewczjapa. Jalla tuž pewcziča:

—¿Jakziquiztan zoñipant amya?

Jesusazti ana čjulumi kjaaziča.

¹⁰ Jalla nižtiquiztan Pilatuqui nižquiz wilta paljaychiča, tuž cjican:

—¿Kjažtiquiztan am ana wejtquiz kjaazjo? Wejrqui mantasača, am cutzjapa. Nižaza mantasača cruzquiz ch'awczjapa, ¿Jalla nii ana ziz amjo?

¹¹ Jesusaqui nižquiz kjaaziča, tuž cjican:

—Yoozqui amquiz mantiz poder ana tjaatasaz niiqui, amtaqui mantiz poder ana žejltača. Yooz amquiz mantiz poder tjaachiž cjenkaz wejr mantasača. Jalla nižtiquiztan jecčhalaj amquiz wejr intirjichi, jalla ninacača amquiztan juc'ant ujchizqui.

¹² Jalla nuž nonžcu Pilatuqui Jesusa ančaž jaknužumi cutz pecatča pero nii judío zoñinacazti kjawžcan chiichiča, tuž cjican:

—Tii zoñi cutznaquiž niiqui, am zakaz César tsjan chawjc jilirž quintra paaquiča. Jakziltat “Wejrtča chawjc jiliritqui” cjican chečhaj niiqui, César chawjc jilirž quintraž paača.

¹³ Pilatuqui jalla nuž nužcu, zultatu mantichiča, Jesusa zancchuc jwescajo. Zancchuc jwesquichiča Gabata cjita patiuquin. Gabata tuž cjiča, maznacžtan curta, jalla nii. Jalla nicju Pilatuqui jusjiiz julzquiz julziča.

¹⁴ Jalla nii tjuñiqui tjacz tjuñitača jaka pascua pjijztaž cjen. Nižaza taypurutača. Nekztanaqui Pilatuqui nii judío zoñinacžquiz cjichiča:

–Tiiča ančhuca chawjc jiliriqui.

¹⁵ Ninacaqui kjawchiča, tuž cjican:

–¡Ticžla tiiqui! ¡Ticžla tiiqui! ¡Cruzquiz ch'awczla!

Nekztan Pilatuqui ninacžquiz cjichiča:

–¿Kjažt ančhuca tsjan chawjc jiliri ch'awcznas?

Nii timplu jilirinacaqui tuž kjaaziča:

–Wejtnacaltaqui zinta tsjan chawjc jiliri žejlča, César cjitača.

¹⁶ Jalla nekztanaqui Pilatuqui ninacž kuczama Jesusa intirjichiča cruzquiz ch'awcta cjisjapa.

CRUZQUIZ CHAWCTACHA

¹⁷ Jalla nekztanaqui Jesusaqui chjichtatača. Persuna cruza kuzi ojkkatchiča Ach Tsji cjeta tjuuchiz yokquin. Nii yokaqui hebreo tawkquiz Gólgota cjitatača.

¹⁸ Jalla nicju cruzquiz ch'awctatača, nižaza nižtan chica tsjii pucultan zoñinaca yekja cruzanacquiz ch'awctazakaztača, Jesusiž porap kjuttan, Jesusazi ninacž taypiquiz.

¹⁹ Nižaza Pilatuqui tsjii letrero paakatchiča, tuž cjican: “Jesusa Nazaret wajtchiz zoñi. Judionacž tsjan chawjc jiliri”. Jalla nii paažcu Jesusiž ach juntuñ cruzquiz ch'awczinchiča.

²⁰ Chawc wajt žcati Jesusaqui cruzquiz ch'awctatača. Jalla nižtiquiztan walja judío zoñinacaqui niž letrero liichiča. Nii letreruqui chjep tawkquiztan cjižtatača, hebreo tawkquiztanami, griego tawkquiztanami, nižaza latin tawkquiztanami.

²¹ Nii letrero cheržcu timplu jilirinacaqui Pilatužquiz cjichiča:

–Ana cjiira, “Judionacž tsjan chawjc jiliri” cjicanaqui. Antiz cjiira, “Tii zoñiqui cjiča, ‘Wejrtča judionacž tsjan chawjc jiliritqui’”. Jalla nuž cjiira.

²² Pilatuqui tuž kjaaziča:

–Jaknužt cjiirchinžlaja, nužupanikaz cjequiča.

²³ Zultatunacaqui Jesusa cruzquiz ch'awczcu niž zquti ricujchiča. Nižaza pajkpic partiquiz tojziča, nii pajkpaltan zultatunacaqui. Tsjii pajk tol zquitiqui ana ch'ucuchiz watzatača, tsewchuc kozzuc pakjipacha.

²⁴ Jalla nižtiquiztan nii zultatunacaqui porapat kazassiča, tuž cjican:

–Anachum wjajrla. Antiz surtiila. Tii zquitiqui jeczquizkat surti cayačhani nižtaž cjequiča.

Jalla nuž paatan cjiirta Yooz takuqui cumplissiča. Cjiirta Yooz taku tuž cjiča: “Ninacžpora wejť zquti tojziča, nižaza parti zquitquiztan surtiyassiča”. Jalla nuž paachiča nii zultatunacaqui.

²⁵ Jalla nekz Jesusiž cruz žcati tsjitsiñ želatča, Jesusiž maa; nižaza niž maa cullaqui; nižaza María (Cleofas tjuntača); nižaza María Magdalena; nii pajkpaltan želatča.

²⁶ Jesusaqui niž maa cherchiča. Nižaza niž pecta tjaajinta zoñi naaža žcati tsijtchi želatča. Jalla nuž cheržcu Jesusaqui niž maaquiz cjichiča:

–Maataka, tiiča am maati cunta.

²⁷ Nekztanaqui nii tjaajinta zoñžquiz cjichizakazza:

–Taača am maaqui.

Jalla nekztanpacha nii tjaajinta zoñiqui Jesusiž maa ricujžcu persun kjuya chjitchiča.

JESUSAQUI TICZA

²⁸ Jalla nekztanaqui Jesusaqui zizziča, tjapa Yooz Epiž tjaata langznaca liwž žeržtapantacha, jalla nii. Nekztan cjichiča:

–Kjaz kjaral paznuča.

Jalla nuž cjican, cjiirta Yooz takuqui cumplissiča.

²⁹ Jalla nekzi tsjii ojch želatča jar vinchiz. Jalla nekztanaqui kjaz ch'umñi esponja t'awziča nii vinqiz. Nekztan hisopo cjita munti parquiz chjapžcu, Jesusiž atquin ch'ižinchiča.

³⁰ Jesusaqui nii jar vinu licžcu, nekztan cjichiča:

–Tjapaž complissay. –Jalla nuž chiižcu Jesusaqui acha colžcu ticziča.

³¹ Pascua pjijzta tjacz tjuñitača. Niž jakatažu jeež tjuñitača, nižaza chawc pjijzti tjuñitača. Jalla nižtiquiztan judío zoñinacaqui nii cruzquiz ticziž curpunaca anaž nuž tsji-jptapacha chjelinz pecatča. Jalla nižtiquiztan nii judionacaqui Pilatužquin maychiča,

cruzquiz ch'awcta žoñinacž lis tsjij kjolkjolžinajo, apura ticskatsjapa. Nekztan ticžtan cruzquiztan apakznasača.

³² Nekztan Pilatuqui zultatunaca mantichiča, nii cruzquiz ch'awctanacž lis kjolžjapa. Pimir tjañž lismi kjolžinchiča. Nižaza tsjii tjañž lizmi kjolžinchičakazza.

³³ Nekztanaqui Jesusižcu macjatžcu, nii zultatunacaqui cherziča, ticzi, jalla nii. Jalla nižtiquiztan nižž lismi ana kjolkjolžinchiča.

³⁴ Pero tsjii zultatuqui Jesusiž ch'ill kjuttan chjapžinchiča pajk cuchillžtan. Jalla nuž chjaptan ljocmi kjazmi lewchiča.

³⁵ Wejrpacha jalla nii cherchinča. Jalla nižtiquiztan werara ticlarchinča nii puntuquiztan, ančhuczakaz criyajo. Weriž ticlarta takuqui werarapanča.

³⁶ Jalla tii watchi puntunacquiztan cjiirta Yooz takuqui cumplissiča. Cjiirta Yooz takuqui jalla tuž cjiča: "Anaž jakzilta nižž tsjijmi kjoltaž cjequiča".

³⁷ Nižaza tsjii cjiirta Yooz takuqui tuž cjiča: "Ninacaqui ninacaž chjapta žoñiqui cherquiča".

JESUSAQUI TJATZTACHA

³⁸ Jalla nekztanaqui tsjii Arimatea wajtchiz žoñiqui, Josė cjiča, Pilatužquin mayi ojkičiča. Josequi Jesusiž curpu maychiča tjažjapa. Josequi chjojzaka Jesusiž chiita tjaajintanaca catokchiča, ana jecžquizimi mazcu. Parti judiŃo jilirinacžquiztan eksiča. Jalla nuž maytan Pilatuqui permiso tjaachiča. Jalla nekztanaqui Josequi ojkičiča Jesusiž curpu chjichi.

³⁹ Nižaza Nicodemo cjiča žoñiqui Jesusiž curpu tjačžni tjonchiča. Jalla nuž Jesusiž curpu tjačžjapa zjičchiča, tsjii quintala zuma ulurchiz mirržtan aloestan t'ajžta. Nižž tuquiqui Nicodemuqui Jesusižquin wen tjonzičača.

⁴⁰ Josežtan Nicodemžtan Jesusiž curpu tjačžiča. Nižaza nii mirržtan aloestan jalla ninacžtan zuma pañunacžtan Jesusiž curpu capžiča, jaknužutažlaj nii judiŃo žoñinacž cuzturumpi, jalla nuž.

⁴¹ Jesusiž cruzquiz ch'awcta yokquin muntinaca želatča. Nii muntinac yokquiz tsjii ew sepulturu želatča, ana jec ticžimi tjažtatača nii ew sepulturquiz.

⁴² Judionacž jeež tjuñimi pascua pjijžta tjuñimi wajillatača. Pero nii ew sepulturuqui žcatillatača. Jalla nižtiquiztan nii sepulturquin Jesusiž curpu tjačžiča.

20

JESUSAQUI JACATATCHICHA

¹ Semana kalltiznan nii tuming wenz chawjc kjantati Mariá Magdalena sepulturquin ojkičinča. Nekztan cherchinča sepultura pjucžta maz, cjetžtatača.

² Jalla nekztan Mariá Magdalenui zati pariju ojkičinča, SimŃn Pedružquin, nižaza nii Jesusiž pecta tjaajinta žoñžquin. (Jalla niiča tii liwru cjiirni Juan cjiataqui.) Jalla naa Mariiqui ninacžquiz paljaychinča, tuž cjičan:

—Jesús jilirž curpu sepulturquiztan chjichtača. Nižaza jakziquin chjichcu tjažtakazlani anača zizzuca.

³ Jalla nekztanaqui Pedružtan nii tsjii pecta tjaajinta žoñžtan ulanžcu sepultura cheržni ojkičiča.

⁴ Ninacac pucultan juntu zatatča. Nii tsjiiqui tsjan apura zajtchiča Pedružquiztan. Jalla nuž zajtžcu Pedruž tuqui sepulturquin irantichiča.

⁵ Irantižcu sepulturquiz colžcu chercherziča, nii Jesusiž curpu tejlžta pañunaca nekzikaz cherziča. Pero ana luzziča.

⁶ Nižž wiruñ SimŃn Pedruqui irantichizakazza. Jalla niiqui sepulturquiz luzziča. Nižaza niiqui Jesusiž curpu tejlžta pañunaca cherziča.

⁷ Jesusiž acha jeržinta pañu morokpachalla tsjii latu nonžtatača. Parti pañunacžtan anatača juntu.

⁸ Jalla nekztanaqui nii tuqui irantiñi žoñiqui sepulturquiz luzzičakazza. Jalla nii pañunaca cheržcu, criichiča, Jesusa jacatatchi, jalla nii.

⁹ Cjiirta Yooz takuqui Jesusaž ticziquiztan jacatatz puntuquiztan chiiča. Pero Jesusiž tjaajintanacaqui nii cjiirta Yooz taku imaž intintazatča.

¹⁰ Jalla nekztanaqui Pedružtan Juanžtan, jalla nii pucultanaqui kjuya quejpciča.

MARIA MAGDALENAZ QUINTU

¹¹ Maria Magdalena cjitiqui sepultur zancu želatča, kaacan. Jalla nuž kaacan sepultur kjutni colžcu cherzinča.

¹² Nekz sepulturquiz pucultan anjilanaca chiw zquiti cutchi želatča. Jakziquiz Jesusa tjažtatažlaja, jalla nekz julzi želatča. Tsjiiqui ach kjuttantača, tsjiiqui kjojch kjuttantača.

¹³ Nii anjilanacaqui naaquiz pewczicha:

–Cullacalla, ¿kjažtiquiztan am kaa? –cjan.

Naaqui tuž kjaaziča:

–Wejt Jilirž curpu chjitchiča. Jakziquin chjitzakazlani, anal zizi atuča.

¹⁴ Jalla nuž chižcu, kjutzquichinča. Jalla nuž kjutzcu Jesusa tsijtsi cherziñča. Pero Jesus ana pajchinča nii ratu.

¹⁵ Nekztan Jesusaqui naaquiz pewczicha, tuž cjan:

–Cullacalla, ¿kjažtiquiztan am kaa? ¿Jequim kjurya?

Mariiqui persun kuzquiz pinsichinča: “Munti yoka cwitiñi zoñiž caa”, cjan. Jalla nižtiquiztan nižquiz cjichinča:

–Señor, amqui Jesusiž curpu chjitchamžlaj niiqui, maznalla, jakziquin nii curpu cjamta. Nekztan wejrqui niž curpu chjichasača.

¹⁶ Jesusaqui nekztan naaquiz cjichiča:

–¡María!

Mariiqui nuž chiñi nonžcu zumpacha kjutzinča. Nekztan Jesusižquiz chiichinča:

–¡Raboní! –cjan. Nii takuqui hebreo tawkquiz “Maestro” cjiča.

¹⁷ Nekztanaqui Jesusaqui naaquiz cjichiča:

–Wejr cutzna. Wejrqui imazil Yooz Ejpžquin okuča. Jaziqi mazñi okaquiča weriž tjaajinta jilanacžquin. Tuž cjan maznaquiča: “Wejrqui Yooz Ejpžquin okača. Jalla niiqui wejt Ejpča, nižaza ančuca Ejpzakazza. Nižaza niča wejt Yoozqui, nižaza ančuca Yoozqui”.

¹⁸ Jalla nekztanaqui María Magdalenqui Jesusiž tjaajintanacžquin mazñi ojkchinča, tuž cjan:

–Jesusa Jiliri cherchinča.

Nekztan ninacžquin Jesusiž chiitanaca mazzinča.

JESUSAQUI WILTA PARIZICHICA

¹⁹ Tumincuqui jalla nii nooj ween niž tjaajintanacaqui tsjii kjuyquiz želatča. Kjuya zuma chawjchitača, quintra zoñinaca eksu. Jalla nuž cjen Jesusaqui tsijtsi ninacž taypiquiz parizichiča. Nekztan ninacžquiz tsaanchiča, tuž cjan:

–Ančucqui walikaz cjee.

²⁰ Jalla nuž tsaanžcu, Jesusaqui ninacžquiz tjeezicha niž pjetta kjaranacaž, nižaza niž chjapta ch'illa. Jalla nekztanaqui ninacaqui Jesús Jiliri cheržcu, ancha chipchi cuntintutača.

²¹ Jalla nekztanaqui Jesusaqui wilta ninacžquiz tuž chiichiča:

–Walikaz cjee. Jaknužt Yooz Ejpqui wejr cuchanžquichiča, jalla nižta zakaz wejrqui ančucaquiz cuchanžcača.

²² Jalla nuž chiican, Jesusaqui ninacž kjutñiž pjuziča, tuž cjan:

–Ančucqui, Yooz Espiritu Santuž tanzna.

²³ Jakzilta zoñiž ujnaca ančucqui pertunaquiz niiqui, Yooz Epiž pertuntaž cjequiča. Nižaza jakzilta zoñiž ujnaca ančucqui ana pertunaquiz niiqui, ana pertuntaž cjequiča.

WILTA PARIZICHICA, TOMAS ZELAN

²⁴ Nii oraqui nii tuncapan illzta zoñinacžquiztan tsjiiqui ana želatča, Tomás cjita. Niiž tsjii tjuuqui “Pacha” cjitatača. Jesusa tjonz, nii ora ana želatča.

²⁵ Wiruñaqi parti tuncapan tjaajintanacaqui Tomasquiz quint'ichiča, tuž cjan:

–Jesús Jiliri wejrnac cherchinča.

Pero Tomaszi tuž cjichiča:

–Anal criyasača. Wejrqui Jesusiž clawžtan pjetta kjarami ana cheraž niiqui, nižaza nii pjetquiz ana wejt kjar loc'ana chjapznaž niiqui, nižaza niž ch'ill pjetquiz wejt kjarana chjapznaž niiqui, jalla nižtiquiztan anal criyasača.

²⁶ Quinsakal tjuñquiztan nii tjaajintanacaqui wilta kjuyquin želatča, Tomastanpacha. Kjuy chajwcchiž cjenami, Jesusaqui ninacž taypiquiz tsijtsi parizichiča. Nekztan ninacžquiz tsaanchiča, tuž cjan:

–Ančucqui walikaz cjee.

²⁷ Jalla nekztanaqui Tomasquiz paljaychiča, tuž cjan:

–Wejt kjara chernza. Am kjar loc'ana tekz chjapzna. Nižaza am kjara zjijca, wejt ch'illquiz chjapzna. Anapan tira ana criñi kuzziz cjee. Antiz criya, wejtquiz kuzziz cjee.

²⁸ Tomasqui tuž kjaaziča:

–¡Wejt Jiliri! ¡Wejt Yooz!

²⁹ Jesusaqui nekztan nižquiz cjichiča:

–Jaziqi Tomás, amqui wejr cheržcu criichinacaqui, juc'ant waliž cjequiča.

³⁰ Jesusaqui niiz tjaajintanacaž cheran walja milajrunaca paachiča. Parti milajrunacakaz tii libruquiz cjiirtatača.

³¹ Jalla tekz cjiirta milajrunacaqui wejrqui cjiirchinča ančhucqui criyajo, Jesusaqui Cristuča, nižaza Yooz Majchča, jalla nii. Nižaza cjiirchinča, ančhuc Cristužquin kuzziz cjisjapa, arajpachquin wiñaya kamzjapa.

21

JESUSAQUI WILTA PARIZICHICHA

¹ Niiz wiruñ Jesusaqui niiz tjaajintanaczquiz wilta parizichiča, Tiberias kot atquin. Jalla tuž watchiča.

² Nekz želatča, Simón Pedružtan, “Pacha” cjita Tomastan, Caná de Galilea wajtchiz Natanaelžtan, Zebedeož majchnacžtan, nižaza tsjii pucultan iya tjaajintanacztan. Jalla ninaca juntu želatča.

³ Nekztan Simón Pedruqui cjichiča:

–Wejrqui ch’iz tani okuča.

Nii partinacaqui cjichiča:

–Wejrnamci amtan chical okača.

Jalla nekztan kotquin ojkičiča. Nicju tsjii warcuquin luzziča. Pakara langzcanami ana čjul ch’izmi tani atčiča.

⁴ Kjanžcanalla, Jesusaqui kot atquin parizizquichiča. Nii tjaajintanacaqui ana zizatča, nii Jesusažlaj, jalla nii.

⁵ Nekztanaqui Jesusaqui ninaczquiz cjichiča:

–Jilanaca, žana čjul ch’izmi tanchinčhuckaya?

Ninacaqui kjaaziča:

–Ana čjul, –cjican.

⁶ Nekztanaqui Jesusaqui ninaczquiz cjichiča:

–Nii warcuž žew latuquiz ch’iz tanz tjojtzna. Jalla nekz ch’iznaca tanznaquiča.

Jalla nuž tjojtžtiquiztan wacchi ch’iznaca tanziča. Wacchi ch’iznaca tanchiž cjen, wirataž ana warcuquin joozua.

⁷ Nii Jesusaž ancha k’aachita žoñiqui Pedružquiz cjichiča:

–Niiča Jesús Jiliriqui.

Nuž čhiitiquiztan nii orapachalla Pedruqui niiz chjojka zquiti cutžcu, kot kjazquin luzziča, kjaz juntuñ naran Jesusižquin ojkszjapa. Warcuquiz langzcan, ana zquitichiztača, calzunsillo alaja.

⁸ Parti tjaajintanacaqui warcuquiz ojkičiča ch’iz tanzquiz ch’iznaca joočan. Nii ch’iz tanzqui ch’iznacžtan chjiipachatača. Nii joočan kot atquin macjatžquichiča. Ninacaqui kot atquiztan patac metruž jalla nužquinakzatača.

⁹ Nekztanaqui kot atquin irantižcu, warcuquiztan ulanchiča. Nižaza uj paraza cherčiča, ch’iz tjucta. Nižaza t’anta želatča.

¹⁰ Nekztanaqui Jesusaqui ninaczquiz cjichiča:

–Tsjii kjaž ančucaž tanta ch’iznaca zjičca.

¹¹ Jalla nuž maytiquiztan Simón Pedruqui warcuquiz luzcu nii ch’iznaca kot atquin joožquichiča. Nii ch’iz tanzqui pajk ch’iznacžtan chjiipitača, patac pjijska tunca quinsani ch’iznacchiztača. Jalla nuž wacchi tanchiž cjenami, nii ch’iz tanzqui ana wjajrziča.

¹² Jesusaqui ninaczquiz cjichiča:

–Picha. Čheriž lujl-lay.

Ana ultimu pajžcumi anaž jecmi nii tjaajintanaczquiztan pewczni atatča, “¿Ject amya?” cjičanaqui. Ninacaqui “Jesús Jilirizlani” nuž kuzquiz pinsichiča.

¹³ Jalla nekztanaqui Jesusaqui ninaczquin žcatžinžquichiča. T’anta tanžcu, ninaczquiz tjaachiča, nižaza ch’iz zakaz ninaczquiz tjaachiča.

¹⁴ Ticziquiztan jacatatžcu, tii čjep wiltiquiziqui Jesusaqui niiz tjaajintanaczquiz parizichiča.

SIMON PEDRUŽQUIZ CHIICHICHA

¹⁵ Jalla nuž čjeri lujltiquiztan, Jesusaqui Simón Pedružquiz pewcziča, tuž cjican

–Simón, Jonás maati, žamqui tii žoñinaczquiztan wejttan juc’anti munazkaya?

Pedruqui tuž kjaaziča:

–Jesalla, wejt Jiliri. Amqui zizza, wejr am pecuča, jalla nii.

Nekztan Jesusaqui niizquiz cjichiča:

–Wejt žoñinaczquiz arajpach čjeri tjaa. Ninacača uuzanacžtakazqui.

¹⁶ Nekztan Jesusaqui Pedružquiz wilta pewcziča, tuž cjican:

–Simón, Jonás maati, žamqui wejttan zuma munazkaya?

Pedruqui tuž kjaaziča:

– Jesalla, wejt Jiliri. Amqui zizza, wejr am pecuča, jalla nii.

Jesusaqui nižquiz cjichiča:

– Wejt žoñinaca cwita. Ninacača uuzanacažtakazqui.

¹⁷ Nekztanaqui Jesusaqui čhjep wiltiquiziqui Pedružquiz pewcziča:

– Simón, Jonás maati, ¿amqui wejr peckaya? – cjan.

Pedruqui jalla nuž čhjep wilta pewcztiquiztan llaquita cjissiča. Jalla nekztanaqui Pedruqui tuž kjaaziča:

– Wejt Jiliri, amqui tjapa zizñampanča. Amqui zizza, wejr am pecuča, jalla nii.

Nekztan Jesusaqui nižquiz cjichiča:

– Wejt žoñinacžquiz arajpach čhjeri tjaa.

¹⁸ Ultim weraral amquiz chiyuča. Amqui tjowa cjananaqui zquiti cujtžcu jakziquinam ojkz pecčhaja, ojkñamtächa. Pero chawczcutzi, amqui kjaram waaznaquiča. Yekja žoñiqui am zquiti tjutznaquiča, nižaza ana amiž ojkz pecta, jalla nijchuc chjichta cjequiča.

¹⁹ Jalla nuž chiižcu, Jesusaqui mazinčiča, jaknužt Pedro ticstančhalaja, nižaza jaknužt Pedruž cjen Yoozquin honora tjaataž cjechaja, jalla nii. Nekztan nuž chiižcu, Jesusaqui Pedružquiz tuž cjichiča:

– Wejt kamañquizka kama.

TJAAJINTA K'AYI ŽOÑI

²⁰ Nekztanaqui Pedruqui wir kjutñi kjutžcu, Jesusiž tjaajinta k'ayi žoñž kjutñi cherziča. Nii tjaajinta k'ayi žoñiqui pascu pjiztquiz čhjeri lulan, Jesusiž latuquiz želatča. Niiqui Jesusižquiz pewczitača, tuž cjan: “Wejt Jiliri, ¿ject am tankataquiya?”

²¹ Jalla nii tjaajinta žoñž kjutñi cheržcu, Pedruqui Jesusižquiz pewcziča, tuž cjicha:

– Wejt Jiliri, ¿tii žoñžquiz čhjulut wataquiya?

²² Jesusaqui Pedružquiz tuž kjaaziča:

– Wejt tjonzcama tii žoñž žejtz munaž niiqui, ¿čhjulut amquiz importiya? Wejt kamañquizka kama amqui.

²³ Jalla nuž Jesusaž chiiquiztan, tii quintu ojkchiča, nii tjaajinta k'ayi žoñiqui ana ticznaquiča, jalla nii. Pero Jesusaqui ana nižta chiičiča, “Amqui ana ticznaquiča” cjan. Pero Jesusaqui cjichiča, “Wejt tjonzcama tii žoñž žejtz munaž niiqui, ¿čhjulut amquiz importiya?” Jalla nužkaz cjichiča.

²⁴ Wejrpachača nii tjaajinta k'ayi žoñiqui. Wejrqui tii cartiquiz cjjirtnaca maznuča. Nižaza tii liwruquiz cjjiruča. Nižaza criichi žoñinacaqui zizza, weriž mazta taku werarapanča.

²⁵ Nižaza iya juc'anti Jesusaž paatanaca žejlča. Tjapa niž paatanaca cjjirta cjesaž niiqui, nii cjjirta liwrunaca tjapa tii muntuquiz chjijpsnasača. Nižaza iya juc'anti želaquiča. Nužukazza. Amén.

LOS HECHOS DE LOS APOSTOLES

¹ Zuma Teófilo, tuqui wejrqui tsjii libro cjiyrchinča tjapa Jesucristuž puntuquiztan. Jesusiž ojklaytanacami tjaajintanacami cjiyrchinča, nasta tjuñquiztan,

² arajpacha quejpsquiz tjuñicama. Ima arajpacha quejpszan Jesusižtan Espiritu Santužtan apostolonacžquin mantichiča, jaknužt kamz waquizichaja, jalla nii.

³ Jesusaqui ticziquiztan jacatatžcu tii yokquiz iya pusi tunc tjuñi žejlchiča niiz apostolonacžquiz persuna tjon tjonžjapa. Tjon tjonžcan, kjanapacha tjeeziča, “Jacatatchinča”, cjican. Nižaza jaknužt Yooz mantuquiz kamz waquizichaja, jalla nii tjaajinchiča.

⁴ Tsjii nooj niiz apostolonacžtan juntjapžcu, Jesusaqui ninacžquiz chiižinchiča, tuž cjican:

—Anača tii Jerusalén wajtquiztan ulnaquiča. Tekziča tjewznaquiča ančhucqui, wejt Yooz Epiž chiita taku cumpliscama. Niiqui Espiritu Santo cuchanžcaquiča; jalla niicamaž tjewznaquiča. Tuqitan wejrqui anchucaquiz nii puntu paljaychinpantača.

⁵ Juan Bautistaqui kjaztan bautissipanča. Anziqi tsjii kjaž majquiztan ančhucqui Espiritu Santužtan bautistaž cjequiča. —Nuž cjichiča Jesusaqui.

JESUCRISTUQUI ARAJPACHQUIN QUEJPCHICHA

⁶ Apostolonacaqui Jesusižtan juntjapsi cjen, pewcziča, tuž cjican:

—Wejt Jiliri, žanzpacha amqui tii Israel wajtchiz žoñinaca ninacž quintranacžquiztan liwriyaquiya? ¿Tii žoñinaca persuna mantisjapaya?

⁷ Nekztanaqui Jesusaqui ninacžquiz kjaaziča, tuž cjican:

—Yooz Ejppankazza timpunacaqui mantiñiqui, čjulorat tii tii watačhaja, jalla nii. Nižaza Yoozqui ančhucaquiz ana zizkatž munča, čjulorat tii Israel žoñinaca liwriita cječhaja, jalla nii.

⁸ Pero Espiritu Santuž ančhuca kuzquiz luztan, ančhucqui tjup kuzziz cjequiča. Jalla nekztan ančhucqui wejt puntuquiztan paljayñi ojklayaquiča Jerusalén wajt yokaran, nižaza Judea yokaran, nižaza Samaria yokaran, nižaza tjapa kjutñi. —Jalla nuž cjichiča Jesusaqui.

⁹ Nekztan apostolonacaž cheran Jesusaqui ninacž taypiquiztan tsewcchuc waytissiča. Yooz Epiž chjichtatača arajpacha. Nužquiz tsjir taypiquiz katchiča Jesusaqui. Ana iya tjenchiča.

¹⁰ Nekztanaqui tsewcchuc cheksnan, pucultan chiw zquitchiz žoñinacažtakaz jeczquichiča ninacž žcati.

¹¹ Nii pucultan anjilanacaqui tuž cjichiča:

—Galilea žoñinaca, žkjažtiquiztan ančhucqui tsewcchuc chekžqui? Jesusaqui ančhucaquiztan arajpacha chjichtača. Pero tsjii nooj nii Jesusapacha wilta tii muntuquiz quejpscaquiča, jaknužt tsjir taypiquiz katčhaja, jalla nuž tsjir taypiquizzakaz jeczcaquiča. Nuž tjonaquiča. —Nuž cjichiča anjilanacaqui.

MATIASQUI ILLZTA APOSTOL CJISSICHA

¹² Jalla nekztanaqui apostolonacaqui Olivos cjita curullquiztan chjiwžqužcu, Jerusalén watja quejpcchiča. Jerusalén watjaqui nii curullquiztan žcatitača, jeejz tjuñquiz jaknužt judiuz li jaru ojkw waquizichaja, jalla nužullquin ojztača.

¹³ Jerusalén watja irantižcu apostolonacaqui alujta kjuya luzziča; tsewcta altu pisuquin alujtatača. Nii apostolonacaqui tinacatača: Pedrotača, Jacobotača, Juantača, Andreštača, Felipitača, Tomastača, Bartolomitača, Mateotača, Jacobo cjita Alfeož majčhtača, Simonatača (niiqui cananista cjita partir žoñitača), nižaza Judas cjita Jacobož majčhtača. Jalla ninacatača apostolonacaqui.

¹⁴ Tjapa ninacaqui tsjii kuzziz Yoozquin mayizizjapa ajcajczñipantača. Ninacžtan chica želatča Jesusiž lajknacžtan, Jesusiž maatan, nižaza yekja maatakanžtan. Tjappacha Yoozquin mayizican želatča.

¹⁵ Tsjii noojiqui jalla nuž chicapacha želan Pedruqui tsjitsiča, nii Yoozquin criči žoñinacž taypiquiz. Nii oraqui tsjii patac paatuncani nužquintakalča nii criči žoñinacaqui. Pedruqui ninacžquiz cjichiča:

¹⁶ —Jilanaca, cullaquinaca, Judasqui Jesusa tanñi žoñinaca irpichiča. Tuqitan jalla nii Judas puntuquiztan Espiritu Santuqui Davidžquiz mazinchiča, Yooz tawk liwruquiz cjiyrta cjsjapa. Nižaza nii Espiritu Santuž mazintaqui cumplispantača. Jaziqi cumplis-siča.

¹⁷ Judasqui učhum partiquiztantača. Nižaza Yoozta langžñiquiz uchtatača.

¹⁸ Nii anawali paañi Judasqui Jesusa tarasunta paaztan tsjii yoka kjaychiča. Nekztan, kozzuc achchiz tjojtscu, walu pjatsi ticziča.

¹⁹ Tjapa Jerusalén wajtchiz zoñinacaqui nii Judas quintu zizza. Jalla nii quintu nonžcu, Judas kjayta yoka tjuuskatchičha, Acéldama cjican. Acéldama tjuuqui ninacž tawkquiztan “Ljoc Yoka” cjiča.

²⁰ Judas puntuquiztan Salmos cjita liwruquiz tuž cjiirtača: “Niiz kjuyaqui jaytitaj cjila. Nižaza ana jecmi nii kjuyquiz kamla”. Salmos cjita liwruquiz tuž zakaz cjiirtača: “Niiz puestuquiz yekja uchtaj cjila”.

²¹ Pedruqui tira chiichiča, tuž cjican:

—Jalla nii Yooz takuž cjen učhumnacquiztan tsjiiqui illza, Judas puesto tanzñijapa. Jaziqui nii puesto tanzñi zoñiqui tjapa wejrnačaž Jesusižtan ojklajta timpu cumpant'ichi zoñinacžquiztan illzta cjistanča.

²² Juanž bautis timpu jalla nijctanpacha Jesusa arajpacha ojkcama, jalla nii timpu cumpant'ichi zoñinacžquiztan nii zoñiqui illzta cjistanča. Nekztan nii zoñiqui wejtnacatan chicapacha cjequičha, Jesusaž jacatatta puntu paljayzjapa. —Nuž cjichiča Pedruqui.

²³ Nekztanaqui pucultan zoñi illsiča, tsjiiqui Judas puesto tanzñijapa. Tsjiiqui José cjitatača, nižaza Josiqui Barsabás cjitazakaztača. Nižaza Josiqui Justo tjuuchizzakaztača. Tsjiizuñqui Matias cjitatača.

²⁴ Nekztan nii ajczñi zoñinacaqui mayizichiča, tuž cjican:

—Jesús jiliri, amqui tjapa zoñinacž kuz zizza. Jaziqui tii pucultiquiztan amiž illzta apóstol tjeznalla.

²⁵ Niiqui Judas puestuquiz uchtaz cjequičha, amquin sirwiñiz ojklajzjapa. Judasqui nii puestuqui pertichiča anawali uj paažcu. Jaziqui infiernuquin ojkcichiča. Jalla nuž niiztaqui waquizichiča. —Jalla nuž mayizichiča.

²⁶ Nekztanaqui ject Jesusiž illzta, jalla nii zizjapa, zurtiassiča, nii pucultiquiztan jakzilitizquiz nii zurti cayachaja, jalla nii. Jalla nuž zurtiascu, nii zurtiqui Matiasquiz caychiča. Jalla nekztan Matiasqui nii parti tuncaman illzta apostolonacžtan juntu cjiissiča. Lijitum apóstol nužquiz cjiissiča.

2

YOOZ ESPIRITU SANTUQUI TJONCHA

¹ Pentecostés cjita pjijsta tjuñquiz tjapa Jerusalén žejlñi criichi zoñinacaqui juntassiča tsjii kjuyquizkaz.

² Tiripintit tsewtan tsjii chawc tjamž joražtakaz nonziča. Tjapa nii kjuya zmali kjaazkatchičha.

³ Jalla nekztanaqui uj lastakaz jeczquichiča zapa mayni ninacž juntuñcama t'akžta, yekja yekja. Jalla nuž zapa maynižquiz nii ujnacaqui želatča.

⁴ Jalla nuž tjonžcu Espiritu Santuqui tjapa ninacžquiz luzziča. Nekztan ninacaqui parijunaca yekja yekja taku chiichičiča, jaknužt nii Espiritu Santuž chiikatčhaja, jalla nii.

⁵ Nii timpunacaqui Jerusalén wajtquin wacchi judío zoñinaca kamñi želatča, ninacž cuzturumpi jarupan paañi. Nii judío zoñinacaqui tjapa kjuttan ajczquichitača.

⁶ Jalla nii suyniñi jora nonžcu, zoñinacaqui juntassiča. Zapa mayni nii zoñinacaqui persun taku nonziča. Nekztan ana tantiichuca, čjulut watachaja, nii.

⁷ Jalla nižtiquiztan ninaca ancha kuz turwaysi cjiissiča. Ispantichi ninacpora parlasiča, tuž cjican:

—¿Tjapa nižta chiichiñinacaqui anaj Galilea wajtchiz zoñinacajo?

⁸ Zapa mayni učhum persun takuž nonža. ¿Jaknužupan teejo? —Jalla nuž cjichiča.

⁹ Nekz želatča Partia zoñinaca, nižaza Media zoñinaca, nižaza Elam zoñinaca, nižaza Mesopotamia zoñinaca, nižaza Judea zoñinaca, nižaza Capadocia zoñinaca, nižaza Ponto zoñinaca, nižaza Asia yokchiz zoñinaca,

¹⁰ nižaza Frigia zoñinaca, nižaza Panfilia zoñinaca, nižaza Egipto zoñinaca, nižaza Africa zoñinaca, nii Afric yokaqui Cirene yokž nawjkuñtan. Nižaza Roma wajtquiztan tjonñi zoñinaca želatča. Yekjapanacaqui judío maa ejpchiz zoñinacatača. Yekjapanacaqui ana judío maa ejpchiz cjenami judionacž cuzturumpi paañi zoñinacapantača.

¹¹ Nižaza želatča Creta wajtchiz zoñinaca, nižaza Arabia zoñinaca. Nii zoñinacaqui parlassičha, tuž cjican:

—Wacchi watjanacchiz zoñinacala učhumtanaqui. Pero zapa mayni učhum persun takunacaž nonžla. ¡Nii tjapa takunacžtan chiiñinacaqui Yooziž ispanlichuca paatanaca quint'ila!

¹² Jalla nuž chiichiiñi nonžcu tjappacha isphantichicha. Kuz turwaysi cjiŝŝicha. Nekztan pewsassiĉha, tuž cjan:

—Nii puntuquiztanac, ħkjažt cjeejo?

¹³ Yekjapanacaqui iñarchiĉha, tuž cjan:

—Aaaa, ninacaqui licchikazza.

PEDRUQUI ZOÑINACŽQUIZ PALJAYCHICHA

¹⁴ Nekzpacha tsijtsi želatĉha nii tuncapan illzta apostolonaca. Jaziqi Pedruqui altu joržtan paljaychicha, tuž cjan:

—Judea yokquiz kamñi žoñinaca, nižaza Jerusalén wajtquiz žejlñi žoñinaca, wejt taku zumpachaž nonžna. Chjuluzłaja, jalla niil kjanzt'aĉha.

¹⁵ Anĉhucqui “Tii žoñinaca licchikaz” cjan pinsiĉha. Pero tii žoñinacaqui anaĉha licchi. Anzic wenzłakaĉha.

¹⁶ Anziqi Joelž cjiŕta Yooz taku cumplissa. Nii Joelqui Yooz cuntiquiztan mazinchiĉha, tuž cjan:

¹⁷ “Yoozqui tuž cjiĉha, Tii timpu tucuzinžtan wejrqui tii muntuquiz žejlñi žoñinacžquiz wejt Espiritul tjaaĉha. Wejt Espiritu Santuž kuzquiz luzziz cjen, anĉhuca maatinacaqui lucmajch cjiñi tjunmata cjiñi wejt takuž parlaquiĉha. Nižaza Espiritu Santuž cjen tjtjowaqui visionanaca cheraquiĉha. Nižaza chawc chawcwanacaqui wiyquin chjuuznaquiĉha.

¹⁸ Jalla nii timpuquiz wejt sirwiñinacžquiz luctaka cjiñi maataka cjiñi wejt Espiritu cuchanžcaĉha. Nii Espirituž cjen, ninacaqui wejt takuž parlaquiĉha.

¹⁹ Tsewc arajpachquinami tii yokquizimi wejrqui isphantichuca siñalanaca tjeeznaĉha, ljocnaca, ujnaca, tsokchi tsjirinaca, uj žketižtakaz, jalla nuž.

²⁰ Ima Jesucristo Jiliriz tjonan, tjuñiqui zumchi cjisnaquiĉha. Nižaza jizmi ljocžtakaz cjisnaquiĉha. Jalla nižtanaca watan, wajillaž Yooz chawc tjuñiqui tjonaquiĉha, Yooz wali azi tjeežñi tjuñi.

²¹ Nii timpuquiziqui jakziltat liwriita cjisjapa Yooz Jiliržquin mayiziĉhaja, jalla niiqui liwriitaž cjequiĉha”.

Jalla nuž cjiŕchiĉha Joelqui.

²² ‘Israel wajtchiz žoñinaca, wejt taku nonžna. Jesusaqui Nazaret wajtchiz žoñitaĉha. Anĉhuca watjanacquiz ojklaycan Jesusaqui Yooz aztan isphantichucanacami, milajrunacami, siñalanacami, jalla ninaca tjeeziĉha. Nii tjeežta obranaca anĉhucqui zizza. Jalla nii obranacaqui kjanapacha tjeeziĉha, Jesusaqui Yooz Epiž cuchanžquita žoñiŕpankazza, jalla nii.

²³ Jalla nuž pajk obranaca paachiž cjenami anĉhucqui Jesusa conkatchinĉhucĉha. Nekztanaqui anĉhucqui uj paañi žoñinacžquiz Jesusa intirjichinĉhucĉha cruzquiz ch'awczjapa. Tuquitanpacha Yooz Ejpqui jalla tižtanaca watzpan zizatĉha. Nižaza niž muntacama tii watzjapa mantichiĉha.

²⁴ Anĉhucqui Jesusa conkatchinĉhucĉha. Yooz Ejpzi Jesusa jacatatskatchiĉha. Anawal ticzquiztan liwriichiĉha. Nii ticzqui Jesusižquiztanaqui anapantaĉha atipchuca.

²⁵ Tuqui ažk watanaca David cjeta jiliriqi Jesusiž puntu cjiŕchiĉha tuž cjan:

“Yooz Jiliri wejtan chica željñiŕpanĉha. Jalla nuž wejt kuzquiz Yoozquin zint'iñiŕpanĉha. Yoozqui wejt žew latuquiz žejlĉha, wejr yanapzjapa, nižaza wejr ana ĉjulquiztanami eksnajo.

²⁶ Jalla nižtiquiztan wejt kuzqui wali cuntintutĉha. Chipchipcan wejt tawkžtan Yoozquin honorat tjaa-uĉha. Ticz cjenami, Yoozquin kuzziztĉha, Yooz Ejpqui wejr jacatatskataquiĉha.

²⁷ Yooz Tata, amqui ticzi žoñinacžtan wejt alma anam ecaquiĉha. Wejrqui am litjum sirwiñi žoñitqui. Jaziqi wejt curpuqui anam ecaquiĉha sipulturniž mokajo.

²⁸ Nižaza wejtquiz arajpach kamaña tjaajinĉhamĉha. Tii muntuquiz amtan chica kamcan anĉha cuntintul cjeeĉha”.

Jalla nuž Jesusiž puntuquiztan cjiŕchiĉha Davidqui.

²⁹ ‘Jilanaca, uĉhum David cjeta tuquita atĉi ejpž puntuquiztan kjanapacha intintiskats pecuĉha. David jiliriqi ticziĉha. Nižaza tjattataĉha. Anzicama niž sipulturniž uĉhum yokquiz žejlĉha.

³⁰ Davidqui illztataĉha Yooz taku chiiñijapa. Yooz Ejpqui nižquiz juramintužtan compromitalĉha tuž cjan: “David, tsjiiqui am majchmaatquiztan (Cristo cjeta) pajk jiliri cjequiĉha. Niiqui mantiz puestuquiz uchtaž cjequiĉha, tii wajtchiz žoñinaca mantizjapa.” Jalla nuž Yoozqui Davidžquiz compromitchiĉha.

³¹ Jalla nii zizcu, Davidqui tuquitanpacha Cristuž jacatatz puntuquiztan chiichiča, tuž cjan: “Cristuž almaqui ticzi zoñinacžtan anaž ecta cjequiča. Nižaza Jesucristuž curpumi anaž mokaquiča.” Jalla nuž Cristuž puntuquiztan chiichiča.

³² Jaziqui Yooz Ejpqui nii Jesucristo jacatatskatchiča. Jacatattan, wejrnapachača Jesucristo chercintiqui. Jaziqui tisticu cjan, nii puntu weraral chiyasatha.

³³ Jesucristuqui jacatatzcu, Yooz Ejpž zew latuquiz walja honorchiz cjissiča, Yooz Ejpžtan chica mantiñi. Nižaza Yooz Epiž tuquita chiita tawk jaru Jesucristuqui Espiritu Santo zoñinacžquiz cuchanzquichiča arajpachquiztan. Nii Espiritu Santuž tjonchiž cjen tii ančucaž chertanacami nonztanacami watchiča.

³⁴ Davidqui persun puntuquiztan ana chiichiča. Davidča tsewc arajpachquin ana ojkchiqui, Yooztan mantizjapa. Davidpachača tuž cjichiqui: “Wejt Yooz Ejp Jiliriqui wejt Yooz Majch Jiliržquiz chiichiča: ‘Honorchiz cjisjapa, wejt zew latuquiz julzna wejtan chica mantizjapa.

³⁵ Tsjii noojiqui am quintra zoñinaca k’ala atipžtaž cjequiča. Am kjojch koztan tjecžtažtakaz cjequiča. Jalla nii oracama wejt zew latuquiz julzna’”.

³⁶ ‘Ančhucqui Jesucristo cruzquiz ch’awcchinčhucča. Pero anziqumi Yooz Ejpqui tii Jesusa tsjan chawc jiliri utchiča zoñinaca liwriizjapa. Jalla nuž intintiñi waquizila tjapa Israel wajtchiz zoñinacaqui. Ultim weraracha tii takuqui. —Nuž cjan Pedruqui paljaychiča.

³⁷ Jalla nuž nonžcu nii zoñinacaqui persun kuzquiz ancha zint’ichiča. Jalla nižtiquiztan Pedružquizimi parti apostolonacžquizimi pewcziča, tuž cjan:

—Jilanaca, ¿kjažt cjisnaqui? ¿čhjulut wejrnap paaqui?

³⁸ Nekztanaqui Pedruqui kjaaziča, tuž cjan:

—Ančhucqui persun uj pajžcu, kuz campiya. Nekztanaqui Jesucristuž tjuuquiz bautistaž cjee. Jalla nekztanaqui ančuca ujnaca pertuntaž cjequiča. Nižaza Yooz Espiritu Santuqui ančuca kuzquiz nužukaz luzaquiz.

³⁹ Nii compromitta Espiritu Santuqui tjaataž cjequiča ančucaquizimi ančuca maatinacžquizimi, ažkquin wajtchiz zoñinacžquizimi, nižaza tjapa učum Yooz Jiliriz kjawžta zoñinacžquizimi. Jalla ninacžquizimi Yooz Espiritu Santo tjaataž cjequiča. —Jalla nuž kjaaziča Pedruqui.

⁴⁰ Wacchi takunacžtan Pedruqui ninacžquiz chiizinchiča, tuž cjan:

—Liwriita cjis waquiziča, Cristuž quintra uj paañi zoñinacžtan ana casticta cjisjapa.

⁴¹ Jalla nekztanaqui walja zoñinacaqui Pedruž chiita taku tjapa kuztan catokchiča. Jalla nuž catoktiquiztan tjapa ninaca bautistaž cjissiča. Nii noojiqui tsjii čhjep warank zoñinacaqui yapžquichiča parti Yoozquin criichi zoñinacžquin. Jalla nuž mirchiča.

⁴² Tjapa nii criichi zoñinacaqui apostolonacaž tjaajintanacžquiz walja tjapa kuztača. Ninacaqui tsjii kuzzizpan cjissiča. Chica juntasñitača Yoozquin mayizizjapa, nižaza čjjeri lujljzapa.

CRICHI ZOÑINACŽ KAMTA

⁴³ Apostolonacaqui walja milajrunacami siñalanacami paachiča. Jalla nuž paatiquiztan tjapa zoñinacaqui ispantichiča.

⁴⁴ Tjapa Yoozquin criichinacaqui juntu kamchiča. Nižaza tjapa ninacž cusasami tsjiuquiz juntapñitača, zapa maynižquiz tojunzjapa.

⁴⁵ Parti cusasa tuyžcu, nii paaz tojunñitača, ana želinchiz zoñinacžquiz.

⁴⁶ Zapuru timpluquiz ajczñipantača Yoozquin sirwizjapa. Nižaza criichi zoñinacž kjuyquiztan kjuya okatča, juntu čjjeri lujljzapa. Humilde kuzziz zuma cuntintu lujlñipantača.

⁴⁷ Nižaza Yoozquin honora tjaañipantača. Jalla nuž nii criichinacaž zuma kamtiquiztan parti zoñinacaqui ninaca zuma rispitiñitača. Zapuru zoñinacaqui criichiča, liwriita cjisjapa. Nekztan parti criichi zoñinacžquiz juntassiča. Jaziqui Jesucristo Jiliriqui criichi zoñinaca mirkatchiča.

3

ZUCH ZOÑI ČJETINTA

¹ Tsjii noojiqui majñakak ora, Pedružtan Juanžtan pucultan timplu kjutñi yawchiča. Nii oraqi Yoozquin mayiziz oratača.

² Nicju tsjii zuch zoñi želatča. Zucha nassipantača. Zapuru timpluquin chjitzatača. Hermosa cjita timplu zanquiz žejlñitača, timplu luzñi zoñinacžquiztan paaz tomangzjapa.

³ Nii zuch zoñiqui Pedružtan Juanžtan timplu luzñi cheržcu, paaz tomangziča.

⁴ Nekztanaqui Pedružtan Juanžtan nii zuch zoñi kjutñi cherziča. Nekztanaqui Pedruqui cjichiča:

—Wejtnaca kjutni cherzca.

⁵ Jalla nuž čhiitiquiztan nii zuch zoñiqui “Paaz onaá” cjican cherziča.

⁶ Pedruqui cjichiča nekztanaqui:

—Anaž wejta paaz žejlča. Antis wejta Jesucristuž azi žejlča, jalla niiztan yana-pasača. Jesucristo cjita Nazaret wajtchiz zoñž aztan amquiz cjiwča, tsijtsna. Oka.

⁷ Nižaza Pedruqui nii zuch zoñž žew kjarcu tanžcu, tsijtskatchiča. Nii tsijtskatan nii orapacha niiz kjojanacaqui tsijtsni cjissiča.

⁸ Jalla nekztanaqui nii zuch zoñiqui layžcu tsijtsiča, nižaza ojklayni cjissiča. Nekztanaqui Pedružtan Juanžtan chica timplu luzziča, ojkan, laylaycan, nižaza Yooz tjuu alawazcan.

⁹ Tjapa timpluquiz žejlni zoñinacaqui nii zuch zoñi ojklayni cherchiča, nižaza Yooz tjuu alawazni nonziča.

¹⁰ Nekz žejlni zoñinacaqui nii zoñi pajchiča. Nii zoñipacha zapuru Hermosa cjita timplu zanquiz žejlitača, paaz tomtomangžcan. Nii čhjetinta zoñi cheržcu ispantichi cjissiča.

PEDRUZ PALJAYTA

¹¹ Nii čhjetinta zoñiqui Pedružquiztan Juanžquiztan anaž eclawk cjetča. Ninaca Portal de Salomón cjita timplu kjuyquiz želatča. Jalla nijchuc tjapa nii timpluquiz žejlni zoñinacaqui zati pariju juntassiča. Ispantichiča.

¹² Nekztanaqui Pedruqui nii juntasquini zoñinaca cheržcu, ninacžquiz paljaychiča, tuž cjican:

—Israel wajtquiz zoñinaca, ¿kjažtiquiztan ančhucqui ispantiya? ¿Kjažtiquiztan ančhucqui wejrnaca chekžjo? Wejrnacpacha anača tii zoñi čhjetinchintqui. Anal wejtnaca aztan ojklayskati achinča. Nižaza wejrnacaž persuna zuma kamtiquiztan anal tii zoñi čhjetinchinča.

¹³ Antiz Yoozkaz tii zoñi čhjetinchiqiu. Nii Yoozqui učum tuquita ejpnacž Yoozza, Abraham, Isaac, Jacobo, ninacž Yoozza. Jalla nii Yoozpaccha niiz Majch Jesusižquiz pajk honorchiz cjiskatchiča. Nii Jesusaž cjen, tii zoñic žejtchiča. Ančhuczti jilirinacžquiz nii Jesusa intirjichinčhucča. Nekztanaqui Pilatuž cutz tantiižtan, ančhucqui ana cutskatz pecchinčhucča. “Tiiqui anapanča Yooziž cuchanžquitaqui” cjican čhiichinčhucča.

¹⁴ Jesusaqui ana čhjul ujhizza. Yooz Ejpž kuzcama kamniča. Nii Jesusa cuts cjenpacha, ančhucqui tsjii pajk ujhiz zoñi cutskatz pecchinčhucča.

¹⁵ Jalla nuž nii žeti tjaañi Jesucristo conchinčhucča ančhucqui. Yooz Ejpzi Jesusa ticztiquiztan jacatatskatchiča. Jalla nii puntuquiztanaqui wejrnacpachacha cherchintqui. Jaziqui nii puntu zuma werara chiyasača.

¹⁶ Tii Jesucristuča azzizqui. Jesucristužquiz tjapa kuztan cjican, wejrnacqui Jesucristuž aztan tii ančucaž pajta zoñi čhjetinchinča. Jesucristužquin tjapa kuzziz cjen tii zoñiqui zumpacha žejtchiča. Jalla nuž ančhucqui tjappachaž cheržcu, nayaquiča.

¹⁷ Jaziqui jilanaca, ančhucmi ančuca jilirinacami Jesusa conchinčhucča. Jalla nii ora ančhucqui čhjulut paatčhaja anaž zizatča.

¹⁸ Jalla nuž cjenami Yoozqui niiz persun taku cumpliskatchiča. Tuquiqui Yoozqui tjapa niiz taku čhiñi profetanacžquiz čhiikatchiča, tuž cjican, “Yooz cuchanžquita Cristuqui sufristanča”. Nii takuqui cumplissiča.

¹⁹ Jaziqui ančhucqui Yoozquin kuzziz cjee, persun uj pajžcu. Yoozquin quejpžca, ančuca ujnaca pertunta cjisjapa. Jalla nekztanaqui Yooz Jiliriqiu ančuca kuznaca cuntintu cjiskataquiča.

²⁰ Nižaza Yooz Jiliriqiu wilta cuchanžcaquiča Jesucristo ančhucalta uchta liwriiñiqui.

²¹ Ima Jesucristuž wilta tjonan Yooz Ejpqui tjappacha azquichaquiča, jaknužt tuquita zuma kuzziz Yooz taku čhiñi zoñinacaž mazinčhaja, jalla niicama cumpliskataquiča. Jalla nii cumplis oracama Jesucristužlaqui tsewc arajpachquin kamspanča.

²² Moisesqui učum tuquita ejpnacžquiz cjichiča: “Yooz Jiliriqiu ančucaquiz tsjii Yooz taku čhiñi profeta cuchanžcaquiča. Nii zoñiqui ančuca wajtchiz zoñinacžquiztanpacha ulnaquiča. Jaknužt Yooz Ejpqui wejr cuchanžquitchaja, jalla nužzakaz tsjii cuchanžcaquiča. Ančhucqui nii Yooz Epiž cuchanžquita zoñž taku tjapa kuztan nonžna, čhjulut chiyachaja, jalla nii.

²³ Jakziltat ana niiz taku nonznawk cječhaj niiqui, Israel wajtchiz zoñinacžquiztan pjaltaž cjequiča. Nižaza walja castictaž cjequiča”. Nuž cjiča Moisesqui.

²⁴ Nižaza tii timplu puntuquiztan tjapa Yooz taku čhiñi profetanacaqui parlichipanča Samuelžquiztanpacha jecchuc.

²⁵ Nii profetanacž taku Yooz Ejpqui ančhucaltajapa čhiikatchiča. Ančhucaltazakaz Yooz Ejpqui tsjii zuma taku tjaachiča učum tuquita ejpnacžquiz. Jalla tuž cjican,

Yoozqui Abrahamžquiz taku tjaachicha: “Am majchmaatiz cjen, tjapa tii muntuquiz žejlñi žoñinacžtajapa favoral paa-acha wejrqui”.

²⁶ Yooz Ejpqui niiz Majch jacatatskatžcu, ančhucaquiz primira cuchanzquichiča, favora paacan. Jazic tjapa ančhuc anawali paaznaca apatatspanča.

4

PEDRUŽTAN JUANŽTAN

¹ Pedružtan Juanžtan jalla nuž parlan, timplu jilirinacaqui, timplu zultatž jiliržtan saduceo parti žoñinacžtan tjonchiča.

² Pedružtan Juanžtan žoñinaca tjaajnatča, tuž cjican:

—Jesusaqui ticziquiztan jacatatchiča. Jalla nuž kjanapacha tjeeža, tjapa ticzi žoñinacaqui jacatataquiča, jalla nuž. —Jalla nižta čhiitiquiztan anča žawjčiča nii jilirinacaqui.

³ Jalla nekztanaqui Pedružtan Juanžtan preso chjitzatača. Nižaza carsilquiz majc-tatača, jakatažcama. Nii oraqui zeziqueyatača.

⁴ Jalla nuž Pedružtan Juanžtan Yooz puntu čhiičiichiž cjen, tama nonžni žoñinacaqui tjapa kuztan Yoozquin criičiča. Luctak criiči žoñinacakaz tsjii pjijska warankatača.

⁵ Jakatažuqui Jerusalén wajtquin ajczitača wajt jilirinacami, timplu jilirinacami lii tjaajñinacami.

⁶ Nii oraqui timplu chawc jiliritača Anasqui. Niimi ajczitača, nižaza Caifastan, Juanžtan, Alejandružtan. Nižaza tjapa timplu chawc jilirinacž famillanacami ajczitača.

⁷ Jalla nuž ajcziž cjen Pedružtan Juanžtan zijjckatchiča. Nekztanaqui nii jilirinacž taypiquiz apantiskatžcu pewcziča, tuž cjican:

—Ančhucqui, žjakzilta jiliriz mantitaž cjen nižta ančhuc paajo?

⁸ Jalla nekztanaqui Espiritu Santuqui Pedružquiz tuž čhiikatchiča:

—Israel wajtchiz jilirinaca, timplu jilirinaca,

⁹ wejrnacqui ančhucaž yujcquiz zijjctacha, tsjii wali paata zumpacha zizajo. Jaknužt tii zuch žoñi žejtčizlaja, jalla nii ziz pecaquiz niiqui, nil quint'asača.

¹⁰ Wejrnacqui ančhuca yujcquiz weraral chiyacha, ančhuc nii quinto zumpacha zizajo; nižaza tjapa Israel wajtchiz žoñinaca zumpacha zizajo. Jesucristuž aztan tii žoñi čhjetinta žejlča tjapa ančhuca yujcquiz tsijtchi. Ančhucqui nii Nazaret wajtchiz Jesucristo cruzquiz ch'awcchinčhucča. Nekztanaqui Yoozqui niipacha ticziquiztan jacatatskatčiča.

¹¹ Ančhucqui kjuy pirkiñinacažtakaz nii zuma maz tjojtčiča, “Ana cusa” cjican. Jalla nii tjojtta mazqui Jesusapanča. Nii tjojtta mazti anča cusala, isquinquiz nonžta maz irata cjišiča. Yoozqui cjičiča, “Tii mazza tsjan juc'ant chekanaqui”.

¹² Jesucristupankazza Liwriñiqui. Yooz Ejpqui anaž iya jakziltami utčiča liwriñi cjis-japa. Tii muntuquiz žejlñi žoñinacžquiztan ana iya liwriñi žoñi žejlča. Jesucristupankaz učhum liwriñi atasacha.

¹³ Jalla nuž Pedruqui čhiičiča Juanžtan. Nii pucultanaqui ana istutiñitača, cam-puquin kami žoñikazza. Jalla nuž cjenami Pedružtan Juanžtan tjuj kuzziz čhiičiča, ana ekscan. Jalla nii nayžcu nii jilirinacaqui ispantichiča. Nižaza pajchipan cjišiča, nii pucultanaqui Jesusižtan chica ojklaychitača, jalla nii.

¹⁴ Nekz chica nii čhjetinta žoñimi tsijtchi želatča. Jalla nižtiquiztan ana čjul quintrami čhi atčiča.

¹⁵ Jalla nekztanaqui nii čhjepultan žoñinaca ajczquiztan ulanskatchiča. Ninacaž ulan-tan, nii jilirinacaqui ninacpora zmalis parlassiča,

¹⁶ tuž cjican:

—Čhjul učhum tii žoñinacžtan paaquejo? Tjapa Jerusalén žoñinacaqui tinacaž paata milajru zizkalala. Tinacaqui pajk siñala tjeeziča. Anača nicchuca učhumqui.

¹⁷ Tii čhiitaqui ana iya zizta cjisjapa, učhumqui ninacžquiz mantiz waquiziča, ana iya Jesusiž puntu parlažo. “Nižta parlaquiz niiqui, ančhucqui casticta cjequiča” jalla nuž čhiizinz waquiziča.

¹⁸ Nekztanaqui nuž parli žeržcu, nii jilirinacaqui Pedružtan Juanžtan kjawziča. Nekz-tan tuž čhiizinchiča:

—Jaziqui ančhucqui anaž iya parlaquiča nii Jesusiž tjuužtan. Nižaza anaž jeczquizimi tjaajnaquiča Jesusiž puntuquiztan. —Jalla nuž mantichiča.

¹⁹ Jalla nuž mantitiquiztan Pedružtan Juanžtan kjaaziča, tuž cjican:

—Ančhucpachaž tantiyasa. Čhjulut walikaz Yooz yujcquiziya? ČAnčhucaž mantita caz wali cjesaya? už ČYooz mantita caz wali cjesaja?

²⁰ Wejrnacqui anal weriz chertanacami nonžtanacami parlis jaytasacha. Jalla nuž parlispanča wejrnacqui.

²¹ Jalla nektanaqui nii jilirinacaqui Pedružquiz Juanžquiz zuma ch'aanchičha. Pero nižtami ninacaqui cutztatačha. Jalla nužquiz nii jilirinacaqui ana castiqi atchičha. Parti zoñinacami Yoozquin alawazžičha, nižaza Yoozquin honora tjaachičha jalla nii milajru paatiquiztan.

²² Nii čhjetinta zoñiqui pusi tunc wata jilchiztačha.

CRICHI ZOÑINACAQUI MAYIZICHICA

²³ Nektanaqui Pedružtan Juanžtan carsilquiztan cutztiquiztan niž mazinacžquin ojkchičha. Tjapa ninacž ojklaytanaca quint'ichičha, jaknužt nii timplu jilirinacami wajt jilirinacami čhičhaja, jalla nii liwž quint'ichičha.

²⁴ Jalla nuž quint'itiquiztan, tjapa ninacaqui tsjii kuzziz Yoozquin mayizichičha, tuž cjican:

—Yooz Jiliri, tjapa mantiñi Jiliri. Amqui arajpachami yokami, kot kjazmi, nižaza tjappacha paachamčha.

²⁵ Amtan Espiritu Santužtan am David cjita sirwiñi tuž čhiikatchamčha:

“¿Kjažtiquiztan Yooz quintra žawjchi čhiichii nacionanacchiz zoñinacaqui? ¿Kjažtiquiztan tii muntu zoñinaca ana zuma tantii?

²⁶ Nižaza tii muntuquiz chawc jilirinacaqui Yooz quintra tsijtsa, nižaza chawc jilirinacaqui Yooz Jilirž quintra nižaza niž uchta Jesucristuž quintra parlizjapa juntassa”.

Nuž cjican cjjirčičha Davidqui.

²⁷ Jalla tižta werarāčha. Herodestan, Poncio Pilatužtan, Israel wajtchiz zoñinacžtan, yekja wajtchiz zoñinacžtan, jalla tjapa ninacaqui tii wajtquin juntassičha wali zuma Jesusiž quintra paazjapa. Pero am Majch utchamčha, tsjan chawc jiliri cjisjapa.

²⁸ Jalla nuž juntascu ninacaqui am kuzquiz pinsitacama cumplissičha. Nužquiz cjsičha. Amiž tuquitan pinsita jaru, jalla nužpacha watchičha.

²⁹ Anziqū, Yooz Jiliri, wejtnaca quintra ch'aanita taku am zizza. Jaziqui wejtnacaquiz, amiž mantita ojkñi zoñinacžquiz, zuma tjup kuz tjaažcalla, ana eksan am taku parlažo.

³⁰ Nižaza am azi tjaažcalla, laa zoñinaca čhjetinjapa, nižaza zuma obranacami, nižaza siñalanacami, nižaza milajrunacami paazjapa, am zuma Majch aztan. —Jalla nuž čhiican Yoozquin mayizichičha.

³¹ Jalla nektanaqui Yoozquin mayiziz žeržtan jakziquin ajczitažlaja, jalla nii kjuya čhekjinčičha. Nižaza tjapa ninacaqui Espiritu Santuž azi tanzičha ninacž kuzquiz. Jalla nižtiquiztan walja tjurt'iñi kuzziz Yooz taku parličičha.

CRICHI ZOÑINACŽ KAMTA

³² Tjapa nii wacchi criichinacaqui tsjii kuzziztačha. Nižaza ninacž pinsamintuqui tsji-ipanikaztačha. Jakzilta zoñit cusasanacchiz želatčhaja, nii zoñinacaqui ana cusasquiztan čhiñitačha, “Wejt cusasaž tiic” cjicanauqui. Antis tjapa ninacž cusasanacaqui tsjižtakaz želatčha, tjapa criichi zoñinacžtajapa.

³³ Nii Jesusiž illzta apostolonacaqui Jesús Jilirž jacatatž puntuquiztan tirapan pal-jayñitačha, zuma atipñi tawkžtan. Zuma wali azziz tawkžtan atipñipantačha. Nižaza Yoozqui ninaca walja yanapchičha.

³⁴ Ninacžquiztan anaž tsjii t'akjir zoñi želatčha. Jakzilta criichi zoñižlaja yokchizimi kjuychizimi, jalla ninacaqui nii tuyžcu paaz zjijčñipanikazza.

³⁵ Nii paaz zjijčcu apostolonacžquin intirjiñipanikaztačha. Nižaza ninacaqui nii paazqui čhicata tojžñitačha ana želinchiz zoñinacžquiz.

³⁶ Nižaza tsjii José cjita levita t'akquiztan zoñi želatčha, Chipre cjita isla yokchiz zoñi. Nii José cjita criichi zoñiqui yekja tjuuchizžakaztačha Bernabé cjita. Jalla nuž tjuuskatchičha apostolonacaqui. Nii Bernabé tjuuqui tuž cjičha, “Zuma Kuzñi”, jalla nii.

³⁷ Nii Bernabé cjita zoñiqui tsjii yokchiztačha. Nektanaqui nii yoka tuychičha. Nii yoka tuyžcu, paaz zjijčičha. Nektanaqui apostolonacžquin nii paaz intirjičičha.

5

ANANIAS, NIZAZA SAFIRA UJ PAACHICHA

¹ Yekja zoñi želatčha, Ananias cjita. Safira cjiti tjunchiztačha. Ninacaqui persun yoka tuychizakazza.

² Nii yok tuyta paazqui t'ecžcu, persunaltaajapa parti čhjojčičha. Partillakaz chjitchičha apostolonacžquin, jalla nužni yoka tuychiztakaz. Niž tjunqui nii t'ecžta paaz zizatčha.

³ Jalla nektanaqui Pedruqui cjichičha:

—Ananias, ¿kjažtiquiztan am kuzquiz Satanás luzzita? ¿Espiritu Santužquiz tižta kotsjapaqui? Nii yok tuyta paazqui t'ecsamčha.

⁴ Ima tuycan nii yokaqui amtapantakaya, ¿ana jaa? Tuyzcu, nii yoka tuyta paazqui amtazakaztaž, ¿ana jaa? ¿Kjažtiquiztan tižta ana wali pinsichamtajo? Amqui Yoozquiz k'otchamčha; ana žoñquiz k'otchamčha.

⁵ Pedruž nuž čhiitiquiztan, Ananiasqui ticzi tjojtsičha. Jalla nižtiquiztan nii quintu nonchi žoñinacaqui ancha eksñi cjsiřha.

⁶ Jalla nuž ticstan, tsjii kjažt tjojowanacaqui macjatchičha, Ananías ticzi curpu murtajz-japa. Nekztan nii tjojowanacaqui tjati chjitchičha.

⁷ Tsjii čhjep orquiztan, Ananías tjunqui tjonchinčha. Naaža lucu ticzi quintu ana zizatčha.

⁸ Nekztanaqui Pedruqui naaquiz pewczičha, tuž cjican:

—Wejtquaz maznalla. ¿Ančhuca yoka tuyta paaz nužullakazkaya?

Nekztanaqui naaqui kjaazičha, tuž cjican:

—Jesalla, nužullapančha.

⁹ Nekztanaqui Pedruqui naaquiz cjichičha:

—Ančhucqui Yooz Espiritu Santo incallz pecatčha. ¿Kjažtiquiztan ančhucqui pucultan nuž kaasjo? Nii zancuz tjončha nii am lucu tjažtquĩnacaqui. Nižaza anziqui amzakaz chjichaquičha.

¹⁰ Nii orapacha Pedruž kjojchquiz tjojtžcu ticzinčha. Nii tjojowanacaqui kjuya luzcu naa ticzin cherchičha. Nižaza jwezcu tjati chjitchičha naaža lucž latuquin.

¹¹ Jalla nižtiquiztan tjapa nii iclizziz žoñinacami, nižaza nii quintu nonchi žoñinacami ancha eksñi cjsiřha.

MILAJRUNACA PAATA

¹² Nii tjuñinacquiz apostolonacaqui walja siñalanacami milajrunacami paañitačha žoñinacž cheran. Nižaza tjapa criichinacaqui Portal de Salomón cjita kjuyquiz ajcžñitačha.

¹³ Ana jakzilta ana criichi žoñinacami criichinacžtan mazi pajas, ancha eksnatčha. Jalla nuž cjenami žoñinacaqui walja rispitchičha criichinacžquiz.

¹⁴ Nižaza tsjan tsjan žoñinacaqui Yooz Jiliržquin kuzziz cjsiřha, luctaka cjiñi maataka cjiñi. Walja žoñinacaqui Yoozquin criichičha.

¹⁵ Nižaza laa žoñinacami callquin jweztatačha. Callquin tjaž zquiti chjinžcu, t'apžtatačha. Nižaza camillquiz zakaz nonžtatačha. Jalla nuž nonžta žejlcan Pedruž tjonž tjewzičha, tsjii kjažta čhjetinta cjeyajo. Pedruž siwsallamekaj laa žoñinacž juntuñ wat jaa, cjiñitačha.

¹⁶ Nižaza nii wajt vicin watjanacquiztan walja žoñinacaqui tjonťjonatčha Jerusalenquin. Laanacami zajraž tantanacami zjic zjiccatčha. Nižaza tjapa laa žoñinacaqui čhjetintatačha.

PEDRUZTAN JUANZTAN CARSILQUIZ CHAWJCTA

¹⁷ Jalla nižtiquiztanaqui timplu chawc jiliriqui saduceo parti žoñinacžtan ancha iñizichičha.

¹⁸ Jalla nuž iñizizcu, apostolonaca preso tanchičha, carsilquiz chawjczjapa.

¹⁹ Jalla nuž carsilquiz chawjctaz cjen ween tsjii Yooz Jilirž anjilaqui tjonchičha. Nižaza carsil zan chawjcz cjetsičha. Cjetžcu, apostolonaca jwessičha tuž cjican:

²⁰ —Timpluquin oka. Jalla nicju tsijtsna. Jesucristuž kamaña puntuquiztan tjapa žoñinacžquiz paljayaquičha.

²¹ Jalla nii anjilaž čhiita jaru, jakatažuqui wentanalla timplu ojkičha. Timpluquin luzcu, tjaajñi kallantichičha. Jalla nii orazakaz timplu chawc jiliriqui niž mazinacžtan parliz kjuyquiz ajczičha. Tjapa Israel wajtchiz jilirinaca kjawzičha. Nižaza zultatunaca mantichičha, nii chawjcta apostolonaca zjijcajo.

²² Jalla nuž carsilquin irantižcu, nii cuchanta zultatunacaqui ana čhjulumi wajtchičha. Quejžcu quint'ichičha,

²³ tuž cjican:

—Wejrnacqui carsilquin irantižcu, zuma chawjcta zalchinčha. Nižaza ichñi zultatunacaqui želatčha carsil zawncatan. Nekztanaqui carsila cjetžcu, luzzinčha. Nii kjuyltanaqui cherassinčha anaž zinta pres žoñi želatčha.

²⁴ Jalla nii quintu nonžcu timplu chawc jilirimi timplu zultatž jilirimi nižaza parti timplu jilirinacami, jalla tjappacha ninacaqui zuma kuz turwayzi cjsiřha, ¿Kjažt cjequejo? cjican.

²⁵ Jalla nii orazakaz tsjii žoñiqui irantižquichičha, tuž cjican:

—Ančhucaž carsilquiz chawjcta žoñinacaqui timpluquin žoñinacžquiz tjaajinčha. —Nuž cjican quint'ichičha.

²⁶ Nekztanaqui nii guardiñi zultatž jiliriqui ojkičha zultatunacžtan. Nekztan apostolonaca zjicchičha, ana chjojritžta. “Chjojritžtaž cjesaž niiqui, parti žoñinacaqui wejrnacž maztan čhjacasaka”, jalla nuž pinsiichičha nii zultatunacaqui.

²⁷ Jalla nuž zjičzcu, nii parliz kjuyquin tsijskatchičha chawc jilirinacž yujcquiz. Jalla nuž želan nii timplu chawc jiliriqiu čhižinčičha, tuž cjan:

²⁸ —Wejrnacqui ančhucaquiz ana iya parlanj cjichintala. Nižaza nii žoñž puntuquiz-tanaqui ana iya tjaajnaj cjichintala. Jaziqiu, žčhulu paachinčuctajo? Ančhucqui tjapa tii Jerusalén watja chjiypchinčucčha ančhuca tjaajintžtan. Nižaza nii žoñi contiquiztan wejtnacaquiz uj tjojtunz pechinčucčha.

²⁹ Jalla nekztanaqui Pedružtan parti apostolonacžtan kjaazičha, tuž cjan:

—Primiraqui wejrnacqui Yooz castančha. Nižž jarukaz žoñimi cazasačha.

³⁰ Ančhucqui cruzquiz ch'awczcu Jesusa conchinčucčha. Nekztan učhum tuquita atchi ejpž Yooz tii Jesusa jacatatskatchičha.

³¹ Jacatatskatzcu Yoozquii nii Jesusa pajk honorchiz cjiskatchičha. Nižž zew latuquiz želan, Yooz Ejpqui mantis poder tjaachičha, Jesusa tsjan chawc jiliri cjisjapa. Nižaza Jesusačha Liwriñiqiu, tii Israel wajtchiz žoñinaca kuz campiiskatajo, ninacž uj pertunta cjeajajo.

³² Jalla tii puntunacquiztan wejrnacqui zizučha. Nižaza tisticu cjican wejrnacqui nii chiyučha Espiritu Santužtanpacha. Yoozquii nii Espiritu Santo tjaačha nižž kuzcama kamñi žoñinacžquiz. —Nuž cjican cjichičha Pedruqui.

³³ Jalla nii nonžcuqui, nii jilirinacaqui apostolonacžjapa ancha žawjchičha. Conz pecatčha.

³⁴ Pero nii jilirinacžquiztan tsjii Gamaliel cjita fariseo želatčha. Nižaza lii tjaajiñi maestrutačha niiqui. Tjapa žoñinacaqui nižžquiz walja rispitičha. Jalla nii Gamaliel cjita žoñiqui tsijsičha. Nuž tsijscu mantichičha apostolonaca zancu jwescajo tsjii ratu.

³⁵ Nekztan parti jilirinacžquiz tuž cjichičha:

—Israel wajtchiz žoñinaca, ančhucqui tii žoñinacžquiztan cwitazaquičha. Anaž čhjulumi paaz waquizičha.

³⁶ Ančhucž cjuñzna, tsjii tuquiqui Teudas cjita žoñiqui jeczquichičha. Nii žoñiqui “Wejrtčha chekan žoñtquii”, tuž cjican ojklaychičha. Jalla nekztanaqui pajcpic patac žoñinacaqui nii apzičha. Pero nii Teudasqui contatačha. Nekztanaqui nii apžñi žoñinacaqui wichanzičha. Nužquiz nižž tjaajintaqui tjabatatačha.

³⁷ Nižž wiruñ censo tjuñinacžquiz tsjii Judas cjita žoñiqui jeczquichičha. Galilea wajtchiz-tačha. Žoñinacaqui nii apzquichičha. Ultimquiziqui contazakaztačha. Nekztanaqui nižž apžñinacaqui wichanzi cjišičha.

³⁸ Jalla nižtquiztan nižta wattanaca cjuñzcu, tii žoñinacž quintra anačha čhjulumi paa. Ana tinacžquiz mitis waquizičha. Tii žoñinacaqui persun kuzcamakat paačhaja, nuž cjenauqi anaž tjurasachha. Orallaž kataquičha.

³⁹ Yooz kuzcamat tii žoñinacaqui paačhaja, jalla nekziqiu tinacaqui anaž tjabatanchuca cjesačha. Tinacaqui Yooz parti žoñinacžlaja, jalla nii quintra paasaž niiqui, Yooz quintraž cjesačha. Jalla nižtquiztan tii žoñinacž quintra anaj paala. —Jalla nuž cjan nii žoñinacžquin čhižinčičha Gamaliel cjita žoñiqui.

⁴⁰ Nižtquiztanaqui tjapa jilirinacaqui naazi cjišičha. Jalla nekztanaqui kjawzičha apostolonaca. Kjawžcu, ninaca wajtchičha. Nižaza čhižinčičha ana iya parlajo nii Jesusiž puntuquiztan. Nekztan ninacaqui cutztatačha.

⁴¹ Jalla nuž cutztan, jilirinacž yujcquiztan ulančičha. Yoozquii jalla nuž munchičha, Jesusiž laycu sufrichi ninacaqui, jalla nuž. Jalla nuž cjenauqi ancha cuntintutačha apostolonacaqui.

⁴² Nekztanaqui zapuru Jesucristuž puntuquiztan tira tjaajnatčha, nižaza tiraž paljay-atčha timpluquinami kjuyquinami, “Jesusaqui Yooz cuchanzquita Cristučha” cjiñitačha.

6

PAKALLAK CRIICHI JILANACA ILLZTA

¹ Nii timpuquiz Yoozquin criichinacaqui waljaž yapatčha. Nuž yaptiquiztan tsjii quija žejlchičha. Griego taku čhiñi judionacaqui hebreo taku čhiñi judionacž quintra quijičha, tuž cjican:

—Wejtnaca žew maatakanaca ana cusa atintitačha. Zapuru čheri tojzquiz upa čheri onantačha.

² Jalla nuž quijtiquiztan nii tuncapan apostolonacaqui tjapa Yoozquin criichinaca kjawzičha. Nekztanaqui tjappacha juntjapžcu ninacžquiz cjichičha:

—Wejrnacqui Yooz taku parli apatatsqui anaž waquizičha, čherikaz atintisjapaqui.

³ Jilanaca, pakallak žoñinaca ančhucaquiztan kjurzna. Zuma kuzziz žoñi, nižaza Yooz Espiritu Santuž irpita žoñi, jalla nižaza zuma intintazzi žoñi, nižta žoñinaca kjurzna. Nekztan ninacaqui tii čheri atintiz puestuquin uchta cjequičha.

⁴ Wejrnacztı Yoozquin mayiziz, niżaza Yooz taku tjaajinz tiral atintača. Nii langzquız tiral kuz tjaa-ača.

⁵ Jalla nii parlita jaru tjappacha asiptichiča. Nekztanaquı pakallak zuma zoñinaca illztatača, čhjeri atintisjapa. Primeruquı Esteban illztatača. Estebanaquı Yoozquin tjapa kuzziztača, niżaza Yooz Espıritu Santuż irpita kamñitača. Niżaza illztatača Felipiżtan, Procorużtan, Nicanorżtan, Timonżtan, Parmenastan, niżaza Nicolastan. Nicolasquı Antioquıa wajtchiz zoñitača. Ima Jesucristużquız kuzziz cjican Nicolasquı judıo cuzturumpichiztača, ana judıo zoñi cjenami.

⁶ Jalla nuż illzcu nii pakallak zoñinaca apostolonacżquin chjichtatača. Nekztanaquı apostolonacauı ninacżta mayizichiča, niżaza ninacż achquız kjarżtan lanziča, nii puestuquız cjeajajo.

⁷ Jalla nekztanaquı Yooz taku paljayta cjen, Jerusalén wajtquin criichi zoñinacaquı ancaż miratča. Niżaza wacchi judiuż timplu jilirinacami tjapa kuztan Yooz taku catokchiča.

ESTEBAN PRESO TANTA

⁸ Estebanaquı walja Yooz aztantača, niżaza Yooziż yanaptatača. Jalla niżtiquıztan walja milajrunacami siñalanacami paachiča zoñinacaż cheran.

⁹ Tsıii nooj tsıii kjaż judıo cuzturumpi paañi zoñinacaquı Estebanżtan ch'aasi kallantichiča. Nii judıo cuzturumpi paañi zoñinacaquı “Liwrıta zoñi” cjitatača. Ninacżtan, tsıii kjażt Cirene wajtchiz zoñinacżtan, niżaza Alejandrıa wajtchiz zoñinacżtan, niżaza Cilicia wajtchiz zoñinacżtan, niżaza Asia yokquin kamñi zoñinacżtan, jalla nii zoñinacaquı Estebanżtan ch'aassıča.

¹⁰ Jalla nuż ch'aascan, Estebanżquız ana atipi atchiča. Estebanquı Espıritu Santuż tjaajinta taku chıiñipantača.

¹¹ Jalla niżtiquıztan nii quintra zoñinacaquı toscar tisticunacaż taku kjaychiča, tuż chıican k'otajo:

–Tii Estebanquı ana wali tawkżtan Moısés quintrami niżaza Yooz quintrami chıichiča. Wejrnacauı nuż chiyanacuı nonzinpanča. –Jalla nii takunacżtan tisticunacżquız tjaajziča.

¹² Jalla nekztanaquı nii Estebanż quintra zoñinacaquı parti zoñinacżquız walja zawjkatchıča. Zoñinacami, wajt jilirinacami, niżaza judıo lii tjaajıñi maestruncami, tjapa ninacaquı zawjchi cjıssiča. Nuż zawjchi cjıscu Esteban tanchıča. Nekztanaquı Esteban tanżcu, pajk parlız kjuya chjitchıča.

¹³ Niżaza toscar tisticunaca apantiżquichiča. Nii toscar tisticunacaquı tuż cjichiča:

–Tii zoñiquı tirapan tii Yooz timplu quintra chıiñiča, niżaza Yooz lii quintra chıiñiča. Nużupanż parlıñiča.

¹⁴ Niżaza wejrnacauı nonzinča, “Nii Jesús cjeta Nazaret wajtchiz zoñiquı tii timplu pajlnaquiča”, nuż cjican tıiquı chıiñiča. Niżaza tıiquı cjiñiča, “Nii Jesusaquı Moısés tjaata cuzturumpinaca campıyaquiča”. Nuż cjiñiča tıiquı.

¹⁵ Jalla nekztanaquı tjapa nii julzi jilirinacami Estebanż kjutñi cherziča. Nii oraquı Estebanż yujquı anjılz yujcżtakaz cherziča.

7

ESTEBANQUI TJURT'ICHICHA

¹ Nekztanaquı timplu chawc jiliriquı Estebanżquız pewcziča, tuż cjican:

–¿Ultımu nużupanza amya?

² Nekztanaquı Estebanquı kjaaziča, tuż cjican:

–Wejt jılanaca, ejpnaca, jilirinaca, nonżna. Učhum zuma honorchiz Yoozquı učhum tuqıta atchi ejp Abraham cjeta zoñquız persuna tjeeziča. Nii oraquı Abrahamquı Mesopotamia yokquin kamñitača. İmaż Harán yokquin kami okatča.

³ Nii oraquı Yoozquı Abrahamżquız cjichiča: “Am yoka eca, niżaza am parintinacami eca. Jakzi yokquinam okačhaja, jalla nicju am tjaajznača”.

⁴ Jalla niżtiquıztan Abrahamquı Caldea yokquıztan ulanchıča, Harán yokquin kami ojkičiča. Nekz kaman Abrahamż ejpquı ticziča. Nekztanaquı tekzi tii učhumż kamz yokquız Abraham tjonchiča. Yoozaa nii irpichiquı.

⁵ Jalla tekz kaman, Yoozquı ana čhjul yok irinsami tjaachiča. Abrahamżtajapa persun yoka ana želatča. Jalla nuż cjenami Yoozquı taku ecchiča, tuż cjican: “Tii yoka amtapanż cjequıča. Niżaza am ticżtanaquı tii yokaquı am maatinacaż tanznaquiča”. Jalla nuż cjican Yoozquı Abrahamżquız taku tjaachiča. Nii oraquı Abraham ana ocjalchiz cjenami, Yoozquı nuż chıichiča.

⁶ Niżaza Yoozquı niıżquız cjichiča, “Wiruñacuı am majchmaatinacaquı yekja yokquin kamaquiča, nacjuñta zoñinacażtakaz. Nekziquı pusi patac wata kamaquiča. Jalla

nii yokquin am majchmaatinacaqui yekja žoňž mantakaz paaquiča. Nižaza sufrican kamaquiča”.

⁷ Nižaza Yoozqui cjichiča: “Am majchmaatinaca sufriskatchiz cjenaqui, wejrqui nii sufriskatñi žoñinaca casticača. Nekztanaqui am majchmaatinacaqui nii yokquiztan ulanžcaquiča. Ulanžcu tui yokquiz wejr sirwaquiča”.

⁸ Nižaza Yooz Ejpqui tsjii compromiso paachiča Abrahamžtan. Nii compromis jaru Abrahamqui persun janchiquiz chimpuskatchiča. Nižaza quinsakal tjuñquiztan Isaac majch nastan, Abrahamqui niž persun majchquiz chimpuchiča. Wiruñaqi Isaacqui niž majch Jacobžquiz chimpuchiča. Wiruñaqi nižazakaz Jacobqui niž tuncapan lucmajch maatinacžquiz chimpuchiča. Jacobž lucmajch maatinacžquiztan tjonchiča učum tuncapan t'akanaca.

⁹ Nii Jacobž majchnacaqui učum tuquita atchi ejpnacatača. Ninacaqui José cjita lajkž quintra iñiziñitača. Jalla nižtiquiztan ninacž lajk tuychiča. Nekztanaqui nii tuyta lajkqui Egipto yokquin chjichtača. Pero Yooz Ejpqui Josižtan chicapachatača nii oraqui.

¹⁰ Nekztan sufrichi želan Yoozqui José liwriichiča. Nižaza walja zizñi cjisšiča. Jalla nuž cjen Faraón chawc jiliriqui Josižtan cuntintutača. Nekztanaqui Faraonqui José utchiča, Egipto wajtchiz žoñinaca mantiñijapa, nižaza Faraonž kjuychiz žoñinaca mantiñijapa.

¹¹ Wiruñ tsjii kjaž watquiztan tsjii mach'a žejlchiča, ancha sufrichiča tjapa Egipto yokquin kamñi žoñinacami, nižaza tjapa Canaán yokquin kamñi žoñinacami. Jalla nuž cjen učum tuquita ejpnacaqui ana čjulu lujlsmi nii timpunacac wachatča.

¹² Pero Jacobqui tsjii quinto nonchiča, Egipto yokquin trigo žejlchi. Nuž nonžcu niž majchnaca cuchanchiča. Niiž majchnacaqui učum tuquita ejpnacatača. Jalla niitacha primer ojkaqui Egipto yokquinaqui.

¹³ Nekztanaqui pizc wila ojžcu, Josequi niž jilanacžquiz pajkatchiča. Jalla nižtiquiztan Egipto chawc jiliriqui Josiž familia pajchiča.

¹⁴ Jalla nekztanaqui Josequi mantichiča niž ejp Jacobo zjijcajo, nižaza tjapa familianacžtanpacha. Ninacaqui pakallak tunca pjijskani žoñitača.

¹⁵ Jalla nekztanaqui Jacobqui kami ojkičiča Egipto yokquin. Nekzi ticziča Jacobqui. Nii yokquin ticzizakaza učum tuquita atchi ejpnacaqui.

¹⁶ Wiruñaqi nii atchi ejpnacž tsjijnaca chjichtatača Siquem cjita yokquin. Nicju tjattatača Abrahamž kjayta yokquin. Abrahamqui nii Siquem yoka paaztan kjaychiča Hamor cjita maatinacžquiztan.

¹⁷ Tuquitan juramintužtan Yoozqui Abrahamžquiz taku tjaachiča, tuž cjican: “Am majchmaatinacžquiz tii yoka tjača”. Nii tjaata taku cumplis ora žcatžinžcan Israel wajtchiz žoñinacaqui waljaž miratča Egipto yokquinaqui.

¹⁸ Nii oranaca Egipto yokquinaqui tsjii chawc jiliriqui mantiz kallantichiča, ana José pajiñi.

¹⁹ Nii jiliriqui učum wajtchiz žoňž quintra pinsichiča. Nekztan anawal quintra paachiča učum tuquita atchi ejpnacžquiz. Nii jiliriqui mantichiča, Israel lucmajch maatinaca majttan zawnc uchla, ticzi cjisjapa.

²⁰ Jalla nii timpu Moisesqui majttatača. Ancha c'achja wawatača niiqui. Yoozqui nii wawžtan wali cuntintutača. Niiž maa ejpqui čhjep jiz kjuyquiz mantiñičiča.

²¹ Ana iya nii wawa čhjoj čhjoj atžcu, kjuyquiztan chjitchiča. Nekztanaqui Egipto chawc jilirž persun majtqui nii Moisés wawa wajtchinča. Jalla nuž wajtžcu, persun maatižtakaz uywazzinča.

²² Jalla nižtiquiztan Moisesqui tjapa nii Egipto žoñinacž tjaajintanaca zizñi cjisšiča. Nižaza zuma paatiquiztanami nižaza zuma chiitiquiztanami walja rispittatača Moisesqui.

²³ Niiž pusi tunc watchiz cjican Moisesqui parti Israel žoñinacžquin tsjii tjonžni ojkič pechiča.

²⁴ Jalla nuž tjonžni ojžcu cherchiča, tsjii Egipto žoñi tui tsjii Israel žoñi wjajtatča, jalla nii cherchiča. Nii Israel žoňžtan cjatžcu kijtchiča. Nekztan nii Egipto wjajtñi žoňžquiz ayni tjepuncan conchiča.

²⁵ Nekztanaqui Moisesqui kuzquiz zizziča, Yoozqui nii utchiča, Israel žoñinaca Egipto žoñinacž mantuquiztan liwriizjapa, jalla nii. Nižaza Moisesqui pinsichiča, Israel žoñinacaqui nižtakaz zizziča. Pero nii Israel žoñinacžti ana nižta naaziča, Moisesqui Yooz uchta liwriiñi, jalla nii.

²⁶ Jaka tažuqui Moisesqui tsjii pucultan Israel žoñinacžtan ch'aasñi zalchiča. Jalla nuž zalžcu, pertunaskats pechiča, tuž cjican: “Jilanaca, pucultan ančhucqui Israel žoñinacžchucča. ¿Kjažtiquiztan ančhucpora ch'aasjo?”

²⁷ Nekztanaqui ana wal uj paañi žoñi Moisés tewkziča, tuž cjican: “¿Ject am jiliri utchejo, wejrnac mantiñijapajo?”

²⁸ Zezcu Egipto zoñi conchamcha. ¿Jazic wejrzam konz pecjo?”

²⁹ Jalla nii nonzcu Moisesqui atipassiha Madián yokquin. Jalla nicju kamchiha nacjuñta zoñi cjenacui. Nicju tjunatan zalzcu, pucultan oejalchiz cjissicha, nii yokquin kaman.

³⁰ Pusi tunc watquiztan nektzan tsjii ch'ekti yokquintača Moisesqui, Sinaí cjita cur zcati. Jalla nekz želan, tsjii anjilaqui nižquin jeczquichiča, tsjii kalu ujžtan taaztažtakaz, nii taypiquiz.

³¹ Jalla nii cheržcu, Moisesqui ispanichiča. Jalla nii uj cheri macjatcan, nonziča Yooz Jilirž jora. Nii joraqui tuž cjichiča:

³² “Wejrqui am tuquita atchi ejpnacž Yooztča. Abrahamž Yooztča, nižaza Isaacž Yooztča, nižaza Jacobž Yooztča”. Nekztanaqui Moisesqui tsucchi kjarcati kallantichiča. Iya ana cheržni atchiča.

³³ Nekztanaqui Yooz Jiliri qui cjichiča: “Am čhjata chjojzka. Tii amiž tecžta yokaqui wejt yokača.

³⁴ Wejrqui weriž illzta zoñinacž sufriñi cherchinča nii Egipto yokquin kamñi. Nižaza ninacž llaquizan ninaca kjawñi nonzinča. Jalla nižtiquiztan ninaca liwrii chji-jwžquichinča. Picha, ninaca liwriizjapa am cuchnača Egipto yokquin”.

³⁵ “Tuqui Israel wajtchiz zoñinacui Moisesquiz ana rispitchiča. Niižquiz cjichiča: “¿Ject am jiliri utchejo, wejrnaca mantiñijapajo?” Jalla nuž cjenami Yoozqui nii Moisespacha jiliri utchiča, Israel zoñinaca liwriyajo. Israel zoñinaca liwriizjapa, nii taazta kalquiz jeczquichi anjilaqui Moisesquiz yanapaquiča.

³⁶ Jalla nekztanaqui Moisesqui učum tuquita atchi ejpnaca jwessiča nii Egipto yokquiztan. Ima nii yokquiztan ulanskatan milajrunacami Yooz siñalanacami paachiča, nižaza Ljoc cjita kot taypiquiz tjakziča, jalla nuž milajru paachiča. Nekztan pusi tunc wata ch'ekti yokquin ojklaycan milajrunacami Yooz siñalanacami paachiča.

³⁷ Jalla tii Moisespacha Israel wajtchiz zoñinacžquiz cjichiča: “Yoozqui wejr cuchanzquichiča ančhuc liwriizjapa. Jalla nižta irata Yoozqui Israel zoñinacžquiztan yekja liwriñi profeta cuchanzcaquiča. Jalla niž tjontan ančhucqui nižquiz caza”. Jalla nuž cjichiča Moisesqui.

³⁸ Nižaza Moisesqui Israel zoñinacžtan ch'ekti yokquin željchiča, Sinaí cjita cur latuquiz. Jalla nekz tsjii anjilžtan parlichiča. Nižaza učum tuquita atchi ejpnacžquiz palt'izinchiča. Jalla nižtiquiztan Yooz taku tanziča, tjurñi Yooz taku. Učumnacaltajapa nii tanziča. Nižaza učumnacauiz nii taku tjaajinchiča.

³⁹ Učum tuquita ejpnacui Moisesquiz ana caz pecchiča. Ana pajz pecatča, Yooziž uchta jiliri, jalla nii. Egipto yokquinpanž quejps pecatča.

⁴⁰ Jalla nekztanaqui učum tuquita ejpnacui Aaronžquiz paljaychiča, tuž cjan: “Yooznaca paažinalla, wejtnaca tuqucin chjichñijapa. Nii Moisesaqui wejrnaca ulanskatchiča Egipto yokquiztan. Pero anzi qui anal zizi atuča, čhjulukat nižquiz watčhani. Cunamit curquiztan ana quejžcačhani”.

⁴¹ Jalla nekztanaqui nii zoñinacui korquiztan tsjii wac chul turu paakatchiča ninačtajapa, tsjii yooz cjisjapa. Nekztan nii paata yoozquiz wilana conchiča. Nižaza ninacž paata yoozquiztan ancha cuntintutača.

⁴² Jalla nižtiquiztan Yoozqui ninaca jaytichiča, ninacž persun kuzcamakaz kamajo. Jalla nižtiquiztan persun kuzcama cjicican arajpach tjuñimi, jiižimi, warawaranacami sirwichiča. Jalla nii puntuquiztan Yooz taku chiiñi profetanacž cjiirta liwruquiz tuž cjiiratača:

“Israel zoñinaca, ančhucqui pusi tunc wata ch'ekti yokquin kamcan, wilana conchinčuchča. ¿Wejtquin sirwisjapa nižta paachinčhucjo?

⁴³ Anapanča. Antis Moloc cjita zoñiž paata yoozquin jawkchinčuchča nii wilananaca. Nižaza Renfán cjita warawara yooztakaz cherchinčuchča. Jalla nii warawara yoozquin rispitchinčuchča wilana tjaacan. Nižaza ančhucui tuqui nii zoñiž paata yooznaca chjitskatiñchuctača. Ančhucpachaž nižta yooznaca paachinčhucqui, nekz sirwizjapa. Jalla nižtiquiztan ančhuc jwesacha ančhucui kamz yokquiztan. Jalla nuž jwescu Babilonia cjita yokquiztan nawjctuiñan chjichača”.

Jalla nuž Yooz tawk liwruquiz cjiiratača.

⁴⁴ Ch'ekti yokquin ojklaycan učum tuquita ejpnacui zkiz timpluchiztača. Yoozqui Moisesquiz nii timplu plano tjeziča. Nekztanaqui Yooz mantita plan jaru, nii timpluqui paatatača. Nekzi qui Yoozqui sirwitatača.

⁴⁵ Nii zkiz timplu učum tuquita ejpnacui tanziča irinsažtakaz. Josuež irpita, učum tuquita ejpnacui nii timplu chjitchiča, Canaan yokquin luzcan. Nekz željñi zoñinacžquiztan nii yoka tanziča. Yooz pacha nii zoñinaca chjatkatchiča, učum tuquita ejpnacžquiz tjaazjapa. Nii yoka tanžcu jalla nekz kamchiča Davidž kamtacama.

⁴⁶ David cjita jiliriqúi Yooziž ancha okžtatača. Jalla nižtiquiztan Davidqúi tsjii timplu kjuya kjuyz pecatča Yooz sirwizjapa. Niž tuqita ejp Jacobqúi nii Yooz sirwichizakazza.

⁴⁷ Pero ultimquiziqui Salomón cjita Davidž majch, niiča Yooz timplu cjican kjuychiqui.

⁴⁸ Jalla nuž timplu kjuyta cjenami, werar Yoozqúi anaž žoñiž kjuyta kjuyquiz želasača. Jalla nuž cjichizakazza tsjii Yooz taku čhiñi profet žoñiqui. Yooz puntuquiztan jalla tuž cjiřchiča nii profet žoñiqui:

⁴⁹ “Wejt mantis julzza arajpachaqúi. Tii yokaqúi wejt kjojcha jeežkatzjapažtakazza. ¿Ĉhjuluz cheechi kjuya ančhucqúi wejtajapa kjuyasajo? Jalla nuž cjiča Yooz jiliriqúi. ¿Jakziqúint wejt jeež yoka žejljo?”

⁵⁰ Wejrtča tjappacha paachintqúi”.

Jalla nuž Yooz puntuquiztan cjiřtatača.

⁵¹ Nižaza Estebanqúi tira čhičhiča, tuž cjican:

—Ančhucqúi ancha chojru kuzzizčhucpanča, ana Yoozquin kuzzizčhucča. Cjuñchizčhucča pero ana Yooz taku nonzinčhucča. Nižaza ančhucqúi Yooz Espiritu Santužquiz anapan caziñčhucča. Tuqita ejpž nižtazakazza ančhucqúi.

⁵² Ančhucə tuqita ejpnacaqúi Yooz taku čhiñi profetanacžquiz ana rispitchipanča. Antis sufriskatchipanča. Nii profetanacaqúi tsjii tsjan zuma žoñiž tjonz mazinčhiča. Ančhucə tuqita ejpnacazti ninaca conchiča. Jaziqúi nii zuma žoñiqui tjonchiča. Ančhuczti nii žoñi preso tankatchinčhucča, y nižaza conkatchinčhucča.

⁵³ Anjilanacaqúi ančhucəquiz Yooz lii tjaachiča. Jalla nii tjaata lii ana caziñčhucča. —Jalla nuž Estebanqúi paljaychiča.

ESTEBAN CONTA

⁵⁴ Estebanž čhiita taku nonžcu, ancha žawjchiča. Nižaza Estebanž quintra izke jojchiča, ninacəž žawjchi tjeezjapa.

⁵⁵ Estebanžti Espiritu Santuž irpitapankaztača. Nekztanaqúi Estebanqúi arajpach kjutñi cherziča. Nekztan Yoozquiztan walja c'ajžquñi cherchiča. Nižaza Yooz Ejpž žew latuquiz Jesusa tsijtsi cherchizakazza.

⁵⁶ Nekztan Estebanqúi cjičhiča:

—¡Arəpach kjutñi cheržna! Arəpacha cjetzil cheruča. Nižaza Yooz Ejpž žew latuquiz tsijtsi žejlčha Jesusa Yooz Maatiqúi.

⁵⁷ Ninacazti ana nonžñi ujyčhiča. Cjuñi chawcziča. Nižaza altu joržtan kjawcan apura zalčhiča tanzjapa.

⁵⁸ Jalla nuž tanžcu, wajtquiztan jwessiča. Nekztan wajtž tjiuquin, maztan čhajcchiča. Nii maz čhajcñi žoñinacaqúi tsjii Saulo cjita tjowžquiz ninacəž zquiti cwtižinajo ecchiča.

⁵⁹ Jalla nuž maztan čhajcan, Estebanqúi Yoozquin mayizichiča, tuž cjican:

—Wejt Yooz Jesús Jiliri, wejt animu čhjichalla.

⁶⁰ Jalla nekztanaqúi Estebanqúi quillziča. Altu joržtan kjawčhiča, tuž cjican:

—Wejt Yooz Jiliri, tii žoñinaca tii ujquiztan pertunalla amqúi.

Jalla nuž kjawžcu, ticziča.

8

CRIICHI ŽOÑINACA WICHANZI

¹ Nekztanaqúi nii Saulo cjita tjowaqúi Esteban conzjapaqúi tjapa kuztača. Jalla nii noo-pacha Yoozquin criichinacž quintra juc'anti juc'anti sufriskati kallantichiča Jerusalén wajtquiz. Jalla nižtiquiztanaqúi tjapa criichi žoñinacaqúi wichanziča tjapa Judea yokaran nižaza Samaria yokaran. Nii Jesusiž apostolonacazti ana wichanziča.

² Tsjii kjažultan Yoozquin zuma sirwiñinacaqúi Estebanž curpu tjažziča. Nižaza ancha kaachiča nižquiztan.

³ Nekztan nii Saulo cjita žoñiqui criichinacž quintra ancha anawali paachiča. K'ala tjtanz pecchiča. Nižaza kjuyquiztan kjuya ojklaychiča luctaka cjiñi maataka cjiñi tanzjapa, nižaza carsilquiz chawjckatsjapa.

SAMARIA WAJTQUIN YOOZ TAKU PALJAYTA

⁴ Jakziquin nii wichanzi criichinacaqúi ojktčhaja, jalla nicju liwriñi Yooz taku paljayñitača.

⁵ Tsjii wichanzi žoñiqui Felipe cjitatača. Jalla nii žoñiqui tsjii Samaria yokquiz žejlñi watja ojkičhiča. Jalla nicju Cristuž puntuquiztan paljayi kallantichizakazza.

⁶ Jalla nuž paljayan žoñinacaqúi walja ajcziča. Tjapa nii žoñinacaqúi Felipiž paljayta taku tjapa kuztan nonznatča. Nižaza Felipiž paata milajrunaca cheržcu, niž čhiita taku tjapa kuztan catokchiča.

⁷ Walja zajraž tanta žoñinacaqúi čhjetintatača. Nii laa žoñinacžquiztan zajraqúi kjawcan ulanchiča. Nižaza walja zuch žoñimi cojumi čhjetintazakaztača.

⁸ Jalla nižtiquiztan tjapa nii wajtchiz zoñinacaqui cuntintutača.

⁹ Jalla nii wajtquiz tsjii Simón cjeta wayt'ir zoñi želatča. Tuquitanpacha wayt'iri ojklayñi zoñitača, nii Samaria wajtchiz zoñinaca incallcan.

–Wejrtča chekan zoñtqui –cjican ojklayñitača.

¹⁰ Jalla niž taku walja nonz pečñitača. Nižaza kolta cjiñimi pakji cjiñimi tuž cjiñitača:

–Tii zoñiča walja Yooz aztanaqui. Yooztakazza tiiqui. –Nuž cjican cjiñitača.

¹¹ Azk watanaca nii wayt'ir zoñiqui zoñinaca incallžcu, walja cazkatñitača.

¹² Jalla nekztanaqui Felipiqui tjončiča Yooz taku paljayi. Yooz Epiž mantiz puntuquiztan nižaza Jesucristuž puntuquiztan jalla nuž paljayičiča. Jalla nuž paljaytquiztan walja luctaka cjiñi maataka cjiñi tjapa kuztan criičiča Yooz Ejpžquin. Nekztan criitiquiztan bautistatača.

¹³ Nižaza Simonpachača criičiqui, nižaza bautistatača. Jalla nekztanaqui Felipžquiz cumpanti kallantičiča. Felipž milajrunaca paan, walja ispantičiča nii Simonaqui.

¹⁴ Nekztanaqui Jerusalenquin žejlñi apostolonacaqui quintu nončiča, Samaria wajtchiz zoñinaca Yooz taku catokčiča, jalla nii. Jalla nuž nonžcu nieju tsjii pucultan cuchanžquičiča, Pedružtan Juanžtan.

¹⁵ Jalla nuž irantižcuqui, nii pucultanaqui Samaria wajtchiz criichinacžtajapa Yoozquin mayizičiča, Espiritu Santu tanznajo.

¹⁶ Tuquiqui anaž jakzilitžquizimi Espiritu Santuqui luztkalča. Jesucristuž tjuužtan alajakaz bautistatakalča.

¹⁷ Jalla nekztanaqui Pedružtan Juanžtan ninacž juntuñ kjaržtan lanziča. Jalla nižtiquiztan Espiritu Santuqui ninacžquiz luzziča.

¹⁸ Jalla nuž kjaržtan lanzižquiztan Espiritu Santuž luzñi cheržcu, Simonaqui paaz tirziča,

¹⁹ tuž cjican:

–Wejtquin zakaz nii am azi tjaalla. Jalla nekztanaqui wejrzakaz kjaržtan lanžcu zoñinacžquiz Espiritu Santo luzkatača.

²⁰ Jalla nekztanaqui Pedruqui Simonžquiz cjichiča:

–Am paazmi amtanpacha k'ala katžla. Yooz onanta Espiritu Santo anaž kjayasača paaztan. ¿Kjažtquiztan nižta am pinsejo?

²¹ Amqui tii langzquiz anaž mitisiz waquiziča. Tii Yooztajapa langzquiz anaž amta cjesača. Yooz yujcquiziqui am kuzqui anača zuma.

²² Jalla nii am anawali pinsisnaca jayta, nižaza apatata. “Wejrqui anawali pinsichinpanča” cjican Yoozquin rocaza, am kuz pinsitanaca pertunta cjis atčhani.

²³ Amqui ana zuma kuzzizžamča. Anawali pinsiskaz am kuzquiz tjonča. Wejrqui am ana wali int'iskatča.

²⁴ Jalla nekztanaqui Simonaqui kjaaziča, tuž cjican:

–Wejtajapa Yooz Jiliržquin mayiziñalla, ana čjulumi tii amiž čhiita takunacquiztan wejtquiz watajo.

²⁵ Nekztanaqui nii apóstol zoñinacaqui Jesucristo Jilirž puntuquiztan zuma čhiičiča, nižaza Yooz taku zuma parličiča. Jalla nekztanaqui Samaria yokquiz wacchi kolta wataran liwriñi Yooz taku paljajñi ojklayčiča. Jalla nuž ojklayžcu quejpčiča Jerusalen watja.

FELIPŽTAN ETIOPIA WAJTCHIZ ZOŇŽTAN

²⁶ Niž wiruñ tsjii Yooz anjilaqui Felipžquiz cjichiča:

–Zaažna. Jerusalen wajtquiztan warchuc oka, Gaza ojknī jiczquin.

Ch'ekti yoka nuž watča nii jiczqui.

²⁷ Nekztanaqui Felipiqui žaažcu, ojčkīča. Nii jiczquiz ojkan tsjii Etiopía wajtchiz zoñžtan zalčiča. Nii zoñiqui eunucutača. Nižaza jilirž cusasanaca cwitiñi zoñitača. Candace cjeta žongui tsjan chawc jiliritača Etiopía wajtquin. Jalla naa chawc jilirž mantuquiztača nii cusasanaca cwitiñi zoñiqui. Nii zoñiqui Jerusalen watja ojčkītača werar Yooz rispitsjapa.

²⁸ Jaziqui persun watja quepi ojčkīča. Niiž persun cawall autuquiz julzi želatča, Isaias cjiřta Yooz taku liican. Isaiastača tuquita Yooz taku čhiñi profetaqui.

²⁹ Jalla nekztanaqui Espiritu Santuqui Felipžquiz cjichiča:

–Nii cawall autuquiz macjata.

³⁰ Jalla nuž macjatžcu Felipiqui nonziča, nii zoñiqui Isaias cjiřta Yooz taku liiñi, jalla nii. Jalla nuž nonžcu Felipiqui pewczīča, tuž cjican:

–¿Nii Yooz taku am intintiya?

³¹ Nii zoñiqui kjaaziča, tuž cjican:

—Anaž wejtquiz jec tjaajñimi žejlča. ĆJaknužt wejr intintasajo?

Nekztanaqui nii žoñiqui Felipe kjawziča, nii autu juntuñ yawwzcajo, nižquiz julžinzcajo.

³² Jalla nii cjiřta Yooz taku tuž cjetča:

“Uuzažtakaz conì chjichtaž cjequičha. Uuzaqui ch'ujukaz žejlpanča tsjii čhijpñi žoñžquiziqui, jalla niža konz oraqui ch'ujuž cjequičha niiqui. Anaž chiyauquičha.

³³ Zuma kamañchiz cjenami ombrawillta cjequičha. Ana čjul justiciami wataquičha. Niž majchmaatquiztan, žjequit tii puntu watchinaca quint'izjapa želas? Tii muntuquiz niž kamz wira tucuzinžnaquičha”.

³⁴ Jalla nii ližcu nii jiliriqiu Felipžquiz pewcziča tuž cjican:

—ĆJecž puntuquiztan tii profetaž cjiřta čhiijo? ĆNiiž persun puntuquiztankaya? už Ćyekja žoñž puntuquiztan, jaa?

³⁵ Jalla nekztanaqui Filipiqui nii liita Yooz taku puntuquiztan tjaajñi kallantichiča. Jesucristuž puntuquiztan niiqui chiyatča. Jalla nii zuma liwriñi taku tjaajziča.

³⁶ Jalla nekztanaqui tsjii wijiña macjatcan, nii jiliriqiu cjičičha:

—Tekz kjaz žejlča. ĆAnaj tii kjazquiz bautista cjesaya?

³⁷ Filipiqui kjaaziča, tuž cjican:

—Am persun tjapa kuztan criyaquž niiqui, bautistam cjesača.

Nii jiliriqiu kjaaziča tuž cjican:

—Jesucristuqui Yooz Majchča, jalla nii tjapa kuztan criyuča.

FELIQUI YOOZ TAKU KJANZT'ICHICHA

³⁸ Jalla nekztanaqui nii cawall autu tsijtskatchičha. Nekztanaqui pucultan chji-wžquičičha kjaz kjutñi. Nekztanaqui Filipiqui nii jiliri bautissiča.

³⁹ Kjazquiztan ulnan, Yooz Espiritu Santuqui Felipe chjitchičha. Felipequi ana iya tjenčičha nii jiliržquiz. Jalla nuž cjenami nii jiliriqiu tira ojkičičha cuntintu.

⁴⁰ Felipizti Azoto cjita wajtquin chjichtatača. Nižaza wajtquiztan watja ojklaycan, liwriñi Yooz taku paljajñi ojkičičha, Cesarea cjita watja irantiscama.

9

SAULO JESUCRISTUZTAN ZALCHICHA

¹ Jalla nuž Felipe ojklayanaqui Sauluqui Yoozquin criichi žoñinaca tanzjapa nižaza konzjapa tirapan kuz tjaatča. Anapanž jaytiz pecatča. Nekztanaqui timplu chawc jiliri cheržñi ojkičičha.

² Nii chawc jiliržquiztan ortina mayčičha. Damasco cjita watja ojcz pecatča. Jalla nicju ajcz kjuyaran ojklaz pecatča, Yooz jiczquiz luzñi žoñinaca kjurzjapa, criichi luctaka cjiñi maataka cjiñi kjurzjapa. Nii criichinaca wajtžcu preso tanz pecatča, Jerusalenquin chjitzjapa. Jalla niža ojklazjapa ortina mayčičha.

³ Ortina jwescu, ojkičičha Damasco cjita wajt kjutñi. Damasco žcatilla cjen, tiripintit tsjii wali pajk kjanaqui muzpa kjanžquičičha niž muytata.

⁴ Sauluqui yokquiz tjojtsičha. Jalla nuž tjojtžcu tsjii jora nonziča, tuž cjiñi:

—Saulo, Saulo, Ćkjažtiquiztan am wejt quintramjo?

⁵ Nekztanaqui Sauluqui pewcziča, tuž cjican:

—Wejt jiliri, Ćject amya?

Nii tsewctan čhiñi joraqui kjaaziča, tuž cjican:

—Wejrčha Jesuqtui. Amqui wejt quintram paača. Nuž paacan, ampacham quintra paača. Tsjii wacaqui ar parž quintra llawkžcu, persun jančič quintraž paača. Jalla niža irata am persun quintram paača.

⁶ Nekztanaqui Sauluqui tsucžcu cjatinzka tjonziča niž curpuqui. Nekztanaqui cjičičha:

—Wejt jiliri, Ćčhulu wejr paajum cjee amya?

Yooz jiliriqiu cjičičha:

—Zaažna. Watja luzna. Jalla nicju amquiz kjana čhiita cjequičha čhjulut paasalaja, jalla nii.

⁷ Saulužtan chicapacha ojklajñi žoñinacaqui ancha tsucchiča. Ninacaqui nonzizakazza nii jora čhižquini. Pero ana cherčičha jecmi.

⁸ Jalla nekztanaqui Sauluqui žaaziča yokquiztan. Jalla nuž zaažcu čhjujquiqui cjetziča, pero ana wira cheri atčičha. Jalla nižtiquiztan Sauluž kjarcu tanžcu Damasco watja chjitchičha nižtan čica ojklajñi žoñinacaqui.

⁹ Jalla nii wajtquin čhjep maj ana cherñi žejlčičha. Nižaza ana čhjeri lujlñi anaza kjaz licñi žejlčičha.

¹⁰ Jalla Damasco wajtquin tsjii Ananias cjita Yoozquin criichi žoñi želatča. Nii Ananiasquiz Yooz jiliriqiu jecžquičičha wiiquin, tuž cjican:

—¡Ananías!

Jalla niiqui kjaaziča, tuž cjan:

—Wejt Jiliri, tekziča wejrqui.

¹¹ Nekztanaqui Yooz Jiliriqui cjichiča:

—Zaažna. Sok'o cjeta call kjutni oka. Nekztan Judas kjuyquiz pewczna, tuž cjan: “¿Saulo, Tarso wajtchiz zoñi anaj zejlya?” Jalla nuž pewcznaquiča. Nii Sauluqui Yoozquin mayzican želaquiča.

¹² Tsjii wiiquin chjuužcan, tiža cherchiča Sauluqui. Tsjii Ananías cjeta zoñiqui nižquiz luzziča. Jalla nuž luzcu kjaržtan niž juntuñ lanziča wilta cherajo. Chjuužcan Sauluqui jalla nuž cherchiča.

¹³ Jalla nuž nonžcu, Ananías cjichiča:

—Wejt Jiliri, ti zoñžquiztan wacchi quintunaca nonchinča. Jerusalén wajtquiz juc'anti anawali paachiča amquin criichinacžquiz.

¹⁴ Anziqui tekzpacha tjonzizakazza. Timplu chawc jiliriž tjaata ortinchiz tjonchiča, tjapa amquin rispitni žoñinaca tanžcu preso chjitsjapa.

¹⁵ Pero Jesucristo Jiliriqui cjichiča:

—Oka amqui. Wejrqui ti zoñi illzinča, wejt puntuquiztan parlažo. Yekja nacionchiz žoñinacžquizimi nižaza ninacž jilirinacžquizimi nižaza Israel nacionchiz žoñinacžquizimi, jalla nuž wejt puntuquiztan parlaquiča tiiqui.

¹⁶ Jalla niiqui wejt puntuquiztan parliñiž cjen ancha sufraquiča. Wejrqui nižquiz intintiskatača jalla niž sufris puntuquiztan.

¹⁷ Jalla nekztanaqui Ananiasqui ojkičiča jakziquin Saulo želatčhaja, jalla nicju. Saulužquin luzcu, kjaržtan niž juntuñ lanziča, tuž cjan:

—Saulo, jila, amiž jiczquiz tekz tjonan Jesusa Jiliriqui amtan zalčiča. Jalla nii Jesusa Jiliriqui wejtquin mantižquiča, am wilta cherkatajo, nižaza Espiritu Santuž am kuzquiz luzajo.

¹⁸ Nii orapacha Sauluž chjujquiztan ch'iz cjažpažtakaz tjojsičiča. Nekztan wilta cherñi cjisičiča. Nekztanaqui Sauluqui žaaziča, nižaza bautista cjisičiča.

¹⁹ Jalla nekztanaqui čheri lujlžcu, wilta azi tanzičiča. Nekztan tsjii kjaž maj Damasco cjeta wajtquin kamčiča Yoozquin criichinacžtan.

SAULUQUI JESUSIZ PUNTUQUIZTAN PALJAYCHICHA

²⁰ Jalla nuž kamcan Sauluqui ajcz kjuyanacquiziqui Jesusiz puntuquiztan paljaji kallantichiča tuž cjan:

—Jesusaqui werar Yooz Majchpanča.

²¹ Nii nonžni žoñinacaqui ispantichiča, tuž cjan:

—Tii zoñiqui Jerusalén wajtquin ojklayčiča Jesucristužquin rispitni žoñinaca tani. Tekzizakaz tjonchiča Jesucristužquin criichinaca tanažlani. Nižaza preso chjichazlani, timplu jilirinacžquin intirjizjapa. Jalla nii žoñipanča, žana jaa?

²² Pero Sauluzti juc'anti tjup kuzziz Yooz taku parličičiča. Juc'anti juc'anti atipni taku-nacžtan parličičiča. Zuma kjana intintiskatchičiča, Jesusa Yooziž cuchanžquita Cristuča, jalla nii. Jalla nuž intintiskatan, nii Damasco wajtquin kamni judionacami kuz inakaz turwaysi quirchiča.

SAULUQUI ATIPCHICHA

²³ Tsjii kjaž majquiztan nii željni judio žoñinacaqui palt'ichiča Saulo conzjapa.

²⁴ Nii žoñinacž conz palt'ita zizziča Sauluqui. Majiñami weenamı wajtž zana tjewsnatča, čhjulorat wajtquiztan ulnačhaja, jalla nii ora Saulo conzjapa.

²⁵ Pero tsjii ween nii wajtchiz criichinacaqui tsjii pajk canastiquiz yaažcu, Saulo chji-junžquičiča. Tsjii pajk alto murallaž muyuntitatača nii watjaqui. Jalla nii juntuñ chjijunchičiča zawncchuc. Jalla nuž atipassiča Sauluqui.

SAULUQUI JERUSALENQUIN QUEJPCHICHA

²⁶ Sauluqui Jerusalén watja quejpžcu Yoozquin criichi žoñinacžtan ajcz pecatča. Nii criichinacazti Saulužtan ajcz eksiča. “Ana ultimu Yoozquin criichižcaa” cjan kuzquiz pinsičiča.

²⁷ Jalla nuž cjenami Bernabé cjeta jilaqui Saulo chjtichiča, apostolonacžtan zalzjapa. Nekztanaqui Bernabequi apostolonacžquin mazziča, jaknužt Saulo jiczquiz ojkan Jesucristo Jiliržtan zaltčhaja, jalla nii. Nižaza jaknužt Jesucristo Jiliriqui Saulužquiz paljay-chičalaja, nii mazi. Nižaza jaknužt Damascuquin Sauluqui Jesucristo puntuquiztan tjup kuzziz parličhaja, jalla nii mazzizakazza.

²⁸ Nekztanaqui Sauluqui Jerusalén wajtquin ojklayčiča; nižaza hermanonacžtan kamčiča.

²⁹ Jalla nuž žejlcan Sauluqui Jesucristuž puntuquiztan tjup kuzziz paljajychičha. Nižaza griego taku chiiñi judionacžtan ch'aascan parlichičha. Nii žoñinacaqui Saulo conz pecatčha.

³⁰ Jalla nii quintu zizcu, nii parti criichinacaqui Saulo chjitchičha Cesarea cjita wajtquin. Jalla niwjctan Tarso cjita watja cuchanchičha.

³¹ Jalla nekztanaqui nii timpuqui walikaz želatčha iclizanacami, Judea yokquin žejlñi iclizanacami, Galilea yokquin žejlñi iclizanacami, Samaria yokquin žejlñi iclizanacami. Jalla nuž tjappacha walipantačha. Yoozquin criichinacami Yooz Jiliri walja tjapa kuzziz cjsnatčha. Rispitñi kuzziztačha. Nižaza Espiritu Santuqui ninaca kuzñitačha, cuntintu kamajo. Jalla nižtiquiztan walja yapchičha Yoozquin criichinacaqui.

ENEAS CHJETINTA

³² Nižaza Pedruqui criichi žoñžquiztan žoñi tjontjonžcan ojklayatčha. Nižaza Lida wajtchiz Yooz parti žoñinacžquiz tjonžñi ojkchičha.

³³ Jalla nicju Eneas cjita žoñžtan zalchičha. Eneasqui quinsakal wata laa zuchu želatčha, tјajz ajpžquiz želatčha.

³⁴ Nekztanaqui Pedruqui nižžquiz cjichičha:

—Eneas, Jesucristuqui am čhjetnaquičha. Zaažna. Am tјajz zquiti zumpacha chjinžna. Nii orapacha Eneasqui žaazičha.

³⁵ Nekztanaqui nii Lida wajtquiz kamñi žoñinacami nižaza Sarón wajtquiz kamñi žoñinacami nii zuch žoñi čhjetinta cherchičha. Nekztanaqui niž tuqita ejpnacž cuztu-rumpinaca eccu, Yooz Eј Jiliržquin criichičha. Nižaza Yooz kamañchiz cjisičha.

DORCAS CJITI ZON JACATATSKATTA

³⁶ Jalla nii timpuzakaz Jope cjita wajtquin tsjaa Yoozquin criichi žon želatčha, Tabita cjiti. Griego tawkquiz Dorcas cjiti tјuuchiztačha. Naa maatak žon zuma paatanaca paacan zuma kamiñpantačha, nižaza t'akјir žoñinaca okzniñitačha.

³⁷ Jalla nii timpu Dorcas cjiti žonqui laa cјscu, ticzinčha. Ima tјatcan naaža curpu awjžcu, tsјii kјuyquiz tsewcta pisuquin chјichtatačha.

³⁸ Jope watjaqui Lida žcatillatačha. Jalla nii Lida wajtquin Pedruqui želatčha. Jalla nuž zizcu nii Jope wajtchiz hermanonacaqui pucultan žoñinaca cuchanchičha Pedružquin rocajo, tuž cјcan:

—Apuraj tјonla, ana enenžcu.

³⁹ Nekztanaqui Pedruqui tsјtscu ninacžtan ojkchičha. Jalla nicju irantižcu nekztan Pedruqui chјichtatačha, Dorcas curpu majcžta kјuyquin. Nii kјuyquin Pedružtan chica žejlcan žew maatakanacaqui kaatčha. Nižaza ninacaqui Pedružquiz tјeezičha Dorcas paata zquitinaca, nii.

⁴⁰ Jalla nekztanaqui Pedruqui tjappacha nii parti žoñinaca ulanskatchičha. Ninacaž ulantiquiztan quillžcu Yoozquin mayizichičha. Naa ticzin žona curpu kјutñi cheržcu chiičičha, tuž cјcan:

—Tabita, žaažna.

Jalla nižtiquiztanaqui naa ticzin žonqui čhјucqui cјetzinčha. Nekztanaqui Pedro cheržcu, julzinčha.

⁴¹ Pedruqui naaža kјarcu tanzičha, nekztan tsјtskatchičha. Nuž tsјtskatzcu Pedruqui parti јilanacami nižaza žew maatakanacami kјawzičha. Nekztan Dorcas žejtchin tјeezičha.

⁴² Tјapa nii Jope wajtchiz žoñinacaqui nii quintu zizzičha. Jalla nižtiquiztan walja Yoozquin criichičha.

⁴³ Pedruqui tsјii kјaž maj nii wajtquiz kamchičha, Simón cjita žoñž kјuyquiz. Nii Simonaqui zkizinaca koñž langžñitačha.

10

PEDRUŽTAN CORNELIUŽTAN

¹ Cesarea wajtquiz tsјii Cornelio cjita žoñi želatčha. Niiqui zultatž јiliritačha, Italian cjita regimientoquiztan.

² Jalla nii јiliriqui nižž familianacžtanpacha arajpach Yooz rispitiñitačha. Nižaza Yoozquin mayiziñitačha. Nižaza pori judio žoñinacžquiz walja paaztan yanapt'ichičha.

³ Tsјii noojiqui majñakak ora chјuuztažokaz tsјii Yooz anјila cherzičha, kјanapacha. Nii anјilaqui nižžquin tјonžquichičha tuž cјcan:

—јCorneliol!

⁴ Corneliužti tsucchi anјilž kјutñi cherzičha. Nekztan pewczičha:

—Wejt јiliri, čhјulutaya? —cјcan.

Nekztanaqui nii anјilaqui kјаazičha, tuž cјcan:

—Amqui Yooz Ejpžquin mayiziñamča. Nuž naychiča Yooz Ejppui. Nižaza am t'akjir zoñinacžquiz yanaptanaca naychiča. Jalla nuž nayžcu, Yooz Ejpqui cuntintuča. Nižaza am cjuñža.

⁵ Jaziqúi Jope wajtquin zoñinaca cuchanžca, Simona kjawzjapa. Nii Simonaqui Pedro cjitazakazza.

⁶ Pedruqui yekja Simonžtan alujtača. Nii yekja Simonaqui zkizi koñz langžñi zoñiča. Niiž kjuya pajk kot žcati žejlča. Nii Pedruž amquiz chiyaučiča, čjulut am paas cječhaja, jalla nii. —Jalla nuž čiičiča nii anjilaqui.

⁷ Nii anjilaž ojektanaqui, Corneliuqui pucultan piyunanaca kjawziča. Nižaza atintiñi zultatunacžquiztan tsjii zuma cumpliñi zultatu kjawziča. Nii zultatuqui Yoozquin kuzziz-zakaztača.

⁸ Nekztanaqui Corneliuqui nii kjawžta zoñinacžquiz tjapa quint'ičiča. Jalla nekztan Jope wajtquin cuchančiča.

⁹ Niiž jaka tažuqui nii čjepultan cuchanta zoñinaca Jope kjutñi ojkčiča. Jope watja žcatiž cjen, nii oraqui Pedruqui kjuy juntuñta patiuquin yawchiča Yoozquin mayizi. Nii oraqui taypurutacha.

¹⁰ Jaziqúi Pedruqui anča čjери eeskatatča, lujlz pecatča. Jalla nuž čjери kisan, Pedruqui nii tsewcta patiuquin tsjii chjuužtažokaz cherziča.

¹¹ Jalla tuž cherziča: arajpacha cjetzi tsjii pajk mantilažtakaz chjijwžquičiča yokquin. Nii mantilaqui pajkpic punta žcucžintača.

¹² Jalla nii mantiliquiz tjapaman pajkpic kjojanacchiz animalanacami, zkoranacami, wežlanacami zelatča.

¹³ Nekztanaqui Pedruqui tsjii jora nonziča, tuž cjican:

—Pedru, tsijtsna. Conžna. Lujlzna.

¹⁴ Pedruzti kjaaziča, tuž cjican:

—Wejt Jiliri, nižta anal paasača. Nii punta animalanaca ana lulasača. Lii quintrača. Jaziqúi nižta anal lulasača wejrqui.

¹⁵ Jalla nuž kjaaztiquiztanaqui nii joraqui wilta čiižquičiča, tuž cjican:

—Yoozqui amquiz čiičiča, “Zumača niiqui, lujlzjapa” cjican. Jalla nii Yooziž čiiita taku anam amqui nicasača, “Ana zumača lujlzjapa. Lii quintrača” cjicanaqui.

¹⁶ Jalla tižta čjep wilta watchiča. Nekztanaqui nii mantilaqui arajpach kjutñi wayti-tatača.

¹⁷ Nekztanaqui Pedruž kuzquiz pinsičiča, tuž cjican: “Nii chjuužtakaz cherta žjakužt čjii? Čjulut Yoozqui wejtquiz intintiskatž pec?” Nii orapacha Simonž kjuya pewcpewcziča Corneliuž cuchanžquita zoñinacaqui. Nekztanaqui Simonž kjuy zanquin irantičiča.

¹⁸ Irantižcu, nii zoñinacaqui altu joržtan pewcziča, tuž cjican:

—¿Simón anaj tekz alujya? Simonž tsjii tjuuqui Pedro cjetača.

¹⁹ Pedruqui tirapanž pinsatča nii chjuužta puntuquiztan. Jalla nuž pinsan, Espiritu Santuqui niž kuzquiz cjichiča:

—Cheržca, Pedro. Čjepultan zoñinaca am kjurča.

²⁰ Tsijtsna. Chjijwžca. Ana paysnakan ninacžtan oka. Wejrčha ninaca cuchanžquichintqui.

²¹ Jalla nekztanaqui Pedruqui chjijwžquičiča, nii Corneliuž cuchanžquita zoñinacžtan zalí. Ninacžquiz cjichiča:

—Ančhucqui tsjii zoñi kjurča. Wejrčha niitqui. Čjululquin ančhucqui tjonch-inčhuctay?

²² Nekztan ninacaqui kjaaziča, tuž cjican:

—Cornelio cjeta zultatž jiliriž cuchanžquita tjonuča wejrnacqui. Niiqui walja rispitta zoñiča. Nižaza niiqui Yooz rispitičha. Tjapa judío zoñinacaqui niž zuma kamañ wira quint'iñiča. Tsjii Yooz anjilaqui nižžquin mantičiča, tuž cjican: “Zoñinaca cuchna, Pedro cjetaqui tekz am kjuyquiz kjawzjapa. Pedruž čiiita taku nonžna amqui”. Jalla nuž Corneliužquiz cjichiča nii Yooz anjilaqui.

²³ Nekztanaqui Pedruqui kjuyquiz kjawziča atintita cjisjapa. Tsjii arama nekz tjajžinčiča. Jaka tažuqui Pedruqui ninacžtan ojkčiča. Nižaza tsjii kjaž Jope wajtchiz hermanonacaqui nižtan chica ojkčiča.

²⁴ Niiž kat tažu Cesarea watja irantičiča, Corneliuž kjuyquin. Jalla nieju Corneliuqui tjewznatča niž parintinacžtan, nižaza tsjii zuma mazinacžtan. Corneliuqui ninaca kjawziča, ninacazakaz Pedruž taku nonzjapa.

²⁵ Pedruž kjuyquin luztan Corneliuqui nižtan zalčiča. Nekztan Pedruž yujcquiz quillziča, nii amzjapa.

²⁶ Pedruzti tsijtskatchiča, tuž cjican:

—Tsijsna amqui. Wejrmi am irat zoñizakaztëcha. Anaëha Yooztakaztëcha.

²⁷ Jalla nuž judiož lii cjiëha. Pero Yoozqui wejr intintiskatchiëha. Anziqúi ëhjul zoñimi Yooz partiquiz cjesaëha, nii. Jalla nižtiquiztan wejrqui anal chiiz waquizuëha, “Nii zoñiqui ana Yooz partiquiz cjesaëha” cjanaquì.

²⁸ Pedruquì ninacžquìz cjiëhiëha:

—Anëhucquì zizza. Tsjiì judío zoñiqui yekja wajtchiz zoñžtan anaž mazi cjisnasaëha, anaž ninacžtan ajcznasaëha. Nižaza yekja wajtchiz zoñž kjuyquìn anaž tjonznasaëha. Jalla nuž judiož lii cjiëha. Pero Yoozqui wejr intintiskatchiëha. Anziqúi ëhjul zoñimi Yooz partiquiz cjesaëha, nii. Jalla nižtiquiztan wejrqui anal chiiz waquizuëha, “Nii zoñiqui ana Yooz partiquiz cjesaëha” cjanaquì.

²⁹ Nekztan amiž kjawžtiquiztan wejrqui ana kjaž chižcu tjonchinëha; judionacž lii quintra cjenami ana nicchinëha. Pero ziz pecuëha, žkjažtiquiztan wejr kjawžinëhucta anëhucquì?

³⁰ Jalla nekztanaquì Corneliuquì kjaaziëha tuž cjan:

—Ažk pajkpic tjuñi wattan tii majñakak ora wejrqui kjuyquìz želatüëha, Yoozquìn mayizican, nižaza ayunazcan. Jalla nuž želan, tsjiì walja lližni žquitchiz zoñiqui wejtquìz jeczquichiëha.

³¹ Nižaza wejtquìz cjiëhiëha: “Cornelio, Yoozquì am mayizita nonziëha. Nižaza amiž t'akjir zoñinacžquìz okztanaca cjuñziëha.

³² Jaziqúi Jope wajtquìn zoñinaca cucna, Simona zjiëcajo. Nižaza niž tsjiì tjuuquì Pedro cjiëtaëha. Yekja Simonž kjuyquìz alujazi žejlpachaëha, pajk kot žcati. Nii yekja Simonaquì ziki kož langžni zoñiëha. Nii Pedruquì tjonžcu, amtanž parlaquičiëha”. Jalla nuž wejtquìz čhiëhiëha nii anjilaquì.

³³ Jalla nuž nii čhiita tawk jaru, apura cuchanchinëha am kjuri. Walim tjonchamëha. Jaziquì tekzi tjappacha wejrnacquì Yooz Ejpž yujcquìz žejlëha. Jaknužt Yoozquì wejrnacalta amquìz cjiëhaja, jalla nii tjappacha nonz pecasuëha wejrnacquì.

PEDRUZ PALJAYTA TAKUNACA

³⁴ Jalla nekztanaquì Pedruquì paljayi kallantichiëha, tuž cjan:

—Jaziqúi intintazuëha. Ultim weraraž, Yoozquì tii muntuquìz žejlñi zoñinaca anaž yekja yekja illilla.

³⁵ Yoozquìn rispitznaquìž niiquì, nižaza Yooz kuczama kamaquìž niiquì, Yoozquì jakzilta ëhjul wajtchiz zoñžquìzimi asiptasaëha. Anziqúi jalla nuž intintazuëha.

³⁶ Yooz Ejpquì Israël zoñinacžquìz amigo pajassiëha. Nekztan niž zuma kamañ puntu zizkatchiëha. Jesucristuž cjen zuma cuntintu kuzziz cjisni atasaëha, jalla nii. Jesucristuëha ëhjulquiztanami chekan jiliriqúi, wali azziz.

³⁷ Anëhucquì zumapanž zizza, jaknužt judío yokquìz watëhaja, jalla nii. Primero Juanquì Yooz taku mazmaziëha. Nižaza zoñinaca bautissiëha. Nekztanaquì Jesucristuquì niž persun Galilea yokquìz obranaca tjeezni kallantichiëha.

³⁸ Jesusaquì Nazaret wajtchiz zoñitaëha. Yooz Ejpquì nižquìz walja Espiritu Santuž azi tjaachiëha. Jalla nižtiquiztan ojklaychiëha, walinaca paacan, nižaza zajraž tanta zoñinaca liwriican. Jalla nuž paachiëha, Yooz Ejpžtan nižtan čhipapahaž nuž cjen.

³⁹ Tjapa Jesusaž ojklaytanacami paatanacami cheržcu, jalla nii maznasaëha wejrnacquì, Judea yokaran ojklaytanacami, nižaza Jerusalén watjaran ojklaytanacami. Wiruñaquì Jesusaquì cruzquìz ch'awctiquiztan conta ticziëha.

⁴⁰ Jalla nuž contiquiztan ëhjep majquiztan Yooz Ejpquì Jesusa jacatatskatchiëha. Jacatatskatžcu Yoozquì wejnacaquìz parizizkatchiëha.

⁴¹ Jesusaquì parti zoñinacžquìziquì ana parizichiëha. Antiz wejnacaquìz alaja parizichiëha. Nižaza jecnacat Yooz Ejp illžtëhaja, jalla ninacžquìz parizichiëha Jesusaquì. Nižaza wejrnacmi Jesusaž jacatattiquiztan nižtan juntu lulassinëha, nižaza kjažmi juntu licassinëha.

⁴² Nekztanaquì Yooz Ejpquì tii Jesusapacha wali Juez Jiliržquìn utchiëha. Juez cjen nii Jesús chawc Jiliriqúi žejtni zoñimi ticzi zoñimi juzjizaquičiëha. Jalla nii mazmazñijapa wejrnac cuchanzquichiëha Jesusaquì.

⁴³ Nižaza tuquitanpacha Yooz taku parliñinacaquì Jesusiž puntuquiztan parlichipanëha, tuž cjan: “Jakžiltat nii Jesusižquìz tjapa kuztan criyaëhaj niiquì ujnacquiztan pertuntaž cjequičiëha”.

ESPIRITU SANTUŽ LUZTA

⁴⁴ Jalla nuž Pedruž čhian, Espiritu Santuquì tjapa niž čhiita taku nonžni zoñinacžquìz luziëha.

⁴⁵ Jalla nuž cjen nii Pedružtan tjonchi judío zoñinacaquì ispanitichi quirchiëha, Espiritu Santuquì tjaatazakaztaëha ana judío zoñinacžquìziquì.

⁴⁶ Espiritu Santo tanžcu, nii zoñinacaquì yekja ana pajta taku čhiichiyatëha. Nižaza Yoozquìn waljaž alawatëha. Jalla nižtiquiztan ispanitichi cjiësiëha nii žejlñi judionacaquì.

⁴⁷ Nekztanaqui Pedruqui cjichicha:

—Wejtnacaquiz Espiritu Santo tjaatacha. Nižaza tinacžquiz Espiritu Santo tjaatazakazza. Jaziqui tinaca bautista cjisjapa, žjec žoñit atajas?

⁴⁸ Jalla nekztanaqui Pedruqui mantichicha, Jesucristuž tjuuquiz tinaca bautista cjejajo. Nekztanaqui nii žoñinacaqui Pedružquiz rocchicha tsjii kjaž maj ninacžquiz kam'tajo.

11

PEDRUZ JUDIO ŽOÑINACŽQUIZ MAZTA

¹ Nii Judea yokaran željñi illzta apostolonacami, jilanacami, jalla ninacaqui quinto nonchicha, yekja wajtchiz žoñinacaqui Yooz taku catokchicha, jalla nii.

² Pedruqui Jerusalén watja quejžquichicha. Jalla nuž quejptan parti judío criichinacaqui Pedruž quintra chuchchicha,

³ tuž cjican:

—¿Kjažtiquiztan učhum lii quintra amqui yekja wajtchiz žoñinacžquin tjonžñi ojkcham-tajo? ¿Kjažtiquiztan učhum lii quintra ninacžtan lujlcham-tajo?

⁴ Nekztanaqui Pedruqui nii parti judionacžquiz quint'ichicha, jaknužt watčhaja primerquiztanpacha Corneliuž puntu, jalla nii. Tuž cjican, quint'ichicha:

⁵ —Wejrqui Jope wajtquin želatuča. Yoozquin mayizican, tsjii chjuužtažoka cherchinča, jalla tižta. Tsjii pajk mantilažtakaz tsewctan chjijwžquichicha. Niiž pajkpic puntuquiztan žcucžintatača. Jakziquiztažlaj wejrqui, jalla nekz wejr tirichuc irantižquichicha.

⁶ Jalla nuž irantižquitanaqui zumpacha cherzinča, čhjulut nii kjuyltan žejl, cjican. Jalla nuž wejrqui cherchinča tјapaman pajkpic kjojchchiz animalanaca, k'it animalanacami, zkoranacami, wežlanacami, jalla nuž cherchinča.

⁷ Nii orazakaz tsewctan tsjii žoñž joražtakaz nonzinča. Wejtquin chiižquichicha tuž cjican: “Pedro, tsijtsna. Conžna. Nižaza lujlžna”.

⁸ Wejrzi kjaazinča, tuž cjican: “Wejt Jiliri, nižta anal paasača. Nii punta animala ana luli atasacha, am lii quintrača. Jaziqui nižta anal paasača wejrqui”.

⁹ Jalla nuž kjaaztiquiztanaqui nii joraqui wiltazakaz chiižquichicha, tuž cjican: “Yoozqui chiičhicha, ‘Zumaž tiiqui lujlžjapa’ cjican. Nii Yooz zuma cјitaqui ana amqui ‘Ana lulasaž’ cjeella. Yooziž čhiita taku anam nicz waquiziča, ‘Ana lulasaž. Lii quintrača’ cjicanaqui”.

¹⁰ Jalla nuž čhjep wilta watchiča, nekztanaqui nii mantilaqui waytitatača tsewchuchpacha.

¹¹ Nekztanaqui čhjepultan žoñinacaqui weriž alujta kjuyquiz irantižquichicha. Cesarea wajtquiztan cuchantatača wejr kjuri.

¹² Nižaza Espiritu Santuqui wejtnan chica ojkchicha. Jalla nicju irantižcu, tјappacha wejrnacqui tsjii žoñž kjuyquiz luzazzinča.

¹³ Nižaza nii kjuychiz žoñi qui wejtnacaquiz quint'ichicha, jaknužt niiž kjuyquiz tsjii anjila chertčhaja, jalla nii. Nii anjila tsijtsi cherchiquichicha. Nižaza nii anjilaqui niižquiz tuž cjichiquichicha: “Jope wajtquin žoñinaca cuchanžca, Simona kjawznajo. Niiž tsjii tjuuqui Pedro cјitacha.

¹⁴ Jalla niiqui amquiz chiyakuichicha, jaknužt ammi nižaza tјapa am familianacami liwriita cjechaja, jalla nuž”.

¹⁵ Nekztanaqui wejrqui ninacžquiz parli kallantitan, Espiritu Santuqui ninacžquiz luzziča, jaknužt tuquiqui učhumnacaquiz luztčhaja, jalla nuž.

¹⁶ Jalla nekztanaqui wejrqui Jesusaž niiž tuquičhiita taku cjuñžinča. Jesucristo Jiliri qui cjichicha, “Juanqui kјazan bautisñipantača. Ančhucqui antis Espiritu Santužtan bautistaž cjequičha”.

¹⁷ Jesucristo Jiliržquiz criichiž cjen Yoozqui učhumnacaquiz Espiritu Santo tjaachiča. Nižta iratapacha Yoozqui ninacžquiz Espiritu Santo tjaachiča. Jaziqui wejrqui anal Yooz quintra cjesača. —Nuž quint'ichicha Pedruqui.

¹⁸ Jalla nii quintu nonztiquiztan nii Jerusalén wajtchiz criichinacaqui ana iya chutchiča. Nužquiz ch'ujquichicha. Yoozquin alawazziča, tuž cjican:

—Nižazakaz yekja wajtchiz žoñinacaqui persun ujnaca pajžcu, nižaza persun kuznaca campijžcu, jalla nekztan ninacaqui persun ujnacquiztan pertuntazakaz cjequičha. Nižaza wiñaya Yooztan kamaquičha.

CRIICHI ŽOÑINACA WICHANZI

¹⁹ Esteban conžcuqui, yekja Yoozquin criichinaca zakaz walja tanzquin cjissiča. Jalla nuž cjen criichinacaqui yekja watjanacquin atipassiča. Fenicia, Chipre, Antioquia, jalla

nii yokanac kjutñi wichanzicha. Jalla nicju liwriñi Yooz takunaca parlichicha. Judío zoñinaczquiz alaja parlichicha, ana yekja zoñinaczquiziqui.

²⁰ Yekjapa criichi jilanacaqui Chipre yokquiztan nižaza Cirene yokquiztan ojkhicha. Nekztanaqui nii yokanacquiztan Antioquia watja irantichicha. Nekztan Antioquia wajtquin yekjapa criichinacaqui ana judío zoñinaczquiz parlichizakazza Liwriñi Jesucristo Jilirž puntu takunacquiztan.

²¹ Jesucristo Jilirž aziqi ninaczquiztača. Nižaza nii parlitiquiztanaqui walja zoñinacaqui tuquita cuzturumpinaca jaytižcu, Jesucristo Jiliržquin tjapa kuztan criichicha.

²² Nekztanaqui Jerusalén iclizziz criichinacaqui nii quintu nonchicha. Jalla nii quintu nonžcu, Bernabé cjita zoñi cuchanchiča Antioquia watja.

²³ Jalla nicju irantižcu, Bernabequi cherchicha, jaknužt Yoozqui nezk žejlñi criichinaczquiz okztchaja, jalla nii. Nii criichinacaqui walja cuntintutača. Jaziqui Bernabequi tjappachquiz chiižinchiča, tuž cjan:

—Yoozquin criichinaca, zuma tjapa kuztan Yooz jiczquiz kamaquicha.

²⁴ Nižaza Bernabequi wali zuma zoñitača. Niiqui Espiritu Santužtan tsjii kuzziztača. Nižaza Yoozquin tjapa kuzziztača. Jalla nuž zuma kamcan walja zoñinaca Yoozquin macjatskatžquichicha Bernabequi.

²⁵ Jalla nekztanaqui Bernabequi Tarso watja ojkhicha Saulo kjuri. Saulo wajtžcu Antioquia chjitchicha.

²⁶ Jalla nicju tsjii wata intiru criichinacztan žejlchiča. Tama zoñinaczquiz Yooz taku tjaajinchiča. Antioquia wajtquiziqui criichinacaqui cristiano tjuuchiz cjsiŕiča. Tuquiqui nižta tjuuchiz ana želatča.

²⁷ Jalla nii timpuqui tsjii kjažultan Yooz taku parliñi zoñinacaqui Jerusalén wajtquiztan Antioquia ojkhicha.

²⁸ Tsjiiqui Agabo cjitatača. Niiqui nii ajczñi criichinacz taypiquiz tsijtsiča. Tsijscan Yooz Espiritu Santuqui nii Agabo chiičkatchiča, tuž cjan:

—Tjapa tii yokquiz wali čhjer mach'a želaquicha.

Jalla tižta watchiča, Claudio cjita chawc jiliriz mantiz timpuqui.

²⁹ Jalla nižtiquiztan nii Antioquia wajtchiz criichinacaqui acuerdo luzziča Judea wajtchiz jilanaczquin tsjii yanapñi cuchanzjapa. Zapa mayniqi jaknužt onanchucažlaja jalla nuž onanchiča, nii Judea wajtchiz criichi jilanaczquin yanapzjapa.

³⁰ Nižaza nii onantanaca apaychiča Judea wajtchiz icliz jilirinaczquin. Bernabežtan Saulužtan nii apayanacaqui chjitchicha.

12

JACOBO CJITA APOSTOL CONTACHA

¹ Jalla nii timpu Herodes cjita chawc jiliriqui yekjap Yoozquin criichi zoñinaca tanchiča.

² Nižaza Herodesqui Jacobo conkatchiča pajk cuchillžtan. Jacobqui Juanž jilatača.

³ Jalla nuž contiquiztanaqui judío zoñinacaqui muzpa chipchipchiča. Jalla nuž nayžcu Herodesqui Pedro preso tanchizakazza. Jalla nii oraqi ana liwaturchiz t'anta lujlž pijstatača.

⁴ Pedro preso tantiquiztan, carsilquiz chawctatača. Carsilquiz pajkpic t'ak zultatunaca wijilñi uchtatača. Zapa t'akaqui pajkpic zultatuchiztača. Pascua pijsta pastanalla Herodesqui Pedro jwes pinsichiča, nii Jerusalén wajtchiz zoñinaczquiz tjeezjapa.

⁵ Nuž Pedruqui tirakaz carsilquiz chawcta želatča, zultatuž cwitita. Nii parti Yoozquin criichi jilanaca cullaquinaca nižtajapa walja tjapa kuztan Yoozquin mayizatča.

PEDRO CARSILQUIZTAN LIWRIITA

⁶ Jaka tažuqui Herodesqui Pedro jwes pecatča zoñinaczquiz tjeezjapa. Ima jwesani nii ween Pedruqui tjaatča, carinžtan čhejta pucultan zultatž taypiquiz. Yekja zultatunacaqui carsil zanquiz wijilatča.

⁷ Jalla nii weenpacha tiripintit Yooz anjilaqui tjonchiča. Nižaza nii carsil kjuyltan muzpa waljaž kjanchiča. Nekztanaqui nii anjilaqui Pedruž latuquiztan lanziča. Nuž lanžcu tjaji wajtskatchiča. Nekztanaqui Pedružquiz paljaychiča:

—Uri žaažna, —cjan.

Jalla nii orapacha Pedruž kjara čhejta carinaqui jutztoka tjojtsiča.

⁸ Nižaza nii anjilaqui cjichiča:

—Cinturuna zumpacha yajkzna. Nižaza am čhjata čhjatzna.

Jalla nuž Pedruž paan, nii anjilaqui cjichiča:

—Am irs irsna. Wejt wirquiz apžca.

⁹ Nekztanaqui Pedruqui anjilž wirquizpacha ulanchiča carsilquiztan. Nii ora Pedruqui werera ana werera, ana zuma zizi atchiča. “Chjuuznoka wejtrqui” cjan pinsatča.

¹⁰ Jalla nekztanaqui primera wijilñi zultatu watchiicha. Nekztanaqui nii jaru wijilñi zultatu watchizakazza. Nekztanaqui carsil zanquin irantichiicha. Nekztan carsil jir chawjczqui jutztoka cjetsiicha. Jalla nekztanaqui callquinpacha ulanchiicha, nižaza ojkchiicha. Jalla nuž cjen yekja callquin zina ectaicha. Anjilaqui nužquiz jutztokaz katchiicha.

¹¹ Pedruqui nekztan zumpacha naaziicha, carsilquiztan liwriita, nii. Nekztanaqui cjichiicha:

–Ultim werara liwriitaž wejrqui. Anal chjuuznukalala. Wejt Yooz Ejp Jiliriqiu niiz anjila cuchanzquichiicha wejr liwriizjapa Herodes kjarquiztan, nižaza nii anawali paaz pecñi judio žoñinacz kjarquiztan.

¹² Jalla nuž pinsican, Pedruqui María kjuya ojkchiicha. Naa Mariiqui Juanž maataicha. Juanž tsjii tjuuqui Marcos cjitazakaztaicha. Jalla naaza kjuyquin walja Yoozquin criichi žoñinacaqui ajczitaicha, nii ora Yoozquin mayizaticha.

¹³ Pedruž kjuy patio zana t'okt'okan, tsjaa tur cullaqui Rode cjiti ulanzquichinicha, ject tjonchi, cjican.

¹⁴ Pedruž jora čhajzcu, ancha cuntintu zajtchinicha partinaczquin mazñi, Pedruča tjonchi, cjican. Tjatzintaicha, nii patio zana cjetzinz.

¹⁵ Nii quinto nonžcu, criichi žoñinacaqui cjichiicha:

–jAmqui lucuratamča!

Jalla nuž chiyani, naaqui werarapanča cjichinicha. Nii partinacazti cjichiicha:

–Anaž nii cjesaicha. Niiz animužlani anjilažlaj.

¹⁶ Pedruzti tira zanquž t'okžinichiicha. Nekztan chawjcz cjetžinichiicha. Pedro cheržcu, walja tsucchi cjissiicha.

¹⁷ Pero Pedruqui kjaržtan siñala utchiicha nii ajczi žoñinaca ch'uj cjeajajo. Jalla nekztanaqui Pedruqui quint'ichiicha, jaknužt Yoozqui nii carsilquiztan liwriitčhaja, jalla nii. Nižaza cjichiicha:

–Ančhucqui nužuzakaz quint'aquičha Jacob jilžquin nižaza parti criichinaczquin. Wejr okaž, –cjichiicha.

Jalla nekztanaqui Pedruqui ulanchiicha, yekja kjutñi ojkzjapa.

¹⁸ Tjuñiž tewjctanalla, Pedro ana žejlñi cheržcuqui, nii wijilñi zultatunacaqui ancha tsucchiicha, nižaza kuz turwayskatchiicha. Pedruqui jaknužt ulantčhaja, jalla nii ana wira jaknuž zizi atchiicha.

¹⁹ Nekztanaqui Herodesqui Pedro kjuri cuchanchiicha. Ana wachi atchiicha. Jalla nekztanaqui Herodesqui nii wijilñi zultatunaczquiz zumpacha pewcpewczčiicha. Jalla nuž pewc pewczcu, nii zultatunaca conajo mantichiicha. Jalla niiz wiruñ Herodesqui Judea yokquiztan ojkchiicha, Cesarea wajtquin želi.

HERODES TICZICHA

²⁰ Herodesqui žawjchiicha Tiro Sidón wajtchiz žoñinacz quintra. Jalla nižtiquiztanaqui ninacaqui acuerdo palt'ichiicha Herodes yujcquiz prisintisjapa. Nii Tiro Sidón watjanacchiz žoñinacaqui Herodes tjaata čhjeržtan kamñitakalča. Nižaza tsjii Blasto cjita žoñi želatča. Niiqui Herodes secretariotaicha. Jalla nii žoñinacaqui Blasto cjita secretario roct'ichiicha ninaczta favora tjurt'izinajo, Herodes ana quintra cjeajajo.

²¹ Herodesqui tsjii tjuñi citchiicha ninaca nekzi prisinti cjeajajo. Jalla nii cita tjuñquiziqui Herodesqui niiz wali jilir zquiti cujtsiicha audiencia watzjapa. Jalla nuž zquiti cujžcu, niiz mantiñi sillquin julziča. Nekztanaqui tsjii kjaž takunaca chiichiicha.

²² Jalla nuž čhiitquiztanaqui nii nonžñi žoñinacaqui kjawi kallantichiicha, tuž cjican:

–Tii čhiñi žoñiqui anača ina žoñi. jAntis yoozpanča!

²³ Jalla nuž kjawtiquiztan Herodesqui cuntintutaicha, nii žoñinacz kjawta taku ana nicz pecatča, “Anača wejrqui Yooztqui” cjicanaqui. Ana werar Yooz Ejpžquin honora tjaachiicha. Jalla nižtiquiztan nii orapacha Yooz Ejp Jiliriqiu niiz anjila cuchanzquichiicha, Herodes chawc laa cjisnajo. Jalla nekztanaqui nuž laacjžcu Herodesqui lak'už liwji mirta ticziča.

²⁴ Pero nii liwriiñi Yooz takuqui tjapa kjutñi parlita cjissiicha. Nekztanaqui tsjan tsjan žoñinacaqui tjapa kuztan nii parlita Yooz taku criichiicha.

²⁵ Bernabežtan Saulužtan nii pucultanaqui apayta onantanaca intirjžcu, Jerusalén wajtquiztan Antioquia quejpchiicha. Nižaza Juan chjichcu ojkchiicha. Juanqui niiz tsjii tjuuqui Marcos cjitazakaztaicha.

¹ Antioquía wajtchiz Yoozquin criichi zoñinac̄quiztan Yooz puntu tjaajiñinaca, nižaza Yooz taku chiiñi profetanaca želatča. Jalla tinacatača: Bernabé, Saulo, Simón (Negro cjitazakaztača), Lucio (Cirene wajtchiz zoñitača), nižaza Manaén (niiqui junto pajkchiča Herodestan. Herodesqui Galilea kjuttan mantiñitača).

² Tsjii nooj Yoozquin alawazjapa ajczitača, nižaza nii ora ayunasatkalča. Jalla nuž cjen Espiritu Santuqui ninac̄quiz cjichiča:

—Anchucqui Bernabé nižaza Saulo yekja t'akžina, weriž munta trabajo paañijapa.

³ Jalla nekztanaqui Yoozquin mayizizcu, nižaza ayunascu, nii Yoozquin criichinacaqui Bernabežtan Saulužtan ninac̄z juntuñ kjaržtan lanziča. Nekztanaqui nii pucultanaqui cuchanchiča, Yooz trabajo trabajčajo.

BERNABEŽTAN SAULUŽTAN CHIPRE YOKQUIN OJKTA

⁴ Nekztanaqui Espiritu Santuž cuchanžquitan Bernabežtan Saulužtan ojkchiča Seleucia cjita watja. Jalla nicju warcu zalchiča Chipre cjita yoka ojkzjapa.

⁵ Jalla nicju irantižcu Salamina cjita watja luzziča. Jalla nicju judionac̄z ajcz kjuyanac̄quiz Yooz taku parli kallantichiča. Juan Marcos ojkchizakazza ninaca yanapi.

⁶ Tjapa nii Chipre cjita yokaran ojklaychiča. Nižtami Pafos cjita watja irantichiča. Jalla nicju tsjii judio zoñžtan zalchiča. Nii zoñiqui Barjesús cjitatača. Nii zoñiqui laykatakalča. Nižaza toscara chiiñitakalča, “Wejrqui Yooz taku chiičiyuča” cjiñitakalča.

⁷ Jalla nii layka zoñiqui chawc jiliri Sergio Paulo cjita niižtan chicatakalča. Jalla nii jiliriqui cusa zizñi zoñitača. Nii zoñiqui Yooz taku nonz pecatča. Jalla nižtiquiztan Bernabežtan Saulužtan kjawskati cuchanchiča.

⁸ Nii layka zoñiqui ninac̄z quintra chiičiča, nii jiliriqui ana Yooz taku nonznajo, nižaza Yoozquin ana kuzziz cjejajo. Nii layka zoñž tsjii tjuuqui Elimas cjitazakaztača.

⁹ Nižaza Sauluž tsjii tjuuqui Pablo cjitazakaztača. Nii Pabluqui Espiritu Santuž irpitapantača. Nii layka zoñiž Yooz tawkw quintra chiičiquiztan, Pabluqui nii zoñž kjutñi zumpacha cherziča,

¹⁰ tuž cjan:

—Amqui anawalimča. Incallñamča. Amqui zajriž maatimča. Nižaza Yooz kuz quintramča. Amqui Yooz Ejpž taku tsjii kjutñi intintiskatz pecñampanča. ¿Kjažtiquiztan nižta amjo?

¹¹ Jaziqui Yooz Ejp Jiliriqui am casticaquiča. Zuram cjequiča. Tsjii kjaž maj tii tjuñ sii anam cheraquiča.

Jalla nii orapacha zura cjissiča, zumchiquizpan. Ana zinta cheri atžcu, nii layka zoñiqui tsjii zoñi kjurchiča niž kjarcu tanžcu chjichñijapa.

¹² Jalla nižta cheržcu, nii chawc jiliriqui Yoozquin criichiča. Yooz taku puntu tjaajintiquiztan walja ispantichi quirchiča nii jiliriqui.

ANTIOQUIA OJKTA

¹³ Jalla nekztanaqui Pabluqui niž mazinac̄žtan warcu zalchiča Pafos wajtquiztan ojkzjapa. Nekztan Perge cjita watja irantichiča. Perge watjaqui Panfilia yokquintača. Nekztan Juanqui ninaca ecchiča, Jerusalén watja quejžquichiča.

¹⁴ Nekztanaqui ninacaqui Pergequiztan watchiča Antioquía watja. Antioquía watjaqui Pisdia yokquintača. Jalla nicju tsjii jeejz tjuñquiz luzziča tsjii judionac̄z ajcz kjuyquiz. Nekztanaqui luzcu, julziča.

¹⁵ Jalla nuž želan cijirta Yooz tawkw liwruqui liitatača, Moisés cijirta Yooz takumi, nižaza Yooz cuntiquiztan chiiñi profetanac̄z cijirta takumi, jalla nii liitatača. Jalla nuž liižcu ajcz kjuy jilirinacaqui Bernabežquiz Pablužquiz chiyajo nuž cjichiča, tuž cjan:

—Jilanaca, anchucalta tsjii zuma taku želanaqui, anzpachaž chiya.

¹⁶ Nekztanaqui Pabluqui tsijtsiča. Nižaza kjara waytižcu ch'uj cjskatchiča. Jalla nuž ch'uju želan, paljaychiča tuž cjan:

—Israel wajtchiz zoñinaca, nonžna. Nižaza werar Yooz rispitiñi zoñinaca, nonžna.

¹⁷ Israel wajtchiz zoñinac̄z Yoozza werar Yoozqui. Jalla nii Yoozqui učum tuquita atchi ejpnaca illziča nižquin sirwajo. Nii timpuquin Egipto yokquin tirapan kamchiča yekja wajtchiz zoñinac̄žtakaz. Jalla nižta želanami Yoozqui walja mirkatchiča. Wiruñiqui Yooz Ejpqui niž azi tjeezcan jwezquichiča nii yokquiztan.

¹⁸ Pusi tunc watanaca ch'ekti yokaran ojklayan, Yoozqui ninac̄z anawali kamzquiztan awantichiča.

¹⁹ Nii timpupacha pakallak nacionanacaqui Canaán yokquin žejlñitača. Jalla tjappacha nii yokquiz žejlñinaca tjanachiča Yoozqui, nižaza ninac̄z yoka tjaachiča učum tuquita atchi ejpnac̄žquiz, tsjii irinsažtakaz.

²⁰ Nekztanaqui pusi patac pjijska tuncan watanaca juezanaca utchiča uĥum ejpnacžquiz mantiņijapa, Samuelž timpu irantisquizcama. Samuelqui Yooz cuntiquiztan chiiņi profetatača.

²¹ Jalla nii Samuelž timpuquiz uĥum ejpnacaqui tsjii pajk jiliri maychiča ninaca irpiņijapa. Jalla nuž maytiquiztan Yoozqui Saúl illziča ninaca mantiņijapa. Nii Saúlqui Cis majchtača, nižaza Benjamín t'akquiztantacha. Nii Saúlqui pusi tunc watajapa mantiņitacha.

²² Nekztanaqui Yoozqui niž puestuquiztan Saúl jwessiča. Jalla nekztanaqui nii rey puestuquin David utchiča. Davidž puntuquiztan Yoozpachača tuž cjichiqui: “Wejrqui tii David cjita žoņi nayuča Isaiž majchča. Tii žoņiž cjen ancha cuntintutča. Wejt kuzcamapanikaz kamņipanča tiiqui”. Jalla nuž cjichiča Yoozqui.

²³ Tsjii Davidžquiztan majchmaati ojķņiqui Jesusa cjitača. Tuquiqui Yoozqui taku ecchiča Israel wajtchiz žoņinaca liwrižjapa. Jalla nii taku cumplisjapa, Yoozqui tii Jesusa cuchanžquichiča Israel žoņinacžquiz.

²⁴ Ima Jesusaž Yooz langz kalltan, Juanqui tjapa Israel žoņinacžquiz parliņitacha, tuž cjican: “Anĥucqui persun ujnaca pajžcu, kuznacaž campiya, nekztan bautistaž cjesača”.

²⁵ Juanž ticz tjuņi žcatžinzcan, Juanqui cjichiča: “Anĥucqui jaknužt wejt puntuquiztan pinsiĥaja, niiqui anaĥa niit wejrqui. Wejt wirquin tjonĥa tsjiiqui, wejtquiztan juc'ant jiliriĥa. Nii atintizjapa, anal waquizuĥa, nižaza wejrqui inakaztča.”

²⁶ Jilanaca, Abrahamž majchmaatinaca, nižaza Yooz rispitsņinaca, anĥucqui nonžna. Anĥucaltajapaž tii liwriiņi Yooz taku zejlĥa.

²⁷ Jalla nii Jerusalén wajtquiz kamņi žoņinacami, nižaza nii jilirinacami, jecĥalaja Jesusaqui, nii ana zizatĥa. Zapa jeejz tjuņquiz judionacž ajcz kjuyquin tuqita profetanacž cjiĥta taku liiņipanĥa. Jalla nuž liyanami nii taku anaž intintazņipantacha. Nii žoņinacapachača tuqita Yooz taku cumpliskatchiqui, Jesusa conta cjskatchiĥa, nuž.

²⁸ Nii Jesusižquiz ana ĥjul ujmi watchiĥa, nii conzjapaqui. Jalla nuž cjenami ninacaqui Pilato ĥawc jiliržquiztan maychiĥa, nii Jesusa conzjapa.

²⁹ Nekztanaqui Jesusiž puntuquiztan jaknužt tuquitanpacha Yooz tawk liwruquiz cjiĥtatažlaja, jalla tjapa nii cjiĥta takunaca cumplisĥiĥa. Nii taku cumplisquiztan Jesusiž curpu cruzquiztan apakĥiĥa. Nekztanaqui niž curpu tjattatača.

³⁰ Yooz Ejpzi Jesusa ticziquiztan jacatatskatchiĥa.

³¹ Nekztanaqui tsjii kjaž majquiztan Jesusaqui niž mazinacžquiz tjontjonziĥa. Niž mazinacaqui nižtan ĥica ojķĥiĥa Galilea yokquiztan Jerusalén watja. Nižaza ninacaqui anziĥi žoņinacžquiz niž puntuquiztan tiraž parliĥa.

³² Jaziqui Yoozqui uĥum tuqita atĥi ejpnacžquiz taku ecchiĥa. Wejrnacqui nii cumplista takunaca zjiĥĥinĥa anĥucaquiz mazjapa. Jalla nii zuma mazta anĥucaquiz parluĥa. Yoozqui uĥum ejpnacžquiz taku ecchiĥa.

³³ Uĥumqui nii tuqita atĥi ejpnacžquiztan tjonĥinĥa. Uĥumnacalta Yoozqui niž ecta taku cumplisĥiĥa, Jesusa jacatatskatchiqui, nii. Nižaza nižtapacha segundo salmuqui cjiĥtatača tuž cjican: “Amqui wejt maatiĥa. Tonj tjuņi žejtkatchinĥa”.

³⁴ Nižaza Yooz Ejpqui niž jacatatz puntuquiztan chiiĥiĥa, tuž cjican: “Ticziquiztan am curpu jacatatskataĥa, ana wira sipulturquiz mojkžjapa”. Jalla nii puntuquiztan chiiĥa cjiĥta Yooz takuqui, tuž cjican: “Yoozqui Davidžquiz taku ecchiĥa, jalla nii tawk jaru anĥucaquiz zuma favora paasaĥa Yoozqui”.

³⁵ Jalla nužpan chiiĥa tsjii salmuquiziqui, tuž cjican: “Am zuma sirwiņiž curpu ana ecta cjesaĥa mokajo”.

³⁶ Jalla nuž weraraĥa. Davidqui niž timpu zejlņi žoņinacžquiz yanapĥiĥa, jaknužt Yooz mantiĥaja, jalla niicama. Nekztanaqui Davidqui ticziĥa niž ejpnaca irata. Nekztan niž ticzi curpu tjattiquiztan mojkĥiĥa.

³⁷ Jesucristuzti Yooziž jacatatskatchiĥa. Niž curpuzi ana mojkĥiĥa.

³⁸ Jilanaca, anĥucqui tuž ziz waquiziĥa. Jesusiž cjen ujnaca pertuntaž cjesaĥa. Jalla nii zuma taku anĥucaquiz parluĥa.

³⁹ Moisiž mantita lii jaru kamcanami, ana pertunta cjisņi atĥa. Jesusižquiz macjatchi cjenacqui jalla nižtakaz tjapa ujnacami pertuntaž cjesaĥa.

⁴⁰ Jaziqui anĥucqui cwit'aza, ana nii tuqita cjiĥta casticu sufrisjapa. Tuquitan Yooz taku parliņi profetanacqui cjiĥriĥa, tuž cjican:

⁴¹ “Nonžna, Yooztan quintrazņinaca, azzucaž anĥucqui, nižaza ĥjatkatĥucaž anĥucqui. Wejrqui Yooz Ejpĥa. Anĥuca kamz timpuquiz wali pajk obranaca paachinĥa. Jalla nuž anĥucaquiz quint'ichi cjenami anĥucqui ana criyasĥa. Jalla nižtiquiztan ispanĥiĥi cjisna, nižaza casticta cjequĥa, anĥucqui Yooz quintra tjasņinaca”.

⁴² Nuž chiižcu Pabluqui niiž mazinacžtan judionacž ajcz kjuyquiztan ulanchičha. Yekjap ana judionacž ejpchiz žoñinaca želatčha. Jalla ninacaqui roč'azzičha, tuž cjan:

—Tii jar jeejz tjuñquiz tii puntunacquiztan wejtnacaquiz wilta tjaaznalla.

⁴³ Nii ajcz kjuyquiz nii cultu žeržcu walja judío žoñinaca, nižaza judiož cuzturumpi paañinaca, jalla ninacaqui Pablužtan Bernabežtan chica apzičha. Nii pucultanaqui zuma taka tjaachičha, tuž cjan:

—Ančhucqui Yoozquin tjapa kuztanž cjee. Nižaza tjurt'iñi kuzziz cjee.

⁴⁴ Jalla nii wiruñta jeejz tjuñquiziqui joz tjapa nii wajtchiz žoñinacaqui ajczičha Yooz taku nonzjapa.

⁴⁵ Jalla nuž ajczi cheržcu, nii judío žoñinacaqui iñizichičha. Nekztanaqui Pabluž quintra chichičha, niiž taku ana walkatzjapa. Nižaza Pablo iñarchičha.

⁴⁶ Nekztanaqui Pablužtan Bernabežtan ana ekskucchičičha, tuž cjan:

—Ančhucqui judío žoñinacžhucčha. Nižtiquiztan ančhucquiz primeraqui tii liwriiñi Yooz taku chiistančha. Ančhuczi tii Yooz taku anaž nonz pecčha. Nižaza Yooziž tjaata wiñaya žeti anaž risiwz pecčha, jalla nuž tantiichinčhucčha ančhucqui. Jalla nižtiquiztan anzičha ana judío ejpchiz žoñinacžquiz tii Yooz taku paljayačha.

⁴⁷ Jalla nuž mantichičha Yooz Ejp Jiliriqui, tuž cjan:

“Wejrqui ančhucquiz utchinčha, tjapa nacionanacquin žoñinacžquiz wejt puntu kjanzt'ajo. Ančhucž cjen tjapa kjuttan tii muntuquiz yok tjiiquin kamñi žoñinacami liwriitaž cjequičha”.

⁴⁸ Jalla nuž nonžcu, nii ana judío ejpchiz žoñinacaqui ancha chipchičha. Nižaza Yooz tawk puntuquiztan, tuž cjichičha: “Tii Yooz takuqui zumapančha”. Jakziltat arajpachquin wiñaya kamzjapa Yoozqui illzaja, tjapa ninacaqui nii parlita Yooz taku criichičha.

⁴⁹ Tjapa yokaran Jesucristo Jilirž puntuqui parlitatačha.

⁵⁰ Judío žoñinaczi quintra aptazzičha. Nekztan ninacaqui tsjii kjaž rispitta judío cuzturumpi paañi maatakanacžtan, nižaza tsjii kjaž wali zuma rispitta wajt jilirinacžtan pal'ichičha. Nii judío žoñinacž cjen ninacaqui Pabluž nižaza Bernabež quintra aptazzizakazza, nii yokquiztan chjatkatzcama.

⁵¹ Jalla nižtiquiztan Pablužtan Bernabežtan ninacž kjojchquiztan zcachi pulpu tsajt-sičha. Jalla nii tsajtstaqui tsjii siñalaztakaztačha nii wajtchiz žoñinacž quintrajapa. Nii yokquiztan ulanžcu, Iconio cjita watja ojckičha.

⁵² Pero nii Yooz taku catokñi žoñinacaqui ancha cuntintutačha. Nižaza Espiritu Santuž irpitapanž cjišičha.

14

ICONIO WATJA OJKTA

¹ Iconio cjita wajtquin kamcan Pablužtan Bernabežtan luzičha nii judionacž ajcz kjuyquin. Nekztan Jesucristuž puntuquiztan parlitiquiztan, walja judío žoñinacžtan, nižaza ana judío žoñinacžtan, walja ninacaqui Yoozquin criichičha.

² Pero nii ana criichi judío žoñinaczi ana criiz pecchipantačha. Nekztan ninacaqui parti žoñinaca Yoozquin criichinacž quintra aptazzičha, nižaza criichinacž quintra pinsiskatchičha, “Nii Yoozquin criichi žoñinacaqui anawalipančha” cjanacaqui.

³ Jalla nižtiquiztan Pablužtan Bernabežtan ažk tjuñi kamchičha nii wajtquin. Nižaza zuma tjurt'iñi kuzziz paljaychičha. Nižaza Jesucristo Jiliržquin tjapa kuzziztačha. Jalla nižtiquiztan Jesucristuqui azi tjaachičha, siñalanacami milajrunacami paajo. Jalla nuž paatiquiztan kjanapacha tježtatačha, Yooz okzñi takuqui weraračha, jalla nii.

⁴ Nii wajtchiz žoñinacaqui pizc partiquin t'akzičha. Parti žoñinaczi judío žoñinacžquin apuychičha. Parti žoñinaczi apostolonacžquin apuychičha.

⁵ Jalla nekztanaqui judío žoñinacaqui parti žoñinacžtan, nižaza nii wajt jilirinacžtan, tsjii parla asiptichičha Pablo Bernabé ch'aanizjapa, nižaza ninaca maztan čhajczjapa.

⁶ Pablužtan Bernabežtan jalla nii quinto zizcu, atipassičha. Lистра wajt kjutñi ojckičha. Nižaza Derbe wajt kjutñi ojckizakazza. Nii pizc watjanacaqui Licaonia cjita yokquintačha.

⁷ Tjapa nii Licaonia yokaran zuma liwriiñi Yooz taku parlichičha.

PABLO MAZTAN ČHAJCTA

⁸ Nii Lистра wajtquin tsjii zuch žoñi želatčha. Majttiquiztanpacha nižtapantačha, wira ana ojcklayñitačha. Jalla nicju julzi želatčha.

⁹ Nii zuch žoñiqui Pabluž chiita taku nonzičha. Nii žoñiqui “Pabluqui wejr čhjetnasaz jaz” cjan pinsičha. Nižaza Pabluqui niiž kuzquiz naychičha, Yoozquin tjapa kuzziz cjeta, jalla nii.

¹⁰ Jalla nižtiquiztan Pabluqui nižquiz zuma chekžcu, altu joržtan chiižinchicha, tuž cjan:

—Sok'opacha tsijsna, am persun kojchtan.

Jalla nižta chiižtanaquini nii zuch žoñiqui tsjii layzcu tsijsicha, nekžtan ojklayi kallantichicha.

¹¹ Jalla nii Pabluž paata cheržcu, žoñinacaqui walja kjawi kallantichicha. Licaonia tawkuiztan kjawchicha tuž cjan:

—Yooznacaqui žoñiztakaz tsewctan chjiwžquichicha učumnacaquiz.

¹² Nii žoñinacaqui cjetča, Bernabequi Júpiter cjita yoozza. Pabluqui parliñipantäča, jalla nuž cjen nii žoñinacaqui cjichicha, Pabluqui Mercurio cjita yoozza.

¹³ Wajt tjiuquin Júpiter yooz timpluquiz želatča. Nii timplu fabriqueruqui wac turunaca nižaza pajkjallanaca zjičchicha, wajt zanquiz, jalla nekž. Nii fabriqueržtan nii wajtchiz žoñinacžtan Pablužquiz Bernabežquiz sirwiz pecatča Yooztakaz. Wac turunacžtan wilana ljokt'iz pecatča.

¹⁴ Nekžtanaquini Pablužtan Bernabežtan jalla ninacaqui nižta paa-awc cjen naaziča. Jalla nuž naažcu persun zquiti wjajrsicha, anal nii pecuča cjan. Nižaza nii žoñinacž taypiquin kjawcan luzcu, altu joržtan chiičhicha, tuž cjan:

¹⁵ —Žoñinaca, žkjažtiquiztan wejtnacaltajapa tižta paajo? Wejrnacqui ančhuca irata žoñizakaztča. Ančhucqui jalla tižta paaz cuzturumpinaca jaytiz waquiziča. Inapanikazza tii ančhuc cuzturumpinacaqui. Werar žejtñi Yoozza tjapa kuztanqui sirwizquini. Jalla nuž cjan ančhucaquiz mazñi tjonchinča. Nii werar Yoozquini paachicha arajpacha, yokanaca, kotanaca, nižaza tjapa žejlñinaca paachicha.

¹⁶ Tuquini timpuquini žoñinacaqui persun kuczama ojklayñitača. Jalla nuž ojklayan Yoozquini ana kjaž cjiñitača.

¹⁷ Yoozquini chijñi apayžquicha, zuma zkala pookajo. Nižaza Yooz cjen wali čheri žejlča, učumnaca lujlžapami, nižaza cuntintu kamžapami. Jalla nuž zumanaca tjaača Yoozquini. Nižtiquiztan žoñinacaqui Yooz pajž waquiziča.

¹⁸ Jalla nuž chianami nii wajtchiz žoñinacaqui tira wilana conawkkaz cjetča, Pablužquiz Bernabežquiz sirwizjapa. Ch'aman tii cuzturumpinaciztan apatatskatchicha. Ultimquizquini nižtami ana wilana conchicha.

¹⁹ Jalla nekžtanaquini tsjii kjaž judionacaqui tjonchicha Antioquia wajtquiztan, nižaza Iconio wajtquiztan. Jalla nii tjonchi žoñinacaqui nii wajtchiz žoñinacžquiz kazzinchicha Pablužquintra. Nekžtanaquini maztan Pablo muzpa čhajčchicha. Nekžtan nii čhajčñi žoñinacaqui, "Ticziča" cjan Pablo wajtž tjiya joochicha.

²⁰ Wajtž tjiuquin ectaž cjen jalla nekzi criichinacaqui ajcziča Pabluž muytata. Jalla nuž želan, Pabluquini žaaziča. Nekžtan wajtquini wilta luzziča. Nekžtanaquini jaka tažuquini Bernabežtan Pablužtan ojkičhicha Derbe cjita wajt kjuťni.

²¹ Jalla nicju zuma liwriñi Yooz taku paljaychicha. Jalla nuž paljayan walja žoñinacaqui Yooz taku criichicha. Nekžtanaquini Lистра Iconio Antioquia nii watjanac kjuťni quejpchicha.

²² Jalla nii watjanacquin Pablužtan Bernabežtan Yoozquin criichi žoñinaca tjuť'iñi kuzziz cjisjapa walja chiižinchicha, tuž cjan:

—Yoozquin kuzzizpankaz tira kamaquicha. Yooz mantuquiz kamčiž cjen, tii mantuquiz ancha sufrispanča učumnacaquini.

²³ Nižaza zapa iclizquin jilirinaca nombrichicha. Nekžtanaquini Yoozquin mayizizcu ayunazcu Pabluquini nii nombritanaca Yoozquin cumpjiichicha. Nii nombrita jilirinacaquini Yoozquin tjapa kuzziztača.

PABLUŽTAN BERNABEŽTAN ANTIOQUIA QUEJPCHICHA

²⁴ Jalla nekžtanaquini Pabluquini Bernabežtan Pisidia cjita yokaran watchicha. Nekžtanaquini Panfilia cjita yokquin irantichicha.

²⁵ Jalla nicju Perge wajtquini Yooz taku paljaychicha. Nekžtanaquini Atalia cjita wajt kjuťni ojkičhicha.

²⁶ Jalla nicju warcu zalchicha, Antioquia ojczjapa. Tuquiquini ima okan, Antioquia wajtchiz criichinacaquini Pablužtan Bernabežtan, nii pucultan Yoozquin cumpjiichicha Yooz taku paljayajo. Jalla nuž Yooz taku paljayž trabajo žeržcu, Antioquia watja quejpchicha.

²⁷ Jalla nicju irantižcu, Pabluquini Bernabežtan nii wajtchiz criichinaca juntaskatchicha. Nekžtan nii criichinacžquiz quint'ichicha, tjapa Yooz aztan paatanaca. Nižaza quint'ichicha, jaknužt yekja wajtchiz žoñinacaquini Yoozquin criichicha; nižaza Yooz jiczquiz luzziča.

²⁸ Nižaza ažk tjuñinaca Pablužtan Bernabežtan nicju žejlchicha criichinacžtan.

15

JERUSALENQUIN AJCZTA PUNTU

¹ Jalla nii timpuquui tsjii kjaž zoñinacaqui Judeaquiztan Antioquía ojkchiča. Jalla nicju ninacaqui Yoozquin criichinaczquin tjaajñi kallantichiča, tuž cjan:

—Moisés mantita cuzturumpinaca paastanča, liwriita cjisjapa.

² Pablužtan Bernabežtan nižta tjaajñi zoñinacztan walja ch'ayi ch'ayi parličiča nii cuzturumpi paaz puntuquiztan. Ultimquiziqui Pablužtan Bernabežtan yekjap criichinacztan nombrita cjisšiča, Jerusalén watja ojkzjapa. Jalla nicju nii parlita puntuquiztan wiltla parlaquiča apostolonacztan nižaza icliz jilirinacztan.

³ Jalla nijjapa nii Antioquía criichinacaqui ninaca cuchanchiča. Jalla nuž ojkan, Fenicia yokaran Samaria yokaran watchiča. Jalla nuž wajtcan Pablužtan Bernabežtan quint'ichiča, jaknužt yekja nacionchiz zoñinacaqui ninacz tuquita cuzturumpinaca jaytichaja, nižaza jaknužt Yoozquin kuzziz cjistčhaja, jalla nii quint'ichiča. Jalla nii quinto nonžcu zoñinacaqui “Ancha cuzala” cjan cjičiča.

⁴ Pablužtan Bernabežtan Jerusalén watja irantitan, nii wajtchiz criichinacami apostolonacami nii icliz jilirinacami tjapa juntu Pablužtan Bernabežtan risiwchiča. Jalla nektzanaqui Pabluqui Bernabežtan quint'ichiča jaknužt ninacaqui Yooz aztan paatčhaja, jalla nii.

⁵ Nektzanaqui yekjap fariseo partiquiztan criichinacaqui tsijtsiča, tuž cjan:

—Nii yekja nacionchiz criichinacaqui judionacz chimpuz cuzturumpi jalla nii paastanča. Nižaza Moisés mantita liicama kamla.

⁶ Jalla nektzanaqui apostolonacami icliz jilirinacami ajcziča jalla nii puntu parlizjapa.

⁷ Jalla nuž azkpacha ch'ayi ch'ayi parližcu, Pedruqui tsijtsiča, tuž cjan:

—Jilanaca, ančhucqui tižta zizza. Tuquiqui Yoozqui ančhucacuztan wejr illzipanla, yekja nacionchiz zoñinaczquiz nii zuma liwriñi Yooz taku paljayajo, ninaca nii liwriñi taku criyajo.

⁸ Nižaza Yooz Ejpqui tjapa zoñinacz kuz zuma zizza. Nii yekja nacionchiz zoñinaca criiñi kuzziz cjen, Yoozqui ninaczquiz Espiritu Santo luzkatchiča. Jaknužt učhumnacaquiz Espiritu Santo luzkattčhaja jalla nužuzakaz. Nižaza Espiritu Santo tjaacan, Yoozqui tjejeziča, yekja nacionchiz criichinaca persun maati cunta ricujchizakazza, jalla nii.

⁹ Yoozqui ninacztan učhumnacatan ana pjalpjalziča. Yoozquin tjapa kuz cjen ninacaqui kuz campiichiča. Nižaza Yoozqui ninaca pertunchiča, zuma kuzziz cjejajo.

¹⁰ Jaziqui Yooz Ejpqui nižta munchiča. Ančhucqui Yooz quintra cjequiz niiqui, casticta cjequiča. Ančhucqui nii yekja wajtchiz criichinaca učhum cuzturumpi tjuz pecča, tsjii liczi kuzižtakaz. Učhumpachaž nii cuzturumpinaca ana tjapa payi atchiča, nižaza učhum tuquita atchi ejpnaczquiztanpacha ana tjapa payi atchiča. Jaziqui, čkjažtiquiztan nižta ninaca paakatž pecjo?

¹¹ Nii cuzturumpi paañiž cjen anaž jakziltami ujnacquiztan liwriita cjesača. Jesucristo Jiliriqui okžñi kuzziz cjen zoñinacz laycu ticziča. Jalla nižtiquiztan Jesucristužquin criičiž cjen učhumnacami ninacami ujnacquiztan liwriita cjesača.

¹² Jalla nuž Pedruž čhiitiquiztan tjappacha ch'uju cjisšiča. Nektzanaqui Pablužtan Bernabežtan ninaca quint'ichiča, jaknužt yekja nacionanacaran ojklaycan Yooz aztan siñalanacami milajrunacami paatčhaja, jalla nii.

¹³ Jalla nuž quint'i žeržtan, Jacoboqui cjičiča:

—Jilanaca, nonžna.

¹⁴ Simón Pedruqui učhumnacaquiz quint'ichiča jaknužt tuquiqui Yoozqui persun maati cunta ana judio zoñinaca ricujchizlaja, jalla nii.

¹⁵ Nižaza Yooz taku parliñi profetanacz cjižrta tawk jaruča niiqui. Cjižrta Yooz takuqui tuž cjiča:

¹⁶ “Tii wattanaqui quejžčiča. Davidž kjuyquiztan ojki zoñinacaqui pajlzi kjuyažtakaz zejčiča. Jaziqui Davidž pajlzi kjuyaqui wital kjuyača. Wital waytača, ew zoñinaca cjisjapa.

¹⁷ Jalla nektzanaqui tjapaman nacionchiz zoñinacaqui Yooz Ejp Jilirž kamaña pecaquiča. Jakziltat Yooz kjawtažlaja, jalla nii zoñinacaqui Yoozquin tjonauquiča.

¹⁸ Jalla nuž cjičiča Yooz Jiliriqui tuqui timpuquiztanpacha, zoñinacz zizajo”.

¹⁹ Jalla nižtiquiztan wejr cjiwčha. Nii ana judio zoñinacaqui ana molistis waquiziča. Ninacaqui ninacz tuquita cuzturumpinaca jaytichiča, Yooz kuzcama kamzjapa. Jalla nuž cjenauqui ana kjaž cjis waquiziča, nii učhum cuzturumpinaca paaz puntuquiztan.

²⁰ Tiikaz učhumqui ninaczquin cijjrasača, tuž cjan: “Zoñiž paata yoozquin wilana jawkta chjizwi anača lujlsqui. Nižaza anača adulteriuquiz ojklayzqui. Nižaza jora

zkenzcu conta animal chjizwimi anača lujlsqui. Nižaza čjul animal ljocmi anača lujlsqui". Jalla niikaz cumplistanča nii yekja wajtchiz criichinacaqui.

²¹ Tuquitanpacha zapa wajtquiziqui Moisés liiqui parlitatača. Nižaza zapa ajcz kjuyquiz liitatača zapa jeez tjuñquiziqui.

²² Jalla nekztanaqui apostolonacami icliz jilirinacžtan nižaza tjapa criichinacžtan palt'ichičha, tsjii tsjii ninacžquiztan illzjapa. Nekztan Judas illztatača, niž tsjii tjuuqui Barsabás cjitazakaztača. Nižaza Silas illztazakaztača. Jalla nii pucultanaqui walja zuma jilanaca cjitatača niž mazi jilanacžquiztan. Nekztanaqui nii illzta zoñinacaqui Pablužtan Bernabežtan cuchantatača Antioquia wajtquin, nii cuzturumpi paaz parlita puntu mazjapa.

²³ Jalla ninacžtan tsjii carta apaychičha. Nii cartiquiz tuž cjichičha:

"Wejtnaca jilanaca, wejrnacqui Jesusiž illzta apostolonacžta, nižaza icliz jilirinacžta, nižaza Yoozquin criichinacžta. Wejrnacqui ančhucaquin tsaanznuča. Ančhucqui ana judío zoñinacžhucča. Antioquia wajtchiz zoñčhucča, nižaza Siria yokquin kamiñčhucča, nižaza Cilicia yokquin kaminčhuczakazza.

²⁴ Wejrnacqui tsjii quintu zizzinča. Tekztan tsjii kjaž zoñinacaqui ančhucaquin ojktalča, ana jec jiliriz mantita ojkičha. Jalla ninacaž čhiita taku ančhuca kuz turwayskatčhani. Ninacaqui cjičhani, "Judionacž chimpuz cuzturumpi paastanča. Nižaza tjapa Moisés liiqui cumplistanča". Jalla nuž čhižcu, paysnakñi kuzziz cjinacžhucžlani.

²⁵ Jalla nii quintu zizcu, nii puntuquiztan wejrnacqui zuma palt'ichinča. Nekztanaqui wejrnacqui kazzinča, tsjii pucultan wejtnacaquiztan illzjapa. Nii pucultanaqui illztatača ančhuc cheržni okajo. Ninacaqui Pablužtan Bernabežtan chica okaquičha. Nii Pablo Bernabé, jalla ninacaqui anča zuma pecta jilanacača.

²⁶ Nii Pablužtan Bernabežtan Jesucristo Jilirž mantita ojklaycan joz conkatchičha.

²⁷ Nižtiquiztan wejrnacqui Judastan nižaza Silžtan cuchanchinča, ančhucatan tii puntu parlijzjapa. Nižaza ančhucaquiz tjapa tii puntuquiztan paljayaquičha.

²⁸ Wejtnacquizimi Espiritu Santužquizimi walikaztača tinacaqui. Wejrnacqui ančhucaquiz anaž tsjii liczi kuzi tjuž waquizasasča, anaž wejtnac liczi cuzturumpi paakat waquizasasča. Jalla tiikaz paakat waquizičha.

²⁹ Zoñiž paata yoozquiz wilana jawkta chjizwi anača lujlsqui. Nižaza čjul animal ljocmi anača lujlsqui. Nižaza jora zkenzcu conta animal chjizwimi anača lujlsqui. Anača adulteriuquiz ojklayzqui, luctaka cjiñimi maataka cjiñimi. Zuma lucutiñipan kamsa. Jalla nuž kamaquiz niiqui, walikaz cjequičha ančhucqui. ¡Zumakaz ojklaya!" Jalla nuž cjižrtatača nii cartauqi.

³⁰ Nekztanaqui nii cuchanta zoñinacaqui cartižtan ojkičha Antioquia watja. Jalla nicju irantžcu, tjapa nii wajtchiz criichi zoñinaca juntazziča. Nekztan nii carta intirjichičha.

³¹ Jalla nii carta ližcu, nii jilanacaqui walja chipchičha, nii zuma takunaca cjižžquizaž cjen.

³² Nižaza nii Judastan Silžtan Yooz taku paljajničha. Jalla nuž paljaycan walja zoñinacžquiz kuzziča. Nižaza nii criichinacaqui tjurt'ini kuzziz cjiskatchičha ninacž tawkžtan.

³³ Jalla tsjii kjaž tjuñinaca nicju kamchičha, Judastan Silžtan. Nekztanaqui ninaca cuchanžquini jilanacžquin quejz pecatča. Jalla nuž peccan parti criichinacaqui cjichičha:

–Yooz Ejpžtan ančhucqui zumakaz okalla.

³⁴ Jalla nekztanaqui Judasqui ojkičha. Ultimquiziqui Silasqui eclis tantičičha.

³⁵ Nižaza Pabluqui Bernabežtan Antioquia wajtquin eclichizakazza. Nekztanaqui parti jilanacžtan Yooz taku walja tjaajnatača ana criichi zoñinacžquiz, nižaza liwriñi Yooz taku paljayatča.

PABLUQUI WILTA YOOZ TAKU PALJAYI OJKCHA

³⁶ Jalla niž wiruñ Pabluqui Bernabežquiz paljaychičha, tuž cjican:

–Wiltaz jaziqui ojklalla. Jakzi watjanacquin učumqui liwriñi Yooz taku parlitažlaja, jalla nii jilanacžquin tjontjonžquialla. Jaknužt kamčhaja jalla ničhum cheržquialla.

³⁷ Bernabequi Juan chjitz pecatča. Juanž tsjii tjuuqui Marcos cjitazakaztača.

³⁸ Niž tuquiqui Panfilia wajtquin žejlcan, Marcosaqui Pablužquiztan Bernabežquiztan quepi zarakchičha. Ana iya chica ojklaychičha Yooz taku parlican. Jaziqui Pabluqui Marcos ana chjitz pecatča.

³⁹ Jalla nižtiquiztan Pablužtan Bernabežtan ch'aassičha. Nekztanaqui jaljtichičha. Bernabequi Marcos chjitzcu tsjii warcu luzzičha Chipre kjutñi ojklajapa.

⁴⁰ Pabluži Silas cjiža zoñi illzičha nižtan chica ojkiñjapa. Nii žejlñi jilanacaqui Pablužtan Silžtan Yoozquin cumpjičičha, Yooz zuma yanapajo.

⁴¹ Nekztan ninaca Siria yok kjutñi ojkcñi. Siria yokaran nižaza Cilicia yokaran ojklaychiča, iclizquiztan icliza ojklaychiča, criichi jilanaca tjurt'ñi kuzziz cjeajo.

16

TIMOTEOQUI PABLO CUMPANT'ICHICHA

¹ Nekztanaqui Pablužtan Silžtan irantižquichiča Derbe Listra cjita watjanacquiz. Jalla nicju tsjii Yoozquin criichi zoñžquiz zalchiča, Timoteo cjita. Niiž maaqui judío žontača, Yoozquin criiñitača. Niiž ejpqui griego žoñitača.

² Nižaza Listra wajtchiz criichi žoñinacami Timoteo rispitchiča. Iconio wajtchiz žoñinacaqui Timoteo rispitchizakazza.

³ Nekztanaqui Pabluqui Timoteo kjutñi pecatča. Jalla nižtiquiztan Pabluqui judionacž cuzturumpi jaru Timoteo chimpuskatchiča, nii yokaran kamñi judionacaž ana quintra chiyajo. Timoteož ejpqui griego žoñitača, anatača judío. Jalla nuž cjen Timoteoqui ana chimpuchiztača, judionacaž irata. Jalla nii zizziča nii yokaran kamñi judionacaqui.

⁴ Nekztanaqui tjapa watjanaca ojklaycan, Pabluqui niiž mazinacžtan Jerusalén parlita quintu mazziča. Apostolonacami Jerusalén icliz jilirinacami, jalla ninacaž čhiita taku quint'ichiča tjapa Yoozquin criichi jilanacžquiz.

⁵ Jalla nižtiquiztanaqui niiran željñi criichinacaqui Yoozquin walja tjapa kuzziz cjis- siča. Nižaza zapuru Yooz jiczquiz luzatča iya žoñinacaqui. Jalla nižtiquiztan tsjanž yapatča Yoozquin criichi jilanacaqui.

PABLUZ CHJUUZTA

⁶ Jalla nekztanaqui Espiritu Santuqui Pablužquizimi niiž mazinacžquizimi atajchiča, ana Asia yokaran Yooz taku parliñi ojklajajo. Jalla nižtiquiztan ninacaqui Frigia, nižaza Galacia cjita yokanacaran ojklaychiča.

⁷ Jalla nuž ojklajču, Misia cjita lintiquin irantichiča. Jalla niwjctan Bitinia yokquin luzquiz pecatača. Jalla nuž pinsan Jesucristužtan Espiritu Santužtan nii yoka luz ana munchiča.

⁸ Jalla nižtiquiztan Bitinia yokquin ana luzziča. Antis Misia yokquin watžcu, Troas cjita watja irantichiča. Jalla nii watjaqui pajk kot tjiiquiz želatča.

⁹ Jalla nicju tsjii ween Yoozqui Pablo chjuuzkatchiča. Chjuuzcan jalla tuž Pabluqui cherchiča, tsjii Macedonia wajtchiz žoñi cherchiča. Tsijtsi želatča. Nižaza rocatča, tuž cjan: "Macedonia yok kjutñi kajžčalla amqui. Yanapt'alla".

¹⁰ Jalla nuž wiiquin chjuuzcuqui Pabluqui tjacziča Macedonia ojczjapa. Nižazakaz wejrnacmi tjaczinča Pablužtan ojczjapa. Ultimupanž Yoozqui wejrnaca kjawziča, nawjk ojklajajo liwriñi taku paljayajo.

PABLUZTAN SILZTAN FILIPOS CJITA WAJTQUIN OJKTA

¹¹ Jalla nekztanaqui Troas wajtquin tsjii warcu zalazzinča. Nekz luzcu ojkcñinča. Nii pajk kot taypiquiz tsjii kolta yoka želatča, Samotracia cjita. Jalla nii trichuc ojkcñinča. Niiž jaka tažqu Neápolis cjita watja irantichinča.

¹² Jalla nekztan ojkcñinča Filipos cjita watja. Nii watjaqui tuquitanpacha romano cjita wajtchiz žoñinacaž julžtatača. Jalla Macedonia yokquin nii watjaqui tsjan chekan pakjitača yekja watjanacquiztanaqui. Jalla nicju tsjii kjaž maj kamchinča.

¹³ Tsjii jeejz tjuñquiz wajtquiztan ulanchinča, nižaza puj atquin. Jalla nicju žoñinacaqui ajczñitača, Yoozquin mayzi. Jalla nuž željcan wejrnacqui julzinča. Nekztanaqui liwriñi Yooz taku palt'ican, nii ajczi maatakanacžquiz paljaychinča.

¹⁴ Tsjaa maataku Lidia cjititača. Naaqui Tiatira cjita wajtchiz žontača. Nižaza naaqui fin murat telanaca tuiyñitača. Naa žonqui Yoozquin walja kuz tjaachintača. Jalla nuž cjen, Yoozqui naaža kuzquiz Pabluž čhiita taku catokskatchiča.

¹⁵ Jalla nižtiquiztan naa žonqui bautistatača naaža familianacžtanpacha. Nekztanaqui wejtnacaquiz roct'ichinča, tuž cjan:

—Ančhucqui ultimupan wejrqui Jesucristužquin criichinčataqui cjičhaj niiqui, wejt kjuyquin tjonžcalla alujazjapa. —Nuž roctiquiztan naaža kjuyquiz wejrnacqui alujazz- inča.

¹⁶ Tsjii noojiqui wilta Yoozquin mayiziz yokquin ojkcñan, wejrnacqui tsjaa zajriž tanti turatan zalchinča. Naa turqui ariwiñi zizzintača. Naaqui patrunž manta payiñitača. Jalla nižtiquiztan walja paaz ganiñitača naaža patrunžjapa.

¹⁷ Naa turqui Pablužquiz nižaza wejtnacaquiz apžñi kallantichinča. Jalla nuž apzcan kjawñitača, tuž cjan:

—Tii žoñinacaqui arajpach Yooz sirwiñiča. Nižaza ančucaquiz liwriñi Yooz taku paljayñiča. —Jalla nuž kjawcan čhiichinča.

¹⁸ Zapuru nižta kjawcan wejtnacaquiz apzniŋtača. Jalla nižtiquiztan Pabluqui naažajapa tsjii zkoluc žawjznawcz cjetča. Jalla nuž cjen naaza kjutŋi quejpczu cherziča. Nižaza naa tanŋi zajrižquiz čiichiča, tuž cjan:

–Zajra, Jesucristuž tjuuquiz am ulna cjiwča taa turaquiztan.

Jalla nii orapacha nii zajraqui naa turaquiztan ulanchiča.

¹⁹ Jalla nižtiquiztan naa tura patrunanacaqui naaža ariwiŋiquiztan ana iya paaz gani atchiča. Jalla nuž cjetča nii patrunanacaqui. Jalla nižtiquiztan ninacaqui Pablužtan Silžtan tanchiča. Nekztanaqui pajk plazquin chjitchiča nii wajt pajk jilirinacz yujcquin.

²⁰ Juez jilirinaczquin prisintiskatchiča, tuž cjan:

–Tii judío žoŋinacaqui učhum žoŋinaca aptjapča.

²¹ Nižaza ninacz tsjemat cuzturumpinaca tjaajinča. Jalla nii cuzturumpinaca učhumqui anaž catokz waquiziča. Nižaza ana niucama kamz waquiziča. Lii quintrača. Učhumnacaqui roman žoŋinacčhumča.

²² Jalla nuž čiitiquiztan nii wajtchiz žoŋinacaqui Pabluž nižaza Silž quintra tjojktičiča. Nižaza nii juez jilirinacaqui mantichiča, ninacz kujta zqiti chjojžzinajo, nekztan paržtan wjajtajo.

²³ Jalla nuž walja wjajtcu, carsilquiz chawjčiča. Nižaza nii carsila itzŋi žoŋi mantichiča, ninaca zuma wijilajo.

²⁴ Jalla nuž mantitiquiztan, nii carsila itzŋi žoŋiqui ninaca carsil kjuył majcčiča, nawjk c'utzjati. Jalla nekzi pajk mazu madera želatča, niiqui žoŋi castics maderapantača. Nii maderquiz ninacz kjojcha majcžinčiča.

²⁵ Jalla nuž cjenami chica arama Pablužtan Silžtanaqui Yoozquin mayizican želatča. Nižaza Yooz wirsu itscan želatča. Jalla nuž mayizan, nuž itsan, nii parti carsilquiz chawjčta žoŋinacaqui nonziča.

²⁶ Jalla nekztanaqui tiripinit tsjii tembloraž tjonchi. Nekztan nii carsil yokanacami pirkanacami liwj chekjinskatchiča. Jalla nuž chekjintiquiztanaqui tjapa nii carsil zananacami justokaz cjetsiča. Nižaza nii preso žoŋinacz čejlta carinanacami justokaz jersiča.

²⁷ Jalla nižta watčcu, carsil itzŋi žoŋiqui tjaji wajtsiča. Nii carsil zananaca cjetsi cheržcu, “Pris žoŋinacaqui atipchiž caa” nuž cjan pinsičiča. Jalla nuž pinsiscu, niiz pajk cuchillu jwessiča, cuchillžtan persuna konzjapa.

²⁸ Nekztanaqui Pabluqui kjawčiča, tuž cjan:

–Anam persunpacha čhjojrichaquiča. Tjapa chawjčta pris žoŋinacami tekz žejlča.

²⁹ Jalla nekztanaqui nii carsila itzŋi žoŋiqui micha tjeesnaj cjichiča. Nekztanaqui carsil kjutŋi zati pariju luzziča, walja tsucchi chekjincan. Nekztan Pabluž Silž kjojchquiz tuzi t'oksiča.

³⁰ Nekztanaqui zancu jwescu, pewcziča, tuž cjan:

–Jlanaca, wejr liwriita cjsjapa, ččhjulut wejr paaz waquizasaya?

³¹ Pablužtan Silžtanaqui kjaaziča, tuž cjan:

–Jesucristo Jiliržquiz tjapa kuztan crija. Jalla nuž cjenauki liwriita cjequiča am familianacztanpacha.

³² Jalla nekztanaqui Pablo Silasqui niizquizimi niiz kjuy familianaczquizimi Yooz taku paljayčiča.

³³ Nii weenpacha nii carsila itzŋi žoŋiqui ninacz čhjojri awjžinčiča. Jalla nekztanaqui niimi tjapa familianacami bautista cjissiča.

³⁴ Nekztanaqui nii carsila itzŋi žoŋiqui Pablužtan Silžtan jalla ninaca chjitchiča persun kjuya. Niiz kjuyquin čheri tjaachiča. Nii žoŋiqui familianacztanpacha walja cuntintutača Yoozquin criiču.

³⁵ Nii wenziqui juez jilirinacaqui zultat policianaca mantichiča carsilquin, Pablužtan Silžtan cutz ortinžtan cuchanchiča.

³⁶ Ninacaz carsilquin irantitan, nii carsila itzŋi žoŋiqui Pablužquiz cjichiča:

–Nii juez jilirinacaqui wejtquin ortina apayžquichiča, ančhuc cutznajo. Nižtiquiztan ančhucqui jazic liwriiž okaquiča.

³⁷ Pabluzti nii zultat policianaczquiz paljayčiča, tuž cjan:

–Wejrnacqui roman parti žoŋinacčča. Tjapa tii wajtquiz žejlŋinacz yujcquiz wejrnaca wjajtčiča, ana wejtnacaquiz zumpacha pewcžu. Nekztanaqui inapacha wejrnac carsilquiz majcčiča. ČJaziqui ančhucqui wejrnaca chjojzaka cuts pecya? ¡Anaž cjesača! Antiz ninacaj persuna wejrnac tii carsilquiztan jwesi tjonla.

³⁸ Nekztanaqui nii policianacaqui ojkžcu nii juez jilirinaczquiz tjapa nii puntuquiztan quint'ičiča. Pablužtan Silžtan roman parti žoŋinaczquiztan, jalla nii quintu zizcu, ancha tsucchi cjissiča.

³⁹ Jalla nižtiqiztan pertuna mayizi ojkcichiča. Nekztanaqui nii jilirinacaqui tjonžcu jwessiča. Nekztan Pablužquizimi Silžquizimi rocchiča, tuž cjan:

—Tii wajtquiztanž ulna.

⁴⁰ Jalla nekztanaqui carsilquiztan ulanžcu Pablužtan Silžtan Lidia kjuya ojkcichiča. Jalla nekztanaqui criichi jilanaca cheržcu, “Tjurt’iñi kuzziz cjee ančhucqui” cjan chiižinchiča. Nekztanaqui ojkcichiča.

17

ZOÑINACAŽ APTJAPZTA TESALONICA WAJTQUIN

¹ Jalla nekztanaqui wilta ojkcichiča, Pablužtan Silžtanaqui. Anfipolis nižaza Apolonia jalla nii yokanaca watchiča. Nekztanaqui Tesalónica cjita pajk watja irantichiča. Jalla nekzi tsjii judionacž ajcz kjuya želatča.

² Nii wajtquin Pabluqui nii acjz kjuyquin ojkcichiča, niiz cuzturumpi jaru. Tsjii čhjep jeejz tjuñinacqiziqui Pabluqui nii ajczñi žoñinacžquiz paljajychiča, nii tuquitan cjjirta Yooz tawk jaru.

³ Yooz tawkquiztan tjaajinchiča Jesucristuž puntuquiztan, tuž cjan:

—Jesucristuqui sufrispantača, niiz ticzcama. Niiz ticziquiztan jacatatspantača. Nii Jesusapachača Yooziž cuchanžquita Cristuqui. Jalla nuž ančhucaquiz paljayuča.

⁴ Jalla nii paljaytiquiztan yekjap judionacaqui Jesucristužquin criichiča. Nekztanaqui ninacaqui Pablužtan Silžtan juntu cjišičiča. Nižaza walja griego parti žoñinacaqui Jesucristužquiz criichizakazza. Tuquiqui Yooz Ejpkaz sirwichiča. Nižaza walja rispitta maatakanacaqui Jesucristužquin criichizakazza.

⁵ Jalla nuž cjen ana criiñi judionacaqui ancha iñiziñi cjišičiča. Nekztanaqui nii ana criiñinacaqui yekjap ñejo kuzziz žoñinaca juntjapchiča, Pabluž Silž quintra parlijzjapa. Nekztanaqui ninacaqui juc’anti žoñinaca juntichiča. Nii žoñinaca juntičcu, žoñinaca aptjapchiča Pabluž Silž quintra. Nekztanaqui tjapa nii quintra aptjapžñi žoñinacaqui Jasonž kjuya ojkcichiča. Jalla nuž ojkcžcu, nii kjuya muyuntichiča, Pablo Silas kjurcan. Nii pucultan žoñinaca jwes pecatča, parti žoñinacžquiz intirjizjapa.

⁶ Pero Jasonž kjuyquiz Pablo Silas ana watchiča. Nižtiqiztanaqui nii quintra žoñinaca Jason tanchiča, nižaza yekjap nekz žejlñi jilanacžtan. Nekztanaqui nii criichinacaqui chjichtatača wajt jilirinacž yujcquin. Nii jilirinacž yujcquiz želan, nii quintra žoñinacaqui altu joržtan chiičiča, tuž cjan:

—Tii žoñinacaqui jakziquin ojktėhaja, nekz žejlñi žoñinacž kuz turwayskatča. Jalla tinacaqui tekz tjonchizakazza, ana wal kamaña quejpskatzjapa.

⁷ Jasonqui niiz kjuyquiz Pablo Silas alujchitakča. Nižaza tinacaqui cjiča, yekja chawc jiliri žejlča, Jesusa cjita. Nužukaz cjiča tinacaqui. Jalla nuž cjenaqui niiqui ancha učhum lii quintrača, nižaza učhum roman chawc jilirž quintrača. —Nuž cjan quintra chiičiča.

⁸ Jalla nuž nonžcu, tjapa nii wajtchiz žoñinacami jilirinacami walja zawjchiča.

⁹ Ultimquiziqui Jasonqui niiz mazinacžtanpacha tsjii wali printa tjaachiča, ninaca cutta cjejajo.

PABLUŽTAN SILŽTAN KAMTA BEREJA CJITA WAJTQUIN

¹⁰ Jalla nii nooj weenpacha criichi jilanacaqui Pablužquiz Silžquiz nii wajtquiztan ulanskatchiča. Nekztan Berea cjita watja ojkcichiča. Jalla nicju irantižcu, judionacž ajcz kjuya luzziča.

¹¹ Jalla nij judionacaqui tsjan zuma kuzziztača nii Tesalonic wajtchiz judionacžquiztan. Tjapa kuztan Yooz taku catokñitača. Nižaza zapuru ninacaqui tuquita cjjirta Yooz taku liičcu liičcu zumpacha tantiichiča, nii Pabluž Silas čiita taku, werara ana werara, jalla nii zizjapa.

¹² Jalla nižtiqiztan walja nii judionacaqui Jesucristužquin criichiča. Nižaza walja griego parti žoñinacaqui criichizakazza, rispitta luctakanacami maatakanacami criichizakazza.

¹³ Jalla nekztanaqui nii Tesalónica wajtchiz judionacaqui nonziča, Pabluqui Berea wajtquin Yooz taku paljayñi ojkcichiča. Jalla nii quintu zizcu, Berea watja ojkcichiča. Jalla nicju ninacaqui žoñinaca žawjwaž zjjjcanchiča, Pabluž quintra.

¹⁴ Jalla nuž cjen nii criichi jilanacaqui ana enenskatčcu Pablo cuchanžquichiča pajk kot kjutñi. Silžtan Timoteožtan, jalla ninacazti Berea wajtquiz elichitača.

¹⁵ Nekztanaqui Pablužtan cumpant’iñi žoñinacaqui Pablo chjitchiča Atenas cjita watja. Jalla nekztanaqui quejžquichiča tii takunacžtan: “Silžtan Timoteožtan, jalla ninacaqui Pablužquin apura irantiz waquiziča”, cjan.

PABLUŽ KAMTA ATENAS CJITA WAJTQUIN

¹⁶ Nekztan Pabluqui Silas Timoteo tjewsnatča. Atenas cjita wajtquiz žejlcan, wacchi zoñiz paata yooznaca cherchiča. Nii wajtquiziqui jakzimi zoñiz paata yooznacapanikaz želatča. Jalla nuž cherzcu niiz kuzquiz ancha sint'ichiča.

¹⁷ Jalla nižtiquiztan Pabluqui judionacž ajcz kjuyquin paljaychiča. Judionacžquizimi Yooz rispitiñi zoñinacžquizimi paljaychiča. Nižaza zapuru pajk plazquin paljaychiča, ojklayñi zoñinacžquiz.

¹⁸ Jalla nii plazquiz tsjii istutiiñinaca želatča. Parti nii istutiiñinacaqui Epicúreos t'akquiztantača. Parti nii istutiiñinacazti Estoicos cjita t'akquiztantača. Jalla ninacaqui Pablužquiz paljaychiča. Nekztanaqui yekjap istutiiñinacazti cjichiča:

—Jakužkat tii zoñic chičhani, waljaž chiča pero? ¿Čhjulut intintiskatz pecjo?

Yekjap istutiiñinacazti cjichiča:

—Niiča yekja yooznacž puntuquiztan paljayñiqui.

Pabluqui Jesusiž puntuquiztan nižaza ticzquiztan jacatatz puntuquiztan chiichiča. Jalla nuž čhiitquiztan nii istutiiñinacaqui nižta chiichiča.

¹⁹ Nekztanaqui nii istutiiñinacaqui Pablo chjitchičha tsjii Areópago cjita yokquin. Jalla nicju ajczñitača parlizjapa. Nekztan Pablužquiz chiichiča tuž cjan:

—Nawjctan amqui tsjii ew tjajjintanaca zjicčhamča. Jalla nii ew taku ziz pecučha wejrnacqui.

²⁰ Amqui tsjemat istrañchuc takunaca chiča. Kjažt cjii nii takunacaya, jalla nii intintaz pecučha wejrnacqui.

²¹ Nii Atenas wajtchiz zoñinacaqui nižaza nii parti wajtquin kamñi zoñinacaqui čhjul ew takunacami nonzkaz pecatča. Nižaza čhjul ew takunacami čhiiz kaz pecatča. Jalla nii ew takunacquizkaz ninacž kuz tjaañitača.

²² Jalla nii Areópago yokquin Pabluqui ninacž taypiquin tsijtsičha. Jalla nuž tsijtsu, tuž cjichiča:

—Atenas wajtchiz zoñinaca, ančhucqui wacchi yooznaca rispitiñchucča, jalla niil cheručha.

²³ Tii wajtquiz ojklaycan, wejrqui ančhuca silunaca cherchinča. Nižaza tsjii silquin cherchinča tuž cjiirta: “Tii siluqui ana pajta Yooz sirwizjapača”. Nii ana pajta Yooz ančhucqui rispitiča, ana pajžcupača. Jalla nii ana pajta Yooz puntuquiztan chiyučha.

²⁴ Nii Yoozqui tii muntu paachiča, nižaza tjapa tii muntuquiz žejlñi cusasanaca. Jaziqi arajpachquinami yokquizimiž mantiča. Nii Yoozqui zoñinacž kjuyta timplunacquiz ana kamča.

²⁵ Anaž čhjulumi pecča, zoñiz sirwita paataqui. Niipčaž zapa maynižquiz žeti tjaača, nižaza quera atquiztan jeejsjapa tjaača, nižaza tjappacha tjaača zoñinacžquiz.

²⁶ Tsjii lucutiñi zoñžquiztan tjapa tii muntuquiz žejlñi zoñinaca tjonkatchičha Yoozqui, tjapa kjutñi tii muntuquiz kamajo. Nižaza zoñinacž žejtz timpumi ticz timpumi, jalla nii Yoozpčaž mantiča. Nižaza jakziquin tsjii zoñiqui kamlaja, jalla niimi zakaz mantiča Yoozqui.

²⁷ Jalla nuž mantichiča Yoozqui, zoñinaca nii kjurajo, nižaza wachajo. Ultimupanča Yoozqui učumnacaquiztan anaž ažkquin žejlča.

²⁸ Yooziž cjen učumqui žejtča, nižaza ojklajča. Jalla nižtazakaz yekjap ančhucaquiztan cjiirčičha, tuž cjan: “Yooziž paatača učumqui”.

²⁹ Nekztanaqui učumqui Yooz paatiquiztan, učumlaqui anaž pinsis waquiziča, tuž cjan: “Ultim Yoozza zoñiz paataqui, korquiztan, paazquiztan, mazquiztan, jalla nižta zoñiz paataqui”.

³⁰ Tuqui timpuqui zoñinacaqui Yooz puntuquiztan ana zumpacha zizziča. Jalla nuž cjen Yoozqui zoñinacž uj awantichiča. Anziqui tjapa tii jazta zoñinacžquiz mantichiča, tuž cjan: “Persun uj pajžcu, kuzza campiya”.

³¹ Nekztanaqui Yoozqui tsjii tuñi utchiča, tjapa tii muntuquiz žejlñi zoñinaca werara pjalzjapa. Tsjii Yooziž illzta zoñiqui tjapa zoñinaca pjalaquičha, Yooz Ejpž cuntiquiztan. Yoozqui nii illzta zoñi ticziquiztan jacatatskatchičha. Jalla nižtiquiztan Yoozqui kjanapacha tjeezičha, nii zoñiqui illztatača pjalñijapa, jalla nii. Jaziqi nižžquin criya. —Nuž paljaychiča Pabluqui.

³² Jalla nii ticziquiztan jacatatchi quinto nonžcu, yekjapanacaqui tjassiča. Yekjapanacazti cjichiča:

—Tii jarquin tii amiž čhiita puntuquiztan wilta nonznačhani.

³³ Jalla nekztanaqui Pabluqui ninacžquiztan ojkiča.

³⁴ Yekjapanacazti Pablužquiz apziča, niž taku crižcu. Ninacžquiztan tinaca želatča: Dionisiotičha tsjiiqui, nižaza niiqui Areópago cjita t'akquiztantača. Nižaza Damaris cjiiti tsjaa maatak zonqui criichintača. Nižaza tsjii kjaž iya zoñinacaqui criichiča.

18

PABLUZ KAMTA CORINTO CJITA WAJTQUIN

¹ Wiruñaquí Pabluquí Atenas wajtquíztan ulanchícha. Corinto cjeta watja ojkcícha.

² Jalla nicju tsjii judío zoñžtan zalchícha. Nii zoñiquí Aquila cjitatacha. Ponto yokquíztan tjonchitacha. Niiž tuquiquí Claudio cjeta chawc jiliriquí mantichícha tjapa judío zoñinaca Roma wajtquíztan ulnajo. Jalla nižtquíztan Aquilaquí Italia yokquíztan ulanspantacha, niiž tjunatanpacha, Priscila cjeti. Ninacžquin Pabluquí tjonžñi ojkcícha.

³ Pablužtan ninacžtan tsjii oficiuchiztača, tultu kjuya paañitacha. Jalla nižtquíztan Pabluquí ninacžtan kamchícha junto nii tultu kjuya langzjapa.

⁴ Zapa jeejz tjuñquíz Pabluquí judionacž acjz kjuya ojknitacha. Jalla nicju judionacžquíz Yooz taku paljayñitacha, nižaza ana judío zoñinacžquízimi. Zuma razunchiz tawkžtan paljaychipanča ninacž zumpacha intintazñi cjsnajo.

⁵ Nekžtan Silžtan Timoteožtan Macedonia yokquíztan irantižquichícha. Nekžtanaquí Pabluquí Yooz takupanž paljayatča. Yekja langžñijapa timpu ana želatča. Nižaza Pabluquí judío zoñinacžquíz kjanacama intintiskatchícha, Jesusaquí ninacž tjewžta Cristučha, jalla nii.

⁶ Nii judío zoñinacžti quintra cjišičha Pablužjapa. Nižaza niiž quintra anawalinaca chichícha. Jalla nižta niiž quintra chiiitquíztan Pabluquí niiž zquiti tsajtsajtsinčičha, ninacž quintra tsjii siñala cjeajajo. Nižaza cjichícha:

—Ančhucquí infiernuquínž tjojtaž cjequičha, liwriñi Yooz taku ana nonzinčhucča, nekžtan. Jalla nuž castictaž cjen, ana wejtkuiz uj tjojnasača. Ančhucquí kuzinpan Yooz taku ana criiz pečča. Tonjtan nawjchuc wejrquí yekja wajtchiz zoñinacžquin okača, ninacžquin liwriñi Yooz taku paljayžčača.

⁷ Nekžtanaquí nii ajcz kjuyquíztan ulanžcu tsjii Justo cjeta zoñž kjuya ojkcícha. Nii zoñiquí Yooz sirwiñitacha, nižaza ajcz kjuy latuquíz kjuychiztača. Jalla nekz žejlñitacha.

⁸ Nii ajcz kjuy jiliriquí Crispo cjitatača. Niiquí niiž familianacžtanpacha Jesu-cristužquin criichícha. Nižaza walja Corinto wajtchiz zoñinacaquí Yooz taku nonžcu criichícha. Nekžtanaquí bautista cjišičha.

⁹ Jalla nekžtanaquí tsjii ween Yooz Jiliriquí Pablo chjuuzkatchícha. Nii chjuuztquíztan Yoozquí Pablužquíz cjichícha:

—Ana eksna amquí. Tirapan Yooz taku parla. Yooz taku paljayñi langzquíztan ana jayta.

¹⁰ Wejrquí amtan chicapachača. Anaž jakziltami amquíz tani atasača, ana wali paazjapaquí. Nižaza tii chawc wajtquíz muzpa zoñinacaquí wejtkuiz criyaquičha.

¹¹ Jalla nuž chjuuzcu Pabluquí nii Corinto wajtquíz tsjii wata tirtuchiz kamchícha, Yooz taku tjaajincan.

¹² Jalla niiž wiruñ judío zoñinacaquí Pabluž quintra tsjii kuzziz ajczícha. Nekžtanaquí Pablo tanžcu, chawc jilirž yujcquin chjitchícha. Galión cjitatača nii Acay yok jiliriquí.

¹³ Jalla nuž chjichcu, nii chawc jiliržquíz cjichícha:

—Tii zoñiquí učumnaca lii quintraž ojklajča. Tiiquí zoñinacžquíz ana wal tawkžtan intintiskatcha, niiž Yooz sirwizjapa. Pero niiž Yooz sirwizquí učumnaca lii quintrača.

¹⁴ Pabluž chiyawc cjen Galión cjeta jiliriquí judionacžquíz paljaychícha, tuž cjican:

—Judío zoñinaca, tii zoñiquí ana wejtnaca lii quintra paachícha. Nižaza ana chawc uj paachícha. Tsjii anawali paatasacha, nekžtan ančhucaž quijta razuna nonžtasacha.

¹⁵ Tii asuntuquí ančhuca takucamakazla; nižaza zoñž tjuu puntuquíztan parlakazla; nižaza ančhuca liiquíztankazla. Jaziquí ančhucporaž parlasa; nižaza ančhucporaž kjažmi arreglase. Wejrquí anal tii ančhuca lii puntuquíztan arreglis želuča.

¹⁶ Jalla nekžtanaquí nii jiliriquí nii zoñinaca tjirkatchícha niiž oficinquíztan.

¹⁷ Nii ajcz kjuya jiliriquí Sóstenes cjitatača. Jalla niičha quijchiquí. Jalla nuž nii jiliriz tjirkattiquíztan, tjapa nii wajtchiz zoñinacaquí nii quijñi zoñžtan kichi tansiča, jalla nekžpacha, nii jilirž yujcquízpacha. Nii Galión cjeta jilirizti nuž kichjasanamí ana impotichícha.

PABLUQUI ANTIOQUIA QUEJPCHICHA

¹⁸ Nekžtanaquí Pabluquí iyapan kamchícha. Nekžtan nii criichi jilanacžquíz “Okučha” cjican ulanchícha. Nekžtanaquí tsjii warcu zali ojkcícha, Siria yoka ojczjapa. Priscilatan Aquilžtan chica ojkcícha. Cencrea cjeta wajtquíz, ima warcuquíz luzcan, Pabluquí niiž ach chara k'ala murchícha, tsjii compromitta cuzturumpi cumplisjapa.

¹⁹ Nekžtanaquí warcuquíz ojkcžcu, Efeso cjeta watja irantichícha. Jalla nicju Pabluquí Priscilatan Aquilžtan, jalla ninaca ecchícha. Nekžtan Pabluquí judionacž ajcz kjuya ojkcícha. Jalla nicju nii ajczñi judionacžtan parlichícha.

²⁰ Nekžtanaquí nii judionacaquí Pablo roct'ichícha, iya tsjii kjaž majžtan kamt'ajo. Pabluzti ana munchícha.

²¹ Jalla nekztan ima ninacžquiztan ojkcan, Pabluqui cjichiča:

—Jerusalén watja irantistanča, pijjsta paazjapa. Pero Yooz munanaqui wejrqui quejpcacača anchucatan wilta zali.

Jalla nuž chižcu, warcuquiz luzziča. Nekztanaqui Efeso wajtquiztan ojkchiča.

²² Nekztanaqui Cesarea cjita watja irantižcu, Pabluqui warcuquiztan ulanchiča. Jalla nuž ulanžcu Jerusalén watja ojkchiča, criichi jilanacžquin zalzjapa. Nekztan Antioquia wajt kjuin ojkchiča.

²³ Jalla nekz tsjii kjaž tjuñi kamžcu, wilta ojkchiča. Galacia nižaza Frigia yokanacaran ojklaychiča. Jalla niiran iclizquiztan icliza ojklaychiča, criichi jilanaca tjurt'iñi kuzziz cjskatzjapa.

APOLOS CJITA YOOZ TAKU PALJAYŃI

²⁴ Jalla nii timpuqui tsjii judío zoñiqui Efeso cjita watja irantichiča. Apolos cjita tjuuchiztača. Niiqui Alejandria pajk wajtchiz zoñitača. Nižaza niiqui Yooz taku walja zuma paljayñitača. Nižaza cjiirta Yooz taku zumaž zizatača.

²⁵ Nii Apoložquiz Yooz kamañ puntu walja tjaajintatača. Jaziqiu walja tjapa kuztan Yooz taku parliñitača. Juanž bautistakaz cjenami Jesucristuž puntuquiztan walja kjana tjaajinchiča.

²⁶ Nekztanaqui Efeso wajtquiz žejlcan, Apolosqui ajcz kjuyquiz tjurt'iñi kuzziz tsijtsiča, Yooz taku paljayzjapa. Niiž paljayta taku nonžcu, Priscilatan Aquilžtan jalla ninacaqui tsjii latu Apolos chjitchiča, Yooz kamaña puntu tsjan kjana tjaajinzjapa.

²⁷ Jalla nekztanaqui Apoložquiz Acaya cjita yokaran ojklayz pecatča. Jalla nuž cjen jilanacaqui walja apoychiča, nižaza tsjii carta credencial apaychiča nii yokquin žejlñi jilanacžquiz, ninaca zuma risiwajo. Nii yokchiz jilanacaqui Yooz okžñiz cjen criichiča. Acaya irantiscuqui Apolosqui nii criichi jilanacžquiz zuma tjaajinchiča.

²⁸ Nižaza zuma razunquiztan chiican, tjapa zoñinacž yuejcuiz nii quintra judionacž pinsitanaca tjeeciča, anapan zumaž ninacž razunaqui. Ninaca atipchiča. Nii quintra judío zoñinacaqui ana kjaž cjii atchiča. Cjiirta Yooz tawk jaru intintiskatchiča, Jesusaqui ninacaž tjewzta Cristuča, nižaza Yoozquiztan cuchanžquita Cristuča, jalla nii.

19

PABLUZ KAMTA EFESO CJITA WAJTQUIN

¹ Acayquiztan quejpcu, Apolosqui Corinto wajtquiz želatča. Pabluzti curunac yoka watžcu, Efeso watja irantichiča. Jalla nicju tsjii kjaž Yoozquin criichi zoñinacžtan zalchiča.

² Jalla nuž zalžcu, Pabluqui pewcziča, tuž cjican:

—žAnčhuc criiž oraqui Espiritu Santuqui ančhuca kuzquiz luzzikay?

Ninacaqui kjaaziča, tuž cjican:

—Anaž. Nii Espiritu Santo puntuquiztan anawira nonzinča.

³ Jalla nižtiquiztanaqui Pabluqui pewcziča, tuž cjican:

—Ančhucqui, žčhjul bautismo tanzinčuctaya?

Ninacaqui kjaaziča:

—Juanž bautismo tanzinča —cjican.

⁴ Nekztanaqui Pabluqui cjichiča:

—Walikazza. Juanqui kuz campiiñi zoñinacžquiz bautisñitača. Pero nii Juanž wirquin tsjiuqui tjonchiča. Jalla niiča Jesusaqui. Niiqui Yooz Ejpžquiztan cuchanžquita Cristuča. Jalla nižquin criiž waquiziča. Jalla nižtakaz Juanqui zoñinacžquiz chižiñitača.

⁵ Jalla nii taku catokžcu, nii zoñinacaqui Jesucristo Jilirž tjuuquiz bautistatača.

⁶ Nekztanaqui Pabluqui ninacž juntuñ kjaržtan lanchiča. Jalla nuž lanžnan Espiritu Santuqui tjonchiča. Jalla nižtiquiztan yekja takunacžtan parli kallantichiča. Nižaza Yooziž zizkatta puntunaca parlichiča.

⁷ Jalla ninacaqui tsjii tuncapan zoñinacatakalča.

⁸ Chjep jiiz Pabluqui jalla nicju kamchiča. Jalla nuž kamcan ajcz kjuya ojkñipantača. Nii ajcz kjuyquin zuma tjurt'iñi kuzziz paljayñipantača, Yooz mantita kamañ puntuquiztan intintiskatcan.

⁹ Yekjap zoñinacazti wira ana criichipanča. Ninacaqui chojru kuzziz cjisiča. Yooz kamañ quintra parlichiča. Jalla nižtiquiztan Pabluqui ninacžquiztan zarakchiča. Nižaza criichi zoñinaca chjitchiča tsjii escuel kjuyquin. Nii escuelchiz zoñiqui Tiranno cjita tjuuchiztača. Jalla nicju Pabluqui tjaajinchiča zapuru.

¹⁰ Jalla nuž tjaajincanaqui pizc wata kamchiča. Jalla nižtiquiztan tjapa nii Asia provincia yokquin kamñinacaqui Jesusa Jilirž liwriiñi quintu nonchiča. Judío zoñinacami, nižaza ana judío zoñinacami nii quintu nonchiča.

¹¹ Nižaza Yooz aztan Pabluqui wali pajk milajrunaca paachiča.

¹² Jalla nižtiquiztan zoñinacaqui pañumi zquitimi Pablužquin lanskatchiča. Jalla nuž lanskatčzu, nii pañumi zquitimi chjitchiča, laa zoñinacžquin. Jalla nižtiquiztan nii laanacaqui chjetintatača, nižaza nii zoñinaca tanñi zajranacami ulanskatchiča.

¹³ Tsjii kjaž judío zoñinacaqui ojklayatča, zajranaca chjatkatcan. Jalla nuž chjatkatcan, nii zoñinacaqui Jesusa Jilirž tjuužtan ojklayz pecatča. Nekztanaqui zajranacžquiz cjichiča:

—Zajranaca, ančhuc ulnaj cjiwča, Pabluž parlita Jesús tjuuquiz.

¹⁴ Jalla nižta paachiča pakallawk judío jilazullcaqui. Ninacž ejpqui Esceva cjita tjuuchiztača. Niiqui judiuž timplu chawc jiliritača.

¹⁵ Nii pakallawk jilazullca nižta paan, tsjii zoñi tanñi zajraqui ninacžquiz cjichiča:

—Jesús pajuča. Nižaza Pablo pajuča. Ančhucqui čjectčhuctajo?

¹⁶ Jalla nižtiquiztan nii zajra tanta zoñiqui tsjii layčzu ninacžquiz tanziča, kijchjapa. Nii zajraž tanta zoñiqui walja azziztača. Jalla nii aztan ninaca atipchiča. Nižaza k'alapacha čhjojritchipanča. Nižtami chjojricta ana zquitchiz atipassiča nii pakallawk zoñinacaqui.

¹⁷ Jalla nekztanaqui tjapa nii Efeso wajtchiz žejlñi zoñinacaqui nii quintu zizziča, judionacami, ana judionacami. Jalla nekztan walja eksnatča. Nižaza Jesucristo Jilirž tjuu walja alawazziča.

¹⁸ Nižaza walja criichi zoñinacaqui ninacaz tuquita persun uj paatanaca pajčzu, kjanacama mazziča.

¹⁹ Nižaza yekjap zoñinacaqui ima Yoozquin criican, laykican ojklayñitača. Jalla ninacaqui ninacž layka ojklayz liwrunaca zjijčičiča. Nekztan k'ala nii liwrunaca ujkatchičiča tjapa zoñinacaz cheran. Pjijska tunc waranka pajk ultimu paaz, nuž valorchiztača nii liwrunacaqui.

²⁰ Jalla nekztan nii criichi zoñinacaqui tjapa kjutñi Yooz taku paljayi ojklayčičiča. Nekztan tsjan tsjan zoñinacaqui Yooz taku catokchiča.

²¹ Jalla niž wiruñ Pabluqui nižz kutquiz Macedonia nižaza Acaya yokanacquin tjonzpanž tantičičiča. Jalla nuž wattan Jerusalén watja irantispantž tantičičiča. Nižaza Pabluqui cjichiča:

—Jerusalén watja ojčkucqui, wejtlauqui Roma watja irantistanča.

²² Jalla nižtiquiztanacuqui Pabluqui pucultan yanapñinaca cuchanchičiča Macedonia. Nii pucultanaqui Timoteotača, nižaza tsjiiqui Erastotača. Pabluzti tsjii kjaž majjapa eclichičiča Asia yokquin.

ZOÑINACA APTJAPZTA EFESO WAJTQUIN

²³ Jalla nii timpuqui walja zoñinaca aptjapziča, Yooz kamañ jicz puntuquiztan paljaytaž cjen.

²⁴ Nii aptjapñi achaqui Demetrio cjitatača. Jalla niiqui paazquiztan yooznaca paañitača. Jalla nuž paatiquiztan walja paaz canchiča, nižaza parti nižta paañinacaqui. Diana cjiti zoñiž paata yooz timplu irata jalla nii paachiča ninacaqui.

²⁵ Nekztan Demetrio cjita zoñiqui tjapa nii yooznaca paañi zoñinaca juntichičiča, nižaza nižz langžñi mazinaca juntichizakazza. Nekztanaqui tuž cjichiča:

—Jilanaca, ančhucqui zizza. Tii oficiuquiz langzcan, zuma paaz canča učumnacaqui, zuma kamzjapa.

²⁶ Tii Pabluqui ojklayča, “Zoñiž paata yooznacaqui anača ultim yoozqui”, cjican. Jalla nuž chiyani, walja zoñinacaqui nižz taku criiča, tii Efeso wajtquinami, nižaza tjapa tii Asia provincia yokquinami. Nižz taku criičzu, učum yooznacquiztan zarakchiča. Jalla nii quintu nonchinčhucča, nižaza cherchinčhucča.

²⁷ Jalla nižtiquiztan tii učum langznacaqui anat cusa cjisnačani. Nižaza učumž cansmi pertisnačani. Anziquu tjapa tii Asia provincia yokquin žejlñi zoñinacami nižaza tjapa tii muntuquiz žejlñi zoñinacami naa yooz siñuri sirwiñičiča. Pero Pabluž cjen, Diana cjití pajk yooz siñuri timplumi ana rispittat cječani.

²⁸ Jalla nuž Demetriuz čhiita taku nonžcu, walja zjawjchi cjišičiča. Jalla nuž zjawjčzu, kjawchiča tuž cjan:

—¡Viva Diana yooz siñura! ¡Viva tii Efeso wajtchiz yooz! —nuž cjican kjawchiča.

²⁹ Nekztan tjapa nii wajtchiz zoñinacž kuz turwayskatchičha. Nižtiqiztan nii wajtchiz zoñinacaqui Gayžtan Aristarcužtan, jalla ninaca kichi tanzičha. Nii pucultanaqui Macedonia yokouiztan Pablužtan chica ojkcchitac̃ha. Jalla nii pucultan tanžcu, pajk parliz kjuya chjitchičha.

³⁰ Nižaza Pabluqui nii kjuya luz pecatčha, zoñinacžquiz paljayzjapa. Criichi zoñinacazti Pablo atajchičha, ana luzkatajo.

³¹ Nižaza yekjap Asia jilirinaca želatčha, Pabluž amigonacatakalc̃ha. Jalla ninacaqui tsjii zoñi cuchanžquichičha Pablužquin rocžinajo, nii parliz kjuyquiz ana luzajo.

³² Tampachquiztan juntazcu zoñinacaqui kjawchičha tjapaman razunanaca chiican. Aptjapziž cjen nekztan nižta kjawchičha zoñinacaqui. Ancha pajk ch'awjwa paatčha. Jila manka zoñinacaqui čjul puntu ajcztažlaja ana zizzičha.

³³ Yekjap zoñinacaqui nii ajczta puntu zumpacha intintiskatchičha Alejandružquiz. Nekztan niiqui tucquin tsjtskatchičha, nii judionacžquiztan tjurt'izinajo. Nekztanaqui Alejandruqui kjara waytižcu ch'uj cjeej cjichičha. Nekztanaqui niiqui tjapa zoñinacž yujcquiz tjurt'iziž tawkžtan chiiz pecatčha.

³⁴ Parti zoñinacazti Alejandro judio zoñi cjican zizcu, wilta kjawchičha tsjii pizc ora. Tsjii joržtan tuž cjican:

—¡Viva Diana yooz siñural! ¡Viva tii Efeso wajtchiz yooz!

³⁵ Jalla nekztanaqui nii wajt secretariuqui zoñinaca ch'uj cjiskatžcu, paljaychičha tuž cjican:

—Efeso jilanaca, tii pajk yooz Diana siñura timplu tii Efeso wajtchiz zoñinacžquiz cumpjitačha. Nižaza arajpachquiztan tjojtžquichinčha taa yooz siñuriqui. Tsjii maz cheechi tjonžquichinčha.

³⁶ Jalla nii puntuquiztanaqui anaž jecmi nicasac̃ha. Jaziqui ch'ujčha cjee. Ima zuma tantiyazcan anačha čjulumi paa.

³⁷ Tii anchuca zijjcta zoñinacaqui ana čjulumi chiichičha naa Diana siñurijapaqui, anazaž naa quintra čjulumi paachičha.

³⁸ Demetriužtan niž langžni mazinacžtan quijz pecčhaj niiqui, nijjapa juez jilirinaca žejlčha. Nii jilirinacžquinkaz ojkla, nii quija arreglisjapaqui.

³⁹ Tsjii yekja puntu parliz pecčhaj niiqui, zumpachaž ajczcuž parla.

⁴⁰ Tii aptjapzi puntuquiztan ućhum chiiz razunanacaqui ana žejlčha. Jaziqui ućhum gobiernuqui ućhumnac quintra uj tjojtznasačha, tii nooj aptjapztiqiztan.

⁴¹ Tii parlaqui žeržta cjila, —nuž cjichičha nii secretariuqui.

Nekztanaqui zoñinaca liwž cuchanchičha, persun kjuya okajo.

20

PABLUZ OJKTA MACEDONIA NIZAZA GRECIA

¹ Jalla nekztanaqui nii aptjapzta zoñinacž ojktan, Pabluqui criichi zoñinaca kjawzičha, ninacžquiz tjaajinzjapa. Nekztanaqui Pabluqui “Okaž” cjichičha, Macedonia yoka ojczjapa.

² Jalla nii yokquin ojklaycan, criichi jilanacžquin zuma tawkžtan ancha p'ekinchaychičha, tjurt'iñi kuzziz cjeyajo. Nekztanaqui Grecia yoka irantichičha.

³ Jalla nicju čhjep jiiž žejlchičha. Nekztan warcu zalz pecatčha, Siria yoka ojczjapa. Warcu tanawc cjen, Pabluqui quinto zizzičha, judionacaqui niž quintra parlassitaquičha, jalla nii. Jalla nižtiqiztan niž warcuquiz ojcz cjetaqui nužquiz tijsičha. Yokaranpacha ojkcchičha. Nekztan Macedonia yoka irantichičha.

⁴ Nižaza Pablužtan chica ojkcchiqui tinacatačha: Sopatertačha (niiqui Berea wajtchiztačha), nižaza Aristarcutačha, nižaza Segundutačha (niiqui Tesalónica wajtchiztačha), nižaza Gayutačha (niiqui Derbe wajtchiztačha), nižaza Timoteotačha, nižaza Tiquicutačha, nižaza Trofimučha. (Jalla Tiquicužtan Trofimužtan Asia provinciuztantačha).

⁵ Jalla nii jilanacaqui wejnaca tuqui okjaychičha. Jalla nuž okjayžcu Troas cjita wajtquin wejrnac tjewzičha.

⁶ Wejrnacqui ana liwaturchiz t'anta lujlž pjijsta paztan, Filipino cjita wajtquiztan zarakchinčha tsjii warcuquiz. Tsjii pjijska tjuñquiztan Troas watja irantichinčha. Jalla nicju kamchinčha tsjii simana.

PABLUZ KAMTA TROAS WAJTQUIN

⁷ Dominguqui wejrnacqui ajczinčha, Santa Cena paazjapa. Jalla nuž ajczcu Pabluqui tjaajinčičha criichi jilanacžquiz. Jaka tažu zarakz cjen, chica aramacama tjaajinčičha.

⁸ Wejrnacqui tsewcta pisuquin ajczintačha tsjii kjuyquiz. Kjanzjapa wacchi michanaca tjestatačha.

⁹ Nižaza Eutico cjeta tjowa ventanquiz julzi želatča. Pabluž azkapacha chiyan, nii tjowaqui ancha tjaji tjonkatchičha. Nekztan nii ventanquiztan kossuc tjojtsičha, čjep pisu kjuyquiztan. Ticzi waytitatača nii tjowaqui.

¹⁰ Nekztanaqui Pabluqui chjiwžquičičha. Nii tjowž juntuñ chutjatžcu žcojrziča. Nekztanaqui parti jilanacžquin cjičičha:

—Anača tsucaquičha. Zejtča tiiqui.

¹¹ Jalla nekztanaqui Pabluqui wilta yawchiča tsewcta pisuquin. Nekztan Santa Cena paachiča. Jalla nuž paažcu, Pabluqui tirapan parličičha kjantatscama. Nekztan ojkičičha.

¹² Partinacazti zuma kuzta ecličičha. Nii tjowa vivož cjen, cuntintu nii tjowa chjitchičha.

¹³ Nekztanaqui wejrnacqui warcuquiz okjaychinča Asón yokacama. Pabluži kjojčuñ ojki pecatča. Asón wajtquiztan Pablo zakaz warcuquiz ojki tantičičha. Jalla nuž cjian kaztatača.

¹⁴ Nekztanaqui Asón wajtquin Pablužtan zalzinča. Nekztanaqui Pabluqui wejtnacatan čica warcuquiz luzziča. Nekztanaqui Mitilene kjutni ojkičinča.

¹⁵ Mitilenequiztan ojkan, jaka tažuqui Quío latuquin watchinča. Kat tažuqui Samos cjeta watja irantichinča. Nekztanaqui Trogilio cjeta wajtquin jeejsassinča. Niiž jaka tažuqui Mileto cjeta watja irantichinča.

¹⁶ Jalla nuž ojkičinča, Asia yokquin ana wacchi tjuñi žejljapa. Efeso wajtquin ana ojki pecatča. Antiz Jerusalén watja apura ojki pecatča Pabluqui. Jalla nicju irantis pecatča ima Pentecostés tjuñi tjonan. Jaknužquiztanami irantisquizpanž pecatča.

EFESO ICLIZ JILIRINACŽQUIN CHIIZINTA

¹⁷ Mileto wajtquiz žejlcan, Pabluqui Efeso icliz jilirinaca kjawžquičha cuchanchičha.

¹⁸ Jalla nii jilirinacaž tjontan, Pabluqui ninacžquiz tuž čiižinčičha:

—Weriž Asia yokquiz tjontan, nii tjuñquiztanpacha jaknužt ančhucatan čica kamtučhaja, jalla nii ančhucqui zizza.

¹⁹ Jalla nuž ančhucatan kamcan, humilde kuzziz Yooz Jiliržquiz sirwichinča. Nižaza criichi žoñinacžquiztan wejt kuzquiz sint'itiquiztan ancha kaachinča, nižaza ancha pruebanačami sufrichinča.

²⁰ Tsjan zuma kamañčiz cjisjapa ančhucaquiz tjapa zumanaca tjaajinčinča, tjup kuzziz. Plazquinami callquinami tjaajinčinča, nižaza ančhuca persun kjuyquiztan kjuya tjaajinčinča.

²¹ Nižaza judionacžquizimi ana judionacžquizimi paljaychinča wejrqui, tuž cjian: “Ančhucqui persun uj pajžcu, kuznaca campiya. Jesucristo Jiliržquin tjapa kuztan criya”.

²² Anziqiu wejrqui Jerusalén watjal okača. Espiritu Santuž mantital okača. Jalla nicju čhjulut watačhaja, anal zizuča.

²³ Jalla tii puntukal zizuča. Tjapa watjaran weriž ojklayan Espiritu Santuqui wejtquiz čiičičha, tuž cjian: “Amqui carsilquiz chawctam cjequičha. Nižaza ančham sufraquičha”.

²⁴ Pero nii mazintiquiztanaqui wejr anal turwasnuča. Tii muntuquiz žejtjapa anaž importičha wejrqui. Wejt wiraqui anaž čekanaqui. Jesucristo Jiliriz tjaata apóstol cargo, jalla nii cumplistanča čekanaqui. Yooziž tjaata kamañ jaru ojklaz pecučha, ticzcama. Liwriičha Yooz taku parliz pecučha, Yooz zuma okžniča cjian.

²⁵ Yooz mantuquiz kamz puntuquiztan ančhucaquiz mazzinča. Anziqiu ančhucqui wejtjan anaž iya zalaquičha tekztan nawjčhuc.

²⁶ Jalla nižtiquiztan ančhucaquiz čhiyuča, tuž cjian: Anaž jecmi ančhucaquiztan wejtquin uj tjojtnašača, tuž cjian:

²⁷ “Pabluqui anaž tjapa Yooziž tjaata taku tjaajinčičha” cjianauqui. Wejrqui tjapa Yooziž tjaata takunaca ančhucaquiz mazzinča.

²⁸ Jalla nižtiquiztanaqui ančhucqui persunpachquiz cwitaza, nižaza parti ančhuca iclizziz jilanaca cwičquičha ančhucqui. Espiritu Santuqui ančhuc jiliriztakaz utčiča Yoozquin criichinaca cwičajo, nižaza Yooz tawk čheri tjaajo. Nii criichi jilanacž laycu Jesucristo Yoozqui niž persun ljoc tawkčiča, cruzquiz ch'awčcu. Jaziqiu criichi žoñinacača Jesucristužtaqui.

²⁹ Tsjii zakal zizuča. Weriž ojktan, yekja žoñinacaqui ančhucaquin tjonaquičha ančhuc wichanzjapa, nižaza ančhuca icliza akscatzjapa. Ninacaqui uuzi tanñi kitižtakaz luzcaquičha.

³⁰ Nižaza ančhucaquiztan toscara čiiñinaca želaquičha tsjii kjutni criichi jilanaca chjitzjapa toscar tawkžtan.

³¹ Jaziqui ančhucqui zumpacha cwitaza. Wejrqui čhjep wata intiru majiñami weenami zapa mayni ančucaquiz tjaajinchinča. Nižaza ančucaquiz chiichiižincan, ancha kaachinča.

³² Jaziqui jilanaca, ančhucqui Yoozquin cumpjiyuča. Nižaza Yooz zuma taku zumpachaž catoka. Jalla nuž cjen ančhucqui tjurt'ifni kuzziz cjequičha. Nekztan Yoozquiztan irinsa tanznaquičha tjapa Yooziž t'akžta žoñinacžtan.

³³ Wejrpachača paazmi zquitimi anapan pecchintqui jeczquiztanami.

³⁴ Antiz wejrtča persun kjaržtan langziñtqui, čhjulut pecatučhaja, jalla niijapa, nižaza wejttan chica ojklayñi žoñinacžjapami. Jalla nii puntuquiztanaqui ančhucqui zumpachaž zizza.

³⁵ Jalla nužupan ančhucqui langz waquiziča, t'akjir žoñinacžquiz yanapzjapa. Jalla nuž kjana tjeezinča persuna langzcan. Nižaza Jesús Jilirž chiita taku cjuñzna. Jalla tuž cjiča nii chiitaqui: “Onanñi žoñinacaqui juc'ant cuntintučha tanzñi žoñinacžquiztanaqui”.

³⁶ Jalla nuž chižcu, Pabluqui quillziča, tjapa nii žejlñi hermanonacžtan, Yoozquin mayizizjapa.

³⁷ Jalla nekztanaqui tjapa nii jilanacaqui kaachiča Pabluž ojcz cjen. Pablo žcojrziča, nižaza chjulziča.

³⁸ Pabluqui cjichiča:

–Wejrqui okača, jaziqui anaž iya wejr cheraquičha. –Jalla nižtiquiztan nii jilanacaqui ancha llaquita cjissiča.

Jalla nekztanaqui warcu luzcama chica ojkiča.

21

PABLUQUI JERUSALEN WATJA OJKCHICHA

¹ Jilanaca eccu, warcuquiz luzzinča. Nekztan Cos cjita yok tirichuc ojkinča. Jaka tažuqui Rodas cjita yokquin ojkinča. Jalla niwctan Pátara cjita watja ojkinča.

² Jalla nii Pátara wajtquiztan tsjii Fenicia kjutñi ojki warcu zalchinča. Nekztan nii warcuquiz luzcu ojkinča.

³ Jalla nuž ojkan Chipre cjita yoka azkquin cherchinča. Chipre yokaqui zkar latuquinča. Tira ojkinča Siria yoka irantizcama. Tiro cjita wajtquiz kuzi ecz želan, nekztan Tiro watja luzziča.

⁴ Jalla nicju criichi jilanaca kjurchinča, zalañcama. Nekztanaqui ninacžtan kamchinča tsjii simana. Ninacaqui Espiritu Santuž cjen chiikatchičha Pablužquiz, tuž cjican:

–Amqui anatača ojczqui Jerusalén watja.

⁵ Simanaž wattan, Tiro wajtquiztan ulanchinča. Nižaza tjapa nii wajtchiz criichi žoñinacaqui maatakanacžtanami ocjalanacžtanami wejnacaquiz cumpant'ichiča wajtž tjiya. Jalla nicju tsjii k'ara želatča, kot atquin. Nii k'arquiz quillžu Yoozquin mayizassinča.

⁶ Nekztanaqui zumpacha kjara tansascu, jaljtassinča “Kjažllami okall” cjican. Nekztanaqui wejrnacqui warcuquiz luzzinča. Ninacazi kjuya quejpcičha.

⁷ Nekztanaqui Tiro wajtquiztan zarakchinča, Tolemaida cjita watja irantiscama. Jalla nicju criichi jilanacžquin tsaani ojkinča. Jalla nekztanaqui tsjii noj kamchinča nii jilanacžtan.

⁸ Niiž jaka tažuqui Pablužtan wejtnacatan ulanchinča. Nekztan Cesarea cjita watja irantichinča. Jalla nii wajtquiz irantižcu Felipž kjuya ojkinča. Jalla niitača liwriiñi Yooz taku parliñiqui jalla nii oficiuchiztača. Niiž tuqui Jerusalenquin pakallawk jilanaca illzatača, Yooztajapa langzjapa. Tsjiiqui nii Felipitača. Jalla niiž kjuyquin kamchinča.

⁹ Nii Felipiqui pajkpaltan ana zalzi tjunmatanacchiztača. Nižaza ninacaqui Yoozquiztan zizta taku parliñi profetanacatača.

¹⁰ Jalla ninacž kjuyquin tsjii kjaž maj kamžcu, tsjii Agabo cjita žoñiqui tjončiča Judea cjita yokquiztan. Nii žoñiqui Yooz taku parliñi profetatača.

¹¹ Jalla nii žoñiqui wejrnac tjonžñi tjončiča. Nekztanaqui Pabluž jweranta kojch aptičičha. Nii kojchtan persun kjojcha kjara jwersičha tuž cjican:

–Espiritu Santuqui tuž cjiča: “Jalla nižtapacha Jerusalén wajtquin judío žoñinacaqui tii kojch tuyñi žoñi jwernaquičha. Jalla nuž jweržcu, yekja wajtchiz žoñinacžquiz intirjaquičha”. –Nuž cjichiča Agabo cjita profetaqui.

¹² Jalla nuž nonžcu, wejrnacmi nižaza nii Cesarea wajtchiz criichinacami tjappacha Pablužquiz rocassinča ana Jerusalén watja okajo.

¹³ Pabluzti kjaaziča, tuž cjican:

–Kjažtiquiztan ančhuc kaajo? Čkjažtiquiztan ančhuc wejr llaquizkatjo? Wejrqui Jesu-cristuž cjen listučha čhejlta cjisjapami nižaza Jerusalén wajtquin ticzjapami.

¹⁴ Jaziqui wejtnaca razunžtan Pabluž taku ana atipi atchinča. Jalla nuž cjen ana tira chiichinča. Tiikazza cjichinča:

—Yooz Jilirž munañpaj cjila.

¹⁵ Jalla nektzanaqui ojkszapa tjaczinča. Nektzan Jerusalén wajt kjutñi ojkcchinča.

¹⁶ Nižaza yekjap Yoozquin criichi jilanacaqui wejtnacaqui cumpant'ichiča. Tsjii ninaczquiztan Mnasón cjita zoñi želatča. Niiqui Chipre cjita wajtchiz zoñitača. Azk wata Yoozquin criichipantača. Niiž kjuyquin alujazjapatača Jerusalén wajtquin.

PABLUQUI JACOBZQUIZ TJONZICHA

¹⁷ Jerusalén watja irantižcu, Yoozquin criichi jilanacaqui wejtnac ancha cuntintu risiw't'ichiča.

¹⁸ Niiž jaka tažu Pabluqui wejtnacatan Jacobžquin tjonzñi ojkcchiča. Jalla nicju tjapa nii Jerusalén icliz jilirinacaqui želatča.

¹⁹ Pabluqui jilanaczquiz tsaanžcu, tjappacha niiž ojklayta quint'ichiča. Yoozqui Pabluquiz wali pajk obranaca paakatchiča ana judío zoñinacz yokaran ojklayan. Jalla nii quint'ichiča Pabluqui.

²⁰ Nižaza ninacaqui nonžcuqui, Yooz honora chiichiča. Nižaza Pabluquiz cjichiča:

—Jila, walikazza niiqui. Nižaza tekzi tsjii kjaž warank judionacaqui Jesucristužquin criichizakazza. Jalla nii zizzamča. Nižaza tjapa ninacaqui cjichipanča, “Moisés lii jaru ojktanča” jalla nii.

²¹ Nižaza ninacaqui nonziča tii quintu: Amqui yekja yokquin kamñi judionaczquiz tjaajinñamča, “Moisés mantita lii ana cumplis waquiziča”, jalla nii. Nižaza ninacaqui am puntuquiztan tuž nonziča: Amqui “Lucmajch wawanaca ana chimputa cjis waquiziča”, cjican tjaajinñamča. Nižaza amqui “Učhum judío cuzturumpinac jaru ana paaz waquiziča” cjican tjaajinñamča. Jalla nuž am puntuquiztan nonziča tekz žejlñi hermanonacaqui.

²² Anziqiu nii hermanonacaqui am tjonchi zizcu ajcznaquiča. Jaziqui, žjaknužum cjeequi?

²³ Amqui jalla tuzum paačhaj. Tii Jerusalén wajtquiz pajkpaltan zoñinaca žejlča. Ninacaqui compromitta taku cumplistanča.

²⁴ Amtan chica ninaca chjiča. Nektzan ninacztan chica am učhum cuzturumpi paa. Nižaza ninacz gasto pacna, ninaca persun ach chara k'ala murta cjisjapa. Jalla nižtquiztan tjappacha intintiskataquiča, amqui učumnaca cuzturumpi ana quintrača, jalla nii. Jalla nuž chiichiñinacaqui toscara cjitaž cjequiča. Ampachazakazim učhum lii jaru paača. Jalla nuž intintaquiča tjappachaqui.

²⁵ Nižaza wejtnacqui nacjuñta wajtchiz ana judío criichinaczquiz cjiirchinča, tuž cjican: “Zoñiž paata yoozquiz wilana jawkta chjizwi anača lujlsqui. Nižaza jora zkenzcu conta animal chjizwimi anača lujlsqui. Nižaza luctakžtanami maatakžtanami anača adulteriuquiz ojklayzqui”. —Jalla nuž Pabluquiz chichiča nii icliz jilirinacaqui.

PABLUQUI PRESO TANTATACHA

²⁶ Jalla nektzanaqui Pabluqui nii pajkpaltan zoñinaca chjitchiča. Niiž jaka tažuqui ninacztan chica cuzturumpi paachiča. Nektzanaqui timpluquin luzziča čhjulorat nii cuzturumpi paaz tjuñinaca žerznačhaja, jalla nii mazjapa. Nii cuzturumpi paaz tjuñinaca žerztan, Pabluqui persunjapami ninacztajapami ofrenda tjaastanča. Nii puntu zakaz timpluquin mazñi luzziča.

²⁷ Nii pakallawk cuzturumpi paaz tjuñinaca žeržmayatača. Jalla nii ora tsjii kjažt judionacaqui želatča Asia provinciquiztan tjonchi. Ninacaqui Pablo cherchiča timpluquiz žejlñi. Jalla nuž cheržcu, ninacaqui tjapa zoñinaca aptjapchiča Pabluž quintra. Nižaza Pablo tanzjapa jirchiča.

²⁸ Nektzan kjawchiča tuž cjican:

—Israel wajtchiz zoñinaca. Yanapt'alla. Tiiča anawal zoñiqui. Tiiqui tjapa kjutñi ojklaycan, zoñinaczquiz tjaajiñiča učhum nación quintrami, nižaza Moisés lii quintrami, nižaza tii timplu quintrami. Nižaza anziqiu tii timpluquiz ana judío zoñinaca chjitchiča. Jalla nižtquiztan tii Yooz timplu quintraž paača. Učhum alajakazza tii arajpach Yooz timpluquiz luzpanqui. Ana judío zoñinacaqui ana luztanča. —Jalla nuž kjawchiča Pabluž quintra.

²⁹ Niiž tuquilla Pabluqui Tróximo cjita zoñžtan želatča. Trofimuqui Efeso wajtchiz zoñitača. Niiž pucultan chica cheržcu, nii judío zoñinacaqui tuž pinsatča, Pabluqui timpluquin nii Tróximo chjitchizlani, cjican. Jalla nižtquiztan Pabluž quintra kjawchiča.

³⁰ Tjapa zoñinacaqui Pabluž quintra zawjchi tjojtichiča. Zati pariju tjonchiča timplu kjutñi. Nektzanaqui Pablo tanchiča. Timplu kjuyltan tanžcu zawncchuc joochiča. Nektzanaqui nii timplu zanami chawjziča.

³¹ Ninacaqui Pablo conzmayatacha. Nekztan zoñinaca walja aptjapzi cjen, zultatz jiliržquin maztatacha.

³² Jalla nii quintu zizcu, walja apura zultatunaca juntassiha ninacz sargentunacztan. Nekztan zati pariju jirchiha jakziquin tama zoñinaca zelatčhaja, jalla nicju. Nekztanaqui zoñinacaqui nii zultatunaca sargentunacztanpacha cherchiha. Nuž cheržcu Pablo kijtz cjen nužquiz apatačhiha.

³³ Jalla nekztanaqui nii zultatz jiliriqui macjatzcu Pablo preso tanchiha. Nižaza mantichiha, pizc carinžtan chelajo. Nekztanaqui zoñinaczquiz pewczicha:

—¿Ject teejo? ¿Čhjulu paachita tii zoñejo?

³⁴ Nii zoñinacazti tjapaman puntunaca chiican kjawchiha. Ancha altu joržtan arnan, nii zultatz jiliriqui ana intintasi atatcha. Jalla nižtiquiztan mantichiha, cuartilquin chjicha, cjican.

³⁵ Zultatz cuartil guardanaczquiz macjatzcan, zultatunacaqui Pablo waytizcu chjitchiha, ana nii zoñinaczquiz kijchkatzjapa.

³⁶ Niiž wirquiz tama zoñinacaqui apzquichiha, kjaw jawi:

—¡Ticzla tiiqui! ¡Panj ticzla! —cjican.

PABLUQUI PERSUNA TJURTICHICA

³⁷ Nekztanaqui Pabluqui cuartilquiz makawc cjen zultatz jiliržquiz paljaychiha, tuž cjican:

—Wejrqui tsjii chiiz pecuča. ¿Wejr chiyasaya?

Nekztanaqui nii zultatz jiliriqui kjaaziča tuž cjican:

—¿Amqui griego taku čiiñam jaa?

³⁸ Jaziqi amqui anaž nii anawal egipt wajtchiz zoñimča. Niiqui azk tjuñinaca gobier-nuž quindra zoñinaca tjojtiskatchiha. Ch'ekti yokquin tsjii pajkpic warank guerrillero juntichiha gobierno niiž puestuquiztan chjatkatzjapa. ¿Ana nii egipto zoñimya?

³⁹ Nekztanaqui Pabluqui kjaaziča, tuž cjican:

—Wejrqui judío zoñičha. Cilicia cjita yokquin Tarso cjita wajtquin nassinča wejrqui. Nii pajk wajtchiz zoñičha wejrqui. Jalla nižtiquiztan tii zoñinaczquiz paljayskatalla. —Nuž permiso maychiha.

⁴⁰ Nekztanaqui zultatz jiliriqui permiso tjaachiha, zoñinaczquiz paljayajo. Nekztanaqui Pabluqui tsjitsiča nii gradanac juntuñ. Nižaza kjara waytizcu zoñinaca ch'ujquizkatchiha. Jalla nuž zoñinaca ch'ujquizkatžcu, Pabluqui hebreo tawkuiztan paljaychiha, tuž cjican:

22

¹ —Jilanaca, ejpnaca, wejrqui personal tjurt'acha. Wejt takuž nonžna.

² Jalla nuž hebreo tawkžtan paljayan, walja ch'uj žejlchiha nii zoñinacaqui. Nekztanaqui Pabluqui paljaychiha, tuž cjican:

³ —Wejrqui judío zoñičha. Nawjc Cilicia cjita yokquin Tarso cjita wajtquin nassinča. Pero tekzi tii Jerusalén wajtquiz pajkchinča. Gamaliel cjita maestruqui wejr tjaajinchiha, učum atchi ejpnacz tuqita lii jarupanča tjaajinchiqi. Nižaza wejrqui tjapa kuztan Yoozquin sirwiñpanča, jaknužt ančhucqui tjapa kuztan učum cuzturumpi jaru paačhaja, jalla nuž.

⁴ Tuquiqui wejrqui Yooz jiczquiz ojklayñi zoñinaca taniñtača, conañcama. Nižaza Yoozquin criichi luctaka cjiñimi maataka cjiñimi preso tanžcu, cheliñtača carsilquiz chawjckatzjapa.

⁵ Nižaza simplu jilirinacami tjapa wajt jilirinacami zizza, weraral chiyučha, nii. Nii nacaqui wejtquiz carta credencial tjaachiha, Damasco wajtquin učum judío jilanaczquiz tjeezjapa. Nekztan nicju ojckchinča, Yoozquin criichi zoñinaca tanzjapa. Tekzi Jerusalén wajtquiz zijjžcu, castic pecchinča. Jalla tii weriž ojklayta puntuquiztanaqui tii Jerusalén jilirinacaqui kjanacama declarasača.

PABLUQUI JESUCRISTUZTAN ZALCHICA

⁶ Carta credencial tanžcu, wejrqui Damasco watjal ojckchinča. Nižaza taypur ora irantiz cjen, tiripintar arajpachquiztan tsjii wali pajk ispijužtakaz kjanžquichiha wejt muytata.

⁷ Wejrqui yokquin tjojtzinča. Jalla nuž tjojtžcu tsjii jora nonziča, tuž cjican: “Saulo, Saulo, čkjažtiquiztan am wejt quintramjo?”

⁸ Jalla nekztanaqui wejrqui pewczinča, tuž cjican: “Wejt Jiliri, ¿ject amya?” Jalla nekztanaqui wejtquiz kjaaziča, tuž cjican: “Wejrtča Jesusitqui. Nazaret wajtchiz zoñičha. Amqui wejt quintram paača”.

⁹ Wejtta chica cumpant'iñi zoñinacaqui walja tsucchiha. Nižaza nii kjanžquiči cherchizakazza. Pero nii wejtquiz čiižquiči jora ana nonziča.

¹⁰ Nekztanaqui wejrqui cjichinča: “Wejt Jiliri, ħħjulu wejr paajum cjii amya?” Nekztanaqui wejt Yooz Jiliri qui kjaaziča, tuž cjan: “Zaažna. Tiraka amqui Damasco watja oka. Jalla nezk amquiz mazinta cjequiča ħħjulut paasalaj, jalla nii”.

¹¹ Jalla nii kjanaž cjen zuranzinča. Jalla nekztanaqui wejt cumpant’iñi žoñinacaqui wejt kjarcu tanžcu Damasco watja irantzicama ħħjitchiča.

¹² Jalla nii wajtquin tsjii Ananias cjeta žoñi želatča. Jalla niiqui Moisés lii jaru walja cumpliñitača. Nižaza tjapa nii Damasco wajtquin kamñi judionacami nii žoñž puntuquiztan “Zumapanča nii žoñiqui” cjiñitača.

¹³ Nekztanaqui Ananiasqui wejtquiz tjonžni tjonchiča. Jalla nuž tjonžcu wejt latuquiz tsjitsiča. Nekztan wejtquiz cjichiča: “Saulo jila, wilta cherñim cjequiča”. Jalla nii orapacha wejrqui cherñi cjišsinča. Nekztan Ananias kutñi cherzinča.

¹⁴ Jalla nekztanaqui Ananiasqui wejtquiz cjichiča: “Tuquitanpacha uħum ejpnadž Yoozqui am illziča, niž pinsita zizajo, nižaza niž ancha zuma Majħ cherajo, nižaza niž jora nonžnajo.

¹⁵ Nižaza amqui niž puntuquiztan paljayaquiča tjapa tii muntuquiz žejlñi žoñinaczquiz. Nižaza ninaczquiz amiž chertanaca, nižaza amiž nonžtanaca declaraučiča.

¹⁶ Jazi qui apura zaažna, Yooz Jiliržquin tjapa kuztan cjee, am ujnaca pertunta cjisjapa. Nižaza bautista cjee”.

¹⁷ Wiruñiqui Jerusalén watja quejpcinča. Jalla nuž quejpcu, timpluquin ojkchinča Yoozquin mayizizjapa. Jalla nuž mayizican Yoozqui tsjii ħjuužtažokaz wejt kuzquiz tjonskatchiča.

¹⁸ Nekztan Yooz Jiliri cherchinča. Nižaza Yooz Jiliri qui wejtquiz cjichiča: “Tii Jerusalén wajtquiztan apura ulna. Amiž wejt puntuquiztan ħiita takunaca anaž nonž pecča”.

¹⁹ Nekztanaqui wejrqui cjichinča: “Wejt Jiliri, ninacaqui zizza weriž ojklaytanacaqui. Tjapa ajcz kjujaran ojklayiñitača, amquin criichinaca kjurcan. Jalla nii criichinaca wachtiquiztan, wejrqui ninaca wajtkačtinča.

²⁰ Nižaza am puntu declarñi Esteban conan, wejrqui nicju tsjitsi želatuča. Nižaza wejt kuzmi tjapa kuztača nii conan. Nižaza nii conñi žoñinacz zquitinaca cwitichinča”.

²¹ Pero Yooz Jiliri qui wejtquiz ħiizinchinča, tuž cjan: “Oka amqui. Ažkquin nacjuñta wajtchiz žoñinaczquin am cuchnača”.

PABLUZTAN COMANDANTI JILIRZTAN

²² Jalla niicama žoñinacaqui Pabluž paljayta taku nonziča. Nekztanaqui kjawi kallantichiča, tuž cjan:

— ħTiczla tii žoñiqui! ħAna žejtz waquiziča!

²³ Jalla nuž tirapan kjawcan, persun zquitinaca wewcwewczinchiča, polvo žketinchizakazza.

²⁴ Jalla nižtiquiztan zultatž jiliri qui mantichiča, Pablo cuartelquin majkžnajo. Nižaza mantichiča, Pablo wjajtzcu mazkatzjapa, “ħKjažtquiztan nii žoñinacaqui niž quintra nižta kjaw?” jalla nii puntuquiztan zizjapa.

²⁵ Pablo wjajtzjapa ħejlžtaž cjen, Pabluqui nezk žejlñi tenientžquiz paljaychiča, tuž cjan:

— Ima zumpacha zizcan, ħtsjii roman žoñi wjajtz waquiziya? Anapaž waquiziča.

²⁶ Jalla nii taku nonžcu, nii tenientiqui niž comandantžquiz ojkchiča, nii puntu mazjapa. Jalla nekztanaqui tuž cjichiča:

— Tii žoñiqui roman žoñipanazača. Anaž ħħjulumi nižtaqui kjaž cjila.

²⁷ Nekztanaqui nii comandante jiliri qui Pablužquin macjatžquichiča. Nekztan pewcziča, tuž cjan:

— ħRoman žoñim panj amya?

Pabluqui kjaaziča, tuž cjan:

— Jesalla.

²⁸ Nekztan nii comandantiqui cjichiča:

— Wacchi paaz wejrqui pacħinpanča roman wajtchiz žoñi cjisjapaqui.

Nekztan Pabluqui kjaaziča, tuž cjan:

— Wejrqui nastiquiztanpacha roman wajtchiz žoñiča.

²⁹ Jalla nuž Pabluž taku nonžcu, nii Pablo wjajtajo mantita zultatunacaqui nužquiz wir kutñi atziča. Nižaza Pablo roman žoñi zizcu, nii comandantiqui nii wjajtzjapa ħejlchiz cjen, tsucchi quirchiča.

PABLUQUI JUDIO JILIRINACZQUIZ PRISINTISKATCHICHA

³⁰ Niž jaka tažuqui nii comandantiqui ancha ziz pecatča Pabluž puntuquiztan. Ultimu, ħkjažtquiztan nii judio žoñinacaqui Pablo conkatz pecatjo? Jalla nekztan Pablo ħejlta carina apakžinchiča. Nižaza timplu ħawc jilirinacami wajt jilirinacami juntapžnajo

mantichičha. Jalla nuž juntjapztiqiztan nii comandantiqui Pablo ninacž yujcquin pris-intisjapa chjitchičha.

23

¹ Nekztanaqui Pabluqui nii ajczi jilirinacž kjutñi cherzičha. Jalla nuž cheržcu, tuž cjichičha:

—Jilanaca, wejt kuzquiz zizučha, tii noojcama wejrqui Yooz yujcquiziqui walika kamchinčha, nii.

² Nuž chiitiquiztan, Ananías cjita chawc jiliriqui Pabluž žcati žejlñi žožžquiz mantichičha Pabluž atquiz kijchnajo.

³ Pabluzti kjaazičha, tuž cjican:

—Pizc kuzziz žoñi, Yoozqui am casticaquičha. Amqui tekz julzamčha, ućhum lii jaru wejr jusjizjapa. Jaziqui, čkjažtiqiztan amqui ućhum lii quintra wejr kijchnajo mantichamtajao?

⁴ Jalla nii žejlñi žoñinacaqui kjaazičha, tuž cjican:

—Čjalla nuž Yooz chawc jiliriqui chayskazkaya?

⁵ Nekztan Pabluqui cjichičha:

—Jilanaca, anal wejrqui zizatučha tiiqui Yooz chawc jilirizlaja, jalla nii. Cjijrta Yooz takuqui tuž cjicha: “Tsjii wajt jilirž quintraqui anačha čhižqui”.

⁶ Jalla nekztanaqui Pabluqui naazičha, parti ajcžñi žoñinacaqui saduceo partiquiztantačha, nižaza parti ajcžñi žoñinacasti fariseo partiquiztantačha. Jalla nižtiqiztan altu joržtan nii žoñinacžquiz paljaychičha, tuž cjican:

—Jilanaca, fariseo parti žoñičha wejrqui. Wejt familiaqui fariseo partizakazza. Tsjii noojiqui ticzi žoñinacaqui jacatataquičha. Jalla nii tjuñi wejrzakal tjewznučha. Jalla nii puntuqiztan ančhucqui wejr jusjicha.

⁷ Jalla nuž chiitiquiztan fariseo partinacžtan saduceo partinacžtan porapat aptjapzičha. Nekztanaqui nii ajcžñi žoñinacaqui t'akzičha.

⁸ Nii saduceo žoñinacasti cjiñitačha, “Ticziqiztanaqui anaž wira jacatataša. Nižaza anaž anjilanacami zajranacami želasačha”, nuž cjiñitačha. Nii fariseo žoñinacasti jacatatz puntumi anjilanacž puntumi, zajranacž puntumi, tjapa nii puntunaca criiñitačha.

⁹ Jalla nižtiqiztan altu joržtan ch'aasi kallantichičha. Nekztan tsjii kjaž lii tjaajiñi maestronacaqui tsjitsičha. Ninacaqui fariseo partiquiztantačha. Ninacaqui paljaychičha tuž cjican:

—Tii žožžquiz ana čjul ujmi wachučha wejrnacqui. Cunamit tsjii anjilačha Pablužquiz čhižzinčini, už ispiritužlaj tižquiz čhižzinči.

¹⁰ Juc'ant juc'ant ch'aascan aptjapsičha. Jalla nuž cjen comandante jiliriqui eksnatčha Pablo chjojritžta cječhaj, jalla nii. Nekztan nii comandantiqui zultatunacžquiz mantichičha nii judionacž taypiqiztan Pablo jwescu wilta cuartilquin chjichajo.

¹¹ Niž jaka zežtažu nii arama Yooz Jiliriqui Pablužquiz jecžquichičha, tuž cjican:

—Pablo, tjup kuzziz cje. Jaknuž tii Jerusalén wajtquiz wejt puntuqiztan paljayčhamžlaja, nižaza Rom wajtquin wejt puntuqiztan paljaystančha.

PABLO CONZ KAZTA

¹² Jalla niž jaka tažuqui tsjii kjaž judio žoñinacaqui Pablo conzjapa juramentužtan tsjii acuerduquiz asiptassičha. “Pablo ana ticznaquiz niiqui, wejrnac contal cječha”. Nuž cjican asiptassičha. Nižaza ninacaqui palt'assičha ninacpora, tuž cjican:

—Anaž čjul čherimi lujls, Pablo conańcama, —jalla nii.

¹³ Jalla nii parla asiptiñi žoñinacaqui pusi tunc jilatačha.

¹⁴ Nižaza ninacaqui mazñi ojkičha timplu chawc jilirinacžquinami nižaza wajt jilirinacžquinami. Ninacžquiz mazzičha tuž cjican:

—Tsjii acuerduquiz asiptassinčha tuž cjican: “Pablo ana ticznaquiz niiqui, wejrnac contal cječha”. Nižaza palt'assinčha wejrnacpora, tuž cjican: “Anaž jecmi čjul čherimi lujls, Pablo conańcama”, jalla nii.

¹⁵ Jaziqui ančhucqui parti jilirinacžtanami nii comandante jiliržquiztan nii Pablo mayaquičha, tuž cjican: “Wilta Pablo cuchanžcalla wejtnacaquin. Wejrnacqui Pabluž puntuqiztan tsjan zumpacha intintiz pecasučha”. Jalla nuž cjican Pablo mayaquičha. Wejrnacqui listuž cječha Pablo conzjapa. Ima ančucaquiz irantizcan, wejrnacqui nii Pablo conačha. —Jalla nuž cjichičha.

¹⁶ Jalla nekztanaqui Pabluž cullaca majchqui Pablo conz puntuqiztan nonzičha. Jalla nii nonžcuqui cuartilquin ojkičha Pablužquiz mazñi.

¹⁷ Nekztanaqui Pabluqui tsjii zultatž teniente kjawzičha, tuž cjican:

—Tii tjowa chjicha comandantizquin. Tiiqui quintuchizza.

¹⁸ Nekztanaqui nii teniente nii tjowa chjitchičha tuž cjican:

—Nii Pablo prisita zoñiqui wejr kjawziča. Nekztan wejtquiz chiichiča tii tjowa amquin chjichajo. Tiiqui amquiz quint'iz pecča.

¹⁹ Nekztan nii comandantiqui kjarcu tanžcu nii tjowa tsjii latu chjitchičha. Jalla nekztan pewcziča, tuž cjan:

—¿Čhjulm amqui wejtquiz chiiz pecya?

²⁰ Jalla nekztanaqui tjowaqui kjaaziča tuž cjan:

—Judío zoñinacaqui tsjii acuerduquiz asiptassiča. Jaka wenz amquiztan mayaquiča Pablo chjitzjapa judío jilirinacž yujcquin. Jalla tuž mañžtan mayaquiča, “Wejrnacqui Pabluž puntuquiztan tsjan zumpacha intintiz pecasuča”. Jalla nuž cjan mayaquiča.

²¹ Amzti ana ninacžquiz juyzu paaz waquiziča. Tsjii pusi tunc jil zoñinacaqui juramentužtan tsjii acuerduquiz asiptassiča, tuž cjan: “Pablo ana ticznaquič ž niiqui, wejrnac contal cjeeča”. Nižaza ninacpora palt'assiča, tuž cjan: “Anača čhjeri lujs Pablo conañcama”. Nii zoñinacaqui čhjojziž tjewža Pablo irantisquizcama. Anzpacha listučha, amiž asiptita takukaz tjewža.

²² Jalla nii quinto nonžcu nii comandantiqui nii tjowa cuchanchičha. Nižaza mantichičha:

—Anaž jeczquizimi amiž quint'itaqui chiichiyaquiča, —jalla nuž cjan cuchanchičha.

PABLUQUI FELIX CJITA JILIRZQUIN CUCHANTA

²³ Jalla nekztanaqui nii comandantiqui pucultan teniente kjawziča. Jalla nuž kjawžcu tsjii ortina mantichičha, tuž cjan:

—Zultatunaca tuž tjaczna, paa patac zultatu kjojchiñ ojkñijapa, nižaza pakallawk tunca zultatu cawallquiz yawchi ojkñijapa, nižaza paa patac zultatu lanzižtan ojkñijapa. Ispir ora listu tjaczta cjequiča Cesarea watja ojkzjapa.

²⁴ Nižaza tsjii cawallu tjaczinaquiča Pablo yawchi chjitzjapa. Nižaza Pablo chjichaquiča ana čhulu kjaž cjižcu. Nekztanaqui Félix cjita chawc jiliržquiz intirjaquiča. —Jalla nuž mantichičha nii comandantiqui.

²⁵ Nižaza nii Pablo chjichni zultatunacžtan tsjii carta apaychiča, tuž cjan:

²⁶ “Al señor excelentísimo chawc jiliri Félix: Wejrqui amquin tsaanučha; Claudio Lisias wejrčha.

²⁷ Judío zoñinacaqui tii zoñi preso tanchičha. Nižaza konz cjichitakalča. Jalla tiiqui roman zoñičha. Jalla nii zizcu, wejrqui zultatunacžtan ojkchinča, tii liwrii. Wejr irantan, judío zoñinacaqui tii conmayatača.

²⁸ Wejrqui ziz pecatučha, ultimú kjažtquiztan nii judío zoñinacaqui tii conkatz pecatjo, jalla nii. Nižtquiztan judío jilirinacž yujcquin chjitchinča.

²⁹ Nekztanaqui zizzinča nii judionacž lii puntuquiztankaz tii quintra uj tjojtunchičha. Anaž konz razunami nižaza ana carsilquiz chawjcz razunami želatčha tii judionacžquiztanaqui.

³⁰ Jalla nekztanaqui nii judío zoñinacaqui tsjii acuerduquiz asiptassitakalča tii Pablo konzjapa. Jalla nii zizcu, nekztan wejrqui amquin apura cuchanžcuča. Nižaza nižta quintra zoñinacžquiz mantichinča, am yujcquiz parlajo, čhjul puntuquiztan quintra aptazaja, jalla nii. Jalla nužukazza”.

³¹ Jalla nekztanaqui ortin jaru zultatunacaqui ween Pablo chjitchičha, Antípatris cjita watjacama.

³² Niž jaka tažquui kjojchiñ ojkni zultatunacaqui cuartilquin quejpžquichičha. Cawallquiz ojkni zultatunacakaz tira Pablužtan ojkchičha.

³³ Cesarea watja irantižcu, carta tjaachiča chawc jiliržquiz. Nižaza nii jiliržquiz Pablo intirjichičha.

³⁴ Carta ližcu, nii chawc jiliriqui Pablo pewcziča, jakzi wajtchiz žoñitazlaja, jalla nii. Cilicia wajtchiz žoñi, nii zizcu,

³⁵ tuž cjichičha:

—Am quintra aptažni žoñinacž tjonchiz cjen, am puntuquiztanaqui wejrqui atintača.

Nekztanaqui nii jiliriqui mantichičha Herodes pajk kjuyquiz Pablo zuma wijilta zelajo.

24

PABLUQUI FELIX YUJCQUIZ PRISINTICHICHA

¹ Nekztan pjijska tjuñquiztan, Ananias cjita templu chawc jiliriqui Cesarea watja irantichičha Jerusalén wajt jilirinacžtanami nižaza tsjii Tértulo cjita tjurt'iziñi awjatžtan. Jalla ninacaqui chawc jilirž yujcquin prisintichičha Pabluž quintra chawc uj tjojtunzjapa.

² Tsjii audiencia cjetžtanaqui jilirž yujcquiz Pablo chjichtatača. Nekztan nii Tértulo tjurt'iziñi awjatuqui Pabluž quintra čhi kallantichičha tuž cjan:

—Wejt excelentísimo chawc jiliri: Walikazza wejt watjaqui, nižaza cuntintu kamasuča. Sparaquiča amquin. Am walja zizñiz cjen zuma irpiñamča wejtnacaquiz. Čjul necesidad žejlčhaja, jalla nii atintichamča.

³Tjapa watjanacquin amiž uchta obranacquiztan ancha sparaquiž cjiwča, zuma excellentísimo Félix. Nižaza tjapa žoñinacaqui nuž amquiz sparaquiča cjiñipanča.

⁴Wejrqui am ana ancha molistis pecuča, tii puntuquiztankaz am atintalla. Nižaza tsjii ratu wejt taku nonžnalla.

⁵Nuc ažka kamcan, wejrnacqui zizzinča, tii žoñiqui wira anawalipanča. Nižaza tjapa kjutñi judío žoñinacaž aptjapča, t'aka t'aka. Nižaza tiiqui walja achuča nii nazaren cjita t'akquiztan.

⁶Nižaza wejtnaca timpluquin yekja wajtchiz žoñi luskatz yanchiča. Jalla nižta anawalipanča. Jalla nižtiquiztan wejrnacqui tii preso tanchinča. Nižaza wejtnac lii jaru tii žoñi casticskatz pecatuča.

⁷Nii Lisias cjita comandantizti fuerzižcu wejtnacaquiz mitisiča. Tama zultatunacžtan tii kjañičiča.

⁸Nekztanaqui nii comandantiqui wejrnacqui tii žoñž uj tjeezjapa tekzi am yujcquiz tjonkatča. Jazic amza tii pewczna. Jalla nekztanaqui tiižquiztanpacha zizaquiča wejrnaca ultim werara čiičinča, wejtnacaž tjojunta uj puntuquiztan zumpacha zizaquiča. Tii žoñiqui walja ujchizza.

⁹Nii žejlñi judío žoñinacaqui cjhizakazza:

—Tiiž čiiita takunaca werarača.

¹⁰Nekztanaqui nii chawc jiliriqui kjara waytižcu Pablo čiiikatchiča. Jalla nuž cjen Pablo paljayčiča, tuž cjan:

—Nuc ažk wata tekz tii nacionquiz amqui jiliri tsjitsamča. Jaziquiz wejrqui ancha cuntintuča am yujcquiz tjurt'izjapaqui wejt puntuquiztan.

¹¹Apacham wejt puntuquiztan averiguasača. Tuncapan tjuñikaz weriž irantisquitaqui, nii Jerusalén wajtquin Yoozquin sirwizjapa tjonchintača.

¹²Anaž jec žoñimi wejr žoñžtan ch'assñi cherčiqui, nižaza wejrqui ana žoñinaca aptjapčinča, Jerusalén wajtquizimi.

¹³Tii wejt quintra žoñinacaqui anaž čjul ujmi amquiz tjeezñi atča.

¹⁴Jalla tiiča ultim weraraqui. Wejrqui wejtnac ejpnacž Yoozpacha sirwuča Yooziž tjeezta kamaña jaru. Jalla nii Yooz kamañaqui yekjaž t'aka cjiča tinacaqui. Nižaza wejrqui criyuča tjapa Moisés cjiirta liimi, nižaza tjapa profetž cjiirta Yooz takunacami.

¹⁵Nižaza criyuča Yoozqui ticziquiztan jacatatskataquiča zuma kamñi žoñimi ana zuma kamñi žoñimi. Jalla nii jacatatz tjuñi tjewznuča, tinacami nižazakaž tjewža.

¹⁶Jalla nuž tjewžcan, Yooz yujcquizimi žoñž yujcquizimi wejt kuz zuma iwjt'ican persunpacha cwitasuča, ana ujchiz cjisjapa.

¹⁷Tsjii kjaž watanaca yekja nacionaran wejr cjklajžquichinča. Jalla nuž ojklajžcu wejrqui wejt persun yoka quejpčinča, limosnami ofrendanacami timpluquin uchjapa.

¹⁸Jalla nuž paan, tsjii kjaž Asia provinciaquiztan tjonchi judionacaqui wejt tan zalčiča. Timpluquin žejlčinča judiož cuzturumpi jaru paacan. Timpluquin žoñinacaqui anatača wacchi, nižaza anatača čjulumi aptazzi.

¹⁹Jalla nii Asiaquiztan tjonchi judionacaqui jalla ninacžla tekziqui am yujcquiz prisintisquizlani wejt quintraqui, čjul uj paatučaja, jalla nii. Ninacaqui tsjii uj tjeeznačhaj niiqui, tekz am yujcquiz tjeezla.

²⁰Jalla nii ana atčucažlaj niiqui, tii žejlñi žoñinacaj weriž paata uj kjanacama čiiilalla. Wejr judío jilirinacž yujcquiz želan, uj paachinžlaj niiqui kjanaj čiiilalla.

²¹Judío jilirinacž yujcquiz žejlcan, tiikaz altu joržtan čiičinča: “Ticziquiztan jacatatz tjuñi tjewznuča. Jalla nižtiquiztan tonj ančhucqui wejr jusiča”. Jalla niikazza weriž čiiitaqui. —Nuž cjan Pabluqui čiiičiča.

²²Jalla nuž nonžcu, Félix chawc jiliriqui nii cjetžta audiencia nužquiz suspintiskatchiča. Nii jiliriqui Yooz jicz puntuquiztan zuma zizziča. Jalla nižtiquiztan Pabluž quintra žoñinacžquiziqui ana juyzu paachiča. Nekztan cjičiča:

—Čjulorat Lisias comandante tjonučaja, jalla nekztanž tii ančuca quijaqui wilta atintita cjequiča. Nii nooj azquizta cjequiča.

²³Nekztanaqui Félix chawc jiliriqui teniente capitanzquin mantičiča Pablo tira kjuyquiz chawjcta cwitajo. Pero Pabluž amigonacžquiz permiso tjaachiča, Pablo atintizjapa.

²⁴Tsjii kjaž majquiztan Félix chawc jiliriqui Drusila cjiti tjunatan tjonžquičiča Pabluž taku nonžjapa. Jalla naaqui judioquiztan žontača. Nekztanaqui Pablo kjawžñi mantičiča. Niiž yujcquiz prisintizcu, Pabluqui Jesucristužquin kuzziz puntuquiztan paljayčiča.

²⁵ Nii jiliriž nonznan, Pabluqui parličiča tii čhjep puntuquiztan: Yooz zuma kamaña puntuquiztan, nižaza persun kuz zuma irpiz puntuquiztan, nižaza Yooz castic tjuŋi puntuquiztan. Jalla nii parlita nonžcu Félix chawc jiliriŋqui muzpa tsucchiča. Nekztanaqui jichiča:

—Oka amqui. Wejttaž timpu želan, wilta am kjawznača.

²⁶ Félix chawc jiliriŋqui “paaz pac jaa” cjan jalla nuž Pablužquiztan pecatča. Paaz pactiquiztan Pabluŋqui cuchtaž cjitasača. Jalla nižtiquiztan nii jiliriŋqui kjaž wilta Pablo kjaw kjawatča, “Cunamiž paaz pacasa jaa” cjan. Pablo kjawžcu, nižtan parličiča.

²⁷ Félix jiliriŋqui judionacž kuz wali cjiskats pecatča. Jalla nižtiquiztan Pablo preso ecchiča. Pizc wata nuž watchiča. Jalla nekztanaqui Félix chawc jiliriŋqui niž puestuquiztan ulanchiča. Nii puestuquiz tsjižzuŋi luzziča, Porcio Festo cjita tjuuchiztača.

25

PABLUQUI FESTUZ YUJCQUIZ PRISINTICHICHA

¹ Festuŋqui chawc jilirž puestuquiz luzcu, niž čhjep majquiztan Cesarea wajtquiztan Jerusalén watja ojkičiča.

² Jalla nicju timplu chawc jilirinacami walja acha wajt jilirinacami, jalla ninacaqui Pabluž quintra quijčiča.

³ Nižaza rocchiča:

—Tsjii favora paalla —cjan. —Tii Jerusalén watja Pablo cuchanzcalla.

Nii oraqui ninacž kuzquiz pinsichiča, Pablo jiczquiz tjonan conzjapa.

⁴ Nekztanaqui Festo chawc jiliriŋqui kjaaziča, tuž cjan:

—Pabluŋqui Cesarea wajtquin preso žejlča. Tsjii kjaž majquiztan wejrpachal quepatha nicju.

⁵ Jaziŋqui ančuca jilirinacaŋqui wejtta chica Cesarea ojkla. Jalla nicju nii žoŋiŋqui ujhizpanžlaj niŋqui, jalla niž uj tjeezpanikazza ančucalaŋqui.

⁶ Nii Festo jiliriŋqui quinsakal tjuŋižlaj už tunca tjuŋižlaj, jalla nuž žejlčiča Jerusalén wajtquiz. Jalla nekztanaqui Cesarea watja quejpcičiča. Niiž jaka tažuŋqui niž jusjiz oficinquiz luzziča. Jalla nekztan Pablo zjijcajo mantichiča.

⁷ Pablo zjijctiquiztan Jerusalén wajtquiztan tjonchi judionacaŋqui jusjiz oficinquiz luzzizakazza. Pabluž muytata tsjitscu, wali chawc ujnaca tjojtunchiča. Pero ana čjul uj tjeezni atchiča.

⁸ Jalla nekztanaqui Pabluŋqui persuna tjurt'ican takunaca čhičiča, tuž cjan:

—Wejrŋqui ana čjul ujmi paachinpanča, ana judionacž lii quintrami, nižaza ana timplu quintrami, nižaza ana roman chawc jilirž quintrami. Anapan uj paachinča.

⁹ Nekztanaqui Festo jiliriŋqui judionacž kuz wali cjiskatzjapa tsjii favora paaz pecatča. Jalla nižtiquiztan Pablužquiz pewcziča, tuž cjan:

—Jerusalén watjam okasaya? Jalla nicju am quintra quijta puntuquiztan atintasacha.

¹⁰ Jalla nižtiquiztan Pabluŋqui kjaaziča, tuž cjan:

—Roman chawc jilirž jusjiz oficinquiz želuča. Tekzpacha wejrŋqui jusjita cjistanča. Amqui zumpacham zizza wejt puntuquiztan. Wejrŋqui ana čjul ujmi paachinča tii judionacž quintrami.

¹¹ Jaziŋqui wejrŋqui ujhizpanchalaj niŋqui, casticta cjis anal jiwjatuča. Nižaza uj paachiž cjen ticz waquizičhaj niŋqui, ticzmi anal jiwjatuča. Pero wejt quintra tjojtunta ujnacami ultimu ana tjeezkattača. Nižtiquiztan anaž nii judionacž kjarquiz wejr intirjita cjesača. Jaziŋqui roman chawc jiliržquinpan watz mayuča wejt puntuquiztan zumpacha arreglita cjisjapa.

¹² Jalla nekztanaqui Festo jiliriŋqui niž tantiiŋnacžtan palt'ichiča. Jalla nuž palt'izcu, Pablužquiz čhičiča, tuž cjan:

—Amqui roman chawc jilirizquin watz maychamča. Jaziŋqui jalla nii jiliržquinpanikam watačani.

PABLUQUI AGRIPZ YUJCQUIZ PRISINTICHICHA

¹³ Jalla tsjii kjaž majquiztan tsjii Agripa cjita chawc jiliriŋqui Cesarea watja tjonchiča Berenice cjiŋi tjunatan. Jalla ninacaŋqui tjonchiča Festo tsaanzjapa.

¹⁴ Jalla nicju tsjii kjaž maj kaman Festo jiliriŋqui ninacžquiz quint'ichiča Pabluž puntuquiztan, tuž cjan:

—Tekz tsjii pres žoŋi žejlča, Félix jiliržquiztanpacha.

¹⁵ Wejrŋqui Jerusalén wajtquiz želan, timplu jilirinacami wajt jilirinacami jalla ninacaŋqui tii žoŋi quintra quijčiča. Ninacaŋqui wejtquiz tii žoŋi conkatz pecatča.

¹⁶ Jalla nižtiqiztan wejrqui kjaazinča tuž cjan: “Romanž liiqui tuž cjiča: Quijta zoñžtan quijñi zoñžtan pucultan declarskatzpanikazza, čjulut watčhaja, jalla nii. Nekztan nii quijta zoñiqui persun takunacžtan tjurt'asača werarquiztanaqui. Nekztan chawc ujhizlaj niiqui, contaž cjesača”.

¹⁷ Jalla nižtiqiztan ninacaž tiwc tjonchiz cjen, ana timpu pertizcu, niiz jaka tažuqui quija atintichinča wejt jusjiz ofcinquiz. Nii quijta zoñi zjijcajo mantižcu zuma atintichinča.

¹⁸ Nii quijñi zoñinacaqui prisintichizakazza. Wejrqui pinsichintača, ninacac chawc ujan nii zoñžquiz tjeeznaa, cjan. Ultimu ninacazti ana čjul chawc ujmi tjeezkati atchiča.

¹⁹ Nii zoñž quintra chiichiča religiön puntuquiztankaz. Tsji Jesusa cjita zoñiqui ticziča. Pabluzti “Žejtča niiqui” cjiñitakalča.

²⁰ Wejrqui nižta quija atintizjapa anal zuma zizatuča. Jalla nižtiqiztan Pabluzquiz pewczinča, tuž cjan: “Žerusalén watja okasay? Jalla nicju tii am quintra quij puntuquiztan atintasacha”. Jalla nuž chiichinča wejrqui.

²¹ Jalla nekztanaqui niiqui maychiča roman chawc jiliržquin watzjapa. Jalla nižtiqiztan Augusto cjita chawc jiliržquin watajo mantichinča. Nižaza tirapan preso želajo mantichinča, čjulorat chawc jiliržquin mantichuca cječhaja, jalla niicama.

²² Jalla nekztanaqui Agripa jiliričiqui Festo jiliržquiz cjichiča:

–Wejrzakal nii zoñž razuna nonz pecuča.

Festo jiliričiqui kjaaziča, tuž cjan:

–Jakapacham nonznaquiča.

²³ Niiz jaka tažuqui Agripa cjita jiliričiqui Berenice cjeti tjunatan pajk audiencia kjuyquin luzquichiča, ancha zuma honorchiz. Zultatž jilirinacžtanami wajt jilirinacžtanami luzzizakazza. Nekztanaqui Festo jiliričiqui Pablo zjijcajo mantichiča.

²⁴ Pablo zjijctiquiztan Festo jiliričiqui tuž paljayčiča:

–Agripa chawc jiliri, nižaza tekz ajczi zuma zoñinaca. Tekziča tii zoñiqui. Walja judionacaqui tii zoñž quintra chiichiča Jerusalén wajtquinami tii Cesarea wajtquizimi. Jalla ninacaqui wejr rocrocchiča tii zoñi conzjapa, “Tii zoñiqui ana žejtz waquiziča” cjan.

²⁵ Wejrpacha tii zuma pewcpewczcu, anapan čjul uj wači atchinča, ticzkatajo. Nižaza tiiqui roman chawc jiliržquin watz maychiča jusjita cjejajo. Jalla nuž maytiqiztan tantižcu, watajo mantichinča.

²⁶ Wejrqui roman chawc jiliržquin ččjul puntut tii zoñž puntuquiztanaqui cjiiras? Anal zuča. Jalla nižtiqiztan am yujcquiz prisintiskatuča, señor Agripa, wejt chawc jiliri. Nižaza tjapa ančhucaquiz prisintiskatuča. Jazičiqui ančhucquiči tii zoñi zumpachaž pewczina. Nekztan wejrqui aptačhani čjul puntut cjiiras, nii.

²⁷ Tii pres zoñž quintra puntuquiztan kjanapacha cjiirz waquiziča. Ana nižta cjiiraquiz niiqui, anapal cuchni atasacha. —Jalla nuž paljayčiča Festo jiliričiqui.

26

PABLUQUI TJURT'INI TAKUNACA WILTA CHIICHICHA

¹ Jalla nekztanaqui Agripa jiliričiqui Pabluzquiz tuž cjichiča:

–Amqui am persunquiztan zuma tjurt'iz taku čiya.

Jalla nekztanaqui Pabluzquiči kjara čhjinžcu paljayi kallantichiča, tuž cjan:

² –Excelentísimo Agripa, chawc jiliri, ancha cuntintuča wejrqui, am yujcquiz wejt puntunaca werara čhiizjapa. Judío zoñinacaqui wejt quintra ujnaca tjojtunchiča. Jaknižlaj nii werara chiyasača.

³ Amqui tjappacha učhum judionacž cuzturumpinaca zumam zizza. Nižaza učhumpora čjul puntu ch'aasaj, nii ch'aastanacami zizza amqui. Jalla nižtiqiztanaqui wejrqui ancha cuntintuča, am yujcquiz tjurt'izjapaqui. Zuma pasinsistanž nonžnalla.

⁴ Tjapa judionacaqui weriž kamta zizza. Wejt yokquiz ojklaytami nižaza Jerusalén wajtquiz ojklaytami jaknuž ocjalquiztanpacha kamiñtažlaja, nii zizza tjapa judionacaqui. Ninacžtan kamiñtača.

⁵ Tjowanstiquiztanpacha fariseo t'akquiz žejlchinča. Nii fariseo t'akaqui učhum judionacž lii jarupan walja estricto kamiñiča yekja judionacž t'akanacquiztan cjenami. Jalla nii ažktan zizza nii wejt quintra judionacaqui. Jazičiqui ninacakaj declarla, declarlž pecčhaj niiqui.

⁶ Tuquiqui Yoozquiči učhum tuquita ejpnacžquiz taku ecchiča, ticziquiztan jacatatz puntu, jalla nii. Jalla nii jacatatzpan tjewznuča. Jalla nuž weriž tjewztiqiztan, judionacaqui wejt quintra quijchiča.

⁷ Pero Israel wajtquiziqui wejtnac tuncapan t'akanacaqui Yooziž ecta taku cumplis zakaz tjewža. Jalla nižtiqizitan Yoozquin rispitiñča, nižaza majiñami weenami nižquin sirwiča. Wejt chawc jiliri, jalla niipan tjewžniž cjen judionacaqui wejt quintra tjojkčiča.

⁸ Ančhucmi zakaz criičhani, Yoozqui ticziqizitan zoñinaca jacatatzičiča, nii.

⁹ Tuquiqui wejrqui pinsiñtača, nii Nazaret wajtchiz Jesusizquin criiči zoñinacž quintra čhjul anawalinacami paaz waquiziča.

¹⁰ Jalla nuž wejrqui criichinacž quintra anawalinaca paachinča Jerusalén wajtquin. Učhum timplu jilirinacž mantita jaru walja criichinaca carsilquiz chawjcskatchinča. Nižaza criichinaca conajo, wejr zakal taku utchinča.

¹¹ Nižaza kjaž wilta criiči zoñinaca sufriskatchinča, Jesucristuž quintra čiikatzičjapa, nižaza Jesucristužquizitan quejpskatzičjapa. Wejrqui nižtapacha paachinča judionacž ajcz kjuyquizimi. Nižaza walja žawjwiñtača nii criichinacž kjutñi. Jalla nuž žawjzcu wejrqui criichinaca tani ojklayiñtača yekja watjaranami.

¹² Jalla niijapa Damasco watja ojkcchinča, timplu chawc jilirinacž mantita jaru. Nižaza ninacaqui wejtquiz carta credencial tjaachiča, nii criiči zoñinaca tanzjapa.

¹³ Jiczquiz okan, taypur ora tiripintit arajpachquizitan tsjii wali pajk ispijužtakaz kjanžquičiča, tjuñ siiquizitan juc'anti. Wejt muytatami wejt cumpant'iñi zoñinacž muytatami kjančiča.

¹⁴ Niž cjen, wejrnacqui yokquiz tsucaña tjojtsinča. Nekztanaqui wejrqui tsjii jora nonzinča. Hebreo tawkuizitan wejtquiz paljayžquičiča, tuž cjan: "Saulo, Saulo, žkjažtiqizitan am wejt quintramjo? Ampacha persun quintra paača. Tsjii wacaqui ar parž quintra llawkžcu, persun janchiž quintra paača, jalla nižta irata am persun quintra paača". Jalla nuž paljayžquičiča nii tsewctan čiini joraqui.

¹⁵ Nekztanaqui wejrqui pewczinča, tuž cjan: "Wejt jiliri, žiect amya?" Nekztan Yooz jiliri qui wejtquiz cjičiča: "Wejrtča Jesuitqui. Amqui wejt quintram paača. Wejrtča niitqui.

¹⁶ Zaažna. Tsijtsna. Amqui wejr sirwaquiča. Nižaza tii amiž chertanacami declaraquiča muzpa zoñinacžquiziqui. Wiruñaqi iyam cheraquiča wejt puntuquizitan. Jalla nekztan tjapa wejt puntuquizitan parlaquiča. Jalla nižtajapa am illzinča. Jalla nuž cjen amquiz pariscuča.

¹⁷ Jazi qui am cučnača ana judio zoñinacžquin wejt puntuquizitan parližcajo. Nekztanaqui amiž parlan, wejrqui am cwitača, judionacžquizitanami, nižaza nacjuñta zoñinacžquizitanami.

¹⁸ Nacjuñta zoñinacžquiz am cučnača, wejt puntuquizitan parlajo. Jalla nuž amiž parlitiquizitan nii zoñinacž kuzqui cjetžintaž cjequiča wejt puntu intintazajo, nižaza ana zumchiquiz kamajo, antiz zuma kamañquiz kamzjapa. Nižaza amiž parlitiquizitan ninacaqui liwriita cjequiča, Satanás cjeta diabluž mantita jaru ana ojklajajo, antiz Yooz mantita jaru ojklajajo. Nižaza wejtquin criyaquiča, ninacž unjaca pertunta cjisjapa, nižaza Yooz kamaña tanzjapa parti Yooz illza zoñinacžtan".

¹⁹ 'Nekztanaqui, Agripa chawc jiliri, nii arajpachquizitan paljayta takunaca catokchinča, nii jaru kamzjapa.

²⁰ Primiraqui Damasco wajtquin žejlñi zoñinacžquiz liwriiñi Yooz taku parli kallantichinča. Nekztanaqui Jerusalén wajtquin nii Yooz taku parlichinčakazza. Niiž jaru Judea yokaran parlichinča. Niiž jaru nacjuñta zoñinacžquin Yooz taku parlichinča. Judio zoñinacžquizimi ana judio zoñinacžquizimi tjappachquiz parlichinča, ninacž kuznaca campiyajo, Yooz sirwiz quejpnajajo, nižaza Yoozquin quejptiquizitan zuma kamaña tježnajo.

²¹ Jalla nižta Yooz takunaca parlitiquizitan judio zoñinacaqui wejr preso tanchiča timpluquiz, wejr conajo.

²² Anzama Yoozqui wejr yanapča. Jalla nižtiqizitan wejrqui tjurt'iñi kuzziž tii zuma Yooz taku parluča humilde zoñinacžquizimi pajk jilirinacžquizimi. Tuquitan Yooz taku parliñi profetž čiita tawk jaru nižaza Moisés čiita tawk jaru, jalla niicama parluča. Jalla ninacaqui mazinčiča, tuž cjan:

²³ "Cristuqui sufristanča ticzcama. Nekztan ticziqizitan jacatatstanča. Jalla ni-iqui primer ticziqizitan jacatatchi zoñiča. Jalla nii Jesucristuž cjen tii zuma liwriiñi Yooz taku qui parlitapantača učhum wajtchiz zoñinacžquizimi yekja wajtchiz zoñinacžquizimi". Jalla nii liwriiñi taku zaka wejr parluča.

PABLUQUI AGRIPZQUIZ CHIIZINCHICHA

²⁴ Pablo jalla nuž tjurt'iñi taku paljayan, Festo jiliri qui altu tawkžtan cjičiča:

—Pablo, žlucuratažtakazza amqui! Zmali istutižcu, jalla nižtiqizitan lucurata cjis-samčhalani amqui.

²⁵ Pabluqui kjaazicha, tuz cjian:

—Festo, zuma chawc jiliri. ¡Wejrqui anača lucuratqui! Antiz weriž paljayta takunacača razunaqui, nižaza werarača.

²⁶ Tekzimi Agripa chawc jilirimi željča. Niimi zumaž tii puntuquiztan zizza. Jalla nižtiquiztan wejrqui tjuj kuztan tiž yujcquiz chiižinuča. Tii Agripa chawc jiliriqui tjapa weriž paljayta puntunacaqui zizzipanča. Nižaza tii puntunacaqui watchičha tjapa žoñinacaž zizan, anača tsjii chjozjak watchi quintu.

²⁷ Señor Agripa, chawc jiliri, ¿profetaž parlita takum criya? Amqui criiž caa kal cjiwchiya.

²⁸ Agripa chawc jiliriqui Pablužquiz kjaazicha, tuž cjian:

—¿Tsji koluc takunacžtancam wejr cristiano cjiskatz pecya?

²⁹ Nekztanaqui Pabluqui cjichičha:

—Tsji kjaž takunacžtan už wacchi takunacžtan wejrqui ančhuc tuž cristiano cjiskatz pecučha. Ammi nižaza tjapa tonj nonžni žoñinacami wejr irataj cjisla. Jalla nuž Yooz munañpaj cjeequi. Wejr irata Yoozquin criichej cjisla, pero ana tiža carinžtan mokta.

³⁰ Jalla nuž Pabluž chiitan, tjappacha nii julzi željči jilirinacaqui tsijtsičha, Agripa chawc jilirimi, nižaza Festo jilirimi, nižaza Berenice cjiti tjunmi.

³¹ Nekztanaqui ninacaqui Pabluž puntuquiztan parlizjapa tsjii latu ojkcichičha ninaccama palt'i. Jalla nekztanaqui ninaccama kazziča:

—Tii žoñiqui ana čjul ujmi paachičha, conkatajo. Anaž conta cjesača. Nižaza anaž carsilquizimi chawjcta cjesača.

³² Nižaza Agripa chawc jiliriqui Festo jiliržquiz cjichičha:

—Tii žoñiqui ana roman jiliržquin watz maytasaz niiqui, cutztaž cjitasača.

27

PABLUZ QUIJAQUI ROMA TJATZTACHA

¹ Jalla nekztanaqui nii jilirinacaqui tantičičha, Pabluž quija roman chawc jiliržquin tjazjapa. Jalla nižtiquiztan Pablumi parti presonacami intirjitača tsjii Julio cjita capitanzquiz, Italia watja chjitzjapa. Nii capitanaqui Augusto cjita batalionquiztan jiliritača. Wejrqui Pablužquiz cumpant'ichinča.

² Adramitio cjita wajtquiz tsjii warcu želatča. Nii oraqui nii warcuqui ojczpachatača Asia kjutči. Jalla nuž cjen nii warcuquiz luzzinča. Nižaza wejtnacatan Aristarco cjita žoñitača. Niiqui Tesalónica wajtchiz žoñitača. Tesalónica watjaqui Macedonia yokquintača.

³ Jaka tažuqui Sidón cjita wajtquin irantichinča. Jalla nicju Julio capitanaqui Pablužquiz tsjii favora paachičha, Pablužquiz permiso tjaachičha niž mazinacžquin tjonznajo atintita cjisjapa.

⁴ Nekztanaqui Sidón wajtquiztan ulanžcu Chipre cjita zkolta yoka watchinča. Zkar latu watchinča tjamiž cjen.

⁵ Jalla nekztanaqui Cilicia nižaza Panfiliaž niž waruñ chawc kota kajkchinča Mira cjita watjacama. Mira watjaqui Licia cjita yokquintača.

⁶ Jalla nicju zultatž capitanaqui tsjii Italia ojkn'i warcu zalčičha. Nii warcuqui Alejandria wajtquiztan ulnatča. Jalla nii warcuquiz capitanaqui wejrnac luzkatchičha tira ojczjapa.

⁷ Nekztanaqui tsjii kjaž maj ojkcichinča zumat. Anča tjamiž cjen ch'aman irantichinča Gnido cjita yokž wartuñtan žcati. Nižaza nii anča tjamiž cjen Salmón cjita yok žcati watchinča. Nekztanaqui Creta yok žcati irantican tajachuc muytižcu ojkcichinča.

⁸ Tjamiž cjen, ch'aman ojkan Creta cjita yok žcati ojkcichinča. Nižtami wejrnacqui irantichinča Buenos Puertos cjita watja, Lasea wajtž žcati.

⁹ Jalla nicju irantizjapaqui walja timpuqui pertitača. Auti timpu irantisquiz cjen, tjamiqui tirapan tjamčičha. Jalla nižtiquiztan anawalitača chawc kotquiz ojczqui. Jalla nižtiquiztan Pabluqui chiižinčičha,

¹⁰ tuž cjian:

—Jilanaca, wilta ojczqui anawaliz cjequičha. Warcumi cargami pertisnachani nižaza učhummiž ticznasača.

¹¹ Nii zultatž capitanažti Pabluž chiita ana cazziča. Warcuchiz tuyñumi, nižaza warcuž capitanaumi, jalla ninacž takukaz nonziča.

¹² Nii wajtquiz auti timpu watzjapa, warcužtaqui anatača cuza. Jalla nižtiquiztan jos tjappacha ninacaqui pinsatča nawjctan ojcz tsjan cusa, nii. Fenice cjita wajtquin irantis pecatča jaknužumi. Fenice watjaqui Creta yokquinzakaztača. Nii wajtquiztan cheržtaqui pajk kota tjenča warutuñtan, užatuñtan. Jalla nicjuñtača waliqui auti timpu watzqui.

PAJK KOTQUIZ ANAWALI WATCHICHA

¹³ Jalla nekztanaqui warutan zuma queržcan ninacaqui pinsichiča, tira ojkzjapa. Jalla nekztan ninacaqui zarakchiča. Creta yok tjiyaranpan ojkchiča.

¹⁴ Tsjii kjaž majquiztan tsjii walja pjursanti tjamiqiu tjonchiča uzatan tuwantan cheechi.

¹⁵ Nekztanaqui tjamiqiu warcu chjitchiča chawc kot mor kjutñi. Tjamž kjutñiqui anataž wira ojkchuca. Jalla nižtiquiztan jakzichuckat tjamiqiu učum chjichačhani, jalla nicjupankaz okáčhani.

¹⁶ Jalla nekztanaqui Clauda cjita kolta yokž waruñ watchinča. Jalla nicjuñ watan tjamiqiu anatača ancha pjursanti. Tsjii kolta warcuqui pajk warcuž wirquiz mojkžtatača. Ana ancha tjamiž cjen nii kolta warcuqui pajk warcuquiz tewziča ch'aman.

¹⁷ Jalla nuž tewžcu, nii pajk warcu kojchnacžtan zumpacha t'ejžtatača, ana cjacsnažo. Jalla niiran yok pjila želatča Sirte cjita. Tjamiž cjen nii yok pjilquiz julz eksnatča. Jalla nižtiquiztan nii pajk pañuz cherchi pajk tultu apakchiča warcu tsewntan. Nekztanaqui tjamžquiz warcu chjitskatchiča.

¹⁸ Niiž jaka tažuqui nii tjam queraqui tira walja pjursantitača. Jalla nižtiquiztan nii warcuquiz žejlñi kuzinacaqui pajk kotquiz tjojtatača.

¹⁹ Jalla niipa tažuqui warcuž cusasanaca kot kjazquiz tjojtchinča wejtnaca kjaržtan.

²⁰ Tsjii kjaž majquiztan ancha ch'orawitača. Jalla nuž ch'orawiž cjen anaž tjuñimi warawarami tjenatča. Nižaza nuž ch'orawiž cjen wejrnacqui "Ticznačhani. Anaž jaknužumi liwriyasatča", nuž cjican čhičinča.

²¹ Tsjii kjaž maj ana čjeri lujlchi cjen Pabluqui ninacž taypiquiz tsijtsiča, tuž cjican:

—Jilanaca, anatača učumquiu Cretquiztan ulansquiz, wejt taku cazpantatča ančucalaqui. Nižaza anaž caganacami pertitasatča, nižaza učumquiu anaž tižta sufritasatča.

²² Anziqiu ančucquiu tjuj kuzziz cjisna, anatača llaquiza. Tii warcuž katanami, anaž jakziltami ticznaquiča.

²³ Wejrquiu Yooz sirwuča, nižaza Yooz partitča. Zez ween Yoozquiu tsjii anjila wejtquiz cuchanzquičiča. Nii anjilaquiu wejtquiz jeczquičiča,

²⁴ tuž cjican: "Pablo, ana eksna amquiu. Roman chawc jilirž yujcquiz prisintistanča amquiu. Jaziqiu amiž cjen tjapa amtan chica ojkñi zoñinaca žetaquiča".

²⁵ Jilanaca, anatača llaquiza. Wejrquiu Yoozquin tjapa kuztanča. Jaknuž nii anjilaquiu čhičhaja, jalla niicamaž cumplisnaquiča.

²⁶ Kot taypiquiz tsjii kolta yoka žejlča. Jalla nii yoka irantiž cjen warcuqui yokquiz čhjakžcu, tsijtsnaquiča kjazquizpacha. —Jalla nuž paljaychiča Pabluqui.

²⁷ Jalla nekztanaquiu pizc simana ojktiquiztan, Adria cjita kot kjazquiz želan, tjamiqiu warcu chjichatča. Jalla nii ween chica arama warcu joojooñinacaquiu pinsichiča, yokquin irantičhani, cjican.

²⁸ Jalla nižtiquiztan kjazquiztan kozzuc yokquin tupžcu, zizziča quinsa tunc sojtan metro. Nižaza tsjii kjažtapacha ojkžcu wilta tupzizakazza. Jalla nuž tupžcu, zizziča paatunc pakallakun metro.

²⁹ Kjaz koston maz akji želačhani cjican pinsichiča. Nekztan warcu wirquiztan tsjii pajkpic pajk jirunaca quijtsiča ana nii maz ajkquin čhjakajo. Ekscan tjuñi tjewks tjewznatča.

³⁰ Jalla nuž tjewžcan, nii warcu joojooñinacaquiu pinsichiča, warcuquiztan atipasjapa. Jalla nuž pinsižcu, nii tewžta kolta warcu kjazquiz chjiwnatča. Jalla nuž chjiwnacan nii pajk jirunaca quijžtažokaž cjetča nii warcuž yujcquiztan.

³¹ Jalla nuž cheržcu, Pabluqui zultatž capitanžquiu paljaychiča nižaza zultatunacžquizimi, tuž cjican:

—Nii warcu joojooñinacaquiu ana tii warcuquiu eclairiž niiquiu, ančucquiu ticznasatča.

³² Nuž nonžcuquiu zultatunacaquiu nii kolta warcu mojkta kojchnaca pootžinčiča kolta warcu kjazquin tjojtsnažo.

³³ Jalla nii kjantati Pabluquiu taku tjaachiča čjeri lulajo, tuž cjican:

—Pizc simana tjontatča ančucmi kuz turwayzi ana tjačhi nižaza ana lujlchi.

³⁴ Nižtiquiztan ančucquiu čjulullamekaz lujlznalla, azi tanzjapa. Anaž jecmi wira apt'isnasatča. Nižaza ana zinta čhjojricta cjequiča.

³⁵ Jalla nuž čhižcu Pabluquiu tsjii t'anta tanziča. Nižaza Yooz Ejpžquin sparaqiuž cjičiča tjapa nii žejlñi zoñinacž yujcquiz. Jalla nekztanaquiu nii t'anta kjolžcu lujlchiča.

³⁶ Jalla nižtiquiztan tjapa nii zoñinacaquiu lujlsquin kuzziz cjsičiča. Nekztan lujlchizakazza.

³⁷ Nii warcuquiu paa patac pakallawk tunca sojtan zoñinacatča.

³⁸ Jaknužt zapa mayni pecčhaja jalla nuž lujlchiča. Jalla nuž lujlžcu nii parti trig kuzinaca kjaz kotquin tjojtchiča nii warcu cježu cjejajo.

WARCU KJAZQUIZ KATCHICHA

³⁹ Tjuñi tjewktanalla, warcu joojooñinacaui nii yoka cheržcu ana pajatča. Pero tsjii puĵ atquin pĵilla iñža k'ar yoka želatča. Nii yokquin warcu tsiĵtskatž pecatča.

⁴⁰ Jalla nekztanaui nii pajk quijžta ĵirunacžquiz moĵkta kojchmi pootchiča. Kjazquiz-pacha cutziča. Nižaza kochnaca ĵweržcu, warcu irpiñi maderanaca cutsiča. Nekztan pajk tutu, warcu ĵuntuñ tucquin tsĵijpsiča tjami tanzjapa. Jalla nižtiquiztan warcuqui puĵu iñža yoka žcatžinchiča.

⁴¹ Jalla nuž žcatžincan, pizc curinti ojķi kjaz jalla nekz cĵissiča. Jalla nižtiquiztan nii warcuqui kjaz koztan yokquiz quijtsiča. Warcu tucquiztanaui pĵilquiz luzzitača. Ana ĵaknužquin kissiča. Nižaza warcu wirquiztanaui kjaz lĵojkikaž warcu kĵolatča.

⁴² Jalla nuž cjen preso itžni žultatunacaui preso žoñinaca conž pecatča, ana atipskatž-japa kjazquiz narkan.

⁴³ Žultatž capitanazti Pablo liwriiz pecatča. Jalla nižtiquiztan presonaca conawc cjen atajichiča. Nekztan mantichiča, tuž cĵican:

—Kjazquiz narfi zizni žoñinaca, ančhucqui primiraui kjazquiz luzna, yokquin irantiz-japa.

⁴⁴ Parti žoñinaca, ančhucqui tabla tanžcu kjazquiz zakaz luzna. —Jalla nuž mantichiča nii capitanaui.

Jalla nuž tjappacha yokquin irantichiča. Ana zinta ticziča.

28**PABLUZ MALTA YOKQUIN KAMTA**

¹ Jalla nuž yokquin ulanžcu, nii kolta yokž tjuu zizzinča Malta cĵitatakalča.

² Jalla nii yokquin žejlfi žoñinacaui wejnaca ancha wali atintichiča. Nižaza tsjii pajk uĵ taazinchiča wejnac kutnajo. Chĵiniž cjen zaquiz cjen wejtnacaltajapa uĵ taazinchiča.

³ Nekztanaui Pabluqui kĵoñ žup aptichiča. Nii žup uĵquin tĵojtan, tsjii zkoraui uĵ kĵakiž cjen ulanžquichiča Pabluž kjarquin ch'atzi chejchipacha.

⁴ Jalla nuž cheržcu nii yokchiz žoñinacaui tuž cĵeyassiča:

—Tii žoñiqui žoñi conñizlani. Kot kjazquiztan liwriitaž cjenami Yoozqui anat munčhani, tiž žejtzi.

⁵ Pabluqui kjarquiztan zkora tsajtsajtsiča uĵquiz. Zkoraž ch'attaž cjenami anapan kjaz cĵissiča Pabluqui.

⁶ Tjapa nii žoñinacaui Pabluž kjarat tjuwačhani cĵican chekznatča. Nižaza tsjii ratuquiztan ticzit cĵee tiiqui, jalla nuž pinsatča nii žoñinacaui. Jalla nuž azk tjewžcu, Pablo ana kĵaž cĵissi cherziča. Jalla nižtiquiztan pinsita campiižcu, nii žoñinacaui cĵichiča:

—Tii Pabluqui cheka Yoozalani —cĵican.

⁷ Ulanta yok žcati nii yokchiz ĵilirž yokanaca želatča. Nii ĵiliriui Publio cĵitatača. Jalla niiqui wejnaca zuma risiwchiča. Chĵep maj wejnac zuma atintichiča.

⁸ Publiož epĵqui laa želatča, tsjii ch'ujlfi conžtan, nižaza ĵawžtan. Pabluqui nižquin tjonžni ojķichiča. Nekztanaui Pabluqui nii laa žoñža Yoozquin mayizichiča, čĵjetinzjapa. Nekztanaui niž ĵuntuñ kjaržtan lanžcu, čĵjetinchiča.

⁹ Jalla nižtiquiztan parti nii yokquiz žejlfi laanacaui tjonchizakazza, jalla ninacami čĵjetintatača.

¹⁰ Nuž čĵjetintiquiztan nii žoñinacaui wejtnacquiz walja rispitchiča. Chĵep ĵiizquiztan wilta tsjii warcuquiz luzzinča. Ima nii warcu luzan, nii žoñinacaui walja zuma žaka cĵiizinchiča, wejnaca ojĵzjapa.

PABLUQUI ROMA WAJTQUIN IRANTICHICHA

¹¹ Warcuqui nii yokquiz auti timpu watchiča. Alejandrija wajtquiztan tjonchitača. Nii warcuž tucquin pizc yooznacchizatača. Cástor y Pólux cĵitatača nii pizc yooznacaui.

¹² Nekztanaui warcuquiz ojķcan, Siracusa wajtquin irantichinča. Jalla nicju čĵjep maj kamchinča.

¹³ Jalla nekztan warcuquiztan tira ojķchinča. Nekztan yok žcatiran ojķcan, Regio cĵita wajtquin irantichinča. Niiž ĵaka tažuqui wartan queržquichiča. Jalla nuž queržcan pucmajquiz irantichinča Puteoli wajtquin.

¹⁴ Jalla nicju tsjii kĵažultan Yoozquin criichi ĵilanacžtan zalchinča. Jalla ninacaui wejtnacaquiz invitchiča ninacžtan tsjii simana kamajo. Jalla nekztanaui Roma wajt kĵutfi zarakchinča.

¹⁵ Roma wajtchiz Yoozquin criichi ĵilanacaui wejtnacaž tjonz quinto zizzitakalča. Jalla nekztan wejtnacatan zali ulanžquichiča. Jalla ninacaž nuž zalzquichiquiztan, Pabluqui

Yoozquin sparaqüz cjichicha. Nižaza juc'ant tjup kuzziz cjissiicha. Wejrnacqui ninacžtan zalchinča Foro de Apio cjita yokquin, nižaza Tres Tabernas cjitazakaztača.

¹⁶ Jalla nekztanaqui Rom watja irantitanaqui nii capitanaqui preso zoñinaca intirjichicha roman zultatž jiliržquiz. Pero nii capitanaqui Pablo kamkatchicha yejkquin tsjii guardiñi zultatžtan.

PABLUZ KAMTA ROMA WAJTQUIN

¹⁷ Chjep majquiztan nuž irantižcu, Pabluqui kjawzkatichicha Roma žejlñi judío jilirinaca. Jalla nuž Pablužquin tjontan, Pabluqui ninacžquin paljaychicha, tuž cjan:

–Jilanaca, wejrcui roman zultatžquiz preso intirjitatača Jerusalén wajtquin, ana čjulumi judionacž quintra paachi cjenami. Nižaza ana čjulumi učum tuquita ejpnacž cuzturumpi quintra paachi cjenami.

¹⁸ Wejr zumpacha pecunžcu, ninacaqui wejr cuts pecatča. Wejt quintra ana čjul ujmi watchicha, wejr conzjapaqui.

¹⁹ Judío partinacžti ana munchicha. Jalla niztiquiztan roman chawc jiliržquin wejt quija tjaznajo maychinča. Jalla nuž cjenami, wejrcui wejt wajtchiz zoñinacž quintra ana čjul uj tjeeskatž pecuča.

²⁰ Jalla niztiquiztan ančuc kjawzkatuča ančuca cherzjapa, nižaza ančucatan parlizjapa. Učumqui Israel wajtchiz zoñinacžhumča. Jalla učumqui Yooziž cučanžquita zoñi tjewža. Jalla nii tjewža zoñi sirwiñiž cjen wejrcui tii carinžtan čejlta zeluča.

²¹ Jalla nekztanaqui nii judionacaqui cjichicha:

–Wejrnacqui am puntuquiztan ana čjul cartami risiwchinča Judea wajtquiztan. Nižaza nii nawjtan tjonchi judío jilanacami anaž am quintra čhiicha.

²² Wejrnacqui amiž pinsita takunaca nonz pecuča. Tjapa wajtquizimi tii ew yekja t'akž quintra čhiicha. Jalla nuž zizuča.

²³ Jalla nekztanaqui tsjii tjuñi citichicha. Jalla nii citta tjuñquiziqui walja zoñinacaqui tjonchicha jakziquin Pablo alujassi želatčhaja, jalla nicju. Jalla nuž zoñinacž tjonžcu Pabluqui ninacžquiz paljaychicha wenstanpacha zezicama Yooz mantita kamañ puntuquiztan. Pabluqui ninaca zumpacha intintiskatz pecatča Jesucristuž puntuquiztan. Moisés liquiztanami nižaza profetanacž cjjirta liwrunacžquiztanami punta punta čhižinčhicha, ninaca zuma intintazajo Jesusiž puntuquiztan.

²⁴ Yekjapanacaqui Pabluž nuž čhiita takunaca catokchicha. Yekjapanacžti niž takunaca ana nonziča.

²⁵ Jalla ninacpora Jesucristuž puntuquiztan ch'aascan, nužquiz ninacaqui wichanzi kallantichicha. İma okan, Pabluqui cjichicha:

–Espíritu Santuqui Isaiás cjita profetžquiz paljaychicha učum tuquita ejpnacžjapa. Ančuca puntuquiztan werarapan čhiichicha, tuž cjan:

²⁶ “Oka, tii zoñinacžquiz paljayžca, tuž cjan: Ančucqui nonžñeeka nonznaquičha, pero ana intintazasača. Nižaza chekžñeeka chekznaquičha, pero ana cumprint-asasača.

²⁷ Jalla nuž cjequičha. Tii zoñinacž kuznacaqui walja tjupiča, ana Yooz taku intintizjapa. Nižaza oñižtakazza ninacaqui, Yooz taku ana nonzjapa. Nižaza zuražtakazza Yooz paatanaca ana cherzjapaqui. Jalla nižtakaz žejlča ana intintiñi kuzziz cjisjapa. Nižaza ana wejrcui cut'iscaquičha, liwriita cjisjapa”.

²⁸ Jalla tekžtan nawjčhuc tii liwriñi Yooz takuqui parlitaz cjequičha ana judío zoñinacžquin. Jalla nii ziza ančucqui. Nii yekja wajtchiz zoñinacaqui tii liwriñi Yooz taku nonznaquičha.

²⁹ Jalla nuž Pabluž čhiitiquiztan, judionacaqui ojckichicha, ninacpora anča ch'aascan.

³⁰ Pabluqui pizc wata intiru nii aquilta kjuyquiz kamchicha. Jakzilta nižquin tjonžñi zoñimi zuma risiwñipanikaztača.

³¹ Jalla ninacžquin parlichicha Yooz mantita kamañ puntuquiztan, nižaza Jesucristo jilirž puntuquiztan. Tjapa kuztan kjana tjaajnatča. Nižaza anaž jecmi Pablo atajchicha, Yooz taku ana paljayajo.

LA CARTA DEL APOSTOL SAN PABLO A LOS ROMANOS

¹ Wejr Pabluqui ančhucaquin tii cartal cjiyržcuča. Jesucristuž mantitacama okiñ zoñtča. Yooz Ejpqui wejr kjawžcu apóstol puestuquin utchiča, liwriiñi Yooz taku parlajo.

² Tuquitanpacha Yoozqui tsjii liwriiñi zoñi cuchanžquiz compromitchiča. Jalla nii compromittaqui Yooz cuntiquiztan chiiñi profetanacaqui mazinchiča zuma Yooz tawki libruquiz.

³ Nii liwriiñi zoñiqui Jesucristo Jiliriča. Yooz Majchča niiqui. Jesucristuqui zoñi cjanacaqui Davidž majch maatinacqiztan tjonñitača.

⁴ Nižaza Jesucristuqui ticziquiztan jacatatchiča; nižaza zuma Yooz Espirituchizza. Jalla nii kjanapacha tjeeža, niiča walja azziz Yooz Majchqui, nii. Jesucristo Yooz Majchča ućhum Jiliriqui.

⁵ Jesucristuž cjen wejrqui zuma Yooz kamaña tanzinča. Nižaza Jesucristuž cjen Yooz Ejpqui wejr apóstol puestuquiz utchiča, tjapa wajtchiz zoñinaca Jesucristužquin kuzziz cjejajo, nižaza nižquiz cazajo. Jalla nuž apóstol kamañquiz kamcan, Jesucristužtajapa langznuča.

⁶ Ančuc zakaz Jesucristužquiz kuzziz cjissinčucča. Yooz Epiž ančhuca kuzquiz kjawžtan Jesucristuž partiquiz cjissinčucča.

⁷ Wejrqui tjapa ančhucaquin cjiyržcuča, Roma wajtquin žejlñi zoñinacčucča. Yooz k'ayi zoñinacaž cjen, Yoozqui ančhucaquiz kjawziča, Yooz zuma kamañchiz cjejajo. Ućhum Yooz Ejpmi, nižaza Jesucristo Jilirimi ančhucaquiz zumaj yanapt'ila; nižaza cuntintu kuzziz cjskatla.

PABLO ROMA WAJTQUIN TJONZ PECCHA

⁸ Jaziqui ančhucaž zuma kamtiquiztan Yooz Ejpžquin ancha gracias cjan chiyuča. Tjapa wajtchiz zoñinacaqui ančuc puntu chiča, ančucqui ancha Jesucristužquin kuzzizza, nii. Jesucristuž cjen Yoozquin gracias cjan chiyuča.

⁹ Wejrqui tjapa kuz Yooz sirwuča, Yooz Majch liwriiñi puntu parlican. Jaziqui Yooz zizza, oracionžtan ančhucaquiz tirapan yanapuča, nii.

¹⁰ Nižaza Yoozquin mayizuča. Yooz munan, ultimu ančhucaquin jaknužquiztanami tjonzquiz atučani. Azka ančhucaquin tjonzquiz pecatuča.

¹¹ Ančucatan ancha zal pecuča, Yooz kamañquiz ančhucaquiz tsjan zuma kami yanapzjapa, nižaza Yooz tjup kuzzizpan cjiñi yanapzjapa.

¹² Ančucmi wejrmi Jesucristužquinkaz kuzzizčumča. Jalla nižtiquiztan zalžcu porapat chižinascu, Yoozquin juc'ant kuzziz cjesača ućhumqui.

¹³ Jilanaca, cullaquinaca, ančhucaquiz zizkatz pecuča, kjaž wiltami wejrqui ančhucaquin tjonz pecatuča. Pero tii orcama ana atchinča. Ančhucaquin tjonz pecatuča, Rom wajtquiz zakaz Yooztajapa obranaca payi. Rom wajtquizimi, nižaza yekja watjanacqizimi Jesucristužtajapa langz pecuča, zoñinaca nižquin kuzziz cjejajo.

¹⁴ Wejrqui liwriiñi Jesucristuž puntu parlistanča, k'ar zoñinacžquizimi campuquiz žejlñi zoñinacžquizimi, zizñi zoñinacžquizimi, ana zizñi zoñinacžquizimi. Jalla tjapa zoñinacžquizimi liwriiñi Jesucristuž puntu parlistanča.

¹⁵ Jalla nižtiquiztan wejrqui ančhucaquiz zakaz nii puntu parliz anchal pecuča.

ANCHA AZZIZZA LIWRIIÑI TAKUQUI

¹⁶ Jakžiltat liwriiñi Yooz taku catokačhaj niiqui, liwriita cjequiča. Tuquiqui juđio zoñinacžquiz nii liwriiz puntu parlitatača. Nekztan yekja wajtchiz zoñinacžquiz parlitazakaztača. Jakžiltat nii liwriiz puntu catokačhaja, jalla niiqui liwriitaž cjequiča. Nižta azzizza liwriiñi Yooz takuqui. Jalla nižtiquiztan nii Yooz taku parlizjapa anal azuča; nii ancha zuma taku parlizjapa ancha jutzaznuča.

¹⁷ Liwriiñi takuqui tuž cjiča; Yoozqui ancha zumača; nižaza zoñinacžquiz nižta zuma nižaza ana ućhiz cjskatasacha. Jalla nuž cjiča nii liwriiñi Yooz takuqui. Jaknužt zoñinaca Yooz yujcquiz ana ućhiz, nižaza zuma cječhaja, jalla nii zizkatuča, nii liwriiñi taku chiican. Jesucristužquiz kuzziz cjen, jalla nii alajakaz Yooz yujcquiz ana ućhiz, nižaza zuma kuzziz cjesača. Cjiyrta Yooz takuqui tuž cjiča: "Jakžiltat Yoozquin kuzziz cječhaja, jalla niiča Yooz yujcquiz ana ućhizqui, nižaza zuma kuzzizqui. Nekztan Yooztan wiñaya kamaquiča".

YOOZ JAYTZCU ZOÑINACAQUI UJPAN PAACHA

¹⁸ Arajpachquiztan Yooz casticuqui tjonča tjapa ana Yooz kuzcama kamñinacž quintra, nižaza anawali paañinacž quintra. Jalla nii anazum kamañchiz zoñinacaqui anawali

paaznacapan pec̄ha, Yooz zuma kamaña anaž importičha. Nekztan Yooz kuzcama ana kamčha. Yooz puntu werara zizawc cjen, atajčha.

¹⁹ Pero ninacž kuzquiz Yooz puntu zizasach̄a. Yoozqui žoñinacžquiz kjanapacha tjeezičha, niž puntu.

²⁰ Ana Yooz cheržcumi tii mundo paatiquiztanpacha Yooz puntu zizta cjesach̄a. Niž paatanaca cheržcu, tjapa žoñinacaqui Yooz puntu zizasach̄a, Yoozqui wiñaya azzizza, nižaza werar Yoozpankazza, tii mundo paachi Yoozqui. Jalla nii kjana zizta cjesach̄a. Jalla nižtiquiztan Yooz kuzcama ana kamcanaqui anazuma kamañchiz žoñinacaqui ana razunchizza.

²¹ Žoñinacaqui Yooz puntu persun kuznacquiz zizza. Jalla nuž zizcumi, Yooz ana rispitch̄a, nižaza ana čjulquiztanami “Gracias, wejt Yooz” cjican chiich̄a. Nekztan žoñinacaqui ina kaz pinsitanacchiz cjissičha. Nižaza ninacž chojru kuzziz cjen ana wali zumchiquiztakaz kamčha.

²² Žoñinacaqui “Wejrnacčha ziziñtqui” cjicanami, zumzužtakaz cjissičha.

²³ Ancha zumapankazza Yoozqui. Pero žoñinacaqui nii wiñaya zejtni Yoozquiz rispitz jaytichičha. Nekztan žoñinacaqui žoñiž paata yoozquizkaz rispitiñi cjissičha. Nii žoñiž paata yooznacaqui ticžni curpuchiz žoñinacž irata paatačha, nižaza wežlanacž irata paatačha, nižaza pajkpic kjojchiz animalanacž irata paatačha, nižaza zkoranacž irata paatačha. Jalla nižta paatanacquiz rispitch̄a.

²⁴ Jalla nižtiquiztan Yooz Ejpqui ninacžquiz jaytichičha. Nekztan ninacž anazuma pec̄ni kuzcama čjul ujmi paañičha. Žoñinacpora azzucanaca paachičha.

²⁵ Ninacaqui Yooz puntuquiztan werar razunanaca criichi ecchičha. Nekztan toscar razunanaca criichičha. Jalla nekztan ninacaqui Yoozquin ana rispitchičha. Yooziž paata obranacquizkaz rispitchičha, nižaza sirwichičha. Pero Yoozqui tjappacha paachičha. Jalla nii tjapa paañi Yoozqui wiñaya honorchizza. Jalla nužoj cjila. Amén.

²⁶ Jalla nižta anawali kuzziz cjen Yoozqui ninaca jaytichičha, ninacaž anazum kuzcama azzucanaca paajo. Jalla nuž azzucanaca paacan maatakanacaqui porapat želassičha, jaknužt lucutiñi želas, jalla nižta.

²⁷ Luctakanacaqui nižaza porapat ana wali želassičha, jaknužt lucutiñi želas, jalla nižta. Ninacpora ancha peccu, azzuca ujnaca paachičha. Ancha akñi ujnacquiz tjojtsičha. Jalla nižtiquiztan ninacž persun curpuquizpacha casticu sufričha, nii ana wali paatiquiztan. Nižaza nižta sufris waquizičha ninacaqui.

²⁸ Werar Yooz zizzucatačha, pero ninacaqui Yooz ana pajz pecatčha. Jalla nižtiquiztan Yoozqui ninaca jaytichičha, ninaca ana zuma pinsiñi kuzziz cjisjapa, nižaza ana zuma cjuch̄i kamañchiz cjisjapa.

²⁹ Ninacž kuzquiz walja tjapaman ana zumanaca želatčha, chjijpipacha. Jalla tižta ana zumanaca želatčha; ana Yooz kuzcama kamz, adulteriuquiz ojklayz, žoñiž quintra ana wali paaz, yekja žoñžquiztan zmaz, nižaza tjapa ana walimi paaz pec̄ni kuz želatčha. Nižaza ninacž kuznaca tižtačha: iñiziñi kuz, žoñi coñi kuz, žoñžtan quija ojklayz kuz, incallni kuz, ana wal paaz pec̄ni kuz, nižaza ana wal quintu joojooñi kuz. Jalla nižta anawali kuzziz žoñi žejlčha.

³⁰ Ninacaqui žoñiž quintra chiiñinacačha. Yooz quintra chjaawjkatñičha. Nižaza žoñi iñarñičha, nižaza mitarazi kuzzizza, persunpacha honora waytisñičha. Nižaza ana zuma paazjapa tantiiñičha, nižaza maa ejp ana cazñičha.

³¹ Nižaza Yooz puntu ana intintiz pec̄ničha, nižaza chiižcupacha niž taku ana cumpliñičha. Nižaza ana jec žoñžtanami munaziñičha. Nižaza ana pertunñičha. Nižaza ana jec žoñžquizimi okžni kuzzizza.

³² Yoozqui mantichičha, jalla nižta žoñinacaqui ticzpan waquizičha. Jalla nuž Yooz mantita zizcumipacha, nii ana wali žoñinacaqui nižta ana wali paazkaz pec̄ničha, nižaza yekjaž nižta ana wali paanami, “Walikazza” cjiñičha.

2

YOOZZA LIJITUMA PJALZÑIQUI

¹ Jakzilta žoñit tsjii uj paachi žoñžquiztan “Yooz nii casticla” cjican chiich̄aja, jalla nii žoñiqui ana nižta ujpacha paaz waquizičha. Jalla nižta ujpacha paaquizñi niiqui, persun casticu chiich̄a. Nižaza Yooz yujcquiziqui anaž razunchiz cjesach̄a niž persun paata ujuquiztan.

² Yoozqui uj paañinaca lijituma pjalznaquičha, casticzjapa. Jalla nii ućhum zizza.

³ Jequit yekja uj paañi žoñiž quintra chiich̄aja, nižaza nižta użakaz persuna paach̄aja, jalla niiqui anapanž atipasačha Yoozquiztan. Panž castictazakaz cjequičha. Uj paažcu, anapan pinsa, “Ana Yooziž casticta cjeeka” cjican.

⁴Jalla niža pinsiñi žoñinacaqui Yooz puntu ana zuma intintiča. Yoozqui anča zumača, nižaza tsjan juc'anti okzñi kuzzizza, nižaza tsjan juc'anti pasinsis kuzzizza. Jalla nii werar razunača. Pero jalla niža kuzziz cjen, Yoozqui žoñinacžquiz persun uj sint'iskatz pecča. Nuž sint'iskatzcu ujnaca paazqui eca. Jalla nuž pecča Yoozqui. Jalla nii zizza ančhuc, ¿ana jaa?

⁵Ančhucqui ana persun uj sint'iñiž cjen, nižaza chojru kuzziz cjen, juc'anti castictaž cjequiča Yooziž ultimu pjalz tjuñquiziqui. Jalla nii tjuñquiziqui Yoozqui žoñinacž paata ujnaca tjeznaquičha; nekztan ultimuz casticaquičha.

⁶Jalla nii tjuñquiziqui Yoozqui tjapa žoñinaca pjalznaquičha ninacaž paatiquiztan jama. ⁷Jequit pasinsis kuzziz zuma kamañchiz kamčhaja, jalla ninacaqui Yooztan wiñaya kamaquičha. Jalla nii zuma kamñinacaqui Yooziž tjaata honorchiz cjis pecča, nižaza Yooziž rispitta cjis pecča, nižaza Yooztan wiñaya kamz pecča.

⁸Pero yekjapanacaqui persun kuzcamakaz kamz pecča, werar Yooz kamaña anaž pecča. Anawalinacž mantuquizpanž žejlča. Jalla ninacž quintra Yoozqui juc'anti žawjžcu casticaquičha.

⁹Tjapa anawali paañinacžtami sufris želaquičha, nižaza wali llaqui želaquičha. Anawali paañi judío žoñinacaqui juc'anti sufraquičha. Pero tjapa anawali paañi žoñinacaqui zakaz sufraquičha, infernuquinaqui.

¹⁰Tjapa zuma kamñinacžtami Yooziž tjaata honorchiz cjequiča, nižaza Yooziž rispittaž cjequiča, nižaza llan kuzziz cuntintu cjequiča. Nii zuma kamñi judío žoñinacaqui juc'ant waliž cjequiča. Pero tjapa zuma kamñi žoñinacaqui zakaz waliž cjequiča, arajpachquinaqui.

¹¹Yoozqui žoñinaca ana illillžcu lijituma pjalznaquičha.

¹²Yekjapanacaqui Moisés lii ana zizza. Jalla nižtiquiztan Yoozqui nii lii jaru ana casticaquičha; persun uj paatiquiztanjama casticaquičha. Yekjapanacaqui Moisés lii zizza. Jalla nižtiquiztan Yoozqui nii lii ana cumplitiquiztan jama casticaquičha.

¹³Jakzilta žoñinacžtami Moisés lii nonžcu, ana nii lii jaru kamčhaja, jalla niiqui Yooz yujcquiziqui tira ujchizza. Pero jakzilta žoñinacžtami Moisés lii cazzaja, jalla niiqui Yooz yujcquiziqui ana ujchizza.

¹⁴Ana judío žoñinacaqui Moisés lii ana zizza. Jalla nuž ana zizcumi, ninacpacha persun kuzquiz zuma paaz zint'asača, jaknužt Moisés lii zuma paaz mantichaja, jalla nuž. Nekztan nii kuzquiz zint'ita jaru zuma kamcan, ninacžtaqui liižtakazza nii kuzquiz zint'itaqui.

¹⁵Jalla nuž zuma kamcan kjanapacha tježa, Yoozqui ninacž kuzquizpacha niž mantitanaca zizkatcha, nii. Nii Yooziž zizkattacama ana kamtiquiztan casticta cjequiča. Nižaza nii zizkattacama kamchizlaja, nekztan ana casticta cjequiča. Yooz pjalz tjuñquiziqui ninacaž kamtanacquiztan jama pjaltaž cjequiča.

¹⁶Yoozqui Jesucristužquiz žoñinaca pjalzkataquičha, chjojkaca paatiquiztanami, nižaza pinsitaquiztanami. Wejrqui niipan chiichinča liwriñi Yooz puntu parlican.

JUDIO ŽOÑINACAQUI MOISES LIICHIZZA

¹⁷Yekjap ančhucquiztan judío žoñinacžhucča. Ančhucqui Moisés liichiz cjen “Walikaztča wejrqui” cjiñchucča. Nižaza mitarazi kuzziz cjiñchucča, “Werar Yoozza wejt Yoozqui”, cjicanaqui.

¹⁸Ančhucqui jaknužt Yooz munčhaja, jalla nii zizza. Ančhucqui Moisés lii tjaajintaž cjen Yooz zuma kamaña panž zizza.

¹⁹Yooz puntu ana zizñi žoñinaca želan, ančhucqui cjiča, “Nii zuražtakaz žoñinacžquiz tjaajznasak” cjican. Nižaza ana wal zumchiquiztakaz kamñi žoñinaca želan, ančhucqui cjiča, “Nii ana wal kamñi žoñinacžquiz Yooz zuma kamaña tjaajznasak” kaž cjiča; “Werjtča ninacžtaqui kjanažtakaz” cjican.

²⁰Nižaza ančhucqui cjiča: “Zumzu kamñi žoñinacžquiz Yooz kamaña sok'o tjaajznasak, ana tsjii kjutñi kamajo”, kaž cjiča. Nižaza ančhucqui cjiča: “Yooz puntu koloculla zizñi žoñinacžquiz tjaajznasak”, kaž cjiča. Yooz puntu razunanacaqui Moisés liiquiz kjana žejlča. Jakziltat Moisés lii zuma zizaja, niiqui Yooz puntuquiztan zuma zizñi zizñi cjequiča.

²¹Jaziqui ančhucqui yekjžquiz tjaajznasaž niiqui, ¿kjažtiquiztan amiž tjaajinta jaru ana kamjo? Nižaza yekjap ančhucquiztan chižiniñchucča, tuž cjican: “Anača tjañi zaazqui”. Jalla nuž chižcu, ¿kjažtiquiztan ančhucpacha tjañi zaajo?

²²Nižaza ančhucqui cjiñchucča; “Anača adulteriuquiz ojklajzqui”. Jalla nuž chižcu, ¿kjažtiquiztan ančhucpacha adulteriuquiz ojklajjo? Ančhucqui žoñiž paata yooznaca chjaawjča. Jaziqui, ¿kjažtiquiztan ančhucqui timplu cusasanaca cjižjo?

²³ Ančhucqui mit kuzziz cjiñchuccha: “Wejrnacqui Moisés liichiztčha”. Jalla nuž chižcu, ħkjažtiqiztan ančhucqui nii lii ana cazjo? Ančhucqui nižta ana cazziž cjen Yoozquiz ana rispittäha.

²⁴ Cjijrta Yooz takuqui razunapanž čhiičha. Yooz takuqui tuž cjičha: “Ančhucaž uj paachiz cjen yekja wajtchiz zoñinacaqui ultim werar Yooz quintraž čhiičha”.

²⁵ Tsjii čhiizinučha. Ančhuc judío jilanacaqui Moisés lii jaru janchiquiz chimputa cjinčinčuccha. Moisés lii jaru kamchiž cječhaj niiqui, ančhucžtaqui nii chimputa walčha. Pero Moisés lii jaru ana kamchiž cječhaj niiqui, nii chimputaqui anaž walčha.

²⁶ Jaziqui tsjii ana chimputa zoñiqui Moisés lii jaru kamchi cječhaja, jalla niiqui Yooz yujcquiziqui chimputažtakaz cjequičha, niž janchiquiz ana chimputa cjenami.

²⁷ Nižaza jakzilta ana chimputa zoñit Moisés lii jaru kamchi cječhaja, jalla niiqui ančhuca uj tjeeža. Ančhucqui chimputaž cjenami nižaza Moisés cjijrta liichiz cjenami, jalla nii lii ana cazza.

²⁸ Jakzillat juntučkaz lii jaru paačhaja, jalla niiqui anačha ultimu Yooz maatiq. Nižaza jakzillat janchiquiz alaja chimputa cječhaja, jalla niiqui anačha ultimu Yooz maatiq.

²⁹ Pero jakzillat tjapa kuztan Yooz kuzcama kamčhaja, jalla niičha ultimu Yooz maatiq. Nižaza niiqui persun kuzquiz ultimu Yooziž chimputačha. Tsjii cjijrta lii jaru juntučkaz kamz anačha chekanaqui. Zoñž kuzquiztančha kamz chekanaqui, lijituma Yoozquin kuzziz, už ana lijituma Yoozquin kuzziz, nii. Jalla nižta lijitum kuzziz zoñiqui Yooziž tjaata honorchizza. Zoñž tjaata honora anaž importičha.

3

¹ Yooz yujcquiziqui judío zoñinacaqui yekja wajtchiz zoñinacžquiztan tsjan walasaž niiqui, ħčhjuljapat waljo? Nižaza janchiquiz chimputaqui, ħčhjuljapat waljo?

² Judío wajtchiz zoñinacaž cjan, zuma walčha. Tužučha primer razunaqui. Judío zoñinacžquiz Yoozqui niž cjijrta taku cumpjičičha.

³ Nii Yooziž tjaata lii jaru yekjap judío zoñinacaqui ana lijituma kamchičha. Jalla nuž ana lijituma kamchiž cjen, ninacaž compromitta taku ana cumplissičha. Jalla nuž cjenami Yoozqui niž persun compromitta taku cumpličha.

⁴ Nužupančha. Yoozqui taku čhižcu panž cumpličha, tjapa zoñinacaž čhiita taku ana cumpličiz cjenami. Cjijrta Yooz takuqui tuž cjičha: “Yooz, amiž čhiitaqui lijitumačha. Jalla nii ziztaj cjila. Zoñinacaž am quintra uj tjojtunchiz cjenami amqui lijitumapankaz tjeežtaj cjila”.

⁵ Zoñinacaž toscara čhiitaqui juc'ant tjeeža, Yoozza lijitumaqui, nii. Jaziqui, ħkjaž cjeequi? Yoozqui nii toscara čhiini zoñinaca ana casticz waquizičha. ħNuž chiyasajo?

⁶ Anapančha. Yoozqui lijitumapančha. Nižaza Yoozqui uj paañi zoñinaca ana casticaquiz niiqui, inakaz jusjasačha.

⁷ Yekjapanacaqui tuž cjiñičha: “Wejt toscara čhiitaqui, Yooz lijitumaž, nii tjeeznaquiz niiqui, ħkjažtiqiztan wejrcu casticta cjesajo? Weriz toscar čhiitiqiztan Yoozqui juc'anti rispitta cjesačha”. ħJalla nuž pinsichinčhucjo? Jalla nii razunaqui ancha zumzučha.

⁸ Nižaza yekjapanacaqui cjiñičha: “Anazuma paatiqiztan zuma paaznaca tsjan kjana tjeežta cjesačha. Nekztan nii anazumanaca paaz waquizičha”. Nižaza cjiñičha: “Pablo zakaz nuž tjaajñičha”. Jalla nuž cjan, yekjap zoñinacaqui wejtnac quintra čhiičha, wejrnacaž ana rispitta cjejajo. Jalla nižta čhiini zoñinacaqui casticta cjis waquizičha.

TJAPA ZOÑINACAQUI UJ PAACHA

⁹ Nekztan, ħkjaž cji? ħUčhum judío zoñinacaqui parti zoñinacžquiztan tsjan wali zoñinacajo? Anapanž cjesačha. Wejrcu kjanapacha tjeezinčha, judío wajtchiz zoñinacami nižaza yekja wajtchiz zoñinacami tjappacha už mantuquiz žejlčha, nii. Tjapa zoñinacami uj paazquin kuz tjaačha.

¹⁰ Jalla nižtapacha cjijrta Yooz takuqui cjičha: “Anaž jec lijitum kamañchiz zoñimi žejlčha, ana zintallami.

¹¹ Anaž jec Yooz kamaña intintiñimi žejlčha, anaž jecmi Yoozta kamzquin kuz tjaačha.

¹² Tjapa zoñinacaqui Yoozquiztan tsjii kjutñi zarakčha, nižaza ana zum kuzziz cjijsa. Anaž jakziltami zuma paañic žejlčha, ana zinta.

¹³ Ninacž joranacquiztan anazuma čhiitanaca ulančha, ticzinacž sipultura cjetžtažokaz. Čhiican, zoñinaca incallčha. Zkorž atquiz žejlñi venenožtakazza ninacaž atquiztan čhiitaqui.

¹⁴ Ninacaž čhiitaqui zoñž quintrapancha, nižaza zoñžtan čhaawjkatčha.

¹⁵ Ninacž kjojčhaqui apura zajtčha, zoñi conzjapa.

¹⁶ Ninacaqui zoñi akz pecčha, nižaza zoñžquiz llaquit kuzziz cjskatčha.

¹⁷ Nižaza llan kuzziz kamaña anapan zizza.

¹⁸ Nižaza werar Yooz rispits puntuquiztan anaž pinsičha”.

¹⁹ Jakziltat tuquita Moisés lii mantuquiz žejlčhaja, jalla niiqui nii lii jaru kamstančha. Pero tjapa nii liichiz zoñinacaqui ana nii lii jaru kamčha. Jalla nižtquiztan ch'uju cjis-sičha. Ana chiyasačha, “Wejrqui ana ujchiztčha” cjicanaqui. Tjapa zoñinacaqui, jaknužt kamčhaja, jalla nii cuenta Yoozquin tjaastančha. Tjapa zoñinacaqui Yooziž casticta cjis waquizičha.

²⁰ Anaž jakziltami Moisés lii jaru zumpacha ligituma kamčha. Jalla nižtquiztan Yooz yujcquiziqui anaž jakziltami ana ujchizza. Moisés lii zizcumi uj paaspančha. Jalla nižtquiztan nii lii jaru ana kamtiquiztan tjapa zoñinacaqui zizza, panž ujchizza, nii.

¿ZOÑINACAQUI, JAKNUŽT ANA UJCHIZ CJESAJO?

²¹ Moisés liiquiztan Yoozqui yekjat lii jaru zoñinacžquiz ana ujchiz nižaza zuma cjisakatčha. Pero nii puntu Moisés liimi nižaza profetanacaž cjiirta takumi zakaz čhičha.

²² ¿Jaknužt zoñinacaqui ana ujchiz cjesajo? Jalla tužučha. Jakziltat Jesucristužquiz kuz tjaačhaja, jalla niiqui Yooz yujcquiziqui ana ujchiz nižaza zuma cjequičha. Yoozqui zoñinaca ana illilla.

²³ Tjapa zoñinacaqui tsjii pariju ujchizza. Jalla nižta ujchiz cjenauqui Yoozqui ana jeczquizimi honorchiz cjisatasachha.

²⁴ Pero Jesucristuqui ujchiz zoñinacžta persun wiržtan pacchičha, ninaca ana casticta cjeajo, nižaza Yooz yujcquiz zuma cjeajo. Yoozqui Jesucristo cuchanžquichiž cjen zoñinacžquiz pajk favora paachičha. Jalla nuž cjen Yoozqui inat zoñinaca liwriyasachha, ninaca ana čhulu paačcu.

²⁵ Yooz Ejpqui Jesucristo cuchanžquichičha ujchiz zoñinacž laycu ticzjapa. Niiž ticziž cjen jakziltat Jesucristužquin kuz tjaačhaja, jalla niiqui persun ujquiztan ana castictaž cjequičha. Tuquitan ima Jesucristuž ticznar Yoozqui niizquin kuzziz zoñinacžtajapa pasinsis kuzziztačha; ninaca ana casticchičha. Pero Yoozqui uj paañinaca casticstančha. Jalla nuž cjenami Jesucristuž cjen Yoozqui ujchiz zoñinaca pertunasačha. Jalla nižtquiztan Jesucristo cuchanžquichiž cjen Yoozqui, persun kuz zuma ligitumaž, jalla nii tjeezičha.

²⁶ Uj paañi zoñinaca ana castictaž cjenami, Yoozqui ligitumačha. Uj paañi zoñinacaqui Jesucristuž ticziž cjen ana castictačha. Jakziltat Jesucristužquin kuz tjaačhaja, jalla niiqui Yooz yujcquiziqui zuma cjissa, ana ujchiz, Jesucristuž cjen.

²⁷ Jaziqui zoñinacaqui anapanž mitarazi kuzziz cjis waquizičha, “Yooz yujcquin walikaztčha wejrqui” cjicanaqui. ¿kjažtquiztan mit kuzziz ana nuž chiyas? Anaž jecmi Moisés lii jaru zuma kamchucaqui. Jalla nižtquiztan ana lii jaru kamchiž cjen tjapa zoñinacaqui Yooz yujcquiz ujchizza. Jesucristužquin kuz tjaachiquiztan, jalla nužquizkaz Yooz yujcquiz zuma cjesačha, ana ujchiz. Jalla nižtquiztan zoñinaca ana mitaraz kuzziz cjis waquizičha.

²⁸ Wejrqui kjanapacha tjaajinchinčha, Jesucristužquin kuz tjaachiž cjen Yooz yujcquiz ana ujchiz nižaza zuma cjesačha, jalla nii. Moisés lii jaru kamchiž cjen Yooz yujcquiz anapančha zuma kuzziz cjichuca.

²⁹ ¿Yoozqui judío zoñinacž Yooz alaja cjesajo? Anapančha. Yoozqui parti zoñinacž Yooz zakazza.

³⁰ Zinta Yoozqui žejlčha. Jalla niiž yujcquiziqui chimputa judío zoñinacami ana chimputa yekja wajtchiz zoñinacami Jesucristužquin kuz tjaachiž cjenkaz zuma cjesačha, ana ujchiz.

³¹ Jalla nižtquiztan nuž tjaajincan wejrqui, “Moisés liiqui anaž walčha”, ¿nuž cjian tjaajnojo? Anazal nižta tjaajnučha. Liiqui panž walčha, cjiwčha.

4

ABRAHAMŽ PUNTU

¹ Wejrnacqui Abrahamž majch maatinacquiztan tjoničhumačha. Tuquita atchi Abraham ejpž puntuquiztan, ¿kjaž cjii?

² Abrahamqui Moisés lii jaru kamtasaz niiqui Yooz yujcquiz ana ujchiz cjitasačha. Nižaza “Wejrtčha Yooz yujcquiz zumtqui” cjian čhi attasačha. Pero ana nuž čhi atatčha Yooz yujcquiziqui.

³ Cjiirta Yooz takuqui tuž cjičha: “Abrahamqui Yoozquin kuz tjaachičha. Jalla nižta kuz tjaatquiztan Yooz yujcquiz zumaž cjisičha, ana ujchiz”.

⁴ Tsjii zakal chiyučha. Jakziltat langznačhaja, jalla niiqui paca tanznaquičha. Nii pactaqui anačha onanta, pero langztiquiztan nižta pacta cjis waquizičha.

⁵ Pero jakzilta ujchiz zoñinacat ana čhulu paačcu, Yoozquin kuz tjaačhaja, jalla niiž kuz tjaatquiztankazza Yooz yujcquiz ana ujchiz, nižaza zuma kuzziz. Ujchiz cjianpacha kuz tjaatquiztan Yoozqui cjičha, “Nii zoñž uj pertunučha. Wejt yujcquiz ana ujchizza”.

⁶ Ana ħjulu paażcu nii kuz tjaaŋi ŷoŋiqi ana ujhiz cjissa. Jalla niżta kuz tjaaŋi ŷoŋ puntu David cġita tuqita ejpqui

⁷ tuż cjichiċha:

“Jakzilta ŷoŋinacż ujnacat Yooziż pertunta cjeċhaja, niżaza ninacż ujnacat Yooziż ana iya tjeeżta cjeċhaja cuntintuż cġila.

⁸ Niżaza jakzilta ŷoŋinacat ujnacqiztan Yooz Jiliriż ana casticta cjeċhaja, jalla nii ŷoŋiqi cuntintuż cġila”.

⁹ Nii Davidż ċhiitaqui ġec ŷoŋ puntuquiztantajo? ġChimputa ŷoŋinacż puntuquiztan alajakzkaya? ġUż yekja wajtċiz ana chimpupa ŷoŋinacż puntuquiztan jaa? Wejrqui cġiwċha pizcquiztanpachaċha. Abrahamqui Yoozquin kuz tjaachiż cjen Yooz yujcquiz ana ujhiz cjissiċha.

¹⁰ ġĤjulorquiztanpacha ana ujhiz cjissitaya? ġIma chimpuchiz cjen? uż ġchimpuchiz cjen jaa? Wejrqui cġiwċha, anaċha chimpuchiz cjen Yooz yujcquiz ana ujhiz cjissiqui, pero ima chimpuchiz cjen.

¹¹⁻¹² Ima chimpupa cġican Abrahamqui Yoozquin tjapa kuz tjaachiċha. Jalla niżtiquiztan Yooz yujcquiz ana ujhiz niżaza zuma cjissiċha. Jalla nii wiruŋ Yoozqui nii chimpupa lii mantichiċha tjeezjapa kuz tjaachiż cjen Yooz yujcquiz ana ujhizza, zuma kuzzizza, jalla nii tjeezjapa. Jalla niżtiquiztan Abrahamqui tjapa Yoozquin kuz tjaaŋinacżta ejpżtakazza, ana chimpupa ŷoŋinacżtami, niżaza chimpupa ŷoŋinacżtami. Jalla nuż pinsichiċha Yoozqui. Jakzilat kuz tjaachiż cjen Yooz yujcquiz ana ujhiz, niżaza zuma kuzziz cjisnaċhaja, jalla ninacaqui Abrahamż ultim majchmaatinaca cjequiċha. Uċhum Abraham ejpqui ima chimpupa cġican Yoozquin kuz tjaachiċha. Jakzilta chimpupa ŷoŋinacat Abrahamżtapacha Yoozquin kuz tjaaċhaja, jalla ninacaqui Abrahamż ultim majchmaatinaca cjequiċha. Chimpukat az ana walċha, Yooz yujcquiz zuma cjejajo.

YOOZIZ TJAATA TAKU

¹³ Yoozqui Abrahamżquizimi niiż majchmaatinacżquizimi compromitan taku tjaachiċha, ti muntuquiz cuntintuż cjequiċha, jalla nii. Abrahamż lii jaru kamtiquiztan Yoozqui ana niżta taku tjaachiċha. Pero Yoozquin kuz tjaachiż cjen niżaza zuma kuzziz cjen, Yoozqui niżta taku tjaachipanċha.

¹⁴ Moisés liichiz kamŋi ŷoŋinacaqui ti muntu irinsa tanznaċhaj niiqui, jalla niżtiquiztan Yoozquin kuz tjaazqui inakazza. Niżaza Yooziż tjaata taku anaż walkatċha. Pero anaċha niżta. Anaż jecmi nii lii jaru zuma kamasatċha.

¹⁵ Jaziqui lii jaru ana kamtiquiztan ŷoŋinacaqui casticta cġistanċha. Lii ana zejltaŷaċha, nekztan lii quintra ana kamtaŷaċha.

¹⁶ Jalla niżtiquiztan Yoozquin kuz tjaatiquiztankaz Yooz yujcquiz ana ujhiz, niżaza zuma kuzziz cjesaċha. Niżaza Yoozqui ŷoŋinacżquiz okziż cjen ŷoŋinaca ana ujhiz cġiskatċha. Jalla nii wali pajk favora paachiċha Yoozqui. Jalla nuż cjen Yooziż tjaata takuqui tirapanż walċha tjapa Abrahamż majchmaatinacżtaqui, Moisés liichiz ŷoŋinacżtami, ana Moisés liichiz ŷoŋinacżtami. Yooziż tjaata takuqui walċha tjapa Abrahamżtapacha Yoozquin kuz tjaachinacżtaqui. Abrahamqui tjapa uċhum Yoozquin kuz tjaachi ŷoŋinacż ejpżtakazza.

¹⁷ Jalla nużupanż cġijrta Yooz takuqui ċhiċha, tuż cġican: “Amqui wacchi nacionchiz ŷoŋinacż epim cjequiċha”. Jalla niżtiquiztan Abrahamqui uċhum ejpżtakazza, Yooz yujcquiziqui. Abrahammi uċhumnacami nii zinta Yoozquin kuz tjaachinċhumċha. Nii zinta Yoozqui ticzinacami jacatatskatċha, niżaza ana zejlŋinaca zejlzkatċha.

¹⁸ Abrahamżquiz Yoozqui cġichiċha: “Amqui wacchi nacionchiz ŷoŋinacż epim cjequiċha”. Jalla nii puntuquiztan zakaz Yoozqui Abrahamżquiz cġichiċha: “Jalla nuż amqui wacchi majchmaatinacċhiz cjequiċha”. Yooz taku criichiż cjen Abrahamqui wacchi majchmaatinaca tjew tjewziċha, ċhawcwacama. Tsjii ŷoŋinacż “Amiż tjaata Yooz taku ana cumplita cjesaċha” nuż ċhiċni cjenami Abrahamti tira tjewziċha, Yooz taku cumplispanż cġican.

¹⁹ Abrahamqui jos patac watchiz cjen ticz orquiztaċha. Ana majchchizpan cġichucataċha. Niżaza niiż maatakaqui ana zinta majtchucataċha. Jalla nuż pucultan ana majtchucata cġicanami, Abrahamqui Yoozquin anaċha upa kuzziz.

²⁰ Niżaza ana kuz turwayskatċiċha. Yooziż compromitta taku cumplis ora tirapan tjewziċha, cumpliscama. Tirapantaċha Yoozquin kuzziz. Niżaza Yooz honora waytican, ġuc’anti Yoozquin kuzziz cjissiċha.

²¹ Abrahamqui zizziċha, Yoozqui niiż compromitta taku ultimupan cumpli atasatċha. Jaziqui tirapan tjewznatċha, ana kuz paysnakżcu.

²² Jalla niżtiquiztan niżta Yoozquin kuz tjaatiquiztan Abrahamqui Yooz yujcquiz ana ujhiz cjissiċha, niżaza anċha zuma kuzziz.

²³ Jalla nuž Yooz tawk liwruquiz cjiirtatača. Nii cjiirtaqui anatača Abrahamž cjen alajakaz,

²⁴ učumnacaltajapa zakaz cjiirtatača. Jakziltat Yoozquin kuz tjaačhaj niiqui, Yooz yujcquiz ana ujhiz cjisnasača. Nii Yoozqui učum Jesucristo Jiliri ticziquiztan jacatatchičha.

²⁵ Jesucristuqui učum ujquiztan contatača; nižaza niž jacatatchiž cjen učumqui Yooz yujcquiz ana ujhiz nižaza zuma cjissinčumča, nižquin kuz tjaačhiž cjen.

5

YOOZQUIN KUZIZ ZOŃINACA

¹ Jalla nižtiquiztan Yooz yujcquiz ana ujhiz, nižaza zuma kuziz cjen, Yoozqui anača učum quintra. Jesucristo Jiliriz cjen, nižaza nižquiz kuziz cjen učumtan Yooztan walikazza.

² Jesucristužin kuziz cjen učumqui Yooz partiquiz luzzinčumča. Jalla nii partiquiz učumnacaqui panž žejlča. Jalla nuž žejlcan cuntintuž tjewža, Yooziž tjaata honora tanz ora, Yooztan honorchiz cjisjapa.

³ Nii Yooz zumanaca tjewžcan, učumqui cuntintučumča. Nižaza sufris želanaqui cuntintuzakazza. Sufrisquiztan pasinziz kuziz cjsisa. Jalla niiqui učumqui zizza.

⁴ Nižaza pasinziz kuziz žejltiquiztan Yoozquin tjurt'iñi kuzizpan yatisinsa. Jalla nekztan zumquin yatisinžcu, Yooz honora tjaaz ora tjewža.

⁵ Yoozqui niž Espiritu Santo učumnaca kuzquiz luzkatchičha. Nii Espiritu Santuqui učum kuzquiz luzcu, Yooz ancha zuma munaziñi kuz učumquiz intintiskatcha. Jalla nižtiquiztan Yooziž tjaata honora tjewžcan učumqui zizza, ultimquiziqui panž tanznaquiča, nii. Ana inakaz tjewznaquiča.

⁶ Učumpacha ujquiztan anatača liwriizuca. Jalla nižtiquiztan Yooziž pinsita timpuquiz Cristuqui ujhiz zoñinacž laycu ticziča.

⁷ Anaž jakzilta zoñimi tsjii zoñžtajapa pjasila ticznasača, zuma zoñi cjenami. Cunamit tsjii ancha zuma kuziz zoñžtajapa ticz pecačhani.

⁸ Yoozti niž zuma okzñi kuz tjeeziča, jalla tižta. Učumnaca ujhiz cjenami Yoozqui niž Majch Jesucristo cuchanžquichiča, učumnacaltajapa ticzjapa.

⁹ Jalla nižtiquiztan Yooz Majch ticziž cjen anziqui učumqui Yooz Ejpž yujcquiz ana ujhizza, nižaza zuma kuzizza. Jalla niic zuma razunača. Jaziqi učumqui zuma kuzizza. Jalla nižtiquiztan tiizakaz zuma razunača: Jesucristuž ticziž cjen učumqui ultim casticž tjuñquiziqui liwriitaž cjequičha Yooz casticžquiztan.

¹⁰ Tuquitan učumnacaqui Yooz quinratača. Jalla nuž Yooz quintra želanami, Yoozqui niž Majch cuchanžquichiča, zoñinacž laycu ticzjapa, zoñinacž pertunta cjeajajo. Jalla ni-iqui razunača. Nižaza anziqui učumqui Yooz pertuntača. Jalla nižtiquiztan učumtan Yooztan walikazza. Nižaza Yooz Majch jacatattiquiztan učumqui ultimquiziqui tjapa anawalinacquiztan liwriitapanž cjequičha, Yooztan wiñaya kamzjapa. Jalla niiqui zuma razunazakazza.

¹¹ Ultimquiziqui liwriitaž cjequičha. Nižaza anzimi liwriitazakaz učumqui. Jalla nižtiquiztan učumqui Yooztan tsjii kuziz cjan, cuntintučha, Jesucristo Jiliriz cjen. Jesucristuž cjen učumqui Yooziž pertunta cjissiča. Jalla nižtiquiztan učumtan Yooztan walikazza.

ADANŽTAN JESUCRISTUŽTAN

¹² Tsjiilla cjesača. Tsjii zoñiž cjen uj žejlča tii muntuquiz. Nižaza nii ujquiztan ticz žejlča. Nižaza tjapa zoñinacami uj paača. Jalla nuž uj paažcu, ticža.

¹³ Moisés liiž tuquiqui uj paazqui želatča tii muntuquiz. Pero ana liichizlaj niiqui, zoñinacaqui nii liiž quintra paata ujquiztan ana castičatača.

¹⁴ Adanž timpuquiztanpacha Moisés timpucama zoñinacaqui ticziča uj paatiquiztan. Jaknužt Adán primera uj paatčhaja, jalla nii uppacha ana paachiča parti zoñinacaqui. Jalla nuž cjenami yekja ujnaca paachiča. Adanqui tjonñi Jesucristužtakaz tjapa tii muntuquiz žejlñi zoñinacžquiz contajičha. Jalla nii puntuquiztan Adanžtan Jesucristužtan cassa.

¹⁵ Pero tii puntuquiztan anaž cassa. Adanž uj paatiquiztan anawalinaca žejlča. Cristuž ticztiquiztanžti zumanaca žejlča. Tsjii zoñiqui uj paachiž cjen tjapa zoñinacžquiz ticskatča. Jalla niičha Adanqui. Nižaza tsjii zoñiž cjenkaz walja zoñinacaqui ujquiztan liwriitacha. Jalla niičha Jesucristuqui. Jesucristuž cjen Yoozqui zoñinaca okziča. Zoñinacž ana okžta cjichuca cjenami, Yoozqui zoñinacžquiz okziča. Jalla nuž okztiquiztan Yoozqui Jesucristuž cjen zoñinaca liwriičiča niž yujcquiz ujhiz ana cjisjapa. Nužupanča.

¹⁶ Adanž uj paatiztan Jesucristuž liwriiñžtan anaž cassa. Punta puntaž zoñinacžquiz contajičha. Adanž zinta ujquiztan tjapa zoñinacaqui pjalžtača, casticta cjisjapa. Pero

Jesucristuž liwriitiquiztan walja žoñinacaqui Yooz yujcquiz ana ujchiz nižaza zuma cjissa, walja ujnaca paachiž cjenami. Jesucristuž cjenkaz niža cjissa.

¹⁷ Tsji žoñž ujquiztan tjapa žoñinacaqui ticstanča. Jalla niic razunača. Tiiqui tsjan zuma razunača. Jakziltat Jesucristuž cjen ujquiztan liwriita cječhaja, jalla niiqui Yooz yujcquiz ana ujchiz cjequičha. Nižaza ujquiztan ticziž cjenpacha, Yooztan wiñaya kamaquičha. Nižaza honorchiz cjequičha.

¹⁸ Jaziqi tsjii žoñž ujquiztan tjapa žoñinacaqui pjalžtača casticta cjisjapa. Nižaza tsjii žoñž ticzižquiztan tjapa žoñinacaqui ninacž ujquiztan pertunta cjesača, ninacž ujquiztan ana casticta cjeajajo, nižaza Yooztan wiñaya kamajo.

¹⁹ Yooz mantita ana cumplichiz cjen Adanqui tjapa žoñinacžquiz ujchiz cjiskatča. Jesucristuzti Yooz kuz cumplichiz cjen walja žoñinacžquiz Yooz yujcquiz ana ujchiz, nižaza zuma cjiskatča.

²⁰ Yoozqui Moisesquiz tsjii lii tjaachiča, žoñinacžquiz persun ujnaca kjanapacha tjeezjapa. Nii lii zizcuqui žoñinacaqui lii quintra juc'anti uj paachiča. Jalla nuž juc'anti uj paachiž cjenami, Yoozqui niiz okžni kuz žoñinacžquiz juc'anti tjeeziča Jesucristuž cjen.

²¹ Uj paažcu žoñinacaqui ticstanča, nižaza casticta cjistanča. Pero žoñinacž ujnacquiztan infiernuquin castictaž cjenpacha Yoozqui žoñinaca liwriichiča Jesucristo Jiliriz cjen. Žoñinacaqui Jesucristuž cjen Yooz yujcquiz ana ujchiz, nižaza zuma cjisnasača, Yooztan wiñaya kamzjapa.

6

EW KAMAÑA PUNTU

¹ Uj puntuquiztan yekjapanacaqui chiiñičha. Učhumqui tira uj paaz waquiziča, Yooz okžni kuz juc'anti tjeezta cjisjapa.

² Pero wejr cjiwča, anapanž uj paaz waquiziča. Tuquitan ticzi žoñinacžtakaztača učhumqui, anazum kamañchiz kamcan. Pero učhumž tuquitan anazuma uj paañi kamañquiztan jaytichinčhumča. Jalla nižtiquiztan uj paañi kamañchiz anapanž kamz waquiziča.

³ Tjapa učhumnacaqui, Jesucristužtan tsjii kuzziz cjissinčhumča. Bautistaž cjen nezk tjeezinčhumča. Jesucristuqui ticžcu, tjatztatača. Jalla niža irata učhumqui anazum uj paažnaca tjatz waquiziča. Jalla nii učhumnacaqui panž zizza.

⁴ Bautista cjiscu, nižaza Jesucristužtan tsjii kuzziz cjiscu, učhumnacaqui uj paañi kamañquiztan jaytichinčhumča. Nekztan zuma ew kamañchiz cjissinčhumča. Yooz Ejpqui persun aztan Jesucristo ticziquiztan jacatatskatchičha. Jalla niža irata Yoozqui učhumnaca anazuma kamañquiztan liwriichiča, zuma ew kamañchiz cjeajajo.

⁵ Jakziltat Jesucristužtan tsjii kuzziz cječhaja, jalla niiqui Jesucristužtan ticziča, anazum uj paañi kamañquiztan liwriita cjisjapa. Nižaza jakziltat Jesucristužtan tsjii kuzziz cječhaja, jalla niiqui Jesucristužtan jacatatchičha, ew zuma kamañchiz cjisjapa.

⁶ Jaknužt Jesucristuqui cruzquiz ch'awcta ticzižlaja, jalla niža irata učhumqui ticzižtakaz cjissiča uj paaz pecni kuzquiztan. Jalla nižtiquiztan učhum anazum uj paaz pecni kuzqui nužquiz ana azziz cjissiča. Nižaza nii uj paaz pecni kuzqui ana iya mantasača učhum kuzquizpacha. Jalla nii učhumqui panž zizza.

⁷ Jakziltat uj paaz pecni kuzquiztan ticzi cječhaja, jalla niiqui uj paañi kamañquiztan liwriita cjequičha.

⁸ Nižaza jakziltat Jesucristužtan tsjii kuzziz cjissiz cjen uj paañi kamañquiztan liwriita cječhaja, jalla niiqui ew kamañchiz cjequičha, Jesucristužtakaz. Nižaza Jesucristužtan čica kamaquičha. Jalla nii razuna cričinčhumča.

⁹ Jesucristuqui ticziquiztan jacatatchičha. Jalla nižtiquiztan ana wilta ticznaquičha, nižtaqui ana iya ticz žejlča.

¹⁰ Jesucristuqui žoñinacž ujquiztan ticziča, tsjii wilta. Ana wilta ticznaquičha. Jaziqi žejtča, nižaza Yooztajapa kamča.

¹¹ Jalla nižtiquiztan ančhucqui cjuñžna, uj paañi kamañquiz liwriitaž, nii. Jaziqi Jesucristo Jiliriz cjen Yooztajapa ew kamañchiz kamla.

¹² Uj paaz pecni kuzqui ana mantiskata, anazumanaca paajo.

¹³ Nii uj paaz pecni kuzqui curpu mantis pecčhaj niiqui, panž ewjasa. Pero ančuca curpu zuma paažjapa, nižaza Yooz sirwizjapa kuz tjaa. Ančhucqui anazum uj paañi kamañquiztan liwriita cjiscu ew zuma kamañchiz cjissinčhumča. Jalla nižtiquiztan ančhucqui Yooz kuzcama kamajo Yooz mantuquiz cjee, tjapa curpumi, nižaza kuzmi.

¹⁴ Ančhucqui anača iya Moisés lii mantuquiz. Okžni Yooz mantuquiza ančhucqui. Jalla nižtiquiztan nii uj paaz pecni kuzqui ana mantiskata.

¹⁵ ¿Kjaž cjesajo? Moisés lii mantuquiz ana žejlcan, nižaza okzñi Yooz mantuquiz žejlcan, žuj paañi kamañchiz zelasajo? Anapanž cjesača.

¹⁶ Jakziltat tsjii žoñž mantuquiz žejlčhaja, jalla nii patrunž mantitanaca caspanikazza. Jalla nižta irata jakziltat uj paaz pecñi kuz mantuquiz žejlčhaja, ujnaca paasača; jalla nekztan Yooziž castictaž cjequičha. Nižaza jakziltat Yooz mantuquiz žejlčhaja, jalla niiqui Yooz kuzcama cumplis waquiziča. Jalla nekztan tsjan tsjan zuma kamañchiz cjequičha. ¿Nii ana ziz ančhucjo?

¹⁷ Tuquiqui ančhucqui uj paaz pecñi kuz mantuquiz žejlñitača. Nekztan Yooz puntu zuma werar razunanacaqui ančhucquiz tjaajintatača. Jaziqui jalla nii tjaajintanac jaru tjapa kuztan kamča. Jalla nižta ančhucua zuma kamañchiz cjen Yoozquin gracias cjican chiyučha.

¹⁸ Jalla nižtiquiztan nii uj paazquiztan liwriitača ančhucqui. Nižaza zumanaca paazjapa tjapa kuz tjaachinčhucča. Yooz manta paaz cjissinčhucča.

¹⁹ Žoñž wirquiztan punta punta chiyučha, Yooz puntu intintazkatzjapa. Ana nižta chiitasaz niiqui, ančhucqui anaž intintaztasacha. Tuquiqui ančhucqui uj paaz pecñi kuz mantuquiz želatča, ujnaca paacan. Jalla nuž žejlcan juc'anti juc'anti uj paachinčhucča. Jaziti Yooz mantuquiz tsjan tjapa kuztan žela, tsjan zumanaca paazjapa. Jalla nuž žejlcan Yooztakaz tsjan tsjan zuma kuzziz cjisnaquičha.

²⁰ Tuquiqui ančhucqui uj paaz pecñi kuz mantuquiz žejlcan, zumanaca paazjapa ana importičha.

²¹ Jalla nuž kamcan, ančhucaltajapa čhjul walitajo? Jaziqui ančhucuaž tuquita paatanacquiztan ančhucaltajapa azipanča. Jalla nižta anazum kamchi žoñinacaqui wiñayjapa Yooziž castictapanž cjequičha.

²² Pero ančhuczi nii anazum uj paañi kamañquiztan liwriitača. Yooz mantuquiz cjissinčhucča. Jalla nižtiquiztan ančhucqui tsjan tsjan zuma kamañchizza. Nižaza Yooztan wiñayaž kamaquičha.

²³ Jakziltat anazum uj paañi kamañquiz kamčhaja, jalla niiqui Yooziž castictaž cjistanča. Nuž waquiziča. Pero Yoozqui žoñinacžtajapa tsjii pajk favora paachiča, žoñinacž ana waquizan. Nužukaz paachiča niiz zuma okzñi kuzziz cjen. Jaziqui jakziltat Yooziž liwriita cjechaja, jalla niiqui Jesucristo Jiliriz cjen Yooztan wiñayaž kamaquičha.

7

LII PUNTU

¹ Moisés lii zizñi jilanaca, cullaquinaca, ančhucqui zizza, ima ticzcan, žoñinacaqui Moisés lii mantuquiz žejlča.

² Nižaza tsjaa maatakqui zalz kamz lii mantuquiz žejlča, naaža lucu ticzcama. Naaža lucuž ticznaquiz niiqui, nekztan naaqui nii lucutiñi kamañ liiquiztan liwriitača.

³ Jaziqui naaža persun lucu žetan, naaqui yekja luctakžtan želaquiz niiqui, jalla naaqui adulterio paacha. Naaža lucu ticznaquiz niiqui, jalla nekz lucutiñi kamañ liiquiztan liwriitača. Jalla nižtiquiztan yekja lucžtan zalžnanami, anaž adulterio cjesača.

⁴ Wejt jilanaca, cullaquinaca, jalla nižta iratača Moisés lii puntuquiztanaqui. Jesucristuqui ančhucua ujnacquiztan ticziča. Niiz cjen ančhucqui Yooz yujcquiz ana ujchizza, zuma kuzzizza. Moisés lii mantuquiz žejlcan, anapan zuma kuzziz cjisñi atchucatača. Jaziqui ančhucqui ticzi žoñžtakazza nii lii puntuquiztan. Jalla nižtiquiztan yekjaž mantuquiz žejlča, Jesucristuž mantuquiz, tsjii yekja lucžtan zalzižtakaz. Jesucristuqui ticziquiztan jacatatačiča, ančhucuaž Yooztajapa zumanaca paajo.

⁵ Tuquiqui učhum persun kuzcama kamcan, učhum uj paaz pecñi kuzqui učhumnacaquiz mantiñitača, ujnaca paajo. Jalla nižta ujnaca paatiquiztan infiernuquin Yooziž casticta cjhucatača. Moisés liiquiz “Anača uj paazqui” cjican cjenami učhum uj paaz pecñi kuzqui juc'anti uj paazquin učhum chjitchičha.

⁶ Ima Jesucristužquin kuz tjaacan, jalla nižta kamchinčhumča. Pero jaziqui učhumqui Moisés liiquiztan liwriitača. Tuquita nii liiz mantuquiz učhum želatča, preso tanta žoñžtakaz. Anziqui Espiritu Santuž mantuquiz žejlča. Niiqui učhumnacaquiz ew kamaña tjaachiča.

¿JECT WEJR YANAPASAJO, ZUMA PAAZJAPAJO?

⁷ Jaziqui ¿kjažu cjeequi? ¿Moisés liiqui anawalejo? Anapanž cjesača. Moisés lii mantuquiz ana kamtasaz niiqui, wejrqui wejt ujnaca anal pajkattasača. Moisés liiquiz “Anača zmazñi kuzziz cjee” cjiča. Nekztan wejt zmazñi kuz zuma pajchinča.

⁸ Moisés liiquiz nižta mantita cjen, wejt uj paaz pecñi kuzqui tjapamana zmaz pinsičičha. Nii lii quintra ancha paaz pecatča. Pero nii liiqui ana žejltasaž niiqui, jalla nižtiquiztan nii zmazquj anaž pajta cjitasakalča.

⁹ Ima Moisés lii pajcan, cuntintul kamchincha. Nekztan Moisés lii mantitanaca pajtiquiztan wejt ujnaca pajchincha, nižaza juc'anti uj paachincha. Jalla nižtiquiztan persun kuzquiz weriž paata uj zint'ican, llaquita žejlchintača. Wejt persun uj paatiquiztan Yooz castictal cjis waquizuča.

¹⁰ Wejrqui Moisés lii jaru zumpacha kamtučaja, jalla nekztan Yooztan cuntintu kamtasacha. Pero nii Moisés lii jaru ana zuma kami atchincha. Jalla nižtiquiztan nii liiž cjen wejtquiz tježtača, wejr castictal cjis waquizuča, jalla nii.

¹¹ Moisés liiquiz mantitanaca žejlča. Nii mantitanacaqui zizcuqui wejt uj paaz pecni kuzqui juc'ant uj paaz pecchiča. Anapan nii lii jaru kami atuča. Incallta cjissinča. Nii lii jaru ana kamtiquiztan, Yooz casticta cjichucatača.

¹² Moisés liiqui Yooziž mantitatača. Jalla nižtiquiztan ancha zumača nii liiqui. Nižaza nii liiquiz mantitami ancha zumapanča, nižaza Yooz kuzcamača, nižaza wejtta waliča.

¹³ Nii liiqui wejtta wali zumažlaj niiqui, žkjažtiquiztan nii liiž cjen Yooz casticta cjis waquizasajo? Nii liiqui zumača. Pero nii zuma lii zizcuqui, wejt uj paaz pecni kuzqui juc'anti ana wal uj paaz pecchiča. Jalla nekztan wejt quintra Yooz casticž žejlča. Jalla nižtiquiztan tježtača, wejt uj paaz pecni kuzqui ana zumapanča, nii. Nižaza Moisés lii quintra paatiquiztan tsjan juc'ant anazumaž cjissa wejt uj paaz pecni kuzqui.

¹⁴ Učhumqui zizza, Moisés liiqui Yooz Espiritu Santuž kuzcamača. Wejrzi persun kuzcama kamz pecuča. Jalla nižta kamcan wejt uj paaz pecni kuz mantuquiz želuča.

¹⁵ Žkjažtiquiztan nižta ana zuma paatojo? Anal intintazuča. Jesucristužquin kuz tjaazcu, jalla nekztanpacha zuma paaz pecni kuzciz cjissinča. Jalla nižta kuzciz cjenami, uj paaz pecni kuzcizpanča. Zuma paaz peccumi, anal zuma payi atuča. Ana pecta uj paaz zuma, jalla niikal wilta paa-uča.

¹⁶ Jalla nižta paachiž cjenaqui, wejrqui pajuča, Moisés liiqui zumača, jalla nii.

¹⁷ Ana zuma paacanami wejt kuzquiz zuma paaz pecuča. Jalla nižtiquiztan wejrpacha nii anazuma paatanaca anal iyal paaz pecuča. Pero wejt uj paaz pecni kuzqui nii ana zuma paatanaca paakatča.

¹⁸ Wejt uj paaz pecni kuzqui ana zumapanča. Yooz aztankaz zuma payi atasacha. Wejrqui zuma paaz pecanami, wejt persun aztan nii zuma paazqui anal atuča. Weriz kamtiquiztan nii razuna zizni cjissinča.

¹⁹ Wejrqui weriz zuma paaz pectanacaqui anal paa-uča. Antiz weriz ana paaz pectanacaqui, nii ana zumanacal paa-uča.

²⁰ Jalla nižta ana weriz pectanaca paacan, wejrpacha ana nižta paa-uča. Pero wejt uj paaz pecni kuzqui nižta anazuma paakatča.

²¹ Jalla nižtiquiztan wejtquiz nižtapan žejlča. Zuma paaz pecanami, wejt uj paaz pecni kuzkaz mantiz pecča.

²² Wejt kuzquizpacha Yooz kuzcamapan paaz ancha pecuča.

²³ Jalla nuž cjenami uj paaz pecni kuzciztča. Wejt curpu mantiz pecča. Jalla nižtiquiztan wejt uj paaz pecni kuzqui wejt zuma paaz pecni kuz quintrača. Wejrqui anazuma paacan wejt uj paaz pecni kuz mantuquiz želuča. Nižaza nii uj paaz pecni kuzqui wejt curpu mantiča. Weriz kamtiquiztan nii razuna zizni cjissinča.

²⁴ Ana waliča wejrqui. Jalla nižtiquiztan žjequit tii ana zuma paañi curpuquiztan wejr liwriyaquiyay? ŽTii casticzkatni curpuquiztanya?

²⁵ Yoozquin gracias cjican, chiyuča, učhum Jesucristo Jiliriča wejt liwriiñiqui. Wejrpacha tjapa wejt zuma paaz pecni kuztan Yooz kuzcama kamuča, wejt uj paaz pecni kuz uj paaz pecanami.

8

ESPIRITU SANTO KUZQUIZ ŽEJLCHA

¹ Jesucristuž partiquiz žejlñi žoñinacaqui ana Yooziž casticta cjequiča. Ninacaqui Yooz Espiritu Santuž kuzcama kamča; uj paaz pecni kuzcama ana kamča.

² Jesucristuž cjen wejrqui Espiritu Santuž mantuquiz želuča. Espiritu Santuž cjen ew kamañchiz kamuča. Nii Espiritu Santuqui uj paaz pecni kuz mantuquiztan wejr liwriichiča. Uj paaz pecni kuz mantuquiz tira žejltasaž niiqui, Yooziž wiñaya casticta cjitasača.

³ Žoñinacž uj paaz pecni kuz mantuquiz žejlcan, Moisés lii jaru ana kami atchiča. Jalla nižtiquiztan Yoozqui niž persun Majch cuchanzquichiča. Ujchiz žoñiztakaz curpuchiz kamchiča. Pero ana ujchizza niiqui. Žoñž curpuchiz cjican, ujchiz žoñinacž laycu ticziča. Jalla nuž cjen Jesucristuqui ujchiz žoñinacž cuntiquiztan casticta cjissiča, Jesucristužquin kuzciz žoñinaca ana casticta cjeajajo.

⁴ Moisés liiquiz Yooz kuzcama kamzqui mantitácha. Jakziltat uj paaz pecñi kuz mantuquiz kamčhaja, jalla niiqui Yooz kuzcama ana kamčha, nižaza Moisés liicama ana kamčha. Pero jakziltat Yooz Espiritu Santuž mantuquiz kamčhaja, jalla niiqui Yooz kuzcama kamčha.

⁵ Jakziltat persun uj paaz pecñi kuzcama kamčhaja, jalla niiqui persun pinsitanacžquikaz kuz tjaacha. Pero jakziltat Espiritu Santuž kuzcama kamčhaja, jalla niiqui Yooz Espiritu Santuž pinsitanacžquiz kuz tjaacha.

⁶ Jakziltat uj paaz pecñi kuz pinsitanacžquiz kuz tjaachaj niiqui, Yooziz wiñaya castictaž cjequičha. Pero jakziltat Espiritu Santuž pinsitanacžquiz kuz tjaachaj niiqui, Yooz kamañchiz kamaquičha, nižaza Yoozantan nižtan walikaz cjequičha.

⁷ Jakziltat persun anazum kuzcamakaz kamz pecčhaja, jalla niiqui Yooz quintračha. Yooz kuzcama anapanž kamz pecčha, nižaza anapanž atčha.

⁸ Jakziltat persun kuzcamakaz kamz pecčhaja, jalla nuž kamtiqiztan Yoozqui anapančha cuntintu.

⁹ Ančhuczi persun kuzcamakaz anaž kamčha. Yooz Espiritu Santuž ančhuca kuznacquiz žejlchiž cjen, ančhucqui Espiritu Santuž kuzcama kamčha. Jakziltat ana Jesucristuž Espirituchizlaja, anačha Jesucristuž partichiz žoñiqui.

¹⁰ Jesucristuž ančhuca kuznacquiz žejlchiž cjen Yooz yujcquiz ana ujhizčhucčha, nizaza zuma kuzzičhucčha. Nižaza ančhuca animunacaqui ew zuma kamañchizza. Uj paachiž cjen ančhuca curpunacaqui ticznaquičha. Jalla nuž cjenami ančhuca animunacaqui Yoozantan wiñaya kamčha.

¹¹ Yooz Ejpqui niž Espiritu Santuž cjen Jesucristo ticziqiztan jacatatskatchičha. Nii Yooz Espiritu Santuž ančhuca kuzquiz žejlčha. Jalla nižtiqiztan Yooz Ejpqui niž Espiritu Santuž cjen ančhuca ticzi curpunaca zakaz jacatatskataquičha.

¹² Jilanaca, cullaquinaca, tsjii mantuquiz kamspančha učhumqui. Anačha uj paaz pecñi kuz mantuquiz kamzqui, persun kuzcamakaz paazjapa. Pero Yooz Espiritu Santuž mantuquiz kamsa.

¹³ Jakziltat persun kuzcamakaz kamchiž cječhaja, jalla niiqui Yooziž wiñaya castictaž cjequičha. Pero jakziltat Espiritu Santuž mantuquiz žejlčhaja, jalla niiqui uj paaznaca jaytičha. Jalla nuž ujnaca jaytičiz cjen, Yooz kamañchiz kamaquičha.

¹⁴ Jakziltat Yooz Espiritu Santuž irpita cječhaja, jalla niiqui Yooz maatičha.

¹⁵ Ančhucqui Yooz maatinacžhucčha. Jaziqiu Espiritu Santuž ančhuca kuznacquiz luzziž cjen, ana Yoozquiztan eksñi kuzzizza. Espiritu Santuž cjen, “Učhum Yooz Tata”,

¹⁶ jalla nuž cjan učhum kuznacaqui čhičha. Nižaza kuzquiz sint'iskatčha, učhumčha Yooz maatinacaqui, jalla nii.

¹⁷ Nižaza Yooz maatinacaž cjen Yooziž tjaata zuma irinsa tanznaquičha, jalla nii irinsačha Yoozantan wiñaya kamzqui, Jesucristužtan čhica. Tii muntuquiz kamcan Jesucristužqui sufrichičha. Učhumqui Jesucristužquiz sirwichiž cjen zakaz sufraquiž niiqui, nekztan arajpachquin nižtan čhica honorchiz cjequičha.

¹⁸ Tii timpuquiz sufrinacaqui anačha anča. Čjuñzna, Yooziž tjaata honoračha anča zuma. Jalla nuž čjuñznučha wejrqui. Jesucristuž tjonž tjuñquiziqui učhumnacaqui zuma honorchiz cjequičha. Jalla nii tjeěžtaž cjequičha.

¹⁹ Tjapa tii muntuquiz žejlñinacaqui ančaž tjewža, Yooz maatinacž honora tjeez tjuñi.

²⁰ Adanž uj paatiqiztan tjapa tii muntuquiz čhjultakimi inakaz čjisičha. Yooz munan jalla nuž čjisičha. Anačha juyztokaz inakaz čjisičha. Pero tsjii noojiqui tii muntumi tii muntuquiz žejlñinacami anawalinacqiztan liwriitaž cjequičha. Jalla nii tjuñi tjewža.

²¹ Jalla nii noojiqui tii muntumi tii muntuquiz žejlñinacami tjapa ana walinacqiztanami liwriitaž cjequičha. Ticzmi anawali watñinacami ana želaquičha. Liwriitiqiztan tii muntumi tii muntuquiz žejlñinacami liwž zumacama cjiskattaž cjequičha, jaknužt Yooz maatinacaqui zumapan cjiskattaž cječhaja, jalla nižta irata.

²² Adanž timpuquiztanpacha tii timpucama tjapa tii muntuquiz žejlñinacaqui sufrichičha jaknužt tsjaa ic maataka majt ora sufrichičha, jalla nižta anča ayincan žejlčha.

²³ Učhum kuzquiz zakaz anča sufrichičha, Espiritu Santužiz cjenami. Nii Espiritu Santuž tsičha zuma adelanto učhum kuzquiz žejlčha. Jalla nuž cjen učhumqui anča tjewža, juč'ant tsjan zuma kamañchiz cjisjapa. Učhumqui Yooz maatinacaž cjitiquiztan nii zuma kamañchiz cjisnaquičha. Nižaza učhum Yooz maatinaca cjan, ew curpuchiz cjisnaquičha.

²⁴ Jalla nuž učhumnacaqui tjewža liwriitaž cjen. Čjulunacat čertčhaja, jalla nii čertanaca ana tjewža cjequičha. ¿Jec žoñit čertanaca tjewžnasajo?

²⁵ Učhumnacaqui ana čertanaca tjewža. Yoozquiztan tjonñi zumanaca tjewža. Jalla nižtiqiztan pasinziz kuztan tjewstančha.

²⁶ Jaknužt učhum zuma tjewzqui sufris awantizjapa yanapčhaja, jalla nižta irata Yooz Espiritu Santuqu učhum yanapčha tjurt'iñi kuzziz cjisjapa. Učhumqui Yoozquiztan jaknužt mayiziz waquizichaja, ana zizza. Jalla nižtiquiztan Yooz Espiritu Santupacha učhumnacalta ancha mayižinñičha, nižaza niipachaž ancha sint'ičha učhumnacalta. Nii Espiritu Santuž mayižintaqui zoñž tawkžtan ana chiita cjesača.

²⁷ Espiritu Santuqu criichi zoñinacžta mayižinñičha Yooz Ejpž kuzcamakaz. Jalla nuž mayižinan kuzquiz zizñi Yooz Ejpqui nii Espiritu Santuž kuzquiz pinsitanaca zizza. Jalla nižtiquiztan Yooz Ejpqui Yooz Espiritu Santuž učhumnacalta mayižintanaca zizza.

YOOZ EJPQUI NIIZ MAATINACZTAN ANCHA MUNAZIČHA

²⁸ Yoozqui niž pinsitacama zoñinaca kjawzičha, niž maati cjiskatajo. Jalla nii kjawžta zoñinacaqui Yooztan zuma munazičha. Jalla nii munazita zoñinacžta Yoozqui čhjulul cjenami mantičha ninacžta zuma cjisjapa. Učhumqui nii zizza.

²⁹ Yoozqui tuquitanpacha zizzičha, jecnacat niž maatinaca cjisnačhaja, jalla nii. Nižaza tuquitanpacha Yoozqui niž maatinaca utchičha, niž zinta Majch irata cjisjapa, jalla nižta zuma cjisjapa. Jalla nuž Yoozqui pinsichičha, niž zinta Majchqui jilir jila cjisjapa, tjapa Yoozquin criichi zoñinacžquiztan juc'ant honorchiz cjisjapa.

³⁰ Yooz Ejpqui jecnacat niž maatinaca cjisnačhaja, nii pinsichičha. Ninaca kjawzizakazza. Nižaza Yoozqui jecnacat kjawzčhaja, jalla ninaca ana ujhiz cjiskatčha. Nižaza Yoozqui jecnacat ana ujhiz cjistčhaja, jalla ninaca juc'ant zuma kamañchiz cjiskatčha.

³¹ Tjapa nii puntuquiztan učhumqui, ¿kjaž iya cjequejo? Yoozqui učhumnacaltajapapančha. Jalla nižtiquiztan ¿ject učhum atipasajo? Anaž čhjulumi.

³² Yoozqui niž zinta Majch ana chjojchičha, antiz učhumnacaltajapa utchičha, učhum laycu ticzjapa. Jalla nuž niž zinta Majch utchiž cjen učhumnacaquiz tjapa niž zumanaca zakaz tjaaquičha, juc'ant zuma kamañchiz kamajo.

³³ Nižaza Yooz illzta zoñinacžjapa anaž jecmi uj tjojtnasačha. Yoozpacha ninaca ana ujhiz cjiskatchičha.

³⁴ Jalla nižtiquiztan ¿ject Yooz illzta zoñinacžquiz “Casticta cjistančha” cjican chiyasajo? Anaž jecmi. Jesucristučha ninacž laycu ticziqui. Nekztan ticziquiztan jacatatchičha. Anziqui Yooz Ejpž žew kjarquiz žejlčha, tjapa mantican. Jalla nii Jesucristupachačha učhumnacalta tjurt'ižinñiqui.

³⁵ Čhjulunacž watanami Jesucristuqui učhumnacatan munazičha: sufris watanami, llaquinaca watanami, chjaawjkatñi watanami, mach'a watanami, ana zquiti žejlž watanami, ana waliž tjonanami, ana wali ticz watanami, čhjulunacaž watanami Jesucristuqui učhumnacatan munazičha.

³⁶ Cjijrta Yooz takuqui tuž cjičha:

“Yooz partiquiz žejlčhiž cjen učhumnacaqui sufrican sufrican zapuru ticzmayažtakaz žejlčha. Učhum quintra zoñinacaqui tantičha, criichi zoñinacaž contaj cjila, cjican. Conz uuzanacažtakaz učhumnacaquiz nayčha”.

³⁷ Pero čhjulunacaž watanami Jesucristuqui učhumnacatan panž munazičha. Nižaza čhjulunacaž watanami učhumnacaqui Jesucristuž cjen tjapa nii anawalinacžquiztan atipaquičha.

³⁸ Anaž čhjulumi Yooz učhumnacatan ana munazizkati atasacha: anaž ticzmi, anaž žetimi, anaž anjilanacami, anaž mantinñinacami, anaž poderchiznacami, anaž anztan žejlñinacami, anaž jaztan žejlñinacami,

³⁹ anaž tsewcta poderanacami, anaž tii yokquiz žejlñi poderanacami, anaž čhjul paatanacami Yooz učhumnacatan ana munazizkati atasacha. Yoozqui učhumnacatan panž munazičha, učhumnacatan Jesucristo Jiliržtan tsjii kuzziz cjen.

9

JUDIO WAJTCHIZ ZOÑINACA

¹ Tsjilla cjesača. Jalla tii puntuquiztan wejrqui zuma razunapal cjiwčha. Jesucristužquiz kuzziz cjen razunal chiyučha, anal toscara chiyučha. Espiritu Santuqui wejt kuz zizza. Lijituma cjiwčha.

² Ancha llaquizučha, nižaza wejt kuzquiz anchal cjuñznučha wejt judío wajtchiz zoñinacžquiz.

³ Wejt judío zoñinacaqui Jesucristuž partiquiz cjiskattasaž niiqui, wejrqui Jesucristužquiztan t'akžtacama cjis pectasačha. Nižaza wejrqui ninacž laycu infernuquin castictacama cjitasacha. Ninacaqui wejt parti zoñinacačha.

⁴ Israel majchmaatinacquiztan tjonchiž cjen, ninacaqui Yooz illzta zoñinacačha. Yoozqui judío zoñinacžquiz persun honora tjeezičha. Nižaza Yoozqui judío zoñinacžtan acuerdunacquiz luzzičha. Nižaza Yoozqui Moisesquiz lii tjaachičha ninacžtajapa. Nižaza Yoozqui,

jaknužt nižquiz sirwiz waquzičhaja, jalla nii cuzturumpinaca ninacžquiz tjaachiča. Nižaza tuqui timpuquiz Yoozqui ninacžquiz takunaca tjaachiča, jaztanaqui tsjii Liwriiñi tjonaquičha, nii.

⁵ Učhum judío zoñinacž tuquita atchi ejpnacaqui Yooziž illztatača. Jaziqui učhum judío zoñinacž majchmaatinaciztan tjonñitača Cristuqui. Nekztan zoñž curpuchiz cjsiŕiča. Cristučha tjapa mantiñi Yoozpachaqui. Nižaza wiñaya honorchiz cjila. Nužoj cjila. Amén.

⁶ Tjapa Israel cjita tuquita ejpž majchmaatinacaqui anača ultim lijitum Israel wajtchiz zoñinaca, nižaza anača Yooz wajtchiz zoñinaca. Tjapa judío zoñinacami ana Yooz maatinacaž cjenami, Yooz takuqui cumplissičha.

⁷ Nižaza tjapa Abrahamž majchmaatinacaqui anača ultim lijitum Abrahamž famili-aqui. Cjijrta Yooz takuqui Abrahamž puntuquiztan tuž cjiča: “Am ultim majchmaatinacaqui am majch Isaacžquiztan okaquičha”.

⁸⁻⁹ Jaziqui wejrqui cjiwčha, tjapa Abrahamžquiztan ojkñi majchmaatinacaqui anača ultim Yooz maatinaca, nii. Yoozqui Abrahamžquiz taku tjaachiča, tuž cjican: “Weriž čhiita timpuquiz quejžpčaca, wejt taku cumplizjapa. Jalla nii weriž quejžpžquizcama am Sara cjeti tjunqui tsjii majch mataquičha”. Nekztan Abrahamqui nii taku catokčičha. Nižaza Yoozqui tjapa niž taku catokñi zoñinacžquiz nayčha, ninacaqui ultim lijituma Abrahamž majchmaatinacača, nii.

¹⁰ Tsjilla cjesača nii puntuquiztan. Učhum Isaac tuquita atchi ejpqui Rebeca cjeti tjunchizza. Nii lucutiñiqui pucultan majchnacchiztača.

¹¹⁻¹³ Nii pucultan ocjalaž ima matan, nižaza ima zuma ana zuma paan, Yoozqui Rebecaquiz cjičiča, tuž cjican: “Am jilir majchqui niž majchmaatinacžtanpacha niž lajkžquiz piyunanaca cjequičha niž lajkž majchmaatinacžquizpacha”. Nižaza cjijrta Yooz takuqui tuž cjiča: “Jacob pecchinča. Esau ana pecchinča”. Jaknužt Yooz pinsitčhaja, jalla nuž illziča. Paatanacquiztan jama ana illziča Yoozqui. Pero niž pectacama illziča, nižaza kjawziča niž partiquiz cjsjapa.

¹⁴ Jalla nii puntuquiztan čkjaž iya cjequejo? ČYooz ana lijituma paajo? Anaž cjesača. Yoozqui lijituma panž pača.

¹⁵ Yoozqui Moisesquiz cjičiča, tuž cjican: “Wejt munañpacama wejt okžñi kuz tjeeznuča, nižaza wejt munañpacama favora paaznuča”.

¹⁶ Ana zoñž munañpacama, nižaza ana zoñiž langžtacama Yoozqui okža. Pero Yoozqui persun kuz munañpacama okža.

¹⁷ Cjijrta Yooz takuqui tuž cjiča: Yoozqui Egipto nación chawc jiliržquiz cjičiča: “Wejrqui am utchinča chawc jiliri cjsjapa. Jalla nuž am utchinča, am quintra wejt azi tjeezjapa, nižaza tjapa tii zoñinacžquiz weriž paata quintu mazta cjsjapa”. Jalla nuž cjičiča Yoozqui.

¹⁸ Yoozqui persun kuz munañpacama okža, nižaza persun kuz munañpacama zoñinacž chojruzakaz cjskatča. Jalla nižta kjanapachača.

¹⁹ Cunamit tsjiiqui cječhani, tuž cjican:

–Jalla nižta cjen, čkjažtiquiztan Yoozqui zoñinacž ujquiztan casticaquejo? ČJec zoñit Yooz pinsita quintra kamasajo?

²⁰ Jalla nižta čhiñižquiz pewcznača, čject amjo Yooz quintra ch'aazjapajo? ČTsjii ojchqui niž paañižquiz chuchasajo, “ČKjažtiquiztan wejr nižta paajo?” cjicanajo?

²¹ Tsjii ojch paañiqui čhjulumi paasača ljocquiztanauqui. Ljocquiztan paasača tsjii anča c'achja ojchlla pijjztanacžquiz joojoota cjsjapa. Nižaza ana zuma čeechi ojch paasača, zapuru joojoota cjsjapa.

²² Jalla nižta iratača Yoozqui. Yoozqui tsjii zoñinaca utčiča, casticta cjsjapa. Jalla nuž utčiča, niž azi tjeezjapa, nižaza niž uj quintra zawjz tjeezjapa. Jalla nuž tjeezñi peccanami Yoozqui pasinziz kuztan nii ana wal zoñinaca awantiča, casticž tjuñicama.

²³ Nižaza Yoozqui yekjap zoñinaca utčiča, niž okžta cjsjapa. Tuquitanpacha nii zoñinaca tjacziča, arajpachquin zuma honorchiz cjsjapa. Nižaza Yoozqui nii zoñinacžtan okžñi kuztan žejlča, niž juč'ant okžñi kuz tjeezjapa.

²⁴ Učhum zakaz Yoozqui kjawziča, niž okžta zoñinaca cjsjapa. Judío wajtchiz zoñinacami ana judío wajtchiz zoñinacami, tjapa učhumqui Yooz okžta zoñinacžchumča.

²⁵ Jalla nii puntuzakaz Yoozqui Oseas cjijrta liwruquiz tuž cjiča:

“Ana Yooziž illzta zoñinacaqui Yooziž illzta zoñinaca cjequičha. Nižaza tuqui ana pecta zoñinacaqui anziqui Yooziž pecta cjequičha”.

²⁶ Nižaza tuquiqui judío zoñinacaqui cjičiča: “Ančhucča anaž Yooz wajtchiz zoñinacaqui”. Pero tii timpuquiz nii iñarta zoñinacaqui “zejtñi Yooz maatinacaž cjequičha”.

²⁷ Israel zoñinacž puntuquiztan Isaias profetaqui tuž cjičiča: “Israelž majchmaatinacaqui anča tama želaquičha, kot at pjilažtakaz, jalla nižta miraquičha. Jalla nuž mirchi cjenami, tsjii kjaž zoñinacakaz liwriitaž cjequičha.”

²⁸ Yooz Jiliriqiu tii muntuquiz žejlñi žoñinacžquiz niiz čhiita taku cumplaquičha, panž apura cumplaquičha”.

²⁹ Jalla nii puntuzakaz Isaías profetaqui mazinchiča tuž cjan: “Walja azziz Yooz Jiliriqiu tsjii učum majchmaatinaca ana liwriitasaž niiqui, tjpapacha ticztasača Sodoma wajtchiz žoñinacažtakaz, nižaza Gomorra wajtchiz žoñinacažtakaz”.

JUDIO ZOÑINACAQUI UJQUIZ TJOJ TSA

³⁰ ¿Kjaž cjequejo nekztanajo? Tuquiqui ana judío žoñinacaqui ana importichiča Yooz yujcquiz ana ujchiz cjisjapa. Jaziqiu Jesucristužquin kuz tjaachiž cjen Yooz yujcquiz ana ujchiz cjissiča.

³¹ Nižaza judío žoñinacaqui Moisés lii jaru kamz pecatča, Yooz yujcquiz ana ujchiz cjisjapa. Pero nii lii jaru ana zumpacha kami atchiča.

³² ¿Kjažtiquiztan Yooz yujcquiz ana ujchiz cjisni atajo? Ninaca persunpacha lii jaru kamtiquiztan Yooz yujcquiz zuma cjis pecchiča. Pero ana atchiča. Nižaza nii lii jaru kamz peccan, juč ant ujchiz cjissiča, Jesucristužquin ana kuz tjaachiž cjen. Jaknužt tsjii mazquiz tejšcu tjojsaja, jalla nižta irata Jesucristužquiztan ujquiz tjojsiča.

³³ Jalla nužpacha cjiřta Yooz takuqui cjiča: “Žoñinaca nonžna; wejrqui Sión cjiřta wajtquiz tsjii utča. Jalla nižquiztan žoñinaca ujquiz tjojsnaquičha. Tsjii maztakaz nižquiztan žoñinaca t'eznaquičha. Pero jakziltat nižquiz kuz tjaačhaja, jalla niiqui ana inakaz kuz tjaaquičha. Ana incallta cjequičha”.

10

¹ Jilanaca, cullaquinaca, judío žoñinaca liwriitaj cjiřa, jalla nužuča weriž kuzquiz pectaqui. Nižaza jalla nužuča weriž Yoozquin mayiztaqui.

² Ninacž puntuquiztan wejrqui ticlarāča, ninacaqui Yooz sirwiz pecča, nii. Pero Yooz sirwiz puntu ana zuma intintazza.

³ Jaknužt Yoozqui žoñinaca ana ujchiz, nižaza zuma cjisatčhaja, jalla nii Yooz pinsita ana zizza. Ninacaqui persun kuzquiz pinsitacamakaz Yooz yujcquiz zuma cjis pecča. Jalla nižtiquiztan Yooz pinsitiquiz ana importichiča; nižaza Yooz taku ana nonža.

⁴ Jesucristuqui Moisés lii nužquiz apatatskatchiča. Jaziqiu jakziltat Jesucristužquiz kuz tjaačhaja, jalla niikaz Yooz yujcquiz zuma cjisnaquičha, ana ujchiz.

⁵ Yooz yujcquiz zuma cjis puntuquiztan Moisesqui tuž cjiřchiča: “Jakziltat wejt lii jaru kamčhaja, jalla niiqui Yooztan kamaquičha, lii jaru kamchiž cjen”. Pero žoñinacaqui nuž kami anapan atča.

⁶ Jaziqiu Jesucristužquiz kuz tjaachiž cjenkaz Yooz yujcquiz zuma cjesača. Jalla nii puntuquiztan tužuča. Ančuca kuzquiz ana pinsaquičha, tuž cjan: “¿Ject arajpacha yawasay?” (Jalla nuž cjan, Jesucristo chjiřkwatz pecča.) Ana čjul žoñimi nižta paasača.

⁷ Nižaza ančuca kuzquiz ana pinsaquičha, tuž cjan: “¿Ject ticzi žoñinacžquin okaqui?” (Jalla nuž cjan, Jesucristo ticziquiztan jacatatskatž pecča.) Ana čjul žoñimi nižta paasača.

⁸ Pero čjul žoñimi Yoozquin kuz tjaachiž cjen Yooz yujcquiz zuma cjisnasača. Yooz yujcquiz zuma cjisqui jalla tužuča. Liwriiñi taku ančhucalta žejlča, Yoozquin kuzžiz cjisjapa. Nii taku ančuca atžtan parlasača, nižaza ančuca kuztan catokasača. Jalla nii liwriiñi takuqui tužuča: Jesucristužquiz kuz tjaaquiz niiqui, liwriita cjequičha, nii. Jalla niipacha wejrnaquui paljayučha.

⁹ Ančhucqui ticlarstanča, Jiliriipantha Jesucristuqui, cjanacaqui. Nižaza ančuca kuzquiz criistanča, Yoozqui Jesucristo ticziquiztan jacatatchiča, jalla nii. Jalla nekztan liwriita cjequičha.

¹⁰ Žoñinacaqui tjapa kuztan criistanča, nekztan Yooz yujcquiz zuma cjequičha, ana ujchiz. Nižaza persun tawžtan “Jesucristužquiz kuz tjaaučha” cjan ticlarstanča, nekztan liwriita cjequičha.

¹¹ Cjiřta Yooz takuqui tuž cjiča: “Jakziltat Yoozquin kuz tjaačhaja, jalla niiqui ana inakaz kuz tjaaquičha”.

¹² Judío žoñinacžtanami yekja wajtchiz žoñinacžtanami Yooz yujcquiziqui tsjii parijukazza. Yooz Jiliriča tjapa žoñinacžta Jiliriqiu. Jakziltat liwriita cjisjapa Yoozquiz mayižhaja, jalla nižquiz Yoozqui okznaquičha; nižaza liwriyaquičha.

¹³ Jalla nužpacha cjiřta Yooz takuqui cjiča: “Jakziltat Yooz Jilirižquiz mayižhaja, jalla niiqui liwriita cjequičha”.

¹⁴ Pero zoñinacaqui Yoozquin ana criyaquiz niiqui, ¿kjažt nii zoñinacaqui Yoozquin mayizasajo? Nižaza Yooz puntuquiztan ana nonzitažlaj niiqui, ¿kjažt Yoozquiz criyasajo? Nižaza Yooz puntu paljajni zoñi ana želaquiz niiqui, ¿kjažt nonžni cjesajo?

¹⁵ Nižaza Yooz puntu paljajni zoñinaca ana cuchanžquitažlaj niiqui, ¿kjažt Yooz puntu paljajta cjesajo? Cjijrta Yooz takuqui tuž cjicha: “Ancha zumača Yooz puntu paljajni zoñinacaqui. Paljajta Yooz taku catokžcu, Yooztan zoñinacžtan wali cjiskatasacha”.

¹⁶ Pero wacchi zoñinacaqui paljajta Yooz taku ana juyzu paača. Jalla nužupan Isaiasqui cjichičha: “Yooz Jiliri, žject wejrnacaž paljajta takunaca criijo? Tsjii kjažukazza criichiqui”.

¹⁷ Jaziqi Jesucristuž puntu paljajtažlaja, nii puntu nonžta cjesača. Nižaza Jesucristuž puntu nonžcu, zoñinacaqui nižžquin kuz tjaasača.

¹⁸ Wejr pewcznuča, ¿Judío zoñinacaqui ana nonzejo? Nonzipanča. Yooz takuqui cjicha: “Tjapa kjutni tii yokchiz zoñinacžquiziqui nii liwriiñi taku mazmaztača. Nižaza tjapa tii muntuquiz žejlñi zoñinacaqui nii taku nonža”.

¹⁹ Tsjiižtan wilta pewcznuča, ¿Israel wajtchiz zoñinacaqui ana intintazzikaya? Tuquiqui judío zoñinacž puntuquiztan Moisesqui cjichičha:

“Yoozqui anchucaquiz iñiziskataquičha, yekja wajtchiz zoñinacžquiztan. Nižaza Yoozqui anchucaquiz žawjkataquičha tuquita ana Yooz pajni wajtchiz zoñinacžquiztan”.

²⁰ Nekztanaqui Isaiasqui ana ekscu, tuž čhičičha:

“Ana werar Yooz pecñinacaqui ultimquiziqui Yooz pajchičha. Nižaza Yoozqui persunpacha tjeeziča tuquita ana nižžquiz pecñinacžquiz”.

²¹ Yooz Ejjpqui Israel wajtchiz zoñinacž puntuquiztan tuž cjicha:

“Zita zita wejrqui anchuc kjawznatučha wejtquin tjonajo. Ančhuczi anaž wejt kjawžta cazza, antiz wejt quintrakazza”.

11

CRICHI JUDIO ZOÑINACA ZEJLCHA

¹ Jalla nižtquiztan wejrqui pewcznuča, ¿Yoozqui niž tuquita illzta zoñinaca chjatkatjo? Anapanž cjesača. Wejrpacha Israel wajtchiztča, Abrahamž majchmaatitča, nižaza Benjamínž parti zoñtča.

² Tuquitanpacha Yoozqui Israel zoñinaca illziča. Jalla nižtquiztan anaž chjatkatasača. ¿Jalla Elías puntuquiztan ana cjuñjo? Elías puntuquiztan cjiirta Yooz takuqui tuž cjicha: Eliasqui Israel zoñinacž ujnaca Yoozquiz tjeeziča, tuž cjan:

³ “Yooz Jiliri, ninacaqui amiž cuchanžquita profetanaca cončičha. Nižaza am sirwiz altaranaca pajlčičha. Wejrqui am sirwiñi zinalla želuča. Ninacaqui wejr zakaz conz pecčha”. Jalla nuž cjichičha Eliasqui.

⁴ Nekztan Yoozqui Eliasquiz tuž kjaaziča: “Wejtajapa pakallawk warank zoñinaca čhjetzinča. Ninacaqui Baal cjita zoñiž paata yooz yujcquiz anapan quillziča”.

⁵ Jalla nižta irata tii timpuquiz zakaz tsjii kjaž judío zoñinacaqui Yooz partiquiz žejlča. Yoozqui ninacžquiz okžcu, illziča.

⁶ Nii criichi judío zoñinacaqui Yooziž okziž cjenkaz illztača. Jalla nižtquiztan ana ninacaž kamtiquiztan illztača. Ninacaž kamtiquiztan illzta cjitasaž niiqui, Yooz okzqui inakaz cjitasača.

⁷ ¿Jazic kjaž cjii? Israel wajtchiz zoñinacaqui ujquiztan liwriita cjis pecatča. Pero ana liwriitatača. Yooziž illztanacaqui ninaca alajakaz liwriitatača. Parti Israel zoñinacazti chojrú kuzziz cjissičha.

⁸ Jalla nii chojrú kuzziz zoñinacž puntuquiztan cjiirta Yooz takuqui tuž cjicha:

“Yoozqui Israel zoñinacžquiz niž puntu ana intintiñi kuzziz cjiskatčičha. Jalla nižtquiztan ninacaqui Yooz puntu chercanpacha ana cherñižtakaz cjiskatčičha, nižaza Yooz puntu nonzcanpacha ana nonžnižtakaz cjiskatčičha. Anžta tii timpucamaž nižta žejlča”.

⁹ Nižaza Davidqui Yooz tawkw liwruquiz tuž cjiirčičha:

“Yoozquin ana kuzziz zoñinaca žejlča. Yooziž tjaatanacaqui ninacžquiz ujquiz tjojtskatla. Tsjii trampažtakaz cjila, ujquiz tjojtskatžjapa. Nižaza ninaca t'ezinla, ninacž uj paatiquiztan jama casticta cjisjapa.

¹⁰ Zur zoñinacžtakaz žejlcan Yooz puntu ana cherñi cjila. Nižaza ninacž tajqui chutunzižtakaz cjila, ana walinacaž tjonchiz cjen”.

YEKJA WAJTCHIZ ZOÑINACŽ PUNTU

¹¹ Jalla nižtquiztan wejrqui pewcznuča, Israel wajtchiz zoñinacaqui ujquiz tjojtsiž cjen, ¿wiñaya chjatkatla cjesajo? Anapanž cjesača. Israel wajtchiz zoñinacž liwriiñi tawkwiz ana juyzu paachiž cjen, nii liwriiñi takuqui yekja wajtchiz zoñinacžquiz paljajtača, Israel zoñinacžquiz p'ekinčayzjapa, Yoozquin kuz tjaajo.

¹² Israel zoñinacaz liwriiñi taku ana juyzu paachiz cjen parti zoñinacztajapa zuma cjissicha. Nižaza ninacaz Yoozquiztan jaytitiqiztan yekja wajtchiz zoñinacztajapa wali cjissicha. Jalla nižtiquiztan Israel zoñinaca wilta Yooz partiquiz cjisnan tsjan juc'ant zumaž cjisnaquičha yekja wajtchiz zoñinacztajapa.

¹³ Anziqiu anchuc yekja wajtchiz zoñinacžquiz chiyučha. Wejrqui yekja wajtchiz zoñinacžquiz cuchanzquita apostoltčha. Jalla nižtiquiztan wejt apóstol kamaña anchal importayučha,

¹⁴ wejt judío sarchiz zoñinaca p'ekinchayzjapa, nižaza tsjii kjažu liwriita cjisjapa.

¹⁵ Judío zoñinacaz chjatkattaž cjen yekja wajtchiz zoñinacaqui pertunta cjissicha, Yooztan wali cjisjapa. Jalla nižtiquiztan nii judío zoñinacaz wilta Yooz partiquiz risiwa cjis cjen, zoñinacaqui ticziqiztan jacatatchi cjisnaquičha.

¹⁶ Judío zoñinacž tuquita atchi ejpnacaqui Yooz partiquiz želatčha. Jalla nižtiquiztan tsjii tjonñi timpuquiz judío zoñinacaqui Yooz partiquiz wilta cjisnaquičha. Jaknužt primir paata t'antaqui zumažlaja, jalla nekztan tjapa nii t'anti mazaqui zuma zakazza. Nižaza tsjii munti sep'aqui zumažlaj niiqui, nii tsijtñi muntiqui zuma zakazza.

¹⁷ Tsjii judío zoñinacaqui munti itzanacaztakaz ts'ojrtačha. Nižaza anchuc yekja wajtchiz zoñinacaqui tsjii ana pecta munti itzažtakazza. Pero anchucqui judío zoñinacž cjenpacha apjattačha, nii zuma muntiz cjen wali zakaz cjejajo. Nii zuma muntiqui Yooz partičha.

¹⁸ Anchucqui jalla nuž apjattiquiztan, anaž judío zoñinaca iñaraquičha. Jakziltat iñaračhaja, jalla niiqui tuž cjuñž waquizičha, anchucqui nii sep'až cjen žetiñčhucčha. Ana anchucaž cjen nii sep'a žejtčha. Nii sep'ačha judío zoñinacaqui. Cristučha tsjii judío žoñiqui. Jalla nižta cjen anchucqui ew žeti tanzinčhucčha.

¹⁹ Yekjapanacaqui cunamit cječhani, "Nii itsanacaqui ts'ojrtačha wejnaca apjatžta cjisjapa".

²⁰ Razunaž niiqui. Ana Yoozquin kuz tjaachiž cjen judío zoñinacaqui chjatkattačha. Anchuczi Yoozquin kuz tjaachiž cjen jalla nii alajakaz Yooz partiquiz žejlčha. Jalla nižtiquiztan anačha mitarazi kuzziz cjeella. Antiz humilde kuzziz cjee, Yooz rispitan.

²¹ Yoozqui ana kuz tjaañi judío zoñinacžjapa quintra cjisizlaj niiqui, anchucajapa zakaz quintra cjisnaquičha ana nižquiz kuzzizlaj niiqui.

²² Yooza okžñimi nižaza castičñimi, jalla niž tantiya. Yoozquiztan zarakñi zoñinacžjapa castičñipančha. Nižaza nižquin kuz tjaañinacžjapa okžñipančha. Anchucqui tira Yoozquin kuzzizlaj niiqui, nekztan Yoozqui anchuc tira okznaquičha. Anchucqui ana tira Yoozquin kuzzizlaj niiqui, nekztan Yoozqui anchucaquiz zakaz chjatkataquičha.

²³ Nii chjatkatta judío zoñinacaqui wilta Yoozquin kuz tjaquiz niiqui, wilta Yoozqui ninaca ricujaquičha. Yoozqui ricujzmi atčha, Yooz partiquiz cjisjapa.

²⁴ Anchucqui yekja wajtchiz zoñinacačha, ana pecta munti itzanacaztakaz. Ana Yooz partiquiz želan Yoozqui anchuc niž partiquiz apjatchičha, yekja wajtchiz zoñinacaz cjenami. Jalla nižta watan, judío zoñinacaqui Yooz partiquiz wilta apjatžqui tsjan pjasilačha, tuquiqui Yooz partiquiz žejlchiz cjen.

JUDIO ZOÑINACAQUI YOOZQUIN KUZ TJAAQUICHA

²⁵ Jilanaca, cullaquinaca, tsjii tuquita ana zizta taku anchucaquiz zizkatž pecučha, ana mitaraz kuzziz cjisjapa, "Wejrnacqui ziziñ žoñtčha" cjicanaqui. Jalla tuž zizkatž pecučha: Yoozqui yekja wajtchiz zoñinacžquiz niž partiquiz cjskatž pecčha. Jakziltanacžquiz Yoozqui niž partiquiz luzkatž pecčhaja, jalla ninacaqui luzaquičha. Tjapa nii Yooziž pecta zoñinaca Yooz partiquiz luzcama, jalla niucama Israel zoñinacaqui chojru ana intintiñi kuzziz cjequičha.

²⁶ Jalla nekztanaqui tjapa nii timpuquiz žejlñi Israel zoñinacaqui liwriita cjequičha. Jalla nuž cjižrta Yooz takuqui cjičha:

"Sión wajtquiztan tsjii Liwriiñiqui tjonauquičha. Jacobž majchmaatinacquiztan ana zum kamañanaca jaytiskataquičha.

²⁷ Jalla nekztanaqui wejrqui ninacžtan compromitačha, ninacž ujnaca pertunačha, nii".

²⁸ Tii timpuquiziqui Israel zoñinacaqui Yooz liwriiñi tawk quintračha, nižaza Yooz quintračha, anchucalta wali cjisjapa. Jalla ninaca Yooz quintraž cjenami Yoozqui ninacžtan munazičha, ninacž tuquita atchi ejpnaca illziž cjen.

²⁹ Yoozqui tjaacanpacha anaž niž tjaataqui kjañasačha. Nižaza Yoozqui illžcupacha, ana chjatkatasacha.

³⁰ Tuquiqui anchucqui Yooz ana cazziñčhucčha. Anziqiu anchucqui Yooziž pertuntačha, ninacaz ana Yooz cazziž cjen.

³¹ Tii timpuquiziqui Israel zoñinacaqui Yooz ana cazza. Jalla nuž cjenami tii jarquin ninacaqui Yooziž pertuntaž cjequičha, jaknužt anchucqui pertunta cjistčhaja, jalla nižta. Jalla nižta Yoozqui niž okžñi kuz tjeeznaquičha.

³² Yoozqui tsjii pariju tjapa žoñinacž unpaca tjeeziča, niizquiz ana cazta, jalla nii. Jalla nuž tjeeziča tjapa žoñinacžquiz tsjii pariju niiz okžni kuz tjeezjapa.

³³ ¡Ancha juc'anti zumača Yoozqui! Ancha zuma pinsitanacchizza. Nižaza Yoozqui tjapa intintazza. Nižaza Yooziž pinsitanaca anaž jecmi zuma intintasača. Yooz pjalan anaž jecmi niizquiz mitisasača.

³⁴ ¿Ject Yooz Jilirž pinsitanaca intintasajo? ¿Ject Yooz Jiliržquiz tjaajnasajo?

³⁵ ¿Ject Yooz Jiliržquiz ayñi cjisjapa tjaasajo? Anaž jecmi.

³⁶ Tjapa Yoozquiztan tjonča. Nižaza tjapa niiz cjen žejlča. Nižaza tjapa niiztacamača. Yoozqui wiñaya honorchiz cjila. Jalla nužoj cjila. Amén.

12

YOOZ KUZCAMA KAMZ PUNTU

¹ Jilanaca, cullaquinaca, Yooz ančhuc okziž cjen ančhucacquiz chiižinuča, ančhucac persun curpu Yoozquin tjaa, tsjii zejtni wilanažtakaz. Ančhucac persun curpu Yooztajapakaz cjee, ana zinta uj paacan. Nuž cjen Yoozqui cuntintuž cjequičha. Jalla nižtača Yooz ultim litituma sirwizqui.

² Jaknužt tii muntuquiz ana criichi žoñinaca kamčhaja, jalla nižta ančhucacqui ana kama. Antiz ančhucac pinsitanacaz campiita cjee, Yooz pinsitanacaz irata cjeajajo. Tjapa ančhucac kamaña zuma cjee. Jalla nekztan Yooz kuz zizniž cjisnaquičha. Yooz kuzqui zumapanča, nižaza Yooz kuzcama kamzqui Yoozquiz cuntintu cjskatča, nižaza Yooz kuzcama kamcan ančhucacqui zumapan cjequičha.

³ Yoozqui wejr okžcu apóstol puestuquiz wejr utchiča. Jalla nižtquiztan tjapa ančhucacquiz chiižinuča, persun puntuquiztan anača pinzizqui, “Wejrqui tsjan zumtča” cjcanaqui. Jalla nuž pinziz anaž waquiziča. Antiz zapa mayni persun kamañ puntuquiztan zuma razunchiz pinziz waquiziča. Cjuñzna, Yoozqui zapa maynižquiz tsjii kamaña tjaachiča, Yoozquin kuzziz cjitiquiztan jama. Jaziqui ana mitarazi kuzziz cjee.

⁴ Tsjii curpuquiz wacchi partinaca žejlča. Punta punta žejlča, cherñi, nonžni, lanžni jalla nižta.

⁵ Jalla nižta irata Cristuž partiquiz žejlča. Učhumqui tamaž cjen tsjii pariju Cristuž partiquizkaz žejlča, tsjii curpužtakazza. Cristuž partiquiz žejlcan, učumnacaqui tsjii kuzziz uniru žejlča.

⁶ Yoozqui zapa maynižquiz yekja yekja kamaña tjaachiča, jaknužt munčhaja, jalla nuž. Jalla nii tjaata kamañ jaru kama. Yooziž tjaata taku parliñi kamañchizlaj niiqui, jalla nii kamañquiz zuma kama, Yoozquiz tjapa kuzquiztan jama.

⁷ Iclizquiz yanapñi kamañchizlaj niiqui, zuma yanapz waquiziča. Yooz puntu tjaajiñi kamañchizlaj niiqui, zumapan tjaajinz waquiziča.

⁸ Yoozquin kamzjapa p'ekinchayñi kamañchizlaj niiqui, zumapan p'ekinchayz waquiziča. Yoozquin cusasanaca tjaañi kamañchizlaj niiqui, tjapa kuztan tjaaz waquiziča. Icliza irpiñi kamañchizlaj niiqui, zumapan irpiz waquiziča. T'akjir žoñinacžquin okžni kamañchizlaj niiqui, zuma cuntintu yanapz waquiziča.

ZUMAPAN KAMAQUICHA

⁹ Tjapa kuztan porapat lititum zuma munaziñi cjee. Ana zuma paaznaca anapan peca. Pero zuma paaznaca tjapa kuztanpan paa.

¹⁰ Porapat oksaspanča. Zuma kuztan parti hermanonacžquiz rispitaquičha, anača tsjiiz rispitskaz tjewzqui.

¹¹ Ana jayrazni kuzziz cjee, pero c'unchi kuzziz cjee Yooz sirwizjapa. Nižaza tjapa kuztanpan Yooz sirwa.

¹² Arajpach zumanaca tjewžcan, cuntintuž kama. Llaquinacaz tjonanami pasinziz kuzziz kama. Yoozquin parlicanpan žela.

¹³ Criichi žoñinacaz t'akjiri želan, panž yanapa. Tjonžñinaca tjonan, panž kjawžna.

¹⁴ Ančhucac quintra žoñinacžtajapa Yoozquiztan mayižinaquičha, ninaca zuma cjisjapa. Anaž quintra chiichiyaquičha. Antiz mayižinaquičha.

¹⁵ Cuntintu žejlñi žoñinacžtan cuntintuza cjee. Kaañi žoñinacžtan chicazaž kaazna.

¹⁶ Porapat zuma munazican kama. Anača mitarazi kuzziz tucquin cjis pecsqui. Pero humilde kuzziz wirquin cjan cuntintuž cjee. Anača “Wejrqui zuma ziziñ žoñtča” cjee.

¹⁷ Tsjiuqui ančhucac quintra paachiž cjen, ančhucacqui anača nižtapacha quintra tjepunzqui. Zumapanž paazjapa tjapa kuz tjaa.

¹⁸ Nižaza ančhucacqui tjapa žoñinacžtan zuma kama, attacama.

¹⁹ Pecta jilanaca, cullaquinaca, ančhucacpacha anača quintra tanassa. Yoozpachaz ančhucac quintranaca casticaquičha. Jalla nuž cjiirta Yooz takuqui cjiča: “Yooz Jiliriqui tuž cjiča, “Wejrčha quintra žoñinaca castiquiñtqui. Wejr casticača””.

²⁰ Nižaza Yooz takuqui cjiča: “Ančhuca quintra zoñinacaz čhjeri eecziž cjen, čhjeri ona. Nižaza kjaz kjara passiz cjen, kjaz ona. Jalla nuž paažcuqui nii zoñinacžquiz azkataquiča”.

²¹ Tsjii zoñiqui ančhuca quintra paasača. Ančhuczi ana nižtapacha tjepna. Pero nii quintra zoñžquiz zumžtanž paacan jalla nuž atipa.

13

¹ Tjapa zoñinacaqui gobiernuž mantitanaca caz waquiziča. Yoozqui mantiz poder tjaacha tižquizimi nižquizimi. Yoozqui jilirinacžquiz poder tjaachiča mantizjapa.

² Jalla nižtiquiztan jakziltat jilirž quintra cječhaja, jalla niiqui Yooziž utža zoñž quintrača. Nižaza nii quintra zoñinacaqui casticta cjequiča.

³ Zuma paañi zoñinacaqui anaž jilirinacžquiz eksnasača. Antiz ana zuma paañi zoñinacaqui jilirinacžquiz eksnasača. ¿Ančhucqui jilirinacžquiz ana ekscan kamz pecya? Zumapan kama. Nekztan nii jilirinacaqui ančhucaquiz walikaz cjan cjequiča.

⁴ Jilirinacaqui zizcumi ana zizcumi Yooz sirwiča, ančhucalta wali žejlžjapa. Pero ančhucqui ana zuma paaquiz niiqui, eksnasača. Jilirinacaqui casticz poderchizza, anača inakaz nii mantiz puestu tanža. Ninacaqui Yooz sirwiča, nižaza Yooz cuntiquiztan ana zuma paañi zoñinaca casticča.

⁵ Jalla nižtiquiztan jilirinacž mantuquiz cjee, Yooz ana casticta cjisjapa, nižaza jilirinacžquiz tjapa kuztan cazapanča.

⁶ Jalla nijjapa zakaz ančhucqui impuestonaca pjojkz waquiziča. Mantiñi gobiernuqui Yooz sirwican impuestonaca packatča.

⁷ Tjapa jilirinacžtan zumapan cjee. Tsjii tasa tjaasljaj niiqui, panž tjaa. Tsjii impuesto pacz waquiziž niiqui, panž paca. Jakziltižquiz rispitz waquiziž niiqui, nižquiz panž rispita. Jakziltižquiz honora waytižinz waquiziž niiqui, nižquiz honora waytižina.

⁸ Ana jecžtanami kajchiz žela. Pero porapat zuma munaziz waquiziča. Jakziltat zoñinacžtan zuma munazačhaja, jalla niiqui Yooz mantitanacž compliča.

⁹ Yooz mantita ortinanacaqui tuž cjiča: “Anača adulteriuquiz žejlžqui. Anača žoñi konzqui. Anača tjañi zaazqui. Anača toscara chiizqui. Anača yekja žoñiža cusasa zmazqui”. Jalla nii mantita ortinanacami nižaza tjapa mantitanacami complitaž cjequiča, tuž kamcan: “Jaknuža am persun kuztan zuma munazičhaja, jalla nuž zoñinacžtan zuma munaziz waquiziča”.

¹⁰ Jakziltat nižta zuma munazičhaja, jalla niiqui zoñinacž quintra anapan paaquiča. Jalla nižtiquiztan zuma munazican Yooz mantita ortinanaca compliča.

¹¹ Jalla nuž kamcan, ti tĩpu naya. Nii nii žela. Tuquiqui Jesucristužquiz kuz tjaachinčumča. Anziqui ultimũ liwriiz tjuñiqui tsjan žcatžinžquiča.

¹² Tii kamz tĩpuqui waj tucuzinžnaquiča. Nižaza Jesucristuž tjonz tjuñi žcatžinžquiča. Jalla nižtiquiztan ana zuma paaz kamañquiztan zarakžpan waquiziča. Zuma paaz kamañchiz kamz waquiziča, tsjii zuma armichiz zultatužtakaz.

¹³ Zuma kamcan zuma žoñiža ojklaya, kjanquiztakaz ojklaycan. Anaž pjijstanaca paacan, kama. Nižaza ana licchi kama. Nižaza ana adulteriuquiz žejlcan kama. Nižaza ana zuma kamañchiz ana kama. Nižaza zoñinacžtan ch'aascan ana kama. Nižaza zoñinacžtan iñisican ana kama.

¹⁴ Tsjii zuma armichiz zultatužtakaz Jesucristo Jilirž kuzcama kama. Uj paaz pecñi kuz pinsitanacžquiz ana kuz tjaa, nii jaru kamzjapa.

14

CRIICHI ZOÑINACAQUI PUNTA PUNTA PINSAQUICHA

¹ Tsjii llajlli kuzziz criichi zoñiqui želan, nižquiz zuma risiwaquiča, pero nižtan ana payznakkatñi puntunaca ch'aas waquiziča.

² Tsjii criichi zoñiqui tantiiča, čhjulumiž lulasača, nii. Yekja criichi zoñiqui tantiiča, chjizwi ana lulasača, nii.

³ Nii čhjulumi lujlñi zoñiqui nii yekja zoñžquiz ana iñarz waquiziča. Nižaza nii ana chjizwi lujlñi zoñiqui nii čhjulumi lujlñi zoñžquiz anaž uj tjojtunz waquiziča. Yoozqui nii čhjulumi lujlñiqui risiwchiča, nižquiz kuzziz cjen.

⁴ Jalla nižtiquiztan nii Yooz sirwiñi zoñžquiz ana uj tjojtunz waquiziča. Niiž persun Yooz Patrunaqui nižž uj jwesnaquiča, ana zuma paachižljaj niiqui. Yoozquiz kuzziz cjenauqui ultimquiziqui walikaz cjesača. Yooz Patrunaqui nii zoñžquiz wali cjiskatz atča nižž aztanaqui.

⁵ Tsjii puntužtan chizinuča. Tsjii criichi zoñiqui “Tsji tjuñinacaqui chawc tjuñinacača” cjiča. Yekja criichi zoñižti cjiča, “Tsji parijuča tjuñinacaqui”. Zapa mayni persun kuzquiz zumpacha tantiižcuqui, jalla nii tantiita jaru kama.

⁶ Tsjii criichi zoñiqui tsjii chawc tjuñi wartaquíz niiqui, Yooz honora waytita cjisjapa wartiyaquičha. Tsjii criichi zoñizti nii tjuñi ana wartčhaja, jalla niiqui Yooz honora waytita cjisjapa nižta ana wartčha. Nižaza tsjii čhjulumi lujlñi zoñiqui Yoozquin gracias cjižcu jalla nuž lulaquíz niiqui, Yooz honora waytita cjisjapa lulaquičha. Nižaza yekja criichi zoñiqui ana chjizwi lulaquíz niiqui, Yooz honora waytita cjisjapa ana lujlčha. Nižaza ana lujlchiz cjen niiqui Yoozquin gracias cjan chiiz waquizičha.

⁷ Anaž zoñinacaui inakaz kamčha, nižaza anaž inakaz ticza.

⁸ Učhumqui tii muntuquíz kamcan Yooz Jiliržtajapapanž kamčha. Nižaza ticzcan Yooz Jiliržtajapapanž ticza. Jalla nižtiquiztan žejtcanami ticzcanami Yooz Jiliržtajapapančhumčha.

⁹ Jalla niijapa Jesucristuqui ticzičha, nižaza jacatatchičha, žejtñi zoñžtami, ticzi zoñžtami tjapa zoñinacžta Jiliri cjisjapa.

¹⁰ Jalla nižtiquiztan čkjažtiquiztan am criichi jilžquíz uj tjojtunjo? Nižaza čkjažtiquiztan am jilž quintra iñarjo? Tjapa učhumqui Yooz yujcquíz prisintistančha, niž pjalžtaž cjisjapa.

¹¹ Cjijrta Yooz takuqui tuž cjičha:

“Yoozqui ultimupanž cjičha, ‘Wejt yujcquíz zapa mayni zoñiqui quillznaquičha. Nižaza zapa mayniqui wejtquin rispitaquičha; nižaza wejt honora chiyaquičha’”.

¹² Jalla nižtiquiztan tjapa učhumqui Yoozqui quinta tjaastančha.

UJQUIZ ANA TJOJTSKATA

¹³ Jalla nižtiquiztan učhumqui porapat ana iya ujnaca tjojtmaras waquizičha. Pero tjapa učhumqui tuž tantiiz waquizičha, yekja jilžquíz anapanž ujquiz tjojtskatz munzqui.

¹⁴ Čhjul cusasami tsjii criichi zoñžquíz ana ujchiz cjskatasachha. Jalla nii razuna zizučha, Jesucristo Jiliržquíz kuzziz cjen. Jalla niic nužupančha. Jakziltat “Tii cusasaqui ujchiz cjskatchha” cjan tantiyachaja, jalla nižquíz nii cusasaqui ujchiz cjskatasachha.

¹⁵ Ančhuca lujltiquiztan tsjii criichi zoñž kuz payznakaquíz niiqui, nii čheriqui anaž lujlž waquizičha. Jalla nii čheri tira lulaquíz niiqui, amqui nii payznakskatñi zoñžtan ana zuma munazičha. Yekja criichi zoñžquíz ana ujquiz tjojtskata, castica cjejajo. Jesucristuqui nižtajapa zakaz ticzičha.

¹⁶ Tsjii zoñžtaqui čhulu lujlžmi walikaz cjesachha. Pero nii lujltaž cjen parti zoñinacaui, “Ana zuma kamañchizza nii criichi zoñiqui” cječhaj niiqui, nekztan ana lujlž waquizičha.

¹⁷ Yooz mantuquíz kamcan, čherimi liczmi ana importičha. Pero Espiritu Santuž cjen ana ujchiz cjee; nižaza Yooztan ančhucatan walikaz cjee; nižaza cuntintu kuzziz cjee. Jalla nužučha chekan zuma kamañquiqui.

¹⁸ Jakziltat jalla nuž kamcan Cristužquíz sirwačhaja, jalla niž cjen Yoozqui cuntintuž cjequičha. Nižaza parti zoñinacaui “Nii zoñiqui walikaz kamčha” cjan chiyaquičha.

¹⁹ Učhumnacžtan parti zoñinacžtan zumapanž kamzjapa kuz tjaa. Nižaza parti criichnacžquíz juc’ant zuma kamañchiz cjejajo, jalla nii kamzquíz kuz tjaa.

²⁰ Ančhucaž čhjulumi lujltiquiztan anačha yekja criichi zoñžquíz Yooz zuma kamañquiztan jaytiskatzqui. Ana čhjul čherimi ujchiz cjskatasachha. Pero nuž čhjulumi lujlžcu yekja criichi zoñžquíz ujquiz tjojtskataquíz niiqui, jalla nižtiquiztan anaž čhjulumi lujlž waquizičha.

²¹ Tsjii criichi zoñiqui ančhucaž chjizwi lujltiquiztan, nižaza vinu lictiquiztan, nižaza čhjulumi paatiquiztan ujquiz tjojtskatasaz niiqui, jalla nižtanaca paazqui ana waquizičha.

²² Jesucristužquíz tjapa kuzziz cjen čhulu kamañchizlaja, jalla nii kamañ jaru Yooz yujcquíz kamz waquizičha. Yoozquízkaž quinta tjaastančha. Jalla nuž zuma kamcan persun kuzquíz uj ana sint’ aquičha. Persun kuzquíz ana zinta uj sint’ican zuma kamaquíz niiqui cuntintuž cjequičha.

²³ Pero jakziltat paysnakñi kuztan lujlčhaja, jalla nii paysnakžcu lujltiquiztan persun kuzquíz uj sint’ aquičha, “Ujžcaa nii lujlžqui” cjan. Yoozquin ana tjapa kuztanžlaj niiqui, čhjulumi ujž cjesachha. Yoozquin kuzzizpan cjee.

15

PORAPAT YANAPARASAUQUICHA

¹ Yekjap učhumqui tjapa kuztanpan Yoozquinčha. Yekjapanacaui Yooztan kamcan llajlla kuzzizza. Učhum kuzquíz pecta jarukaz anaž kamz waquizičha. Nii llajlla kuzziz criichi zoñinacaž pinsitanaca panž cjuñžna, zuma kami yanapajo.

² Zapa mayni criichi zoñiqui parti criichi zoñinacžtajapa kamz waquizičha, ninaca tsjan zuma kamañchiz cjisjapa.

³ Jesucristuqui nižta kamchičha, anačha persun kuz wali cjisjapa kamchiqui. Cjijrta Yooz takuqui Jesucristuž puntuquiztan tuž cjičha: “Yooz quintra iñarñi zoñinacaui wejt quintra iñarchičha”.

⁴ Yooz takuqui uĥumnacalca cjiirtkalĥa, uĥumnacaquiz tjaajinzjapa. Jalla tuž uĥumnacaquiz tjaajinĥa, zuma tjurt'ifi kuztan, pasinsis kuztan, nižaza p'ekinchayta kuztan, Yoozquin arajpachquin ojzk tjewzjapa.

⁵ Yoozqui uĥumnacžtan pasinsis kuzzizza; nižaza uĥumnacaquiz p'ekinchayĥa. Nii Yoozpacha uĥumnacaquiz yanapt'ila, tsjii kuzziz cjeajajo, nižaza zuma kamajo Jesucristuž munañpacama.

⁶ Jalla nuž tsjii kuzziz kamcan, uĥumqui tsjii kuzziz Yooz honora waytaquiča. Yoozqui uĥum Jesucristo Jilirž Ejpĥa. Jalla niž honora waytaquiča.

CRISTUZ PUNTU

⁷ Jalla nižtiquiztan tsjiimi tsjiimi zumaž risiwžcu munazaquiča, jaknužt Cristuqui uĥumnacatan zuma munaziĥaja, jalla nuž, Yooz honora waytita cjisjapa.

⁸ Anĥucaquiz cjiwĥa. Jesucristuqui judio žoñinaca liwrii nižaza yanapñi tjonĥiča. Nuž tjontiquiztan Yooz niž taku lijituma cumpliñipan, jalla nii tjeeziĥa. Yoozqui tuquitanpacha judio žoñinacž atchi ejpnacžquiz taku tjaachiĥa. Jalla nii taku cumpliĥiča, Jesucristuž tjonĥiž cjen.

⁹ Nižaza Jesucristuqui tjonĥiča, yekja wajtchiz žoñinacžquiz Yooz honora waytiskatzjapa. Yooz anĥa okžni kuzziz cjen niž honora waytitaĥa. Jalla nužupan cjiirta Yooz takuqui ĥiīĥa, tuž cjan:

“Jalla nižtiquiztan wejrqui yekja nacionchiz žoñinacžtan žejlcan, am honora waytaĥa. Nižaza am honora waytican, itsnaĥa”.

¹⁰ Yooz tawk liwruquiz tuž cjiirjazakazza:

“Yekja nacionchiz žoñinaca, Yooz parti žoñinacžtan ĥica cuntintuž cjee”.

¹¹ Yooz tawk liwruquiz tuž cjiirjazakazza:

“Yekja nacionchiz žoñinaca, tjapa anĥucqui Yooz Jilirž honora wayta. Tjapa žoñinacaqui Yooz zuma paatanacquiztan nižquin honora tjaala”.

¹² Nižaza Yooz tawk liwruquiz Isaiasqui tuž cjiirĥiča:

“Isaiž majĥmaatinacquiztan tsjiiqui tjonauquiča. Jalla nii tjonžcu yekja nacionchiz žoñinacž mantaquiča. Nižaza niž cjen ninacaqui liwriiñiž tjewznaquiča”.

¹³ Yoozza liwriiñi tjewzkatñiqui. Nii Yoozqui anĥuca kuz anĥa cuntintu cjskatla. Nižaza Jesucristužquiz kuzziz cjen walikaz cjskatla. Nekztan anĥucqui Yooz Espiritu Santuž aztan zumpacha liwriiñiž anĥa tjewznasaĥa.

¹⁴ Wejt jilanaca, cullaquinaca, anĥucqui anĥa zuma kamañĥizza, nižaza Yooz puntu zuma zizza, nižaza tsjiižquizimi tsjiižquizimi Yooz puntu zuma intintiskatĥa. Jalla nužupanĥa anĥuca kuzqui. Jalla niiqui zumpachal zizuĥa.

¹⁵ Jalla nuž cjenami ana jiwjatžcu tsjii kjaž puntunaca cjiiržcuĥa, anĥucaquiz cjuñkatžjapa. Yoozqui wejtquiz favora paacan apóstol puestuquiz utĥiča, tii puestuquiz Jesucristo sirwizjapa. Jalla nižtiquiztan anĥucaquiz cjiiržcuĥa.

¹⁶ Jesucristo sirwican, yekja wajtchiz žoñinacžquiz liwriiñi Yooz taku paljajuĥa. Jalla nuž Yooztajapa langznuĥa, nii yekja wajtchiz žoñinaca Yoozquin kuz tjaajo. Ninaca tsjii zuma ofrendažtakaz Yoozquiz prisintis pecuĥa. Nižaza Espiritu Santuž ninacžquiz zuma kamañĥiz cjskatchiž cjen, Yoozqui ninacžquiztan cuntintuž cjequiča.

¹⁷ Jesucristo sirwican wejt Yooztajapa langžtiquiztan cuntintuĥa wejrqui, tama žoñinaca nižquin kuz tjaachiž cjen.

¹⁸ Jesucristuž puntuquiztankaz wejrqui ĥiiz pecuĥa. Jesucristuqui wejtquiz wacchi zuma obranaca paakatchiča, yekja wajtchiz žoñinaca nižquin kuz tjaakatzjapa. Jesucristuž cjen, wejrqui milajru paatanacami Yooz puntu ĥiitanacami nii yekja wajtchiz žoñinaca Yooz kuzcama cazkatchinĥa.

¹⁹ Espiritu Santuž aztan ninaca cazkatchinĥa wacchi milajrunaca paacan. Jalla nuž paacan, nižaza tjapa Jesucristuž puntuquiztan parlican, wejrqui tjapa kjutñi ojklayĥinĥa, Jerusalenquiztan Ilirico yokaran.

²⁰ Wejrqui kuzquiz tantiĥinĥa, jakziquin Yooz puntu parlitažlaja, jalla nicju ana ojzk pecĥinĥa. Pero jakziquin Jesucristuž puntu ana parlitažlaja, jalla nicjuñ liwriiñi Jesucristuž puntuquiztan parlican ojklayaĥa, yekja žoñi iclizanaca ana mitiscu.

²¹ Cjiirta Yooz takuqui tuž cjiĥa:

“Tuquiqui Yooz puntu ana nonziĥa. Jaziqui nii žoñinacaqui Yooz puntu nonžcu catokaquiča. Nižaza ninacaqui Yooz puntu intintazaquiča”.

PABLQUI ROMA CJITA WAJTQUIN OJKZ PECĤHA

²² Jalla nuž ojklaycan wejrqui anĥucaquiz ana tjonžni atĥinĥa. Walja tjonz pecaytuĥa, pero anal atĥinĥa.

²³ Ažk watanacquiztanpacha wejrqui anĥucatan zalz pecaytuĥa. Anziqiu tii yokaran ojklayzquī žerzinĥa.

²⁴ Jalla nižtiqiztan ančhucaquin ojkz cjisnuča; España ojkan tjonznacha. Tsji kjaž maj ančhucatan cuntintu kaman, ančhucqui wejr yanapasača, wilta jiczquiz ojkszjapa España irantajo.

²⁵ Pero anzpacha wejrqui Jerusalén watja okača, ofrendanaca chjichača nicju žejlñi criichinaca yanapzjapa.

²⁶ Macedonia wajtchiz žoñinacami Acaya wajtchiz žoñinacami kazziča ofrendanaca utzjapa, Jerusalén pori criichinaczquiz yanapzjapa.

²⁷ Jalla nuž ofrendanaca tjaaz puntuqiztan ninacapachača “Waliča niiqui” cjchiqui. Nižaza ninacaqui judío žoñinaczquiz kajažtakazza. Judío žoñinacaqui ninaczquiz Yooz zuma tjaajintanaca tojunchičha, ninaca liwriita cjisjapa. Jalla nižtiqiztan nii yekja wajtchiz žoñinacaqui judío wajtchiz žoñinaczquiz ninacz susanaca tojunz waquziča.

²⁸ Primiraqui tii ojkz cumplistanča ofrendanaca intirizjapa. Jalla nuž ojктаž ančhucaquiz tjonznacha, España ojkan.

²⁹ Nekztan liwriiñi Jesucristuž puntuqiztan zumpacha ančhucatan parliz pecučha. Jalla nekztanaqui Jesucristuž cjen wejtqizimi ančhucaquizimi wali cjequičha. Nužupanž cjequičha.

³⁰ Jilanaca, cullaquinaca, ančhucaquiz rocučha učhum Jesucristo Jiliriž cjen, nižaza munaziñi kuz cjiskatñi Espiritu Santuž cjen, oracionžtan yanapalla. Wejrqui ancha Yoozqiztan mayučha,

³¹ Judea wajtchiz quintra žoñinaczqiztan anapan tanta cjisjapa. Nižaza oracionžtan yanapalla, tii weriž chjitzta ofrendanaca wali risiwta cjisjapa. Pecučha, judío criichi žoñinacaqui tii ofrendanaca zuma risiwčhaja, nii.

³² Jalla nuž zuma wataquiz niiqui, ančhucaquin tjonžčača Yooz munan. Wejr cuntintu irantižquizjapa, mayižinaquičha. Nižaza ančhucatan tjonžcu porapat cuntintu kuzziz yanaparaszjapa mayižinaquičha. Jalla niijapa oracionžtan yanapalla.

³³ Yoozqui ančhuc walikaj cjiskatla. Jalla nužoj cjila. Amén.

16

PABLUZ TSAANTANACA

¹ Tsjaa criichi cullaquiqui žejlča, Febe cjiti, jalla naa cullaquiqui ancha zumča cjiwčha. Naaqui Cencrea iclizquiz Yooztajapa sirwiča.

² Yooz Jiliriž cjen naa cullaqui zuma risiwaquičha. Jalla nuž waquziča Jesucristužquiz kuzziz jilanacaqui. Jalla naa cullacaquiz yanapaquičha čhjuulu pecanami. Naaqui wacchi criichi žoñinaczquiz yanapchinča, nižaza wejtqizimi.

³ Priscilaquizimi Aquilžquizimi tsaanžinalla. Ninacaqui Jesucristužquin sirwiñi mazi-nacača.

⁴ Wejr ticznawc cjen ninacaqui wejr liwriiskatchičha. Jalla nuž liwriiskatcan ninacaqui joz ticzizakazza. Jalla nižtiqiztan ninacz cjen Yoozquin gracias cjican chiyučha. Nižaza tjapa nacjuñta jilanacaqui ninacz cjen Yoozquin gracias cjiča.

⁵ Nižaza Priscila Aquilž kjuyquiz ajczñi jilanaczquiz tsaanžinaquičha. Nižaza weriž pecta Epeneto tsaanžinaquičha. Acaya wajtchiz žoñinaczqiztan primirpacha niiqui Cristužquin kuz tjaachiča.

⁶ Nižaza Mariaquiz tsaanžinaquičha. Naaqui ančhucatan žejlcan ancha langzinča.

⁷ Nižaza wejt wajtchiz žoñinaczquiz, Andrónico, nižaza Junias, tsaanžinaquičha. Ninacaqui wejtan chica carsilquiz žejlchi compañerunacatača. Apostolunacazakaz ninaca rispitcha. Weriž ima Jesucristužquiz kuz tjaan, ninacaqui Jesucristužquiz kuz tjaachiča.

⁸ Nižaza Ampliasquiz tsaanžinaquičha. Jalla niičha weriž pecta maziqi. Niiqui Jesucristo Jiliržquin kuz tjaachizakazza.

⁹ Nižaza Urbanžquiz tsaanžinaquičha. Niiqui Jesucristužquiz sirwiñi maziča. Nižaza weriž pecta Estaquizquiz tsaanžinaquičha.

¹⁰ Nižaza Apesquiz tsaanžinaquičha. Jalla niiqui Jesucristužquiz kuz tjaazcu, Yooz kamaña pankaz kamča. Nižaza Aristóbuluž kjuychiz žoñinaczquiz tsaanžinaquičha.

¹¹ Wejt wajtchiz žoñžquiz, Herodión, tsaanžinaquičha. Nižaza Narcisož kjuychiz Yoozquin criichi žoñinaczquiz tsaanžinaquičha.

¹² Nižaza Trifenaquiz, nižaza Trifosaquiz tsaanžinaquičha. Ninacaqui Yooz Jiliržtajapa sirwiča. Nižaza učhum pecta Persidaquiz tsaanžinaquičha. Naaqui Jesucristo Jiliržtajapa juc'anti langzinča.

¹³ Nižaza Rufžquiz tsaanžinaquičha. Niiqui Jesucristužquiz tjapa kuz tjaazcu, parti hermanonaczquiz rispitta cjissiča. Nižaza niž maaquiz tsaanžinaquičha. Naaqui wejt maa cuntitača.

¹⁴ Nižaza tsaanžinaquiča tinacžquiz, Asincritužquiz, Flegontižquiz, Hermasquiz, Patrobasquiz, Hermesquiz, nižaza ninacžtan chica kamñi jilanacžquiz.

¹⁵ Nižaza tsaanžinaquiča Filologužquiz, nižaza Juliaquiz, nižaza Nereožquiz, nižaza niž callacaquiz, nižaza Olimpasquiz, nižaza tjapa ninacžtan kamñi criichi žoñinacžquiz.

¹⁶ Nižaza porapat zuma tsaanassaquiča, tjapa kuztan. Nižaza tjapa Jesucristužquiz kuz tjaañi žoñinacaqui ančhucaquiz tsaanz apayžquiča.

¹⁷ Jilanaca, cullaquinaca, ančhucaquiz rocuča, zumapanž ančhucqui cwitazaquiča, nii t'akt'aksñi žoñinacžquiztan. Nižaza zumpacha cwitazaquiča tsjii kjutñi tjaajiñi žoñinacžquiztan. Nii žoñinacaqui, jaknužt ančhucaquiz Yooz puntu tjaajinta cječhaja, jalla nii tjaajinta quintra tjaajinča. Ninacžquiztan ančhucqui zaraka.

¹⁸ Ninacaqui Jesucristužtjapa ultimu ana sirwiča. Antiz ninacaqui persun kuzcamaž sirwiča. Ninacaqui humilde criichinacžquiz incallča, zuma čiican, žoñinacž kuz wali cjisjapa.

¹⁹ Tjapa žoñinacaqui ančuca puntu zizza, jaknužt ančhucqui Yoozquin cazzaja, jalla nii. Jalla nižtiqiztan wejrqui chipznuča. Nižaza zumanaca paazjapa zizñi zizñi cjee. Ana zumanaca paachucaž cjen, ana mitisa.

²⁰ Jalla nuž zuma kaman, Yoozqui ančhucaltajapa Satanás diablužquiz tječžcu, atipaquiča. Yooza ančhuc walikaz cjskatñi. Nižaza učum Jesucristo jiliriqui ančhucaquiz yanapt'ila. Amén.

²¹ Timoteuqui ančhucaquin tsaanz apayžquiča. Niiqui wejt compaņeruča, wejr Yooztajapa langznan. Nižaza wejt wajtchiz žoñinaca, Lucio, Jasón, Sosípater, jalla ninacaqui ančhucaquin tsaanz zakaz apayžquiča.

²² Nižaza wejrqui, Tercio cjita žoñtča ančhucaquin tsaanz zakaz apayžcuča, Jesucristo jilirž tjuuquiz. Wejrqui Pabluž čiitiqiztan tii cartal cijjruča.

²³ Nižaza Gayuqui ančhucaquin tsaanz apayžquiča. Niiž kjuyquiz alujassinča. Nižaza niiqui čjul criichi žoñimi kjawzñipanikazza, niiž kjuyquiz alujazjapa. Nižaza Erastuqui ančhucaquin tsaanz apayžquiča. Jalla niiča wajt paaz tanzñi tesoreruqui. Nižaza učum jila Cuarto cjitaqui ančhucaquin zakaz tsaanz apayžquiča.

²⁴ Učum Jesucristo jiliriqui tjapa ančhucaquiz zumaj yanapt'ila. Jalla nužoj cjila. Amén.

ZERZ TAKUNACA

²⁵ Ima žerzcan Yooz honora waytuča. Yoozqui ančhuc tjurt'iñi kuzziz cjisnasača. Nii liwriiñi Yooz puntumi, Jesucristuž puntumi parluča. Jalla nii parlita puntunacaqui Yoozqui ančhucaquiz zizkatchiča. Tuqitan nii puntunaca ana ziztača.

²⁶ Tii timpuquizkaz Yoozqui nii puntunaca zizkatchiča. Nižaza profetanacaqui nii puntunaca cijrchiča Yooz tawk liwruquiz. Tii timpuquiz wiņay žejtñi Yoozqui mantichiča, tjapa žoñinacžquiz nii puntunaca zizajo. Jalla nuž mantichiča, žoñinaca Jesucristužquiz kuz tjaajo, nižaza casajo.

²⁷ Yoozkazza zizñi zizñiqui. Jesucristuž cjen Yooz honoraqui wiņaya waytitaj cjila. Jalla nužoj cjila. Amén.

PRIMERA CARTA DEL APOSTOL SAN PABLO A LOS CORINTIOS

¹ Wejrqui Pablutča. Jesucristuž cuchanžquita apostoltča. Jalla nuž Yoozqui munchičha, wejr apóstol puestuquiz uchi. Wejrqui Sóstenes cjita jilžtan tii cartal cjijržcuča ančhuc criiči zoñinacžquin.

² Ančhucqui Corinto wajtchiz criiči jilanacčhucča. Werar Yooz iclizziz zoñinacčhucča. Jesucristuž cjen Yoozqui ančhuc t'akziča niž zuma kamañchiz cjisjapa. Jalla nijjapaqui Yoozqui ančhuc kjawziča. Nižaza Yoozqui tjapa criiči zoñinaca kjawziča niž zuma kamañchiz cjisjapa. Ančhucatan parti criiči zoñinacžtan Jesucristo jiliržquin sirwiča. Jesucristo jilirž mantuquizza ninacami, nižaza učummi.

³ Učhum Yooz Ejpžtan Jesucristo jiliržtan, ančhucquiz zumaj yanapla. Nižaza ančhucžtajapa walikaj kamkatla.

YOOZQUI ZOÑINACŽQUIZ YANAPCHICHA

⁴ Jesucristuž cjen Yoozqui ančhucquiz ancha okziča. Ančhucadž okžtaž cjen tirapan Yoozquin gracias cjican chiyučha.

⁵ Jesucristuž cjen Yoozqui ančhucquiz zumpacha yanapchiča, Yooz puntu zuma zizajo, nižaza Yooz taku zuma paljayajo.

⁶ Wejrnacadž Jesucristuž puntuquiztan paljaytan ančhucqui persun kuzquiz zumpacha catokchinčhucča.

⁷ Jalla nižtiquiztan ančhucqui tjapaman Yooziž tjaata kamañchizza. Jalla nuž kamcan, Jesucristo jilirž tjonz tjuñi tjewža ančhucqui.

⁸ Jesucristo jiliripacha ančhucquiz tjturt'ini kuzziz cjskataquiča niž tjonz tjuñicama. Tjturt'ini kuzziz tjewznan, Jesucristo jilirž tjonz tjuñiquiziqui ančhucquintra anaž jecmi kjaž cjesača. Yoozqui ančhuc ujnaca pertunchiča Jesucristuž cjen.

⁹ Nižaza ančhuc kjawziča niž Majch Jesucristo jiliržtan tsjii kuzziz cjejajo. Nižaza Yooza niž kjawžta taku cumpliñiqui. Niž tawkcama ančhucquiz cwitaquiča Jesucristuž tjonz tjuñicama.

T'AKA T'AKA CH'AASSICHA

¹⁰ Jilanaca cullaquinaca, učhum Jesucristo jilirž tjuuquiz ančhucquiz rocuča, porapat tsjii kuzziz cjejajo, nižaza ana pjali cjejajo. Tsjii kuzziz cjen tsjii pinsamintuchiz cjis waquziča.

¹¹ Wejt jilanaca cullaquinaca, tsjii kjaž zoñinacaqui Cloé famill zoñinacžquiztan wejtquiz quint'ichiča, ančhucpora ch'aasiñchucquiča, jalla nii.

¹² Ch'aascan, t'aka t'aka chiichiñchucquiča, tuž cjican: “Wejrtča Pabluž t'akquiztanqui”. Tsjiiziti cjiñizakazquiča: “Wejrtča Apolos t'akquiztanqui”. Tsjiiziti cjiñizakazquiča: “Wejrtča Pedruž t'akquiztanqui”. Yekjapanacaziti cjiñizakazquiča: “Wejrtča Cristuž t'akquiztanqui”. Jalla nužupan ančhucqui ch'aasiñchucquiča.

¹³ Nonžna ančhucqui. Cristuqui anača t'aka t'aka. Ančhuc laycu wejrqui anača cruzquiz ch'awtaqui. Nižaza wejt tjuuquiz anača bautistaqui, wejt t'akquiz cjisjapa.

¹⁴ Crispo, nižaza Gayo, jalla ninaca bautissinča. Walizat ana iya bautistučhaja. Jalla nižtiquiztan Yoozquin gracias cjican chiyučha.

¹⁵ Nižaza wejt tjuu ana waytasacha, “Pabluqui wejr bautissinča”, cjicanaqui.

¹⁶ Aaa, tsjiilla wejr tjatzinča; Estéfnas familia zakaz bautissinča. Anal iya jec bautistac cjuñučha.

¹⁷ Cristuqui anača wejr bautisajo mantižquichi. Antis liwriñi Yooz taku paljayajo mantižquichiča. Jalla nuž Yooz taku paljaycan wejrqui anača chawjc takunaca chiichintqui. Chawjc takunaca chitasaz niiqui, wejtquiz kuz tjaatasacha. Jalla nižtiquiztan ančhucqui anaž učhum laycu conta Jesucristužquiz tjapa kuztan cjitasača. Nižaza Jesucristužquin tjapa kuz ana criitasača.

JESUCRISTO CRUZQUIZ CH'AWCTA PUNTU

¹⁸ Jesucristuqui cruzquiz ch'awctatača. Jalla nii puntu paljaytiquiztan infernuquin ojknii zoñinacaqui zumzu takunacaztakaz nayča. Liwriita, arajpachquin ojknii zoñinacaziti Yooz takupanž nayča. Nii Yooz taku paljaytaž cjen, Yoozqui niž azi tjeeža.

¹⁹ Cjijrta Yooz takuqui tuž cjiča:

“Yoozqui tjeeznaquiča, ana criiči zoñinacadž ziztaqui inakazza, jalla nii. Nižaza Yoozqui tjeeznaquiča, ana criiči zoñinacadž intintitaqui tsjii kjutñiča, jalla nii”.

²⁰ Nonžna. Chawjc taku chiiñi žoñinacami, judío cuzturumpinac puntu tjaajiñi žoñinacami, nižaza partir puntu parliñi žoñinacami, jalla ninacaqui inakazza; Yooz puntuquiztan ana zizñinacača. Jalla nuž tjeeziča Yoozqui; ninacž takunacami pinsitanacami zumzukazza.

²¹ Tii muntuquiz žejlñi žoñinacaqui persun kuzquiz pinsican anapan Yooz pajasacača. Jalla nuž Yoozqui munchiča. ¿Jaknuž žoñinacaqui Yooz pajasajo? Jalla tižtača. Wejrnacqui Jesucristuž puntuquiztan paljajuča. Nii paljajta taku catokžcu žoñinacaqui werar Yooz pajasacača. Nižaza liwriita cjesača. Ana criichi žoñinacaqui nii liwriiñi taku zumzu takužtakaz nayča. Jalla nuž ninacaž zumzu taku nayanami, Yoozqui muncha, paljajta Yooz taku criižcu, žoñinacaqui liwriita cjequiča, nii.

²² Judío wajtchiz ana criichi žoñinacaqui milajrunacakaz pecča. Griego wajtchiz ana criichi žoñinacazti ninacaž pinsita jarukaz liwriita cjis pecča.

²³ Ana walipanča nižta kuzziz žoñinacaqui. Jesucristuqui ticziča, žoñinaca ujquiztan liwriizjapa. Jalla nii Jesucristuž puntuquiztan wejrnacqui paljajuča, žoñinaca liwriita cjeajajo. Pero wejrnacaž Jesucristuž ticžta puntu paljajtiquiztan, Judío wajtchiz žoñinacaqui ana criiz pecča, “¿Kjažt niiča liwriiñi cjesajo?” cjanacaqui. Parti žoñinacazti wejrnacaž paljajta takunaca nonžcu zumzu takužtakaz nayča. Pero ligitum liwriiñi takupanča.

²⁴ Jakzilta Judío wajtchiz žoñinacami yekja wajtchiz žoñinacami Yooziž kjawžta nonžaja, jalla ninacaqui Jesucristuž puntu takunaca zumaž nayča. Nižaza Yooz taku nayča, walja zizñiž taku, nii. Nižaza Jesucristuž cjen liwriiñi Yooz aziž pajcha nii Yooziž kjawžta nonžni žoñinacaqui.

²⁵ Ana criichi žoñinacazti Yooz taku zumzu takužtakaz nayča. Pero Yooz takuqui tsjan zumača tjapa zizñi žoñinacž tawkuiztanami. Nižaza Yoozqui žoñinaca ujquiztan liwriizjapa juc'ant azzizza čjul žoñinacžquiztanami. Cruzquiz ch'awctaž cjen Cristo ana azziztakaz nayča ana criichi žoñinacaqui. Pero cruzquiz ch'awctiquiztan Cristuqui žoñinaca ujquiztan liwriyasacača. Ana criichi žoñinacaqui persun aztan anaž liwriyasacača. Cristupankazza liwriiñi azzizza.

YOOZ KJAWŽTA ŽOÑINACA

²⁶ Jilanaca, cullaquinaca, ančhucž cjuñzna. Yoozqui ančhuc kjawziča. Jalla nii kjawžta oraqui jila parti ančhucacuztan ana zizñi žoñinacatača tii muntuquiz žejlñi žoñinacž yujcquiziqui. Nižaza ana mantiñi žoñinacatača. Nižaza zuma rispitta familianacuztan anatača jila parti ančhucqui.

²⁷ Yoozqui ančhuc illziča ana zizñi žoñinaca cjenami. Nuž muncha ana criichi zizñi žoñinaca azkatsjapa ultimquiziqui. Nižaza Yoozqui ančhuc illziča ana mantiñi žoñinaca cjenami. Nuž muncha ana criichi mantiñi žoñinaca azkatsjapa.

²⁸ Nižaza Yoozqui ana rispitta nižaza iñarta žoñinaca illziča, liwriizjapa. Nii žoñinacž puntuquiztan tii muntuquiz ana criichi žoñinacaqui cjiñiča, “Ana čjuljapa sirwiča”, cjan cjiñiča. Pero ultimquiziqui iñarta žoñinacaž liwriitiquiztan ana criichi rispitta žoñinacaqui inakaz cjskattaž cjequiča.

²⁹ Jalla nuž Yoozqui žoñinaca illz munchiča, niiz yujcquiz anaž jecmi mitarasi kuzziz cjeajajo.

³⁰ Yoozqui Jesucristuž cjen ančhucacuz tsjii ew kamañchiz cjskatchiča. Nižaza Jesucristuqui učumnacaquiz Yooz zuma pinsitanaca tjeeziča. Jesucristuž cjen učumqui zuma cjisšiča Yooz yujcquiziqui. Nižaza Jesucristuž cjen učumqui Yooz kuzcama kamča. Nižaza ultimquiziqui tjapa ana walinacuztanami liwriitaž cjequiča učumqui. Jalla nužuča Yooz zuma pinsitanacaqui učumnacaltajapaqui.

³¹ Jalla nižtiquiztan cijrta Yooz takuqui tuž cjiča: “Jakziltat honora waytiz pecčaja, persunpachquiziqui honora anaj waytila, antis mañiñi Yoozquizkaz honoraj waytila”.

2

YOOZ TAKU PALJAYZ PUNTU

¹ Jilanaca, cullaquinaca, wejrqui ančhucacuz liwriiñi Yooz taku paljaji tjončinča. Jalla nuž paljayan ana chawjc tawkžtan paljajčinča, tsjii walja zizñi žoñižtakazzi.

² Ančhucatan želan, Jesucristuž puntuquiztan nižaza Jesucristuž ticžta puntuquiztan jalla niipanikazza weriž paljajtaqui. Jalla nuž wejrqui persun kuzquiz tantičinča, ima ančhucacuz tjoncan.

³ Ančhucatan želcan, wejrqui humilde kuzziztača, nižaza Yooz eksñi kuzziztača.

⁴ Ančhucacuz Yooz taku paljayan ana chawjc tawkžtan atips pequiñtača, tsjii walja zizñi žoñižtakaz. Pero paljayan, Espiritu Santuča niiz aztan ančhucacuz kuznaca atipchiqui, Jesucristužquin criajajo.

⁵ Yooz aziž tježižtiquiztan ančhucacuz criiskatz pecatuča. Ana chawjc taku paljajtiquiztan ančhucacuz criiskatz pecatuča.

YOOZ PUNTUQUIZTAN INTINTAZ PUNTU

⁶ Pero tsjii tsjii Yooz puntunacaqui ch'amača intintazqui. Jalla nii puntunacazakaz tjaajnz pecučha. Pero walja Yooz kuzcama kamñi criichi zoñinacakaz nii puntunaca intintazasača. Jalla nii Yooz puntunacaqui anaž tii muntuquiz kamñi zoñinacž kuzquiz pinsitiquiztan tjonča. Nižaza anaž tii muntuquiz mantiñi jilirnacžquiztan tjonča. Jalla ninacaqui kataquičha, ninacaž pinsitanacžtanpacha.

⁷ Ima tii muntu paacan Yoozqui persun kuzquiz pinsichičha, jaknužt zoñinaca liwriyačhaja, jalla nii. Azk watanaca Yoozqui nii liwriñi puntu ana kjanapacha intintazkatchičha zoñinacžquiz. Jaziqui tii timpuquizkaz Yoozqui intintazkatča, učum niižtan wiñaya kamzjapa. Yoozpachača liwriñi puntuquiztan tjaajinchiqui wejtquiziqui. Jalla nii tjaajinta kjanzt'učha.

⁸ Tii timpuquiz mantiñi zoñinacžquiztan anaž jecmi liwriñi Yooz pinsita intintazziča. Intintazasaž niiqui zuma honorchiz Jesucristo Jiliri anaž cruzquiz ch'awctasača ninacaqui.

⁹ Cjijrta Yooz takuqui tuž cjiča:

“Yoozqui zumanaca tjaczinchičha nižquin sirwiñi zoñinacžtajapa. Nii Yooz tjaczinta zumanacača anaž jecmi cherchi, nižaza anaž jecmi nonzi, nižaza anaž jecmi persun kuzquiz tantiyi atchiqui”.

¹⁰ Anzimi Yoozqui niž zumanaca Espiritu Santuž cjen učumnacaquiz intintazkatchičha. Espiritu Santuqui Yooz puntuquiztan zumpacha intintazza, tjapa Yooz puntumi. Jalla nižtiquiztan učumnacaquiz intintazkatasacha.

¹¹ Zoñinacaqui persun kuzquiz persun pinsitanacami zizza. Yekja zoñiqui ultimu ana zizza. Jalla nižta irata Yooz Espiritu Santuqui Yooz Ejpž pinsitanacami zizza. Ana čjul zoñimi Yooz pinsitanaca zizi atasacha,

¹² Yoozqui učum kuznacquiz niž persun Espiritu Santo luzkatchičha, niž persun pinsita intintazkatajo. Ana criichi zoñž kuzqui Yooz pinsitanaca anapan intintazkati atasacha. Jalla nižta kuz učumnacaltaqui ana žejlča.

¹³ Wejrnacqui Yooz puntu intintazcu, ančhucaquiz Yooz pinsitanaca tjaajinchinča. Zoñiž tjaajinta jaru nižaza zizñi zoñž chawjc tawk jaru anal tjaajnuča. Pero Yooz Espiritu Santuž tjaajinta jaru, jalla niil tjaajnuča. Jaziqui Yooz pinsitanaca tjaajnuča Espiritu Santuž irpita crichinacžquin.

¹⁴ Jakzilta zoñit ana Yooz Espiritu Santuž irpitažlaj niiqui, Espiritu Santuž tjaajintanaca anaž catokča. Zumzu tjaajintanacažtakaz nayča. Jalla nižtiquiztan ana Espiritu Santuchiz zoñinacaqui anapanž Yooz tjaajintanaca intintazasača. Yooz Espiritu Santuž irpita zoñinacapankaz Yooz puntu tjaajintanaca intintazasača.

¹⁵ Espiritu Santuž irpita zoñinacaqui tjapa tjaajintanaca tantiyasača, Yoozquiztan tjonñi taku cjiču, už zoñžquiztan tjonñi taku cjiču, jalla nii. ¿Pero ana Espiritu Santuž irpita zoñinacaqui Espiritu Santuž irpita zoñž taku ana tantiyasača, nižaza criichi zoñinacžquiz Yooz puntu ana tjaajnasacha? ¿Kjažtiquiztan nižta cjesajo?

¹⁶ Yoozqui niž Espiritu Santuž cjen učumnacaquiz Cristuž pinsitanaca tjaajza. Jaziqui zizza. Cjijrta Yooz takuqui, tuž cjiča: “Anaž jecmi persun kuzquiztan Yooz pinsitanaca zizasacha. Jaziqui anaž jecmi Yoozquiz tjaajnasacha”.

3*ANA CRIICHI ZOÑINACAŽTAKAZ ANACHA KAMZQUI*

¹ Jilanaca, cullaquinaca, wejrcui ančhucaquiz tjapa Yooz puntu imazil tjaajzñi atuča. Ančhucqui imazi zuma intintazasača. Cristužquiz criichi cjenami Yooz Espiritu Santuž tjaajinta jaru ana zuma kamiñchucča. Persun kuzcama kamiñchucča, kolta ocjalanacažtakaz.

² Jalla nižtiquiztan wejrcui Cristuž puntuquiztan tsjii kjaž tjaajintanacakaz ančhucaquiz tjaajinchinča. Jaknužt tsjii wawaqui lichí licča, nižaza anaž čheriqui luli atča, jalla nižta irataž ančhucqui. Imazi Yooz tawk čjeri intintazasača. Imaziča Yooz tawk čjeri lujlžquinaqui ančhucqui.

³ ¿Kjažtiquiztan nižtajo? Ančhucča ana criichi zoñinacažtakazqui. Ančhucpora quintras pequiñchucča, nižaza ch'aas pequiñchucča, nižaza pjali cjičjiz pequiñchucča. Jalla nuž anawali kamcan iyaziča Yoozquin zuma sirwiñinacžhucqui. Nuž anawali kamcan, ana criichi zoñinacažtakazza.

⁴ Yekjapanacaqui ančhucaquiztan cjiča, “Wejrcui Pabluž t'akquiztanča”. Yekjapanacazti cjiča, “Wejrcui Apolos t'akquiztanča”. Jalla nuž chiichiican ana criichi zoñinacažtakaz kamča.

⁵ ¿Ject Apolosjo? ¿Ject Pablojo? Wejrnacaž Yooz taku paljaychiž cjen ančhucqui Jesucristužquin criichinchuccha. Wejrnacqui Yoozquin sirwiñkaztcha. Yoozqui zapa mayniž wejtnacaquiz sirwiz langz tjaachiča.

⁶ Jalla nižtiquiztan Yooz taku paljaychinča, tsjii zkal čhjaqui kalltažokazzi. Wiruñaquí Apolosqui ančhucquaz iya Yooz taku paljaychizakazza, jaknužt zkalquiz kjaztan jawiyaz, jalla nižta. Ultimquiziqui Yoozpachača zuma kamañchiz ančhucquaz cjiskatchiqui, tsjii zuma zkalažtakaz.

⁷ Jalla nižtiquiztan nii čhjacñimi nii jawiñimi anaž čhjulumi. Yoozpanča chekanaqui. Yoozqui žoñinacž kuzquiz langža, tsjii čhjecta žkalažtakaz zuma pakzjapa.

⁸ Čhjacñimi jawiñimi tsjiikazza ninacaqui. Yoozqui zapa mayñižquiz pacaquiča niž langztiquiztan jama.

⁹ Wejrnacqui Yooztajapa langžni mazinactcha. Ančhucqui Yooz langžta yok cuntiuchuccha. Nižaza ančhucqui Yooz kjuyta kjuya cuntiuchuccha.

YOOZTAJAPA LANGZ PUNTU

¹⁰ Yoozqui niž kuzcama wejrnacqui apóstol puestuquiz utchiča. Jalla nekztan Yooz taku paljaychinča, žoñinaca Jesucristužquin criyajo. Wejrnacqui kjuya kjuyñi maestružtakaztcha. Yooz kjuy simintu langzinča. Nekztan Yooziž tjaata langzquiztan jama yekjapaqui Yooz kjuya pirkichiča. Weriž kalltita kjuy simintuntuñ jakziltat pirkachaža, zumpachaž pirkiz waquiziča.

¹¹ Wejrnacqui Jesucristuž puntuquiztanpankaz tjaajinchinča. Jalla nii tjaajintaqui Yooz kjuy simintužtakazza. Tsjemat simintuqui anača Yooz kjuyjapaqui.

¹² Nii Yooz kjuy simintuntuñ punta punta pirkitamiz cjesača. Koržtan, paaztan, zuma mazačtan, jalla ninacžtan pirkitaž cjesača. Nižaza pirkitaž zakaz cjesača tabližtan, cañžtan, pjitžtan jalla ninacžtan.

¹³ Pero zapa mayniž langžtaqui kjanapacha tjeježtaž cjequiča Yooz pjalz tjuñquiziqui. Yoozqui ujtžtanžtakaz tankataquiča. Nii ujtžtan zapa mayniž langžta yatizinskataquiča, zuma langžta, ana zuma langžta, jalla nii.

¹⁴ Jakziltiž langžtat ujtžtan tankattiquiztan tjurachaža, jalla niiqui zuma pactaž cjequiča.

¹⁵ Jakziltiž langžtat ujsnačhaja, jalla niiqui ana pactaž cjequiča. Pero nii žoñž wirakaz infernuquiztan liwriřta cjequiča, niž langžta pertissi cjenami.

CRICHI ŽOÑINACAQUI YOOZ TIMPLU CUNTACHA

¹⁶ Ančhucqui Yooz timplu cuntacha. Yooz Espiritu Santuqui ančhucquiz kuznacquiz kamča. ¿Jalla nii ana ziz ančhucjo?

¹⁷ Yooz timpluqui Yooztajapapanča. Ančhucpachača Yooz timpluchucqui. Jalla nižtiquiztan jakziltat ančhuc akachaža, nii ančhuc akñi žoñiqui zakaz akta cjequiča; Yooziž castictaž cjequiča.

ANA CRICHI ŽOÑINACŽ ZIZTAQUI

¹⁸ Ančhucqui anaž jecžquizmi incallskata. Jakziltat ančhucquiztan žoñinacž tjaajintanaca zuma zizñižlaja, jalla niiqui nii tjaajintanacžquiz anača kuz tjaazqui. Pero Yooz puntuquiztan tjaajintanacžquizkaz kuz tjaaz waquiziča, nekztan litum zizni žoñi cjequiča.

¹⁹ Žoñž kuzquiztan ziztaqui zumzu ziztažtakazza Yooz yujcquiziqui. Cjijřta Yooz takuqui tuž cjiča: “Jakzilta žoñit žoñiž pinsita jarukaz kamčhaj niiqui, jalla nižta kamtiquiztan Yooziž tantaž cjequiča, casticta cjisjapa”.

²⁰ Nižaza cjijřta Yooz takuqui, tuž cjiča: “Tjapa ana criichi žoñinacž pinsitanaca inakazza. Jalla nii zizza Yooz Jiliriqui”.

²¹ Jaziqui anača žoñž kuzquiztan tjaajintaqui kuzquiz sint'izqui, “Jalla nii žoñiqui zumaž tjaajinča”, cjicanaqui. Yoozqui tjapa ančhucquiz tjapa zumanaca tjaacha.

²² Tjappachača ančhucaltaqui, Pablumi, Apolosmi, Pedrumi, tii muntuquiz željñimi, žetimi, ticzmi, tii anžta željñimi, tii jazta željñimi, tjappacha ančhucaltača, Yoozquin sirwiz yanapzjapa.

²³ Nižaza ančhucča Cristužtjapaqui. Nižaza Cristuča Yooz Ejpžtjapaqui.

4

YOOZ SIRWIZ PUNTU

¹ Wejrnacqui Yooz sirwiñi žoñinacakaztcha. Wejrnacaž Yooz sirwan, Yoozqui wejtnacaquiz niž tuquita chjojzaka pinsitanaca tjaajinchiča, parti žoñinacžquiz tjaajinajo. Jalla nuž ančhucqui wejtnaca puntuquiztan pinsiz waquiziča.

² Jakziltižquiz Yoozqui tjaajinčhaja, jalla nii tjaajintacama parti žoñinacžquiz tjaajinčanča nii žoñiqui. Jalla nužupan waquiziča.

³ Weriz tjaajintaqui yatisinžtaž cjequičha. Pero ančhucqui weriz tjaajinta yatisinžnaquič niiqui, čhjul žoñimi weriž tjaajinta yatisinžnaquič niiqui, wejtquiz anaž impořtičha. Werjpacchami ultimu ana yatisinžnasachha. Yoozkazza ultimu yatisinžskatfiiqui.

⁴ Wejrqui persun kuzquiz ana čhjul uj wachučhaj niimi, Yooz yujcquiziqui cunamizłani wejr ujchiztni. Ultimquiziqui Yooz Jiliriqui wejr yatisinžskataquičha.

⁵ Jalla nižtquiztan ančhucqui Yooztakaz anaž yekjapanacžquiz tantiiž waquizičha, ima pjalz tjuñi tjonanaqui, nižaza ima Jesucristo Jiliriz tjonanaqui. Ultimquiziqui Jesucristo Jiliriqui chjojta anawalinaca kjanapacha tjeeznaquičha. Nižaza tjapa žoñinacž kuzquiz pinsitanaca tjeeznaquičha, zumpacha pjalzjapa. Jakziltami zuma lijituma ulnachhaja, jalla niiqui honorchiz cjequičha; Yooziž tjaata honoržtan.

MITARAZI KUZIZ ŽOÑINACA

⁶ Jilanaca, cullaquinaca, Apolužtan wejttañ jalla nii wejtnaca puntuquiztan chiyučha, ančhucquiz tjaajnzajo. Wejtnacaž tjaajntami nižaza kamtami Yooz tawk jaručha. Jalla nuž nayžcu, ančhucmi Yooz tawk jaru kamñi kuzziz cjee. Anačha mitarazi kuzziz cjiicji-isqu, “Wejt Yooz taku tjaajiñiqui juc'ant zumačha; am Yooz taku tjaajiñiqui anal pecučha”, cjiicanaqui.

⁷ ¿Ject ančhuc t'aka parti žoñinacžquiztan tucquin uchjo? Ančhuc t'akaž juc'ant waližłaj niiqui, Yoozpankaz juc'ant wali cjskatchičha. Ančhucqui anačha persunpacha wali cjisnasachha. Jalla nižtquiztan anačha atinaru kuzziz chiichiziqui, “Juc'ant waličha wejt t'akaqui”, cjiicanaqui.

⁸ ¿Ančhucqui wejrnac wirquin ecchinčhucjo? ¿Ančhucqui tjapa Yooz puntunaca zizjo? ¿Wali chwajc jilirinacažtakaz ančhucqui kuzquiz sint'ejo? ¿Wejrnac wirquin ecchinčhucjo? Ultimquiziqui ančhucqui anačha nižta. Jalla nižta cjenauqui walipanž cjesachha. Neesaj wejrnacmi ančhuc partiquiz cjiwčhani, ančhucatan chica jilirinaca cjisjapa.

⁹ Ančhucqui nayčha, Yoozqui wejrnac apostolonaca wirquin ectachha, conta cjisjapa utžta žoñižtakaz, jalla nii. Žoñinacami anjilanacami nižaza tjapa tii muntuquiz žejłñinacami wejtnacaquiz chekža. Ana wali žoñinacažtakaz wejtnacaquiz chekža.

¹⁰ Wejrnacaž Jesucristuž puntuquiztan paljayan ana criichi žoñinacqui cjiñičha, “Zumzu žoñinacčhucčha”. Nuž cjanaz wejtnacaquiz iñarčha. Ančhuczi persun puntuquiztan pinsiñchucčha, “Cristuž cjen zuma zizñi žoñinacčha wejrnacqui”, cjiicanaqui. Wejrnac apostolanacaqui humilde kuzzizičha. Ančhuczi persun puntuquiztan pinsiñchucčha, “Tjup kuzzizičha”, cjiicanaqui. Wejrnacqui iñartačha. Ančhuczi rispitta žoñižtakazza. Ultimquiziqui ančhucqui anačha nižta.

¹¹ Anzcama wejrnac apostolanacaqui ancha sufručha čhjerquiztanami kjazquiztanami, nižaza zquitzquiztanami. Nižaza wejrnacqui kichtačha. Nižaza anačha wejrnacqui žejłž kjuychiztqu.

¹² Nižaza persun kjaržtan ochañcama langznučha. Žoñinacaž wejtnacaquiz iñaranami zuma tawkžtan kjaaznučha. Nižaza žoñinacaž wejtnacaquiz ana wali paanami, zuma tjurt'iñi kuzziz awantučha.

¹³ Žoñinacaqui wejtnaca puntuquiztan quintra čhiičha. Jalla nuž quintra chiyanam, wejrnacqui zuma pazinziz kuzziz čhiizinučha. Nižaza žoñinacaqui wejtnacaquiz tsjii cjujchi irataž cherčha, nižaza wirquinpanž tewjčža tsjii juc'ant ana zuma kamñi žoñižtakaz. Jalla nuž wejtnacaquiz watačha.

¹⁴ Jalla nuž cjiyržcučha ana ančhuc azkatzjapa, antiz ančhucquiz čhiizinzcučha wejt k'ayi maatinacaž cjen.

¹⁵ Weriz Jesucristuž puntuquiztan paljaytiquiztan, ančhucqui Jesucristužquin criich-inčhucčha. Jaziqui wejrqui ančhuc ejp cuntitčha. Kjažtamit ančhucquiz wacchi tjaajiñinaca, nižaza irpiñinaca želačhani, tsjii ejpchizčhucakazza.

¹⁶ Jalla nižtquiztan jaknužt wejr zuma kamučhaja, jalla nižta ančhucqui zuma kamz waquizičha.

¹⁷ Jalla nižtquiztan wejt k'ayi Timoteo cuchanzcučha, ančhucquiz cjuñkatzjapa, jaknužt wejrqui Jesucristo sirwican kamtučhaja, jalla nii. Nižaza tjapa kjutñi tjapa iclizziz žoñinacžquizimi tjaajnučha, jaknužt žoñinacžlaqui Cristuž kamañchiz kamzłaja, jalla nii. Jalla nuž Timoteoqui ančhucquiz cjuñkataquičha. Timoteoqui zuma cumpliñi žoñičha. Timoteoqui weriz cjen Jesucristužquin criičičha.

¹⁸ Yekjapanacaqui ančhucquiztan mitarazi kuzziz cjisinčhucčha. Tuz pinsich-inčhucčha, “Pabluqui anapanž tjonžñi tjonasaka”, cjiican.

¹⁹ Yooz munan, wejrqui wajillaž tjonachha. Nekztan wejrqui nii mitarazi kuzziz žoñinacaž langžta obra pajachha, nižaza jaknižta kamañchizłaja, jalla nii. Nii žoñinacaž čhiitami wejtquiz anaž impořtičha.

²⁰ Yooz mantuquiz kamcan, Yooz aztan zuma kamstanča. Jalla niiča chekanaqui; chiita takunacakazza anaž chekanaqui.

²¹ ¿Jaknužt ančhuc pecjo? ¿Ančhuc casticzjapa, wejrqui tjonz waquiziya? ¿Už humilde kuzziz k'ayachtican tjonz waquiza ja'? ¿Weriz tjontanaqui kjaž cjiñiz pec ančhucjo?

5

ANA WALI KAMTA QUINTU

¹ Jilanaca, cullaquinaca, wejtquin tsjii ana wal quintu tjonchiča, ančhucquiztan tsjiiqui niž wiri maa persun tjun tjacsiquiča. Jalla niiqui juc'ant anawaliča. Ana criichi zoñinacami ana nuž paača.

² Jalla nuž cjenami ančhucqui tirapan mitarazi kuzzizčhucča. Pero ančhucalaqui llaquit kuzziz cjis waquiziča. Jalla nižta ana wali paañi zoñiqui ančhucquiztan jaytitaj cjila.

³ Wejrqui ančhucatan ana chica želuča. Jalla nuž cjenami, kuzquiz llaquita sint'izcuča. Nuž sint'izcu wejrqui nii uj paañi zoñž puntuquiztan tantiichinča, ana wali paača, jalla niiqui.

⁴ Ančhuczti wejt llaquita kuz cjuñžcan, Jesucristo Jilirž tjuuquiz ajcznaquiča nii uj paañi zoñž puntu tantiizjapa. Jalla nuž ajczcu, Jesucristo Jiliriqui niž aztan ančhucatan chicaž cjequiča.

⁵ Nekztanaqui ančhucqui nii uj paañiqui Satanasquiz intirjaquiča, niž curpu t'akjisajo. Niž curpu t'akjistiquiztan cunamit niž kuzqui azquichta cječhani. Jalla nekztanaqui Jesucristuž tjontanaqui niž animuqui liwriita cječhani.

⁶ Ančhucami mita kuzziz cjisqui anawaliča. Jalla tii chiita taku cjuñžna, “Koloculla liwraturaqui tjapa t'anti maza t'amcha”. Jalla nižta iratača nii anawal zoñiqui ančhucatan chica kamcan parti zoñinacžquiz anawali cjskatasacha.

⁷ Tjapa ančhucami anawali kamañanaca eca, zuma kamañchizpan cjisjapa. Jesucristuqui učhum cuntiquiztan tsjii wilanažtakaz ticziča, učhum ujquiztan ana casticta cjejajo. Jalla nižtiquiztan ančhucqui ana ujchizza Yooz yujcquiziqui. Tsjii zuma t'anti maza cuntičhucča.

⁸ Jaknužt pascua pjijsta paañinaca zuma kamañchiz cjis pecčhaja, jalla nižta irata učhumqui zuma kuzziz cjis waquiziča, nižaza Yooz kuzcama litituma kamz waquiziča. Anazuma kuzziz, nižaza anazuma kamañchiz, jalla nižta kamz ana waquiziča.

⁹ Tuquiqui cartiquiz cjižžquichinča tuž cjican: “Adulterio paañinacžquiztan jaytaquiča, nižaza nižta paañinacžtan anaž cumpant'iz waquiziča”.

¹⁰ Jalla nuž cjižžcu wejrqui ultimupan anal cjiwča, tjapa ana criichi adulterio paañinacžtan ana želajo. Ana criichi zoñinacaqui anawaliž paača, adulteriuquiz ojklayča, nižaza cusananacžquiz kuz tjaača, nižaza tjañi zaača, nižaza zoñiz paata yooznaca sirwiča. Tii muntuquiz nižta anawali paañi zoñinaca panž željča.

¹¹ Yekjapanacazti “Yoozquin criyuča” cjican, anawali paača; adulteriuquiz ojklayča, nižaza cusananacžquiz kuz tjaača, nižaza zoñiz paata yooznaca sirwiča, nižaza anawal takunaca joojooča, nižaza licča, nižaza tjañi zaača. Jalla nižta anawali paacan jakziltat Yoozquin criyuča” cječaj niiqui, jalla nižta zoñinacžtan ana ojklayaquiča. Nižaza anača nižta paañinacžtanaqui čherimi lujlsqui. Panž ana cumpant'iquiča.

¹² Wejrqui ana criichi zoñinaca anača wejtlaqui tantiistanqui. Antiz učhumqui icliz zoñinaca tantiistanča, ujchiz ana ujchiz, jalla nii.

¹³ Nii uj paañi zoñi jaytitaj cjila. Pero Yoozqui nii ana criichi zoñinaca tantiyaquiča, casticzjapa.

6

QUIJZ PUNTU

¹ Jakziltat tsjii jilž quintra quijačhaja, jalla niiqui ana criichi juez yujcquiziqui anaž quijz waquiziča. Pero criichi jilanacžquin quijspanča.

² Jesucristuž tjontan criichi jilanacaqui tjapa ana criichi zoñinacž puntu jusjisaquiča. ¿Nii ana ziz ančhucjo? ¿Tjapa ana criichi zoñinacž puntu jusjisaquiča niiqui, kjažt tsjii quija ana azquichi atasajo?

³ Criichi zoñinacaqui anjilanacž puntu zakaz jusjisaquiča. ¿Nii ana ziz ančhucjo? Jaziqui anjilanacž puntu jusjisaquiča niiqui, ¿kjažt tii muntuquiz željñi quija ana azquichi atasajo?

⁴ Ančhucquiz quijanaca želaquiča niiqui, ¿kjažt ančhucqui ana criichi zoñžquin quijjo? Criichinacžquiztanaqui anaž čjulumi ninacaqui.

⁵ Jalla nuž tii puntuquiztan čhižinuča ančhuc azajo. Ančhucquiz quijanacača anaž cjičhuc. ¿Tsjii quija želan, ančhucquiztan anaj azquichi atñi zoñi želj, kjažtatajo?

⁶ Ana criichi jilirž yujcquiz quijas, žkjažtatajo?

⁷ Quija želanaqui, kjanapacha tjeeža, ančhucaquiz ana walicha, jalla nii. Nii criichi jilaž uj paatiquiztanaqui nuž pasinza paachucakazza. Nižaza awantichucakazza.

⁸ Pero ančhucpachača persun criichi jilanacž quintra payiñchucqui, ana walinaca paacan nižaza tjañi zaacan, jalla nuž.

ARAJPACHQUIN KAMZ PUNTU

⁹ Ana wali kamañchiz žoñinacaqui anaž arajpach wajtquin Yooztan chica kamasacha. Žjalla nii ana ziz ančhucjo? Jaziqui ančhucqui anača incallta cjisqui. Arajpachquin anaž okaquiča tii žoñinacaqui: adulteriuquiz ojklayñinaca, nižaza žoñiž paata yooz sirwiñinaca, nižaza pampa cjićjiñi zultirunaca, nižaza luctakpora tsjii luctakžtan tsjii maatakžtantakaz cjeyasñinaca.

¹⁰ Nižaza tjañinaca, nižaza cusasanacquin kuz tjaañinaca, nižaza licchinaca, nižaza quintra chiičhiñinaca, nižaza žoñinacžquiztan kjañz pecñinaca. Jalla tjapa nižta žoñinacaqui arajpachquin anapan okasača Yooztan wiñaya kamzjapa.

¹¹ Ima Yoozquin criicanaqui yekjap ančhucqui nižtatača. Anziqui Jesucristo Jilirž cjen, nižaza Yooz Espiritu Santuž cjen ančhuca ujnacaqui pertuntacha. Jalla nižtiquiztan ančhucqui Yooz partiquiz cjišičha, nižaza Yooz yujcquiziqui walikaz ana ujchiz cjišičha ančhuca ujqiztan liwriita.

YOOZTAJAPACHA UCHUMQUI

¹² Jilanaca, cullaquinaca, tsjiilla cjesača. Yekjapa ančhucqui chiičhani, criichi žoñiqui liwriitaž cjen čjulu paazmi paasača. Pero čjulu paazmi zuma kamañchiz kamzjapa anaž yanapča. Čjulu paazmi paasača, pero čjul paazami ana wejt kuz atipskatz pecuča.

¹³ Tužučha razunaqui. Čjeriqui pjuchjapača. Nižaza pjuchqui čherijapača. Ulimquiziqui Yoozqui piscpacha liwž tucužinzkataquiča. Tužuzakazza razunaqui, ućhum persun curpuqui anača adulterio paazjapaqui. Antiz ućhum curpuqui Jesucristo Jiliržquiz sirwiñijapača. Nižaza Jesucristo Jiliričha ućhum curpuž mantñiqui.

¹⁴ Yooz Ejpqui Jesucristo Jiliri jachatatskatchičha. Nižaza Yoozqui niž persun aztan ućhum curpunaca jachatatskataquiča.

¹⁵ Ućhum curpunacaqui Jesucristužtajapača. Žjalla nii ana ziz ančhucjo? Jalla nižtiquiztan žkjažt criichi žoñiž curpuqui putirii maatakžquin tjaata cjesajo? Anapanž cjuhca.

¹⁶ Jakzilta žoñit putirii maatakžtan adulterio paačhaj niiqui, nuž pucultan tsjii curpuchiztakaz cjišsa. Cjijrta Yooz takuqui tuž cjiča: “Luctakžtan maatakžtan lucutiñi cjequič niiqui, tsjii curpuchiztakaz cjišnaquiča”. Žjalla nii Yooz taku ana ziz ančhucjo?

¹⁷ Nižaza jakzilta žoñit persun kuz Jesucristo Jiliržquin tjaaquič niiqui, nuž pucultan tsjii kuzziz cjišsa.

¹⁸ Adulterio cjejisqui anapanž pecalla. Jalla nižta paaquič niiqui, persunažtajapa quintraž paača. Parti paata ujnacaqui, anaž nii adulterio ujtapachaqui.

¹⁹ Ančhuca curpuqui Yooziž tjaata Espiritu Santuž kjuya timplučha. Jalla nižtiquiztan Espiritu Santuqui ančhucaquizpacha žejlča. Žjalla nii ana ziz ančhucjo? Ančhucqui patrunchizpanča.

²⁰ Yoozqui ančhuc kjayčičha, wali preciužtan, Jesucristuž ljocžtan. Jalla nižtiquiztan ančhuca curpuquiztanami kuzquiztanami Yooztajapa honora waytiz waquiziča. Jalla nuž pizcpacha Yooztajapanča. Jilanaca, anača uj paazqui.

7

ZALZ PUNTU

¹ Jaziqui amiž cjiirta pewcžtanacquiz kjaaznasacha. Jaziqui tii chiižinuča. Ana zalzqui walikazza.

² Jalla nuž cjenami tii timpuquiz zalz waquiziča, ana adulterio ujqiz tjojtšjapa. Jalla nižtiquiztan zapa luctaka tsjaa maatakžtan zalz waquiziča. Nižaza zapa maataka tsjii luctakžtan zalz waquiziča.

³ Tsjii lucuqui zuma lucuža cjišpanča persun maatakžtanaqui. Nižaza tsjaa tjunqui zuma tjunaža cjišpanča persun luctakžtanaqui.

⁴ Tjuna curpuqui persun lucžtajapanča. Nižaza lucž curpuqui persun tjunaltajapanča.

⁵ Nižaza porapat lucutiñi curpu tjaa-asaquiča. Porapat tsjii acuerduquiz luzasaquič niiqui, tsjii kjažtallaž nicasasača, Yoozquin mayizizquin kuz tjaazjapa. Nii acuerduquiz luzta timpu wattan, nii lucutiñiqui ana iya nicz waquiziča. Tira nicaquič niiqui persun curpu ana ewjazñi atačhani, nekžtan Satanás diabluqui nii ana ewjazñi attiquiztan nižaza nictiquiztan adulteriuquiz tjojtškatasača.

⁶ Nekztan jalla tuž chiizinuča, pero anal ultimu mantuča.

⁷ Wejrqui ana zalzniča. Jalla niža kamñiz cjičhaj tjapa ančhucqui, jalla nižtal pecuča wejrqui. Pero Yoozqui zalz kamaña, nižaza ana zalz kamaña tjaača. Jalla nižtiqiztan zapa mayni niž persun Yooziž tjaata kamañ jaru kamstanča. Jalla niiqui walikazza.

⁸ Zultiržquizimi, žew luctakžquizimi žew maatakžquizimi tuž chiizinuča ančhucquiz. Wejr irataž cjičhaj ančhucqui, ana zalzñi. Jalla niiqui waliž cjesača.

⁹ Anchapanž zalz pecčhaj niiqui, zalzna cjichucača. Ana zalcanpacha nižaza ancha maataka peccan želasaž niiqui, ujquiz tjojtznasača. Jalla nuž cjenaqui zalzla cjichucapanikazza.

JALJTIZ PUNTU

¹⁰⁻¹¹ Zalzi zoñinaca, ančhucquiz wejr mantuča, jalla tuž. Tsjaa tjunqui naaža persun luctakžtan ana jaljtiz waquiziča. Nižaza tsjii lucuqui niž persun tjunatan ana jaljtiz waquiziča. Jaljtaquiz niiqui, ana iya yejkžtan zalznasača. Pero nii lucutiñ zoñiqui porapat pertunas waquiziča. Jalla tii mantitaqui anača weriž mantitakazzi, Yooz Jiliriz mantitapanča.

¹² Parti zoñinacžquiz chiizinuča, tii chiizintaqui ana Yooziž mantitača. Tsjii criichi zoñiqui ana Yoozquin criichiñ tjunchizlaj niiqui, nižaza naa tjunqui lucutiñipan kamz pecčhaj niiqui, nii criichi lucuqui ana jaljtiz waquiziča.

¹³ Nižaza tsjii criichi maatakaqui ana criichi lucchizlaj niiqui, nižaza naaža lucuqui lucutiñipan kamz pecčhaj niiqui, naa criichiñ tjunqui ana jaljtiz waquiziča.

¹⁴ Naaža cjen Yoozqui naaža ana criichi lucu cwtiča. Nižaza Yoozqui ana criichiñ tjun cwtiča naaža Yoozquin criichi lucchiz cjen. Ana niža cjequiz niiqui, nii lucutiñ maatinacaqui ana criichi zoñinacž maatinacažtakaz cjesača. Pero Yoozqui nii lucutiñ maatinaca cwtiča.

¹⁵ Pero tsjii ana Yoozquin criichi lucumi už tjunmi jaljtizpanž pecčhaj niiqui, tsjiikaj jaljtla cjichucača. Jalla niža wataquiz niiqui nii Yoozquin criichi lucu cjuu už tjun cjuu jaljtasača, porapat zuma kamasajo, ana wali kamchuca cjenaqui. Yoozqui učum criichinaca kjawzicha, zuma kamajo.

¹⁶ ¿Criichi lucuqui niž ana criichiñ tjun ultimu Yoozquin criiskatasajo? Ana zizzucača. ¿Nižaza criichiñ tjunqui naaža ana criichi lucu ultimu Yoozquin criiskatasajo? Ana zizzucača.

YOOZIZ TJAATA KAMAÑ JARU KAMZ WAQUIZICHA

¹⁷ Zapa mayniqui Yooziž tjaata kamañ jaru kjažtachichimi kamz waquiziča. Yooziž kjawžtaž cjen tsjii wira kamchinchučha. Jalla nii wira ana Yooz quintražlaj niiqui, niža kamzquiz cjesača. Jalla nužupan mantuča tjapa iclizziz zoñinacžquin.

¹⁸ Criiz oraqui jakziltat judio zoñž chimputažlaj niiqui, chimputa žela. Nižaza criiz oraqui jakziltat ana chimputažlaj niiqui, ana chimpuskata.

¹⁹ Chimputamani ana chimputamani anaž importiča. Yooz mantitacama kamzqui, jalla niičha importaqui.

²⁰ Yoozquin criižcuqui čjul zoñimi čjul kamañchizlaja, jalla nii kamañquiz cuntintu žejlkazza.

²¹ Criiz oraqui zoñž mantuquiz žejlcanami, amqui ana kuz turwayskataquiča. Nekztan, jalla nii zoñž mantuquiztan liwriita cjesaž niiqui, pan ulnaquiča, liwrii cjisjapa.

²² Jakzilta criichi zoñit zoñž mantuquizlaj niiqui, nii zoñž mantuquiz tira žejlcanami, cjuñzna, Jesucristo Jiliriz liwriitača, nii. Nižaza jakzilta criichi zoñit zoñž mantuquiz ana žejlčhaja, tii cjuñzna, Jesucristuž mantuquiz žejlča, nii.

²³ Yoozqui ančhuc kjaychiča wali jila preciužtan. Cristuž ljokča nii preciuqui. Jalla nižtiqiztan zoñž mantuquiz anača cjiskatsqui.

²⁴ Yoozquin criižcuqui čjul zoñimi čjul kamañchizlaja, jalla nii kamañquiz žejlz waquiziča. Kjažtachichimi cuntintu cjequičha Yooztan chica kamchiz cjen.

ZALZ PUNTU

²⁵ Yoozqui wejtquiz ana taku tjaachiča zultirunacž puntuquiztan. Pero, wejrqui tuž chiizinuča. Nižaza cjuñzna, Yoozqui wejtquiz apóstol kamaña cumpjiichiča. Nižaza nii apóstol kamañ jaru panž kamuča. Wejrqui Yooziž illztitča nižquin sirwizjapa. Jalla nižtiqiztan weriž chiizinta tawkquiz kuz tjaaz waquiziča.

²⁶ Tuž chiizinuča. Tii timpuquiz kamzqui ch'amača criichi zoñinacžtajapaqui. Jalla nižtiqiztan čjul kamañchizlaja, jalla nii kamañquiz žejlz waquiziča. Zalzižlaja, zalzi žela; ana zalzižlaja, ana zalz waquiziča.

²⁷ Jakziltat tjunchiz cječhaja, anaž persun maatakžtan jaljtiz waquiziča. Nižaza ana zalzi zoñiqui maataka kjurz ana waquiziča.

²⁸ Pero jakziltat zalznačhaja, jalla nii zalžtaqui anača ujqui. Nižaza jakzilta turt zalznačhaja, jalla nii zalžtaqui anača ujqui. Tii ch'ama kamz timpuquiz zalžñinacžquiz juc'ant llaquinaca cjequiča. Wejrqui anaj nižta llaquita kamjaa ančhuc cjiwčhiya.

²⁹ Jilanaca, cullaquinaca, tii walja ch'ama kamz timpuqui ana ažka tjuraquiča. Jalla nižtikuiztan tekztan nawjčhuc tjunchiz zoñinacaqui anaž tjunaquiz juc'anti kuz tjaaquiča. Antiz Yoozquin juc'anti kuz tjaaquiča.

³⁰ Nižaza llaquita zejlñi zoñinacaqui anaž ancha llaquisaquiča. Yooztan kamčhiž cjen cuntintu cjequiča. Nižaza čhjulquiztan chipsñi zoñinacaqui anaž juc'anti kuz tjaaquiča chipchipsquiziqui. Yoozquin juc'anti kuz tjaaquiča. Nižaza cusasanaca kjayñi zoñinacaqui anaž juc'anti kuz tjaaquiča kjayta cusasanacquiz.

³¹ Tii muntumi nižaza tii muntuquiz zejlñimi tucuzinzaquiča. Jalla nižtikuiztan jakziltat tii muntuquiz želinchiz cječhaja, anaž nii želinchizquiz kuz tjaaquiča. Antiz Yoozquin juc'anti kuz tjaaquiča.

³² Ančhucqui tii muntu kamcan kuz turwayzquiztanaqui liwriitakaj cjeejal cjiwčhiya. Ana zalžñi zoñinacaqui Yooz kamañquizkaz kuz tjaašpanča; Yooz kuz cuntintu cjskatz pecča.

³³ Zalžñi zoñinacazti Yoozquin sirwicanami tii muntu kamañquiz kuz tjaača, persun tjun cuntintu cjisjapa.

³⁴ Nižaza zalzi maatakž kamañžtan zultir maatakž kamañžtan anača tsjiikaz. Ana zalzi maatakqui Yooz kamañquizkaz kuz tjaača. Curpumi kuzmi Yoozquin sirwizquin tjapa kuz tjaača. Pero zalzi maatakazti Yoozquin sirwicanami tii muntu kamañquiz kuz tjaača, persun lucu cuntintu cjisjapa.

³⁵ Tii weriž čhižintaqui ančhucalta wali cjisjapača, anaž ančhuca atajzjapa. Nižaza tii weriž čhižintaqui ančhucaquiz zuma kami yanapzjapača, nižaza Yoozquinpankaz tjapa kuz tjayi yanapzjapa.

³⁶ Tsjiilla cjesača, zalz puntuquiztan zakaz. Jakzilta zoñžtat tsjaa majt želačhaja, zalz irarquiz tjonchiñ, nižaza ancha zalz pecchiñ. Ana chajalztiquiztan niž kuz turwayskatčhaj niiqui, tuž čhižinuča. Niž tur chjalz wali tantižcu, chjalznasača. Nii chjalzqui anača ujqui.

³⁷ Tii puntu iyal čhižinuča. Naa tura ejpqui ana chjalz pecčhaj niiqui, ana chjalzucaca. Walikaz cjesača. Naa turaž cjen, ana jarita cjesaž niiqui, nižaza niž persun kuzquiz ana chjalz pinsitacamažlaj niiqui, ana chjalzucaz cjesača. Jalla nii ana chjalzqui waliž cjesača.

³⁸ Jaziqui nii chjalzñi zoñiqui walikaz paača. Pero nii ana chjalzñi zoñizti juc'ant walikaz paača.

³⁹ Zalžñi maatakaqui persun lucžtan kamaquiča, čhjulorat ticznačhaja, jalla niicama. Jalla niiqui liy jaruča. Jalla nuž lucu ticzi cjenaqui naa žew žonqui yekja lucžtan zalznasača, pero Yoozquin criichi zoñizakaz cjesača.

⁴⁰ Pero naa žew žon ana zalznaquiz niiqui, juc'ant cuntintu cjequiča. Jalla nuž pinsuča wejrqui. Nižaza Yooz Espiritu Santuča wejt kuzquiziqui, weriž pinsita zuma cjisjapa.

8

ZOÑIŽ PAATA YOOZNACQUIN TJAATA ČJERI PUNTU

¹ Tsjiilla cjesača, zoñiž paata yooznacquin tjaata čjeri puntuquiztan. Ančhucqui cjiča: “Tjapa wejrnacqui nii puntuquiztan zizuča”. Pero wejr cjiwča, jakziltat “Wejrtča ziziñtqui”, cječhaj niiqui, mit kuzziz cječhani. Nižaza jakziltat zuma munaziñi kuzziz cječhaj niiqui, parti criichi zoñinacazquiz yanapstanča zuma kamañchiz cjeajajo.

² Jakziltat persun kuzquiz pinsican: “Ultim weraral zizuča”, cjian cječhaja, jalla niiqui ana zuma zizza. Anapanž ultim werara zizasacha.

³ Jakziltat Yoozquin tjapa kuz tjaačhaja, Yoozqui nii zoñi pajča niž maati cunta.

⁴ Jaziqui nii zoñiž paata yooznacquin tjaata čjeri puntuquiztan, tuž cjiwča. Zoñiž paata yooznacaqui anapanča ultim Yoozqui. Nižtikuiztan anača čhjulumi. Werar Yoozqui zintallapanikaz zejlča.

⁵ Tii muntuquiz zejlñi zoñinacž yooznacaqui wacchiča. Ana criichi zoñinacaqui tii yokquiz zejlñimi nižaza tsewc arajpachquin zejlñimi cjiča, “Niiča Yoozkaz”, nižaza “Niiča učhum jiliriqui”, panž cjiča.

⁶ Učhumnacalta tsjii werar Yoozkaz zejlča. Tsjii Yooz Ejp zejlča. Niiqui tjapa zejlñinaca paachiča. Nižaza učhumnacaqui nižtajapača. Nižaza tsjii Jesucristo jilirikaz zejlča. Niž cjen tjapa zejlñinaca zejlča, nižaza niž cjen učhumnacaltaqui ew žejt kamañ zejlča.

⁷ Zoñiž paata yooznac puntuquiztan yekjap criichi zoñinacaqui ana zuma intintičha. Tuquita yekjapanacaqui ančhucaquiztan zoñiž paata yooznaca sirwiñitačha. Jalla nižtiquiztan anziqui yooznacquiz tjaata čheri lujlcan, nii paata yooznacquin pinsičha, nižaza persun kuzquiz sint'ičha. Jalla nižtiquiztan nii čheri lujlchiž cjen ultim Yooz quintra uj paacha.

⁸ Yooz yujcquiziqui čheri lujlchi cjenami ana čheri lujlchi cjenami anaž importičha. Jakziltat čjul čherimi lujlčhaj niiqui, nii čherquiztan anaž tsjan Yoozquin kuzziz cjesačha. Nižaza jakziltat ana tjpaman čheri lujlčhaj niiqui, nii ana tjpaman čheri lujltiquiztan ana upa Yoozquin kuzziz cjesačha.

⁹ Pero zoñiž paata yooznacquin tjaata čheri lujlquiztan cwitazaquičha, ana tsjii ana zuma intintiñi criichi jila ujquiz tjojskatzjapa.

¹⁰ Ančhucqui zizza, zoñiž paata yoozqui anačha čjulmi, jalla nii. Nižaza ančhucqui zoñiž paata yooznacquin ana sint'ičha. Pero yekjap jilanacazti tirapan zoñiž paata yoozquin kuzquiz sint'iskatčha, ultim Yoozquin criichi cjanami. Jaziqui yekjap ančhucaquiztan zoñiž paata yooz timpluquiz čheri lulasačha. Pero tsjii jilaqui ančhuc cheržcu lujl zakaz pecasačha, aunquimi nii zoñiž paata yoozquin sint'icanami. Jalla nižtiquiztan nii zoñiž paata yoozquin sint'ičha jilaqui ultim Yooz quintra uj paasačha, nii zoñiž paata yoozquin tjaata čheri lujlžcu.

¹¹ Jaziqui ančhucaž lujltiquiztan nii criichi jilaqui werar Yoozquiztan zarakskatčha. Jesucristuqui nii jilž laycu ticzičha, jalla.

¹² Pero ančhucqui nii jilž kuz ana wali cjskatčha. Jaziqui nii jilž quintrami uj paacha, nižaza Cristuž quintrami uj paacha.

¹³ Jalla nižtiquiztan zoñiž paata yoozquin tjaata čheri lujlchiž cjen wejt jila ujquiz tjojskatasaz niiqui, anapan nii čheri lujlž pecučha. Wejrqui anapan yekja jila ujquiz tjojskatz pecučha.

9

PABLUZ KAMAÑA PUNTU

¹ Wejrqui liwriičha. Jalla nižtiquiztan čjulu paazmi paasačha. Wejrqui Jesucristuž cuchanzquita apostoltčha. Nižaza wejrqui persun čhujcžtan učum Jesucristo Jiliri cherchinčha. Nižaza weriž Yooz taku paljaytiquiztan, ančhucqui Jesucristo Jiliržquin criichinčhucčha. Jaziqui ančhucqui wejt obra cuntačha Yooztajapaqui.

² Cunamit yekjapanaca wejr ana apóstol pajčhani. Ančhuczi wejr apóstol pajstančha. Ančhucaž Jesucristužquin criichiž cjen, wejrqui kjanapacha tjeztitčha, ultim werara apóstol, jalla nii.

³ Wejt quintra chiiñinacžquiz kjaaznučha, tuž cjan: Wejrtčha lijitum apostoltqui.

⁴ Jalla nižtiquiztan criichi zoñinacaž tjaata čherimi nižaza čjul tjaatami tanznasačha.

⁵ Nižaza apóstol kamañquiz ojklayan criichiñ tjun chjichasačha. Jalla nižta chjichñičha parti apostolanacaqui, nižaza Jesucristo Jilirž persun lajknacami, nižaza Pedrumi.

⁶ Wejttn Bernabežtan Yooz taku paljaycan tirapan langznučha, persuna mantinzjapa. Jalla nuž cjenami, tii mantinzjapa langzqui jaytasachha, ančhucqui wejr mantinžinajo.

YOOZ TAKU PALJAYÑI ŽOÑŽ PUNTU

⁷ Tsjiilla cjesačha nii puntuquiztan. Zultatunacaqui anaž sirwičha, persuna mantincan. Nižaza zkala langžñi zoñiqui zkal čherquiztan lulasačha. Nižaza uza ichñi zoñiqui uuzi lichiz licasačha. Jalla nužupančha tii muntuquiziqui.

⁸ Anačha wejt kuzquiztankaz tii chiitaqui. Jalla nuzupanž chičha Moisés cjiirta Yooz takuqui.

⁹ Nii Moisés cjiirta liiquiziqui tuž cjičha: "Tsjii zkala jojñi wacaqui anaž ñujcz waquizičha". Yoozqui jalla nuž cjan čhuchičha anačha wacžtajapa,

¹⁰ antiz wejrnacaltajapačha. Niijapa nii Yooz taku cjiirtačha. Zkal yoka kjullñi zoñimi, nižaza zkala jojñi zoñimi tjewznachha zkalquiztan tsjiiztan tanzjapa.

¹¹ Jaziqui wejrnacqui ančhucaquiz Yooz taku paljaychinčha, zkala čhjacchižtakaz. Jalla nižtiquiztan wejrnacalaqui ančhucaquiztan mantinzjapa tanzñi cjichuca, zkala langžñi zoñižtakaz.

¹² Yekja Yooz taku tjaajiñi zoñinacaqui ančhucaquiztan mantinzjapa tanchipančha. Wejtnacalaqui ančhucaquiztan juc'anti tanzuca. Wejrnaczi anapan wira mantinz exijcan kamiñčha. Wejrnacqui persuna langziquiztan mantincan kamiñčha. Čjulumi awantučha liwriiñi Cristuž taku catokz ana atažta cjejajo.

¹³ Timpluquiz langžñi zoñinacaqui timpluquiztan mantiñičha. Nižaza timplu altarquiz wilana jawkñi zoñinacaqui wilana jawkta chjizwiquiztan mantiñitachha. Jalla nii ančhucqui zizza.

¹⁴ Jalla nižtapacha Jesucristo Jiliriqui mantichiča, jakziltat liwriiñi Yooz taku paljayačhaja, jalla niiqui nii Yooz taku paljayz langzquiztan mantinasacha.

PABLUQUI YOOZ TAKU PALJAYCHA, PERSUNA MANTINCAN

¹⁵ Wejrqui anapan mantinz exjcan kamiñča. Nižaza anziqiu anal ančhucaquin cji-ržcuča wejr mantinskatzjapa. Ana jakziltižquizimi mantinskatz pecuča. Wejrqui ima žoñžquiz mantinskatzcan ticzkal pecasača. Tii persuna mantinz honora ana wejtquiztan kjañkatz pecuča.

¹⁶ Yooz taku paljaycan wejrqui anal mit kuzziz cjesača. Yoozqui wejtquiz nii kamaña tjaachiča. Jalla nižtquiztan Yooz taku paljaystanča. Liwriiñi Yooz taku ana paljayasaž niiqui, wejrqui castictal cjesača.

¹⁷ Nižaza wejrqui persun kuzcamakaz Yooz taku paljaytasaz niiqui tsjii pacz tjew-ztasacha, weriž Yoozquiz yanaptiquiztan. Pero anača wejt kuzcama tii puestuquin kamuča. Yoozqui tii Yooz taku paljayz kamaña wejtquiz tjaachiča. Jalla nižtquiztan Yooz taku paljaystanpanča wejrqui.

¹⁸ Nižaza liwriiñi Cristuž taku paljaycan ana jeczquiztanami cobriñča, wejr mantinžinajo. Antiz persunpacha mantinuča. Jalla nižta ojklayzcu ancha cuntintuča. Jalla niiča wejt kuzquiz pactažtakazqui.

¹⁹ Cristuž cjen wejrqui liwriitača. Jaziqiu žoñž kuzquiz pinsita jaru ana kamuča. Jalla nuž liwriitaž cjenami, wejrqui tjapa žoñž kuz jaru paasača, walja žoñinaca Cristužquin kuzziz cjskatzjapa.

²⁰ Judío žoñinacžtan kamcan, judío žoñinacž cuzturumpi paa-uča, ninaca Cristužquin kuzziz cjskatzjapa. Nižaza, Moisés liy jaru kamñi žoñinacžtan kamcan, Moisés liy paa-uča, ninaca Cristužquin kuzziz cjskatzjapa. Ultimquiziqui anal nii Moisés liy mantuquiz kamuča.

²¹ Nižaza ana Moisés liy jaru kamñi žoñinacžtan kamcan, wejrqui zakal Moisés liy jaru ana kamuča, nii žoñinaca Cristužquin kuzziz cjskatzjapa. Ultimquiziqui wejrqui werar Yooz liy jaru kamuča, nižaza Cristuž liy jaru kamuča.

²² Nižaza čjulquizimi kuz sint'iskatñi žoñinacžtan kamcan, wejrqui nižtakazak kuz sint'iskattažokaz cjiñča, nii žoñinaca Cristužquin kuzziz cjskatzjapa. Jalla nižta punta punta kamuča, jaknužumi žoñinaca liwriita cjejajo.

²³ Jalla nižta punta punta kamuča, žoñinacžquiz liwriiñi Yooz taku criiskatzjapa. Nižaza jalla nižta kamuča, persunpacha Yoozquiztan zumanaca tanzjapazakaz.

²⁴ Tsjiilla cjesača. Ančhucqui tuž zizza. Tsjii zajtñiquiz tjapa zajtñi žoñinacžquiztan tsjiillapankaz ganča. Jalla nuž cjuñzcu ančhucqui Yooz jiczquiz tjapa kuztan zajtz waquziča, premio ganzjapa.

²⁵ Tjapa piluta uziñinacaqui walja istutiča ima canchiquiz luzcan. Nižaza ana walinac-quiztan jaytissa tsjan cusa uzinzjapa. Jalla nižta paača, tsjii chjañquiztan paata royti pillu ganzjapa. Nii premiuqui tsjii upacamakaz tjurča. Ančhuczi Yooz jiczquiz zajtča, tsjii wiñaya tjurñi premio ganzjapa. Jalla nii premiuqui cjiča, Yooztan wiñaya kamz, jalla nii.

²⁶ Wejrqui anal inapampa Yooz jiczquiz zajt zajtcan kamuča. Tsjii pucultan boxsiasñi žoñinacaqui anaž tsjii kjutñi čhajcz pecča. Antiz panž čhajcza tsjiizuñž yujcquin. Wejrqui jalla nižtakaz anal inapampa kamuča. Antiz liwriiñi Yooz takucama kamuča.

²⁷ Wejrqui persun kuzquizpacha ewjasuča čjul anawalinacami paazquiztan. Wejrqui jalla nuž paa-uča, Yooz wejr ana wirquin tjewcznajo. Yekjapanacžquiz zuma tjaajinžcu wejrqui anal wirquin tjewczta cjis pecuča, wejr ana zuma kamchinž cjen.

10

TUQUITA EJPNACZ KAMTA PUNTU

¹ Tsjiilla cjesača. Wejrqui ančhucaquiz tuž zizkatz pecuča. Egipto yokquiztan ulanžquichi tuquita ejpnacaqui tsjir koztan kamatča. Moisés irpita kamatča. Nižaza Moisesqui tjapa ninaca Ljoc Kota tjakchiča.

² Jalla nuž irpitaž cjen, nižaza Ljoc Kota tjaktaž cjen, nii žoñinacaqui Moiestan tsjii kuzziztača. Jalla nižtquiztan tjapa ninacaqui Moisés irpiñi bautistažtakaztača.

³ Nižaza tjapa ninacaqui Yooz tjaata čjjeri lujlchiča.

⁴ Nižaza tjapa ninacaqui tsjii pajk maz ajkquiztan Yooz tjaata kjaz licchiča, curpu mantinzjapa, nižaza ninacž kuz wali mantinzjapa. Nižaza ninacž kuz wali mantinzjapa Cristutača mazquiztan ulanñi kjaztakaz. Jalla nii Cristuqui chicapacha cumpañ'atča ninacž jiczquiz okan.

⁵ Jalla nuž Cristuž cumpañ'ita cjenami, jila parti nii žoñinacaqui anapan Yoozquin kuzziztača. Jalla nižtquiztan Yoozqui anatača cuntintu; ninacž quintra žawjchiča. Jalla nižtquiztan nii žoñinacaqui ch'ekti yokquin ticziča.

⁶ Jalla nii tuquita kamtaqui cjiirtatača učumnaca cjuñajo, nižaza nižta ana walinaca tuquitažtapacha ana paajo.

⁷ Jaknužt yekjapa tuquita ejpnaca žoñiž paata yooznacquin sirwitčhaja, jalla nižtapachaqui anapanž kamz waquiziča ančhucqui. Nii tuquita ejpnacž puntuquiztan cjiirta Yooz takuqui, tuz cjiča: “Nii žoñinacaqui čheri lujlžcu licžcu tsajts pjijsa payi waquintičiča.” Jalla nižta irata kamz anaž waquiziča.

⁸ Nižaza yekjap tuquita ejpnacaqui adulterio paachiča. Jalla nižtiquiztan ticziča 23,000 žoñinacaqui tsjii noojikaz. Jalla nii cjuñzna. Adulterio anača paazqui.

⁹ Nižaza yekjap tuquita ejpnacaqui: “Yoozza pazinziz kuzzizqui”, cjičiča. Jalla nekztan juc'anti anawalinaca zaapaatča. UltimquiziQUI Yooz Ejpqui ninaca casticčiča. Jalla nii castictiquiztan walja žoñinacaqui ticziča, zkoranacaž č'atta. Jalla nii cjuñzna. Anača uj paazqui: “Yoozza pazinziz kuzzizqui”, cjecanaqui.

¹⁰ Nižaza yekjap tuquita ejpnacaqui Yooz quintra chutčiča. Jalla nižtiquiztan Yoozqui anjila cučanžquičiča ninaca conzjapa. Jalla nii cjuñžcu, ančhucqui Yooz quintra chuch anaž waquiziča.

¹¹ Tjapa tuquita ejpnacaž kamtaqui Yooz tawk libruquiz cjiirtatača učumnacaquiz čhižinzjapa ana nižta paajo. Tii muntu tucuzinz žcatžinžquičiča. Jalla nižtiquiztan tuquita ejpnacaž kamta quintunaca zumpacha cjuñž waquiziča, ana nižta kamzjapa.

¹² Jalla tuž cjiwčha. Jakziltat persun kuzquiz “walikaztča wejrqui” cjecan pinsičhaja, jalla niiqui panž cwitzaquičiča, ana ujquiz tjojtsjapa.

¹³ Čjul pruebanacquizimi ančhuc sufričhaja, jalla nižta pruebanacquiz zakaz tsjii tsjii criči žoñinacaqui sufriča. Čjul pruebanacaž sufriskatta cjenami Yoozqui anchucaquiztan nii pruebanaca ana atipskataquičiča. Antiz ultimquiziQUI Yoozqui čjul pruebanacquiztan anchucaquiz atipskataquičiča, ančhuc ana čjul ujquiz tjojtsjapa, nižaza tjurt'ini kuzziz awantizjapa. Učum Yoozza zuma yanapñiqui, učumnacaž tjapa pruebanaca tjurt'ini kuzziz watajo.

ZOÑIŽ PAATA YOOZNACQUIZTAN ZARAKA

¹⁴ Werič pecta jilanaca, cullaquinaca, žoñiž paata yooznacquiztan zaraka. Anapanž ninacžquiz sirwa.

¹⁵ Ančhucča zizñi žoñinacaqui. Ančhucpacha tii werič čhiita taku yatisinznasača, werara ana werara, jalla nii.

¹⁶ Cristuqui učhum laycu ticziča. Jalla nii cjuñžnajo Cristuqui cuzturumpi mantičiča, uwas kjaz liczmi, nižaza t'anta lujlžmi. Nii uwas kjazza Cristuž ljoc cuntaqui. Nižaza nii t'antača Cristuž curpu cuntaqui. Nii Cristuž mantita cuzturumpi paacan Yoozquin gracias cjecan čhiča. Nii uwas kjaz liccan Cristužtan tsjii kuzziz cjecan tječa. Nižaza nii tojta t'anta lujlcan Cristužtan tsjii kuzziz cjecan tječa.

¹⁷ Tsjii t'anta žejlča, aunquimi t'unapacha kjolžtami. Nižtazakazza učummi. Walja tama cričinaca želanami, tsjii curpuchiztakazza. Tsjii t'antiquiztan tjappacha lujlča, jalla nuž tječa, tsjii kuzzizza tjappacha, cjecanaqui.

¹⁸ Israel žoñinacžquiztan tii puntu cjuñzna. Jakziltat Yooz altarquin wilana jawkčhaja, jalla niiqui wilanquiztan lujlcan nii altarž Yooztan tsjii kuzziz cjecan tječa.

¹⁹ Nonžna, žoñiž paata yoozqui anaž čjulumi. Nižaza žoñiž paata yoozquin tjaata čhizwimi anaž čjulumi, čhizwikazza.

²⁰ Pero jakzilta ana Yoozquin criči žoñit wilana jawkčhaja, jalla niiqui zajranacžquin wilana onanča, anapanž werar Yoozquin onanča. Jalla nižtiquiztan ančhucqui anaž ninacžtan cumpañ'iz waquiziča. Cumpañ'iquiž niiqui zajranacžquiz kuzziz cjecan tječa.

²¹ Anaž jakziltami Cristo Jilirž wasumi nižaza zajranacž wasumi tanznasača. Nižaza anaž jakziltami Cristo Jilirž t'antami nižaza zajranacž čherimi tanznasača. Anača nižta kuzziz cjičuca. Antiz tsjii Yoozquizpanikaz kuzziz cjesača.

²² Jakziltat zajranacž cuzturumpiquiz mitisaquiči niiqui, jalla nii žoñž quintra werar Yoozqui zawjwaquiči. Jalla nižtiquiztan ančhucqui nuž paaquiči niiqui, castictaž cjequiči. Ančhucqui anača Yoozquiztan juc'anti azziz jalla.

ZOÑIŽ PAATA YOOZNACQUIZ ANA MITSA

²³ Jalla tuž werarača. Tsjii criči žoñiqui liwriitača. Jalla nižtiquiztan čjulumi paasača. Pero tjapa paataqui juc'ant Yoozquin kuzziz cjisjapa anaž yanapča. Nižaza čjulu paatami anaž parti cričinacžquinami yanapča zuma kamañchiz kamajo.

²⁴ Parti cričinacaž zuma kamañchiz cjisjapača kuz tjaazqui. Anača persun kamañjapakaz kuz tjaazqui.

²⁵⁻²⁶ Cjiirta Yooz takuqui tuž cjiča: “Tjapa tii muntuqui Yooz Jiliržtacamača, nižaza tjapa tii muntuquiči žejlñinacaqui Yooz Jiliržtacamača”. Jalla nižtiquiztan mercatquiz

kjayta čherimi lulasača. Anaž persun kuz turwayskataquičha tuž pinsican, tii čherizlan zoñiz paata yoozquiz tjaata čheri, už zoñiz paata yoozquiz ana tjaata čherizlaj, jalla nii.

²⁷ Nižaza ana werar Yoozquin criichi zoñiqui čheri lujljzjapa am impitasaz niiqui, okasača, ojkz pecasaž niiqui. Jalla nuž okaquiz niiqui, čjul onanta čherimi lujljz-naquičha anaž persun kuz turwayskatcan.

²⁸⁻²⁹ Pero tsjiiqui amquiz maznačhani, tuž cjan: “Tii čheriqui zoñiz paata yoozquiz tjaata čheričha. Jalla nii čheri ana lujljz waquiziča”. Jalla nuz cjenaqui amlaqui anača nii čheriqui lujlsinsqui, nii mazni zoñiz sint’iñi kuz anawali cjskatzjapa, nižaza niž kuz ana turwayskatzjapa. Am persun kuzqui walikaz cječhani, ana turwayta. Jalla nuz cjenami amqui nii čheri lulasaž niiqui, am jilž kuz turwayskatasacha.

Jalla nii weriz čiižintiquiztan yekjap ančhucaquiztan wejtquiz pewcznačhani, tuž cjan: “čKjažtquiztan amqui nižta čiižinjo? Tsjii zoñiz sint’iñi kuzziz cjenami, čjulumi paaz atučha, Cristuqui wejr liwriičha.

³⁰ Ima čjul čherimi lujlan Yoozquin gracias cjan chiyučha. Jaziqui, čkjažtquiztan weriz lujltiquiztan zoñej wejtquin uj tjojtunjo?” Nuž cjan, wejtquiz chiyachani.

³¹ Ančhucaquiz tuž kjaaznuča. Čheri lujlzi, čjulumi paazmi Yooztajapa honora waytiz waquiziča.

³² Ančhucqui anaž jec zoñimi ujquiz tjojtskata, judio zoñinacami, ana judio zoñinacami, nižaza Yooz iclizziz zoñinacami.

³³ Wejrzi kjažllami tjapa zoñinacžquiz yanapuča zuma kamañchiz kamajo. Anal wejtajapakaz ojklayuča. Antiz parti zoñinacžtajapa ojklayuča, ninaca ujquiztan liwriita cjejajo.

11

¹ Wejrqui jaknužt Jesucristuqui kamtčhaja, jalla nižtazakal kamuča. Nižaza jaknužt wejr kamučhaja, jalla nižtazakaz kama ančhucqui.

ACHA CH'OKCHI CUZTURUMPI PUNTU

² Jilanaca cullaquinaca, ančhucqui tjapa weriz tjaajintanaca cjuñča, nižaza weriz tjaajintacama kamañchučha. Jalla nižtquiztan ančhucaquin felicitučha. Ultimu anača wejt kuzquiztan nii tjaajintaqui, antiz, wejtquiz tjaajintatača.

³ Jilanaca, cullaquinaca, persun luctakž mantuquiz žejlča maatakanacaqui. Nižaza zapa luctak zoñiqui Cristuž mantuquiz žejlča. Nižaza Cristuqui Yooz Ejpž mantuquiz žejlča. Jalla nii puntuquiztan ančhucaquiz intintiskatz pecučha.

⁴ Iclizquiz ajčcu luctak zoñinacaqui pañžtan acha ch'okchi anapanž cjesača, Yoozquin mayizicanami, nižaza Yooziž tjaata taku tjaajincanami. Acha ch'okchižlaj niiqui, persunjapa omobrawillaž cjesača.

⁵ Nižaza iclizquiz ajčcu, criichi maatakanacaqui panžtan acha ch'okchi panž cjesača, Yoozquin mayizicanami, nižaza Yooziž tjaata taku tjaajincanami. Acha ana ch'okchinžlaj niiqui, persunjapa ombrawillaž cjesača. Acha ana ch'okchinžlaj niiqui ach chara k'ala murtaž cjes, nižtažtakaz cjesača.

⁶ Iclizquiz ajčcu, jakzilta maatakata ana acha ch'okchinžlaj niiqui, naaža persun ach chara k'ala murtaž cjila. Nekztan naaqui acha ch'okznasača. Naaža ach chara k'ala murtaž cjen ombrawillaž cjesača. Jalla nižtquiztan maatakaqui acha ch'okchinpanž cjis waquiziča.

⁷ Yoozqui niž kuzcama luctak zoñi paachiča niž irata cjejajo. Jalla nižtquiztan luctak zoñiz cjen Yooztajapa honoraqui tjeeztača. Nižaza maatakaž cjen luctakž honoraqui tjeeztača, jalla nižtquiztan criichi luctakaqui iclizquiz ajčcu anapan acha ch'okchi cjis waquiziča.

⁸ Tukuqa timpuqui Yoozqui luctaka paachiča, nekztan luctakžquiztan maataka paachiča. Luctakaqui ana maatakžquiztan paatatača.

⁹ Nižaza maatakaqui luctakžtajapa paatača. Luctakaqui anača maatakžtajapa paataqui.

¹⁰ Jalla nižtquiztan maatakanacaqui acha ch'okz waquiziča, luctakž mantuquiz cjan tjeezjapa, anjilanacaž cjen.

¹¹⁻¹² Pero tii tantiya. Cristian kamañchiz cjen luctakanacami nižaza maatakanacami tsjiikazza. Yoozqui luctakžquiztan maataka paachiča. Nižaza luctakaqui maatakaž majtniž cjen žejlča. Pero tjappachaqui Yooziž cjen žejlča. Jalla nižtquiztan ana maataka žejltčhaja luctakaqui ana žejltasača. Nižaza ana luctaka žejltčhaja maatakaqui ana žejltasača. Nižaza anaj Yooz muntčhaja, anapanž čjulumi žejltasača.

¹³ Ančhucpacha tantiya. Yoozquin mayizican maatakaqui acha ch'okchinžlaj niiqui, čwali cjesaya? už čanawali cjesaj? Acha ch'okchi walipankazza maatakžtaqui.

¹⁴ Nižaza luctakaqui lajch charchizlaj niiqui persunjapa ombrawillaž cjesača. Jalla nužuča tii wirquiz kamañaqui. Tjapa žoñinacaqui persun kuzquiztan nuž zizza.

¹⁵ Nižaza maatakanacaqui pajk charchizlaj niiqui ninacžquizpacha honoraž cjesača. Pajk charchizqui acha ch'okchi cuntača. Jalla nižtiquiztan pajk charchiz cjisqui walikazza maatakžtaqui.

¹⁶ Jakziltat nii puntu ch'as pecčhaja, jalla niiqui ziz waquiziča tužu. Wejrnacqui nii cuzturumpi pajzpanča. Nižaza tjapa Yooz iclizziz žoñinacaqui nii cuzturumpi jaru paaspanča.

SANTA CENA PAAZ PUNTU

¹⁷ Tsjiiztan zakal chiižinuča. Wejrqui ančhucaquiz zumpacha ewjtis waquiziča. Santa Cena paažcu ančhucqui koluculla akžta kamañchiz ulanča tsjan zuma kamañchiz cjenpacha.

¹⁸ Iclizquiz ajczcan, ančhucqui t'aka t'aka cjiicjiñchucquiča. Nii quintu wejtquiz irantizquičiča. Cunamit nižtapan cjiicjiñchani.

¹⁹ Pero jalla nižta t'aka t'aka cjitiquiztan, kjanapacha tjeeža, jecnacat lijitum cristian kamañchiz criichinaca, nii. Jalla nižtiquiztan t'aka t'aka cjichuca cječhani.

²⁰⁻²¹ Ančhucqui Santa Cena cuzturumpi paazjapa čheri luli ajczinčhucquiča. Nekztan čheri lujlcan zapa mayni ančhucaquiztan persun čheri lujlskaz cjsinčhucquiča, ana tojunžcu. Jalla nižtiquiztan koloculla čherchiz žoñinacazti čheri eecznan željchiquiča. Partizti čhjei čheri lujlchi željchiquiča, nižaza yekjapazti mallzilla željchiquiča. Ana wali paachinčhucča. Jalla nižtiquiztan anača Jesucristo Jiliriz mantita Santa Cena cjichuca cjequiča.

²² ¿Ančhuczi lujljzapa liczjapa, ana kjuychizčhuc, kjažtatajo? Nižta ana wali paacan, ančhuqui tjeeža, ančhucaquiz Yooz iclizziz žoñinaca anaž importiča, nii. Nižaza pori criichinacaqui azkatča ana želinchiz cjenaqui. ¿Wejr ančhucaquiz kjažt cjes? ¿Wejr ančhucaquiz "Walikaz" chiyasaya? Anapan nižta chiyasacha.

²³ Jesucristo Jiliripachača wejtquiz mantichiqui Santa Cena cuzturumpi paajo. Jalla nii tjaajintacama ančhucaquiz zakal tjaajinchinča. Ima Jesucristo Jiliriz intirjita cjen, jalla nii weenpacha tsjii t'anta tanziča niiz persun kjaržtan.

²⁴ Jalla nekztanaqui Yooz Ejpžquin gracias cjan cjichiča. Nekztanaqui t'anta kjolžcu, tojunčiča, tuž cjan: "Tii t'antaqui wejt curpu cuntača. Wejrqui žoñž curpuchiz cjen ančhuc laycul ticznača. Weriž ticžta cjuñžjapa tii cuzturumpi wilta wilta paaquiča".

²⁵ Nekztan čheri lujlžcu nižtapacha Jesucristuqui niiz persun kjaržtan tsjii wasu tanziča, tuž cjan: "Tii wasquiz uwas kjazqui wejt ljoc cuntača. Wejt ljoc cjen ew acta tjulžtaž cjequiča. Čhjulorat tii cuzturumpi paačaj niiqui, wejtquiz cjuñž waquiziča". Nuž mantičiča Jesucristuqui.

²⁶ Čhjulorat tii Santa Cena cuzturumpi paachaj niiqui, ančhucqui tjeeža Jesucristo ticzīča ančhuca laycu, jalla nii. Jalla nii cuzturumpi paaz waquiziča, Jesucristo Jiliriz tjonzcama.

²⁷ Jalla nižtiquiztan jakziltat nii Santa Cena cuzturumpi ana zuma paaquiz niiqui, Jesucristo Jiliriz ombrawillaž cjequiča. Nižaza Jesucristo Jiliriz quintra uj paaquiča; niiz curpuquizimi niiz ljocquizimi iñartažokaz cjequiča.

²⁸ Ima Santa Cena paacan, zapa mayni persun kuzquiz amayt'asaquiča, kjažtiquiztan Santa Cena cuzturumpi paa, jalla nii. Nekztan Santa Cena cuzturumpi paasacha.

²⁹ Nižaza Santa Cena paacan, Jesucristuž ućhum laycu ticžta, jalla niiča zapa mayni persun kuzquiz waljapanž cjuñž waquiziča. Santa Cena paacan Jesucristo ana cjuñžiz cjequiz niiqui, persun casticujapa cjequiča.

³⁰ Santa Cena cuzturumpi ana wali paatiquiztan, walja ančhucaquiztan laa željča, nižaza ana wali željča, nižaza yekjapanacaqui ticzīča.

³¹ Ima Santa Cena cuzturumpi paacan ućhumnacapacha zapa mayni persun kuzquiz zuma amayt'as waquiziča. Nekztan pertuna mayiziz waquiziča. Nekztan Jesucristo Jiliriz anaž casticta cjequiča.

³² Jesucristo Jiliriqui ućhum casticaquiz niiqui, azquichjapa panž castičča, zuma kamañquin cjsinajo. Nekztan ana criichi žoñinacžtan chica ana wiñaya casticta cjequiča.

³³ Wejt jilanaca, cullaquinaca, čheri lujljapami nižaza Santa Cena paazjapami ajczcu, zapa mayni tjewz waquiziča partii criichi žoñinacžta zumpacha ajczquiscama.

³⁴ Jakziltat čheri eeskatchaja, persun kjuyquin zumpacha lujlžnaquiča, ima iclizquin ojkan. Nekztan lujlžcu ajczquin okaquiča, Santa Cena zuma paazjapa. Jakziltat Santa Cena ana zuma paaquiz niiqui, Yoozqui nii žoñi casticaquiča. Nužulkazza nii puntuqui. Yekja puntunacaqui wejr azquichača, ančhucaquin cheržni quejžcu.

12

ESPIRITU SANTUZ TJAATA KAMAÑANACA PUNTU

¹ Tsjii zakaz chiižinuča, Espiritu Santuž tjaata kamañanaca puntuquiztan. Jalla nii ančhucaquiz zuma intintiskatz pecučha.

² Tuquiqui ima ančhucaž Yoozquin criican ančhucqui ana criiñi zoñiž paata yooz-nacžquiz tsjii kjutñi irpitatača, jalla niža irpiskatchinčhucča ančhucqui. Jalla nii ančhucqui zuma zizza.

³ Jakziltat Yooz Espiritu Santuž irpitažlaja, jalla niiqui ana chiyasača: “Jesusaqui laykjita cjila”, cjicanaqui. Nižaza jakziltat: “Jesusaqui Yooz Jiliriča”, cjican chiyachaja, jalla niiqui Espiritu Santuž irpitaž chiyacuicha. Jalla nuž intintiskatz pecučha.

⁴ Jilanaca, cullaquinaca, criichi zoñinacaqui yekja yekja Espiritu Santuž tjaata kamañanacchizza, nižaza poderanacchizza. Pero tsjii Espiritu Santukaz tjapa nii kamañanacami nižaza poderanacami tjaacha.

⁵ Nižaza criichi zoñinacaqui yekja yekja Yoozquin sirwiča. Pero tsjii Yooz Jiliržquinkaz sirwiča.

⁶ Nižaza criichinacaqui yekja yekja wali obranaca paača. Pero tsjii Yooz Ejpkaž criichinacžquiz nii obranaca paakatča.

⁷ Jaziqui tjapa criichinacaqui Yooz Espiritu Santuž tjaata kamañchizza, parti criichinacžquiz juc'ant zuma kami yanapzjapa.

⁸ Tiža kamañanacaqui tjaatača: Espiritu Santuqui yekjap criichinacžquiz zuma pinsita razunanacchiz chiikatča. Nižaza Yooz Espiritu Santuqui yekjap criichinacžquiz zizñi zizñi chiikatča.

⁹ Nižaza Espiritu Santuqui yekjap criichinacžquiz Yoozquin juc'ant tjapa kuzziz cjskatča, zuma obranaca paazjapa. Nižaza Espiritu Santuqui yekjap criichinacžquiz poder tjaacha laanaca čhetnajo. Pero Espiritu Santuqui tsjiikazza.

¹⁰ Nižaza Espiritu Santuqui yekjap criichinacžquiz poder tjaacha wali milajrunaca paazjapa. Nižaza Espiritu Santuqui yekjap criichinacžquiz poder tjaacha, Yooziž tjaata takunaca zuma kjanzt'izjapa. Nižaza Espiritu Santuqui yekjap criichinacžquiz zizñi kuz tjaacha, zoñinacaž čhiita takunaca zumpacha tantizjapa, Yoozquiztan tjonchižlan už zajrižquiztan tjonchižlaj, jalla nii. Nižaza Espiritu Santuqui yekjap criichinacžquiz ana pajta taku čhiikatča. Nižaza nii Espiritu Santupacha yekjap criichinacžquiz zizñi kuz tjaacha, nii ana pajta čhiita taku parti criichinacžquiz intintiskatajo.

¹¹ Tsjii Espiritu Santukaz tjapa nii yekja yekja poderanaca tjaacha. Jaknužt nii Espiritu Santuqui tjaaz munčhaja, jalla niicama tjapa criichinacžquiz tjaacha.

CRICHI ZOÑINACAQUI TSJIKAZZA

¹² Cristužtan nižquin criichi zoñinacžtan tsjii curpuchiz zoñižtakazza. Tsjii zoñiža žejlča, kjarami, lismi, čhujcquimi, cjuñimi, jalla nižtanaca žejlča, pero tsjii zoñikazza. Wacchi cjenami tsjii curpukazza. Jalla niža iratača Cristužtan criichinacžtan.

¹³ Criichinacaqui yekja yekja žejlča, judionacami, yekja wajtchiz zoñinacami, piyunanacami, ana piyunanacami, jalla nižtanaca žejlča. Pero bautistaž cjistanaqui Espiritu Santuž cjen tjapa niža criichinaca tsjii zoñž curpu cunta cjissiča. Nižaza Yooz Ejpqui tjapa criichinacž kuzquizimi Espiritu Santo luzkatchiča.

¹⁴ Tsjii zoñižaqui kjarami lismi achami čhujcquimi cjuñimi jalla nižtanaca žejlča. Punta punta žejlča tsjii zoñž curpuquiziqui.

¹⁵ Jalla niža iratača Cristužtan nižquin criichinacžtan. Jalla nižtiquiztan tjapa Cristužquin criichinacaqui tsjiikazza. Jilanaca, cullaquinaca, nonžna. Tsjii zoñž kjojchaqui ana čhiiz waquiziča, tuž cjican: “Wejrqui kjojchakazza, anača wejr kjaraqui; jalla nižtiquiztan anaž tii zoñž curpuquiz želasača”. Jalla niža čhižcumi, nii kjojchaqui tirapanča nii zoñž curpu partiquizqui.

¹⁶ Nižaza tsjii zoñž cjuñiqui ana čhiiz waquiziča, tuž cjican: “Wejrqui cjuñikazza, anača wejr čhujquiqui. Jalla nižtiquiztan anaž tii zoñž curpuquiz želasača”. Jalla niža čhižcumi, nii cjuñiqui tirapanča nii zoñž curpu partiquizqui.

¹⁷ ¿Tjapa zoñž curpuquiz čhujquicamažlaj niiqui, kjažt nonžnasajo? ¿Nižaza tjapa zoñž curpuquiz cjuñicamažlaj niiqui, kjažt mucžnasajo?

¹⁸ Yoozqui zoñž curpuquiz punta punta utchiča, jaknužt munčhaja, jalla nuž. Jalla niža irata Yoozqui punta punta Espiritu Santuž kamañanacami nižaza poderanacami tjaachiča criichinacžquiz.

¹⁹ Zoñž curpuquiz anaj punta punta žejlčhaja, anaž ultim zoñž curpu cjitasača.

²⁰ Punta punta želanami, tsjii curpukazza. Jalla niža irata criichinacaqui punta punta poderanacchizza, nižaza kamañanacchizza, pero tjapa criichinacača Yooz partiquiz, nižaza tsjiikazza.

²¹ Jalla nižtiquiztan čhjujquiqui kjaržquiz ana chiiz waquiziča, “Amqui anal pecuča”, cjcanaqui. Nižaza ačaqui kjojchquiz ana chiiz waquiziča, “Amqui anal pecuča”, cjcanaqui. Nižaza tsjii criichi žoñiqui yekja criichi žoñžquiz ana chiyasača: “Amqui anal pecuča”, cjcanaqui.

²² Žoñž curpuqui puntaž pecča. Jaziqui žoñž curpuquiz jallc'a partiqui zaka žejlča. Nii jallc'a partiqui juc'antiz pecča.

²³ Nižaza žoñž curpuquiz ana zuma chercherchiznaca žejlča. Ninacaqui zquitztan tjužtača zuma chercherchiz cjsjapa. Nižaza žoñž curpuquiz chjojžta partinaca žejlča. Ninacaqui zquitztan tjužtača, učhum ana azjapa.

²⁴ Zuma chercherchiznaca tsjii zquiti tjužtqui anaž pecča. Yoozqui žoñž curpu nižta paachiča. Nižaza Yoozqui žoñž kuz peckatchiča, ana zuma chercherchiznaca tsjii zquitztan zuma tjužtjapa. Jalla nižta iratača iclizziz žoñinacaqui.

²⁵ Jalla nižta munchiča Yoozqui, criichi žoñinacaž ana t'aka t'aka cjsjapa. Nižaza Yoozqui nižta munchiča, porapat zuma munaziñi kuzziz yanapasjapa.

²⁶ Tsjii criichi žoñž sufran, tjapa criichinacaqui kuzquiz sint'iča. Nižaza tsjii criichi žoñž honorchiz cjen, tjapa criichinacaqui nižtan chica chipča.

CRIICHI ŽOÑINACŽ KAMAÑ PUNTU

²⁷ Jilanaca, cullaquinaca, tjapa Yoozquin criichinacžtan Cristužtanpacha tsjii kuzzizza. Zapa mayni ančhucqui Jesucristuž partiquiz žejlča.

²⁸ Nižtiquiztan Yooz Ejpqui criichinacžquiz yekja yekja kamañnaca tjača, iclizziz žoñinacžquiz yanapzjapa. Primiraqui Yoozqui yekjap criichinacžquiz apóstol kamaña tjaachiča. Niž jaru Yooziž tjaata taku paljayz kamaña tjaachiča yekjap criichinacžquiz. Niž jaru Yoozqui niž taku tjaajinz kamaña tjaachiča yekjap criichinacžquiz. Nižaza Yoozqui milajru paaz poder tjaachiča. Nižaza Yoozqui poder tjaachiča laanaca čhjetnajo. Nižaza Yoozqui icliz langzquiz yanapz kamaña tjaachiča. Nižaza Yoozqui kamaña tjaachiča iclizziz žoñinacžquiz irpiñijapa. Nižaza Yoozqui poder tjaachiča, ana pajta takunaca čhiichiyajo.

²⁹ Anača tjapa ančhucqui apóstol kamañchizqui. Nižaza anača tjapa ančhucqui Yooziž tjaata taku paljayz kamañchizqui. Nižaza anača tjapa ančhucqui Yooz taku tjaajinz kamañchizqui. Nižaza anača tjapa ančhucqui milajru paaz poderchizqui.

³⁰ Nižaza anača tjapa ančhucqui laanaca čhjetinz poderchizqui. Nižaza anača tjapa ančhucqui ana pajta takunaca čhiiz poderchizqui. Nižaza anača tjapa ančhucqui nii ana pajta čhiita takunaca intintiskatz poderchizqui.

³¹ Ultim zuma kamañquiz kuz tjaa ančhucqui. Nižaza wejrqui ančhucquiz nii juc'ant zuma kamañal tjaajnuča.

13

ZUMA MUNAZIZ KAMAÑAQUI JUC'ANT ZUMACHA

¹ Jalla tužuča juc'ant zuma kamañnacu. Zuma munaziz kamañnacu juc'ant zumača tjapa kamañnacuquiztanacu. Tsjii žoñiqui ana pajta žoñž takunacami nižaza anjilž takunacami chiyasača. Jalla nižta čhiichiž cjenami ana zuma munaziñi kuzziz cječhaj niiqui, jalla nii žoñiqui inapachaž chiyacučiča. Ina takukazza nii žoñž takuqui. Tsjii ina wjajtta cazažtakaz cjesača.

² Nižaza tsjii žoñiqui Yooziž tjaata takunaca paljayasača; nižaza tjapa Yooz pinsitanaca zizasasača; nižaza tjapa Yooz puntu zizasasača. Pero ana zuma munaziñi kuzziz cječhaj niiqui, anaž čhjulumi cjequiča Yooz yujcquiziqui. Nižaza tsjii Yoozquin tjapa kuzziz žoñiqui Yoozquiztan mayizichiz cjen, tsjii curumi kiskatasasača. Pero jakziltat ana zuma munaziñi kuzziz cječhaja, jalla niiqui čhulu parlizcumi zizcumi paazcumi anaž čhjulumi cjequiča Yooz yujcquiziqui.

³ Nižaza tsjii žoñiqui tjapa niž želinchiznaca tojnasaž niiqui, nižaza Cristuž cjen persun curpumiž ujta cjsjapa intirjasaž niiqui, pero ana zuma munaziñi kuzziz cječhaja, jalla niiqui čhulu paazcumi inakaz cjesača nii persunalatjapa.

⁴ Zuma munaziñi kuzziz žoñiqui tižta kuzzizza. Pazinziz kuzzizza, nižaza okžni kuzzizza, nižaza ana iñiziñi kuzzizza, nižaza ana persun kamaña alawasni kuzzizza, nižaza ana mit kuzzizza.

⁵ Nižaza ana atinar kuzzizza, nižaza zuma munaziñi kuzziz žoñiqui ana malcriat kuzzizza. Nižaza persun kuzcamakaz anaž kamz pecča. Nižaza ana žawjni kuzzizza. Nižaza ana anawal ayñi tjepuns kuzzizza.

⁶ Nižaza tsjii jilaž ujquiz tjojtsi cjenacu, anaž chipasača zuma munaziñi kuzziz žoñiqui. Antiz tsjii jilaž zuma paachi cjenacu, nekžtan chipsnasača.

⁷ Chjul pruebanaca tjonanami zuma munaziñi kuzziz žoñiqui awantiča. Nižaza zuma munaziñi kuzziz žoñiqui parti criichinacž puntuquiztan persun kuzquiz cjiča; “Zuma kuzzizlan”, cjan. Nižaza zuma munaziñi kuzziz žoñiqui parti criichinacž puntuquiztan persun kuzquiz: “Zuma kamačhan”, cjiča. Nižaza čjul pruebanacaž tjonanami Yoozquin tjurt'iñi kuzziz cjequiča zuma munaziñi kuzziz žoñiqui.

⁸ Nii zuma munaziz kamañaqui anawira tucuzinzaquiča. Nii Yooziž tjaata taku paljayz kamañaqui tucuzinzaquiča; nižaza nii ana pajta taku čhiiz kamañaqui zakaz tucuzinzaquiča. Nižaza nii Yooz puntu zumpacha zizta paljayz kamañaqui panž tucuzinzaquiča.

⁹ Tii muntuquiz žejlcanaqui Yooz puntuquiztan anapanž tjappacha zizi atasača. Nižaza Yooz puntuquiztan anapanž tjappacha intintiskati atasača.

¹⁰ Wiruñaqi Yooztan kamcanaqui Yooz puntu tjappacha zizaquiča. Jalla nii timpuqui Yooz puntu tjaajinz kamañanacaqui kataquiča.

¹¹ Jalla tiža iratača Yooz puntu zizqui. Žoñiqui kolta uza cjanacaqui, ocjal čhiičiiz čhiñiča, nižaza ocjal pinsi pinsiñiča, nižaza ocjalž pinsamintuchiz tantiiñiča. Jalla niža žejltača ocjala cjanacaqui. Jazizti pajk žoñi cjisquiqui, ocjalažtakaz čhiičiiznacami, pinsiznacami jaytitača. Jalla niža irataž Yooz puntunaca zizqui.

¹² Zur ispijquiz persun yujcqui ana zuma kjanaž tjenča. Jalla niža iratača anziqui Yooz puntunaca zizqui, ana kjana. Wiruñaqi Yooztan kamcan zuma kjanaž zizaquiča Yooz puntuqui. Anziqui anaž tjappacha zizzuca Yooz puntuqui. Wiruñaqi Yooztan kamcan tjapa Yooz puntunaca zizaquiča, jaknužt Yoozqui učum puntuquiztan zumpacha zizzaja, jalla niža.

¹³ Ultimquiziqui criiči žoñinacaqui Yoozquin tjapa kuzziz wiñaya cjequiča. Nižaza criichinacaqui Yoozquiztan zumanaca niž jaru niž jaru tjewznaquiča. Nižaza criichinacaqui zuma munaziñi kuzziz wiñaya cjequiča. Pero tsjičha chekan waliqui, zuma munaziñi kuz, jalla nii.

14

YOOZ TAKU PALJAYZ KAMAÑA PUNTU

¹ Jalla nižtiquiztan zuma munaziz kamañquiz kuz tjaa. Jalla nii kamañača juc'ant chekanaqui. Nižaza Yooz Espiritu Santuž tjaata kamañanacquiz kuz tjaa. Yooz taku paljayz kamañquiz juc'anti kuz tjaa.

² Nii anaž pajta taku čhiiz kamañaqui anača chekanaqui. Nii kamañčiz žoñiqui Yoozquizkaz čhiča. Anaž žoñžquiziqui čhiča. Jalla nuž ana pajta taku čhiyan parti žoñinacaqui anaž intintazi atča. Espiritu Santuqui ana zizta čhojžta taku paljayzkatča nii ana pajta taku čhiñi žoñžquiz.

³ Pero nii Yooz taku paljayñi žoñiqui parti criichinacžquiz paljayčha, juc'ant zuma kamajo, nižaza Yoozquin tjurt'iñi kuzziz cjejajo, nižaza kuzta cjejajo.

⁴ Nii ana pajta taku čhiñi žoñiqui persunjapakaz yanapča Yoozquin juc'anti kuzziz cjisjapa. Nii Yooz taku paljayñi žoñizti parti criichinacžquiz yanapča Yoozquin juc'anti kuzziz cjejajo.

⁵ Wejrqui ančucaquiz cjiwčha, tjapa ančhucqui ana pajta taku čhičhiñi cjičhaja. Pero juc'ant chekanaqui, Yooz takunaca paljayñiž cjičhaja, jalla niža anchal pecučha. Nii Yooz takunaca paljayz kamañčiz žoñičha juc'ant chekanaqui nii ana pajta taku čhiičiiz kamañčiz žoñžquiztanacu. Jalla nižtiquiztan ana pajta taku čhiičižcu, parti criichinacžquiz intintiskatz waquiziča Yoozquin juc'anti kuzziz cjejajo.

ANA PAJTA TAWKŽTAN PALJAYZ KAMAÑA PUNTU

⁶ Jilanaca, cullaquinaca, ančucaquiz tjonžcu ana pajta tawkžtan paljayaž niiqui, nii paljayaqu iinakaz cjequiča ančucaquiz. Ana yanapasača tsjan zuma kamañčiz cjejajo. Ančucaquiz yanapzjapa, wejlaqui kjanapacha paljaystanča, tsjii Yooziž tjaata ew takumi, tsjii Yooz puntu zizta takumi, tsjii Yooziž intintiskatta takumi, tsjii Yooz puntu catokta takumi, jalla nii. Nekžtan ančhucqui yanaptaž cjequiča, Yoozquin juc'anti kuzziz cjisjapa.

⁷ Tsjii pincallu pjujñi žoñiqui čjakčhakaquiz niiqui, nii pjujta wirsu ana pajta cjequiča. Nižaza pincallu pjujñinacami quitara icñinacami čjul musicunacami tsjii wirsu ana kjanapacha tejlznaquiz niiqui, parti žoñinacazti čjul wirsut pjujčhaja, icčhaja, anaž tantiyi ataquiča. Jalla niža iratača ana pajta tawkžtan čhižqu.

⁸ Tsjii quira zalzjapa trompetaz ana zuma claro tjawunaquiz niiqui, jalla nuž ana zuma tjawuntiquiztan zultatunacaqui anaž listu tjaczi cjequiča nii quirajapaqui.

⁹ Jalla nižta irata zakaz ančucaquiz wačha. Tsjii criichi zoñiqui ana intintazuc takuz paljayaquiz niiqui, ančucqu ana intintichiz cjequičha, čjulut chiitčhaja, jalla nii. Jakziltat ana intintazuc takuz čhiitčhaj niiqui, inakaz čhiičha.

¹⁰ Tii muntuquiz tjapaman takunacapanž žejlž, jaz. Nižaza zapa takuqu intintitaž cjesačha jakziltižquizimi.

¹¹ Pero wejrqu tšjii čhiita taku anal intintasaž niiqui, niwjtanaqu yekja wajtchiz zoñitakaztčha nii čhiični zoñžquiztanaqu. Nižaza nii yekja taku čhiični zoñiqui wejtquiztan yekja wajtchiz zoñitazakazza.

¹² Ančucaquiz nižtazakazza. Ančucqu Espiritu Santuž tjaata kamañnacami ancha tanz pequiñčucčha. Jalla nižtquiztan ančucqu tšjan chekan kamañnacquiz kuz tjaaz waquizičha, parti criichinacaz Yoozquin juc'anti kuzziz cjejajo.

¹³ Jalla nižtquiztan jakziltat ana pajta taku chiyachaja, Yoozquin mayiziz waquizičha, niž čhiita taku zuma intintiskatzjapa parti criichinacžquiz.

¹⁴ Nižaza wejrqu ana pajta tawkžtan Yoozquin mayizaž niiqui, wejt animukaz mayaquičha. Wejt kuzpacha anaž intintičha. Jalla nižtquiztan inakazza wejt kuzqu. Ana čjul provechumi jwesasačha.

¹⁵ ¿Jalla nuž cjenauki kjažt cjes wejrqu? Kuztanami animužtanami Yoozquin mayiziz waquizičha. Nižaza kuztanami animužtanami Yooz wirsu its waquizičha.

¹⁶ Animukaz ana pajta tawkžtan Yoozquin gracias cjan chiyasačha. Pero jalla nuž chiyana parti nonžni zoñinacauki anaž intintazi atasacha. Jaziqui: “Amén. Jalla nužoj cjala”, cjan ana kjaazni atasacha.

¹⁷ Ana pajta čhiita orasunaqu walikaz cjesačha, Yoozquin gracias cjanauki. Pero nii orasunaqu parti criichinacžquiziqui anaž yanapčha, Yoozquin juc'anti kuzziz cjejajo.

¹⁸ Wejrqu ana pajta tawkžtan juc'anti chiyučha tjapa ančucaquiztan. Jalla nižtquiztan Yoozquin gracias cjan chiyučha.

¹⁹ Jalla nuž cjenami parti criichinacžtan ajczcu, wejrqu nii parti criichinacžtan tjaajinz pecučha. Jaziqui ana pajta tawkžtan anal čhiiz pecučha. Jalla nuž chiyana parti criichinacauki anaž tantiyi atasacha. Jalla nižtquiztan iclizziz zoñinacžtan ajczcu pjijska intintita takunaca čhiiz pecučha, tunca waranka ana pajta takunacquiztan.

²⁰ Jilanaca, cullaquinaca, pruebaž tjonan, anapan uj paa. Antiz zuma pinsiñiz cjee.

²¹ Cjijrta Yooz takuqu, tuž cjičha: “Wejrqu yekja wajtchiz zoñinacžquiz paljayskatačha. Ninacauki ana intintazuc tawkžtan tii wajtchiz zoñinacžquiz paljayaquičha. Nižta ana pajta taku nonžcanami tii wajtchiz zoñinacauki anaž wejtquin kuzziz cjequičha. Jalla nuž cjičha Yooz Jiliriqui”.

²² Ana pajta takunaca paljajanaqu jalla nii čhiita takuqu ziñalažtakaz cjequičha, ana criichi zoñinacžquiziqui. Nii ana intintazuc takunacauki anačha criichi zoñinacžtajapa. Yooziž tjaata takuz jalla niičha criichi zoñinacžtajapaqu. Nii takuqu anačha ana Yoozquin criichi zoñinacžtajapaqu.

²³ Tjapa criichi zoñinacžtan ajcziz cjen tšjii ana criichinacauki luzasačha. Nekžtan, ana pajta takunacakaz čhiični nonžnaukiž niiqui, ninacauki criichi zoñinacžquiz chersnaquičha lucurat zoñinacžtakaz.

²⁴ Pero criichinacauki Yooziž tjaata takunacakaz paljayaquiz niiqui, nekžtan nii ana criichi zoñinacauki persun kuzquiz sint'aquičha. Yooz taku paljayaž cjen, nii ana criichi zoñinacž ujnaca tjeēžtaž cjequičha. Nii criichinacž čhiita takunaca nonžcu persun kuzquiz amayt'asaquičha, nekžtan persun ana zuma kamtaž pajaquičha.

²⁵ Jalla nuž ninacaz chjojzaca uj paatanacauki tjeēžtaž cjequičha. Jalla nižtquiztan quillžcu, werar Yoozquin macjatasacha, nižquin sirwizjapa. Nekžtan chiyaquičha; “Yoozqu ančucatanalčha”, cjanauki.

CULTO PAAZ PUNTU

²⁶ Jilanaca, cullaquinaca, iclizziz zoñinacžtan ajczcan, jalla tuž waquizičha. Yekjapanacauki Yooz wirsu tjaajnasacha. Yekjapanacazti tšjii zuma taku tjaajnasacha. Yekjapanacazti tšjii Yooziž tjaata taku intintiskatasacha. Yekjapanacazti ana pajta taku paljayasačha. Yekjapanacazti nii ana pajta čhiita taku zumpacha intintiskatasacha. Jalla niiqui walikazza. Pero tjapa čhiita takunacauki criichinacžquiz yanapz waquizičha, Yoozquin juc'anti kuzziz cjejajo.

²⁷ Nii ana pajta taku paljajni zoñiqui tšjii pucultan čjepultanž nuž cjesačha. Nižaza niž jaru niž jaru turnasasačha. Nižaza ninacž čhiita taku intintiskatta cjis waquizičha.

²⁸ Intintiskatni zoñi ana želaquiz niiqui, nekžtan ana pajta takunaca ana čhiiz waquizičha. Pero nii ana pajta taku čhiični zoñinacauki persun kuzquiz paljayasačha, Yoozquinami.

²⁹ Nižaza nii Yooz takunaca paljayñi zoñinacaqui tsjii pucultan ċhjepultanž nuž cjesaċha. Parti criichinacaqui ninacž ċhiita taku zumpacha tantiyaquičha, werara ana werara paljayñi, jalla nii.

³⁰ Yoozqui tsjii julzi zoñžquiz taku tjaaquiz niiqui, nekztan nii ora ċhiñiqui nužquiz apatatasaċha, niiz ċhiizquiztan.

³¹ Jilanaca, cullaquinaca, paljayñi zoñinacaqui niiz jaru niiz jaru paljayz waquiziċha, parti criichinacaž Yooz taku zumpacha zizajo, nižaza juc'anti Yoozquin kuzziz pek'inċhayta cjejajo.

³² Nii Yooz taku paljayñi zoñinacaqui persun kuzquiz zuma ewjas waquiziċha, niiz jaru niiz jaru paljayzjapa.

³³ Iclizquiziqui Yoozqui anaž tsjiiza tsjiiza arañi pecċha. Iclizziz zoñinacžtan ajczcu zuma ligituma Yoozquin rispita. Zuma walikaz ajcz waquiziċha. Jalla nuž pecċha Yoozqui.

Jalla tuž criiči zoñinacaqui ajczñipanċha tjapa wajtquiziqui.

³⁴ Nižaza iclizquiziqui maatak criichinacaqui ċh'ujupanž želasāċha, anaž ċhiiz waquiziċha. Nižaza maatak criichinacaqui luctakž mantuquiz cjistanċha. Jalla nuž cjiċha cjiirta Yooz takuqui.

³⁵ Maatakaqui tsjii puntu ana zuma intintičhaj niiqui, kjuyquin persun luctakžquiz pewcznaquičha zuma intintizjapa. Nii ajcztiquizpacha ana pewcznaquičha, criichinacžtajapa ana ombrawillta cjejajo.

³⁶ Anċhucqui nii tjaajinta jaru kamz waquiziċha. Yooz takuqui anċhucquiztan anaž kalltiċha. Nižaza anaċha anċhuc alajquizkaz Yoozqui taku tjaachiċqui. Weriz tjaajintacama kamċha tjapa iclizziz zoñinacaqui.

³⁷ Jakziltat Yooz taku paljayz kamañċiz cjeċhaja, nižaza jakziltat Espiritu Santuž tjaata kamañċiz cjeċhaja, jalla ninacžlaqui tii weriz cjiirta taku pajstanċha. Jalla tii takuċha Yooz Jilir mantitaċqui.

³⁸ Jakziltat tii weriz cjiirta taku ana pajz pecċhaj niiqui, parti criichinacaqui nii zoñžquiz anaž pajaquičha. Nii zoñiqui anapanž Espiritu Santuž tjaata kamañċizquiz.

³⁹ Wejt jilanaca, cullaquinaca, tužuċha chekanaqui. Yooz takunaca paljayz kamañquiz kuz tjaa. Pero tsjii zoñiqui ana pajta tawkžtan ċhiyaquiz niiqui, jalla nii ċhiñi zoñžquiz anaž atajz waquiziċha.

⁴⁰ Jilanaca, cullaquinaca, iclizquiziqui zuma jurmali cultu paaz waquiziċha, nižaza ajcztiquiz paljayñinacaqui niiz jaru niiz jaru ċhiiz waquiziċha.

15

JESUCRISTUZ JACATATTA PUNTU

¹ Jilanaca, cullaquinaca, weriz tjaajinta takunaca cjuñskatz pecuċha. Wejrqui werar liwriñi Yooz taku tjaajinċinċha. Nižaza weriz tjaajintanaca nonžcu anċhucqui catokċinċhucċha; nižaza nii tjaajintacama kamzjapa tjup kuzzizċhucċha.

² Nižaza liwriñi Yooz taku tiraž catokaquiz niiqui, nii liwriñi Yooz takuž cjen anċhucqui tsjan tsjan ujnacquiztan liwriita cjequičha, tsjan zuma kamzjapa. Juñta kuzquizkaz catokċizlaj niiqui, nii juntuñaallakaz catoktiquiztan ultimu ana liwriitaž cjequičha.

³ Wejrqui anċhucquiz juc'ant chekan takunaca tjaajinċinċha. Tuquiqui wejtquiz zakaz nii zuma takunacaqui tjaajintataċha. Jalla tužuċha nii tjaajinta takunacaqui. Jesucristuqui uċhum uċ laycu ticziċha. Jaknužt Yooz tawk liwruquiz cjiirtatažlaja, jalla nii cjiirta jaru complissičha.

⁴ Nekztanaqui Jesusiz curpuqui tjažtataċha. Nekztanaqui nuž tjažtquiztan ċhjep majquiztan ticziquiztan jacatatiċha. Jaknužt Yooz tawk liwruquiz tuquitan cjiirtatažlaja, jalla nii jaru complissičha.

⁵ Jacatatžcu Jesucristuqui Pedružquiz parizichiċha. Nekztanaqui niiz illzta apostolanacžquiz parizichizakazza.

⁶ Nekztanaqui niiz wiruñ pjijska patac jilanac ajczquiz parizichizakazza. Jila parti ninacaqui tira žejtċha, tsjii kjažta zoñinacakaz ticziċqui.

⁷ Niiz wiruñ Jacobžquiz parizichizakazza. Nekztanaqui tjapa niiz illzta apostolanacžquiz parizichizakazza.

⁸ Ultimquiziqui wejtquiz zakaz parizichiċha. Wejrqui parti apostolanacžquiztan wirwirilla Yooz partiqui luzzinċha.

⁹ Wejrqui parti apostolanacžquiztan ana anċha waquizuċha. Tuquiqui wejrqui Yoozquin criichinacž quintra ojklayiñtaċha. Jalla nižtquiztan anataċha Cristuž apóstol cjeta cjiċhuca.

¹⁰ Yooz wejtquiz okñiž cjen, wejrqui apóstol kamañquiz uċhtitċha. Pero ana ina Yoozqui wejr utċhiċha. Wejrqui apóstol kamañquiz juc'anti jilacami langzinċha nii parti

apostolanac̄quiztan. Nii langztiqiztan wejrqui ana honorchiz cjichucācha, Yoozza honorchizqui. Yoozqui wejtquiz wali yanapchīcha, apóstol kamañquiz zuma cumplisjapa.

¹¹ Nužulkazza nii puntuqui. Chekpachācha wejrnac̄qui an̄chucaquiz liwriiñi Yooz taku paljaychintqui. Jaziqui an̄chuc̄qui nii liwriiñi taku tjapa kuztan catokchin̄chuc̄cha.

ZOÑINACAQUI JACATATAQUICHA

¹² Jaziqui wejrnac̄qui tjaajinchin̄cha, Jesucristuqui ticziqiztan jacatatchi, jalla nii. Yekjap an̄chuc̄tzi chiiñīcha: “Zoñinacaqui tic̄zcu ana jacatatas̄ācha”. ¿Kjāzta nīzta cjesajo?

¹³ Ticziqiztan ana jacatattasāz niiqui, Jesucristuqui anapaj jacatatchi cjēchani.

¹⁴ Nīzaza Jesucristo ana jacatatchīzlay niiqui, jalla nīztiqiztan wejrnac̄āz paljayta liwriiñi taku nūz cjenac̄qui inapankat cjēchani. Nīzaza an̄chuca Cristūzquin criichi kamañac̄qui inapanzakat cjēchani.

¹⁵ Wejrnac̄qui “Yoozqui Cristo jacatatskatchīcha” jalla nūz cjiwchiya. Ana jacatatchīzlay niiqui, wejrnac̄qui toscar tisticūztakazlani Yooz puntuquiztanani. Ticzi zoñinacaqui ana jacatattasāz niiqui, Yoozqui Jesucristo anapaj jacatatskatchi cjēchani.

¹⁶ Ticzi zoñinacaqui ana jacatattasāz niiqui, Jesucristupacha anapaj jacatatchi cjēchani.

¹⁷ Nīzaza Jesucristuqui anapan jacatatchīzlay niiqui, an̄chucāz nīzquin tjapa kuztan criitac̄qui inapankat cjēchani. An̄chuca ujqiztan anapan liwriita cjēchani.

¹⁸ Nīzaza Jesucristūzquin criichi ticzi zoñinacaqui ninac̄z ujchiz cjen casticta cjēchani.

¹⁹ Jesucristūzquin criichinacaqui ultim liwrii ora tjew̄za. Nii tjew̄zqui inakazlay niiqui, ūchumqui ana criichi zoñinac̄zquiztan juc'anti incalltāz cjēchani.

²⁰ Pero ultim werara Jesucristuqui ticziqiztan jacatatchipan̄cha. Jalla nīīcha primir ticziqiztan jacatatchi zoñiqui, primira pookchi zkala ricujtāztakazza.

²¹ Primirquiztanpacha tsjii zoñīz uj paachīz cjen, tjapa zoñinacaqui ticstan̄cha. Jalla nīzta kaz tsjii zoñīz cjen tjapa Jesucristūzquin criichi zoñinacaqui jacatataquīcha, Yooztan wiñaya kamzjapa.

²² Adán cjita zoñīz cjen tjappachāz tic̄za, jalla nīzta kaz Jesucristo cjita zoñīz cjen tjapa nīzquin criichi zoñinacaqui jacatatskatta cjequīcha.

²³ Nīzaza tjapa criichinacaqui jaknūz̄t Yooz mun̄chaja, jalla nīicama jacatatskatta cjequīcha. Jesucristo, nīīcha primiraqui. Nekztan Jesucristūz tjonz tjuñquiziqui nīz parti zoñinacaqui jacatataquīcha.

²⁴ Jalla nīz wiruñ nīz parti zoñinac̄āz jacatattiquiztan, tii muntuquiz tucuzin̄znaquīcha. Nekztan tjapa Jesucristūz quintrá jilirinacami, nīzaza nīz quintrá mantiñinacami, nīzaza nīz quintrá azzinacami, jalla tjappacha liwj tjatantāz cjequīcha. Jalla nekztanaqui tjapa mantizqui Yooz Ejp̄zquin intirjitāz cjequīcha.

²⁵ Pero an̄ziqui Cristuqui tira mantistan̄cha nīz quintrarionaca liwj atipscama. Nīz quintranaca tjewc̄ztāzokaz cjequīcha.

²⁶ Ultimquiziqui ticzqui atiptāz zakaz cjequīcha. Ticzqui ana iya zelaquīcha.

²⁷ Yoozqui Cristo utchīcha tjappacha mantizjapa. Yooz Ejp̄kazza ana Cristūz mantuquiz žejl̄cha. Jalla nii puntu kjanācha. Tjapa nekztanaqui Cristūz mantuquiz žejl̄cha.

²⁸ Yoozqui Jesucristo utchīcha, tjappacha mantizjapa. Ultimquiziqui Jesucristo Yooz Majchqui tjapa tii muntuquiz žejl̄inacami atip̄zcu, niipachāz Yooz Ejp̄z mantuquiz cjequīcha. Yooz Ejp̄cha wiñaya juc'ant chekanaqui cjequīcha, tjappachquiztanaqui.

²⁹ Tsjiilla cjesācha, jacatatz puntzakaz. An̄chucaltāz tsjii cuzturumpi žejl̄cha, criichi zoñiqui ima bautistan, ticzīz cjen, žejt̄ñi criichi zoñiqui nii ticzi criichīz cuntiquiztan bautismo tanzñīcha. Ticziqiztan ana jacatatchi cjēchaja, ¿Kjāztiqiztan nīzta paa an̄chuc̄jo? ¿Ĉhjuljapa bautismo tanz̄jo? ¿Ticzi zoñīz cuntiquiztanajo?

³⁰ Nīzaza ticziqiztan ana jacatatchi cjēchaj niiqui, ¿Kjāztiqiztan wejrnac̄qui zapuru sufrican Yooz taku paljayz kamañquiz tira ojklayojo?

³¹ Apóstol kamañquiz ojklayan anchuc̄qui Jesucristo Jilir̄zquin criichin̄chuc̄cha. Jalla nūz cjen cuntintūz wejrqui. Jalla nūz chiican werar razunal chiyūcha. Nīzaza zapuru wejrqui ticz llaquizican želūcha, apóstol kamañquiz ojklaycan. Jilanaca, jalla nūz chiican, werar razunal chiyūcha.

³² Wejrqui Efeso cjita wajtquin preso cjicanaqui anawal q'uit animalanac̄ztan kich-jaskattatācha. Ticziqiztan anāzlaja jacatatīniiqui, werīz nūz sufritaqui inakat cjēchani. Ana criichi zoñīz pinsita jaru inapankazza werīz sufritaqui. Ninacaqui tūz cjiñīcha: “Lujl̄zla, lic̄zla, jaka kat ūchumqui ticznāchan”, jalla nūz cjiñīcha ana criichi zoñinacaqui. Ticziqiztan ana jacatattasāz niiqui, nūz cjiñi zoñinacaqui zuma razunchiztakat chiīchani. Pero ultim zoñinacaqui jacatataquīcha.

³³ Jaziqui an̄chuc̄qui anāz incallskata. Ana zuma kamañchiz mazinac̄chiz̄chuc̄chalaj niiqui, an̄chuc̄qui zuma kamañquiztan tsjii kjut̄ñi chjictāz cjesācha.

³⁴ Ančhucqui zuma lijitum razunanacchiz cjisna; nižaza lijituma cjee; anaž uj paa. Yekjap ančhucqui Yooz puntunaca ana zuma zizza. Jalla nii ančhucaquiz chiižinuča, ančhuc azajo.

JACATATCHI ZOŃINACŹ CURPU PUNTU

³⁵ Cunamit tsjii zoŃiqui pewcznačhan, tuž cjan: “¿Jaknužt ticzi zoŃinaca jacatataquejo? ¿Chjuluz cherchi curpuchiz cjequejo?”

³⁶ Zumzu pewczni pewczicha. Semilla čhjaczcu, nii čhjacta semillaqui ana katchi cjequiz niiqui, ew zkala ana jecznašača.

³⁷ Nii čhjacta semillaqui anaž ew zkalapacha cjesača. Nii čhjacta semillaqui semillakazza, trigo cjenami, yekja cjenami, semillakazza, anaž ew zkalapacha cjesača.

³⁸ Semilla čhjactiquiztan jaknužt Yoozqui munčhaja, jalla nižta ew zkala ulanskatča. Čhjacta semillquiztan jama, punta puntaž ew zkala ulanča. Tjapa zkalanacaqui anača tsjiikaz. Punta punta žejlča.

³⁹ Jalla nižta iratača tii muntuquiz žejlŃi curpuqui. ZoŃinacž curpuqui yekjača. Čh'iznacž curpuqui yekjača.

⁴⁰ Nižaza arajpachquin žejlŃinacž curpuqui yekjača. Nižaza yokquiz žejlŃinacž curpuqui yekjača. Arajpach curpuqui tsjemata cheechi tjeeža yokquiz žejlŃi curpuquiztan.

⁴¹ TjuŃ kjanaqui tsjematača jiiž kjanquiztan. Nižaza tsjematazakazza warawarž kjanquiztan. Nižaza tsjii warawarž kjanaqui tsjematazakazza yekja warawarž kjanquiztan.

⁴² Jalla nižta iratača jacatatzqui. Ticzi curpuqui tsjematača jacatatchi curpuquiztan. Nii ticzi curpuqui tjažta, nižazaž mojkča. Nii jacatatchi curpuzi ana ticznasača, nižaza ana mokasača.

⁴³ Nii ticzi curpuqui ana honorchizza. Nii jacatatchi curpuzi zuma honorchizza. Nii ticzi curpuqui ana azzizza. Jacatatchi curpuzi walja azzizza.

⁴⁴ Nižaza ticzzuca curpuqui tii muntuquiz kamzjapa curpukazza. Jacatatchi curpuqui tsjematača, wiŃaya kamzjapa. Tii muntuquiz kamcan, zoŃinacaqui curpuchizza. Nižta zakaz jacatatzcu curpuchiz zakaz cjequiča, wiŃaya kamzjapa.

⁴⁵ Čjirta Yooz takuqui tuž cjiča: “Tuquita zoŃiqui Adán čjitatača, nižaza žejtŃi curpuchiztača, tjapa niž majch maatinacžtajapaqui”. Cristuqui Adanžtapachazakazza. Jalla niiqui wiŃaya žetiž tjača, tjapa nižquin criichi zoŃinacžtajapaqui. Yooztan kamz, jalla niiča wiŃaya žetiqui.

⁴⁶ Tii muntuquiz zoŃinacaqui kamča žejtŃi curpuchiz. WiruŃaqui jacatatzcuqui zoŃinacaqui wiŃaya žejtŃi curpuchiz cjequiča.

⁴⁷ Tuquiza zoŃiqui yok pjilquiztan paatača. WiruŃta zoŃiqui, Jesucristo Jiliriqui, arajpachquiztan tjončiča.

⁴⁸ Tii yokquiz kamŃi zoŃinacž curpuqui Adanž curpu iratača. Nižaza Yooztan arajpachquin kamŃi criichinacž curpuqui Jesucristuž jacatatchi curpu iratača.

⁴⁹ Učhumnacaqui Adán irata curpuchizza. Pero jacatatzcu Jesucristo irata kamaquiča, ew curpuchiz.

⁵⁰ Jilanaca, callaquinaca, jalla tii puntu tjaajnuča, ančhucaquiz zizkatzjapa. Janchichiz nižaza ljokchiz curpuqui arajpach wajtquin ana luzasača. Nižaza tii mojkŃi curpuqui anaž wiŃaya žetasacha arajpachquin.

⁵¹ Tsjii zakaz ančhucaquiz zizkatz pecuča. Tjapa criichinacaqui anaž ticznaquiča. Pero tsjii ratullakaz curpunacaqui campiižintaž cjequiča.

⁵² Tsjii čhjujqui jaknužt čh'ipquičižlaja, jalla nuž tsjii ratulla curpu campiižintaž cjequiča. Arajpach anjlaž trompeta tjawžtan, curpunacaqui campiižintaž cjequiča. Nii trompeta tjawžtan, ticzi zoŃinacaqui jacatatskattaž cjequiča, ana iya ticzjapa. Nižaza žejtŃi zoŃinacž curpunaczakaz campiižintaž cjequiča.

⁵³ Tii yokquiz žejlŃi curpuqui anaž wiŃaya tjurŃi cjesača. Jalla nižtquiztan učhumqui ew curpuž tanstanča wiŃaya žejtjapa. Nižaza učhum ticzŃi curpuqui anaž wiŃaya tjurŃi cjesača. Jalla nižtquiztan učhumqui ana ticzŃi curpu tanstanča.

⁵⁴ Učhumnacaqui ew wiŃaya žejtŃi curpuchiz cjequiča, nižaza ana ticzŃi curpuchiz. Jalla nuž wattan Yooz takuqui cumplissi cjequiča. Yooz takuqui tuž cjiča: “Ticzqui atipžtaž cjequiča. Jalla nižtquiztan ana iya ticz želaquiča.

⁵⁵ Nižaza ticzqui anapanž iya atipaquiča”. Ticzqui anaž iya zoŃinacžquiz llaquita cjskataquiča.

⁵⁶ Ujchiz cjen ticz žejlča. Nižaza ticzqui zoŃinacžquiz llaquita cjskatča. Nižaza tuquita čjirta liiqui zoŃinacžquin persun ujnaca tjeeža.

⁵⁷ Wejrqui Yoozquin ancha gracias cjan tjaa-uča. Jesucristo Jilirž cjen učhumqui ticzquiztan atipaquiča.

⁵⁸Jalla nižtiquiztan, weriž pecta jilanaca, Yoozquin tjurt'iñi kuzziz cjee, nižaza Yoozquin tjuj kuzziz cjee, nižaza Jesucristo Jilirž tjaata kamañquin juc'anti juc'anti kuz tjaa. Ančhucqui zizza, Jesucristo Jiliržtajapa langzqui anača inaquí.

16

CRICHINACZTAJAPA PAAZ JUNTIZ PUNTU

¹Tsjii zakal chiizinuča, criichinacztajapa paaz juntiz puntuquiztan. Jaknužt Galacia provinciquin wejrqui tjapa iclizziz žoñinacžquiz chiizinchinčhalaja, jalla nižta irata ančhucaquiz chiizinuča, paaz juntantiz waquiziča, pori criichinacžquiz yanapzjapa, jalla nii.

²Zapa siman tumincuqui ančhucqui ančucaž cantiquiztan jama t'akz waquiziča. Jalla nuž t'akžcu chjojwaquičha wejt tjonzcama. Nekztan weriž tjontan, ana žoñ žoñžquiztan apura ojklaycan paaz juntantichuca. Ančucaž t'akzta paazqui listupachakaz cjequičha.

³Nižaza ančhucqui tsjii kjaž jilanaca illz waquiziča, nii juntantita paaz chjichñijapa Jerusalén wajtchiz criichinacžquiz. Nižaza ančhucqui nii illzta jilanacžquiz tsjii carta credencialž tjaaquičha. Nekztanaqui wejr tjonžcu, wejrpachal ninaca cuchanžcača Jerusalén watja.

⁴Wejr ojckhuca cjequiz niiqui wejttañ chicaž okaquičha ninacaqui.

TSJII KJAZT PUNTUNACA

⁵Ima tjoncan, wejrqui Macedonia yokaran ojklayasaj cjiwčha. Wiruñiqui Corinto irantasaj cjiwčha, ančucaquiz tjonzjapa.

⁶Irantižcu tsjii kjaž maj kamačhan, uz cunamit nicju sac timpu watačhani. Nekztanaqui ančhucqui wejt ojklazjapa yanapasacha, jakzi ojck cjenami, jalla nii.

⁷Wejrqui tsjii upacama watcankaz ana tjonz pecučha. Antiz tsjii kjaž maj ančhucatan kamz pecučha, Yooz Jilirž munan.

⁸Pero Efes wajtquin kamača Pentecostes tjuñicama.

⁹Tii Efes wajtquiz ancha Yooztajapa langz žejlčha. Nižaza zumpachapan langznan, walja žoñinacaqui criyačhani. Nižaza walja Yooztajapa langzñi quintra žoñinaca žejlčha.

¹⁰Timoteož irantižquitan, ančhucqui Timoteož kuz cuntintupanž cjskataquičha. Niiqui Yooz Jiliržtajapa langža, wejr irata.

¹¹Jalla nižtiquiztan anaž jecmi ančucaquiztan nii Timoteo iñarasacha. Antiz ančhucqui juc'antiž yanapaquičha, nii zuma cuntintu tira ojklajajo. Nižaza nii yanapaquičha, wejr chertzñi quejpžcajo. Tekzi wejrqui Timoteo tjewznuča parti criichi jilanacžtan.

¹²Apolos jilž puntuquiztan tiil maznuča. Wejrqui ancha nižžquiz ročhinčha, yekjap jilanacžquiz cumpañt'ajo, ančucaquin chertzñi. Parti jilanacžtan ojck cen Apoluqui ana okawk cjičhiča. Wiruñ niiqui ančhuc chertzñi okačhani, atchucaž cjen.

¹³Ančhucqui persun kamaña cwitaza. Yoozquin tjurt'iñi kuzziz cjee. Yooz aztan tjuj kuzziz cjee.

¹⁴Chjulu paacanami zuma munaziñi kuzziz cjee.

¹⁵Jilanaca, cullaquinaca, ančhucqui zizza. Acaya yokquiz Estefanasqui nižž jamilanacžtanpacha primira Yoozquin criichiča. Nekztanaqui ninacaqui parti criichi jilanacžquiz yanapzjapa kuz tjaachiča.

¹⁶Jalla nižta kuzziz žoñinacž tawk jaru kama. Nižaza tjapa nižta criichinacžquiz yanapñinacami, nižaza Yooztajapa langžñinacami rispitaquičha. Nižaza ninacž tawk jaru kama.

¹⁷Estefanastan Fortunatžtan Acaicužtan jalla ninacaž tjontan, walja cuntintutača wejrqui. Ančucaž ana wejttañ žejlčucaž cjen, ninacača ančhuc cuntiquiztan wejr yanapchiqui.

¹⁸Wejttañ kamcan ninacaqui wejt kuzquiz amtaychiča, jaknužt ančuca kuzquiz amtayčhaja, jalla nižta. Nižta žoñinacaqui, rispittaj cjila.

¹⁹Asia provinciquin žejlñi jilanacaqui ančucaquin tsaanžquičha. Aquilžtan Priscilatan, nižaza ninacž kjuyquiz ajczñi jilanacžtan, jalla tjapa ninacaqui ančhuc criichinacžquin tsaanžquičha, Jesucristo Jilirž tjuuquiz.

²⁰Nižaza tjapa criichi jilanacaqui ančucaquin tsaanžquičha. Nižaza ančucaquiz porapat zuma kuztan tsaanassnaquičha.

²¹Wejrqui Pablutča. Persun kjaržtan tii weriž tsaanta litraqi cjiuruča.

²²Jakžiltat Jesucristo Jiliržquin ana kuzziz cječhaja, nižaza quintra cječhaja, jalla niiqui anawalquiz uchtaž cjequičha. ¡Učhum Jesucristo Jiliri urej tjonla!

²³⁻²⁴Nižaza Jesucristo Jiliriqui ančucaquiz zuma yanapt'ila. Nižaza wejrqui tjapa ančucaquin k'ayichučha Jesucristuž cjen. Jalla nužoj cjila. Amén.

SEGUNDA CARTA DEL APOSTOL SAN PABLO A LOS CORINTIOS

¹ Wejr Pabluqui Jesucristuž illzta apostoltča. Yoozqui niž munañpi jaru tii apostol puestuquiz wejr utchiča. Jaziqúi tii cartal apayžcuča ančhucacuin Corinto wajtchiz zoñinaca. Wejttan Timoteužtan ančhucacuin tsaanžcuča. Nižaza tjapa Acaya yokquin kamñi zoñinacžquin tsaanžcuča. Ančhucqui Yoozquin criichiž cjen Yooz icliz zoñinacčhucča.

² Učhum Yooz Ejpžtan Jesucristo Jiliržtan ančhucacuíz yanapt'ila. Nižaza ančhucacuíz walikaj kamkatla.

YOOZ EJP ANCHA OKZŃI NIZAZA KUZŃI KUZIZ

³ Učhum Jesucristo Jilirž Yooz Ejpžcui honora waytitaj cjila. Yooz Ejpqui okzñi kuzzizpanča, nižaza sufrita zoñinacžcui zumpacha kuzñipancha.

⁴ Wejrnacaž sufranami Yooz Ejpqui kuzñipancha, niztapacha wejrnacaž sufrita jilanacžcui kuzjapa. Nekztanaqui wejrnacqui sufrita jilanacžcui maznasača, "Yoozqui amquiz kuznasača", cjan. Nižaza wejrnacpacha ninacžcui kuznasača.

⁵ Jesucristužquin criichiž cjen Jesucristuž irata ancha sufruča. Nižaza Jesucristuča wejrnacacuíz zumpacha kuzñiqui.

⁶ Jaziqúi wejrnacqui ančhucacuíz tsjan zuma kuznasača. Nižaza Yooz taku paljaycan ančhucaltajapa sufruča, ančhuc liwriyta cjisjapa. Nižaza wejrnacqui Yooziž kuztača. Jaziqúi nižtakaz ančhucacuíz kuznasača. Nekztan ančhucqui kuzta kuzziz cjen sufrinaca wataquiča, ana ančhuc kuz turwayskatžcu. Jaziqúi ančhucqui wejrnac irata sufrican, pasinziz kuztan awantasača.

⁷ Ančhucqui tjurt'iñi kuzzizčhucča. Jalla nužupanča ančhucqui. Ančhucqui wejrnac irata sufriča. Nižaza Yoozqui ančhucacuíz zakaz kuznaquiča. Jalla nužupanž cjequiča.

⁸ Jilanaca, cullaquinaca, tii puntunaca ančhucacuíz zizkatž pecuča. Asia yokaran ojklajcan, ancha sufrichinča. Jalla nuž sufrican azi upzižtakaz cjissintacha, ticzmayažtakaztača.

⁹ Jalla nižta sufritiqiztan kuzquiz tantiichinča, ticzucapan, jalla nii. Pero Yoozza ticzinacami jacatatskatñiqui. Jalla nižta sufrichinča, persun aqquizimi nižaza pinsitanacquizimi ana kuzziz cjisjapa, antiz Yoozquin juc'anti kuzziz cjisjapa.

¹⁰ Ultimquiziqui Yoozqui wejr liwriičiča, nii ticzmaya ojklajta pruebanacquiztan. Nižaza wilta nižta prueba tjonaquiz niiqui wilta Yoozqui wejr liwriyaquiča. Yoozquin kuzziz cjan, jalla nužupanča wejt razunaqui.

¹¹ Ančhucqui wejtquiz mayizinalla, wejt pruebanacquiztan liwriita cjisjapa. Jalla nuž ančhucacuíz ancha mayizintaž cjen liwriital cjeeča. Jalla nekztan weriž yanaptaž cjen ančhucqui Yoozquin gracias cjan chiyasača. Jaziqúi wejtajapa mayizinalla.

PABLO CORINTO WAJTQUIN OJKZ PECATČHA

¹² Wejrqui ančhucatan, nižaza tjapa zoñinacžtanami Yooz zuma kamañchiz kamchinča, zuma lijituma. Ana pizc kuzziz kamchinča. Wejt kuzquiz zizuča anal toscara chiyuča, wereral chiyuča. Jalla nižta zuma kamcan, ana zoñiž pinsita jaru kamchinča. Okzñi Yoozqui wejtquiz yanapchiča, nižta zuma kamzjapa. Jalla nižta zuma kamtaž cjen cuntintuča wejrqui.

¹³ Weriž cjiirtaqui zuma werera zakazza. Liican, ančhucqui kjanaž intintasača. Ana incallñi kuztan cjiiržcuča.

¹⁴ Yekjapanacaqui ančhucacuíztan wejt kuz pajča. Wejt kuzqui juc'anti zumpacha pajspanča ančhucqui. Nekztan Jesucristo Jilirž tjonz tjuñquiziqui ančhucqui weriž cjen cuntintuž cjesača, jaknužt wejrqui ančhucacuíz cjen cuntintul cjeeča, jalla nižta.

¹⁵ Ančhucatan wejttan walikazza. Jalla nužupanča. Jalla nižtiqiztan weriž ojklajtiqiz ančhucacuíztan wilta tjonz pecaytuča. Nekztan ančhucqui pizc wilta cuntintu cjskattaž cjitasača, weriž pizc wilta tjonžtiqiztan.

¹⁶ Primiraqui Macedonia cjeta provinciquin ojkan ančhucacuíz tjonz pecaytuča. Nekztan Macedoniqui ojkažu wilta ančhucacuíz tjonz pecaytuča. Jalla nuž ančhucqui wejr yanaptasača, Judea yokquin irantizjapa. Nužupan tantižcu ana atchinča.

¹⁷ Jalla nižtiqiztan yekjap zoñinacaqui wejtjapa čhiichiča, Pabluqui p'ajpacužtakaz čhiichiča, cjan. Anača werera ninacž tantiitaqui. Wejrqui ana tantiyiñča ana criichi zoñižtakaz. Ana criichi zoñinacaqui p'ajpawc razunchiz chiyasača.

¹⁸ Lijitum Yoozqui zizza, wejrqui anača p'ajpacužtakaz čhiichintqui, nii

¹⁹ Silvanužtan, Timoteužtan, wejtjan, jalla wejrnacqui anapan p'ajpawc razunanaca chiichintqui. Ančhucatan kamcan Jesucristo Yooz Majch puntuquiztan lijituma chiichinča. Nižaza Jesucristuqui zuma lijitumača. Niiž chiita taku cumpliñipanča.

²⁰ Nižaza tjapa Yooz taku cumpliñipanča. Jalla nižtiquiztan Jesucristuž cjen Yooz tawkwiztan “Nužoj cjala” cjiñča. Nuž cjan Yoozquin honora tjaa-uča.

²¹ Nižaza Yoozza wejrnacquizimi ančhucaquizimi Jesucristužquin tjurt'iñi kuzziz cjskatñiqui. Nižaza Yoozza wejr utchiqui, niiž apóstol cjisjapa.

²² Yoozqui nii tjeeziča, nižaza wejtnaca kuzquiz niiž Espiritu Santo luzkatchiča. Jalla nižtiquiztan kjana tjeeztača, Yooz žoñinacača wejrnacqui, nii.

UJCHIZ ZOŃI PERTUNTA

²³ Jilanaca, cullaquinaca, Corinto wajtquin tsjii tjonžni okitača. Pero ana tjonchinča, ančhuc ana uzsjava. Jalla niiča ana wejr tjonñi razunaqui. Yoozqui zizza, weraral cjiwča wejrqui.

²⁴ Ančhucqui Yooz mantuquiz željča, anaž wejt mantuquiz. Pero ančhucaquiz chiižinačhaj niiqui, yanapz pecuča, ultimu ančhuc juc'anti cuntintuž cjisjapa.

2

¹ Wejrqui tantiichinča, imazi ančhucaquin wilta tjonžni. Wilta llaquiskatz anal pecatuča.

² Ančhucaquiz llaquiskatasaz niiqui, anaž čhjulumi wejtquiz cuntintu cjskatasacha. Ančhucča wejtquiz cuntintu cjskatñiqui. Jalla nižtiquiztan ančhucaquiz ana wilta llaquiskatz pecatuča.

³ Jaziqui ančhucaquin tjonz cjenpacha tuqui cjižžquichinča zumpacha ewjt'ican, ančhuc anawalinaca azquichjapa. Nekztan wejrqui ančhucaquin irantižcu, cuntintu cjeeča, ana llaquita. Ančhucča wejtquiz cuntintu cjskatñiqui, žana jaa? Weriz cuntintu cjen ančhucqui zakaz cuntintuž cjesača. Jalla nužupanž cjesača.

⁴ Tuqui cjižžquican, ančhucajapa anča kuzquiz sint'iskatchinča nizaza llaquisinča, kaazcama. Jalla nuž cjižžquican anal ančhuc llaquiskatz pecatuča, antiz wejt zuma munaziñi kuz tjeez pecaytuča. Ančhucatan anča munazuča.

⁵ Nii ana wali kamñi žoñiqui ančhucaquiz anča llaquiskatchiča. Wejtquiz zakaz llaquiskatchiča; pero ančhucaquiz juc'anti. Cunamit anaž tjapa ančhucaquiz llaquiskatchižlani, pero jila partipan ančhucaquiztan.

⁶ Jila parti ančhucqui nii ana wali kamñi žoñi casticchinčhucča, nižaza chjaawjkatchinčhucča. Nužquizkaz cjala.

⁷ Anziqui nižquiz pertunz waquiziča, nižaza nižquiz kuz waquiziča, nii žoñi ana juc'anti upa kuz cjisnajo.

⁸ Jaziqui ančhucaquiz rocuča, nižquiz zuma munaziñi kuz wilta tjeezjapa.

⁹ Tuqui tii puntuquiztan ančhucaquiz cjižžquichinča, ančhuc zumpacha yanzjapa, tjapa weriz chiižinta cazzi, ana cazzi, jalla nii.

¹⁰ Nii ujchiz žoñiqui ančhucaž pertuntažlaja, jalla niiqui weriz pertuntazakazza. Cristuž yujcquiziqui pertunuča, ančhuc juc'ant zuma cjisjapa.

¹¹ Nii ujchiz žoñi pertunta cjis waquiziča, Satanás diablu ana učumnacaquiz atipskatzjapa. Diabluž ana wal mañanaca zizza učumqui.

QUINTU ANCHA ZIZ PECCHICA PABLUQUI

¹² Troas watja irantichinča, Cristuž liwriñi taku paljayzjapa. Nekztan Jesucristo Jilirižtajapa langznan, muzpa žoñinacaqui Yooz taku nonziča.

¹³ Pero Tito cjita jilžtan anča zalz pecaytuča, ančhuc quintu zizjapa. Jalla nižtiquiztan wejt kuzqui anatača cuza. Jalla nižtiquiztan Troas wajtchiz žoñinacžquiztan eccu, Macedonia yokquin ojkhinča.

¹⁴ Nicju tjapa ančhucž quintu nonzinča, walikazza ančhucqui. Yoozquin anča gracias cjan chiyuča. Yoozpanča anawalinacquiztan wejrnaca atipskatchiqui. Nižaza tjapa kjutñi Yooz Ejpqui Cristuž puntuquiztan paljayta cjskatča wejrnacaž cjen. Jaknužt tjapa kjutñi tsjii zuma ulura žkejtchaja, jalla nižta irata wejrnacaž paljayta liwriñi taku tjapa kjutñiž ojķča.

¹⁵ Wejrnacqui zuma inzizužtakaz Yoozquiz cuntintu cjskatuča, Cristuž puntu paljaycan. Liwriita žoñinacžquizimi ana liwriita žoñinacžquizimi Cristuž puntu paljayuča.

¹⁶ Nii ana liwriita žoñinacaqui anapan catoktiquiztan juc'anti casticta cjequiča. Jalla nižtiquiztan weriz paljaytaqui ana wali chjonanči žketñižtakazza ninacžtajapa. Pero nii liwriita žoñinacazti weriz paljayta catoktiquiztan juc'ant zumaž cjequiča. Jalla nižtiquiztan weriz paljaytaqui zuma uluražtakazza ninacžtajapa. Jalla nižtiquiztan jequit Cristuž puntuquiztan paljayñi puesto tanznasajo?

YOOZ UCHTA ZONICHA PABLUQUI

¹⁷ Wejrqui Cristuž puntu paljaycan anal negocio paa-učha; nižaza Yooz taku anal queručha yekjap žoñinacažtakaz. Wejrzi zuma litituma paljajučha zuma kuzziz. Yooz uchta apostultčha. Cristužtan wejtta tsjii kuzziz cjen, Yooz Ejpqui zizza, liwriiñi Yooz taku litituma paljajučha.

3

¹ Jalla nuž wejt puntuquiztan chiyanaqui, ančhucqui pinsachani, wejr persunpacha honora waytiñi, jalla nii. Yekjapanacaqui tsjii carta nombramientužtan ojklajčha. Nižta carta nombramientuqui wejtta ana pecza, ančhucquiz prisintizjapa. Nižaza ančhucquiztan nižta carta anal mayasačha.

² Ančhucpachača wejt carta nombramiento cuntaqui. Ančhucqui weriž paljaytiqiztan ew kamañchizza. Tjapa žoñinacaqui nii cherasačha, nižaza pajasačha.

³ Cristuqui ančhucquiz ew kamañchiz cjiskatčha, weriž paljaytaž cjen. Jaziqi ančhuc ew kamañqui tsjii carta nombramientužtakazza. Jalla nii cartauki anačha čjul tintižtanami cjiřtaqui; anačha čjul mazquizimi cjiřtaqui. Yooz Espiritu Santuqui ančhuc kuzquiz luzzičha, ew kamañchiz cjisjapa. Jaziqi ančhuc ew kamañqui tsjii carta nombramientužtakazza.

CRISTUZ LIWRIIÑI TAKU PALJAYZ

⁴ Ančhucčha kjana tjeežñi, wejrqui lititum apostoltqui, nii. Jalla nužupan cjiwčha. Cristuž cjen nuž chiyasačha Yooz yujcquiz.

⁵ Nuž cjan, zakaz cjiwčha: Wejrpacha ana čjul walimi paasačha Yooztajapa. Čjul Yooztajapa wali paatami Yooz aztanpankaz paatačha. Inakaztčha wejrqui. Pero Yoozqui wejr illzičha, niž apóstol cjisjapa.

⁶ Yoozpacha wejr utčičha niž ew compromis puntu paljayñi ojklajzjapa. Nii ew compromisuqui anačha Moisés cjiřta liiquiztan, antiz Espiritu Santužquiztančha. Nii cjiřta lii cjen žoñinaca infiernuquin okaquičha, castictaž cjisjapa. Espiritu Santuž cjen žoñinacaqui arajpachquin okaquičha, Yooztan wiñaya kamzjapa.

⁷ Nii Moises cjiřta liiqui maznacquiz litranacžtan cjiřtatačha. Nii cjiřta lii tanžcu, Moises yujcqui walja c'ajčičha. Jalla nuž Moises yujc walja c'ajan, parti Israel žoñinacaqui niž yujc ana cheržni atčičha. Moises yujcqui jalla nuž c'ajñiž cjen, zumat zumat upa c'ajčičha. Yoozqui jalla nižta lii tjaachičha, honorchiz cjisjapa, žoñinaca ana liwriiñi cjenami.

⁸ Yoozqui niž ew compromiso juc'ant honorchiz cjiskatchičha. Ew compromisužtan Espiritu Santuqui žoñinacžquiz liwriiskatčha.

⁹ Nii honorchiz lii ana cumplitiquiztan učhumqui castictajapa cjisinčhumčha. Pero ew compromiso catokchiž cjen učhumqui Yooz yujcquiz zuma cjisinčhumčha, ana ujchiz. Juc'ant honorchizza nii ew compromisuqui.

¹⁰ Tuquiqui Moisés liiqui honorchiztačha. Anzta ew compromisužtan nii tuquita liiqui anča upa honorchizza, nii anzta compromisuqui juc'ant honorchiz cjen.

¹¹ Nii liiqui Cristuž tjonzcama mantizjapakaz tjaatatačha. Nekžtan ana iya walčha. Nii ew compromisuzti wiñayaž tjuraquičha. Jalla nižtiquiztan juc'ant honorchiz žejlžtančha.

¹² Jalla nii ew compromiso ut'aytaž cjen wejrnacqui učtačha, wiñaya liwriiñi taku paljayzjapa. Jalla nižtiquiztan tjup kuztan kjanacama chiyučha.

¹³ Nii Moises irata anal paa-učha wejrnacqui. Moisesqui niž c'ajni yujc chjojzičha, parti Israel žoñinaca ana cherzjapa, nii yujc c'ajni katzcama. Moises yujcqui ana tira c'ajničha. Nii tuž cjičha, liiqui anaž tira walčha, apatatta, jalla nii.

¹⁴ Wejrnacqui liwriiñi puntuquiztan kjanacama chiyučha. Pero Israel žoñinacazti nii puntu ana intintazičha. Chojru kuzzizpantačha anzcama ana intintazza. Moises lii liižcu nii liiquizkaz pinsičha. Cristužquin kuz tjaaz ana pinsičha. Pero Cristužquin kuz tjaachiž cjenkaz liwriiñi Yooz puntu intintazni cjesačha.

¹⁵ Anzcama Moises lii liicanami ana liwriiñi Yooz puntu intintazasačha jila parti judío žoñinacaqui.

¹⁶ Jesucristo Jiliržquiz kuz tjaazcu, nekžtanž liwriiñi Yooz puntu intintazasačha.

¹⁷ Jesucristo Jiliriqi Yooz Espiritužtan tsjii kuzzizza. Nižaza jakziltiž kuzquiz Jesucristuž Espiritu žejlčhaja, jalla niiqi liwriitapanž cjequičha.

¹⁸ Jalla nižtiquiztan liwriitaž cjen, tjapa učhumqui Jesucristo Jilirž honoraž tjeeža, tsjii ispijužtakaz. Nižaza učhumqui zumat zumat Jesucristuž irata juc'ant zuma cjišsa. Nižaza niž irata juc'ant juc'ant honorchiz cjišsa. Jalla nuž učhumnacaltajapa cjiskatčha Jesucristo Jilirž Espirituqui. Nužupančha Yoozqui učhumnacaltajapa.

4

YOOZQUI PABLO UTCHICHA APOSTOL PUESTUQUIZ

¹ Jalla nižtiqiztan anal upa kuzziz cjesača. Yoozqui niž okzñi kuzziz cjen wejr apóstol puestuquiz utchiča.

² Jalla nii puestuquiz kamcan, wejrqui ana wali chjojzaka paaznaca, nižaza azzuca paaznaca ana wirapan paachinča. Nižaza ana wali paaz mañanaca ana wira paachinča. Nižaza Yooz taku anal tsjii kjutñi cjiyasacha. Antiz kjanacama werarapanikal chiyuča. Yoozza weriž chiičaqi zizñiqi. Nižaza weriž chiičiqiztan tjapa žoñinacaqui persun kuzquiz zizasacha, wejrčha lijitum apostoltqui, jalla nii. Nuž cjiwčha, ana wali žoñinacaž wejtquiz uj tjojtñanami.

³ Weriž paljaytaqui zumzu takužtakazza ana criichi žoñinaczjapaqui. Ninacača infier-nuquin ojkninacaqui.

⁴ Tii muntuquiz mantiñi diabluqui nii ana criichi žoñinacz kuz chojru cjiskatchiča, liwriiñi taku ana intintajo. Zur žoñižtakaz cjiskatchiča, Cristuž liwriiñi kjana ana cherajo, nižaza liwriiñi taku ana catokajo. Nii liwriiñi takuča anča zumaqui. Anča zuma Cristuž puntu chiiča. Jesucristuča Yooz Ejpž kuz tjeezñiqi.

⁵ Jilanaca, cullaquinaca, nonžna. Wejrqui Jesucristuž puntuquiztankaz paljayuča. Ultim chawjc Jiliripankazza Jesucristuqui. Nuž cjiwčha. Jesucristuž honora waytuča; anača wejt persun honora waytuča. Nižaza Jesucristuž mantuquiz ojklayan wejrqui ančhuca piyunitča, ančhuc yanapzjapa.

⁶ Tuquitanpacha Yoozqui mantichiča ween zumchiquiz kjana cjejajo. Nii Yooz-pachača wejt kuzquiz kjanchiqui, liwriiñi Yooz taku zumpacha intintizjapa, anča zuma Yoozpan pajzjapa. Jesucristuqui niž anča zuma kamañchiz cjen Yooz kuzmi nižaza Yooz honora tjeeziča, učhum nii zuma intintajo.

PABLUQUI ANCHA SUFRICHICHA

⁷ Jaknužt zumanaca tsjii ljoc mazquiquiz chojta cječhaja, jalla nižta irataž Yoozqui liwriiñi puntu wejtquiz cumpjiichiča žoñinaczquiz paljayajo. Jalla nuž Yoozqui wejr apóstol utchiča, niž juc'ant zuma azi tjeezjapa. Liwriiñi aziqiu Yoozquiztankaz tjonča, anaž wejtquiztan tjonča. Žoñikazza wejrqui.

⁸ Wejtta anča anawalinaca želanami, ultimquiziqui wejrqui atipača. Wejt kuz tur-wayskatanami, anaž wejt kuz llajllasa.

⁹ Žoñinacaž wejr chjatkatanami, Yoozqui wejr ana zinalla ecča. Wejtquiz anča sufriskatcanami, žoñinacaqui wejr anaž akasača.

¹⁰⁻¹¹ Jesucristužquin sirwican jakziquinami wejr ojklayučhaja, anča sufruča, tic-maya cjenami. Jalla nuž sufrican, Jesucristuž cjen tira žetuča; nižtajapa tii curpuquiz kamuča. Jesucristužquin sirwichiž cjen anča sufruča. "Waj ticznaa; ticznaa" cjiwčha. Pero tii ticzñi curpchiz žejtcanaqui, Jesucristuž cjen kamuča.

¹² Wejrqui walja sufrisnacal watuča. Wilta wilta ticzmayžtakaztača, Cristuž puntu paljaycan. Pero weriž paljaytiqiztan ančhucqui Cristuž žeti tanchinčhucča.

¹³ Yooz takuqui tuž cjiča: "Yoozquin kuzziz cjen, wejrqui chiyuča". Jalla nižta irata wejrqui Yoozquin kuzzizza, sufrita kamcanami. Jalla nižta kuzziz cjen, chiichiyuča, Cristuž puntu paljaycan.

¹⁴ Nuž paljayuča, tuž zizcu: Yoozqui Jesucristo Jiliri jacatatskatchiča, nižaza Jesucristužtan chica wejrmi ančhucmi jacatatskatta cjequiča. Yooz yujcquin chjichtaž cjequiča. Chjulumi sufrican, nii cjuñznuča.

¹⁵ Tjapa wejtquiz wachinacaqui ančhucaltajapača. Liwriiñi Yooz taku paljayuča, juc'anti juc'anti žoñinaca Yoozquin kuzziz cjiskatzjapa, nižaza ninaca Yooziž yanapta cjiskatzjapa. Jalla nuž cjen tsjan tsjan žoñinacaqui Yoozquin gracias cjan chiyaučiča, nižaza Yoozqui juc'anti honorchiz cjequiča. Jalla nuž pecuča.

¹⁶ Jalla nižtiqiztan wejrqui anal llajllazuča. Kjažtami wejt curpu sufrichani wejt kuz zapuru tsjan tjupi cjissa; juc'anti Yoozquin kuzziziča.

¹⁷ Tii wirquiz kamcan sufrisqui tsjii ratužtakazza; nekztan watča. Pero tii muntuquiz sufritiqiztan učhumqui arajpachquin wiñaya honorchiz cjequiča. Anča sufriču, anča juc'anti honorchiz cjequiča. Arajpachquin anča zuma kamaquiča.

¹⁸ Nužupanž cjequiča, tii muntuquiz žejlñi cusasanaczquiz anača kuz tjaazqui. Antiz arajpach zumanaczquin kuz tjaaz waquiziča. Nekztan arajpachquin anča honorchiz cjequiča. Cherta cusasanaca wataquiča. Arajpach zumanacazti wiñaya tjuraquiča.

5

PABLUQUI ARAJPACHQUIN OJKZ PECCHA

¹ Jalla tuž zizuča wejrqui. Tii žejtñi curpuqui ticziž cjequiz niiqui, Yoozqui ew curpuž tjaaquičha, Yooz paata curpu. Nekztan arajpachquin wiñaya kamača.

² Tii muntuquiz sufricanaqui anchal pasnuča ayincan. Ew arajpach curpu anchal pecučha, nekz kamzjapa.

³ Wejt kuzqui nii ew curpuchiz ancha pecučha, tsjii ew zquiti cujtz pecas, jalla nižta. Ana curpuchiz anal cjis pecučha.

⁴ Tii curpuchiz sufrican, ayučha. Tii curpuqui ticznaquičha. Nižaza tii muntuquiz kamtaqui ana wiñayjapača. Jalla nižtiquiztan ew yekja curpuchiz cjis pecučha. Arajpachquin wiñayjapa kamz pecučha.

⁵ Yoozpachača nižtajapa wejr utčiča. Nižaza Yoozza niiz Espiritu Santo wejt kuzquiz luzkatchiqui. Jaziqui arajpachquin kamspanča wejrqui.

⁶ Jalla nižtiquiztan wejrqui tjup kuzzizpanča. Tii curpuchiz kamcan, arajpachquin Yooztan chica ima žejlča. Pero arajpach wajtchiz zoñtča wejrqui. Jalla niil zizuča.

⁷ Tii muntuquiz kamcan, ana Yooz chercan kamuča. Pero ana cherta Yoozquin kuzzizpan kamuča ana niiz cheranami.

⁸ Jalla nižtiquiztan tjup kuzziz želuča. Tii curpuquiztan ulanžcu, nižaza Yooztan chica arajpachquin kamcan, jalla nii walikaz cjesača.

⁹ Jaziqui žejtcanami, ticz cjenami, Yoozquin kuzziztča wejrqui. Weriz kamtiqiztan wejt Yoozquiz cuntintu cjiskatzpan pecučha.

¹⁰ Tjapa učumnacqui Cristuž yujquiz prisintistanča, pjalžta cjisjapa. Jaknužt tii muntuquiz kamtčhaja, zuma ana zuma, jalla niit jama pjalžtaž cjequičha. Jalla nuž pjalžtiquiztan zapa maynižquiz arajpach kamaña tjaataž cjequičha.

ZOÑINACŽTAN YOOZTAN WALIKAZ CJESACHA

¹¹ Jalla nižtiquiztan Jesucristo Jiliri ekscan zuma razunžtan ančhucaquiz chiyučha, zuma kamančiz kamiñča, cjan. Toscara anal chiyučha. Wejt kamaña Yooz zizza. Wejr cjiwča, ančhucqui zakaz zizza zuma kamañchiz kamiñča, jalla nii.

¹² Jalla nuž čiican, persun honora anal waytiz pecučha. Antiz wejt puntuquiztan ančhucaquiz intintiskatz pecučha, wejtquiztan cuntintu cjisjapa. Jalla nekztanaqui ančhucqui wejt quintra zoñinacžquiz kjaaznasača, zuma razuna tjaacan, “Pabluqui zuma kamiñča”, cjan. Wejt quintra zoñinacaqui zoñinacžquiztan honorchiz cjis pecučha. Ninacžtajapa zuma kuz anaž importayča. Tucquin cjis, jalla niikaz importayča ninacžtaqui.

¹³ Wejrzi zuma kuzziz cjis anchal pecučha. Wejt quintra zoñinacaqui cjiñičha “Lucuratača Pabluqui”. Jalla nuž chiyanami Yooztajapakal kamuča. Yekjap zoñinacazti cjiñičha, “Zuma razunžtan čiičha Pabluqui”. Ančhucaltajapa zuma razunžtan chiyučha.

¹⁴ Jesucristuqui ancha okžñi kuzziz cjen tjapa zoñinacž laycu ticziča. Zoñinacž cuntiquiztan ticziča. Jalla nužupanča weraraqui. Jalla nuž tjapa kuztan criižcu, wejrqui Jesucristužquin sirwistanča, livriñi taku paljaycan.

¹⁵ Jesucristuqui tjapa zoñinacž laycu ticziča, zoñinacž ana persunjapa kamajo, antiz Cristužtajapa kamajo. Jalla nižtiquiztan jakziltat ew kamañchiz kamčhaja, jalla ninacaqui Jesucristužtajapa kamz waquiziča. Jesucristučha ninacž laycu ticziqui, nižaza jacatatchiqui.

¹⁶ Jaziqui Jesucristužtajapa kamcan, zizuča, zoñinacž kuzza chekanaqui, nii. Tuquiqui pinsatuča: Zoñinacž cherchi, pajk puesto ocupchi, wajt honora tanchi, jalla nižtanacača chekanaqui, nuž cjan pinsatuča, Cristuž puntuquiztanami. Ana criichi zoñinacž pinsitakaz pinsatuča. Anziqui ana iya nižta pinsučha.

¹⁷ Jaziqui tuž cjiwča: jakziltat Cristužtan tsjii kuzziz cjissaja, jalla niiqui ew kuzzizza, nižaza ew kamañchizza. Tuquita kamaña livj ecta, ew kamañchizpan kamča.

¹⁸ Ew kuzmi nižaza ew kamañami Yooziž tjaatapanča. Cristuž cjen Yoozqui učumnaca pertunchičha, nižtan učumnacatan zuma cjisjapa. Nižaza Yoozqui wejnaca utčiča parti zoñinacžquiz Yooz pertunz puntu paljayajo, Cristuž cjen zoñinacžtan Yooztan zuma cjesača, cjan.

¹⁹ Yooz pertunz puntuqui jalla tužučha. Yoozqui Cristuž cjen tjapa zoñinaca pertunasacha, nižtan ninacžtan zuma cjisjapa. Zoñinaca pertunžcu, ana ujhiz cjiskatča, ana casticta cjisjapa. Nižaza Yoozqui wejnacaquiz cumpjiičičha, Yooz pertunz puntu paljayajo.

²⁰ Jalla nižtiquiztan Cristuž cuntiquiztan ojklayuča niiz takunaca paljaycan. Jalla nuž ojklayan Yoozqui weriz cjen ančhucaquiz paljayča. Jaziqui Cristužtajapa ančhucaquiz čiizinuča, Yoozquin kuz tjaalla, nižtan ančhucatan zuma cjisjapa. Jalla nuž čiizinuča.

²¹ Cristuqui ana čjul uj paachiča. Učhum laycu Jesucristuqui Yooz yujcquiz učhum ujnacchiz cjissiča, učhumqui Yooz yujcquiz ana ujchiz nižaza zuma cjisjapa. Jalla nuž cjskatchiča Yoozqui, niiz pinsitacama.

6

¹ Jilanaca, cullaquinaca, wejrqui Yooztan langznuča, žoñinaca Yoozquin kuz tjaajo. Jaziqiu ančhucaquiz chiižinuča, liwriiñi Yooz takuqui anača inapankaz nonzqui, nii. Ancha okzñi kuzziz cjen, Yoozqui ančhucaquiz niiz liwriiñi taku paljaykatchiča.

² Cjijrta Yooz takuqui tuž cjiča: “Wejrtča okzñiñtqui, ančhuc liwriita cjisjapa. Jaziqiu tii timpuquiz okzñi kuzziz ančhucaž mayizita nonzinja, nižaza tii liwriiz timpuquiz ančhucaquiz yanapchinča”. Jaziqiu Yoozpanča okzñi kuzzizqui. Anziqiu žoñinaca liwriita cjesača.

³ Wejrqui anal jec žoñzquizimi t'ezinz pecuča, ujquiz tjojtjapa. Jaziqiu ana jecmi weriz Yooztajapa trabajta iñarasacha.

⁴ Yooztajapa trabajan, jaknuž watanami, zuma Yooz kamañkaz tjeez pecuča. Yoozquin tjurt'iñi kuz tjeez pecuča, čjul sufrisquiztanami, nižaza čjulquiztan t'akjiri žejlžquiztanami, nižaza čjul ch'ama ojklayquiztanami. Čjulunacaž watanami tjurt'iñi kuz tjeez pecuča.

⁵ Jilanaca, cullaquinaca, tižta sufrisnaca watchinča: wjajttatača, carsilquiz chawc-tatača; žoñinacaqui wejtnaca quintra aptichiča; nižaza muzpa ch'ama langznaca watchinča otčañ tjepi; nižaza ana tjačhi kamchinča, nižaza čherž kjara pascan žejlčinča. Jalla nižta sufrisnaca watchinča, tjurt'iñi kuztan.

⁶ Yooztajapa langzcan, zuma Yooz kamaña tjeez pecuča, zuma lijitum Yooz kamañchiz kamcan, nižaza Yooz puntu zuma zizñi nižaza pasinziz kuzziz kamcan, nižaza okzñi kuzziz kamcan, nižaza Espiritu Santuž aztan kamcan, nižaza zuma lijitum munaziñi kuzziz kamcan,

⁷ nižaza lijitum Yooz taku paljaycan, nižaza Yooz aztan kamcan. Jalla nižta kamcan zuma Yooz kamaña tjeez pecuča. Nižaza Yooztajapa kamcan, Yooz zuma razunžtan ojklayuča, tsjii zuma armichiztakaz. Yooz zuma razuna chican, wejrqui žoñinacžquiz Yooz taku catokskatuča, nižaza quintra žoñinacžquiz Yooz zuma razunžtan kjaaznuča.

⁸ Yooztajapa kamcan, awizaqui wejrqui zuma rispittača. Awizaqui ch'aanitzakazza. Awizaqui žoñinacaqui wejt quintra ana waliž parliča. Awizaqui žoñinacaqui wejt puntu zumaž parliča. Wejt puntuquiztan yekjap žoñinacaqui “Niiča tsjii kjutñi irpiñiqui” cjan chiičiča. Jalla nuž cjenami, wejrtča werara chiiñtqui, nižaza irpiñtqui.

⁹ Yekjapanacaqui wejr ana pajz pecča. Jalla nuž cjenami, pajtapanikazza wejrqui. Yekjapanacaqui “Nii Pabluqui ticzla”, cjiñiča. Jalla nuž cjenami tiral žetuča. Wejt Yooz Epiž ujžta cjenami, ana contača wejrqui.

¹⁰ Llaquita kuzziz cjenami, Yoozqui wejt kuzquiz cuntintupan cjskatcha. Poriž cjenami, Yooz taku paljaycan walja žoñinacžquiz ricachužtakaz cjskatchinča. Ana čjulchiz cjenami, tjapa wejtta žejlča, Yooz maatiž cjen.

¹¹ Corinto wajtchiz jilanaca, cullaquinaca, kjanapacha ančhucaquiz paljayžčuča. Ančhucatan zuma munazuča, tjapa kuztan.

¹² Anača juntuñalla kuz ančhucatan munazuča. Yekjapanacazti anaž tjapa kuztan wejttn munaziz pecčhani.

¹³ Pero ančhuczti tjapa kuztan wejttn zuma munaziñi cjee. Ančhucaquiz chiižinuča, jaknužt tsjii ejp persun ocjalžquiz chiižinčaja, jalla nižta.

YOOZ ŽOÑINACŽHUCCHA ANCHUCQUI

¹⁴ Tsjiiilla chiižinuča. Ana criichi žoñnacžtan anaž anča pajasa, tii muntuquiz kamcan. Yooz kamañchiz žoñiqui Yooz quintra žoñžtan anapan tsjii kuzziz cjesača. Zuma žoñiqui ana zum žoñžtan anapan zuma pajasasača, tii muntuquiz kamcan.

¹⁵ Jaknužt Cristužtan Satanas diablužtan tsjii kuzzizpan cjesajo? Nižaza jaknužt criichi žoñiqui ana criichi žoñžtan tsjii kuzziz cjesajo? Anapanž tsjii kuzziz cjesača.

¹⁶ Yooz kjuyquiz žoñiž paata yooznacaqui anapanžuntu cjesača. Nižaza učhumqui žejtñi Yooz kjuyčhumča. Yoozpachača tuž cjičiqui: Ninacž kuznacquiz kamača; ninacžtan chica želača. Ninacž Yooz wejr cječa, nižaza ninacaqui wejt wajtchiz žoñinacaž cjequiča.

¹⁷ Jalla nižtiquiztan Yooz Jiliriqui tuž zakaz cjiča: Ana criichi žoñinacž kamañquiztan zaraka, nižaza jayta. Ana zum kamañnacchiz anapan kama. Nekztan wejrqui ančhuc zuma risiwača.

¹⁸ Ančhuca ejp cječa. Nižaza ančhucqui wejt maatinacaž cjequiča. Jalla nuž cjiča tjapa azziz Yooz Jiliriqui.

7

¹ Munazita jilanaca, cullaquinaca. Yoozqui učumnacaquiz niiz chiita takunaca tjaachiča. Jalla nižtiqizitan učumqui tjapaman ana walinaquizitanami nižaza tjapaman ana zum kamañanacquizitanami jaytistanča, zuma kamañchizpan cjisjapa, curpumi kuzmi zuma cjisjapa. Yoozquin eksan, nižaza rispitan, tjapa ana walinaquizitan jaytistanča, juc'ant juc'ant walja zuma lijituma cjisjapa, Yooz kamañchizpan cjisjapa.

PABLUZ CHIITA TAKU CATOKTA

² Wejttan zuma munaziñi cjee, tjapa kuztan. Ana jakziltiz quintra čhjulumi paachinča. Nižaza ana jakziltizquizimi tsjii kjutñi chjitchinča. Nižaza ana jakziltizquizimi incallchinča, cusasanaca tanzjapa.

³ Jalla nuž čhiican, ančucaquiz uj tjojtunz ana pecuča. Tjapa kuztan ančucatan zuma munazuča. Tuqui nuž cjetuča. Anača wejr ančuca quintraqui. Ticz cjenami, žejtz cjenami tirapan ančucatan zuma munazuča.

⁴ Wejr cjiwča, ančucqui tirapan Yoozquin tjurt'iñi kuzziz cjequiča. Ančucaž cjen anča cuntintuča. Ančuca honora waytuča. Ančuca quinto nonžcu zuma kuztaž wejrqui. Anča sufrita cjenami anchal chipuča ančucaž cjen.

⁵ Macedonia yokquin irantižcu, ana jeejzñi atchinča. Tjapa kjutñi walja sufrisnaca želatča. Tjapa kjuttan quintranaca želatča. Wejt kuzqui turwaysnatča, “Criichi žoñinacaqui qoejpsnaa”, cjichinča. Llaquita kuzziztača wejrqui.

⁶ Pero Yoozqui llaquita žoñinacžquiz kuzñipanča. Yoozqui wejr kuzziča, Tituž tjon-tiquiztan.

⁷ Nižaza Titžquiztan ančuca quinto nonžcu, wejrqui zuma kuztatača. Tituqui ančucaž cjen llaquita cjissitača. Nekztan ančucaquiz tjonžcu, nižaza ančucaž zuma kamta cheržcu, kuztatača. Nižaza Tituqui quint'ichiča, ančucqui wejr anča chertz pecatča, nižaza weriž llaquita cjen ančucqui llaquitazakaz cjissinčucča. Nekztan wejtžuz tjurt'izinchinčucča. Jalla nii nonžcu juc'anti cuntintu cjissinča.

⁸ Weriž cjiirta cartaqi ančuc llaquita cjiskatchiča. Jalla nuž cjenami, anziqi ana llactazzinča. Pero tuquiqui llactazzinča; nii ančucaquiz čhiizinta ana cjiirz pecatuča. Pero ančuc tsjii upacamakaz llaquiskatchinča.

⁹ Ančucqui llaquiskattiquiztan anazuma kamznaca ecchinčucča. Jalla nižtiqiztan wejrqui cuntintuča. Ančucaž llactztiquiztan wejrqui anatača cuntintu. Antiz ančucaž anazuma kamznaca ectiquiztan jalla nekztantača wejrqui cuntintu. Ančucaž anazuma kamtiqiztan Yoozqui ančucaquiz uj cjuñkatchiča. Jaziqi weriž cjen ančucqui ana ina llaquissinčucča.

¹⁰ Yoozqui žoñžquiz uj cjuñkatča kuz campiita cjejado. Jequit kuz campiičhaja, jalla niiqui liwriita cjesača, zuma kamañchiz cjisjapa. Nižaza liwriita žoñinacaqui cuntintuča. Ana criichi žoñinacaqui ujnaca cjuñžcan nižaza llactazcan ana kuz campiyaquiz niiqui chojru kuzziz cjissa. Ultimu infernuquin okaquiča.

¹¹ Ančuczti uj cjuñž Yoozquin juc'anti kuzziz cjissinčucča; oralla kuz campiichinčucča. Nižaza tjapa kuz tjaachinčucča ana wali kamznaca azquichjapa. Nii uj paañi žoñž quintra anča žawjchinčucča. Nižaza nii ujquiztan tsucchinčucča. Nižaza wejttan anča zalz pecchinčucča. Nižaza nii uj paañi žoñi anča casticz pecchinčucča. Nižaza ultimu nii uj paañi žoñi casticchinčucpanča. Jalla nižtiqiztan ančucqui kjanapacha tjeezinčucpanča, zuma kuzzizčucča, ana tira ujchiz.

¹² Nii uj paata puntuquiztan nonžcu ančucaquiz c'aripacha cjiiržquichinča. Anatača nii uj paañi žoñžapakaz cjiiržquichinqui. Nižaza anatača nii quintra uj paažinta žoñžapakaz cjiiržquichinqui. Antiz ančucajapakaz cjiiržquichinča, Yooz yujcquiz ančucaquiz tjeezjapa, ančucqui wejttan munaziñi kuzzizza, jalla nii.

¹³ Ultimquiziqui tjappacha walikaz cjissiča. Jalla nižtiqiztan wejrqui cuntintu cjissinča. Ančucaž wilta zuma kamtiqiztan Tituqui wilta llan kuzziz cjissiča. Nižaza Tito cuntintu cjissiž cjen, wejr zakaz juc'ant cuntintu cjissinča.

¹⁴ Wejrqui Titžquiz ančuca honora waytichinča, “Ninacaqui zumača”, cjican. Jalla nuž cjican ultimquiziqui ančucaž cjen ana azkatchinča. Ančucatan žejlcan werar razunakaz čuichinča. Nižaza Titžquiz čhiita razuna werara zakazza ančuca puntuquiztan.

¹⁵ Tituž tjaajintacama zuma kamchinčucča. Nižaza Tito zuma risiwchinčucča, humilde kuztan, nižaza rispitiñi kuztan. Tjapa nižta cjuñžcu Tituqui ančucaquin juc'antiž munaziča.

¹⁶ Ančucaž cjen wejrqui zakaz anča cuntintuča. Nižaza ančuca puntuquiztan cjiwča, anča zuma kamañchiz, jalla nii.

8

OFRENDANACA TJAAZ PUNTU

¹ Jaziqui jilanaca, cullaquinaca ančucaquiz tii zizkatz pecučha, jaknužt Macedonia yokquiz željñi criichinacaqui Yooz zuma kamaña tjeezičha, jalla nii.

² Nii criichi žoñinacaqui ancha pruebanaca watchičha. Ancha pori cjisiz cjenami ninacaqui ancha cuntintu želatčha. Nižaza ricachužtakaz walja ofrendanaca utchičha.

³ Ninacz želinchizquiztan jama utchičha. Wejr cjiwčha, jilacama utchičha ninacz persun kuzquiztan.

⁴ Ninacaqui t'akjir criichinaczquin ofrenda tjaaz ancha pecchičha, jaknužt parti criichinacaqui ofrenda tjaatčhaja, jalla nižtapacha. Nižaza wejtquiz ancha rocchičha favora paajo, ninacz ofrenda chjichajo, jalla nii rocchičha.

⁵ Ninacaqui juc'ant zuma paachičha weriž tantiitiquiztanaqui. Tuquiqui Yoozquin tjapa kuz tjaachičha. Nekztan Yooz munañpi jaru wejtquiz kuz tjaachizakazza.

⁶ Jalla nižtiquiztan wejrqui Tito rocchinčha, ančucaquin wilta okajo. Tuquiqui Tituqui ofrenda tjaaz puntu ančucaquiz chiižinčičha. Jaziqui Tito wilta rocchinčha, ančucaquin wilta okajo, ančuca ofrendanaca cumpliskatzjapa, jaknužt tuqui ančucqui okzñi kuzquiztan tjaatčhaja, jalla nuž.

⁷ Ančucqui ancha zumačha; ančučha Yoozquin kuzzizpan, nižaza Yooz puntu zuma zizñi, nižaza zuma tjaajnasachha, nižaza tjapa kuztan zumanaca paayiñčuchčha, nižaza wejtan zuma munaziñi kuzzizčuchčha. Chjulquizimi ančucqui ancha zumačha. Jalla nižtiquiztan ančucqui zuma ofrenda tjaaz zakaz waquizicha, ančuca okzñi kuzquiztan.

⁸ Ančucaquiz anal mantučha, pero zizkatz pecučha, parti žoñinacaqui tjapa kuztan ofrenda utchičha, jalla nii. Jazic ančucqui walja ofrendanaca tjaaquiz niiqui, ančuca okzñi kuz tjeeznasachha.

⁹ Učhum Jesucristo Jilirž ancha okzñi kuz zizza ančucqui. Jesucristuqui tjappacha nižtacama željchiz cjenami, ančucaž cjen pori cjisšičha tii muntuquiz kamcan. Jalla nuž pori cjisšičha ančuc ricachužtakaz cjskatzjapa.

¹⁰ Jalla nižtiquiztan tii ofrenda puntuquiztan ančucaquiz chiižinučha. Waj tsjii wataqui ančucqui t'akjir criichinacztajapa ofrenda uch pecatčha, nižaza ofrenda uchi kalltichinčuchčha. Jalla nižtiquiztan anziqiu nii ofrenda cumpliskatz waquizicha. Jalla niiqui walipanž cjesačha.

¹¹ Tuquiqui ančucqui tjapa kuztan ofrenda uch pecatčha. Jalla nuž pectaqui cumpliskatz waquizicha, ančuca želinchizquiztan jama.

¹² Jakziltat tjapa kuztan ofrenda utčhaja, želinchizquiztan jama uch waquizicha. Jalla niiqui Yoozquin cuntintu cjskatasachha. Jakziltat ana zinta želinchiz cječhaja, jalla nižquiztan Yoozqui ana ofrenda mayčha.

¹³ Wejrqui anal pecučha, yekja criichinaczquiz yanaptiquiztanaqui ančucpacha t'akjiri cjisjapa.

¹⁴ Tuž cjiwčha, anziqiu ančucqui juc'ant želinchizza. Jalla nižtiquiztan nii t'akjir criichi žoñinaczquiz yanapasachha. Wiruñaquí ninacaqui ančucaquiz yanapachani, ninacz juc'ant želinchizquiztan jama. Jalla nižtiquiztan tsjiikaz cjequičha.

¹⁵ Cjijrta Yooz taku tuž cjičha: "Juc'ant želinchiz žoñiqui anaž čhjetnasachha. Nižaza ana želinchiz žoñiqui ana t'akjiri želasachha".

TITZ PUNTU

¹⁶ Yoozqui Tito ančucaquiz ancha cjuñzkatchičha, jaknužt wejrqui ančucaquiz cjuñzničha, jalla nižta. Jalla nižtiquiztan Yoozquin gracias cjican chiyučha.

¹⁷ Weriž roctiquiztan Tituqui "iyaw" cjichičha. Pero niipacha ančucaquiz cjuñzičha. Jalla nižtiquiztan persun kuzquiztan ančucaquin tjonžcaquičha.

¹⁸ Titžtan juntu yekja jila cuchanzčachha. Tjapa iclizziz criichinacaqui nii jilž puntu zizza, zuma liwriñi taku parliñi, jalla nii.

¹⁹ Nižaza iclizziz criichinacaqui nii jila utchičha, wejtan chica ojklajajo, nižaza tii ofrenda Jerusalemen chjitzjapa. Wejrqui tii ofrenda chjitz pecučha, Yooz honora waytizjapa, nižaza wejt yanapñi kuzziz tjeezjapa.

²⁰ Jalla nuž tii ricujta ofrendaqui ancha tažpachachha. Jalla nii paaznaca chjichcan wejrnacqui zuma kjana kamz pecučha, žoñinaca wejtnacaquiz ana uj tjojtñajo, "Pabluqui persunjapa ofrendanacquiztan paaz jwessičha", cjican.

²¹ Yooz yujcquizimi žoñinacz yujcquizimi wejrnacqui zuma lijituma kamz pecučha.

²² Titžtan nii yekja jilžtan tsjii jilžtan zakaz cuchanzčachha. Tii jilaqui wejrnacqui wawzinčha, zuma lijitum kuzziz chjultakquiztanami, jalla nii. Niiqui ančuca puntuquiztan nonžcu, ančucaquin tjonzquin ancha pecchičha. Ančucaž zuma kamtiquiztan nižta kuzzizza.

²³ Titž puntuquiztan tuž cjiwča. Niiqui wejt cumpańeruča. Nižaza wejttan chica ančhucultajapa sirwiča. Nii yekja pucultan jilanacž puntuquiztan tuž cjiwča, ninacača iclizquiztan cuchantaqui, nižaza ninacaž cjen Cristuqui ancha honorchizza.

²⁴ Nonžna ančhucqui. Tjapa criichinacžquiz ančuca zuma okzńi kuz tjeezna. Jalla nuž tjeeznan criichinacaqui zizaquiča, zuma razunžtan ančucaž kamtiquiztan wejrqui cuntintutča, jalla nii.

9

OFRENDA PUNTU

¹ Tsjiižtan zakal chiižinuča Yooz žońinacžtajapa ofrenda puntuquiztan. Jalla nii puntuquiztan anača ančucaquin tsjii cartami cjiyržquihuca.

² Ančhucqui tjapa kuztan tjaaz peguińčuča. Jalla nii zizuča. Nižaza Macedonia yokquin žejlńi criichinacžquiz cuntintu cjiwča, ewitanpacha Acaya yokquin žejlńi criichinacaqui ofrendižtan yanapzjapa listutača, jalla nuž chiyuča. Jalla nuž nonžcu tsjan kuzziž cjsiřha ofrenda uchjapa zakaz.

³ Nižaza wejrqui tii čjepultan jilanaca cuchanžcuča, weriž čiiita ančuca puntuquiztan ana toscara cjsjapa, ultimupan ančuca uchta ofrenda tjacžta cjsjapa, jaknužt wejrqui parti criichinacžquiz cjiučhaja, jalla nuž.

⁴ Cunamit yekjap Macedonia criichinacaqui wejttan chica tjonačani. Ninacžquiz ančuca ofrenda uch puntuquiztan kjaž wiltami chiižinčinča. Jalla nižtiquiztan ančuca ofrenda ana listu tjacžtažlaj niiqui, wejtnacaltami ančhucaltami aziž cjequiča.

⁵ Ana azi cjsjapa, wejrqui tantiičinča, tii čjepultan jilanaca rocž waquiziča wejt tuqui ančucaquin tjonznajo. Ninacaqui tjonžcu ančucaž compromitta ofrenda cumpliskataquiča. Jalla nižtiquiztan ančuca ofrenda listu tjacžta cjequiča ima wejt tjonan. Zuma okzńi kuzziž cjen ofrenda uch waquiziča, ana weriž chiižintiquiztankaz.

⁶ Ančhucqui tii cjuńzna. Jequit koloculla zkala čhjacačhaja, nižaza koloculla ajznaquiča. Nižaza jequit wacchi čhjacačhaja, nižaza wacchi ajznaquiča.

⁷ Zapa mayni persun kuzquiz tantiižcu, ofrenda uchaquiča. Jequit zuma okzńi kuztan ofrenda utčhaja, jalla nižtan munaziča Yoozqui. Ana pižc kuztan uchasača, nižaza ana žońiž chiižintiquiztankaz uchasača.

⁸ Tiizakaz cjuńzna. Yoozqui ančucaquiz wacchi tjapaman wintizunanaca tjaaznasača. Jalla nižtiquiztan ančhucqui želinchizkaz cjesača. Nižaza ančhucqui želinchizquiztan ofrenda tjaasača, tjapaman zuma obranaca yanapzjapa.

⁹ Tii puntuquiztan cjiyrta Yooz takuqui tuž cjiča: Zuma žońiqui okzńi kuztan pori žońinacžquiz tjača. Nižaza niiž zuma obranaca watay wata cjuńtaž cjequiča.

¹⁰ Yoozza semilla tjaañiqui čhjaczjapa, nižaza čhjeri tjaañiqui lujljapa. Jalla nižtiquiztan Yoozqui ančucaquiz želinchiz cjskataquiča, juc'anti. Nekžtan ančhucqui juc'ant ofrenda tjaasača. Ančucaž zuma tjaatiquiztan zuma obranacchiz cjequiča.

¹¹ Yoozqui ančucaquiz tjapaman zuma cusasanacchiz cjskataquiča, ančuca okzńi kuztan juc'anti tjaazjapa. Ančucaž uchta ofrenda intirjitiquiztan, nii ofrendižtan yanapta criichinacaqui Yoozquin ancha gracias cjan cjequiča.

¹² Jalla nuž ofrenda tjaacan Yooz sirwiča. Nižaza nii Yooz sirwitiquiztan t'akjir criichinacaqui yanapta cjequiča. Nekžtan ninacaqui Yoozquin ancha gracias cjan cjequiča.

¹³ Tii ofrendaqui tjeeža, jaknužt ančhucqui Cristuž liwrińi tawc jaru kamčhaja, jalla nii. Nižaza ančucaž zuma kamtiquiztan Yoozquin ancha honorchiz cjequiča. Ančhucqui okzńi kuztan wali chawc ofrenda tjaaquiča. Ninacžtajapa, nižaza tjapa criiči žońinacžtajapa ančhucqui zuma okzńi kuzzižčuča. Jalla nižtiquiztan Yoozqui honorchiz cjequiča.

¹⁴ Yoozqui ančucaquiz ancha zuma okzńi kuzziž cjskatchiča. Jalla nižtiquiztan nii yanapta žońinacaqui ančhucaltajapa Yoozquiztan mayižinaquiča. Nižaza ančhucatan juc'anti zuma munazaquiča.

¹⁵ Jilanaca, cullaquinaca. Tiipanž cjuńzna. Yoozqui učhumnacaquiz Cristo tjaachiča. Nii Yooziž tjaataqui juc'ant zumača; ana intintazzucača. Yoozquin ancha gracias cjan cjiwča.

10

PABLUQUI CRISTUŽ APOSTOLUČHA

¹ Jilanaca, cullaquinaca. Wejr Pabluqui tii cjiyržcuča. Jaziž nonžna. Cristuqui humilde kuzziž. Jalla nižta kuzziž cjen wejrqui ančucaquiz chiižinžcuča. Yekjap žońinacaqui tuž cjiča: “Ančhucatan žejlcjan, Pabluqui humilde kuzzižtača. Pero ančhucatan ana žejlcjan, c'aripachača”.

² Ančhucatan wilta żejlcan, ana wilta c'ari cjis pecučha. Yekjapanacaqui wejtnacaquij uj tjojtunčha. "Žoñž kuzcamakaz kamčha Pabluqui", jalla nuž cjiñičha. Jalla ninacžtajapa c'ari cjesačha. Pero ančhucqui ninacaž irata ana cjee. Ančhucaltajapaqui anal c'ari cjis pecučha. Cristuž apostoltčha wejrqui. Pero wejt persun aztan mantiz anal tjeez pecučha.

³ Wejrqui žoñi cjicanami ana žoñž kuzcamakaz paa-učha, nižaza ana žoñinacžtan kichas pecučha. Pero tjapa Yooz quintranacžtan quiražtakaz zalnasasčha.

⁴ Nižaza Yooz quintranacžtan zalžcu, ultim arma anal joojoo-učha. Antiz Yooz aztan anawalinacžquiztan atipasasčha, ninacaž anawal azziz cjenami.

⁵ Yooz quintra razunanacami atipasasčha. Nižaza čjul mit kuzquiztan pinsita razunanacami atipasasčha, žoñinaca Yoozquin pajkatžjapa. Tjapa žoñinacaž pinsitanacami Cristuž tjaažintanac jaru cjiskatz pecučha.

⁶ Jalla nižtiquiztan wejrqui listučha tjapa Yooz quintra žoñinaca casticžjapa. Ančhucqui Yooz mantuquizpan cjisna, tjappacha. Weriz tjonžtan, jakžiltat anaž Yooz mantuquizlaja, jalla niiqui castica cjequičha. Cristuž apostoltčha wejrqui.

⁷ Ančhucqui žoñikaz chekža, kjažta tsijtchižlaja nižaza kjažta čhiñižlaja, jalla nii. Jakžiltat mit kuzziz "Wejrqui Cristuž partiquiztčha" cječhaja, jalla niiqui cjuñž waquizičha, wejrzakaztčha Cristuž partiquiz, jalla nii.

⁸ Wejt apóstol puesto puntuquiztan cunamit juc'anti chiyučhani. Jalla nuž cjenami wejrqui anal azasasčha. Jesucristo Jiliriqui wejtquiz nii apóstol puesto tjaachičha, ančhucalta zuma kamañchiz cjiskatzjapa. Wejtta nii poder ana žejlčha, ančhuc akžjapa.

⁹ Cartanaca cjižžcu anal ančhuc tsucunž pecučha.

¹⁰ Yekjap quintra žoñinacaqui tuž cjičha: "Pabluž cartanacaqui čhawjc jilirž cartanacažtakazza. Pero tekz žejlcan, ana azzizza, nižaza niiz razunanaca inakazza". Nuž cjiñičha yekjapanacaqui.

¹¹ Jalla nižta cjiñi žoñinacaqui zumpacha intintaz waquizičha. Jaknužt wejrqui cartanacquiz cjižžquitučhaja, jalla niicama paasačha ančhucatan žejlcan.

¹² Nii mita kuzziz žoñinacaž irata cjis anal pecučha. Ninacaqui porapat iñaraskan ana intintazni kuz tjeeža. Yooz tawk jarupankaz kamž waquizičha.

¹³ Wejrqui persun puntuquiztan anal juc'ant chiyučha. Yoozpachačha wejtquiz tii apóstol langž tjaachiqui. Nii langžquiztan jama chiyučha. Nižaza nii Yooziž tjaata langžquiztan jama ančhucquin tjonžinčha, liwriñi Yooz taku paljayžjapa.

¹⁴ Ančhucquin ana tjontasaž niiqui, wejrqui Yooziž tjaata langžquiztan jama ana ojktasasčha. Parti Cristuž liwriñi taku paljayñi žoñinacžquiztan wejrtčha primero ančhucquin tjonchintqui. Yekja žoñiž Yooz taku langtiquiz ana mitisasasčha.

¹⁵ Yekja žoñiž Yooztajapa langžtiquiztan anapal cjiwčha, "Nii langžtaqui weriz langžtačha" cjicanaqui. Wejrqui pecučha, ančhucqui juc'anti Yoozquin kuzziz cjejajo. Jalla nižtiquiztan ančhucaporquiz Yooztajapa juc'anti langž pecučha, Yooz tjaata langžquiztan jama.

¹⁶ Jalla nekztanaqui ančhucquiztan nawjkchuc yekja wajtchiz žoñinacžquiz zakaz liwriñi Yooz taku paljayž pecučha. Pero yekja žoñiž Yooztajapa langžtiquiz anal mitisis pecučha.

¹⁷ Jakžiltat honora waytiz pecčhaja, nižlaqui Yooz honora waytiz waquizičha.

¹⁸ Jakžiltat persun honora waytican čhiñižlaja, jalla niiz puntuquiztan Yoozqui "ana zumasčha" cjequičha. Jakžiltat "Yooz alaja zumapankazza" cječhaja, jalla niiqui Yooziž tjaata honorchiz cjequičha.

11

PABLUZTAN ANAZUM TJAAJIÑINACŽTAN

¹ Wejrqui zumzužtakaz tsjii koloc chiyasčha. Nii zumzužtakaz čhiita takunaca nonžnalla.

² Yoozqui ančhucajapa tsjii silusiñižtakaz wejtquiz cjiskatčha. Weriz Yooz taku paljaytiquiztan ančhucqui Cristužquin kuzziz cjissičha. Cristužtan zalz ora wejrqui ančhuc zuma kamañchiz Cristužquin prisintis pecučha, jaknužt tsjaa zuma tur naaža compromitta tjožwquiz prisintita cječhaja, jalla nuž.

³ Wejrqui ančhuc punctuquiztan turwayznučha; cunamit tsjiiqui ančhucquiz incallskatačhani, Cristužquin ana tjapa kuz cjisjapani, nižaza Cristužquiztan zarakchi cjisjapani. Ančhucacž pinsitanacaqui tsjii kjutñiž cjisnačhani. Tuquitanpacha nii ana wal zko-ražtakaz diabluqui mañužtan Evaquiz incallčičha, cunamit jalla nižta incallta cjisnačhani ančhucqui.

⁴ Wejrqui ančhucquin tjonchinčha, werar liwriñi takumi nižaza Jesusiž puntuquiztanami paljayžjapa, nižaza tjonchinčha Espiritu Santuž ančhuc kuzquiz luzskatzjapa. Jaziqui ančhucquiz čhižinučha. Tsjii žoñinacaqui tsjemat liwriñi taku paljayñiž cjenami,

ančhucqui nii incallñi zoñi zuma risiwiñchucquiča. Ninacaž tsjemat tjaajintanaca catokiñchucquiča. Nižaza tsjii zoñinacaqui tsjemat espiritunaca tjaaz pecasaž niiqui, ančhucqui nižta incallñi zoñi zuma risiwiñchucquiča. Nuž nonžcu, ispantichinča; nižaza llaquita kuzziz cjskatchinča.

⁵ Yekjapnacaqui ančhucquiztan nii incallñi zoñinacž puntuquiztan pinsiča, zuma apostolonacača, jalla nii. Ninacaqui anača werar apostolonacaqui; anača wejtquiztan pajk jiliriqiu. Jalla nuž cjiwča.

⁶ Wejrqui anal altu tawkžtan paljaycan ančhucatan kamchinča. Jalla nuž cjenami wejrqui Yooz puntu zuma zizuča. Jalla nii zizñi cjan kjanapacha tjezinča weriž tjapa puntunaca paljaytiquiztan. Tantiya ančhucqui.

⁷ Wejrqui humilde kuzziz ančhucatan kamchinča, ančhuc honorchiz cjisjapa. Nižaza ana paaz paca mayžcu, liwriñi Yooz taku ančhucquiz paljaychinča. ¿Jalla nuž anawali paachin wejrjo?

⁸ Yekja iclizziz zoñinacaqui wejtquiz paaz tjaachiča. Jalla nii ofrendanaca tanzinča, ančhucquin Yooz taku paljayñi ojkszjapa.

⁹ Ančhucatan kamcan ana želinchiz cjissinča. Pero ančhucquiztan ana čjulumi maychinča. Macedoniaquiztan tjonchi jilanaacaqui wejtquiz onanchiča. Jalla nižtiquiztan anaž čjulumi wejtquiz pjaltatča. Tuquiqui wejrqui ančhucquiz ana mayzjapa anča cwitassinča, ančhucjapa ana ch'ama cjejajo, nižaza jaztanami mayzquiztan cwtasuča.

¹⁰ Jaknužt Cristuqui werarapan chiiñitažlaja, jalla niž cjen nižta werarapan chiyiñzakaztča wejrqui. Jalla nižtiquiztan legali cjan, wejrqui cjiwča, anaž jec Acay wajchiz zoñiqui wejt puntuquiztan cjesača, “Pabluqui ana želinchiz cjan, wejtquiztan maychiča”, nuž cjanaqu. Jalla nuž ančhucquiztan ana čjulumi maytiquiztan cuntintutča wejrqui.

¹¹ ¿Kjažtiquiztan nižta chiyu wejrjo? ¿Ančhucatan ana zuma munazojo? Anapanž cjesača. Yooz zizza, wejrqui ančhucatan munazuča, jalla nii.

¹² Wejrqui liwriñi Yooz taku paljayiñča, ana paaz paca mayžcuqui. Nižaza tirapan nužullakaz kamača. Nekztan jakžiltat paaz ganzjapa Yooz taku paljayčhaja, jalla niiqui anapanž cjuču, “Wejrčha Pabluž irata Yooz taku paljayiñtqui”, nuž cjanaqu.

¹³ Nii paaz tanzjapa paljayñinacaqui falso apostolonacača. Nii zoñi incallñinacaqui Cristuž apostolonacažtakaz ojklayñiča.

¹⁴ Jalla nužupan tii muntuquiz wataquiča. Satanás diablupacha tsjii Yooz anjilažtakaz ojklayča.

¹⁵ Nižazakaz Satanásquiz sirwiñi zoñinacaqui werara Yooz sirwiñinacažtakaz ojklayča. Jalla nižta puntu nayžcu, ana tsucaquiča. Ninacaž nižta ojklaytiquiztan jama castictaž cjequiča.

PABLUQUI ANCHA SUFRISNACA WATCHICHA

¹⁶ Wiltal cjiwča. Jalla nuž chiyanaqu ančhucqui weriž chiita puntuquiztan anača pinsisqu, “Niiqui zumzu taku chiča” cjanaqu. Jalla nuž pinsanami, wejr chiyaj cjila tsjii lucrata zoñižtakaz. Wejrqui tsjii koluculla persun honora waytaj cjila.

¹⁷ Jalla nuž chiican wejrqui lucrata zoñižtakaz chiyacha. Anal chiyacha Yooz Jilirž ortin jaru, jalla nuž persuna honora waytican.

¹⁸ Walja zoñinacaqui tii muntuquiz čjulunacquiztanami persun honora waytiča. Jalla nižtiquiztan wejr zakal persun honora koluculla waytača.

¹⁹ Ančhucqui chiiñchucča, “Ziziñ zoñinactča wejrnacqui”, cjanaqu. Jalla nuž chichiz cjenami ančhucqui zumzu zoñinacž takunaca cuntintu nonzniñchucča.

²⁰ Falso zoñinacaqui ninacž mantuquiz ančhuc cjskatz pecča. Nekztan ančhucqui nii zoñinacžquiz zuma cassa. Nižaza tsjii falso zoñinacaqui ančhuc cusasanacquiztan paca mayča. Nekztan ančhucqui ninacžquiz zuma tjaacha. Nižaza tsjii falso zoñinacaqui persunaltajapa zuma cjisjapa ančhuc mantiča. Nekztan ančhucqui nižquiz zuma cassa. Nižaza tsjii falso zoñiqui ančhuc iñarča. Nekztan ančhucqui nižquiz zumakaz awantiča. Nižaza tsjii falso zoñiqui ančhuc yujcquiz tsjajpachani. Jalla nižakaz ančhucqui zuma awantachani.

²¹ Wejrqui ančhucatan kamcan ana nižta kamchinča; humilde kuzziz kamchinča. ¿Jalla nižtiquiztan wejrqui azasajo? Anapal azasača. Yekja zoñinacaqui čjulquiztan persun honora waytačhaja, jalla nii zoñinacžquiztan juč'antitča wejrqui. Jalla nuž chiicanaqui lucratažtakaz chiyuča.

²² Yekjapanacaqui cjiñiča, “Hebreo sarchiz zoñinactča wejrnacqui”. Werj zakal cječa, “Hebreo sarchiz zoñiča wejrqui”. Nižaza ninacaqui cjiñiča, “Yooz illzta Israel wajtchiz zoñinactča wejrnacqui”. Wejr zakal cječa, “Yooz illzta Israel wajtchiz zoñiča

wejrqui". Nižaza ninacaqui cjiñičha, "Abrahamž majchmaatquiztan tjoniñičha". Wejrmi zakal cjeečha, "Abrahamž majchmaatquiztan tjoniñičha".

²³ Ninacaqui cjiñičha, "Cristuž sirwiñičha". Wejrmi zakal cjeečha, "Cristuž juc'ant zuma sirwiñičha". Jalla nuž čiicanaqui lucuratažtakaz chiyučha. Pero ninacžquiztan juc'anti langzinčha Cristužtajapa. Nižaza ninacžquiztan juc'anti wjajttatačha. Nižaza ninacžquiztan juc'anti carsilquiz chawctatačha. Nižaza tsjii kjaž wilta ticzmaya želayučha.

²⁴ Pjijska wilta judío žoñinacaqui wejr casticchičha. Jalla nuž casticcan, quinsa tunca llatuncan lazu wjajtta mutchinčha.

²⁵ Čhjep wilta wejrqui wjajtz paržtan wjajttatačha. Tsjii wilta maztan čhajttatačha. Čhjep wilta warcuquiz okan nii warcu julskatchičha. Warcu julskatzcu tsjii nooj weentiztan majiñtiztan pajk kot taypiquiz željchinčha.

²⁶ Tirapan ojkojkchinčha, walja anawalinaca watñiž cjenami. Tižta anawalinaca watchinčha, anawal pujunaca, anawal tjañinaca, wejt wajtchiz anawal žoñinaca, yekja wajtchiz anawal žoñinaca, chawjc wajtquiz anawal željñinaca, ch'ekti yokquin anawal željñinaca, anawal pajk kotanaca, nižaza anawal falso jilanaca. Jalla nižta anawalinacami watchinčha.

²⁷ Nižaza ancha langzinčha, nižaza zuma ch'amanaca watchinčha, kjaž wilta ana tjaji atchinčha, nižaza kjaž wilta čherž kjarami kjaž kjarami passinčha, kjaž wilta ayunassinčha. Nižaza kjaž wilta zakinaquiz ch'uncan sufrichinčha, zquitz kjara.

²⁸ Tjapa nižtanaca watchiž cjenami, iyakal sufručha. Zapuru tjapa iclizziz žoñinacžtajapakal cjuñznučha, llaquita kuzziz ninaca zuma kamañchiz cjisca.

²⁹ Jakziltat llajllasñi kuzziz cječhaja, wejrqui nižtan chica zakal llaquisučha. Jakziltat ujquiz tjojtskatñi cječhaja, wejrqui nii tjojtskatñi žoñž quintra žawjznučha.

³⁰ Wejrqui persun honora waytaž niiqui, weriž sufritanacquiztanami nižaza inallakaz cjitiquiztanami honoral waytačha.

³¹ Anal toscara chiyučha. Jesucristo Jilirž Yooz Ejpqui nii zizza. Yooz Ejpqui wiñaya honorchiz cjila.

³² Damasco wajtquin želan, Aretas cjita chawjc mantiñi jiliriqui ulanz zananacquin guardianaca mantichičha, wejr tanzjapa.

³³ Pero criichi jilanacaqui wejr pajk canastiquiz yaažcu, pirkiz tsewctan kozzuc tsjii kjuya wintanquiztan wejr chjijunchičha. Jalla nižtiquiztan wejrqui ninacžquiztan atipassinčha.

12

¹ Persun honora waytican, anačha čhjulumi wejttaqui cusaqui. Jalla nuž cjenami tiral wejt puntuquiztan chiyučha. Ančhucaquiz tii zakal quint'ačha, Yoozqui nižž puntunaca cherkatchičha. Nižaza nižž puntunaca zizkatchičha.

² Wejrqui Jesucristužquin kuz tjaachinčha. Nižž wiruñ ažk tunca pusin watanaca wejrqui arajpach Yooz wajtquin chjichtatačha tsjii upacama. Curpužtanpacha chjichtatažlaja, už ana curpužtanpacha chjichtatažlaja, jalla nii anal naychinčha. Yooz Ejpkaž zizza.

³⁻⁴ Pero wejrqui zizučha, nii zuma wajtquin chjichtatačha, jalla nii. Curpužtanami ana curpužtanami, jalla nii anal naychinčha. Yoozkaž zizza. Jalla nii zuma wajtquin takunaca nonzinčha, jalla nii nonžta takunacaqui anačha čiichuca žoñž takunacžtan.

⁵ Jalla nii Yooz puntu nonztiquiztanami chertiquiztanami honora waytasačha. Wejrqui persun sufrisnacquiztan honora zakaz waytasačha. Persunquiztan anal honora waytiz pecučha.

⁶ Wejrqui persun honora waytiz pectasaž niiqui lucuratažtakaz ana čiitasačha. Zuma werar razunžtanpan chiyučha. Jalla nuž cjenami, persun honora anal iya waytačha. Weriz čiitanacquiztanami paatanacquiztanami jalla nii jarukaz wejrqui rispitta cjesačha.

⁷ Nii Yooz puntu ziztanaca, chertanaca juc'ant zuma cuzačha. Jalla nižtiquiztan ana mit kuzziz cjisjapa, Yoozqui wejr laa cjisatchičha. Wejr tsjii ch'apžtan chjapchižtakaz sufriskatchičha. Yoozqui Satanás diablužquiz nii laa cjisjapa permitchičha, wejtquiz nižta sufriskatzjapa.

⁸ Wejrqui čhjep wilta nii laa puntuquiztan Yooz Jiliržquin mayizichinčha, wejt curpu laa žetajo.

⁹ Pero Yooz Ejpzi wejtquiz kjaazičha, tuž cjican: Wejrqui amtan zuma munazučha, jalla nižtiquiztan amquiz yanapačha. Am inallakaz cjicanaqui wejt aztan amquiz zuma atñi cjiskatačha, nižaza čhjulunacquiztanami amquiz zuma atipñi cjiskatačha. Jalla nuž cjichičha Yoozqui.

Jalla nižtiquiztan wejrqui sufrisnaca watchiž cjenami, nižaza inallakaz cjenami, cuntintul cjeečha. Nekžtan Cristuž aztan wejt kuzmi curpumi yanaptaž cjequičha.

¹⁰ Cristužtajapa sufricanaqui čhju lu watanami cuntintul cjeeča, inallakaz cjenami, iñarta cjenami, ana želinchiz cjenami, sufriskatta cjenami, ch'amanaca watchiž cjenami, čhjulunacaž watanami cuntintul cjeeča. Juc'ant inallakaz cjcanaqui, juc'ant tjupi kuzzizt'ča, Cristuž aztanaqui.

¹¹ Jalla nuž čhiican lucuratažtakaz čhiichinča. Ančhucpachaz niža wejr čhiikatchiča. Ančhucpacha wejt puntuquiztan zumanaca čhiiz waquiziča. Yekjap žoñinacaqui čhiinča, nii Pabluzquiztan juc'ant zuma apostolonact'ča wejrnacqui, cjan. Jalla niža cjiñinacžquiztan juc'ant zumt'ča wejrqui, Yooz yujcquiz inakaz cjenami.

¹² Wejrqui ančhucatan žejlcan ultim werar apóstol puestuquiz ojklaychinča, zuma pasinsis kuztan. Ančhucporquiz wacchi milajrunacami, siñalanacami, ispantichucanacami, jalla nižtanaca paachinča.

¹³ Jaknužt parti iclizziz criichinacžtan kamtučhaja, jalla niža irata ančhucatan kamchinča. Jalla nuž kamcan ančhucquiztan ana čhjulumi maychinča, jaknužt parti criichinacžquiztan maytučhaja, jalla niža. Jalla nii ana čhjulumi maytquiztanaqui cunamiz ančhucqui zawjčhani. Jalla nekztanz pertunalla.

PABLUQUI CORINTO ŽOÑINACŽQUIZ ANCHA CJUŇCHA

¹⁴ Anziqui wejrqui tjacznuča čjep wiltiquiziqui ančhucquin tjonzjapa. Tii wilta zakaz ančhucquiztan ana čhjulumi mayača. Ančhucac cusasa wejtquiz anaž importiča. Antiz ančhuc alaja importayuča. Ocjalanacaqui anaž cusasanaca juntasača, maa ejpžtaqui. Antiz maa ejpnacaž cusasanaca juntasača, persun ocjalanacžta.

¹⁵ Jalla nižtquiztan wejrqui persun gasto gastača ančhucac kuznaca zuma cjisjapa. Wejrqui ančhucquiz yanapasacha ochañcama. Wejrqui ančhucatan juc'ant zuma munaziñi kuzzizt'ča. ¿Ančhuczti upa wejtan munaziñi kuzzizčuckaya?

¹⁶ Tsjii žoñinacaqui tuž cjiñiča, Pabluzqui wejtnacquiztan ana čhju lu may cjenami, jalla nuž maña paacan wejtnacquiz incallchiča. Jalla nuž cjiñiča.

¹⁷ Pero wejrqui pewcznuča, ¿Wejrqui cuchanzquita jilanacžquiz ančhuc incallzkatčinjo? Anapanča.

¹⁸ Wejrqui Tito rocchinča ančhucquiz tjonzcajo. Niižtan chica yekja jila cuchanzquichinča. ¿Nii Titžquiz ančhucqui incallchinčucjo? Niižtan wejtan nuž pucultan ančhucatan zumpacha kamchinča, zuma kuztanami nižaza zuma kamcanami.

¹⁹ Ančhucqui cunamit wejt puntuquiztan pinsičhani, Pabluzqui persun puntuquiztan tirapankaz tjurt'iča, jalla nii. Jalla niža pinsitaqui anazumača. Weriz pecta jilanaca, cullaquinaca. Yooz yujcquiz Cristuž tjuuquiz chiyuča, ančhucac kuznaca juc'ant zuma cjisjapa.

²⁰ Ančhucquin tjonžcu, cunamit wejrqui ančhucquiztan tsjii žoñinacžtan anazuma kamañchiz zalachani. Jalla nii jiwjatuča. Jalla niža zalaž niiqui, wejrqui ančhucquiz c'aril cjeeča. Jalla niža c'ari takunacžtan tjonzjapa anaž pecča ančhucquiz. Cunamit ančhucaporquiz ch'aznaca žejlčhani, nižaza iñiziñinaca žejlčhani, nižaza čhjaawjkatñinaca žejlčhani, nižaza mitarar kuzziznaca žejlčhani, nižaza ana zum taku joojooñinaca žejlčhani, nižaza žoñž quintra čhiichiñinaca žejlčhani, nižaza mit kuzziz žoñinaca žejlčhani, nižaza kichjasñi kuzziz žoñinaca žejlčhani. Jalla nižtanaca žejlčhani. Jalla nižtquiztan tii cartal cjiyržcuča, ančhucac ana zuma kamañnacquiztan jaytisjapa.

²¹ Cunamit yekjapanacaqui ana zuma kamañchizlani, nižaza adulteriuquiz ojklaychizlani, nižaza ana walinaca paachizlani. Cunamit yekjapanacaqui ančhucquiztan uj paayičhucžlani, nižaza ančhucac ujquiztan ana pertuna mayzichinčucžlani. Jalla nižtquiztan ančhucquin tjonan cunamit wejt Yoozqui ančhucac anazuma kamchiz cjen wejr azkatačhani. Niža wataquiz niiqui, llaquita kuzziz cjeeča.

13

ZERZ TAKUNACA

¹ Tiižtan čjepquiziqui ančhucquin tjonžcuča. Ima tjoncan tiizakal čhiizinuča. Tsjii žoñžquiz uj tjojtnaquiz niiqui, ima casticta cjan, pucultan čjepultan tisticunacžtan ticlarskataquiča nii uj paañi žoñž puntuquiztan.

² Tuquiqui wejrqui uj paañi žoñinacžquiz čhižinčinča, ujnaca eca, cjan. Nižaza tjapa žoñinacžquizimi niža čhižinčinča. Jaknužt pizc wiltiquiz tjonžcu ninacžquiz čhižinčinča, jalla niža tii cartiquiz wilta čhižinžcuča, ančhucatan ana žejlcanami. Wilta tjonžcu, uj paañi žoñinaca panž casticača.

³ Jalla nuž castictiquiztan ančhucqui kjanapacha cheraquiča, Cristužtan wejtan tsjii kuzzizza. Jaziqui Cristuqui wejr čhiikatchiča. Cristuqui anača inallakaz ančhucaltajapa. Antiz ančhucaporquiz niž azi tježa.

⁴ Ina zoñiztakaz cruzquiz ch'awctatacha. Pero Yooz Ejpž aztan jacatatchicha. Cristužtakaz inallakaz wejrqui. Pero nižaza Cristužtan kamcan, wejrqui Yooz aztan tjeeznasača ančhucaltajapa.

⁵ Ančhucqui persunpacha kuz tantiyasa, Cristužquin tira kuz tjurt'iñi, uż ana tjurt'iñi, jalla nii. Persunpacha tantiyasa. Jesucristuqui ančuca kuznacquizza. ¿Jalla nii ana naazjo? ¿Ančhucqui anaj ultim criichinacajo?

⁶ Wejrqui cjiwča, wejrnacqui anača falso criichi zoñi, antiz ultim werar criiñ zoñtča. ¿Nii ana nayjo?

⁷ Wejrqui Yoozquin mayizuča, ančhuc ana ujnaca paajo. Jalla nuž mayizuča, wejt zuma razuna ana tjeezjapa, antiz ančhucqui zuma cjisjapa. Wejrqui ana zuma razunchiz-takal cjež niiqui, anaž importiča.

⁸ Wejrqui werar razun quintra anal paasača čjulumi. Antiz werar razun jarukaz chiyasača.

⁹ Jalla nižtiquiztan wejrqui inallakaz cjanami cuntintuča, ančhucqui tjup kuzziz cjequiz niiqui. Wejrqui ančhucaltajapa tira Yoozquin mayizuča, ančhuc juc'ant zuma kamañchiz cjisjapa.

¹⁰ Wejrqui ančhucatan ana žejlcan, jalla tuž tii cartal cjižrcuča, ančhuc zuma cjisjapa. Wejrqui ančucaquin tjonacha Yooz Jilirž apóstolž aztan. Ančucaquin tjonacha, ana c'aripacha cjisjapa, antiz ančhuc juc'ant zuma kamañchiz cjiskatzjapa.

¹¹ Jilanaca, cullaquinaca, jalla nuž chiižcu tiizakal chiyuča. Ančucaquiz zumaj cjila. Ančuca kamañanaca zumpacha azquicha. Zuma kamañchiz panž cjisna. Nižaza ančhucqui porapat kuzzasñiž cjee. Tsji kuzziz cjee. Porapat zuma munaza. Jalla nuž zuma kaman, Yoozqui ančhucatan cjila. Yoozqui ancha zuma okzñi kuzzizza, nižaza niiča llan kuzziz cjiskatñiqui.

¹² Jilanaca, cullaquinaca, porapat zuma tsaanasaquiča.

¹³ Tekzta tjapa Yoozquin kuzziz jilanacaqui ančucaquin tsaanžquiča.

¹⁴ Jesucristo Jiliriqui tjapa ančucaquiz zumanacaj tjaala, nižaza Yooz Ejpqui tjapa ančhucatan zuma munaziñej cjila, nižaza Yooz Espiritu Santuqui tjapa ančuca kuznac-quiz cjila. Jalla nužoj cjila. Amen.

LA CARTA DEL APOSTOL SAN PABLO A LOS GÁLATAS

¹ Wejr Pablutča, ančhucaquin tii cartal cjiřzčuča. Jesucristužtan Yooz Ejpžtan cuchanzquita apóstol zoñtča wejrqui, anača zoñiz cuchanzquititqui. Nižaza anača zoñiz uchtitqui tii apóstol puestuquiz. Antiz Jesucristužtan Yooz Ejpžtan wejr tii apóstol puestuquiz utčiča. Yooz Ejpča Jesucristo ticziquiztan jacatatskatchiqui.

² Wejrqui tjapa wejttan žejlñi jilanacžtan ančhucaquin tsaanžčuča. Ančhucqui Galacia provinciquin icliz zoñinacžčuča.

³ Učhum Yooz Ejpžtan Jesucristo Jiliržtan ančhucaquiz zumaj yanapla, nižaza ančhucaquiz cuntintu kuzziz walikaj kamkatla.

⁴ Tii muntuquiz kamcan, zoñinacaqui ana zuma kamañchiz kamča. Nii ana zuma kamañquiztan liwriizjapa, Jesucristuqui ticziča. Nižaza učhum ujnac laycu ticziča Yooz Ejpž munañpi jaru. Jalla nii Yoozza učhum yanapñiqui.

⁵ Yooz Ejpqui wiñaña honorchiz cjila. Jalla nužoj cjila. Amén.

TSJIKAZ LIWRIIŃI TAKU ZEJLCHA

⁶ Wejrqui ančuca puntu nonžcu ispantichinča. Ančhucqui ratulla Yoozquiztan zarakuiča. Jesucristuž ančhucaquiz okzñiz cjen, Yoozqui ančhuc kjawziča, liwriita cjisjapa. Yoozquiztan zarkan ančhucqui yekja tsjemat liwriiñi taku catokquiča.

⁷ Pero anaž yekja liwriiñi takuqui želasča. Tsjii tsjii zoñinacaqui ančuca kuz turwayskatž pecča. Nižaza Jesucristuž liwriiñi taku tsjematquin querez pecča. Wejrnacqui ančucaquiz werar liwriiñi taku paljaychinča. Jalla niic ančhucqui zizza.

⁸ Jalla nižtquiztan jakziltamiž tsjemat liwriiñi taku ančhucaquiz tjaajnasaz niiqui, jalla nii zoñiqui Yooziž castictaj cjila. Wejr mekaj cjila, arajpachquiztan tjonchi anjila mekaj cjila, jakziltami yekja tsjemat liwriiñi taku tjaajnasaz niiqui, castictaj cjila.

⁹ Tuquiqui nižtapan chiichinča. Jaziqui wilta nižtapachal chiyuča: Jakziltamiž yekja tsjemat liwriiñi taku ančhucaquiz tjaajnasaz niiqui, jalla niiqui Yooziž castictapaj cjila. Ančhucqui werar liwriiñi taku catokchinčuča. Ana iya žejlča.

¹⁰ Jalla nuž c'aripacha chiican, žčjulut pecoj wejrjo? Anal pecuča "Amča zumamqui" cjiñinacaqui. Nižaza anal pecuča zoñinacž kuz wali cjskatzjapa. Jalla nižta pecaquiz niiqui, Jesucristuž mantuquiz sirwiñi ana cjichučača.

PABLUZ OJKLAYTA QUINTU

¹¹ Jilanaca, cullaquinaca, ančhucaquiz tuž tjaajinz pecuča. Weriz paljayta liwriiñi takuqui anača zoñiz kuzquiztan pinsita.

¹² Ana jec zoñžquiztanami nii liwriiñi taku nonzinča, nižaza anaž jec zoñimi wejtquiz nii liwriiñi taku tjaajinchiqui. Jesucristupachača wejtquiz tjaajinchiqui.

¹³ Tuquiqui wejrqui judio zoñinacž kamañ jaru kamiñtača. Jalla nii nonzinčuča. Tuquiqui Yooz partir zoñinaca tanžcu ninaca walja sufriskatiñtača. Yooz icliz zoñinaca k'ala akz pecaytuča.

¹⁴ Nižaza wejrqui judio cuzturumpinacž puntu juc'anti zizzinča, wejt judio mazi-nacžquiztan juc'anti. Wejrqui wejt tuquita atchi ejpnacž cuzturumpiquiz tjapa kuztant-ča. Nii cuzturumpinacž jaru kamzjapa anča c'unchintača.

¹⁵ Jalla nuž cjenami Yoozqui wejr t'akziča, niž apóstol cjisjapa. Ima weriz maaquiztan nasan, Yoozqui wejr t'akzjapa tantiichiča. Nižaza Yoozqui wejtquiz anča okzñiz cjen, wejr kjawziča, liwriita cjisjapa. Čjulorat wejr kjawz tantiitčhaja, jalla nii ora wejr kjawziča,

¹⁶ niž zinta Majch pajzjapa, nižaza niž apóstol cjisjapa. Nižaza Yoozqui wejr kjawziča, ana judio wajtchiz zoñinacžquin Jesucristuž puntu paljayñi cjisjapa. Jalla nuž Yooztan niž Majchtan pajžcu, ana jecžtanami kazñi ojkchinča.

¹⁷ Nižaza ana Jerusalen watjami ojkchinča, parti apostolanacžtan kazñimi. Ninacaqui wejt tuqui apóstol puestuquin luzzitča. Jalla nuž wejt tuqui luzziž cjenami ana ninacžtan kazñi ojkchinča. Antiz Arabia yokquin ojkchinča. Wiruñaqu i niwjtcan Damasco wajtquin quejžquichinča.

¹⁸ Nekztanaqui čjep watquiztan Jerusalén ojkchinča, Pedružtan zalzjapa. Jalla nekztan Pedružtan tsjii tunca pjijskan tjuñi kamchinča.

¹⁹ Jalla nicju kamcan, Jesucristo Jilirž lajk Jacobo cjita apostolžtan zalchinča. Ana jakzilta parti apostolonacžtanami zalchinča.

²⁰ Yooz yujcquiz žejlcan, anal toscara chiyuča. Tii weriz cjiřtaqui werarča.

²¹ Jerusalén wajtquiztan zarakžcu, Siria yokaran nižaza Cilicia yokaran ojkchinča.

²² Judea yokquin kamñi criichinacžtan ima zalchinča. Nii Cristuž partir zoñinacaqui ima wejr paj-kalča.

²³ Ninacaqui wejt puntuquiztan tii quintukaz zizziča: “Nii wejrnacaž sufriskatta zoñiqui niipachaž Jesucristužquin kuztan criichiqui. Tuquiqui liwriñi Jesucristuž puntu k'ala tjtanz pecñitača. Anziqiu niiqui liwriñi Jesucristuž puntu paljayla”. Jalla nuž cjetča wejt puntuquiztanacqui.

²⁴ Nii criichinacaqui Yooztajapa honora waytichiča wejt puntu nonziž cjen.

2

APOSTOLONACAQUI PABLO ZUMA RISIWCHICHA

¹ Nekztan tunca pusin watquiztan wilta Jerusalén watja ojkchinča Bernabežtan. Nižaza Tito chjitchinča.

² Yooz wejtquiz chiitan, Jerusalén watja ojkchinča. Jalla nicju jaknužt yekja wajtchiz zoñinacžquiz liwriñi Yooz taku paljaytučhaja, jalla nii mazinž pecchinča. Primiraqui icliz jilirinacžtan ajczcu ninacžquiz mazinchinča, nekztan parti criichinacžquiz mazinchinča weriž paljayta liwriñi Yooz taku, jalla nii. Jalla nuž mazinchinča, weriž Yooztajapa langžta ana ina cjisjapa. Nižaza anz weriž Yooztajapa langžtaqui ana ina cjiskatz pecučha. Jalla nižtquiztan weriž paljaytaqui nii judío criichinacžquiz mazinchinča.

³ Ninacaqui wejr zuma risiwchicča. Nižaza Tituqui wejtan chica želatča. Nii Tituqui griego wajtchiz zoñi cjan, ana janchiquiz chimpuchiztača, judío zoñinacž cuzturumpi jaru. Jalla nuž cjenami judío zoñinacž cuzturumpi ana paakatchičha, nii janchiquiz chimputa cuzturumpi, jalla nii.

⁴ Pero tsjii kjaž zoñinaca želatča, “Wejrnacžta criichinacaqui” cjiñi. Jalla ninacaqui anatača lijitum criichinacaqui pero. Criichinacžporquiz chjojzaka luzzitača. Jalla nii ana zum zoñinacaqui awayt'i luzzitača, jaknužt wejrnacqui Jesucristužquin kuzziz cjen Moisés liiquiztan liwriita, jalla nii. Ninacakaz Titžquiz judío chimpuchiz cjiskatz pecatča. Nižaza ninacaqui wiltaž wejrnac ninacž lii mantuquiz utz pecatča.

⁵ Anapan ninacž munañpi jaru cjiskatchinča. Wejrnacqui pecaytuča, ančhucqui werar liwriñi Yooz tawk jaru tirapan kamzjapa, jalla nuž.

⁶ Nekz željñi pajta jilirinacaqui ana wejtquiz čjul ew taku tjaajinčičha. Jiliri cjenami ana jiliri cjenami wejtquiz anal importayuča. Yoozquiz zoñinaca ana illilziča. Yooz yujcquiziqui tjapa criichinacaqui tsjii parijuča.

⁷ Jalla ninacaqui wejtquiz ana čjul ew taku tjaajinčičha. Antiz ninacaqui wejr pajchiča, Yooziž uchta apóstol, nižaza werar liwriñi taku paljayñi, jalla nii. Wejrqui uchtača yekja wajtchiz zoñinacžquiz liwriñi Yooz taku paljayajo, jaknužt Yoozqui Pedro utčhaja, judío wajtchiz zoñinacžquiz liwriñi taku paljayajo, jalla nižtapacha.

⁸ Yoozqui Pedro cuchanchičha, judío zoñinacžquiz liwriñi taku paljayajo. Jalla nii Yoozpacha wejr cuchanchizakazza, yekja wajtchiz zoñinacžquiz paljayajo. Yoozqui jalla nuž pucultan cuchanchičha nižtajapa langznajo.

⁹ Jalla nižtquiztan Jacobžtan Pedružtan Juanžtan wejr pajchiča, Yooz amt'ita jaru apóstol puestuquiz uchta, jalla nii. Nii čhjepultanaqui pajta chawjc jilirinacatača. Jalla nuž wejr pajčzu, ninacaqui wejr zuma risiwchicča. Bernabequi risiw tazakazza. Jalla nižtquiztan wejtnacatan ninacžtan wali cjiyassinča. Wejrnacqui tsjii zuma acuerduquiz kazzassinča, wejrnaca yekja wajtchiz zoñinacžquiz paljayi ojkzjapa, nižaza ninaca judío zoñinacžquin paljayi ojkzjapa, jalla nuž.

¹⁰ Nižaza ninacaqui wejtnacaquiz roct'ichičha, pori zoñinacžquin yanapzjapa cjuñznajo. Wejrqui nižtapacha zakaz anča tantiyučha.

PEDRUŽTAN PABLUŽTAN ANTIOQUIA WAJTQUIN

¹¹ Niiž wiruñ Pedruqui Antioquia watja ojkchičha. Jalla nicju Pedružquiz zumpacha chiižinčinča, niiž yujcquizpacha. Niiž kamtaqui ana zumquintača.

¹² Antioquia wajtquin irantižcu, Pedruqui nii wajtchiz ana judío zoñinacžtan lujlčičha. Nekztan tsjii kjaž Jacobž partir zoñinacaqui irantichičha. Jalla ninacaqui judío cuzturumpinaca exijiñitača. Jalla ninacžquiz eksču, Pedruqui nii ana judío zoñinacžquiztan tsjii latu zarakchičha.

¹³ Pedruž nuž zaraktan, parti judío criichinacaqui nižtapacha zakaz tsjii latu zarakchičha. Pero ninacaqui kuzquiz zizatča, nižta zarakz ana wali, jalla nii. Bernabemi ninacžtan chica zarakzkattatača.

¹⁴ Jalla nuž zarakžcu ninacaqui werar liwriñi Yooz tawk jaru ana kamchičha. Jalla ninaca zarakñi cheržcu wejrqui tjapa zoñinacž yujcquiz Pedružquiz zumpacha chiižinčinča, tuž cjan: —Amqui judío zoñimča. Jalla nuž cjenami amqui ana judío zoñižtakaz kamñamča. Amqui judío cuzturumpinac jaru ana kamñamča. Jalla

nižtiquiztan ¿kjažtiquiztan amqui tii ana judío žoñinaca judío žoñinacažtakaz kamkatz pecya? Anapanž zuma niiqui.

JESUCRISTUZQUIN KUZZIZ CJEN ZOÑINACA LIWRIITACHA

¹⁵ Wejrnacqui judío žoñinacžquiztan tjoninča. Yekja wajtchiz žoñinacžquiztanami, Yooz quintra paañi žoñinacžquiztanami anapan tjoninča.

¹⁶ Jalla nuž tjoninč cjenami wejrnacqui zizzinča, anaž jakziltami Moisés lii jaru kamchiž cjen Yooz yujcquiz zuma cjisnasacha. Yooz yujcquiz zuma cjisjapa, žoñinacaqui Jesucristužquin kuzziz cjistanča. Jalla nuž zizzinča. Wejrnac zakaz Jesucristužquin kuz tjaachinča, Yooz yujcquiz zuma cjisjapa. Anaž jakziltami Moisés lii jaru kamchiž cjen Yooz yujcquiz zuma cjisnasacha. Jalla nižtiquiztan wejrnac zakaz Moisés lii jaru kamchiž cjen, Yooz yujcquiz anapanž zuma cjisnasacha.

¹⁷ Yooz yujcquiz zuma cjisjapa wejrnacqui Jesucristužquin kuz tjaachinča. Jalla nii kuz tjaaz oraqui, wejrnacqui yekja wajtchiz žoñinaca irata persun uj pajstantača, “Wejrnacmi zakaz ujchiztča”, cjicanaqui. ¿Jalla nuž wejrnacaž persun uj pajchiz cjen, Jesucristuqui wejrnac nižta ujchiz cjiskatjo? Anapanž cjesača.

¹⁸ Yooz yujcquiz zuma cjisjapa, Moisés lii ana walča. Jalla nuž wejrqui tjaajinčinča. Anziñi wejrqui wilta chitasaž niiqui, “Moisés lii jaru kamchiž cjen Yooz yujcquiz zuma cjisnasacha” jalla nižtiquiztan wejrqui juc'anti ujchizpan cjitasača.

¹⁹ Moisés lii mantuquiz kaman nii liiqui kjanapacha wejtquiz tjeeziča, wejrqui ujchizpantča, jalla nii. Jalla nižtiquiztan wejt persun uj pajžcu, Jesucristužquin kuz tjaachinča. Jalla nižtiquiztan Moisés lii quiztan liwriitača wejrqui, Yooztajapa kamzjapa.

²⁰ Jesucristuqui wejt ujnac laycu cruzquiz ch'awcta ticziča. Jalla nuž wejt ujnac laycu ticziž cjen, wejrqui niiztan chica ticzižtakaztča. Wejt tuquita ana zuma kamaña jaytichinča, jalla nižtiquiztan ew kamañchizza wejrqui. Pero anača wejt persun kamañchiz antiz Cristuž kamañchiz kamuča. Jaziqiu tii muntuquiz žejtan ew kamañchiz kamuča. Jesucristo Yooz Majchquin kuz tjaatiquiztan Jesucristuqui wejtquiz okžniž cjen, wejt ticz cuntiquiztan ticziča.

²¹ Yoozqui žoñinacžquiz okžcu, Jesucristo cuchanžquichiča žoñinaca liwriizjapa. Liwriñi Yooz taku anal nicz pecuča. Moisés lii jaru kamchiž cjen žoñinacaqui Yooz yujcquiz zuma cjissiz cjitasaž niiqui, Jesucristuqui inapankaz ticztasača. Anapanča nužuqu.

3

LIWRIIZ PUNTU

¹ Galat wajtchiz žoñinaca, ančhucča zumžužtakaz. ¿Jequit ančhuc incallechejo? ¿Jequit werar liwriñi tawkuiztan ančhuc tsjii kjutñi chjitchejo? Liwriiz puntu paljaycan wejrnacqui Jesucristuž puntuquiztan kjanapacha ančhucquiz tjaajinčinča, Jesucristuqui žoñinacž ujnacquiztan cruzquiz ch'awcta ticziča, jalla nii.

² Tsjii pewcz pecuča. ¿Moisés lii jaru kamchiž cjen, Espiritu Santo ančhuca kuzquiz luzzikay? Anapanča. Jesucristužquin kuz tjaatiquiztan, nekztan Espiritu Santuqui ančhuca kuzquiz luzziča. Jalla niiqui nužupanča.

³ ¿Kjažtiquiztan anča zumzu ančhucjo? Espiritu Santuž cjen ančhucqui Yooz kamañquiz kami kallantichinčhucča. ¿Persun kuzcama kamcanaqui Yooztajapa tsjan zuma kamasajo? Anapanča.

⁴ ¿Jesucristužquin crižcu ančhucqui inakaz sufrichinčhuc cjes kjažtatajo? Ana inakaz ančhucqui sufrichinčhucžlani.

⁵ Yoozqui ančhuca kuzquiz niiz Espiritu Santo luzkatchiča. Nižaza ančhucaž cheran Yoozqui milajrunaca paachiča. ¿Ančhucaž Moisés lii jaru kamtiquiztan jalla nižta milajrunaca Yooz paachejo? Anapanča. Ančhucqui Jesucristuž puntuquiztan nonžcu catokchinčhucča. Jaziqiu ančhucaž Jesucristužquin kuz tjaatiquiztan Yoozqui ančhucaž cheran milajru paachiča.

⁶ Abraham zakaz Yoozquin kuz tjaachitača. Jalla nuž tjaatiquiztan Yooz yujcquiz zuma cjiskattatača.

⁷ Jalla nižtiquiztan jakziltat Jesucristužquin kuz tjaachaja, jalla niiqui ultim Abrahamž majchmaatiča. Jalla niic werar razunača.

⁸ Yoozqui tuquitanpacha tuž tantiichiča, Jesucristužquin kuz tjaañi žoñinaca Yooz yujcquiz zuma cjiskattaž cjesača, jalla nuž tantiichiča. Jalla nižtiquiztan tuquitanpacha liwriñi Yooz puntuqui Abrahamžquiz chitatača, tuž cjican: “Amiž cjen tjapa wajtquiztan žoñinaca zumaž cjiskattaž cjequiča”. Jalla nuž cjiča cjirra Yooz takuqu.

⁹ Jalla nižtiquiztan jakziltat Jesucristužquin kuz tjaachaja, jalla niiqui Abrahamžtan zuma cjiskattaž cjesača.

¹⁰ Jakzilta žoñinacat Yooz yujcquiz zuma cjisjapa, Moisés liiquiz kuz tjaachaja jalla ninacaqui Yooziž castictaž cjequiča. Cjijrta Yooz takuqui tuž cjiča: “Jakziltat tjapa Moisés liiquiz mantitanac jaru ana zumpacha kamčhaja, jalla ninacaqui Yooziž castictaž cjequiča”.

¹¹ Anaž jecmi Moisés lii jaru zumpacha kami atasacha. Jalla nižtiquiztan Moisés liiquiz kuz tjaatiquiztan anaž jecmi Yooz yujcquizi zuma cjisnasacha. Kjanapachacha nii razanaqui. Cjijrta Yooz takuqui tuž cjiča: “Jakziltat Yoozquin kuz tjaatiquiztan Yooz yujcquiz zuma cjisnachaja, jalla niiqui Yooztan kamaquiča”.

¹² Pero Moisés lii jaru kamcan, Yoozquin kuz tjaazqui ana walča. Moisés lii puntuquiztan Yooz takuqui tuž chiča: “Jakziltat Moisés lii jaru kamčhaja, jalla niiqui nii lii jaru kamtiquiztan Yooztan kamaquiča”.

¹³ Pero anaž jecmi nii lii jaru zumpacha kamasacha. Jalla nižtiquiztan tjapa žoñinacaqui Yooziž castictaž waquziča. Pero Jesucristuqui ućhum liwriičiča, Yooziž ana casticta cjeajo. Jesucristupacha ućhum cuntiquiztan casticta cjissiča. Cjijrta Yooz takuqui tuž cjiča: “Jakziltat cruzquiz ticznachaja, jalla niiqui tjeeža, Yooziž castictaž, jalla nii”.

¹⁴ Jesucristuqui yekja wajtchiz žoñinacž cuntiquiztan zakaz casticta cjissiča, ninaca Abrahamžtan Yooz yujcquiz zuma cjisatzjapa. Nižaza Jesucristužquin kuz tjaachiž cjen Yoozqui tjapa ućhum kuznacquiz niž Espiritu Santo luzkatchiča, niž tuquita chiita takucama.

MOISES LII PUNTU

¹⁵ Jilanaca, cullaquinaca, tsjii puntul chiyacha. Tiiž nonžna. Tsjii zuma legali acuerduquiz luzta, nižaza jiliriz silta, jalla nii documentuqui ana wira campiyasacha, nižaza ana nekz yapasacha, jiliri silta jaru.

¹⁶ Anziqiu tii puntul chiyacha. Yoozqui taku tjaachiča Abrahamžquizimi niž majchquizimi. Yooz takuqui anaž cjiča, “Majchmaatinacžquizimi”, cjicanaqui. Anaž wacchi žoñinacž puntuquiztan chiča. Antiz tsjii žoñž puntuquiztankaz chičiča. Jalla nii žoñiča Cristuqui.

¹⁷ Jalla tuž chiyučha: Yoozqui Abrahamžquiz taku tjaachiča. Nekztan pusi patac quinsa tuncan watanacquiztan Yoozqui Moisesquiz niž lii tjaachiča. Jalla nii wiruñ tjaata liiqui nii tuquita Abrahamžquiz tjaata taku anapanž ana walkatasacha.

¹⁸ Moisés lii jaru kamchiž cjen Yooz zumanaca tanžtaž cjitasaž niiqui, jalla nižtiquiztan Yooziž Abrahamžquiz tjaata taku anaž waltasacha. Pero panž walča. Yoozqui Abrahamžquiz nužkaz taku tjaachiča, žoñinaca liwriizjapa.

¹⁹ Jalla nižtiquiztan, ¿chjuljapat Moisés lii sirwiya? Jalla tužuča. Moisesquiz nii liiqui tjaatatača, žoñinacž unaca tjeezjapa. Nižaza nii liiqui walatča, Jesucristuž tjonzcama. Jesucristuqui Abrahamž majchmaatquiztan tjonñiča. Nižaza niž puntuquiztan chiča nii Yooziž Abrahamžquiz tjaata takuqui. Yoozqui anjilanaca cućhanžquichiča, niž lii Moisesquiz tjaazjapa. Nekztan Moisesqui parti žoñinacžquiz Yooz mantitanaca tjaajinčiča.

²⁰ Moisesqui nii ližtan žoñinacžquiz mantichiča, žoñinaca nii lii cumplajo. Pero Yoozqui niž persun tjaata taku cumplichiča. Yooz alaja cumplichiča.

²¹ Jalla nižtiquiztan, ¿kjaž cjii? ¿Moisés liiqui Yooziž tjaata tawk quintra cjesaya? Anapanž cjesacha. Anaž jecmi Moisés lii jaru zumpacha kamasacha, Yooztan wiñaya kamzjapa. Jalla nii lii jaru žoñinaca kamtasaz niiqui, Yooz yujcquiz zuma cjitasača, nii lii jaru kamtiquiztan.

²² Pero cjijrta Yooz takuqui tuž cjiča: “Tjapa žoñinacaqui uj paachiž cjen castictaž cjequiča”. Jalla nuž cjenami, Jesucristužquin kuz tjaañi žoñinacaqui Yooziž tjaata taku tanznasacha, ana casticta cjisjapa, Yooztan wiñaya kamzjapa.

²³ Ima Jesucristuž puntuquiztan zizcan ućhumqui Moisés lii mantuquiz želatča. Nižaza nuž željchinćhumtača Jesucristužquin kuz tjaazcama.

²⁴ Jalla nižtiquiztan Moisés lii mantuquiz želatča ućhumqui, Jesucristuž tjonzcama. Nekztan Jesucristužquin kuz tjaatiquiztan Yooz yujcquiz zuma cjissinćhumča, nižaza ana ujchiz.

²⁵ Anziqiu žoñinacaqui Jesucristuž puntuquiztan zizasacha. Jalla nižtiquiztan ućhumnacqui Moisés lii mantuquiz željzqui žeržtača.

²⁶ Jesucristužquin kuz tjaatiquiztan tjapa anćhucqui Yooz partiquiz žejlča, Yooz maatinacćhucča.

²⁷ Jakziltat Jesucristužtan tsjii kuzziz cjiscu bautista cječhaja, jalla niiqui Cristuž partiquiz cjissiča. Nižaza ew kamañchiz cjissa.

²⁸ Cristuž partiquiz žejlcan, anaž t'aka t'aka žejlča. Judío žoñinacami, yekja wajtchiz žoñinacami, žoñž mantuquiz žejlñi žoñinacami, ana žoñž mantuquiz žejlñi žoñinacami,

luctakami, maatakami, jalla tjapa zoñinacaqui Jesucristuž partiquiz žejlcan Yooz yujcquiz tsjii parijuča. Nižaza tsjii t'akquizkazza.

²⁹ Nižaza Cristuž partiquiz želaquiz niiqui, ančhucqui Abrahamž ultim lijitum majchmaatinacchucča. Nižaza ančhucqui Abrahamž lijitum majch maatinacažlaj niiqui, ančhucqui Yooziž Abrahamžquiz tjaata taku tsjii irinsažtakaz tanznaquičha, Yooztan wiñaya kamzjapa.

4

UCHUMNACAQUI YOOZ MAATICHUMCHA

¹ Nii irinsa puntu tii zakaz chiiz pecučha. Tsjii irinsa tanzñi ocjalaquičha zoñi pajkzcama anaž irinsa tanznasacča. Ocjala cjanaquičha nii famillžquiz piyunažtakaz kamčha. Pajkžcu, nekztan tjapa nii famillž cusasanaca niiztacama želaquičha.

² Nii ocjalaquičha famillž mantuquičha tjiizta žejlčha, nižaza niiz irinsaquičha yekja zoñžquiz cwitzinajo cumpjiitačha, irinsa tanz oracama.

³ Jalla nižta iratačha učhumnacaquičha. Tuquiqui učhumquičha ocjalažtakaz kamcanaquičha zoñiž pinsita jarukaz kamatčha.

⁴ Yooziž pinsita timpu irantižcu Yoozquičha niiz Majch cuchanžquičha. Nekztan tsjaa maatakquiztan majtatačha, nižaza Moisés lii mantuquičha želatčha.

⁵ Jalla nuž Yoozquičha niiz persun Majch cuchanžquičha učhumnaca Moisés lii mantuquiztan liwriizjapa, nižaza Yooz maati cunta cjisjapa.

⁶ Ančhucaž Yooz maati cjanaquičha Yoozquičha niiz Majch Espiritu Santo ančhuca kuzquičha cuchanžquičha. Espiritu Santuquičha ančhuca kuzquičha Yooz Ejpžquin cjuñžkatčha, "Wejt Tata" cjan.

⁷ Jalla nižtquiztan Yooz cjen ančhucquičha Moisés lii mantuquičha anaž iya žejlčha. Yooz maati cjan, Yooz tjaata irinsa tanznaquičha.

PABLUQUI CRIICHI ZOÑINACŽQUIZ ANCHA CJUÑČHA

⁸ Tuquičha ančhucquičha werar Yooz anaž pajatčha. Antiz zoñiž pinsita yooznadž mantuquičkaz želatčha. Nii yooznacaquičha anaž ultimu Yoozza, zoñiž pinsitiquiztankazza.

⁹ Anziquičha ančhucquičha werar Yooz pajčha. Primiraquičha Yoozquičha ančhuc maati cunta pajčičha. Jalla nuž Yooz maati cunta cjisju, žkjaž ančhucquičha zoñiž pinsita yooznacquin wilta cutasajo? ŽNii yooznadž mantuquičha wilta cjis pecjo? Nii yooznacaquičha ana azzizza; nižaza inakazza.

¹⁰ Ančhucquičha tirapan tjuñnacžquizimi jiiznacžquizimi oranacžquizimi watanacžquizimi rispitiñchucča. Jalla nižta rispitzquičha anaž waquizičha.

¹¹ Jalla nuž rispitan wejla ančhucaquičha tjaajinzquičha inapanakaj cjičhani. Jalla niil jiw-jatučha.

¹² Jilanaca, cullaquinaca, ančhucaquičha rocučha, wejržtapačha cjisjapa, Moisés lii mantuquiztan liwriita, jalla nižta. Wejrquičha ančhuc yekja wajtchiz zoñižtakaz cjissinčha judío cuzturumpinaca ana paažcu. Ančhucquičha wejr zuma risiwchinčhucča, ana čjul wejtr quitra kjaž cjisju.

¹³ Ančhucquičha zizza, primeraquičha wejr laacjichiz cjen ančhucatan kamchinčha. Nižaza ančhucatan kamcan, liwriiñi Yooz puntu paljaychinčha. Jalla nii zizza ančhucquičha.

¹⁴ Jalla nii cona laacjitaquičha wejttajapa tsjii pruebatačha. Jalla nižta weriž laacjitiquiztan ančhucquičha ana wejr iñarchinčhucča, nižaza wejr ana jakjurpayz pecchinčhucča. Antiz wejr ancha zuma risiwchinčhucča, tsjii Yooz cuchanžquičha anjilažtakaz. Nižaza Jesucristužtakaz wejr zuma risiwchinčhucča.

¹⁵ Weriž ančhucatan kamchiz cjen ančhucquičha zuma cuntintu sint'ichinčhucča. Jaziquičha ančhucaquičha, žkjažt cjisjo? Wejrquičha declaručha, ančhucatan kamcan, ančhucquičha attasaž niiqui, persun čhujcquimi lecžcu wejtquičha tjaatasacča.

¹⁶ Wejrquičha ančhucaquičha werar razunanaca čhiichinčha. Jalla nuž čhiitiquiztan, žančhucquičha wejt quitra cjisinčhuccho?

¹⁷ Nii ana werar razuna čhiini zoñinacaquičha ančhuc ančaž importayčha. Jalla nuž importayan ninacaquičha ančhuc ana zuma cjiskatz pecčha. Wejtnacaquiztan t'akskatz pecčha, ninadž partiquiz cjisjapa, nižaza ninadž honora waytiskatzjapa.

¹⁸ Tsjii zoñiquičha yekja zoñžquiz tsjan zuma kamañchiz cjiskatz pecasačha. Jalla nuž peccanaquičha niiz zoñžquiz ancha importayasacča. Jalla nižta importayzquičha ancha zumačha. Tjapa zoñinacaquičha ančhucaquičha nižtaj paala. Anačha wejrkaž, ančhucatan kamcanaquičha, ančhuc importayz waquizičha.

¹⁹ Zuma jilanaca, cullaquinaca, ančhucaltajapa wilta wejt kuzquičha ancha cjuñčha. Nižaza wejrquičha ančhucaltajapa tiral cjuñčha ančhucaž Cristuž kamañchiz zuma kamzcama.

²⁰ Wejrqui ančhucatan chical žejlz pecuča. Jalla nuž ančhucatan žejltasaž niiqui, juc'ant zuma carinchiz razuna chiižintasacha. Ančhuca quinto nonžcu wejrqui kuz turwayskatchinča.

ABRAHAMZ MAATIZ PUNTU

²¹ Ančhucqui Moisés lii mantuquiz kamz pecñinaca, ¿nii lii mantuquiz kamzqui ana intintiya?

²² Cjijrta Yooz takuqui tuž cjičha: Abrahamqui pucultan majchnacchizza. Tsjiiqui Abrahamž mantita piyunaž majttačha. Tsjiizti Abrahamž zalžta tjunaž majttačha.

²³ Piyunaž majtta majchqui žoñiž pinsita kuzcama majttatačha. Tjunaž majtta majchzti Yooz tjaata tawk jaru majttatačha.

²⁴ Nii pucultan maataquiztan tuž cjičha. Yoozqui pizc wila taku tjaachičha. Tsjiiqui Sinaí cjičha curquiz Yoozqui Moisesquiz mantita lii tjaachičha. Jakziltat nii lii mantuquiz žejlčhaja, jalla niiqui nii lii jaru kamstančha. Tsjaa maataquiztan nii puntu cjičha. Naa maataquui Agar cjititačha.

²⁵ Agar cjitiquiztan Sinaí curu cjičha. Sinaí curuqui Arabia yokquin žejlčha. Sinaí curquiztan Jerusalén watja cjičha. Jerusalén wajtchiz žoñinacami, nižaza tjapa judío žoñinacami Moisés lii mantuquiz žejlčha.

²⁶ Učhumzti anaž Moisés lii mantuquiz žejlčha. Yooziž liwriitiquiztan ultim arajpach Jerusalén wajtchiz žoñinacchumčha. Jalla nii Jerusaleñqui Yooz watjačha.

²⁷ Cjijrta Yooz takuqui tuž cjičha:

“Ana majtñi maataka, cuntintuž cjee. Majtz sufris ana pajžcumi, alto tawkžtan Yooztajapa honora waytila. Ecta maataquui juc'ant majchmaatinacchiz cjequičha ana ecta maataquiztan”.

²⁸ Jilanaca, cullaquinaca, jaziqui učhumqui Yooz tjaata tawk jaru Yooz maatinacchumčha, Isaac cjičha žoñižtakaz.

²⁹ Abrahamž pucultan majchnacžquiz tižta watchičha. Nii žoñiž kuzquiztan pinsita majttaqui quintratačha nii Yooz Espiritu Santuž cjen majtta majchjapa. Anzimi nižta iratazakazza.

³⁰ Cjijrta Yooz takuqui tuž cjičha: “Naa piyuni majchtanpacha chjatkata. Naa piyunaž majtta majchqui anaž irinsa tanznaquičha. Antiz zalžta tjunaž majtta majch, jalla niikaz irinsa tanznaquičha”.

³¹ Jilanaca, cullaquinaca, učhumqui anačha naa piyunaž majtta maatinacažtakazqui. Antiz zalžta tjunaž majtta maatinacažtakazchumčha. Učhumqui lijitum Yooz maatinacchumčha.

5

LIWRIIZ PUNTU PALJAYTA

¹ Jesucristuqui učhum liwriichičha, Moisés lii mantuquiz ana iya kamzjapa. Jesucristužquiz tjp kuzziz cjee. Anačha nii lii mantuquiz iya kamzqui.

² Wejr Pabluqui ančhucaquiz cjiwčha, ančhucqui judío chimpu cuzturumpi jaru paaquiz niiqui, jalla nižtiquiztan ančhucaltajapa Cristuqui inakaz cjequičha.

³ Wejrqui tii puntu ticlaručha, jakziltat Yooz yujcquiz ana ujhiz cjisjapa Moisés lii jaru persuna chimpuskatčhaja, jalla niiqui tjapa nii lii mantitanaca cumplistančha.

⁴ Ančhucqui Moisés lii jaru Yooz yujcquiz ana ujhiz cjis pecčhaj niiqui, Cristužquiztan persunpachaž t'aksa. Nižaza liwriiñi Yooz kamañquiztan persunpachaž t'aksa.

⁵ Yooz Espiritu Santuž cjen, nižaza Jesucristužquiz kuz tjaachiz cjen, učhumqui Yooz yujcquiz ana ujhiz nižaza zuma kamañchiz, jalla nii tjapa kudtan tjewža.

⁶ Jesucristuž partiquiz žejlcan žoñinacaqui tsjii parijučha. Judío chimpuchiz cjenami ana judío chimpuchiz cjenami anaž importičha. Antiz Jesucristužquiz kuz tjaaz importičha. Nižaza kuz tjaažcu zuma munaziñi kuzziz cjis importičha.

⁷ Ančhucqui zumaž kamatčha. Jalla nuž zuma kaman, ¿ject ančhuc atajchejo werar tjaajintanaca ana cazpapajo?

⁸ Jalla nii atajñiqui anačha Yoozquiztan. Yoozqui ančhuc kjawzičha, liwriita cjisjapa.

⁹ Jaknužt tsjii zkoluc liwatura tjapa t'anti maza t'amkatčhaja, jalla nižta irata zkoluc ana zuma tjaajñinacaqui tjapa ančhuc tsjii kjutñi chjichasačha.

¹⁰ Jesucristo Jiliriz cjen wejrqui ančhucaquiztan anal kuz turwayskatučha. Ultimquiziqui jaknužt wejrqui Yoozta kamañ puntu pinsučhaja, jalla nužuzakaz ančhucqui Yoozta kamañ puntu pinsaquičha. Nižaza jakziltat ančhuca kuz turwayskatčhaja, jalla niiqui casticta cjequičha, jakziltapirimi.

¹¹ Jilanaca, cullaquinaca, tuquiqui ima Jesucristužquiz kuz tjaacan, wejrqui tjaajinchinča, judío chimpuchiz ana želaquiz niiqui, Yooz yujcquiziqui anapanž zuma želasačha.

Jalla nuž tira tjaajintasaž niiqui, čkjažtiquiztan wejt quintra ancha tanjo? Jalla nuž tjaajintasaž niiqui. Jesucristuž ticz puntuquiztan tjaajincanpacha ana wejt quintra tanasača. Pero jalla nižta ana tjaajinchinča.

¹² Ančhuca kuz turwayskatñinacaqui persun janchej pootpootžla.

¹³ Jilanaca, cullaquinaca, Yoozqui ančhuc kjawziča Moisés liiquiztan liwriita cjisjapa. Jalla nuž liwriita cjan, anaž persun kuzcamakaz kamz waquiziča. Antiz zuma munazican porapat yanaparassa.

¹⁴ “Jaknužt persunpachquiz zuma okzaja, jalla nižta irata parti žoñinacžquiz zuma okzpanča”. Jalla nuž kamcan tjapa Moisés liiqui cumplissa.

¹⁵ Pero ančhucqui porapat chjaawjwasaquič niiqui, nižaza porapat ch'aasaquič niiqui, jalla nižtiquiztan tsjiimi tsjiimi aksnaquiča.

ESPIRITU SANTUZ IRPITA KAMZ

¹⁶ Wejrqui cjiwčha, ančhucqui Yooz Espiritu Santuž irpita kama. Nekztan persun ana zum kuzquiz pectanac jaru ana kamaquiča.

¹⁷ Nii ana zum kamañaquí Espiritu Santuž pecta kamañ quintrača. Nižaza Espiritu Santuž pecta kamañaquí nii ana zum kamañ quintrača. Nii pizc kamañaquí anača tsjikazquí, antiz pisc punta kamañacha, zuma kamaña, ana zuma kamaña, jalla nii. Jalla nižtiquiztan nii ana zuma kamaña pecñi kuzqui ančhuc atajča zuma kamañ jaru ana kamzjapa.

¹⁸ Pero ančhucqui Espiritu Santuž irpitaž cjequič niiqui, anača lii mantuquič žejlzqui.

¹⁹ Nii ana zuma kamaña pecñi kuzqui jalla tižta paaz pecča: adulterio paaz, yekja maatakžtan yekja luctakžtan ana wali paaz, azzucanaca paaz,

²⁰ žoñiž paata yooznacžquiz sirwiz, žoñiž quintra laykiz paaz, žoñiž quintra chuchas, žoñižtan ch'aas, iñiziz, chjaawjkatas, persun kuzcamapankaz paaz, t'aka t'aka cjiyas, tsjii partiquiztan tsjii partiquiztan quintras,

²¹ zmaz, žoñi conz, licz, ana wira wali pjijsa paaz, jalla nižta ana zumanaca paaz pecča nii ana zuma kamaña pecñi kuzqui. Tuquiqui wejrqui ančhucquič čiižinčinča, ana nižta paazjapa. Wilta ančhucquič čiižinuča, anapan nižtanaca paaz waquiziča. Jalla nižta paañi žoñinacaqui werar Yooz mantuquič ana žejlča.

²² Espiritu Santuž kamañ jaru kamcan, jalla tižtanaca paasa: zuma munaziz, cuntintu cjis, ilan kuzziz cjis, pazinziz kuzziz cjis, okzñi kuzziz cjis, zumanaca paaz, lijituma kamz,

²³ humilde kuzziz cjis, ana zuma pecñi kuz persun kuzquiz ewjaz. Jalla nii zuma paatanacaqui anapanča lii quintrači.

²⁴ Nižaza jakziltat Cristuž partiquič žejlčhaja, jalla ninacaqui nii ana zuma paaz pecñi kuz mantuquič ana kamz waquiziča. Nii ana zuma pecñi kuzquiztan ticzi žoñižtakazza. Nižaza nii ana zuma pinsitanac jaru ana kamz waquiziča.

²⁵ Učhumqui Espiritu Santuž cjen liwriitažlaja nižaza ew kamañchizlaja, jalla nižtiquiztan učhumqui Espiritu Santuž cjen nii zuma kamañ jaru pan kama.

²⁶ Jalla nii zuma kamañ jaru kamcan učhumqui ana mitarazi kuzziz cjistancha. Nižaza ana žawjwa zjiicanñi kuzziz cjistancha. Nižaza anaž porapat zmazastanqui.

6

PORAPAT YANAPARAS WAQUIZICHA

¹ Jilanaca, cullaquinaca, yekjap ančhucqui Espiritu Santuž kamañchiz kamiñchucča. Jaziqui ančhucqui tsjii criichi žoñi uj paañipacha cheraquič niiqui, zuma kuztan čiižinaquiča, nii uj paañi žoñi wilta zuma kamañchiz cjejajo. Nižaza ančhucqui persun kuzqui zuma cwitaza, uquič ana tjojtsjapa.

² Pruebanacaž watan, ančhucqui porapat kuzzassa. Jalla nuž kamcan ančhucqui Cristuž lii cumpliča, zuma munaziz, jalla nii.

³ Jakziltat persun puntuquiztan mit kuzziz “Wejrqui zumtča” cjan pinsačhaja, jalla niiqui persunpacha incallča. Anaž zumača niiqui.

⁴ Zapa mayni persun kamtanaca tantiistanča, zuma ana zuma kamta, jalla nii. Jakziltat zuma kamchizlaj niiqui, cuntintuž cjesača, persuna zuma kamtaž cjen. Criichi žoñinacaqui yekja žoñiž kamaña iñarčcu, anaž mitarazi kuzziz cjis waquiziča, “Wejrqui juc'ant zuma kamañchiztča” cjan.

⁵ Ultimquiziqui zapa mayni persun kamañquiztan jama Yooziž tantiitaž cjequiča.

⁶ Yooz puntu tjaajinta žoñiqui persun cusasanacquiztan tjaaz waquiziča Yooz puntu tjaajinacžquiz.

⁷ Ančhucqui persun kuzquizpacha anača incallzqui. Yoozquiztan ana atipasača. Jaknužt tsjii žoñi kamčhaja, jalla niit jama pjalžtaž cjequiča.

⁸ Jakziltat persun kuzcamakaz kamčhaja, jalla niiqui niiz ana zuma kamtiquiztan castictaž cjequiča. Nižaza jakziltat Espíritu Santuž kamañ jaru kamčhaja, jalla niiqui Espíritu Santuž cjen Yooztan wiñayaž kamaquiča.

⁹ Učhumqui zumanaca paazjapa tjurt'ila. Ultimquiziqui pactaž cjequiča, ana jaytasaz niiqui.

¹⁰ Jalla nižtiquiztan čhjulora zumanaca payi atchucaž cjequiž niiqui, učhumqui zumaž paala tjapa žoñinacžquizimi. Criichi mazinacžquizimi juc'ant zuma paala.

ZERZ TAKUNACA

¹¹ Anziqui wejt persun kjaržtan cjjržcuča. Tii pajk litranaca chera.

¹² Tsji žoñinacaqui ančhuc judío chimpuchiz cjiskatz pecča. Jalla ninacaqui nuž pecča, parti žoñinacž kuz wali cjiskatzjapa, nižaza parti žoñinacž ninacžjapa ana quintra cjisjapa. Cristuqui cruzquiz ticziča učhumnaca liwriizjapa, judiuz irata ana chimputa cjenami.

¹³ Pero nii chimputa žoñinacapacha Moisés lii jaru ana zumpacha kamča. Ninacaqui ančhuc chimpuchiz cjiskatz pecča, ančuca janchiquiz chimpuchiz cjen persun incantiñi kuzziz cjisjapa.

¹⁴ Wejrqui anacha čhjulquiztanami incantiñi kuzziztqui. Jesucristo Jiliriž učhum laycu ticziquiztan, jalla nektankazza wejrqui incantiñi kuzziztqui. Jesucristuž ticziž cjen wejrqui liwriitača. Jalla nižtiquiztan tii muntuquiz žejlñinacaqui anaž wejr ancha importayuča. Ninacžquiztan ticzi žoñižtakaztča wejrqui.

¹⁵ Jesucristuž partiquiz žejlcan, judío chimpuchiz cjisqui anaž importiča, nižaza ana chimpuchiz cjismi ana zakaz importiča. Ew kamañchiz cjisqui jalla niikaz importiča.

¹⁶ Jakziltat ew lii kamañ jaru kamčhaja, jalla ninacaqui ultim werar Yooz partir žoñinacača. Jalla ninacžtan Yooztan zumaj cjila, nižaza Yoozqui ninacžquiz okžla.

¹⁷ Tekztan nawjchuc tii puntunacquiztan ana jecmi wejtquiz molestila. Jesucristo Jiliržtajapa kamčiz cjen wejt janchiquiz chjojrínaca zejlča. Nii chjojrínaca kjanapachaž tjeeža, "Wejrčha Jesucristuž partiquiztqui", jalla nii. Anzcama nii chjojrínacaqui wejt janchiquiz cherchuchača.

¹⁸ Jilanaca, cullaquinaca, učhum Jesucristo Jiliriqui ančuca kuznaca walikaj cjiskatla. Jalla nužoj cjila. Amén.

LA CARTA DEL APOSTOL SAN PABLO A LOS EFESIOS

¹ Wejrteha Pablutqui, ančhucaquin tii cartal cjiřzcuča. Wejrqui Jesucristuž illzta apostoltča Yooz munañpi jaru. Ančhucqui Yooz partir žoñinacčhucča, Efeso wajtquiz kamñinaca. Nižaza ančhucqui Jesucristužquin kuz tjaachi žoñinacčhucča.

² Učhum Yooz Ejpmi, učhum Jesucristo Jilirimi ančhucaquiz zumaj yanapla, nižaza ančhucaquiz cuntintu kuzziz walikaj kamkatla.

YOOZ EJPQUI UCHUMNACALTAJAPA ZUMA PINSICHA

³ Učhum Jesucristo Jilirž Yooz Ejpžtajapa honoral waytuča wejrqui. Učhum Yooz Ejpqui učhumnacaquiz anča zuma favoranaca paachiča, Jesucristuž partiquiz cjiskatchiž cjen. Učhumqui arajpach Yooz wajtchiz žoñinacčhumča. Jalla nižtiquiztan tjpaman favoranaca učhumnacaquiz paachiča Yooz Ejpqui.

⁴ Tuqitanpacha ima tii muntu kalltican Yooz Ejpqui Jesucristuž cjen učhumnac illziča, nižtajapa t'acžta cjisjapa, nižaza niž yujcquiz ana ujšiz nižaza zuma cjisjapa.

⁵ Yoozqui niž okžni kuzziz cjen, tuqitanpacha tantiichiča, učhumnaca niž partiquiz cjisjapa, niž maatinacjapa. Jesucristuž cjen učhumqui Yooz maatinacčhumča.

⁶ Nižaza Yooz Ejpqui niž anča okžni kuz tjeeziča, niž persun honora waytita cjisjapa. Niž k'ayi Majchiž cjen učhumnacaquiz nužukaz walja okžiča Yooz Ejpqui.

⁷ Jesucristuž ticziž cjen, Yoozqui učhum liwriichiča. Jalla nuž liwriižcu učhum ujnaca pertunchiča, niž zuma okžni kuzquiztan.

⁸ Yoozqui učhumnacaltajapa niž okžni kuz walja tjeeziča, zuma favoranaca paacan. Jalla nuž zuma favoranaca paacan, Yoozqui učhumnacaquiz tjapa niž puntunaca intintazni cjiskatchiča.

⁹ Nižaza Yoozqui niž tuqita chjojta pinsitanaca učhumnacaquiz zizkatchiča. Niž kuzcama pinsita jaru, jalla nuž učhumnacaquiz zizkatchiča.

¹⁰ Yoozqui niž pinsita tjuñquiz niž persuna pinsitaqui cumpliskataquiča. Jalla niž pinsita jaru Yoozqui tjapa arajpachquin žejlñinacami, nižaza tjapa tii yokquiz žejlñinacami tjappachaž juntjapaquiča, Cristuž mantuquiz cjisjapa.

¹¹ Jesucristužquin kuzziz cjen wejrnac judío žoñinacaqui t'acžtača. Yoozqui persun kuzcama pinsita jaru nuž wejrnac t'acziča. Yoozqui tjapa niž pinsitacama cumpliskatča.

¹² Wejrnacqui ančhucž tuqui Jesucristo tjewziča. Wejrnacqui t'acžta cjissinča, zuma kamzjapa. Nekztan wejrnacaž zuma kamtiquiztan Yooztajapa juc'anti honora waytitaž cjequiča.

¹³ Nižaza ančhucqui werar Yooz taku nonžcu Jesucristužquin kuz tjaachinčhuczakazza. Jalla nižtiquiztan liwriita cjissinčhuczakazza. Nekztan Cristuž partiquiz želan, Yoozqui niž Espiritu Santo ančhuca kuznacquiz luzkatchiča. Tuqitanpacha Yoozqui niž Espiritu Santo cuchanžquizjapa taku tjaachiča. Nižaza Espiritu Santuqui ančhuca kuzquiz žejltiquiztan, ančhuca kuzquiz Yooziž chimputapanča. Nii kjanapacha tjeeža, ančhucqui Yooz partir žoñinacčhucča, jalla nii.

¹⁴ Espiritu Santo učhumnaca kuzquiz cjen, učhumqui zizza, ultimpacha arajpach Yooz irinsa tanznaquiča. Chjulorat tjapa Yooz partir žoñinaca liwriita cječhaja, jalla nii ora nii irinsa tanznaquiča. Tjapa niža zumanaca učhumnacaltajapa pinsichiča Yoozqui, nižtajapa juc'ant honora waytita cjisjapa.

PABLUZ MAYIZITA

¹⁵ Jilanaca, cullaquinaca, ančhuqui Jesucristo Jiliržquin kuzzizpanča, nižaza parti criichi žoñinacžtan zuma munaziñi kuzzizpanča. Jalla niža zizcu,

¹⁶ wejrqui ančhucaž cjen tirapan Yoozquin sparaquž cjiwča. Nižaza Yoozquin mayzican ančhucaltajapa mayizuča, ančhuc Yooz puntu zuma zizni cjisjapa.

¹⁷ Učhum Jesucristo Jilirž Yooz Ejpžquinpan mayizuča. Yooz Ejpqui juc'ant chekan honorchizza. Ančhucaltajapa mayizuča, Yooz ančhucaquiz tsjii zizni kuzziz cjiskatajo, nižaza mayizuča Yooziž tjeežtanaca intintazni kuzziz cjiskatajo. Jalla niža kuzziz kamaquiz niiqui, juc'anti Yooz puntunaca zizni cjequiča.

¹⁸ Nižaza juc'anti Yooz puntunaca intintazni kuzziz cjequiča. Zuma intintazni cjequiz niiqui, arajpachquin kamz puntu juc'anti zizaquiča. Yoozqui učhumnaca kjawziča, arajpachquin kamzjapa. Jalla nicju kamzjapa učhumqui tjewža. Arajpachquin Yooztan kamzqui juc'ant anča zuma wali irinsažtakazza. Jalla nii irinsa Yoozqui tjapa niž partir žoñinacžquiz tjaaquiča.

¹⁹ Nižaza wejrqui mayizuča, ančhucqui Yooz aziž puntuquiztan juc'anti intintazjapa. Učhum Yoozqui juc'ant walja azzizza, čhjultakquiztanami. Niž aztan Yoozqui učhum kuznaca campiiskatchičha, ew kamañquiz kamzjapa. Yoozqui niž jacatatskatñi aztan učhum kuznaca campiichičha.

²⁰ Yooz Ejjpqui niž walja azi tjeeziča, Jesucristo ticziquiztan jacatatskatcan. Nižaza niž aztan tjeeziča arajpachquin niž žew latuquiz Jesucristo tjułžcan, nižtan chica mantizjapa.

²¹ Yoozqui tjappacha Cristuž mantuquiz utchiča, tjapa jilirinacami, tjapa mantiñinacami, tjapa mantiñi poderchiznacami, tjappacha Cristuž mantuquizcama uchtača. Tii timpuquiz žejlñinacami, nižaza jazta timpuquiz tjonñi mantiñinacami tjappacha Cristuž mantuquiz uchtača.

²² Yoozqui mantichiča tjappacha Cristuž mantuquiz cjisjapa. Nižaza Yooziž manti-tiquiztan nii tjapa mantiñi Cristuquui niž icliz zoñinacžtajapacha.

²³ Cristuž partir zoñinacaqui nižtan tsjii kuzziz žejlča, nižaza tsjii curpuchiztakazza. Tjapa Cristuž partir zoñinacaqui Cristuž kamañchizpankazza. Nižaza Cristuž cjen tjapa čhjultakimi tii muntuquiz žejlča.

2

YOOZ OKŽŃI KUZIZ CJEN ZOŃINACAQUI LIWRIITACHA

¹ Jaziqui Yoozqui ančhucaquiz ew kamañchiz cjskatčičha. Tuquiqui ančhucqui Yooz yucquiziqui ticzi zoñinacažtakaz želatčha ujnaca paachiž cjen, nižaza ana walinaca paachiž cjen.

² Jalla nuž ana wali ujnaca paacan, ančhucqui kamatčha ujchiz zoñinacž kamañ jaru. Nižaza ana wali paacan, zajranacž jilirž kuzcamakaz kamatčha. Jakzilat ana Yooz kuzcama kamčhaja, jalla niiqui zajranacž jilirž kuzcamapankaz kamčha. Nii ana wali zajra jiliričiqui zoñinacžquiz ana wal kamañchiz cjskatčha.

³ Tuquiqui učhumqui ana wal kamañchiz zakaz kamatčha, Yooz kuzcama ana kamcan. Učhumqui persun kuzcamakaz kamatčha. Nižaza učhum ana wali pecni kuz jaru kamatčha. Nižaza učhum ana wali pinsitanacž jaru kamatčha. Jalla nižtiquiztan učhumqui Yooz casticta cjichucapantacha, jaknužt Yoozqui parti ujchiz zoñinaca casticačhaja, jalla nižta.

⁴ Jalla nižta ana wali kamanami, Yoozti zuma okžni kuztan učhumnacaquiz okziča. Nižaza učhumnacatan munaziča.

⁵ Nuž zuma okžni munaziñi kuzziz cjen, Yoozqui učhumnacaquiz Cristužtan zuma kamañchiz cjskatchičha. Yooz okztiquiztankaz ančhucqui liwriitača. Tuquiqui uj paachiž cjen, učhumqui Yooz yucquiziqui ticzi zoñinacažtakaztača.

⁶ Jaknužt Jesucristuquui ticžcu Yooz aztan sepulturquiztan ulantčhaja, jalla nižta irata učhumqui Yooz aztan ana wal kamañanacquiztan ulanchinčhumčha. Nekztan Cristužtan tsjii kuzziz cjen Yoozqui učhumnacaquiz Cristužtan chica honorchiz cjskatchičha.

⁷ Jalla nuž Yoozqui cjskatchičha, wiñajjapa niž ancha zuma okžni kuz tjeezjapa. Jesucristuž cjen Yoozqui učhumnacaquiz zuma kuztan munazicha.

⁸ Yooz okžni kuzziz cjen, nižaza ančhucaž Jesucristužquin kuz tjaachiž cjen, ančhucqui liwriitača. Jalla nii liwriitaquui anača ančhucaž cjenaquui. Antiz Yooz cjenpankazza nii liwriitaquui. Jalla niičha ančhucaquiz liwriiz tjaachiquui.

⁹ Ančhucaž paata obranacquiztan nii liwriizquui anaž tjončha. Jalla nižtiquiztan anaž jecmi mit kuzziz cjesača.

¹⁰ Učhumqui Yooz obranacčhumčha. Jesucristužquin kuz tjaachiž cjen Yoozqui učhum liwriičičha, zuma kamañchiz cjisjapa. Yoozqui jalla nižta zuma kamañanaca učhumnacaltajapa tantižinčičha, ima nižquiz criñiž cjen. Jalla nii kamañanaca tantižinčičha, učhum zuma obranaca paazjapa.

TUQUI ANCHUCQUI ANATACHA YOOZ ZOŃINACA

¹¹ Ančhucqui jalla tuž cjuñzna. Ančhuquui anača judío zoñinaca. Chimputa judío zoñinacaqui ančhuca puntuquiztanž cjiča, "Ninacaqui jančiquiz ana chimputača. Jalla nižtiquiztan anaž Yooz partir zoñinaca cjesača". Jalla nuž cjiñičha. Nii judionacača curpuquiz chimputaqui, "Yooz illzta žoñi" cjican tjeezjapa. Zoñiž chimputača nii judío zoñinacaqui.

¹² Nižaza cjuñzna. Tuquiqui ančhucqui ana Cristo pajiñchuctača. Nižaza Israel wajtchiz zoñinacžquiztan yejkchuctača. Nižaza ančhucqui Yooziž tjaata takunaca anaž pajatčha. Ujnacquiztan liwriita cjisjapa ana tjewzñi atatčha. Tii muntuquiz kamcan ančhucqui anapan werar Yooz pajatčha.

¹³ Pero aniziqui Jesucristužquin kuzziz cjen ančhucqui Yoozquin macjatchinčhucča. Tuquiqui ančhucqui Yoozquiztan aškquin želatča. Cristuž ticziž cjen, ančhucqui Yoozquin macjatskattača.

¹⁴ Cristuž cjen učhumnacatan Yooztan pajaskatchiča. Nekztan zumanskatchiča. Nižaza učhumnacatan parti criichi žoñinacžtan zumanskatchizakazza. Cristuquiqi judío žoñinacami ana judío žoñinacami tsjii partiquizkaz tjappacha cjiskatchiča, nižquin criichiž cjen. Tuquiqui judío žoñinacaquiqi yekja wajtchiz žoñinacžtan quintranpanikaztača. Nižaza yekja t'akapanž nayatča. Pero aniziqui Yooz partiquiz cjan criichi žoñinacaquiqi tsjiikazza.

¹⁵ Cristuquiqi curpuchiz cjan Yooziž mantita lii liwž cumpližcu ticziča. Jaziqiqui Cristuž ticziž cjen Yoozquiqi ni tuquiqi timpuquiztan kamchi lii tuct'ayskatchiča, tjapa niž mantitanacžtanpacha. Jalla nekztan Yoozquiqi judío criichi žoñinacami ana judío criichi žoñinacami tjappacha tsjii ew partiquiz cjiskatchiča. Nii ew partiquiz žejlcan, judío žoñinacžtan yekja wajtchiz žoñinacžtan ana iya quintrasni cjesača.

¹⁶ Nižaza cruzquiqi ch'awcta ticziž cjen, Jesucristuquiqi judío žoñinacžtanami yekja wajtchiz žoñinacžtanami pertunaskatchiča. Jaziqiqui Jesucristuž cjenkazza nii pucultan quintrasni žoñinacžtan Yooztan zuma cjiskatchiqui. Nižaza nii pucultan quintrasni žoñinacaquiqi tsjii partiquizkaz kamasacha, zuma munazican.

¹⁷ Nižaza Jesucristuž tjonchiž cjen, Yoozquiztan aškquin žejlñinacžquizimi žcati žejlñinacžquizimi zuma quintunaca paljaytača. Ninacaquiqi nii paljayta tjapa kuztan catokaquiqi niiqui, jalla nekztan Yooziž pertunta cjesača. Nižaza ninacžtan Yooztan zumanznaquičha.

¹⁸ Jesucristuž cjen nižaza Yooz Espiritu Santuž cjen judío žoñinacami ana judío žoñinacami, tjapa žoñinacaquiqi Yooz Ejpžquin macjatz atča.

¹⁹ Jalla nižtiquiztan ančhucqui anača iya yekja žoñinacžhucqui, anača iya Yoozquiztan yekja t'akčhucqui. Antiz Yooz partiquiz kamni mazinacžhucča parti criichi žoñinacžtan, nižaza ančhucqui Yooz famillquizčhucča.

²⁰ Učhumquiqi tsjii pajk kjuyaztakazza Yooztajapaquiqi. Nii kjuj simintuquiqi apostolonacača, nižaza Yooztajapa chiiñi profetanacača. Nižaza Jesucristupachača juc'ant chekan maz cuntaquiqi nii kjuyquiziqui.

²¹ Jesucristuž cjen tjapa criichi žoñinacaquiqi arubinacažtakazza nii kjuja pirkitaquiqi. Tjapaman criichi žoñinacž cjenami tsjii Yooztajapa kjuyakaz kjuytača. Jesucristuž yanaptaž cjen nii kjuychiz žoñinacaquiqi tsjan tsjan zuma cjissa, Yooztajapa kamcan.

²² Ančhuc zakaz nii kjuj pirkita arubinacažtakazza parti criichi žoñinacžtan. Jalla nuž učhum Yooz kjuyquiz cjsiž cjen, Yoozquiqi učhum kuzquiqi žejlča niž Espiritu Santužtan.

3

PABLUQUI YOOZ TAKU PALJAYŃI ŽOŃIČHA

¹ Jalla nižtiquiztan wejr Pabluquiqi ančhucaltajapa mayizuča. Wejrquiqi Jesucristo sirwiñiž cjen tii carsilquiqi želuča. Nižaza ančhuc yekja wajtchiz žoñinacžquiqi liwriñi taku paljaytquiztan zakaz carsilquiqi želuča wejrquiqi.

² Ančhucquiqi wejt puntuquiztan zizzinčhucžlani. Yoozquiqi tii apóstol puestuquiqi wejr utchiča, ančhucquiqi Yooz puntu paljayzjapa, jaknužt Yoozquiqi okžni kuzziz ančhuc liwriiž pecħaja, jalla nii paljayzjapa.

³ Nižaza ančhucquiqi zizzinčhucžlani Yoozquiqi niž tuquita pinsita takunaca wejtquiqi zizkatchiča, jalla nii. Tuquita anapan ziztatača nii takunacaquiqi. Nii wejtquiqi zizkatta takunaca tuquiqi ančhucquiqi tsjii koluculla cjiyrchinča.

⁴ Nižaza tii carta liižcu, ančhucquiqi tantiyasača, wejrtača Cristuž puntuquiztan zuma intintaziñtquiqi, jalla nii.

⁵ Tuquiqi timpuquiqi Yoozquiqi anaž jecžquizimi Cristuž puntuquiztan zuma zizkatchiča. Jazikaz Yoozquiqi Cristuž puntu zuma zizkatchiča, niž illzta apostolonacžquizimi, nižaza nižtajapa chiiñi profetanacžquizimi. Niž Espiritu Santuž cjen nuž zizkatchiča.

⁶ Nii tuquita chjojta puntuquiqi jalla tiča: Cristuž puntu liwriñi taku catokchiž cjen, čħjuluž cherchi žoñimi Yooziž liwriitaž cjesača. Tsjii irinsažtakaz nii liwriiž tanznasača. Ana judío žoñinacami Cristuž partiquiz zakaz cjisnasača. Nižaza Cristuž partiquiz žejlcanpacha Yooz tjaata taku tanznasača, liwriita cjisjapa.

⁷ Wejrquiqi nii liwriñi taku paljayzjapa apóstol puestuquiqi uchača. Jalla nii puestuquiqi cjis anal waquizuča. Yoozquiqi wejr okžcu nužkaz nii puestuquiqi wejr utchiča, niž kuzcama. Yooz poderchiz apóstol kamañ jaru kamuča.

⁸ Wejrquiqi tjapa Yooz partir žoñinacžquiztan upa honorchiz cjis waquizuča. Jalla nuž cjenami Yoozquiqi wejtquiqi apóstol puestu tjaachiča, ana judío žoñinacžquiqi Cristuž

puntuquiztan ancha zumanaca paljayzjapa. Cristuž puntuqui ancha zumača. Tjapa nii puntuquiztan ana intintazzucača.

⁹ Yoozza tjappacha paachiqui. Jalla nii Yoozqui wejtquiz niiz tuquita chjojta pinsita cumpjiichiča, tjapa žoñinacžquiz kjanzt'izjapa.

¹⁰ Jalla nuž watchiča, tjapa poderchiz espiritunacami tjapa mantiñi espiritunacami zizkatzjapa, jaknužt Yoozqui ancha zizñi zizñi pinsichižlaja, nii. Tuquiqui nii arajpachquin žejlñi espiritunacaqui ana zuma zizziča nii Yooziž pinsita puntuqui. Anziqui criichi žoñinacž cjen, nii espiritunacaqui Yooz tuquita pinsitaqui zizziča.

¹¹ Tuquitanpacha Yoozqui nuž zizkatz pecchiča. Jaziqui učhum Jesucristo Jiliriz cjen Yoozqui niiz pinsitaqui zizkatchiča.

¹² Nižaza Jesucristuž cjen učhumqui Yoozquin macjati atasacha, ana eksčan. Jesucristužquin kuz tjaachiž cjen, učhumqui tjup kuztan Yoozquin macjati atasacha.

¹³ Jalla nižtiquiztan ančhucaquin tuž čhižinžcuča, weriž ančhucaltajapa sufrichiz cjen, ana upa kuzziz cjee. Jalla nuž ančhucaltajapa sufran, ančhucqui juc'ant honorchiz cjequiča.

CRISTUQUI ANCHA ZUMA MUNAZIŃI KUZIZ

¹⁴ Nii Yooziž ancha zuma pinsitaqui cjuñzcu, wejrqui učhum Jesucristo Jilirž Yooz Ejpžquiztan mayižinuča. Quillžcu, Yoozquiztan mayižinuča.

¹⁵ Yooz Ejpžquiztan tjapa Yooz partiquiz žejlñi familianacaqui tjuuchizza, arajpachquinami yokquizimi.

¹⁶ Yooz Ejpžquiztan mayižinuča, ančhuca kuznaca tjupi tjurt'ichi cjisjapa. Yoozqui niiz Espiritu Santuž aztanž cjen, ančhuca kuznaca tjupi tjurt'ichi cjiskatasacha. Yoozqui niiz juc'ant zuma kuzquiztan ančhuca kuznaca tjurt'ichi cjiskatasacha.

¹⁷ Nižaza ančhucaltajapa mayižinuča, Jesucristužquin juc'ant kuzziz cjejajo. Jalla nuž juc'ant kuzziz cjen, Jesucristuqui ančhuca kuznacquiz juc'anti irpaquiča. Jesucristuž irpita cjen, ančhucqui zuma munaziñi kuzzizpanž kamaquiča, tsjii zuma pookñi kalažtakaz.

¹⁸ Nižaza zuma munaziñi kuzziz kamchiž cjen, ančhucqui Jesucristuž zuma munaziñi kuz juc'antiž pajaquiča. Jalla nuž mayižinuča tjapa criichi žoñinacžtajapa. Wejrqui tuž mayižinuča, tjapa criichi žoñinacaqui Cristuž zuma munaziñi kuz zumpacha pajla cjiwča. Zmali pakjiž cjes, nižaza palaž cjes, nižaza lajchaž cjes, jalla nižta iratača Cristuž zuma munaziñi kuzqui.

¹⁹ Žoñinacaqui Cristuž zuma munaziñi kuz anaž tjapa paji atča. Jalla nuž cjenami Yoozquiztan mayižinuča criichi žoñinaca Cristuž zuma munaziñi kuz zumpacha pajzapa. Jalla nuž pajtiquiztan, ančhucqui Yooz iratapankaz zuma kamañchiz kamaquiča.

²⁰ Jaziqui Yoozqui zuma honorchiz cjila. Yoozqui niiz aztan učhum kuznacquiz zuma obranaca trabajča. Učhumž mayizitiquiztanami nižaza učhumž pinsitiquiztanami juc'anti zuma kamañchiz kami yanapasacha učhum zuma Yoozqui.

²¹ Criichi žoñinacž cjenami, Jesucristuž cjenami, Yoozqui honorchiz cjila. Wiñay wiñaya watay wata honorchiz cjila. Jalla nužoj cjila. Amen.

4

ESPIRITU SANTUŽ CJEN TSJII KUZIZZA UCHUMQUI

¹ Jesucristo Jiliržquiz sirwiñiž cjen carsilquiz želuča. Wejrqui ančhucaquin čhižinžcuča zuma kamañchiz kamajo, jaknužt Yooz kjawžta žoñinaca kamz waquizičhaja, jalla nižta. Yooz Ejpqui ančhuc kjawziča nižtajapa kamajo. Jalla tuž kamz waquiziča,

² ana miž kuzziz, nižaza humilde kuzziz, nižaza zuma munaziñi kuzziz, nižaza pasinichiz kuzziz. Jalla nuž kamz waquiziča.

³ Espiritu Santuž cjen, tsjiižtan tsjiižtan zumanskatz waquiziča. Jaziqui tsjii kuzzizpan cjee. Nužquiz tirapan kuz tjaa.

⁴ Tjapa criichi žoñinacaqui Cristuž partiquiz žejlča tsjii curpuchiztakazza. Nižaza tsjii Espiritu Santuchizza. Tjapa ančhucqui Yooz kjawžtiquiztan tsjiikaz tjewža, arajpachquin Yooztan kamz, jalla nii.

⁵ Nižaza tjapa ančhucqui tsjii Jesucristo Jilirchizkazza, nižaza tjapa ančhucqui Jesucristužquin kuz tjaachinčucča. Jalla nižtiquiztan ančhucqui tsjiikazza. Nižaza tsjii bautismokaz tanzinčucča.

⁶ Nižaza tjapa učhumqui tsjii Yooz Ejpchizza. Učhum Yooz Ejpž mantuquiz tjapa criichi žoñinaca žejlča. Nižaza Yooz Ejpqui trabajča tjapa criichi žoñinacž kuzquiz. Nižaza Yooz Ejpqui tjapa criichi žoñinacž kuznacquiz žejlča.

⁷ Tjapa criichi žoñinacžquiz kamañanaca tjaatača, Cristuž pectacama.

⁸ Jalla nii puntuquiztan Yooz taku tuž cjiča: “Arapachquin ojkan, wacchi Cristuž atipta presunaca chjitchiča. Nižaza tii muntuquiz žejlñi zoñinacžquiz kamañanaca tjaachiča”.

⁹ Yooz takuqui “Arapachquin ojkan” ¿kjažt cji? Jalla tuž cjiča: Primeraqui Cristuqui tii muntuquiz chjijwžquichiča.

¹⁰ Jalla nii chjijwžquiniqui Jesucristupachača. Nižaza niipachača arajpach kjutñi ojkhiqui, juc'ant tsewc arajpachquin. (Jalla nuž Jesucristuqui tsewc ojkhichiča, Espíritu Santuž cjen criichi zoñinacž kuznacquiz niipacha žejljapa.)

¹¹ Jalla tiža kamañanacchizza criichi zoñinacaqui: apostolonaca kamañchiz, nižaza Yooztajapa paljayñi profetanaca kamañchiz, nižaza liwriñi taku parliñinaca kamañchiz, nižaza icliz irpiñinaca kamañchiz, nižaza Yooz puntu tjaajiñinaca kamañchiz.

¹² Jalla niža kamañanaca tjaachiča Yoozqui, tjapa criichi zoñinaca Yooztajapa zuma kamaajo, nižaza Yooztajapa sirwican langznajo, nižaza parti criichi zoñinaca tsjan zuma kamañchiz cjiskatajo. Criichi zoñinacaqui Cristužtan tsjii curpuchiztakazza.

¹³ Nižaza Yooz Ejpqui criichi zoñinacžquiz niža kamañanaca tjaachiča, Yooz irata zuma cjisca. Jalla niža Yooz irata zuma cjican tjapa criichi zoñinacaqui tsjii kuzzizpankaz cjequičha, Jesucristužquiz tjapa kuz tjaacan, nižaza tjapa Yooz Majch puntunaca intintazcan. Jalla nuž Yooz irata zuma cjican, uħumqui tsjii zuma pajk žoñižtakaz cjequičha. Nižaza jaknužt Jesucristuqui zumapanžlaja, jalla niža irata uħumqui zumapanž cjequičha.

¹⁴ Jalla niža zuma kamñi intintazñi cjican, uħumqui anaž tsjii ocjalažtakaz cjequičha, chjul ew tjaajintiquizimi criizjapaqui. Nižaza uħumqui anaž tsjii kjutñi chjichta cjesača. Nižaza uħumqui nii ana wal mañuz zoñinacžquiz ana incallskataquičha. Nii ana wal zoñinacaqui chjulumi paača, nižaza chiča, parti zoñinaca incallzapa, nižaza tsjii kjutñi chjichjapaqui.

¹⁵ Antiz uħumqui zuma munaziñi kuztan werarapan chiiz waquiziča. Jalla nuž zuma kamcan nižaza zuma chiican, uħumqui Cristužtan tsjii kuzzizimi tsjii kamañchizimi juc'anti cjisnacučiča. Cristupankazza uħum jilir achaqui.

¹⁶ Uħumqui Cristužtan tsjii curpuchiztakazza. Tsjii curpuquiz yekja yekja žejlča. Jalla nuž cjenaqui tsjii curpukazza. Jalla niža iratača Jesucristuž partiquiz žejlñi zoñinacaqui. Yekja yekja želanami, tsjii partiquiz juntjapziča, Jesucristuž cjen. Jesucristuqui uħumnaca juntjapchiča, nižaza tsjii kuzziz cjiskatchiča, nižaza ew kamaña tjaachiča. Tjapa criichi zoñinacž zuma kamñiž cjen Cristuž curpuqui tsjan zuma pajk-tažokazza. Nižaza porapat zuma munaziñi kuzziz kamñiž cjen, tsjan tsjan wali zumaž cjissa.

EW KAMAÑCHIZZA CRIICHI ZOÑINACAQUI

¹⁷ Jalla nii puntu anħucaquin chiiznžcuča. Jesucristo Jiliržtan tsjii kuzziz cjican werjqui anħucaquin tuž cjiweča: Ana Yoozquin criichi zoñinacaqui ana zuma kamča. Jalla ninacaqui inapankaz persuna pinsitanacž jaru kamča. Jalla niža irataqui anħucqui anača kamzqui.

¹⁸ Ana criichi zoñinacaqui ana Yooz puntu intintazñi kuzzizza. Zumchiquiz ojklajñi zoñinacača ninacaqui. Ninacž chojru kuzziz cjen, Yooz puntu ana zizza. Jalla nižtiquiztan ana Yooz kamañchizza.

¹⁹ Ninacaqui ana wali paaznacquiztan ana azñiča. Nižaza ana wal kamañquiz kuz tjaachiča. Tjapaman ana walinaca paazjapa pecñipanča.

²⁰ Pero Jesucristuž tjaajintaqui anača niža. Jalla niž tjaajintaqui zizza anħucqui.

²¹ Anħucqui Jesucristuž puntuquiztan nonžcu niž tjaajintaqui catokchinħucča. Niž tjaajintaqui werarapankazza.

²² Anħuca tuquita ana wal kamaña eca. Anħuca ana wali pecñi kuz jarutača nii kamañaqui. Ana wal kamañchiz kamcan, zoñinacaqui persunpachaž incallča. Ana wal kamaña liwj jayta anħucqui.

²³ Kuznaca liwj campiya, zuma kamañchiz cjisjapa.

²⁴ Nižaza Yooz tjaata ew kamañchizpankaz cjisna. Nii ew kamañaqui Yooz irata zuma kamañača. Nii ew kamañ jaru kamcan, ana uj paaquičha, lijituma zumaž kamaquičha.

²⁵ Jalla nuž kamcan, ana toscar takunaca chiya. Antiz zapa mayni porapat zuma werar takunacžtan parlispanča. Tjapa criichi zoñinacaqui yekja yekja cjenami tsjii curpuchiztakazza.

²⁶ Tsjii žawjz tjonanaqui, uj paazquiztan cuitaza. Ana zita žawjz peczqui.

²⁷ Anača Satanás diabluž jaru ujquiz tjojtskatz peczqui.

²⁸ Jakziltažlaja tjangz pecñi kuzziz, nii tjañi zaaz kuz jaytila. Jalla niiqui langz waquiziča persun kjaržtan. Nekžtan ganžcu, t'akjir zoñinacžquiz onasača.

²⁹ Ana wal takunacžtan ana chiya. Antiz zuma takunacžtan chiya, parti žoñinaca juc'ant zuma kamañchiz cjisjapa. Jalla nuž chiyan nonžñi žoñinacaqui yanapta cjequičha, zuma kamajo.

³⁰ Espíritu Santuqui ančhuca kuzquiz žejlcan Yooz chimpupapanča, ultim liwriiz tjuñicama. Jalla nižtiquiztan Yooz Espíritu Santužquiz ana llaquiziskata, ana wali kamcan.

³¹ Chjaawjkatñi kuz jayta, nižaza culirazñi kuz jayta, nižaza žawjžawjz kuz jayta, nižaza žoñi ararñi kuz jayta, nižaza žoñž quintra ana wali chiñi kuz jayta, nižaza tjapa ana wali kuznaca jayta.

³² Nižta ana wali kuzziz cjenpacha porapat zuma munaziñi kuzziz cjee. Nižaza porapat zuma okžñi kuzziz cjee. Nižaza porapat pertunñi kuzziz cjee. Jaknužt Jesucristuž cjen Yoozqui ančhucaquiz pertunčhaja, jalla nižta porapat pertunassaquičha.

5

ZUMA KAMAÑANAC PUNTU

¹ Ančhucqui Yooz partiquiz žejlcan Yooz pecta maatinacača. Jalla nižtiquiztan Yooz irata zuma kamañchiz cjee. Yooz kamañchiz yatekaza.

² Zuma munaziñi kuzziz cjee. Jaknužt učumnacatan Cristo munazičhaja, jalla nižta. Učumnacatan munazican, Cristuqui učum laycu ticzičha. Jalla nuž ticžcan Cristuqui niž persun curpu Yoozquin tjaachičha, tsjii zuma ofrendažtakaz, nižaza tsjii zuma wilanažtakaz.

³ Ančhucqui Yooz partiquiz cjicanaqui, anača tsjii adulteriuquiz ojklayz pinsisqui. Nižaza anača čjul anawalinacami pinsisqui. Nižaza anača čjultakimi zmazqui. Nižta anawalinaca anapanž pinsis waquizičha.

⁴ Anača azzuc takunaca čiičhiizqui. Nižaza anača ina takunaca čiičhiizqui. Nižaza anača ana zum takunaca čiičhiizqui. Jalla nižta čiičhiiznacaqui anaž učumnaca čiičhiiz waquizičha. Antiz zuma takunacžtan čiičhiiz waquizičha. Yoozquin sparaquiž cjis waquizičha.

⁵ Ančhucqui tuž zizza. Jakžiltat adulteriuquiz ojklayñi cječhaja, jalla niiqui anaž arajpach wajtquin luzasača, Cristužtanami Yooz Ejpžtanami čica kamzjapa. Nižaza ana zuma kamñinacami, nižaza zmazñinacami, jalla ninaca zakaz ana arajpach wajtquin luzasača. Ninacaqui Cristuž partiquizimi Yooz partiquizimi anapanž cjesača. Tsjii zmazñi žoñiqui, tsjii žoñiž paata yooz rispitiñi žoñi iratača.

⁶ Nižaza ančhucqui ina takunacžtan ana incallskata. Jalla nižta ana wali paañiž cjen Yoozqui nii ana wali paañinaca casticaquičha. Ninacaqui Yooz kuzcama ana kamñiča, antiz Yooz quintra paañiča.

⁷ Jalla nižta ana wali paañi žoñinacžtan čica anača munazizqui.

⁸ Tuquiqui ančhucqui uj paacan ana wal zumchiquizkaz kamatčha. Anziqui Jesucristo Jilirž partiquiz cjan, ančhucqui kjanquiz kamčha. Jalla nižtiquiztan zuma kamcan kjanquiz kamñi žoñižta cjee.

⁹ Kjanquiz kamcan, ančhucqui zuma kamaquičha, nižaza Yooz kuzcama kamaquičha, nižaza lijituma kamaquičha.

¹⁰ Čjul kamaña Jesucristo Jiliriqui jutztazaja, jalla nii kamañchiz kamzjapa tjapa kuz tjaa.

¹¹ Ana zuma obranaca paazqui ana nekz mitisa. Zumchiquiz ojklayñi žoñinacakazza nižtanaca paaz pecñiqui. Ninacž obranacaqui ana waliž, jalla nii kjanapacha tjeezna ančhucqui.

¹² Zumchiquiz ojklayñi žoñinacaqui chjožzaka ana zuma paañiča. Jalla nii paatanac puntuquiztan parlizqui anča azzucača.

¹³ Jalla nižta chjožzaka paatanacaqui kjanapacha tjeežtažlaj niiqui, tjappacha zizasacha, ana walipan, jalla nii. Werar Yooz kjanaqui čjul paatanacami tjeežkatasacha, zuma, ana zuma, nii.

¹⁴ Jalla nii puntuquiztan Yooz takuqui tuž cjičan: "Tjajñi žoñinaca, žaazna ančhucqui. Ticziquiztan žaažtažokaz cjee. Cristuqui ančhuca kuzquiz kjanzt'aquičha, tsjii zuma kjanažtakaz".

¹⁵ Jaziqi ančhucqui amayt'aza, jaknužt kamčhaja, jalla nii. Yooz puntu ana zizñinacažtakaz ana kamz waquizičha. Antiz Yooz puntu zizñi žoñinaca irata kamspanž waquizičha.

¹⁶ Tii timpuquiz kamñinacaqui ana wali paača. Jalla nižtiquiztan tii timpuquiz žejlcan ančhucqui parti žoñinaca yanapa, zuma kamajo.

¹⁷ Anača zumzužtakaz cjee. Antiz Jesucristo Jiliriz pecta kuz intintazñiž cjee.

¹⁸ Nižaza anača vinžtan licchi cjisqui. Jalla nuž licaśaž niiqui, zuma kamañquiztan tsjii kjutñi chjichta cjesača. Antiz ančuca kuztan Espiritu Santužtan tsjii kuzziz cjee.

¹⁹ Ančhucqui porapat zuma parlaquiča Yooz tawk salmužtan, nižaza Yooz wirsu itsnacžtan. Yoozquin tjapa kuztan itsnaquiča. Nižaza itscan Yoozquin honora tjaa.

²⁰ Chjulu watanami Yooz Ejpžquin tirapan sparaquiž cjequiča, učhum Jesucristo Jiliriz cjen.

CRIICHI FAMILLZ PUNTU

²¹ Jesucristužquin rispitchiž cjen porapatž sirwasaquiča.

²² Maatakanaca, persun luctakž jaru cjee, jaknužt ančhucqui Jesucristo Jilirž jaru kamčhaja, jalla nižta.

²³ Maatakaqui luctakž mantuquiz žejlča, jaknužt icliz žoñinacaqui Cristuž mantuquiz žejlčhaja, jalla nižtača. Icliz žoñinacaqui Cristužtan tsjii curpuchizpanča. Nižaza Cristuqui ninacž ačača. Cristuqui nižquin criichi žoñinaca liwriiča.

²⁴ Jaknužt criichi žoñinacaqui Cristuž mantuquiz žejlčhaja, jalla nižta irata tsjii maatakaqui luctakž mantuquiz cjistanča čjulu cjenami.

²⁵ Luctakanaca, persun maatakžtan zuma munaza. Jaknužt Cristuqui criichi žoñinacžtan zuma munazičhaja, nižaza ninacž laycu ticztčhaja, jalla nižta irata persun maatakžtan zuma munaza.

²⁶ Jalla nižta zuma munazican Cristuqui nižquin criichi žoñinacž laycu ticziča, ninaca zuma kamañchiz cjskatzjapa. Jalla nižta zuma kamañchiz cjisjapa criichi žoñinacaqui kjaztan ajuntažokaz cjissiča, Yooz taku catokžcu.

²⁷ Cristuqui nižquin criichi žoñinacžquiz zuma kamañchiz cjskatchičha, nižquizpacha zumapankaz ana ujhiz prisintisjapa. Jaknužt tsjii zuma telaqui ana manchichiz, nižaza ana tjot tjotsi, nižaza ana čjul ana walinacchiz žejlčhaja, jalla nižtapan criichi žoñinacaqui Cristuž yujcquiz cjequiča, zumapankaz cjequiča.

²⁸ Jalla nižta Cristo irata tsjii luctakaqui persun maatakžquiz zuma munazizpanča. Jaknužt persun curpuquizpacha cuitazñižlaja, jalla nižta persun maataka cuitaz waquziča. Persun maatakžtan munazican, persunpacha munazitažokaza.

²⁹ Anaž jecmi persun curpujapa quintra paasača. Antiz persun curpuquiz cuitazza, nižaza čheriž tjaača. Cristuqui jalla nižta irataž icliz žoñinacžtan cuitičha.

³⁰ Učhumqui icliz žoñinacača, nižaza Cristuž curpu cuntača, yekja yekja cjenami. Jalla nižtiguiztan Cristuqui učhumnacatan cuitičha.

³¹ Yooz takuqui tuž cjiča: “Tsji luctak žoñiqui persun maa ejpžquiztan zarakaquiča, persun maatakžtan zalzjapa. Persun maatakžtan zalzcu, ni pucultanaqui tsjiikaz cjiśsa”.

³² Cristužquiz criichi žoñinacaqui Cristužtan lucutiñižtakaza. Jalla nižta cjenaqui ch'amača intintazqu.

³³ Pero zapa mayni ančucaquiztan persun maatakžtan zuma munaza, jaknužt persunpachquiz zuma munazaja, jalla nižta. Nižaza maatakaqui persun luctaka rispitsa.

6

¹ Criichi maatinaca, persun maa ejpžquiz caspanča. Jalla nuž cascuqui Yooz pecta kuzcamaha.

² Yoozqui tuž mantichiča: “Maa ejpžquiz rispitsa”. Nižaza maa ejpžquiz rispitaquiz niiqui Yoozqui compromitchičha, tuž cjičan:

³ “Maa ejpžquiz rispitaquiz niiqui, ančhucqui waliž kamaquiča, nižaza ažk wata žetaquiča tii yokquiziqui”.

⁴ Ejnaca, ančhucqui maatinacžquiz ana inapankaz žawjwa zjična. Ocjalanacaqui ana wali paaquiz niiqui, zumžtan chiižinaquiča zuma kamajo. Nižaza Jesucristo Jiliriz tjajinta tjajžna.

⁵⁻⁶ Piyunanaca, ančuca patrunacžquiz caspanča, rispitan, nižaza ekscan, nižaza tjapa kuztan. Anača cherankaz c'unchikaz tuczqu niž kuz wali cjisjapa. Antiz tjapa kuztan nižtajapa langznaquiča. Jaknužt ančhucqui Yooz kuzcama tjapa kuztan Cristužquiz sirwičhaja, jalla nuž ančuca patrunacžquiz sirwasača.

⁷ Zuma kuztan langznaquiča, Yooz Jiliržtajapa langtažokaz, ana žoñtjapapaqui.

⁸ Ančhucqui zizza, piyunanacami, ana piyunanacami, tjapa žoñinacami Yoozquiztan pactaž cjequiča zuma langtiguiztan jama.

⁹ Patrunanaca, ančhuc zakaz piyunanacžtan zumapan cjee. Ana žawñi takunacžtan čhičhiya. Jalla tuž cjužna: ančhucmi, ančuca piyunanacami, tjappacha arajpach Yooz Patrunž mantuquiz žejlča. Nižaza Yooz Patrunaqui žoñinaca ana illilza.

YOOZQUIN TJURT'IZ PUNTU

¹⁰ Jaziqi jilanaca, cullaquinaca, Yooz wali aztan Jesucristo Jiliržquiz tjurt'ini kuzziz cjee.

¹¹ Satanás diabluz incallzpanž pecčha. Jalla nižtiquiztan tjapa Yooziž tjaata armanacchiz cjee, tjurt'iñi kuzziz cjisjapa.

¹² Učhum wali azziz quintranacaqui anačha zoñinacakaz. Antiz ninacaqui ana wal jilir zajranacačha, nižaza ana wal poderchiznacačha, nižaza ana wal mantiñinacačha. Nižaza tjapa ana wal azziznacačha učhum ultim quintranacaqui. Jalla ninacaqui zumchiquizkaz ojklayñičha, tii timpquiz ana walinaca mantican.

¹³ Jalla nižtiquiztan Yooz armanaca tanžna, nii ana walinacž quintra tjurt'izjapa tii ana wal timpuquiz. Yooztajapa tjurt'ican tjup kuzziz žela.

¹⁴ Jaziqui tii Yooz armanaca tanžna. Tsjay cinturuna tanžna. Nii cinturuna tanzqui tuž cjičha, werar Yooz tawkžtan tjurt'ichi žejlz, jalla niičha niiqui. Nižaza persun curpu atajñijapa arma tanžna. Nii arma tanzqui tuž cjičha, Yooz kuzcamapankaz kamz, jalla niičha niiqui.

¹⁵ Nižaza jaknužt zultatunacaqui quira zalzjapa zuma zapatu cujtžaja, jalla nuž ančhucqui liwriiñi taku paljayzjapa tjaczpančha.

¹⁶ Nekžtan tii arma tanžna. Tii armačha juc'ant chekanaqui, escudo cjeta. Jalla nii arma tanzqui tuž cjičha, Jesucristužquin kuzziz kamz, jalla niičha niiqui. Jesucristužquin kuzziz cjen, ana wal diabluz quintra tjurt'aquičha.

¹⁷ Nižaza tii arma žejlčha. Yooziž liwriita cjisqui tsjii tjup scarchiztakazza, acha ana chjoiritžta cjisjapa. Nižaza Espiritu Santuž pajk cuchillu tanžna. Jalla nii cuchilluqui Yooz takučha.

¹⁸ Espiritu Santuž ančhuca kuzquiz želan, ančhucqui Yoozquin tirapan mayiza, nižquin tjurt'ichi cjisjapa. Jalla nuž tjurt'ichi cjisjapaqui, naynay žela, ana llajlli kuzziz cjee. Nižaza tjapa Yooz partiquiz žejlñi zoñinacžtajapa mayizina.

¹⁹ Nižaza wejtajapa mayizina, Yoozqui wejr niž liwriiñi takunaca chii yanapzjapa. Wejrqui tjup kuztan liwriiñi Yooz taku zumpacha paljayz pecučha. Jalla nuž paljayzjapa wejtajapa mayizina.

²⁰ Yoozqui wejr cuchanzquichičha, niž puntunaca paljayzjapa. Jalla nuž weriž paljaytiquiztan anziqiu wejrqui carsilquiz chawcta želučha. Jalla nižtiquiztan wejtajapa mayizina, liwriiñi takunaca tjup kuztan ticlarzjapa, jaknužt wejrqui chiiz waquizučhaja, jalla nii.

ZERZ TAKUNACA

²¹ Tiquico jilaqui ančhucaquin tjapa wejt puntunaca quint'aquičha, jaknužt želučhaja, nižaza čhjulut paa-učhaja, jalla nii. Tiquico jilaqui pecta jilačha, nižaza wejt zuma yanapñičha, Jesucristo Jiliri sirwican.

²² Jaziqui tii jila ančhucaquin cuchanzcučha, wejtnaca puntuquiztan mazinžjapa, nižaza ančhuca kuznacquiz zumpacha p'ekinčayzjapa.

²³ Yooz Ejpžtan Jesucristo Jiliržtan ančhucaquiz llan kuzziz cjiskatla, nižaza juc'ant zuma munaziñi kuzziz cjiskatla, Jesucristužquin kuz tjaacan.

²⁴ Učhum Jesucristo Jiliržtan zuma munaziñi kuzziz zoñinacžquiz Yoozqui yanapt'izquila. Jalla nužoj cjila. Amén.

LA CARTA DEL APOSTOL SAN PABLO A LOS FILIPENSES

¹ Wejr Pabluqui Timoteo jilžtan ančhucaquin tii cartal cjiyržcuča. Wejrnacqui Jesucristuž manta payiñtča. Jaziqui ančhuc Filipos wajtchiz criichinacžquin cjiyržcuča. Jesucristužquin kuz tjaachiž cjen, ančhucqui Yooz partir žoñinacača. Ančhucaquin tsaanžcuča icliz irpiñnacžquinami, nižaza icliz jilirinacžquinami.

² Učhum Yooz Ejp, nižaza učhum Jesucristo Jiliri ančhucaquiz yanapt'ila. Nižaza ančhucaquiz walikaj kamkatla.

PABLUZ MAYIZITA

³ Chjulorat ančhucaquin cjuñznučhaja, ančhucaž cjen Yoozquin sparaquič cjian chiyučha.

⁴ Nižaza chjulorat ančhucaltajapa mayizučhaja, cuntintul mayizuča.

⁵ Učhumqui chicapacha langzinčhumča, žoñinaca Yoozquin kuzziz cjiskatzjapa. Ančhucaž criichi tjuñquiztanpacha nižaza anzcama Yooztajapa wejttan chica langzinčhucča.

⁶ Ančhucaž criichi tjuñquiz Yoozqui ančhucaquiz zuma kamañchiz cjiskatz kalltichiča. Nižaza Yooz Ejpqui ančhuca zuma kamaña Jesucristuž kamaña irata juc'anti juc'ant cjiskataquičha, Jesucristuž tjonz tjuñcama. Jalla nužupanča cjiwčha.

⁷ Nii ančhuca puntuquiztan pinsitanacaqui zuma lijitumača. Wejrqui persun kuzquiztan ančhucajapa anchal cjuñučha. Yoozqui tjapa ančhucaquizimi wejtquizimi yanapchiča, carsilquiz želanami, nižaza jilirinacž yujcquiz želanami. Jilirinacž yujcquiz liwriiñi Yooz tawk favora čiicanpan tjurt'ichinčhumča. Nižaza "Nii liwriiñi takuqui werar takupanča" cjian tielarchinčhumča. Jalla nuž chiyen Yoozqui učhum yanapchiča.

⁸ Jaziqui wejrqui persun kuzquiz ančhucajapa anchal cjuñučha, jaknužt Jesucristuqui ančhucajapa zuma cjuñučhaja, jalla nuž. Yoozqui nuž zizza.

⁹ Jalla nižtiquiztan ančhucaltajapa Yoozquin mayizuča, ančhucqui tsjan tsjan zuma munaziñi kuzziz cjisjapa. Nižaza jalla nuž zuma munazan, zakaz mayizuča, ančhucqui Yooz puntu tsjan zizñi cjisjapa, nižaza Yooz puntu tsjan zuma intintazñi kuzziz cjisjapa.

¹⁰ Jalla nuž ančhucqui zuma zizñi nižaza intintazñi kuzziz cjequič niiqui, zuma kamañanacakaz illznaquičha. Nuž illznaquič niiqui, Jesucristuž tjonz tjuñquiziqui ančhucqui ana ujhiz zumapan cjequičha. Anaž jecmi ančhuca quintr tsjii ujmi tjojtNASAča.

¹¹ Nižaza ančhucqui Jesucristuž cjen zuma kamañanacakaz tjeeznaquičha Jesucristuž tjonz tjuñquiziqui. Jalla nižtiquiztan ančhucaž cjen Yoozqui zuma honorchiz cjequičha. Nižaza "Yooz ancha zumača" cjian Yooz honora chiitaž cjequičha.

KAMAÑAQUI CRISTUZ CJENPANCHA

¹² Jilanaca, cullaquinaca, ančhucaquin wejt puntuquiztan zizkatz pecučha. Wejtquiz anawali watchinacaž cjen tsjan Žoñinacaqui liwriiñi Yooz taku nonziča.

¹³ Anziqui pajk jilirž kjuyquiz preso želuča. Jalla nuž želan tjapa wejr cuitiñi zultatunacaqui liwriiñi Yooz taku nonziča. Parti Žoñinacaqui nonzizakazza. Tjapa ninacaqui zizza, wejrqui Jesucristuž liwriiñi puntu paljaychiz cjen, preso želuča.

¹⁴ Nižaza weriž preso željtiquiztan, jila parti criichinacaqui Yooz taku paljayzjapa zumpacha p'ekinchaychiča. Nižaza tjup kuzziz cjissiča Yooz taku paljayzjapa, ana ekscan.

¹⁵ Yekjapanacaqui wejtjapa iñiziñi kuztan Cristuž puntu paljayča. Ninacaqui wejtquiztan juc'ant honorchiz cjis pecčha. Partizti zuma kuztan Cristuž puntu paljayča.

¹⁶⁻¹⁷ Ninacaqui zuma munaziñi kuzquiztan Yooz taku paljayča. Ninacaqui zizza, wejrqui tekz carsilquiz želuča, liwriiñi tawk favora tjurt'ichiž cjen. Yekjapanacaqui ana zuma kuzquiztan persun honora tanzjapa Cristuž puntu paljayča. Ninacaqui pinsičha, ninacž quinto nonžuc wejrqui juc'ant llaquisichucača, jalla nii.

¹⁸ Jalla nuž cjen, wejrqui žkjažt cjeesa? Jalla tuž cjiwčha: zuma kuztan cjenami, ana zuma kuztan cjenami Crustuž puntuqui paljaytača. Jaknužt paljayta cjenami, wejttaqui walipankaz cjesača. Jalla nuž cjenauqui wejrqui chipznučha.

¹⁹ Nižaza juc'anti chipznučha. Ančhucaž wejtjapa mayizic cjen, nižaza Jesucristuž Espirituž yanapz cjen, tjapa tii watchinacžquiztan wejrqui walipankal cjeeča. Wejrqui tii carsilquiztan ulnačhani.

²⁰ Jalla nuž anchal pecučha, nižaza tjewznučha. Ultimquiziqui wejrqui ana azkattal cjeeča. Pero Cristuž puntul kjana declaracača, zuma tjurt'ichi kuztan. Jaziqui weriž cjen

Cristuqui tsjan honorchiz cjequičha, weriž žetanami, weriž ticznanami. Tuquimi anizimi weriž cjen Cristuqui honorchizpančha.

²¹ Tuž cjiwčha. Cristužtajapapankaz žetučha. Wejr ticznaž niiqui, wejtajapa tsjan cusaž cjequičha, arajpachquin Cristužtan čica žejlcan.

²² Tii curpuchiz tira žetaž niiqui, Cristužtajapapankal langznasatha. Jalla nižtiqiztan, žejtzmi ticzmi jakzilat illz waquizas? Anal atasacha.

²³ Tii pizc partiqui ch'amačha illzjapa. Tsji kuzqui ticz pecučha, Cristužtan čica žejljapa. Jalla niiqui wejtajapa juc'ant waliž cjesačha.

²⁴ Pero ančhucaltajapa wejt tira žejtz waquizičha.

²⁵ Jalla nuž wejr ančhucaquiztan kuzquiz zint'ican, wejrqui zizučha: tiral žetučha. Ančhucatan tiral kamučha, ančhucqui Jesucristužquiz juc'ant kuzziz cjisjapa, nižaza juc'ant cuntintu cjisjapa.

²⁶ Nižaza wiruñaquí ančhucaguin wilta tjonznacha. Jalla nuž weriž tjonz cjen, nižaza Jesucristuž cjen, ančhucqui cuntintuž cjequičha.

²⁷ Jilanaca, cullaquinaca, jalla tužučha chekanaqui. Ančhuc cristian kamzqui Cristužquiz honorchiz cjiskatz waquizičha, Cristuž tjaajinta jaru kama. Jalla nuž kamaquič niiqui, ančhuc punctuquiztan zuma quintu okaquičha. Nekztanaqui wejrqui ančhucaguin chertzni tjonznaž niiqui, už ana chertzni tjoní ataž niiqui, wejrqui ančhuc punctuquiztan zuma quintu nonznachani. Ančhucqui tsji kuzziz tjurt'ichi želačhani. Nižaza tjapa ančhucqui tsji kuzziz Yooz tawk favora langzcan želačhani.

²⁸ Nižaza ančhucqui quintra žoñinacžquiztan anaž jaknužumi tsuctsucačhani. Anaž ninač taku kjayačhani. Jalla nuž quintu nonžcuqui, cuntintul cjeečha. Nižaza ančhuc nuž kaman, kjanapacha tježtaž cjequičha, ančhuc quintra žoñinaca infiernuquin Yooziž castictaž cjequičha. Nižaza kjanapacha zakaz tježtaž cjequičha, ančhucqui ultimu liwrižcu arajpachquin zuma kamañchiz cjequičha. Nii zuma kamaña Yooziž tjaata cjequičha.

²⁹ Yoozqui ančhuc illzičha, Jesucristužquin kuz tjaazjapami, nižaza Jesucristuž laycu sufrisjapami.

³⁰ Wejr irata ančhucqui sufrichinčhucča žoñinacaž quintra paan. Tuqui jaknužt wejrqui sufritučhaja, jalla nuž cherchinčhucča. Anzimi zakaz wejt sufrita quintu nonzinčhucča. Anchuc zakaz nižta suffraquičha.

2

CRISTUZ TII MUNTUQUIZ KAMTA PUNTA

¹ Ančhucqui Jesucristužquin kuzziz cjen p'ekinčaytaž cjee. Nižaza Jesucristo ančhucaguiz okzñiž cjen, ančhucqui kuzta cjee. Nižaza Espiritu Santuqui ančhuc kuzquiz luzičha. Nižaza ančhucqui okzñi kuzzizza.

² Jalla nižtiqiztan ančhucqui tsji kuzziz cjee, porapat zuma munazican, nižaza zuma kamcan. Jalla nuž ančhucqui kamaquič niiqui, nekztan wejrqui juc'ant cuntintul cjeečha.

³ Anaž persun kuzcamakaz čhjulumi paa. Nižaza anaž čhjulumi mit kuztan paa. Antiz humilde kuzziz cjee. Parti criichinacaqui wejtquiztan juc'ant honorchiz waquizičha, jalla nuž cjican pinziz waquizičha.

⁴ Persunaltajapa wali cjisjapa, ančhucqui kuz tjajiničhucča. Nižaza parti criichinacžtajapa wali cjisjapa zakaz kuz tjaa.

⁵ Jaknužt Jesucristuqui zuma kuzziz žejltčhaja, jalla nižta irata zuma kuzziz cjee. Jesucristuqui zuma kuzziz žejlcan, ana paachičha persunaltajapakaz wali cjisjapa.

⁶ Jesucristuqui Yooz cjicanaqui, arajpachquin žejlñi kamañchizpan želatčha. Nii arajpach kamañchiz cjenami ana nii arajpach kamaña jaknužumi tira tanzitačha.

⁷ Nii arajpach kamaña ecchičha. Nekztan tii muntuquiz žejlñi kamañchiz cjissičha, žoñinaca sirwizjapa. Nižaza žoñi irata nassičha.

⁸ Žoñž curpuchiz cjican, humilde kuzziz želatčha. Yooz manta paacan, Yooz Ejpž kuzcamapan kamatčha. Cruzquiz ch'awta ticz cjenami, Yooz Ejpž kuzcamakaz kamatčha. Yooz kuzcama kamzquiztan anapan jiwjatchičha.

⁹ Jalla nižtiqiztan Yooz Ejpqui Jesucristužquiz juc'ant zuma honora tjaachičha. Jesucristužquiz tsjan chawc jiliri utchičha, tjappachquiztanami.

¹⁰ Jalla nižtiqiztan tjappachaž nižquiz quillzcan rispitaquičha. Arajpachquin žejlñimi, tii muntuquiz žejlñimi, yok kos žejlñimi, tjappacha Jesucristužquiz rispitaquičha.

¹¹ Tjappacha ticlaraquičha, tuž cjican:

— Jesucristuqui, werarapan Jilirimčha amqui. Jalla nuž cjican, Yooz Ejpžquiz zakaz honora tjaata cjequičha.

¹² Weriz pecta jilanaca, cullaquinaca. Weriz ančhucatan želan, ančhucqui weriz chiita taku cassinčhucpanča. Nižaza jaziqui juc'antiž wejt taku casa, ančhucatan ana želanami. Arajpachquin kamzjapa nižaza ultimu liwriita cjisjapa, ancha kuz tjaa. Nižaza humilde kuzziz cjee Yoozquin ekskan.

¹³ Cjuñzna. Yoozqui ančuca kuzquiz žejlča. Jalla nuž žejlcan, niipachaž niiz kuzcama zuma paaz ančucaquiz peckatča. Nižaza Yoozpacha nii zuma paaznaca cumplisjapa yanapča.

¹⁴ Chjulu paacanami, ana Yooz quintra chucha, nižaza ana payznaka. Pero tjapa zuma kuztan kama.

¹⁵ Jalla nuž zuma kuztan kamtiqiztan, anaž jecmi ančuca quintra uj tjojtñasacha. Ana wal ujchiz žoñinacžtan kamcanami, anapan ujchiz cjesača, zuma kuztan kamcan. Nekztan ančhucqui kjanapacha tjeeža, Yooz maatinacžhucča. Zuma kamcan ančhucqui ana wal žoñinacžquiz Yooz zuma kamaña pajkatča, zuma kjanažtakaz.

¹⁶ Nižaza ančhucqui Yooztan wiñay kamz puntu paljaycan Yooz zuma kamaña pajkatča. Jalla nuž ančucaž zuma kamtiqiztan wejrqui Jesucristuž tjonz tjuñquiz ancha cuntintul cjeeča. Ančuca zuma kamañchiz kamtiqiztan weriz apóstol puestuquiz Cristužtajapa langžtaqui anača ina.

¹⁷ Ančhucqui Yoozquin tsjii wilana ofrendažtakaz ančuca zuma kamaña tjaača. Ančuca ofrenda zuma cumplisjapa, ticznasacha wejrqui. Jalla nuž ticzcanami wejrqui cuntintul cjeeča. Ančucaž cjen Yooz sirwican cuntintuča.

¹⁸ Nižaza ančhucqui weriz cjen cuntintu zakaz cjis waquiziča. Jaziqui wejttan chica cuntintuž cjee.

¹⁹ Jesucristo Jiliriz munan, wejrqui ančucaquin Timoteo jila cučanžquiz pecuča. Nekztan Timoteož quejpžquiztan, ančuca puntu wejtquiz maznaquiča. Nekztan wejrqui persun kuzquiz zuma cuntintul cjeeča.

²⁰ Anaž iya jecmi wejr irata pinsiñi žejlča, Timoteokazza. Jalla niiča ančhucalta wali cjisjapa kuz tjaañipankaz.

²¹ Parti jilanacaqui persunaltajapa wali cjisjapa kuz tjaača. Jesucristuž kuzcama ana zuma ojklayča.

²² Ančhucqui Timoteo jilž puntu zizza. Niiqui zuma kuz tjeeziča. Wejttan chica liwriiñi Yooz taku paljaycan wejr zuma yanapčiča, jaknužt tsjii majch persun ejp yanapčhaja, jalla nižta irata.

²³ Chjulut wejtquiz carsilquiz watačhaja, jalla nii zizcu, wejrqui Timoteo jila cučanžquiz pecuča ančucaquin.

²⁴ Nižaza Jesucristo Jiliriz munan, wejrpača upaquiztan ančhuc cherzñi tjonz pecuča.

²⁵ Tirapan carsilquiz želaž niiqui, Epafrodito jila cučanžcača. Jalla nuž cučanžquiz tantičinča. Epafrodito jilaquī wejt herman jilača, nižaza Jesucristužtajapa langžñi maziča, nižaza wejttan chica tjurt'iñi maziča. Ančhucqui Epafrodito jila wejtquin cučanžquichinčhucča, wejtquiz yanapzjapa. Wejttan žejlcan, wejr zuma atintičiča.

²⁶ Nii jilaž tjapa ančucaquiz ancha cjuñtiqiztan wejrqui tantičinča, ančucaquin nii cučanžjapa. Ančhucqui Epafrodito jila laaquita quintu nonzinčhucča. Epafrodito jilaquī jalla niiz quintu ančucaquin irantitiquiztan kuz turwaysi cjisiča, ančhuc cjuñžcu.

²⁷ Ultim werara laatača, nižaza ticzmayatača. Pero Yoozqui niizquiz zuma okžcu čhjetinčiča. Yoozqui wejtquizimi okzizakazza. Ana čhetintaž cjitasaž niiqui, wejttaqui juc'ant llaquiz cjitasača.

²⁸ Jalla nižtiqiztan wejrqui tii jila juc'ant cučanžquiz pecuča, ančhucqui tii jila cheržcu cuntintu cjequiča, nižaza wejrzakaz ančucaž cuntintu cjen, upa llaquisača.

²⁹ Nii jila zuma cuntintu kuztan risiwaquiča, zuma Jesucristo Jilirizquin criiči žoñiča niiqui. Jalla nižta jilanacžquiz rispitspanča.

³⁰ Tii Epafrodito jilaquī ticzmayapantača, Cristužtajapa sirwican. Jos ticziča, ančuca cuntiquiztan wejtquiz tii carsilquin atintican. Jalla nižtiqiztan niizquiz zuma risiwaquiča.

3

PABLUQUI JESUCRISTUŽQUIN KUZIZPANCHA

¹ Jilanaca, cullaquinaca, tsjiilla cjesača. Cristuž mantuquiz žejlcan cuntintuž cjee. Tuqui ančucaquin cartal cjiirčinča, tsjii kjaž puntunacquiztan. Jalla nii puntunacquiztan wital cjiirz pecuča. Wejtta ana molističa nii wila cjiirzqui. Ančhucaltajapaqui ancha walipanča jalla nii puntunaca wila cjiirzqui.

² Ančhucqui ana wal žoñinacžquiztan cwitaza. Ana wal pacužtakazza ninacaqui. Ana wali paañinacača ninacaqui. Čhimpuchiz cjisjapa žoñinacž curpu pootiča.

³ Učhumqui ligitum Yooz partir zoñinacača, nižaza učhum kuznacquiz Yooziž chimpupanča. Yooz Espiritu Santuž učhum kuznacquiz luzziž cjen, Yooz rispitiñčumča. Nižaza Jescristužquin kuz tjaachiž cjen učhumqui cuntintučumča. Učhumqui anača zoñiž pinsita custurumpiquiz kuz tjaachinčumqui, Yooz partira cjisjapaqui.

⁴ Ima Jesucristužquiz kuz tjaacan, wejttaqui razunanaca želatča, “Yooz partiquiz želuča” cjisjapaqui. Jakzilat persun razunanacquiztanz pinsičaja, “Wejrqui Yooz partiquiz želuča” cjanacqui, jalla nižta chiiñi zoñžquiztan wejttaqui juc'anti razunanaca žejlča, “Yooz partiquiz želuča” cjisjapaqui.

⁵ Jalla tužuča wejt razunanacacqui: maaž majttiquiztan quinsakal tjuñquiztan persun curpuquiz chimpupančača. Wejrqui Israel wajtchiz zoñiča. Benjamin familliquiztantča. Hebreo tawkchiz zoñiča majttiquiztanpacha. Nižaza wejt maa ejpmi hebreo chiiñizakazza. Judio lii puntuquiztan fariseo partir tjaajinta jaru kamiñpantača.

⁶ Anča tjapa kuztan judionacž lii jaru kamz pecquiñtača. Jalla nižtiquiztan Jesucristužquin criichi zoñinaca sufriskatiñtača. Judionacž lii jaru kamz puntuquiztan wejrqui zuma cumpliñtača. Anaž jecmi wejt puntuquiztanacqui “Amqui anam judionacž lii jaru kamča” cjanacchi atchiča. Wejt kamzqui ligituma lii jarupantača.

⁷ Tuquiqui tjapa nii puntunacacqui wejtquiztan anča walñitača. Anziqiu tjapa nii puntunacacqui wejtquiztan ana zinta walča, Jesucristuž tjapa walchiz cjen.

⁸ Jesucristo wejt Jiliri tsjan zuma pajspanqui, jalla niikaz wejtquiztiju walča, tjapachquiztan juc'anti. Jalla nižtiquiztan tjapa zoñiž pectanaca wejtquiztan ana zumanacažtakal nayuča. Wejtquiztan anaž iya čjulumi walča. Jesucristuž partiquiz cjisjapa wejrqui tjapa zoñiž pectanaca ana kuz tjaa-uča. Ninaca ecchinča. Jaziqui ana criiñi zoñiž pectanaca cjujchinacažtakal nayuča Cristuž partiquiz žejljzapa,

⁹ nižaza Cristužtan tsjii kuzziz cjisjapa. Jesucristupankaz wejtquiztanac walča wejr Yooz yujcquiz ana ujhiz cjisjapa. Wejt persun pinsita jaru kamtasaz niiqui, nižaza judionacž lii jaru kamtasaz niiqui, Yooz yujcquiz tirapan ujhiz cjisjapa. Pero Yooz yujcquiz ana ujhiz cjisjapa, Jesucristužquin ultimpacha kuzziztča wejrqui. Jesucristužquin kuzziz cjen, Yoozqui wejtquiz nayuča, ana ujhiz nižaza zuma, jalla nii.

¹⁰ Wejrqui pecuča tužu, Cristo tsjan zuma pajz, jalla niiča. Nižaza Jesucristuqui jacatatan, anča aziž tjeeziča. Jalla nižta azziz cjis pecuča. Nižaza jaknužt Jesucristuqui sufritchaja, jalla nuž sufris zakal pecuča, niž partiquiz cjisiz cjen. Nižaza jaknužt Jesucristuqui ticztčaja, jalla nižtazakaz ticzižtakal žejlz pecuča, ana uj paacan žejljzapa.

¹¹ Jalla nuž Cristužtajapakaz kamcan, wejrqui ticžcu tjewznuča, jacatatjapa, jalla nii.

YOOZ IRATA ZUMA KAMAÑCHIZ CJIS PECCHA PABLUQUI

¹² Tuž cjiwča. Wejrqui tii muntuquiz žejlcan, Cristužtajapa awisaqui ana zuma kamuča. Imaziča Yooz irata zuma kamañchiz žejlzquinaqui. Jalla nuž cjenami, wejrqui tirapan kuz tjaa-uča, nižaza tjurt'uča, Yooz irata zuma kamañchiz cjisjapa. Jalla nižta wejr cjisjapaqui Jesucristuqui wejr liwriičiča. Nižaza wejr liwriičiča niž mantuquiz cjisjapa.

¹³ Jilanaca, cullaquinaca, wejrqui tuž cjiwča, wejrqui imaziča Yooz irata zuma kamañchizqui cjanacqui. Pero tuž cjiwča, wejt tuquita ana zuma kamaña ecuča. Nižaza anča tjapa kuztan tjurt'uča, juc'ant zuma kamañchiz cjisjapa.

¹⁴ Tira tjurt'uča, Yooz irata zuma kamañchiz cjisjapa, nižaza Yoozquiztan tsjii zuma premio ganzjapa. Jesucristuž partiquiz žejlčiči cjen Yoozqui wejr arajpachquin kjawznaquiča. Nekztan juc'ant zuma kamañaž tjaaquiča.

¹⁵ Tjapa ančhuc Yoozquin kuz tjurt'ichinaca wejr irata cjee. Ančucaž pinsitaqui tsjii puntu ana wejr iratažlaj niiqui, Yoozqui ančucaquiz nii puntu zizkataquiča ligituma pinzizjapa.

¹⁶ Tii zakal cjiwča. Anzcama jaknuž Yoozqui učhumnacacqui niž kamañ puntuquiztan zizkatčaja, jalla nii zizkatta kamañ jaru kamstanča.

¹⁷ Jilanaca, cullaquinaca, weriž kamta irataž kama. Nižaza jakzila criichinacat weriž kamta irata kamčhaja, jalla ninacžquin yatekaza, juc'ant zuma kamañchiz cjisjapa.

¹⁸ Wejrqui kjaž wilta ančucaquiz chiižinčinča, nižaza anča kuzquiz zint'ican kaacan, wilta chiižinuča, jalla tuž cjan. Wacchi zoñinacacqui Cristuž quintra žejlča. Cristuž cruzquiz ticziž cjenami, jalla nii liwriiči ana juyzu paača.

¹⁹ Ultimquiziqui nii ana Cristužquiz juyzu paañi zoñinacacqui Yooziž castictaž cjequiča. Ninacaž persun kuzquiztan pectanaca rispitiča, tsjii yooztakaz. Azzucanaca paacan, mit kuzzizkazza. Nižaza tii muntu yokquiz žejlñi cusasanacžquizkaz pinsiča.

²⁰ Učhumzti arajpach wajtchiz zoñinacčumča. Učhumqui arajpachquiztan učhum liwriiči, Jesucristo Jiliri, tjewža.

²¹ Jesucristuqui wilta tjonžcu ućhum ana wal curpunaca tsjemataž tuckataquića, niiz irata zuma curpuchiz cjisjapa. Niiz persun aztan ućhumnaca curpu jalla niža tsjemata tuckataquića. Nižaza niiz persun aztan ćhjultakimi niiz mantuquiz cjiskataquića.

4

YOOZQUIN KUZZIZ CJEN CUNTINTUPANZ CJEE

¹ Weriz pecta jilanaca, cullaquinaca, anćhucaquin ancha tjonž pecuća. Anćhucaž cjen, cuntintuž wejrqui, nižaza anćhucaž cjen honorchiz cjeeća. Pecta jilanaca, cullaquinaca, Jesucristo Jiliržquin tjurt'ichi kuzziz cjee.

² Evodia cullaca, nižaza Sintique cullaca, anćhucqui Jesucristo Jiliržquin criichiz cjen tsjii kuzziz cjee.

³ Wejt ligitum Cristužquiz sirwiñi mazi, amquiz rocuća, tii pucultan cullaquinacžquiz yanapt'alla, porapat zuma munaziñi kuzziz kamzjapa. Nii pucultan cullaquinacaqui wejtjan chica liwriñi taku paljaycan langzića. Nižaza nii cullaquinacaqui Clementižtan, nižaza parti wettan chica paljayñi mazinacžtan langzića. Tjapa ninacž tjuunacaqui listitacħa arajpach žejzt liwruquiz.

⁴ Jesucristo Jiliriz cjen cuntintupanž cjee ćhjolorami. Wilta cjiwćħa: cuntintuž cjee.

⁵ Tjapa žoñinacaqui anćhuc zuma kuzziz pajla. Jesucristo Jiliriqui wajillaž tjonacućića.

⁶ Ana ćhjulkwiztanami llaquita kuzziz cjee. Antiz ćhjulu watanami Yoozquizkaz mayiza. Yoozquiztan ćhjulumu maya, nižaza sparaquiz cjee.

⁷ Jalla nuž kaman, Yoozqui anćhuca kuzquiz cuntintuž cjiskataquića. Jaknužt Yoozqui žoñinacž kuzquiz cuntintu cjiskatćħaja, jalla nii cuntintu cjiskataqui ana intintzasacħa, žoñiz pinsitiquiziqui. Jesucristužtan tsjii kuzziz cjen anćhuca kuznacaqui cuntintu cjequićħa, Yooz cwiťitiquiztanaqui.

ZUMA PINZIZNACAPANZ WAQUIZICħA

⁸ Jilanaca, cullaquinaca, tii zakal cjiwćħa. Jalla tižta ultim zuma pinziznaca waquizicħa: weraranaca, nižaza rispitsnaca, nižaza Yooz kuzcama kamznaca, nižaza ana uj paaznaca, nižaza tjapa zumapan kamz pecznaca, nižaza zuma quintuchiz cjisnaca. Jalla niža zamanaca pinza, nižaza tjapa zuma walinaca pinza.

⁹ Weriz tjaajinta jarumi, nižaza weriz čhiita jarumi, jalla nii jarupan kama. Nižaza jaknužt weriz kamta puntuquiztan nonžinćħucćħalaj niiqui, nižaza cherchinćħucćħalaj niiqui, jalla niža iratapan kama. Jalla nuž zuma kamtiquiztan Yoozqui anćhucatan chicapacħaž cjequićħa. Nekžtan anćhucqui walikaz cjequićħa.

PABLUZQUIN PAAZNACA APAYZQUITA

¹⁰ Jaziqui anćhucqui wilta wejtquiz cjuñzinćħucćħa. Jalla nižtiquiztan anćħa cuntintućħa wejrqui, Jesucristo Jiliriz cjen. Jazic wejrqui anal cjis pecuća, wejr tjazikalak, cjicanaqui. Antiz anćhucqui yanapž peccanami, ana jaknužumi wejtquiz yanapi atćħinćħucćħa.

¹¹ Wejrqui anal cjiwćħa, "Ancha t'akjiri želuća", cjicanaqui. Wejrqui apredicħinćħa, cuntintupankaz žejlžjapa, ćhjulu wejtquiz watanami.

¹² Želinćħiz kamcanami, ana želinćħiz kamcanami cuntintu želi zizzinćħa. Čhjulu watanami, ćħjerćħiz cjicanami ana ćħjerćħiz cjicanami, walipankaz želi apredicħinćħa. T'akjirižtakaz žejlcanami, ana t'akjiri žejlcanami walipankaz želi apredicħinćħa.

¹³ Čhjulu watanami, Jesucristuqui wejtquiz azi tjaañipanćħa, awantizjapa. Cristuž aztan ćhjulumu paacħucaćħa.

¹⁴ Jalla nuž cjenami, anćhucqui walipankaz paacħinćħucćħa, wejtquiz yanapcan, weriz sufrican žejlćħiz cjen.

¹⁵ Tuquiqui weriz liwriñi taku paljayi kalltitan, nižaza Macedonia yokquiztan ulantan, anćhucqui wejtquiz ofrendanacžtan yanapžquicħinćħucćħa. Anćhuca iclizquiztankaz wejtquiz yanapćħinćħucćħa. Wejrqui anćhucaquiz zuma Yooz taku paljayćħinćħa, nižaza anćhucqui wejtquiz cusasanaca tjaacan yanapćħinćħucćħa. Jalla tjapa nii zizza anćhucqui.

¹⁶ Nižaza Tesalónica wajtquiz sufrican želan, anćhucqui ofrendanaca wejtquin apayžquicħinćħucćħa, wilta wilta.

¹⁷ Wejrqui anćhuca ofrendanacquiz anal kuz tjaa-ućħa. Anćhuca ofrendanacakaz anal pecuća. Pero wejr pecuća, anćhuc arajpachquin juc'ant honorchiz cjisjapa, anćhucaž ofrendanaca tjaatiquiztan. Jalla niil pecuća.

¹⁸ Anćhucaž yanaptiquiztan juc'anti wejtquiz žejlćħa, ana iyal necesituća. Epafrodito jilaqui anćhucaž apayžquita ofrendanaca wejtquiz intirjicħićħa. Jalla nižtiquiztan wejtta jilacamaćħa. Jalla nii apayžquita ofrendanacaqui Yoozquiz tsjii zuma ulurćħiz

inzinzužtakaztača. Nizaza Yooz yujcquiziqui ančuca ofrendanacaqui tsjii zuma wilanažtakazza. Yoozqui nižtiquiztan cuntintuča.

¹⁹ Chjulorat ančucqui čjulunacquiztanami upsi cječhaja, jalla nii oraqui wejt Yoozqui ančucaquiz juc'anti yanapt'aquiča. Jesucristuž cjen Yoozqui ančucaquiz yanapt'aquiča, tjapa nižquiz zuma walinaca žejtiquiztanjama.

²⁰ Učhum Yooz Ejpžquiz wiñaya wiñaya honora tjaataj cjila. Jalla nužoj cjila.

²¹ Tsjii cjesača. Tjapa Jesucristužquin criichi jilanacžquin tsaanžinalla. Nizaza tii wejttan chica criichi jilanacaqui ančucaquin tsaanžquiča.

²² Tjapa tekžta criichi žoñinacaqui ančucaquiz tsaanžquiča. Juc'anti ančucaquiz tsaanžquiča tii Roman chawc jilirž kjuychiz criichi žoñinacaqui.

²³ Učhum Jesucristo Jiliriqui ančuca kuzquiz zumapaj yanapt'ila. Amén.

LA CARTA DEL APOSTOL SAN PABLO A LOS COLOSENSES

¹ Wejrqui Pablutĉha, anĉucaquin cjiŕŕcuĉha. Wejrqui Jesucristuŕ illta apostultĉha, Yooz pectiquiztan. Wejtĉan Timoteuŕtan tii carta cjiŕŕcĉan anĉucaquin tsaanŕcuĉha.

² Anĉucqui Colasas wajtĉiz ŕoŕinacĉucĉha, niŕaza lijitum Yooz parti ŕoŕinacĉucĉha. Anĉucqui lijitum Jesucristuŕquin kuzzizĉucĉha. Jaziqui wejtnac mazinacĉucĉha. Uĉhum Yooz Ejp anĉucaquin yanapt'ila, niŕaza zuma cuntintu kuzziz cjskatla.

PABLUZ MAYIZITAQUI

³ Wejrnacqui ĉjulorat Yoozquin parluĉhaja, uĉhum Jesucristo Jilirŕ Yooz Ejpŕquin sparaquiĉa cjiŕŕpanĉha anĉuca zuma kamĉiŕ cjen.

⁴ Anĉucqui Jesucristuŕquin kuz tjaayiŕĉucquiĉa, niŕaza parti jilanacĉtan zuma munaziŕĉucquiĉa. Jalla nuŕ zizcu, Yoozquin anĉa sparaquiŕ cjinĉha.

⁵ Jalla nuŕ zuma kamcan, anĉucqui tjewŕquiĉa, ĉjulut Yoozqui arajpachquin anĉucaltajapa zuma panŕ tjacŕaja, jalla nii. Anĉucqui nii Yooz tjacŕta kamz puntu zizzinĉucĉha, werar liwriiŕi Yooz taku nonŕcu.

⁶ Nii liwriiŕi takuqui anĉucaquiz paljaytataĉha, niŕaza tjapa kjutŕi ŕoŕinacĉquiz paljaytataĉha. Jalla nii taku paljaytiquiztan, tjapa kjutŕi ŕoŕinacaqui Yooz zuma kamaŕĉiz cjiŕŕiĉha. Niŕaza tjapa kjutŕi tsjan tsjan ŕoŕinacaqui liwriiŕi tawkquiz kuzzizza. Niŕaza tsjan tsjan anĉuca wajtĉiz ŕoŕinacaqui liwriiŕi tawkquiz zakaz kuzzizza. Zuma Yooz taku nonztiquiztanpacha tii orcama tsjan tsjan anĉucqui Yoozquin kuzzizĉucĉha. Niŕaza Yooz taku nonŕcu zumpacha zizŕi cjiŕŕinĉucĉha, Yoozqui ŕoŕinaca anĉa okŕiĉha, jalla nii.

⁷ Jalla nuŕ Epafŕas jilaqui anĉucaquin tjaajinchizakazza. Jalla niiqui uĉhumŕ pecta jilaĉha, niŕaza niiqui wejtĉan ĉica Jesucristo Jilirŕtajapa langziĉha. Niŕaza Epafŕas jilaqui Jesucristuŕquin sirwiŕiĉha.

⁸ Epafŕas jilaqui anĉuca puntu wejtnacaquiz quint'ichiĉha, jaknuŕt anĉucqui parti criĉhinacĉtan zuma munazichinĉucŕlaja, jalla nii.

⁹ Jalla nuŕ anĉuc zuma kamtiquiztan wejrnacqui anĉucaltajapa Yoozquin mayiziŕpanĉha. Anĉuca puntu nonŕcu, Yoozquin mayiziŕpanĉha, tsjan zuma kamajo. Niŕaza mayiziŕpanĉha, Yoozqui anĉuc zumpacha zizkatajo, jaknuŕt niiqui anĉuc zuma kamz munĉhaja, jalla nii. Niŕaza mayiziŕpanĉha, anĉucqui Yooz kuz zizŕi cjisjapa, niŕaza Yooz kuz intintazŕi cjisjapa.

¹⁰ Jalla nuŕ zizŕi niŕaza intintazŕi cjequiŕ niiqui, anĉucqui zuma kamaquiĉa, jaknuŕt Jesucristo Jilirŕ partir ŕoŕinacaqui kamstanŕlaja, jalla nii. Jalla nuŕ anĉucaŕ zuma kamtiquiztan, Yoozqui cuntintuŕ cjequiĉa. Niŕaza jalla nuŕ zuma kamcan, anĉucqui tjapaman walinacaŕ paaquiĉa. Niŕaza Yooz puntu juc'ant zuma zizaquiĉa.

¹¹ Jalla nuŕ anĉucqui zuma kamcan, Yooz aztan kamaquiĉa, jaknuŕt Yoozqui zuma tjapa aztanĉhalaja, jalla niŕta aztan. Yooz aztan kamcan, anĉucqui ĉjulquiztanami pasinsis kuzziz Yoozquin tjurt'aquiĉa, niŕaza sufricanami cuntintu kuzziz cjequiĉa.

¹² Niŕaza zuma kamcan, anĉucqui Yoozquin sparaquiŕpanŕ cjequiĉa. Yoozqui anĉuc tjacziĉa, arajpachquin irinsa tanzjapa. Yoozqui tjapa criĉhinacĉquin tsjii zuma irinsa tjaaquiĉa. Nii zuma irinsa anĉucaquiz zakaz tjaata cjequiĉa. Jaziqui Yoozquin anĉa sparaquiŕ cjis waquiziĉa.

¹³ Yoozqui uĉhum liwriichiĉha, jalla niŕtiquiztan uĉhumqui ana wal Satanás mantuquiz ana iya ŕejlĉha. Yoozqui uĉhum niiz pecta Majĉ Jesucristuŕ mantuquiz utĉiĉha.

¹⁴ Jesucristuŕ ticztiquiztan uĉhumqui Satanás mantuquiztan liwriitaĉha. Niŕaza Jesucristuŕ ticztiquiztan uĉhum ujnaca pertuntataĉha.

JESUCRISTUZ PUNTUQUIZTAN

¹⁵ Tii muntuquiz kamcan Yooz Majĉqui ana ĉerta Yooz Ejpŕ kuz kjanacama pakĉiĉha. Yooz Majĉqui tjappachquiztan tsjan jiliriĉha.

¹⁶ Niiz cjen tjappacha ŕejlĉha, tjapa arajpachquin ŕejlŕinacami, tjapa yokquiz ŕejlŕinacami, tjapa ĉertanacami, ana ĉertanacami, tjapa mantiŕinacami, gobiernunacami, jilirinacami, tjapa anjilanacami, tjapa zajranacami, Jesucristo Yooz Majĉ cjen, tjappacha ŕejlĉha. Niŕaza niiztajapa tjappacha paataĉha, niizquiz honora waytizjapa.

¹⁷ Jesucristuqui ŕejlĉiĉha, primerquiztanpacha, niŕaza tjapa ŕejlŕinacŕ tuquitanpacha. Niiz cjen tjappacha ŕejlĉha.

¹⁸ Nizaza Jesucristuqui Yooz partir zoñinaca mantiča. Jaknužt persun zoñž kuz persun curpu mantičaja, jalla nižta irata Jesucristuqui niž icliz zoñinaca mantiča. Niž cjen niž icliz zoñinacaqui Yooz kamañchiz cjsiča. Niča primera ticžcuqui jacatatchiqui, tjappachquiztan tsjan jiliri uchta cjisjapa.

¹⁹ Yooz Ejpžtan Yooz Majchtan tsjii kamañchizpanča.

²⁰ Nizaza Jesucristuž ticži cjen, tjappacha pertunta cjesača, yokquiz željñinacami, ana yokquiz željñinacami. Jalla nuž Yooz Ejpqui munchiča. Jesucristuž cruzquiz ch'awcta ticži cjen, Yooz Ejpžtan parti željñinacžtan zumanskattaž cjesača. Jalla nuž munchiča Yooz Ejpqui.

²¹ Tuquiqui ančhucqui Yoozquiztan yekjatača, nizaza Yooz quintratača ančuca kuzquiz. Tuqui ančhucqui ana wali pinsiñhuctača, nizaza Yooz quintra ana wali paayiñhuctača. Jalla nuž ana wali kamta cjenami Yoozqui ančhuc pertunchiča, nižtan ančhucatan wali cjisjapa.

²² Jesucristuž cjen Yooz Ejpqui ančhuc pertunchiča. Jesucristuqui ančhuc irata curpuchiz cjian, ančuca laycu ticžiča. Ančhuc laycu ticžiča, Yooz yujcquiz ančhuc ana ujchiz Yooz irata zuma kamañchiz prisintiskatzjapa. Jalla nuž Yooz yujcquiz zuma cjian anaž jecmi ančucaquiz tsjii uj tjojtunz atasacha.

²³ Jalla nuž Yoozatan ančhucatan wali cjisjapa, ultimu chekpacha Jesucristužquiz kuzzizpanča. Nizaza ančhucqui Jesucristužquiz tjurt'iñi kuzziz cjistanča, ana wira jaytistanča. Tii muntuquiz liwriñi tawk jaru kamñi cjistanča, arajpach zuma kamaña tjewžcan. Nii liwriñi taku nonzinčhucča. Nizaza nii liwriñi takuqui tjapa kjuñi tii muntuquiz paljaytatača. Nii taku paljayzjapa, wejr Pabluqui apóstol oficiuquiz uchtača.

PABLUQUI APOSTOL KAMAÑCHIZZA

²⁴ Wejt Yooz tjaata oficio cumplan, ančhucaltajapa sufruča. Jalla nuž sufrican wejrqui cuntintuča. Ančhuc zuma kamañchiz cjisjapa yanapñiz cjen, wejrqui cuntintuča. Nižtami iya sufristanča. Jalla nuž wejt curpužtan sufrican, Cristuž partir zoñinacaltajapa wejt sufrinaca cumpližinuča. Cristužquiz kuzziz cjen nižta sufruča. Cristuž partir zoñinacaqui Cristuž icliz zoñinacača.

²⁵ Wejrqui Cristuž partir zoñinacžquin sirwizjapa, apóstol oficiuquiz uchtača. Yoozqui ančhucaltajapa nii oficiuquiz wejr utčiča. Wejrqui uchtača Yooz taku zumpacha zizkatjapa,

²⁶ nizaza Yooz pinsita zizkatjapa. Jalla nii Yooz pinsitaqui tuquitanpacha chjoj-tatača. Jalla nižtiquiztan tjapa zoñinacaqui ana zizzucatača. Jazikaz Yoozqui niž pinsita zizkatchiča niž partir zoñinacžquiz.

²⁷ Yoozqui niž partir zoñinacžquiz niž tuquita chjojta pinsitaqui zizkatz munchiča. Nii pinsitaqui anča zumača ana judio zoñinacžtajapaqui. Jalla tiča nii tuquita chjojta pinsitaqui: Jesucristuqui ančuca kuzquiz željča. Jalla nižtiquiztan ančhucqui Cristužtan arajpachquin anča zuma kamaquiča. Jalla nii zuma kamaña tjewža ančhucqui.

²⁸ Jesucristuž puntu paljayuča, tjapa zoñinacžquin chiižincan, nizaza tjaajincan. Jalla nuž chiyani, Yoozqui wejr yanapča zizñi zizñi chiyajo, tjapa Jesucristužquin kuzziz zoñinaca Yooz irata zuma kamañchiz cjejajo.

²⁹ Nizaza apóstol oficiuquiz ojklaycan, anča langznuča, tjapa Cristuž tjaata aztan langznuča, tjapa jilanaca Yooz irata zuma kamañchiz cjiskatzjapa.

2

¹ Jalla nuž ančucaquin maznuča, weriž ančhucaltajapa langžta zizkatjapa. Tjapa kuztan langznuča, ančhucaltajapami, nizaza Laodicea cjiata wajtchiz zoñinacžtajapami, nizaza tjapa ana wejr cherchi criichinacžtajapami.

² Jalla nuž tjapa aztan langznuča, Yoozquin criichi zoñinacž kuzquiz zumpacha p'ekinchayta cjisjapa, nizaza tsjii kuzziz cjisjapa, nizaza porapat zuma munaziñi kuzziz cjisjapa. Nizaza langznuča, Yooz chjojta pinsita puntu zumpacha intintizkatjapa. Jalla nuž zumpacha intintazcu, ančhucqui tjurt'iñi kuzziz cjequiča. Jalla nii tuquitan chjojta Yooz pinsitaqui Cristuž puntuča. Wejrqui Cristuž puntu paljaycan langznuča.

³ Cristupankaz Yooz puntu lijituma zizñi cjiskatasacha, nizaza tjapa Yooz puntu intintazñi cjiskatasacha.

⁴ Jalla nil ančucaquiz cjiwčha, ana jakziltami ančucaquiz incallzjapa, tsjii zuma takužtakaz chiican.

⁵ Ančhucatan ana željcanami, wejt persun kuzquiz ančucaquiztan anchal cjuñznuča. Wejrqui ančuca puntu naychinča, tsjii kuzziz kamča, nizaza Jesucristužquin criiču tjurt'ichi kuzzizčhucča. Jalla nižta nayčcu wejrqui chipznuča.

⁶ Tuquiqui ančhucqui Jesucristuž puntu tjaajintan tjapa kuztan catokchinčhucča. Nuž catokžcu Jesucristuž mantuquiz cjissinčhucča, niiqui ančuca jiliri cjisjapa. Jalla nuž Jesucristuž mantuquiz tirapan kama. Nižaza nižquin tsjii kuzziz cjee.

⁷ Nekztan niž puntu tsjan tsjan zizni cjequičha, nižaza nižquin tjurt'ichi kuzziz kamaquičha. Jalla nuž ančhucqui tjaajintatača. Nižaza čhjulu watanami ančhucqui Yoozquin sparaqizpanž cjis waquizičha.

CRISTUZ CJEN EW KAMAÑA ZEJLCHA

⁸ Ančhucqui cwitazaquičha, tsjii kjutni ana chjichta cjisjapa. Yekjapanacaqui ančhuc incallskatz pecča, zuma razunanacažtakaz chiican, nižaza toscar takunacžtan chiican. Jalla nižta tawkchiz žoñinacaqui Cristuž pinsita jaru anaž čhiičha. Pero žoñiz pinsita jarukaz čhiičha. Nižaza zajranacž pinsitanac jarukaz čhiičha. Jaziqiu nižta čhiiči žoñinacžquiztan cwitazaquičha.

⁹ Cristuquii tii muntuquiz kamcan žoñž curpuchiztača. Nižta curpuchiz cjenami, Cristuquii Yoozpankazza, nižaza Yooz kamañchizpankazza.

¹⁰ Cristužtan tsjii kuzziz cjan ančhucqui Yooz kamañchizpan žejlča. Nižaza Cristučha wali pajk jiliriqiu tjapa mantiñinacžquiztanami, tjapa poderchiznacžquiztanami.

¹¹ Cristužtan tsjii kuzziz cjan, ančhucqui kuzquiz chimpata cjissinčhucča. Žoñiqui ana ančhuc chimpuchiča. Pero Jesucristuquii ančuca kuz chimpuchiča. Nii kuzquiz chimputaquii tuž cjiča: Yooz partir žoñinacača, jalla nii. Cristuquii niž partir žoñinaca uj paaz pecni kuzquiztan jaytiskatchičha.

¹² Jesucristužquin kuz tjaatiquiztan bautista cjissinčhucča. Bautistaquii tuž cjiča: Jaknužt Cristuž curpu tjatžtažlaja, jalla nižta irata ančuca tuquita ana wal kamaña tjatžtakazza. Nižaza jaknužt Jesucristuquii jacatatžcu Yooz kamaña tanžtčaja, jalla nižta irata zakaz ančhucqui Jesucristužquin kuzziz cjen Yooz kamaña tanzinčhucča. Yoozquii ticzinaca jacatatskatžjapa azzizza. Jalla nii azziz Yoozquin criižcu, Yooz kamaña tanzinčhucča, Yooz kamañchiz kamzjapa.

¹³ Tuquiqui ančhucqui ana curpuquiz chimputatača, judio žoñinacž partira cjisjapa. Ana chimpuchiz cjan, nižaza ujnaca paacan, ticzi žoñinacažtakaztača ančhucqui. Jaziqiu Cristužtan tsjii kuzziz cjen Yoozquii ančucaquiz niž ew kamaña tjaachiča. Nižaza tjapa učum ujnaca pertunchičha.

¹⁴ Uj paatiquiztan tsjii acta želatča učum quintra. Jesucristuž učum laycu ticziž cjen Yoozquii nii acta jurkatchičha, tjapa učum quintra puntuquiztan. Anulta cjisšičha, Jesucristuž cruzquiz ch'awcta ticziž cjen.

¹⁵ Cristuž cruzquiz ch'awcta ticzižquiztan, Yooz Ejpquii atipchiča tjapa anawal jilirinacami nižaza poderchiznacami. Yoozquii nii anawal azziz ispiritunaca ana azziz cjskatchičha. Kjanapacha azkatchičha, prisu tanta žoñinacažtakaz. Yoozpankazza tjap-pacha atipchiqui.

ARAJPACH KAMAÑCHIZ CJISPANCHA

¹⁶ Jalla nižtiquiztan anaž jecmi ančucaquiz uj tjojtasača, tuquita mantitanaca jaru ana kamtiquiztan. Tuquitan Yoozquii puntu puntu mantichiča, lujlz puntu, licz puntu, pijista puntu, ew jiiz puntu, jeejz tjuñi puntu, jalla nuž.

¹⁷ Tuquitan Yoozquii tjapa nii puntunaca mantichiča, Yooz kuz koloculla tjeezjapa. Pero Cristupankaz ultim werara Yooz kuz tjeeža.

¹⁸ Ančhucqui Jesucristužquin kuzziz cjen, anaž jecžquizimi ančucaquiztan arajpach premio kjankataquičha. Yekjap žoñinacaquii mit kuzziz cjenami, ana mit kuzziz tjeeža. Nižaza anjilanacžquiz rispitažo tjaajža. Nuž tjaajni žoñinacaquii anchuc incallz pecča, čhjuužta puntunaca ancha paljaycan. Ninacaquii inakaz mit kuzzizza. Ana wal pinsita jarukaz tjaajža. Nuž tjaajincan mit kuzziz cjsa.

¹⁹ Ninacaquii Cristuž Jiliržquiz ana tsjii kuzziz tjurt'ichi žejlča. Pero Cristupankazza criichinacž jiliriqiu. Niiž cjen tjapa criichinacaquii tsjan tsjan zuma kamañchiz cjisnasača. Nižaza Cristuž cjen tjapa criichi žoñinacaquii tsjan tsjii kuzziz cjisnasača. Jaknužt žoñž curpuquii, yekja yekja cjenami, tsjii curpuchizkazza, jalla nižta irata criichi žoñinacaquii, yekja yekja cjenami, tsjii kuzzizkazza.

²⁰ Ančhucqui Jesucristužquin kuzziz cjen, ujchiz žoñinacž pinsitanacžquiztan t'akzinčhucča. Nii ana wal pinsitanacžquiz ojklayz cjenpacha, ticzi žoñinacažtakaz katzinčhucča. Jalla nižtiquiztan, čkjažtiquiztan ančhucqui ujchiz žoñinacž pinsita jaru wilta kamjo? Žnižaza ninacž lii jaru ojklajjo?

²¹ Ninacž liiquii tuž cjiča: Tiinaca ana kjaržtan tanžla, nižaza tiinaca ana lujl-la, nižaza tinaca ana čjul lanžla. Jalla nuž cjiča ninacž liiqui.

²² Nii liinacaquii tii muntuquiz žejlči casus puntukazza. Nii cusasanacaquii tucuzin-naquičha. Nii liinacaquii žoñiz pinsita mantita jarukazza.

²³ Ninacž liinacaqui zizñi pinsitažtakazza. Pero ultimquiziqui inakazza. Ana azzizza, zoñinaca zuma kamñi yanapajo. Cuzturumpinaca ijzijcan mantičha, nižaza humilde kuzziztakaz mantičha, nižaza persun curpu sufriskatzjapa mantičha. Jalla nuž mantita liinacaqui zizñi pinsitažtakazza. Pero ultimquiziqui inakazza. Uj paaz pecñi kuz tjonaanaqui anaž nižta kuz ewjazi atasachha nii liinacaqui. Jaziqui ančhucqui ninacž inakaz tjaajntaqui anaž nonznaquičha.

3

¹ Ančhucqui Yooz kamañchizza. Jaknužt Jesucristuqui jacatatžcuqui Yooz kamaña wilita tanzizlaja, jalla nižta irata ančhucqui Yooz kamaña tanzinčhuccha. Jalla nižtiqiztan ančhucqui arajpach Yooz kamañquikaz kuz tjaa. Jalla nieju arajpachquin Cristo žejlčha; Yooz Ejpž žew latuquiz julzi žejlčha, mantican.

² Ujchiz žoñž kamañquiz ana kuz tjaa. Arajpach kamañquikaz kuz tjaa.

³ Ančhucqui Jesucristužquin kuz tjaachiž cjen, ančhuc tuquita ana wal kamaña ecchinčhuccha. Jaziqui ančhuc Yooz kamañaqui Yooztajapa žejlčha. Ana criichi žoñinacžtajapa ančhuc Yooz kamañaqui chjojžtažtakaz žejlčha. Ana wira intintazzucaha.

⁴ Cristuqui ančhucquiz Yooz kamaña tjaachičha. Jalla nižtiqiztan chjulorat tjapa žoñinacaqui Jesucristužquiz pajchi cječhaja, jalla nii ora zakaz ninacaqui ančhuc Yooz kamaña pajchi cjequičha. Jalla nii oraqui ančhucatan Jesucristužtan honorchiz cjequičha.

TUQUITA KAMAÑ PUNTU, JAZTA KAMAÑ PUNTU

⁵ Jalla nižtiqiztan ančhuc tuquita ana wal kamaña liwj jayta. Anaž adulteriuquiz ojklayzqui. Anačha luctak žoñiqui yekja maatak žonatan ojklayzqui. Anačha ančhuc ana wal paaz pecñi kuz jaru ojklayzqui. Anačha chjul ana walimi peczqui. Anačha yekja žoñž čhultakimi mazquzi. Jalla nuž zmaznaquiz niiqui, žoñž paata yoozquiz rispitažokazza. Jalla nii anawali paaznacquiztan liwj jayta.

⁶ Nii ana wali paañi žoñinacžquiz Yoozqui ancha casticu tjaaquičha, Yooz kuzcama ana kamtiqiztan.

⁷ Ančhucqui tuquita ana wal kamañquiz ojklaycan, nižtanacaz paa-atčha.

⁸ Jaziqui ančhucqui nii ana wal paaznaca liwj eca. Anačha zawjchi kuzziz žejlzqui. Anačha culirazzi kuzziz žejlzqui. Anačha ana wal paaz pecñi kuzziz žejlzqui. Anačha žoñž quintra ana wali taku chiziqui. Anačha ana wal tawkžtan chii chican žejlzqui.

⁹ Anačha toscar taku chiziqui. Ančhucqui tuquita ana wal kamaña ecchinčhuccha. Jalla nižtiqiztan ančhucqui nii ana wal paaznacquiz ana iya ojklayz waquizičha.

¹⁰ Ančhucqui Yooz kamañchiz cjissinčhuccha. Yoozpacha ančhucquiz Yooz kamaña tjaachičha. Nižaza ančhucqui Yooz irata zuma kamañchiz tsjan tsjan cjissa, Yooz zumpacha pajañcama.

¹¹ Yooz kamañchiz cjican, tjapa criichi žoñinacaqui Yooz yujcquiziqui tsjiikazza. Tuquita kamañanacaqui anaž walčha. Pero Cristo kamañchiz kaz walčha. Tsjii griego walja zizñi kamañami anaž walčha. Tsjii judio lii jaru kamañami anaž walčha. Tsjii curpuquiz chimpata žoñž kamañami anaž walčha. Tsjii curpuquiz ana chimpata žoñž kamañami anaž walčha. Tsjii k'ar žoñž kamañami anaž walčha. Tsjii q'uit žoñž kamañami anaž walčha. Tsjii piyunažta žoñž kamañami anaž walčha. Tsjii patrun žoñž kamañami anaž walčha. Cristuž kamañapankaz walčha. Nižaza Cristupankaz tjapa criichi žoñinacž kuzquiz žejlčha.

¹² Ančhucqui Yooz illzta žoñinacčhuccha. Jalla nižtiqiztan Yooz zuma kamañ jaru kamstančha. Yoozqui ančhucatan zuma munazičha. Yooz partir žoñinaca cjican, jalla tuž kama: Okžni kuzziz, nižaza zuma kuzziz, nižaza ana mit kuzziz, nižaza humilde kuzziz, nižaza pasinziz kuzziz, nižaza

¹³ porapat pertunasñi kuzziz. Jalla nižta kamz waquizičha. Tsjii criichi žoñiqui yekja criichi žoñž quintra quijchi cjesaž niiqui, zuma kuztan pertunz waquizičha, jaknužt Jesucristuqui ančhucquiz pertuntčhaja, jalla nuž.

¹⁴ Jalla tužučha chekanaqui, porapat zuma munazizza, jalla nii. Jalla nuž zuma munazican, zuma kuzziz zuma kamaquičha, Yooz irata zuma kamaña cumplañcama.

¹⁵ Ančhuc criichinacaqui, Cristuž cjen ančhucqui llan kuzziz cjesačha. Jaziqui llan kuzziz cjee, porapat zuma munazican zuma kamzjapa. Jalla nuž porapat zuma kamzjapa, Yoozqui ančhuc liwriichičha. Jalla nuž liwriiču, Yoozqui tjapa ančhuc criichinaca tsjii t'akquizkaz cjiskatchičha. Tsjii curpuchiztakazza ančhucqui. Jalla nižtiqiztan ančhucqui Yoozquin ancha sparaquž cjican, mayiziz waquizičha.

¹⁶ Ančhucqui Cristuž puntu zuma zizcan porapat tjaajsarasaquičha, nižaza Cristuž tawkžtan porapat p'ekinchayrasaquičha. Nižaza ančhuc kuzquiz Cristuž taku zumpacha catokz waquizičha. Nižaza Yooz takumi, Yooz wirsumi itsnaquičha, ančhuc kuzquiz Yooz ancha cjuñcan.

¹⁷ Ančhucqui Cristuž partir žoñinacčhucča. Jalla nižtiquiztan čhulu paacanamí chicanami, zuma kamañchiz kamz waquiziča. Nižaza čhulu watanami Jesucristuž cjen Yooz Ejpžquin sparaquiž cjan tjaaz waquiziča.

PORAPAT ZUMA KAMZ PUNTU

¹⁸ Maatanaca, persun luctakanacž mantuquiz cjee. Jesucristo Jiliržquin kuzziz cjan, jalla nuž waquiziča.

¹⁹ Luctakanaca, persun maatakanacžtan zuma munaziñi cjee. Nižaza anaž persun maatakanaca chjaawj chjaawjwa.

²⁰ Maatinaca, persun maa ejpžquiz casa, čhulu mantanami. Jalla nuž maa ejpž mantita casaquiz niiqui, amiž cjen Jesucristo JiliriQUI cuntintuž cjequiča.

²¹ Ejpñaca, anaž persun maatinaca žawjwa zjicna, upa kuzñi ana cjisjapa.

²² Piyunanaca, am persun patruca čhulu mantanami caspanča. Anača cherankaz c'unchikaz tuczqui. Pero tjapa kuztan nižtajapa langz waquiziča. Yooz patruca cjuñcu, zuma langz waquiziča. Anača langzqui ančhuca patruñž kuz wali cjskatzjapakaz.

²³ Čhulu langzcanami tjapa kuztan langznaquiča, Yooz Patrunžtajapa langznaquiča, ana žoñžtajapakaz langznasača.

²⁴ Ančhucqui tuž zizza, Yooz Patrunžquiztan arajpach irinsa tanznaquiča. Ultimu Yooz Patrunaqui ančhucaquiz pacaquiča. Nižaza ultimu ančhucqui Jesucristo Patrunžquiz sirwiča.

²⁵ Nižaza jakziltat ana wali paačhaja, jalla niiqui castictaž cjequiča niž ana wali paatiquiztan jama. Yoozqui ana žoñi illilla.

4

¹ Patrunanaca, ančhucqui persun piyunanacžtan zuma lijituma cjistanča. Ančhucqui tuž zizza, ančhuc zakazza Patrunchizqui. Jalla niiča arajpach Yoozqui.

² Tjapa criichinaca, ančhucqui mayizicanpan želaquiča. Nižaza Yoozquin mayizican ana tjatna, Yoozquin sparaquiž cjisjapa.

³ Wejnacaquiz zakaz mayizican yanapalla, wilta Yooz takunaca paljayñi ojklajzjapa. Cristuž puntuquiztan tuqita chjojta taku paljayz pecuča. Jalla nuž paljaytiquiztan wejrqui carsilquiz želuča.

⁴ Mayizican wejtquiz yanapalla, Cristuž puntu kjanapacha paljayzjapa, jaknužt wejrqui kjana paljayz waquizučhaja, jalla ni.

⁵ Ančhucqui ana criichinacžtan kamcan, walja zizñi zizñi ojklayaquiča. Čhulorot Cristuž puntu paljaychucažlaj niiqui, panž paljayaquiča, ana criichinacžquiz nonzkatzjapa.

⁶ Jalla nuž Yooz taku paljaycan zuma tawkžtan chiyaquiča. Jaknužt yacuqui tsjii lak'a čhjerquiz zuma saborchiz paačhaja, jalla nii irata ančhuca zuma takunacaqui Cristuž puntunaca zuma saborchiztakaz paaquiča. Jalla nuž zuma takunacžtan paljaycan, ančhucqui zapa maynižquiz jaknužt kjaaz waquizičhaja, jalla niiqui zizaquiča.

ZERZ TAKUNACA

⁷ Jilanaca, cullaquinaca, ućhum pecta Tíquico jilaqui tjapa wejt puntuquiztan ančhucaquin quint'aquiča. Tiquicuqui wejtquiz anča zuma yanapñipanča. Yoozquin tjurt'iñi kuzzizza. Nižaza wejttan chica Yooztajapa sirwichiča.

⁸ Wejt puntuquiztan quint'izjapa ančhucaquin nii cuchanžcuča. Nižaza cuchanžcuča, ančhuca kuzquiz zumpacha p'ekinchayzjapa.

⁹ Nižtan chica Onésimo pecta jila cuchanžcuča. Onésimo jilaqui Yoozquin tjurt'iñi kuzzizakazza. Nižaza ančhuca wajtchiz žoñiča. Jalla nii pucultanaqui tjapa tekz watchinaca quint'aquiča.

¹⁰ Aristarco jilaqui wejttan chica carsilquiz chawcta maziča. Niiqui ančhucaquin tsaanžquiča. Nižaza Marcos jilaqui ančhucaquin tsaanžquiča. Marcos jilaqui Barnabež famillžquiztanča. Tuquiqui wejrqui Marcos puntu ančhucaquiz čhiichinča. Marcos jilaqui ančhucaquin tjonaquiz niiqui, ančhucqui zumaž risiwaquiča.

¹¹ Nižaza Jesusaqui ančhucaquin tsaanžquiča. Jesusaqui Justo cjitazakazza. Ni-inacakazza judío criichinacžtan wejttan chica Yooztajapa langžñinacqui, Yooz mantita kamañ puntu paljaycan. Ninacaqui wejtquiz anča kuzziča.

¹² Nižaza Epafras jilaqui ančhucaquin tsaanžquiča. Epafras jilaqui Jesucristužtajapa sirwiñiča. Jalla niiqui zakaz ančhucaquiztanča. Jalla niiqui tjapa kuztan ančhucaltajapa Yoozquin mayiziñipanča, ančhucqui tjurt'ichi kuzziz cjisjapa, nižaza tjapa kuztan Yooz munañpa kamañ jaru kamzjapa.

¹³ Wejrqui Epafra pñuquiztan tclaruĉha, niiqui anĉha langziĉha anĉhucaltajapami. Niĉaza Laodicea wajtchiz criichinacĉtajapami, niĉaza Hierápolis wajtchiz criichinacĉtajapami Epafra jilaqui anĉha langziĉha.

¹⁴ Niĉaza Lucas jilaqui Demas jilĉtan anĉhucaquin tsaanzquiĉha. Lucas pecta jilaqui kullñi medicuĉha.

¹⁵ Laodicea wajtchiz criichi jilanacĉquin tsaanĉinalla. Niĉaza Ninfas jilĉquiz tsaanĉinalla. Niĉaza niĉ kjuyquiz ajcĉñi criichinacĉquiz tsaanĉinalla.

¹⁶ Tjapa anĉhucqui tii carta liiĉcu, Laodicea iclizquin apayĉcaquiĉha, nekz liyajo. Wejrqui tsjii carta cjiĉrĉinĉha Laodicea criichi jilanacĉquin. Anĉhuczakaz nii carta liyaquiĉha.

¹⁷ Anĉhucqui Arquipo jilĉquiz chiĉzinaquiĉha, tuĉ cĉjan: “Jesucristo Jiliriĉqui am tsjii puestuĉquiz utĉiĉha, niĉĉquiz sirwizjapa. Nii Jesucristuĉ tjaata puestuĉquiz ĉejlcan, zuma cumplistanĉha”.

¹⁸ Wejr Pabluĉqui persun kjarĉtan tii tsaanta letra cjiĉrĉcuĉha. Wejrqui carsilquiz zeluĉha, jalla nii cjuñzna. Yoozqui anĉhucaquiz zumaj yanapla. Jalla nuĉoj cĉjila. Amén.

PRIMERA CARTA DEL APOSTOL SAN PABLO A LOS TESALONICENSES

¹ Wejr Pabluqui, Silvanužtan, Timoteožtan, tii cartal cjiřžcučha ančhuc Tesalónica wajtchiz zoñinacžquin. Nii wajtquiz icliz zoñinacžhucčha ančhucqui. Nižaza Yooz Ejpžtan Yooz Majchtan tsjii kuzzizčhucčha. Jalla nižtiquiztan učhum Yooz Ejpžtan, nižaza učhum Jesucristo Jiliriztan ančhucquiz yanapt'ila. Nižaza zuma cuntintu kuzziz walikaj kamkatla.

JESUCRISTUŽQUIN ANCHA KUZIZ ZOÑINACA

² Wejrnacqui tjapa ančhucž cjen tirapan Yoozquin sparaquiz cjiwčha. Yoozquin mayizcan ančhucaltajapa wiltan wiltan mayizučha.

³ Učhum Yooz Ejpžquin mayizcan, cjuñžnučha ančhucž zuma Yooztajapa trabajtiqiztan. Ančhucqui Jesucristužquin kuzziz cjen Yooztajapa tjapa kuztan trabajčha. Nižaza ančhucqui zuma munaziñi kuzziz cjen, Yoozquin zuma sirwičha. Nižaza Jesucristo Jilirž tjonz tjuñi tjewzcan, zuma tjurt'iñi kuzzizčhucčha. Jalla nuž ančhucquain cjuñžcu Yooz Ejpžquin sparaquiz cjiwčha.

⁴ Jilanaca, cullaquinaca, Yooziž pectanaca, Yoozqui ančhuc illižha. Jalla nuž zizcu, wejrnacqui Yoozquin sparaquiz cjiwčha.

⁵ Wejrnacqui ančhucquain tjonžcu, liwriñi Yooz taku paljaychinčha. Anačha žoñž taku alajakaz paljaytaqui; Yooz takupančha paljaytaqui. Yooz Espiritu Santuž aztan paljaychinčha. Nižaza werar Yooz tawkquiz tjapa kuz tjurt'ican, Yooz puntu paljaychinčha. Nižaza ančhucatan kamcan jaknužt wejrnacqui kamchinžlaja, jalla nii zuma zizza ančhucqui.

⁶ Ančhuczi wejrnaca kamaña irata jalla nižta kamñi žoñi cjissinčhucčha. Nižaza Jesucristo Jilirž kamañ irata kamñi žoñi cjissinčhucčha. Nižaza ančhucqui wejrnacž paljayta Yooz taku catoktiqiztan, anča sufrichinčhucčha. Walja sufris cjenami, Espiritu Santuqui ančhucquiz cuntintu cjiskatchičha. Nižaza sufrisqui ančhucquiz wejtnacquiz irataz-kaz watchičha.

⁷ Jalla nižtiquiztan ančhuc punctuiztan zuma quintu ulanchičha tjapa criichi zoñinacžquin, Macedonia yokquin žejlñi criichi zoñinacžquinami nižaza Acaya yokquin žejlñi criichi zoñinacžquinami.

⁸ Ančhucž cjen Yooz takuqui tjapa kjutñi paljaytačha. Anačha Macedonia yokquizkaz nižaza Acaya yokquizkaz paljaytaqui. Tjapa kjutñi paljaytačha. Nižaza jaknužt ančhucqui Yoozquin kuzziz cjissinčhucčlaja, jalla nii quintu tjapa zoñinacquiz zizza. Jaziqi wejrnacqui ančhuc punctuiztan anaž iya quint'asačha.

⁹ Ninacapacha wejtnacquiz quint'iñitačha jaknužt ančhucqui wejtnacž paljayta Yooz taku catokchinčhucčlaja, jalla nii. Ančhucqui žoñiž paata yooznacquiztan zarakchinčhucčha, werar žejtñi Yooz sirwizjapa.

¹⁰ Nižaza ančhucqui Yooz Majch arajpachquiztan tjonz tjuñi tjewža. Yoozqui niž Majch ticziqiztan jacatatskatchičha. Jalla nii Jesusaqui učhum casticunacquiztan liwriichičha. Jalla nuž quint'iñitačha ančhuc punctuiztan.

2

PABLUZ YOOZ TAKU PALJAYÑI OJKTA

¹ Jilanaca, cullaquinaca, jalla tuž zizza. Wejrnacqui ana ina ančhucquiz tjonzinčha.

² Ima ančhucquiz tjoncan Filipos wajtquiz sufrichinčha, nižaza wejrqwi iñartatačha. Jalla nuž sufritaž cjenami Yoozqui wejrnaca yanapchičha, ana ekscan tjurt'iñi kuzziz Yooz zuma liwriñi taku paljayajo. Jalla nuž paljaychinčha, žoñinacž wejtnacatan quintra anča aptazanami.

³ Nižaza wejtnaca paljaytaqui anatačha chekachuc, nižaza anatačha ana zuma kuzquiztan, nižaza anatačha ančhuc incallzjapa.

⁴ Yooz Ejpqi wejrnaca tantiichičha, walikazza. Jalla nižtiquiztan Yoozqui wejtnacquiz niž zuma taku cumpjiichičha. Jalla nii Yooz takupan paljayučha wejrnacqui. Anal paljayučha žoñinacž kuz wali cjeyajo kasi. Antiz Yooz kuz wali cjeyajo paljayučha. Yoozqui učhumnaca kuz zizza, nižaza tantičičha ultimu.

⁵ Ančhucqui tuž zizza, wejrnacqui anačha zuma takunaca paljaychinčha wejtnaca partiquiz luzkatzjapa, nižaza persunalta čhulumni tanzjapa. Weraral chiyučha. Yoozakaz wejtnaca punctuiztanaqui nii zizza.

⁶ Cristuqui wejrnac apostolunaca cuchanzquichiča. Jalla nižtiquiztan wejrnacqui ančhucaquiz mantiñi cjitasača. Pero ančhuc ana mantichinča, nižaza wejrnaca honora wayt'ižiñi anal pecasuča, ančhucni yekjanacami.

⁷ Antiz wejrnacqui ančhuc zuma cwitican željchinča, jaknužt tsjaa maatak zonqui persun wawa cwitassaja, jalla nuž.

⁸ Nižaza ančhuc anča k'ayachtuča. Jalla nižtiquiztan ančhucaquiz Yooz zuma liwriñi taku paljaychinča. Nižaza ančhucaltajapa čhulu paazmi listutča wejrnacqui, ticz cjenami. Jalla nuž ančhuc pecñi cjissinča.

⁹ Jilanaca, cullaquinaca, weriž langžta cjuñzna. Majiñami weenami langzinča ochañcama, wejtnaca persun wira mantinsjapa, nižaza ančhucalta ana ch'ama cjeajajo. Jalla nuž kamchinča liwriñi Yooz taku paljaycan.

¹⁰ Nižaza ančhucatan zuma kamchinča. Yooz kuzcama kamchinča. Nižaza anaž jecmi wejtnaca quintra čhjul ujmi tjeežni atasacha. Jalla nii ančhucqui zumpacha zizza. Yooz zakaz nii zizza.

¹¹ Ančhucmi zakaz zizza, jaknužt tsjii ejpqui niiz persun maati cwitassaja, jalla nižtapacha wejrnacqui ančhuc cwitassinča. Ančhuc kuzzinča, nižaza p'ekinčaychinča, nižaza chiizchinča, ančhuc zuma kamajo.

¹² Jaknužt Yoozquin criichi žoñinacaqui zuma kamz waquizichaja, jalla nuž ančhucqui zuma kamz waquiziča. Yoozqui niizquin criichinaca utchiča nižtan chica mantizjapa, nižaza nižtan chica honorchiz cjisjapa. Jalla nižtiquiztan zuma kamz waquiziča.

¹³ Ančhucqui weriž paljayta Yooz taku nonzinčhucča, nižaza catokchinčhucča, tuž cjan: "Tii takuča ultim werar Yooz takuqui. Anača žoñž takukaz". Jalla nuž catoktikuiztan tii zuma Yooz takuqui ančhuca kuznaca tsjan tsjan zuma cjskatča. Jalla nižtikuiztan tirapan Yoozquin sparaquiž cjiwča.

¹⁴ Jilanaca, culluquinaca, ančhucqui walja sufrinčhucča ančhuca persun wajtchiz žoñinacaž ana wali paañiz cjen. Jalla nižta irata sufrichiča Judea yokquiz željñi criichinacami. Werar Yooz icliz žoñinacaž cjen nižta sufrichiča. Nižaza persun wajtchiz žoñinacaž ana wali paañiz cjen, sufrichiča. Tsjiikaz ančhucaquizimi ninaczquizimi watchiča.

¹⁵ Nii Judea yokquiz željñi judionacaqui Jesús jiliri conchiča. Nižaza niiz tuqui Yooz taku paljayñi žoñinaca conchiča. Nižaza wejrnacqui chjatkatchiča. Nižaza jalla nuž paažcu tjapa žoñinacz quintraž paacha. Jalla nuž paatiquiztan Yoozqui ninacz quintra žawjča.

¹⁶ Wejrnacqui liwriñi Yooz taku paljayz pecatuča ana judío žoñinaczquiz, ninaca liwriita cjeajajo. Nii anawali paañi žoñinacazti wejrnac atajchiča. Jalla nižtikuiztan ninacaqui juc'anti persun ujž yapkatča. Jalla nuž ujnaca yapkattiquiztan Yoozqui wiñayaž wali casticu tjonkataquiča ninaczquiz.

PABLUQUI WILTA TJONZ PECCHA

¹⁷ Jilanaca, cullaquinaca, tsjii kjažtapacha ančhucaquiztan ojkchinča. Jalla nekztan wejrnacqui ančhuc anchal cjuñznuča. Jalla nižtikuiztan ančhuc anča cherzpal pecaytuča.

¹⁸ Nižaza ančhucaquin irantisquizpan pecaytuča. Wejrnacaž ojkz pecan, Satanasaquí wejrnac atajchiča. Wejrqui wiltan wiltan ojkz cjichintača. Jalla nuž ojkz pectaž cjen, Satanasaquí wejr atajchiča.

¹⁹ Jilanaca, cullaquinaca, Jesucristuqui tjonaquiča. Nekztan niiz yujcquiziqui ančhucaž cjen cuntintul cjeeča. Ančhucaž cjen wejrnacqui tjewznača honora tanzjapa. Ančhucaž Yooz taku criichiz cjen, juc'antiž chipznača wejrnacqui.

²⁰ Chekapan ančhucqui wejtnacaquiz cuntintuž cjskatča, nižaza wejrnac honorchiz cjskatča.

3

¹ Jalla nuž ančhucaquiztan ojkžcu, anča ančhuc cjuñchinča. Jalla nekztan Timoteo učum jila cuchanzquichinča, ančhuc cheržni. Parti wejrnaczi Atenas wajtquiz ecliz cjichinča.

² Timoteuqui Yoozquin sirwiñiča, Cristuž liwriiz puntu paljaycan. Jalla nižtikuiztan Timoteuqui cuchanzquichinča ančhuc juc'anti Yoozquin tjurt'iñi kuzziz cjeajajo. Nižaza ančhucaquiz zumpacha Yoozquin criizjapa p'ekinčayajo, cuchanzquichinča.

³ Nižaza Timoteuqui ančhucaquin tjonžquichiča, ančhuca kuz ana turwayta cjisjapa pruebanacaž watchiz cjenami. Ančhucpacha zizza criichinacaqui pruebanacaquiztan sufristanča, jalla nii.

⁴ Tuquiqui ančhucatan željcan, wejrnacqui nuž mazinčinča, učum criichinaczquiz pruebanacaž tjonaquiča, cjan. Jalla nižtapacha weriž čiita taku cumplissiča.

⁵ Jalla nuž ančhucaquiz pruebanacaž watan wejrqui quintu ana zizzi atchinča. Jalla nižtiquiztan ana iya awantichinča. Nekztan Timoteo cuchanžquichinča, ančhuca Yoozquin criichi kuz, jaknužt kamčhaja, jalla nii zizjapa. Pinsichinča, “Satanás diablut ančhuc tsjii kjutñi cutiskatzcaa”, cjan pinsichinča. Ančhuc cutiskattasaž niiqui, wejnaca obra inakaz cjitasača.

⁶ Tsji kjaž majquiztan Timoteuqui quejpžquichiča Tesalónica wajtquiztan. Nižaza zuma quintunaca zjijcchiča tuž cjan: “Nii Tesalónica wajtchiz criichi zoñinacaqui ancha Yoozquin kuzzizpanča, nižaza zumaž munaziča. Nižaza ninacami učumnacž zumapanž cjuñkalča. Nižaza ninacaqui učumnacatan ancha zalz pecča, jaknužt učumqui ninacžtan ancha zalz pecčhaja, jalla nižtazakazza ninacaqui”. Jalla nuž cjan zuma quintunaca zjijcchiča ančhucaquiztan.

⁷ Jilanaca, cullaquinaca, wejrnac zakaz ancha sufrisnacami pruebanacami watuča. Jalla nuž cjenami nii ančhuca puntu zuma quint'itiquiztan wejtnaca kuzqui zuma cuntintutuča. Ančhucaž Yoozquin tjapa kuzziz cjen, ancha cuntintutuča.

⁸ Jaziqui zizzinča, ančhucqui Yoozquin tjurt'iñi kuzzizpanča. Jalla nuž zizcu wejrnacqui tsjii ew žeti tanžtažokazza.

⁹ Ančhucaž cjen Yoozquin ancha sparaquiž cjiwča. Nižaza ančhucaž cjen Yooz yujcquiz ancha cuntintuž wejrnacqui.

¹⁰ Nižaza majiñami weenami Yoozquin mayizuča ančhucatan wejtnacatan persunpacha wilta zalzjapa. Nekztan ančhucaquiz tjaajznasača juc'ant zumpacha Yoozquin kuzziz cjisjapa. Ančhuca kamaña čhjulut pjaltičhaja, jalla nii tjaajnasacha.

¹¹ Jaziqui učum Yooz Ejpžtan nižaza Jesucristo Jiliržtan, jalla ninacaqui wejrnaca irpijaal cjiwča ančhucaquiz wilta zalzjapa.

¹² Nižaza Jesucristo Jiliriqui ančhucaquiz juc'anti zuma munaziñi kuzziz cjiskatla, porapatmi nižaza tjapa zoñinacžquizimi. Jaknužt wejrnac ančhucatan zuma munazituchaja, jalla nižta irata.

¹³ Jalla nuž zuma kamtiquiztan Yoozqui ančhuca kuz juc'ant tjurt'iñi cjiskataquiča. Jalla nižtiquiztan ančhuca kuzqui Yoozquinpanž cjequiča, Yooz Ejpž yujcquiziqui ana čhjul ujchiz cjisjapa. Jalla nuž cjequiča učum Jesucristo Jilirž tjonž tjuñquiziqui. Jalla niiqui tjonaquiča niž partir zoñinacžtanpacha.

4

LUCUTJIÑI ZUMA KAMZ WAQUIZICHA

¹ Jilanaca, cullaquinaca, jaknužt zuma kamz waquizichaja Yooz cuntintu cjisjapa, jalla nuž tjaajinchinča. Nii zuma kamañ jaru kamiñchucča. Nižaza juc'anti niicama kamaquiča. Jalla nijapa ančhucaquiz chiižinuča, nižaza rocuča, Jesucristo Jilirž cuntiquiztan.

² Tuquiqui ančhucatan žejlcan, wejrnacqui Jesucristo Jilirž cuntiquiztan tjaajinchinča. Jalla nii tjaajintanaca ančhucqui zizza.

³ Yooztajapapan zuma kamajo, jalla nižtaž kamñiz pecča Yoozqui. Jalla nuž kamcan, anača adulteriu paazqui, nižaza anača tsjii luctakaqui yekja maatakžquiz pinzizqui.

⁴ Nižaza Yooztajapa kamcan, tjapa criichi zoñiqui ziz waquizicha, jaknužt criichinacaqui persun tjunatan zalz waquizichaja, nižaza zalzcu jaknužt zumapanž kamz waquizichaja, jalla nii.

⁵ Ana Yoozta kamñi zoñinacazti persun tjunatan ana zuma kamča. Yekja maatakanacžquizpankaz pinsican kamñiča. Jalla nižta irata ančhucqui anaž kamz waquizicha.

⁶ Anaž jec criichimi yekja jilž maataka kjutñi pinziz waquizicha. Nižaza yekja jilž maatakatan adulteriu paaz anaž waquizicha. Nižta paaquiz niiqui, jilž quintra uj paača. Jalla nuž ana zuma kamñinaca casticaquiča Yoozqui. Jalla nuž tuquiqui wejrnacqui ančhucaquiz chiižinchinča.

⁷ Yoozqui učumnaca kjawziča niž partiquiz cjisjapa, nižaza zuma kamajo, ana yekja kjutñi cjičeyajo.

⁸ Jalla nii tjaajintaqui anaž zoñž kuzquiztan tjonča, Yooz kuzquiztanpan tjonchiča. Jalla nižtiquiztan jequit nii tjaajinta taku ana pajčhaja, niiqui Yooz ana pajča. Yoozqui ančhuca kuzquiz niž Espíritu Santo luzkatchiča ančhuc zuma kamajo.

⁹ Tsjiilla wejr cjiwča, criichi jilanacžtan zuma munaziz puntuquiztan. Jalla nižta puntuquiztan Yoozqui ančhucaquiz tjaajinchinča porapat zuma munazizjapa. Jalla nižtiquiztan wejrnacqui ančhucaquiz nii puntuquiztan ana ancha cjiirača.

¹⁰ Jalla nuž zuma munaziñhuc̄cha tjapa Macedonia yokquiz kam̄ni criichinac̄ztan. Jilanaca, cullaquinaca, wejrnac̄qui an̄huc̄ chiizinūcha, an̄huc̄a kuz juc'anti munaziñi cjisla, jalla nuž cjiw̄cha.

¹¹ Nižaza an̄huc̄qui zuma llan kuzziz cjee. Yekja zoñž asuntuquiz anapan mitiz waquzičha. Pero persun kamañ wirquiz kuz tjaasa. Nižaza persun kjaržtan langznaquičha. Tuquiqui nuž an̄huc̄aquiz mantichin̄ča.

¹² Jalla nuž an̄huc̄ zuma langztiquiztan ana criichi zoñinacaqui an̄huc̄ rispitaquičha. Nižaza an̄huc̄aquizpacha ana čjulumi pjaltaquičha.

JESUCRISTUQUI WILTA TJONAQUICHA

¹³ Jilanaca, cullaquinaca, wejrnac̄qui an̄huc̄aquiz ticzi zoñinac̄ž puntuquiztan tjaajinz pecūcha, ana ancha llaquita cjeajajo. Ana jacatatz wira tjewzñi zoñinacaqui llaquzičha tsjii ticzi cjenac̄qui. Ana nižta cjeajajo, an̄huc̄aquiz tjaajinz pecūcha.

¹⁴ Učhumqui criichin̄chum̄ča, Jesucristuqui ticziquiztan jacatatchičha, jalla nii. Nižaza criichin̄chum̄ča, Yoozqui Jesucristužquin criichi ticzinaca jacatatskataquičha. Nižaza ninaca Jesucristužtan chica tjonkatta cjequičha.

¹⁵ Nižaza tii Jesucristo Jiliriz tjaajinta taku an̄huc̄aquiz tjaachin̄ča. Jesucristo Jiliriz tjonz tjuñquiziqui primiraqui ticzi criichi jilanacaqui nižtan zalaquičha. Nekztan tii yokviz žejtchi criichinacaqui tsewc̄huc̄ chjitžtakaz cjequičha, Jesucristužtan zalzjapa.

¹⁶ Učhum Jesucristo Jiliripacha tsewc̄ arajpachquiztan chjiw̄zcaquičha. Nii orapacha criichinaca kjawznaquičha mantiñi joržtan. Nižaza tsjii pajk jilir arc anjilaqui kjawznaquičha. Nižaza Yooz trompeta tjawunznaquičha. Jalla nekztan Cristužquin ticzi criichinacaqui jacatatskattaž cjequičha.

¹⁷ Tii muntuquiz žejtchi criichinac̄ž tuqui jacatatskattaž cjequičha. Nii ticzi criichinac̄ž jacatatskattiquiztan parti criichinacaqui ninac̄ztan juntupacha chjitžtakaz cjequičha. Nekztan tsewc̄huc̄ tsjir taypiquiz Jesucristo Jiliržtan zalaquičha. Jalla nekztanaqui tjapa criichinacaqui tirapanž Jesucristo Jiliržtan wiñaya kamaquičha.

¹⁸ Jalla nii zizcu, nii takunac̄ztan porapat kuzasnaquičha.

5

¹ Jilanaca, cullaquinaca, čjulorat Jesucristuqui quejp̄cačhaja, nižaza ima niž quejp̄zcan čjulut watačhaja, jalla nii pizc puntuquiztan an̄huc̄aquiz ana anchal cjiirūcha.

² An̄huc̄qui nii pizc puntu zumpacha zizza, Jesucristo Jiliriqui tiripintitž tjonzcaquičha. Zoñinac̄ž ana čjulu pinsita, tiripintit tsjii tjañiqui luzza. Jalla nižtaž cjequičha Jesucristo Jiliriz tjonzqui.

³ Ana criichi zoñinac̄ž “Walikal kamok” cjenpan, nižaza cuntintu želan, tiripintit Yoozqui ninac̄žquiz tsucnaquičha casticž tjuñžtan. Jaknužut tsjaa ic maatak žon tiripintit laaquičhaja majtsjapa, jalla nižtaž tiripintit ana criichi zoñinacaqui castictapanž cjequičha. Nii casticž tjuñquiztan ana atipa ataquičha.

⁴ Jilanaca, cullaquinaca, ana criichinacaqui zumchiquiz kam̄ča. An̄huc̄zti anaž zumchiquiz kam̄ča. Jalla nižtiquiztan Jesucristuž tjonzqui anaž an̄huc̄ tsucnaquičha tsjii tjañitakaz.

⁵ Tjapa an̄huc̄qui Yooz zuma kjañ jiczquiz kamiñhuc̄ča, anaž zumchiquiz kamiñhuc̄ča.

⁶ Jalla nižtiquiztan Jesucristo Jiliriz tjonz tjuñi an̄huc̄qui listu tjaczzi zuma kuzziz tjewznaquičha. Zuma kamcan, listupachaž tjewžna, ana tjaatažokaz. Ana criichi zoñinacaqui ana juvyz paača Jesucristo tjonz tjuñi puntuquiztan. Ana nižta cjee. Jesucristuž tjonz tjuñi zuma listuž tjewžna, tjaji watsi kuzzitakaz. Nižaza zuma kamzjapa persun wira cwitasa.

⁷ Weenqui zoñinacaqui panž tjačha. Nižaza weenqui zoñinacaqui lic̄ča, panž lic̄ča. Jalla nuž paacan, ana iya čjulumi pinsičha. Jalla nižtačha ana criichi zoñinacaqui. Jesucristuž tjonz puntuquiztan ana juvyz paača.

⁸ An̄huc̄qui ana nižta cjee. Učhumnacaqui Yooz kjan jiczquiz kamiñhuc̄ča. Jalla nižtiquiztan persun kuz zuma Yooz jiczquiz kamzjapa, cwitasa. Yoozquin tjapa kuztan cjee, Yooz an̄huc̄ Satanasquiztan tsijtsinajo. Nižaza criichi zoñinac̄žtan zuma munaziza. Nižaza an̄huc̄qui liwriiz tjuñi zuma listuž tjewžnaquičha. Jalla nuž kaman armichiztakaz cjequičha. Jalla nižtiquiztan Satanasqui an̄huc̄ ana atipasačha.

⁹ Yoozqui učumnaca ana utchičha casticta cjisjapa. Pero Yoozqui učumnaca utchičha, zuma liwriita wira tanzjapa Jesucristo Jilirž cjenac̄qui.

¹⁰ Jesucristuqui učum laycu ticzičha, žejtchi criichinacami ticzi criichinacami nižtan chica cuntintu kamajo.

¹¹ Jalla nižtiqiztan porapat p'ekinchayrasaquiča, tjurt'iñi kuzziz cjisjapa. Nižaza porapat yanaparasaquiča, zuma kamañchiz kamzjapa. Anziqiu ančhucqui porapat yanapassa. Jalla nuž tirapan porapat yanaparasaquiča.

PABLUZ CHIIZINTA TAKUNACA

¹² Jilanaca, cullaquinaca, ančhucatan Yooz taku paljayñi zoñinaca žejlča. Jalla ninacžquiz rispitaquiča. Nižaza ančhuca irpiñinacžquiz rispitaquiča. Nižaza ančhucaquiz zuma tawkžtan chiižini zoñinacžquiz rispitaquiča. Yooz Jiliriz uchtaž cjen nii zoñinacž mantuquiz žejlča ančhucqui. Jalla ninacžquiz rispitažo rocuča.

¹³ Ančhucqui tjapa nii zoñinacami ancha rispitaquiča ninacaž Yooztajapa langztiqiztan. Ninacžtan zuma munazaquiča. Nižaza ančhucqui porapat zumapanž kamaquiča.

¹⁴ Jilanaca, cullaquinaca, ančhucaquiz chiižinžcuča, jayrazñi criichinacžquiz zumpacha trabajjapa chiižinajo, nižaza ururñi kuzziz criichinaca tjup kuzziz cjejajo, nižaza llajllasñi kuzziz criichinaca tjurt'iñi kuzziz cjiskatajo. Nižaza tjapa criichinacžtanami pasinziz kuzziz cjee.

¹⁵ Tsjii zoñiqui ana wali paatan tsjiizuñiqui ana nižta ayni tjepunz waquiziča. Antiz zuma munaziz waquiziča porapatmi nižaza tjapa zoñinacžtanami.

¹⁶ Chjulu watanami cuntintuž cjee.

¹⁷ Yoozquin tirapanž mayiza.

¹⁸ Chjulu watanami Yoozquin sparaquiča cjee. Jalla nuž ančhucalta Yooz munča ančhucqui Jesucristužquin kuz tjaachiž cjen.

¹⁹ Espiritu Santuž obra tjeeznan, ana nii ataja.

²⁰ Nižaza Yooz taku paljayñi zoñinaca ana iñara.

²¹ Antiz nii paljayñi zoñinacž taku zumpacha tantiya, werar Yooz taku ana werar Yooz taku, jalla nii. Zuma Yooz takuž cjenacqui, kuzquiz nii taku catokaquiča.

²² Ultimu ana werar Yooz taku cjequizñi niqiu, nii taku ana catokaquiča. Chjul ujmi nižaza anawalinacami anapan paa.

²³ Učhum Yoozza cuntintu kuzziz cjiskatñiqui. Jalla nii učhum Yooz ančhucaquiz niž kuzcamapankaj kamkatla. Nižaza Yoozqui ančhuca kuzmi, animumi, janchi curpumi zumapaj cwitila ana tsjii uj cjejajo, Jesucristo Jiliriz tjonzcama.

²⁴ Yoozqui ančhuc kjawziča niž partiquiz cjisjapa. Yoozza niž taku panž cumpliñiqui.

²⁵ Jilanaca, cullaquinaca, oracionžtan yanapžcalla.

²⁶ Tjapa criichi jilanacžquiz zuma tsaanaquiča, jaknužt ančhuca tsaanz cuzturumpi žejlčhaja, jalla nuž.

²⁷ Wejrqui ančhucaquiz tjiinuča, tii carta tjapa criichi jilanacžquiz liižinaquiča, jalla nuž.

²⁸ Učhum Jesucristo Jiliriqui ančhucaquiz yanapt'ila. Nužukazza tii cartaqui. Amén.

SEGUNDA CARTA DEL APOSTOL SAN PABLO A LOS TESALONICENSES

¹ Wejrnacqui Pablužtan, Silvanužtan, Timoteužtan tii cartal cjiřzčuča ančhuc Tesalónica wajtchiz žoñinacžquin. Nii wajtquiz icliz žoñinacčhucča. Nižaza učhumča Yooz Ejpžquinami Jesucristo Jiliržquinami kuzzizquiz.

² Jalla nižtiquiztan Yooz Ejpžtan nižaza Jesucristo Jiliržtan ančhucquiz zumaj yanapt'ila. Nižaza walikaj kamkatla. Nižaza zuma contento kuzziz cjiskatla.

CRIICHI ŽOÑINACAQUI SUFRISTANCHA

³ Jilanaca, cullaquinaca, wejrnacqui ančhucž zuma kamtiquiztan tirapan Yoozquin sparaquiz cjiwča. Jalla nužupan chiž waquizuča. Ančhucqui juc'anti juc'anti Yoozquin kuzziz cjissa, nižaza juc'anti juc'anti porapat zuma munaziñi kuzziz cjissa.

⁴ Nižaza ančhucž zuma kamtiquiztan wejrnacqui ančhuc honoratlaruča Yooz iclinanacquinami. Ančhucqui walja sufricanami, nižaza žoñinacž chjaawjkatta cjenami awantichinčhucča. Ančhucča pasinziz kuztan Yoozquin tira tjurt'iñchucqui. Nižaza Yoozquinča tjapa kuztan tira žejlžqui.

⁵ Jaziqui ančhucqui Yooz partirquiz cjen sufriskattatča. Jalla nižta sufritaqui kjanapacha tježa, Yooz Ejpžtan ančhucjapa tantiichiča, ančhucqui Yooz arajpach wajtquin luzkatz waquiziča, jalla nii.

⁶ Yoozqui nii ančhucquiz chjaawjkatñi žoñinaca legali casticaquiča. Anziqui ninacaqui ančhucquiz sufriskatča. Ultimquiziqui Yoozqui ninacžquiz sufriskataquiča.

⁷ Nižaza ančhucž sufritiqiztan Yoozqui ančhucquiz jeejskataquiča Jesucristo Jilirž tjonz tjuñquiziqui. Nižaza wejtnacaquiz jeejskataquiča. Tsewc arajpachquiztan Jesucristuqui niž walja azziz anjilanacžtan jecžcaquiča.

⁸ Tsjii ujžtakaz kjakaquiča. Jalla nii uj irata ana Yooz pajñinacž quintra cjequiča. Ninacaqui castictaž cjequiča. Nižaza jakziltat učhum Jesucristo Jilirž zuma liwriñi taku ana cazzit cječhaja, jalla ninacami castictaž cjequiča.

⁹ Jalla tjapa nii casticta žoñinacami wiñayaž sufraquiča. Yooz yujcquiztanaqui wiñayaž chjatkattaž cjequiča. Arajpachquin Yoozqui niž zuma azi tjeznaquiča. Pero nii casticta žoñinacaqui Yooz zumanaca anaž cheraquiča.

¹⁰ Jalla nii Jesucristo Jilirž tjonz tjuñquiziqui, Yooz partir žoñinacami nižquin honora waytazaquiča. Ančhucqui wejrnacž paljajta Yooz taku catokchinčhucča. Nižaza Jesucristuž tjonz cheržcu, Yooz taku catokchinacaqui ispanitichi cjequiča. Pero contintuž cjequiča.

¹¹ Wejrnacqui tirapan Yoozquin mayizuča ančhucaltajapa, ančhuc ultimu liwriita cjeajajo. Yoozqui ančhucquiz kjawziča nižta ultimu liwriita cjeajajo. Jaziqui Yoozqui ančhucquiz liwriita cjis waquizkataquiča. Jalla nuž mayizuča. Yoozqui niž aztan ančhucž zuma pinsitanacami cumplista cjiskataquiča. Jalla nuž zakaz mayizuča. Nižaza Yoozquin kuzziz cjen, ančhucqui zuma obranaca paača. Yoozqui niž aztan tjapa ančhuc zuma obranaca cumplista cjiskataquiča. Jalla nuž zakaz mayizuča.

¹² Jalla nekztanaqui ančhucž zuma kamčiž cjen Jesucristo Jiliriqui honorchiz cjequiča. Nižaza Jesucristuž cjen ančhucqui honorchiz zakaz cjequiča. Tjapa nižtanaca wataquiča učhum Yooz Ejpžtan Jesucristo Jiliržtan učhumnacaquiz okžñiž cjen, nižaza yanapchiz cjen.

2

ANA WALI PAAÑI ŽOÑŽ PUNTU

¹ Jilanaca, cullaquinaca, učhum Jesucristo Jilirž tjontanaqui, učhumqui juntjapz-naquiča, nižtan zalzjapa. Jalla nii puntuquiztan ančhucquiz intintiskatz pecuča.

² Yekjap žoñinacaqui ančhucquiz incallžkatz pecča, "Jesucristuqui tjonchikalča" cjan. Jalla nižta chiita taku nonžcu, anaž ančhucqui tsuca. Nii takunaca ana juyzu paa. Nižaza anaž kuz turwayskata. Ninacaqui cjiča, "Yoozqui Pablužquiz nii taku tjaachiquiča. Nekztan Pablupacha wejtquiz quint'ichiča, 'Jesucristuqui tjonchikalča', jalla nii. Nižaza Pabluqui nuž tsjii cartiquiz cjiřrechiča". Jalla nuž cjiča nii toscara chiiñi žoñinacaqui. Jalla nižta chiita taku nonžcu, ana criyaquiča.

³ Ana jaknužumi nii Jesucristuž tjonz puntuquiztanami incallta cjee. Ima Jesucristuž tjonan, walja žoñinacaqui juc'ant Yooz quintra cjistanča. Nižaza tsjii juc'ant ana wal žoñiqui jecžcaquiča. Wiruñiqui nii žoñiqui wiñaya casticta cjequiča.

⁴ Jalla niiqui čhjul yooznacqiztanami juc'ant tučquin cjis pecaquičha. Nižaza ultim werar Yooz quintrami, nižaza žoñiž paata yooz quintrami aptasaquičha. Nižaza tjapa tii muntuquiz amtitanaca quintra aptasaquičha. Nižaza nii ana wal žoñiqui, "Wejrtčha chekan Yooztqui" cjequičha. Werar Yooz timpluquinpankaz julznaquičha Yooztakaz.

⁵ Ančhucatan žejlcan, jalla nižtapan paljayčhinča. ¿Ana cjuñž ančhucjo?

⁶ Tii zakaz nonžna ančhucqui. Nii juc'ant ana wali paañiqui atajtačha. Wiruñaquí Yooziž pinsita timpu niiqui parizaquičha.

⁷ Anziquí ana wali paañinaca žejlčha. Nižaza ana walinaca paačha. Nii ana walinaca paañinaca atajtačha, čhjul ana walimi ana paajo. Wiruñaquí nii atajñiquí ana iya atajaquičha. Nekztan čhjul ana walimi paata cjesačha.

⁸ Jalla nii ana atajanaquí nekztan nii juc'ant ana wali paañiquí jecžcaquičha. Nekztanaquí Jesucristo Jiliriquí tjonžcu, persun tawkžtan nii ana wali paañi conaquičha. Nižaza walja aztan tjonžcu nii ana wali paañi liwj akznaquičha Jesucristo Jiliriquí.

⁹ Satanás cjita diablucqui nii juc'ant ana wali paañi žoñi jecskataquičha. Nižaza Satanás aztan ispančhuc milajrunacami siñalacami paaquičha žoñinacžquiz incallžjapa.

¹⁰ Niiž ana wal kuzcama kamcan tjapaman milajrunaca paaquičha, nižaza tjapaman takunaca parlaquičha, incallžjapa. Jalla nuž ojklajcan incallaquičha infernuquín ojkní žoñinacžquiz. Jalla nii žoñinacaquí Yooz werar taku ana catokž pecchičha, liwriita cjisjapaquí.

¹¹ Jalla nižtiquiztan Yoozquí ninaca jakjurpaychičha, incallta cjeyajajo werar Yooz taku ana criiñiž cjen. Nižaza nii ana liwriita žoñinacaquí toscar takupan criyaquičha.

¹² Ninacačha ana wali paatanacapankaz juztasñiquí, jalla nižtiquiztan tjapa nii Yooz taku ana criičhi žoñinacaquí casticaž cjequičha.

ILLZTA ŽOÑINACAQUI LIWRIITA CJEQUICHA

¹³ Yooz k'ayi jilanaca, cullaquinaca, wejrnacqui ančhucaž cjen tirapan Yoozquin sparaquiž cjistančha. Tuquí timpuquiztanpacha Yoozquí ančhuc illzipančha liwriita cjisjapa. Nižaza ultimupan liwriitaž cjequičha Espiritu Santuž cjen, nižaza werar taku criičiž cjen. Nii Espiritu Santuquí ančhucaquiz anča zuma yanapčha, ančhuca kuz ultimú zumapankaz cjisjapa.

¹⁴ Jalla niijapa Yoozquí ančhuc kjawzičha. Wejrnacaž zuma liwriičhi Yooz taku paljaytaž cjen, Yoozquí ančhuc kjawzičha, Jesucristo Jiliržtan ančhucquí zuma honorčhiz cjisjapa.

¹⁵ Jaziquí jilanaca, cullaquinaca, tirapan tjurt'iñi kuzziz cjee. Wejrnacqui ančhucaquiz tjaajinčhinča, čhiita takunacžtanami nižaza cjiirta takunacžtanami. Jalla nii tjaajinta takunaca anapan tjatzna. Nii tjaajinta jaru panž kama.

¹⁶ Učhum Yooz Ejpquí učhumnaca okzičha, nižaza niičha wiñayjapa cuntintu cjskatñi. Nižaza učhumnaca okžcan, ančhucaquiz tjewskatčha, arajpachquin nižtanpan zuma kamz, jalla nii.

¹⁷ Yooz Ejpžtan učhum Jesucristo Jiliržtan, jalla ninacapacha ančhuca kuznaca p'ekinchayaquičha. Nižaza ninacaquí ančhucaquiz juc'ant tjurt'iñi kuzziz cjskataquičha tjapaman walinaca paajo, nižaza tjapaman wali takunaca parlajo. Jalla nuž ančhucaltajapa mayizučha.

3

¹ Jilanaca, cullaquinaca, tiicamakal čhižinačha. Wejtnacalta Yoozquin mayiza, Yooz taku tjapa kjutñi paljayta, nižaza mayiza nii paljayta Yooz taku tjapa kuztan catokta cjeyajajo. Jalla nižta ančhucquí Yooz taku catokčhinčhucčha.

² Nižaza Yoozquin mayiza, ana wal kuzziz žoñinacžquiztan wejrnac tsjitsinajo. Yekjap žoñinacaquí anačha Yoozquin kuzziz.

³ Jesucristo Jiliričha cumpliñiquí. Jalla nižtiquiztan niiquí ančhuca tjurt'iñi kuzziz chejlnaquičha, nižaza anawalinacquiztanž zumapanž cwitaquičha.

⁴ Ančhucaž Yooz Jiliržquin kuzziz cjen, wejrnacqui tantiichinčha, ančhucquí wejrnacaž mantitacama kamiñchucčha, nižaza niicama tira kamcan želaquičha, jalla nii. Jalla nužupan cjequičha.

⁵ Jesucristo Jiliriquí ančhuca kuz irpila, Yooz irata jilnacžtan zuma munazajajo, nižaza Jesucristuž irata pasinziz kuzziz cjeyajajo. Jalla nuž mayizučha.

ANA JAYRAZCU LANGZ WAQUIZICHA

⁶ Jilanaca, cullaquinaca, Jesucristo Jilirž tjuuquiz ančhucaquiz mantučha. Jayrazñi jilnacžquiztan zaraqauičha. Jalla ninacaquí wejrnacaž tjaajintacama ana kamčha.

⁷ Jaknužt wejrnacqui kamučhaja, jalla niicama ančhucalaquí kamsa. Wejtnacaž kamaña yatekaza. Wejrnacqui ančhucatan žejlcan walja langzinčha.

⁸ Nižaza kjayžcu t'antami čhjerimi lujlchinča. Majiñami weenami walja langzniñča ochañcama, ančhucalta ana ch'ama cjejajo.

⁹ Ančhucaltan žejlcanaqui wejrnačqui ančhucaquiztan čhjeri mayiñ cjichuca cjitasacha. Ultimquiz anal maychinča. Antiz langzinča, tsjii kamaña tjeezjapa. Jalla niwjctanaqui tsjii zuma kamaña tjeez pecchinča, ančhucqui nii kamañquiz jaru kamzjapa. Jakziltat lujlz pecchaja, langz waquiziča.

¹⁰ Ančhucatan žejlcan, chiižinčinča. “Jakziltat ana langz pecchaja, jalla niiqui anaž lujlz waquiziča yejkž čhjerquiztan”.

¹¹ Pero tsjii quintu nonzinča. Yekjap ančhucaquiztan ana langžcu kamñiquiča. Ana langžcu, ana persun luraña paažcu, jayrazcan yekja žoñž asuntunacquiz mitisñiquiča.

¹² Jalla nižta žejlñi žoñinacžquiz mantuča ana nižta cjsjapa. Učhum Jesucristo Jilirž tjuuquiz ninacžquiz chiižinuča, zuma kuzziz nižaza ana mitisñi kuzziz langznaquiča persun wira mantinzjapa, jalla nii.

¹³ Jilanaca, cullaquinaca, zuma paazjapa anaž očhlla.

¹⁴ Jakziltat tii weriž cartiquiz cjiřta taku anapanž catokz pecchaja, jalla nii zumpacha cheraquiča, jecchalaj nii. Nižta žoñžquinaqui anapanča tjonzqui, nižaza anapanča niižtan ojklayzqui, nii žoñipacha azajo niž anawal kamañquiztan.

¹⁵ Anaza niižjapa quindra cjee, antiz nii criichi jilžquiz zuma tawkžtan chiižina.

¹⁶ Jesucristo Jiliriča cuntintu kuzziz cjiskatñiqui. Jalla nii zakaz ančhuca kuz walikaj cjiskatla zapurumi nižaza čhjulju cjenami. Nižaza Jesucristo Jiliriqi ančhucatan chicapachaj kamla.

¹⁷ Wejrqui Pablutča. Anziqi tii ančhucaquin tsaanz letranaca persun kjaržtan cjiřžcuča. Jalla nužupan zapa cartiquiz wejt firmapan firmuča.

¹⁸ Učhum Jesucristo Jiliriqi tjapa ančhucaquiz zumaj yanapla. Nužukazza. Amén.

PRIMERA CARTA DEL APOSTOL SAN PABLO A TIMOTEO

¹ Wejrtĉha Pablutqui. Timoteo jila, amquin tii cartal cjiyrzcuĉha. Jesucristuĉ illzta apostultĉha wejrqui. Jalla nii ap6stol puestuquin uĉhum Liwriiĉni Yooz Ejpqui Jesucristo Jilirzĉtanpacha wejr utĉiĉha. Jesucristo Jilirizĉ tjonz tjuĉni tjewza uĉhumqui.

² Timoteo jila, amquin tii cartal cjiyrzcuĉha. Werizĉ Yooz taku paljaytaĉ cjen amqui tjapa kuztan Yoozquin criĉhamĉha. Jaziĉqui wejt maati cuntamĉha. Amĉha lijitum criĉchi zoĉniĉqui. Yooz Ejpzĉtan uĉhum Jesucristo Jilirzĉtan amquiz zumaj yanapla, niĉzaza amquiz okzla, niĉzaza walikaj kamkatla.

ANA WALI TJAAJININACA TJONAQUICHA

³ Tuĉiqui ima Macedonia yokquin ojkan wejrqui amquiz rocĉinĉha, Efeso waĉtquin zelajo. Anziĉqui wilta rocĉha niĉju tiraka zelajo. Jalla niĉju zejĉlan, amqui tsjii zoĉniĉnacĉquiz chiiĉzinĉ waquiziĉha. Jalla ninacĉquiz amqui mantaquĉiĉha, Yooz taku ana iya tsjii kjutĉni tjaajnaĉjo.

⁴ Niĉzaza mantaquĉiĉha zoĉniĉz pinsita quintunacĉquizimi ana kuz tjaajo. Niĉzaza tuĉuita atĉi ejpnacĉz tjuunac puntuquizimi anapanĉha niĉcĉhuĉqui kuz tjaazqui. Jalla nuĉz amqui mantaquĉiĉha. Jalla niĉzta parlanacaqui panĉz inakazza, kuznaca turwayskatĉni alajaĉha. Niĉzta parlanacaqui anapanĉz uĉhumnacaquiz yanapĉha, Yooziĉz tjaata kamaĉniquiz juc'ant zuma kamajo. Yooz kamaĉniquiz kamcan, Yoozquin kuzziz cjiĉjiĉni, jalla niĉz walĉha.

⁵ Jalla nuĉz wejrqui mantuĉha, criĉchi zoĉniĉnacĉz porapat zuma munazajo. Zuma kuzzizpan, niĉzaza ana ĉjul ujmi cjuĉnĉzcu, zuma munaziz waquiziĉha. Niĉzaza tjapa kuztan Yoozquin criĉcan, jalla niĉzta kuzziz zoĉniĉnacĉqui zuma munaziz waquiziĉha.

⁶ Jalla niĉzta zuma kamaĉniquiztan tsjii zoĉniĉnacĉqui chekachuc ojĉkĉiĉha. Jaziĉqui parleeka parlis pecĉiĉha, ana ĉjulquiz waquiziĉni.

⁷ Niĉzaza walja zizĉni Moisisĉ lli tjaajiĉni cjis pecĉha. Ninacazti tjaajinĉzcupacha, persuna chiĉta ana intintassa. Niĉzaza "Tuĉupanĉha werar razunaqui" cĉiscupacha, ana panĉz niĉz persuna tjaajintaqui intintazasaĉha.

⁸ Yooziĉz Moisesquiz tjaata liinacaqui zumaĉha, Yooz kuz jaru lijituma tjaajintaĉz niĉqui.

⁹ Niĉzaza lli puntuqui tuĉuĉha: Moisisĉ liinacaqui anataĉha ut'ayta zuma kamĉni zoĉniĉnacĉztaĉjapa. Antiz ana zuma kamĉni zoĉniĉnacĉztaĉjapa ut'aytataĉha. Zuma paaznaca ana juyzu paaĉni zoĉniĉnacĉza, niĉzaza Yooz kuzcama ana kamĉni zoĉniĉnacĉza, niĉzaza ana Yooz sirwiĉnacĉza, niĉzaza uj paaĉniĉnacĉza, niĉzaza Yooz kamaĉniquiz ana pecĉniĉnacĉza, niĉzaza ana Yooz rispitiĉnacĉza, niĉzaza persun maa ejp conĉniĉnacĉza, niĉzaza zoĉni conĉniĉnacĉza,

¹⁰ niĉzaza adulteriuquiz ojĉklayĉni zoĉniĉnacĉza, niĉzaza luctakpora ana wali paasĉniĉnacĉza, niĉzaza zoĉni tanĉniĉnacĉza, niĉzaza toscara chiiĉniĉnacĉza, niĉzaza toscar juramentuĉzĉtan chiiĉniĉnacĉza, niĉzaza tjapa zuma tjaajintanacĉz quintra paaĉniĉnacĉza, jalla ninacĉza ut'aytataĉha Moisisĉ liinacaqui.

¹¹ Zuma tjaajintanacaqui zuma liwriiĉni Yooz tawk jaruĉha. Yooz takuqui azzizza, zoĉniĉnacĉ liwriiĉzjapa. Walja zuma Yoozqui wejtquiz nii liwriiĉni taku zizkatchiĉha, niĉzaza wejtquiz cumpjiĉiĉha, zoĉniĉnacĉquiz paljayajo.

JESUCRISTUQUI PABLUZQUIZ ANCHA OKZICHA

¹² Yooz taku paljayajo, Jesucristo Jiliriqui wejtquiz yanapĉiĉha. Jalla niĉztiĉquiztan Jesucristuĉzquin sparaquĉiz cjiwĉha. Jesucristuĉqui wejr cumpliĉnipan cherziĉha. Jalla niĉztiĉquiztan ap6stol puestuquiz wejr utĉiĉha nii sirwajo.

¹³ Tuĉiqui wejrqui Jesucristuĉz quintra chiiĉntaĉha, niĉzaza niĉz quintra iĉnariĉntaĉha. Niĉzaza Jesucristuĉzquin criĉchi zoĉniĉnacĉz quintra payiĉntaĉha. Jalla nuĉz paanami niĉzaza chiyamani, Yoozqui wejtquiz okziĉha. Ima Jesucristuĉzquin criĉcan, jalla nuĉz ana wali ojĉklayĉchintaĉha ana ultim werara zizcu. Jalla niĉztiĉquiztan Yoozqui wejtquiz anĉha okziĉha.

¹⁴ Uĉhum Yooz Jiliriqui wejtquiz walja zuma okziĉha. Jaziĉqui Jesucristuĉz cjen, Yoozquin tjapa kuztan cĉjissinĉha wejrqui, niĉzaza Yooztan anĉha munaziĉni kuzziz cĉjissinĉha.

¹⁵ Jesucristuĉqui tii muntuquiz tjonĉiĉha, ujĉhiz zoĉniĉnacĉ liwriyi. Jalla nii takuĉha ultim razunaqui. Niĉzaza tjappachaqui nii taku catokz waquiziĉha. Tjapa ujĉhiz zoĉniĉnacĉzquiztan wejrtĉha juc'ant ujĉhiztqui cjiwĉha.

¹⁶ Jalla nuĉz cjenami, Yoozqui wejr zumapan okziĉha, Jesucristuĉz zuma pasinziz kuz tjeezjapa. Werizĉ cjen, tjappacha zizaquĉiĉha, Jesucristo anĉha zuma pasinziz kuzziz, jalla nii. Tjapa ujĉhiz zoĉniĉnacĉzjapa Jesucristuĉqui zuma pasinziz kuzzizza. Cristuĉzquin criyaquĉiz niĉqui, ĉjul zoĉni Yooztan wiĉaya kamaquĉiĉha.

¹⁷ Jalla nižtiqiztan tjapa mantiñi Yooz honoraž wiñayjapa waytitaj cjila. Yoozqui wiñaya žejlča, nižaza ana ticznasača, žoñž čhjujczquiz anaž cherta cjesača. Tsjiillapanikazza Yoozqui, nižaza niipanča juc'ant tjappacha zizñiqi. Jalla nii Yooz honora wiñay wiñaya tirapan waytitaj cjila. Jalla nužoj cjila. Amén.

¹⁸ Timoteo jila, wejt maati cuntamča. Zuma zultatužtakaz Yoozquin tjurt'iñi kuzziz cjee. Nižaza Satanás partiranacž quintra cjee. Tuquiqui tsjii criichi jilanacaqui am puntuqiztan Yooziž tjaata taku čhičiči. Nii takunaca cjuñzna. Jalla nii tawkjaru amqui Yooz sirwiz puestuqiz utžtača. Jaziqiu amquin tii čhižinuča.

¹⁹ Tirapan Yoozquin tjapa kuzziz cjee, nižaza zumapan kama. Zuma kamcan, am kuzquiz ana ujnaca cjuñznaquiča. Yekjapaqui persun kuzquiz ujnaca cjuñzcu, ana juzyu paachiča, nii ujquiztan ana jaytichiča. Jalla nižtiqiztan ninacaqui ana uj tantiyasñi kuzziz cjišiča, nekztan Yooz kamañ jiczquiztan zarakčiča.

²⁰ Jalla nižta paachiča Himeneužtan nižaza Alejandružtan. Jalla ninaca Satanás kjarquiz intirjichinča, ana Yooz quintra iya čhii zizajo.

2

YOOZQUIN MAYIZIZ PUNTU

¹ Tsjižtan cjiwča. Primeraqui čhižinžcuča jalla tuž: Tjapa žoñinacžta Yoozquin mayizaquiča, nižaza zuma kuztan Yooztan parlaquiča, nižaza tjapa žoñinacžtajapa Yoozquiztan roct'izinaquiča, nižaza Yoozquin sparaqiz cjequiča. Jalla nuž mayiziz waquiziča tjapa žoñinacžtami,

² nižaza tjapa pajk mantiñi jilirinacžtami, nižaza tjapa jilirinacžtami. Jalla nuž mayiziz waquiziča, walikaz kamajo. Jalla nuž kamcan, Yoozquin sirwiñi kuzziz cjee, nižaza nižta kuzziz kamcan jilirinacžquiz rispitiñi kuzziz cjee.

³ Jalla nižta kamaquž niiqui, walikazza. Nižaza jalla nižta kamz cjen, učhum Liwriiñi Yoozqui cuntintuž cjequiča.

⁴ Učhum Liwriiñi Yoozqui tjapa žoñinaca liwriita cjis, jalla nii pecča. Nižaza tjapa žoñinaca werar taku pajñi cjis, jalla nii zakaz pecča.

⁵ Tsjii Yoozpanikaz žejlča. Nižaza žoñinacaltajapa tsjii Yoozquiz pjalt'iziñi žejlča. Jalla ničiča Jesucristuqui. Učhum irat žoñi cjisicu,

⁶ tjapa tii muntuquiz žejlñi žoñinacž laycu ticziča. Jalla nuž ticžcu ninacž ujquiztan pacičiča. Yooz pinsita timpu tjonžcu, jalla nekztan nii zuma liwriiñi quintuqui žoñinacžquiz paljaytatača.

⁷ Jalla nii Jesucristuž žoñinacž laycu ticzi quintu wejrzakaz paljayuča. Nižta paljayajo, Yoozqui wejr apóstol puestuquiz utčiča. Wejr utčiča werar liwriiñi Yooz taku tjaajnajo ana judío žoñinacžquin. Ninacžquin Yooz taku paljayiñiča, ninaca Jesucristužquin kuzziz cjejajo. Wejrqui Jesucristužquin criichiž cjen weraral čhiyuča. Ana toscaral čhiyuča.

⁸ Tjapa kjutñi žoñinacaqui Yoozquin mayiziñi cjičhaj cjiwča. Jalla niil pecuča. Zuma kuzziz, nižaza ana žawjčhi kuzziz, nižaza ana čh'aazñi kuzziz, nižaza zuma kuztan kjara waytžcu, jalla nuž mayiziñi cjičhaj cjiwča.

MAATAKZ PUNTU

⁹ Nižaza maatakanacami zuma kuzziz cjispanča. Zuma zquitinaca anaž juc'anti cujtzni cjičhaj cjiwča. Anača iziwiri maatakažtakaz cujtzqui. Nižaza anača ricachužtakaz cujtzqui. Anaž anča ist'asaquiča. Nižaza maatakanacami anača persun ach charquiz anča quitsnacchiz cjequiča. Nižaza anaž anča čjul alajanacchiz cjequiča. Nižaza anaž anča zquitinaca cujt cutaquiča. Jalla nižta zquitinacquizimi nižaza cusasanacquizimi ana kuz tjaa.

¹⁰ Antiz zuma kamzquin kuz tjaa. Zuma kamz waquiziča Yoozquin kuzziz criichi maatakanacami.

¹¹ Nižaza maatakanacami ch'uju žejlcan tjaajinta takunaca catokspanča, ana čhulu čhižcu.

¹² Nižaza žoñinaca cheran maatakanacami luctakanacžquiz anaž tjaajinz waquiziča; nižaza anaž mantiz waquiziča. Nižaza maatakanacžlaqui ch'uju žejlcan luctakanacž takunaca nonspanča.

¹³ ČKjažtiqiztan nižta cjesajo, maatakanacž puntuqiztanajo? Jalla tužuča niiqui. Tuquiqui Yoozqui Adán paachiča. Nekztan Eva paachiča.

¹⁴ Nižaza Adanžquiz anatača incallta. Antiz Evaquiztača incallta. Incallskattiquiztan Evaqui ujquiz tjojtsinča.

¹⁵ Maatakanacami maatakž kamañquiz kamz waquiziča, maatinaca majtcan. Nižaza Yoozquin kuzziz, nižaza zuma munaziñi kuzziz, nižaza ana ujchiz zuma kamañ

kuzziz, nižaza humilde kuzziz, jalla nižta kuzzizpan kamaquiz niiqui, liwriita cjequičha maatakanacami.

3

ICLIZ JILIRZ PUNTU

¹ Jakziltat icliz jilirz puestuquiz luz pecčhaja, jalla niiqui zuma Yooztajapa langz pecñičha niiqui. Jalla nii takuquì ultim weraračha.

² Jalla nižtiquiztan jakziltat icliz jilirz puestuquiz luzaja, jalla niiqui zuma kamañchiz zoñi cjispančha. Jalla nižtiquiztan zoñinacaqui niiz puntu cjiñičha, “Zuma zoñipancha, ana ujchiz” cjicanaqui. Niiqui tsjaa tjunchizpanikaz cjispančha. Nižaza ewjazñi kuzziz cjispančha. Nižaza zumapan kamñi kuzziz cjispančha. Nižaza zuma kamtiquiztan rispittaž cjispančha. Nižaza tjonzñi zoñinacžquiz kjawzñi kuzziz cjispančha. Nižaza zuma tjaañiñi kuzziz cjispančha.

³ Nižaza anapan licñi kuzziz cjispančha. Nižaza ana kichjasñi kuzziz cjispančha, antiz pasinziz kuzzizpan cjispančha. Nižaza anapan ch'aazñi kuzziz cjispančha. Nižaza paaz pecñi kuzziz anapan cjispančha.

⁴ Nižaza niž kjuychiz žejlñi zoñinaca zuma irpiñi cjispančha. Nižaza niž maatinacami zuma cazñi nižaza walja rispitiñi, jalla nižta kuzziz cjispančha.

⁵ Tsjii icliz jiliriqui niž persun kjuy zoñinaca ana zuma irpiñi atchucažlaj niiqui, jalla nižtiquiztan, čjakuñžt Yooz icliz zoñinaca zuma irpasajo?

⁶ Nižaza tsjii icliz jiliriqui anaž uzca criiči zoñi cjesačha. Uzca criiči cjesaž niiqui, mitarazi kuzziz cjisnasačha, nekztanaqui ujquiz tjojtunasacha. Nižaza jaknužt diabluqui niž ujquiztan casticta cječhaja jalla nižta irata nii zoñiqui uj paatiquiztan casticta cjequičha.

⁷ Nižaza icliz jilirinacaqui tjapa zoñinacžquiz rispittaž cjispančha, criiči zoñinacami, ana criiči zoñinacami. Ana criiči zoñinacaqui nižquiz ana rispitaquiz niiqui, juc'anti nižquin ujnacaž tjojtunasacha. Jalla nižtiquiztan diabluqui nii zoñžquiz ujquiz tjojtscatasačha.

⁸ Naca nižta zuma kamañchiz zakaz cjispančha iclizquiz yanapñi zoñinacaqui. Jalla ninacaqui zuma rispitta kamañchiz cjispančha. Nižaza ninacž chiita taku cumpliñi kuzziz cjispančha. Nižaza anapan licñi kuzziz cjispančha. Nižaza paaz pecñi kuzziz anapan cjispančha.

⁹ Tuquiqui Jesucristuž puntumi nižaza nižquin kuzziz puntumi ana tjapa ziztatačha. Anziqui kjanacama paljaytačha. Nii Jesucristuž puntu zuma zizñi kuzziz cjispančha. Nii iclizquiz yanapñi zoñinacaqui ana uj paañi kuzziz cjispančha.

¹⁰ Tsjii zoñiqui iclizquiz yanapz puestuquiz luzasaž niiqui, primeraqui niž persun kamaña zumpacha tantitaž cjispančha. Nekztan zuma kamañchiz cjequiz niiqui, iclizquiz yanapz puestuquiz luzasačha.

¹¹ Jalla nižta zuma kamañchiz cjispančha iclizquiz yanapñi maatakanacami. Nii maatakanacami walja rispitta kamañchiz cjispančha. Nižaza anapan ana wal quintu joojoñi kuzziz cjispančha. Nižaza ewjazñi kuzziz cjispančha. Nižaza tjapa cumpliñi kuzziz cjispančha.

¹² Nižaza iclizquiz yanapñi zoñinacaqui tsjaa tjunchiz alajakaz cjispančha. Nižaza niž persun maatinacami kjuy zoñinacami zumapanž irpiñi cjispančha.

¹³ Jakziltat iclizquiz yanapz puestuquiz zuma cumplačhaja, jalla niiqui zuma honorchiz cjequičha, nižaza juc'ant tjuj kuzziz cjisnaquičha, Jesucristužquin criiz puntuquiztan paljayzjapa.

¹⁴⁻¹⁵ Wajilla wejrqui amquin ojcz pecučha. Pero anat uri tjonz atučhani. Jalla nižtiquiztan tii takunaca amquin cjiñžcučha. Tii takunacaž cjen amqui zizaquičha, jaknužt Yoozquin criiči zoñinacaqui parti Yooz maatinacžtan kamz waquizichaja, jalla nii. Yooz maatinacačha werar žejtñi Yooz iclizaqui. Yooz icliz zoñinacaqui werar Yooz tawkquizimi tjurt'iñi kuzzizpančha.

¹⁶ Anaž jecmi kjaž cjesačha tii puntuquiztan. Tuquiqui Jesucristuž puntumi, nižaza Yooz kamañ puntumi ana tjapa ziztatačha. Anziqui nii puntunacami kjanacama ziztačha. Tii Jesucristuž puntunacačha chekanaqui. Jesucristuqui učhum irat curpučiz tjonchičha tii muntuquiziqui. Jacatattiquiztan Yooz Espiritu Santuqui ticlarchičha niž puntuquiztan, ljiituma Yooz kamañchizza, jalla nii. Nižaza Yooz anjilanaqui Jesucristo cherchičha. Nižaza tjapa tii muntuquiz žejlñi zoñinacžquiz Jesucristuž puntuquiztan paljaytačha. Nižaza tjapaman zoñinacaqui nižquiz criičičha. Nižaza Jesucristuqui tsew arajpachquin wilta quejpičičha. Jalla nii puntunacačha chekanaqui.

4

ZUMA TJAAJINTA TAKUNACA

¹ Tsjii puntu cjesača. Yooz Espíritu Santuqui kjanapacha intintazkatchiča jalla tužu: Ima Jesucristuž wilita tjonan, yekjap criichinacaqui Yoozquin criizquiztan zarakaquiča. Tsjii kjutñi irpitaž cjequiča incallñi zajranacaž cjen, nižaza nii ana wal zajranacaž tjaajintaž cjen.

² Nii zajranacaž mantita žoñinacaqui incallñi kuzziz cjan toscar takunaca paljayaquiča. Nižaza ninacž toscar takunaca nonžcu, yekjap werar Yoozquin criichinacaqui Yoozquiztan tsjii kjutñi zarakaquiča. Nii zajranacaž mantita žoñinacaqui ujquiztan ana sint'iñi kuzziz cjequiča, nižaza ana uj naazñi kuzziz cjequiča.

³ Nii ana wal žoñinacaqui anapanž lucutjñi zalzqui cjan mantaquiča. Nižaza tsjii čherinaca lujlžmi, anapanž lulzqui, cjan mantaquiča. Nii incallñi žoñinacaqui jalla nuž cjequiča, pero Yoozqui nii čheri tjaachiča, žoñinacaž lulajo. Jalla nižtiquiztan Yoozquin criichinacami werar Yooz tawkquiz criichinacami nii čheri lulasača Yoozquin sparaquiz cjižcu.

⁴ Tjapa Yooziž tjaata čherinacaqui walipankazza. Yoozquin sparaquiz cjižcu lulasača. Anapanča "Lujljapača anawaliqui" cjižqui.

⁵ Yoozquin sparaquiz cjižcu, nižaza Yooz taku čiižcu, čjul čherimi walipankaz cjesača, lujljapa.

⁶ Jalla nii weriž tjaajinta takunaca criiči žoñinacžquiz tjaajnaquiča amqui. Nekztan amqui Jesucristužtjajapa zuma sirwiñim cjequiča. Yooz tawk jaru, nižaza Yooz puntu zuma tjaajintanac jaru zuma kamčamča. Nižaza zuma tjaajnaquiz niiqui, juc'ant zuma kamañchiz cjequiča.

⁷ Ana wal quintumi nižaza zumzu žoñinacž quintumi anapan nonznaquiča. Antiz Yooz kuzcamapankaz kamzquinča kuz tjaazqui.

⁸ Curpu ejercicio paakatzi curpuquizkaz yanapča. Yooz kuzcama kamzqui curpuquizimi kuzquizimi tjappachquizpanž yanapča. Nižaza tii muntuquiz kamz žejtquizimi arajpach muntuquiz kamz žejtquizimi yanapča.

⁹ Jalla werar razunača nii takuqui. Jalla nižtiquiztan catokz waquiziča.

¹⁰ Učhumqui žejtñi Yoozquin criičiž cjen tjewznaquiča arajpachquin Yooztan kami ojkszjapa. Jalla nuž tjewžcan, učhumqui Yoozta anča langža nižaza sufriča. Jalla nii žejtñi Yoozta ultim werar Liwriñiqui. Nižquin criichinacaqui liwriita cjequiča. Nižaza tjapa žoñinacaqui liwriita cjesača, nižquiz crijauquiz niiqui.

¹¹ Jalla nii puntu tjaajintanaca mantaquiča, nižaza tjaajnaquiča amqui.

¹² Amqui tjowaž cjenami žoñinacžquiz rispitskataquiča, amiž zuma kamtiquiztan. Amqui zumapan kamaquiča, nižaza zumapan čiyaquiča, nižaza žoñinacžtan zuma munazaquiča, nižaza Yoozquin tjapa kuzzizpan cjequiča, nižaza lijtum kamañchiz cjequiča. Nekztan jaknužt amqui zuma kamčaja, jalla nii cheržcu, parti criiči žoñinacaqui am iratapacha zakaz zuma kamasacha.

¹³ Nižaza wejt tjonzcama, parti criiči žoñinacžquin Yooz taku liizinzjapa kuz tjaaquiča. Nižaza Yooz taku ližcu parti criiči žoñinacžquin zumpacha čiižinaquiča. Nižaza ninacžquiz tjaajnaquiča.

¹⁴ Tuquiqui icliz jilirinacaqui kjaržtan am juntuñ lanziča. Nižaza am puntuquiztan tsjii Yooziž tjaata taku čiičiča, "Yooz tjaata kamañchiz cjequiča" cjanaqui. Nekztan jalla nižta Yooz kamañchiz amquiz cjiskatchiča. Amqui nii Yooz kamaña ana cutznaquiča.

¹⁵ Jalla nii am kamañ puesto cumplisjapa, tjapa kuz tjaaquiča. Nii kamañ jaru kama. Jalla nižta kamz cjen, amqui juc'ant juc'ant zuma kamaquiča. Nižaza parti criichinacaqui am juc'ant zuma kamañiž cjen nayaquiča.

¹⁶ Jaziqi am persun kuzquizimi nižaza amiž tjaajintanacquizimi cuitaza, zumapan cjisjapa. Weriž čiižintanaca tirapan cjuñzna. Jalla nuž zuma cjuñznaquiz niiqui, ultimquiziqui liwriitam cjequiča. Nižaza amiž tjaajinta catokchi žoñinacaqui liwriitaž zakaz cjequiča.

5

ZEW MAATAKANACZ PUNTU

¹ Tsjiilla cjesača. Irarchiz ejnacžquiz ana anča ujznaquiča. Antiz persun ejpžtakaz zuma tawkžtan čiižinaquiča, niž ana wali paatiquiztan jaytiskatzjapa. Nižaza parti luctak žoñinacžquiz persun jlanacžquiz čiižintazokaz čiižinaquiča.

² Nižaza irarchiz maatakanacžquiz persun maažtakaz zuma rispitchiz razunžtan čiižinaquiča. Nižaza parti maatakanacžquiz persun cullaquincžquiz čiižintazokaz čiižinaquiča, zuma kuztan. Maatakanacžquiztan zumapan pinsaquiča.

³ Nižaza ultim t'akjir zewanacžquiz okznaquiča.

⁴ Tsjaa žew žonqui maatinacchiz nižaza ajlchinacchiz cjesaž niiqui, jalla ninacaqui naa žew maaquiz okz waquiziča. Jakziltat Yoozquin criičižlaj niiqui, persun famillžquiztan

zew maatakanac̄quiz yanapz waquiziča. Nii zew maatakanacaqui famill ocjalanaca jwesi yanapchižlani. Zew maatakanac̄quiz yanapzpanž waquiziča persun familiaqui. Jalla nuž Yooz yujcquiziqui walipanikaz cjequiča.

⁵ Jakzilta t'akjir zew žonmi zinalla žejlčhaj niiqui, jalla naača werar zewqui. Naaqui Yoozquin kuzziz cjenauqui arajpachquin kami ojcz, jalla nii tjewža. Nižta tjewžcan naaqui majiñami weenami Yoozquin ancha mayizinča.

⁶ Jakzilta zew žonmi tii muntuquiz kamzquinkaz kuz tjaachi žejlčhaja, jalla naaqui criichi žoñž cutzturumpi paachi cjenami, ana Yoozquin kuzziz zuma kamča.

⁷ Persun famillž žewnac̄quiz okz waquiziča. Jalla nuž mantaquiča amqui, žewanacami ninac̄z familianacami ana ujchiz cjisjapa.

⁸ Persun famillžquiztan tsjii t'akjiri žejlčhaj niiqui, famillžquiztan mantinta cjis waquiziča. Ana mantintažlaj niiqui, nii famillchiz žoñinacaqui Yooz kuzcama kamz ana cumpliča. Nižaza nižta žoñinacaqui tsjan ana zuma kuzzizza ana criichinac̄quiztanami.

⁹ Jakzilta zew maatakanac̄z tjuumi icliz listiquiz žejlčhaja jalla ninacaqui yanapta cjesača. Nižaza nii zew maatakanacaqui yanapzjapa sojta tunc wata jilchiz cjistanča. Nižaza tsjii luctakžtan panikaz zalsintača naa zewqui.

¹⁰ Nižaza žoñinacaqui naaza zuma kamtiquiztan pajta cjistanča. Nižaza naa žewqui maatinaca zuma irpiñtacha. Nižaza tjonžni žoñinac̄quiz zuma atintiñi kuzziz cjispanča. Nižaza criichi žoñinac̄z kjojcha humilde kuzziz ajwsinintacha. Nižaza sufrini žoñinac̄quiz zuma yanapñi kuzziz cjispanča. Nižaza tjapaman wali paatanac̄quiz kuz tjaañi cjispanča. Jalla nižta zuma kuzziz zew maatakanacaqui iclizquiztan yanapta cjesača.

¹¹ Ima sojta tunca wathcz cjen zew maatakanacaqui anaž icliz listiquiz apuntita cjesača, yanapta cjisjapa. Listiquiz apuntita cjisjapaqui, zew maatakanacaqui tsjii icliz jilirinac̄z acuerduquiz lutzanča. Tur zew maatakanacaqui wilta zalz pecachani. Wilta zalažakž niiqui, nii acuerduquiztan ulanspanča. Jalla nuž ulantiquiztan Cristuž quintražtakaz cjequiča.

¹² Nii primero acuerduquiztan ulantiquiztan ujchiz cjequiča.

¹³ Nižaza turapacha zew maatakanacaqui kjuyquiztan kjuya ojklayasaž niiqui, jayraž cjesača. Nižaza ana wali quinto joojooñiz cjesača. Nižaza yekja žoñž parliquiz mitisni cjesača. Jaziqiu ana zuma takunaca chiichiyachani. Nižta chiichiizqui inapankazza. Anapan waquiziča.

¹⁴ Jalla nižtiquiztan tur zew maatakanacaqui zalz waquiziča. Zalzcu, ocjalchiz cjesača. Nižaza kjuya luraña cwitiñi cjesača. Jalla nižta zuma kamañ quintra žoñinacaqui icliz žoñinac̄quiz anaž iñarasacha.

¹⁵ Yekjap zew maatakanacazti Yoozquiztan zarakchiča, nižaza Satanás diabluz kuzcama ojčča.

¹⁶ Jakzilta criichi luctakami maatakami persun famillžquiztan tsjaa zew žon žejlčhaja, naa zew žon yanapz waquiziča, icliz žoñinac̄zta ana ch'ama cjejajo. Jalla nižtiquiztan ultim t'akjir chawc zew maatakanac̄quiz icliz paažtan yanapta cjesača.

ICLIZ JILIRZ PUNTU

¹⁷ Jakzilta icliz jilirit zumpacha irpačhaja, parti criichi žoñinacaqui nii jiliržquin zuma honora tjaaz waquiziča, nižaza zuma pacz waquiziča. Nižaza Yooz taku paljayñi jiliržquizimi, nižaza Yooz taku tjaajiñi jiliržquizimi juc'ant honora tjaaz waquiziča, nižaza juc'anti pacz waquiziča.

¹⁸ Tuquitanpacha cjiřta Yooz takuqui tuž cjiča: "Tsjii trigo jojñi aznuqui ñujčtan ana ñucasacha ana lulajo". Nižaza cjiřta Yooz takuqui tuž cjiča: "Jakziltat langžñižlaja, jalla niiqui pacta cjis waquiziča".

¹⁹ Nižaza tsjii žoñikaz icliz jiliržquiz uj tjojtNASAž niiqui, jalla nii žoñž chiitaqui anača nonzqui. Antiz tsjii pucultan ehjepultan tisticu žoñinac̄z ujchizpanča cjesaž niiqui, ninac̄z chiitaqui nonznaquiča.

²⁰ Nižaza jakzilta icliz jilirit uj paañi žejlčhaja, jalla nižžquiz ujsnaquiča parti criichi jilanac̄z yujcquiz. Jalla nižtiquiztan nii parti žoñinacaqui uj paaz jiwjataquiča.

²¹ Jaziqiu Yooz Ejpžtan nižaza Jesucristužtan nižaza Yooziž illzta anjilanac̄žtan, jalla ninac̄z yujcquiziqui amquiz mantuča, nii weriž tjaajintanac jaru kamajo, nii. Nižaza jalla nuž kamcan anapanča pjali cjičisqui. Nižaza tjapa žoñinac̄žtan tsjii kuzziz cjis pecsa.

²² Nižaza ima icliz jilirž puestuquiz uchan, nii žoñž kuz zumpacha tantižžinaquiča. Ana zumpacha tantiyaquiz niiqui, tsjii amiž uchta icliz jiliriqui ujquiz tjojtNASAža. Nekžtan parti žoñinacaqui amquiz zakaz uj tjojtNASAča. Jaziqiu ima uchcan zumpacha tantiiz waquiziča. Nižaza am persun kuzquiz cuitasa ana ujquiz tjojtSjapa.

²³ Amiž walu ancha laa laa cjenauqui, anam kjaz alaja licašača. Tsjii kulla cunta koluc vinulla licsnasacha.

²⁴Yekjap zoñinacaž uj paatanacaqui kjanapacha tjeežta cjissa ima casticta cjisnan. Yekjap zoñinacaž uj paatanacazi chjojžta cjesača, casticz tjuñicama. Nekztan tjeežtaž cjequičha.

²⁵Jalla nižtapacha yekjap zoñinacaž zuma paatanacaqui kjanapachača. Yekjap zoñinacaž zuma paatanacazi ana chertača. Pero anaž tirapan chjojžta cjequičha. Pjalz tjuñquiziqui tjeežtaž cjequičha.

6

¹Criiči zoñinacžquiz chiižina, tuž cjican: Patrunž mantuquiz kamñi piyunanacaqui persun patrunžquiz rispita, parti zoñinacaž werar Yooz quintra ana chiyajo, nižaza tjaajinta Yooz taku ana iñarajo.

²Nižaza jakzilta piyunanacat criichi patrunchizlaj niiqui, juc'anti rispita, ana quintra chila, nii patrunaž criichiz cjen. Antiz juc'anti nii patrunžta langžinspanča. Am patrunpachača criichi maziqi. Jalla nižtiqizitan zuma k'ayi jilača niiqui. Jalla nii puntunaca chiižinaquičha, nižaza tjaajnaquičha.

ANA WALI TJAAJIÑINACŽ PUNTU

³Tsjii zoñiqui tsjemat pinsita takunacžtan tsjii kjutñi tjaajnačhani. Jalla nižta ana wali tjaajnaquiz niiqui, Jesucristo Jiliriz zuma tjaajintanacquiztan tsjemataž tjaajinča. Nižaza nii zoñiqui Yooz mantita kamañquiztan tsjemata kamaña tjaajinča.

⁴Jalla nižta tjaajini zoñiqui mit kuzzizza. Yooz puntunaca ultim werara ana zizza. Nižaza nižta tjaajini zoñiqui ana wali kuzziz cjen zoñinacžtan ch'aazkaz pecča. Čjul taku puntuquiztan ch'aazkaz pecča. Jalla nuž ch'aazcan chjaawjkatas žejlča, nižaza t'aka t'akaž cjissa, nižaza zoñinacaqui quintra chiyas žejlča. Nižaza porapat uj tjojtassa.

⁵Nižaza nii millk'u kuzziz zoñinacaqui porapat ana tucuziñi ch'aasniča. Ninacaqui Yooz pinsitanacami zuma werar razunanacami ana zizza. Tii muntuquiz wali jiru kamz cjis pinsican, Yooz jiczquin luzza. Nii wali jiru kamzqui, "Jalla nii kamzkazza waliqui", cjican pinsiñičha. Jalla nii ana wal pinsitanacchiz zoñinacžtan ana munazaquičha.

⁶Pero tsjiikaz cjiwča. Yooz jiczquiz kamzqui anča waliča, wali jiru kamzquiztan juc'anti. Yoozquinkaz kuzziz cjican zoñinacaqui cuntintu cjequičha.

⁷Tii muntuquiz nascuqui učhumqui ana čjulchiztača. Nižta irata ticžcuqui tii muntuquiztan ana čjulchiz okaquičha.

⁸Jalla nižtiqizitan tii muntuquiz žejlcan, čherchizimi zquitchizimi cuntintu cjistanča.

⁹Jakziltat wali jiru cjis pecčhaja, ujqquiz tjojtssasača, nižaza ana wal jiczquiz lusašača. Nekztan zumzu pinsamintuchiz cjesača. Nižaza persun quintra ana wal kamzquizkaz pecasača. Nekztan nii ana wal kamtiqizitan tjappacha pertaquičha. Liwj akztaž cjsnaquičha nii zoñiqui.

¹⁰Paazquin kuz tjaazqui tjapaman ana walinacquiz cjiskatča. Paazquin kuz tjaacan yekjap criichi zoñinacaqui Yoozquiztan tsjii kjutñi chjichta cjisničha. Nekztan persunpacha wira anča sufriskatča.

TIMOTEOZQUIZ CHIZINTA TAKUNACA

¹¹Timoteo jila, amqui Yooz zoñimča. Jaziqi ana walinacžquiz anapan kuz tjaaquičha. Antiz zuma kamzquin kuz tjaaquičha. Yooz kuzcama kama. Nižaza Yoozquin kuzzizpan cjee. Nižaza zuma munaziñi kuzziz cjee. Nižaza pasinziz kuzziz tjurt'a. Nižaza humilde kuzziz cjee.

¹²Zuma zultatužtakaz Yoozquin tjurt'iñi kuzziz cjee, nižaza Satanás diabluž partiranacž quintra cjee. Nižaza arajpachquin Yooztan wiñaya kamzjapa, kuz tjaaquičha. Arajpachquin wiñaya kamajo Yoozqui am kjawziča. Nižaza nuž kjawzitan, amqui walja zoñinacž yujcquiz ticlarchamča, "Yoozquinkaz kuzziztča wejrqui" cjican.

¹³Timoteo jila, Yoozqui tjapa tii muntuquiz žejlñinacžquiz žeti tjaača. Nižaza Jesucristuqui Poncio Pilatuž yujcquiz Yooz Ejpžquinkaz kuzziztača. Jaziqi Yooz yujcquizimi Jesucristuž yujcquizimi wejrqui amquin mantuča,

¹⁴Yooz kamañquizkaz kama, jalla nii. Nekztan zoñinacaqui Yooz kamaña quintra ana čjul chiyasača, nižaza Yooz kamañaqui zumapankaz tjeežta cjequičha, Jesucristo Jiliriz tjonz tjuñicama.

¹⁵Yooz Epiž pinsita timpuquiz Jesucristuqui wilta tjonaquičha. Yooz Ejpqui zinta zuma Yoozza. Jalla niičha tjappachquiztanami chekanaqui. Nižaza Yoozqui tsjan pajk jiliričha čjul jilirinacžquiztanami. Nižaza niičha juc'ant azziz mantiñiqui čjul mantiñinacžquiztanami.

¹⁶Yoozpankazza wiñay žejtchizqui. Nižaza anaž jec ujhiz zoñimi Yoozquin macjati atasača juc'ant zuma kjañquiz kamchi, nekztan. Jalla nižtiqizitan anaž jec zoñimi Yooz cherchiča, nižaza ana cherasača. Yoozqui wiñaya honorchiz cjila. Nižaza wiñaya mantiñej cjila. Jalla nužoj cjila. Amén.

¹⁷ Amqui tii muntuquiz wali jiru kamñi zoñinacžquiz mantaquiča, ancha cusasanacchiz cjenami ana mita kuzziz cjeyajo. Anaž wiñaya nižta wali jiru kamasacha. Jalla nižtiquiztan cusasanacquiz anača kuz tjaazqui. Antiz Yoozquinkaz kuz tjaa. Nii žejtñi Yoozpankaz učumnacacquiz tjapaman wintizunanaca tjaača, učumnaca cuntintu kamzjapa.

¹⁸ Nižaza nii wali jiru kamñi zoñinacžquiz mantaquiča tuž kamajo. Ninacacqui zuma obranaca paaz waquiziča. Nekztan zuma obranacaž paachiž cjen ultim werar wali jiruž cjequiča Yooz yujcquinaqui. Nižaza ninacacqui zuma kuztan ninacž cusasanacžtan zoñinacžquiz yanapz waquiziča. Ana zkutu kuzziz cjis waquiziča.

¹⁹ Jalla nuž zuma obranaca paatiquiztan arajpachquin ultim werar cusasanaca juntaquiča. Nuž juntitiquiztan, ultimupan Yoozqui arajpachquin ninacžquiz zuma kamkataquiča, wiñaya. Jalla nii arajpachquin wiñay kamzquin kuz tjaaz waquiziča. Nii kamzqui juc'ant zumača. Jalla nuž wali jiru zoñinacžquiz mantaquiča amqui.

²⁰ Timoteo jila, wejrqui amquiz tjapa Yooz puntunacquiztan tjaajinchinča. Jalla nii tjaajintanaca zumpacha cjuñzna, nižaza nii jaru kama. Nižaza ina zoñž takunaca ana nonžna. Ana Yooz takunacača ninacž takunacacqui. Nižaza zuma tjaajintanac quintra chiitaqui ana nonžna. Yekjap zoñinacacqui tsjii kjutñi chiižcuqui, “Zuma zizta takuča weriž chiitaqui”, cjiñiča.

²¹ Nižaza yekjap criichi zoñinacacqui nii ana wal taku catokžcu Yoozquiztan tsjii kjutñi zarakchiča. Ana zuma kuzziz cjissiča.

Yoozqui am wintijla. Jalla nužoj cjila. Amén.

SEGUNDA CARTA DEL APOSTOL SAN PABLO A TIMOTEO

¹ Wejrčha Pablutqui. Yooz muñañpi jaru Jesucristuž illzta apostoltčha. Yoozqui Jesucristuž cjen žoñinacžquiz taku tjaachičha, Jesucristužquin kuz tjaañi žoñinacžquiz wiñaya arajpachquin kamkatzjapa. Jalla nii wiñaya kamz puntuquiztan paljayajo wejrqui apóstol puestuquiz uchtitčha.

² Timoteo jila, amqui wejt k'ayi maati cuntamčha. Jalla nekztanaqui tii cartal cjiřzcučha. Učhum Yooz Ejpžtan nižaza učhum Jesucristo Jiliržtan, jalla ninacaqui amquin zumaj yanapla, nižaza amquin okžla, nižaza zuma cuntintu kuzziz kamkatla.

TIMOTEOZQUIZ CHIZINTA TAKU

³ Wejrqui majiñami weenami Yoozquin mayizican, am cjuñučha. Am cjuñzcu, wejrqui amiž cjen tirapan Yoozquin sparaquiž cjiwčha. Yoozquin tjapa kuztan lijituma sirwučha. Jaknužt wejt tuquita atchi ejpnaca Yoozquin zuma sirwitčhaja, jalla nuž Yoozquin sirwučha.

⁴ Wejrqui cjuñučha, amiž wejtquiztan kaazñiž cjen. Nižaza wilta am chertz anchal pecučha. Nekztan cuntintul cječha.

⁵ Nižaza cjuñučha, amqui tjapa kuztan Yoozquin criichamčha, jalla nii. Primeraqui am Loida cjiti matilliqui Yoozquin kuzziz cjissintačha. Nekztan am Eunice cjiti maa Yoozquin kuzziz zakaz cjissintačha. Nižazakaz amqui ultimupan Yoozquin kuzziz cjissamčha.

⁶ Yoozqui amquiz tsjii zuma kamaña tjaachičha, weriž am juntuñi kjaržtan lanžtan. Jalla nižtiquiztan amquin chiižinučha, nii zuma kamañquiz tira kamajo.

⁷ Yoozqui učhumquiz eksñi kuzziz ana cjiskatchičha. Antiz tjup kuzziz cjiskatchičha, nižaza zuma munaziñi kuzziz cjiskatchičha, nižaza zuma pinsiñi kuzziz cjiskatchičha.

⁸ Jaziqi amqui anapanim azaquičha, učhum Jesucristo Jilirž favora paljaycan. Wejrqui Jesucristuž cjen carsilquiz chawjtitčha. Jalla nuž cjenami amqui ana wejtquiztan azaquičha. Amqui Yooz zuma liwriñi taku paljayñiž cjen zakam sufričha. Nii sufrisquiztan ana jiwjatalla. Yoozqui amquiz azi tjaažcaquičha tjurt'izjapa.

⁹ Nii azi tjaañi Yooza učhum liwriichiqui. Nekztan učhum kjawzičha nižquin tjapa kuztan kamzjapa. Yoozqui učhum ana kjawzičha učhumnaž zuma paatiquiztan. Antiz Yoozqui učhum kjawzičha niž persun kuz munañpi jaru, nižaza niž persun okžñi kuzziz cjen. Ima tii muntu želan Yoozqui tantiichičha, Jesucristužquin kuzziz žoñinacžquiz niž okžñi kuz tjeeznaquičha, nii.

¹⁰ Jaziti Yoozqui učhum Liwriñi Jesucristuž tjonchiž cjen niž okžñi kuzziz tjeezičha. Jesucristuž ticz liwjt atipchičha persunaltajapami nižaza nižquin criichi žoñinacžtajapami. Nižaza liwriñi Yooz taku paljaytiquiztan, jaknužt žoñinacaqui Yooztan wiñaya kamčhaja, jalla niiqui kjanzt'itačha.

¹¹ Jalla nii zuma quintu paljayajo Yoozqui wejr utchičha apóstol puestuquiz. Nižaza wejr utchičha ana judio žoñinacžquiz tjaañajo.

¹² Jalla nižtiquiztanpacha wejrqui ancha sufručha tii carsilquiz chawjckatzcama. Jalla nuž cjenami wejrqui anapan azučha, werar Yooztan tsjii kuzziz cjen. Werar arajpach Yoozquinpanž kuz tjaachinčha. Nižaza tuž cjiwčha, wejt Yoozqui walja azzizza. Jaziqi niiqui weriž cumpjiita wira cuitaquičha Jesucristo tjonz tjuñicama. Jalla niičha zuma werar razunaqui.

¹³ Werjqui amquiz zuma tjaañinčinčha. Jalla nii tjaañintacama amqui tirapan tjapa kuztan kamaquičha. Yoozquin kuzzizpan cjequičha, nižaza žoñinacžtan zuma munaziñi kuzziz cjequičha. Jalla nuž kamaquičha Jesucristužtan tsjii kuzziz cjen.

¹⁴ Yoozqui amquin niž zuma tjaañintanaca tjaachičha. Jalla nii zuma taku cuitaquičha. Učhum kuzquizpachača Espiritu Santuquičha. Jalla niiqui amquiz yanapaquičha nii Yooz taku zuma lijituma tjaañajo.

¹⁵ Tjapa nii Asia provinciquiztan tjonchi žoñinacaqui wejr zinalla ecchičha. Jalla ninacquiztan Figelo, nižaza Hermógenes, jalla ninacaqui wejr ecchizakazza. Nii zizza amqui.

¹⁶ Onesiforožti ancha wejr kuzzičha wiltan wiltan. Nižaza weriž carsilquiz chawjctaz cjen ana azzičha. Jalla nižtiquiztan zuma okžñi kuzziz Yooz Jiliriqui nižquiz zumaj yanapla, niž familianacžtanpacha.

¹⁷ Roma cjita wajtquiz želan, nii Onesiforo jilaqui wejr ancha kjurchičha zalañcama.

¹⁸ Jesucristo Jiliriz pjalz tjuñquiziqui Yooz Jiliriqui nii Onesiforožquin okžñi kuzziz cjequičha. Efeso wajtquin želan, Onesiforoqui jaknužumi criichi žoñinacžquin yanapchičha, jalla nii amqui zuma zizza.

2

JESUCRISTUZ ZULTATUZ TAKAZ CJISPANCHA

¹ Timoteo jila, wejt maati cuntamcha. Tjup kuzziz cjee. Jesucristuqui amquiz yanapaquiča.

² Wejrqui walja žoñinacaž želan Yooz taku tjaajinchinča. Ninacžtanpacha amqui weriž tjaajintanaca nonzamča. Jalla nii tjaajinta takunaca amqui tjaajnaquiča zuma cumpliñi kuzziz žoñinacžquizimi. Nekztan nii žoñinacaqui yekjanacžquizimi tjaajnasatča.

³ Amqui Jesucristužquin sirwiñiž cjen sufraquiž niiqui, nii sufrizquiztan ana jiwjata. Jalla nuž sufrican, Jesucristužquin tjurt'aquiča walja tjup zultatužtakaz.

⁴ Jakzilta zultatut servicio militarquiz žejlčhaja, jalla niiqui militar asuntunacquiz tjapa kuz tjaatča. Ana panž civil asuntunacquiz kuz tjaasatča. Niiž comandantiž mantuquiz cjissa, nii comandantiž kuz wali cuntintu cjiskatzjapa. Jaziqui zultat lii jaruž kamča, anapanž civil lii jaruž kamča.

⁵ Jalla nižta irata jakziltat pelota uzinčhaja, pelot uzinz lii jaru uzinztanča. Ana pelot uzinz lii jaru uznaquiž niiqui, anapanž premio ganasatča.

⁶ Nižaza jakzilta langžni žoñit žkala langžaja, jalla niiqui primeraž zkal čherquiztan lulasatča.

⁷ Jalla nii weriž chiita puntuquiztan tantiya. Jalla nekztan Yooz Jiliriqui tjapa nii puntuquiztan zumpachaž intintiskataquiča.

⁸ Nižaza Jesucristuž puntu cjuñzna. Jesucristuqui David cjita tuquita jilirž majchmaatinacquiztan tjonñiča. Jesucristuž ticziquiztan jacatatchi puntu cjuñzna. Jalla nii liwriñi takupacha paljajuča.

⁹ Jalla nuž paljaytiquiztan wejrqui carsilquiz chawjcta sufruča, criminal žoñižtakaz. Jalla nuž weriž carsilquiz chawjcta želanami, liwriñi Yooz takuqui anača chawjcta. Jalla nižtiquiztan Yooz takuqui tirapanž paljaytatča.

¹⁰ Jalla nižtiquiztan wejrqui walja sufruča Yooziž illzta žoñinacžquiz juc'ant wali cjiskatzjapa. Sufruča ninacami wejrmi ultimu liwriita cjisjapa. Jesucristužquiz kuzziz cjen ninacami wejrmi wiñayaž liwriita cjequiča, nižaza arajpachquin wiñaya honorchiz cjequiča.

¹¹ Jesucristuqui učhum laycu ticziča. Jalla niiča ultim werar razunaqui. Učhumqui tuquita ana wal kamañquiztan ticzi žoñinacžtakaz cjissinčhumča, nii ana wal kamañquiz ana iya kamajo. Jaziqui ew kamañchiz cjissinčhumča. Jalla nižtiquiztan Jesucristužtan kamča.

¹² Nižaza Jesucristužquiz sirwiñiž cjen sufračhaj niiqui, tjurt'ichi kuzziz kamz waquiziča. Nekztan tjurt'ichi kuzziz tirapan cjequiž niiqui, učhumqui nižtan čica mantaquiča. Učhumqui Jesucristužquiz nicaquiž niiqui, niiqui nižaza učhum nicaquiča.

¹³ Jaziqui učhumž Jesucristužquiz criiz ana cumplichiz cjenami, nii Jesucristuqui tirapanž niiz ecta taku cumplaquiča. Niiqui persun taku anapanž nicasatča.

YOOZTAJAPA ZUMA LANGZPANCHA

¹⁴ Amqui criichi jilanacžquiz nii puntu cjuñskataquiča. Nižaza Jesucristo Jilirž tjuuquiz ninacžquiz zumpacha chiižinaquiča, jalla tužu: Anaž ch'aazaquiča ina žoñž takunac puntuquiztan. Jalla nuž ch'aazqui anaž čjuljapa sirwiča. Nižaza nii ch'aazta taku nonžni žoñinacaqui Yooz jiczquiz kamzquiztan tsjii kjutñi čjichetaž cjesatča.

¹⁵ Amqui Yooztajapa tjapa kuztan langzna, Yooz yujcquiziqui zuma langžni žoñi pajta cjisjapa. Jalla nižtiquiztan Yooz yujcquiz žejlcan amqui ana čjulquiztan azasatča. Nižaza Yooztajapa langžcan, niiz werar liwriñi taku legali paljaya.

¹⁶ Ina žoñž takunacaqui anača čhiizqui. Jalla nii ina takunaca čhijasaz niiqui, tsjan tsjan tsjii kjutñi žoñinacžquiz irpaquiča.

¹⁷ Nii ana wal čhiizqui zuma kamañanaca ana wali cjiskataquiča, jaknužt tsjii laa cjiñi tjapa curpu ana wali ch'ujlkatčhaja, jalla nižta. Jalla nuž watchiča Himeneožtan Filetužtan, jalla ninacžquiz.

¹⁸ Jalla ninacaqui werar Yooz tawkquiztan tsjii kjutñi tsjemat taku parličiča, "Jacatatz tjuñiqui watchiča", cjican. Jalla nuž čhiitiquiztan yekjap criichinacž kuznacaqui turwayskatžcu, Yooz jiczquiztan zarakskatchiča.

¹⁹ Jalla nuž cjenami Yoozqui niizquin kuzziz žoñinaca yanapča tjurt'iñi kuzziz cjeajajo. Jalla nižtiquiztan Yooz icliz žoñinacaqui tirapan tjuraquiča. Jalla nii puntuquiztan Yooz takuqui tuž cjiča, "Yooz Jiliriqui niiz illzta žoñinacž pajča". Nižaza, "Tjapa Jesucristužquin kuzziz žoñinacaqui ana wal kamañquiztan zarakstanča". Jalla nužupanča.

²⁰ Tsjiiilla cjesatča. Tsjii ricach žoñž kjuyquiziqui tjapaman cusasanaca žejlča, koriguiztan paata, nižaza paazquiztan paata, nižaza tabliquiztan paata, nižaza ljocquiztan

paata, jalla ništa cusasanaca žejlča tsjii kjuyquiziqui. Parti cusasaqui zuma visitanaca atintizjapa žejlča. Parti cusasazti zapuru kamzjapa žejlča.

²¹ Jalla ništa iratača zoñinacaqui. Yooz Jiliriz atintizjapa, nižaza zuma honorchiz cjsjapa, zuma kamstanča. Nižaza nii ana wali chiiñi zoñinacžquiztan cuitasaquiča. Yooz Jiliriztajapa sirwiñipankaz cjee. Nekztan Yooz Jiliriqui am ocupasača. Nižaza listu cjesača čjul wali paazjapami.

²² Tjotjowanacaqui ana wali pinsizcu, ana wali ojklayasacha. Amqui ništa anawali kamzquiztan cuitasaquiča. Yooz kuzcama kamaquiča, nižaza Yoozquinkaz kuzziz cjequiča, nižaza zuma munaziñi kuzziz cjequiča, nižaza parti zoñinacžtan zuma kamaquiča. Amtan tjapa Jesucristo Jiliržquin kuzziz zoñinacžtan zuma kamz waquiziča.

²³ Nižaza zumzu ana zizñi zoñinacaž ch'aaz puntunaca parlanacu, ana mitasaquiča. Nii ch'aaz puntu parlaquiž niñi, ultimupan juc'anti aptjapznasača. Jalla nii zizza amqui.

²⁴ Jesucristo Jiliržquin sirwiñi zoñiqui anaž ch'aaz waquiziča. Antiz tjapa zoñinacžtan zuma munaziñi kuzziz kamz waquiziča. Nižaza zuma tjaajiñi kuzziz cjis waquiziča. Nižaza pasinziz kuzziz cjis waquiziča.

²⁵ Nižaza Yooz tawk quintra zoñinacžquiz chiižinaquiča zuma humilde kuztan. Jalla nuž chiižinan Yoozqui cunamit ninacž kuz campiškatačani, werar Yooz tawk jaru wila kamajo.

²⁶ Anziqui ninacaqui diabluz kjarquiz žejlča, tsjii presužtakaz, diabluz mantita jaru ojkszapa. Amiz humilde kuztan chiižintiquiztan Yoozqui cunamit diabluz kjarquiztan ninacžquiz liwriita cjskatačani.

3

ANCHA ANA WALI ZOÑINACA ZELAQUICHA

¹ Jalla tišta zakaz intintazkatz pecuča. Ima Jesucristuž tjonan ch'amaž cjequiča zuma kamzjapa.

² Zoñinacaqui persun kuzcama kamzkaz pecaquiča. Nižaza paazquiz kuz tjaaquiča. Nižaza persun honorchiz cjis pecaquiča. Nižaza mit kuzziz cjequiča. Nižaza Yooz quintra chiiñi cjequiča. Nižaza maa ejpž takunaca ana casñi cjequiča. Nižaza ana jeczquizimi sparaquiž cjiñi cjequiča. Nižaza Yooz kamañ puntu ana rispitaquiča.

³ Nižaza ana okzñi kuzziz cjequiča. Nižaza ana jecztanami zuma kamaquiča. Nižaza zoñinacž quintra takunaca joojowaquiča. Nižaza jaknužt persun kuz pinsičhaja, jalla niicama ojklayñi cjequiča. Nižaza zoñi sufriskatz pečni kuzziz cjequiča. Nižaza zuma zoñinacž quintran cjequiča.

⁴ Nižaza tarasuna paañi kuzziz cjequiča. Nižaza ana eksñiž malcreados cjequiča. Nižaza persun honorchiz cjis pečni kuzzizkaz cjequiča. Nižaza persun kuzcama kamzquinkaz kuz tjaaquiča. Yooz kuzcama kamzquin anapan kuz tjaaquiča.

⁵ Ninacaqui Yoozquin criichiz cuzturumpi jaru ojklayñi cjenami, ultimquiziqui persun kamañ wira kaz paaquiča, anaž Yooz kamañ jaru cjequiča. Yooz aztan ana kamaquiča zuma kamzjapa. Jalla ništa kamñi zoñinacžtan anača ancha amigo pajasqui.

⁶ Nižaza yekjapanacaqui nii ana wal kamñi zoñinacžquiztan maatakžtan kjuyquiz luz peča, nii kjuychiz uj paañi maatakžquiz incallzjapa. Ništa maatakanacaqui uj paazquiztan ana atipasača. Nižaza juc'ant juc'ant ujchiz cjissa. Persun kuz ana ewjasñi atča. Jaziqui nii maatakanacaqui čjul ana wali pinsitanacž jaru ojklayča.

⁷ Zizñi cjis peccu, čjul tjaajintanacami catokča. Pero anawira werar Yooz taku intintazñi cjis atasacha.

⁸ Jalla nižtakaztača pucultan yatirinacaqui, Janes cjita zoñžtan nižaza Jambres cjita zoñžtan. Jalla ninacaqui Moisés quintra paachiča. Jalla ništa irata nii ana wal kamñinacaqui werar Yooz tawk quintra paača. Nižaza nii ana wal kamñi zoñinacaqui ana zum pinsamintuchiz tsjii kjutñipan chiiñiča "Yoozquin kuzziztča" cjcanaqui. Pero zumpacha tantiita cjequiča. Nekztan ninacž ana zuma kuz kjanapacha tjeežta cjequiča, tjapa zoñinacaž ninacž puntuquiztan werara zizajo.

⁹ Ninacaqui tsjii ratupanikaz ninacž taku walkatasacha. Nekztan zoñinacpachaž ninacž taku zuma tantižcu ninacž ana zuma razunanaca nayaquiča. Jalla ništa watchiča Janetan Jambrestan.

PABLUZ KAMTANAC PUNTU

¹⁰ Amzti weriž tjaajintanaca zumpacha catokchamča, nižaza weriž kamtanacami zumpacha zizamča, nižaza weriž kuzquiz tantiitanacami, nižaza weriž Yoozquin kuzziz kamtanacami, nižaza weriž zuma pasinziz kuzziz kamtanacami, nižaza weriž zuma munaziñi kuzziz kamtanacami, nižaza weriž tjurt'iñi kuzziz kamtanacami,

¹¹ nižaza žoñinacaž wejtquiz chjaajwkatcan kamtanacami, nižaza weriž sufrican kamtanacami. Jalla tjapa weriž kamtanacami zizzamčha. Nižaza amqui zumpacha zizza, jaknužt wejtquiz watčhaja Antioquía wajtquizimi, Iconio wajtquizimi, Listra wajtquizimi. Jalla nii watjanacquiziqui ancha sufrichinčha. Jalla nuž sufrichiž cjenami Yooz Jiliriqui wejr liwriičičha tjapa nii sufrisquiztan.

¹² Jalla nižta sufraquičha tjapa criiči žoñinacaqui. Jakzilta criiči žoñinacat Jesucristuž kuzcamapan zuma kamz pecčhaja, jalla nižta sufraquičha tjapa ninacaqui.

¹³ Nižaza ana wal kamñi žoñinacami nižaza incallñi žoñinacami tsjan juc'anti ana waliž kamaquičha, žoñinacžquiz incallaquičha, nižaza ninacaqui incallta zakaz cjequičha.

¹⁴ Amzti amiž zizta Yooz tawk jaru kamcan tirapan tjurt'iñi kuzziz cjequičha. Nižaza amqui zizza jecčhalaj amquiz tjajajinči, jalla nii. Nii tjajaintanaca zumpacha tantiižcu, legali Yooz takucamačha nii tjajajintanacaqui, jalla nii tantiyazzamčha.

¹⁵ Koltallquiztanpacha amqui cjiirta Yooz taku zizzamčha. Nii Yooz takuž istutiican, amqui liwriiči puntu ancha ziziñi cjissamčha. Yooz takuqui tjajaža, jaknužt liwriita cječhaja, Jesucristužquiz criičiž cjen, jalla nii.

¹⁶ Tjapa nii cjiirta Yooz takuqui Yoozquiztancoma ulanchicamačha. Jalla nižtquiztan Yooz takučha zuma tjajajiñipanqui, nižaza uj tjeežñiqui, nižaza zuma Yooz jiczquiz ojklajajo azquichñiqui, nižaza tjapa Yooz kuzcama tjajajiñipanqui.

¹⁷ Jalla nužupančha Yooz takuqui. Yooz taku zumpacha catokžcuqui, Yoozquin kuzziz žoñinacaqui zumpacha ziziñi cjissa Yooz kamañquizkaz zuma kamzjapa. Nižaza Yooz taku catokžcuqui Yoozquin kuzziz žoñinacaqui zumpacha tjaczi cjissa, tjapaman walinaca paazjapa.

4

PABLUZ CHIIZINTA TAKU

¹ Jesucristo Jiliriqui mantizjapa tjonaquičha. Jalla nuž tjonžcu ticzimi žejtñimi pjalz-naquičha. Jalla niž yujcquizimi Yooz Ejpž yujcquizimi am chiižinučha, Yooz taku paljayaquičha amqui.

² Nižaza timpuchiz cjicanami ana timpuchiz cjicanami tirapan Yooz tawkžtan žoñinacžquiz chiižinaquičha. Nižaza žoñinacžquiz intintiskataquičha Yooz taku weraračha, jalla nii. Nižaza uj paañi žoñinacžquiz Yooz tawkžtan ujznaquičha. Nižaza zumpacha amtayaquičha. Jalla nuž chiižincan, zuma pasinziz kuzzizpan tirapan tjajajnaquičha.

³ Tsjii timpuž tjonaquičha. Jalla nii timpuquiz žoñinacaqui zuma Yooz taku tjajajintanaca anaž nonz pecaquičha. Antiz jakzilta tjajajiñit ninacž persun kuz wali cjiskatačhaja, jalla nii tjajajiñinaca nonzkaz pecaquičha. Ninacž persun ana wali razun jaru, jalla nižta tjajajintanaca pecaquičha.

⁴ Werar Yooz taku anapanž nonz pecaquičha. Ina žoñž parlakaz nonz pecaquičha.

⁵ Amzti zuma werar razunanac jaru tirapan lijituma kamaquičha. Sufricanami zuma tjurt'iñi kuzziz cjequičha. Nižaza zuma liwriiči Yooz taku paljayzquin kuz tjaaquičha. Nižaza amqui Yooziž tjaata kamañ cumplaquičha.

⁶ Wejrqui tsjii wilanažtakaz contal cjeečha. Wejt ticz tjuñiqui wajillačha.

⁷ Zuma zultatužtakaz wejrqui Yoozquin zuma tjurt'iñi kuzzizpan zejłchinčha. Nižaza wejrqui wejt apóstol oficio zuma cumplichinčha. Nižaza tirapan Yoozquin tjapa kuztan criyučha.

⁸ Jaziqui arajpachquin ojžču weriž Yooz kuzcama kamtquiztan, tsjii zuma premiužtakaz gansjapa tjewnučha. Jesucristo Jiliričha lijituma pjalñiqui. Jalla niiqui niž pjalz tjuñquiz nii premio wejtquiz tjaaquičha. Anaž wejtquizkaz premio tjaaquičha. Tjapa nižquin kuzziz žoñinacžquiz premio tjaaquičha. Ninacazakaz niž tjonz tjuñi ancha tjewža, ancha cherez pecčha.

PABLUQUI ZINALLA CARSILQUIZ ZEJLCHA

⁹ Timoteo jila, tsjiillakaz cjesačha. Tsjii wiltallami wejr cherezñipan tjonz pecall amqui. Wajilla tjonalla.

¹⁰ Demaszi wejr zinalla ecchičha. Tii muntuquiz zejłñi cusasanaca juc'anti pecčha. Jalla nekztan wejtquiztan ojkičičha Tesalónica watja ojczjapa. Nižaza Crescentiqui Galacia yokquin ojkičičha. Nižaza Tituzti Dalmacia yokquin ojkičičha. Jaziqui wejtquin tjonalla.

¹¹ Lucaskazza wejttañi chicaqui. Jaziqui Marcos kjurznaquičha. Nuž wajtžcumu zjič-caquičha amtan. Marcosqui wejtquiz zuma yanapasačha Yooztajapa langzquiztan.

¹² Tiquico wejrqui cuchanchinčha Efeso wajtquin.

¹³ Amqui tjoncan wejt irs caputi zjijcnaquiĉha. Wejt irs caputi ecchinĉha Carpos kjuyquiz Troas wajtquin. Niĉaza librunaca zjijcnaquiĉha. Tsjan chekanac wejt papilanaca zjijcnaquiĉha.

¹⁴ Alejandro, nii cobre jirunaca paañiqui ancha wejt quintr paachiĉha. Jalla niĉ paatiquiztan Yooz Jiliriĉqui nii casticaquiĉha.

¹⁵ Amqui niĉquiztan cuitasaquiĉha. Niiĉqui uĉhum paljayta Yooz taku ancha quintrĉha.

¹⁶ Weriz jilirnacĉ yujcquiz primera tjurt'lni tawkĉtan chiyan, anaĉ jecmi wejtquiz tjurt'i yanapĉhiĉha. Tjapa wejr zinalla ecĉhiĉha. Ninacaĉ ectiquiztan Yoozqui ninaca anakaj casticla.

¹⁷ Yooz Jiliriĉqui wejtquiz yanapĉhiĉha. Niĉaza wejtquiz zuma tjup kuzziz cjiskatĉhiĉha, jalla niĉtiquiztan wejrĉqui liwriiñi Yooz taku tirapankal paljayuĉha, tjapa ana judio ŉoñinaca nonznajo. Niĉaza wejr konz cjen Yoozqui wejr liwriiĉhiĉha.

¹⁸ Niĉaza tjapa ana walinacquiztan wejr liwriyaquiĉha, niĉaza Yoozqui wejr cuitaquiĉha niĉ arajpach wajtquin cjisjapa. Zuma Yoozqui wiñaya wiñaya honorchizkaj cjila. Amén.

¹⁹ Tsaanzinalla Priscaquin, niĉaza Aquilĉquin, niĉaza Onesiforuĉ familianacĉquin.

²⁰ Erasto cjita jilaĉqui Corinto wajtquin ecĉhiĉha. Trófico cjita jila jalla nii laa ecĉhinĉha Mileto wajtquin.

²¹ Ima zac timpu luzan tjonĉquizpan pecalla. Niĉaza amquin tsaanĉquiĉha Eubulo cjita jilami, niĉaza Pudente cjita jilami, niĉaza Lino cjita jilami, niĉaza Claudia cjiti cullacami, niĉaza tjapa criĉhi jilanacami.

²² Jesucristo Jiliriĉqui amtan chicaj cjilalla, niĉaza tjapa anĉhucaquiz zumaj wintijla. Amén.

LA CARTA DEL APOSTOL SAN PABLO A TITO

¹ Wejrtĉha Pablutqui, Yooz mantitacama okiñ zoñtĉha, niżaza Jesucristuż cuchanżquita apostoltĉha. Jesucristużqui wejr apóstol puestużquiz utchiĉha criichi zoñinacżquiz Yoozquin juc'ant kuzziz cjiskatzjapa, niżaza Yooz kamañ puntu ultim werara zizkatajo,

² niżaza arajpachquin Yooztan wiñaya kamz tjewzkatajo. Yoozqui ana toscara chiyasaĉha. Jalla niiqui arajpachquin wiñaya kamzjapa taku tjaachiĉha tuqui timpuquiz-tanpacha.

³ Nekztan niż pinsita timpuquiz Yoozqui nii kamz puntuquiztan kjanapacha kjanzt'ichiĉha paljayta liwriiñi Yooz tawkquiztan. Nii liwriiñi taku paljayajo, uĉhum Liwriiñi Yoozqui wejtquiz mantichiĉha. Jalla niżtiquiztan wejrtĉha liwriiñi taku paljayñi kamañchizqui.

⁴ Tito jila, jaziqui wejrqui amquin tii cartal cjjrżcuĉha. Wejt maati cuntamĉha. Amqui Yoozquin kuz lijituma tjaachamĉha. Jaziqui pucultan uĉhumqui Yoozquin kuzzizĉhumĉha. Yooz Ejpżtan niżaza Jesucristo uĉhum Liwriiñiżtan, amquiz yanapla, niżaza amquiz okzla, niżaza walikaj kamkatla.

ICLIZ JILIRINACAQUI ZUMA KAMZPANCHA

⁵ Creta yokquin wejrqui am ecchinĉha, criichi zoñinacżquiz juc'ant zuma kamañanacchiz cjiskatajo, niżaza weriż mantitacama zapa wajtquiz icliz jilirinaca uchajo.

⁶ Icliz jilirinacaqui zuma kamzpanĉha: Zuma kamañchizlaj niiqui, ana jakziltami ĉjul ujmi tjeeznasaĉha. Icliz jilirinacaqui tsjaa tjunatanpanikaz cjispanĉha. Niżaza niż maatinacaqui Yoozquin criiñi cjispanĉha. Niżaza niż maatinacaqui zuma kamañchiz cjispanĉha, ana malcreado. Niżaza maa ejp cazñi kuzziz cjispanĉha.

⁷ Jakzilta icliz jilirit Yooz icliz cwiitiñi puestużquiz uchta cjeĉhaja, jalla niiqui zuma kamañchizkaz cjispanĉha, jalla niżtiquiztan ana jakziltami niżquiz ĉjul ujmi tjeeznasaĉha. Niżaza ana persun kuzcamakaz pecñi cjispanĉha. Niżaza ana oralla žawjñi kuzziz cjispanĉha. Niżaza ana licñi kuzziz cjispanĉha. Niżaza ana kichjasñi kuzziz cjispanĉha. Niżaza ana ancha paaz pecñi kuzziz cjispanĉha.

⁸ Niżaza ĉjul tjonżñinacżquizimi zuma kjawzñi kuzziz cjispanĉha. Niżaza zumanapan pecñi kuzziz cjispanĉha. Niżaza zuma pinsamintuchiz cjispanĉha. Niżaza Yooz kuzcamapankaz kamñi kuzziz cjispanĉha. Niżaza Yoozquin tjapa kuz sirwiñi cjispanĉha. Niżaza persun kuz zuma ewjazñi cjispanĉha, ĉjul uj paaz cjenami.

⁹ Niżaza apostoluż tjaajinta jaru ultim werar Yooz tawkquiz tjurt'ichi kuzziz cjispanĉha. Niżaza werar Yooz taku zuma tjaajincan, criichi zoñinacżquiz p'ekinchayasaĉha, niżaza Yooz tawk quintra chiiñinacżquiz ninacż ana zuma pinsamintunaca tjeeznasaĉha.

¹⁰ Creta yokquin walja ana zuma zoñinaca žejlĉha, ana jiliri cazñi. Niżaza ina razunanacaż chiiñiĉha. Niżaza criichinacżquiz incallĉha. Niżaza ninacaqui judío cuzturumpinac jaruzakaz kamz pecñiĉha. Ninacaqui juc'anti niżta ana waliż kamĉha.

¹¹ Nii ana zum zoñinacaqui ana wali tjaajinĉha, paaz gansjapakaz. Jalla ninacż ana zuma chiiñi ataqui chawjcsinsa, ana niżta tjaajnajo. Ninacaqui ana wali tjaajincan, kjuychiz familianaca intiru quejpskatĉha. Jalla niżta ana wali tjaajinz ana waquiziĉha.

¹² Tsjii Cret wajtĉiz zoñiqui ariwiñitaĉha. Nii Cret zoñipacha cjichiĉha: "Cret wajtĉiz zoñinacaqui toscar zoñinacapanĉha, niżaza malcreado zoñinacaĉha, niżaza walja lujlñi zoñinacaĉha, niżaza jayranacaĉha". Jalla nuż cjichiĉha nii Cret zoñiqui.

¹³ Jalla nii zoñiqui razuna chiiĉhiĉha. Jalla niżtiquiztan Cret wajtĉiz anawal criichinacżquiz zumpacha ujznaquiĉha, Yoozquin tjapa kuzziz werar Yooz tawkquiz tjurt'ajo.

¹⁴ Niżaza chiiżinaquiĉha judío quintunaca ana juyzu paajo. Yekjap zoñinacaqui werar Yooz taku anaż catokz pecĉha. Jaziqui Cret zoñinacżquiz chiiżinaquiĉha nii Yooz tawk quintra zoñinacż mantitanaca ana juyzu paajo.

¹⁵ Jakziltat Yooz kuzcama zuma kamĉhaja, jalla niiqui ĉjulu paacanami Yoozquin kuzzizpanĉha. Pero ana zuma kamañchiz ana criichinacaqui ĉjulu paacanami ana Yoozquin kuzziza, persun pecta kamzquinkaz kuzzizza. Ninacaĉha ana zuma pinsamintuchizkazqui. Niżaza persun uj paażcumí ana naažñiĉha.

¹⁶ Ninacaqui cjiñiĉha, "Yooz pajuĉha" cjan. Ultimquiziqui ana zuma kamñiz cjen Yooz quintranpanikaz kamĉha. Yoozqui ninacaż ana zuma kamtiquiztan anaż justazza. Ninacaqui Yooz kuzcama ana cazñipanĉha. Niżaza ninacaqui ana ĉjul zuma paazmi atasaha.

2

ZUMA TJAAJINTA PUNTU

¹ Tito jila, amqui zuma tjaajinta jaru tjaajnaquiča, jalla tužu:

² Chawc zoñinacaqui zuma ewjazñi kuzziz cjispanča. Nižaza rispitta kamañchiz cjispanča. Nižaza zuma pinsamintuchiz cjispanča. Nižaza Yoozquin tjapa kuzziz cjispanča. Nižaza zuma munaziñi kuzziz cjispanča. Nižaza tjurt'iñi kuzziz cjispanča.

³ Jalla nižta irata zakaz cjispanča chawc maatakanacami. Zuma kamañchiz cjispanča, jaknužt Yooz yujcquiz zuma kamz waquizičaja, jalla nižta. Nižaza ana čjul ana wal quintumi joojooñi cjispanča. Nižaza ana licñi kuzziz cjispanča. Nižaza parti maatakanacžquiz zumanaca tjaajiñipan cjispanča.

⁴ Nižaza parti maatakanacžquiz čhižinasacha, persun luctakžtanami maatinacžtanami zuma munaziñi cjisjapa.

⁵ Tur maatakanacaqui zuma pinsamintuchiz cjispanča. Nižaza anapanž yekja luctaka pinsispanča. Nižaza kjuya zuma cwitiñi cjispanča. Nižaza okzñi kuzziz cjispanča. Nižaza luctakž jaru cjispanča. Jalla nižta zuma kamtiquiztan anaž jecmi Yooz tjaajinta tawk quintra chiyasača. Jalla nižta tjaajnaquiča chawc maatakanacaqui.

⁶ Nižaza tjowa luctakanacžquiz zakaz čhižinaquiča nižta zuma kamañchiz kamajo. Nii tjowa luctakanacaqui ewjazñi kuzziz cjispanča, ana čjul uj paazjapa.

⁷ Ampacha zumapankaz kamz waquiziča. Jalla nižtiquiztan tjowa luctakanacaqui am zuma kamñi cheržcu, nižta iratazakaz zuma kamasacha. Nižaza amqui tjaajincanaqui zumapan tjaajnaquiča zuma kuztan, nižaza humilde kuztan.

⁸ Jalla nuž amiž zuma tjaajintiquiztan anaž jecmi amquiziqui uj tjojtñasacha, "Ana wali tjaajinchamž amqui" cjananaqui. Nižaza amiž zuma tjaajintiquiztan quintra zoñinacaqui azkataquiča. Ana čjulumi am quintra uj tjeezñi atasacha.

⁹ Amqui criichi piyunanacžquiz čhižinaquiča, ninacž patrunž mantita jaru cjejajo. Nižaza čjulu paacanami patrunžquiz cuntintu cjiskatasacha, anapanž chayñi kuzziz cjispanča.

¹⁰ Nižaza anača tjañi cjispanqui, antiz litumapanž cjispanča, zuma cumpliñi. Jalla nižta piyunanacaž kamtiquiztan, zoñinacaqui učhum Liwriñi Yooz tjaajinta puntuquiztan "Walipanča" cjan chiyasača.

¹¹ Yoozqui tjapa zoñinacalta Jesucristo cuchanžquichiča. Jaziqiu jakziltat Jesucristužquiz kuzziz cječhaja liwriita cjesača. Jalla nuž cuchanžquitaž cjen Yoozqui niž okzñi kuzziz tjeeziča.

¹² Nii okzñi kuzziz Yoozqui učumnacaquiz tjaajža, Yooz tawk quintra paatanaca ecajo, nižaza ana wal kuzquiztan pectanaca ecjo. Nižaza Yoozqui tjaajža, tii muntuquiz žejlcan persun kuz ewjazpanča čjulu uj paaz cjenami, nižaza čjulu ana wal čhiž cjenami. Nižaza Yooz kuzcama kamspanča. Nižaza Yoozquin tjapa kuz sirwispanča. Jalla nuž tjaajža Yoozqui.

¹³ Učhum Liwriñi Jesucristuča pajk Yoozqui. Jalla niiqui zuma pajk obra tjeezcan tii muntuquiz wilita tjonauquiča. Jalla niž tjonz tjuñquiziqui cuntintuž cjequiča tjapa criichinacaqui. Jalla nižtiquiztan zuma kamcan niž tjonz tjewznaquiča. Jalla nižta tjewz waquiziča, jalla nii tjaajža Yoozqui.

¹⁴ Nii tjonzñi Jesucristuqui učhum laycu ticziča, tjapa ana walinacquitzan liwriizjapa. Ana walinacquitzan učhum liwriichiča, niž partir zoñi cjiskatzjapa, nižaza učumnacaquiz tjamapan zumanaca paaz ancha pecñi kuzziz cjiskatzjapa.

¹⁵ Jalla nii tjaajintanaca amqui zakaz tjaajinstanča, zumpacha čhižincan, nižaza p'ekinchaycan. Nižaza nii tjaajintanaca panž mantaquiča zoñinacaž nii tjaajinta jaru kamajo. Jilir puestuchiz cjen nižta mantaquiča. Nekztan amiž tjaajintiquiztanacu anaj jecmi am iñarla.

3

PABLUZ CHIIZINTA TAKUNACA

¹ Criichi zoñinacžquiz cjuñskataquiča jalla tužupan: Ninacžlaqui gobierno mantiñi zoñinacžquizimi jilirinacžquizimi jalla ninacž mantuquiz zuma kamz waquiziča. Nižaza ninacaž mantitanaca caz waquiziča. Nižaza listupan cjispanča zuma obranaca langzjapa.

² Nižaza anaž jakziltižquizimi čjaawjkatasacha. Nižaza ana ch'asñi kuzziz cjispanča. Nižaza llan kuzziz cjispanča. Nižaza tjapa zoñinacžtan humilde kuzziz cjispanča.

³ Tuquiqui učhumqui ana criichi zoñinacazakaztača. Yooz puntuquiztan zumzu ana zizñi kuzziztača. Nižaza ana Yoozquin cazñi kuzziztača. Nižaza tsjii kjutñi cjičjiñčhumtača. Nižaza učhumqui persun kuzcama ojklayiñčhumtača, jaknužt učhum ana wal kuz

pecthaja, jalla nuž. Nižaza ana wal kuzziz kamiñchumtača. Nižaza tsjii želinchiz žoñiztakaz cjis pequiñchumtača ana wali zmazñi. Nižaza učum ana wali kamtiquiztan žoñinacaqui učum quintra žawjñitača. Nižaza žoñinacžtan porapat chjaawjkatñi kuztan ch'aasiñchumtača.

⁴ Jalla nuž učumnacaž ana zuma kaman učum Liwriiñi Yoozqui niiz zuma kuzmi nižaza niiz okzñi kuzmi tjeeziča.

⁵ Jalla nižta okzñi kuzziz tjeežcu Yoozqui učum liwriichiča. Učumnacaqui tsjii lii jaru kamtiquiztan ana liwriitatača. Pero učum ana zum kuz awjžintaž cjen, nižaza Yooz Espiritu Santuqui učumnac kuznacquiz luzziž cjen, Yoozqui učum liwriichiča. Nekztan ew zuma kamañña tjaachiča.

⁶ Učum Liwriiñi Jesucristuž cjen Yoozqui tjapa učumnacaquiz niiz Espiritu Santo ancha zuma kuztan tjaachiča.

⁷ Yooz Ejpqui niiz okzñi kuzziz tjeežcu učumnacaquiz nii fava paachiča, niiz yujcquiz zumapan cjisjapa. Nižaza Yoozqui učumnacaquiz arajpach irinsa tanzñinaca cjskatchiča. Nižta irinsa tanzñinacaž cjen učumnacaqui tjewznača Yooztan chica wiñaya kamzjapa.

⁸ Ultim werarača Yoozquiztan tjaajintaqui. Nižaza zumpacha tjurt'iñi kuztan nii tjaajintanacquiz panž tjurt'aquiča, Yoozquin criichinacaž zuma kamzquin kuz tjaajo. Jalla nii tjaajintaqui ancha zumapanča, tjappach žoñinacžta. Nižaza zumapanž yanapča Yooz kamañquiz juc'ant zuma kamzjapa.

⁹ Zumzu ch'aazñinacžquiz ana mitisa, nižaza zarakaquiča nii zumzu ch'aazñinacžquiztan. Nižaza tuquita atchi ejpnacž puntu parlita nonzquiztan zarakaquiča. Nižaza Moisés lii puntuquiztan ch'aasnan jalla nižtanaca nonzquiztan zarakaquiča. Tjapa nii ana wali parlitanacaqui inakazza. Zuma kamañchiz kami anapanž yanapča.

¹⁰ Jakzilta icliz criichinacat pjali t'akačhaja, jalla nii žoñi kjawznaquiča. Nekztan chiižinaquiča tsjii wiltami pizc wiltami. Amiz chiižinta anaž nonznaquiz niiqui, iclizquiztan chjatkattaž cjequiča.

¹¹ Niiz ana nonžtiquiztan amqui zizzaquiča, nii žoñiqui ana zuma kuzzizpanča, nižaza tsjii kjutñi chjichta kuzzizpanča, jalla nii. Persunpacha niiz uj paata naaznasača. Ancha ujnaca paaz pecñi kuzziz cjen castictaž cjequiča.

¹² Wejrqui amquin Artermas už Tiquico cuchanžcača. Jalla niiz irantižquitan, amqui wejtquin uri tjonz pecalla. Wejrqui Nicópolis wajtquin želača. Jalla nicju awti timpu watz tantiichinča.

¹³ Nii tjurt'iziñi Zenas awjatu, nižaza Apolos, jalla nii pucultan žoñinaca zumpacha despachaquiča amqui, ninaca ana čjulumi pjaltizjapa. Nižaza zumpacha žaka cjižinaquiča ninaca ojkzjapa.

¹⁴ Nižaza učum criichinacaqui zuma kamznacquiz kuz tjaaz waquiziča. Nekztan t'akjir criichi žoñinacžquiz yanapaquiča. Nižaza wacchi zuma obranaca tjeeznaquiča.

¹⁵ Tjapa wejtan chica kamñi žoñinacaqui amquin tsaanžquiča. Nižaza wejrmi amquin tsaanžcuča. Nižaza amqui wejtnaca k'ayi criichinacžquiz tsaanžinaquiča. Yoozqui amquiz nižaza tjapa nekz žejlñi criichi žoñinacžtan zumapaj yanapla. Jalla nužoj cjila. Amén.

LA CARTA DEL APOSTOL SAN PABLO A FILEMON

PABLUQUI FILEMONZQUIZ CARTA APAYCHICHA, ONESIMUZQUIZ ZUMA RISIWAJO

¹ Wejrt'cha Pablutqui. Jesucristužquin sirwiñiž cjen carsilquiz chawjctit'cha. Filemón jila, amqui Yoozquin sirwiñi mazim'cha, nižaza pecta jilam'cha. Wejttan Timoteo jilžtan amquin tii cartal cjižr'cuča.

² Nižaza cjižr'cuča am kjuyquiz ajczñi criichi zoñinacžquin. Nižaza cjižr'cuča Apia cullacaquin, nižaza Arquipo jilžquin. Arquipuqui zuma zultatužtakaz tjurt'iñi kuzziz Yoozquin sirwiča.

³ Učhum Yooz Ejpžtan nižaza učhum Jesucristo Jiliržtan, ančucaquiz zumapaj yanapla, nižaza walikaj kamkatla.

FILEMON ANCHA ZUMA TJAPA KUZUZZA

⁴ Yoozquin mayizican am cjuñznuča. Amiž cjen wejrqui tirapan Yoozquin sparaqiz cjiw'ča.

⁵ Amqui zuma munaziñi kuzziz kamñam'ča tjapa criichi jilanacžtan. Nižaza amqui Jesucristužquin tjapa kuzziz criicham'ča. Jalla nii am puntu zizcu, Yoozquin sparaqiz cjičin'ča.

⁶ Ammi parti Jesucristužquin kuzziz zoñinacami Yooz zuma kamañchizza. Jesucristužquin kuzziz cjen učumnacalta ancha Yooz zumanaca žejl'ča. Amiž zuma kamz cjen zoñinacauqui Yooziž tjaata zumanaca puntuquiztan juc'anti intintazñi cjissiča.

⁷ Filemón jila, amiž cjen criichi jilanacž kuznacaqui cuntintu cjiskattača. Wejrqui zakaz nižaza cuntintu cjissin'ča, am zuma munaziñi kuzziz cjen.

PABLUQUI TSJII FAVORA MAYCHICHA

⁸ Wejrqui Cristuž illta apostult'ča. Jalla nižtiquiztan wejrqui jaknužt am kamz waquizichaja, jalla nii amquiz mantasacha.

⁹ Pero amquin ana mantača. Antiz amquiztan tsjii favora mayuča. Wejrt'cha chawcalla, nižaza Jesucristužquin sirwiñiž cjen carsilquiz preso želuča. Amtan zuma munazican, amquiz roz pecuča Onesimužquiz tsjii favora paajo.

¹⁰ Tii carsilquiz žejlcan, wejrqui Onesimužquiz Yooz taku paljaychinča. Nekztan Onesimuqui Yoozquin criichiž cjen wejt maati cunta cjissiča.

¹¹ Niiž tuquiqui Onesimuqui ana wal kamañquiz luzzitacha. Anziqui zuma kamañquiz luzziča. Jaziqiui niiqui amtani wejtmani walipan'ča.

¹² Jaziqiui wilta amquin cuchanzcuča. Nižaza niiž irantizcu amqui zuma risiwaquiča, jaknužt wejr risiwcham'ča, jalla nuž.

¹³ Tekz wejttan chica eclichaj cjiw'ča. Carsilquiz želan Onesimuqui am cuntiquiztan wejtquiz sirwasacha. Wejrqui Yooz taku paljaytquiztan tii carsilquiz želuča.

¹⁴ Pero amtan ima zumpacha parlican, wejrqui anal Onésimo ecliskatz pecuča. Amquiz anal ancha mantiz pecuča, wejtta tsjii favora paazjapa. Onésimo wejttan chica tira kamasacha. Pero am persun kuzquiztan nuž tantiitaž niil pecuča.

¹⁵ Tsjii timpuqui Onesimuqui amquiztan zarakchiča. Cunamit nižta katčhani, amtan chica tsjii criichi jila watay wata cjisjapa.

¹⁶ Jaziqiui anača piyunakazqui. Antiz Yoozquin criichi k'ayi jilazakazza. Wejrqui niižquin k'ayachuča. Walikazza niiqui. Amzakaz Onesimužquiz k'ayachaquiča am zuma žoñiž cjen, nižaza Yoozquin criichi jilažta cjen.

¹⁷ Nižaza amqui wejtquiz zuma amigumžlaj niiqui nekztan Onésimo zuma risiwaquiča, wejt cunta cjenauqui.

¹⁸ Tuquiqui Onesimuqui amquiz ana wali paachizlaj niiqui, weril respontacha. Nižaza Onesimuqui amquiz čhulu kaja cjenami, wejtquizkam cobraquiča.

¹⁹ Wejrpacha tii litranaca persun kjaržtan cjižr'cuča, wejrqui tjapa pacača. Pero wejr am cjuñskatasacha, weriž cjen amqui Yoozquin criicham'ča.

²⁰ Wejt jila, jalla nii favoraž paalla, Yoozquin criichi jilažta. Wejr kuznalla, Cristužquin criichi jilažta.

²¹ Yooz kuzcama kamñam'ča. Jaziqiui nayuča, amqui tii weriž mayta favorquiztan juc'anti paaquiča, nii. Jalla nužupanž cjequiča.

²² Nižaza wejtta tsjii alujamintu tjačzinalla. Wejrqui ančuc cherzñi tjonz pecuča. Yooz munan nižaza ančucaž mayizitaž cjen wejrqui tjonacha, ančuc cherzñi. Jalla nii ojkszjapa tjewznuča.

²³ Epafraŝqui amquin tsaanžquiča. Niiqui wejttan chica carsilquiz žejlča, Jesucristužquin sirwiñiž cjen zakaz.

²⁴ Marcustan, Aristarcužtan, Demastan, nižaza Lucastan, jalla ninacaqui amquin zakaz tsaanžquiča. Ninacača wejt mazinacaqui, Yooz sirwiñi langzñiča.

²⁵ Učhum Jesucristo Jiliriqui amquiz zumaj yanapla. Jalla nužoj cjila. Amén.

LA CARTA A LOS HEBREOS

YOOZ MAJCH PUNTU

¹ Tuquí timpuquí Yoozqui niiz puntunaca zizkatchiicha uñum tuquita atchi ejpnacžquiz. Yoozqui niiz cuntiquiztan chiiñi profetanacžquiz jaknužquiztanami wiltan wiltan niiz taku zizkatchiicha. Nekztan nií profetanacaqui uñum tuquita atchi ejpnacžquiz parlichicha.

² Anziquí tii timpuquíz Yoozqui niiz Majch cjen uñumnacaquíz juc'ant zizkatchiicha niiz puntunaca. Yooz Majchta tjapa žejlñinacaqui. Yooz Ejpqui niiz Majch cjen tjappacha paachiicha. Nekztan niiz Majch mantuquíz tjappacha utchiicha.

³ Yooz Majchtan Yooz Ejpžtan tsjii kuzzizpanča, jalla nižtiquiztan Yooz Majchkazza Yooz Ejpž juc'ant zuma kuz tjeezñiquí. Nižaza Yooz Majch kjarquíz tii muntu žejlča. Niiz chiitaž cjen tii muntu žejlñipanča. Walja azzizza niiz chiitaquí. Nii Majchpacha uñum ujnacžquiztan ticziicha, uñum pertunta cjsjapa. Jalla nekztan arajpacha ojkičiicha. Jalla nicju arajpach Yooz Ejpž žew latuquíz julziicha, mantiñijapa.

⁴ Nii Yooz Majchquí tjapa anjilancžquiztan tsjan chawc jiliriicha. Nižaza tjapa anjilancžquiztan tsjan zuma puesto tanzicha.

⁵ Yooz Ejpqui ana jakzilta anjilžquízimi tuž chiichiicha: “Amčha wejt Majchquí. Jaziquí amquin wejt kamañal tjaa-učha”. Jalla nuž cjican, ana jakzilta anjilžquízimi chiichiicha. Antiz niiz zinta Majchquíz alajakaz nuž chiichiicha. Nižaza Yooz Ejpqui niiz Majch puntuquíztan cjichizakazza:

“Wejrqui nižtajapa niiz Ejp cjeeča. Niiquí wejtajapa wejt Majch cjequičha”.

⁶ Wiruñ Yooz Ejpqui niiz zinta Majch tii muntuquíz cuchanžquíz pinsiscu tuž chiichiicha:

“Tjapa wejt anjilancacaqui wejt Majchquíz rispítla”.

⁷ Yoozqui anjilancacž puntuquíztan tuž chiichiicha:

“Wejrqui wejt anjilancaca cuchničiicha tsjii apura ojkiñi tjamižtakaz. Nižaza wejrqui wejtquíz sirwiñi anjilancacžquíz cjskatučha tsjii uj peekstažtakaz”.

⁸ Pero niiz Majch puntuquíztan Yooz Ejpqui tuž cjichiicha:

“Amčha Yoozqui. Am mantiz puestuquí wiñayjapa cjequičha. Am mantizqui litituma-pankazza.

⁹ Amqui zuma litituma mantiz pecñampanča. Yooz kuz quintra paañinaca panž ch-jaawñamčha amqui. Wejrtčha am Yoozqui. Amquíz juc'ant honorchiz cjskatchinča, čjul žejlñinacžquíztanami”.

¹⁰ Yooz Ejpqui niiz Majch puntuquíztan cjichizakazza:

“Amqui jilirimčha, tuquí timpuquíztanpacha amqui anaž čjulquíztanami tii mundo paachamčha. Nižaza am kjaržtan arajpacha paachamčha.

¹¹ Amqui wiñayjapam želaquičha. Pero nií paata arajpachami yokami tucuzinžnaquičha. Tsjel zquitižtakaz tucuzinžnaquičha.

¹² Pižta zquitižtakaz tsjii latu ectaž cjequičha. Liwj campiitaž cjequičha. Amzti ana nižta campiyaquičha. Amqui wiñay wiñayjapa cjequičha”.

¹³ Yoozqui niiz Majchquíz tuž cjichizakazza:

“Wejt žew latuquíz julzna, am quintranaca kjojchtan tjezczama”.

Jalla nuž Yooz Ejpqui cjichiicha niiz Majchquíz. Ana wira tsjii anjilžquíz nuž chiichiicha.

¹⁴ Tjapa anjilancaca ana cheraña ojklayñiquí, Yooztajapakaz sirwiñiicha. Yoozqui ninaca cuchanča, liwriita žoñinacžquíz yanapi.

2

LIWRIINI TAKU IMPORTIČHA

¹ Jilanaca, cullaquinaca, Yooz puntu tjajintancacžquíz juc'anti kuz tjaaž waquiziča, werar zuma kamañquíztan tsjii kjutñi ana chjitžta cjsjapa.

² Tuquiquí anjilancacaqui žoñinacžquíz chiichiicha. Jalla nií chiitaquí walñitača. Jakziltat nií chiita jaru ana kamtčhaja, uj paachiicha. Nekztan nií uj paañinacaqui ninacž ana zuma paatiquíztan jama castictapan cjsiicha.

³ Nižaza tii timpuquízquí zuma liwriiñi takuquí uñumnacaquíz zumpacha kjanzt'itača. Jalla nií liwriiñi taku ana catokaquíz niiquí, ¿kjaž Yooz castictiquíztan atipasajo? Anapanž nií castictiquíztan atipi atasača. Primeraquí nií liwriiñi takuquí Jesucristo jiliriz paljaytatača. Nekztanaquí Jesucristuž tjajinta žoñinacaqui nií liwriiñi takupacha uñumnacaquíz litituma paljaychiicha.

⁴ Jalla nuž paljayan Yoozqui zuma pajk obranacami nižaza ispantichucanacami, nižaza tјapaman milajrunacami paachiča. Nižaza Yoozqui crichi žoñinacžquiz niž munañpacama niž Espiritu Santuž tјaata kamañanaca tojunchiča. Jalla nižta Yoozqui tјeeziča, nii liwriiñi takumi lititumača, jalla nii.

JESUCRISTUQUI ZOÑI CJISSICHA

⁵ Yoozqui niž wiñayjapa mantiz puestuquiz anjilanaca ana utchiča. Jalla nii puntuquiz-tan cijržcuča.

⁶ Tsjii cijirta Yooz takuqui tuž cjiča:

“Zoñiča anaž čjulumi. Yooz Ejp, ¿kjažtiquiztan amqui žoñinaca cjuñjo? ¿kjažtiquiztan žoñinacžquiz honorchiz cjiskatjo?”

⁷ Tii kjaž watanaca anjilanacaqui žoñžquiztan tsjan jilir puestuquiz žejlča. Jalla nuž Yoozqui munchiča. Nekztanaqui Yoozqui žoñžquiz juc'ant honorchiz cjiskataquiča anjilanacžquiztan. Nižaza juc'ant zuma kamzqui žoñžquiz tјaataž cjequiča.

⁸ Yoozqui žoñž mantuquiz tјapa tii muntupacha utča”.

Jalla nuž čiičiča Yooz takuqui. Jaziqiu Yoozqui žoñž mantuquiz tјapa tii muntu žejlñinaca utchiča. Jalla nižtiquiztan žoñž mantuquiz tјappachapankaz cjequiča. Imazipañča tјappacha žoñž mantuquiz žejlča.

⁹ Pero Jesucristuž puntu naya. Niiqui tsjii kjažtapacha anjilanacžquiztan upa jilir puestuquiz cjiskattatača, žoñinacž laycu ticzjapa. Yooz žoñinacžquiz okžñiz cjen Jesucristuqui tјapa žoñinacž laycu ticziča. Jalla nuž ticztiquiztan Yoozqui nižžquiz juc'ant zuma honora tјaachiča; nižaza Jesucristuqui juc'ant zuma kamaña tanziča.

¹⁰ Yooz cjen tјappacha žejlča, nižaza nižtajapa žejlča. Zuma Yoozqui pinsičiča, tјapa niž maatinacaqui pruebanaca watžcu, nižtan čica honorchiz cjequiča. Jalla nii pinsičiča. Jalla nižtiquiztan Yooz Ejpqui pinsichizakazza, Jesucristuqui sufrisnaca watžcu, anča zuma Liwriiñi cjisnaquiča, jalla nii. Jesucristupankazza žoñinaca Liwriiñiqui. Jalla nii liwriiñi pinsitaqui anča zumača.

¹¹ Jaziqiu Jesucristuqui žoñinacžquiz Yooz irata zuma kamañchiz cjiskatasacha. Nii zuma kamanchiz cjiskatñimi, nižaza nii zuma kamañchiz cjiskattanacami tsjii Yooz Ejpchizkazza. Jalla nižtiquiztan Yooz Majchqui liwriita žoñinacžquiz “Wejt jilanaca” cјican čhiizjapa anaž azza.

¹² Yooz tawk liwruquiz Jesucristuqui tuž cjiča:

“Wejrqui wejt jilanacžquiz Yooz puntu čhiizinača. Yooz partir žoñinacžtan žejlcan Yoozquin honora tјaača”.

¹³ Cristuqui zakaz cjiča:

“Wejrtča Yoozquinakaz kuzziztqui”.

Wilta zakaz cjiča:

“Yoozqui wejtquiz žoñinaca tјaachiča, maatinacažtakaz. Yooz Tata, tekz žejlča ninacami wejrmi”.

¹⁴ Jesucristuž liwriita žoñinacaqui curpuchizza, nižaza ljocchizza. Jalla nižtiquiztan Jesucristuqui curpuchiz nižaza ljocchiz zakaz cjissiča. Jalla nižta curpuchiz cјiscu, ticziča ana wal diablu tјatanzjapa. Nii diabluqui konz poderchizza. Pero ticžtiquiztan Jesucristuqui diabluž poder atipchiča.

¹⁵ Žoñinacaqui ticz ekskcu diabluž mantuquizpan žejlča. Nii žoñinaca liwriizjapa, Jesucristuqui ticziča.

¹⁶ Jesucristuqui tii muntuquiz tјončiča, ana anjilanacžquiz yanapzjapa antiz Abrahamž majchmaatinacžquiz yanapzjapa. Jakziltat Jesucristužquin kuz tјaačhaja jalla ninacaqui Abrahamž majchmaatinacažtakazza.

¹⁷ Žoñinaca liwriiñi cјisjapa, Jesucristuqui žoñinaca iratpacha cјistanča. Jalla nuž žoñinaca irata cјican, Jesucristuqui žoñinacžtajapa zuma litum palt'iziñi cjissiča Yooz yujcquiziqui. Okžñi kuzzizza učum palt'iziñiqui. Žoñinacžtajapa palt'iziñi cјican Jesucristuqui Yoozta zuma wilanažtakaz ticziča. Jalla nižta ticziča, uјchiz žoñinacž laycu.

¹⁸ Jesucristupacha sufrichiča, nižaza diabluqui Jesucristo yanziča uјquiz tјojtskatzjapa. Pero sufrisquiztanami diabluž yanžtanami atipchiča. Jalla nuž tјapa atipžcu Jesucristuqui žoñinacžquiz yanapi atasacha, ana uјquiz tјojtzkatzjapa.

3

JESUCRISTUQUI MOISESQUIZTAN TSJAN JILIRICHA

¹ Yooz kamañchiz jilanaca, cullaquinaca, Yoozqui ančhucaquiz kјawziča Jesucristužquin kuzziz cјisjapa. Jalla nižtiquiztan arajpach wajtchiz mazinaca cjissinčhucča. Ančhucqui Jesucristuž kuz zumpacha naya. Jalla niiqui učumnacalca

tsjan jilir apóstol cuntača, Yooz puntu zuma tjaajinchiz cjen. Nižaza učumnacalra timpluquiz langzñi pajk jiliri cuntača, učumnacatan Yooztan zuma cjskatchiz cjen.

² Tuquiqui Yoozqui Moisés utchiča tsjii puestuquiz. Moisesqui nii puesto zuma cumplichiča, Yooz kjuychiz zoñinacžquiz sirwican. Jalla nižta irata Yoozqui Jesucristo tsjii puestuquiz utchiča. Jesucristo zakaz nii puesto zumapan cumplichiča Yooz kjuychiz zoñinacžtajapa.

³ Tsjii kjuy kjuyñi zoñiqui nii kjuyquiztan tsjan honorchizza. Jalla nižta irata Jesucristuqui Moisesquiztan tsjan honorchizza. Jalla nuž waquizichiča.

⁴ Zapa kjuyaqui tsjii zoñiž kjuytacha. Pero Yoozza tjappacha paataqui.

⁵ Yooztajapa sirwiñi Moisesqui niž puestuquiz zuma cumpliñi kamchiča, tjapa Yooz kjuychiz zoñinaca irpican. Moisesqui Yooz puntunaca tjaajinchiča. Jalla nižta tjaajincan Moisequi Yoozquin sirwichiča. Wiruñaquí nii Yooz puntunacaqui tsjan kjana tjaajintatača.

⁶ Jesucristuzti anača Yoozquin sirwiñikazza. Antiz Yooz Majchpanča. Jalla niiqui niž puestuquiz zuma cumpliñi kamchizakazza, Yooz kjuychiz zoñinacžquiz mantican, tsjii jilir maatižtakaz. Nižaza učumnacalra Yooz kjuychiz zoñinacaqui. Jakziltat tirapan Yoozquin tjurt'ichi kuzzizlaja, jalla niiča ultimu Yooz kjuychiz zoñiqui. Jesucristuqui taku tjaachiča, Yooz zoñinacaqui arajpachquin nižtan chica kamaquiča, jalla nii. Jaziqui jakziltat Jesucristuž tjaata takuž cjen chipchi kuzzizlaja, jalla niiča ultimpacha Yooz kjuychiz zoñiqui.

ANA CHOJRU KUZZIZ CJEE

⁷ Jalla nii puntuquiztan Yooz Espíritu Santuqui Yooz tawk liwruquiz tuž cjiča:

“Anztan Yooz kjawžta nonžcu,

⁸ anaž chojru kuzziz cjee. Ančhuca tuquita atchi ejpnacaqui ch'ekti yokquin žejlcan, chojru kuztan Yooz quintra cjissiča. Chojru kuztan persun kuzcamakaz kamz pecchiča, Yooz žawjwa zjijquinzjapa.

⁹ Pusi tunc watanaca ninacaqui Yooz pajk obranaca cherchiča. Jalla nuž cheržcumi, tirapan Yooz žawjwa zjijquinz pecchiča. Anapan criyatča.

¹⁰ Jalla nižtiquiztan nii zoñinacž quintra žawjziča Yoozqui. Ninacž puntuquiztan Yoozqui tuž cjichiča: ‘Ninacž kuzqui tsjii kjtñipan pinsiča. Wejt zuma kamaña ana pajk pecča’. Nuž cjichiča Yooz Ejpqui.

¹¹ Jalla nižtiquiztan Yoozqui ninacž quintra žawjžcu, tsjii juramentužtan chiižinchiča, tuž cjican: ‘Anapan wejt famillquiz luzkatača, wejtan chica jeejzjapa’”.

¹² Jilanaca, cullaquinaca, persun kuzquiz cuitasa, Yoozquin ana criichi kuzziz ana cjisjapa. Anawal kuzziz cjequiz niiqui, ultim žejtñi Yoozquiztan zarakzkatta cjequiča.

¹³ Tii timpuquizkaz Yoozqui zoñinaca kjawznaquiča, jaziqui zapurupan porapat p'ekinchayasaquiča, Yoozquin nonznajo. Anapanž ančhucqui persun uj paažcu incallskataquiča, Yooz quintra paazjapa. Jalla nižta anawali paažcu chojru kuzziz cjisnasacha ančhucqui. Nekztan Yooz kjawžta ana nonžni atasacha. Ančhucqui jalla nižta anazum kuzziz ana cjisjapa, porapat p'ekinchayasaquiča.

¹⁴ Tuquiqui učumqui Jesucristužquin kuz tjaachinčhumča. Jakziltat tirapan ticzcama Jesucristužquin tjurt'ichi kuzziz kamčhaja, jalla niiqui ultimu Cristužtan tsjii kuzzizza.

¹⁵ “Tonjpacha tii Yooz taku nonžna: Anztan Yooz kjawžta nonžcu, anaž chojru kuztan Yooz quintra cjee. Jaknužt ančhuca tuquita atchi ejpnaca chojru kuztan Yooz quintra želatčhaja, anaž nižta cjee”.

¹⁶ Egipto yokquiztan Moisés irpita zoñinacaqui, jalla ninacatača Yooz quintranacaqui. Yooz taku nonžcupacha ninacatača chojru kuzzizpan.

¹⁷ Nekztan Yoozqui pusi tunc wata ninacžtajapa žawjchiča. Ninacž uj paatiquiztan žawjchiča. Nekztan ninacaqui ch'ekti yokquin walja ticziča.

¹⁸ Nižaza Yoozqui tsjii juramentužtan chiižinchiča, “Anapan wejt famillquiz luzkatača ančhucqui wejtan chica jeejzjapa”, cjican. Jalla ninacacha Yooz taku ana cazñinacaqui.

¹⁹ Jalla ninacaqui ana criichiž cjen, Yooz wajtquin ana luzi atchiča. Jalla nii kjanapacha intintita cjesacha.

4

YOOZ FAMILLQUIZ LUZA, NIIZTAN JEEJZJAPA

¹ Tuquiqui Yooz Ejpqui taku ecchiča tuž cjican, “Jakziltat weriž kjawžta nonžaj niiqui, wejtan chica jeejznaquiča, nižaza liwriita cjesacha”. Nii Yooz ecta takuqui tirapan walča. Jaziqui učumqui persun kuz cuitila. Persun kuz ana cuitaqui niiqui, ana Yooztan chica jeejznachani.

² Učumnacaquizimi tuqita ejpžquizimi nii zuma liwriiñi Yooz taku paljaytatača. Pero ninacaqui inakaz nonziča, ana criichiž cjen.

³ Učumquui nii liwriiñi taku catokžcu criichinčumča. Jalla nižtiquiztan liwriitaž cjen Yooztan chica jeejža. Pero ninacž puntuquiztan Yoozquui cjichiča:

“Ninacž quintra žajwžcu, wejrquui tsjii juramentužtan čhiichinča, tuž cjan: ‘Ninacaqui wejtan chica ana jeeznacuīča, anapan wejt famillquiz luzkatača’ ”. Yoozquui tii muntu paažcu, nii langž žerziča; sojta tjuñinacakaz langziča.

⁴ Pakallak tjuñ puntuquiztan tsjii Yooz takuquui tuž cjiča:

“Pakallak tjuñquiziqui Yoozquui tjapa niž muntu paaz langzquiztan jeejziča”.

⁵ Tsjii zakaz Yooz takuquui cjiča:

“Nii uj paañi žoñinacaqui anapan wejtan chica jeejnasača, wejt famillquiz cjisjapa”.

⁶ Nii tuqita ejpnacaqui liwriiñi taku nonžcu ana Yooz famillquiz cjissiča, Yooz tawk jaru ana kamchiž cjen. Jalla nižtiquiztan anziqiu iya žoñinacaqui Yooz famillquiz cjesača.

⁷ Yoozquui anzta timpuquui sitchiča, žoñinaca wilta kjawzjapa. Ažk watanaca nii tuqita ejpnacžquiz čhižcu Yoozquui Davidžquiz čhiikatchiča, tuž cjan:

“Anzta žoñinacami, nižaza jazta žoñinacami, Yooz taku nonžcu, ana chojrju kuzziz cjee”.

Jalla nii Yooz takuquui tuquitanpacha čhižintatača.

⁸ Josuequi žoñinacžquiz ultimu jeejskattasaž niiqui, Yoozquui ana čhiitasača, iya timpu želaquičiža žoñinacaž Yooz famillquiz jeejzjapa.

⁹ Jalla nižtiquiztan anzta timpuquizzakaz Yoozquin kuzziz žoñinacaqui Yooz famillquiz luzasača, Yooztan jeejzjapa.

¹⁰ Jakziltat Yooz famillquiz luzzaja, jalla niiqui ch'aman kamznacquiztan jeejža, jaknužt Yoozquui niž mundo paaz langziquiztan jeejztčhaja, jalla nižta.

¹¹ Jalla nižtiquiztan učumnacaqui Yoozquin tjapa kuz tjaaz waquiziča, Yooztan jeejzjapa, nižaza Yooz famillquiz kamzjapa. Učum tuqita atchi ejpnacaqui ana criichiž cjen ana Yooz famillquiz luzziča, antiz castictatača. Jalla ana nižta casticta cjisjapa, učumquui criizpanž waquiziča.

¹² Yooz takuquui žejtñi Yooz azzizza, žoñinacž kuzquiz zuma, ana zuma, jalla nii tjeezjapa, nižaza cjuñskatzjapa. Nižaza nii Yooz takuquui tsjii porap latu archiz cuchillužtakazza. Pero tsjan ariča. Yooz takuča žoñž animquizimi kuzquizimi uj cjuñskatñi. Tsjii žoñž kuzquui parti žoñinacžquiztan chjojta cjesaž niimi, jalla nii kuzquiz Yooz takuquui uj cjuñskatasača. Nižaza Yooz takuquui žoñž kuzquiz pinsitanacami tantiitanacami kjanapacha tjeeža, zuma ana zuma, jalla nii.

¹³ Yoozquui tjappacha paachiča. Jalla nižtiquiztan anaž jakziltami nižquiztan chjojžñi atasača. Ultim pjalž tjuñquiziqui tjappacha persun kamañ puntuquiztan, nižaza kjažtat kamtčhaja, jalla nii puntunacquiztan cuenta tjaastanča. Tjapa žoñinacaž kamta puntunacquiztan Yoozquui liwž zizza, nižquiztan ana tsjii takumi chjojžñi atasača.

JESUCRISTUČHA UČUM PALT'IZIŽIQUI

¹⁴ Jesucristuča Yooz Maatiqui. Jalla niiča učum chawjc timplu jiliri cuntača. Nižaza niiqui arajpachquin Yooz yujcquin luzziča, učumnacaltajapa tsjii wali palt'iziñi cjisjapa. Jalla nižtiquiztan učumquui Jesucristužquin kuzziz kamcan jalla nii kamzquiz tjurt'ichi kuzziz cijla.

¹⁵ Učumquui Yooz irata zuma kamzjapa panž pjaltiča. Pero Cristuquui zuma okžñi kuztan učum criichinacžquiz cjuñča, nižaza yanapasacha. Učum irata Jesucristuquui pruebanaca wathiča. Ana uj paacan tjpaman pruebanaca wathiča. Jalla nižtiquiztan, Jesucristuquui zuma okžñi kuztan učumnacaltajapa palt'izinasacha.

¹⁶ Jalla nižtiquiztan čhjul pruebanaca watanami učumnacaqui okžñi Jesucristužquin tjapa kuztan cjee. Yooz yujcquin macjatz ana jiwjataquiča, učum ujnaca pertuna mayizizjapa, nižaza pruebanaca želan, Yoozquiztan mayizaquiča nii pruebanaca zuma watzjapa.

5

¹ Tjapa timplu jilirinacaqui žoñinacžquiztan illztatača, žoñinacžtajapa Yoozquin palt'izinažo. Nižaza nii timplu jilirinacaqui žoñinacž wilananacami Yooz yujcquiz timplu altarquiz nonžñitača, žoñinacž ujnaca pertunta cjisjapa. Nižaza žoñinacžtajapa ninacž ofrendanaca Yooz yujcquiz tjeežñitača.

² Timplu jilirinacapacha pruebanaca sufriča, parti žoñinaca irata. Nižaza uj paača parti žoñinaca irata. Jalla nižtiquiztan nii jilirinacaqui pasinziz kuzziz cjesača ana zizñi žoñinacžtajapami, nižaza tsjii kjutñi cjičjiñi žoñinacžtajapami.

³ Ujchiz zakaz cjanacaqui nii timplu jilirinacami persun ujnacquiztanami nižaza parti žoñinacž ujnacquiztanami Yoozquin wilana tjaastanča, pertunta cjisjapa.

⁴ Nižaza anaž jakziltami timplu jilirž puestuquiz persun kuzcama luzasača. Yoozqui zoñinaca kjawža, nii puestuquiz utzjapa. Jaknužt Yoozqui Aarón cjita zoñi utčhaja, jalla nižta.

⁵ Nižaza Cristuquui anaž persun kuzcama palt'iziñi puestuquiz luzziquui. Yoozpankazza nii honorchiz puestuquiz utchiqui. Nižaza Yoozqui Cristuž puntuquiztan tuž cjichičha: “Amčha wejt persun maatimquui. Amquiz wejt kamañal tjaa-učha”.

⁶ Cristuž puntuquiztan Yoozqui zakaz cjičha:

“Amčha zoñinacžtajapa palt'iziñi jiliriqui wiñay wiñayajapa. Jaknužt Melquisedec cjitaquui zuma palt'iziñi jiliri uchtatažlaja, jalla nižta”.

⁷ Tii muntuquiz kamcan Jesucristuquui Yooz Ejpžtan parlichičha, nižaza Yooz Ejpžquin rocchičha, tjurt'iñi kuzzizpan kami yanapzjapa. Altu tawkžtan chiican nižaza kaacan Yoozquin jalla nuž mayizichičha. Yoozqui Jesucristo liwrii atatčha, ana cruzquiz ticzjapa. Pero Jesucristuž ticzquiztan ana liwriitaž cjenami Yooz Ejpquui niizquiz yanapchičha, Yooz kuzcamapankaz kamzjapa. Jesucristuquui Yooz Ejpžtan kuzziz cjen yanaptatačha.

⁸ Cristuquui Yooz Majch cjenami sufrichičha. Jalla nižta tii muntuquiz sufrichiz cjen Yooz Ejpž kuzcamapankaz kamchičha.

⁹ Jalla nuž tii muntuquiz sufrichiz cjenami, jalla niičha Yooz kuzcamapankaz kamñiqui. Jalla nižtiquiztan zoñinaca liwriiñiqui cjiisichha. Jakziltanacat nižquiz cazzaja, jalla tjapa ninacaquui wiñayajapa liwriitaž cjequičha.

¹⁰ Yooz Ejpquui Cristo utchichha zoñinacžtajapa liwriiñi nižaza palt'iziñi cjisjapa. Jaknužt Melquisedec cjita zoñiqui palt'iziñi jiliri uchtatažlaja, jalla nižtapacha.

PERSUN KUZ CUITASAQUICHA

¹¹ Jalla nii puntuquiztan waljaž takunacaž žejlčha. Pero ch'amačha ančhucaquiz intintiskatzquui.

¹² Ažk watanaca ančhucquui criichinčhucčha. Jaziqui Yooz puntu tjaajiñi maestrunaca cjichuca cjiwčha. Pero wiltakaz ančhucquui tjaajinta cjis pecčha Yooz tawk pjasilanaca zizjapa. Ančhucquui wawanacažtakaz lichikaz pecčha Yooz tawk čheri lujlquiztanacuui.

¹³ Lichtan mantinasñi wawažtakazza ančhucquui. Jaziqui lijitum Yooz kamaña ana zuma kamiñčhucčha.

¹⁴ Čheri lujlquui pajk zoñinacžtačha. Jalla nižta irata ch'aman intintazuc puntunaca zuma criichi zoñinacžtajapačha. Jalla ninacaquui zuma kamchiz cjen zumpacha tantiyasačha kamañ puntunaca, zuma, anazuma, jalla nii.

6

¹ Pjasil Yooz puntunacquiztan zizñi, cjee. Jesucristuž puntuquiztan tjaajintanaca zizzinčhucčha. Jalla nižtiquiztan ančhucquui nii puntunacquiztan anaž iya tjaajinz pecasačha, jalla. Ančhucquui zizzinčhuctačha, casticu zijicñi paaznaca puntuquiztanami nižaza kuz campiz puntuquiztanami, nižaza Yoozquin kuz tjaaz puntuquiztanami,

² nižaza bautismo puntuquiztanami, nižaza kjaržtan lanz cuzturumpi puntuquiztanami, nižaza ticziquiztan jacatatz puntuquiztanami, nižaza ultim pjalz tjuñi puntuquiztanami. Jalla nižtanaca zizzinčhuctačha ančhucquui.

³ Yooz munan, iya Yooz puntunaca tjaajnasačha, juc'ant zuma kamañchiz cjisjapa.

⁴ Jakziltat kjanzt'ita Yooz taku catoktčhaja, jalla nuž catokzpacha Yooz quintra quejpsaja, jalla niiqui ana wilta liwriita cjesačha. Jakziltat Yooz taku catoktčhaja, jalla niiqui Yooz kamañquiz luzzipančha, nižaza Espiritu Santuquui niiz kuzquiz luzzičha.

⁵ Nižaza ninacaquui Yooz taku zuma nayžcu catokchičha. Nižaza arajpachquiztan tjonñi azi pajchičha persun kuzquiz.

⁶ Jalla nižta Yooz taku catokchi zoñinacaquui Yooz quintra quepsnaquiz niiqui, anaž wilta kuz campii atasacha zumquinaquui. Ninacž kuzquui chojrupan cjiisa. Jalla nižta cjisicu, ninacpacha Jesucristo Yooz Majch wilta cruzquiz ch'awtažokazza, niiz quintra zoñinacž yucquiz cjićjiñičha.

⁷ Tii quintu nonžna. Tsii yokaquui zkala čhjacaž. Jalla nekztan chijñiz tjončha. Jalla nekztan nii zkalaquui zuma čheriž tančha. Nižazaž pookčha, nii zkala čhjacñi zoñinacžtajapa. Nii yokaquui Yoozqui wintjichičha.

⁸ Pero nii yokaquui ch'apinacchizkaz cjisnasaž niiqui, inakaz cjequičha. Jalla nižtiquiztan pjalzta cjequičha, ana zuma. Jalla nekztan ujqin tewjkznaquičha. Jalla nižtaž nii Yooz taku catokzpacha quejpsñi zoñiqui.

YOOZQUIN KUZZIPAN CJEE

⁹ Pecta jilanaca, cullaquinaca, jalla nuž chiižcumi ančhuca puntuquiztan anačha nižta cjiwčhiya. Ančhucquui liwriita cjisicu ultimpacha ančhucquui zuma Yooz kamañchiz kamaquičha. Jalla niiqui nužupančha.

¹⁰ Yoozqui ancha zumapancha. Anchucaquiztan anaz tjaznasača, anchucaž zuma kamañchiz cjen, nižaza anchucaž Yooztan zuma munaziñi kuzziz cjissiz cjen. Anchucqui jalla nižta kamañchiz cjen parti criichi jilanacžquiz sirwichinčhucča Yooztajapaqui. Tuquimi anzimi zakaz anchucqui nižta zuma kamañchizza.

¹¹ Zapa mayni anchucaquiztan nižta zuma kuzzizpan cjee, juc'ant juc'ant zuma kamañchiz cjisjapa, ticzcama. Anchucqui tirapan tjewzna, arajpachquin Yooztan zuma kamz, jalla nii. Nižaza nii oracama, juc'ant juc'ant zuma kamañchiz cjee. Jalla niil pecučha.

¹² Anchucqui ana jayrazñi kuzziz cjee. Antiz zuma Yoozquin kuzziz zoñinacžquiz yatekasa. Nižaza pasinziz kuzziz zoñinacžquiz yatekasa. Nižta kamñi zoñinacaqui Yooz chiita zumanaca tanznaquičha, tsjii irinsažtakaz.

¹³ Yoozqui Abrahamquiz tsjii zuma taku tjaažcu, persun ahtan juramento paachiča. Niižquiztan tsjan jilir juramento tjaakatñi ana želatča. Jalla nekztan persun ahtan juramento paachiča,

¹⁴ tuž cjan: “Ultimpacha wejrqui amquin zumanacal tjaažcača, nižaza am majchmaatinaca walja mirkatača”.

¹⁵ Abrahamqui Yoozquin kuzzizpan tjewžcu, nii Yooziž tjaata taku tanzičha.

¹⁶ Tsjii juramento tjaañi zoñiqui nii juramento tanzñi zoñžquiztan tsjan jiliriča. Tsjii juramento paažcu, anaz iya parliz zelasača. Jalla nii puntuquiztan žeržtača.

¹⁷ Jaziqui Yoozqui tsjii juramento paažcu taku tjaačiča. Nekztan Yoozqui nii tjaata taku tanzñi zoñinacžquiz kjanapacha tjeez pecchiča, niž tjaata taku panž cumpliskataquičha, jalla nii. Yoozqui niž chiita taku ana campiyasača.

¹⁸ Yoozqui taku tjaačiča, ućhumqui nižtan chica kamaquičha, jalla nii. Nekztan juramento paachiča. Jalla nii picz taku anapan campiyasača tsjii tsjii chicanauqui. Yoozqui ana toscara chiyasača. Ućhumqui Yoozquin macjatchinćhumča, niž cuitita cjisjapa. Ućhum cuitiñi Yoozza taku cumpliñiqui. Jalla nižtquiztan Yooz taku cumpliz ora tjewžcan p'ekinchayta kuzzizpan cjesača ućhumqui.

¹⁹ Jalla nii cumpliñi Yooziž chiita taku cjuñžcupan ućhum kuz tjurt'ichi cjiskatča, ana kuz turwayskatchuca. Nii taku cumpliñi Yoozqui warcu anclaztakaz, ućhum kuz tjurt'ichi cjiskatča. Jesucristuž cjen Yoozqui niž tjaata taku cumplaquičha. Jesucristuqui arajpachquinpacha Yooz yujcquiz luzziča.

²⁰ Ućhumž tuqui luzziča, ućhumnacaltajapa palt'izinjapa. Jesucristuqui zuma palt'iziñi cjissičha, jaknužt Melquisedec palt'iziñi cjtčhaja, jalla nižta. Jalla nižtquiztan ućhumnacaltajapa ultimu palt'iziñi puestuquiz luzziča.

7

MELQUISEDECZ PUNTU

¹ Nii Melquisedec cjita palt'iziñiqui Salem wajt jiliriča, nižaza niž puestuquiz zinta arajpach Yooziž ućhtatača. Melquisedecž timpuquiz Abrahamqui quintra reynacžtan tsjii quira zalchiča, ninacž zultatunacžtanpacha. Nekztan Abrahamqui liw atipchiča. Jalla nuž Abrahamž atipžtan Melquisedecqui Abrahamžtan zalchiča. Nekztanaqui Melquisedecqui Abrahamžtajapa Yoozquin palt'izinchiča, Abrahamžquiz Yooziž yanaпта cjisjapa.

² Nekztan Abrahamqui Melquisedecžquiz tjapa niž cantiquiztan diezmo tjaachiča. Melquisedec tjuuqui tuž cjiča, Yooz kuzcama zuma mantiñi, jalla nii. Nižaza Salem tjuuqui tuž cjiča, zoñinaca walikaz žejlča, jalla nii. Melquisedecž puntu cjiča, niž mantičiz cjen, zoñinaca walikaz žejlča.

³ Yooz takuqui anaz chiča, Melquisedecž maa ejpž puntuquiztanami, niž atchi ejpnacžquiztanami, niž majtquiztanami, niž ticzquiztanami. Jalla nižtquiztan palt'iziñitača Yooz Majch irata.

⁴ Jaziqui Melquisedecqui pajk jiliriča. Nii naya anchucqui. Ućhum tuquita ejp Abrahamqui quira atipžcu Melquisedecžquiz tsjii tunca parti niž cantiquiztan tjaachiča. Jalla nižtquiztan Melquisedecqui Abrahamžquiztan juc'ant jiliriča.

⁵ Moisés lii jaru Leví cjita majchmaatquiztan tjoñi zoñinacakaz timplu jilirž puestu tanznasača, zoñinacžtajapa Yoozquin palt'izinjapa. Jalla nii timplu jilirinacaqui parti zoñinacžquiztan ninacž želinchizquiztan diezmo cobriñitača. Aunquimi nii cobrita zoñinacaqui timplu jilirinacž familiatača. Tjapa ninacaqui Abrahamž ejpžquiztan tjoñitača. Jalla nižtquiztan Melquisedecqui nii timplu jilirinacžquiztan juc'ant jiliriča.

⁶ Melquisedeczi ana Leviž majchmaatquiztan tjoñitača. Pero Abrahamqui nižquiz diezmo tjaachiča. Nižaza Melquisedecqui Abrahamžquiz wintizuna tjaachiča, Yooz Abrahamžquiz taku tjaachiž cjenami.

⁷ Wintizuna tjaañi zoñiqui tsjan jiliricha wintizuna tanzñi zoñzquiztan. Anaž jakziltami nii razuna nicasača.

⁸ Tii muntuquiz kamcan zoñikazza učumnacaquiz diezmo cobriñiqui. Zoñinacača ticzñiqui. Pero Melquisedecž puntuquiztanaquui Yooz takuquui niiz ticz puntuquiztan ana chiiča, wiñayjapa žejtžjapažtakazza.

⁹ Melquisedecž timplu wattan Leviž majchmaatquiztan tjonñi timplu jilirinacaquui diezmo cobriñitača. Nii cobriñi zoñinacapacha Abrahamž majchmaatquiztan tjonchicha. Jalla nižtiquiztan Abrahamž diezmo Melquisedecžquiz pactiquiztan, ninacazakaz pactažokazza.

¹⁰ Abrahamž curpuquiz niiz majchmaatinaca želatča, ima majttatača. Jalla nižtiquiztan Abrahamž Melquisedecžquiz diezmo pactiquiztan, Leviž majchmaatquiztan tjoñi timplu jilirinacaquui zakaz pactažokazza.

¹¹ Leviž parti timplu jilirinacaquui Israel wajtchiz zoñinacžquiz Moisés lii jaru kamkatchiča. Nižaza nii jilirinacaquui parti zoñinacžta Yoozquin palt'iziñitača. Nii Leviž parti zoñinacaquui Aaronž majchmaatquiztan tjonñitača. Jaziqui ninacaquui parti zoñinacžquiz Yooz yujcquiz zumapankaz cjiskattasaž niiqui, anaž iya palt'iziñi pectasača. Nii wiruñ tjonñi palt'iziñiqui anaž Aaronž majchmaatquiztan tjonñiča. Antiz Melquisedecž partiquiztan tjonchicha.

¹² Palt'iziñi timplu jilirinacaquui campiitaž cjenaquui, lii zakaz campiitaž cjistantača.

¹³ Nii wiruñ tjonñi palt'iziñiqui Jesucristo jiliricha. Jesucristuquui anača Leviž partiquiztan tjonñiqui. Antiz Judaž majchmaatquiztan tjoñitača. Pero Moisés lii jaru anaž jakziltami Judaž partiquiztan timplu jilirž puestuquiz uchtatača.

¹⁴ Timplu jilirinacž puntuquiztan Moisesquui anaž čjulumi chiičiča Judaž parti zoñinacžquiz. Judaž parti zoñinacaquui anapan timplu jilirž puestuquiz luzasača. Pero kjanapachača Jesucristuquui Judaž partiquiztan tjoñi.

¹⁵ Jalla nižtiquiztan kjanapachazakazza Moisés lii campiitaquui. Melquisedecžtakaz Jesucristuča tsjemant timplu jiliriqui, zoñinacžtajapa Yoozquin palt'izinjapa.

¹⁶ Moisés liiqui cjiča, ticzñi timplu jilirinacaquui Leviž majchmaatquiztan tjonñi zoñinacapankaz cjequiča. Jesucristuquui anaž nii lii jaru timplu jiliri cjissiča. Antiz niiz wiñayjapa žejtñi kamañquiztan timplu jilirž puestuquiz uchtatača, wiñayjapa zoñinacžtajapa Yoozquin palt'iziñi cjisjapa.

¹⁷ Jesucristuž puntuquiztan Yooz takuquui tuž chiiča:

“Amqui wiñayjapa timplu jiliri cjequiča zoñinacžtajapa palt'iziñi. Melquisedecž partiquiztan cjequiča”.

¹⁸ Tuquita liiqui nužquiz apatatziča. Nii liiqui ana azzizza zoñinaca zumapan kamkatzjapa. Jalla nižtiquiztan ana iya walča.

¹⁹ Nii Moisés lii jaru kamtiquiztan anaž jakziltami Yooz yujcquiz zumapankaz cjiskattaž atasacha. Jaziqui tsjii ew lii žejlča; učumnacaltajapa juc'ant zumača. Nii lii jaru Jesucristuquui Yoozquin palt'iziñi puestuquiz luzziča. Jesucristuž cjen učumquui Yoozquin macjatasacha.

²⁰ Yoozquui juramentužtan Jesucristo utchiča palt'iziñi puestuquiz.

²¹ Tuquita palt'iziñi timplu jilirinacaquui ana juramentužtan nombritatača. Pero tii Jesucristo timplu jilirizti juramentužtan nombritatača. Yooz takuquui tuž cjiča:

“Yooz jiliriqui juramentužtan tuž mantichiča: Amqui wiñayjapa timplu jilirim cjequiča zoñinacžtajapa palt'iziñi, Melquisedec partiquiztan. Jalla nuž mantizcu, Yooz kuzquiz pinsitaquui wira ana campiyasacha”.

²² Nii Yooz chiitaž cjenaquui Jesucristuča tuquita timplu jilirinacžquiztan zoñinacžtajapa juc'ant zuma Yoozquin palt'iziñiqui. Jalla nižtiquiztan zoñinacaquui wiñaya liwriitapan cjequiča. Nii ew liiqui tuquita liinacquiztan juc'anti zumača.

²³ Nii tuquita timplu jilirinacaquui tamatača. Ninacžquiztan anaž jakziltami wiñaya timplu jilirž puesto tanzñi atchiča. Ninacaquui tjapaž ticza.

²⁴ Pero Jesucristuži wiñaya žetaquiča. Jalla nižtiquiztan wiñayjapa timplu jiliripanž cjequiča, zoñinacžtajapa Yoozquin palt'iziñijapa.

²⁵ Jalla nižtiquiztan Jesucristuquui ultimupan wiñayjapa zoñinaca liwriyasacha. Jakziltat niiz cjen Yoozquin macjataquž niiqui, wiñayjapa liwriita cjequiča. Nižaza Jesucristuquui wiñaya žejtcan liwriita zoñinacžtajapa tirapan Yoozquin pjalt'izinaquiča.

²⁶ Jalla nižta palt'iziñipanž pecča učumnacaquui. Jalla nii Jesucristuquui Yooz irata zumapankaz kamañchizza. Anaž jakziltami niizquiz tsjii uj tjojtñasacha. Niiqui ana zinta ujchizza. Ujchiz zoñinacžquiztan tsjematača. Arajpachquin Yooztan chica honorchizza.

²⁷ Jesucristuquui parti timplu jilirinaca ana iratača. Nii parti timplu jilirinacaquui zapuru wilanapan tjaañitača, persun ujnacquiztanami parti zoñinacž ujnacquiztanami.

Jesucristuqui anapan nižta paasača, ana ujhizza niiqui. Jesucristuqui tsjii wiltapankaz wilana tjaachiča. Wilana cunta niž persun curpu intirjichiča.

²⁸ Moisés lii jaru ujhiz žoñinacaqui palt'iziñi puestuquiz uchtatača. Nii liinacqiztan wiruñ Yoozqui tsjii juramento paachiča, niž Majch palt'iziñi puestuquiz uchjapa. Nii Majchqui Yooz irata zumapankaz kamañchizza wiñajjapa.

8

EW LII ZEJLCHA

¹ Weriz chiitanacqiztan jalla tiiča chekanaqui, učumnacaltajapa tsjii zuma palt'iziñi žejlča, Jesucristupacha. Jalla niiqui arajpachquin Yooz Ejpž žew latuquiz julzi žejlča, Yooz Ejpžtan chica mantican.

² Niiča ultim Yooz kjuychiz jiliriqiu, učumnacaltajapa palt'iziñzjapa. Nii ultim Yooz kjuy timpluqui anaž žoñiz paatača. Nižaza anača tii muntuquiz. Antiz Yooz Jilirž arajpach kjuyapankazza.

³ Zapa timplu jiliriqui niž puestuquiz kamcan, ofrendanacami wilananacami jalla ninaca tjaañiča. Jalla nižtiquiztan Jesucristo zakaz tsjii tjaazjapa necesiča.

⁴ Jesucristuqui tii yokquizkaz kamñi žoñi cjitasaž niiqui, anaž timplu jilirimi cjitasača. Tii yokquizpachača Moisés lii jaru timplu jilirinaca panž žejlča. Jalla ninacaqui tirapanž wilana tjaača Moisés lii jaru.

⁵ Pero ninacaqui ultim Yooz kjuy timpluquiz anaž sirwiča. Arajpachquin žejlča nii ultim Yooz kjuy timpluqui. Jalla nii timplu cunta tii yokquiz tsjii paata timplu žejlča tsjii fotožtakaz. Tuqui timpuqui Moisesqui Yooz cjitacama tsjii zkiz timplu paakatchiča. Ima paakatcan Yoozqui nižquiz mantichiča, tuž cjan: “Sinaí curquin amquiz tjeezinča, jaknužt wejt timpluqui paaztančalaja, jalla nii. Jalla nii jarupankaz timplu kjuya kjuystanča”. Jalla nuž mantichiča Yoozqui.

⁶ Pero Jesucristuzi žoñinacžtajapa tsjan zumaž palt'izinasacha. Jalla niiča tuquita palt'iziñinacž kamañquiztan juc'ant zuma kamañchizqui. Nižaza tuquita liiquiztan tii anza liiqui učumnacalta tsjan zumača. Jesucristuž cjen tii anza liiqui žejlča. Nižaza nii liiž jaru tsjii tsjan zuma kamañqui compromittača.

⁷ Tuquita tjaata liiqui juc'ant zuma cjitčhaj niiqui, anaž iya liiqui pectasača.

⁸ Yoozqui tuquita lii jaru kamñi žoñinacžquiz ana zuma naychiča. Jalla nii puntuquiztan Yooz takuqui tuž cjiča:

“Yooz Jiliriqui tuž cjiča: Wiruñta timpuquiztajapa wejrqui tsjii ew lii tjaa-ača Israel wajtchiz žoñinacžquizimi, nižaza Judá wajtchiz žoñinacžquizimi.

⁹ Nii ew liiqui tuquita ejpnacžquiz tjaata liiquiztan tsjemataž cjequiča. Tuquiqui wejrqui ninacž tuquita ejpnaca jwessinča Egipto yokquiztan. Nii timpuquizpacha wejt lii ninacžquiz tjaachinča; pero ninacžti wejt lii jaru ana cumplichiča. Jalla nižtiquiztan wejrqui ninaca jaytichinča. Jalla nuž cjiča Yooz Jiliriqui.

¹⁰ Wiruñta timpuquiz Israel žoñinacžtajapa tsjii ew lii tjaa-ača, jalla tuž: Jalla nii wiruñta timpuquiz wejrqui žoñinacž kuzquiz wejt lii zizkatača, kuzquiz cjjirtažtakaz. Nekztan wejrpača ninacž Yooz cječa. Nižaza ninacaqui wejt partir žoñinaca cjequiča.

¹¹ Jalla nii wiruñta timpuquiz kamñi žoñinacaqui anaž porapat tjaajnasasacha, ninacž mazinacžquizimi, nižaza ninacž jilanacžquizimi. Anaž tjaajnasacha, “Yooz Jiliržquin paja” cjan. Antiz zapa mayni Yooz Jiliripankaz pajaquiča, tsjii zkoltiquiztanpacha asta pajk žoñicama.

¹² Nižaza ninacž ujnaca pertunača, wejt okžni kuzziz cjen. Nižaza ninacž ujnacqiztan tjatznača wiñajjapa”.

Jalla nuž cjiča Yooz takuqui.

¹³ Yoozqui nii ew lii puntuquiztan chiižcu nii tuquita lii apatatchiča. Nii tuquita liiqui watchiz cjen, inakazza. Wajilla liiw tjatztaz cjequiča.

9

YOOZ ZKIZ TIMPLU

¹ Nii tuquita liiqui cuzturumpinacchizza, Yooz rispizjapa. Nii cuzturumpinacaqui tii muntuquiz žejlči Yooz timpluquizkaz paatatača.

² Primeraqui zkiz timplu želatča. Nii timpluquiz pizc kjuya želatča. Tsjii kjuyaqui ‘Yooztajapa T'akžta Kjuya’ cjitatača. Nii kjuyquiziqui tsjii pajk candelabra želatča, nižaza mesa želatča, Yooztajapa t'akžta t'anta nonzjapa.

³ C'uchquin tsjii kjuya želatča, ‘Yooztajapa Juc'ant T'akžta Kjuya’ cjitatača. Nii pizc Yooz kjuy taypizquiz tsjii pañ cortina želatča.

⁴ C'uchquin tsjii kor altara želatča, incienso ujjzapa. Nižaza tsjii caja želatča, Yooz tjaata lii chjojzjapa. Nii cajuqui kjuyltanami zawnctanami koržtan tjalžtatača. Nii caj kjuyltan tsjii kor ojch želatča maná cjita čherchiz. Nižaza Aaronž wara želatča. Nii waraqui ch'oña c'ajchiča tsjii žejtñi muntiztakaz. Nižaza nii caj kjuyltan Yooz lii cjiirrtanaca želatča.

⁵ Nii caj juñtun querubines cjita želatča anjila irata paata. Nii querubinanacaqui wezlaž cherchi kjarchiztatača; nii caj juntunñ kjara waazitača. Nižaza nii caj juntunñ ljocžtan tjawkz tabla želatča, jalla niiqui ujnaca pertunta cjisjapatača. Jaziqui nii puntunacqiztan ana iya čhiiz pecuča.

⁶ Jalla nuž tjacžcu timplu jilirinacaqui zawnčchuc kjuyquiz luzluzñitača, lii jaru cuzturumpinaca paacan.

⁷ C'uchquin žejlñi kjuyquiz tsjii watquiz tsjii wilta luzñitača timplu chawjc jiliriqui. Nii alajakaz jalla nekziqiu luzasača. Jalla nuž luzcan wilana conta ljoc chjichñitača, persun ujnaca pertunta cjisjapami, nižaza parti žoñinacž ujnaca pertunta cjisjapami.

⁸ Jalla nižta liiquiztan Espiritu Santuqui zizkatchiča, ima Moisés lii apatatczan, nii Yooz kjuy timpluquiz paaz cuzturumpinacaqui walatča, nii. Nižaza jalla nuž walan čjul žoñimi anapan c'uchquin luztača.

⁹ Nii tuquita liiqui Yooz puntunaca čhiča tii timpuquiz kamñi žoñinacžtajapa. Nii lii jaru žoñinacaqui ofrendanacami wilananacami tjaachiča. Jalla nuž tjaachiž cjenami nii žoñinacaqui Yooz yujcquiz ana ujchiz nižaza zuma kuzziz ultimu ana cjiskatta cjesača. Ninacaqui tirapan ujchiztača.

¹⁰ Jalla nii tuquita cuzturumpinacaqui jalla tižtakaztača: čjeri tjaazmi, licz tjaazmi, kjaztan ajunzmi. Jalla nižta cuzturumpinacaqui žoñž curpu zawnctankazza. Jalla nuž cjenami lii campiizcama nii cuzturumpinacaqui walatča.

¹¹ Wiruñ nekžtan Cristuqui tjonchiča. Jazic niiča Yooz timplu chawjc jiliriqui; Yooz zumanaca tjaazjapa tjonchiča. Timplu chawjc jiliri cjan Yooz kjuyquiz sirwiča. Anaž tii yokquiz paata Yooz kjuyquiz sirwiča. Antiz arajpachquin Yooz ligitum kjuyquin sirwiča. Jalla niiča ultim Yooz kjuya. Tii yokquiz paata Yooz kjuyquiztan juc'ant zumača.

¹² Cristuž arajpachquin ultim Yooz kjuyquiz luzziča. Jalla nuž luzcan ana cabranacž ljocmi nižaza ana vac toronacž ljocmi chjitchiča. Antiz persun ljocžtan luzziča, žoñinaca wiñaya liwriita cjisjapa. Jalla nuž persun ljocžtan tsjii wiltakaz luzziča tjapa tižtajapa.

¹³ Tuquita liiqui tužutača: Cabranacž ljocžtanami, vac toronacž ljocžtanami ujchiz žoñinacžquiz tjawkñitača. Nižaza ujta vacanacž kupžtan ujchiz žoñinacžquiz llump'acžt'iñitača. Jalla nižta cuzturumpinaca zawnctankazza; ana poderchiztača, ana ujchiz cjiskatzjapa.

¹⁴ Cristuž ljocžti ancha juc'anti poderchizza. Nii ljocž cjen žoñinacž kuznacaqui zuma cjiskatasacha. Wiñay žejtñi Espiritu Santuž cjen Cristuqui tsjii zuma wilana cunta persun-pacha ticziča. Ana ujchiz cjan, niž ljoc Yoozquin tjaachiča, ujchiz žoñinaca pertunta cjisjapa. Jalla nižtiqiztan Cristuqui žoñinaca liwriyasača. Cristuž cjen nii liwriita žoñinacaqui ninacž tuquita ana zuma kamañanaca jaytasača, nižaza zuma kamañchiz Yoozquin sirwasača.

¹⁵ Jalla nižtiqiztan Jesucristuž cjen Yoozqui ew lii ut'aychiča, žoñinaca ultimu liwriita cjisjapa. Žoñinacaqui primer lii mantuquiz cjan, ujnaca paañitača. Pero Jesucristuqui ticziča, nii paata ujnacqiztan liwriizjapa. Jalla nižtiqiztan jakziltat Yooz kjawžta cječhaja, jalla niiqui Yooz compromitta irinsa tanznaquiča; jalla niiqui wiñayjapa Yooztan čica kamaquiča.

¹⁶ Tsjii žoñiqui testamento paachiž cjen, niž cuzazanaca tanñi žoñinacžquiz ut'ayča. Pero ticžtankaz nii testamentuqui walča.

¹⁷ Nii testamento paañi žoñiqui tira žetan, nii testamentuqui anaž walča. Antiz ticžtan, jalla nekžtanž nii testamentuž walasača. Ticžtankaz niž cuzazanaca tanñi žoñinacaqui ultimu niž cuzazanaca tanznasacha.

¹⁸ Jalla nižtiqiztan tuquita liiqui ut'aytatača, conta animal ljocžtan.

¹⁹ Moisesqui tjapa Yooz mantita liinaca kjanapacha paljayžcu nii liinaca ljocžtan ut'aychiča. Moisesqui tsjii chupic choma tanžcu, hisopo cjita parquiz tjerchiča. Nekžtan ljocžtan kjaztan t'ajžcu, jalla nekž nii para ch'ižcu, sucarpayñitača, žoñinacžquizimi, liichiz libruquizimi.

²⁰ Jalla nuž sucarpaycan, Moisesqui tuž cjichiča: Tii ljocqui Yooz mantita liinaca walkatča ančhucaltajapa.

²¹ Jalla nižtakaz Moisesqui nii ljocžtan Yooz kjuyquizimi, Yoozquin sirwiz cuzazanac-quizimi sucarpayñitača.

²² Nii tuquita lii jaru jos tjapa cuzazanaca sucarpayñitača, Yooz yujcquiz zuma cjisjapa. Ljoc ana tjawkžcu ujnaca ana pertunta cjesača.

JESUCRISTUQUI ZOÑINACŽ LAYCU TICZICHA

²³ Tuquita lii jaru nii Yoozquin sirwiz cuzazanacaqui Yooz yujcquiz wali cjisjapa jalla nižta cuzturumpinaca paastantača. Tii yokquiz žejlñi cuzazanacaqui fotožtakazza. Anača arajpachquin ultimu želasača. Arajpach Yooz zuma kamañchiz cjiskatzjapa, nii animal ljocnacaqui anaž atasacha.

²⁴ Cristuqui persun ljocžtan ana žoñiž paata timpluquiz luzziča. Arajpach Yooz kjuyquizpacha luzziča. Jalla nicju anziqui niiča učumnacaltajapa Yoozquin palt'iziñiqui. Tii yokquiz žejlñi timpluqui tsjii fotožtakazza nii werar arajpach Yooz kjuyquiztan.

²⁵ Zapa wata timplu chawjc jiliriqui animalž ljocžtan Yooz kjuyquin luzñitača. Ana persun ljocžtan luzñitača. Pero Cristuqui tsjii wiltapanikaz wilana cunta cjissiča, ana wilta wilta.

²⁶ Wilta wilta wilana cunta ticztasaž niiqui, tii muntu kalltiquiztanpacha wilta wilta sufrican ticztasača. Tuquita timpu tucuzinta cjiscu tsjii wiltakaz Jesucristuqui parizquichiča. Nekztan niž ljoc tjawkžcu ticziča, tjapa ujnacquiztan žoñinaca liwriizjapa.

²⁷ Tjapa žoñinacaqui tsjii wilta ticstanča tii yokquiz. Jalla nekztan pjalžta cjequiča, Yooz yujcquiz zuma, anazuma, nii.

²⁸ Jalla nižta irata Jesucristuqui tsjii wilta tii yokquiz ticziča, wacchi ujchiz žoñinacž laycu. Pero wiruñ wilta tii muntuquiz tjonaquiča. Nekztan žoñinacž ujnacquiztan ana ticznaquiča. Antiz nižquiz tjapa kuz tjewžñi žoñinaca ultimu liwriyaquiča.

10

MOISES LIIQUI PJALTICHA

¹ Moisés liiqui Yooz zumanaca tsjii kolucullakaz tjeeziča. Ana ultimu kjana tjeeziča. Nii liiqui tuž cjicha: Wiruñ tjapa Yooz zumanaca tjonaquiča, jalla nii. Nižaza nii liiqui anaž ultimpacha Yooz yujcquiz zuma cjiskatasacha, Yoozquin macjatñi žoñinacžquiziqui. Nii lii jaru watay wata wilanakaz contača. Jalla nuž paažcumi, žoñinacžquiz anaž ultimpacha Yooz yujcquiz zuma cjiskatta cjesača.

² Nii lii jaru paacan, žoñinacaqui ultimpacha Yooz yujcquiz zuma cjiskattasaž niiqui, anapanž wilana tjira onantasača. Nii wilana tjaañi žoñinacaqui ultimu ana ujchiz cjitasaž niiqui, zumapan cjitasača, nižaza persun kuzquiz ana iya cjuñtasacha čhjul ujquiztanami.

³ Pero nii wilana tjaaž liiqui watay watapanž ujnaca cjuñkatča.

⁴ Vac toronacž ljocmi cabranacž ljocmi tjaatiquiztanami anapanž ujnacquiztan liwriyasacha.

⁵ Jalla nižtiquiztan Cristuqui tii muntuquiz tjonžcu Yooz Ejpžquin tuž cjichiča: “Amqui animal wilananacami ofrendanacami ultimu ana pecasacha. Antiz wejttajapa žoñž curpu tjaczinčamča, žoñinacž ujnac laycu ticzjapa.

⁶ Ujta animalanacami uj paatiquiztan tjaata ofrendanacami ultimu am ana cuntintu cjiskatasacha.

⁷ Jalla nižtiquiztan wejrqui cjichinča: Wejt Yooz, tii muntuquiz tjonchinča, am kuzcama paazjapa. Jaknužt wejt puntuquiztan Yooz tawk liwruquiz cjiirtažlaja jalla nii cumplizjapa tjonchinča”.

⁸ Jesucristuqui cjichiča, “Yooz Ejpqui anaž pecča nižaza anaž jutzazza jalla tinaca: animal wilananacami, ofrendanacami, nižaza ujta animalanacami, nižaza uj paatiquiztan tjaata ofrendanacami. Tuquita liiqui nižtanaca tjaaž mantichiča. Jalla nuž mantita cjenami, Yoozqui anaž niikaz ultimu pecča”.

⁹ Nekztan Jesucristuqui cjichizakazza: “Yooz Tata, wejrqui tii muntuquiz tjonchinča, am kuzcama kamzjapa”. Jaziqi Jesucristuqui nii tuquita liinaca apatatskatchiča, nii lii cuzturumpinacžtanpacha. Nekztan ew lii ut'aychiča. Nii lii jaru Jesucristuqui wilana cunta intirjitatača.

¹⁰ Yooz kuzcama kamcan Jesucristuqui tsjii wiltakaz persun curpu wilana cunta intirjichiča, žoñinacž ujquiztan ticzjapa. Jalla nižtiquiztan Yoozqui učumnacaquiz zuma kamañchiz cjiskatchiča.

¹¹ Timplu jilirinacaqui zapuru ninacž puestuquiz atintichiča. Zapuru wiltan wiltan wilanana Yoozquin tjaañitača. Pero nižta wilananaqui ujnacquiztan anapan žoñinaca liiwriyasacha.

¹² Jesucristuzti tsjii wiltakaz persun curpu wilana cunta intirjichiča, zoñinacž ujquiztan ticzjapa. Jalla nuž ticžcu, arajpachquin Yooz Ejpž zew latuquiz julziča, nižtan chica mantiñi cjisjapa.

¹³ Jalla nicju tjewžcan žejlča, niž quintranaca liwj atiptacama cjisjapa, niž kojch koztan tjecžtažtakaz.

¹⁴ Jalla nuž zoñinacžtajapa tsjii wilta ticžcu, Jesucristuqui Yooz partiquiz žejlñi zoñinacžquiz wiñayjapa Yooz yujcquiz ancha zuma cjiskatchiča.

¹⁵ Nižaza nii puntuquiztan Espiritu Santuqui chičiča, tuž cjan:

¹⁶ “Tuquita lii apatatžcu, wejrqui zoñinacžquiz tsjii ew lii tjaa-ača. Jalla nuž cjiča Yooz Jiliriqui. Wejrqui ninacž kuzquiz wejt liinaca zizkatača, nižaza intintazkatača”.

¹⁷ Nekztan cjichizakazza:

“Ninacaž paata ujnaca ana iya cjuñznača. Nižaza ninacaž ana wali cjcjitanacami liwj tjatznača.

¹⁸ Jalla nižta ujnacquiztan pertuntažlaj niiqui, ana iya čjul wilanami pecasača”.

YOOZQUIN MACJATSPANZ WAQUIZICHA

¹⁹ Jilanaca, cullaquinaca, jaziqui Jesucristuž ticziž cjen učhumqui ana jiwjatcan Yooz yujcquiz luzasača.

²⁰ Ew kamañchiz kamcanaqui ana jiwjatcan Yooz yujcquiz luzasača. Jalla nii ew kamañqui Jesucristuž tjaatača. Persun curpu wilana cunta tjaažcu, Jesucristuqui arajpachquinpacha Yooz yujcquiz luzziča, nii c'uchquin žejlñi cortina cjetžtažokaz.

²¹ Jesucristuča Yooz kjuychiz zoñinacžtajapa Yoozquin palt'iziñiqui. Jaziqui učhumnacaltajapa palt'izinaquiča.

²² Jalla nižtiquiztan tjapa kuztan Yoozquin macjatz waquiziča. Nižaza Jesucristužquin kuzziz cjen ana jiwjatcan Yoozquin macjatz waquiziča. Jesucristuqui učhumnacaž paata ujnaca pertunchiča, učhumnac kuzquiz ana iya uj cjuñzjapa. Nižaza učhum curpunacaqui tsjii zuma kjaztan awjztažokazza.

²³ Yoozquin macjatzcu Yooz famillquiz luzzinčhumčiča. Jaziqui ana jiwjatcan tirapan Yoozquin tjurt'ichi kuzziz cjequiča. Nekztan Yooztan chica kamaquiča. Nii Yooztan kamzqui, jalla nii Yoozqui učhumnacaquiz compromitchiča. Nižaza nii compromitchi Yoozza taku cumpliñiqui.

²⁴ Jalla nižtiquiztan Yooz kamañquiz kamcan porapat zumpacha p'ekinchayasa, zuma munaziñi kuzziz cjisjapa, nižaza zuma obranaca paazjapa.

²⁵ Nižaza yekjap criichi zoñinacaqui zapa domingo ana ajcaczñiča. Ana nižta irata kama. Antiz učhumqui porapat zumpacha p'ekinchayasa, zuma kamzjapa. Jesucristuž tjonz tjuñi žcatžinžquiča. Jalla nižtiquiztan juc'anti učhumqui porapat p'ekinchayastanča.

²⁶ Werar Yooz taku catokžcupacha nekztan kuzinpan Yooz quintra quepsnaquiči niiqui, ana pertunta cjesača.

²⁷ Pero nižta cjičijinacžquiz Yoozkaz casticaquiča. Yoozqui niž quintranaca wiñaya casticaquiča infiernuquin.

²⁸ Jakziltat Moisés lii ana cazzi cjitčhaja, nižaza pucultan čhjepultan testicunaca nii ana cazta puntu declartčhaja, jalla nekztan nii uj paañi zoñiqui ana okžcu conzpanikaztača.

²⁹ Jalla nižtiquiztan jakziltat Yooz Majch quintranapan quepsnačhaja, nižaza Yooz Majch li-wriñi ljoc tjawkta puntuquiztan iñaračhaja, nižaza okžni Yooz Espiritu Santužquiz zawjwa zjijčhaja, jalla nižta paañinacaqui juc'anti castictaž cjequiča, nii Moisés lii quintra paañi zoñinacžquiztan cjen. Jalla nižta casticzpan waquiziča nižta zoñinacžtaqui.

³⁰ Učhum pajta Yooz Jiliriqui tuž cjičiča: “Wejrčiča castiquiñtqui. Wejrqui zoñinacžquiz casticača, ujnaca paatiquiztan jama”. Jalla nuž cjičiča Yooz Jiliriqui. Nižaza Yooz takuqui tuž cjiča: “Yooz Jiliriqui niž kjuychiz zoñinacž paatanaca pjalz-naquiča”.

³¹ Jakziltat Yooz quintranapan kamchižlaja, jalla niiqui werar žejtñi Yooziž tantaž cjequiča. Jalla nuž Yooz tantaž cjequiči niiqui, nižtanacžquiz ancha ana waliž cjequiča.

³² Ančhucaz Yooz famillquiz luztaž cjuñzna. Paljajta Yooz taku catokžcu, ančhucqui pasinziz kuztan ancha sufrichinčhucčiča, quintranaca ancha žejlčhiž cjen.

³³ Yekjap ančhucqui ch'aanitatača, nižaza wjajttatača tjapa zoñinacaž cheran. Nižaza yekjap ančhucua jilanacaž nižta sufran, ančhucqui “Jesalla, wejt jilača niiqui” cjan declarčinčhucčiča.

³⁴ Ančhucqui tsjii criichi zoñinaca preso tanta cjen okžni kuztan yanapčinčhucčiča. Nižaza ančhucuaž cusasanaca kjañta cjenami, cuntintu kuzziz žejlčinčhucčiča. Arajpachquin ančhucaltajapa juc'ant zumanaca žejlča, wiñayjapa tjurñi. Jalla nii cjuñžcu, ančhucqui cuntintu kuzziz žejlčinčhucčiča.

³⁵ Tjurt'ichi kuzziz cjan, jalla nii zuma kuzquiztan ana jayta. Ticzcama tjurt'ichi kuzziz cjequiz niiqui, Yoozquiztan pacta cjequičha juc'ant zumanacžtan.

³⁶ Ančhucqui pasinziz kuzziz cjee, Yooz kuzcama zuma kamzjapa. Jalla nekztan ančhucqui Yooziž compromitta zumanaca tanznaquičha.

³⁷ Yooz takuqui tuž cjičha:

“Wajilla nii tjonñiqui tjonauquičha, anaž ancha azk katasačha.

³⁸ Jakziltat wejtquiz kuzziz cjen wejt yujcquiz ana ujchiz cjechaja, jalla niiqui arajpachquin wejtjan chica zumapan kamaquičha. Pero jakziltat wejt quintra quepačhaja, jalla nii zoñičha ana waliqu. Nižtan ancha anal jutzazučha”.

³⁹ Pero učhumnacačha anapan Yooz quintra quejpnasaz niiqui, Yooziž ancha ana waliž castictaž cjequičha. Antiz učhumčha tirapan Yoozquin kuzzizqu. Jalla nuž kamcan učhum persun animu zumaž čhjelinčha, liwriita cjisjapa.

11

YOOZQUIN KUZUZIZ ZOÑINACA

¹ Yoozquin kuzziz cjen, učhumqui ultimupan zizza, Yooz taku cumplitapanž cjequičha, jalla nii. Nižaza Yoozquin kuzziz cjen učhumqui zizza, anza timpuquiz ana cheržcumi Yooz žejlpančha, nižaza Yooz zumanaca ultimupan žejlčha, nii.

² Učhum tuquita atchi maa ejpnacaqui Yoozquin kuz tjaachičha. Jalla nuž Yoozquin kuzziz cjen Yoozqui ninacž puntuquiztan “Zumačha ninacaqui” cjičhičha.

³ Yoozqui tawkžtankaz čhiican tii muntu paachičha. Yoozquin kuzziz cjen jalla nii zizza, ultim werara jalla nužupan paata, jalla nii. Yoozqui ana chertanacquiztan tii muntuquiz žejlñinaca paachičha.

⁴ Yoozquin kuzziz cjen Abelqui tsjii zuma ofrenda wilana Yoozquin tjaachičha. Cainžquiztan juc'ant zuma ofrenda Yoozquin tjaachičha. Abelž Yoozquin kuzziz cjen, Yoozqui Abelž tjaata ofrenda risiwchičha. Nižaza Abelž puntuquiztan Yoozqui čhičhičha “Zumačha niiqui” cjan. Abel ticiž cjenami učhumqui zizza, niiqui Yoozquin zuma kuzziztačha, jalla nii. Jalla nii zizcuqui učhumqui Abelž zuma kamaña yatekasa.

⁵ Yoozquin kuzziz cjen Enocqui arajpachquin ana ticzi chjichtatačha. Ana iya tii muntuquiz žejlchičha. Yoozpantačha chjitchi. Yooz takuqui Enocž puntuquiztan tuž cjičha: Ima arajpachquin chjichtaž cjen, Yoozqui Enoc zuma kamañquiztan cuntintu cjišičha. Jalla nuž cjiyrtačha Yooz tawk liwruquiz.

⁶ Jakziltat ana Yoozquin kuzziz cjechaja, jalla niižquiztan Yoozqui anapanž cuntintu cjesačha. Jakziltat Yoozquin macjatz pecčhaja, jalla niiqui criistančha, Yoozqui žejlčha, jalla nii. Nižaza criistančha, Yoozqui niižquin macjatz pecči zoñinacžquiz zumanaca tjaaquičha, jalla nii. Jalla nižta criichi žoñžquiztan Yoozqui cuntintučha.

⁷ Nižaza Yoozquin kuzziz cjen Noequi kjaz juyzuquiztan liwriitatačha. Ima kjaz juyzu tjonan Yoozqui Noežquiz čhižinchičha, “Kjaz juyzul cuchanžcačha”, cjan. Jalla nii Yooz čhižintaqui Noequi catokchičha. Nekztan Yooz čhiita jaru tsjii pajk warcu kjuya irata kjuychičha, niž familianacžtanpacha liwriita cjisjapa. Jalla nuž Yoozquin kuzziz cjen Noequi tjeezičha, parti zoñinacaqui ancha ujchizza, jalla nii. Nižaza Yoozquin kuzziz cjen Noequi Yooz zuma kamaña tanchičha, tsjii irinsažtakaz.

⁸ Nižaza Abrahamqui Yoozquin kuzziz cjen, Yooz mantita ana jayrazcu cazičha. Yoozqui Abrahamžquiz cuchanzjapa kjawzičha, yekja yokquin okajo. Nižaza Yoozqui Abrahamžquiz tuž cjičhičha: “Wiruñ wejrqui amquiz nii yoka tjaačha, irinsa cunta”. Yooz mantita jaru ojkičha. Jakziquin ojktčhaja, jalla nii ana zizatačha. Jalla nuž cjenami Abrahamqui Yooz tawk jaru ana jayrazcu ojki želatčha.

⁹ Abrahamqui Yoozquin kuzziz cjen Yooz mantitacama nii Yooz tjeežta yokquiz kamchičha. Yekja zoñž yoka cjenami, Yoozqui Abrahamžquiz nii yoka compromitchičha, “Wiruñ tii yoka amta cjequičha”, cjanacaqui. Jalla nii yokquizpacha kamcan, zkiz kjuy tultunacchiz kamñitačha Abrahamqui. Jalla nižta zakaz Isaacžtan Jacobžtan zkiz kjuychiz kamñitačha. Nii pucultanaqui Abrahamž irata tjewzizakazza Yooziž čhiita taku cumplitacama.

¹⁰ Ultimu Abrahamqui arajpach wajtquin ojcz tjewzičha, wiñaya tjurñi watja. Yoozqui nii zuma watja pinsičhičha, nižaza paachičha. Jalla nii zuma wajtquin ojcz tjewzičha Abrahamqui.

¹¹ Nižazakaz Sarqui Yoozquin kuzziz cjen ica cjišsinčha, chawcwa cjanpacha. Tsjii majchchiz cjišsinčha, Yoozquin criičiž cjen. Sarqui tantiichinčha, Yoozqui niž compromitta taku panž cumplisnaquičha, nii.

¹² Jalla nižtiquiztan Abrahamqui ticz irarchiz cjenami tsjii majchchiz cjišičha. Jalla nii majchquiztan walja tama mirchičha, walja tama arajpach warawaranacažtakaz nižaza

walja tama kot at pjilanacažtakaz, jalla nižta mirchiča. Ancha tamaž cjen, anača kanchuca Abrahamžquiztan tjonñi majch maatinaca.

¹³ Tjapa nii žoñinacaqui, Abelžtan Enocžtan, Noežtan, Abrahamžtan, jalla ninacaqui ticziča ima Yooz compromitta taku cumplisan. Jalla nuž cjenami Yoozquin tirapan kuzziztača. Yoozquin kuzziz cjen ninacaqui zizziča, Yoozqui niž taku wiruñtajapa panž cumplaquiča. Jalla nuž kuzziz zizcu cuntintutača. Tii muntuquiz žejlcan ninacaqui “Yekja wajtchiz žoñiča”, cjiñitača.

¹⁴ Jalla nižta chiiñinacaqui kjanapacha tjeeža, ninacaqui arajpach wajtquin ojkc pecchiča, nii.

¹⁵ Ninacaž ulanžquita yoka cjuñtasaj niiqui, nii yokquin cuttiñi attasača.

¹⁶ Ninacazti tsjan cusa yokaž pecatča, arajpach yokquin irantiz pecatča. Jalla nižtquiztan Yoozqui anaž azkatča, ninacaž “Wejt Yoozza”, cjan cjenacqui. Yoozqui ninacžtajapa tsjii zuma watja tjaczinchiča.

¹⁷ Nižaza Abrahamqui Yoozquin kuzziz cjen tjapa Yooz mantitanacami cumpliñitača. Yoozqui Abraham yanziča, ultimu Yoozquiz kuzziz, ana ultimu Yoozquiz kuzziz, jalla nii. Jalla nuž yanzjapa Yoozqui Abrahamžquiz mantichiča, niž zinta majch wilana cunta tjaakatzjapa. Nii zinta majchqui Isaac cjitatača. Nekžtan Abrahamqui niž zinta majch wilana cunta conijochiča. Nekžtan conzmayatača. Pero Yoozqui nii conz apatatskatchiča, Abrahamž zuma cazñi kuz zizcu. Niž tuquiqui Yoozqui Abrahamžquiz cjichiča:

¹⁸ “Isaacž cjen amqui majchmaatinacchiz cjequiča”. Jalla nuž taku tjaachi cjenami Abrahamqui niž zinta majch wilana cunta conijochiča.

¹⁹ Abrahamqui persun kuzquiz tantiichiča, Yoozza ticzinacami jacatatskatñiqui, jalla nuž tantiyatča. Abrahamqui persun kuzquiz persun majch conz cjichipantatča. Jalla nižtquiztan Isaac majchqui ticziquiztan jacatatchižtakaz cjisšiča.

²⁰ Nižaza Isaacqui Yoozquin kuzziz cjen Jacobžtan Esaužtan, jalla ninacžquiz mazinchiča, wiruñtajapa ninacžta zumanaca cjequiča, nižaza Yooz yanapta cjequiča, jalla nii.

²¹ Nižaza ticz ora Jacobqui Yoozquin kuzziz cjen Josež maatinacžquiz mazinchiča, Yoozqui ninacžquiz zumanaca tjaaquiča, jalla nii. Nižaza Jacobqui atžtan tjurt'izcu Yoozquin rispitchiča.

²² Nižaza Josequi Yoozquin kuzziz cjen ticz ora mazinchiča, Israel žoñinacaqui Egipto yokquiztan ulnaquiča, nii. Nižaza mantichiča, persun curpu tsjijnaca Egipto yokquiztan chjichajo.

²³ Nižaza Moisés maa ejpqui Yoozquin kuzziz cjen Moisés nastiquiztan čhjep jiiž chjožiča. Ninacaqui cherchiča, ancha c'achja nii wawa, jalla nii. Tuquiqui Egipto chawjc jiliriqui mantichiča, tjapa Israel lucmajch wawa contaj cjila, nii. Pero Moisés maa ejpqui Yoozquin kuzziz cjen nii chawjc jiliriz mantita ana eksiča. Moisés wawa ana conchiča.

²⁴ Nekžtan Faraón chawjc jilirž majtqui nii Moisés wawa uywassinča. Jalla nuž uywastiquiztan nii wawaquijojkchiča. Jalla nekžtan pajkžcu Moisesqui Yoozquin kuzziz cjen Faraonž maati cunta cjis anapan pecatča.

²⁵ Antiz Moisesqui Yooz illža Israel žoñinacžtanpacha sufriz tantiichiča, uj paañi žoñinacžtan tsjii ratukaz cuntintu žejlz cjenpacha.

²⁶ Niž kuzquiz tantiichiča, “Egipto cusasanacžtan cuntintu kamz cjenpacha, Cristužtajapapankaz sufrasača. Jalla nuž sufrichi kamchiž cjen ultimquiziqui juc'ant cusal cjeeča, ricachu kamzquiztan”. Jalla nuž cjan, Moisesqui Yooz compromitta zumanac kjutñi pinsatča.

²⁷ Nižaza Moisesqui Yoozquin kuzziz cjen Egipto yokquiztan ulanchiča, chawjc jilirž žawjta ortina ana eksu. Niž kuzquiz tantiita jaru tjurt'ichi žejlchiča, niž kuztan Yooz cherchiž cjen.

²⁸ Nižaza Moisesqui Yoozquin kuzziz cjen Yooz mantita jaru zapa kjuyquiz pascua wilana conz mantichiča. Nekžtan nii wilan ljocžtan zapa kjuy zanzquiz sucarpay mantichiča Israel žoñinacž primer maatinaca ana conta cjisjapa, ticzkatñi anjilžquiz.

²⁹ Nekžtan Yoozquin kuzziz cjen Israel žoñinacaqui Mar Rojo cjeta pajk kota kajkchiča, kjoñ yokažtakaz. Nekžtan Egipto quintra žoñinacaqui nii kjoñiranpacha nii pajk kota zakaz kakatča. Jalla nuž taypiquiz kajkžcan tjapa nii Egiptonacaqui kjazquiz ticziča.

³⁰ Yoozquin kuzziz cjen Israel žoñinacaqui Jericó wajt muytata žejlñi pirkanaca pajkatchiča, pakallak tjuñi muytata ojklajžcu.

³¹ Nižaza Yoozquin kuzziz cjen Rahabqui ana ticzinča parti Jericó wajtchiz žoñinacžquiztan. Naaqui Israel wajtchiz awayt'iñinaca zuma risiwchinča. Jalla nižtquiztan ana ticzinča. Tuquiqui putirii žoñitača. Nekžtan Yoozquin kuz tjaachinča.

Pero parti Jericó wajtchiz zoñinacaqui Yooz mantita ana cazziča, werar Yoozquin ana kuz tjaachiča.

³² Yoozquin kuzziz puntuquiztan iya quintunaca žejlča. Pero timpuž pjaltiča. Jalla nižtiquiztan ana chii atasača Gedeónž puntu, Baracž puntu, Sansónž puntu, Jeftéž puntu, Davidž puntu, Samuelž puntu, nižaza profetanacž puntu. Jalla nii Yoozquin kuzziz zoñinacž quintunaca žejlča pero.

³³ Ninacaqui Yoozquin kuzziz cjen quintra zoñinaca atipchiča, nižaza zuma mantiñi cjsičiča, nižaza Yooz compromitta taku tanziča, nižaza ana wal leonanacž atanaca chawczinchiča.

³⁴ Nižaza ana wal uj asñinaca tjessinchiča, nižaza atipchiča, ninaca ana pajk cuchillžtan conta cjisjapa. Nižaza ana azziz zoñinacaqui azziz cjsičiča Yoozquin kuzziz cjen. Nižaza quira zalcan walja azziztača, jalla nižtiquiztan quintra zoñinaca tjiranchiča.

³⁵ Yoozquin kuzziz cjen Yoozqui yekjap maatakanacžtajapa ticzinaca jacatatskatchiča. Yoozquin kuzziz cjen yekjap zoñinacazi sufriskattača. Pero ninacaqui ana Jesucristo nicchiča, sufrisquiztan liwriita cjisjapa. Antiz tirapan tjurt'ichiča, ticz cjenami. Jalla nuž ticziča, jacatatžcu juc'ant zuma kamañchiz cjisjapa.

³⁶ Yekjap zoñinacaqui Yoozquin kuzziz cjen iñartatača. Nižaza wjajttatača. Nižaza carinžtan moktatača. Nižaza carsilquiz chawctatača.

³⁷ Nižaza Yoozquin kuzziz cjen yekjap zoñinacaqui maztan čajczcu contatača. Nižaza yekjapanacaqui taypiquiz pootžcu contatača. Yekjapanacaqui sufriskattatača, werar Yoozquiztan quejpskatajo. Pero nii criichi zoñinacaqui ana quejpsiča. Yekjapanacaqui Yoozquin kuzziz cjen cuchillžtan contača. Yekjapanacaqui Yoozquin kuzziz cjen uuzi zkizimi cabra zkizimi cujžta ojklaychiča. Ana iya zquitchiztača. Nižaza Yoozquin kuzziz cjen yekjap zoñinacaqui t'akjiri kamcan awantichiča; yekjapanacaqui ancha sufrisnaca awantichiča; yekjapanacaqui chjojrirtžtapan awantichiča.

³⁸ Ana criichi zoñinacaqui nii Yoozquin kuzziz zoñinacžtan ana kamz waquiziča. Ana criichi zoñinacaqui ana zumapanča. Nii Yoozquin kuzziz zoñinacazi ancha zumača. Jalla nuž cjenami tii muntuquiz sufrican awantichiča, ch'ekti yokaran ojklaycan, curunacaran ojklaycan, maz pjet ajkquiz kamcan, nižaza yok pjetquiz kamcan.

³⁹ Tjapa ninacaqui Yoozquin kuzzizpantača. Jalla nižtiquiztan Yoozqui ninacž puntuquiztan ticlarchiča, "Ninacača wejtquin kuzzizqu" cjanacaqui. Jalla nuž cjenami, Yooziž compromitta taku ninacžtajapa ima cumplissiča. Yooz taku cumplitaqui ana tanziča.

⁴⁰ Učumnaca cjuñžcu, Yoozqui juc'ant zumanaca pinsichiča. Jalla nižtiquiztan ninacžtanami učumnacatanami chicapacha, nižaza tjapa Yoozquin kuzziz zoñinacaqui Yooz irata ancha zuma kamañchiz cjequiča.

12

YOOZ KAMAÑCHIZ CJEE

¹ Yoozquin kuzziz zoñinaca, jaziqui wacchi tuqita zoñinacaqui učumnacaquiz tjeeziča, Yoozquin kuzziz kamaña, jalla nii. Ninacaqui učumnaca muytatažtakazza. Ninacž zuma kamaña cjuñžla. Jalla nekžtan tjapa anawalinaca paaz jaytila nižaza kuzquiz tjapa anawali pinsiskatñinaca ecla. Nekžtan Yooziž tjaata kamañquiz tjurt'ini pasinziz kuztan kamla.

² Nižaza učumquiqi Jesucristuž kamaña cjuñžla. Niiž cjen učumquiqi Yoozquin kuz tjaachinčumča. Nižaza niiqui učumnacaquiz juc'ant Yoozquin kuzziz cjskataquiča, ancha zuma Yooz kamañchizkaz cjisjapa. Jesucristuquiqi cruzquiz ticzcan sufrichiča. Cruzquiz ticzquiqi azzucatača. Pero Jesucristuquiqi ana turwayziča nii ticzjapa. Jalla nižtiquiztan arajpachquin Yooz žew latuquiz julzi žejlča, cuntintu. Jalla nuž cuntintu žejlz zizcu, nii sufriznaca awantichiča.

³ Jesusaž kamta cjuñžna. Niiquiqi ujchiz zoñinacž kjarquiz ancha sufrichiča. Jalla nii Jesusaž kamta cjuñžcu Yooz kamañchiz kamcan anapan oča, tjup kuzziz cjee.

⁴ Ančucquiqi imaziž contača ujchiz zoñinacaz ančucaquiz walja sufriskatanami.

⁵ Yoozquiqi ančucaquiz chiižinchiča, niiž maatinacaztakaz. Jalla nii ewjt'ini chiižinta ana tjažna. Yooz takuquiqi tuž ančucaquiz chiižinča:

"Wejt maati, Yooz Jiliriz ewjt'ini chiižinta ana chjaya. Nižaza niižquiz casticta cjenami ana llajlla kuzziz cjee.

⁶ Yooz Jiliriquiqi niiž k'aayi maatinaca ewjt'iča; nižaza persun maatinaca azquichni casticu tjaaza, wilta zuma cjcijyajo".

⁷ Jalla nižtiquiztan ančuquiqi pasinziz kuztan Yooz azquichni casticu awanta. Yooz Ejpquiqi ančucaquiz irpiča. Tjapa ejpnacaquiqi persun maatinacapanž ewjt'iča. ¿Tsjii ana nižta ewjt'ini ejp želasajo? Anaž cjesača.

⁸ Jaknužt Yoozqui tjapa niiz maatinaca ewjt'ichaja, jalla nižta Yoozqui ančhuc ewjt'izakazza. Ančhucqui ana ewjt'ita cjitasaž niiqui, ana lijitum Yooz maatinaca cjitasača. Ančhucqui pamparan maatinacažtakaz cjitasača. Ana ultim Yooz famillchiz žoñinaca cjitasača.

⁹ Ančhuc cjuñzna, ocjala cjcanaqui ućhum persun maa ejpqui ewjt'iñitača. Nižaza ni-nacžquiz rispitchinćhumtača. Jalla nižtiquiztan žoñi paañi Yooz Epiž ewjt'itaqui juc'anti catokz waquizičha, zuma kamañchiz kamzjapa.

¹⁰ Ućhum persun maa ejpqui tsjii timpujapakaz ućhumnacaquiz ewjt'ichiča, ninacaž tantiitacama. Yooz Ejpzi ućhumnacaltajapa ewjt'iñičha, ućhum tsjan zuma kamañchiz cjisjapa, niiz irata ancha zuma cjisjapa.

¹¹ Azquichñi casticunacquiztan ućhumqui sufrićhumćha. Casticz ora llaquita kuzzizćhumćha. Pero jakziltat castictiquiztan tsjan zuma kamañchiz cjsisžlaja, jalla niiqui ultimu cuntintu cjisnaquičha. Nižaza zuma kuzziz Yooz kuczama kamaquičha.

YOOZQUIN TJAPA KUZ CJISPANCHA

¹² Jalla nižtiquiztan ančhucqui wilta azi tanzna, zuma kamzjapa. Kjaranacami owanacami otchižtakazza. Tjup kuzziz cjee, zuma kamzjapa.

¹³ Yooz jiczquiz zuma ojklaya. Jalla nekztan anazuma ojklayñi žoñinaca zuma kamañquiz irpita cjesača. Ančhucaž zuma kamtiquiztan ninacaqui zuma kamañchiz cjisnaquičha.

¹⁴ Nižaza tjapa žoñinacžtan zumapanž kamzjapa tjapa kuz tjaa. Nižaza Yooz irata ancha zuma kamañchiz kamzjapa tjapa kuz tjaa. Ana zuma kamañchiz cjequiz niiqui anaž Yooz jiliržtan kamasacha.

¹⁵ Yoozqui ančhucquin yanapz pecćha. Nii zuma yanapta ana chjaya. Yoozquiztan anapan zaraka. Ana wal jar muntizćtakaz ana cjee. Jalla nuž ana wal muntizćtakaz cjequiz niiqui, anćhucatami parti jilanacžtami ana wali kamañchiz cjesača.

¹⁶ Nižaza nii ana zuma kamañchiz Esaúćtakaz ana nižta cjee. Esaúqui adulteriuquiz ojklaychiča, nižaza Yooz kamaña ana importaychiča. Esaúqui jilir majch irinsižtan tsjii lujlž ćheržtan campiichiča.

¹⁷ Nekztan wiruñ Esaúqui ejpžquiztan jilir majch irinsa tanz pecatćha. Niiz ejpqui Jacobžtan tjaachitaž cjen Esaúćquiz ana tjaas atchiča. Niiz irinsa tjaatapanća. Wiruñ Esaúqui ancha kaacanami, ana jaknužumi irinsa tanzñi atchiča.

¹⁸ Ančhucqui Yoozquin macjatžquichinćhucćha. Ančhucqui anača Israel žoñinacažtakaz Sinaí curquin macjatžquichinćhucqui. Nii curquiz žoñinacaqui ojklayćha, nižaza lanža. Pero Yoozquin ana lanžñi atasača. Tuqui timpuqui Israel žoñinacaž Sinaí curquin macjatan nii curuqui ujznatćha, nižaza tsokchi tsjiržtan weeztatača. Nižaza jorjorñimi lliwjlilwñimi želatćha.

¹⁹ Nekz žejlcan trompet jora nonziča. Nižaza Yooz jora nonziča, ninacžquin pal-jayžquñi. Nii jora nonžni žoñinacaqui roct'ichiča, ana iya chiižcajo.

²⁰ Nii joraqui tuž mantichiča: "Jakziltat tii curquiz macjatžcaćhaja, maztan ćhajc jawi contaž cjequičha, už pajk cuchillžtan contaž cjequičha. Žoñinacami animalanacami nižta macjatžcaquiz niiqui, contaj cjiła". Jalla nuž chiižinžquitiuiztan Israel žoñinacaqui ancha tsucchiča, nižta mantanaqui ana iya awanti atchiča. Jalla nižtiquiztan roct'ichiča, ana iya chiižcajo.

²¹ Ancha ispantichucanacatača nii chertanacaqui. Jalla nižtiquiztan Moisespachača tuž cjičiqui: "Wejrqui anchal tsucuča, nižaza kjarkatuča".

²² Pero ančhucqui Sinaí curquin ana macjatžquichinćhucćha. Ančhuczi arajpach žejtñi Yoozquin macjatchinćhucćha, nižquin kuz tjaachiž cjen. Jaziqui ančhucćha arajpach Jerusalén wajtchiz žoñinacaqui. Nižaza Sión cjića curquiz macjatažokazza. Nii Sión cjića curuqui cjića, arajpach Jerusalén watja, jalla nii. Arajpach Yooz wajtquin warank waranka anjilanača žejlćha, Yoozquin rispizjapa ajczñi.

²³ Nižaza Yooz wajtquin anjilanaćžtan chica Yooz wajtchiz žejlñinacaqui ajcža, Yooz wajtchiz žoñinacžtanpacha. Jalla nii žoñinacž tjuunacaqui arajpach listiquiz cjiřtača. Nižaza ančhucqui Yooz jiliržquizpacha macjatchinćhucćha. Nii Yoozza tjapa pjalñiqui. Nižaza ančhucatan zuma kamañchiz žoñinacž animunacžtan Yooz wajtchizza. Yoozqui ninacžquiz niiz irata ancha zuma kamañchizkaz cjskatchiča.

²⁴ Nižaza ančhucqui Jesusižquin macjatchinćhucćha. Ničha ew acta ut'aychiž cjen žoñinacžta tjurt'ižniiqui. Žoñinacžtajapa ticziča. Nižaza žoñinacž laycu niiz ljocžtan sucarpaytažokaz cjičiča animal ljocžćtakaz. Jesusiž ljoc tjawkchiž cjen, žoñinacaqui liwriita cjesača. Abelž ljocqui žoñinaca ana liwriyasača. Jalla nižtiquiztan Jesusiž ljocqui Abelž ljocquiztan tsjan cusača.

²⁵ Jalla nižtiquiztan ančhucqui Yooz chiita taku anaž nicaquičha, panž catokz waquizičha. Tuqui timpuqui Yoozqui Sinaí curquiztan Israel žoñinacžquiz chiičiča.

Nekztan ninacaqui nii chiita taku ana juyzu paachiča. Jalla nižtiquiztan ninacaqui castictatača. Anziqúi Yoozqui arajpachquiztan učhumnacaquíz chiizínžquiča. Nii chiizinta ana juyzu paaquíz niiqui, panž castictaž cjequiča. Yoozquiztan anapan atipi atasača.

²⁶ Tuqui timpuqui Yooz joraqui yokanaca chjekinskatchiča. Anziqúi cjiča: “Tsjiižtan yokanacami arajpachami chjekinskatača”.

²⁷ “Tsjiižtan” cjanacauqui Yoozqui zizkatča, Yooz paata yokanacami arajpachanacami liw kataquiča. Nekztan ana chjekinskattanaca, niikaz želaquiča.

²⁸ Yooz watjaqui ana tjtantaž cjesača, panž želaquiča. Učumča nii wajtchiz žoñinacaqui. Nižaza učumqui Yooztan chica mantaquiča. Jalla nižtiquiztan učumqui Yoozquin gracias cijzpan waquiziča. Nižaza tjapa kuztan, nižaza humilde kuztan Yoozquinž zuma rispiča, Yooz tsucchuca azi tjeezñiž cjen, nii cjuñzcu. Jalla nuž rispitan Yoozqui cuntintu cjequiča.

²⁹ Cjuñzna. Učum Yoozza tsjii anawalinaca ujzñi ujtakazqui. Jalla niiča anawali žoñinaca casticñiqui.

13

CHIIZINTANACA

¹ Jilanaca, cullaquinaca, porapat tirapan zuma munaziñi kuzziz cjee.

² Nižaza tjonžñi žoñinacžquíz zuma pan kjawžna. Jalla nuž kjawžcuqui yekjap žoñinacaqui anjilanacžquíz atintichiča, ana zizcu.

³ Carsilquíz chawcta jilanaca panž cjuñžna. Ančhucazakaz persun kuzquíz ninacaž chawctiquiztan sint'iz waquiziča. Nižaza sufriskatta jilanacžquíz cjuñžna. Ančhucqui curpuchiz cjanacauqui zakaz sufriskatta cjesača.

⁴ Tjapa ančhucqui lucutjiñi zalžcu, zuma lijitumaž cjecjiya. Tjunatan zalžcu zuma lijitumaž kama, ana yekja maatakžtan ojklayasača. Jakziltat adulteriuquíz ojklayčhaja, jalla niizquíz Yoozqui casticaquiča.

⁵ Ančhucqui anaž paazquin kuz tjaa. Zejlñi cusasanacžtan cuntintukaz cjee. Yoozqui tuž cjičiča: “Wejrqui ančhuc anal jaytača, nižaza anal ečača”.

⁶ Jalla nižtiquiztan učumqui ana jiwjatcan chiyasača, tuž cjan:

“Yooz Jiliriča wejtquíz yanapñiqui. Žoñinacaž wejtquíz čhulu paachi cjenami anal eksnasača”.

⁷ Ančhucqui icliz irpiñinaca cjuñžna. Ninacaqui ančhucquíz Yooz taku paljayčiča. Jaknužt ninacaqui tjurt'ichi kuzziz ticzičhaja, jalla nii cjuñžna. Ninacaž Yoozquin kuzziz kamta jalla nižta irataž kama.

⁸ Jesucristuqui tuquitanpacha, anizimi, jaztanami tsjii kuzzizpanikazza, jalla niiča ana kuz campiiñiqui.

⁹ Nižaza ančhucqui tjapaman tsjemata tjaajintanacžquíz anaž incallskata. Cjuñžna, Yoozqui ančhucquíz yanapaquiča, tjup kuzziz cjisjapa. Jalla niiqui tsjan yanapča, čheri lujl cuzturumpiquiztanaqui. Jakziltat nii čheri lujl cuzturumpinac jaru kamčhaja, jalla ninacžtaqui anaž yanapča juc'ant zuma kamañchiz cjisjapa.

¹⁰ Učumnacaltaqui anača animal wilana žejlča. Tsjemat wilana žejlča, Jesucristupacha. Tuquita timplu jilirinacaqui anapanča nii wilana lujlčuca.

¹¹ Tuquita lii jaruqui timplu chawjc jiliriqui conta wilan ljoc chjitchiča c'uchquin žejlñi Yooz kjuyquin, Yoozquin ofrenda tjaazjapa, ujnaca pjonca cjisjapa. Nii wilanž curpunacaqui wajt tjii pampiquin ujñitača.

¹² Jalla nižta irata Jesusaqui wajt tjiuquin ticziča, niž persun ljoc cjen žoñinacžquíz Yooz anča zuma kamañchiz cjskatzjapa.

¹³ Ančhucqui ana wal kamaña eccu, Jesucristužquin macjatz waquiziča. Nekztan učum listuž cjee, sufrizjapa.

¹⁴ Tii muntuquíz kamcan ana wiñaya tjurñi wajtchizčhumča. Pero učumqui arajpach watjaž ojkszjapa anča tjewža.

¹⁵ Jalla nižtiquiztan Jesucristužquin sirwican učumqui tirapan Yoozquin honora tjaaz waquiziča. Jalla nuž honora tjaacan wilana cuntaž cjequiča. Jaziqúi učumqui persun atžtan “Yoozqui honorchizkaj cjiča”, cjan chiiz waquiziča.

¹⁶ Nižaza ančhucqui zuma paaznaca panž paa. Nižaza parti jilanacžtan ančuca želinchizquiztan jama tojna. Nekztan ančucaž zuma kamtiquiztan cuntintu cjequiča Yoozqui.

¹⁷ Ančhucqui icliz irpiñinaca cazpanča, nižaza ninacž jaru cjee. Ninacaqui ančhuc cuitiñiča. Nižaza nii icliz irpiñinacaqui, jaknužt criichi žoñinaca cuitiñižlaja, jalla nii Yooz yujcquin cuenta tjaastanča. Ančhuc zuma kaman, irpiñinacaqui cuntintuž ančhuc

cuitaquiĉha, ana llaquizcu. Anĉhucqui anĉhuca irpiĉinacĉquiz llaquiskataquiĉ niiqui, anapanĉ cusa cjesaĉha anĉhucaltajapaqui.

¹⁸ Wejtnacaltajapa Yoozquiztan mayizina. Wejrnacqui zuma kuztanpan kamuĉha. Jaziqui wejtnaca kuzquiz ana zinta uj cjuĉuĉha. Chjulu paacanami zuma lijituma kamz pecuĉha.

¹⁹ Niĉaza wejtnacaltajapa mayizinalla, anĉhucaquin wilta apura tjonzjapa, ana iya atajta cjisjapa.

²⁰⁻²¹ Yoozza Źoĉinacĉ kuznaca walikaz cjiskatĉiqui. Jalla niiqui uĉhum Jesucristo Jil-iriĉ ticziquiztan jacatatskatchiĉha. Jesucristuĉha uĉhum chawjc Awatiriqui uuzanaca itzĉiĉtakaz. Niiqui persun ljoĉĉtan ew acta ut'ayĉhiĉha wiĉayjapa.

Jalla niĉtiquiztan Yoozqui anĉhucaquiz zuma kamaĉchizpankaj cjiskatla, niiĉ kuzcama kamzjapa. Niĉaza Jesucristuĉ cjen Yoozqui uĉhum yanapla, zuma obranacami paazjapa, niĉaza zuma kamzjapa. Anĉhucaĉ zuma kamtiquiztan Yoozqui cuntintu cjequiĉha. Jaziqui Jesucristuqui wiĉayjapa honorchiz cjila. Jalla nuĉoj cjila. Amen.

²² Jilanaca, cullaquinaca, anĉhucaquiz rocuĉha, weriĉ chiiĉzinta taku zuma kuztan nonznaquiĉha. Tsjii kjaĉ takunaca tii cartiquiz cjiĉrchinĉha.

²³ Uĉhum Timoteo jilaqui carsilquiztan liwriitaĉha. Jalla nii anĉhucaquiz maz pecuĉha. Timoteoqui tekz waj tjonaquiĉ niiqui, niiĉtan wejttan anĉhucaquin cherzĉi okaĉha.

²⁴ Tjapa icliz irpiĉinacĉquin tsaanĉzinalla. Niĉaza tjapa Yoozquin criichi Źoĉinacĉquiz tsaanĉzinalla. Niĉaza Italiaquiztan tjoĉi jilanacaqui anĉhucaquin tsaanĉzquiĉha.

²⁵ Yoozqui tjapa anĉhucaquiz zumapanj yanapt'ila. Jalla nuĉoj cjila. Amĉn.

LA CARTA DE SANTIAGO

¹ Wejrtča Santiaguqui. Wejrqui Yooz Ejpž, nižaza Jesucristo Jilirž mantitacama okiñ zoñtča. Ančhucqui Israel wajtchiz zoñinacaqui tjapa nacionquin wichanzicha. Anthucaquin saludos apayžcuča tii cartiquiz.

PRUEBANACZ PUNTU

² Yoozquin criichi jilanaca, cullaquinaca, tii muntuquiz kaman tjapaman pruebanacaž zejłtča. Čjulorami tsjii prueba tjonaquiz niiqui, ancha cuntintuž cjee.

³ Yoozquin tirapan kuzziz cjen, čjul pruebanacami atipaquičha. Nižaza Yoozquin juc'anti kuzziz cjisnaquičha. Nekztan juc'anti Yoozquin tjurt'iñi kuzziz cjisnaquičha.

⁴ Nižaza tirapan Yoozquin tjurt'aquiz niiqui, Yooz irata ancha zuma kamañchiz cjisnaquičha. Zuma lijitum zoñipan cjisnaquičha.

⁵ Pruebanacaž amquiz tjonaquiz niiqui, nekztan am kuz turwayznaquiz niiqui, Yoozquin juc'anti mayiza, Yooz jicz puntu zuma zizñi cjisjapami, nižaza nii pruebanaca atipjapami. Yoozqui ancha zumača. Jakziltat mayizaja, jalla nii zoñžquiz Yoozqui zuma yanapasača. Niiž okzñi kuzziz cjen, ana ujžcu yanapasača, pruebanaca atipsjapa.

⁶ Yoozquin mayizican tjapa kuztan mayizizpanča. Ana paysnakñi kuzziz mayiziz waquiziča. Paysnakñi kuzziz cjesaž niiqui, tjamiž chjichta kjaz ljojkižtakaz cjesača, awizaqui Yoozquin kuzziz, awizazti ana Yoozquin kuzziz.

⁷⁻⁸ Nii paysnakñi zoñiqui pizc kuzzizza. Jalla nižtiquiztan pizc kuzziz mayizan, ana nonžta cjesača. Yoozqui nii zoñžquiz ana yanapasača. Nižaza nii pizc kuzziz zoñiqui anaž pinziz waquiziča, "Yoozqui wejtquiz yanapaquičha", cjicanaqui.

⁹ Jilanaca, cullaquinaca, yekjapa Yoozquin criichi zoñinaca porinacača. Nii zoñiqui Yoozquin criichiž cjen, Yooz maati cjissiča. Nižaza arajpachquin okaquičha, walikaz kamzjapa. Jalla nižtiquiztan cuutintupanž cjis waquiziča.

¹⁰ Jakzilta Yoozquin criichi zoñit ricachuquiztan porilla cjisnasaž niimi, cuntintupankaz cjis waquiziča. Nii zoñiqui tirapan Yooz maatiča. Tsjii pastuqui tsjii pacamakazza zuma pjajkjallchizqui. Nekztan niiž pjajkjallaqui k'alaž chooča. Pjajkjallažtakaz tsjii timpupankaz ricachu cjesača zoñiqui.

¹¹ Tjuñiž kjaki siyanaqui pastu pjajkjallanacaqui k'ala chooča. Nekztan nii pjajkjallanacaqui katča. Anaž iya c'ajča. Nižtakaz ricach zoñinacaqui tsjii timpukaz ricu kamča. Ricachu kamcan tiripintit porinsnasača.

UJ PAAZ PUNTU, YOOZ PUNTU

¹² Čjul prueba tjonanami Yoozquin tjurt'iñi kuzziz cjee. Nižta tjurt'aquiz niiqui, cuntintuž cjequičha. Yoozqui nii zuma tjurt'iñi kuzziz zoñinaczquiz ancha zuma kamaña tjača. Nuž Yoozqui compromitchičha nižtan munazican sirwiñi zoñinaczquin.

¹³ Jakziltat uj paaz pecčhaj niiqui, anapanž Yoozquin culpasača, "Yoozqui wejtquiz ujquin tjojtskatz pecča" cjicanaqui. Yoozqui ana jakzilta zoñimi ujquiz tjojts munča. Nižaza Yoozqui uj paazqui anapanž persuna pecča.

¹⁴ Zoñinacz persun kuzqui ana zuma uj paaz pecča. Nekztan uj paazquin ojkča.

¹⁵ Čjulorami zoñinacaqui ana zuma kuzcama kamčhaj niiqui, ujquinpanž chjichtača. Nižaza jakziltami uj paañipan kamčhaj niiqui, wiñaya castictaž cjequičha.

¹⁶ Wejt k'ayi jilanaca, cullaquinaca, ana incalltaž cjee.

¹⁷ Yoozqui zumapanča, nižaza lijitumapanča čjulquiztanami. Tjappacha zumanacaqui Yoozquiztanž tjonča, tjapa zumanacača tsewcta Yooz Epiž tjaataqui. Yoozqui tjuñimi jiižmi paachiča. Ninacz kjanaqui awisac zuma kjanča, awisac tsjirquiz weeztača. Yoozti anača nižta, zumapankazza. Anapan zoñi ujquin tjojtskatz pecča.

¹⁸ Yoozqui zuma kuztan učumnacaquiz niiž maati cjiskatchičha. Yooz werar taku criichiž cjen, učumnacaqui Yooz maatinaca cjissinčumča. Jalla nižtiquiztan učumnacaqui parti criichi zoñinacz tuqui Yooz maatinaca cjissinčumča. Jalla nužupanča Yooziž pinsitaqui.

YOOZ TAKUNACA CATOKZPANCHA

¹⁹ Wejt k'ayi jilanaca, cullaquinaca, nonžna. Yooz taku nonzjapa listu cjee. Ančuca kuzquiz čjulu chiizmi tjonžaja, jalla nii chiizqui zumpacha tantiižcu, chiiz waquiziča. Tiizakaz cjiwča, anača orallac žawjzqui.

²⁰ Oralla žawjñi zoñinacaqui parti zoñinaczquiz anaž yanapi atasča Yooz kuzcama kamajo.

²¹ Jaziqui ančhucui ana zuma kamañnacquiztan jayta. Ancha uj paaznaca žejlčha. Tjapa uj paaznacquiztan jayta. Nekztan humilde kuzziz Yooz tjajinta taku zumpacha catoka. Nii Yooz takuqui ančhucž liwriyasača.

²² Yooz takuqui anača nonžneeka nonzqui, antiz catokspanča, ana persunpachquiz incallta cjeajajo.

²³ Yooz taku nonžcu jakzilta žoñit nii Yooz tawkcama ana kamčhaja, jalla niičha ana zuma žoñiqui. Tižtaž nii žoñiqui. Nii žoñiqui ispiwjquiz persun yujc cheržcu,

²⁴ ojkčha. Nekztan nii cheržta yujc tjažta. Nižtaž nii Yooz taku nonžneeka nonžni žoñiqui. Yooz taku nonžcu, Yooz taku tjažta; ana nii Yooz tawkcama kamčha.

²⁵ Yekjap žoñinacazti tjapa kuz nonžta Yooz zuma liwriiñi taku. Kuzquiz chjojčha. Nonžcu, ana tjažta, niicamaž kamčha. Jalla niiz zuma kamtiquiztan Yoozqui nii žoñžquiz wintissa, tsjan walikaz kamajajo.

²⁶ Jakzilta žoñit “Yooz tawkcama zuma kamiñ žoñičha wejrqui” chiičhaj niiqui, niiz atquiztan chiičhiz cuitazla. Anaž niiz ata cuitasaquiz niiqui, persunpachaž incallčha. Inapankaz cjičha, “Yooz tawkcama zuma kamiñ žoñičha wejrqui”.

²⁷ Jakzilta žoñit Yooz tawkcama zuma kamčhaj niiqui, t’akjir wajchallanacami žewallanacami yanapaquičha. Nižaza ujchiz žoñi irata anaž kamasacha. Jalla nii žoñičha Yooz tawkcama zumaž kamñiqui. Jalla nii žoñičha Yooz Ejpž yujcquiziqui ana ujchizqui.

2

JILANACZQUIZ ANACHA PJALI PJALI CJISQUI

¹ Wejt jilanaca, cullaquinaca, Jesucristo jiliričha ancha honorchiz Yoozqui. Ančhucqui nii Jesucristo jiliržquiz kuzziz kamcan, tjapa jilanacžtan kuz chicata chjits pecca. Anača pjali pjali cjisqui.

² Jalla tuž nonžna. Ančhucraž ajcizž cjen pucultan žoñinacaqui tjonachani. Tsjiiqui ricachuča, kor surtijanacchiz, nižaza ancha zuma zquitčhiz. Tsjiižti porillača, tsjel zquitčhiz.

³ Nekztanaqui ančhucqui ricachukaz zuma atintačhani, “Tucquin julzna” cjičan. Nii porill žoñžquizzti, “Nekzillakaz tsijtsna” cjičan, už “Zana latullakaz julzna” cječhaj.

⁴ Nuž cjequiz niiqui, niwjctanaqui pjaliž cjiicjičha. Tjapa jilanacažtan ana chicata kuz chjičha. Ana zuma kuzziz cjen, nižta cjiicjičha ančhucqui.

⁵ Nonžna, wejt k’ayi jilanaca, cullaquinaca. Tii muntuquiz Yoozqui pori žoñinaca illzičha, niizquin ancha kuzziz cjeajajo. Nižaza Yoozqui tsjii taku tjaachičha, tuž cjičan: “Wejtquin kuzziz žoñinacaqui wejttan chičaž kamaquičha. Nižaza jilirižtakaz wejttan chičaž mantaquičha”. Jalla nii taku tjaachičha, niiztan zuma munaziñi žoñinacžquiz. Jaziqui nii Yoozquin kuzziz pori žoñinacaqui nii tjaata taku tanznaquičha.

⁶ Ančhuczi pori žoñinaca ana rispitičha. Ricachukaz rispitičha. Pero ricachu žoñinacaqui ančhucjuč’anti langzkatčha. Nižaza jilirinacž yujcquiz ančhuc chjičha, multanaca pacajajo.

⁷ Nižaza ricachunacaqui Jesucristuž quintra ana zuma chiičhičha. Pero zuma Jesucristuž cjen učhumquj cristiano cjiča tjuuchizčhumčha.

⁸ Jilanaca, cjiirta zuma Yooz takuqui tuž cjičha: “Jaknužt persunpachquiz okžñamžlaja, jalla nižta okžni kuzziz cjičanča žoñinacžquizimi, lijitum mazižtakaz”. Niicama kamcanaqui zuma kamsa.

⁹ Pero pjali cjiicjiñinacazti uj paača. Yooz tawk quintra paača. Jalla nii kjanapacha zizkatčha Yooz takuqui.

¹⁰ Jakzilta žoñit tsjiillapan Yooz mantita ana cazzaj niiqui, ujchizpanča. Parti mantitanaca cazziž cjenami Yooz lii quintra paachičha. Jaziqui castictaž waquzičha.

¹¹ Yoozqui tuž mantičha: “Anača adulterio paazqui”. Nižaza nii Yoozpača mantičha: “Anača žoñi conzqui”. Adulterio ana paachi cjenami, jakzilta žoñit žoñi cončhaj niiqui, uj paača. Yooz lii quintraž paača.

¹² Yooz takuqui Cristuž puntu zakaz chiičha. Cristučha učhum liwriiñiqui. Liwriita žoñinacaqui čhulu paacanami chiičanami zuma munaziz waquzičha. Jakzilta žoñit ana nuž kamčhaj niiqui, casticta cjequičha.

¹³ Nižaza jakziltat ana okžni kuzziz kamchizlaj niiqui, casticta cjequičha. Yoozqui niizquiz ana zakaz okznaquičha. Pero jakziltat okžni kuzziz kamchizlaj niiqui, juyzuquiz liwriita cjequičha, ana casticta cjequičha.

YOOZQUIN KUZUZ KAMZ PUNTA

¹⁴ Wejt jilanaca, cullaquinaca, jakzilta žoñit ana zuma kamčhaja, niiqui inakaz chiičha, “Yoozquin kuzzizčha wejrqui” cjičan. Nuž ata alaja chiyani, ana liwriita cjesača.

¹⁵ Nonžna. Tsjii jila cjiču už tsjaa cullaqui cjiču ana zquitčhizlaja, nižaza ana čherchizlaja, jalla niizquiz yanapž waquzičha.

¹⁶ Nii t'akjir zoñi cherzcu tsjiiqui ančucaquiztan cjechani, “Walika okalla amqui, am curpu anam čh'uñuri naykataquičha; nižaza anam čheri eckataquičha” cjan. Pero ana čhjulumi nii t'akjir zoñžquiz yanapčhaj niiqui, ina chiita tawkžtankaz okža. Nii pori zoñiqui pachpa t'akjirikaz žejlča.

¹⁷ Pori zoñžquiz ana yanapčhaj niiqui, inapanikazza Yoozquin criitaqui. Nii ana yanapñi zoñiqui ana Yooz kamañchizqui. Inakaz pinsičha, “Yoozquin kuzziz zoñtča wejrqui” cjananaqui.

¹⁸ Yekjap zoñinacaqui cjechani, “Tsjiičha Yoozquin kuzzizqui. Tsjiizti zuma kamañnacchizqui”. Pero wejrqui cjiwčha, ana zuma kamčhaj niiqui, čjaknužt Yoozquin kuzzizqui tjeeznasajo? Anapanž tjeezñi atasacha. Zuma kamcan, Yoozquin kuzzizqui tjeeznasacha.

¹⁹ Zinta Yoozpankaz žejlča. Ančhucqui nii zinta Yoozquin criičha. Nii walikazza. Pero zajranacami “Zinta Yoozpankaz žejlča” jalla nuž zakaz zizza. Jalla nuž zizcu, Yooz casticz tjuñi eksñičha. Pero Yoozquin eksñi cjenami ana Yooz mantitacama kamz pecčha nii zajranacaqui.

²⁰ Ana zuma kamcan, jakziltat “Yoozquin kuzziztča” cjan chiičhaja, jalla niiqui inakaz nižta chiičha. Zumzučha niiqui. Yoozquin kuzziz puntu zizñi cjisjapa, tuž nonžna.

²¹ Abraham, učum tuquita atchi ejpqui, Yooz mantitacama ojčkīčha. Tsjii nooj Yoozqui Abrahamžquiz mantichičha tuž cjan: “Abraham, am zinta majch, Isaac cjeta, wilanažtakaz jawkwaquičha”. Yoozqui nuž mantichiž cjenaqui, Abrahamqui niž kuzquiz nii mantita payitacha. Pero niž majch Yoozquin wilana l'joktawk cjen, Yoozqui Abrahamžquiz atajchičha, nii zinta majch ana conajo. Jalla nuž Yooz mantitacama kamtiquiztan, Abrahamqui Yooz yujcquiziqui ana ujchiz nižaza zuma cjišičha.

²² Abrahamqui Yoozquin kuzziz cjen, Yooz mantitacama zuma kamchičha. Nižaza zuma kamchiž cjen Abrahamqui tjeezičha, Yoozquin kuzzizpančha, nii. Nekztan Yooz mantita cazziž cjen, juc'anti Yoozquin kuzziz cjišičha.

²³ Cjiirta Yooz takuqui tuž cjičha: “Yoozquin kuzzizpančha Abrahamqui. Nekztan Yooz yujcquiziqui Abraham ana ujchiz nižaza zuma cjišičha”. Abrahamž kamtiquiztan učumqui zizza, nii Yooz takučha zuma razunaqui. Nižaza Abrahamqui “Yooz amigo” cjeta tjuuchiztačha.

²⁴ Jaziqui ančhucqui zizza, zuma kamcan, Yooz yujcquiziqui ana ujchiz cjesačha, nii. Ana zuma kamcan, ata alajakaz chiičha, “Yoozquin kuzziztča” cjananaqui. Juñta kuzllakaz criyanaqui Yooz yujcquiziqui tira ujchizpanikaz žejlča.

²⁵ Nii puntuquiztan tsjiillazakaz cjiwčha. Naa Rahab cjeti putirii maatakž puntuquiztan cjuñzna. Naaža wajtquiziqui pucultan Israel zoñinacaqui cuchanžquitatačha awayt'izjapa. Naa žonqui nii pucultan Yooz partir zoñinaca zuma atintichičha. Nekztan ana conta cjeajajo nii zoñinaca yekja jicquin cuchanchičha. Atipasñi yanapchičha. Jalla nižtiquiztan Yooz yujcquiziqui ana ujchiz cjišičha, nižaza zuma kuzziz, naaž zuma kamchiž cjen.

²⁶ Tsjiillazakaz cjiwčha. Tsjii zoñiqui ticžcu, animu ojčkīčha, janchi inakazza. Nižtapachaž tsjii ana zuma kamñi zoñiqui ticzižtakaz žejlča. Ana žejt wirchizza. Inakaz chiičha, “Yoozquin kuzziztča” cjananaqui.

3

ATZTAN CHIIZ PUNTU

¹ Wejt jilanaca, wacchi zoñinaca anaž tjaajiñi cjis waquizičha. Tjaajiñi zoñinacaqui Yoozquiz cuenta tjaastančha. Nekztan ana zuma tjaajinchižlaja, niiqui yekja zoñžquiztan juc'anti castictaž cjequičha. Nii zizzinčhucčha ančhucqui.

² Tjapa zoñinacaqui ujnaca paacha. Jakzilta zoñit persun chiiquiztan ana ujchizlaja, jalla nii zoñičha ancha zumapanqui. Persun chiiž zumpacha ewjasaquiz niiqui, jalla nekztan tjapa niž curpuzakaz ewjasñi atasacha, ana uj paazjapa.

³ Nonžna. Tsjii frenžtan cawalluqui irpita cjesačha, yawchi zoñž pecta jaruqui.

⁴ Nižtakaz zoñinacaqui tsjii kolta tuñžtan pajk warcumi chjitsa, pjursanti tjamiž cjenami. Tsjii warcu joojooñi zoñimi jakzi pecanami tuñžtan nii warcu chjichasacha. Kjažta kolta tuñžtanami pajk warcumi joojowasacha.

⁵ Nižtakaz tsjii kolta ujmi wacchi muntinaca t'apznasacha. Nižtakaz učum chiiñi atami kjažta koltalla cjenami, niž chiiquiztan ancha mantiz atasacha.

⁶ Tsjii uj peekztažtakazza tii ataquī. Tii ataquī čhjul anawalinacami chiyasacha. Tii ataž cjen persunpacha ana zuma kamčha. Nižaza tii ataž cjen yekja zoñinacžquiz ana zuma kamkatačha. Tii atazakaz ajriž jaruqui chiičha.

⁷ Tjapa animalanacami nižaza tjapa wežlanacami zoñž mantuquizpanikaz cjesačha.

⁸ Antiz anañ jec zoñimi persun chiiñi ata manti atasacha. Tii ana wal ataquí anañ jaknuž mantichuca. Tii ataquí ana wali chiiz pecñipanča. Tsjií wininožtakazza tii učum ataquí.

⁹ Učumqui tii atžtan chiican Yooz Ejpž tjuu aynakiñčhupanča. Yooz Ejpqui zoñi paachiča niž irata kuzziz. Nižaza tii atžtanpacha chiican Yooziž paata zoñinaca laykiñizakazza.

¹⁰ Tii atača zuma ana zuma chiiñiquí. Jilanaca, cullaquinaca, jalla nižta chiichiizqui anawalipanča.

¹¹ Tsjií zuma wijiñquiztan zuma kjaztan nižaza chjonanchi kjaztan anañ lewasacha. Anapanž tsjií wijiñquiz pizc punta kjaz želasacha.

¹² Nižtakaz tsjií tujquin mazk'a kjaztan nižaza ch'uyi kjaztan, jalla nii pizc punta kjaz ana želasacha. Nižtakaz tsjií muntiquiz tsjií punta frutapankaz pookñiča. Pizc punta fruta anañ pookasacha. Nižaza tsjií ch'uyi tuquiztan mazk'a kjaz ana cooznasacha.

¿JECT YOOZ TAWK JARU KAMÑI ZOÑI?

¹³ Jaziquí jakziltat Yooz taku zuma zizzaj niiquí, zumaž kamspanča. Nii zizñi zoñiquí humilde kuzziz zuma kamaña tjeez waquiziča.

¹⁴ Jakzilta zoñit anawal iñiziñi kuz tjeezaja, nižaza persunpacha tucquin cjis pecñi kuz tjeezaja, jalla niiquí mit kuzzizpanča. Nižaza nii ana zum zoñiquí "Yooz taku zizintča" cjičanami, Yooz tawk jaru ana kamča.

¹⁵ Nii zoñž kamañaquí anača Yoozquiztanapankazza. Zoñž kuzquiz pinsitanac jaruča nii kamañaquí. Zajražquiztan tjonča.

¹⁶ Jakzilta zoñit anawal iñiziñi kuzzizlaja, nižaza tucquin cjis pecñi kuzzizlaja, jalla nii zoñiž cjen ch'aasnacami nižaza tјapaman ana wali kamznacami žejlča. Nižaza jakzilta zoñit Yooz Epiž kamañchizlaja, jalla niiquí zumapankaz kamča.

¹⁷ Nižaza niiquí pasinziz kuzziz cjen, zoñinacžtan zuma kamča. Nižaza parti zoñž razunanaca nonža. Nižaza nii zuma kamañchiz zoñiča okžni kuzzizqui. Jalla nii zoñiquí zuma kamañanac jarupanž kamča. Nii zoñiquí ana pjali cjiicjiñi kuzzizza. Antiz zuma kuzzizza.

¹⁸ Jakzilta zoñit pasinziz kuzziz zoñinacžtan kamčhaja, jalla niiquí zuma kamča, nižaza parti zoñinacžquiz zuma kami yanapča.

4

MAYIZIZ PUNTU

¹ ¿Jequiž cjen chjaawjkatas žejljo? ¿Jequiž cjen ch'aas žejljo? Ančhuc ana zuma kuzziz cjen žejlča niiquí. Ančhuca ana zuma pecñi kuzqui mantiz pecča.

² Ančhucaž pectanaca ana žejlča. Nekžtan ančhucqui kichassa, zoñi conañcama. Nižaza yekja zoñž cusasa zmassa. Nii zmasta cusasa ana cunsiquí atžcu, nekžtan chjaawjkatassa, nižaza kichassa. Ančhucaž pectanaca cunsiczjapaqui, Yoozquiztan ana mayiziñčhucča. Jalla nižtiquiztan ančhucaž pectanaca ana žejlča ančhucalta.

³ Nižaza ana zuma mayizan, ančhucaž mayizitaquí ana nonžtača. ¿Kjazičquiztan ana nonžtajo? Ančhucqui ana zuma kuzquiztan mayizichinčhucča. Persun kuzcamakaz kamzjapa mayizichinčhucča. Nekžtanacu anapan nonžtatača.

⁴ Yoozquiztan quejpsñi kuzziz jilanaca. Ana nižta cjee. Ujchiz zoñž kamañquiz kuzzizlaj niiquí, Yooz quintrača ančhucqui. ¿Nii ana ziz ančhucjo? Jakzilta zoñit ujchiz zoñž kamañquiz kuzzizlaj niiquí, Yooz quintraž cjišiča nii zoñiquí.

⁵ Anaž inapampa tuquita Yooz cjiirta takuquí tuž cjiča, "Yooz Ejpqui učum kuzquiz niž Espiritu Santo cuchanzquichiča. Nii Yooz Espiritu Santuquí anča pecča, učumqui Yoozquin alaja kuzziz cjisjapa, jalla nii".

⁶ Ančhucaž Yoozquin juc'anti kuzziz cjisjapa, Yoozqui juc'anti yanapasacha. Nižaza Yooz takuquí cjiča, "Yoozqui humilde kuzziz zoñžquiz yanapñipanča. Pero mita kuzziz zoñž quintranpanča Yoozqui".

⁷ Jaziquí Yoozquin kuzziz cjee. Niiž mantuquiz cjee. Zajraž ančhuc ujquiz tјo-јtskat pecanami, Yoozquin tјurt'ichi kuzziz cjee. Nekžtanacu ančhucaquiztanacu zarakaquiča nii zajraqui.

⁸ Yoozquin macjata. Nižaza Yoozqui ančhucaquiz macjatžcaquiča. Uj paañinaca, ančhucqui uj paaz eca. Pizc kuzziznac, Yoozquin tјapa kuzziz cjee.

⁹ Nižaza uj paažcuquí, llaquita cjee. Kaacan ančhucaž paata uj paja. Uj paažcuquí, anača chipsqui. Juc'ant llaquizziza. Anača cuntintu cjisqui.

¹⁰ Yooz Jilirž yujcquiziquí humilde kuzziz cjee. Nekžtan Yoozqui ančhucaquiz honorchiz cjiskataquiča.

ANACHA JILANACZ QUINTRA CHIICHIIZQUI

¹¹ Jilanaca, cullaquinaca, tsjiizquinami tsjaaquinami anača quintra chiizqui. Nižaza anača quintra chuchqui. Jakziltat jilanacž quintra chiyachaja, už cullaquinacž quintra chiyachaja, jalla niiqui Yooz mantita jaru ana kamča. Yooz mantitaqui tuž cjiča, “Porapat zuma munazizza”. Nii mantitacama ana kamaquiz niiqui, nii mantitaqui ana waliztakaz nayaquiča. Nižaza nii Yooz mantita anal pecuča cjiča.

¹² Tsjiipankazza ultim mantiñi taku tjaachiqui. Yoozza niiqui. Jalla niizakazza ultim juezqui. Jaziqui nii Yoozqui zoñinaca arajpachquin chjichasača. Nižaza infiernuquin chjatkatasača. Jaziqui anchuczti anaž jecmi arajpachquinami infiernuquinami ojkkatasacha. Jaziqui ančuca jilanaca anača pjalz peczqui.

TII MUNTUQUIZ ZOÑZ ZETI PUNTU

¹³ Tsjiilla cjesača. Nonžna. Yekjap zoñinacaqui anchucaquiztan anča chawjewa amtiñiča, tuž cjian: “Tonji jakat watja okača. Nii watja irantizcu, cusasa campijan, paaz cancan zumal kamača tsjii wata intiru”. Nuž cjiñiča.

¹⁴ Niža chiižcumi, anapanž zizza nii zoñiqui, jaknužt kamačaja, čjulul watačaja, jalla nii. Yoozpankazza tjappacha mantiñiqui. Ćčjululu iratat ančuca žejtz? Kuyiztakazza žejtzqui. Tsjii kuyiqui jeczcu tsjii upacamapankaz tjenča. Nekztanž katča. Nižtapachazakazza zoñiqui. Tsjii upacamapankaz tii yokquiz žejtča.

¹⁵ Jaziqui tuž čiiž waquiziz, “Yooz munanaqui, žetača. Nekztan Yooz munanaqui langznača, nižaza čjulumi paača, nižaza ojklayača”. Jalla nuž čiiž waquiziča.

¹⁶ Antiz yekjapaqui ančucaquiztan chawjewa amtiñi kuzziz čiiča, ana tjapa čjulumi zizcu. Jalla niža mit kuzquiztan chiizqui ana walipanča.

¹⁷ Jakziltat Yooz kuz ziztaj niiqui, Yooz kuzcama kamz waquiziča. Ana nii Yooz kuzcama kamčhaj niiqui, uj paača.

5

RICACHU ZONINACZ PUNTU

¹ Ricachunaca, nonžna. Ančucaquiz ana walinacaz tjonauquiča. Nii zizcu, kjawcan kaacan žejlz waquiziča.

² Ančuca cusasanacaz mokaquiča. Ančuca zuma zquitinaca kjuriz lujltaž cjequiča.

³ Ančuca juntjapa korinacami paaznacami inapankaz cjequiča. Ančucqui ančuca wacchi paaznaca ana gastichinčucča, zuma kamtanaca paazjapa. Jaziqui ančuca ana okžñi kuzziz cjen casticta cjequiča. Niža cjenami ančucqui tira juc'anti paaznaca juntjapča.

⁴ Ančuc ricachu patrunacaqui ančuca piyunanaca juc'anti langskatchinčucča. Ančuca pastunaca zkalanaca ajzkatchinčucča, “Cusa pacaž” cjian. Ultimquiziqui koloculla pacchinčucča. Nii incallta piyunanacaqui ančuca quintra quijchiča. Yooz-pachača nii piyunanacž quijta nonziqui. Jalla Yoozza walja azzizqui.

⁵ Ančuc ricachu patrunacaqui, tii muntuquiz anča cusasanacchiz kamiñčucča. Čjululž pectanacami žejlča ančucaltaqui. Jaziqui tsjii cjew animalažtakaz cjissinčucča. Zoñiqui cjew animala illza conzjapa. Nižtapacha Yoozqui ančuc illziča casticta cjisjapaqui.

⁶ Ančucqui ricachu patrunaca, ana ujchiz zoñinaca kuzinpan casticchinčucča, conañcama. Nii zoñinacazti anatača ančuca quintraqui.

PASINZIZ KUZIZ PUNTU

⁷ Jilanaca, cullaquinaca, učhum pajk arajpach jiliriz tjonzcama pasinziz kuziz cjee. Zkal puntuquiztan cjuñžna. Tsjii zkala čhjacchi zoñiqui čjiñi tjonz tjewža, primer čjiñi, taypi čjiñi. Pasinziztan tjewža, ima zkala ajz timpu irantizcan.

⁸ Nižtakaz ančucqui pasinziz kuziz cjee. Arajpach jiliriz tjonz tjuñiqui wajillača. Nekztan ana walinacquiztan liwriita cjequiča. Nii cjuñžcan, Yoozquin tira tjurt'ila.

⁹ Jilanaca, cullaquinaca, porapat anaž chuchasaquiča. Jakzilta zoñit chuchačhaj niiqui, Yooziz azquichtaž cjequiča. Nii azquichñi Yoozqui wajillaž tjonauquiča.

¹⁰ Jilanaca, tuquita Yooztajapa čiiñi zoñinacaz puntu cjuñžna. Kjažta sufriz cjenami, Yoozquin tjurt'ichiča pasinziz kuztan. Nižtapacha cjee.

¹¹ Učhumqui tuž cjiñčumča, sufriz cjenami, “Yoozquin tjurt'ichi zoñinaca cuntintuž cjequiča”. Tuquiqui Job cjita jila želatča. Niiž quintu zizza učhumqui. Jobqui pasinziz kuztan sufrichiča. Nižaza Yoozquin tirapan tjurt'ichiča. Jalla nii sufriz wattan, Yoozqui niiz zuma pinsita cumplichiča nii Job cjita zoñitajapa. Nižtapankazza Yoozqui zoñinacžquiziqui, anča okžñi kuzzizpanča.

¹² Jilanaca, cullaquinaca, tiicha chekanaqui. Anača inapampa Yooz tjuuqui chiichi-izqui. Anapanča “Juro por Dios” cjan, chiichiizqui. “Iyaw” cjižcuqui, cumplispanča. “Anača” cjižcuqui, anača cjispanča. Werar chiizpanča, ana Yooziž casticta cjisjapa.

¹³ Jakziltat sufračhaja, jalla niiqui Yoozquin mayiziz waquiziča. Nižaza cuntintu kamñi žoñimi Yooz wirsu itz waquizizča.

¹⁴ Nižaza tsjii laa žoñi želan icliz jilirinaca kjawz waquiziča. Nii jilirinacaqui asiitžtan kullcan, Jesucristo Jiliržquiz mayizaquiča, laa žoñi žetajo.

¹⁵ Yoozquin tjapa kuztan mayizaquiž niiqui, nii laa žoñi čhjetnaquiča. Jesucristo Jiliriqui nii laa žoñi žaazkataquiča. Nižaza nii laa žoñiqui ujchiz želaquiž niiqui, pertuntaž cjequiča.

¹⁶ Jakziltat žoñž quintra uj paačhaja, jalla niiqui nii uj maztanča, “Am quintra tii uj paachinpantča” cjan. Nekztan Yoozquin porapat mayizaquiča. Nekztan ančhucqui čhjetintaž cjequiča. Yoozqui tsjii zuma žoñiž tjapa kuztan mayizitaqui nonža. Jalla nekztan Yoozqui tjaaquiča nii mayizitacama.

¹⁷ Cjuñzna, Elías cjita jilž puntu. Učhum iratača nii jilaqui, žoñikazza. Pero Yoozquin tjapa kuztan mayizichiča, ana chijnajo. Nekztan čhjep wata chicatchiž ana chijinčiča.

¹⁸ Wiruñaquei Elías cjita jilaqui wilta mayizichiča, chijñi apayžcajo. Nekztan Yoozqui chijñi apayžquichiča. Chijnan, zkananacaqui wilta pookchiča.

¹⁹ Jilanaca, cullaquinaca, tsjii žoñiqui Yooz jiczquiztan zarakachani. Nekztan Yooz jiczquiztan zarakchi žoñžquiz tuž paljayz waquiziča, “Ana zarakalla. Yooz jiczquiz cut'iscalla” cjan.

²⁰ Nekztan nii zarakchi žoñiqui niž uj paaznaca ecaquiž niiqui, nižaza Yooz jiczquiz wilta quejpžcaquiž niiqui, jalla niž wacchi ujnacquiztan pertuntaž cjequiča. Infiernuquin ana okaquiča nii žoñiqui. Jalla nii zizza ančhucqui.

PRIMERA CARTA DEL APOSTOL SAN PEDRO

¹ Wejrteha Pedrutqui, Jesucristuž uchta apostoltqui. Jalla nižtiquiztan ančhucaquin tii cartal cjiiržcuča. Ančhucqui persun wajtquiztan wichanzinčhucča wacchi yekja provincianac kjutñi, Ponto, Galacia, Capadocia, Asia, Bitinia, jalla nii provincianacquin ojkchinčhucča. Jakziqunt ojektčhaja, jalla nicju kamča; ana persun wajtquiz kamča ančhucqui.

² Yooz Ejpqui ančhuc illziča, niž partiquiz cjisjapa. Niž tuqita pinsita jaru ančhuc illziča. Nižaza Espiritu Santuqui ančhucaquiz zuma kamañchiz cjskatchičha, ančhuc Jesucristuž kuczama kamajo. Jesucristuž tičziž cjen ančhuca ujnacaqui pertuntača. Jaziqni ančhucča Yooz wajtchiz zoñinacaqui. Yoozqui ančhucaquiz zumaj yanapt'ila, nižaza ančhucaquiz walikaj kamkatla.

EW KAMAÑCHIZ PUNTU

³ Učhum Jesucristo Jilirž Yooz Ejpqui honorchizkaj cjila. Yooz Ejpqui zuma okzñi kuzziz cjen učumnacaquiz ew kamaña tjaachiča. Jesucristuž tičzcu jacatattiquiztan Yoozqui učumnacaquiz ew kamaña tjaachiča. Ew kamañchiz cjan učumqui tjewža arajpachquin Yooztan chica kamzjapa.

⁴ Nižaza ew kamañchiz cjan učumqui Yooz tjaata irinsa tanznaquičha arajpachquin. Učhum irinsača arajpachquin Yooztan kamzqui. Anaž čhjul anawalinacami neks želasacha. Nii Yooz irinsaqui učumnacaltajapa chjojtacha. Jalla nižtiquiztan nii irinsaqui anaž jecmi akasača. Tsji ew zquitiqni manchita cjesača. Nižaza tsji c'achja pjajkjal-lagui choočha. Ančhuca arajpachquin chjojta irinsaqui ana nižta cjesača.

⁵ Arajpachquin ančhucaltajapa tsji ancha zuma kamzqui tjacžtača. Jesucristuž tjonz tjuñquiziqi nii zuma kamzqui tjeēžta nižaza tjaata cjequičha. Pero anziqni tii muntuquiz želan, nižaza ančhuc Yoozquin kuzziz cjen, Yoozqui niž aztan ančhuc cuitaquičha.

⁶ Jalla nižtiquiztan ančhucqui zuma cuntintu kuzzizčhucča. Pero tii anžta timpuquiz ančhucaltaqui anawalinacaž tjonchiž cjen llaquisaquičha. Tii muntuquiz želan ančhucqui pruebanaca watča. Nuž cjenami Yooz Ejpča ančhuc cuitiñiqui, nižaza liwriñiqui. Jaziqni cuntintuž cjee.

⁷ Ančhuca kuzqui pruebanacžtan yanztača, ultimu Yoozquin kuzziz, ultimu ana Yoozquin kuzziz, jalla nii tjeēžta cjisjapa. Jakziltat pruebanacžquiztan sufranami tirapan Yoozquin tjurt'ichizlaja, jalla nižta kuzziz zoñiqui ancha valorchizza, c'achja kor paazquiztan cjen juc'anti. Chjul c'achjanacami anaž tjurča, akžñipanikazza. Korimi ujquiz t'azinta cjenacuq, jiñipanikazza. Nekztan pjalzñičha ana walinaca. Pero zuma pjalzta korimi ana tjurñipanikazza. Yoozquin kuzzizpan zoñinacaqui anača nižtažtakaz. Antiz tjurñipanikazza. Ančhucča Yoozquin ligitum kuzzizqu. Jalla nižtiquiztan Yooz Ejpqui ančhuc zuma risiwaquičha, nižaza honoraž tjaquičha, Jesucristo wilta tjonz tjuñquiziqi.

⁸ Ančhucqui Jesucristužtan munaziča, kjažta ana cheržcumi. Nižaza ana cheržcumi nižquin kuzzizza. Jalla nižtiquiztan ančhucqui ancha cuntintuž chipža. Zoñž takunacžtan učum cuntintu kuz puntuquiztan ana zuma intintaskati atasacha. Nižta cuntintu kuzqui Yoozpachaž chipskatča.

⁹ Ančhucqui Yoozquin kuzzizpanča. Jalla nižtiquiztan ancha zuma kamañchizza. Wiñaya Yooztan walikaz kamča.

¹⁰ Yoozqui niž okzñi kuzziz cjen ančhucaquiz yanapča nižtan zuma kamajo. Učumnacaltajapacha nii Yooziž yanaptaqui. Jalla nii Yooziž yanaptaqui mazinčiča tuqita profetanaqu. Nii Yooztajapa čhiñi profetanaqu Yooztan kamz puntu walja istutičiča nii puntu iya iya zizjapa. Walja kuzquiz pinsičičha tsjan zuma intintajo.

¹¹ Cristuž Espiritu Santuqui profetanač kuzquiz zizkatchičha, jalla tuž: Yooziž cučanžquita Cristuqui sufraquičha; nižaza sufrizcu walja honorchiz cjequičha. Jalla nii puntunaca profetanaqu zizkattatača. Pero tsjan kjana ziz pecatča, žčhjulorat Cristo tjonaquejo, nižaza jaknužt niž tjonz wataquejo? Jalla nii zizjapa ancha pinsatča.

¹² Espiritu Santuqui tuqita profetanačquiz Yooz pinsitanaca zizkatchičha, učumnacaquiz maznajo. Anatača ninacžtajapakaz nii zizkattaqui, antiz učumnacaltajapazakaz. Jaziqni anžta timpuquizkaz nii tuqita mazintaqui kjanapacha kjanzt'ičha. Liwriñi Yooz taku paljayñi zoñinacača nii puntunaca kjanzt'iñinacaqui. Espiritu Santuqui arajpachquiztan cučanžquitača, kjanzt'iñi zoñinaca yanapzjapa. Jalla nii kjanzt'ita puntuquiztanaqui arajpachquin žejlñi anjilanacami juc'ant intintazñi pecča.

¹³ Jalla nii puntunacquistan chiizcu, jalla tuž ančucaquin chiizinz pecuča. Zumpacha tantiya, zuma razunžtan. Ewjt'iñi kuzziz cjee. Tjapa kuztan tjewža, Yooz irata zuma kamañchiz cjisjapa. Jalla nižta zuma kamaña ančucaquiz tjaaquičha Yoozqui, Jesucristuž tjonz tjuñquiz.

¹⁴ Ančhucča Yooz zuma cazñi maatinacaqui. Jaziqui zuma kamañchiz cjee. Ima Yooz maati cjan, tuqita ana wali paaz pecñi kuz jaru kamchinčhucča. Yooz kamaña ana pajchinčhucča.

¹⁵ Jaziqui, Yooz maati cjan, nižta ana wali pecñi kuz mantuquiz ana cjiskata. Anziqui čhju lu paacanami zuma kamañchizkaz cjee, jaknužt ančhuc kjawzñi Yoozqui zuma kamañchizpanžlaja, jalla nižta.

¹⁶ Yooz tawk liwruquiz Yooz Ejpqui tuž cjiča: “Wejrqui zuma kamañchizpankaztča. Jalla nižtiquistan ančhuczakaz zuma kamañchiz cjee”.

¹⁷ Ančhucqui, Yooz maatinaca cjan, mayiziča, “Wejt Ejpča” cjan. Ančhucqui, nižquinkaz rispitan, tii muntu yokquiz zuma kamzpan waquiziča, arajpachquin ojkz-cama. Yooz Ejpqui ana illillžcu pjalznaquičha. Zapa mayniqu paatiquistan jama pjalžta cjequičha.

¹⁸ Cjuñzna ančhucqui. Tuquiqui ančhucqui tuqita ejpnacaž tjaaajinta kamañchiztača. Inapankaz kamchinčhucča. Jalla nii ana walñi kamañquiztan liwriitača. Nii liwriiñiz puntuquiztanaqui tantiya. Anaž čhjul koržtanami, nižaza anaž paaztanami, nižaza anaž čhjul tucuziñi cusasanacžtanami pačžcu, liwriitacha ančhucqui.

¹⁹ Antiz Jesucristuž ancha walurchiz ljocžtan liwriitacha. Jesucristuqu conta cjissičha, walipunt uuza wilanažtakaz, zuma llumpaka. Jalla nižta zuma ljocžtan ančhucqui liwriitacha.

²⁰ Ima tii muntu paacan Yoozqui Jesucristo utčiča, tii muntuquiz žejlñi zoñinaca liwriizjapa. Anzta timpuquizkaz Jesucristuqu tjonchiča; ančhucaltajapa zoñi tucchiča.

²¹ Jesucristuž cjen ančhucqui Yoozquin kuzziz žejlča. Yoozqui Jesucristo ticziquistan jacatatskatchičha; nekžtan zuma honorchiz cjiskatchičha, ančhuc nižquinq kuzziz cjisjapa, nižaza arajpachquin kamz tjewzñi kuzziz cjisjapa.

²² Jaziqui ančhucqui lijitum Yooz tawkquiz cassinčhucča Espiritu Santuž yanapchiž cjen. Jalla nuž Yooz tawkcama kamtiquistan ančuca kuznacaqui ana ujchiz cjissičha Yooz yujcquiz. Nižaza parti cričhñinacžtan zuma munaziñi kuzziz cjissičha. Jalla nižtiquistan tirapan porapat ancha tjapa kuztan zuma munaza.

²³ Ančhucqui užca nassi wawažtakaz ew kamañchizza. Ančuca ew kamañaqui anača ticzi ejpnacžquiztan. Antiz žejtñi Yooz Ejpžquiztanča, niž taku catoktiquistan. Yooz takučha ew kamañchiz cjiskatñi; nižaza Yooz takuqu wiñayjapa tjuraquičha.

²⁴ Jalla nii puntuquiztan Yooz takuqu tuž cjiča:
 “Tjapa zoñinacaqui pastunacažtakazza. Tjapa zoñinacaž pajk obranacaqui pastunacž pjakjallažtakazza. Tsjii timpukaz tjurasacha. Jaknužt pastunacaqui tsjii timpukaz žejlčhaja, jalla nižta tsjii kjaž watanacakaz zoñinacaqui kamčha; nekžtan ticža. Nižaza pastunacž pjakjallanacaqui ratulla choočha, jalla nižta irataž žoñiž paata pajk obranacaqui anaž tjurasacha.

²⁵ Pero Yooz Jilirž takuzi wiñayjapa tjuraquičha”.

Jalla nii Yooz takučha liwriiñi takuqu. Jalla nii liwriiñi taku ančucaquiz paljaytatača.

2

¹ Jalla nii taku catokžcu zuma kamañchizpan cjee. Tjapaman ana wali paaznaca eca. Nižaza pisc kuzziz cjijsnaca eca. Nizaza ana incallz pecñi kuzziz cjee. Nižaza ana zmazñi kuzziz cjee. Nižaza anawali chiichižznaca eca.

² Ančhucqui Yooz taku ancha pecz waquiziča, jaknužt tsjii užca nassi wawaqui piz itz pecčhaja, jalla nižta Yooz taku pecñi kuzziz cjis waquiziča. Nekžtanacu Yooz taku juc'anti zizñi zizñi kuzziz cjen, juc'ant zuma kamañchiz cjisnaquičha.

³ Jesucristo Jiliriqui zumapanča. Jalla nii naazinčhucča. Jaziqui Yooz taku juc'ant juc'ant zizñi cjee.

JESUCRISTUCHA CHEKAN MAZTAKAZ

⁴ Jesucristo Jiliržquiz macjata. Niiča ew kamaña tjaañiqui. Jesucristučha žejtñimi, nižaza žejtkatñimi. Jalla niiča, žejtñi maz cjiataqui. Zoñinaca nii maz ana pecchiča. Yooztti nii maz illziča; nižtajapa ancha walurchizza.

⁵ Nii žejtñi maz cjiata Jesucristuž cjen, ančhuczakaz Yooz žeti tanzinčhucča. Jaziqui ančhuczakazza žejtñi maznacažtakaz. Jaknužt maznacžtan kjuya pirkichaja, jalla nižta Yoozqui ančhucatan niž kjuya kjuytažokaz cjiča. Ančhucča Yooz kjuychiz zoñinacaqui. Nižaza ančhucqui t'akžtača Yooztajapa sirwiñi. Nižaza ančhucqui persun kuznaca

Yoozquin tjaacha ofrendanacažtakaz. Nižaza Jesucristuž cjen Yoozqui ančhucaž tjaata kuznaca asiptasača.

⁶ Jesucristučha maz cjitaqui. Jalla nii puntuquiztan cjjirta Yooz takuqui tuž cjiča: "Wejrqui tsjii simint maz tjulznuča Sión cjita arajpach wajtquin. Jalla nii mazqui juc'ant chekanča tjapa parti maznacquiztan. Nii mazqui Yooziž illztača, nižaza Yooztajapa wali walurchizza. Jequit nii walurchiz maz cjita Jesucristužquin kuz tjaachaja, jalla ninacaqui anapanž amulasaquiča. Anapanž inapankaz cjesača".

⁷ Maz cjita Jesucristuqui walja walurchizza, ančhuc criichinacžtaqui. Pero ana criichi zoñinacatqui nii maz ana walurchiztakaz nayča. Cjjirta Yooz takuqui tuž cjiča: "Kjuyñi zoñinacatqui tsjii maz ana pecchiča. Jalla nii ana pecta mazpacha zuma chekan maz cjissiča".

⁸ Nižaza cjjirta Yooz takuqui tuž cjiča: "Nii maz cjen zoñinacatqui t'ejzcu, ujquiz tjojtsnaquiča". Ana criichi zoñinacatqui Yooz taku ana juyzu paača. Nekztan sufriskattapanž cjequiča. Jalla nižtajapa Yoozqui ninaca utchiča.

⁹ Pero ančhuczi anača nižta. Antiz ančhucqui Yooziž illztača. Jaziqi ančhucča Yooz maatinacaqui. Yooz Jiliržquiz sirwizjapa, t'akžtača. Ančhucča Yooz wajtchiz zoñinacatqui. Jalla nuž cjisjapa illztača ančhucqui. Nižaza ančhucqui illztača Yooz ispan-tichuca obranaca paljayzjapa. Anawal zumchiquiz kaman Yoozqui ančhuc kjawziča, niž anča zuma jiczquiz luzkatzjapa, niž kjanquiz kamzjapa.

¹⁰ Tuquiqui ančhucqui anatača Yooz watja. Anziča Yooz wajtchiz zoñinacatqui. Tuquiqui ančhucqui Yooziž ana okžtatača. Anziča Yooziž okztaqui.

JILIRINACQUIZ RISPITA

¹¹ Pecta jilanaca, cullaquinaca, tii muntuquiz kamcan ančhucqui istrañiñčhucča. Yooz wajtchiz zoñinacatča ančhucqui. Jaziqi chiižinžcuča, anawali pecñi kuz ana juyzu paa. Nii anawali pecznacaqui ančhuca persun kuz animu quintrača.

¹² Ana Yooz pajñi zoñinacžtan kamcan, ančhucqui zumapan kama. Ana Yooz pajñi zoñinacatqui ančhuca quintra chiyachani. Nižaza uj paañinacažtakaz ančhuc nayachani. Jalla nižta quintra cjičjiyanami, ančhucqui zuma kamz waquiziča, ninaca ančhucaž zuma paatanaca chertzjapa. Jalla nuž chertzcuqui ninacaqui Yoozquin honora tjaaquiča ultim pjalz tjuñquiziqui.

¹³ Jilanaca, cullaquinaca, nonžna. Jesucristo Jiliržquiz sirwican tjapa zoñiž nombrita jilirinacžquiz casa. Chawc mantiñi jiliržquiz casa.

¹⁴ Nižaza niž cuchanžquita jilirinacžquiz casa. Nii jilirinacatqui cuchanžquitača, anawali paañi zoñinaca casticajo, nižaza zuma paañi zoñinacžquiz honora tjaajo.

¹⁵ Yoozqui pecčha, ančhuc zuma kamzjapa. Jalla nižta zuma kamcan, ančhucqui zumzu anawali kamañchiz zoñinacžquiz ch'ujuž cjiskataquiča.

¹⁶ Yooz liwriita zoñinaca cjicanaqui zuma kama. Pero liwriita cjicanaqui anača pinz-izqui ana walinaca paaznacžquiz. Antiz zuma kama Yooz piyunažta.

¹⁷ Tjapa zoñinacžquiz rispita. Tjapa criichi zoñinacžtan zuma munaza. Yoozquin rispita. Nižaza chawc mantiñi jiliržquiz honora tjaa.

SUFRICAN YOOZQUIN KUZIZ CJEE

¹⁸ Piyunanaca, ančhucqui patrunacž mantuquiz cjee, ninacžquiz rispitan. Zuma kuziz, nižaza okžñi kuziz patrunchizlaj niiqui, niž mantuquiz cjee. Nižaza ana zuma patrunchizlaj niiqui, niž mantuquiz zakaz cjee.

¹⁹ Tsjii piyunaqui zuma langžñi cjenami wjajttaž cječhani. Pero pasinziz kuztan awantiz waquiziča. Jalla nii piyunaqui nuž sufrican cjuñž waquiziča, niičha ultimu Yooz piyunaqui, jalla nii. Jalla nuž sufrizcu zuma kuz tjeeža; nekztan Yooz yujcquiz anča cuza cjitaž cjequiča.

²⁰ Tii muntuquiz kamcan ančhucqui anawali paatiquiztan castictaž cječhani. Pasinziz kuztan awantaquiz niiqui, žčhjul honorat tjaata cjesajo? Pero zuma paatiquiztan sufriskattaz cjequiz niiqui, nižaza ančhucqui pasinziz kuztan awantaquiz niiqui, Yooz yujcquiz honorchiz cjequiča.

²¹ Jalla nižta pasinziz kuziz sufraquiz niiqui, kjana tjeeža, Jesucristuž zoñinacčhucča, nii. Yoozqui ančhuc kjawziča, zuma kuz tjeezjapa. Cristuqui ančhuc laycu sufrichizakaza. Cristuqui sufrican anča pasinziz kuz tjeeziča. Nižta irata ančhucqui sufrican, nižtazakaz pasinziz kuz tjeez waquiziča.

²² Jesucristuqui ana zinta uj paachiča. Nižaza čhjul anawal takumi ana chiichipanča.

²³ Cristuqui zoñinacž ch'aanita cjenami, anapan chjaychiča. Nižaza Cristuqui sufrichi cjenami, anapan zoñi kitz pecchiča. Jalla nižta sufrican Cristuqui zizziča, Yooz Eppqui nii anazuma zoñinaca legali casticaquiča, jalla nii. Jesucristuqui zizziča, anawali

cjicjiñinacaž paatiquiztan jama casticta cjequiča, nii. Nižaza Yooz Ejjpqi zuma kuzziz žoninacžquiz honora tjaaquiča.

²⁴ Jesucristupachača persun curpuquiz učhum ujnacquiztan sufrichiqui, cruzquiz ch'awcta. Jalla nuž učhumnacalta laycu ticziča, učhumnaca anawali ujnaca ecajo, nižaza Yooz tjaata zuma kamañchiz cjeajajo. Jesucristuqui chjojricta cjissiča, ančhuc čhetinta cjisjapa ančhuca ujnacquiztan.

²⁵ Tuquiqui ančhucqui pasta uuzanacažtakaz ojklayatča. Anziqwi ančhucqui Arajpach Awatiržquiz quejpcinčhucča, ančhuca kuz niž cuitita cjisjapa.

3

LUCUTJIŃI KAMZ PUNTU

¹ Maatakanaca, ančhucqui persun luctakž jaru kama. Tsji luctakanacaqui Yooz taku ana criiča, nižaza Yooz tawk jaru ana kamča. Pero ančhuc criichin maatakanacaqui zuma kamaña tjeez waquiziča. Ančhuca zuma kamaña tjeeztiquiztan, ančhuca ana criichi luctakanacaqui Yooz taku criichiž cječhani, ančhuc ana anča tawkžtan atipchiž cjen.

² Nižaza ančhuca luctakanacaqui cryačhani ančhuca zuma kamtiquiztan, nižaza ančhuca rispitiñi kamtiquiztan.

³ Zawncan zquiti ist'asnacquiz anača kuz tjaazqui. Persun c'achja chjijcžta ach charquiz, nižaza zquiti ist'asnacquiz, nižaza anča c'achja zquitinacquiz, jalla nižtanacquiz anača kuz tjaasqui.

⁴ Antiz zuma c'achja kamañanacquiz kuz tjaa. Humilde kuzziz, nižaza llan kuzziz cjee. Jalla nižta kamañanacaqui Yooz yujcquiziqui walja walurchizza. Ni zuma c'achja kamañaqwi tsjii zuma tjurñi walurchiztakazza.

⁵ Tuquiqui timpuqui Yooz partir maatakanacaqui nižta c'achja kamañchiztača. Nii maatakanacaqui Yoozquin kuzziztača. Nižaza luctakž jaru cjiicjiñitača.

⁶ Jalla nižta Sara cjita cullaquiqui Abraham cjita lučquiz cassinča, nižquiz "wejt jiliri" cjian. Ančhucqui nižta zuma kamañchiz cjequiči niiqui, Sara cullaca maatinacažtakaz cjequiča. Ana čjulquiztanami ančhuca kuz turwayskata.

⁷ Luctakanaca, ančhucaquin zakaz chiižinžcuča. Ančhucqui persun maatakanacžtan zuma intintazñi munaziñi kuzziz kamaquiča. Yoozqui pucultan ančhucaquiz niž zuma kamaña tjaachiča. Jalla nižtiquiztan jaknužt persun maatakžquiz rispitz waquizičaja, jalla nuž rispitaquiča. Cjuñzna, luctakaqui maatakžquiztan juc'ant azzizza. Persun maatakžtan zuma kamz waquiziča, ančhucaž Yoozquiztan mayizitanaca ana ina cjeajajo.

SUFRIS PUNTU

⁸ Tsjižtan zakal cjesača. Tjapa ančhucqui tsjii kuzziz kamaquiča. Nižaza criichinacpora zumaž munazaquiča. Nižaza okžñi kuztan kamaquiča. Nižaza humilde kuztan kamaquiča.

⁹ Tsjižnuž ančhucaquiz anawali paachiž cjen ana nižtapacha anawali tjepnaquiča. Nižaza tsjižnuž ančhuca quintra ch'ananami, ana nižtapacha niž quintra ch'aaquiča. Antiz nižtajapa Yoozquiztan mayizinaquiča, nii zuma cjiskatzjapa. Yoozqui ančhuc kjawziča, zumanaca tanzjapa. Jalla nižtiquiztan ančhuca quintra žoñinacžtajapami Yoozquiztan mayizinaquiča, Yooz wintizta cjisjapa.

¹⁰ Yooz takuqui tuž cjiča:

"Jakzilat zuma kamañchizpan pecčaja, nižaza cuntintupan kamz pecčaja, jalla niiqui persun čiiñi ata ewj'istanča, anawal taku ana čhiizjapa, nižaza ana incallñi toscar taku ana čhiizjapa.

¹¹ Nižaza jakzilat cuntintupan kamz pecčaja, anawali paaznacquiztan zarakstanča; nekžtan zumapan paastanča. Parti žoñinacžtan wali kamzjapa, jalla nižtiquiz kuz tjaastanča.

¹² Yooz Jiliriqui zuma kamañchiz žoñinaca cuitiča. Nižaza ninacaž mayizitanaca nonža. Pero Yooz Jiliriqui anawali paañi žoñinacž quintrača.

¹³ Ančhucaž zuma kamznacquiz kuz tjaachiž cjen, žject ančhuca quintra paasajo?

¹⁴ Pero ančhucqui zuma kamcan sufraquiči niiqui, cuntintuž cjee. Yoozqui ančhucaquiz honora tjaaquiča. Nii quintra žoñinacžquizimi ana eksna. Nižaza anaž jecžquiztanami kuz turwayskata.

¹⁵ Cristupankazza ultim Jiliriqui. Jalla nižtiquiztan Cristužquiz ančhucqui rispitanča. Nižaza ančhucqui listu tjaczi žela, ančhucaž Yooztajapa kamz puntuquiztan čhiizjapa. Tsjii žoñi nii puntu pewcznaquiči niiqui, zuma razunžtan kjaaz waquiziča. Humilde kuzziz nižaza rispitiñi kuzziz kjaaz waquiziča.

¹⁶ Zumaž kamaquiča. Nekžtan ančhuca kuzquiči anaž čjul ujmi cjuñznaquiča. Cristužquin kuzziz zumaž kama. Jalla nekžtanaqui žoñinacaqui anaž ančhuca quintra čhiyi

atasača. Ninacaqui ančuca quintra chyaquiz niiqui, ultimu azaquiča ančuca zuma kamtiquiztan.

¹⁷ Ančhucqui walikaz Yooz munañpi jaru kamcan sufračhaja, wintižta cjequiča. Ana zuma kamtiquiztan sufraquiz niiqui, jalla niiča ana waliqui; anaž Yooz munañpi jaruča niiqui.

¹⁸ Jesucristuqui učhum ujnac laycu ticziča. Jalla nižtiquiztan učhum ujnac laycu ana iya ticz pecča. Zuma kamañchiz Cristuqui ana zuma kamañchiz žoñinacž laycu ticziča, ninacžquiz Yoozquin macjatskatzjapa. Curpuchiz cjan contatača pero niž animuqui tirapan žejtča.

¹⁹ Niž espíritu animuqui chawctažtakaz espíritu animunacžquin ojkchitača Yooz puntu kjanzt'izjapa.

²⁰ Jalla nii chawctažtakaz espíritu animunacaqui tuquitanpacha Yoozquin ana casiča. Noež kamta timpuquiz Yoozqui pasinziz kuzziz želatča nii tuquita anawali žoñinacžtajapa. Jalla nuž žejlan Yoozqui Noežquiz tsjii pajk kjuyaž cherchi warcu kjuykatchiča. Nekztan Yoozqui nii warcuquiz tsjii quinsakal žoñinaca luzkatchiča, wacchi kjazquiztan žejtkatzjapa.

²¹ Jalla nii kjazquī bautismožtakaztača. Ančhuczakaz bautista cjan liwriitača. Ultim bautismuqui anaž curpu ajunča, antiz ultim bautismuča Yoozquin tjapa kuztan cjisqui, ujnacquiztan pertunta cjisjapa, paata ujnacquiztan ana iya cjuñzjapa. Jilanaca, cullaquinaca, Jesucristuž jacatatchiž cjen učhumqui liwriita cjesača.

²² Jesucristuqui jacatatzcu arajpacha ojkchiča. JaziQUI nicju Yooz Ejpž zew latuquiz julzi žejlča. Nekz žejlan anjilanacami, nižaza jilirinacami nižaza poderchiznacami Cristuž mantuquiz žejlča.

4

¹ Cristuqui žoñž curpuchiz kamcan sufrichiča. Jalla nižtiquiztan ančhuczakaz sufrisjapa listo cjis waquiziča. Ančhucqui Cristužquiz kuzziz cjen sufraquiz niiqui, nižquin juc'anti macjataquiča. Nižaza uj paaznacquiztan juc'anti zarakaquiča.

² JaziQUI zuma kamaquiča, tii muntuquiz žejlan. Yooz munañpi jaru juc'anti kamaquiča; anawali pecči kuz jaru ana kamaquiča.

³ Ančhucaquiz cjiwča, ančuca tuquita kamtaqui ana walitača. Nužquizkaj cjila nii anawal kamtaqui. Jalla nižta anawal kamtaqui ana criichi žoñinacaqui juztazza. Ančhucqui zuma zizza nii anawal kamta puntu. Tuquiqui ančhucqui anawal kuz pinziz jaru ojklayatča; nižaza adulteriuquiz ojklayatča; nižaza čjul kuz pecta jarumi paatča, nižaza kuz katchi licatča, nižaza ancha pjiistanaca paatča, nižaza mazinacžtan licz pecatča. Nižaza žoñž paata yoonacquiz rispitatča. Werar Yooz mantita quintrača niiqui.

⁴ Yoozquin kuzziz cjen, ančuca kamtaqui anača iya nižtaqui. Jalla nižtiquiztan ančuca tuquita mazinaca ančhucaquiztan istrañča, ančucaž ana iya cumpant'ichiz cjen. Nekztan ančhucajapa iñarča.

⁵ Pero ultim pjalz tjuñquiz ninacaqui persuna anazuma kamtiquiztan Yoozquin cuenta tjaastanča, Yoozqui ticzi žoñinacami žejtñi žoñinacami ultimquiziqui pjalznaquiča, tii yokquiz jaknužt kamtčhaja, jalla niit jama. Yoozqui listo žejlča žoñinaca pjalzjapa.

⁶ Tii muntuquiz žejlñi žoñinacžquiz liwriiñi Yooz takuqui paljaytatača, ninaca criyajo, nižaza liwriita cjeyajo. Žoñž curpuchiz cjen criichinacaqui tjapa žoñinaca irata ticža. Pero ninacž animunacaqui Yooziž arajpachquin kjawžta cjen zumapan kamča Yooz irat kamañchiz.

⁷ Jilanaca, cullaquinaca, tii timpuqui otča, wajillaž tjappacha čhultakinacami tucuz-inznaquiča. Pero ana kuz turwayzita cjee. Zuma pinsiñi cjee. Nižaza persuna kamz ewjazñi cjee, Yoozquin mayizican.

⁸ Jalla tužuča chekanaqui, porapat zuma munaziñi kuzzizpankaz cjee. Zuma munazican, parti žoñinacž ujnac puntuquiztan ana ancha cjuñasača.

⁹ Porapat ančuca kjuyquiz zumapanž risiwasauquiča, ana paysnakžcu.

¹⁰ Yoozqui criichi žoñinacžquiz tjapaman zuma kamañanaca tjaača. Nii kamañanacchiz porapat yanapassauquiča, juc'ant zuma kuzziz cjisjapa. Nižta pecča učhum Yooz Jiliriqui.

¹¹ Jakziltat paljayz kamañchiz žejlčhaja, panž Yooz taku paljayz waquiziča. Jakziltat yanapñi kamañchiz žejlčhaja, panž Yooz tjaata aztan yanapz waquiziča. Tjapa ančhucqui čjul kamañchizimi Yooz honora juc'ant waytiskatča, Jesucristuž cjen. Yoozqui wiñayjapa honorchiz cjila. Nižaza Yoozqui wiñayjapa mantiñej cjila. Jalla nužoj cjila. Amén.

¹² Pecta jilanaca, cullaquinaca, anawal pruebanacaž tjonan ana tsuca. Ančhuc yanz-japakaz tjonča, Yoozquin zuma tjurt'iñi kuzziz, ana tjurt'iñi kuzziz, jalla nii yanzjapa. Nižta pruebanacaqui panž želaquiča. Anaž istraña.

¹³ Jaknužt Jesucristuqui sufritchaja, jalla nižtakaz ančhucqui sufraquiča. Jalla nižtiquiztan nižta pruebanaca tjonchiž cjen, cuntintuž cjee. Nižaza Jesucristuž tjonz tjuñquiz ančhucqui juc'anti cuntintuž cjequiča. Nekztan Jesucristuqui niž aztan niž honora tjeeznaquiča.

¹⁴ Cristužquin kuzziz cjen ančuca quintra ch'aanita cjequiča. Pero ančhucqui cuntintuž cjee. Zuma Yooz Espiritu Santuqui ančuca kuzquiz žejlča. Ančuca quintra žoñinacaqui Cristuž quintra ch'iča. Ančhuczi Cristuž honora waytiča.

¹⁵ Nonžna ančhucqui. Anača žoñi conzqui. Anača tjañi zaazqui. Anača uj paazqui. Anača yekja žoñž asuntuquiz mitizizqui. Nižta ana walinaca paaquiz niiqui, sufračhani. Pero nižta ana walinaca anapan paaquiča.

¹⁶ Zuma cristiano cjan sufraquiz niiqui, ana azasača. Antiz Yoozquin panž honora tjeeznaquiča, Cristuž partiquiz žejltiquiztan.

¹⁷ Yoozqui niž famillchiz žoñinaca jusjiñi kalltiča, azquichta kamañchiz cjisjapa. Učhumqui tii muntuquiz žejlcan sufraquiz niiqui, žkjažt ana criichi žoñinacžtajapa wataquejo? Ninacaqui Yooz liwriiñi taku anapanž cassa. Jalla nižtiquiztan infiernuquin wiñayjapa sufraquiča.

¹⁸ Zuma kamañchiz žoñinacaqui ch'aman anawalinacquiztan liwriitača. Jalla nižtiquiztan ana criichi žoñinacžquiz nižaza uj paañi žoñinacžquiz kjaž cjitat cjequejo? Infiernuquin wiñayjapa sufraquiča.

¹⁹ Jalla nižtiquiztan tii muntuquiz kamcan criichi žoñinacaqui Yooz munañpi jaru sufriča. Jalla nižta sufričan Yoozquin kuzzizpan cjee, niž cuitita cjisjapa. Tii muntu paañi Yoozza lijituma cuitiñiqui. Ancha zumapanča.

5

CRIICHI ŽOÑINACŽQUIZ CHIIZINTA TAKU

¹ Icliz jilirinaca, ančucaquin zuma tawkžtan chiižinžcuča. Wejrqui icliz jilirizakaztča. Persunpacha Jesucristo sufriñi cherchinča. Nižaza wejrqui parti criichi žoñinacžtan chica honorchiz cjeeča, Jesucristo wilta tjonz tjuñquiz.

² Tjapa ančhucqui Yoozquin criichi žoñinaca zuma cwitaquiča, zuma uza awatiriztakaz. Tjapa kuztan nižaza zuma kuztan cuitiz waquiziča. Jalla nižta pecča Yoozqui. Anača paaz ganzjapakaz iclizziz žoñinaca cuitaquiča, pero Yooz sirwican tjapa kuztan cuitiz waquiziča.

³ Anača tsjii ana zum patrunažtakaz cjiicisqui, ančuca icliz žoñinacžtaqui. Antiz parti criichi žoñinacžquiz zuma kamaña tjeezna, ninaca nižta iratapacha zuma kamkatzjapa.

⁴ Nekztan chekan jilir Awatiriqui tjonžcu ančucaquiz zuma honoraž tjaaquiča, zuma premiožtakaz. Tsjii chjañiquiztan paata premiuqui ratulla tucuzinznasača. Ančuca honora ana tucuzinznasača. Ančhucqui Yoozquin criichi žoñinaca zuma cuititiquiztan jalla nižta honora tanznaquiča.

⁵ Ančhucqui tjetjowanaca, icliz jilirinacž jaru cjee. Nižaza tjapa ančhucqui porapat humilde kuztan rispitasaučiča. Yoozqui mita kuzziz žoñinacž quintrača. Pero humilde kuzziz žoñinacžquiz yanapča.

⁶ Jalla nižtiquiztan tjapa azziz Yooz Jilirž mantuquiz humilde kuzziz cjee, nekztan Yoozqui ančucaquiz honorchiz cjiskataquiča.

⁷ Yoozqui ančhuc cuitiča. Jalla nižtiquiztan čjul llaquinacami nižaza kuz turwayskatñinacami nižquin kuzziz cjee.

⁸ Pinsiñi kuzziz cjee. Nižaza naynay žela. Ančhuc quintra diabluqui ojklajča, anawal leona ajuticanžtakaz. Nii anawal diabluqui ančucaquiz atipz pecča. Nižaza criichi žoñinaca Yoozquiztan zarakskatz pecča.

⁹ Jalla nižtiquiztan niž quintra tjurtichi žela. Jesucristužquin kuzziz tjurt'ichi žela. Ančhucqui zizza, tii muntuquiz kamcan tjapa criichi jilanacaqui sufristanča. Jalla nižta zizcu, Jesucristužquin tjapa kuzziz cjen tjurt'ichi žela.

¹⁰ Ančhuc tsjii žkoloc sufritan, Yoozqui ančucaquiz yanapaquiča, juc'ant zuma kamañchiz cjisjapa. Nižaza Yoozqui ančucaquiz tjurt'iñi kuzziz cjiskataquiča, nižaza tjuj kuzziz cjiskataquiča, čjul ana walquiztanami atipajo. Nii Yoozza zuma yanapñiqui. Niiqui učhum kjawziča, Jesucristužtan chica arajpachquin kamzjapa, wiñayjapa honorchiz cjisjapa.

¹¹ Nii Yoozqui wiñayjapa honorchizkaj cjila. Wiñayjapa mantiñej cjila. Jalla nužoj cjila. Amén.

¹² Wejrqui ančhucaquin tii kolta cartal Silvanužquiz cjijskatučha. Silvano jilaqui zuma lijitum jilačha, cjiwčha. Tii cartiquiz ančhucaquin chiižinžcučha, nižaza Yooz lijitum okzñi kuz puntu paljayžcučha. Jalla nii puntunaca zizcu tira tjurt'ifñi kuzziz cjee.

¹³ Babilonia wajtquin icliz zoñinacaqui ančhucaquin tsaanžquičha. Ninacaqui Yooz illzta zoñinacazakazza. Nižaza Marcos ančhucaquin tsaanžquičha. Marcossa wejt maatiztakaz.

¹⁴ Ančhucqui porapat zuma munaziñi kuztan tsaanasaquičha. Tjapa ančhucqui, Cristuž partiquiz žejlñinaca, walikaj cjila. Jalla nužoj cjila. Amén.

SEGUNDA CARTA DEL APOSTOL SAN PEDRO

¹ Wejr Simón Pedruqui ančhucaquin cjiiržcuča. Wejrqui Jesucristuž manta payiñ zoñtča. Niiž uchta apostoltča. Yooztan Jesucristo Liwriiñžtan zoñinacžquiz anaž illillza; legaliz niiqui. Jalla nižtiquiztan ančhucmi wejrmi Jesucristužquin kuzziz cjen Yooziž tjaata kamaña tanzinčhumčha. Ancha zumača nii kamañaqui.

² Yoozquiz nižaza učhum Jesucristo Jiliržquiz juc'ant zuma pajz waquiziča. Nekztan ančhucqui juc'anti Yooziž yanapta cjequiča, nižaza tsjan walikaz kamaquiča Yooziž cjen.

CRIICHI ZOÑINACŽ KUZ PUNTU

³ Yoozqui učhum kjawziča, niižtan chica honorchiz cjisjapa, nižaza nii irata zuma kamañchiz cjisjapa. Jaziqui Yoozqui niž aztan ančhucaquiz yanapčha, niž kuzcama zuma kamñi atñijapa. Ančhucqui Yooz puntu zizñi zizñiž cjen Yooz yanaptaqui tanznasacha.

⁴ Yoozqui niž ancha zuma walurchiz tawkžtan compromitchiča, učhum yanapzjapa. Nii compromitta taku complissičha. Jaziqui ančhucqui Yooz kuz irataž cjisnaquiča. Nižaza ančhucqui tii muntuquiz žejlñi ana walinacžiztan atipaquiča. Tii muntuquiz ancha ana walinaca žejlčha zoñinacž ana zuma pinsiñiž cjen.

⁵ Jalla nižtiquiztan ančhucqui Yoozquin tjapa kuztan cjee juc'anti juc'anti zuma cjisjapa. Jesucristužquin kuzziz cjen lijituma zuma kamz waquiziča. Nekztan zuma kamcan, zizñi nižaza intintiñi kuzziz cjis waquiziča.

⁶ Nekztan zizñi kuzziz cjian, persun kuzquiz ewjazñi kuzziz cjis waquiziča. Nekztan persun kuzquiz ewjazcan, zuma tjurt'iñi kuzziz kamz waquiziča. Nekztan tjurt'iñi kuzziz kamcan, Yooz kuzcamakaz kamz waquiziča.

⁷ Nekztan Yooz kuzcamakaz kamcan, criichi zoñinacžquiz okzñi kuzziz cjis waquiziča. Nekztan okzñi kuzziz cjian, tjapa zoñinacžquiz zuma munaziñi kuzziz cjis waquiziča.

⁸ Ančhucqui jalla nižta ancha zuma kuzzizčhucčhalaj niiqui, juc'anti juc'anti zumaž cjequiča. Nižaza ančhucaž zuma kamtaqui anaž ina cjequiča. Nižaza ančhucaž Jesucristo Jilirž puntunaca ziztaqui anaž ina cjequiča. Jesucristuž puntunacžiztan zizñi zizñi cjian, walja zuma obranacchiz cjisnaquiča.

⁹ Jakzilta zoñit nižta zuma kamañchiz ana žejlčhaja, jalla niičha tsjii zur zoñižtakaz. Nižaza niičha ana zizñi zoñiui. Niiž ujnacaqui pertunzqui tjaztatača.

¹⁰ Ančhucqui, anača nižta cjee. Yoozqui ančhuc illzcu kjawziča. Jalla nii kjawžta zumpachaž catoka. Nižaza nižquinpan kuz tjaaquiča. Jalla nuž zumpachaž kamaquiz niiqui, anapanž Yoozquiztan zarakasača.

¹¹ Nekztan ančhucaž zuma kamtiquiztan arajpach wajtquin zuma risiwtaz cjequiča. Nii arajpach wajtquin Liwriiñi Jesucristo Jiliriqui wiñajjapa mantiča.

¹² Jalla nižtiquiztan wejrqui ančhucaquin tirapan nii puntunaca cjuñzkatača. Ančhucqui nii puntunaca zizza. Nižaza ančhucqui werar Yooz taku catokžcu Yoozquin tjurt'ichi žejlčha.

¹³ Jalla nuž cjenami wejrqui tuž tantiichinčha. Wejr iya žejtcan, ančhucaquiz cjuñzkatz pecučha, tii chiižintanacžtan. Nii walikaz cjiwčha.

¹⁴ Učhum Jesucristo Jiliriqui wejtquiz zizkatchičha, wajillaž tii curpu eccu arajpach wajtquin okača, nii.

¹⁵ Jalla nižtiquiztan tii puntunacžiztan cjiirz pecučha. Nekztan weriž ticžtan ančhucqui čhjulorami tii puntunaca liyasacha, zuma cjuñajo.

JESUCRISTUZ PUNTUQUIZTAN TJAAJINTA

¹⁶ Ančhucaquin tjaajincan, wejrqui učhum Jesucristo Jilirž puntuquiztan tjaajinchinčha, jaknužt walja aztan wilta tjonachaja, jalla nii. Jalla nii tjaajintaqui anaž wejt kuzquiztan ulanchičha. Nii tjaajintaqui anača mañžtan tantiita quintuui. Antiz wejrqui persun čhjujcztan Jesucristuž honora cherchinčha.

¹⁷ Wejrqui cherchinčha, Yooz Ejpqui Jesucristužquiz zuma honora tjaachiča. Nižaza Yooz Ejpž ispantichuc joraqui chiižquichiča tuž cjian: "Jalla tiičha wejt k'ayi Maatiui. Tiiž cjen ancha cuntintutča".

¹⁸ Jalla nuž cjiñi taku nonzinčha arajpachquiztan tjonñi. Nii oraqui wejrqui Jesucristužtan chica žejlchinčha Yooziž illzta curquin.

¹⁹ Jaziqui wejrqui cjiwčha tuquita Yooztajapa chiiñi profetž takučha werar takuui, nii. Jesucristuž tjonzcama nii profetaz čhiitaqui učhumnacaltajapa kjanazt'ičha tsjii zuma lamparaztakaz. Jalla nižtiquiztan nii profetaz čhiitiuiquiz kuz tjaaz waquiziča. Nii walikaz

cjiwêcha. Wentan kjantati chawcwa tewczcan, anaž iya lampara kjañi pecasača. Jalla nižta irata Jesucristuž tjonan, profetaž chiitanacaqui anaž iya pecasača.

²⁰ Jalla tii zakaz intintaz waquiziča. Nii cjiirta profetaž chiitanacaqui Yooz takuča. Jaziqui profetaž chiitami žoñž kuzquiztankaz ana intintazta cjesača. Yoozpanikazza profetaž chiita intintazkatñiqui.

²¹ Profetanacaqui anača persun kuzcama nižtanaca chiichiqui. Antiz Yooz Espiritu Santuqui ninacžquiz Yooz taku chiikatchiča.

2

FALSO TJAAJIÑINACŽ PUNTU

¹ Tuqui timpuqui toscara chiiñi profetanacaqui Israel wajtchiz žoñinacžquiz jecziča. Jalla nižta irata zakaz ančhucaqui toscar tjaajinacacaqui jecznaquiča. Ninacaqui persuna pinsitaquiztan chjojkazaž tjaajinaquiča, žoñinaca turwayskatzjapa, nižaza Yoozquiztan zaraskatzjapa. Jalla nuž anawali tjaajincan Jesucristo Jiliri ana pajñi chiyauiča. Pero Jesucristuqui ninaca liwriizjapa ticziča. Jalla nuž anawali tjaajintiquiztan ninacpachaz wajilla castictaž cjequiča.

² Nižta anawali tjaajintiquiz walja criichi žoñinacaqui kuz tjaaquiča. Nekztan anazuma kamaquiča. Jalla ninacaž anazuma kamtiquiztan žoñinacaqui werar Yooz kamañ quintra iñaraquiča.

³ Anča paaz paca peccu, nii anawali tjaajinacacaqui toscar tawkžtan ančhucaquiz incallaquiča. Nekztan ančhuca paaz tanznaquiča. Jalla nuž cjen ninacaqui ultimupan tantaž cjequiča. Tuquitanpacha Yoozquini ninaca utchiča casticta cjisjapa.

⁴ Yoozquini u paachi anjilanacžquiz ana pertunchiča. Antiz infernuquin tjojtchiča. Zumchiquiz chawtažtakaz nekz chjojta žejlča, ultimu pjalz tjuñicama.

⁵ Nižaza tuquita timpuqui Yoozquini u paachi žoñinaca ana pertunchiča. Antiz kjaz juyzu mantižquiča nii anazuma kamañchiz žoñinaca ticznažo. Noé cjetaqui žejtkatchiča nižž pakallak familianacžtan. Noequi nii timpuquiz kamñi žoñinacžquiz cjichiča: “Zuma kamañchiz cjee” cjian. Pero žoñinacaqui Noež chiita tawkquiz ana juyzu paachiča.

⁶ Nižaza Yoozquini ana wal Sodoma wajtchiz žoñinacami nižaza Gomorra wajtchiz žoñinacami ujtžtan uchiča, kjup tuczcama. Jalla nuž Yoozquini liwjtžtan japa mantichiča. Jalla nuž casticcan Yoozquini wiruñ tjonñi anawal kamñi žoñinacžquiz chiižinz pecchiča, “Anača nižta kamzquini” cjian.

⁷ Nii pizc ujzi watjanacquiztan Lot cjeta žoñiqui alajakaz liwriitača. Jalla niitača zuma kamañchizquini. Parti žoñinacaqui tjpaman ana walinaca paachiča. Jalla nižtiquiztan Lot cjetaqui nii anawali kamñi žoñinaca cheržcu anča llactazñitača.

⁸ Nii zuma žoñiqui zapuru nižž kuzquiz anča zint'iñitača, nii parti žoñinacž Yooz lii quintra paachiž cjen. Lot cjeta žoñiqui zapuru ninacaž anawali paatanaca cherchiča, nižaza nonziča. Jaziqui nii anawali paañinacžtan kamcan, nižž kuzquiz anča zint'iñitača.

⁹ Ultimiquizquini Yoozquini Lot jwessiča nii wajtquiztan. Yooz Jiliri quini pruebanacžquiztan zuma kamañchiz žoñinaca liwriiñiča. Nižaza Yoozza anazuma kamñinaca pjalzñiquini, nižaza chjojñiquini casticž tjuñicama.

¹⁰ Yoozquini juc'anti casticaquiča jalla tižta žoñinaca, persun anawali pecñi kuzcama kamñi žoñinacami, nižaza jilirinacžquiz ana rispitiñinacami. Jalla nižta žoñinaca juc'anti castictaž cjequiča. Ninacaqui anča lisuča, nižaza mit kuztan anawali paañiča. Ninacaqui poderchiz arajpachquin žejlñinacžquiz ana ekskuc ararñiča.

¹¹ Yooz zuma anjilanacazti nii poderchiz arajpachquin žejlñinacžquiz araržjapa eksa, azziz anjilanacaz cjenami. Nižaza zuma anjilanacaqui Yooz yujcquizquini nii anawal žejlñinacž quintra ana ujtžtanuz pecča.

¹² Jalla nii anawal kamñi žoñinacaqui animalažtakazza ana intintazñi kuzziz. Persun kucamakaz ojklayñiča, Yoozquin ana juyzu paañi. Q'uit animalanacaqui žejlča, tanžta cjisjapa, nižaza conta cjisjapa. Jalla nižtaž nii žoñinacaqui. Ana zizta puntuquiztan quintra chiiča. Anawali kamcan nii anawali kamtiquiztan animalanacaztakaz ticznaquiča.

¹³ Nižaza ninacaqui parti žoñinacžquiz sufriskatchiž cjen, zakaz sufraquiča. Nižaza anawal pijžtanacquiz kamcan, “Cuntintutča wejrnacqui” cjian chiiñiča. Ančhucquini ninacžtan žejlquini azipanča, nižaza ninacž cumpant'izmi ančhucaltajapa ana waliča. Ninacaqui ančhucaquiz incallž anča jutzazza, ančhuc criichinacžtan chica žejlžjapa.

¹⁴ Nii anawali žoñinacaqui tsjii maataka cheržcu, panž adulterio paaz pecča. Nižta anawali paaznacquiztan anapan ochñiča. Incallchuc maatakanacžquiz adulterio kjutñi chjichñiča. Jalla nižta žoñinacaqui adulteriuquini ojklayñi, nižaza paaz tanzñi nižaza žhjul u paazmi anča atñipanikazza. Jalla nižta cjiicjñinacaqui infernuquin ojklñi žoñinacača.

¹⁵ Yooz jiczquiztan zarakchiča. Nekztan uj paacan ojklayñiča. Tuquitan tsjii anawali profeta želatča, Balaam cjita, Beorž majch. Jalla niiqui anawali paatiquiztan paaz ganz pecchiča. Jalla nii Balaam cjitaž iratača ninaca ojklayñiqui.

¹⁶ Tsjii ana chiiñi aznuqui Balaamžquiz ujziča žoñž tawkžtan, Balaam anawali paaz pecchž cjen. Jalla nižta ujžñž cjen Balaamqui atajtatača niž anawali pinsita jaru ana paazjapa.

¹⁷ Wejr cjiwča, nii anawali tjaajiñi žoñinacaqui ana kjazziz tujžtakazza. Ancha taku tjaacha, pero anawira cumpliča. Nižaza ninacača ana chijñichiz tsjirižtakaz, tjami chjichta tsjirižtakaz. Ninacaqui wiñayjapa casticta cjequiča anawal tsokchi zumchiquiz chjatkatzcu.

¹⁸ Nii anawalinacaqui mitarazzi tawkchiz inapankaz chiiñiča. Anawali paaznaca tjaajincan, nižaza anawali pecznaca tjaajincan užca anawal kamañquiztan zarakchinacžquiz wilta anawal kamañchiz kamkatz pecñiča.

¹⁹ Wejtnac jaru cjee, cjiñiča. Wejtnac jaru cjican, čhjuļu paaznacami walikazza cjiñiča. Pero ninacapacha anazum kamañanac jaru cuztumrazziča. Jakziltat anawal kamañ jaru cuztumrazachaja, jalla niča nii anawal kamañ mantuquiz željñiqui.

²⁰ Učhum liwriñi Jesucristo Jiliržquin crižcu, yekjap nii anawal tjaajñinacaqui liwriitačani anawali paatanacquiztanami, nižaza anazuma kamtiquiztanami. Liwriita cjsicu wilta anazum kamañquiztan ninacžtaqui juc'ant anawira waliž cjequiča, niž tuqita anawal kamañquiztan juc'anti anawaliž cjequiča.

²¹ Ninacaqui Yooz zuma kamaña ana pajtasaz niiqui, ninacžtaqui tsjan cusaž cjitasacha. Pero ninacaqui Yooz zuma tjaajinta catokchiča. Jaziqui Yooz zuma kamaña pajžcu, quejpsiča. Jalla nižtiquiztan ninacžtaqui juc'ant anawira waliž cjequiča.

²² Ninacaqui Yooz tawk jaru ojklaychitača. Nekztan Yoozquiztan quejpsiča ninacaqui. Jaziqui nii quejpsiča žoñinacaqui pacunacžtakazza. Pacunacaqui jotžcu persun joti lujlža. Nižaza tsjii ajunta cuchiqui wilta ljajzpiquizpacha zumt'iča. Jalla nižtača nii anawal tjaajñinacaqui.

3

JESUCRISTUZ TJONZ PUNTU

¹ Pecta jilanaca, cullaquinaca, jalla tižtan pizc wilta cartal ančhucaquin cjiřžcuča. Jalla tii pizc cjiřta cartaž cjen ančhucaquiz werar razunžtan pinsiskatz pecuča.

² Tuquitan Yooztajapa chiiñi zuma profetanacaqui Yooz puntu mazinčiča. Nižaza wejrnac apostolonacaqui liwriñi Jesucristo Jilirž mantitanaca ančhucaquiz tjaajinchinča. Jaziqui tjapa nii tjaajintanaca cjužzna.

³ Profetaž mazinta timpuž tjontan žoñinacaqui tjonaquiča. “Yooz puntu tjaajintanaca inapanikazza” cjican burlasaquiča. Nii burlasni žoñinacaqui persun anawal kuzcama ojklayaquiča, nižaza persun kuzcama kamaquiča. Ančhucqui jalla nii zumpacha ziz waquiziča.

⁴ Ninacaqui pewcznaquiča, tuž cjican: “žKjažt cjisit Cristojo tjonaquiča cjetla pero? Učhum tuqita atchi ejpnacaqui kamchiča; nekztan ticziča. Tii muntu kalltiquiztanpacha tjapa nižtapankaz watča. Cristuc anaž tjonasacha”. Nuž cjicanž chiyaučiča ninacaqui.

⁵ Pero tuqita timpuquiztanpacha arajpachaqui Yooz chiitiquiztanpacha paatača. Jalla nii Yooz paatami, ninacaqui anaž naaza. Nižaza Yooz mantitiquiztanpacha tii yokaqui kjazquiztan jecziča.

⁶ Nižaza kjaz juyzu tjontiquiztan nekztanpachaž tii muntu yoka kjazquiz katžcu pertis-siča.

⁷ Tii muntuquiz željñi yokami pachanacami ujžtan ujzjapa chjojta željča. Yooz mantita jaru zakaz nižta wataquiča. Jalla nii ujqui ultiu pjalz tjuñquiz ujaquiča. Nii pjalz tjuñquiz zakaz anazum kamañchiz žoñinaca castictaž cjequiča nii ujquizpacha.

⁸ Pecta jilanaca, cullaquinaca, tižkaz anaž tjatna. Yooz Jiliržtajapa tsjii noojiqui warank watanaca cuntača. Nižaza warank watanacaqui tsjii nooj cuntača. Yooztajapa timpunacaqui niztača.

⁹ Yekjap žoñinacaqui tuž cjiča, Yooz Jiliriqui niž tjaata taku ana uri cumpliča. Jilanaca, jalla nii chiičtaqui anazuma razunača. Antiz Yoozqui ančhucaltajapa pasinziz kuzziz željča. Yoozqui anaž jakziltami casticz pecča. Antiz tjapa žoñinaca “ujchizpantča” cjican chikatatz pecča, ninaca liwriita cjsjapa. Jalla nižtiquiztan ana uri tjonča.

¹⁰ Pero Jesucristo Jilirž tjonz tjuñiqui tiripintž tjonaučiča, tsjii tjañižtakaz. Jalla nii tjuñquiziqui tii muntu pachanacaqui tsjii tsucchuc jorjorñižtan tucuzinžnaquiča. Tjuñimi

jiizmi warawarami liwj kataquiĉha; ujta cjequiĉha. Niżaza tii muntu yokami tjapa Źejlĳinacĉtan pacha ujĉtan tankattaĉ cjequiĉha.

¹¹ Jalla niĉta liwj tĉatantaĉ cjequiĉha. Jalla niĉtiqiztan anĉhucqui Yooz kuzcama juc'anti kamz waquiziĉha, niĉaza Yooz irata zuma kamaĉchiz cjis waquiziĉha. Jalla niĉta kamaĉchiz waquiziĉha anĉhucqui.

¹² Yooz tjonz tjuĳi tjewĉna, niĉaza zumapan langĉna, Yooz apura tjonzjapa. Nii tjonz tjuĳquiziqui tii muntu pachanacami ujĉtan tankattaĉ cjequiĉha. Niżaza tjuĳi jiizmi warawarami ujquiz liwj jiĳkattaĉ cjequiĉha; nekztan liwj kataquiĉha.

¹³ Pero uĉumzti ew arajpachami yokami tjewĉa, Yooz chiita tawk jaru. Nii ew arajpachquinami yokquinami tjappacha Yooz irata zumacamaĉ cjequiĉha. Ana zinta anawaliĉqui cjequiĉha.

¹⁴ Pecta jilanaca, cullaquinaca, Yooz tjonz tjuĳi tjewĉcan, zuma kamaĉquiz kuz tjaa, niĉ yujcquiz ana ujchiz cjisjapa. Nekztan Yooztan uĉumnacatan walikaz cjequiĉha.

¹⁵ Jalla tii cjuĳĉna. Yooz Jiliriĉqui anĉhucaltajapa pasinziz kuzziz Źejlĉha, anĉhuc liwriita cjisjapa. Jalla nii puntuqiztan zakaz Pablo jilaĉqui anĉhucaquin cĉjirĉiĉha. Yoozqui niĉzquiz zizĳi zizĳi niĉaza zuma intintazĳi kuzziz cĉjiskatĉiĉha. Jalla nii ziztanac jaru uĉumĉ pecta Pabluĉqui anĉhucaquin cĉjirĉiĉha.

¹⁶ Weriz chiita puntunacqiztan Pabluzakaz ĉiichiĉha tjapa niĉ cĉjirta cartanacqiz. Parti Pabluĉ cĉjirtanacaĉqui ch'aman intintazzucaĉha. Jalla niĉta ch'aman intintazzucanacaĉqui ana zizĳi Źoĳinacami, niĉaza pizc kuzziz Źoĳinacami tsĉii kĉutĳiĉ intintazza. Niżaza parti Yooz takunaca zakaz tsĉii kĉutĳiĉ intintazza. Jalla nuĉ tsĉii kĉutĳiĉ intintazcu, ninacaĉqui ninacĉtajapa juc'ant ana zumquiz cĉjissa; nekztan castictaĉ cjequiĉha.

¹⁷ Pecta jilanaca, cullaquinaca, ima tii muntuqiz tiĉtanaca watan tii puntunaca anĉhucaqiz zizkatchinĉha. Jaziqui anawali incallĳi Źoĳinacaĉqui Źelaĉquiĉha. Nii anawali incallĳi Źoĳinacaĉqui Yooz mantitanaca anapan cassa. Jalla niĉtiqiztan ninacĉqiztan cuit'aza, ana tsĉii kĉutĳiĉ ĉjĉicta cjisjapa. Anawalinac kĉutĳiĉ ĉjĉicta cjequiz niĉqui, anĉhucqui ana tĉurt'iĳi kuzziz cjequiĉha.

¹⁸ Anĉhucqui uĉum liwriiĳi Jesucristo Jilirĉquiz juc'ant zumaĉ pajaĉquiĉha. Niżaza niĉ puntu juc'ant zizaĉquiĉha. Niżaza juc'ant zuma kamaĉchiz cjee. Uĉum Jesucristo Jiliriĉqui honorĉizkaj ĉjila anzĉtajapami wiĳayajapami. Jalla nuĉoj ĉjila. Amĉn.

PRIMERA CARTA DEL APOSTOL SAN JUAN

JESUCRISTUQUI TII MUNTUQUIZ TJONCHICHA

¹ Wejrqui Jesucristuž puntul ančucaquin cjižrčučha ančhuc wali cuntintu cjisjapa. Tuqui timpuquiztanpacha Jesucristuqui žejlñipantakalčha, ima tii muntu želan. Tii muntuquiz tjontanaqui wejrnacqui Jesucristužtan kamčinčha; wejtnaca čhjujčžtan nii cherčinčha; nižaza niž taku nonzinčha. Jacatattanaqui wilta cherchinzakazza; nižaza wejtnaca kjaržtan nii lanzinčha. Jazimi tirapanž žejtčha Jesucristuqui. Nižaza jakziltat Jesucristuž taku criyachaja jalla niiqui Yooztan wali cuntintupankaz cjequičha.

² Nii žeti tjaañi Jesucristuqui tjonchičha tii muntuquiz. Nekztan wejrnacqui nii Jesucristuž puntuquiztan žoñinacžquizimi, ančucaquizimi paljaychinčha. Tuqui timpuquiztanpacha žejtñipantakalčha nii Jesucristuž puntuquiztan žoñinacžquizimi, kamñitakalčha. Nekztan tii muntuquiz tjonžcu, žoñi tucchičha.

³ Jaziqui nii chertanaca nii nonžtanaca ančucaquin quint'učha, wejtnacatan ančhucatan tsjii kuzziz cjejajo. Wejtnacatan Yooz Ejpžtan nižaza Yooz Majchtan tsjii kuzzizpančha, jalla nižtapacha wejtnacatan ančhucatan cjisjapa.

⁴ Wejrqui tii cartal cjižrčučha ančucaquin wali cuntintu cjisjapa.

YOOZQUI ZUMA KJANQUIZ KAMCHA

⁵ Jesucristuqui wejtnacaquiz tjaajinchičha. Jaziqui nii tjaajintanaca ančucaquin cjižrčučha. Yoozqui zuma kjanquiz kamčha. Yoozqui zumapankazza, jalla nuž cjičha nii kjanquiz kamz puntuqui. Nižaza Yoozqui anapanž zumchiquiz kamčha. Yoozqui ana čjul ujchizza, jalla nuž cjičha nii ana zumchiquiz kamz puntuqui.

⁶ Tsjii uj paañi žoñiqui zumchiquiz kamčha. Nuž kamcanaqui “Yooztan wejtanaqui tsjii kuzzizza”, cjičhaj niiqui, toscaraž čiičha nii žoñiqui. Anaž werar Yooz jiczquiz ojklayčha.

⁷ Yekjapazti kjanquiz kamčha; Yoozqui kjanquiz kamčha, jalla nižtapacha. Jakzilta žoñinacat nuž kamčhaj niiqui, Yoozquin criichinacžtan tsjii kuzzizza. Nuž kamcanaqui, tjapa niž ujquiztan pertuntačha, Jesucristuž ticziž cjen.

⁸ Jakzilta žoñit “Ana ujchiztčha”, cjičhaj niiqui, persunpachaž incallčha; toscaraž čiičha. Ana zum kuzzizza nii žoñiqui.

⁹ Pero jakzilta žoñit Yoozquin pertuna mayizaj niiqui, niž ujqui pertuntaž cjequičha. Nižaza ana ujchiz cjequičha. Jalla nuž cjičha Yoozqui. Anaž wira toscara chiyasačha Yoozqui; niž taku cumplñipankazza.

¹⁰ Yoozqui cjičha, “Tjapa žoñinacami ujchizza”. Jaziqui jakzilta žoñit “Ana ujchiztčha”, cjičhaj niiqui, Yooz toscara čiičhažokaž nayčha nii žoñiqui. Nižaza niž kuzquiz Yooz taku anaž catokčha.

2

JESUCRISTUCHA UCHUM TJURT'IZIÑIQUI

¹ Wejt jilanaca, cullaquinaca, wejrqui tii cartal cjižrčučha, ančhuc ana uj paažo. Jakziltat uj paačhaj niiqui, Jesucristužquiztan mayizaquičha. Niičha učhum tjurt'iziñiiqui. Nekztan Jesucristuqui Yooz Ejpžquin mayizinaquičha. Jesucristuqui ana čjul ujchizza, zumaž kamčha. Jaziqui nii tjurt'iziñiiqui zuma mayizinasachha.

² Učhumž uj paatiquiztan Yooz Ejpqui učhum casticž waquizičha. Jesucristuž ticzi nekztan Yooz Ejpqui učhum pertunasačha. Ana ujchiz Jesucristuqui učhum laycu učumnaca ujquiztan ticzičha. Jaziqui Jesucristužquin tjapa kuztan cjenaqui čjul uj paañi žoñinacami pertunta panikaz cjesačha.

³ Jakzilta žoñit Yooz mantita jaru kamčhaj niiqui, Yooz pajčha. Jalla niičha werarapan.

⁴ Jakzilta žoñit ana Yooz mantita jaru kamčhaj niiqui, anaž čui atasachha “Yooz pajučha”, cjičhanaqui. “Yooz pajučha”, cjesaž niiqui, toscaraž čiičha. Anazum kuzzizza nii žoñiqui.

⁵ Jakzilta žoñit Yooz tawk jaru kamčhaj niiqui, Yooztan ancha zuma munaziñi kuzzizza. Yoozquin tjapa kuzzizpančha. Jilanaca, tii zuma cjuñzna.

⁶ Jakzilta žoñit “Yooztan tsjii kuzziztčha wejrqui”, cjičhaj niiqui, zuma kamzpanž waquizičha, Jesucristuqui zumaž kamčha, jalla nižta.

EW MANTITA

⁷ Jilanaca, cullaquinaca, wejrqui anal jazta mantita cjižrčučha. Tuquitanpacha tii mantitac zizzinčhucčha ančhucqui, porapat zuma munaziz, jalla nii. Tuquitanpacha tii mantitac nonzinčhucčha.

⁸ Pero tii mantita cjiyrzcuča, jazta mantitažtakaz. Jesucristuqui tii mantitacama kamčiča tii muntuquiz. Ančhuczakaz tii mantitacama kamča. Nuž kamcan, zuma munazican, ana zumchiquiz kamča, werar kjanquiz kamča, Yooz takucama. Jalla nužupanča niiqui.

⁹ Jakzilta zoñit “Kjanquiz kamuča”, cjičhaj niiqui, jilanacžtan porapat zuma munaziz waquizičha. Jilanacžtan tira chjaawjkatchaj niiqui, pachpa zumchiquizpanž kamča.

¹⁰ Jakzilta zoñit jilanacžtan porapat zuma munazaja, jalla niiqui kjanquizpankaz kamča. Jaziqui Yooz jicz cherchucača, ana ujquiz tjojtšjapa.

¹¹ Jakzilta zoñit jilanacžtan chjaawjkatchaja jalla niiqui zumchiquiz kamča. Jakzitchuc ojkčhaj niiqui, ana zizza. Jaziqui Yooz jicz ana cherchucača; zur zoñižtakazza nii zoñiui.

¹² Jilanaca, cullaquinaca, ančhucquin cjiyrzcuča. Jesucristuž ticzi nekžtan ančuca uj pertunchičha Yoozqui.

¹³ Ejpnača, ančucaquin cjiyrzcuča. Jesucristuqui tuqui timpuquiztanpacha žejlñipantakalča. Nii Jesucristužtan kamča ančhucqui. Tjotjowanaca, turtakanaca, ančhucqui Satanás atipchinčhucča. Jaziqui ančucaquinžakaz cjiyrzcuča.

Jilanaca, cullaquinaca, ančhucqui Yooz Ejpžtan kamča. Jaziqui ančucaquinžakaz cjiyrzcuča.

¹⁴ Ejpnača, Jesucristuqui tuqui timpuquiztanpacha žejlñipantakalča. Nii Jesucristužtan kamča ančhucqui. Jaziqui ančucaquin cjiyrzcuča. Tjotjowanaca, turtakanaca, ančuca kuzquiz Yooz taku chjojchiñčhucča. Nekžtan Yoozquin tjurt'iñi kuzziz cjen, ančhucqui Satanás atipchinčhucča. Jaziqui ančucaquinžakaz cjiyrzcuča.

¹⁵ Tjappacha ančhucqui, nonžna. Anača tii muntuquiz žejlñi cusasanacžquin kuz tjaazqui. Anača anawali paaznacquiziqui kuz tjaazqui. Jakzilta zoñit anawali paaznacquiz kuz tjačhaj niiqui, anaž Yooz Ejpžquin kuz tjača.

¹⁶ Tii muntuquiziqui tižta anawali paaznaca žejlča: persun kuzcama kamz pecznaca, persun čhujquiz čerta pecznaca, tucquin cjis pecznaca. Jalla nižtanaca pecčhaj niiqui, diabluž jaru ojklajča.

¹⁷ Tii muntuquiz žejlñinacaqui liwj tucuzaquičha, tjažtaž cjequičha. Nižaza tii muntuquiz žejlñinaca pecznacami tucuzaquičha. Pero Yooz kuzcama ojklajñinacazti Yoožtan wiñaya kamaquičha.

WERAR TAWKZTAN, TOSCAR TAWKZTAN

¹⁸ Jilanaca, cullaquinaca, tii timpumiž ojtča. Tsjii Jesucristuž quintraqui tjonauquičha, nii quintu zizza ančhucqui. Nižaza anziqui muzpa Cristuž quintra zoñinacaqui jecža. Nekžtan učhumqui zizza tii timpuqui ojtča.

¹⁹ Nii quintranacaqui učhumquiztan zarakchiča. Anatača učhumtan tsjii kuzziz ninacaqui. Učhumtan tsjii kuzziz cjitasaž niiqui, tira učhumtan kamtasacha. Ninacaž zaraktanauqui, kjanapacha cjissiča, anatača učhum tsjii kuzziz ninacaqui.

²⁰ Ančhuczi ana nižtičhucča. Ančuca kuzquizti Yooz Espiritu Santo kamča. Jaziqui ančhucqui tjapa werara zizzinčhucča.

²¹ Werar taku zizñiž cjen ančucaquin cjiyrzcuča. Nižaza Yooz takuqui anaž čjul toscarami čiiča.

²² ¿Ject toscar zoñejo? Jakziltat “Jesusača ana Yooziž cuchanžquita Cristuqui” cjičhaja, jalla niičha toscara čiiñiqui. Cristuž quintrača ninacaqui. Nii zoñinacaqui Yooz Ejpžquin nižaza Yooz Majchquin ana pajz pecča.

²³ Jakziltat ana Yooz Majchquin pajz pecčhaja, jalla niiqui ana Yooz Ejpžtan kamasacha. Jakziltat “Jesucristuqui werar Yoozza” cjičhaja, jalla niiqui Yooz Majchtan kamča; Yooz Ejpžtan zakaz kamča.

²⁴ Nii tuqui nonžta Yooz taku persun kuzquiz chjojwa ančhucqui. Nii Yooz taku chjojžcu, Yooz Majchtan Yooz Ejpžtan ančhucatan tsjii kuzziz wiñaya kamaquičha.

²⁵ Yooz Majchqui čiičičha, tuž cjian:

—Wiñaya Yoožtan kamaquičha ančhucqui.

²⁶ Yekjap zoñinacaqui ančhuc incallž pecča. Jaziqui cjiyrzcuča nii puntuquiztan.

²⁷ Jesucristuqui Yooz Espiritu Santo ančuca kuzquiz cuchanžquičičha. Jalla nižtiquiztan nii Espiritu Santuqui ančucaquiz tjaajinča. Jaziqui yekja tjaajiñi espiritu anaž pecca ančhucqui. Yooz Espiritu Santuž chekan weraraqui tjaajinča. Anaž toscaranaca tjaajnasacha. Cristužtan tsjii kuzziz kama; jalla nuž tjaajinča Espiritu Santuqui. Nižtaqui niiž tjaajintacama kama.

²⁸ Jilanaca, cullaquinaca, Cristužtan tsjii kuzziz kama ančhucqui. Nekžtan Cristuž tjontanaqui, učhumqui anaž eksnaquičha, nižaza anaž azaquičha.

²⁹ Jesucristuqui zuma kuzzizpanča. Nii zizza ančhucqui. Jakziltažlaj zuma kuzziz niiqui, Yooz maatiča. Jalla nižakaz zizza ančhucqui.

3

YOOZ MAATINACA

¹ Tjappacha ančhucqui nonžna. Yooz Ejpqui učhum zumaž k'ayacht'ičha. Nižaza Yoozqui učhum illzičha, niž maati cjisjapa. Yooz maatičhumčha učhumqui. Jalla nižtiqiztan učhum kuzqui ana pajčha ana Yooz cričinacaqui. Yooz kuzmi anazaž pajčha ninacaqui.

² Jilanaca, cullaquinaca, učhumqui Yooz maatičhumčha. Wiruñauqui jaknužkačhum cjisnačan, učhumqui ana zizza. Pero Jesucristuž tjontanaqui, nii cheraquičha učhumqui. Nekztanaqui Jesucristuž irata cjisnaquičha učhumqui. Jalla nii tjaajinta zizzinčhumčha.

³ Jakziltat Jesucristo tjewžaja, jalla niiqui čhjul uj paaznacami ecčha, ana ujchiz cjisjapa; Jesucristuqui ana ujchizza, jalla nižtapacha cjisjapa.

⁴ Jakzilta žoñizlaj uj paañi, jalla niiqui Yooz mantitanaca anaž cazza. Uj paazqui Yooz taku quintračha.

⁵ Jesucristuqui tii muntuquiz tjonchičha, žoñinacž uj pampatzjapa. Ana čhjul ujchizza niiqui. Jalla nii zizza ančhucqui.

⁶ Jakzilta žoñizlaj Cristužtan tsjii kuzziz, jalla niiqui ana uj paañičha. Uj paañi žoñinacaqui anaž naaza Cristuž puntuquiztanaqui. Nižaza anaž kamčha Cristužtanami.

⁷ Jilanaca, cullaquinaca, ana jeczquizimi incallskata ančhucqui. Wali kamñi žoñinacaqui zuma kuzzizza, Cristužtakaz.

⁸ Satanás cjita diabluqui tuqui timpuquiztanpacha uj paañipankaztakalčha. Jaziqiu nižaza tira uj paañičha. Nekztan uj paañi žoñinacaqui Satanás diabluž maatinacačha. Jesucristuzti tii muntuquiz tjonchičha, Satanás diabluž paatanaca akkatzjapa.

⁹ Yooz maatiqiu ana kuzin uj paañičha. ¿Kjažtiqiztan nii ana kuzin uj paañitajo? Yooz maatičha, nekztan kuztan ana uj paapaasačha. Yooz Ejpž kuz cherchi kuzziz kamñičha. Jalla nekztan tjapa kuztan uj ana paasačha.

¹⁰ ¿Jakziltat Yooz maatejo? ¿Jakziltat diabluž maatejo? ¿Jaknužža nii zizas učhumjo? Jalla tuž zizasachha. Jakziltažlaj kuzin uj paañi, jalla niičha ana Yooz Ejpcizqui. Nižaza jakziltažlaj niž jilanacžtan čhjaawjkatñi, jalla niičha diabluž maatiqiu.

PORAPAT ZUMA MUNAZIZA

¹¹ Porapat zuma munaziza. Tii mantitaqui tuquitanpacha nonzinčhucčha.

¹² Tsjii žoñi želatčha, Cain cjita. Jalla nii Cainqui niž lajk conchičha. ¿Kjažtiqiztan conchit niijo? Jalla niž paatanacaqui anawalinacatačha; niž lajkž paatanacazti wali-nacatačha. Jalla nekztan niž lajk conchičha. Cainqui diabluž maatičha. Ana nii Cainž kuz cherchi kuzziz cjee ančhucqui.

¹³ Jilanaca, cullaquinaca, tii muntuquiz žejlñi žoñinacž ančhuc čhjaajwanaqui, ana istraña, ana upa kuzziz cjee.

¹⁴ Tuquiqui ana zuma munazan, jalla nekztan infiernuquin okaj cjitatalčha učhumqui. Jaziqiu Yoozquin criičuqui arajpach watjaž okaquičha; wali cuntintu cjequičha. Jalla nekztan učhumqui Yoozquin criiči jilanacžtan porapat zuma munazizza. Nii zizza učhumqui. Jakziltat ana jilanacžtan porapat zuma munazičhaja, jalla niiqui infiernuquinž okaquičha.

¹⁵ Jakziltat niž jilžtan čhjaawjkatčhaja, jalla niiqui žoñi conchiz cjes, jalla nižtaž nina-caqui. Nižaza žoñi conñinacami ana Yooz kuz cherchi kuzzizza. Anaž wiñaya Yooztan kamasačha.

¹⁶ Cristuqui učhum laycu ticzičha. Nekztan jaknuž munazizlaja, jalla nii učhumqui zizza. Učhumqui Yooz criiči jilanacžtan zuma munazizpančha, ticzcama.

¹⁷ Tsjii tjapa cusasanacchiz žoñiqui tsjii t'akjir jila cheraquiž niiqui, okzpančha. Anaž okznasaž niiqui, ¿kjažt Yooz cherchi kuzziz cjesajo? Anapanž Yooz cherchi kuzzizza.

¹⁸ Jilanaca, cullaquinaca, anačha atžtan taku mayaka okzqui. Paatanacžtanaqui okza. Nekz tjeeža učhumž okžtaqui. Niičha werar okzqui.

YOOZQUIZTAN ANA PAYZNAKZCU MAYAQUICHA

¹⁹ Jilanaca zuma okzcan, učhumqui zizza, werar Yooz maatičhumpančha, jalla nii. Nekztan llajlla kuzzizlaj niiqui, tjup kuzziz cjee. Yooz yujcquiz Yooz maatinacčhumčha.

²⁰ Yoozza juc'ant chekanaqui učhum kuzquiztan cjenaqui. Yoozqui tjapa učhum kuz zizza, ana walinacami, walinacami, tjappacha. Nii anawalinaca zizcumi, Yoozqui tirakaž učhum okža.

²¹ Jilanaca, cullaquinaca, čhjulorat učhumž kuz walika cječhaj niiqui, Yoozquiztan ana ekscu mayasačha.

²² Učhumqúi Yooz mantitacama kamtiqúiztan, nižaza Yooz kuzcama kamtiqúiztan učhumž mayiztac nonžtaž cjequičha.

²³ Yooz mantitanacaqui tužučha: Yooz Majch Jesucristužquin tjapa kuztan cjee. Nekztanaqui jılanacžtan zuma munaza. Jalla nuž mantichičha Yoozqui.

²⁴ Jakziltat nii mantitacama kamčhaja, jalla niiqui Yooztan tsjii kuzzizza. Nižaza Yooztan tsjii kuzzizza nii žoñinacžtan. Yooz tjaata Espiritu Santuquí učhum kuzquíz žejlčha. Jalla nekztan zizza učhumqúi, Yooztan učhumtan tsjii kuzziz, jalla nii.

4

ESPIRITU SANTUŽTAN CRISTUŽ QUINTRA ESPIRITUŽTAN

¹ Jılanaca, cullaquinaca, nonžna. Jakziltat “Tii takuqúi Yooz takučha”, cjičhaj niiqui, nii žoñiž čhiita taku zumpacha tantiyaquičha, Yooz taku čhiñi, ana Yooz taku čhiñi, jalla nii. Anačha čhjul takumi pjazila criizqui. Tii muntuquíz muzpa toscara čhiñi žoñinaca žejlčha; Yooz taku čhiitažokaž cjičha.

² ¿Jaknužt žoñiž čhiita taku paji atas učhumjo? ¿Yooz Espiritu Santuž čhiikatcaya? ¿Uz ana Yooz Espiritu Santuž čhiikatja? Jalla tuž paji atasachha učhumqúi. Tii muntuquíz Jesucristuqúi žoñž curpuchiz kamčičha. Jakziltat nižtapan čhičhaja, jalla niičha Yooz taku čhiñiqui.

³ Nižaza jakziltat Jesucristuqúi anačha žoñž curpuchiz kamčiqui, cjanan čhičhaja, jalla niičha ana Yooz takucama čhiñiqui. Cristuž quintra espirotuqúi nii čhiikatčha. Nii Cristuž quintra espirotuqúi tjonaquičha; tuquitan ančhucqúi jalla nii nonzinčhucčha. Anziqúi tii muntuquíz nižta Cristuž quintra čhiñinaca žejlčha.

⁴ Pecta jılanaca, cullaquinaca, ančhucqúi Yooz maatinacčhucčha. Nii toscar taku joojooñinacaqui diabluž mantitaž ojklayčha. Ančhuczi Yooz Espiritu Santuž mantitaž ojklayčha. Yooz Espiritu Santuqúi juc'anti azzizza nii diablužquíztan cjenauqúi. Nekztan ančhucqúi nii toscar taku joojooñinaca atipasachha.

⁵ Ninacaqui diabluž maatinacachha. Nii žoñinacaqui ana Yooz takucama čhiñičha, diabluž taku čhiñičha ninacaqui. Nii diabluqúi tii muntuquíz ančhaž mantičha. Jaziqúi Yoozquin ana criiči žoñinacaqui diabluž taku criičha.

⁶ Učhumzti Yooz maatinacčhumčha. Jaziqúi werar Yooz takuž čhiyan Yoozquin criiči žoñinacaqui nii werar takuž catokčha. Ana Yoozquin criiči žoñinacaqui nii werar taku anaž catokčha. Nužquíz werar taku čhiñi žoñinacami, nižaza toscar taku čhiñi žoñinacami pizcpacha pajasachha učhumqúi.

YOOZQUI ANCHA MUNAZIŇI KUZZIZZA

⁷ Pecta jılanaca, cullaquinaca, Yoozpankazza učhum porapat zuma munazkatñiqui. Jaziqúi učhumqúi tjappacha porapat zuma munazizpančha. Jakziltat zuma munazičhaja jalla niiqui Yooz maatičha. Nižaza Yooz pajčha.

⁸ Yoozqui ancha munaziñi kuzzizza. Jaziqúi jakziltat ana munaziñi kuzzizlaja, jalla niiqui ana Yooz pajčha.

⁹ Yooz Ejpqúi tii muntuquíz niž zinta Majch cuchanžquičičha učhum Yooztan wiñaya kamzjapa, wali cuntintu. Jalla nuž cuchanžquitiqúiztan Yoozqui učhumquíz nižž munaziñi kuz žeezičha.

¹⁰ Yoozqui ultimu zuma munaziñi kuzzizpančha. Yooz Ejpčha učhum k'ayachichiqui. Nekztan nižž Majch cuchanžquičičha. Yooz Majchqúi učhum ujlajcu ticzičha, učhum ana casticta cjisjapa. Nekztan zuma munaziñi kuzqui jaknužt cječhaja, nii zizza učhumqúi.

¹¹ Pecta jılanaca, cullaquinaca, učhumtan ancha munazičha Yooz Ejpqúi. Jaziqúi učhum nižtazakaz porapat zuma munazizpančha.

¹² Anaž jakzilta žoñimi Yooz cherčha. Ana Yooz cheržcumi zuma munazičhaja, jalla nii žoñiqui Yooztan tsjii kuzzizza. Nižaza Yooz munaziñi kuz, jalla nižta kuzzizza nii žoñiqui.

¹³ Yooz Ejpqúi nižž Espiritu Santo učhumquíz tjaachičha. Jalla nekztan Yooztan učhumtan tsjii kuzzizza, nii zizza učhumqúi.

¹⁴ Yooz Ejpqúi nižž Majch cuchanžquičičha žoñinaca liwriizjapa. Nii Yooz Majch cherchinčha wejrnacqúi. Nekztan ančhucquíz nii puntu tjaajinčinčha.

¹⁵ Jakziltat “Yooz Majchčha Jesucristuqúi”, cjičhaja, jalla niičha Yooztan tsjii kuzzizqui. Nižaza Yoozqui nižtan tsjii kuzzizza.

¹⁶ Yoozqui učhumtan ancha munazičha, jalla nii zizza učhumqúi. Nižaza nii criičha učhumqúi. Yoozqui munaziñi kuzzizza. Jaziqúi jakziltat munaziñi kuzzizpanžlaja, jalla niičha Yooztan tsjii kuzzizqui. Nižaza Yoozqui ninacžtan tsjii kuzzizza.

¹⁷ Nuž kamcan juc'ant juc'ant munaziñi kuzziz cjišsa učhumqúi, Jesucristuž irat kuzziz cjišcama. Jalla nekztan juyzuquíz ana eksnaquičha učhumqúi.

¹⁸ Munaziñi kuzziz žoñinacaqui ana Yoozquin eksñiċha. Zuma munaziñi kuzziz žoñinacaqui anaž ċġulumi eksnasaċha. Jalziltat eksñi kuzzizlaja, jalla niiqui Yooz casticz eksa. Jalla nižtiquiztan anaž zuma munaziñi kuzzizza nii eksñi žoñinacaqui.

¹⁹ Yoozqui uċumtan zuma munaziċha. Jalla nektanaqui uċumqui Yooztan munaziċha.

²⁰ Jakziltat “Wejrqui Yooztan zuma munaziñi kuzziztċha”, ċhiċġhaja, jalla niiqui niž jilanacžtan ana ċġaawjkatñipanċha. Niiž jilanacžtan ċġaawjkatċhaja, jalla niiqui anaž Yooztan zuma munaziñi kuzzizza. Inapankaz “Wejrqui Yooztan zuma munaziñi kuzziztċha” ċġiċha. Toscana ċhiċġha. Nii žoñinacaqui ċherċa jilanacžtan anazuma munaziċhaja, jalla niiqui ċġaknužt ana Yooz ċheržcu Yooztan munaziñi kuzziz ċjesajo? Anapanž ċjesaċha.

²¹ Yoozqui uċum mantichiċha tuž ċjican:

–Jakziltat Yooztan munaziñi kuzzizlaja, jalla niiqui niž jilanacžtanami zuma munaziñi kuzzizakaz ċjis waquiziċha.

5

UCHUMQUI ANAWALINACA ATIPĊHA

¹ Jesucaċha Yooziž ċuchanžquita Cristuqui. Jakziltat nii Jesucristužquin criċġhaja, jalla niċġha Yooz maatiqui. Tjapa Yooz maatinacami Yooz Ejpžtan munaziñi kuzzizza. Nižaza Yooz Ejpžtan munaziñi kuzzizalaj niiqui, Yooz Ejpž maatinacžtan munaziñi kuzzizza-kazza.

² Nižaza jakziltat Yooztan munaziñi kuzzizalaja, jalla niiqui Yooz mantitanacaž cazza. Jalla nektan Yooz maatinacaqui porapat zumaž munaziċha. Niiž zizza uċumqui.

³ Yooztan munaziñi kuzziz žoñiċqui Yooz mantitanaca cazza. Nii Yooz mantitanacaqui anaċha ċġ'ama.

⁴ Yooz mantita cazcu, Yooz maatinacaqui anawalinaca atipċha. Jakzilta žoñit Yoozquin tjapa kuz criċġhaja, jalla niiqui anawalinaca atipċha.

⁵ ċġJakziltat anawalinaca atipjo? Jakziltažlaj Jesús ċġita Yooz Majġquin tjapa kuztan, jalla ninacaž atipċha anawalinacaqui.

YOOZ MAJĊCHA JESUCRISTUQUI

⁶ Jesucristuqui tii muntuquiz tjontan, ġjastan bautistataċha. Jalla nektan cruzquiz ċġ'awċta ticziċha. ġjastan bautistaž ċġen, jalla niċġha tisticuqui, Yooz Majġċha Jesucristuqui, ċġjican. Cruzquiz ċġ'awċta lġoc tjawkċiċha. Jalla nii zakazza tisticuqui, Yooz Majġċha Jesucristuqui, ċġjican. Yooz Espiritu Santuqui tisticuzakazza: Yooz Majġċha Jesucristuqui, ċġjican. Nii Espiritu Santuċha werarapan ċġiċġiċqui.

⁷ Arajpachquinaqui ċġjep tisticunaca žejlċha, Yooz Ejp, nižaza Taku ċġita tjuuchiz Yooz Majġ, nižaza Yooz Espiritu Santo. Nii ċġjepultanaqui tsjiġkaz ċġiċġha.

⁸ Nižaza tii muntuquiziċqui ċġjep tisticunacazakaz žejlċha, Yooz Espiritu Santo, nižaza ġjastan bautis, nižaza cruzquiz lġoc tjawkz. Nii ċġjepqui tsjiġkaz ċġiċġha: Jesucristuċha Yooz Majġġqui, ċġjican.

⁹ Zoñž taku weraražlaja niiqui, Yooz taku ġuc'ant weraraċha. Werara ċġiċġiñi Yooz Ejpqui ċġiċġha, tuž ċġjican:

–Jesucristuċha Wejt Majġġqui.

¹⁰ Jakziltat Yooz Majġġquin criċġhaja, jalla niiqui persun kuzquiz zizza, Jesucristuċha Yooz Majġġqui, nii. Jalla nižakaz Yooz Ejpqui ċġiċġha. Jakziltat Yooz taku ana criċġhaja, jalla niiqui Yooz toscara ċġiitažokaz nayċha. Yooz takuqui ċġiċġha: Jesucristuċha Yooz Majġġqui, ċġjicanaqui. Jalla nii anaž criiz pecċha yekġap žoñinacaqui. Jalla nektan Yooz toscara ċġiitažokaz nayċha nii ana criċġinacaqui.

¹¹ Nižaza Yoozqui ċġiċġha:

–Wejt Majġġqui anċuca uġquiztan ticziċha. Jalla nektan anċhucqui wejtġan wiñaya kamaquiċha, wali cuntintu.

¹² Jakziltat Yooz Majġġtan tsjii kuzziz kamċhaja, jalla niiqui Yooztan wiñaya kamaquiċha. Nižaza jakziltat Yooz Majġġtan ana tsjii kuzziz kamċhaja, jalla niiqui Yooztan ana wiñaya kamaċha.

ZERZ TAKUNACA

¹³ Anċhucqui Yooz Majġġquin criċġha tjapa kuztan. Jalla nektan Yooztan wiñaya kamaquiċha, wali cuntintu. Nii zizjapa, anċucaquin ċġjiržcuċha wejrqui.

¹⁴⁻¹⁵ Uċumqui Yooz kuzcama mayizaquiž niiqui, nonžtaž ċġequiċha. Uċumž mayizta nonžtaž ċġequiž niiqui, tjaataž ċġequiċha. Jalla nužupanċha. Weraraž niiqui.

¹⁶⁻¹⁷ Tjapa anawalinacami uġpanċha. Tsjii jilaqui uġ paaquiž niiqui, Yoozquiztan mayizinspanċha, pertunta ċġeejo. Pero tsjii ġuc'ant anawal uġ paaz kuzzizalaj niiqui anaž

pertunta cjesača. Niižta ana Yoozquiztan mayizina, pertunta cjeejuqui. Yekja ujnacami Yoozquiztan mayizinasաճա, pertuntaճ cjejajo.

¹⁸ Yooz maatinacami anaճ kuzin uj paasaճա. Yooz maatinaca walja kjaraճ cuitiճա Yooz Majchqui. Nii anawal Satanաս diabluqui Yooz maati Yooz kjarquiztan ana kjaճi atճա. Nii zuma zizza anճhucqui.

¹⁹ Yooz maatinacճhumճա uճhumqui. Ana Yoozquin criichi ճofճinacaqui, tjappacha Satanաս diabluճ mantuquiz ճejlճա. Uճhumqui nii zakaz zizza.

²⁰ Yooz Majchqui tjonճiճա uճhumnaca zuma intintazkatajo, niճaza werar Yooz pajajo. շject werar Yoozjo? Jalla niiճա Jesucristo Yooz Majchqui. Jaziqui uճhumqui nii werar Yooztan tsjii kuzziz cjissinճhumճա. Niiճtan kamcan, wiճaya niiճtan kamaquiճա.

²¹ Jilanaca, cullaquinaca, anճhucqui ճofճiճ paata yooznacquiztan zaraka, ana iya neksz macjata anճhucqui. Jalla nuճzupanճա.

SEGUNDA CARTA DEL APOSTOL SAN JUAN

WERAR TAKU, MUNAZIÑI KUZ

¹ Wejrqui Juan cjitičha. Icliz jiliritčha wejrqui. Jaziqui tii cartal cjiyrzcučha Yooz illzta cullacaquin tjappacha naaža maatinacžquin. Wejrqui ančhuc werara k'ayachučha. Nižaza tjapa Yooz taku criichinacaqui ančhucž k'ayachučha.

² Učhum kuzquiziqui werar Yooz taku žejlčha, nižaza wiñaya želaquičha.

³ Nižaza zuma munaziñi kuzziz kaman, Yooz Ejpžtan nižaza Jesucristo Yooz Majchtan učhum yanapčha. Nižaza učhum okžcu, llan kuzziz cjiskatčha.

⁴ Yekjap am maatinaca cherchinčha, Yooz takucama kamñi. Nužupan, mantichičha Yoozqui. Nuž kamñi cheržcu, ancha chipchinčha wejrqui.

⁵⁻⁶ Cullacalla, anziqiu am roct'učha, porapat zuma munaza. Nii mantitaqui anačha anztakaz. Tuquitanpacha učhumqui nuž mantitapančha. Jakziltat zuma munaziñi kuzzizlaja, jalla niiqui Yooz mantitanacacama kamčha.

Tuquitanpacha Yooz mantita nonzinčhucčha, zuma munaziñi kuzziz cjee, jalla nii.

INCALLÑI ZOÑINACA

⁷ Tii muntuquiz muzpa zoñinacaqui ojklayčha, zoñi incallcan. Ninacaqui anaž criičha, Jesucristuž žoñž curpuchiz kamchičha tii muntuquiz, nii. Jalla ninacačha incallñinacaqui. Nižaza Cristuž quintranacačha.

⁸ Ančhucqui nonžna. Ančhucqui Yooztajapaž langža. Nii langžta cuitaquičha, ana pertiznajo, arajpachquin zumanaca tanzjapa.

⁹ Jakziltat Jesucristuž tjaajinta yapzaja, jalla niiqui anaž Yooztan tsjii kuzziz kamčha. Nižaza jakziltat Jesucristuž tjaajintacama ana kamčhaja, jalla niiqui anazakazza Yooztan tsjii kuzzizqui. Pero jakziltat Jesucristuž tjaajintacama kamčhaja, jalla niičha Yooz Ejpžtan nižaza Yooz Majchtan tsjii kuzzizqui.

¹⁰ Jakziltat ančhucquiz tjonžcu Cristuž tjaajinta ana niicama tjaajinčhaj niiqui, anaž Yooztan tsjii kuzziz nii jilaqui. Ančhucqui nii žoñi ana kjuyquiz kjawznaquičha. Anazaž tsaanaquičha.

¹¹ Jakziltat nii anawal žoñžquiz tsaanačhaj niiqui, nii žoñž anawal langž yanaptažokaz cjičha.

ZERZ TAKUNACA

¹² Zumsira wacchi takunaca wejta žejlčha. Pero tjappachaqui anal cjiyrz pecučha. Ančhucquain tjonž pecučha, učhum pora parlizjapa, porapat cuntintu cjisjapa.

¹³ Am cullaqui illzizakazza Yoozqui. Naaža maatinacaqui saludos apayžquičha. Jalla nužukazza.

TERCERA CARTA DEL APOSTOL SAN JUAN

GAYO CJITAQUI ZUMACHA

¹ Wejrqui Juan cjitičha. Icliz jiliritčha wejrqui. Gayo, amquin cjjiržcučha. Yooz takucama kamcan, am k'ayachučha.

² Jila, amtal mayizinučha tjappacha walicama cjeajo, nižaza am curpu zuma žejtñi cjeajo. Am kuz walikazza, nii zizučha wejrqui.

³ Yekjap jilanacaqui wejtquiz tjonzičha. Am puntu wejtquiz quint'ichičha, tuž cjan:

—Nii Gayuqui werar Yooz takucamaž kamčha.

Jalla nuž zizcu ancha chipchinčha.

⁴ Wejt jilanacaž werar Yooz takucama kamñipan zizcu, anchal cuntintučha wejrqui. Anaž čjulumi wejr juc'ant cuntintu cjiskatñiqui žejlčha.

⁵ Jila, walikam am paačha, jilanaca yanapcan, ana pajta jilanacami.

⁶ Yekjap amiž yanaptanacaqui iclizquiz mazzičha, tuž cjan:

—Nii Gayo cjita jilaqui ancha zumačha. Ana pajta jilanacami yanapñipankazza. Nižaza okzñipankazza.

Gayo jila, jalla nužupan amqui tira yanapaquičha. Jilanacaž jiczquin okanami yanapz waquizičha. Jalla niic walikazza; jalla nuž cjenauqui Yooz kuzqui wali cuntintuž cjequičha.

⁷ Nii jilanacaqui Yooz sirwican ojklayñičha. Ninacaqui ana Yooz criichinacžquiztan ana čjul yanapñimi pecñičha.

⁸ Jaziqui učumqui nii Yooz sirwiñi jilanaca yanapz waquizičha, ninaca werar Yooz taku parlajo.

DIOTREFES CJITAQUI ANAWALI PAAÑIČHA

⁹ Tuquiqui iclizquin cjjirchinčha. Tsji žoñiqui weriž cjjirta anaž nonz pecčha. Wejrqui icliz jiliritčha. Pero nii žoñiqui anaž wejr jilirižtaka nayčha. Diótfes cjita tjuuchizza nii žoñiqui. Niikaz jilanaca juc'antiž mantiz pecčha.

¹⁰ Wejrqui ančucaquin tjonachaj niiqui, jalla nekztan nii žoñiž anawali paatanaca paljayačha ančucaquiz. Nii Diotrefesqui toscanaca parličičha wejtnaca quindra. Iya anawalinaca paachizakazza. Nižaza jilanacaž tjonznunami, ana risiwz pecñičha. Yekjap criichinacazti wali quiyas pecčha. Nii Diótfeszi cjiñičha:

—Anapanž nii jilnacžtan zumaž risiwaquičha.

Nižaza zuma risiwñi jilanaca iclizquiztan chjatkatñičha.

¹¹ Jila, jaziqui anačha nižta cjisqui. Nii žoñiž paatanaca ana yatekaza. Amzti, walikam paačha. Jakziltat walinaca paačhaja, jalla niiqui Yooz cherchi kuzziz kamčha. Jakziltat anawalinaca paačhaja, jalla niiqui anaž Yooz pajčha, ana Yooz cherchi kuzzizza.

DEMETRIO CJITAQUI WALI PAACHA

¹² Tjappach žoñinacaqui Demetriuž puntu cjičha:

—Zumačha nii Demétrio cjita jilaqui. Niž paatanacami werar tawk jarupankazza.

Nižaza wejrnacmi chiyučha, Demetriuqui zuma jilačha, nii. Ančhucqui zizza, wejrnacqui werar takul chiyiñčha, nii.

¹³ Zumsira wacchi takunacaqui wejta žejlčha cjjirzjapa. Pero tii cartiquiz anal iyal cjjirz pecučha.

¹⁴ Wajilla amquin tjonzquiz pecučha. Jalla nekztan učumporaž palt'auquičha.

¹⁵ Llan kuzziz cjee. Tekzta jilanacaqui saludos apayžquičha. Nižaza amqui wejtnaca jilanacžquiz tsaanzinaquičha, zapa maynižquiz. Jalla nužukazza.

LA CARTA DEL APOSTOL SAN JUDAS

¹ Wejr Judasqui Jesucristuž manta payiñ zoñt'cha nižaza Jacobž lajk'cha. Wejrqui ančhucaquin cjiřzcučha. Yooz Ejpqui ančhuc kjawzičha, niž maati cjejayo. Nižaza Yooz Ejpqui ančhucatan zuma munazičha. Nižaza ančhuc anawalnacqiztan cuitičha, Jesucristuž tjonzcama.

² Yoozqui ančhucaquiz juc'antej okžla, nižaza juc'ant walikaj kamkatla, nižaza ančhucqui Yooziž ancha munasitaj cjila.

TOSCARA TJAAJIÑINACŽ PUNTU

³ Pecta jilanaca, cullaquinaca, wejrqui ančhucaquin anchal cjuñchinča. Jalla nuž cjuñžcu liwriiñi puntuquiztan ančhucaquin anchal cjiřz pecučha. Ančhucatan wejtta liwriita zoñinacačha. Anawal tjaajiñinacž ančhucaquiz incallz pecchiž cjen tii cartal urgente apayžcačha, ančhucaquiz čhižinzjapa. Yoozquin kuz tjaaz puntu werara tjaajintatačha. Tsjemata tjaajintanacaqui anačha werara niiqui. Werar tjaajintanacžquizkaz tjurt'iñi kuzziž cjee.

⁴ Yekjap ana lijitum criichi zoñinacaqui ančhucaquiz jamazit luzzičha, ana kjanapacha. Ninacaqui ana wal zoñinacačha. Yooz partiquiz luzcu, Yooz okžni kuz tsjii kjutñi intintazza. Ninacaqui cjiñičha, "Yoozqui učhum okzpančha, jaziqi čhjul paatami walikazza". Jalla nuž kamcan učhum Jesucristo Jiliržquiz anapan pajčha. Pero criichi zoñinacž pajk Patrunačha Jesucristuqui. Yekjat ana iya želasacha. Jaziqi ninacaqui Yooz kamañquiz anapan kamčha. Tuquiqui profetanacaqui nižta kamañinacž puntuquiztan cjiřrčičha, "Yoozqui ninacžquiz casticaquičha", jalla nuž cjican.

⁵ Ančhucaž zizziž cjenami, ančhucaquiz zumpacha cjuñkatž pecučha tii puntuquiztan. Tuqui Yooz Jiliriqui Egipto yokquiztan Israel wajtchiz zoñinaca jwessičha. Nekztan jwessiž cjenami ana criichinacžquiz ticzkatchičha.

⁶ Nižaza tii cjuñzna. Yekjap anjilanacaqui Yooziž tjaata puesto ana iya wacaychiz pecchičha, nižaza arajpach puestuquiztan zarakchičha. Jalla nižtiquiztan Yoozqui ninaca presužtakaz čhjelinča. Wiñayjapa zumchiquiz chawcetažtakaz žejlčha Yooz pajk pjalz tjuñcama.

⁷ Nižaza Sodoma wajtquiz žejlñinacami Gomorra wajtquiz žejlñinacami, nižaza žcatinta wajtquiz žejlñinacami jalla nii ana wal anjilanacažtapacha ancha uj paachičha. Ninacaqui adulteriuquiz ojklayčičha. Nižaza tsjemata adulterio paachičha. Jalla nižtiquiztan Yoozqui ninaca casticchičha, wiñaya infernuquin. Jalla nuž kjanapacha čhiičha, Yoozqui ana walinaca casticspančha, jalla nii.

⁸ Jalla nii Yooz casticž puntu zizcumi, ana zuma tjaajiñi zoñinacaqui chjuužta jaru ojklayčha, "Yoozqui nižta wejtquiz tjaajinčičha, tsjii chjuužtiquiz" cjican. Nekztan adulteriuquiz ojklayčha, nižaza Yooz Jiliriz mantita anaž cassa, nižaza poderchiz zajranacžquiz ararčha. Jalla nuž chjuužta jaru anawali kamčha.

⁹ Tsjii pajk arcángel Miguel cjita žejlčha, walja poderchiz. Jalla nii anjilaqui diablužtan ch'aassičha Moisés curpu puntuquiztan. Jalla nuž ch'aascan, Miguel anjilaqui diablužquiz ana ararchičha; "Casticta cjee", cjican. Antiz tiikaz čhiičha, "Yooz Jiliriqui amquiz ujžla". Jalla nižtakaz čhiičha.

¹⁰ Pero nii ančhucatan kamañi anawali zoñinacaqui ana intintazñi kuzzizza. Poderchiz zajranacž quintra čhiican, chjaawjkatčha. Animalažtakaz persun kuzcamakaz ojklayñičha. Jalla nuž ojklaytquiztan persunjapa casticu zjičča.

¹¹ Ninacžtaqui ana wali cjequičha. Cainž irata Yooz kamañquiz ana kamz pecčha. Paaz ganz peccu, Balaam irata tsjii kjutñi ojklayčha. Nižaza Corež iratažtakazza casticu zjičča. Korequi Yooz uchta zoñinacž quintra paažcu ticzičha.

¹² Ančhucqui Yooztjapa pijstanaca paacha. Ančhucaž cristian pijjsta paan, ninacaqui azipančha ančhucalta. Pjijstiquiz ancha anazuma lujlñi, nižaza licñi, nižaza ana zuma kamañičha. Ninacačha Yooz ana rispitñiqui. Persunjakaz importičha. Anačha yanapchuca, ančhucaž zuma kamajo. Ninacaqui ana chijñichiz tsjirižtakazza, nižaza tjamiž chjichta tsjirižtakaz. Nižaza ninacaqui anazuma frutchiz muntinacžtakaz. Cajlžta muntinacžtakaz, žejtz wira anapan žejlčha ninacžtaqui.

¹³ Tjamiž chjichta kjaz ljojkinacžtakazza. Ninacaž azzuca paatanacaqui kot anazum ch'utunacžtakazza. Nižaza ninacaqui tsjii kjutñi pertissi warawaranacžtakazza. Anawal zumchiquiz wiñayjapa castictaž cjequičha. Casticta cjisjapa, nii anawal tjaajiñinacaqui chjojtačha.

¹⁴ Tsjii zoñiqui Enoc cjitatača. Adanžquiztan pakallak wilta majchmajchquiztan tjonñitača. Jalla nii Enocqui Yooztajapa chiichiča tuž cjan: “Yooz Jiliriqiu warank warank anjilanacžtan tjonacquiča, tjapa zoñinaca pjalzjapa.

¹⁵ Jalla nuž pjalžcan Yooz Jiliriqiu tjapa anawal zoñinacž ujnaca tjeznaquiča; tjapa ninacaž anawali paatanaca tjeznaquiča. Nižaza Yoozqui tjapa niž quintra anawali chiitanaca tjeznaquiča”. Jalla nuž mazinchiča Enoc cjitaqui.

¹⁶ Nii anawali zoñinacača quijakaz pecñinacaqui. Nižaza iñarcan chuchkaz pecñinaca; nižaza ninacaž kuz pecta jaru ojklayñiča. Nižaza mitarazzi takunacžtan chiñiča. Nižaza zoñinacž kuz wali cjisjapa chiñiča, nii zoñinacžquiztan cusasanaca ganzjapa.

CRIICHI ZOÑINACŽQUIZ CHIIZINTA TAKU

¹⁷⁻¹⁸ Pecta jilanaca, cullaquinaca, jalla tii puntuquiztanž cjuñzna. Učhum Jesucristo Jilirž apostolonacaqui ultim timpu puntuquiztan ančhucaquiz mazinchiča, tuž cjan; “Ima tii muntu tucuzinžnan, anawal zoñinacaqui jecžnaquiča, Yooz kamañ puntunacž quintra chiican. Ninacaqui persun anawal pecta kamañ jaru kamaquiča”. Jalla nuž mazinchiča apostolonacaqui.

¹⁹ Jalla nižta anawali zoñinacaqui zoñi t'akñiča, nižaza porapat quintra tanaskatñiča. Yooz Espiritu Santuqui ninacž kuzquiz ana žejlča. Ninacaqui persun kuzcamakaz kamča.

²⁰ Pecta jilanaca, cullaquinaca, Yooz puntunaca tjaajintanacžquiz tjurt'iñi kuzziz cjee. Nižaza Espiritu Santuž aztan Yoozquin mayiza, juc'ant zuma kamañchizpan cjisjapa.

²¹ Nižaza zuma kama, Yooz ančhucatan tira zuma munazizjapa. Nižaza učhum Jesucristo Jilirž tjonz tjuñi tjewžna. Nii tjuñquiziqui Jesucristuqui niž okzñi kuzziz cjen arajpachquin Yooztan wiñaya kamñijapa ančhucaquiz cjiskataquiča.

²² Turwayzi kuzziz zoñžquiz zumpacha paljaya, zuma tjaajintanacžquiz tjurt'iñi kuzziz cjisjapa.

²³ Infiernuquin tjojsnak cjenpacha kjawžna, liwriita cjisjapa. Nižaza ujšiz zoñinacžquiz okzñi kuzziz cjee. Anawal zoñinacžquiz okžcan, persun kuzquiz cuitasaquiča, zuma kamañquiztan tsjii kjutñi ana chjitchta cjisjapa. Ančhucqui ana zuma kamañchiz zoñinacžtan ojklaycan nižta ana zuma kamañchiz cjesača. Jalla nižtiquiztan anawal zoñinacžquiz okžcan, cuitasa ninacž irata ana cjisjapa.

²⁴⁻²⁵ Yoozqui zinta Yooza. Niiča Jesucristo Jilirž cjen učhum Liwriiñiqui. Niiča ancha azzizqui, učumnaca cuitizjapa, nižaza ančhuc ana ujšiz tjojtzjapa, nižaza niž yujcquiz ana ujšiz prisintizjapa. Jalla nekz, Yooz yujcquiz žejlcan, ančhucqui ancha cuntintuž cjequiča. Anztajapami wiñayajapami Yoozqui honorchizkaj cjila, nižaza niž arajpach watjaqui zumapaj cjila, nižaza tjapa azzizkaj cjila, nižaza tjapa mantiñej cjila. Jalla nužoj cjila. Amén.

APOCALIPSIS O REVELACIÓN A SAN JUAN

¹ Yoozqui tii liwruquiz cjiirta puntunaca Jesucristužquiz mazinchiča, Jesucristo niiz sirwiñi žoñinacžquiz maznajo. Tii puntunacaqui waji wataquiča. Jesucristuqui niiz sirwiñi Juanžquin anjila cuchanzquichiča, tii liwruquiz cjiirtanaca zizta cjeajajo.

² Wejr Juanqui tjapa nii zizta puntunacžquiztan cjiiruča, jaknužt wejr nii zizzinžlaja, jalla nužupan. Jaziqiu Yooz takumi nižaza Jesucristuž maztami chiyuča. Nižaza tjapa weriž chertanacami chiyuča. Tjappacha werarapan cjiiruča.

³ Jakziltat žoñinacžquiz tii Yooziž tjaata takunaca liičhaja, jalla niiqui cuntintuž cjequiča. Nižaza jakziltat tii Yooziž tjaata takunaca nonžaja, nižaza niiz jaru kamčhaja jalla niiqui zakaz cuntintuž cjequiča. Tii puntunaca cumplis timpunaca žcatžinžquiča.

JUANQUI ICLIZANACZQUIN CJIJRCHA

⁴ Wejr Juanqui pakallawk Asia yokquin žejlñi iclizanacquin cjiiruča. Yoozqui ančhucacžquiz zumpachaj yanapt'ila, nižaza Yoozqui ančhucacžquiz walikaj kamkatla. Yoozqui tuquitanpachami anzimi jaztanami wiñayjapa tirapan žejlča. Yooz mantiz julz yujcžquiz pakallawk zuma ispiritunaca žejlča. Ninacaqui ančhuc walikaj kamkatla.

⁵ Nižaza Jesucristuqui ančhuc walikaj kamkatla. Jesucristuča lijitum chiiñiqui. Nižaza primir ticziquiztan jacatatchi žoñiča. Nižaza Jesucristupanča tjapa tii muntuquiz žejlñi mantiñi reynacžquiz mantiñiqui. Cristuqui učum ancha okziča. Nekztan učum ujnacžquiztan ticziča. Jalla nuž ticžcu, učum liwriičhaja, niiz ljok tjawkchiz cjen.

⁶ Nekztan Jesucristuqui učum utchiča, nižtan chicapacha mantiñijapa, nižaza Yooz Ejpžquiz rispiñijapa. Jalla nii Jesucristuqui wiñayjapa honorchiz cjila. Nižaza wiñayjapa mantiñej cjila. Jalla nužoj cjila. Amén.

⁷ Cjuñzna. Tsjii noož Jesucristuqui tsjir taypiquiz tjonaquiča. Jalla nuž tjonan tjapa žoñinacaqui nii cheraquiča; Jesucristo quintra paañi žoñinacami nii zakaz cheraquiča. Nekztanaqui tjapa wajtchiz ana criiñi žoñinacaqui kaaquiča, ninaca casticz ora tjonchiz cjen. Jalla nužoj cjila. Amén.

⁸ Yooz Jiliriqui tuž cjiča: “Wejrčha primirquiztan tjappacha kalltichintqui. Nižaza wejrčha tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitčha wejrqui tjappachtajapa”. Jalla nuž cjiča tjapa aztan mantiñi Yooz Jiliriqui. Niiqui anzimi, tuquitanami, jaztanami žejlča.

⁹ Wejr Juanqui ančhucacquin cjiiržcuča. Wejrqui ančhuc jiltčha, Jesucristužquin kuz tjaatiquiztanaqui. Učhumqui Yooz mantuquiz kamchiz cjen, sufričha. Pero čjul sufritam žejlčhaja, Jesucristuqui učumnacžquizimi pasinsis kuzziz cjskatčha. Wejrqui kot taypiquiz kolta yokquiz želuča, Patmos cjita tii yoka. Jalla ticju preso želuča, Yooz taku parlitiquiztan, nižaza Jesucristuž puntuquiztan maztiquiztan.

JESUCRISTUZ CERTA

¹⁰ Tsjii Yooz tjuñquiziqui Yooz Espiritu Santuqui wejt kuzquiz ancha tjonchiča. Tjonžcu jalla tii watchiča. Tsjii alto jora nonzinčha wir kjutñi, trompetž pekž joražtakaz nonzinčha.

¹¹ Nii joraqui tuž cjičičha:

–Wejrčha primirquiztan tjappacha kalltichintqui. Nižaza wejrčha tjappacha mantiñtqui. Jaknužt tsjii litraqui “A”quiztan kallantičhaja, nižaza “Z”quin žerzaja, jalla nižtitčha wejrqui tjappachtajapaqui”. Jaknužt amqui cheračhaja, jalla nii chertanaca cjiira. Nekztan nii libro pakallawk iclizanacquin apaya, Efeso iclizquin, nižaza Esmirna iclizquin, nižaza Pergamo iclizquin, nižaza Tiatira iclizquin, nižaza Sardis iclizquin, nižaza Filadelfia iclizquin, nižaza Laodicea iclizquin. Jalla nii Asia cjita provinciquin žejlñi iclizanacquin nii cjiirtaqui apaya.

¹² Jalla nekztanaqui wir kjutñi kjutzinčha cherzjapa, jectpan nižta paljayzqui, nuž cjan. Jalla nuž kjutžcu tsjii pakallawk kor cantilero cherzinčha.

¹³ Nii cantiler taypiquiz tsjii žoñižtakaz tsijtchi želatčha. Niiqui tol zquitchiztača, nižaza quecquiz tsjii pal kor sinturunchiztača.

¹⁴ Nižaza niiz ach charami chiwitača, čiw chomažtakaz, nižaza čiw kjatñižtakaz. Niiz čhjujcuquinacaqui ujžtakaz c'ajatčha.

¹⁵ Niiz kjojchanacaqui zuma llijatčha jurnuquiz tjiñanta korižtakaz. Niiz joraqui wacchi kjaz pujquiz kjawñižtakaztača.

¹⁶ Niiz žew kjarquiz pakallawk warawaranaca tanzitača. Niiz atquiztan pajk ar cuchillužtakaz ulnatčha, porap kjuttan archiz. Niiz yujcqui zmali tjuñižtakaz c'ajatčha.

¹⁷ Jalla nii cheržcu, niiz kjojchquiz tjojtsinča, ticziřtakaz. Niizti wejr lanziča žew kjaržtan. Jalla nuž lanžcu tuž cjichiča:

—Wejr ana eksna amqui. Primirquiztanpacha asta wiricama zeluča. Wejrtča juc'ant chekanaqui tjappachquiztanami.

¹⁸ Wejrtča žetiřtqui. Wejrqui ticzinča. Pero wejtquiz chernza. Wiřayjapa žetuča. Nižaza wejrqui mantuča ticzmi, nižaza ticz yokami.

¹⁹ Jaziqui cjiiraquiča jaknužum cherčhaja, jalla nii. Cjiiraquiča tii timpu watchinacami, nižaza jazta timpu tjonanami, nii.

²⁰ Wejt žew kjarquiz pakallawk warawaranaca žejlča. Jalla nii cherchamča, nižaza pakallawk cantilerunaca cherchamča. Ninaca tuž cjiča: nii pakallawk warawaranacaqui pakallawk iclizanacž irpiřinacača. Nii pakallawk cantilerunacaqui pakallawk iclizanacača.

2

EFESO ICLIZQUIZ CHIITA TAKUNACA

¹ Efeso icliz irpiřizquin tuž cjiira: “Tsjiiqui žew kjarquiz pakallawk warawara tanža, nižaza pakallawk kor cantiler taypiziqui ojklajča. Jalla niiqui tuž cjiča:

² Ančucaž paatanacami pajuča. Ančucqui wejtajapa anča langža. Nižaza sufrichiz cjenami ančucqui tjurt'iři kuzzizza. Nižaza ančucqui ana zum kamařchiz žořinaca ana cherz pecča. Nižaza jakziltat 'apostultča wejrqui' cjan ojklajčhaja, jalla ninaca wawczinčucčha ančucqui, werara ana werara jalla nii. Jalla niřtquiztan jecnacat ana werar apóstol ojklajčhaja, jalla nii zizzinčucčha.

³ Wejrqui zizuča, ančucqui pasinsis kuztan sufričha, wejtquiz criican. Nižaza wejtquiz kuzziz cjen walja awantichinčucčha. Nižaza wejtajapa walja langzinčucčha, ana oča nayžcu.

⁴ Pero tsjii ujchizza ančucqui. Jaknužt ančucqui primero tjapa kuz wejtta anča munazitčhaja, jalla niřta ana tira munaziča. Anz wejtta upa munaziča.

⁵ Cjuřzna, jaknužt ančucqui primero anča zuma munaziři kuzziz cjiřtčhaja. Nižaza cjuřzna jaknužt anziqui upa munaziři kuzziz cjiřtčhaja. Jalla nii cjuřzcu, 'ujchizpantčha wejrqui' cjis waquiziča. Nekztan wilta anča zuma munaziři kuzziz cjee, wilta zuma kamzjapa. Ana wilta zuma munaziři kuzziz cjequiz niiqui, am cantileruqui kjařtaž cjequiča; nekztan ančuca icliza tjtanta cjequiča.

⁶ Pero ančucaltajapa tsjii zuma obra žejlča, ančucqui ana wal nicolaítas parti žořinacž quintrajapa chjaawjkatčha, jalla nii. Wejrqui ninacž quintrajapa zakal chjaawjkatuča.

⁷ Jakziltat nonži cjuřchiz cječhaja, nonžla Espiritu Santuž iclizziz žořinacžquiz čhiitaqui. Jakziltat anawalinacquiztan atipačhaja, jalla niřzquiz wejrqui permiso tjaa-ača, žeti tjaaři muntiquiztan lulajo. Yooz zuma yokquin žejlča nii zuma muntiqui”.

ESMIRNA ICLIZQUIZ CHIITA TAKUNACA

⁸ Esmirna icliz irpiřizquin tuž cjiira: “Tsjiiqui primirquiztanpacha wiricama žejlča. Jalla niičha juc'ant chekanaqui tjappachquiztanami. Niiqui ticziča, nižaza wilta žejtři cjiřsiča. Jalla niiqui tuž cjiča:

⁹ Wejrqui zizuča, ančucqui anča sufričha, nižaza t'akjiri žejlča. Pero riacužtakazza ančucqui, Yooz wajtchiz žořinacž cjan. Judío žořinacaqui ančuca quintra anča anawal takunaca čhiičha. Ninacaqui anača ultim werar judionacaqui. Ninacača Satanás diabluz partiquiziqui.

¹⁰ Jaknužt ančucqui sufračhaja, nuž sufrisquiztan ana tsuca. Cwitas, diabluqui yek-japanaca ančucaquiztan carsilquiz chawckataquiča, ančucaž ujquiz tjojtskatzjapa. Ančucqui tunca tjuři intiru anča sufraquiča. Ticzcama wejtquiz tjurt'iři kuzziz cjee. Nekztanaqui wejrqui ančucaquiz wiřayjapa žeti tjaa-ača, tsjii premiužtakaz.

¹¹ Jakziltat nonži cjuřchiz cječhaja, jalla niiqui nonžla, Espiritu Santuž iclizziz žořinacžquiz čhiitaqui. Jakziltat ana walnacquiztan atipačhaja, jalla niiqui infiernuquin castictiquiztan liwriřtaž cjequiča. Infiernuquin casticzqui curpumi animumi wiřaya sufričha. 'Piz ticz' cjetača nii infiernuquin sufrisqui”.

PERGAMO ICLIZQUIZ CHIITA TAKUNACA

¹² Pergamum icliz irpiřizquin tuž cjiira: “Tsjiiqui porap kjuttan ar cuchillužtakaz žejlča. Jalla niiqui tuž cjiča:

¹³ Wejrqui pajuča, tjapa ančucaž paatami. Jakziquin Satanás diabluqui mantičhaja, jalla nicju ančuc žejlča. Jalla niřta žejlchiz cjenami tīrapanž wejtquiz tjurt'iři kuzzizza. Wejtquin kuz tjazquī ana jaytiča, anča sufrichiz cjenami. Nii anča sufris timpuquiz tsjiiqui ančucaquiztan Antipas cjetaqui contataquiča. Antipasquī wejt puntuquiztan

tisticu cjecanaqui zuma ticlarñicha, nižaza wejtquiz kuz tjaañipanča. Jakziquin Satanás diablucui mantičhaja, jalla nicju Antipas contataquiča.

¹⁴ Nonžna; tsjii kjaž ujnaca ančhucž quintra tjeeznuča. Yekjap ančhucacuiztan anawal tjajintanaca catokchinčhucča. Nii tjajintanacaqui Balaamž cjita tjajintažtakazza. Tuquita timpucui nii Balaamqui Balak cjita zoñžquiz tjajziča, jaknužt Israel zoñinaca ujqviz tjojskatchucažlaja, jalla nii. Nekztanaqui Balak cjitaqui Israel zoñinaca ujnacquiz tjojskatchiča. Jaziqui Israel zoñinacaqui adulterio paachiča, nižaza zoñiž paata yooznacquiz tjata čhjeri lujlchiča. Jalla nižta ujnacquiz tjojskatchiča Balak cjitaqui.

¹⁵ Nižaza yekjap ančhucacuiztan nicolaítas tjajintanaca catokchinčhucča. Ninacž tjajinta quintrajapa čhaawjkatuča.

¹⁶ Ančhucadž anawali ujnaca paatiquiztan ‘ujchizpantča’ cjis waquziča; kuz campiiz waquziča. Ujnacquiztan ana jaytaquiz niiqui, ančhucqui castictaž cjequiča. Wejrqui ančhucacuiz wajilla tjonacha, ujchiznacž quintra paazjapa. Wejt atquiztan ulanñi ar cuchillžtan ninacž quintra paa-ača.

¹⁷ Jakziltat nonžni cjuñchiz cječhaja, nonžla, Espiritu Santuž icliz zoñinacžquiz čhiitaqui. Jakziltat anawalinacquiztan atipačhaja, jalla nižžquin ana pajta maná tjaa-ača, lujljapa. Nižaza nižžquin tsjii čhiw maz tjaa-ača. Nižaza čhiw mazquiz niž ew tjuu cjiřtaž cjequiča. Nii ew tjuuqui ana jakziltami zizza, nii tanzñi zoñikaz zizaquiča”.

TIATIRA ICLIZQUIZ CHIITA TAKUNACA

¹⁸ Tiatira icliz irpiñizquin tuž cjiřa: “Tsjiuqui žejlča, ujtakaz c’ajñi čhujcchiz, nižaza niž kjočhanacaqui jurnuquiz tjiñanta korižtakazza. Jalla niiča Yooz Majchqui. Niiqui tuž cjiča:

¹⁹ Wejrqui ančhucadž paatanacami pajuča. Ančhucqui zuma munaziñi kuzzizza, nižaza wejtquiz tjapa kuztan criiča, nižaza wejtquiz tjapa kuztan sirwiča, nižaza pasinsis kuztan sufriča. Ančhucadž primir paata obranacquiztan ančhucadž anza paata obranaca juc’ant zumača.

²⁰ Wejrqui cjiwča, tii ujchizza ančhucqui. Tsjaa anawal maataka žejlča, Jezabel cjiti maatakažtakaz. Naaqui cjiñča, ‘Wejrtča Yooz taku parliñtaji’. Jalla nuž cjecan, wejtquiz sirwiñinacžquiz incallča. Naaža incalltiquiztanaqui criiči zoñinacaqui adulteriuquiz ojklajča; nižaza zoñiž paata yooznacquiz tjata čhjerinaca lujlča. Jalla nuž ana zuma tjajjan, ančhucqui naaža puntuquiztan ana kjaž cjiñčhucča. Pero nii anawal tjajintaž quintra čhiž waquziča.

²¹ Wejrqui pasinsis kuz tjewzinča, naaqui ‘ujchizpantča’ cjecan ujnacquiztan jaytizjapa. Pero naaqui uj paaznacquiztan anapan jaytiz pecča; uj paaz pecča.

²² Jalla nižtiquiztan naa sufriskatača. Nižaza jakziltat naatan čica wejt quintra ujnaca paačhaja, jalla ninacazakaz anča sufriskatača. Naaža tjajinta anawalinaca paazquiztan ana jaytaquiz niiqui, panž sufriskattaž cjequiča.

²³ Naa irat ana zum kamañchiz zoñinaca conača. Jalla nekztan tjapa iclizanacquiz žejlñi zoñinacaqui naaznaquiča, wejrqui čjul zoñiž kuzquiz pinsitami zizuča. Nižaza paata obranacquiztan jama zapa maynižquiz zumanacal tjaa-ača.

²⁴⁻²⁵ Parti ančhuc Tiatir criičinacaqui naaža tjajinta ana catokchinčhucča. Satanás diabluz čhojzaka tjajintanaca ana mitisñi cjišsinčhucča. Ančhucacuiz tuž cjiwča, jaknužt ančhucqui wejt tjajintanaca catokčhaja, jalla nižta tirapan catokaquiča, wejt tjonzcama. Ana iya mantuča.

²⁶ Jakziltat anawalinacquiztan atipčhaja, nižaza tii muntu tucuzincama wejt muñañpi jarupanž kamčhaja, jalla nižžquiz wejrqui mantiz poder tjaača nacionanacchiz zoñinacžquiz mantizjapa.

²⁷ Jaknužt wejt Yooz Ejjpqui mantiz poder wejtquiz tjaatčhaja, jalla nižta irata wejrqui mantiz poder ninacžquiz tjaa-ača. Jalla nižtiquiztan ninacaqui anawali paañi zoñinacžquiz zuma c’aripacha mantaquiča, tsjii ljoc mazca t’unapacha kjolsnas, jalla nižta.

²⁸ Nižaza wejrqui ninacžquiz zumanacal tjaa-ača wenzta chawc warawaražtakaz.

²⁹ Jakziltat nonžni cjuñchizlaja, jalla niiqui nonžla, Espiritu Santuž icliz zoñinacžquiz čhiitaqui”.

3

SARDIS ICLIZQUIN CHIITA TAKUNACA

¹ Sardis icliz irpiñizquin tuž cjiřa: “Tsjižta pakallawk Yooz ispiritunaca žejlča, nižaza pakallawk warawaranaca žejlča. Jalla niiqui tuž cjiča: Ančhucadž paata obranaca pajuča. Zoñinacaqui ančhuc puntuquiztan cjiñiča, ‘Zuma kamañchizza’ cjiñiča. Jalla nuž čhičhiz cjenami, ultimu ana zum kamañchizza; ticzižtakazza ančhucqui.

² Ančhucqui ana zuma kamañanaca eca. Zuma kamañquiz tjurt'iñi kuzziz cjee. Tira anawali kamañchizlaj niiqui, castictaž cjequiča. Wejrqui ančuca paata obranaca yatis-inzinča, Yooz yujcquiz anawaliča, ni.

³ Cjuñzna ančhucqui, tuqui catokta tjaajintanacami, nižaza nonztanacami panž catoka. Jaziqui nii jaru wilta zumanap kama; nižaza ančuca ujnaca paaznacquiztan jayta, 'ujchizpantča', cjican. Ančhucqui ana zuma kamañquiztan ana ecaquiz niiqui, castictaž cjequiča. Wejrqui tiripintit tjonacha, tsjii tjañiztakaz. Ana pinsita orquiz tjonacha, ančhuc casticzjapa.

⁴ Tsjii kjaž ančhuc Sardis zoñinacaqui zuma kamañchizza. Ančhucča zuma ana ch'izlli zquitchiztakazqui. Jalla nižtiquiztan ančhuc zuma zoñinacaqui wejtta chicaž juc'ant zuma kamaquiča zuma chiw limpu zquitchiztakaz. Jalla nuž waquiziča ančhucaltaqui.

⁵ Jakziltat anawalinacquiztan atipačhaja, jalla ninacaqui zuma kamañchiz cjequiča zuma chiw limpu zquitchiztakaz. Nižaza ninacž tjuunaca anal akznača zejtni zoñinacž tjuu apuntita liwruquiztan. Nižaza wejt Yooz Ejpž yujcquiz, nižaza Yooz anjanlacž yujcquiz ninacž puntuquiztan ticlaracha, 'Wejt partiquizza tinacaqui' cjanaqu.

⁶ Jakziltazlaja nonžni cjuñchiz, nonžla, Espiritu Santuž icliz zoñinacžquiz chiitaqui".

FILADELFIA ICLIZQUIZ CHIITA TAKUNACA

⁷ Filadelfia icliz irpiñizquin cjjira: "Tsjiča juc'ant zumaqui; nižaza lititumača. Niča David jilirž mantiz poderchizqui. Nii zoñiqui Yooz partiquiz luzkatasaz niiqui, anaž jecmi nii zoñiz luztiquiz atajasača. Nižaza Yooz partiquiz ana luzkatasaz niiqui, anaž jecmi luzkatasacha. Jalla niiqui tuž cjiča.

⁸ Wejrqui ančucaž paata obranaca pajuča. Ančhucaltajapa trabajo tjaachinča wejtta langzjapa. Anaž jecmi ančhuc atajasača. Ančhucqui ana suti azzizza. Jalla nuž ana zuti azziz cjenami, ančhucqui wejt taku tirapanž catokchinčhucča, nižaza ančhucqui wejt puntuquiztan ana k'otchinčhucča, 'Jesucristo anal pajuča' cjanaqu.

⁹ Nonžna. Yekjap zoñinacaqui cjiñiča, 'Wejrnačča Yooztajapa judío zoñinacaqui'. Jalla nuž chiican, k'otča. Ultimu ana Yooztajapača nii zoñinacaqui. Pero Satanás diabluz partiquiz kamñi zoñinacača. Nonžna. Wejrqui ančuca yujcquiz ninaca quillskatača, ančucaquiz rispitzjapa. Nižaza wejrqui ninaca zizkatača, ančhucatan wejtta zuma munaziz, jalla nii.

¹⁰ Wejt mantita ortin jaru kamcan, ančhucqui pasinsis kuztan sufrichinčhucča. Jalla nižtiquiztan wejrqui ančhuc liwriyača juc'ant sufris timpuquiztanaqui. Nii timpuqui tjonaquiča. Nekztan tjapa nii muntuquiz Zejlñi zoñinacaqui ancha sufraquiča, wawczta cjisjapa. Jalla nii sufris timpuquiztan ančhuc liwriyača.

¹¹ Nižaza wejrqui wajillal tjonacha. Yooz tjaajintanaca tirapan catokaquiča. Nekztan Yoozqui ančucaquiz zumanaca tjaaquiča, tsjii zuma premiužtakaz. Ančhucqui ana jec zoñquizimi tsjii kjutni irpiskataquiča nii zumanaca ana pertisnajo.

¹² Jakziltat anawalinacquiztan atipačhaja, jalla nižquiz uchača Yooz kjuyquiz jiliriztakaz. Nižaza nii zoñinacaqui Yooz kjuychizpan cjequiča. Wejt Yooz Ejpž tjuu nižquiz cjjiržinača, Yooz kjuychiz zoñipan tjeezjapa. Nižaza wejt Yooz Ejpž wajtž tjuu nižquiz cjjiržinača. Wejt Yooz Ejpž wajtž tjuuquiz ew Jerusalén cjiča. Yoozqui arapachquiztan nii watja chjijunžcaquiča. Nižaza wejt ew tjuu nižquiz cjjiržinača, wejt jila cjican.

¹³ Jakziltazlaj nonžni cjuñchiz niiqui, nonžla, Espiritu Santuž icliz zoñinacžquiz chiitaqui".

LAODICEA ICLIZQUIN CHIITA TAKUNACA

¹⁴ Laodicea icliz irpiñizquin tuž cjjira: "Tsjiča juc'ant lititumaqui. Jalla niiqui zuma razunžtanpan litituma chiča Yooz puntu. Primirquiztanpacha niž cjen tjapa Yooz paatanaca paatača. Jalla niiqui tuž cjiča:

¹⁵ Wejrqui ančucaž paata obranaca pajuča. Ančhucqui ana ancha wejt quintra paachinčhucča, nižaza ana ancha wejtajapa paachinčhucča. Wejrqui pecuča, ančhucqui ancha wejt quintra paazjapa, už ancha wejtajapa paazjapa, jalla nuž pecuča.

¹⁶ Jaziqui ana zumača ančuca kamzqui. Jalla nižta kamtiquiztan ančhuc chatkatasacha, tsjii ana zuma jottažokaz.

¹⁷ Ančhucqui cjiñčhucča, 'Ricachutča wejrnaqu. Jaziqui walikal želuča, ana čjulumi pecuča'. Jalla nuž cjiñčhucča. Jalla nuž chiichiz cjenami ančhucqui ana naazinčhucča, t'akjirižtakaz ančhucqui, nižaza poriztakaz, zur zoñinacžtakaz, nižaza ana zquitchiz zoñinacžtakazza. Ultimu nižta kamañchizza ančhucqui.

¹⁸ Jalla nižtiquiztan wejrqui ančucaquiz chiižinuča, wejtquiz kuzziz cjeyajajo. Ujquiz tjiñanta korižtakaz jalla nižta c'achja kamaña ančhucqui wejtquiztan mayz waquiziča, ultim ricachu cjisjapa. Nižaza chiw zquitinacžtakaz jalla nižta zuma kamaña wejtquiztan mayz waquiziča, ančuca azucca ujnaca ana cherta cjisjapa. Nižaza čhujc kullažtakaz

wejtquiztan mayz waquizicha, ančhuca ujnacquiztan čhetinta cjisjapa, nižaza ančhuc Yooz puntu intintiñi cjisjapa.

¹⁹ Jakziltiztan wejrqui zuma munazichaja, jalla niizquiz chiižinacha. Nižaza zuma ewit'ucha, niiz kamaña azquichta cjeajo. Jalla nižtiquiztan weriž chiižintiquiztan, ančhucqui 'ujchizpantča' cjis waquizicha. Nižaza wejtquiz tjapa kuztan cjis waquizicha.

²⁰ Nonžna. Wejrqui ančhuca kuzquiz macjatžcu, kjawnuča. Jakziltat weriž kjawžta nonžaja, nižaza cazaja, jalla ninacž kuzquiz luzasacha, nižaza ninacžtan chica zuma cjeeča. Nižaza ninacaqui wejtta chica zuma cjequičha.

²¹ Jakziltat anawalinacquiztan atipathaja, jalla niizquiz zuma honora tjaa-ača, wejtta chica mantiñi cjisjapa. Jaknužt wejrqui tjapa anawalinacquiztan atipžcu, wejt Yooz Ejpžtan chica mantiñi cjisjaja, jalla nižta ninacaqui wejtta chica mantiñi cjequičha.

²² Jakziltažlaja nonžni cjuñchiz, jalla niiqui nonžla, Espiritu Santuž icliz žoñinacžquiz chiiatqui”.

4

ARAJPACHQUIN CHERTANACA

¹ Jalla nekztanaqui wejrqui tsewc kjutñi cherchinča. Arajpachquin tsjii zana cjetzi, cherchinča. Nižaza tsjii jora nonzinča, trompet pekz joražtakaz. Jaknužt primero nonžta jora, jalla nižta irata. Nii joraqui wejtquiz paljaychiča, tuž cjan:

–Tekz tjonžca. Wejrqui amquiz tjeeznača, jaknužt nekztan watačhaja, jalla nii.

² Nii orapacha wejrqui Espiritu Santuž mantiz poderquiz želatučha. Jalla nuž žejlcan, arajpachquin tsjii chawc mantiz julz cherchinča. Nižaza nii julzquiz tsjii julzi želatučha.

³ Nii julzi žejlñi žoñitača c'achja tsijtchiz, c'achja maznacažtakaz c'ajatča, jaspe coralina nižta maznacažtakaz. Nižaza niiz mantiz julz muytata cumari arco iris cherchinča, esmeralda maztakaz c'ajatča.

⁴ Jalla nii chawc mantiz julz muytata paatunc pusin mantiz puestunaca cherchinča, zapa puestuquiz tsjii žoñi julzi želatučha. Nižaza ninacatača chiw tol zquiti cutchi; nižaza ninacž achquiz kor pillužtakaz tewžinta.

⁵ Nii chawc mantiz julzquiztan liwjliwñižtakaz ulanchiča, nižaza nii julzquiztan rayu jorjorñižtakaz joranaca nonzinča. Nii chawc mantiz julz yujcquiz pakallak uñi teyas pekžtatača. Nii pakallak teyasnacaqui pakallak Yooz ispiritunacača.

⁶ Nižaza nii chawc mantiz julz yujcquiz kota želatučha, ispijužtakaz c'ajatča.

Nižaza nii chawc mantiz julz muytata pajkpic latuquiztan pajkpic žejtñinaca želatučha. Jalla nii žejtñinacaqui yujcquiztan tajquiztan tama čhujcquinacchizatača.

⁷ Nii primir žejtñiqui león animalažtakaztača. Tsjii žejtñižti wac turužtakaztača. Tsjii žejtñižti žoñž yujcchizatača. Tsjii žejtñižti layñi aquilažtakaztača.

⁸ Nii pajkpic žejtñinacaqui zapa mayni sojta wežlaž kjaraztakaztača, nižaza tjapa kjuttan čhujcquinacchizatača. Majiñami weenami tirapan Yooz wirzu tuž itscan želatučha:

“Juc'ant zuma, juc'ant zuma, juc'ant zuma, Jalla nižtapanča tjapa azziz Yooz Jiliriqui. Yooz Jiliriqui tuquitnami, anzimi, jaztanami žejlča”.

Jalla nuž itsičha.

⁹ Nii žejtñinacaqui chawc mantiz julzquiz julzita mantiñižquiz honora tjaachiča, nižaza niizquiz rispitchiča, nižaza niizquiz gracias tjaachiča. Wiñayjapača nii chawc mantiñiqui.

¹⁰ Chjulorat žejtñinacaqui nižta paatčhaja, nekztan nii paatunc pusin jilirinacaqui mantiñiž yujcquiz quillziča, nižaza niizquiz rispitchiča. Nii chawc mantiz julzñiqui wiñayjapa wiñayača. Jalla niiz yujcquiz nii tuncapan pusin jilirinacaqui ninacž kor pillužtakaz nonžinchiča, tuž itsni cjan:

¹¹ “Učhum Yooz Jiliri, amqui honorchizkaj cjila. Nižaza amqui rispittaj cjila. Nižaza amča tjapa azzizqui. Jalla nii pajtaj cjila. Amqui tjapa žejlñinaca paachamča. Amiž munañpa jaru tjapa žejlñinacaqui paatatača, nižaza žejlča”.

5

TJUUŽTA LIWRU CJETÑIQUI

¹ Nižaza nii julzi žejlñi mantiñiž žew kjarquiz tsjii liwru tjuužta želatučha. Nii tjuužta liwruqui porap latu cjižžtatača. Nižaza nii liwruqui pakallak estampillžtan zcatžtatača. Jalla nuž cherchinča.

² Nekztanaqui cherchinča, tsjii walja azziz anjila. Jalla nii anjilaqui altu joržtan pewcžnatča, tuž cjan:

–¿Jequit waquizas tii tjuužta liwru cjetzjapa? ¿Nižaza tii zcatžta estampillanaca wjajrznas? –Jalla nuž pewcžnatča.

³ Arajpachquinami tii muntuquizimi, tii muntu koztanami anaž jecmi cjetz waquizicha, nii liwruquiz cjiirtanaca chertzjapa.

⁴ Jalla nuž cjetz waquizifni ana željchiz cjen, wejrqui kaacan ancha llaquizatuča.

⁵ Jalla nekztanaqu tšjii jiliriqiu wejtquiz paljaychiča, tuž cjan:

—Ana iya kaa. Tšjiiqui nii tjuužta liwru cjetfni waquizichiča. Niiqui Judá cjeta zoñiž majchmaatiqiztan tjonfiča. Juc'ant azziz cjen, León cjetača. Nižaza niiqui Davidž majchmaatiqiztan tjonfiča. Jalla niiqui tjappacha atipchiž cjen nii liwru cjetz waquizicha, nižaza nii liwruž estampillanaca wjajrzni.

⁶ Nekztanaqu tižtanaca cherchinča. Nii chawc mantiz julztan, nii žejtfinacžtan, nii jilirinacžtan, jalla ninacž taypiquiz tšjii Uuzažtakaz tšijtchi cherchinča. Wilana jawkta Uuzažtakaz, jalla nii cherchinča. Nižaza nii Uuzaqu pakallak wajranacchiztača, nižaza pakallak čhjujquincchiztača. Niiž pakallak čhjujquincacaqui pakallak Yooz ispiritunacča. Jalla nii Yooz ispiritunacaqui tjapa kjutfi tii muntuquiz cuchantaca.

⁷ Jalla nii Uuzaqu tjuužta liwru tanziča, julzi mantiñiž žew kjarquiztan.

⁸ Nii liwru tanžtan nii pajkpic žejtfinacami nižaza nii paatunc pusin jilirinacami nii Uuzažtakaz chawc jilirž yujcquiz quillziča. Zapa mayni nii jilirinacaqui pajk guitaražtakaz arpa cjeta tanzitača. Nižaza kor chuwanaca čhichatča insinsuchiz čhijpi. Nii insinsuchiz chuwanacaqui Yoozquin criichinacž oracionanaca cjetča.

⁹ Ninacaqui ew wirsu itsatča, tuž cjan:

“Amqui waquizichamča nii tjuužta liwru cjetfičjapa, nižaza nii liwruquiz zcatžta estampilla wjajrzničjapa. Amqui contatača. Ticziž cjen am ljokžtan Yooztajapa sirwiñi zoñinaca liwriichamča. Amiž liwriita zoñinacača tjapa zarchiz zoñinacami, nižaza tjapaman takunacchiz zoñinacami, nižaza tjapaman watjanacchizimi, nižaza tjapaman nacionacchizimi.

¹⁰ Amqui amiž liwriita zoñinaca mantiñijapa utchamča. Nižaza amqui nii zoñinaca Yooztajapa sirwiñijapa utchamča, Amiž liwriita zoñinaca tii yokquiz mantaquiča”. Jalla nuž cjichiča nii itsfinacaqui.

¹¹ Jalla nekztanaqui nonzinča wacchi anjilanacž jora. Nižaza cherchinča mantiz julz muytata, nižaza žejtfinacž muytata, nižaza jilirinacž muytata, jalla ninacž muytata muzpa waranka waranka anjilanaca želatča.

¹² Nii anjilanacaqui altu joržtan cjichiča:

“Nii conta Uuzaqu waquizicha, mantiz poder tanzjapa, nižaza tjapa zuma cusasanaca tanzjapa, nižaza tjapa zizjapa, nižaza tjapa azziz cjisjapa. Nižaza nii waquizicha honora tanzjapa, nižaza rispitta cjisjapa, nižaza honora waytizinta cjisjapa. Jalla nužoj cjila. Nuž waquizicha nii conta Uuzaqu”.

¹³ Nekztan tjapa arajpachquin žejlfinacžtan, nižaza tjapa tii muntuquiz žejlfinacžtan, nižaza tjapa tii yok koztan žejlfinacžtan, nižaza tjapa kotquiz žejlfinacžtan, jalla nuž tjappacha niž puntu cjichiča:

“Nii chawc mantiñižquizimi nii Uuzižquizimi wiñayjapa honora waytizintaj cjila; nižaza nii puculizquiz wiñayjapa honorchiz cjila; nižaza wiñayjapa rispittaj cjila; nižaza tjapa azziz cjila watay wata”.

¹⁴ Nekztan nii pajkpic žejtfinacaqui cjetča:

—Jalla nužoj cjila. Amén.

Nižaza nii paatunc pusin jilirinacaqui quillzcu nii watay wata žejtñižquiz rispitchiča.

6

ESTAMPILLANACA WJAJRTA CHERCHINCHA

¹ Nekztanaqui wejrqui cherchinča, jalla tužu: Uuzažtakaz zoñiqui tšjii estampilla wjajrzicha. Nižaza nonzinča tšjii žejtñiqui jorjorñižtakaz joržtan kjawchiča:

—Pichay. Chertzca.

² Nekztan wejrqui cherchinča, jalla tužu: Tšjii chiw cawallu tjonchiča. Nii cawallž juntuñ yawchi zoñiqui flech arcu armichiz tanchiča. Niižquiz tšjii atipz poder tjaatača, tšjii coronažtakaz. Jalla nižtiqiztan atipni ulanchiča, tirapan atipzjapa.

³ Nekztanaqui nii Uuzažtakazqui segunda estampilla wjajrzicha. Jalla nuž wjajrtan, segundo žejtñiqui cjichiča:

—Pichay. Chertzca.

⁴ Nekztan yekja cawalluqui ulanchiča, ljok cawallu. Nii cawallž juftun yawchi zoñiqui poder tjaatača, zoñinacpora kichanasjapa, nižaza porapat conasjapa. Niižquiz tšjii pajk cuchillu tjaatača.

⁵ Nekztanaqui nii Uuzažtakazqui tercer estampilla wjajrzicha. Jalla nuž wjajrtan, nonzinča tercer žejtñiqui tuž cjan:

—Pichay. Cheržca.

Nekztan cherchinča tsok cawallu. Nižaza nii cawallž juñtun yawchi zoñiqui balanci-chiztača niiž kjarquiz.

⁶ Nekztanaqui žejtñinacž taypiquiz tsjii jora nonzinča. Nii joraqui tuž cjichiča:

—Pajk paaztan tsjii kilo trigo kjayasača. Nižaza pajk paaztan čjep kilo siwatu kjayasača. Aceitimi vinumi tira želaquiča.

⁷ Nekztanaqui nii Uuzažtakazqui cuarto estampilla wjajrziča. Jalla nuž wjajrtan nonzinča cuarto žejtñiqui tuž cjican:

—Pichay. Cheržca.

⁸ Jalla nekztanaqui wejrqui cherchinča, tsjii k'ill cawallu želatča, yawchi zoñchiz. Jalla nii yawchi zoñiqui Ticz cjitatača. Niiž wiruñ Ticz Yoka cjita apziča. Ninacžquiz poder tjaatača, cuarta parte tii muntuquiz žejlñi zoñinaca conzjapa. Ninacaqui zoñinaca conaquiča pajk cuchillžtan, mach'anacžtan, conanacžtan, nižaza anawal animalanacžtan.

⁹ Jalla nekztanaqui nii Uuzažtakazqui quinta estampilla wjajrziča. Jalla nuž wjajrtan wejrqui cherchinča arajpach altarž koztan almanaca želatča. Nii almanacž curpunacaqui Yooz taku parlitiquiztan contatača. Ninacaqui tii muntuquiz kamcan Yooz puntu ticlarchiča. Jalla nižtiquiztan contatača.

¹⁰ Nii almanacaqui altu joržtan kjawcan tuž cjichiča:

—Zuma lijitum Jiliri. Amanča taku cumpliñiqui. Jaziqui ¿ĥjulorcamat zoñinaca pjalznaquiya? ¿Ĥjulorcamat wejrnac conñi zoñinaca casticaquiya? —Jalla nuž cjichiča nii almanacaqui.

¹¹ Jalla nekztanaqui almanacaqui chiw tol zquti tjaatača. Nižaza ninacžquiz cji-tača, tsjii kjaž tjuñikaz jeejnaquiča. Primuruqui iya Cristužquiz sirwiñinacaqui conta cjiſtanča, jaknužt tuquiqui almanacž curpunaca contažlaja, jalla nižta. Nii contanaca pojkcama, almanacaqui jeejnaquiča.

¹² Jalla nekztanaqui nii Uuzažtakazqui sexta estampilla wjajrziča. Jalla nuž wjajrtan, wejrqui cherchinča, yoka anča chekjinskatača. Nižaza tjuñimi tsokchi cjiſsiča, lut zquitižtakaz. Nižaza jiižmi ljok cjiſsiča.

¹³ Nižaza warawaranacami yokquin tjojtſquichiča, jaknužt pjursant tjamiqui higo frutanaca tjojtſkatchaja, jalla nižta.

¹⁴ Nekztanaqui pachaqui katchiča tjuužta papilažtakaz. Nižaza tii muntuquiz tjapa curunacami tjapa kot taypiquiz žejlñi yokanacami kizkattatača.

¹⁵ Nekztanaqui tii muntuquiz mantiñinacami, jilirinacami, zultatž jilirinacami, ricachunacami, azziz zoñinacami, mantita zoñinacami, ana mantita zoñinacami, tjappacha chjojziča pajk maz pjetanacquizimi, nižaza cur akjinacquizimi.

¹⁶ Jalla ninacaqui kjawchiča, tuž cjican:

—Curunaca, maznaca, wejnaca juntuñ tjojtžca. Wejrnac chjojzna, julzi mantiñiž yujc-quiztan. Nižaza wejrnac chjojzna nii žawchi Uuzažtakazquiztan, ana casticta cjiſjapa.

¹⁷ Ultim casticž tjuñi tjonča. ¿Ject Yoozquiztan atipas? —Jalla nuž kjawchiča ninacaqui.

7

144,000 ZOÑINACA CHIMPUTA

¹ Jalla nekztanaqui wejrqui cherchinča, pajkpic anjilanacaqui tii muntuž pajkpic latuquiztan tsijtsi želatča. Jalla nuž žejlcan pajkpic puntu tjaminacaqui atajatča, ana zinta tjamzjapa yokquizimi kotquizimi muntinacquizimi.

² Nekztanaqui tsjii anjila cherchinča, tuwanchuctan tjonñi. Nii anjilaqui žejtñi Yooz mantita ortinžtan tjonchiča. Jalla nižtiquiztan nii anjilaqui altu joržtan kjawcan paljay-chiča pajkpic anjilanacžquiz. Nii pajkpic anjilanacaqui poder tjaatatača, yokami kotami anawali cjiſkatzjapa.

³ Jalla nižtiquiztan nii Yooz tjaata ortinžtan anjilaqui ninacžquiz cjichiča:

—Yokami, kotami, muntinacami ana anawali cjiſkata, uĥum Yooz sirwiñinaca chimputa cjiſcama. Yooz sirwiñinacaqui ninacž yujc ayquiz chimputa cjequiča.

⁴ Nekztanaqui nonzinča patac pusi tuncan pusin waranka zoñinaca chimputatača, tjapa Israelž familianacžtan.

⁵ Tuncapan waranka Judáz familiaquiztan chimputatača. Tuncapan waranka Rubénž familiaquiztan chimputatača. Tuncapan waranka Gadž familiaquiztan chimputatača.

⁶ Tuncapan waranka Aserž familiaquiztan chimputatača. Tuncapan waranka Neftalíž familiaquiztan chimputatača. Tuncapan waranka Manasés familiaquiztan chimputatača.

⁷ Tuncapan waranka Simeónz familiaquiztan chimpūtatača. Tuncapan waranka Levíz familiaquiztan chimpūtatača. Tuncapan waranka Isacarz familiaquiztan chimpūtatača.

⁸ Tuncapan waranka Zabulonz familiaquiztan chimpūtatača. Tuncapan waranka Joséz familiaquiztan chimpūtatača. Tuncapan waranka Benjamínz familiaquiztan chimpūtatača.

CHIW ZQUITCHIZ ZOÑINACA

⁹ Jalla nekztanaqui cherchinča, muzpa tama zoñinacaqui chawc mantiz puesto yujcquizimi, nažaza Uuzažtakaz zoñz yujcquizimi želatča. Nii zoñinacaqui tjapa nacionanacquiztantača, nižaza tjapaman zarchiz zoñinacžquiztantača, nižaza tjapaman watjanacquiztantača, nižaza tjapaman takunacchiz zoñinacžquiztantača. Muzpa tamatača, jalla nižtiquiztan ana wira kanchucatača. Jalla nii zoñinacaqui chiw tol zquiti cutchicamatača. Nižaza ninacž kjarquiz munti itzanaca tanzicha, chjanžtanpacha.

¹⁰ Jalla nii zoñinacaqui altu joržtan tuž chiyatča:
 “Učhum Yoozkazza Liwriñiqui. Niiča chawc mantiz puestuquiz julzñiqui. Nižaza nii Uuzažtakaz zoñzakazza Liwriñiqui”.

¹¹ Nižaza chawc mantiz puesto muytatami, jilirnacž muytatami, pajkpic žejtñinacž muytatami, jalla ninacž muytata tjapa anjilanacaqui tsijtchi želatča. Ninaca zakaz chawc mantiz puestuž yujcquiz yokquiz puct'ichi Yooz rispitača.

¹² Nii anjilanacaqui Yooz rispitan tuž cjichiča:

“Jalla nužoj cjila. Učhum Yooztajapa watay wata honora waytižintaj cjila, nižaza wiñaya rispittaj cjila. Učhum Yoozza zizñi zizñipanqui. Niižquiz wiñaya gracias cjila. Nižaza niižquiz honora waytižintaj cjila. Učhum Yoozqui wiñayapa tjapa azziz cjila, nižaza poderchiz. Jalla nužoj cjila. Amén”.

¹³ Jalla nekztanaqui tsjii jiliriqui wejr pewczicha, tuž cjican:

– Ľjecnacat tii chiw zquiti cujtchinacaya? Nižaza Ľjakzquiztan tjonchi ninacataya?

¹⁴ Wejrqui niižquiz kjaazinča, tuž cjican:

– Jiliri, anal zizuča.

Nekztan niiqui cjichiča:

– Tinacaqui juc'ant sufris timpu watchiča. Nižaza tinacaqui ujnacquiztan liwriitača, Jesucristo Uuzažtakaz cjen. Cristuž ticziž cjen, jalla nižtiquiztan tinacaqui chiw ajunta zquitchizza.

¹⁵ Jalla nižtiquiztan tinacaqui Yooz mantiz puestu yujcquiz žejlča. Tinacača majiñami weenamii Yooz kjuyquiz sirwiñinacaqui. Nižaza nii chawc mantiz puestuquiz julzñiqui tinaca cwitaquiča. Niižtan tinacžtan watay wata chica želaquiča.

¹⁶ Tinacaqui ana iya čjери eesckataquiča, nižaza anaž iya kjaz kjara pasnaquiča. Nižaza sii kjakimi ana tinaca laacjiskataquiča, nižaza čjul kjakimi.

¹⁷ Jesucristuča mantiz puestu žcatipacha žejlñiqui. Jalla nii Uuzažtakaz Jesucristuqui tinacž awatiri čjequiča. Nižaza Jesucristuqui tinacžquiz zuma kamañchizpan irpaquiča, jaknužt zuma awatiriqui niiž uuzanaca zuma jalzurquiz kjaz liquinčhaja, jalla nižta. Nižaza Yoozpacha tjapa tinacž kaaj chjužžinaquiča.

8

SEPTIMA ESTAMPILLA WJAJRTA

¹ Jalla nekztanaqui Uuzažtakaz Cristuqui séptima estampilla wjajrziča. Jalla nuž wjajrtan, tsjii media ora tjapa ch'uju žejlčiča arajpachquin.

² Nekztan cherchinča, pakallawk anjilanaca želatča. Nii anjilanacaqui Yooz yujcquiz tsijtñitača. Jalla ninacžquiz pakallawk trompet pekz tjaatatača.

³ Nekztanaqui tsjii anjilaqui tjonžcu, altar yujcquiz tsjitsiča, tsjii kor insinsarchiz. Jalla nekztanaqui niižquiz wacchi insinsunaca tjaatatača, criichinacž oracionanacžtan t'ajzjapa. T'ajžta insinsužtan oracionanacžtan kor altarquiz nonžtatača chawc mantiz puestu yujcquiz.

⁴ Nii Yooz anjilž kjarquiztan criichinacž oracionanacžtan insinsužtan t'ajžta žketi waytichiča Yooz yujcquiz.

⁵ Jalla nekztanaqui nii anjilaqui insinsaru tanžcu, altarquiz uj parazižtan chjijpziča. Nekztan nii uj parazižtan chjijpi insinsaru tii muntu yokquiz jorjtchiča. Jalla nižtiquiztan ancha pjursanti liwjliwčiča, nižaza ancha pjursanti jorjorchiča, nižaza yoka chekjinčiča.

TROMPETCHIZ ANJILANACA

⁶Jalla nuž watžcu pakallawk trompetchiz anjilanacaqui tjaczicha trompetanaca tjawunzjapa.

⁷Primir anjilaqui niž trompet pekz tjawunchiča. Jalla nuž tjawunžcu caranuz chijñižtan ujtžtan, nižaza ljokžtan t'ajžta tii muntu yokquiz cutzinchiča. Jalla nižtiquiztan tercer parti tii muntu yoka ujsiča, nižaza tercer parti muntinaca ujsiča, nižaza tercer parti pastunacami ujsiča.

⁸Nekztan segundo anjilaqui trompet pekz tjawunchiča. Jalla nuž tjawunžcu uj peksi pajk curužtakaz pajk kotquin tjojtchiča. Nekztanaqui tercer parti kot kjazqui ljok cjsiča.

⁹Nekztan tercer parti kotquiz žejlñi animalanacaqui ticziča, nižaza tercer parti kotquiz ojklayñi warcunacaqui akžtatača.

¹⁰Tercer anjilaqui trompet peks tjawunchiča. Jalla nuž tjawunžcu pajk warawara arajpachquiztan tjojtsiča, uj peksi teyažtakaz. Nii warawaraqui tjojtsiča tercer parti pujunacquizimi, nižaza tercer parti tujnacquizimi nižaza wijiñanacquizimi.

¹¹Nii warawaraž tjuuqui Ajenjo cjiča. Ajenjo cjiča tsjii jar muntiqui. Jalla nii warawaraž tjojtiquiztan tercer parti kjazqui ajenjožtakaz jaru cjsiča. Nii jar kjaz cjen walja žoñinacaqui ticziča.

¹²Cuarto anjilaqui trompet pekz tjawunchiča. Jalla nii tjawunžcu tercer parti tjuñimi jizmi warawarami zumchi cjsiča. Nekztanaqui tercer parti majiñaquei ana kjančiča, nižaza tercer parti weenami ana kjančizakazza.

¹³Jalla nekztanaqui wejrqui cherchinča, nižaza nonzinča, tsjii anjilaqui tseewc arajpach taypiquiz laycan altu joržtan čiičiča, tuž cjan:

—Muntu yokquiz žejlñi žoñinacžtajapa ana wali, ana wali, ana wali cjisnaquiča. Chjep parti anjilanacaqui trompet pekz tjawunzmayacha. Jalla ninacaž tjawnan juč'ant ana wali cjisnaquiča.

9

QUINTO ANJILAQUI

¹Jalla nekztanaqui quinto anjilaqui trompet pekz tjawunchiča. Jalla nuž tjawunquiztan tsjii warawaražtakaz cherchinča arajpachquiztan tii yokquiz tjojtsi. Jalla nii warawaražta anawal jiliržquiz poder tjaatača, anawal koz tuj cjetzjapa.

²Jalla nekztanaqui nii anawal jiliričiqi koz tuj cjetziča. Jalla nuž cjetžtiquiztan jurnu žketižtakaz ulanchiča. Jalla nii koz tuj žketiqi tjuñimi pachami zumchi cjskatchiča.

³Jalla nii žketquiztan langosta animalanaca ulanchiča tii yokquiz laylayzjapa. Jalla nii animalañacžquiz anawali paazjapa poder tjaatatača, jaknužt tsjii yek'achunca ana wali yek'antičhaja, jalla nižta cjisjapa.

⁴Nižaza nii animalanacaqui mantitatača, anača yokquiz žejlñi pastunacžquizimi tjapa ch'oñna pajkñinacžquizimi anawali paajo. Pero yujc ayquiz ana Yooz chimpupa žoñinacžquiz ana wali paasača.

⁵Pjijska jiižcama nii anawali paañi animalanacaqui ana chimpupa žoñinacžquiz sufriskatzjapa nižta poder tjaatatača. Sufriskatcanami ticzkatta poder ana tjaatatača. Jalla nuž sufriskatan, nii žoñinacaqui ancha ayinčiča, jaknužt tsjii žoñi yek'antiquiztan ancha ayiñižlaja, jalla nižta.

⁶Jalla nižta sufris timpuquiz žoñinacaqui ticz pecaquiča, pero anaž ticzñi ataquiča. Jalla nuž ticz peccanami, ana wira ticz tjonacučiča.

⁷Nii langosta cjiča animalanacaqui quira tjacžta cawallunacažtakaztača. Ninacž achanacžquiz kor pillunacžiztakaztača. Nii animalanacž yujnacaqui žoñinacž yujnacažtakaztača.

⁸Nižaza ninacž charaqui maatakanacž charažtakaztača. Nižaza ninacž izkenacaqui león animalanacž izkenacažtakaztača.

⁹Nižaza ch'iztakaz kjajpchižtača. Nii kjajpanacaqui jiružtakaztača curpunaca chjojžjapa. Laylaycan, nii animalanacaqui ančaž arnatča, jaknužt cawallunacaqui tsjii quirquiz zalcan arančhaja, jalla nižta.

¹⁰Nii animalanacž kjurznacaqui yek'achuncaž kjuržtakaztača. Ninacž kjurznacžtan yek'antasača žoñinaca sufriskatzjapa nii pjijska jiiž intiru.

¹¹Nii animalanacž mantiñi jiliriqi nii koz tuj cjetñipachača. Nii jilirž tjuuqui Abadón cjiča hebreo tawkquiziqui. Griego tawkquiz Apolión cjiča. Apolión cjiča, akžñiqui, nii.

¹²Jalla nižta watžcu primir anawaličiqi watchiča. Nonžna. Imaziž iya pizc anawalinacaqui tjonča.

¹³ Jalla nekztanaqui sexto anjilaqui trompet pekz tjawunchiċha. Jalla nuż tjawuntiquiztan tsjii jora nonzinċha. Yooz yujcquiz żejłñi kor altarquiztan nii joraqui ulanchiċha. Pajkpic wajrichiztaċha nii kor altaraqui.

¹⁴ Nii joraqui sexto trompetchiz anjilżquiz tuż cjichiċha:

–Pajk Eufrates cjita puġquiz pajkpic anjilanaca ċhejlta żejłċha. Jalla nii pajkpic anjilanaca cutzna, –jalla nuż cjetċha.

¹⁵ Nekztanaqui nii pajkpic anjilanacaqui cutstataċha, ċhjep parti żeoinaca conzjapa. Jalla niżta paazjapa tjacztataċha, nii ora, nii tjuñi, nii jiiz, nii wata, jalla nii timpujapa niżta paazjapa tjacztataċha.

¹⁶ Żooinaca conzjapa wacchi żeoiż yawċhi cawallunaca żełatċha, paa patac millonanacataċha. Jalla nuż wacchi nonzinċha.

¹⁷ Nii cawallunacataċha jalla tiżta cherchiqui. Nii yawċhi żeoinacaqui queca weezinacchiztaċha. Nii queca weezinacaqui tiżta culuranacataċha, lġok, larama, k'illu, jalla niżta culuranacataċha. Nii cawallunacaqui león animalanaċz achanacchiztaċha. Jalla nii cawallunacaz atquiztan uj, žketi, azupri ulanchiċha.

¹⁸ Jalla nii ċhjep anawalinacataċha anawali paachiqui. Jalla nii uj, žketi, azupri ulantiquiztan ċhjep parti żeoinaca contactaċha.

¹⁹ Nii cawallunacaz sufriskatz poderaqui ninacž atquiztaċha, niżaza ninacž kjurzquiztaċha. Nii cawallunacaz kjurznacaqui zkoraztakaztaċha. Nii zkoranacaqui ċh'atni achchiztaċha, żeoinaca sufriskatzjapa.

²⁰ Nii anawalinacaz ana conta žeoinacazti Yoozquin anapanž kuz tjaachiċha. Żoñiż paata yooznacžquin rispitzquiztan anapan jaytichiċha. Tirapan rispitchiċha zajranacžquizimi niżaza žeoiż paata yooznacžquizimi. Ninacž yooznacaqui paatataċha korquiztan, paazquiztan, mazquiztan, tabliquiztan, jalla niżtanaca. Nii žeoiż paata yooznacataċha ana ċherñimi, niżaza ana nonžñimi, niżaza ana ojklayñimi.

²¹ Nii parti žeoinacaqui anawal kamtiquiztan anapan jaytichiċha. Tirapantaċha žeoiż conzqui, niżaza yat'iri ojklayzqui, niżaza adulteriuquiz ojklayzqui, niżaza tjañizaz ojklayzqui.

10

TSJII LIWRUCHIZ ANJILA ZELATĤA

¹ Nekztanaqui pajk azziz anjila cherchinċha, arajpachquiztan tjonñi. Nii anjilaqui tsjir taypiquiz tjonchiċha, tsjii arcu iris cumari niiz ach juntuñ. Nii anjilż yujcqui tjuñiżtakaz c'ajatċha. Lisnacaqui uj asñiżtakaztaċha.

² Niiz kjarquiz tsjii cjetżta liwru tanziċha. Niiz żew kjojchaqui pajk kotquiz tjecziċha, niiz zkar kjojchaqui yokquiz tjecziċha.

³ Nii anjilaqui altu jorżtan kjawċhiċha, león animalažtakaz. Nekztanaqui pakallaw wilta jorjorchiċha.

⁴ Jalla nuż jorjortan, wejrqui cjiirzmayataċha. Pero cjiirzmaya ċjen arajpachquiztan tsjii joraqui wejtquin ċhiizquichiċha, tuż cjican:

–Nii pakallaw jorjorñiż ċhiitaqui ċhjożna. Ana nii puntu cjiira.

⁵ Jalla nekztanaqui nii kotquizimi yokquizimi tjeczi anjilaqui žew kjara waytichiċha arajpach kjutñi.

⁶ Żew kjara waytiżcu, juramintu paachiċha Yooz tjuu ċhiican.

–Watay wata żejtñi Yoozqui paachiċha arajpachami, yokami, kotami; niżaza arajpachquiz żejłñinacami, yokquiz żejłñinacami, kotquiz żejłñinacami, tjappacha paachiċha. Jalla nii zinta Yooz tjuu ċhiican juramintu paachiċha, tjapa Yooz puntu parliñi profetanacaz ċhiitanacaqui ana enenżcu cumplisjapa.

⁷ Ĥjulorat séptimo anjilaqui trompet pekz tjawznachaja, jalla nii timpu Yooz ċhjożzaka tantiita taku cumplisnaquiċha. Tuqui timpuqui Yoozqui niiz sirwiñi profetanacžquiz nii ċhjożzaka taku mazinċhiċha.

⁸ Jalla nekztanaqui nii arajpachquiztan ċhiizquini joraqui wilta wejtquiz paljayzquichiċha, tuż cjican:

Nii kotquizimi yokquizimi tjeczi anjilż kjarquiztan cjetta liwru tanzñi oka. Jalla nuż wejtquiz mantichiċha.

⁹ Jalla nekztanaqui anjilżquin liwru mayi ojċchinċha, wejtquiz nii liwru tjaajo. Nii anjilaqui wejtquiz cjichiċha:

–Tanzna, niżaza lujżna. Am atquiz zuma mazk'až ċjequiċha. Pero am pjuchquiziqui jaruż tucaquiċha.

¹⁰ Nekztan anjilż kjarquiztan liwru tanżcu lujżinċha. Wejt atquiz anċha mazk'ataċha. Jalla nuż lujtiquiztan wejt pjuchquiz jaru ċjissiċha.

¹¹ Nekztanaqui wejtquiz cjichicha:

—Wilta amqui Yooziž chiita taku paljaystanča, nacionanacž puntuquiztanami, tjapaman sarchiz žoñinacž puntuquiztanami, tjapaman takunachiz žoñinacž puntuquiztanami, mantiñinacž puntuquiztanami.

11

YOOZ TAKU PALJAYÑI ZOÑINACA

¹ Jalla nekztanaqui wejtquiz tsjii caña tjaatatača tupz paražtakaz. Nekztanaqui tsjiiqui wejtquiz mantichicha tuž cjian:

—Zaazna. Yooz kjuya mirižca, altaržtanpacha. Nižaza nekž žejlñi Yooz rispitiñinaca kanzna.

² Yooz kjuy patiuqui ana mirižzaquičha. Jalla nii patiuqui yekja wajtchiz žoñinacžquin intirjitača. Jalla nii žoñinacaqui Yooz zuma watja akznaquičha pusi tunc paani jijnaca.

³ Wejrqui cuchanzčača pucultan tisticu wejtquiztan paljajajo. Lut zquiti cuctchi ojklayaquičha, 1260 tjuñicama. —Jalla nuž wejtquiz mantichicha.

⁴ Pizc olivo cjita muntinacami, nižaza pizc cantilirunacami tii yok mantiñi Yooz yujcquiz žejlča. Jalla nii muntinacami, nižaza cantilirunacami pucultan tisticu cjicha.

⁵ Jakziltat Yooz taku paljayñi žoñinacžquiz sufriskatz yanznačhaja, jalla niiqui contaž cjequičha. Nii pucultan tisticunacž atquiztan asñi uj ulnaquičha ninacž quintra žoñinaca liw ujzjapa. Nekztan ninacžquiz sufriskatz pecñinacaqui contaž cjequičha.

⁶ Poderchizza nii pucultan tisticunacaqui ana chijinskatajo. Yooz taku paljaycan, jalla nii timpu ana chijinskataquičha. Nižaza nii pucultan tisticunacaqui kjaz ljok tuckatz poderchizzakazza. Nižaza tii yokquiz žejlñi žoñinacžquiz tjapaman anawalinacžtan sufriskatz poderchizzakazza. Chjulora peccanami žoñinaca sufriskatasača.

⁷ Jalla nii pucultan tisticunacaqui Yooz taku paljayž žeržcu, contaž cjequičha. Tsjii anawal animalažtakaz anawal koz tujquiztan ulnaquičha. Yooz taku paljayñinacž quintra cjequičha. Nižaza nii pucultiquiztan atipaquičha, nižaza conaquičha.

⁸ Nekztanaqui ninacž ticzi curpunacaqui jakowasaquičha, Jerusalén wajt callquiz. Nii pajk wajtquiz Jesucristuqui cruzquiz ch'awctatača. Nižaza Jerusalén watjaqui Sodoma cjitača tsjii parabolažtakaz. Nižaza Egipto cjitazakazza, tsjii parabolažtakaz.

⁹ Čhjep maj chicatčiz tisticunacž ticzi curpuqui callquiz želaquičha. Jalla nuž želan žoñinacaqui ticzi curpunaca cheraquičha, tjapa nacionanacchiz žoñinacami, tjapa watjanacchiz žoñinacami, tjapaman takunacchiz žoñinacami, tjapaman saranacchiz žoñinacami, jalla ninaca. Nii cheržñi žoñinacaqui anaž nii ticzi curpunaca tjatkataquičha.

¹⁰ Nii pucultan tisticunacaqui tii yokquiz žejlñi žoñinacžquiz ancha sufriskatchitača. Jalla nuž ticžtiquiztan tii yokquiz žejlñi anawal žoñinacaqui cuntintuž cjequičha, nižaza pijžta paaquičha, nižaza porapat onantanaca onarassaquičha.

¹¹ Nekztan čhjep maj chicatquiztan Yoozqui nii pucultan tisticunaca jecatatskataquičha, wilta žeti tjaacan. Jacatžcu tsjitsnaquičha. Nekztan nii ticziquiztan jecatatchinaca cheržcu, žoñinacaqui ancha tsuctsucaquičha.

¹² Jalla nekztanaqui arajpachquiztan tsjii altu joraqui nii pucultizquiz paljayaquičha, tuž cjian:

—Tsewc yawžca ančhucqui. Tekz želaquičha.

Jalla nekztanaqui quintra žoñinacaž cheran, nii pucultan tisticunacaqui arajpachquin waytitaž cjequičha tsjir taypiguiz.

¹³ Nekztan cherčinča tužu. Jalla nii orapacha ancha yoka chekjinčičha. Jalla nuž yoka chekjintiquiztan tunca parti Jerusalén watjaqui pajlsičha. Nii yoka chekjintiquiztan pakallawk warank žoñinaca ticziča. Parti žejtñi žoñinacazti ancha tsuctsucčičha. Jalla nižtanaca wattiquiztan parti eclichi žoñinacaqui Yooz honora waytichicha.

¹⁴ Jalla nii anawali wattan, pizc anawalinacaqui watchičha. Nižaza wajillaž tjonča tercer anawaliqui.

SEPTIMO ANJILA

¹⁵ Jalla nekztanaqui séptimo anjilaqui trompet pekž tjawunchičha. Jalla nuž tjawuntiquiztan arajpachquin altu joranaca chiiñi nonzinča. Jalla tuž čhičičha:

“Tjapa tii muntuqui učhum Yooz Jiliriz mantita cjissičha. Nižaza Yooz Epiž uchta Jesucristuž mantita cjissičha. Jalla ninacača watay wata wiñaya mantiñiqui”.

¹⁶ Jalla nekztanaqui nii paa tunc pusin jilirinacaqui Yooz yujcquiz yokquiz puct'ican, Yooz rispitchičha. Jalla ninacača Yooz yujcquiz mantiz puestunacquiz julžñiqui.

¹⁷ Yooz rispitan, tuž cjichicha:

“Tjapa azziz Yooz Jiliri, amĉha anzimi tuquitanami ŷejlĉiui. Am ju'ant azi tjeezamĉha, niŷaza anziqui tjapa mantiĉi kalltichamĉha. Jalla niŷtquiztan amquin gracias tjaa-
uĉha.

¹⁸ Nacionanacchiz ŷoĉinacaui am quintra ŷawjĉiĉha. Pero ninaca castic tjuĉi tjonĉha. Niŷaza ticzi ŷoĉinaca pjalz tjuĉi tjonĉha. Niŷaza amquiz sirwiĉinacŷquiz zumanaca tjaaŷ tjuĉi tjonĉha. Amquiz sirwiĉinacami, am taku paljayĉinacami, amquiz rispitiĉinacami, amquiz kuz tjaaĉinacami, jalla tjapa ninacŷquizimi zumanaca tjaaŷ cjequĉiĉha pjalz tjuĉiquiziqui. Niŷaza tii yoka akĉinacami, tii yoka ŷejlĉi ŷoĉinaca akĉinacami, jalla ninaca akskattaŷ cjequĉiĉha. Jalla nii tjuĉiŷ tjonĉha”.

Nuŷ cĉiĉiĉha nii paa tunc pusin jilirinacaui.

¹⁹ Jalla nektanaui Yooz arajpach kjuya cjetŷtataĉha. Kjuj kjuyltan tsĉii cajuna chertataĉha. Yooziŷ tjaaŷ takutaĉha nii cajunquiziqui. Niŷaza arajpachquin rayunaca ŷelatĉha, niŷaza jorjorĉinaca ŷelatĉha. Niŷaza yoka chekjinskatĉi ŷelatĉha. Niŷaza pjur-santi caraniza ŷelatĉha.

12

TSJAA MAATAKATAN TSĉII ANAWAL ANIMALZTAN

¹ Jalla nektanaui arajpachquin tsĉii pajk siĉala parizichiĉha. Nii siĉalaui tiŷtataĉha. Tsĉaa maataka ŷelatĉha. Naa maataka zquitiui tjuĉiŷtakaztaĉha. Niŷaza naaŷa kĉojch koztan ĉiiz ŷelatĉha. Naaŷa achquiz tuncapan warawara tewŷintataĉha, tsĉii pilluŷtakaz.

² Naa maatakui ictataĉha. Nuŷ cĉen, ancha aynatĉha, majtŷjapa.

³ Jalla nektanaui tsĉii siĉala parizichizakazza arajpachquin. Tsĉii ju'ant anawal pajk ljok animala ŷelatĉha. Jalla niuiui dragonĉ cĉitataĉha. Pakallawĉ achĉiztaĉha, niŷaza tunca wajrichizataĉha. Niŷaza zapa achquiz mantiĉi ŷoĉiŷ pillunacŷtan tewŷintataĉha.

⁴ Niiŷ pajk kjurz wewcŷcu, ĉĉjep parti warawaranaca tjoĉskatchiĉha yokquin. Jalla nii dragonui maataka yuĉquiz tsĉiŷiĉha, naa maataka majtŷ ora tjewŷcan. Jalla nuŷ tsĉiŷiĉha, naaŷa majtta wawa lujlŷjapa majtquiztanpacha.

⁵ Nektanaui naa maatakui lucmajch wawa majtchinĉha. Nii lucmajchui tjapa nacionquiz ŷejlĉi ŷoĉinaca c'aripacha mantiĉiŷ cjequĉiĉha. Pero jalla nuŷ majtquiztan nii lucmajch wawaui Yoozquin wayitataĉha, Yooziŷ tjaaŷ puestunaca tanzjapa.

⁶ Naa maatakzi ch'ekti yokquin atipassinĉha. Jalla nicju Yoozui naa maatakaltajapa tsĉii yoka tjaczinĉiĉha. Jalla nicju 1260 tjuĉinaca watzcama ĉĉjerĉiz cjequĉiĉha naaui.

⁷ Jalla nektanaui arajpachquin quira zaltissiĉha, Miguelŷtan niiŷ mazi anĉinanacŷtan dragonŷ quintra quira zaltissiĉha. Nii dragonŷtan niiŷ mazinacŷtan ancha kichjassiĉha.

⁸ Pero atipta cĉissiĉha. Jalla niŷtquiztan arajpachquin ana iya ŷelasaĉha.

⁹ Jalla niŷtquiztan nii dragonŷtan niiŷ mazi anĉinanacŷtan tii yokquiz ĉĉjatkatŷquitataĉha. Nii dragonui Satanŷ diablupantaĉha. Niiĉha tuquita ŷkoraŷtakaz incallĉiui. Tuquitan nii diabluui Evaquiz incalltquiztan tjapa tii muntu incallĉiĉha anawali ĉĉjaskatŷjapa.

¹⁰ Jalla nektanaui wejrqui arajpachquin tsĉii altu jora nonzinĉha, tuŷ ĉĉiĉi:

–Jaziui ultim liwriiz tjuĉi tjonĉha, niŷaza Yooz azi tjeez tjuĉi tjonĉha, niŷaza uchum Yooz tjapa mantiz tjuĉi tjonĉha. Niŷaza Yooziŷ uchta Jesucristuŷ mantiz tjuĉi tjonĉha. Uĉhum criĉchinacŷ quintrariunacaui ĉĉjatkatŷ cjequĉiĉha. Majiĉami weenami nii anawaliui Yooz yuĉquiz criĉchinacŷ quintra uj tjoĉtuĉitaĉha.

¹¹ Pero criĉchinacaui anawal diablu atipĉiĉha, Uuzaŷtakaz Jesucristuŷ ticziŷ cĉen, niŷaza Yooz taku paljayĉiŷ cĉen. Niŷaza nii criĉchinacaui Yooz taku paljaycan ana ĉiŷjatchiĉha ticzuca cĉenami.

¹² Arajpacha, niŷaza arajpachquin kamĉinaca, cuntintuŷ cĉee. Yokquiz kamĉinaca, kotquiz kamĉinaca, anĉhuacaui anawali ĉĉjaskataquiĉha. Diabluui ĉĉjatkatŷquitquiztan anĉha ŷawjĉiĉha. Jalla niuiui zizza, muntuquiz kamz timpuqui ŷkoluczakza.

¹³ Jalla nektanaui nii dragonui yokquiz ĉĉjatkatŷquita nayŷcu, naa lucmajch maatiĉi maatakaquiz apziĉha tanzjapa.

¹⁴ Nektan naa maatakaquiz pizc pajk aquilŷ kjara tjaatkalĉha, ch'ekti yokquin laycan ŷkoraŷtakaz diabluŷquiztan atipŷjapa. Yoozqui nii yoka tjacziĉha, maatakaquiz ĉĉjep wata ĉĉicatchiz ĉĉjerĉiz ĉĉjajapa. Jalla nii yokquin maatakui layĉi atipĉinĉha.

¹⁵ Nektanaui ŷkoraŷtakaz diabluui persun atquiztan wacĉi kjaz jotĉiĉha, pu-juŷtakaz, kjaztan nii maataka tjuŷjapa.

¹⁶ Nektan yokaui maatakaquiz yanapŷjapa, c'acĉiĉha. Jalla nii c'actiquiz dragonŷ jotta kjazqui luzziĉha.

¹⁷⁻¹⁸ Nii cherzcu, dragonqui maatakajapa juc'anti žawjchicha. Jalla nekztanaqui diabluqui naaža majchmaatinacž quintra quira zali ojčkhiča. Naa maataka majchmaatinacaqui tižtanacača. Jakziltat Yooz mantitanac jaru kamčhaja, nižaza Jesucristuž tjaajinta jaru kamčhaja, jalla ninacaqui naa maataka majchmaatinaca cuntača. Nii diabluqui quira zali ojčkzcu, kot atquiz tsijtsiča.

13

PIZC ANAWAL ANIMALANACA CHERCHINCHA

¹ Jalla nekztanaqui chawc kot kjazquiztan tsjii anawali pajk animala ulanžquiñi cherchinča. Jalla nii animalaqui pakallawk achchiztača, nižaza tunca wajrichiztača, nižaza zapa wajriquiz mantiñi žoñž pillunacžtan tewžintatača. Nižaza achanacquiz Yooz quintra tjuu cjiřrtatača.

² Jalla nii weriž cherta animalatača tigriztakaz tsijtchi. Nižaza niž ataqi leonž atažtakaztača. Jalla nekztan dragonžtakaz diabluqui nii anawal animalžquiz niž poderchiz puestu tjaachiča, walja azziz mantizjapa.

³ Tsjii achaqui nii animalž pakallawk achanacquiztan ticskatzmaya chjojrichtažtakaztača. Pero ana ticziča. Antiz žejtchiča. Nekztanaqui ispantižcuqui tjapa tii muntuquiz žejlñi žoñinacaqui anawal animala apziča.

⁴ Žoñinacaqui nii dragón diablužquiz rispitchiča, Yoozquiztakaz. Nižaza nii dragonqui anawal animalžquiz niž mantiz poder tjaachiča. Jalla nižtiquiztan žoñinacaqui nii animalžquiz rispitchizakazza, tuž cjan:

—Žakziltat tii animalžquiztan juc'ant azzizqui? ŽJequit tii animala atipasajo?

⁵ Nekztan nii anawal animalaqui mit takunacami Yooz quintra čhiita takunacami čhiizjapa permitta cjsičiča. Nižaza puzi tunc paan žižnaca watzcama mantiz poderchiz cjequiča.

⁶ Jalla nekztanaqui anawal animalaqui Yooz quintra čhiichiča, Yooz tjuu quintrami, nižaza Yooz timplu quintrami, nižaza arajpachquin kamñinacž quintrami. Jalla nižta quintra čhiichiča.

⁷ Nižaza anawal animalaqui Yoozquin criichinacž quintra quira zalajo permittatača, ninaca atipzama. Nižaza nižquiz mantiz poder tjaatatača, tjapa zaranacchiz žoñinacžquizimi, tjapa watjanacchiz žoñinacžquizimi, tjapa takunacchiz žoñinacžquizimi, tjapa nacionanacchiz žoñinacžquizimi, jalla tjapa nii ana criichi žoñinacžquizimi mantizjapa.

⁸ Yoozquin ana criichiž cjen žoñinacaqui anawal animalžquiz rispitchiča, Yoozquiztakaz. Nii animalžquiz rispitiñi žoñinacž tjuunacaqui anaž cjiřrtacha, Uuzažtakaz Jesucristuž liwruquiz. Liwriita žoñinacž tjuunaca Jesucristuž liwruquiz cjiřrtacha. Jalla ninacž laycu ticziča Jesucristuqui. Ima tii muntu kalltan, jakziltižquiz Jesucristuqui wiñay žeti tjaachaja, jalla ninacž tjuunaca cjiřrchiča arajpach liwruquiz.

⁹ Jakziltat nonžni cjuñchizlaja, nonžla.

¹⁰ Jakzilta žoñit preso chjichta cječhaj niiqui, panž chjichtaž cjequiča. Nižaza jakzilta žoñit pajk cuchillžtan conta cječhaj niiqui, panž conta cjequiča. Jalla nižtiquiztan Yooz wajtchiz žoñinacaqui Yoozquin tjapa kuztan cjis waquiziča, nižaza pasinsis kuztan cjis waquiziča, sufrsnaca watzjapa.

SEGUNDO ANAWAL ANIMALA

¹¹ Jalla nekztanaqui yekja anawal animala cherchinča yokquiztan ulanñi. Jalla nii animalaqui pizc wajrichiztača, uuzažtakaz. Pero dragonžtakaz chiyatča.

¹² Jalla nii segundo anawal animalaqui tjapa nii primir animalž poderchiz mantichiča, primir animalžtan čica žejlcan. Nižaza segundo animalaqui tjapa tii muntuquiz žejlñi žoñinaca primir animalžquiz rispitskatchiča. Primir animalatača ticzmaya chjojrichtiquiztan žejtchiqui.

¹³ Nižaza segundo animalaqui pajk milajrunaca paachiča. Tsewctan yokquiz uj tjojt-skatchiča žoñinacž cheran.

¹⁴ Jalla nižta milajrunaca payi permittatača, primir animalaž želan. Jalla nižta milajrunaca paachiž cjen, tii muntuquiz kamñi žoñinacžquiz incallchiča. Nižaza žoñinaca mantichiča, chjojrichtiquiztan žejtchi animalž irata tsjii yooz paajo. Nekztan mantichiča, nii yooz rispatajo. Nii primir animalatača pajk cuchillžtan chjojrichtaž cjenami, wilta žejtchi cjsiçiqui.

¹⁵ Segundo animalaqui primir animalž irata paata yooz žejtñi cjskatchiča. Nižta poderchiz cjsičiča segundo animalaqui. Jalla nuž žejtñi cjan, nii paata yoozqui čhiñi cjsičiča. Nižaza jakziltat nii yooz ana rispitchaja, jalla niiqui contaj cjila, mantichiča žejtñi čhiñi yoozqui.

¹⁶ Nižaza segundo anawal animalaqui mantichiča, tjapa zoñinacž yujc ayquizimi uż žew kjarquizimi chimputa cjisjapa. Koltanacami, pajkinacami, ricahunacami, porinacami, zoñž mantuquiz cjiñinacami, ana zoñž mantuquiz cjiñinacami, liwj mantichiča, chimputa cjejjajo.

¹⁷ Ana chimputa cjenauqi ana kjaychucatača, nižaza ana tuychucatača. Nii chimpuqui tužutača, zoñž ayquiz anawal animalž tjuužtan uż anawal animalž numeružtan cjjirtatažlaja, jalla nii.

¹⁸ Jalla nii intintisjapaqui walja zizni cjistanča. Jakziltat zizni cječhaja, jalla niiqui anawal animalž número tantiiz waquiziča. Nižaza nii numeruqui zoñinacž numeruča. Jalla nii numeruqui sojta patac sojta tuncan sojtani, jalla niiča.

14

144,000 ZOÑINACA CHERCHINCHA

¹ Jalla nekztanaqui Sión cjeta cur kjutni cherchinča. Jalla nicju Uuzažtakaz Jesucristuqui tsjtichi želatča. Nižtan chica 144,000 zoñinaca želatča. Nii zoñinacž ayquiz Jesucristuž tjuumi, niž Ejpž tjuumi, jalla nii tjuunaca cjjirtatača.

² Jalla nekztanaqui arajpachquiztan tsjii jora nonzinča, wacchi pujunacž kjaz joražtakaz, nižaza pjursanti jorjorñiz joražtakaz. Nižaza nii weriž nonžta joraqui suyniñitača, jaknužt wacchi arpa quitaranaca suyniñaja, jalla ništa.

³ Jesucristužtan žejlñi zoñinacaqui ew wirsu itsiča. Nii mantiz puestuž yujcquiz nižaza nii pajkpic žejtñinacž yujcquiz, nižaza nii jilirinacž yujcquiz itsiča. Anaž iya jakziltami nii ew wirsu catoki atatča; nii 144,000 jalla nii alaja nii wirsu catokčiča. Nii 144,000 zoñinacaqui yokquiztan liwriitatača.

⁴ Jalla ninacaqui ana zalzi nižaza ana čjul maatakatan adulteriužtakaz paachiča. Jalla ninacaqui Uuzažtakaz Jesucristo apziča, jakziquin ojktčhaja, jalla nii. Nižaza ninacatača zoñinacžquiztan primero liwriita zoñinacaqui. Yooztajapami Uuzažtakaz Jesucristužtajapami liwriitatača.

⁵ Jalla ninacatača ana zinta toscara čiichiqui, nižaza ana čjul ujchiztatača.

CHJEP ANJILANACA CHERCHINCHA

⁶ Jalla nekztanaqui arajpach taypiquiz tsjii anjila layni cherchinča. Nii anjilaqui liwriiñi tawkchiztača, tii muntuquiz kamfi zoñinacžquiz parliñijapa. Nii liwriiñi takuča wiñayjapa werar razunaqui. Nii liwriiñi takuqi tjapa zoñinacžtajapa, tjapa nacionacchiz zoñinacžtajapami, nižaza tjapa zaranacchiz zoñinacžtajapami, nižaza tjapa takunacchiz zoñinacžtajapami, nižaza tjapa watjanacchiz zoñinacžtajapa, jalla ninacžtajapatača.

⁷ Jalla nii anjilaqui altu joržtan tuž čiichiča:

–Yoozquin rispitiñiz cjee. Nižquin honora waytiñiz cjee. Niiž ultim casticz ora tjonča. Niiqui arajpachami, yokami, kot kjaznacami, nižaza kjaz jalzurinacami paachiča. Jalla nižtiquiztan nižquiz rispitiñiz cjee.

⁸ Jalla nekztanaqui yekja anjilaqui apžquichiča, tuž cjan:

–Babilonia, nii pajk watjaqui akziča, akziča. Nii watjaqui parti watjanacchiz zoñinacžquiz anawali kamañchiz cjiskatchiča, jaknužt adulteriuquiz ojklayñinacaqui ana zuma kamañchizlaja, jalla ništa.

⁹ Jalla nekztanaqui tercer anjilaqui apžquichiča, altu joržtan tuž cjan:

–Jakziltat nii anawal animala rispitchaja, nižaza nii zoñiž paata yooz rispitchaja, jalla niiqui castictaž cjequiča. Nižaza jakziltat niž ayquiz anawal animalž chimputa cječhaja, uż kjarquiz anawal chimputa cječhaja,

¹⁰ jalla niiqui Yooziž castictaž cjequiča. Jalla nii ana ultim Yooz rispitiñi zoñinacž quintra Yoozqui anča zawjwaquiča. Yoozqui ninaca anča casticaquiča. Ninacaqui infernuquin nižaza asni azupriquiz anča t'akjizaquiča Yooz zuma anjilnacž yujcquizimi, Uuzažtakaz Jesucristuž yujcquizimi.

¹¹ Infernuquin wiñayjapa sufran, uj žketiqui žketaquiča watay wata. Nii sufrini zoñinacča majiñami weenami jeezquqi ana žejlčuca. Ninacaqui anawal animala rispitičiztanami nižaza ni paata yooz rispitičiztanami jalla ništa anča sufraquiča. Nižaza ninacaqui nii anawal animalž tjuužtan chimputaž cjen ništa anča sufraquiča.

¹² Jakziltat Yooz partiquiz žejlčhaja, nižaza Yooz tawk jaru kamčhaja, nižaza Jesucristužtin kuz tjaačhaja, jalla ninacaqui tii muntuquiz pruebanaca watcan pasinsis kuzziz tira tjurt'ichej cjala.

¹³ Jalla nekztanaqui wejrqui arajpachquiztan tsjii jora nonzinča. Nii joraqui tuž cjičiča:

–Jalla tiic cjjira: “Tekztan nawjčhuc jakziltat Yooz Jiliržquiz tjurt'ichi kuzziz ticznačhaja, jalla niiqui cuntintuž cjequiča”. Espiritu Santuqui tuž cjiča: “Ninacaqui

ninacž langzquiztan jeejnaquičha. Nižaza ninacž zuma obranacquitzanami nižaza kamtiqiztanami pactaž cjequičha. Jalla nižtiqiztan cuntintuž cjequičha”.

ZOÑINACA RICUJTA CUCIHAZTAKAZ

¹⁴ Jalla nekztanaquī tsewc kjuṭñi cherčicu, chiw tsjiri cherchinča. Nii tsjir juntuñ tsjii zoñiztakaz julzi želatča, kor pillu achquiz tjewzi, nižaza kjarquiz cuchillu tanzi.

¹⁵ Nekztanaquī tsjii anjilaquī arajpach Yooz timpluquiztan ulanchičha altu joržtan kjawcan. Nii tsjir juñtuñtan julzi zoñžquiz paljaychiča, tuž cjan:

—Tii muntuquiz žejlñi cujich ora tjonchiča. Cujichaquī zuma pookchiča. Jalla nižtiqiztan am cuchillžtan pootzna, cujicha ricuja. —Nuž cjichiča anjilaquī. Tii muntuquiz žejlñi criichi zoñinacača cujichažtakazquī.

¹⁶ Jalla nekztanaquī nii tsjir juñtuñtan julzi zoñiquī cuchillžtan tii muntuquiz žejlñi cujicha ricujchiča. Jalla nižtiqiztan Yoozquin criichi zoñinacaquī ricujta cjsiča.

¹⁷ Nekztanaquī tsjii yekja anjilaquī arajpach Yooz timpluquiztan zakaz ulanchičha, cuchillžtan zakaz.

¹⁸ Nekztanaquī tsjii anjilaquī arajpach Yooz altarquiztan ulanchizakazza. Nii anjilaquī akzjapa poderchizza. Nekztanaquī nii anjilaquī segundo cuchillžtan anjilžquiz paljaychiča, altu joržtan tuž cjan:

—Am cuchillžtan uwas cujicha ricuja. Uwasnacaquī zuma pookchiča. Jaziquī nii ricuja. —Nuž cjichiča anjilaquī. Tii muntuquiz žejlñi ana criichi zoñinacača uwas cujichažtakazquī.

¹⁹ Jalla nekztanaquī nii anjilaquī cuchillžtan ana Yoozquin criichi zoñinaca cujichažtakaz pootchiča, nižaza ricujchiča. Nekztan nii ricujta zoñinacaquī uwas cujich uyquiztakaz tjojtatača, Yooz casticta cjsjapa.

²⁰ Jalla nekztanaquī jaknužt ricujta uwasanaca tječančhaja, jalla nižta nii ricujta zoñinacaquī castictatača Yooz wajtž tjiiquin. Jalla nuž castictaž cjen, ancha ljoc ojkičiča, cawallunacž freno irantizcama. Quinsa patac kilómetro larcuquin nižta ljoc ojkičiča.

15

PAKALLAWK ANAWALINACA

¹ Jalla nekztanaquī arajpachquin tsjii siñala cherchinča. Nii pajk siñalaquī ancha ispantichucatača. Pakallawk anjilanacaquī želatča, pakallawk anawalinacchiz. Jalla nii anawalinaca wattan Yooz casticz žerzta cjequičha.

² Nižaza llijñi kota cherchinča, ispijužtakaz ujtžtan t’ajžta. Nižaza nii ispijužtakaz kot atquin zoñinaca tsijtchi želatča. Nii zoñinacaquī Yooz arpi gitara tanzi želatča. Nii zoñinacaquī tii muntuquiz kamcan, anawal animalquiztan atipchiča, nižaza niž paata yoozquiztan atipchiča. Nižaza nii anawal animalž tjuužtan ana chimputatača.

³ Jalla nii zoñinacaquī Yooz sirwiñi Moisés itsñi itsatča, nižaza Uuzažtakaz Jesucristuž itsñi itsatča, tuž cjan:

“Tjapa azziz Yooz Jiliri, amiž paata pajk obranacača ancha zumanacaquī, nižaza ispantichucača. Am kamañaquī zuma lijitumča, werarapanča. Amča tjapa nacionchiz zoñinaca mantiñamquī.

⁴ Yooz Jiliri, cject amquin ana eksnasa? Cject amquin honora ana tjaasa? Am alaja ancha zumampanča. Amča zuma lijituma pjalzñamquī, jalla nižtiqiztan tjapa nacionquiztan zoñinacaquī tjonaquičha, am rispitzjapa”.

⁵ Jalla nekztanaquī arajpachquin cherchinča timplu kjuyltan. Jakziquizlaj Yooz lii, jalla nekz Yooz žejlž kjuya cjeti cherchinča.

⁶ Nekztan cherchinča, timpluquiztan pakallawk anjilanacaquī pakallawk anawalinac casticchiz tjonchiča. Ancha zuma llijñi tol zquitchiztača, nižaza kor tsjaychiztača, quecanaca jweržinta.

⁷ Jalla nekztanaquī tsjiiquī pajkpic žejtñinacžquiztan zapa mayni pakallawk anjilanacžquiz kor chuwa tjaachiča. Nii chuwanacaquī wiñay žejtñi Yooz casticunaca chjiipžtatača.

⁸ Nii timpluquī uj žketžtan chjiipžtatača, Yooz juc’ant azziz cjen, nižaza juc’ant honorchiz cjen. Nižaza anaž jecmi nii timpluquin luzi atasacha, nii pakallawk anjilanacž anawalinaca watzcama.

16

ANAWALINACA CUTZTA

¹ Jalla nekztanaquī tsjii alto čiiñi jora nonzinča. Timpluquiztan nii joraquī pakallawk anjilanacžquiz paljaychiča, tuž cjan:

—Oka. Ančucaqui nii intirjita anawalinaca cutzna. Nii anawalinacžtan Yoozqui žoñinaca casticaquiča. —Jalla nuž paljaychiča nii joraqui.

² Jalla nuž paljaytiquiztan primir anjilaqui ojkcchiča nižquiz intirjita anawalinaca tii muntu yokquiz cutzjapa. Jalla nektzanaqui jakziltat anawal animalž chimpuzlaja, nižaza nii anawal animalž žoñiž paata yoozquiz rispitchaja, jalla tjapa ninacaqui anawal llajanacžtan llajchiča. Nižaza ancha kjawcan aynatča.

³ Jalla nektzanaqui segundo anjilaqui ojkcchiča nižquiz intirjita anawalinaca tii muntu kotquiz cutzjapa. Nii kot kjazqui ticzi žoñž ljocnacažtakaz tucchiča. Jalla nižtiquiztan tjapa kotquiz zejlñi animalanacaqui ticziča.

⁴ Jalla nektzanaqui tercer anjilaqui nižquiz intirjita anawalinaca cutziča pujunacquizimi jalzurinacquizimi. Tjapa kjazqui ljoc tucchiča.

⁵ Jalla nektzanaqui kjaz mantiñi anjilaž chiita nonzinča. Nii anjilaqui tuž cjichiča: —Ancha zumamča Yooz Jiliri. Amqui tuquitanami jaztanami žejlča. Amqui ligitumakaz pjalžcu, casticča.

⁶ Nii casticta žoñinacaqui am parti žoñinacami, nižaza am parti parliñi žoñinacami conchiča. Jaziqi amqui nii žoñinacžquiz ljoc lickatchamča. Jalla nužupan ninacžta waquiziča.

⁷ Nižaza altarquiztan tsjii chiižquiñi jora nonzinča, tuž cjican:

—Tjapa azziz Yooz Jiliri. Amqui ultim werara pjalzamča; nižaza ligitumapan pjalžnamča. Jalla nužupanča.

⁸ Jalla nektzanaqui cuarto anjilaqui nižquiz intirjita anawali cutziča tjuñquiz. Jalla nuž cutztiquiztan, tjuñiž siiqui žoñinaca ujsiča, zmali kjakan.

⁹ Jalla nižtiquiztan žoñinacaqui tjuñiž ujta cjissiča. Jalla nuž ujtiquiztan, žoñinacaqui ana persun uj paaznacquiztan jaytichiča, “Ujchizpantča” cjican. Nižaza Yoozquin ana honora tjaachiča. Antiz Yooz tjuu quintra chiichiča, Yooz nii anawalinaca mantizquichiz cjen.

¹⁰ Jalla nektzanaqui quinto anjilaqui nižquiz intirjita anawali cutziča, jakziquin nii anawal animalaqui mantiñi julzičaja, jalla nicju. Jalla nektzanaqui nii mantita yokaqui ancha zumchi cjissiča. Jalla nuž cjen žoñinacaqui persun las chatsiča; ancha t'akjizichiča.

¹¹ Jalla nuž sufrichiž cjenami, ana jaytichiča anawali paaznacquiztan, “Ujchizpantča”, cjicanaqui. Pero arajpach Yooz quintra chiichiča, ninacaž nuž ayinskatñi llajacama cjenauqui.

¹² Jalla nektzanaqui sexto anjilaqui nižquiz intirjita anawaliqui pajk Eufrates cjita pujquiz cutziča. Jalla nuž cutztiquiztan, nii pujuqui kjonchiča, tuwantan tjonñi jilirinaca kjakžquizjapa.

¹³ Nektzanaqui cherchinča anawal dragonž atquiztan anawal ispiritu ulanchiča. Jalla nižtazakaz ulanchiča anawal animalž atquiztanami, nižaza falso profetž atquiztanami. Nii čhjep ulanchi ispiritunacaqui zcaranacažtakaztača.

¹⁴ Nii ispiritunacaqui zajra ispiritunacatača. Milajrunacaž paa-atča. Nižaza tjapa tii muntuquiz mantiñinacaž juntatča, quira zaltisjapa. Tjapa azziz Yooz Jiliriž uchta timpu pajk quira želaquiča.

¹⁵ Nonžna. Jesucristuqui tuž cjiča: “Wejrqui tjañižtakal tiripintit tjonatča. Jakziltat naazñi kuzziz cječaja, cuntintuž cjequiča. Zquitchizpan cjee; nektzan ana k'ala okasatča, žoñinacaž ombrawillta cjisjapa”.

¹⁶ Jalla nektzanaqui mantiñi jilirinacaqui juntantitaž cjissiča, tsjii yokquiz. Nii yokaqui hebreo tawkquiz Armagedón cjatača.

¹⁷ Jalla nektzanaqui séptimo anjilaqui intirjita anawaliqui querquiz cutziča. Jalla nuž cutztiquiztan altu joraqui arajpach timpluquiz mantiz puestuquiztan chiichiča, tuž cjican:

—Yooz casticz obranaca cumplita cjissa.

¹⁸ Jalla nektzanaqui rayunacami, arañinacami, jorjorñinacami želatča. Nižaza juc'anti yoka chekjinchiča. Yooziž žoñi paatiquiztan jalla nii timpuquiztan anzama tii yokaqui ana wira juc'anti chekjinchiča. Walja tsucuñi cheknatča.

¹⁹ Jalla nuž yoka chekjinzcu, Jerusalén pajk watjaqui čhjep parti t'akžtatača. Nižaza nacionacž capitalanacaqui k'ala pajlsiča. Nižaza Yoozqui Babilonia pajk watja cjuñziča. Yoozqui Babilonia wajtž quintra žawjžcu, juc'anti casticchiča, jaru vinžtan liquintažtakaz.

²⁰ Jalla nuž castican tjapa kot taypiquiz žejlñi yokanacami, nižaza curunacami katchiča.

²¹ Nižaza arajpachquiztan žoñinacž juñtuñ pajk caranuzat tjojtžcu, ojkcchiča. Tsjii caranuzauqui quintal jilatača, ancha liczitača. Nektzanaqui žoñinacaqui Yooz quintra chiichiča nii caranuzadž nuž ojktiquiztan. Jalla nii anawaliquiztan ancha sufrichiča.

17

PUTIRII MAATAKA CHERCHINCHA

¹ Jalla nektanaqui tsjii nii pakallaww ana walinacchiz anjilanačquiztan wejtquiz tjonchiča, tuž cjan:

—Pichay. Putirii maataka amquiz tjeeznača. Naa putirii maatakaqui pajk watja cjiča. Jaknužt nii pajk watja casticta cječhaja, jalla nii zakal tjeeznača. Jalla nii anawal watjaqui wacchi kjaznacaran žejlča. Juc'ant anawali putirii maatakažtakazza nii watjaqui.

² Tii yokquiz mantiñi jilirinacaqui naa putiriyatan adulteriuquiz ojklaychiča. Naa irat kamañchiz peczcu, Yoozquiztan ancha zarakchiča nii mantiñinacaqui. Jaknužt vinžtan licchi zoñiqui tsjii kjutñi ojkečhaja, jalla nižta cjissiča.

³ Jalla nektanaqui Espiritu Santuqui wejr cherkatchiča jalla tižta. Tsjii anjilaqui wejr chjitchiča ch'ekti yokquin. Jalla nicju tsjaa maataka cherchinča. Jalla naa maatakuqui ljoc animalž juntuñ yawchi želatča. Jalla nii animalaqui persun curpuquiz Yooz quintra tjuunacchiztača. Nižaza pakallaww achchiztača, nižaza tunca wajrichiztača.

⁴ Naa maatakuqui morat ljoc zquiti cujtchintača. Nižaza koržtan, c'ajñi mazllanacžtan, c'achanacžtan, jalla ninacžtan alajitača. Nižaza naaž kjarquiz kor wazu tanzinča. Nii kor wazuquiz anawalinacžtan nižaza ana zuma kamañanacžtan chjijpžtatača.

⁵ Nižaza naaž ayquiz tii ana intintazzuca tjuu cjjirtatača: “Pajk Babilonia, putirii maatakanacž maa, nižaza tii yokquiz ana zuma kamañanacchiz maa”. Jalla nuž cjjirtatača.

⁶ Nektanaqui wejrqui naa maatak cherchinča licchižtakaz. Naa maatakuqui wacchi Yoozquin criichinaca conchinča. Jesucristužquiz kuz tjaachiž cjen contatača nii criichinacaqui. Ninacž ljocžtan licchižtakaz cjistkalča. Jalla naa maataka cherzcu, wejrqui ancha ispantichinča.

⁷ Weriz ispantitiquiztan anjilaqui wejtquiz paljaychiča, tuž cjan:

—¿Kjažtiquiztan am ispantejo? Wejrqui naa maatakaž ana intintazzuca puntu amquiz maznača. Nižaza nii pakallaww achchiz, tunca wajrichiz animalž ana intintazzuca puntu amquiz maznača.

⁸ Maatakaž yawta animala cherchamča. Jalla nii animala tuquitan tii muntuquiz želatča. Nektan ana želatča. Wiruñ wilta želaquiča, koz anawal tujquiztan ulanžcaquiča. Ultimquiziqui infiernuquin chjatkataž cjequiča. Tuquitan tii muntu paatiquiztanpacha Yoozquin ana criichi zoñinacž tjuunacaqui anaž Yooz liwruquiz cjjirtatača. Jalla nii zoñinacaqui anawal animala cherzcu ispantaquiča. Nii animalaqui žejlchiča, nektan ana želatča, nektan wilta žejlča. Jalla nižtiquiztan ana criichi zoñinacaqui ispantaquiča.

⁹ Jalla nii intintizjapa intintiñi kuzziz cjis waquiziča. Nii anawal animalž pakallaww achaqui pakallaww curunaca cjiča. Nii curunacž juntuñ tsjii watja julzi žejlča. Putirii maatakažtakazza nii watjaqui.

¹⁰ Nii pakallaww achanacaqui pakallaww mantiñi jilirinaca cjiča. Pjijzkaltan mantiñinacaqui ezziča; katchiča. Tsjii mantiča anziqiu. Nii tsjiiqui ima tjonča. Jalla nii tjonžcu upacamakaz mantaquiča.

¹¹ Nii tuqui žejlñi, nektan ana žejlñi animalaqui octavo mantiñi jiliriča. Pero nii pakallaww mantiñinacž partiquiztankača. Nižaza ultimquiziqui infiernuquin chjatkataž cjequiča.

¹² Nižaza nii amiž cherta tunca wajranacaqui tunca mantiñi jilirinaca cjiča. Nii tunca mantiñinacaqui imaž mantiz poder tanža. Nii anawal animalžtan chica tsjii orakaz mantaquiča.

¹³ Nii tunca mantiñinacaqui tsjii kuzzizza; ninacž mantiz poder tjaaquiča anawal animalžquiz.

¹⁴ Nii anawal mantiñinacaqui Uuzažtakaz Jesucristuž quintra quira zaltayskataquiča. Pero Uuzažtakaz Jesucristuqui criichi zoñinacžtan ninacžquiz atipaquiča. Jesucristuqui Jiliric jiliripanča, rey mantiñic mantiñipanča. Criichi zoñinacaqui nižtan chica želaquiča. Criichi zoñinacača Yooziž kjawžta, nižaza illzta, nižaza Yoozquin tjurt'iñi kuzzizpan.

¹⁵ Jalla nektanaqui nii anjilaqui wejtquiz cjichizakazza:

—Nii amiž cherta kjaznacaqui, jakziquin naa maataka julzinžlaja, jalla nii kjaznacaqui zoñinaca cjiča. Nii zoñinacaqui tjpaman watjanacchiztača, nižaza nacionanacchiztača, nižaza takunacchiztača.

¹⁶ Nižaza nii amiž cherta tunca wajranacažtakaz mantiñinacaqui anawal animalžtan naa putirii maatak quintra chaawjkataquiča. Nektan naa maataka akznaquiča, nižaza ana zquitchiztakaz cjiskataquiča. Nižaza naaž curpu lujznaquiča. Nižaza ujtžtan ujnaquiča.

¹⁷ Jalla nuž nii mantiñinacaqui naa maatakaquiz paaquiča. Yoozqui ninacž kuznacquiz nuž peckatchiča, Yooz muntacama paa-ajo. Jalla nuž Yooz muntacama paacan ninacaqui tsjii kuzziz cjequiča, anawal animalžquiz ninacž mantiz poder tjaazjapa, Yooz chiitacama cumpliskatzjapa.

¹⁸ Nižaza amiž cherta maatakqui pajk watja cjiča. Nii watjača tii yokquiz željñi mantiñi jilirinacžquiz mantiñiqui.

18

BABILONIA CJITA WATJA EZZICHA

¹ Jalla nekztanaqui wejrqui tsjii anjila arajpachquiztan chjijwžquiñi cherchinča. Nii anjilaqui walja mantiz poderchiztača; nižaza walja kjanatča. Nuž kjanan tii yokaqui majiñažtakaz cjissiča.

² Nekztanaqui nii anjilaqui altu joržtan kjawchiča, tuž cjican:

—Babilonia pajk watja ezziča, ezziča. Nii wajtquiz zajranacaqui watja chassiča, tjapaman anawal ispiritunacžtan, nižaza tjapaman chjaawjkatta wežlanacžtan.

³ Nii Babilonia watjaqui tjapa nacionanaca Yoozquiztan zarakskatchiča, licchinacažtakaz. Nižaza nii watjaž cjen tjapa tii yokquiz mantiñi jilirinacaqui ana zuma kamañchiz cjissiča. Nižaza nii wajtchiz žoñinacžquiz tjapaman cusasanaca tuytiquiztan, tuyñi žoñinacaqui ricachu cjissiča.

⁴ Jalla nekztanaqui wilta tsjii jora nonzinča, arajpachquiztan chiižquiñi. Nii joraqui tuž cjičiča:

—Wejt parti žoñinaca, nii wajtquiztan ulna, ana nii wajtchiz žoñinacažtapacha uj paazjapa, nižaza nii wajtchiz žoñinacžtanpacha ana casticta cjsjapa.

⁵ Nii wajtchiz žoñinacž ujnacaqui juc'anti muntunacžtakaz yapchiča arajpacha irantiz-camažtakaz. Juc'anti ujnaca paachiča. Jaziqúi Yoozqui ninacaž paata ujnaca naychiča.

⁶ Jaknužt nii wajtchiz žoñinacaqui yekja žoñinacžquiz anawali paatčhaja, jalla nii anawal paatiquiztan jama castictaj cjila. Ninacaž ujnaca paatiquiztan pizc wilta juc'anti castictaj cjila. Jaknužt yekja žoñinaca anawali cjskatchaja, jalla nižta irata pizc wilta juc'anti ana wali cjskattaj cjila.

⁷ Jaknužt nii wajtchiz žoñinacaqui ancha persun honora waytitčhaja, nižaza jaknužt ninacaqui persun kuzcama kamtčhaja, jalla nuž anawali kamtiquiztan jama sufriskattaj cjila. Ninacž kuzquiz tuž cjiñitača: “Wejrnacqui juc'ant zumtča. Anawalinaca wejtquiz anapan cjsnasača. Anal wira tsjaa zewažtakaz kaaznasača”.

⁸ Jalla nižtiquiztan nii wajtchiz žoñinacžquiziqui casticu tiripintit tjonaquiča. Ninacžquiz ancha anawalinaca tjonaquiča. Jaziqúi žoñinaca ticznaquiča; nižaza llacjizaquiča; nižaza chjerž kjara paznaquiča; nižaza ujquin ujžtaž cjequiča. Muzpa azziz Yooz Jiliriqui nii žoñinaca pjalžcu casticaquiča. Jalla nižtiquiztan nižta anawalinaca tjonaquiča.

⁹ Jalla nii cheržcu jakzilta mantiñinacat nii wajtchiz žoñinacžtan ana zuma kamañchizlaja, nižaza persun kuzcama kamchizlaja, jalla ninacaqui nii wajtchiz žoñinacž castictu cheržcu, kaaquiča, nižaza llacjizaquiča. Nii watja ujnzan, nii mantiñi jilirinacaqui uj žketñi cheraquiča. Nekztan kaaquiča.

¹⁰ Jalla nuž cheržcu, nii watja nuž castictaž cjen, ažkquin tsjtchi želaquiča; ana macjatžcaquiča. Castictaž cjen tssucaquiča, tuž cjican: —¡Ay! ¡Ay! Babilonia pajk watja. Muzpa azziz cjenauqi, anawali cjissila. Tsjii ratukaz casticta cjissila.

¹¹ Nii watja castictaž cjen, tii muntuquiz željñi tuyñinacazakaz kaaquiča, nižaza llacjizaquiča. Ninacž cusasanaca kjayñimi ana iya želaquiča.

¹² Ninacž cusasanacaqui tižtanacača: kori, paaz, llijñi maznaca, c'achjanaca, zuma pañu, murat pañu, ser pañu, ljoc pañu, tjapaman zuma ulurchiz tablanaca, zuma marfila cjita maznaca, jila walurchiz maderanaca, korinaca, jirunaca, zuma marmol cjita llijñi maznaca,

¹³ canelanaca, zuma ulurchiznaca, insinsunaca, zuma ulurchiz mirra cjanaca, zuma ulurchiz asitinaca, vinunaca, asitinaca, chiw llamp'u jac'unaca, trigonaca, kuzñi animalanaca, uuzanaca, cawallunaca, autunaca, tuyzjapa piyunanaca. Jalla tjapa nižtanaca tuytatača.

¹⁴ Nii tuyñinacaqui nii wajt puntuquiztanž cjequiča:

—Nii wajtquiziqui anaž iya tjapaman zumanaca želaquiča, nii ancha juztažta zumanacaqui. K'ala pertissiča, wiñayjapa. Walurchiz cusasanacaqui pertissiča, nižaza wajtquiz honora tjaañi cusasanacaqui pertissiča wiñayjapa. —Nuž chiyaquiča.

¹⁵ Nii cusasanaca tuyñinacaqui ricachu cjiššičha nii wajtchiz zoñinacaz kjaychiz cjen. Jaziqui tuyñinacaqui nii watja casticu cheržcu, eksñi kuztan azkquin tsijtchi zelaquiča. Nižaza altu joržtan kjawcan, kaaquiča, nižaza llacjizaquiča.

¹⁶ Nižaza ninacaqui tuž cjequiča: —¡Ay! ¡Ay! Anawali cjiššila tii pajk watjaqui. Tsjaa ricach maatakažtakaz želatča, iñarato zquitchiz cujtchin, zuma pañ zquitchiz, murat pañ zquitchiz, ljoc pañ zquitchiz. Zuma iñarato želatča, koržtan, zuma walurchiz maznacžtan, zuma c'achjanacžtan.

¹⁷ Tsjii ratukaz tjapa nii wajtquiz walja walurchiz cusasanaca pertiššičha. —Jalla nuž cjequiča.

Jalla nii watja casticu cheržcu, warcu joojooñinacami, warcuquiz ojklayñinacami, warcuquiz langžñinacami, tjapa kot warcužtan langžñinacami azkquin tsijtchi zelaquiča.

¹⁸ Jalla nii wajtquiztan uj žketñi cheržcu, kjawaquiča, tuž cjan:

—Ĵakzilta watjat tižta chawc watjažtapacha željjo?

¹⁹ Jalla nekztanaqui ninacaqui persun achanacquiz pjlžtan tjatznaquiča, ancha kaan, nižaza ancha llacjizcan. Nižaza tuž cjequiča:

—¡Ay! ¡Ay! Ana wali cjiššila nii chawc watjaqui. Nii wajtquin cusasanaca chjtchiz cjen, tjapa warcužtan langžñi zoñinacaqui cusa ricachu cjiššičha. Nižaza tsjii ratulla akžtala.

²⁰ Arajpachquin željñinacazti, nii watja akžtaž cjen, cuntintuž cjee. Yoozquin criichi zoñinaca, cuntintuž cjee. Nii wajtchiz zoñinacaqui ančucaquiz anawali paachiča. Yooz parti zoñinaca, nižaza Yooz uchta apostolonaca, nižaza Yooz puntu parliñinaca, tjapa ančhucaltajapa Yoozqui nii watja casticaquiča. Jaziqui ančhucaltajapa Yoozqui nii watja casticaquiča.

²¹ Jalla nekztanaqui tsjii walja azziz anjilaqui tsjii pajk maz tjaajžtakaz waytižcu kotquiz tjojtchiča, tuž cjan:

—Tii maz tjaaj tjojttažokaz Babilonia chawc watja tjojttaž cjequiča. Anaž wira iya cherta cjequiča.

²² Tii wajtž calliran anaž wira iya itsñi jora nonžtaž cjequiča, arpi guitar jorami, itsñi jorami, pincall jorami, trompet pekž jorami. Nižaza tii wajtquiz anaž wira iya oficiuchiz langžñinacami želaquiča. Nižaza tii wajtquiz anaž wira iya zoñinaca tjaajžtan jawunñi jora nonžtaž cjequiča.

²³ Nižaza tii wajtquiz miča pekžta anaž iya cheraquiča. Nižaza anaž iya zalžñi pijjsta ch'ajwiñi nonznaquiča. Tuqui tii wajtquiz tuyñinacaqui zoñinacž yujcquiz pajk zoñitača. Maña paacan, tii wajtchiz zoñinacaqui tjapa nacionanacchiz zoñinacžquiz incallchiča.

²⁴ Nižaza tii wajtchiz zoñinacaqui Yooz parti zoñinaca, nižaza Yooz puntu parliñinaca conchiča. Tjapaman zoñinaca contača.

19

ARAJPACHQUIN YOOZQUI HONORCHIZZA

¹ Jalla nekztanaqui arajpachquin wacchi zoñinacž jora nonzinča, tuž cjan:

“¡Aleluya! Učhum Yoozza liwriñiqui, walja azzizza, walja honorchizza.

² Učhum Yoozza litituma pjalžñiqui. Jalla nuž Babilonia wajtchiz zoñinaca litituma casticchiča. Nii zoñinacaqui tjapa wajtchiz zoñinacžquiz ana wali kamañchiz cjiskatchičha. Jalla nižtquiztan casticta cjiššičha. Nižaza Yoozquin sirwiñi zoñinaca conchiž cjen, Yoozqui nii zoñinaca casticchiča”.

³ Wilta nii arajpachquin željñinacaqui altu joržtan čiichiča, tuž cjan:

—¡Aleluya! Nii wajtquiztan uj žketi wiñaya žketaquiča.

⁴ Nekztanaqui arajpachquin paa tunc puzin jilirinacžtan pajkpic žejtñinacžtan yokquiz quillžcu, puct'ichiča. Nižaza Yoozquiz rispitchičha. Yoozqui niž mantiz puestuquizača. Rispitcan tuž cjichiča:

—¡Nužoj cjila! ¡Aleluya! ¡Amén!

⁵ Nekztanaqui mantiz puestuquiztan tsjii jora nonzinča tuž čiizquini:

“Tjapa Yoozquin sirwiñinaca, Yoozquiz honora waytila. Koltami pakjimi tjapa Yoozquin rispitiñinacami, Yoozquiz honora waytila”.

⁶ Nekztan wejrqui wacchi zoñinacž jora nonzinča. Wacchi kjaz pujquiz kjawñižtakaztača. Nii joranacaqui tuž cjichiča:

“¡Aleluya! Učhum tjapa azziz Yooz jiliriñi tjapa mantiz kallantichiča.

⁷ Jalla nižtquiztan ančaž chipžla učhumqui, cuntintuž cjila. Yoozquin honoraž tjaala. Uuzažtakaz Jesucristužtan niž parti zoñinacžtan juntu kamz ora irantižquichiča, tsjii zalz pijjsta oražtakaz. Jesucristuž parti zoñinacaqui listu tjacziča, zalziñ turažtakaz.

⁸ Finu zquitinacžtan cujtziča; ancha limpu, nižaza llijñitača”.

Nii finu zquitinacžtan cujtchi tuž cjiča, Yoozquin criichinacaž zuma kamañnacchiz, jalla nii. Jalla nuž zquitinacžtan cujtzkatčičha Jesucristuž parti žoñinacžquiz.

⁹ Jalla nektanaquii tsjii anjilaquii wejtquiz paljayčičha tuž cjian:

–Jalla tuž cjičra: “Uuzažtakaz Jesucristuž zalz pijjztiquiz invittanaca cuntintoj cjiča”.

Nižaza wejtquiz cjičičha:

–Jalla tii weriž chiita takunacaquii Yooz zuma werar razunanacačha.

¹⁰ Jalla nižtiquiztan wejrquii nii anjilž kjočquiz quillžcu puct'ichinča, nii rispitzjapa. Niizti wejtquiz čhižinčičha, tuž cjian:

–Ana nižta paa. Wejrquii Yooz sirwiñtčha, amtan chica, nižaza am jilanacžtan chica. Tjapa ančhucčha Jesucristuž puntuquiztan parliñinacaquii. Yoozquin alaja rispita amquii.

Jakziltat Jesucristuž puntuquiztan mazinčhaja, jalla niičha werar Yooz taku parliñiquii.

CHIW CAWALLQUIZ YAWCHI ZOÑI

¹¹ Jalla nektanaquii arajpacha cjetzi cherchinča. Jalla nicju tsjii chiw cawallu ječžquičičha. Calwallquiz tsjii zuma žoñi yawchi cherchinča. Nii žoñiquii Zuma Lijituma cjičičha, nižaza Werar Razunchiz cjičičha. Jalla nii žoñičha zuma lijituma pjalžñiquii, nižaza ultim werar razunquiztančha quira zaltñiquii.

¹² Nii žoñž čhjučquinacaquii ujžtakaz c'ajatčha. Niiž achquiz wacchi mantiñi žoñinacž pillunacchiztačha. Nižaza nižžquiz tsjii tjuu cjičrtatačha. Nii tjuuquii niikaz zuma intinčičha.

¹³ Nii žoñiquii ljocžtan tinta tol zquitchiztačha. Niiž tjuuquii Yooz Taku cjičičha.

¹⁴ Nižžquiz apzcatčha arajpach zultatunaca; chiw finu zquitchiznacatačha, nižaza limputačha. Nii zultatunacačha chiw cawallunacquiz yawchi.

¹⁵ Nii zuma žoñž atquiztan tsjii pajk ar cuchillu ulančičha, nacionanacchiz žoñinaca casticzjapa. Tjapa nacionanacchiz žoñinacžquiz mantaquičha, tjapa anawali paatiquiztan jama casticcan. Jaknužt tsjii uwas cujichñi žoñiquii uwas kjaz zpjičztjapa tječančhaja, jalla nižta irata nii zuma žoñiquii Yooztajapa quintra žoñinaca tječnaquičha. Tjapa azziz Yoozza anawali žoñinacž quintra žawjchipan. Anziquii ninaca casticta cjišsa.

¹⁶ Nii tječanñi žoñž tol zquitquizimi niž lizquizimi tii tjuu cjičrtatačha: “Tjapa mantiñi reynacžquiztan tsjan reyčha. Nižaza tjapa jilirinacžquiztan tsjan jiliričha”.

¹⁷ Jalla nektanaquii cherchinča, tsjii anjila tjuñquiz tsijtchi. Alto joržtan arajpachquin laylayñi wežlanaca kjawzičha, tuž cjian:

–Tekhuc picha. Nižaza tekz ajcsca, Yooz tjaata čhjeri lujljjapa.

¹⁸ Tekz ajcsca, mantiñi reynacž janchi lujljjapa, nižaza zultatu mantiñinacž janchi lujljjapa, nižaza zup kuzziz žoñinacž janchi lujljjapa, nižaza cawallunacž chjizwimi nii yawchi žoñinacž janchimi lujljjapa, nižaza tjapaman žoñinacž janchi lujljjapa, žoñž mantuquiz cjičjiñi žoñinacž janchimi, ana žoñž mantuquiz cjičjiñi žoñinacž janchimi, kolta žoñinacž janchimi, pajk žoñinacž janchimi; tjapaman žoñinacž janchi lulaquičha. –Nuž cjičičha anjilaquii.

¹⁹ Jalla nektanaquii cherchinča, nii anawal animalžtan yokquiz mantiñi reynacžtanami ninacž zultatunacžtanami ajcsitačha, chiw cawallquiz yawchi žoñž quintra kichjasjapa, niž zultatunacžtanpacha.

²⁰ Quira zaltžcu, nii anawal animalaquii preso tanta cjišičha, falso profetžtan chica. Jalla nii falso profetaquii animalž yujcquiz milajrunaca paachiž cjen, nii animalaž chimputa žoñinaca incallchičha; nižaza nii animalž žoñž paata yoozquiz rispitiñi žoñinaca incallchizakazza. Jalla nii pucultan anawalinacaquii azupri infiernuquin tjojtatačha, žejtñi sufrisjapa.

²¹ Nii chiw cawallquiz yawchi žoñiquii parti quintra žoñinaca pajk cuchillžtan conchičha. Nii pajk cuchillučha nii žoñž atquiztan ulančiquii. Jalla nižtiquiztan tjapa nii ajcsi wežlanacaquii ninacž janchižtan, chjizwinacžtan ancha chjekchi cjišičha.

20

WARANK WATA PUNTU

¹ Jalla nektanaquii tsjii anjila cherchinča, arajpachquiztan tjonñi. Nii anjilaquii kjarquiz llawi tanzičha; nižaza pajk carina tanzičha. Nii llawiquii koz anawal tuj llawitačha.

² Nektan nii anjilaquii dragón tanchičha. Dragonquii žkoražtakaz Satanás diablučha. Jalla nii diabluquii warank wata watzcama čejltačha.

³ Nektan nii anjilaquii diablu tjojtžcu, koz tuj chawjčičha. Nižaza tsjii estampillžtan žcatžinčičha, diabluž nacionanacchiz žoñinacžquiz ana iya incallajo, warank wata watzcama. Jalla nii warank watanaca wattanaquii, wilta cucta cjištančha tsjii upacamakaz.

⁴Jalla nektzan mantiz puestunaca cherchinča. Jalla nii puestunacquin julzi zoñinacaqui pjalzjapa poderchiztača. Nižaza acha muržinta criichinaca cherchinča. Nii criichinacaqui contatača, Yooz taku parlitiquiztan, nižaza Jesucristuž puntuquiztan ticlar-tiquiztan. Ninacaqui anawal animalžquizimi nižaza niiz paata yooznacžquizimi ana rispikalča. Nižaza anatača anawal animalž chimputa, ana yujc ayquizimi, ana kjarquizimi. Jalla nii conta criichinacaqui jacatatchi cherchinča. Warank watanaca Cristužtan juntu mantaquiča.

⁵Jalla niiča primiru jacatatzqui. Parti ticzi zoñinacaqui ana jacatatchiča nii warank watanaca watzcama.

⁶Nii primiru jacatatchinacaqui cuntintuž cjequiča. Ancha zuma kamañchiz cjequiča. Nii segundo ticzqui ninacžtaqui ana želaquiča. Nii segundo ticzqui tuž cjiča, infernuquin chjatkatta wiñayjapa casticta cjisjapa. Pero nii jacatatchinacaqui Cristužtan juntu mantaquiča warank watanaca. Ninacaqui Yooztajapami Cristužtajapami sirwiñinaca cjequiča.

⁷Jalla nii warank watanaca wattiquiztan Satanás diabluqui cuchtaž cjequiča koz tujquiztan.

⁸Jalla nuž cutztiqiztan Satanás diabluqui ulnaquiča tjapa tii yokquiz žejlñi nacionanaca incallzjapa. Gog cjita naciona, nižaza Magog cjita naciona nižaza tjapa nacionanacžquiz incallžcu, quira zalzjapa ajcškataquiča. Jalla nii nacionanacchiz zultunacaqui walja tamača, kot at pjilažtakaz. Nuž cherchinča.

⁹Nii zultunacaqui walja campuquin ojkchiča, Yooz parti zoñinaca muyuntizjapa, nižaza Yooziž pecta watja muyuntizjapa. Jalla nuž muyuntan, Yoozqui arajpachquiztan uj cutzinžquichiča, ninaca k'ala ujjjapa.

¹⁰Nekztanaqui incallñi diabluqui azuprižtan asñi uj kotquin tjojtatača. Jalla nicju tuquiqui anawal animalžtan toscar profetžtan tjojtatača. Jalla nicju majiñami weenami sufraquiča watay wata.

PAJK CHIW MANTIZ PUESTU

¹¹Jalla nekztanaqui tsjii pajk chiw mantiz puestu cherchinča. Nižaza nii puestuquiz tsjiiqui julzi želatača. Jalla nii julzi mantiñiz nuž želan, niiz yujcquiz arajpachami yokami k'ala katchiča. Nekztan ana iya arajpachami yokami želatača.

¹²Nekztan ticzi zoñinaca cherchinča, koltami pakjimi, mantiñi Yooz yujcquiz tsijtchi. Jalla nekztanaqui Yooz liwrunaca cjetžtatača. Nižaza yekja liwru cjetžtatača; liwriita zoñinacž tjuu listichiz liwrutača. Nii Yooz liwrunacquiz tjapa zoñinacaž paatanacaqui apuntitatača. Ticzinacaqui apuntita paatiquiztan jama pjaltzatača.

¹³Jakziltat pajk kotanacquiz ticzčhaja, jalla ninacaqui Yooz yujcquiz intirjitatača. Nižaza jakziltami ticzčhaja, nižaza ticzi zoñž yokquin žejlčhaja, jalla ninacaqui Yooz yujcquiz intirjitatača. Jalla nekztanaqui tjapa zoñinacaqui ninacaž paatiquiztan jama pjaltzatača.

¹⁴Ticzmi nižaza ticzi zoñinacž yokami ana iya želaquiča. Asñi ujquin tjojtatača. Nii asñi uj kotquin sufrisqui segundo ticz cjiča.

¹⁵Jakziltiž tjuuqui liwriita zoñinacž tjuu listiquiz ana žejlčhaja, jalla niiqui asñi uj kotquin tjojtazakaztača.

21

EW ARAJPACHA EW YOKA

¹Jalla nekztanaqui ew arajpachami ew yokami cherchinča. Primir arajpachami primir yoka katchiča, nižaza kotami.

²Nekztanaqui wejr Juanqui ew Jerusalén watja cherchinča, Yooz arajpachquiztan tjonñi. Jaknužt tsjaa zalzin turqui persun tjowažtajapa tjaczinžlaja, jalla nižta zuma tjacžtača ew watjaqui.

³Nekztan arajpach mantiz puestuquiztan tsjii jora nonzinča. Altu tawkžtan tuž cjičiča:

—Cheržca. Yoozqui zoñinacž taypiquiz kamča. Yoozqui ninacžtan chica kamaquiča, nižaza nii zoñinacaqui Yooz wajtchiz zoñinaca cjequiča. Jalla nižtiqiztan Yoozqui ninacžtan chicaž cjequiča.

⁴Yoozqui ninacž kjaz kaajmi chjujžinaquiča. Nižaza ninacžta anaž iya ticz želaquiča, nižaza iya kaazmi, llaquizmi, sufrismi anaž želaquiča. Jalla ninacaqui k'ala watchiča.

⁵Nekztanaqui nii mantiz puestuquiz julžñiqui tuž cjičiča:

—Cheržca, wejrqui tjappacha ew paa-uča. Tii cijra. Tiiča werar takunacaqui, nižaza lijitum takunaca.

⁶Jalla nekztanaqui cjičiča:

–Tjappachaž jazic žeržta. Wejrťcha primirquiztanpacha, nižaza wiricama, jaknužt tsjii litranacaqui “A”quiztan kallantičhaja, nižaza “Z”quin wiricama žerzaja, jalla nižta. Jakziltat kjaztakaz zuma kamaña ancha pecchaja, jalla niižquiz nužullakaz zuma kamaña tjaata cjequičha, jalzurquiztan žejťni kjaztakaz. Wejrqui nii zuma kamaña tjaa-ačha.

⁷ Jakziltat tjapa anawalinacquiztan atipachaja, jalla niižquiz irinsažtakaz tii zumanaca weriž tjaata cjequičha. Wejrqui ninacžtajapa Yooz cjeečha. Ninacaqui wejt maatinaca cuntaž cjequičha.

⁸ Ana wejtquin kuzziz žoñinacazi azupri uj kotquin chjatkataž cjequičha. Jalla tižta kamañchizza nii žoñinacaqui: Yooz ničñinaca, Yoozquin kuz ana tjaañinaca, ana zuma kamañchiz žoñinaca, žoñi conñinaca, adulteriuquiz ojklayñinaca, yat’irinaca, žoñiž paata yooznaca sirwiñinaca, toscara chiññinaca. Jalla ninacaž ašni ujquin castictaž cjequičha. Jalla nii ašni uj infernuquin ojzquzi segundo ticz cjičha.

EW JERUSALEN CJITA WATJA

⁹ Tuquiqui cherchinčha pakallawk anawalinacaqui pakallawk anjilanacžquiz intirjitatatčha. Jalla nektzanaqui nii pakallawk anjilanacquiztan tsjiuqui wejtquin tjonchičha. Jalla tuž cjican, chiichičha:

–Pichay. Amquiz tjeeznačha, Uuzažtakaz Jesucristuž tur.

¹⁰ Jalla nektzanaqui Espiritu Santuqui wejtquiz tuž cherkatchičha. Wejrqui pajk curquiz chjichtatačha. Jalla niwjtcan pajk zuma Jerusalén watja wejtquiz tjeezičha, arajpachquiztan Yoozquiztan tjonni.

¹¹ Nii watjaqui Yooz honorchizza; nižaza llijatčha Yooztakaz. Llijni maztakaztačha llijnatčha jasje maztakaz, nižaza ispijužtakaz.

¹² Nii wajt muytata pajk pirka želatčha, tuncapan zanchiz. Zapa zanquiz tsjii anjila želatčha. Nižaza zapa zanquiz tsjii tjuu cjjirtatačha. Nii tuncapan tjuunacaqui Israel žoñinacž t’akanacž tjuutačha.

¹³ Nii pirkatačha tuwanchuc čhjep zanchiz, užachuc čhjep zanchiz, warchuc čhjep zanchiz, tajachuc čhjep zanchiz.

¹⁴ Nii wajt muytat pirkaqui tuncapan maz simintuchiztačha. Nii tuncapan maz simintuquiz tuncapan Jesucristuž apostolunacž tjuunaca cjjirtatačha.

¹⁵ Jalla nii wejtquiz chiiñi anjilaqui kor miriis parchizza, nii watja miriisjapa, zanami pirkanacami.

¹⁶ Nii watjaqui isquinatutačha, porap kjuttan igualatačha. Anjilaqui kor paržtan watja miriichičha, 2,200 kilometratačha, tsewchuc altu kjutni, nižaza latuquin igualatačha.

¹⁷ Nekztan pirka miriichičha. Nii muytat pirkaqui sojta tunc pusin metro miriichičha, žoñiž metružtan miriita, jalla nuž.

¹⁸ Muytat pirkaqui jasje maztan pirkitatačha. Watjaqui kori puru kjuyanacchiztačha, limpu ispijužtakaz.

¹⁹ Nižaza wajt muytat pirkiž simintunacaqui c’achja maznacžtan alajitatačha. Primiruquzi jasje maztan, segunduquzi zafiro maztan, terceruquzi ágata maztan, cuartoquzi esmeralda maztan,

²⁰ quintoquzi ónice maztan, sextoquzi cornalina maztan, septimuquzi crisólito maztan, octavuquzi berilo maztan, novenuquzi topacio maztan, decimuquzi crisoprasa maztan, undecimuquzi jacinto maztan, duodecimuquzi amatista maztan.

²¹ Nižaza nii tuncapan zanaqui tuncapan perla maznacžtan paatatačha. Zapa zanaqui tsjii perližtankaz paatatačha. Wajt chawc calliqui kori puru paatatačha, limpu ispijužtakaz.

²² Wajtquiz ana timplu cherchinčha. Tjapa azziz Yooz Jiliržtan Uuzažtakaz Jesucristužtan, jalla ninacaqui wajt timplu cuntačha.

²³ Nižaza nii wajtquiz kamcan, anaž tjuñimi jizmi pecasačha, kjanžjapa. Yoozpachaž kjančha, Jesucristužtanpacha.

²⁴ Nacionanacquiztan liwriita žoñinacaqui Yooz kjanquizkaz ojklayaquičha wajtquiz kamcan. Nižaza yokquiz mantiñi reynacaqui nii wajtquin honora zjičacuquičha.

²⁵ Majiñ zita zana cjetžtaž želaquičha. Nižaza anaž ween želaquičha.

²⁶ Tjapa nacionanacž honora chjichtaž cjequičha nii wajtquin.

²⁷ Jalla nii wajtquizquzi anaž anawali kamañchizquzi luzasačha. Nižaza Yooz chjaawjkatta žoñinacami ana luzasačha, nižaza incallni žoñinacami ana luzasačha. Jakziltiž tjuut Uuzažtakaz Jesucristuž liwruquiz cjjirtažlaja, jalla ninacakaz Yooz wajtquiz luzasačha.

22

¹ Nekztanaqui nii anjilaqui wejtquiz tsjii limpu puju tjeeziča. Nii puj kjazqui zeti tjaañi cjiča. Nii kjazqui ispijuztakaztača. Yooz mantiz puestuquiztanami, Uuzažtakaz Jesucristuž mantiz puestuquiztanami ulnatča.

² Nii puj kjazqui wajt chawc call taypiquiz okatča, puj porap kjuttan zeti tjaañi munti pakatča. Jalla nii muntiqui tuncapan wilta tsjii watquiz pookča, nižaza tuncapan frutchizza. Zapa juizquiz fruta pookča. Nižaza nii munti chjañinacaqui watjanacchiz zoñinaca chjetinzjapača.

³ Nižaza nii wajtquiz kamñinacaqui ana iya casticz cheraquiča. Yooz Jiliriz mantiz julzmi, Jesucristuž mantiz julzmi nii wajtquiztača. Ninacž sirwiñinacaqui nii pucultizquiz rispitaquiča.

⁴ Nižaza Yooz wajtchiz zoñinacaqui Yooz cheraquiča. Nižaza Yooz tjuuqui nii zoñinacž ayguiz cjiřtaž cjequiča.

⁵ Nii wajtquiz ween ana želaquiča. Nižaza anaž sir kjanami, anaž lampar kjanami, anaž tjuñ kjanami pecasača. Yooz Jiliripachaž ninacžtajapa kjana cjequiča. Nižaza Yoozqui nii wajtquiz kamñinacaqui watay wataž zuma mantaquiča.

JESUCRISTUZ TJONZ TJUÑI WAJILLACHA

⁶ Jalla nekztanaqui nii anjilaqui wejtquiz cjichiča:

—Tii chiita takunacaqui werarača, zuma ligitumapanča. Tuquitan Yooz Jiliriqui niiz puntu parliñinacžquiz chiikatchiča. Jalla nii Yoozpachaqui niiz anjila cuchanžquichiča, niiz sirwiñinacžquiz tjeezjapa, čhjulut wajilla wataquiča, jalla nii.

⁷ Jesucristuqui wajillaj tjonla.

Jakziltat tii liwruquiz cjiřta Yooz taku catokačhaja, jalla niiqui cuntintuž cjequiča.

⁸ Wejr Juanqui jalla tinaca cherchinča, nižaza nonzinča. Jalla nii nonžcu, cheržcu, nii wejtquiz tjeezñi anjilž yujcquiz quillzinča, nižquiz rispitzjapa.

⁹ Jalla nekztanaqui nii anjilaqui wejtquiz chiižinčiča, tuž cjan:

—Ana nižta paa. Wejrqui Yoozquin zakal sirwuča, am irata, nižaza Yooz parti parliñi jilanacaž irata, nižaza tii liwruquiz cjiřta Yooz taku catokñinacaž irata. Jalla nižtiquiztan Yoozquinkaz rispita.

¹⁰ Nekztanaqui wejtquin cjichizakazza:

—Tii liwruquiz cjiřta Yooz taku ana chjožzaka joojoowa. Wajillaž tii taku cumplis tjuñi žcatžinžquiča.

¹¹ Jalla nii timpu tjonan, jakziltat anazuma paacan žejlčhaja, jalla niiqui anazuma kaj paala. Nižaza jakziltat anazuma kuzziz žejlčhaja, jalla niiqui anazuma kuzziz kaj kamla. Nižaza jakziltat zuma kamañchiz žejlčhaja, jalla niiqui zuma kamañchiz kaj cjila. Nižaza jakziltat Yoozquinkaz kuzziz žejlčhaja, jalla niiqui Yoozquinkaz kuzziz kaj cjila.

Nekztan tsjii joraqui cjichiča:

¹² —Nužupan wejrqui wajillal tjonacha. Jalla nuž tjoncan premiuchiz tjonacha. Zapa maynižquiz tjaa-ača, ninacaž kamtiquiztan jama.

¹³ Wejrčha primirquiztanpacha wiricama, nižaza wejrtčha kalltiñtqui, nižaza žerzniñtqui, jaknužt tsjii litra “A” quiztan kalltičhaja, nižaza “Z” quin žerzaja, jalla nižta.

¹⁴ Jakziltat persun ujnacquiztan pertuntažlaja, jalla ninacaqui limpu ajunta zquitchiz-takazza. Jalla nii pertunta zoñinacakaz cuntintuž cjequiča. Nižaza žeti tjaañi muntiz frutunacquiztan luzasača. Nižaza ew wajt zanquiztan luzasača.

¹⁵ Pero wajt zancu jalla tižta zoñinacaž eclaquiča: tsjii kjutñi kuz tjaañi zoñinaca, yat'irinaca, adulteriuquiz ojklayñinaca, zoñi conñinaca, žoñiž paata yooznacžquin rispitiñinaca, nižaza tjapa incallñinaca, nižaza tjapa toscar taku pecñinaca. Jalla nii anazuma zoñinacaž wajt zancu eclaquiča.

¹⁶ —Wejr Jesucristutča. Wejt anjila cuchanžquichinča, tjapa icliz zoñinacžquiz tii takunaca ticlarzjapa. Wejtquiztan David jiliriqui tjoninča. Nižaza Davidž majchmaatinacžquiztan wejrqui tjoninča. Wejrtčha weenzlak kjantat llijñi warawaražtakaz.

¹⁷ Espiritu Santuqui Jesucristužquiz kuzziz zoñinacžtan “Jesucristuqui tjonla” cjiča.

Nižaza jakziltat tii chiita taku nonznačhaja, jalla niizakaz “Jesucristuqui tjonla” cjila.

Jakziltat kjaztakaz Yooz zuma kamaña ancha pecčhaja, picha, Yoozquiztan zuma kamaña tanzjapa. Nužullakaz tanznasacha. Zuma žeti tjaañi kjaztakazza nii zuma kamañaqui.

¹⁸ Jakziltat tii liwruquiz cjiřta Yooz taku nonžaja, jalla nižquiz chiižinžcuča, tuž cjan: Jakziltat tii cjiřta Yooz taku yapačhaja, jalla ninacžquizi tii liwruquiz cjiřta anawalinacaž wataquiča.

¹⁹ Nižaza jakziltat tii liwruquiz cjjrta Yooz taku t'upznačhaja, jalla niž tjuu Yooz liwruquiztan jurtaž cjequičha; nižaza zuma Yooz wajtquiz anaž luzasačha; nižaza tii liwruquiz cjjrta zumanaca ana nižtajapa cjequičha.

²⁰ Jalla tii takunaca ticlarñiqui tuž cjičha:

—Ultimupan wejrqi wajillal tjonacha.

Wejrzakaz cjiwčha:

—Jalla nužoj cjila. Amén. Jesucristo Jiliri, jalla nuž tjona.

²¹ Učhum Jesucristo Jiliriqui tjapa ančhucaquiz zumaj cjiskatla. Nužoj cjila. Amén.